

Digitized by the Internet Archive  
in 2011 with funding from  
University of Toronto









SANCTI  
THOMAE AQUINATIS  
OPERA OMNIA  
TOMUS XVII.






SANCTI  
THOMAE  
AQUINATIS  
DOCTORIS ANGELICI  
ORDINIS PRAEDICATORUM  
OPERA OMNIA

AD FIDEM OPTIMARUM EDITIONUM

ACCURATE RECOGNITA

TOMUS XVII.



PARMAE  
TYPIS PETRI FIACCADORI

MDCCLXIV



DEC 2 1975



**SANCTI THOMAE**

**AQUINATIS**

**OPUSCULA THEOLOGICA ET PHILOSOPHICA**

**VOLUMEN SECUNDUM**





SANCTI  
THOMAE AQUINATIS

DOCTORIS ANGELICI

ORDINIS PRAEDICATORUM

OPUSCULA THEOLOGICA ET PHILOSOPHICA

TAM CERTA QUAM DUBIA

ADJECTIS BREVIBUS ADNOTATIONIBUS

VOLUMEN SECUNDUM

COMPLECTENS

OPUSCULA DUO ET TRIGINTA



PARMAE

TYPIS PETRI FIACCADORI

MDCCCLXV



# ADMONITIO TYPOGRAPHI

---

Inter Opuscula Praeceptorum Angelici D. Thomae tributa ac sub ejus nomine exarata, complura reperiri falso ipsi adscripta, nemo eruditorum est qui ambigat. Quod peculiari ratione de contentis in hoc volumine fas est asserere: cum eo de numero demptis quatuor, in recensione mea LX. LXI. LXII. ac LXIII. signatis, subque titulis « De emptione et venditione ad tempus, — Epistola exhortatoria ad quemdam etc. — In librum Boetii de hebdomadibus, — In librum Boetii de Trinitate expositio » his, inquam dumtaxat exceptis, cetera omnia tamquam supposititia, doctorum quidem virorum judicio habeantur. Etsi enim summo conamine Clariss. Vir P. Hyacinthus De-Ferrari O. P. Casanatensis Bibliothecae Praefectus duo a se detecta Opuscula sub appellationibus « De adventu et statu et vita Antichristi, — De praeambulis ad iudicium et de ipso iudicio et ipsum concomitantibus » ac Romae primum publici juris effecta, postremo loco in Collectione mea relata, sub numeris LXVIII. et LXIX., contenderit genuinum S. Doctoris fetum esse, non quidem ita ut ipse conscripserit, sed ore tenus ab eo prolata alius quispiam exceperit; in oppositam profecto sententiam Criticae leges nos abire jubent: cum plura quae ibi traduntur, de re philosophica praesertim, non modo Thomisticam doctrinam minime redoleant; verum etiam iis adversantia reperiantur, quae S. Thomas ubique et constantissime retinuit. Ut nonnulla indigitem, nunquam Doctor Angelicus in ea sententia fuit, ut humanae menti notiones aliquas non ex phantasmatibus enatas tribueret: quinimmo ubicumque eam quaestionem pertractavit, Aristotelicae doctrinae « nihil sine phantasmate intelligit anima » presse adhaesit. Atqui Opusculorum auctor, justitiae et prudentiae notiones, aliasque id genus, non ope phantasmatum, sed aliunde haberi disertis verbis affirmat. Quatuor vires interiores, non amplius, sensum communem, phantasiam, aestimativam, me-

moriā Aquinas noster in Summa Theologica admittit, idemque alibi saepe inculcat: cum Opusculorum Conscriptor quinarium numerum probet. Intellectum materialem ab agente et possibili distinctum, ab Auctore isto assertum, S. Thomas, imo reliqui Scholastici fere omnes, uno ore exhibent. Quod sequitur, non ad philosophicum penu, sed potius ad sacram Eruditionem spectat: estque adeo palmaris lapsus, ut vel ipse Clariss. Editor Casanatensis interpolationem aliquam imperiti amanuensis hoc loco suspicari coactus sit. Verum, quin potius integrum opus<sup>o</sup> nothum atque suppositum arbitremur? *Alleluja* vocem hebraicam esse S. D. optime noverat, idque in IV. Sentent. Distinct. VIII. Art. III. ad expositionem Textus expresse tradit: contra Auctor ille veluti graecam habet; quodque magis mirere, Ven. Bedam in adiutorium sui erroris assumit: qui tamen nihil simile habet, imo hebraicam originem fatetur in Commentario ad Psalm. 97, ipso adnotante Viro doctissimo ex cuius Elucidationibus has excerptimus citationes. Universae si conferantur, opinionem ejusdem si non omnino tollere, saltem maxime infirmare videntur. Quae reverenter a nobis proposita dubia, pro ea qua pollet, humanitate ut aequi bonique faciat, precamur.

Interim proximo volumine Angelicam explanationem in Aristotelis Opera, multis abhinc annis non amplius excusam, adeoque perraram effectam, aggressurus, quid superest nisi ut a te, benigne Lector, seni proxime defecturo et oculis fere capto ne desis, efflagitem? Inter tot publicas privatasque aerumnas illud certe non minimum est solatium ad aeterna properanti, quod labores meos hoc in opere susceptos non omnino irritos fore confidam: nam etsi divinae sapientiae elucidatoribus quibus aeterna vita repromissa est, meipsum annumerare non audeam, strenue tamen adlaboravi, ut praeclarissimum Ecclesiae decus in cuius scriptis tantopere ea sapientia elucet, in omnium manibus versaretur: ac ceptum semel propositum, nullis fractus impedimentis, ad extremum usque vitae spatium prosecutus sum. Vale.

Parmae ex mea typographica officina Kal. Aprilis MDCCCLXV.



# OPUSCULUM XXXVIII.

## DE NATURA ACCIDENTIS

(EDIT. ROM. XLI.)

Quoniam omnis cognitio humana a sensu incipit, sensus autem propria objecta sunt accidentia: ideo et accidentia magnam partem conferunt ad cognoscendum quod quid est, ut dicitur 1 de Anima. De accidente igitur et ejus origine aliquid breviter dicemus, quo facilius intellectus in quidditatem rei ducatur. Sciendum igitur est, quod accidens dicitur dupliciter: naturaliter scilicet, et logice: naturaliter sicut accidens dividitur contra substantiam, et hoc continet novem genera accidentium; logice vero dicitur accidens unum de quinque universalibus, de quibus loquitur Porphyrius. Ideo primo modo dictum sequitur naturam rei; accidens vero secundo modo dictum sequitur operationem intellectus, qui facit universalitatem in rebus, ut dicit Commentator 1 de Anima. Cum autem natura rei praecedat actum intellectus, ideo primo est de accidente primo modo dicto agendum. Sciendum est igitur quod ens non dicitur de accidente hoc nisi mediante substantia, de qua per prius dicitur: haec enim est natura omnis analogi, quod illud de quo primo dicitur, erit in ratione omnium quae sunt post; sicut sanum, quod prius dicitur de animali quam de urina vel medicina. Et ideo sanitas animalis cadit in definitione utriusque sanitatis: urina enim dicitur sana, in quantum est signum sanitatis in animali; et similiter medicina, quia est causa sanitatis animalis: per quem modum cum ens dicatur per prius de substantia quam de accidente; ideo ratio entis in substantia necessario cadit in definitione entis in accidente: dicitur enim quantitas ens, quia est mensura per se entis, idest substantiae: et qualitas quia est dispositio per se entis, dicitur ens, et sic universaliter de aliis. Et quia esse est actus entis, hoc autem verbum « inesse » est designans inhaerentiam accidentis; ideo inesse rei perfectae est esse accidentis, quod extraneum a rei natura esse necesse est: non enim significatur per hoc inesse, quod accidentis esse sit in ipso esse substantiae, cum esse sit formalissimum omni rei. Et ideo esse solum per se existentibus convenit, sed natura accidentis est inesse, sive inhaerere ipsi rei. Et hoc quidem manifestum est, quia quaedam accidentia sunt quibus tantum hoc convenit, scilicet inesse rei, secundum suum esse quod in hoc solum consistit: verumtamen eorum subjectum proprium non est esse substantiale ipsius rei, sed accidens aliquod, sicut

quantitas est subjectum qualitatis. Constat igitur quod esse qualitatis est inesse quantitati: hoc etiam reperitur sine subjecto substantiae, ut in sacramento altaris. Quantitas autem in rebus naturae est primum et proximum accidens substantiae naturalis, cum tamen sit extraneum ab ipsa natura rei, cum non sit de constitutione ipsius substantiae, sicut sunt sua naturalia principia, licet non sit mensura extranea, sicut sunt locus et tempus, sed intranea, et tantum una ejusdem rei: quod non est verum de loco, cum una res multa loca mutet. Nec erit ut in subjecto in ipso esse rei quod est maxime intimum rei, sed in ipsa re cujus esse est actus: hoc enim esse est substantiale, non accidentale, cujusmodi est esse quo designatur ens esse secundo modo, et non primo, ut dicitur 5 Metaph. Et ideo hoc esse formalius se habet ad rem constituendam in genere entis, quam ipsa forma rei, quae hoc ipsum esse dat, vel materia cui datur, ex quibus compositum resultat, cujus est hoc esse ut entis. Intimius (1) ergo ad rem ipsam quae est ens inter omnia est ipsum esse ejus, et post ipsum ipsa forma rei qua res habet ipsum esse. Et ultimo ipsa materia: quae licet sit fundamentum in re, inter omnia ab ipso tamen esse rei magis distat. Cui propinquissimum est ipsa res, ut cujus est; cum per rem insit et formae et materiae: nisi in homine, ubi esse formae, communicatur toti, et illud esse est formae ut a qua est, quia ipsa est principium ipsius esse, et ultimo est ipsius materiae ut ejus in quo recipitur. Materia igitur rei cujus est esse, plus a re distat quam ipsa forma a qua est esse: et ideo materia non est ens de sua natura, sed per ipsum compositum, vel per ipsam formam. Cum igitur esse accidentis et omne accidens a principiis rei extraneum sit et alterius naturae; primum inter omnia accidentia, scilicet quantitas, materiam quae a re maxime distat, sequetur, et reliqua ipsa mediate: licet quaedam aliorum naturam formae magis sequi videantur, sicut sunt qualitates, in quantum sunt media ad aliquas actiones: omnis enim actio rei formam sequitur, cum idem sit principium essendi et operandi, vel agendi. Quomodo igitur quantitas sequatur materiam, considerandum est a parte formarum quae natae sunt materiam informare, cum materia

(1) *Al.* intimus.

non sit scibilis nisi per analogiam ad formas, ut dicitur 1 Phys. Ad hujus igitur evidentiam sciendum est, quod in una et eadem materia natae sunt inesse quaedam formae generales et quaedam speciales, quarum natura est in materia facere quidquid formae generales natae sunt facere, et adhuc amplius, ut dicit Boetius. Forma autem nihil est nata facere, nisi id quod ad actum pertinet. Et ideo si quid fuerit sequens esse materiae in ordine ad aliquam formam distinctam in essentia sua ab alia forma, si hoc non pertineat ad esse actu ipsius materiae per ipsam formam, non fit id nisi per aliam formam certam: ut puta, in materia est potentia ad formam aliquam generalem, sicut ad formam corporeitatis, quae dat esse corpus, cum introducta fuerit materia ad illam transmutata, hoc idem facit forma perfectior, et adhuc amplius: hoc enim ad actum pertinet. Quod autem ad materiam refertur, non fiet ab utraque forma indifferenter: hoc enim esse actualitatis non est, nec ad esse pertinens, sed ad ipsam suam essentiam. In materia namque est potentia ad formam corporis, ut dictum est, et hoc facit in illa cum ei infuerit: hoc etiam facit forma perfectior: ut dictum est. Sed forma perfectior licet faciat idem quod facit forma generalis, non tamen eandem perficit potentiam quam perficeret forma generalior si inesset. Et hoc manifestum est: nam materia sub forma perfecta existens, est in potentia (1) ad talem formam: quod non contingeret, si ejus potentia ad illam formam esset perfecta per aliam formam. Id igitur quod potest fieri in materia per diversas formas, indifferenter se habet ad plures, et ad unam perfectam: hoc enim spectat ad ipsum constitutum ex materia et forma, cujus est esse actu. In quo cum non possint esse plura esse substantialia sub una forma quam sub aliqua alia forma, per unam formam sequuntur omnia quae in diversis per diversas formas contingunt. Proportiones vero quae pertinent ad istam materiam, ordinant eam ad diversas essentias formarum determinate: ita quod potentia sua quae est ad unam formam, non perficitur per aliam, licet alia fuerit abundans in virtute et perfectione ad faciendum quidquid aliae formae facere consueverunt, et amplius. Si qua igitur accidentia sunt consequentia materiam in ordine ad formam generalem, necessario consequuntur eam, vel secundum esse actu quod ab illa recipit, vel secundum perfectionem potentiae suae per illam formam solum, quae non potest per aliam formam perfici. Quando igitur talis forma sola perficit materiam, et facit esse actu in ea; tunc accidens quod materiam consequitur in ordine ad illam formam quae perficit potentiam materiae secundum certum respectum in essentia, aderit essentiae materiae perfectae, non nuda, sed secundum actum illius compositi. Et haec est materia, in qua accidens habet esse: est enim aliquod subjectum accidentis, secundum quod est actu. Ex quo facile est scire, quid sit accidens sequi materiam in ordine ad formam generalem, vel in ordine ad formam specialem: hoc enim non respicit esse actu accidentis, cum hoc indifferenter sit in materia ab una forma et a multis; sed respicit essentiam ejus respectu potentiae materiae, quae non potest perfici indifferenter, sed per certam formam essentiae illius materiae proportionatam.

(1) *Al.* impotentia.

Si enim referendum esset ad esse actu accidentis, nunquam distingueretur inter accidentia quae sequuntur materiam in ordine ad unam formam vel ad aliam formam: cum esse actu, et quidquid ad ipsum pertinet, indifferenter sit a quacunque forma perfectiore, ut dictum est. Unde cum aliqua forma perfecta in materia recipiatur, quae facit quidquid aliae formae facere solent de his quae ad actum pertinent, omnia accidentia secundum esse quod habent, sequuntur esse actu illius compositi, quod ab illa forma perfecta; esse vero accidentis ipsius non sequitur esse actu, sed sequitur materiam in ordine ad formam cujus solum est illam essentiam perficere secundum potentiam ad eam ordinatam. Et tale accidens est quantitas, et ea quae sunt secundum diversas proportionales in mixtis, ut albedo et nigredo. Et ideo talia accidentia, forma perfecta ablata et destructa specie, manent in essentiis suis aliud et aliud esse actu habentia. Non enim re perfecta pereunte perit ordo materiae ad formam generalem, sed potius per eam perficitur in esse actu. Et ideo in vivo et mortuo quantitas dimensiva manet, et similiter albedo et nigredo et vestigia vulnorum quae in quantitate recepta sunt. Nec est accidentium transitus propter hoc: manet enim origo et radix accidentis, eadem materia in ordine ad formam generalem remanente, licet sit transitus in esse actu. Inde est quod diversimode mutatur color in vivo et mortuo: quod non contingeret, nisi aliud et aliud esse actu haberet: quod est ratione diversorum actuorum existentium, quorum tamen alterum in esse non est mutatum, et illud sequebantur praedicta accidentia. Accidentia autem quae sequuntur materiam in ordine ad formam specialem, cujusmodi est figura, (in qualibet enim specie est certa figura. Et ideo inter omnia alia accidentia certa sola figura speciem rei cujuslibet demonstrat: alia est enim figura hominis, et alia equi) destructa specie rei, non possunt manere, nisi aequivoce. Manet tamen eadem figura individui hominis, sicut et quantitas in qua est: est enim figura qualitas in quantitate. Omnia enim accidentia individui sunt communia accidentia, sed speciei accidentia non: et ideo sequuntur materiam in ordine ad formam generalem, cum materia sit principium individuationis sub dimensionibus certis, quae sunt quaedam accidentia communia. Si qua autem accidentia sunt quae sequuntur formam, sicut qualitas, et quaedam quae sunt principia actionum et passionum, non manent forma destructa nisi aequivoce, cum non possint in easdem actiones amplius. Alia autem accidentia sunt sequentia formam, quae nec etiam similitudinem aliquam post se relinquunt, ut risibile, et alia hujusmodi.

## CAPUT II.

### *De accidente logico.*

Nunc restat de accidente secundo modo dicto agere. Sciendum est igitur quod omnia accidentia, universalis quaedam sunt sequentia res secundum esse quod habet in anima; quia intellectus est qui facit universalitatem in rebus, ut dicit Commentator 2 de Anima: et non solum operatur circa substantias sed etiam circa accidentia ipsa in rerum natura; utrisque enim intentionem tribuere potest. Et inde est quod illa universalis quae fiunt per

actionem animae circa substantias, specialia nomina habent, ut genus, species et differentia: et haec omnia sunt designativa ipsarum accidentalium intentionum. Sed haec non sic circa substantias fieri dicuntur quasi in accidentibus locum non habeant; cum et in eis sint genus, differentia et species: sed quia non subest res in natura, cui ratio generis conveniat in accidentibus per modum aptum generi et speciei ut sic (1), cum nihil sit in accidentibus per se subsistens. Similiter intellectus facit accidens ut per se subsistens, cum cum (2) nominat nomine abstracto; et sic sibi rationem generis et speciei tribuit. Cum autem circa accidentia operatur specialiter non eis tribuendo quod substantiis tribuit,

(1) *scilicet* generi et speciei, sic cum nihil etc.

(2) *Lege* illud.

sed alias intentiones quae substantiis non conveniunt, nomina specialia non ponit, sed per nomina rerum rationem universalis exprimit. Et ideo duo universalialia, proprium scilicet et accidens, quorum utrumque verum accidens est in rerum natura, nomina propria propter intentionem universalis non mutant: sicut homo est nomen rei naturae humanae, et nomen speciei, sed aequivoce: ita proprium et accidens sunt nomina generalia quorundam accidentium, et praeter hoc sunt universalium nomina. Et hoc certum est aequivoce contingere: non enim si proprium est universale, et risibile est proprium, risibile erit universale: variatur enim medium secundum aequivocationem, sicut cum arguitur: Socrates est species, quia est homo, et de homine species praedicatur. Et haec de natura accidentis sufficiant.



# OPUSCULUM XXXIX.

## DE NATURA GENERIS

( EDIT. ROM. XLII. )

### CAPUT I.

#### *De ente.*

Quoniam omnis creatura Generis limitibus continetur, ne circa naturas rerum aliquis error causetur, de Genere et difficultatibus ipsum contingentibus aliquid, quo facilius scientiarum a se invicem diversarum ortus processusque discerni possit, dicere intendimus, initium sumentes ab illo ad quod intellectum omnem incipere et resolvere necesse est. Hoc autem dicimus ens: ens namque est objectum intellectus primum; cum nihil sciri possit nisi secundum quod est ens actu, ut dicitur 9 Metaph. Unde nec oppositum ejus intelligere potest intellectus, non ens scilicet, nisi fingendo ipsum ens aliquo modo: quod cum intellectus apprehendere nititur, efficitur ens rationis. De quo modo entis dicitur in 5 Metaph., quod ens uno modo dicitur, de quo possunt propositiones formari, etiam si essentiam non habeat. Ens igitur est cujus actus est esse, sicut viventis vivere. Sic enim se habent haec tria ad invicem, ens, esse et essentia, sicut vivens, vita et vivere. Vita enim est principium quo vivens vivit: et essentia est principium, quo ens est; nisi quod vita et vivere significant actum, vita in abstracto, vivere vero in concreto, sicut cursus et currere; unde non est vita sine vivere: essentia tamen non semper constituit esse. In ente autem sic accepto duplex analogia reperitur. Dicitur enim ens de Deo et creatura; sed per prius de Deo, et per posterius de creatura: licet verius sit Deum esse super omne ens, quam esse ens; sicut dicit Dionysius et Damascenus. Propter hanc tamen analogiam non sequitur ens esse prius utroque, Deo scilicet et creatura, sicut prius est ens substantia et accidente, de quibus analogice dicitur. Ad cujus evidentiam est sciendum, quod quando tota ratio analogi reperitur in altero de quibus praedicatur, sicut tota ratio entis absolute in Deo reperitur, tunc non erit praedicatum prius utroque, cum praedicatum non excedat subjectum. Cum vero tota ratio praedicati in neutro subjectorum est, necesse erit praedicatum prius esse et communius utroque subjecto; sicut tota ratio entis non salvatur in substantia quae est genus primum, cum ens divinum non includat. Ens autem

genus esse non potest, ut docetur in 2 Metaph. et in 5. Nulla enim differentia participat genus: quia genus sumitur a materia, differentia vero a forma: sicut rationale a natura intellectiva, animal vero a sensitiva. Forma autem non includitur in materia actu, sed in potentia tantum; similiter differentia non pertinet ad naturam generis, sed genus continet differentias potestate. Et ideo differentia non participat genus: quia cum dico rationale, significo aliquid quod habet rationem, nec est de intellectu rationalis quod sit animal. Illud autem quod participatur, est de intellectu participantis. Nulla autem differentia potest accipi, de cujus intellectu non sit ens: unde manifestum est, quod ens non potest habere differentias sicut genus habet. Et ideo ens genus non est, sed est de omnibus communiter praedicabile analogice: similiter dicendum est de aliis transcendentibus.

### CAPUT II.

#### *De transcendentibus.*

Sunt autem sex transcendentia: videlicet: ens, res, aliquid, unum, verum, bonum: quae re idem sunt, sed ratione distinguuntur. Sicut enim in demonstrationibus resolvere oportet omnes propositiones usque ad principia ipsa, ad quae necesse est stare rationem; ita in apprehensione praedictorum oportet stare ad ens, quod in quolibet cognito naturaliter cognoscitur, sicut et principium in omnibus propositionibus quae sunt post principia continetur. Unde oportet omnia alia aliquid addere supra ens, quod de intellectu entis non sit: nihil enim addere possunt, de cujus intellectu ens non sit. Dupliciter igitur contingit addere aliquid super aliquid. Aliquando namque illud cui fit additio, non est de intellectu ejus quod additur; sicut individuum addit supra rationem speciei materiam individualement, de cujus intellectu non est species ipsa: et talis additio est realis. De intellectu tamen constituti ex specie et illo addito, est species ipsa; sicut de intellectu Socratis est homo. Aliquando autem illud cui fit additio, est de intellectu ejus quod additur, sicut ens est de intellectu omnium; aliqua tamen addere dicuntur supra ens, quia aliquid important quod de ratione entis non est: et



talis additio non potest esse nisi rationis tantum, cum nullam rem importent quae non sit ens, licet aliquid dicant quod ens non dicit. Quod autem additum sit de intellectu ejus cui fit additio, non contingit: homo enim ponit super animal; et id quod ponit, non est de intellectu animalis; animal vero nihil ponit super hominem, quia quicquid animal dicit, homo dicit, et amplius. Supra ens igitur quod additur, ut dicit Avicenna, dicit esse aliquam specialem rationem entis, sicut substantia dicit specialem modum existendi, qui est per se esse. Oppositum autem necessario oportebit addere alium modum entis, sicut esse per aliud: unde quod sic addit supra ens, non potest esse in aequo cum ente. Et isto modo praedicamenta addunt supra ens, quae ad invicem dividuntur secundum specialem modum quem unumquodque supra ens addit. Si autem per additamentum ipsum non dicatur aliquis specialis modus entis habens in se aliquam oppositionem; quod se habet ex additione tali ad ens, in aequo erit cum ente. Hoc autem dupliciter contingit: uno modo quando additio fit super ens absolute; alio modo, quando fit additio ad ens comparatum ad aliquid quod habet convenientiam cum omni ente, cujusmodi est anima. Quando autem aliquid addit super ens absolute; aut accipitur affirmative, aut negative. Si affirmative; aut dicit ipsam rem habentem esse quod est actus entis; aut dicit unde hoc inest rei, et hoc est per prius re naturaliter. Non autem habet res aliunde quod sit, nisi per indivisionem: divisio enim facit rem non esse; et ideo eorum quae sunt, quaedam sunt indivisibilia actu et potentia, ut incorporalia: quaedam vero sunt indivisibilia actu, et divisibilia potentia, ut corporalia. Universaliter tamen unumquodque in quantum est, indivisum est. Unum autem significat indivisionem quae acquiparatur enti; et ideo unum idem est quod ens secundum rem, licet rationem quamdam addat super ens, per quam unumquodque habet quod sit ens. Omne enim quod est, ideo est, quia unum numero est, secundum Boetium. Sed cum divisio dicat privationem divisionis, unitas autem sit indivisio; necessario unitas dicit privationem divisionis. Et ideo manifestum est, quod unitas non importat privationem multitudinis: quia cum privatio sit posterior illo quod privatur; si unum privaret multitudinem, sequeretur quod esset posterius multitudinem: et cum habitus sit de definitione privationis, sequeretur quod unitas definiretur per multitudinem: quod est falsum, quia tunc foret circulus in definitione: nam multitudo definitur per unitatem: multitudo enim est aggregatio unitatum. Et ideo unum quod convertitur cum ente, non importat privationem divisionis entis quae est per quantitatem; quia ista divisio pertinet ad unum genus particulare entis, et non posset cadere in definitione unius, cum sit particularius quam ipsum unum quod definitur: sed dicit privationem formalis divisionis, quae est per opposita, ejus radix prima est affirmatio et negatio: illa enim sic dividuntur, quod unum non est aliud. In intellectu igitur primo cadit ens: secundo divisio: tertio unum quod divisionem privat: et consequenter multitudo, in cujus definitione cadit unitas, sicut et in ratione unius cadit divisio. Et tamen divisa praedicto modo rationem multitudinis habere non possunt, nisi unicuique divisorum ratio unitatis applicetur. Hoc est igitur quod unum addit

*S. Th. Opera omnia. V. 17.*

super ens; privationem scilicet divisionis, quae omne ens concomitatur. Si autem dicat ipsum quod habet esse manifestando in supposito illo unde est; sic res addit super ens, ut Avicenna dicit in *Metaph.* sua. Unaquaeque enim res habet certitudinem, qua est id quod est. Si autem accipiatur negative, sic « aliquid » addit super ens: aliquid namque idem est quod aliud quid, quod idem est quod non hoc: omne namque ens est aliquid, ita quod non nisi illud solum. Si autem illud quod additur super ens sequatur ens in comparatione ad animam, quae quodammodo est omnia (in anima enim est duplex potentia, intellectus scilicet et voluntas, quarum altera omnia cognoscere potest, altera autem amare), sic accipiuntur verum et bonum. Verum enim addit supra ens rationem cognoscibilis: unde verum importat ordinem quemdam entis ad intellectum, qui non importatur in nomine entis absolute dicti. Sed bonum addit rationem appetibilis: eo enim est ens bonum, quo est appetibile. Unde bonum importat ordinem entis ad appetitum, sicut verum ad intellectum; sed diversimode: quia motus intellectus est ad seipsum, motus autem appetitus est ad rem extra. Et ideo secundum Philosophum, bonum et malum sunt in rebus, sed verum et falsum in intellectu. Ens autem absolute dictum, super quod omnia ista addunt rationes certas, communissimum est in se. Et ideo plurimas divisiones habet, quarum aliquae trahunt ad naturam generis, de quibus principaliter intendimus agere. De hoc enim alias tractatum fecimus specialem, cujus sententiam pro parte recitabimus, suppletiones necessarias in certis locis inserendo.

### CAPUT III.

#### *De quadruplici divisione entis.*

Sciendum igitur est, quod in 5 *Metaph.*, dividitur ens quadropliciter. Prima enim divisio entis ibi posita est, quod ens uno modo dicitur secundum se, alio modo secundum accidens. Secunda vero divisio entis est, quod ens uno modo dicitur substantia, alio modo accidens: et haec est divisio entis per decem praedicamenta. Ex quo patet, quod haec divisio entis non est eadem cum prima, ubi dividitur ens in ens secundum se dictum, et secundum accidens. Harum autem differentia est: quia ens dicitur substantia vel accidens secundum absolutam entis considerationem, sicut albedo dicitur accidens, et homo substantia; sed in primo modo oportet accidens subjecto componi: unde secundum se, vel secundum accidens dicitur, quando aliquid praedicatur de aliquo secundum se, vel secundum accidens. Ens vero dividitur in substantiam et accidens, quia in natura sua est substantia vel accidens: ideo subdit Philosophus, quod ens secundum accidens dicitur dupliciter. Quando accidens praedicatur de subjecto, vel accidens de accidente, vel subjectum de accidente. Divisio autem entis in substantiam et accidens, est divisio entis per se dicti: illa enim per se sunt, quae continentur in figuris praedicationis, ut ibidem dicitur. Cum autem ens contrahi non possit, sicut genus contrahitur per differentiam, ut dictum est; oportet quod ens contrahatur ad praedicta per diversum modum praedicandi. Eorum autem quae praedicantur, quae-

dam significant quid, quaedam quantum, quaedam quale, et sic de ceteris; ideo oportet quod unicuique modo praedicandi esse idem significet: ut cum dicitur « homo est animal » esse significat substantiam; cum vero dicitur « homo est albus » esse significat qualitatem; et sic de aliis praedicamentis, de quorum ortu infra dicetur. Tertio modo dicitur ens, quod significat propositionem quam facit intellectus componens et dividens, cujus compositionis veritas est veritas rei per causam: eo enim quod res est vel non est, oratio dicitur vera vel falsa. Veritas autem propositionis significatur per hoc verbum « est »: quae comparatur ad existentiam rei sicut effectus ad suam causam: ex hoc namque quod aliquid in rerum natura est, sequitur veritas in propositione, quae illud significat quod ipsum verbum « est ». Sed quia illud quod in se est non ens, intellectus accipit ut ens, sicut negatio et privatio; ideo talia dicuntur esse, quando formatur propositio de eis per ipsam copulam « est ». Licet non respondeat esse a parte rei, eo quod talia essentias non habeant, quae sunt principia existendi. Et hoc ideo est, quia accidit rei quod de ea aliquid dicitur vere per intellectum; cum res non referatur ad scientiam, sicut e contrario. Quartus modus quo dividitur ens, est per actum et potentiam. In omnibus enim praedicamentis aliquid reperitur in actu, et aliquid in potentia; et ideo haec divisio entis est in sua communitate, cum reperitur in omni genere entis: sine qua nihil est in genere: et ideo Deus in genere non est, cum non sit in eo potentia et actus. Id enim in genere est, quod determinatum et limitatum est ad aliquem specialem modum entis: sed determinari est potentiae per actum: unde omne id in genere est, in quo est potentia et actus. Omne enim quod est in genere, natum est habere aliquid prius se, respectu cuius est in potentia necessario: quia in diversis actus necessario est prior potentia: in eodem vero potentia praecedit actum; et ubi reperitur potentia et actus, necessario erit ibi genus. Cum igitur in omnibus citra primum sit potentia et actus, omnia praeter ipsum erunt in genere. Ideo licet ens quod est subjectum Philosophiae primae, non sit genus, nec in genere, ut dictum est; tamen nobiliores partes entis, substantiae scilicet separatae, necessario erunt in genere. Et quia accidens est imperfecta pars entis, sed perfecta ratio entis in substantia reperitur; perfectior pars entis ad genus substantiae spectabit, de quo primo agendum est.

#### CAPUT IV.

##### *Quod Logicus et Metaphysicus circa omnia operantur differenter.*

Sciendum est ergo, quod sicut in 4 Metaph. dicitur, Logicus et Metaphysicus circa omnia operantur, differenter tamen. Sicut enim primi Philosophi est loqui de ente in communi, ita et Logici; aliter non esset circa omnia ejus consideratio, nisi haberet pro subjecto ens in communi. Cum enim unius scientiae sit unum subjectum, idem erit subjectum utriusque. Sed differunt: quia Philosophus procedit ex certis et demonstrabilibus, Logicus autem ex probabilibus: et hoc ideo est, quod ens dupliciter dicitur, scilicet naturae et rationis. Ens autem rationis proprie dicitur de illis intentionibus quas

ratio in rebus adinvenit; sicut est intentio generis et speciei, quae non inveniuntur in rerum natura, sed sequuntur actiones intellectus et rationis: et hujusmodi ens est subjectum Logicae; et illud ens aequiparatur enti naturae; quia nihil est in rerum natura, de quo ratio non negotietur. Inde etiam est quod circa idem dicuntur operari Metaphysicus et Logicus. Substantiae ergo separatae, sicut subsunt enti perfecto, substantiae scilicet naturae; ita et enti rationis, substantiae scilicet secundum logicam considerationem acceptae. Substantia autem, ut dictum est supra, addit super ens specialem modum essendi, qui est per se esse. Cui si addiderimus, in omne illud quod est genere habere potentiam et actum; potentia autem ad actum se non promovet, cum nihil se in esse perducatur; invenimus illud ad genus substantiae pertinere quod per se subsistit, habens tamen esse ab alio. Sed de hac potentia sumpserunt aliqui rationem ad docendum substantias separatas compositas ex materia et forma; dicentes genus substantiae ex materia et forma componi, et omnia quae ad ipsum pertinent: quod et Boetium super praedicamenta sentire dicunt, ubi dicit Aristotelem relictis extremis, materia scilicet et forma, agere de medio composito ex utroque, praedicamento scilicet substantiae. Sed cum ratio substantiae sit per se subsistere, ita quod sit in eo compositio potentiae et actus; non fuit intentio Boetii dicere, praedicamentum substantiae esse compositum ex materia et forma; sed ostendere, cum materia et forma non possint per se esse, quod non sunt in praedicamento substantiae ut species vel individuum; et ideo Philosophus omissis materia et forma, agit de composito quod est in substantia ut species et individuum. Et ideo licet in materialibus et in rebus inferioris ordinis, quod est in genere substantiae, sit compositum ex materia et forma; in substantiis tamen superioribus quae sunt in vertice rerum, nihil est de natura materiae: quod patet praecipue ex earum operatione, quae est intelligere. Et ratio hujus satis manifesta est: quia materia non recipit formam in quantum forma simpliciter, sed in quantum est haec forma: ideo si in aliquo composito ex materia et forma reciperetur forma aliqua, non reputaretur forma intelligibilis actu antequam per abstractionem intellectus fieret; quod non ponitur in substantiis separatis. Forma enim materialis non efficitur intelligibilis in actu, nisi prius reddatur intellectui proportionata; quod fit per abstractionem ejus in materia. Ex quo manifestum est intellectum esse sine materia: ex proportionem enim objecti ad potentiam, sciri potest natura potentiae. Non igitur propter materiam et formam erit potentia et actus in omni re quae est in genere, licet hoc inveniat in rebus inferioribus, ut dictum est. Cum autem omne quod est in genere ut completum existens, componatur ex genere et differentia; genus autem sumatur ab eo quod est in potentia: differentia vero a forma, sive ab actu: in substantiis vero separatis essentia est ut potentia, esse vero ut actus; sequi quibusdam videtur genus ejus sumi ab essentia, differentiam vero ab esse. Sed hoc nihil est: quia essentia est aliud ab esse Angeli: sed illud unde sumitur differentia non est aliud ab essentia rei constitutae per differentiam: sicut intellectus unde sumitur rationale non est extra essentiam hominis. Esse autem cujuslibet rei citra pri-

mum, accidens est, cum quidquid (1) sit de essentia rei cadat in ejus definitione, esse autem non pertinet ad definitionem rei, cum ens definiiri possit, et si esse non habeat. Ideo sup. 3 Metaph. dicit Commentator, quod haec propositio, Socrates est, est de accidentali praedicamento. Quod verum est secundum quod esse importat entitatem rei, non autem secundum quod importat ipsam rem existentem: sic enim ens et esse sunt substantialia. Unde manifestum est, quod differentia in Angelis non potest sumi ab esse eorum. Cum igitur in substantiis separatis non sit nisi essentia et esse, in eis ab essentia sumitur genus et differentia.

## CAPUT V.

Ad cujus evidentiam considerandum est, quod sicut Avicenna dicit, omne quod habet esse aliud a sua quidditate, est in genere, quia omne tale habet naturam determinatam per se, unde comprehendi potest per actum rationis cujus est intentiones formare generum et specierum; quod non fieret, nisi sibi aliquid responderet in natura rei: quia ejus esse non est aliud ab essentia, ideo in Deo hoc facere non potest intellectus (2): ideo substantiae separatae sunt in genere substantiae, quae est primum genus, cujus ratio est habere esse aliud a sua substantia seu quidditate, in se tamen et non in alio. Et ideo ex ipsa potentia essentiae cujuslibet rei indifferenter, quae est in praedicamento substantiae (quae potentia importatur, cum dicitur, habens esse aliud a sua essentia), sumitur ratio generis; sed a perfectione illius quidditatis per quam appropinquat ad esse actus, accipitur ratio differentiae. Sed alio modo est hoc in rebus materialibus, et alio modo in simplicibus. Potentialitas enim totius compositi in rebus materialibus est a materia (3); ideo ab ea sumitur genus; perfectio vero totius est a forma, ideo a forma sumitur differentia: per formam enim ipsum attingit esse actu. Ideo aliud et aliud in essentia est: unde sumitur ratio generis et ratio differentiae in compositis. Materia enim prout est materia respectu formae, est pars: et forma similiter est pars, comparata ad materiam; pars autem de toto non praedicatur: ideo genus et differentia non sumitur a materia et forma ad se invicem comparata, cum genus et differentia praedicentur de toto. Sed quia materia est materia totius, et non solum formae; et forma est forma totius, et non solum materiae; ideo nomen designans totum sumptum a forma totius, est differentia; et nomen designans totum sumptum ex utroque, est species. In separatis vero genus et differentia non sumitur a diversis partibus quidditatis ipsius, cujus aliquid sit potentialitas quaedam, et aliud perfectio; cum non sit in eis nisi una compositio tantum, essentiae scilicet et esse: sed utrumque fundatur super unum simplex et per essentiam indivisibile; cujus potentialitas attendi potest, quia non habet esse de se; et inde ratio generis accipitur. Sed haec eadem potentialitas essentiae in aliquibus minor est, quia magis prope actu primo et puro est natura sua constituta: quanto enim aliquid actu primo propinquius est, tanto minus potentialitatis habet. Et ideo quot sunt

gradus propinquitatis in eis, tot sunt differentiae specificae. Hos autem gradus solum illi noseunt, qui suam propinquitatem ad Deum, et elongationem a rebus compositis et corruptibilibus speculantur. Illa ergo essentia simplex supra naturam mobilium existens, est res generis metaphysici, nullam compositionem materiae et formae suscipiens; cujus ratio nobis occulta manet, cum nos lateat natura unde sumitur ratio generis et differentiae ejus. Sicut enim physica definitio homini est ex anima et carne et osse, ita cognoscenti illam naturam simplicem, manifesta est ratio essentiae suae, quae metaphysica definitio est dicenda, sicut hominis physica. Illae ergo substantiae simplices nullum genus subalternum habent: et ideo unica differentia sufficit earum perfectioni, quia non colligitur earum perfectio ex multis et diversis divisionibus generum, et conjunctionibus differentiarum: et tanto perfectior est earum natura, quanto plura unite et in uno simplici habet. Sicut enim in physicis res quaedam subsunt intentionibus generum et specierum, ut corpus et anima in homine, a quibus accipitur ratio generis et differentiae, et hoc nobis manifestum est; ita etiam res quaedam nobis occulta subest intentionibus quas anima format. Et inde est quod non formamus intentiones logicas in Angelis per aliquid conceptum a parte eorum; sed per id quod concipimus in rebus nobis notis, propter communitatem quam habent cum Angelis in hoc quod omnia sunt ab uno primo: et ideo formamus intentiones quae uniformiter istis et illis conveniunt. Universale enim dicitur dupliciter. Uno modo ipsa natura, cui intellectus propter aliquid in ~~ea~~ inventum intentionem attribuit; et sic universalis quae rerum naturas significant, praedicantur in quid: animal namque dicitur substantia illius de quo praedicatur, et similiter homo; et isto modo non est unum in multis; immo natura praedicatorum semper multiplicatur multiplicatis subjectis: quot enim sunt homines, tot sunt animalia. Alio modo dicitur universale natura illa sub intentione universalitatis sibi attributa: et sic propter uniformitatem rationis inventam in intentione quae fit propter remotionem a materialibus conditionibus et omni diversitate, est unum in multis: sic enim homines sunt unus homo et unum animal. In re igitur nihil est commune multis; quia quicquid est in re, est singulare uni soli communicabile; quod autem commune est, agitur per intellectum. Intellectus enim facit universalitatem in rebus, ut dicit Commentator sup. lib. de Anim. Potest igitur intellectus actionem suam extendere ad omne ens, quia ens rationis in aequo est cum ente naturae, ut dictum est. Unde cum de intellectu substantiae, quae est genus primum, non sit compositio materiae et formae, nec ejus oppositum; utrumque potest sibi accidere; sicut patet de substantiis separatis et compositis. Remanet ergo de intellectu generis substantiae per se esse, quod tamen differens est ab essentia ipsius generis; et hoc solum commune est utrique substantiae, mobili scilicet et immobili, seu immateriali: cum in omni re mobili necessario sit materia, ut dicitur in 2 Metaph. Et ideo haec ratio substantiae logica est. Nihil enim commune potest esse substantiae corruptibili et incorruptibili nisi nomine tenus, quae est logica consideratio, cum nomina sint notae intellectus, ut dicitur I Perihermenias.

(1) *Al.* quid.(2) *Legendum videtur:* ideo in Deo hoc facere non potest intellectus, quia ejus esse non est aliud ab essentia.(3) *Non, ut alias,* a forma.



## CAPUT VI.

*Quod substantiae separatae et materiales non conveniunt nisi in genere logico.*

Ex quibus manifestum est, quod substantiae separatae et materiales non conveniunt nisi in genere logico solum. Unde substantiae materiales nihil reale habent per quod dici possint substantiae, praeter id quod sunt corpora. Impossibile est enim firmam materiae uniri, quin sit corpus generis substantiae. Ad hoc enim, quod forma uniat materiae, in qua est aptitudo ad multas formas et diversas, oportet statim in materia partem et partem ponere. Sed non est pars et pars nisi per quantitatem, quae est proprium accidens corporali substantiae. Impossibile est igitur aliquas formas materiae uniri, quin sint corpus. Ex dictis igitur patet, genus metaphysicum substantiam esse realem non compositam ex materia et forma, sed simplicem naturam et nobis occultam, ad quam tamen consideratio logica attingit: ratione cujus aliquid commune est utrique, materiali scilicet et immateriali substantiae. Licet enim Metaphysici sit de omnibus agere sub ratione entis; praecipue tamen ad ipsum pertinet tractare de rebus separatis: tum quia perfectior ratio entis in eis salvatur, quam Metaphysicus quaerit: tum quia in particulari eorum natura occulta est, unde non potest de eis scientia particularis esse, sicut quae est de rebus particularibus, quarum quidditates apprehendimus; unde de entibus particularibus scientiae particulares sunt. Hoc autem non contingit in substantiis separatis; quia de eis, quod est quid, scire non possumus. Theologi tamen multa de eis per revelationem noverunt. Patet igitur natura primi generis, substantiae scilicet; quomodo ejus communitas tactum logice accipienda est: cum nulla sit realis convenientia inter separata et materialia. Sicut enim substantiae separatae non descendunt ad genus corporis, sed sunt substantiae primo perfectae, genus subalternum non habentes, ut dictum est; ita res materiales non ascendunt usque ad substantiam separatam: summum enim in eis est corpus, ultra quod rem aliquam non attingunt, quam non habeant per corpus: in ipsis namque est compositio materiae et formae, ad quae tamquam ad sua principia prima resolvuntur, nec ultra procedere habent. Ex materia autem et forma semper constituitur corpus, ut dictum est. Primum ergo genus materialium erit corpus; ultra quod nihil reale habent, sicut nec ultra sua prima principia. Poterunt tamen aliquid intentionale ultra corpus habere, quod non est corpus in quantum corpus est: alioquin solum corpus hoc haberet: et hoc est per se esse, quod non solum est corporis, sed etiam substantiae; ipsis tamen hoc competit quia corpora sunt. Per se autem esse, secundum quod tale est, non inest alicui per corpus; alioquin omne per se esse esset corporis, quod est falsum. Attingunt ergo materialia per naturam corporis aliquid quod ratione corpus excedit; et hoc est eis logice convenire cum substantiis separatis. Si enim nulla substantia separata esset, primum praedicatum foret corpus: alioquin falso divideretur substantia per corporeum et incorporeum, quae tamen sunt differentiae substantiae immutabiles; nihilominus tamen posset poni substantia, quae divideretur contra accidens, licet substantia separata non esset.

## CAPUT VII.

Ad horum evidentiam considerandum est, quod cum genus de toto praedicetur, ut animal de homine; ratio generis non sumitur a materia prout est pars, ut dictum est supra; et eodem modo de differentia dicendum est, cum et ipsa de toto praedicetur. Unde sciendum est, quod aliquando est unitas a parte naturae subtractae intentioni universalis praeter istam quam facit intellectus, aliquando autem non, natura autem non (1). Natura enim quae est subtracta intentioni universalitatis, sicut natura animalis, tripliciter considerari potest. Uno modo absolute et secundum se; et sic nihil sibi convenit nisi quod est de intellectu ejus: ut puta. de intellectu animalis est corpus animatum sensibile: nihil enim aliud sibi attribui potest secundum hanc considerationem, nisi falso, ut album vel musicum, vel aliquid hujusmodi. Alio modo potest considerari haec natura prout est recepta in aliquo singulari sui generis; et adhuc inest sibi ratio, quae de intellectu ejus est absolute: animal enim, quod est Socrates, est substantia animata sensibilis. Sed si recipiatur in pluribus individuis, necessario et natura ipsa, et intellectus suus multiplicabitur: Socrates enim et Plato sunt duo animalia, et duae substantiae animatae sensibiles. Unde, licet in natura animalis non sit unitas vel pluralitas secundum quod est nata recipi in pluribus inferioribus, cum possit in uno recipi et in pluribus; est tamen in ipsa natura absolute accepta, secundum quod non est in inferioribus considerata, quaedam unitas; cum definitio ejus sit una, et nomen suum, ut patet. Tertio modo potest considerari haec natura prout est in anima. Et quia omne quod est in anima est abstractum ab omni divisione et diversitate materiali; attribuitur isti naturae, ratione uniformitatis quam habet ad omnia, ratio universalis, quod est unum in multis, unde sic non multiplicatur haec natura in suis inferioribus imo plures homines sunt unus homo: et unum animal, participando genus et speciem: hoc enim modo convenit talibus naturis secundum rationem generis et speciei. In istis igitur est duplex unitas. Una scilicet in natura absoluta, quae natura convenit singulis suppositis; sed haec unitas non descendit ab ipsa natura ad sua supposita: sicut de natura animalis absoluta est substantia animata sensibilis, ut dictum est; sed hoc non dicit totam naturam ejus absolutam, sed aliquid ejus. In natura enim sua absoluta est, quod possit substerni intentioni universalitatis, quia solum natura absoluta hoc potest, et etiam omnis natura absoluta. Comprehendendo ergo totam naturam ejus absolute, dicendo naturam animalis absolutam esse substantiam animatam sensibilem aptam natae substerni intentioni universalitatis: non est de intellectu ejus unitas aliqua, nec etiam pluralitas; quia utrumque potest sibi accidere. Alia est autem unitas naturae, quam habet ab intellectu, in quam omnia supposita conveniunt: ideo unitas quam facit intellectus in tali natura, fundatur super unitatem in re inventam, quae una est illa unitate. In substantia autem quae est genus primum, non est recipere aliquam unitatem a parte ipsius rei: unde non est aliqua definitio ejus, per quam illa unitas ostendatur. Si autem dicatur, quod ratio substantiae est esse per

(1) Fortasse redundunt haec verba, natura autem non.



se et non per aliud, et hoc in omnibus substantiis reperitur: hoc etiam non valet, quia hoc competit sibi secundum quod dividitur contra accidens, et non secundum quod est genus: de quo posterius plenius agetur. Remanet igitur in substantia sola unitas quam facit intellectus, et nulla alia: ejus actio fundatur non super aliquam rem quocumque modo unam, sed super naturas penitus diversas, quae tamen participatione generis erunt una substantia. Corporalia enim et incorporalia plus differunt quam secundum aliquod genus reale: et hoc ideo est, quia non habent aliquam rem unam eis communem nisi (1) secundum rationem tantum. Si autem diceretur substantia quae est genus primum componi ex materia et forma, et hoc esse commune eis, sequeretur quod substantia non esset genus primum: omne enim compositum ex materia et forma habet unde sumitur in eo ratio generis, scilicet materiam, et ratio differentiae, scilicet formam: unde esset aliquod genus prius substantia: et ideo implicatio contradictionis est dicere genus primum componi ex materia et forma. Inde est quod si non esset aliqua substantia separata, corpus foret genus primum, ut dictum est: sed tunc ratio corporis logice tantum acciperetur, nec foret in corpore compositio materiae et formae secundum quod esset genus: si enim omnia genera essent unius rationis, ita scilicet quod in quolibet esset compositio materiae et formae, non foret status in genere. Ratio igitur generis convenit substantiae per actum intellectus tantum, qui non fundatur super rem aliquam unam communem utrique naturae, sicut reperitur natura animalis una quodammodo, cui additur unitas universalitatis quam facit intellectus: unde Philosophus in 7 Metaph. docens, quod ideae non sunt substantiae quaedam universales, sic arguit: Universale semper habet dici de subjecto aliquo. Sed substantia non dicitur de aliquo subjecto. Igitur non est aliqua substantia, quae idea dici possit. In praedicamentis vero docet, ut videtur, oppositum: quia secundum eum ibi, non est contra rationem substantiae de subjecto praedicari, licet sit contra rationem substantiae in subjecto esse. Sed advertendum est, quod secundum logicam considerationem agit in praedicamentis: Logicus enim considerat aliqua secundum quod sumuntur in ratione: et ideo considerat substantiam secundum quod per actionem intellectus subest rationi universalitatis: et ideo quantum ad praedicationem quae actum rationis dicit, praedicatur de subjecto, id est de re extra animam. Sed Philosophus primus considerat de rebus prout sunt vere entia: et ideo apud Philosophum non est differentia inter dici de subjecto, et esse in subjecto. Ex quo patet, quod ex sola actione intellectus est, quod substantia praedicatur: quod habet in quantum est genus, et non ex aliqua communitate reali, ut dictum est.

## CAPUT VIII.

Ex dictis igitur manifestum est nullam formam, quae realiter sit substantia, praecedere in re corporea, per quam res est corpus. Cum autem formatio generis et speciei, quae est actio intellectus, non sit fictitia, sicut est quando fingit non entia, ut montem aureum, cui nihil respondet extra in re, sed ex conceptione montis et auri format, scilicet montem aureum; necessario in re ipsa corpo-

(1) *Al. deest nisi.*

rea aliquid erit, super quod intellectus formet utrumque genus, substantiam scilicet et corpus, quae inter se solum ordinem prioritatis et posterioritatis ab intellectu conceptum habent, a quo habent rationem generum. Non quod in natura rerum aliquid sit ad aliud ordinabile, cum in una re non sit prius et posterius respectu sui ipsius, nisi forte in illis in quibus essentia est in successione, quod non potest substantiae convenire: unde in ipsa non est ordo, ut dicitur 7 Metaph., licet ordo sit in differentiis, quae ponuntur in definitione substantiae. Tota namque constituitur definitio ex ultima differentia. Quod ex hoc patet, quia si aliqua alia differentia repliatur, super illam, erit nugatio, ut dicatur, homo est animal bipes, habens pedes, nugatio est: sub bipede enim includitur habens pedes, sicut ternarius in senario. Si autem dicatur habens pedes, et addatur, duos, non est nugatio. Hunc autem ordinem inter differentias sola ratio facit. Quod ex processu Philosophi ibid. manifestum est. Dicit enim quod vera definitio investigans substantiam rei, est ex genere primo et differentiis, quae postea non habent dividi per differentias per accidens. Ratio autem quare genus primum debet poni in definitione, est, quia genera intermedia nihil aliud sunt nisi genus primum cum differentiis additis. Ut si in definitione hominis ponatur animal, quod est intermedium genus: manifestum est quod nihil aliud est animal, quam substantia, quae est genus primum, cum his differentiis, quae sunt animatum sensibile. Non solum autem hoc genus dividitur per differentias, sed differentiae illae iterum per alias differentias dividuntur: sed hoc fieri necesse est per differentias per se, et non per accidens: puta, animal dividitur per habens pedes, et non habens pedes. Habens autem pedes non dividitur per alatum et non alatum, quia accidit quod dividatur sic: sed per se dividitur per habens pedes duos, vel non habens pedes duos: et sic necesse est differentias dividi, quia illae sunt remotiores a genere quam primae. Alatum autem et non alatum non plus distant ab animali quam habens pedes et non habens pedes. Quomodo autem unum fiat ex genere et his differentiis, docet per hoc quod genus non est praeter suas species: non enim est animal, quod non sit homo vel equus. Si enim invenirem aliquid praeter speciem, quod dicatur genus; illud non erit genus, sed materia. Licet namque idem secundum nomen conveniat generi et materiae, non tamen erit idem secundum rationem. Materia enim cum sit pars integralis rei, non praedicatur de re: genus vero cum praedicatur de re, oportet quod totum significet. Corpus namque quod est materia hominis, habet de intellectu suo tres dimensiones cum aptitudine ad formam hominis supervenientem, sine eo quod ipsam contineat implicite vel explicite. Corpus autem ut est genus, est substantia completa ultima forma, indeterminate tamen: ejus species erunt substantiae perfectae per easdem formas determinatas, ut per formam hominis aut bovis. Sicut enim quando privatio est innominata, aliquid dicitur fieri ex simpliciter materia, ut si figura fiat ex ligno, constat quod fit ex infigurato: ita cum forma est sine nomine, simpliciter nominatur ex materia: ideo dicitur fieri ex materia et forma. Et hoc ideo est, quia hoc non contingit ubi est aliqua forma determinata, sed ubi est forma com-

munis. Compositum namque ex materia et forma commune est genus. Unde ex hoc est quod animal quod est genus, non est praeter speciem aliquam, quia formae specierum non sunt aliae a formis generis realiter, sed tantum differentia communis et proprii sive determinati: et ideo differentia non additur generi sicut diversa essentia a genere, sed quasi aliquid in genere contentum implicite. Genus ergo licet esse non possit sine specie, intelligi tamen posset sine specie, et dividi per differentias communiores, et pluribus convenientes quod uni speciei, inter quas certus ordo reperitur: aliter non referret quae illarum ante, et quae post poneretur: et ideo ipsum sola ratio facit, cui unum reale respondet, tamen multiplex ratione.

#### CAPUT IX.

Nunc igitur superest ostendere, quomodo genus implicite contineat ea quae sunt in eo. Sciendum est igitur, quod genus continet differentias potestate. Potentia autem principium indistinctionis est, sicut per oppositum actus primo distinguit. Illud igitur pro generalissimo sumendum est, quod est primum principium indistinctionis aliorum. Ut homo et equus, licet indistincta sint in animali, animal tamen non est primum principium indistinctionis eorum, nec etiam corpus. Statur autem ad substantiam: nam etsi in ente non distinguantur, ens tamen non est generalissimum, quia non praedicatur de aliquibus univoce, quod requiritur ad naturam generis. Ista autem indistinctio aliter est in substantia, et aliter in aliis generibus quae sunt post: in aliis enim generibus reperitur una natura aliqua, quae subest intentioni universalitatis, ut dictum est: ratione enim cum uniformitate quae est a ratione, ipsum genus uniformiter se habet ad omnia quae sibi subsunt, quod est implicite illa continere. Sed in substantia non est una res subjecta intentioni, sed intellectus ex diversis rebus colligit intentionem quae utrique naturae ab intellectu applicatur. Unde in substantia solum est convenientia in intentione, in qua est uniformitas ad omnia quae sunt in genere substantiae, per quod substantia dicitur implicite omnia continere.

Ex dictis igitur satis potest accipi ratio, quare et quomodo genus de contentis sub eo praedicatur. Non enim est praedicatio generis de specie denominativa, sicut est praedicatio materiae de re materiali, et accidentis de subjecto. Eadem namque res penitus est animal, quod praedicatur de homine, et homo. Sed album quod praedicatur de homine, non est penitus eadem res cum homine, cum unum sit accidens, aliud vero substantia. Cum igitur genus de specie praedicatur, et ratione uniformitatis communiter se habeat ad omnia contenta sub eo, necesse erit ipsum praedicari univoce, quod est praedicari secundum nomen et secundum rationem. Non enim est alia ratio animalis quando praedicatur de homine, et alia quando praedicatur de equo: immo una et eadem est ratio per quam de utroque praedicatur, sicut et nomen idem est. Et hoc facile est videre, si consideretur natura animalis, vel alterius superioris quod praedicatur de inferioribus suis, quod natura absoluta praedicabilis est, vel recipit unitatem, vel pluralitatem a subjectis. Naturam igitur animalis praedicari, est, quod dicat totum respectu illius de quo praedicatur, et non partem, quia pars non praedicatur de toto.

Non autem accipitur ut totum integrale, quia tale non praedicatur nisi de omnibus partibus simul sumptis: sed ut totum universale quod praedicatur de qualibet parte. Sic igitur accepto animali, nihil potest sibi attribui, nisi quod per se est de ratione ejus, ut substantia animata sensibilis. Quicquid autem aliud sibi attribuitur, per accidens attribuitur, ut est unum vel plura: si enim unum esset de intellectu ejus, tunc quibuscumque conveniret ipsum genus, et ipsum similiter conveniret: sicut de homine et asino praedicaretur, et ipsum unum similiter de eis diceretur, quod est falsum. Nec multa sunt de ejus intellectu: quia cum animal praedicatur de Socrate, tunc Socrates esset multa animalia. Utrumque tamen potest sibi accidere per aliud, scilicet de quo praedicatur. Si enim illud fuerit unum, et aliud erit unum: sicut quando praedicatur de homine uno, est unum; quando de pluribus, plura: et hoc accidit sibi, quia accidit sibi praedicari de homine. Non enim est de intellectu animalis praedicari de homine; quia tunc homo praedicaretur de asino, cum animal praedicatur de asino. De quocumque enim praedicatur aliquid, praedicatur etiam illud quod est de intellectu ejus, per regulam Philosophi in lib. Praedic.: Quando alterum de altero etc. Similiter esse in aequo cum homine, vel esse in plus, non convenit animali praedicato de homine secundum suum intellectum; sed utrumque potest sibi accidere. Si enim cum dicitur, homo est animal, consideretur natura animalis absoluta, sic non erit in plus animal quam homo; immo in aequo cum homine: aliter absoluta ratio ejus non multiplicaretur ad multiplicationem subjectorum. Unitas enim illa non descendit sub animali, ut dictum est. Et sic nihil reale erit in praedicato, quod non sit in subjecto. Animal enim non dicit aliquid plusquam homo: et sic accidit sibi non esse plus quam homo, quia accidit sibi praedicari de homine, ut dictum est. Si autem consideretur haec natura ut subtracta intentioni, vel praeter (1) uniformitatem quam accipit ab anima, sic erit in plus et communius quam subjectum de quo praedicatur: quia a parte praedicati servatur uniformitas illa, non autem a parte subjecti; et sic non plurificatur praedicatum ad multiplicationem subjectorum, immo manet unum de multis praedicatum, ut dictum est. Et quia hoc logicum est, ideo secundum eum non convertitur consequentia subsistendi ab animali ab hominem; ab animali, inquam, quod de homine praedicatur. Similiter autem accipiendo animal sine intentione universalitatis, proprie non est praedicabile; quia sic est prima substantia, quae neque in subjecto est, neque de subjecto dicitur. Sed accipiendo animal et hominem sub intentione universalitatis, quomodo individuum accipi non potest propter repugnantiam universalitatis ad individuatiouis principia; animal et homo dicuntur secundae substantiae, quarum proprietas est de prima praedicari, ut habetur in Praed. Quem modum considerationis de substantia Metaphysicus non habet, qui considerat eam solum secundum quod est ens in se: et ideo secundum eum substantia non dicitur de subjecto, nec est in subjecto, ut dictum est supra. Quod autem substantia praedicatur de subjecto, habet in quantum per actum rationis induit naturam accidentis. Quod ratio enim nostra facit circa substantiam, accidens est, et

(1) *Al.* propter.

non substantia. Et ideo Philosophus in lib. Praedic. dicit substantias secundas per quamdam nominis similitudinem hoc aliquid significare, quod est proprium substantiae primae, ut cum dicitur homo, vel animal; sed secundum rei veritatem magis significant quale quid, in quantum per actum rationis transeunt in similitudinem accidentis, non amittendo substantiam propriam in rerum natura, sed accipiendo rationem uniformitatis in anima. Et ideo dicit illa significare quale quid, quia qualitatem, id est uniformitatem, per quam fiunt universalis per actum rationis, circa substantias quasdam, res scilicet particulares, determinant; quae proprie sunt quid. Ex dictis patet, quod considerando entitatem rerum in se, sicut Philosophus primus, in substantia nulla foret praedicatio unius de altero, quae tamen in substantia reperitur secundum Logicum, secundum quem substantia quodammodo induit similitudinem inhaerentiae accidentalis, ubi est proprie dici de altero etiam secundum primum Philosophum. Ex quo facile deprehenditur error volentium in natura rei multiplicare formas substantiales, unde sumuntur praedicta substantialia, sicut et formae accidentales multiplicantur in re, de qua multa praedicantur accidentalia realiter: cum tamen in substantia non sit praedicatio aliqua secundum veram naturam rei, sed per actum intellectus, ut dictum est. Unde ponentes plures formas substantiales in re una, ignorant naturam et originem propositionum, in quibus aliquid de aliquo praedicatur, et differentiam etiam inter substantiam et accidens.

## CAPUT X.

Nunc igitur superest ostendere differentiam inter substantiam secundum quod est genus primum, et secundum quod dividitur contra accidens: sic enim facilius sciatur quomodo praedicatur, et usque ad quem terminum descendat ejus praedicatio ad contenta in suo genere. Ad ejus evidentiam sciendum est, quod eadem sunt differentiae divisiuae generum, et constitutivae specierum. Ens autem non potest habere aliquas differentias divisiuas, ut supra probatum est, sed quosdam modos distinctivos habet. Et ideo in substantia secundum quod est primum praedicamentum, ut in 7 Metaph. dicitur, ratio entis perfecta reperitur; et non constituitur per aliquam differentiam constitutivam; et ideo sic est genus, quod nullo modo species esse potest. Ex quo ostendi potest nullam formam realem esse in substantia, secundum quod est genus primum: ex qualibet enim forma substantiali differentia aliqua trahi potest; et hoc supra ostensum est. Per quemdam igitur modum specialem superadditum enti oportet accipere naturam substantiae. Hic autem modus specialis est, non generalis, includens in se oppositionem quamdam. Unde omni enti non convenit iste modus. Specialis est ergo, et non generalis, ut dictum est supra: est enim per se esse et non in alio, per quem modum substantia dividitur contra accidens. Sed super hoc ratio generis addit ordinem ad contenta sub eo, qui quidem ordo importatur in uniformitate ejus ad exteriora. Hanc autem uniformitatem habet per actum intellectus, ut dictum est. Potest igitur substantia quae est primum genus, dici ens per se existens, implicite continens in se sua inferiora; ita tamen quod per se existens non ostendat

aliquod universale esse separatum, ut Plato posuit; sed secundum quod « per se » opponitur ei quod est esse in alio, quod est proprium accidentis, sine quo esse non potest, ut dicitur in Praedicamentis. Ex hac igitur diversitate quae est in substantia, sciri potest quomodo et de quibus substantia praedicari habet, secundum tamen quod genus est implicite continens sua inferiora; quia potestate continet suas differentias, per quarum additionem efficiuntur et constituuntur sua inferiora: et tantum descendit sua praedicatio, quantum et differentiae constituentes. Divisio autem differentiarum stat ad species specialissimas, quia sub eis nihil est nisi individua, quae dicunt privationem divisionis per partes subjectivas: ideo individuum non habet partem subjectivam sibi, de qua praedicetur, cum a prima substantia nulla sit praedicatio, ut dicitur in Praedicamentis. Ultimum enim de quo praedicatur substantia in linea praedicamentali, erit aliquis homo, vel aliquod suppositum, ut equus, vel bos, respectu ejus ex genere primo et differentia aliquod genus constitutum, scilicet animal, de ipso praedicatur: ut puta, Socrates est substantia, et est animatus sensibilis: ex quibus constituitur animal, quod de Soerate praedicatur. Isto enim modo facile est scire de quibus praedicatur aliquid ut genus, et de quibus non praedicatur. Unde manifestum est, quod de manu hominis vel pede non praedicatur substantia, secundum quod est genus. Sic enim cum manus sit animata sensibilis, si cum hoc esset substantia manus, ita foret animal. Unde manifestum est, quod animatum et sensibile iterum non praedicantur de manu secundum quod sunt differentiae generis alieujus; quia differentia non praedicatur de aliquo, de quo non praedicetur genus ipsum. Cum ergo manus non sit animal, non erit animata secundum quod animatum est differentia, nec substantia secundum quod est genus. Erit ergo manus substantia, secundum quod dividitur substantia contra accidens, et tantum sic. Ratio enim ejus sic accepta est per se esse, et non in alio, quod est proprium accidentis, quod non potest esse sine eo in quo est. Ipsa enim sic accepta, una est et non plurificata in suis suppositis, in quibus plurificatur secundum quod est genus, propter multitudinem differentiarum constituentium diversa supposita diversarum specierum, ut supra dictum est. Substantia igitur secundum quod habet naturas rerum sub se diversas, super quas fundatur, in se unum quidem est, ejus unitas non descendit sub eo (1), sed statim in inferioribus multiplicatur; licet sit unum sub intentione universalis, sicut de aliis dictum est, et sic contra accidens dividitur. Inde est quod, licet substantia praedicetur de duabus manibus hominis, non tamen dicendum est quod duae manus sint duae substantiae; cum potius sint partes unius substantiae, quam duae substantiae: unde in partibus in toto manentibus non habet substantia multiplicari, cum non praedicetur de eis ut natura in inferioribus, quae sunt partes subjectivae, recepta, et consequenter multiplicata; sed ut contra accidens dividitur, ut dictum est. Manus enim, vel pes est substantia, secundum quod substantia contra accidens dividitur, ejus esse est esse in alio; et non per se: cum accidens sit in alio ut in subjecto; pars autem est in toto, non ut accidens in subjecto, ut dicitur in Praedicamentis. Accidens

(1) *Al* super eo.



autem est in subiecto, tamquam impossibile sit ipsum esse sine eo, ut paulo ante dixit Philosophus. Ex quibus concluditur per connexionem Philosophi: cum accidens non possit esse sine eo in quo est, et pars non est in toto ut accidens in subiecto; quod pars sic est in toto, quod tamen sine toto esse possit; non quidem sub ratione partis, cum pars importet relationem ad totum (unde pars, ut pars, sine toto esse non potest, cum relativa sint simul); sed secundum quod res quaedam est. Cum autem materia non possit esse per se, pars autem per se esse possit, cum in hoc differat ab accidente, sed non secundum quod pars est, quod inest sibi a toto; necessario in eo quod pars est, erit aliqua compositio materiae et formae: non secundum quod pars est, quia hoc habet a forma totius, a qua esse habet actu pars participative tantum, cum impossibile sit duo esse substantialia in una re ponere, nisi illa res sit duo entia, cum esse sit actus entis. Compositum ergo ex illa materia et forma non erit aliquod ens actu. Unde nec istam formam aliquod esse sequitur, cum esse non sequatur formam nisi quando compositum est per se existens, cujus est esse actu. Et ideo substantia secundum quod dividitur contra accidens, de illo composito non praedicatur: non enim est per se existens ut totum, neque in toto, ut pars quae a toto participat esse; sed est in toto in potentia propinqua ad esse debitum sibi secundum essentiam formae quae in ea est sine esse. Unde ad genus non spectat per se ut suppositum, vel per eductionem ut pars, quamdiu in toto est isto modo, in essentia scilicet sine esse, vel per se, vel participative. Sed potius pertinet ad genus ut principium materiale compositi nondum per se existentis, sed futuri per resolutionem: cum materia per illam formam nondum sit transmutata ad esse actu, qui est finis formae eductae de potentia materiae: cum pars esse actu tantum habeat a forma totius. Cum qua solum in rebus diversarum naturarum poterunt aliae formae in esse produci de potentia materiae: cum partes diversae in natura unam rem constituent cum hoc quod natae sint per se esse. Ideo, ut dicit Aristoteles, necesse est per aliud et aliud hoc eis convenire. Cum autem per se existere incipiunt, tunc ad genus spectant, cum habeant rationem subjectivae partis adhuc in gradu perfectiori quam corpora simplicia.

#### CAPUT XI.

Ex dictis manifestum est, quod sicut substantia sub ratione generis non praedicatur de parte integrali rei subjectae, sed secundum quod dividitur contra accidens, potius ostenditur quid parti convenit, quam quid conveniat toti; ita necesse est animatum et sensibile de parte praedicari, non secundum quod sunt differentiae, quia non potest differentia praedicari de re de qua non praedicatur genus, sed secundum quod dividuntur contra inanimatum et insensibile. Et ideo rationabile non praedicatur de anima separata secundum quod est differentia, cum anima non sit animal; sed secundum quod designat potentiam animae, denominat animam. Patet etiam ratio, quare non numeratur substantia in his de quibus praedicatur. Sic enim hoc convenit substantiae quasi quaedam differentia communis. Non esse namque in alio communissimum est de omnibus quae substantiae debentur.

Sub differentia autem communi non numeratur genus aliquod: isoeheles enim et isopleuros et scalenon non numerant figuram quae est genus sub differentia communi, sed sub differentia trianguli. Dividitur igitur figura per differentias suas, per triangulare scilicet et quadrangulare; et una istarum differentiarum, sub triangulari scilicet, continetur isoeheles, et isopleuros, et scalenon. Sed si triangulus constitutus dividatur per differentias trianguli, ut per tria latera aequalia, vel per duo, vel per omnia inaequalia, non erit unus triangulus, sed tres trianguli. Sic igitur substantia secundum quod dividitur contra accidens, quae est communis differentia ejus (licet nulla differentia substantiam constituat, cum substantia genus non habeat, ut dictum est), non multiplicabitur in partibus de quibus praedicatur. Ideo corpora duorum animalium, prout sunt partes duorum animalium, cum de eis non praedicetur substantia secundum quod est genus, cum non sint partes subjectivae, sed partes integrales rei quae pars subjectiva est, et (1) non sunt duae substantiae, cum genus sub differentia communi non multiplicetur, sed una substantia sunt. Nec possunt aliquae differentiae superaddi substantiae, per quas substantia numero eadem praedicetur de partibus in aliqua re existentibus; cum non possint esse partes subjectivae alienius speciei specialissimae, ad quam divisio et multitudo differentiarum stat, ut dictum est. Solum enim per differentias ultimas numeratur genus. Quod manifestum est, si dividatur genus per multas differentias per se et non per accidens, quousque deveniatur ad ultimam divisionem, per quam species specialissimae constituuntur: quae adhuc unitatem retinent de natura sua. Sed cum forma specifica recipitur in materia individuali, quae est principium individuationis et numerositatis (ex divisione enim quantitativa quae materialis est, causatur numerus, ut dicitur in 3 Phys.); et numeratur forma specifica, et omnia quae in intellectu suo continentur, ejusmodi sunt genera superiora. Compositum autem ex materia individuali et forma specifica efficitur pars subjectiva, de qua solum praedicantur sua superiora, ut genera subalterna et species: quorum nihil est pars integralis rei: ideo non numeratur illud quod dicitur de partibus, ad numerum partium. Quod autem dictum est de substantia, dici debet de corpore, quod est genus secundum, et de aliis generibus, de quibus post dicitur. Corpus enim, secundum quod est genus, non praedicatur de corpore hominis, dum est pars ejus: quia si corpus hominis esset corpus, id est si de eo praedicaretur corpus quod est genus; cum corpus hominis sit animatum et sensibile, corpus hominis esset animal: quod patet esse falsum, cum homo sit animal: idem enim numero non praedicatur de toto et de parte in heterogeneis. Praedicatur ergo corpus de corpore hominis secundum quod dividitur contra incorporeum, et hoc est maxime commune corpori; ideo non numeratur quando praedicatur de diversis corporibus prout sunt partes. Quando autem mortuis hominibus, per se sunt corpora, tunc, cum habeant rationem partium subjectivarum, praedicatur de eis corpus numerose. Manifestum est autem, quod non numeratur corpus hominis mortui corpori vivo, ut possint dici duo corpora: licet per aliam et aliam formam fuerit

(1) *Conjunctio et videtur superflua.*

corpus in actu in vivente et in mortuo, et non per eandem.

## CAPUT XII.

Ad hujus igitur evidentiam considerandum est, quod nomina primae intentionis sunt quae rebus sunt imposita absolute mediante conceptione, quae fertur intellectus super ipsam rem in se, ut homo vel lapis; nomina autem secundae intentionis sunt illa quae imponuntur rebus non secundum quod in se sunt, sed secundum quod subsunt intentioni quam intellectus facit de eis; ut cum dicitur: homo est species, animal est genus. Quia igitur in rerum natura invenitur quod essentia rei a supposito differt non solum secundum operationem intellectus, sed in natura sua, ut docetur in 7 Metaph.; ideo res naturae est nomen primae intentionis impositum ipsi supposito. Sed quia per actum intellectus super ipsam naturam designatam per modum totius efficiuntur nomina intentionalia, ut species et genus: ideo super rem naturae inveniuntur nomina intentionum, ut puta, suppositum, quod est nomen secundae intentionis ipsius rei, in quantum per actum intellectus fit praedicatio speciei de re naturae. Et ideo res naturae vocatur suppositum, cum praedicatum sit superius naturaliter ipsi subjecto. In quantum vero genus et species dicuntur universalialia, res naturae dicuntur particularia. Nominum autem significantium ipsa particularia, quaedam sunt communia omni generi, sicut particulare, individuum et singulare: quaedam autem in genere substantiae tantum, ut res naturae et suppositum, hypostasis et persona. Cum ergo ratio substantiae sit per se existere, nullum istorum nominum conveniet nisi naturae rei completae existenti: et ideo nihil horum dicitur de parte rei: ideo pars rei non est suppositum, ut de ea aliquid praedicetur habens etiam rationem superioris. Nec etiam aliquod aliorum quae significant particulare in genere substantiae. Talia enim habent relationem ad speciem ipsam per se, et non per reductionem per aliud; et ideo ista non numerantur ad numerum partium: duae enim manus non sunt duo supposita nec duae hypostases. Illa autem quae signant particulare in omni genere, sicut individuum et particulare, cum in omni genere sit stare ad aliqua quae non habent partes subjectivas, quod importatur in individuo; non requirunt aliquid per se existens de quo dicantur, cum praedicentur de accidentibus; et ideo de partibus praedicantur. Ista enim nomina magis oppositionem quamdam important ad ipsas species rerum quam convenientiam, quod non in aliis reperitur. Individuum namque dicit privationem divisionis in partes subjectivas, quod tamen speciei conveniet in generibus et corporibus. Particulare etiam opponitur universali. Ista igitur cum praedicentur de partibus, habent multiplicari sicut et partes: duae enim manus sunt duae res particularia: similiter duo singularia, et duo individua. Sed istud conveniet magis particularibus accidentibus, quae tamen sunt partes subjectivae ad quas stat divisio in partes subjectivas. quam partibus rei; licet de partibus dici possit. Sed individuum dicit negationem talis divisionis potius quam statum ejus, cum in tota re stet talis divisio. Inde est, quod cum corpus non praedicetur secundum rationem generis subjectam intentioni universalitatis de parte homi-

*S. Th. Opera omnia. V. 17.*

nis, non numeratur in talibus partibus. Non enim sunt duo supposita corporis, sicut nec duo supposita hominis. Si autem praedicetur de eis prout dividitur contra incorporeum (cum sic se habeat ut genus sub differentia communi, ut unum de eis praedicatur, cui si addatur aliquid eorum quae praedicata de partibus multiplicantur, ut particulare vel hujusmodi, cum hoc sit quasi differentia ultima, cujus est multiplicari et multiplicare superiora inferioribus), numerabitur corpus in eis: duae namque partes sunt duo corpora particularia, cum tamen absolute non sint duo corpora, ut corpus quod est genus in eis multiplicetur. Licet enim corpus acceptum secundum quod dividitur contra incorporeum non sit genus, ut natura particularis esse possit differentia ipsum dividens; tamen similitudinem habet cum corpore sub ratione generis cum differentia communi, in qua omnia ut unum accipiuntur. Sicut namque omnes figurae eo quod figurae sunt, dividuntur contra infiguratum, ita omnia corpora eo quod corpora sunt, dividuntur contra incorporeum: et sic omnia corpora sub ratione universali comprehenduntur, et unum sunt. Quae quidem unitas removetur per additionem oppositam ejus, scilicet particulare: particulare enim dicitur per oppositum ad universale. Et haec est ratio quare cum additione particularitatis multiplicatur corpus de eis dictum, non autem absolute; cum de illis non praedicetur corpus genus, cum non sint plura supposita, sed corpus condivisum accidenti, quod habet unam rationem communem ad omnia corpora ut dictum est. Corpus autem sic dictum non est aliud realiter a corpore quod est subjectum intentioni universalitatis, quod dicitur corpus genus: immo idem secundum rem, et diversum secundum rationem, cum corpus quod est subjectum intentioni tali sit res non incorporea. Unde corpus sic dictum, praedicatur de corpore quod est altera pars hominis, dum est pars. Corpus vero quod est genus, praedicatur de corpore mortuo amissa ratione partis, quia jam potest esse suppositum in genere substantiae, cum sit per se existens, quod est proprium primae substantiae, ut dicitur in Praedicamentis: unde illa non sunt duo corpora diversa numero; cum corpus quod est pars, non ponatur in numero corporum absolute, et sine additione particularis, ut dictum est. Verumtamen est sciendum, quod corpus mortuum cum sit per se existens, suscipit praedicationem corporis secundum rationem generis, quod tamen est unum suppositum, et res naturae. Corpus tamen prout est pars, non sic suscipit; quia non dicitur de eo corpus quod est genus; sicut nec dicitur de eo homo vel animal, ut dictum est; cum praedicatio generis de aliquo semper sit per speciem, quae consequitur formam rei. Corpus autem pars non pertinet ad speciem vel genus, nisi participative et per reductionem, id est per naturam totius quod est in genere. Corpus vero mortuum absolute in genere et in specie est. Impossibile est autem ab eadem forma substantiali alicui conferri esse absolute et participative, cum esse participatum sit a toto parti communicatum, esse vero absolutum sit totius, cum nihil sibiipsi sit totum et pars. Necessario igitur per aliam formam substantialem erit corpus mortuum corpus actu qui est actus absolute, et corpus vivum corpus actu qui est participatus.

## CAPUT XIII.

Ex dictis manifestum est, quod non potest concludi quod corpus vivum et mortuum sint duo corpora diversa, etsi necessarium sit corpus mortuum per aliam formam esse corpus in actu quam per illam per quam erat corpus vivum corpus actu. Si autem dicantur duo corpora particularia, ex hoc non sequitur, quod sunt duo corpora realiter diversa; quia particulare non est differentia aliqua sumpta a forma specifica, quae realiter aliquid constituat, sicut est rationale. Nec propter hoc erunt unum simpliciter, sed secundum quid tantum, ratione scilicet communis; cum nihil de re priori sit jam nisi materia tantum. Et licet hoc corpus mortuum mixtum sit habens certam proportionem miscibilium, et certam formam consequentem, quae est forma mixti, per quam efficitur sub corpore mixto: cum tamen totum hoc nos lateat (quia nec forma ipsa nobis nota est, nec proportio ipsa: per speciem autem unumquodque certificari habet et demonstrari); nihil autem nobis sit certius de illo quam quod habet tres dimensiones et plenam naturam corporis, reliqua autem nobis incerta sunt, ut dictum est: ideo speciem ejus ponimus corpus sub ratione corporis, quia hoc de eo nobis notius est, licet in rerum natura super differentias corporis in eo reperiatur aliquid specialius. Illud enim pro specie accipiendum est, per quod certius et determinatius res innotescit, ut dicitur in Praedicamentis. Si autem sit aliquid corpus mortuum quod non habet rationem suppositi, cum non subsistat per se, sicut de corpore Christi in triduo; non videtur quod de illo corpus sub ratione generis praedicari possit, cum per se esse non habeat; sicut nec prius praedicabatur de illo vivo, quando erat pars hominis.

Ad cujus evidentiam sciendum est, quod res naturae dicitur quod habet naturam aliquam cui accidit ratio suppositi, in quantum scilicet per se subsistit: quod semper evenit quando principia illius naturae constituunt suppositum ipsum. Si autem principia alicujus rei naturae conjuncta ad invicem alicui per se existenti adjungantur, rationem suppositi non habebunt, rem tamen naturae ipsa constituent in supposito, sed non suppositum. Ideo in Christo non sunt duae res naturae, sed una res duarum naturarum, quae tamen constituta est res illius naturae, humanae scilicet, per hanc naturam humanam; sed non est constituta suppositum, quod dicit aliquid absolutum per se subsistens per humanam naturam. Licet igitur idem sit hoc suppositum et res naturae humanae, aliunde tamen est res humanae naturae, aliunde suppositum: res enim naturae humanae est per principia humanae naturae, sed suppositum non. Cum igitur homo sit res naturae humanae; per principia naturae humanae constituitur homo ille non per se existens: homo enim fuit sic assumptus: sed natura in suis principiis, ex quibus ad invicem conjunctis suppositum illud per se existens factum est homo. Et ideo Filius Dei naturam humanam assumpsit, et factus est homo: et ideo ratio suppositi homini convenit, ille enim homo fuit ab aeterno. Per illum igitur hominem ratione suppositi per se existentis quod homo ille factus est, homo ille per se existere dicitur; non quod aliquid ex principiis naturae humanae tantum constitutum

sit per se seorsum a Verbo: sed quia res naturae humanae, quae per naturam humanam constituta est, est (1) ipsum suppositum divinum quod per se existit; unde et homo ille cum sit ipsum suppositum, per se existit in genere substantiae. Et ideo partes naturae humanae, corpus scilicet et anima, ad genus spectabunt per naturam illius totius quod per se est in genere illo. Patet igitur, quod diversimode sunt aliorum hominum partes in genere, et partes humanitatis Christi. Quia in aliis ex principiis naturae propriae erit aliquid per se existens, quod per se est in genere, et per ipsum alia erunt in genere per reductionem; in Christo autem per principia humanitatis non constituitur aliquid per se existens; sed ipsum suppositum divinum per se existens complete et perfecte factum est res humanae naturae per principia naturae humanae. Unde res naturae humanae propter identitatem cum supposito divino erit per se existens: res enim humanae naturae in Christo non est pars illius suppositi, ut praedicetur de supposito ipso, sed est ut ipsum totum, et ideo per se esse dicitur. Erunt igitur partes naturae humanae in Christo pertinentes ad genus et speciem per ipsam rem naturae humanae, quae constituta est per principia naturae humanae, ut dictum est: quae tamen res per se esse habet a supposito, cum quo identitatem habet, et non a principiis propriis, ut dictum est. Ex quibus manifestum est, quod partes humanae naturae in Christo non reducuntur ad speciem vel genus per suppositum ipsum, cum illud per se non sit in genere; sed per rem naturae, quae est ut habens esse per se. Nec refert a quo habeat esse per se; aut a suis principiis, aut a Verbo cui adjungitur: cum hoc universaliter tenendum sit, quod principia per illud ad genus reduci habent, quod per illa constituitur: et hoc semper est res illius naturae, cujus sunt illa principia. Cui quidem rei quandoque accidit ratio suppositi, quando scilicet habet per se esse: quandoque vero non; quando scilicet alteri adjungitur, ut dictum est. Ex dictis igitur manifestum est, quod corpus Christi mortuum, licet per se non sit sicut corpora aliorum, res tamen est alicujus naturae habentis sua principia. Et ideo genus de eo praedicatur, cum idem sit Verbum, et res illius naturae; ratione cujus identitatis per se esse dicitur. Ratio enim suppositi accidentaliter se habet ad principia naturae sibi mutuo juncta; res vero naturae essentialiter. Ideo semper ubi est res naturae constituta, erit praedicatio generis illius naturae, et specierum de re suae naturae.

## CAPUT XIV.

De metaphysica autem, et logica, et earum consideratione quae ad omnia se extendunt, actum est: nunc vero de naturali et mathematica restat agendum. Sciendum est igitur, quod antiqui philosophi scientiam naturalem primam philosophiam putaverunt, sicut etiam putaverunt primum ens esse corpus. Sed Philosophus in 6 Metaph. docet, quod naturalis philosophia est de quodam particulari ente habente in se principium motus et quietis: unde et materiale ens est, quia materia est in omni eo quod per se movetur: subjectum enim phi-

(1) *Al. deest* primum est.



osophiae naturalis est ens mobile. Et ideo sua consideratio, secundum Philosophum *ibid.*, est circa ea quae sunt in materia, ut in pluribus: quod dicit propter animam humanam quae pertinet etiam ad Physicam, in quantum est forma corporis, licet per se esse possit: ideo scientia naturalis subalternatur metaphysicae.

Ad cuius evidentiam considerandum est, quod dupliciter convenit unam scientiam alteri subalternari. Uno modo quando subjectum unius est species subjecti alterius, sicut homo est species animalis, et animal est species corporis naturalis, ideo scientia de animalibus, subalternata est scientiae naturali. Alio modo quando subjectum inferioris scientiae non est species subjecti superioris scientiae, sed se habet ad illud ut materiale ad suum formale; per quem modum Perspectiva se habet ad Geometriam. Geometria enim agit de linea et aliis dimensionibus absolute et formaliter ad nullam materiam applicando: non enim agit de linea in ligno vel aere: sed Perspectiva agit de linea secundum quod est in aliqua materia in qua videri possit, unde agit de linea visuali. Linea enim visualis non est species lineae, sicut nec triangulus ligneus est species trianguli: differentia enim non sumitur a materia. Et haec est ratio quare non est aliqua specialis scientia de linea recta vel circulari, sicut est de linea visuali: quia rectum et circulare sunt propriae differentiae lineae, visuale autem non, sed est alterius et extraneae naturae; et ideo scientia specialis est de linea visuali, et non de linea recta vel circulari. Isto modo naturalis scientia, quae applicat naturam entis ad naturam sensibilem, est sub metaphysica, quae considerat de ente absolute: quia ens mobile non est species entis, cum ens non sit genus, ut dictum est. Ens igitur mobile est subjectum naturalis philosophiae, quae dividitur secundum divisionem entis mobilis in suas species; scilicet in ens mobile motu locali tantum, sicut est corpus caeleste, et in ens mobile motu generationis et corruptionis, et sic de aliis. Haec tamen divisio magis pertinet ad logicum quam ad physicum, cum sit generis in suas species. Sicut enim supra dictum est, quod substantia quae est primum genus, non habet aliquam unam rem supra quam fundatur, sed supra diversas res, a quibus tamen ratio unitatem quamdam accipit, ratione cuius dicitur genus unum; ita ens mobile, quod est subjectum naturalis philosophiae. Nec dico corpus mobile; quia omne corpus probatur esse mobile in *lib. Phys.* Hoc enim secundum genus non habet aliquam unam rem naturalem supra quam fundatur, sed fundatur supra diversas res: quas tamen quia apprehendimus in pluribus convenire, scimus corpora superiora cum inferioribus in eodem genere corporis esse, sicut substantias separatas cum materialibus, de quibus supra dictum est. Quod autem generabilia et corruptibilia, et mobilia motu locali tantum, sunt duae species entis mobilis, de quo in communi agitur in *1 Phys.*, magis ostendit eorum convenientiam secundum Logicum, quam secundum Naturalem. Substantiae enim corruptibili et incorruptibili nihil est commune nisi logice tantum; cum plus differant quam genus aliquod reale, ut dictum est. Unde in *3 Metaph.* dicit Philosophus, ubi docet quae differunt in genere physico, quod illa differunt genere, quorum subjectum primum est diversum: sicut primum sub

jectum coloris differt a subjecto primo saporis, sicut superficies ab humore: et sic differunt, quia non reducuntur in unum subjectum, quantumcumque fiat resolutio utriusque. Si enim posset fieri unum de illis per aliquam resolutionem realem, non differrent simpliciter in subjecto primo, nec per consequens in genere. Ut puta materia ignis differt a materia aëris: sed si fiat resolutio ignis et aëris, non remanebunt diversae materiae. Et ideo ignis et aer non sunt duo diversa genera, physice loquendo. Corpus vero caeleste cum corporibus generabilibus differt, cum non convenient in materia: si enim miraculose corrumpetur caelum, quia naturaliter incorruptibile est; adhuc essentia materiae suae diversa esset a materia elementorum, nec foret resolutio ad unum subjectum: quod testatur potentia materiae elementorum, quae nunquam transmutari potest ad formam caeli: alioquin esset in eo potentia frustra, quam tamen constat in materia caeli esse, cum in ea est forma caeli. Ex quo patet, quod ens mobile motu locali, et ens mobile per generationem et corruptionem, sunt duae species entis mobilis logice tantum, ut dictum est. Patet etiam, quod unitas generis physici est ab unitate primi subjecti. Primum autem subjectum est materia. Illa igitur conveniunt in genere physico, quae habent eandem materiam, sed differunt specie, propter diversitatem formae, sicut ignis et aer. Nec tamen erit aliqua distinctio in materia: cum distinctio dicat actualitatem aliquam quae non est in materia secundum se: sed haec diversitas est in potentia passiva tantum, ad quam non sequitur aliquid in fundamento naturae esse distinctum.

Ex dictis igitur patet, quod ens mobile, quod est corpus communiter acceptum, non habet a materia aliquam formam communem, per quam est corpus, super quam fundatur actio intellectus, qui facit communitatem quamdam inter corpora generabilia et corruptibilia, in quantum facit esse ea diversas species entis mobilis, cum nulla res communis subsit, nec etiam materia ipsa quae est incorruptibilis et ingenita: si enim esset aliquod compositum tale, ex materia scilicet et forma corporis praeter formas ad quas sequuntur qualitates sensibiles, quae sunt principia generationum et corruptionum, esset inordinabile ad formas tales, et ad alias, ad quas generatio et corruptio non attingit, sicut ad corpus caeleste. Sic autem foret necesse, si in re generabili et corruptibili praecederet aliqua forma formam specificam rei, per quam solum est generatio et corruptio in rebus, cum solum ad illam sequantur qualitates activae et passivae, quae sunt principia generationis et corruptionis, et non ad formam talem imperfectam. Unde ipsa indifferenter se haberet (1) ad formam supervenientem, sive esset principium generationis et corruptionis, sive non esset: tunc enim caelum haberet aliquid reale commune cum generabilibus et corruptibilibus: quod est directe contra praedicta verba Philosophi. Et ideo impossibile est in rebus generabilibus et corruptibilibus aliquam formam praecedere formam specificam, sicut antiqui posuerunt materiam primam esse formatam quadam forma non elementalibus, sed imperfecta, quae sit quasi via ad alias, sicut forma embrionis imperfecta est respectu formae specificae animalis. Unde Commentator *sup. 9 Me-*

(1) *Al.* habet.

taph. dicit primam habilitatem materiae esse semper respectu formae elementorum. Unde non reperiuntur mediae formae elementi ex elemento, sicut est in generatione animalis, ubi sunt multae formae mediae sibi succedentes per generationes et corruptiones multas usque ad ultimam, quam solam in re manere necesse est, ne dicatur ipsa accidens esse. Ex dictis patet, quod res secundi generis, non est una, super quam fundatur unitas rationis, sicut nec res primi generis, de quo supra dictum est. Sed antequam de hoc plus agatur, prius de hac unitate agendum est.

#### CAPUT XV.

Ad hujus igitur difficultatis notitiam considerandum est, quod cum objectum intellectus sit quoddam intra intellectum, et non extra, quia intelligere non est motus ab anima, sed ad animam: actus intellectus potest ferri in intelligibile, vel prout est objectum in natura objecti, scilicet in quantum terminat ejus actionem: et sic nihil sibi tribuit, sed solum considerat quid natura objecti habeat, unde possit aliquid formari quod naturam illius objecti insinuet, ut puta, definitionem aliquam. Alio modo potest actio intellectus ferri in objectum, non in natura sua, sed prout est abstractum per actum animae a conditionibus materialibus: et sic accipitur ut in anima, et sic anima attribuit sibi aliquid non considerans quid sibi debetur in natura objecti, sed quid sibi per actum animae convenire potest; et illud attributum est ratio universalitatis. Ut puta, intelligendo animal in quantum naturam sensitivam habet, format ejus definitionem, substantiam scilicet animatam sensibilem, quam manifestum est unitatem quamdam in animali significare: animal enim objectum unum natura sua est. Sed haec unitas non descendit ab animali ad aliquas species animalis: animal enim sic acceptum, non dicit aliquod ens in natura; cum non sit aliquod animal in natura animal solum; sed dicit essentiam quae esse non habet nisi per habentem essentiam, cujus esse est ut actus. Ideo quot fuerunt habentes essentiam, tot erunt essentiae secundum esse. Habebit igitur essentiam et unitatem ab habente eam si unum fuerit, et pluralitatem si plura fuerint: idem enim est de unitate et esse, cum unum et ens convertantur. Ideo unitas inventa in natura aliqua, ut in natura animalis, non descendit ad aliquam ejus speciem: imo si in uno recipiatur, jam ab illo unitatem habebit, sicut et esse. Sed alia unitas quam facit intellectus, descendit ad omnia contenta sub uno communi. Prima igitur unitate manifestum est, quod nihil est unum genere commune corporibus caelestibus et generabilibus, super quod intellectus fundare possit rationem universalitatis. Licet enim corpus sit substantia corporea, non tamen propter hoc erit aliquid unum reale conveniens corporibus caelestibus et inferioribus, super quod intellectus fundare possit intentionem universalis; sed secundum intentionem tantum. Quod manifestum est, si fiat resolutio ad primum subjectum corporis, quod est materia; quae in se considerata, erit diversa in caelo et elementis, ut dictum est. Quamvis autem non sit resolvere ad aliquod unum subjectum commune utrique; tamen illae diversae res super quas fundatur

actus intellectus formantis intentionem universalem, compositae sunt ex materia et forma; et ideo ex utraque parte sequitur corpus. Impossibile est enim materiam et formam componi, quin sit corpus, ut supra dictum est: materiae enim natura est esse primum ex quo fit aliquid per se, et ultimum in quo aliquid transit per corruptionem, ut dicitur in 1 Phys. Et ideo ex nullo fieri potest, sicut nec in aliquod praecedens resolvi. Simplex ergo materiae essentia necessario erit, cum simplex per se in nihil resolvi possit. Forma enim cum sit simplex essentia, non resolvitur per se in aliquid, sed per accidens: resoluta enim composito in materia, forma resolvitur in eandem, quia nec forma per se fit, sed compositum, ut docetur in 7 Metaph. Ex duabus autem essentiis simplicibus conjunctis resultat semper essentia quae altera est ab utroque; et hoc necesse est esse corpus, si una illarum de altera educatur, sicut essentia formae educitur de essentia materiae. Essentia enim formae est in essentia materiae in potentia: de potentia autem in actum oportet transitum quemdam esse, in quo importatur transmutatio quaedam. In omni autem transmutatione includitur vel praesupponitur motus localis: sicut in alteratione, a priori est motus localis, in motu vero augenti a posteriori. Quod enim augmentatur mutat locum, non autem ante augmentum: sed quod alteratur, mutat locum antequam sit alteratum. Generatum vero medium importat inter alterationem et augmentum, cum sit terminus alterationis et principium augenti: nihil enim augmentatur, nisi quod generatum est; educi autem per motum localem non potest nisi corpus, vel corpori adjunctum, ut omnia accidentia corporalia. Igitur de potentia materiae non potest aliquid substantialiter educi, nisi constituatur corpus. Nec refert utrum materia, de qua educitur ipsa forma, prius fuerit sub alia forma, ubi solum alteratio praecedit propter subjectum actu existens, cujus materia praefuit formae educendae: sive non; sicut materia caeli nunquam praefuit sub alia forma, et ideo alteratio vel motus localis non praecessit ejus esse: unde caelum non est genitum, sed per simplicem emanationem tantum ad esse processit a Deo. Motus igitur localis accidentaliter tantum se habet ad educationem formae de potentia materiae: in quantum scilicet accidit materiae praefuisse sub alia forma, per quam fiebat subjectum actu existens, quod oportuit corrumpi per actionem qualitatum alterantium, ad hoc quod alia forma induceretur. Esse vero corpus in productione formae de potentia materiae, non accidit propter ipsum motum localem, cum corpus caeleste consecutum sit per educationem suae formae de potentia materiae suae propriae, nullo motu locali vel alteratione praecedente. Essentialiter ergo natura corporis sequitur educationem formae de potentia materiae. Nec hoc adhuc est quia educitur, sed quia fit unum ex materia et forma educta: quia posito per impossibile, quod forma educeretur de potentia materiae, et tamen non fieret unum compositum ex illa cum forma, corpus non sequeretur educationem formae de potentia materiae; cum constet corpus semper compositum esse ex materia et forma. In hoc igitur praecisa ratio corporis consistit, quod ex materia et forma fiat unum: quod infallibiliter contingit, quando forma educitur de potentia materiae. Quandoque etiam hoc fit, etsi



forma non educatur de potentia materiae: ut patet de anima humana; quae etsi non sit edueta de potentia materiae, cum a materia non traducatur; quia tamen ex ipsa et materia fit unum, efficitur corpus. Hoc igitur corpus, sive forma educatur de potentia materiae sine motu, ut caelum: sive cum motu, ut in generabilibus et corruptibilibus: sive non educatur de potentia materiae, ut patet in homine, est res physica prima, supra quam intellectus format intentionem generis, et illud est proprium subjectum philosophiae naturalis; logice tamen: quia si fiat resolutio omnium istorum, non erit devenire ad aliquod commune caelo et inferioribus, ut supra dictum est, cum nec in materia convenient. Si vero fiat resolutio omnium generabilium et corruptibilium, erit devenire ad unum commune principium indifferens ad omnia haec; et ideo corruptibilia omnia conveniunt in uno subjecto physico unitate reali; sed caelum convenit cum corruptibilibus in uno subjecto physico non unitate reali aliqua, sed logica tantum. Huic igitur naturae intellectus attribuit rationem generis, cui in rebus corruptibilibus respondet quoddam habens quamdam unitatem, quae sub eo non descendit, ut supra dictum est, sed multiplicatur in suppositis suis, in quibus recipitur. Unde cum de illis praedicetur, oportet jam naturam constitui in qualibet re per formam quae est totius. Cum illa natura per intentionem sibi additam de toto praedicetur, non potest illa praedicatio sumi a parte rei, et attribui toti rei. Ut puta, homo constituitur ex anima et corpore tamquam ex duabus partibus: praedicatum autem quod sumitur a corpore, quod est altera pars conveniens homini, non est corpus, sed corporeum: idem enim non praedicatur de aliquo denominative, et absolute, sive abstracte. Non erit igitur aliqua forma faciens corpus partem rei, alia a forma totius rei, cum corpus secundum intentionem praedicetur de tota re. Nec potest intellectus parti intentionem aliquam, per quam de toto absolute praedicetur, tribuere: quia pars de toto non praedicatur nisi denominative tantum. Ex quo satis manifestum est, lapidem vel ignem vel hominem non per aliam formam esse corpus, quam per illam per quam sunt illud quod sunt in sua specie, sicut nec per aliam materiam: non enim est alia materia in homine per quam homo est corpus, quam illa per quam est homo.

#### CAPUT XVI.

Et hoc est facile considerare in modo generationis naturae: quia materia prima primam habitudinem habet ad formam elementi. Si enim debet generari ignis, non transmutatur ad formam corporis et postmodum devenit ad formam ignis, sed statim in eodem instanti quo corrumpitur forma aëris, vel quo inducitur forma ignis: qualitas enim activa ignis nihil intendit nisi inductionem formae ignis, ejus ipsa est passio, et in ejus virtute agit. Et certum est, quod non agit in virtute formae corporis, cum non sit ejus accidens proprium. Sed certe sic se non habet materia nuda ad formam mixti: unde non habet habilitatem aliquam immediate ad eam, sed oportet eam primo indui formas elementorum, cum mixtum non possit fieri nisi ex miscibilibus praesuppositis. Has tamen formas, licet materiam ordinent ad formam mixti, necesse

est materiam deponere in adeptione formae mixti, quia in mixto ipso est aliquid quod natum est agere ad dissolutionem ipsius mixti. Forma tamen mixti immediate inest ipsi materiae loco formarum simplicium, faciens subjectum virtutibus formarum elementorum. Unde ex diversis proportionibus miscibilium sunt diversae formae substantiales in diversis mixtis: alia enim est forma mixtionis in auro, alia in lapide, alia in argento. In mixto namque propter naturam mixtionis nulla reperitur diversitas partium: aliter in omni mixto esset diversitas partium, quod falsum est, cum mixta multa sint homogenea, sicut et simplicia. Sicut patet de osse, carne et lapide: quorum quaelibet pars suscipit praedicationem secundum completam rationem ipsius naturae in toto: quaelibet enim pars ossis est os: quod ideo est, quia natura formae secundum totum id quod est, essentialiter est in qualibet parte. Cum igitur pars et pars in aliquo sit per quantitatem, quae est accidens proprium corporis substantiae, cum mensura ejus; sit alia autem forma non potest esse secundum totam naturam suam in aliqua re, quam in illa quae est altera pars compositi; impossibile est aliam formam esse in igne vel lapide, per quam aliquod istorum sit corpus, quam illam per quam praedicatio rei verificatur de parte uniformiter cum toto: et hanc constat esse formam specificam. Sic igitur oportet materiam prius formari formis simplicium corporum, quas oportet deponere in adventu formae mixti, licet virtute in mixto maneat, non autem in essentia. Mixtum autem ex diversis miscibilibus fit. Itaque cum animatum aliquod habens magnam diversitatem in partibus ex diversa mixtione causatam constituitur, necessario erit una forma ipsius animati. Et hanc certum est esse formam mixtionis totius: quam tamen manifestum est non inesse cuilibet parti secundum totam naturam suam, cum non contingat rem praedicari de parte et toto uniformiter. Praedictae autem partes animati per se non fuerunt, cum ex eis constitueretur totum, sicut simplicia corpora habuerunt esse per se ante mixti constitutionem: sed simul agit natura ad eorum educationem in toto, et totius constitutionem ex eis: sicut patet in animali, ubi vis activa patris, quae in semine, agit ad constitutionem corporis diversa membra formando. Inter alia tamen primo format cor, et deinde semper operando ad extrema: quae, quia est virtus assimilans sibi passum, non corrumpitur formato corde, sed durat quousque menstruum fuerit transformatum in illa quae sunt in eo potentia: et omnibus membris formatis, et destructo menstruo et semine, virtus haec necessario destruitur et non post formationem, scilicet unius vel duorum membrorum, ut dicitur in 16 de Anim. Agens enim instrumentale non cessat, nisi effectus intentus a principali agente prius inducatur; et posterius non est necesse eum applicari effectui. Semen autem continet vim generativam, quae est delativa potentiae paternae, sicut instrumentum defert vim principalis agentis. Et ideo virtus quae est in semine, peracto officio suo, corrumpitur. Sciendum est autem quod in menstruo est potentia ad diversas partes, in quibus est diversa proportio miscibilium, ex qua consurgit materialiter multiplex diversitas in partibus, in quarum tamen qualibet est reperire uniformitatem mixtionis. Sicut licet alia sit proportio miscibilium in

osse, alia in carne, tamen in carne uniformitas est; quia quaelibet pars carnis est caro, et ossis os similiter: natura enim mixtionis est habere uniformitatem in mixto. In qualibet igitur parte rei habentis diversas partes erit aliqua qualitas media quae fit ex qualitatibus simplicibus alteratis ad invicem; et haec qualitas erit propria dispositio ad formam mixti, sicut calor intensus disponit ad formam ignis. Nec refert utrum dicatur esse una qualitas in re, vel plures: quia si dicatur una, necessario in diversis partibus habebit difformitatem, ita quod in una parte sui praevalcat humidum, ut in cerebro; in alia calidum, ut in corde. Si vero plures dicantur, adhuc manifestum est sensui eas ad constitutionem unius rei ordinari. Illi igitur qualitati, sive sit una, sive plures, necessario respondebit una forma mixti difformis in virtute: quae licet per essentiam sit tota in qualibet parte rei, non tamen tota virtus ejus erit in qualibet parte rei: sicut patet, quod vis auditiva non est in oculo, nec visiva in aure. Et quia essentia formae rei indivisibilis est, tota enim est in qualibet parte rei; virtutes autem illae ab ipsa forma separari non possunt, quia quaelibet illarum virtutum sequitur totam essentiam, in alia tamen et alia parte, in quibus simul tota essentia est, ut dictum est; ideo diviso aliquo membro a toto, non manet essentia formae indivisibilis in parte divisa, nec virtus, cum virtus ab essentia formae separari non possit. Ideo necessario in parte divisa, cum et in ipsa proportio miscibilium sit, erit alia forma in essentia a priori forma quae totius rei erat. Quae qualiter eveniat sciri potest ex aliquo mixto uniformi, ut puta, in ligno vel lapide, in quibus est una forma actu, quae est multiplex in potentia: et ideo facta divisione, ex illa forma priora (1) quae in toto erat secundum totam suam rationem una in actu, sed multiplex in potentia, fiunt multae actu, nulla nova forma introducta. Non enim cum ramus dividitur ab arbore, nova forma inducitur: sed prior forma quae erat in potentia fit actu; et ideo eadem accidentia manent in ramo abscisso quae prius fuerunt secundum essentiam, sed non secundum esse idem actu: quia primo habebant esse actu a toto, nunc autem non. Patet igitur quod hoc esse, quod actu ramus jam habet, est aliud ab esse actu quod habuit in arbore, non tamen habet aliam formam in essentia a priori: nam hoc esse actu respondet ei quod dictum est continuum habere unam formam multiplicem in potentia, non autem illi quod dictum est illam esse actu unam. Si igitur una continuitas reperitur in aliqua parte membri vivi, sicut in osse vel carne; cum una sit forma totius actu, anima scilicet, quae in animalibus perfectis non est multiplex in potentia, ita quod per divisionem fiat actu sicut est in imperfectis, ut patet in animalibus anulosi ratione continuitatis; oportet praeesistere in carne vel osse formam sine esse actu quae est in toto animato perfecto; cum se habeat ad esse actu sicut in aliis continuis, ut in plantis et lapidibus, se habet multipliciter potentiae ejusdem formae. Potentia autem diversa ejusdem formae nullum esse faciebat in continuo, in quo non erat nisi unum esse tantum; quamvis essentia illius formae respondeat potentiae, sicut et actui, quem

in toto facit. Et ideo, cum talis forma ponatur in re praecipue ratione continuitatis, ubi sola divisio facit esse actu in partibus; facile est videre quomodo essentia formae possit esse ibi, et non dare esse ipsi parti. Sicut igitur non alia transmutatione ducitur materia rei continuac ad formam secundum quod est una in actu, et alia secundum quod est multiplex in potentia, sed eadem; ita eadem transmutatione qua inducitur forma totius multiplex in virtute, inducitur et forma illius sine esse, quia non est nisi quidam respectus. Quia sicut dum manet res in uno actu, illa potentia quae est in eadem forma quae actu esse confert, nihil acquirit illi rei, nisi respectum quemdam uniformitatis in natura inter totam rem, et illud quod in ea divisum est; ita illa essentia formae in re diversae naturae nihil rei ipsi acquirit nisi respectum quemdam qui est cujusdam similitudinis ipsius esse actu partis et seorsum; cum tamen constet non esse idem esse actu vivum et mortuum.

### CAPUT XVII.

Ex his facile est videre, quomodo corpus mortuum actu prius vivebat. Certum est enim potentiam non dividi ab actu ad quem ordinata est, nisi per aliquem actum impossibilem illi ad quem illa potentia ordinatur: sicut potentia quae est in materia ignis ad formam aëris, remota est ab aëre, cum forma ignis materiae inest. Non autem forma ignis perficit potentiam materiae ad aerem; sed manet in potentia in igne non perfecta, occupata tamen forma ignis. Cum enim forma ignis sit in materia, certum est nihil reale esse in materia quod non sit occupatum ab igne: aliter si aliquid esset liberum a forma ignis, statim aliam formam indui posset. Sicut igitur potentia ad aerem occupata est per formam ignis, sed non perfecta; ita accipit actum per formam ignis, qui tamen non erit perfectio potentiae ad aerem. Et ideo potentia ad aerem, propter concomitantiam materiae perfectae per formam ignis, non per se esse actu habet, quia nihil relinquitur in materia non occupatum ab actu ignis, ut dictum est. Per quem modum forma alicujus partis organicae, quae est potentia ad esse seorsum, non perficitur per actum formae totius, cum ad illum non ordinetur: occupatur tamen essentia talis formae, mediante essentia materiae quam concomitatur, ab esse actu, quod est a forma totius. Hoc autem esse non est esse participatum, quod inest a toto ipsis partibus: quia esse partium participatum pertinet per se ad esse totius ex partibus constituti: sed est esse non conferens ad ipsum totum nisi per accidens; in quantum videlicet impedit esse actu debitum parti a forma propria, quam acquirit pars per dissolutionem a toto. Et sicut habet esse actu a toto per concomitantiam, ut dictum est, ita vivere. Unum igitur esse penitus est, et ipsius totius absolute, et partium participative, et talis formae per concomitantiam; et idem est vivere. Et ideo corpus mortuum vere vivum fuit: non quod vitae principium fuerit forma totius compositi ex materia et forma quam jam habet; sed materia ejus tantum per se, cui esse actu conferebat, quod et ipsa forma materiae juncta concomitanter accepit.

(1) *Al.* facta divisione ex illa, forma prior quae etc.

## CAPUT XVIII.

His visis, sciendum est, quod prima divisio corporis, quod est genus, est per simplex et mixtum ex simplicibus. In simplicibus autem non praecedit in natura aliqua forma ipsam formam elementi simplicis, ut supra ostensum est; et hoc facile est demonstrare. Si enim accipiatur minimus ignis in quantitate (quod possibile est, quia res naturae habet terminum augmenti et diminutionis), si dividatur, non manet ignis, nec ex illo aliquid elementum generari potest. Forma autem ignis non destruitur sola, sed et corpus et substantia destruitur. Aliter, cum corpus quantum sequatur corpus substantiam; si corpus remaneret destructo igne, cum corpus substantia non dicat quid sensibile, mathematica forent separata a sensibilibus: quod est impossibile. Cum enim aliquid tale contingit, fit mutatio incontinens, quia non potest de potentia materiae aliqua forma educi. Cum igitur corpus mixtum ex simplicibus generetur, quae sunt media inter primam materiam et ipsum mixtum; in mixto autem non manent formae elementorum, ut dictum est; non erit invenire in mixto aliquam formam mediam inter materiam primam et ipsam formam specificam: quae est forma mixti, cum nulla fuerit media inter materiam et formam elementi. Unde grossi homines aliam viam generationis ponentes, diverterunt a Philosopho, dicentes materiam primo informari forma substantiae et postea corporis, et sic descendendo ad ultimam formam quae est forma specifica: cum tamen Philosophus supradictum modum generationis posuerit, dicens formam elementi immediate materiae inesse; qua deposita, introducit forma mixti. Si enim primo induceretur in materia forma substantiae, et postea forma corporis, et postea forma elementi; cum ex quatuor elementis fiat mixtum, depositis formis elementalibus (quibus depositis, si in materia mixti, quae ex elementis fit, necessario fuerit consimilis ordo), cum totum id materiale quod fuit sub quatuor elementis, sit jam sub mixto; sequitur quod sub una forma mixti maneat quatuor formae substantiales, quarum quaelibet faciet corpus; et quatuor aliae formae, quarum quaelibet faciet substantiam. Ex illis enim non potest fieri unum corpus, cum maneat illae formae in essentia sua, nec substantia una (1) similiter; quodlibet ergo mixtura est quatuor corpora (propter naturam enim illius corporis dicunt praedicari corpus de re ipsa): et similiter erunt quatuor substantiae eadem ratione. Et ideo impossibile est in mixto esse aliquam formam praeter formam (2) mixti. Corpus autem mixtum multiplex est, quia multae sunt proportionales miscibilium in mixto. Unde necesse est diversas species mixtorum constitui: quaedam enim sunt mixta uniformia, sicut lapides et metalla, in quibus est magna multitudo specierum, et talia sunt omnia inanimata; alia sunt mixta difformia, ut plantae et animalia; et haec sunt animata; et quanto sunt perfectiora tanto majorem difformitatem requirunt. Quae enim nata sunt plures et diversas operationes exercere, necessario in eis erit major diversitas organorum. Et ideo inter animata minima diversitas est in plantis, cum non sint principia multarum operationum: in quibus tamen reperitur magna di-

versitas specierum. Sed harum omnium genus proximum et substantialium est corpus animatum. Nec oportet addere ejus principium esse animam vegetabilem: sic enim nihil esset realiter diversum; cum constet ipsam esse primum principium vitae in omnibus quae apud nos vivunt. Super corpus autem animatum simplex aliquid reale addit altera ejus species animal: quod manifestum est ex operationibus utriusque: quia super operationes vegetabiles, quae sunt generare, nutrire, et augmentare, in animali reperitur actio quaedam realis superaddita, scilicet sentire. Cum igitur in animali cum operationibus quae apparent in plantis, inveniatur actio superaddita quae est sentire; necessario oportet dicere sensitivum animalis in sua essentia utrumque obtinere: ne si dixerimus in animali esse vegetabilem distinctam in essentia a sensibili, cogamur in quolibet animali duas animas ponere: quia sequeretur tandem in homine tres animas esse, cum super alia animalia nobilissimam actionem habeat realiter ab aliis actionibus diversam, intelligere scilicet; super quam non invenitur aliquid, quod addat actionem nobiliorem. Et ideo propter additionem talis differentiae, super quam nihil invenitur, animal est ultimum genus. Non solum autem post sensibilem animam, unde accipitur animalis ratio, diversitas realis reperitur in homine; sed aliis in quibus differentiae a se realiter diversae secundum rationem formarum, et non solum secundum rationem materiae reperiuntur, ut patet de equo et asino et aliis hujusmodi. Cum autem certum sit quamlibet istarum formarum aliquis mixti esse, et propter diversitatem quae est in natura formae unius ad alteram, diversitatem materialem esse in mixtione, quae respondet diversitati formarum; sic in eadem specie diversitas formarum est propter diversitatem mixtionis, quae multiplex est. Solum autem simplicia corpora ordinantur ad generationem mixti, ut dictum est. Impossibile igitur erit in aliqua re sive animata sive inanimata nisi unam formam ponere, cum formae elementares manere non possint.

Ex dictis facile est videre, quomodo scientiae diversae oriuntur et dividuntur, sicut et res subjectae. Ens enim mobile est subjectum philosophiae naturalis, ut dictum est: et hoc idem corpus substantia est: cujus prima passio est quantitas; quae, in quantum est terminus corporis, et propria ejus mensura, ad eandem scientiam pertinet. Sed in quantum in eo potest proportio attendi (quia considerari potest sine consideratione alicujus qualitatis sensibilis): quae consideratio posterior est (et ideo in proportione sua non est accipere finem); et hoc idem est subjectum mathematicae: cujus subjectum non est realiter accipere distinctum a subjecto philosophiae naturalis, sed consideratione tantum. De ipso vero ente mobili in communi est liber Phys. Cujus prima species est mobile secundum locum, de quo est liber de Caelo. Corpus autem vel est simplex, vel est mixtum, et in utrisque est generatio et corruptio: ideo de generatione simplicium agit in libro de Generatione. Mixta autem quaedam sunt animata, et quaedam inanimata. De generatione vero inanimatorum agit in lib. Meteor., ut de mineris, et etiam de generatione impressionum. Animata autem sunt tripliciter: quia de generatione animatorum anima vegetabili agitur in lib. de Plant. De generatione vero animalium in lib. de Anima.

(1) *Al.* sua.(2) *Al.* impossibile est in mixto esse aliquam formam mixti.



De homine in lib. de Anima, et de his quae sibi subjiciuntur. In omnibus autem et circa praedicta laborat Metaphysicus et Logicus. De processu autem metaphysico dictum est sufficienter in physicis operibus nostris.

## CAPUT XIX.

Nunc superest de novem generibus accidentium tractare. Sciendum est igitur, quod in accidentibus in rerum natura non est aliquid correspondens operationi intellectus, eo modo quo possint rationem generis et differentiarum recipere, sicut est in substantia. Essentia enim accidentis designata in abstracto non videtur ens aliquod significare; cum abstractum significet ut per se existens: accidens autem per se esse non potest: unde accidens in abstracto non videtur ens aliquod significare. Sed significatio quae importatur in nominibus, non pertinet ad naturas rerum nisi mediante conceptione intellectus; cum voces sint notae passionum quae sunt in anima, ut dicitur in libro Perihermenias. Intellectus autem potest seorsum intelligere ea quae sunt conjuncta. Illud autem quod seorsum accipitur, videtur ut per se existens; et ideo designatur nomine abstracto, quod significat remotionem ejus ab alio. Sed nomina abstracta non important res per se existentes in genere substantiae: ut humanitas nomen abstractum est, non tamen per se existit. Sic ergo per actionem intellectus nomina abstracta accidentium significant entia, quae quidem inhaerent, licet non significant ea (1) per modum inhaerentium. Unde per actionem intellectus efficiuntur nomina quasi res quaedam, quibus idem intellectus postea attribuit intentiones generum et specierum. Nihil vero in natura rerum fuit, super quod intellectus fundaret intentiones universales. Cum autem accidens non sit compositum ex materia et forma, non potest genus et differentia sumi in eo, sicut sumitur in substantia genus a materia, differentia a forma; sed in unoquoque accidentium genus debet sumi ab eo quod prius in eo reperitur, differentia vero ab eo quod post accedit. Primum autem quod invenitur in quolibet accidente, est specialis modus entis includens diversitatem quamdam ad alios ejus modos: sicut in quantitate est specialis modus entis per aliud, scilicet quod sit mensura substantiae; et in qualitate, quod sit dispositio ejus; et sic de singulis. Quod autem in genere diversitas quaedam accipi possit, manifestum est. Nam licet res unius generis non differant ab invicem propter suum genus, sed potius convenient; res tamen diversorum generum suis generibus diversificantur: sicut licet rationale differat ab irrationali, quae tamen convenient in animali, homo tamen differt a non animali per animal. Et ideo in generibus accidentium invenitur diversitas alia ab illa quae est per differentias generis inter res ejusdem generis. Differentia vero debet sumi in eis per aliquid quod in illo modo a quo genus accidentis acceptum est, implicite continetur. Hoc autem invenitur in diversitate principiorum ex quibus causantur: sicut, verbi gratia, ratio mensurae reperitur in quantitate, et hoc est commune omni speciei quantitatis, et ab hoc est acceptum nomen generis. Sed con-

stat, quod successiva sunt diversa principia in natura sua a permanentibus; et ideo naturaliter diversas habent mensuras. Et inde est, quod cum definiuntur accidentia in abstracto, subjectum ponitur in eorum definitione oblique, et secundo loco; et hoc est proprium differentiae; ut cum dicitur, Simitas est curvitas nasi, per quod differt simitas a curvitate quae est in ligno. Accidentia autem in concreto dicta non sunt in genere nisi per reductionem, ut album vel musicum et hujusmodi. Aliquando autem propria principia accidentis, quae sunt in loco differentiae, latent; et tunc loco illorum ponimus eorum effectus. Sicut lucis effectus est disgregare, cum intensa fuerit: quae est principium albedinis: ideo aliquando ponimus disgregativum in ejus definitione, sicut dicimus quod albedo est color disgregativus visus. Disgregativum enim non est differentia absoluta in eodem genere cum colore, sicut est rationale cum animali; sed est differentia sumpta a subjecto coloris exprimens excessum quemdam in receptione lucis. Unde accidentia definitionem non habent per res proprii generis, cum non dicant quid simpliciter, sicut dicit substantia. Cum enim quaeritur quid est albedo, respondetur, color: est enim color quid albedinis, sicut animal hominis. Sed animal quod dicit quid hominis, dicit substantiam simpliciter. Et ideo color qui dicit quid albedinis, magis dicitur substantiale, quam substantia; quia substantiale dicitur quod modum substantiae induit, etsi substantia non sit. Inter omnia autem accidentia quantitas est propinquior substantiae. Et hoc manifestum est: quia sicut subjectum quantitatis est divisibile per se, in partes scilicet essentielles; ita quantitas habet propriam divisionem, per partes scilicet quantitatis. Et ideo si quantitas esset separata a substantia, non oporteret quod esset una tantum, quia potest dividi propria divisione in multa. Albedo vero si esset separata, necessario foret tantum una, cum non haberet in natura sua unde dividatur, sed a natura quantitatis.

## CAPUT XX.

*De quantitate igitur primo agendum est.*

Sciendum est igitur, quod quantitas secundum rationem ejus communem, quae ponitur in 3 Metaph., est divisibilis in ea quae sunt in actu. Quod non est ideo dictum quasi partes in quas quantum est divisibile, sint actu in toto, in quo sunt, divisae; sed hoc est dictum ad differentiam mixti, quod non est divisibile in miscibilia nisi per alterationem, per quam altera forma inducitur. Sed hic sine alteratione aliqua, sola divisione fit pars in actu. Unde quando est in toto, actu esse dicitur, quia quod prope est ad esse, nihil ab esse differre videtur. Et ideo statim subjungit (1), quod quaelibet pars nata est esse unum aliquid, et hoc aliquid demonstrabile. Quod non convenit partibus essentialibus, ut in materia et forma: quia post divisionem neutrum manet per se existens, nisi forte fuerit forma et hoc aliquid simul, sicut est anima humana. Quantitatis autem primae differentiae sunt continuum et discretum. Ex quibus duae species constituuntur, magnitudo scilicet et multitudo. Ma-

(1) *Al. eas.*

(1) *Supple Aristoteles.*

gnitudo constituitur per continuum: unde magnitudo dicitur quantitas divisibilis in partes continuas, sicut multitudo est quantitas divisibilis in partes non continuas, immo ab invicem discretas. Differentiae autem secundae continui sunt intraneum et extraneum: quia quaedam sunt quae mensurantur per intraneum, ut linea et huiusmodi: quaedam per extraneum, ut tempus. Has autem differentias vocat Aristoteles permanens et transiens; quia tempus est mensura transiens, linea vero permanens. Tertiae vero differentiae continui permanentis sive intranei sunt secundum unam dimensionem vel duas vel tres: quia quantitas intranea vel est divisibilis in partes continuas secundum unam dimensionem, et tunc est linea: vel secundum duas, et tunc est superficies: vel secundum tres, et sic est corpus. Et haec omnes sunt species quantitatis per se, ut dicitur in Praedicamentis. Sed in 5 Metaph., tempus ponitur species quantitatis per accidens, sicut albedo dicitur tanta, quia superficies est tanta. Et huius ratio est, quia Logieus considerat quantitatem secundum rationem mensurae, sic enim potest formare intentiones logieas in quantitate. Et quia sunt diversae rationes mensurae; quia quaedam sunt extra, et quaedam intra, quarum nulla est ab alia; et ideo Logieus ponit tempus et locum per se species quantitatis continuae et univocae cum aliis. Primus autem Philosophus considerat quantitatem secundum esse suum, et non sub ratione mensurae: et ideo illa quae sunt quanta per se ponit per se species quantitatis, ut lineam, superficiem et corpus. Illa autem quae sunt quanta per aliud, ut tempus est quantum per motum, motus vero per magnitudinem, ponit Philosophus esse quantitates per accidens. Et ideo in Praedicamentis locus ponitur species quantitatis, non autem in Metaphysica; quia locus habet rationem mensurae aliam a superficie: quia locus mensurat extrinsecum rem locatam, in qua locus non est ut in subiecto; superficies autem rem in qua est ut in subiecto. Locus autem non habet aliud esse a superficie; immo est ipsa continentis superficies, sive ultimum, ut ut dicitur in 4 Physic. Aliam divisionem ponit Philosophus in Praedicamentis, quae eadem est cum praedicta: quia habere partes habentes positionem ad invicem, est habere partes discretas, quod est numerum constituere: licet non omne continuum habeat partes habentes positionem ad invicem: sicut tempus quod est continuum materialiter, licet sit discretum formaliter: est enim numerus motus, ut dicitur in 4 Physic. Haec enim positio differt a positione (1) quae est praedicamentum: quia positio quae est praedicamentum: dicit ordinem partium totius locati ad locum; sed positio haec dicit ordinem partium in toto existentium ad invicem. Secunda differentia super discretum est commune et proprium. Commune autem facit numerum qui idem est hominum et equorum, immo omnium numerabilium. Licet enim diversitas sit in numero aptato diversis rebus, in numero tamen formaliter nulla est diversitas: potest enim numerus qui in se discretus est, formaliter a re numerata continuitatem habere, sicut tempus a motu, et ulna a panno. Proprium vero facit orationem quae non potest pluribus aptari, sed solum orationi prolatae, cuius ipsa oratio est mensura cum qua est, ut dicitur in

Praedic. Ipsa enim cum voce profertur, quia idem est causa et principium subiecti, et per se passionis ejus.

## CAPUT XXI.

Nunc restat de qualitate aliquid dicere. De qua, cum inter omnia accidentia quantitatis sit propinquior substantiae, cum habeat per se divisionem sicut substantia, ut dictum est; secundum inesse de ea agendum est. Et ideo per naturam subiecti sui agendum est de qualitate, sicut de quolibet inhaerente agendum est per naturam illius cui inhaeret. Illud autem cui inest qualitas, vel est corporeum, vel incorporeum. Si incorporeum; aut est de facili transiens, aut de difficili: si de facili, est dispositio; si de difficili, est habitus. Licet ista duo communiter reperiantur in corporeis sicut in incorporeis. Sanitas enim corporis habitus quidam est, et dispositio ad ipsum ordinata. Nos enim de propriis passionibus incorporeorum nihil novimus: ideo in libr. de Anima dicitur, quod omnes passionibus sunt ipsius conjuncti: et ista pertinent ad primam speciem qualitatis. Si autem illud sit corporeum, sic accipiuntur tres aliae species qualitatis: secunda tamen species qualitatis, quae est naturalis potentia vel impotentia, a primo Philosopho non numeratur inter species qualitatis, sed ponitur potentia quaedam passioni resistens. In praedicamentis vero ponitur propter modum denominandi quem habet qui convenit qualitati: et hoc ad Logieum pertinet. De tertia vero specie qualitatis agit Philosophus in Philosophia prima, et etiam in Praedicamentis, et de quarta similiter. De ad aliquid frequenter satis dictum est. De aliis autem generibus quae magis principia naturalia sequuntur, Philosophus in Praedicamentis suis parum loquitur, de quibus in Physicis latius pertractatur.

## CAPUT XXII.

His de natura generis perspectis, considerandum est, quomodo aliqua sunt in genere uno per se, sed ratione alterius adjuncti in aliud genus mutantur. Sciendum est igitur, quod per naturam praedicamenti seiri potest in quo genere quid sit ponendum. Cum enim ens diversimode reperitur in substantia et accidente, ut dictum est; per diversum modum essendi importatum in praedicatione, cui semper esse est adjunctum, faciliter sciatur ipsum praedicatum. Quod autem esse praedicatum sequatur, manifestum est per resolutionem ejusdemque verbi: nam facta resolutione, semper eodem subiecto manente, novum praedicatum adjungitur: ut puta, si dicatur « homo laborat », et resolvatur ipsum verbum, erit homo subiectum ut prius. Sed illud quod prius erat praedicatum « laborat », scilicet esse, adjungetur praedicatione: esse enim laborantem contingit hominem. Eodem modo de homine albo, cum album dicat esse quale, homo albus in praedicatione sumptus ad genus qualitatis pertinet. Si autem ponatur in subiecto, ut puta, si dicatur « homo albus est homo », cum praediceatur esse hominem, et non esse album, ad substantiam spectabit. In aliis autem praedicationibus idem reperitur, ut duplum, puta, si dicat subiectum, sive ipsam rem subiectam, ad quantitatem spectat natura dupli. Si autem praediceatur esse duplum, cum hoc includat respectum ad dimidium, duplum in genere relationis est. Omnia

(1) *Al. passione.*

haec praedicamenta sunt denominativa. Sed praedicatio solius substantiae de suis inferioribus, et similiter aliorum generum de suis speciebus, est univoca: non enim est aliud per essentiam animal et homo, color et albedo, sed idem: animal enim est quid hominis, ut dictum est, et color albedinis. Et ideo animal in quid (1) praedicatur de homine, et homo de Socrate, in quo tota natura generis substantiae reperitur, univocae, non per aliquam aggregationem, sicut est in acervo lapidum, vel structura domorum, vel aliqua alia colligatione; in quibus nullum adjunctorum praedicatur de toto, sicut animal de homine, et homo de Socrate, sed acqui-

(1) *Al.* Et ideo animal, inquit, praedicatur etc.

voce, ut dictum est, cum unumquodque illorum de toto praedicetur sub quo non est descensus ad aliquod singulare. Et ideo Plato quietem et terminum scientiae ponit ad individua quae sunt objecta propria sensus; quia sensus est singularium, quae sola sunt per se existentia in rerum natura, Substantiae enim separatae singularia quaedam sunt, solo tamen intellectu noscuntur earum notitiae proportionato. Cum igitur ea quae sunt in praedicamento substantiae solum per se esse possint, in substantia autem conveniant substantiae separatae et materiales, quae quidem supposita sunt habentia esse per se, esse autem est proprius effectus et terminus actionis divinae: ideo tam haec quam illae a Deo sunt, qui est super omnia benedictus. Amen.

# OPUSCULUM XL.

## DE POTENTIIS ANIMAE

( Edit. Rom. XLIII. )

### CAPUT I.

*Quot sunt animae, quot gradus viventium, quot genera potentiarum animae. Et primo determinat de vegetativa.*

Ut adjutorium homini collatum, et progressum peccati plenius videamus, de anima et ejus potentiis aliquid consideremus. In primis ergo oportet supponere cum Philosopho in 2 de Anim., quod anima est primum principium vitae in istis rebus inferioribus: animata enim viva dicimus, inanimata vero non viva. Ista enim vita duplici operatione manifestatur: cognitione scilicet, et motu; unde et philosophi, ut patet 1 de Anima, per ista duo animae naturam investigaverunt. Pro tanto autem dico primum principium vitae: quia, licet aliquod corpus possit esse principium vitalis operationis, ut oculus visionis et cor vitalis operationis; non tamen est primum: quia hoc non convenit eis in quantum sunt corpora, sed in quantum sunt talia corpora, scilicet viva; quod habent per animam. Quia quod est actu tale, hoc habet ab aliquo principio, quod est actus ejus. Anima ergo quae est primum principium vitae, non est corpus, sed actus corporis, et aliquid corpore altius. Nunc autem sic est secundum Philosophum in 2 Cael. et Mund., quod ea quae sunt infima in entibus, non possunt consequi perfectam bonitatem, sed aliquam imperfectam consequuntur paucis motibus: his vero superiora consequuntur perfectiorem bonitatem motibus multis: superiora vero his perfectam adipiscuntur bonitatem motibus paucis: summa vero perfectio invenitur in eo qui absque ullo motu perfecte possidet bonitatem. Quia ergo natura humana est inter corporalem et angelicam naturam constituta, ad majus bonum est ordinata quam natura corporalis quae ordinatur ad aliquod particulare bonum, quia ad aequale cum Angelis, scilicet ad beatitudinem: idcirco plures habet virtutes et operationes quam corporalia quae ordinantur ad bonum particulare, et quam Angeli qui eam in naturalibus excedunt. Sunt ergo in anima humana plures potentiae ad hoc ut consequi possit beatitudinem ad quam finaliter ordinatur. Ista autem potentiae per actus et objecta distinguuntur, ut dicitur 2 de Anima. Potentia enim secundum id quod est potentia, or-

dinatur ad actum: unde oportet rationem potentiae accipere ex actu ad quem ordinatur. Unde ubi (1) diversificatur ratio actus, oportet quod diversificetur ratio potentiae. Ratio autem actus secundum diversam rationem objecti diversificatur, ut dicitur in eodem. Actus enim potentiae activae comparatur ad objectum ut ad terminum et finem ejus, ut actionis augmentativae est finis et terminus ipsum quantum. Actus autem potentiae passivae comparatur ad objectum ut ad principium activum, ut visus ad colorem. Ex principio autem et fine omnis actus recipit speciem. Patet ergo, quod potentiae animae distinguuntur per actus et objecta. Quia ergo vegetare, sentire, et intelligere sunt diversi actus respectu diversorum objectorum, quia vegetare est quanti ut objecti, et sensus qualis, intellectus autem quidditas rei; patet quod anima habet tria genera potentiarum in generali: scilicet vegetativum, sensitivum et intellectivum. Nec ad praesens fiat vis, utrum sint in una essentia animae, vel in diversis: quia qualitercumque dicatur, semper aliquo modo dicuntur potentiae animae humanae: quia etsi sint tres substantiae, non tamen tres animae.

Sed contra hoc videtur esse Philosophus, 2 de Anima, ubi dicit: Potentias autem animae dicimus vegetativum, sensitivum, appetitivum, motivum secundum locum, et intellectivum. Sed istud non moveat nos: quia si volumus proprie loqui, tres sunt animae, et quatuor modi vivendi, et quinque genera potentiarum animae. Diversitas enim animarum accipitur secundum quod operatio animae supergreditur operationem naturae corporalis: secundum enim quod operatio ipsius animae magis aut minus dependet a corpore, secundum hoc nobilior aut imperfectior anima judicatur. Anima autem rationalis in tantum excedit naturam corporalem, quod propriam operationem suam exercet sine organo corporali. Anima autem sensibilis dependet a materia corporali plus, quia suam operationem exercere non potest sine organo corporali: sed tamen istam operationem non exercet mediante qualitate corporea: unde sensus suam operationem non exercet mediante calido, humido, frigido et sicco; licet istae qualitates requirantur ad compositionem seu dispositionem organi, per quod operationem suam exercet. Anima

(1) *Al. ibi.*

vero vegetabilis ita est immersa materiae, quod per organum corporale et per qualitatem corpoream suam operationem exereet. In hoc tamen excedit naturam corporalem, quia est principium intrinsecum operationum vivorum: operationes vero corporum inanimatorum sunt a principio extrinseco. Quod autem operatio animae vegetativae fiat per qualitatem corpoream, aperte habetur 2 de Anima ubi (1) dicitur, quod digestio et omnia quae digestionem consequuntur, fiunt virtute caloris ab anima regulati. Per hanc ergo considerationem animae distinguuntur. Modi vero vivendi distinguuntur secundum gradus diversos viventium. Sunt enim quaedam quae solum habent vegetativum, ut plantae: quaedam in quibus cum vegetativo invenitur sensitivum tantum sine motu, ut animalia imperfecta immobilia, ut conchilia et hujusmodi: alia sunt quae cum istis habent motum localem, ut animalia perfecta, ut equus et hujusmodi: alia sunt in quibus invenitur intellectus, ut in hominibus. Et per istam considerationem appetitivum non constituit aliquem gradum viventium: quia in quibuscumque invenitur sensitivum, invenitur appetitivum, ut patet in 2 de Anima. Si vero consideremus genera potentiarum, sic distinguuntur secundum diversitatem objectorum. Quanto enim potentia respicit minus universale objectum, tanto est inferior. Unde vegetativum est respectu corporis uniti, quia non nutrit nisi corpus sibi unitum: sensitivum autem non solum corpus sibi unitum, sed corpus sensibile respicit, sive unitum sive non: intellectivum autem respicit omne ens generaliter, eo quod omne ens est intelligibile. Ideo inferior est potentia vegetativa, superior sensitiva, sed suprema intellectiva. Et sic habemus tres potentias animae acceptas secundum quod res conjungitur ipsi animae. Secundum vero quod e contrario anima conjungitur ipsis rebus, habemus duas potentias. Quia secundum quod anima inclinatur ad rem extrinsecam ut ad finem, qui est principium in intentione, accipitur appetitivum. Secundum vero quod inclinatur ad rem extra ut in terminum suae operationis et motus, accipitur motivum secundum locum. De vegetativa anima et potentia prius considerandum est.

## CAPUT II.

### *De anima vegetativa, et ejus potentiis.*

Advertendum tamen prius, quod dicitur anima vegetabilis a vegetando, sive vivificando. Vivere enim, ut 2 de Anima habetur, dupliciter accipitur. Uno modo vivere est actus primus ipsius viventis: et secundum hoc vivere idem est quod habere vitam, vel vivum esse: et sic vivere viventibus est esse, ut dicitur 2 de Anima. Alio modo dicitur vivere, uti vita, vel exercere opera vitae. Vivere primo modo dictum est ab anima vegetativa prout est forma substantialis et actus corporis; sed secundo modo acceptum, est a vegetativo prout est potentia. Loquendo ergo de vegetativo ut est potentia, dicit Philosophus, 2 de Anima, quod ejus operationes sunt generare, alimento uti, et augmentum. Sicut enim dictum est, potentia vegetativa habet pro objecto corpus in quo est: ad quod cor-

pus tria sunt necessaria. Unum est: quod habeat esse: et ad hoc ordinatur generativa. Aliud est, quod habeat esse perfectum: et ad hoc ordinatur augmentativa. Aliud est, quod in statu debito conservetur: et ad hoc ordinatur nutritiva. Inter istas autem potentias generativa est nobilior, ut dicitur 2 de Anima; quia nutritiva et augmentativa deserviunt generativae, nutritiva vero augmentativae. Item quia generativa exereet suam operationem quodammodo in corpus exterius, quia non generat corpus in quo est, sed aliud, magis accedit ad operationem animae sensitivae, quae habet operationem suam in res exteriores. Nutritiva, quae est principium conservationis viventium per restaurationem deperditi, habet quatuor vires, quae naturales appellantur: scilicet attractivam, quae attrahit alimentum nutritivum corporis: retentivam, quae illud retinet donec digeratur: digestivam, quae illud digerit quod attractiva attraxit et retentiva retinuit: expulsivam, quae residuum ex nutrimento superfluum expellit. Hae per quatuor qualitates primas operantur: attractiva enim operatur per calidum et siccum: retentiva per frigidum et siccum: digestiva per calidum et humidum: expulsiva per frigidum et humidum. Vis vero augmentativa est principium crementi corporis, et perfectionis debitaе quantitatis. Vis autem generativa est principium producendi de se tale quale ipsum est, ut ex homine hominem, plantam ex planta. Haec vis generativa habet tres vires, secundum Avicennam. Prima est seminativa, quae in masculis et feminis semen generat. Secunda est immutativa, quae virtutes quae sunt in seminibus permiscet contemperando, secundum quod complexionem cujuslibet membri corporis formandi convenit. Tertia est formativa, quae ex sic permixtis seminibus membra format et configurat.

## CAPUT III.

### *De potentia sensitiva, et quinque sensibus exterioribus.*

Viso de potentia vegetabili, videamus de sensibili potentia. Haec autem potentia sensibilis dividitur: quoniam quaedam est apprehensiva, et quaedam motiva. Apprehensiva autem sensibilis dividitur in apprehensivam de foris, et in apprehensivam de intus. Apprehensiva de foris dividitur in quinque sensus exteriores. Horum autem distinctio secundum Philosophum accipienda est secundum illud quod per se ad sensum pertinet. Illud autem quod per se ad sensum pertinet, est objectum exterius, scilicet sensibile, a quo sensus natus est immutari. Unde secundum diversitatem immutationum sensus ab exteriori sensibili, accipiuntur isti quinque sensus. Est autem duplex immutatio. Una in quantum forma immutationis vel similitudo formae accipitur in mutato secundum esse naturale, ut calor in calefacto. Alia est spiritualis immutatio: scilicet quando similitudo immutantis recipitur in immutato secundum esse spirituale, ut similitudo coloris in pupilla, quae non fit per hoc colorata. Spiritualis autem immutatio essentialis est sensui, quia sine illa non est sensus: propter quod naturalia corpora non sentiunt licet immutentur naturaliter, quia non immutantur spiritualiter. Est ergo aliquis sensus in quo invenitur

(1) *At. ut.*



immutatio spiritualis soluitur, ut in visu. In quibusdam autem cum immutatione spirituali invenitur immutatio naturalis. Hoc autem potest esse vel ex parte organi, vel ex parte objecti. Ex parte objecti potest esse immutatio naturalis dupliciter: vel secundum sonum, ut patet in auditu, cuius objectum est sonus, qui causatur ex percussione, et aeris commotione. Alio modo potest contingere immutatio ex parte objecti secundum alterationem, ut patet in olfactu, cuius objectum est odor, qui causatur eo quod calidum alterat corpus ad hoc quod spiraret odorem: cuius signum est, quod odor magis sentitur in aestate. Alio modo potest esse immutatio naturalis ex parte organi; et hoc contingit in tactu et gustu: manus enim tangens calidum calefit, et lingua humectatur per humiditatem saporis. Horum autem duorum sensuum distinctio ex hoc sumitur, quod licet sensus gustus comitetur sensum tactus in lingua, non tamen ubique. Vel possumus dicere, quod organum tactus immutatur primo et per se a qualitate quae obicitur sibi proprie, sed organum gustus ab illa quae praecambula est illi: unde lingua non fit dulcis vel amara, sed humectosa vel sicca. Visus sic definitur a Damasceno, lib. 2, c. 18: Visus est primus sensus, cuius organa sunt qui ex cerebro progrediuntur nervi et oculi, et sentit secundum rationem primam colores, dignoscit autem et cum colore coloratum corpus. Dicitur autem primus sensus non in constituendo animal, quia sic tactus est primus sensus, ut dicitur 2 de Anima; sed in apprehendendo, et etiam quia prior est dignitate. Unde patet, quod organum proximum et extrinsecum visus sunt oculi: primum autem et intrinsecum sunt nervi visuales. Istius autem objectum est color. Auditus est vis ordinata in nervis mollibus a cerebro procedentibus ad apprehendendum suum causatum ex aeris commotione constricti inter percussione et percussum. Objectum autem auditus est sonus, qui habet immutare auditum per hoc quod habet tangere aerem quietum collectum in concavitate nervi auditus. Olfactus est vis ordinata in anteriori parte cerebri, cuius organi sunt nares, et duae mollities similes capitibus mamillarum, per quas remittit ad cerebrum odorem sibi oblatum ab aere, cui huiusmodi odor permiscetur. Gustus est vis ordinata in nervo expanso supra corpus linguae, ad apprehendendum diversos sapes resolutos ex corporibus contingentibus ipsam. Tactus est vis diffusa per ossa, carnem et cutem, per quem apprehenditur calor, frigus, humiditas, siccitas, durities et mollities, asperitas et levitas. De unitate tactus dicit Philosophus, 2 de Anima, quod est unus in genere, et dividitur in multos secundum speciem, et ideo plurium contrarietatum est. Tamen potest dici unus, quia etsi sit plurium contrarietatum, omnes tamen continentur sub una contrarietate nobis ignota et innominata. Sicut autem est in visu, quod unum habet organum publicum extra, scilicet pupillam, et aliud intra, in quo fit iudicium, sicut vult Philosophus in lib. de Sensu et Sensato; ita est et in tactu. Quia organum in quo fit apprehensio, est caro, et quaelibet pars secundum aequalitatem mixta. Illud autem in quo ultimo fit iudicium, est nervus interior et cerebrum, quod licet sit de se insensibile, est tamen principium sentiendi ipsi nervo. Est autem caro in tactu et organum et medium, sed ratione diversorum: quia ratione aequalitatis com-

mixtionis, quae est in potentia respectu cuiuslibet excellentiae qualitatum, est organum; ratione vero aequalitatis commixtionis consimilis existentis in ea, est medium illud deferens.

## CAPUT IV.

*De quatuor potentiis sensitivis interioribus secundum earum naturas.*

Viso de virtute sensitiva apprehensiva deforis, videndum est de apprehensiva deintus. Cum enim natura non deficiat in necessariis, ut dicitur 5 de Anim., tot potentias et operationes oportet esse in animali, quot requiruntur ad vitam animalis perfecti. Requiritur autem ad vitam animalis perfecti, ut non solum apprehendat rem cum actu est praesens, sed etiam cum actu est absens. quia cum non habeat omnia necessaria sibi conjuncta, oportet quod moveatur ad distantiam. Cum autem moveatur per apprehensionem, non posset moveri ad rem distantem et absentem, nisi rem absentem apprehenderet. Cum ergo per sensus exteriores apprehendat rem solum quantum ad sui praesentiam, necesse habuit habere virtutem sensitivam, per quam rem absentem apprehenderet, et eius speciem retineret. Sicut ergo sensus proprii et sensus communis ordinantur ad apprehensionem formarum sensibilium in rei praesentia, sic et aliae vires in rei absentia. Ista autem vires apprehensivae sunt quinque sensus secundum Avicennam, sed quatuor secundum Averroem. Prima est sensus communis, secunda est phantasia, tertia imaginativa, quarta aestimativa seu cogitativa, quinta memorativa. Secundum autem Averroem phantasia et imaginativa sunt eadem potentia. Verius tamen dicitur, quod sunt quatuor. Sensus communis secundum Avicennam est virtus cui redduntur omnia sensata. Est ergo sensus communis a quo omnes sensus proprii derivantur, et ad quem omnis impressio eorum renuntiatur, et in quo omnes junguntur. Ejus enim organum est prima concavitas cerebri, a quo nervi sensuum particularium oriuntur; et hinc est quod quantum ad distinctionem spiritus animalis, sensus proprii derivantur a communi; quantum vero ad apprehensionem et renuntiationem sensus communis fit in actu per proprios; quia nihil apprehenderet nisi per hoc quod sensus proprii redeunt ad ipsum cum suis lucris, ut dicit Avicenna. Ista autem potentia est animali necessaria propter tria, quae habet facere sensus communis. Primum est, quod habet apprehendere omnia sensata communia, quae sensus proprius non apprehendit: non enim sensus proprius primo et per se apprehendit figuram vel motum, sed quasi per accidens. Sensus autem communis per se apprehendit sensibilia communia, quae sunt quinque secundum Philosophum, 2 de Anima: scilicet motus, quies, magnitudo, figura, numerus. Est enim triplex sensibile, ut ibidem dicit Philosophus. Unum est proprium, quod scilicet non contingit alio sensu sentiri, et circa quod non contingit sensum proprium errare: ut visus circa colorem, auditus circa sonum. Aliud est commune, quod dividitur in quinque, ut dictum est, quae per se respondent sensui communi. Tertium dicitur sensibile per accidens, ut album, quod est Darii filius; quia album sentitur per se, cui accedit Darii filium esse. Secundus actus sensus commu-

nis est apprehendere plura sensibilia propria, quod non potest aliquis sensus proprius: non enim potest animal judicare album esse dulce vel non esse, vel ponere diversitatem inter sensata propria, nisi sit aliquis sensus qui cognoscat omnia sensata propria: et hic est sensus communis. Tertius vero actus est sentire actus propriorum sensuum, ut cum sentio me videre: non enim potest hoc sensus proprius, ut probatur 2 de Anima; quia unius sensus proprii unum est objectum. Unde cum actus et objectum visus, scilicet color, sint duo cognoscibilia, iudicium utriusque non pertinet ad unum sensum proprium.

Secunda vis interior est phantasia, quae est motus factus a sensu secundum actum, ut dicitur 5 de Anima: quia phantasia est potentia mota a specie sensibili, per quam et sensus proprius et sensus communis fit in actu. Non solum autem movetur ab illa specie, sed etiam ipsam in absentia rei retinet, quam sensus communis recipit. Recipere autem et retinere in corporibus reducuntur ad diversa principia: nam humidum bene recipit, et male retinet: siccum vero e contrario bene retinet, et male recipit. Cum ergo potentia sensitiva sit actus organi corporalis, oportet esse aliam potentiam quae recipit species sensibilem, et quae conservat. Et hujus organum est post organum sensus communis in parte cerebri quae sic non abundat humido sicut prima pars cerebri in qua situm est organum sensus communis. Et ideo melius potest retinere formas sensibiles re absente.

Tertia vis sensitiva est aestimativa: et hujus necessitas sic patet. Animal enim non solum movetur propter delectabile et contristabile secundum sensum, quia sic non esset necesse ponere in eo nisi apprehensionem et retentionem formarum, in quibus sensus delectatur vel horret; sed aliquando fugit vel quaerit aliqua propter diversas alias commoditates vel utilitates et nocumenta. Sicut ovis fugit lupum non propter indecentiam coloris vel figurae, sed quasi inimicum suae naturae: similiter avis colligit paleam, non quia delectat sensum, sed quia utilis est ad nidificandum. Oportet ergo ponere in animali aliquod principium perceptionis hujusmodi intentionum aliud quam phantasiam, ejus immutatio est a forma sensibili, non autem perceptio hujusmodi intentionum. Et hujusmodi virtus est aestimativa, quae est apprehensiva intentionum quae per sensum non accipiuntur. Unde Algazel dicit: « Aestimativa est virtus apprehendens de sensato quod non est sensatum, sicut ovis inimicitias lupi. » Hoc enim non facit per oculum, sed per aliam virtutem quae est in brutis hoc quod est intellectus in hominibus. Sicut enim aliquis cognoscit per intellectum quod non cognoscit per sensum, licet non cognoscat nisi accipiendo a sensu; ita aestimativa, licet modo inferiori. Organum autem hujus potentiae ponitur in brutis in posteriori parte mediae partis cerebri. In hominibus autem ejus organum ponitur media cellula cerebri, quae syllogistica appellatur. Unde, licet quantum ad formas sensibiles non sit differentia inter hominem et alia animalia, eo quod fiunt per infusionem a sensibilibus exterioribus; tamen quantum ad intentiones est differentia aliqua. Sicut aliqua animalia percipiunt hujusmodi intentiones, quae sunt bonum et

conveniens et nocivum, solo instinctu naturali; homo autem ultra hoc per quamdam collationem. Et ideo quae in aliis animalibus dicitur aestimativa naturalis, in homine dicitur cogitativa: quae per quamdam collationem hujusmodi intentiones adinvenit. Quae etiam ratio particularis dicitur, quia scilicet est collativa intentionum individualium, sicut ratio universalis intentionum universalium. Avicenna vero posuit unam potentiam inter aestimativam et phantasiam, ejus sit componere et dividere inter formas imaginatas: sicut cum ex forma auri imaginati et montis componimus unam formam montis aurei, quam nunquam vidimus. Sed quia hanc operationem non vidimus nisi in hominibus, non debemus propter hoc ponere novam potentiam sensitivam. Ad hoc enim sufficit in homine virtus imaginativa, vel phantasia, ut dicit Averrois in lib. suo de Sensu et Sensato.

Quarta vis sensitiva interior est memorativa, vel memoria. Est autem memoria secundum Algazelem vis conservatrix harum intentionum quas apprehendit aestimativa; et ideo est area intentionum, sicut phantasia vel imaginativa est conservatrix formarum et area illarum: et istae intentiones non sunt sensatae, sed a sensibus elicita. Organum autem hujus potentiae est in posteriori concavitate cerebri. Unde Avicenna 6 de Naturalibus: vis memorialis est quae est ordinata in posteriori concavitate cerebri, continens quod apprehendit vis aestimationis de intentionibus non sensatis singularium et sensibilem. Differenter est autem in hominibus et in brutis: quia in brutis memoria sola proprie, reminiscencia autem minus proprie. Quia secundum Avicennam et Algazelem in brutis instinctus naturae est loco inquisitionis, ut per propriam intentionem veniat in propriam illius formam sensibilem, et ex forma sensibili et propria imaginatione in rem a qua est accepta in praeterito: et sic bruta observant tempus vindictae, et memorantur injuriarum et beneficiorum, et ista recordatio subita est. In hominibus vero non solum est memoria, sed etiam reminiscencia, quae fit per quamdam collationem intentionum individualium praeviarum ad formas syllogistice discurrendo usque ad ultimo quaesitum. Istam autem excellentiam non habent in homine aestimativa et memorativa per id quod est proprium parti sensitivae, sed per affinitatem et propinquitatem ad rationem universalem per quamdam influentiam: semper enim virtus inferior fortificatur ex conjunctione sui cum virtute superiori, eo quod supremum naturae inferioris attingit infimum naturae superioris, ut dicit Dionysius.

His visis patet quomodo est excellentia in potentiis animae sensitivae. Sensus enim proprius non potest apprehendere sensata communia primo et per se, sed quasi per accidens; sensus autem communis potest. Item, sensus proprius non potest apprehendere nisi unum sensatum, sensus vero communis plura. Item sensus proprius non potest actum proprium cognoscere, quod facit sensus communis. Item sensus communis non potest aliquid apprehendere, nisi ad praesentiam rei extra: phantasia autem formam rei retinet re absente. Item phantasia non potest apprehendere nec retinere: nisi formas a sensibilibus acceptas. Aestimativa autem potest intentiones circa hujusmodi formas apprehendere. Aestimativa vero licet possit hujusmodi intentiones apprehendere, non tamen

retinere; quod habet memorativa: et ultra hoc non potest virtus sensitiva formam rei apprehendere et abstrahere a conditionibus materialibus. Ideo semper forma apprehensa a sensu exteriori sive (1) interiori est particularis.

## CAPUT V.

*De virtute animalis motiva sensitiva.*

Viso de virtute sensitiva apprehensiva, videntur est de virtute motiva. Motiva autem sensitiva dividitur: quia quaedam est naturalis, quaedam animalis. Naturalis est quae non movet (2) per apprehensionem, nec est subjecta imperio rationis: et talis est virtus vitalis et pulsativa quae movet arterias et cor secundum dilatationem et constrictionem: et huiusmodi est in corde sicut in proprio organo. Unde solum habet esse in animalibus perfectis pulmonem et cor habentibus: et haec vis per spirationem et respirationem est principium contemperandi calorem cordis et corporis. Motiva animalis est, quae movet per apprehensionem: et haec dividitur: quia quaedam movet per modum dirigentis, quaedam per modum imperantis, quaedam per modum exequentis. Motivae per modum dirigentis sunt phantasia et aestimativa, in quantum appetitui ostendunt formam vel intentionem convenientem vel disconvenientem: phantasia enim movet ostendendo formas sensibiles, aestimativa ostendendo intentiones. Motivae autem imperantes et facientes motum, sunt (3) concupiscibilis et irascibilis, quae sunt partes appetitus sensitivi: concupiscibilis enim est vis imperans motum, ut appropinquetur ad ea quae putantur necessaria vel utilia, et hoc appetitu delectandi: irascibilis est vis imperans motum ad repellendum id quod putatur nocivum vel corrumpens, et hoc appetitu vindicandi aut vincendi. Vis exequens motum istum est vis exterior, quae diffusa est in musculis et lacertis et nervis membrorum. Advertendum tamen est, quod sensibilitas et sensualitas differunt. Quia sensibilitas comprehendit omnes vires sensitivas, tam apprehensivas quam appetitivas. Sensualitas autem dicit proprie partem animae sensibilis, per quam est motus ad prosequendum vel fugiendum quod apparet consentaneum vel dissentaneum voluptati animalis, et hoc est secundum ordinem ad imperium rationis. Unde sensualitas licet praecoxigat vires sensitivas apprehensivas quasi praecambulas, tamen ad essentiam ejus non pertinent, sed appetitus sensitivus. Aestimativa etiam valde propinqua est sensualitati, quia sibi confinis est, quia sensualitas dicit ordinem quemdam ad rationem. Ex quo patet, quod in brutis non est sensualitas vocans ad peccatum, sed in solis hominibus: in quibus propter ordinem ejus ad rationem, est porta corruptionis, et janua culpa.

## CAPUT VI.

*De potentia intellectiva.*

Viso de potentia vegetativa et sensitiva, dicendum est de intellectiva. Potentia autem haec prima

sui divisione dividitur in apprehensivam et motivam vel appetitivam. Hae duae potentiae solum inveniuntur in substantiis spiritualibus et intellectualibus, ut dicit Commentator super 11 Metaph. Ratio huius divisionis est, quia quamlibet formam sequitur aliqua varia inclinatio. Sicut ergo formam naturalem sequitur inclinatio vel appetitus naturalis, et formam sensibilem sequitur appetitus sensitivus; ita formam universalem vel intellectualem apprehensam sequitur appetitus intellectualis. Et quia appetitus intellectualis sequitur apprehensionem; ideo prius dicendum est de apprehensivis, quam de appetitivis.

Ad apprehensionem intellectualem duo principia sunt necessaria: scilicet intellectus quo est omnia facere, idest intellectus agens: et intellectus quo est omnia fieri, idest intellectus possibilis, ut dicitur in 3 de Anima. Sicut enim in qualibet natura sunt principia sufficientia ad generationem propriam vel operationem, ita in anima. Per unam autem et eandem potentiam non potest actus intelligendi expleri. Quia anima nihil intelligit nisi informetur specie, ad quam est in potentia, sicut pupilla ad colores. Per illam potentiam autem per quam recipit, non potest educi in actum: sed oportet quod educatur in actum per aliud quod est actu et respectu intellectus possibilis et respectu speciei intelligibilis. Cum autem species non recipiatur in intellectu possibili nisi depuretur a sensibilibus materialibus, et hoc non possit fieri nisi per id quod est actu immateriale; patet quod oportet ponere ultra intellectum possibilem, intellectum agentem in anima; ita quod anima per aliam potentiam est in potentia, et per aliam est in actu respectu specierum intelligibilium. Sicut videmus quod ignis quando agit in aquam, agit in eam per caliditatem quam habet actu, et patitur ab aqua per frigiditatem quam habet in potentia, et aqua habet eam actu. Ita anima quia actu est immaterialis, est in actu respectu speciei immaterialis, et in potentia respectu speciei materialis; et cum vult potest eam actu facere, et hoc per intellectum agentem. Est autem in potentia respectu speciei, in quantum non habet eam actu, et in tantum potest ab ea pati. Ex quo patet quae sit operatio intellectus agentis, quia abstrahere species a materia et sensibilibus materialibus. Ista autem abstractio non est intelligenda secundum rem, sed secundum rationem. Sicut enim videmus in potentia sensitivis, quod licet aliqua sint conjuncta secundum rem, tamen illorum sic conjunctorum visus vel alius sensus potest unum apprehendere altero non apprehenso; ut visus apprehendit colorem pomi qui tamen saporem colori conjunctum non apprehendit; sic multo fortius potest esse in potentia intellectiva: quia licet principia speciei vel generis nunquam sint nisi in individuis, tamen potest apprehendi unum non apprehenso altero: unde potest apprehendi animal sine homine, asino et aliis speciebus: et potest apprehendi homo non apprehenso Socrate vel Platone: et caro et ossa et animal (1) non apprehensis his carnibus et ossibus: et sic semper intellectus formas abstractas, idest superiora sine inferioribus intelligit. Nec tamen falso intelligit intellectus; quia non judicat hoc esse sine hoc, sed apprehendit et judicat de uno, non judicando de altero. Objectum autem quod requi-

(1) *Al.* sine interiori.(2) *Al.* non manet.(3) *Al.* sicut.(1) *Al.* et anima.



ritur ad intelligendum, est phantasma et similitudo rei particularis, quae est in organo phantasiae. Unde, sicut visio corporalis completur per tria: scilicet per colorem visui objectum, per visum recipientem similitudinem coloris, per actum lucis super colorem irradiantis, et de potentia visibili actu visibile facientis; ita intelligere fit per intellectum possibilem ut recipientem similitudinem phantasmatis, et per operationem intellectus agentis speciem immaterialem a phantasmate abstrahentis, et per ipsum phantasma suam similitudinem in intellectum possibilem imprimentis. Advertendum tamen, quod phantasma non intelligitur sicut color videtur; sed pro tanto dicitur objectum intellectus, quia suam operationem non exercet sine phantasmate. Proprium autem objectum ipsius intellectus possibilis est quod quid est, idest quidditas ipsius rei, ut dicitur in 5 de Anima. Sicut enim est gradus in potentiis, ita in objectis. Quia sicut sensus exterior non tantum potest quantum sensus interior, nec interior sicut intellectus; ita objectum sensus exterioris quae sunt qualitates de tertia specie qualitatis, scilicet passibiles qualitates, non est ita altum sicut proprium objectum sensus interioris, scilicet sensus communis, phantasiae et imaginativae, quod est quantitas quae immediate adhaeret substantiae. Omnia autem ista excellit substantia rei: quia sicut qualitas non potest esse sine quantitate, ita nec utraque sine substantia. Substantia ergo rei est id quod intellectus intelligit. Similitudo autem illius rei quae est in anima, est illud quo formaliter intellectus rem extra intelligit: phantasma autem est illud quo quasi effective intelligit in acquirendo scientiam: intellectus autem agens est qui omnia illa actu agit et facit; intellectus vero possibilis est qui speciem recipit, et actum intelligendi elicit. Et sic solus intellectus possibilis est qui est subjectum scientiae, maxime acquisitae. Intellectus autem agens est qui nihil recipit, sed est potentia animae, quo omnia facit actu intelligibilia quae per naturam suam sunt potentia solum intelligibilia, cum habeant materiam quae intellectum impedit, quia a-numquodque intelligitur in quantum habet esse immateriale.

Intellectus autem possibilis, cuius solius est recipere speciem intelligibilem, quadrupliciter potest considerari. Uno modo secundum quod est omnino in potentia ad scientiam: et sic est ante intelligere: et hoc modo appellatur a philosophis materialis, idest potentialis, quasi nullo modo actu. Secundo modo potest considerari, ut habet aliquam dispositionem ad scientiam, sed incompletam, ut cum habet principia per se nota alicujus scientiae: et sic appellatur intellectus dispositus. Tertio modo potest considerari prout habet habitum scientiae, non tamen utitur habitu: et sic appellatur intellectus perfectus in habitu. Quarto modo secundum quod actu considerat secundum habitum; et sic dicitur intellectus adeptus in actu; et de isto intellectu volunt quidam intelligi illud verbum Philosophi in 3 de Anima, quod intellectus non quandoque intelligit, quandoque non, sed semper.

Iste autem intellectus possibilis licet secundum diversas ejus perfectiones et operationes diversimode nominetur, non tamen potest aliquo modo multiplicari secundum substantiam potentiae. Cujus ratio est, quia, ut dictum est, potentia non diversificatur nisi secundum diversam rationem objecti. Nunc autem

sic est, quod quando potentia aliqua ordinatur ad aliquod objectum sub ratione universali objecti, non diversificatur potentia illa secundum diversitatem particularium differentiarum objecti: unde visus, quia respicit colorem sub universali ratione coloris, non diversificatur secundum diversitatem albi et nigri: quia nec album nec nigrum considerat nisi in quantum coloratum. Cum autem intellectus possibilis sit quo est omnia fieri, ut dicitur 5 de Anima, respicit objectum suum sub ratione communi entis: et ideo secundum nullam differentiam entis potest diversificari potentia intellectiva apprehensiva. Respectu tamen istius objecti diversificatur intellectus agens et intellectus possibilis, quia respectu objecti ejusdem oportet esse aliam potentiam activam, et aliam passivam, ut dictum est.

Ex hoc patet, quod idem sit intellectus speculativus et practicus. Cujus ratio est, quia illud quod accidentaliter habet se ad rationem objecti quam respicit aliqua potentia, non diversificat potentiam. Quia enim accidit colorato, quod sit magnum aut parvum, homo vel asinus; ideo omnia ista per unam potentiam visivam apprehendantur. Constat autem quod accidit apprehenso per intellectum, quod ordinetur ad opus, vel non ordinetur. Unde, cum secundum hoc differant intellectus speculativus et practicus; quia finis speculativi est sola veritas, practici vero opus, ut dicitur 2 Metaph.: manifestum est, quod sunt una potentia. Quod aperte vult Philosophus 5 de Anima: ubi dicit, quod intellectus speculativus extensione, scilicet apprehensi ad opus, fit practicus: ex quo patet quod solo fine differunt.

Ex hoc etiam apparet, quod intellectus et intelligentia non sunt diversae potentiae: sed differunt (secundum quod intelligentia accipitur a Philosopho), non quidem sicut potentia a potentia, sed sicut actus a potentia. Intelligentia enim est actus ipsius intellectus, qui est intelligere (1) juxta illud Philosophi 5 de Anima: indivisibilem intelligentia est, in quibus non est falsum. Intelligentia tamen aliquando a philosophis accipitur pro natura vel substantia separata; quae intelligentia dicitur, quia semper intelligit.

Intellectus autem a ratione differre non potest: quod patet si eorum actus diligenter consideretur. Intelligere est veritatem simplici intuitu considerare: ratiocinari autem est de uno intellecto ad aliud procedere ad veritatem intelligibilem cognoscendam: unde ratio incipit semper ab intellectu, et ad intellectum terminatur. Unde patet, quod ratiocinari et intelligere differunt sicut moveri et quiescere. Constat autem secundum Philosophum, 2 Caeli et Mundi, quod per eandem potentiam movetur aliquid ad locum et quiescit in loco in corporalibus. Ergo multo fortius in spiritualibus per unam et eandem potentiam ratiocinamur et intelligimus; veritatem inquirimus, et inventam intelligimus.

Ratio etiam superior et inferior diversae potentiae esse non possunt: quia ratio inferior ex hoc dicitur, quod rebus inferioribus intendit; ratio superior, quia superioribus. Superioribus autem intendere potest dupliciter: uno modo speculando ea in seipsis; alio modo accipiendo ex ipsis regulas inferiorum agendorum. Ista autem duo

(1) *Al.* qui est intelligentia.

objecta, scilicet temporalia et aeterna, comparantur ad cognitionem nostram dupliciter. Uno modo secundum viam inventionis: et sic temporalia sunt nobis via deveniendi in aeterna, juxta illud Rom. 2: « Invisibilia Dei per ea quae facta sunt, intellecta conspiciuntur. » Alio modo per viam resolutionis et iudicii: et sic per rationes aeternorum temporalia disponimus. Nunc autem sic est, quod licet medium et illud ad quod per medium devenitur, possint ad diversos habitus pertinere, nunquam tamen ad diversas potentias, sed ad eandem. Unde, licet principia et conclusiones pertineant ad diversos habitus; quia principia ad habitum intellectus principiorum, conclusiones ad habitum scientiae conclusionum; tamen utraque pertinent ad eandem potentiam. Ergo consideratio aeternorum, licet ad alium habitum pertineat quam consideratio temporalium, quia illa ad sapientiam quae est de aeternis, ista ad scientiam quae de temporalibus, tamen oportet quod ad eandem potentiam pertineat utrorumque consideratio. Dicitur tamen pars superior et inferior, quia pars a partitione dicitur. Ibi autem licet non sit partitio potentiarum, tamen partitio habituum et officiorum est ibi: et ideo dicuntur ab Augustino duae partes.

## CAPUT VII.

*De voluntate et libero arbitrio, quod sunt idem.*

Viso de apprehensiva intellectiva, videamus de motiva, vel appetitiva, quae dicitur voluntas. Voluntas autem est duplex: una naturalis; alia deliberativa. Potest enim voluntas moveri motu naturali sicut aliae potentiae, et hoc ad salvationem naturae; et sic dicitur voluntas naturalis. Alio modo potest moveri ad aliquid, secundum quod abundat ab aliis in libertate, sequendo suum motorem, qui est intellectus vel phantasia; et sic est indeterminata respectu intelligibilium; unde sic est deliberativa. Nec tamen sunt diversae voluntates, sed una diversimode mota, vel movens seipsam. Ista autem voluntas per irascibilem et concupiscibilem non dividitur, sicut appetitus sensitivus, qui (1) respicit bonum sub particulari ratione boni, sicut et sensus particularem rationem boni apprehendit; ideo secundum particulares rationes bonorum diversificantur appetitus sensitivi: concupiscibilis enim respicit propriam rationem boni, in quantum est delectabile secundum sensum, et conveniens naturae; irascibilis autem respicit particularem rationem boni, secundum quod est repulsivum et pugnativum ejus quod infert noxamentum. Voluntas autem respicit bonum sub universali ratione boni: et ideo non diversificantur in ea potentiae secundum diversas particularium bonorum rationes secundum concupiscibilem et irascibilem. Voluntas autem deliberativa et liberum arbitrium idem sunt. Non enim potest esse habitus, ut quidam dixerunt; quia per habitus nos habemus determinate ad passiones et actus bene vel male, ut dicitur 2 Ethic. Liberum autem arbitrium indifferenter se habet ad bene agendum vel male. Unde oportet dicere, quod sit potentia eadem, scilicet eum voluntate. Non tamen nominat voluntatem absolute, sed per comparationem ad rationem, in quantum scilicet manet in

ea virtus rationis deliberantis: unde sicut velle est voluntatis absolute, ita eligere est liberi arbitrii, in quantum in ea manet virtus rationis. Licet autem sit potentia, tamen per actum suum aliquando nominatur; unde dicitur liberum arbitrium quasi liberum de ratione iudicium. Facultas etiam dicitur, quia potentia est expedita ad operandum. Dicitur etiam habitus a Bernardo, non prout habitus dividitur contra potentiam, sed prout dicit aliquam habitudinem per quam aliquis eodem modo se habet ad actum. Unde breviter eodem modo comparatur liberum arbitrium ad voluntatem, sicut ratio ad intellectum: quia sicut ratio per discursum unius ad alterum cognoscit, quod intellectus simpliciter et absolute facit, sic liberum arbitrium est appetitus alicujus ad aliquid consequendum; unde est eorum quae sunt ad finem. Voluntas autem est appetitus rei absolute: unde dicitur esse ipsius finis, qui propter se appetitur.

## CAPUT VIII.

*In quibus potentiis animae est peccatum, et in quibus non.*

Viso de potentiis animae, videndum est in quibus potest esse peccatum, et in quibus non. Dicendum est ergo secundum Gregorium, quod « omnis creaturae nomine homo intelligitur, quia cum omni creatura habet aliquid commune. Habet enim esse cum lapidibus, vivere cum arboribus, sentire cum bestiis, intelligere cum Angelis. » Ratione vero qua homo habet esse, non convenit ei aliquis motus, quia sic motus conveniret omnibus entibus. Ratione vero qua vivit, sentit et intelligit, convenit ei triplex motus: scilicet naturalis, animalis et rationalis. Motus autem naturalis est secundum necessariam inclinationem praeter alicujus delectabilis apprehensionem. Et quia ubi necessaria est inclinatio, ibi nulla subjectio vel obedientia ad rationem; ideo motus naturalis in homine, sicut est motus nutritivae, augmentativae, generativae, secundum quod sequuntur naturae necessitatem, et antecedunt apprehensionem, non possunt esse subjectum peccati, eo quod peccatum aliquo modo est voluntarium et rationi subjectum: unde in actibus partis vegetativae non potest esse peccatum. Motus vero animalis sequitur delectabilis apprehensionem, et habet esse in appetitu sensitivo, qui est rationalis per participationem; unde dicit Philosophus 1 Ethic. in fin.: « Est itaque aliquo modo obedibile rationi » etsi non simpliciter propter corruptionem et infectionem. Unde, quia peccatum est actus moralis et ordinatus, potest esse in illa potentia quae subiacet aliquo modo principio morali, idest voluntati. Quia tamen actus isti vel motus animales non omnino subsunt imperio voluntatis, quia non eliciuntur nec imperantur a voluntate sicut motus deliberationem sumentes, sed solum permittuntur a ratione et voluntate; ideo licet habeant rationem peccati, tamen incompleti, quod est peccatum veniale; non autem completi, quod est mortale. Quia ergo peccatum attribuitur, ut subjecto, potentiae, quae ipsum elicit, vel est principium ejus; ideo in sensualitate quae nominat appetitum sensitivum in homine, ut dictum est in distinctione potentiarum animae, potest esse peccatum veniale, tamquam in subjecto, non autem pec-

(1) Non ut alias, quia.

catum mortale. Motus autem rationalis est qui est secundum rationem liberam (1), per quam debet actus ordinari in debitum finem. Unde si deordinatur a debito fine, habet actus rationem peccati, cum rationis sit actum suum ordinare. Ratio autem habet duplicem actum: unum secundum se, per comparationem ad objectum suum, quod est cognoscere aliquod proprium verum: qui est tunc inordinatus, quando ratio non recte se habet circa ea ad quae tenetur et debet: et sic inordinatio causatur ex ignorantia. Alium actum habet ratio, in quantum est directiva humanorum actuum; et iste actus est imperare, vel coercere vires inferiores: et per istum actum peccat, quando imperat quod non debet imperare, vel non coercet quod debet coercere. Nec contra istud est, quod peccatum dicitur esse in voluntate. Ratio enim quodammodo praecedit voluntatem, quodammodo voluntas rationem: quia ratio dirigit voluntatem, et voluntas movet rationem; et ideo motus voluntatis dicitur rationalis, et motus rationis voluntarius. In ratione etiam superiori potest esse peccatum tam mortale quam veniale. Ratio enim superior habet ferri (2) in objectum proprium, et in objecta virium inferiorum: in objecta virium inferiorum non fertur nisi in consulendo eis leges aeternas; et ideo in ea fertur per modum deliberationis. Unde si objectum virium inferiorum est de genere suo mortale peccatum, actus etiam motus superioris rationis est mortale peccatum; si autem sit in genere peccati venialis, erit veniale; ut patet

(1) *Al. liberum.*

(2) *Al. perperam fieri.*

cum quis consentit in verbum otiosum. Circa proprium autem objectum habet ratio superior duplicem motum: unum scilicet simplicem intuitum sui objecti; et iste motus potest esse subitus circa divina et inordinatus. Et quia inordinatio subita sine deliberatione non est peccatum mortale: ideo talis actus est peccatum veniale, ut subitus motus infidelitatis, quamvis infidelitas sit peccatum mortale. Alius est actus superioris rationis circa objectum proprium per deliberationem, ut cum occurrit motus infidelitatis de resurrectione mortuorum, et statim occurrat resurrectionem mortuorum, a lege Dei traditam: si post conscientiam legis habeat motum infidelitatis, tunc ille motus deliberatus est, et est peccatum infidelitatis completum et mortale. Et sic patet, quod ratio inferior potest peccare venialiter et mortaliter, sed non sine consensu vel negligentia superioris. Ratio vero superior, quandoque venialiter, quandoque mortaliter, et in comparatione ad objecta virium inferiorum, et in comparatione ad objectum proprium. Ipsa autem voluntas maxime subjectum peccati habet esse; quia nullus actus est peccatum nisi aliquo modo sit voluntarius, sicut actus animae ipsius voluntatis, cum nullus actus sit ita proprie bonus vel malus bonitate vel malitia morali, sicut actus voluntatis. Et quia actus voluntatis non transit in exteriorem materiam, sed manet in agente, cuius est perfectio (1), ideo talis actus est in voluntate sicut in subjecto. Unde et in voluntate completissime habet esse peccatum, et in aliis potentiis, secundum quod voluntati subduntur, ut visum est.

(1) *Al. perfectior, corrupto sensu.*

# OPUSCULUM XLI.

## DE TEMPORE

(EDIT. ROM. XLIV.)

### CAPUT I.

*Quod tempus habet esse extra materiam.*

Sicut vult Philosophus 2 Metaph., difficultas in cognoscendo veritatem causatur ex duobus: quia causatur quandoque ex parte nostra, quandoque ex parte rerum cognoscibilium. Cum enim unumquodque cognoscatur secundum quod est in actu; quae secundum se sunt maxime actu, secundum se sunt maxime cognoscibilia. Unde quod intellectus noster ad eorum cognitionem non attingat, hoc non est ex parte eorum, sed ex parte nostra. Illa vero quae minimam entitatem habent secundum se, sunt minime cognoscibilia. Unde quod ea ignoremus, hoc non solum est ex parte nostra, sed etiam ex parte eorum. Talia autem sunt materia prima, quae secundum se non est ens in actu, et omnia successiva, quae secundum se tota non extant, sed secundum aliquid indivisibile sui, de numero quorum est tempus. Ex quo sequitur, quod difficile est cognoscere quid sit tempus. Ad cognoscendum tamen quid sit, oportet agnoscere an sit: quia impossibile est cognoscere de aliquo quid sit, ignorato an sit.

Dubitatur ergo primo, an tempus sit: et videtur quod non, quia illud quod componitur ex partibus quae non sunt, videtur non esse: entitas enim totius videtur consurgere ex entitate partium. Tempus autem componitur ex praeterito et futuro, quae non sunt: praeteritum enim fuit et non est, futurum autem nondum est. Videtur ergo tempus non esse. Nec potest dici quod aliqua pars temporis sit, scilicet ipsum nunc; quia nunc pars temporis non est: omnis enim pars aliquoties accepta mensura totum, aut saltem omnis pars cadit in compositione totius: Nunc autem multoties acceptum non mensurat totum tempus: nec iterum ex ipsis nunc componitur tempus, ut probatur 6 Phys., eo quod ex indivisibilibus non potest componi aliquid continuum. Unde manifestum est, quod nunc non est pars temporis. Nihil ergo, quod sit pars temporis, de tempore existit.

Respondeo dicendum, quod necessarium est tempus esse. Quod patet, quia omnia generabilia et corruptibilia tempore mensurantur: accipiunt enim principium et finem sui esse in tempore, ut vult Philosophus 4 Physic. Si ergo tempus non esset, nihil esset generabile vel corruptibile: quod est inconueniens. Tempus ergo est.

Fuerunt tamen quidam, qui propter rationem superius inductam dixerunt tempus non esse nisi in anima. Qui ad confirmandam suam positionem adducunt duas rationes. Prima est, quia cum tempus sit numerus motus; aut erit in materia numerabili, aut in anima numerante. Non primum, quia materia numerabilis temporis non est nisi prius et posterius in motu, in quibus nihil potest esse, cum ipsa sint non entia. Sequitur ergo, quod tempus solum sit in anima numerante. Secunda est ratio, quia si tempus esset in re extra tamquam numerus alicujus motus exterioris, tunc sequitur, quod qui non apprehenderet motum exteriorem, non apprehenderet tempus: ejus oppositum vult Philosophus 4 Physic.: qui dicit, quod si sumus in tenebris, et nihil patiamur per visum ab exterioribus visibilibus, nec sentiamus aliquem motum exteriorum corporum, dum tamen fiat aliquis motus in anima per successionem cogitationum vel imaginationum, semper sentimus tempus. Ex quo sequitur, quod tempus semper sequatur motum qui est in anima, et quod solum sit in anima. Hujus opinionis fuit Galenus: cui etiam in tantum consensus Averrois, quod dixit tempus secundum quid esse extra animam; secundum vero complementum sui, esse solum in anima. Istud non potest habere veritatem, quia cum tempus sit numerus motus, et sit numerus numeratus; sic est necesse esse tempus, sicut et motus. Constat autem, quod motus est in re extra. Ergo et tempus est in re extra. Item quantitas continua est vera res extra animam. Tempus autem est vera quantitas continua. Ergo impossibile est, quod sit in anima. Et ideo dicendum, quod tempus sit in re extra.

Ad cujus intellectum considerandum est, quod cum numerus sit in rebus numeratis; sicut dependet rerum esse numeratarum ab intellectu numerante, ita et numerus. Esse autem rerum numeratarum non dependet ab intellectu nostro, sed ab intellectu qui est causa rerum, sicut est intellectus divinus. Ergo nec numerus rerum dependet ab intellectu nostro. Tempus autem numerus motus est. Et ideo, sicut motus non dependet ab intellectu nostro, ita nec tempus. Sunt tamen quidam, qui dicunt etiam motus dependere ab anima: quia cum motus sit aliquid successivum, partes ejus quae sunt prius et posterius, non habent esse in re extra, sed so-



lum in anima comparante priorem dispositionem mobilis ad posteriorem; et ideo solum habet esse in anima simpliciter, et quantum ad esse suum perfectum. In re autem extra habet esse solum secundum aliquod indivisibile sui, et istud esse est imperfectum esse, et secundum quid: et idem dicunt ipsi de tempore. Istud non potest stare, quia illud in quo motus est secundum esse suum completum et perfectum, necessario movetur. Si ergo motus secundum esse suum completum esset in anima, anima necessario moveretur: quod est inconveniens. Et ideo intelligendum est, quod omne esse ab actu est. Actus autem est divisibilis, ut vult Philosophus 9 Metaphysic.: est enim actus quidam totus simul existens, sicut anima, aut albedo. Et est alius actus successivus, ut dies et agnoscere, infinitum et vacuum, de numero quorum sunt et motus et tempus. Cum ergo esse sequatur actum, et modus essendi sequetur modum actus. Esse igitur quod est ab actu primo, est esse simul: et tale est esse completum quod debetur rei perfectae per primum actum. Esse vero quod est ab actu secundo, scilicet ab actu successivo, est esse successivum: et tale est esse perfectum, quod debetur tali actui, vel rei perfectae per talem actum. Et ideo esse perfectum ipsius motus et temporis, quod debetur utrique secundum rationem propriae speciei, non est esse simul existens, sicut ipsi dicunt: sed est esse in successione, quod est secundum aliquod indivisibile ipsorum.

Ad rationes in oppositum patet solutio. Ad primum dicendum, quod praeteritum et futurum non sunt sic, ut simul sint. Nec hoc requiritur ad esse temporis, cum sit successivum, ut declaratum est: habet tamen esse per aliquod indivisibile sui, quod continuat ea; scilicet per ipsum nunc.

Ad alias rationes probantes tempus esse in anima dicendum est. Cum arguitur: tempus cum sit numerus, aut habet esse in materia numerabili quae sunt prius et posterius: dicendum quod tempus habet esse in priori et posteriori motus. Et eum dieis, quod haec non sunt; verum est sub esse permanenti; habent tamen esse successivum, ut dictum est. Ad aliud dicendum, quod tempus motum sequitur exteriorem aliquem, scilicet primum motum. Nec obstat hoc; quia apprehenso quocumque motu, comprehenditur motus primus saltem virtualiter, eo quod ipse est causa omnis transmutationis.

Quia vero dictum est, quod tempus cum sit successivum, habet esse solum per aliquod indivisibile sui quod est nunc; non irrationabiliter dubitatur, utrum sit unum et idem nunc in eodem tempore, an aliud et aliud. Videtur enim, quod sit unum et idem: quia sicut impossibile est duas partes temporis simul esse, nisi una contineat aliam, sicut annus mensem, mensis septimanam, septimana diem; ita impossibile est duo nunc in tempore simul esse, cum unum non contineat alterum. Si ergo primum nunc non potest simul esse cum posteriori, necesse est primum esse corruptum. Omne autem quod est corruptum, corruptum est in aliquo nunc. Nunc ergo, quod est corruptum, aut est corruptum in seipso, aut in aliquo posteriori: non in seipso, quia tunc est: nec in aliquo posteriori: quia aut hoc esset in nunc mediato, aut in nunc immediato: non in nunc immediato, quia unum nunc non est continuum alii nunc, sicut nec punctus puncto, ut probatur 6 Physic. Nec potest corrumpi in nunc mediato; quia inter quae-

libet duo nunc est tempus medium, sicut inter quaelibet duo puncta est linea media. In quolibet autem tempore sunt infinita nunc. Si ergo nunc prius corrumpere in nunc posteriori mediato; sequitur quod haberet esse cum infinitis nunc mediis, quod est impossibile. Impossibile est ergo duo nunc esse in tempore. Oppositum hujus videtur dupliciter. Primo, quia cujuslibet continui finiti sunt duo termini ad minus. Nunc autem terminus temporis est, et est accipere tempus finitum. Ergo ad minus sunt duo nunc in tempore. Secundo, quia illa dicuntur simul esse, quae sunt in eodem nunc temporis. Si ergo non essent plura nunc in tempore, sed unum tantum; sequitur quod ea quae fiunt post millesimum annum, simul essent cum his quae sunt hodie. Hoc autem est impossibile. Intelligendum, quod sicut dictum est, esse successivorum consistit in hoc quod existant secundum aliquod indivisibile sui: quod manifestari potest, quia quaelibet pars cujuslibet successivi divisibilis est in diversas partes. Si ergo aliquod successivum existeret, non solum secundum aliquod indivisibile sui, sed secundum aliquam sui partem; sequitur quod multae partes alicujus successivi simul essent: quod est contra rationem successivorum. Specialius autem possumus hoc probare de tempore: quia quaelibet pars temporis est tempus. Si ergo aliqua pars temporis existeret, sequitur quod tempus secundum se existeret; quod est falsum. Existit ergo tempus secundum aliquod sui indivisibile, illud autem est nunc. Hoc supposito dicendum est, quod unum et idem nunc est in toto tempore secundum substantiam, differens secundum esse et rationem. Cujus ratio est, quia ipsi nunc quod est in tempore, aut succedit aliud nunc, aut aliqua pars temporis. Non aliud nunc, quia unum nunc non potest continuari alii nunc: non aliqua pars temporis, quia nulla pars temporis secundum se existere potest, ut probatum est. Ergo impossibile est quod unum nunc succedat alii nunc in tempore. Praeterea, sicut se habet illud quod fertur ad motum, ita nunc ad tempus. Quia sicut per illud quod fertur, cognoscimus motum, et prius et posterius in motu, in quantum videmus illud quod movetur aliter et aliter se habere; ita per nunc determinatur prius in tempore. Sed quod fertur unum est et idem secundum substantiam in toto motu, aliud et aliud secundum esse in quantum est alibi et alibi. Ergo et ipsum nunc unum et idem est in toto tempore secundum substantiam, aliud et aliud secundum esse, in quantum scilicet consideratur in alio et alio successu temporis. Nec valent rationes prius adductae. Cum enim dicitur, quod cujuslibet finiti sunt duo termini ad minus, dicendum, quod cujuslibet continui finiti permanentis sunt duo termini differentes secundum rem: continui vero finiti successivi non oportet quod sint duo termini secundum subjectum, sed solum secundum rationem. Et praeterea falsum supponit ratio, in hoc quod ponit quod est dare tempus finitum: non enim est accipere aliquod tempus actu finitum et terminatum per nunc, nisi secundum imaginationem nostram, vel per relationem ad aliquem motum, qui in tempore terminatur: totum enim tempus secundum se continuum est, nec est actualiter una pars divisa ab alia. Ad aliud dicendum, quod non dicuntur esse simul secundum tempus, quaecumque sunt in nunc eodem secundum substantiam; sed



quae sunt in eodem nunc secundum esse et secundum rationem. Illa autem quae fiunt post millesimum annum, et quae sunt hodie, licet sint in eodem nunc secundum substantiam, non tamen sunt in eodem secundum esse. Et ideo non oportet quod dicantur esse simul.

## CAPUT II.

*Quod tempus non est motus, sed aliquid ejus.*

Viso ergo quod tempus sit, inquirendum est quid sit. Est autem considerandum, quod tempus non est motus, sicut quidam opinati sunt tempus esse motum caeli, qui circulatio dicitur. Quia quaelibet pars temporis est tempus. Si ergo tempus esset circulatio, sequeretur quod quaelibet pars circulationis esset circulatio: quod tamen falsum est. Item omnis motus est velox vel tardus. Tempus autem nec tardum est nec velox. Ergo tempus non est motus. Minor patet, quia velox et tardum determinantur tempore. Tempus autem non determinatur tempore nec quantum ad quantitatem suam, nec quantum ad qualitatem. Secundo considerandum, quod licet tempus non sit motus, non tamen est sine motu. Cum enim nos non transmutamur secundum cognitionem nostram per successionem cognoscibilem, tunc non apprehendimus tempus, quia nec apprehendimus motum, sicut accidit his quos fabulantur dormisse in Sardo apud Heroes: ibi enim reddebantur aliqui insensibiles propter quasdam incantationes, qui excitati dicebant se vidisse quaedam mirabilia. Tales autem qui excitabantur, non percipiebant tempus quod fluxerat, eo quod copulabant primum nunc in quo dormire coeperant, posteriori nunc in quo excitati fuerant, ac si non fuisset tempus medium. Sicut ergo si nihil fuisset medium inter illa duo nunc, non fuisset tempus; ita quia non percipiebant medium, non percipiebant tempus. Sic ergo non percipimus tempus, quia non percipimus motum. Cum autem percipimus motum et determinamus prius et posterius in ipso, tunc percipimus tempus. Relinquitur ergo, quod licet tempus non sit motus, non tamen est sine motu. Quia ergo simul cognoscimus motum et tempus, manifestum est quod tempus est aliquid ipsius motus. Motus autem sequitur magnitudinem quantum ad duo: scilicet quantum ad continuitatem, et quantum ad prius et posterius; et similiter tempus motum. Prius autem et posterius motus licet sint idem subjecto cum motu, differunt tamen ratione, eo quod in definitione motus assignantur in 4 Physic. Et ideo restat inquirere, ratione cuius tempus sequitur motum: utrum scilicet ratione motus absolute, aut ratione prioris et posterioris. Dicendum quod hoc est ratione prioris et posterioris, quia ex priori et posteriori in motu cognoscitur tempus. Ergo tempus sequitur motum ratione prioris et posterioris. Juxta quod intelligendum est, quod prius et posterius in motu possunt considerari dupliciter. Uno modo prout sunt sub forma continui absolute: et sic cognoscendo prius et posterius, simul cognoscimus motum. Alio modo ut sunt sub forma discreta: in quantum scilicet anima dicit posterius esse aliud a priori, et ipsa esse duo et non unum; et sic tempus non est motus absolute, nec prius ac posterius motus absolute; sed est prius et posterius motus

ut numerata sunt. Ex quo possumus concludere definitionem temporis: quod tempus est numerus motus secundum prius et posterius. Quod autem tempus sit numerus, patet. Numero enim iudicamus aliquid plus vel minus. Tempore autem iudicamus motum esse minorem et majorem. Ergo tempus est numerus. Numerus autem est duplex: est enim numerus absolute quo numeramus, ut unum, duo, tria etc.: et numerus numeratus, ut numerus decem hominum. Tempus enim non est numerus quo numeramus, sed numerus numeratus: est enim prius et posterius, ut numerata sunt in motu. Et licet numerus quo numeramus, sit aliquid discretum; tamen tempus est aliquid continuum; sicut decem ulnae panni sunt continuae, licet numerus denarius sit aliquid discretum. Quia ergo tempus et est aliquid discretum, et aliquid continuum; relinquitur quod in tempore est dare aliquo modo numerum minimum, et aliquo modo non. In numero enim simpliciter est dare minimum, sicut unitatem: vel minimum quod habet rationem numeri, sicut est binarius. In numero autem numerato, sicut in multitudine linearum, est dare minimum secundum multitudinem, sicut unam lineam aut duas: secundum magnitudinem autem non est dare minimam lineam, eo quod omnis linea divisibilis est in alias lineas. Sicut etiam in tempore est dare minimum tempus secundum multitudinem; puta, unam diem vel duos dies in genere dierum; minimum autem tempus secundum magnitudinem non est dare, eo quod omne tempus divisibile est in infinitum, sicut et quodlibet continuum. Quia autem tempus et est numerus, et est continuum: inde est quod dicitur multum et paucum, breve et longum, non autem velox vel tardum: multum enim et paucum sunt passionis numeri. Et ideo tempus, quia est numerus, dicitur multum et paucum. Longum autem et breve sunt passionis continui, unde linea dicitur longa vel brevis. Et quia tempus est continuum, ideo dicitur longum vel breve. Velox autem aut tardum non dicitur: quia cum tempus sit numerus motus, si diceretur velox aut tardum, aut hoc esset ratione numeri, aut motus: non ratione numeri, quia numerus neque velox neque tardus dicitur: neque ratione motus: quia licet tempus sit aliquid motus, non est tamen dicere quod tempus sit motus. Et ideo non oportet passionis motus, quae sunt velox et tardum, dici de tempore: quia velox et tardum determinantur tempore, et ideo tempus non dicitur velox nec tardum. Continuitas autem in tempore est ex continuitate motus, non eujuscumque, sed primi. Et ideo, quia motus primus unus est, tempus est unum mensurans omnes motus simul factos. Prius autem et posterius temporis altera sunt sicut prius et posterius motus. Unde sicut reiteratur eadem circulatio secundum speciem, et non secundum numerum; ita tempus reiteratur idem secundum speciem et non secundum numerum. Mensuramus autem motum tempore et tempus motu, in quantum determinamus quantitatem unius per quantitatem alterius: motum enim mensuramus tempore, quia tempus secundum id quod est, est numerus motus: tempus etiam mensuramus, in quantum scilicet, per quantitatem motus nobis notam determinamus quantitatem temporis: dicimus enim, quod tempus est multum, quia motus qui factus est in tempore est multus. Et hoc rationabiliter accidit. Motus enim

sequitur magnitudinem quantum ad continuitatem, et prius et posterius; et tempus similiter motum. Per magnitudinem autem mensuramus motum, et e converso: dicimus enim quod motus est multus, quia magnitudo supra quam est motus, est multa; et similiter dicimus quod magnitudo est multa, quia motus supra magnitudinem factus est multus. Quare et similiter determinamus quantitatem temporis per motum, et quantitatem motus per tempus.

### CAPUT III.

*Quae sunt illa quae mensurantur tempore, quae non.*

Determinato de tempore secundum se, considerandum est de ipso secundum relationem ad ea quae tempore mensurantur. Est autem considerandum, quod aliter comparatur tempus ad motum, et ad alias res. Cum enim motus sit continuus et successivus essentialiter; ideo non solum mensuratur tempore quantum ad suum esse et suam successionem vel durationem, sed etiam quantum ad id quod est; quia ejus essentia in successione consistit. Mobilia vero quantum ad id quod sunt, sicut homo aut lapis, non mensurantur tempore: quia essentia eorum est in quolibet nunc temporis, nec habet prius nec posterius, sive successionem; unde his respondet nunc temporis, et non tempus. Mensurantur autem tempore quantum ad suum esse et suam successionem vel durationem, quia duratio eorum non est tota simul. Sicut ergo motum esse in tempore est ipsum mensurari tempore quantum ad id quod est, et quantum ad suam durationem; ita alias res esse in tempore, est ipsas mensurari tempore non quantum ad id quod sint, sed quantum ad suam durationem. Et quod hoc sit verum, patet. Esse enim in tempore, aut est esse dum tempus est, aut est esse sicut in numero. Esse autem in tempore non est esse quando tempus est; sicut nec esse in loco, est esse quando locus est: sic enim sequeretur quod omnia essent in eodem loco, cum omnia sint quando unus locus est: sicut etiam sequeretur quod caelum esset in grano milii, quia caelum est quando granum milii est. Sed esse in tempore est mensurari et contineri a tempore, sicut esse in loco est mensurari et contineri loco: propter quod sequitur, quod esse in tempore, est esse sicut in numero. In numero autem aliquid est dupliciter; aut enim est aliquid ipsius numeri, sicut unitas, par vel impar: aut quia numerus est ejus, sicut rei numeratae. Sic ergo cum tempus sit numerus, aliqua dicuntur esse in tempore quia sunt aliquid ipsius temporis, ut nunc, prius et posterius. Aliqua autem sunt in tempore, non quia sunt aliquid ejus, sed quia mensurantur tempore et continentur sub tempore, sicut ea quae sunt in numero continentur sub numero. Quia ergo esse in tempore est sicut esse in numero, omni autem eo quod est in numero, est dare majorem numerum; inde est quod est dare tempus majus omni eo quod est in tempore. Haec est ergo prima conditio omnium eorum quae tempore mensurantur. Secunda conditio eorum est, quod quaecumque sunt in tempore, patiuntur sub tempore: sicut consuevimus dicere, quod tempus tabefacit et corrumpit ea quae sunt in tempore, et quod oblivio fit propter tempus. Hujus autem causa est duplex. Prima est, quia videmus aliqua corrumpi in tempore, dato quod non appareat nobis aliquod exterius corrup-

pens, sicut est in corruptione quae fit ex senio, quam maxime attribuimus tempori. Nihil autem fit in tempore, nisi appareat aliquid exterius faciens; propter quod non dicimus quod tempus sit causa generationis sicut corruptionis, aut quod tempus sit causa disciplinae, sicut est causa oblivionis; quia ex hoc solo quod aliquis diu vivit, non efficitur sciens. Secunda causa est, quod tempus est numerus motus: motus autem facit distare mobile a dispositione in qua prius erat, et est magis causa corruptionis quam (1) generationis, cujus ratio signatur triplex. Prima ratio est, quia motus facit id quod movetur distare a prima dispositione sua, ut dictum est. Haec autem distantia attenditur respectu termini a quo, qui corrumpitur in motu; et ideo motus per se est causa corruptionis. Quod autem per motum generetur aliquis terminus ad quem, hoc non est de ratione motus absolute, sed convenit ei ut finitus est. Rationem autem finiti habet ex determinata intentione moventis, cujus est movere ad aliquem determinatum terminum. Unde generatio termini ad quem magis est attribuenda formae ipsius moventis, ratione cujus movens movet, quam ipsi motui. Secunda ratio est, quia illud quod movetur, dum movetur, neque est omnino in termino a quo, neque in termino ad quem; sed deficit ab utroque. Et ideo motus de se est causa quare mobile sit sub privatione termini a quo et termini ad quem. Cum autem mobile factum est sub termino ad quem, tunc non est motus. Et ideo motus magis est causa corruptionis utriusque termini dum est, quam generationis termini ad quem; quia cum terminus ad quem generatus est, tunc motus non est. Tertia ratio est, quia, ut patet ex 5 Phys., motus trahitur ad rationem actionis, secundum quod consideratur ut ab hoc. Ad rationem autem passionis trahitur, ut consideratur ut in hoc. Constat autem quod omne accidens veriorum habet comparationem ad subjectum quam ad causam agentem: ideo verior est consideratio motus sub ratione passionis quam sub ratione actionis. Passio autem est causa corruptionis per se: de ratione enim ejus est, quod ipsa magis facta plus et plus abjicitur a substantia. Factio autem magis attribuitur actioni. Et quia, sicut dictum est, verius consideratur motus sub ratione passionis, quam sub ratione actionis; inde est quod motus magis est causa corruptionis quam generationis. Tempus autem, ut dictum est, est mensura motus; et ideo magis est causa corruptionis quam generationis, sicut et motus. Neutrius tamen est causa per se.

Ex his duabus conditionibus quae apparent in rebus quae sunt in tempore, possumus concludere, quod ea quae sunt semper, non sunt in tempore. Primo, quia sicut dicit prima conditio, omni eo quod est in tempore est accipere tempus majus. Semper autem non est aliud majus tempus accipere, cum ipsa semper sint. Ergo ea quae semper sunt, non sunt in tempore. Praeterea, sicut dicit secunda conditio, ea quae sunt in tempore patiuntur in tempore, corrumpuntur in tempore. Ea autem quae semper sunt, non patiuntur a tempore, nec corrumpuntur, neque senescunt. Quare manifestum est, quod non sunt in tempore.

Ex his autem quae dicta sunt, posset aliquis credere, quod ea quae quiescunt, cum semper dum quiescunt similiter se habeant, sicut

(1) Al. et generationis.

sempiterna, quod non mensurarentur tempore: hoc autem est falsum. Et ideo dicendum est, quod sicut tempus est mensura motus per se, ita est mensura quietis per accidens: non enim oportet quod omne quod est in tempore, actu moveatur, sicut omne quod est in motu necesse est actualiter moveri; quia tempus non est motus, licet sit numerus motus. In numero autem motus convenit esse non solum illud quod movetur, sed etiam illud quod quiescit: quiescens enim non dicitur quodcumque quod non movetur, sed quod non movetur, aptum tamen natum moveri; et omne tale est mobile: esse ergo rei quiescentis est esse rei mobilis. Esse autem rei mobilis mensuratur tempore. Ergo et esse rei quiescentis. Mensuratur autem id quod quiescit et id quod movetur quantum ad quantitatem quietis vel motus. Motus tamen per se, quies autem per accidens: dicimus enim quod aliquid quievit uno die, quia cessavit a motu una die. Juxta quod intelligendum est, quod mobile potest considerari dupliciter: vel quantum ad suam substantiam seu essentiam, vel quantum ad suum esse. Si consideratur quantum ad suam substantiam, sic non mensuratur tempore, eo quod substantia mobilis in quolibet nunc temporis est, nec habet successionem, nec prius nec posterius. Si autem consideretur quantum ad suum esse, hoc potest esse dupliciter. Quia aut considerari potest quantum ad suum esse substantiale, aut quantum ad suum esse quod habet in motu, quod est suum moveri. Si consideretur primo modo, sic non mensuratur tempore: secundo autem modo mensuratur tempore: moveri enim mobilis non est totum simul, sed successivum. Viso ergo quod non omnia entia sunt in tempore, et quod non omnia non entia sunt in tempore; ut hoc breviter comprehendamus, dicendum est quia illa non entia quae impossibile est esse, non mensurantur tempore. Et ratio hujus est, quia sicut dictum est, omni eo quod est in tempore, est accipere majus tempus. Constat autem quod non est accipere majus tempus entitate eorum quae impossibile est esse; et ideo non entia talia non sunt in tempore. Ea autem quae possunt esse et non esse, sunt in tempore, quia est dare tempus majus entitate eorum et non entitate.

#### CAPUT IV.

##### *De differentia aeternitatis aevi et temporis; et quid sit unumquodque eorum.*

Viso ergo de tempore secundum se, et per resolutionem ad temporalia; considerandum est per relationem ad alias mensuras, quae sunt aeternitas et aevum. Primo ergo videndum an aeternitas sit, et quid sit. Dubitant enim aliqui an aeternitas sit; et probant ipsi quod non: quia infiniti in quantum infinitum est non est mensura. Causa autem prima infinita est, cujus mensura ponitur aeternitas. Ergo videtur quod aeternitas non possit esse in genere mensurae. Ergo aeternitas nihil est. Item, omnis mensura certificat aliquam quantitatem. Causa autem prima nullam quantitatem habet. Ergo aeternitas non potest esse mensura causae primae; nec per consequens aliquid esse, cum non ponatur esse nisi in genere mensurae. Item, nihil uno modo se habens potest mensurae. Aeternitas autem est uno modo se habens. Ergo non potest habere

rationem mensurae. Non ponitur autem esse aeternitas nisi ut mensura quaedam: ergo aeternitas non est. Intelligendum, quod aeternitas tripliciter accipitur. Uno modo dicitur aeternitas mensura durationis rei semper similiter se habentis, nihil acquiritis in futuro, et nihil admittentis in praeterito: et sic propriissime sumitur aeternitas. Secundo modo dicitur aeternitas mensura durationis rei habentis esse fixum et stabile, recipientis tamen vias in operationibus suis: et aeternitas sic accepta proprie dicitur aevum: aevum enim est mensura eorum quorum esse est stabile, quae tamen habent successionem in operibus suis, sicut intelligentiae. Tertio modo dicitur aeternitas mensura durationis successivae habentis prius et posterius, earentis tamen principio et fine, vel earentis fine, et tamen habentis principium: et utroque modo ponitur mundus aeternus licet secundum veritatem sit temporalis; et isto modo impropriissime dicitur aeternitas: rationi enim aeternitatis repugnat prius et posterius. Utroque autem istorum modorum dicta aeternitas verissimam entitatem habet. Nec valet illud quod arguitur, quod infiniti in quantum infinitum est, non est mensura: quia licet causa prima infinita sit eo quod careat principio et fine, tamen finitissima est, eo quod in se ipsa manens, nihil sui habet extra se. Ad aliud, cum dicitur quod omnis mensura certificat aliquam quantitatem, dicendum quod non est universaliter verum, nisi accipiatur quantitas valde large pro quantitate virtutis et magnitudinis. Licet autem prima causa non habeat quantitatem magnitudinis, habet tamen quantitatem virtutis, et hoc sufficit. Ad aliud, cum dicitur, illud quod uno modo se habet, non mensurat, dicendum quod verum est quod non mensurat ut numerus, sed ut unitas. Unde aeternitas magis dicenda est unitas rei aeternae, quam numerus.

Nunc ergo considerandum est, quid sit aeternitas. Ad quod sciendum, considerandum est, quod aeternitas dicit interminabilitatem quamdam: dicitur enim aeternum quasi extra terminos existens. Sicut autem dicit Philosophus 8 Physic., in omni motu est aliqua generatio et aliqua corruptio, in quantum mobile desinit esse in termino a quo, et incipit esse in termino ad quem. Ex hoc patet, quod omnis mutabilitas repugnat aeternitati. Includit ergo aeternitas non solum interminabilitatem essendi, sed etiam immobilitatem. Ex motu autem causatur prius et posterius in tempore. Et ideo, cum motus repugnet aeternitati, ex consequenti repugnat ei habere prius et posterius. Propter quod Boetius definit aeternitatem dicens: « Aeternitas est interminabilis vitae tota simul et perfecta possessio. » Quaecumque ergo cum indeficientia essendi habent immobilitatem, et sunt absque successione temporali, ipsa dicuntur esse aeternaliter, et mensurantur aeternitate. Unde a quibusdam definitur aeternitas, quod est mora; et non mora temporis, sed dicitur mora essendi, idest indeficientia. Spatium vero dicitur, eo quod ambit totum esse indeficiens. Continuum vero dicitur, non eo quod habeat partes, sed quia nunquam deest, nunquam defuit, nunquam deerit: non interfectum vero dicitur, quia non habet partes quae exeant de potentia ad actum, sicut tempus cujus pars prior praeteriit, et pars posterior futura est. Propter quod dicit Boetius, quod nunc stans et non fluens causat aeternitatem. Occasione hujus dubitant aliqui, quomodo verba

praeteriti temporis et futuri, verificantur de Deo. Ad quod dicendum est, quod aeternitas est mensura rei indeficientis, sicut dictum est. Huic tamen accidit quod comparetur ad praeteritum vel futurum; et hanc comparisonem vel concomitantiam ex indeficientia ejus causatam, dicunt verba praeteriti et futuri temporis. Unde prima causa dicitur fuisse in praeterito, quia in toto tempore praeterito nunquam defuit; et dicitur fore in futuro, quia nunquam deerit.

Ex his quae dicta sunt, potest assignari differentia inter aeternitatem, aevum et tempus. Quia aeternitas est mensura rei incommutabilis non recipientis vices in operatione: aevum autem est mensura rei cujus esse est incommutabile, quod tamen recipit vices in suis operationibus: tempus vero est mensura rei secundum omnem modum mutabilis et successivae. Constat autem quod aeternum quod immutabiliter se habet, causa est aeviterni, quod incommutabiliter se habet quantum ad esse, recipit tamen vices in suis operationibus; et similiter aeviternum causa est temporalis. Et sicut est in his, sic et in instrumentis eorum. Quia aeternitas causa est exemplaris ipsius aevi: aevum enim imitatur aeternitatem quantum potest, deficit tamen ab aeternitate. Aevum autem est causa exemplaris ipsius temporis, eo quod tempus imitatur aevum quantum potest, deficit tamen ab aevo. Unde non est dubium, quod sicut tempus est primo mensura unius, scilicet primi mobilis, qui est velocissimus, et aeternitas primo est mensura primi esse quod est essentiae simplicissimae; ita aevum est primo mensura alieujus unius, quod licet recipiat vices in operationibus suis, est tamen propinquissimum primo actui. Et ideo quidquid dicatur, sicut est unum tempus et una aeternitas, ita et unum aevum.

Ex hoc confutatur error quorundam dicentium, quod est idem nunc aeternitatis et temporis: quod nituntur probare, quia stans et movens se, non videtur differre secundum substantiam, sed solum secundum rationem. Nunc autem aeternitatis est stans, et nunc temporis fluens. Quare non videtur differre, nisi ratione sola. Istud

non potest habere veritatem, secundum ea quae determinata sunt. Visum est enim, quod aeternitas et tempus essentialiter differunt, quia nunc aeternitatis et nunc temporis essentialiter differunt. Item quaecumque se habent ut causa et causatum, essentialiter differunt. Nunc autem aeternitatis, cum non differat ab aeternitate nisi sola ratione, causa est temporis, et nunc ipsius, ut dictum est. Quare nunc temporis et nunc aeternitatis, essentialiter differunt. Praeterea, nunc temporis et nunc aeternitatis essentialiter differunt: quia nunc temporis est continuativum praeteriti cum futuro, ut patet 4 Phys.: nunc autem aeternitatis non est continuum praeteriti cum futuro, quia in aeternitate non est prius nec posterius, nec praeteritum nec futurum, sed tota aeternitas est tota simul. Neque valet ratio in oppositum, cum dicitur quod stans et fluens non differunt per essentiam. Verum est in omni eo quod contingit et stare et fluens esse. Tamen stans quod nullo modo contingit fluere, et fluens quod nullo modo contingit stare, differunt per essentiam. Talia autem sunt nunc aeternitatis et nunc temporis. Et praeterea, si nunc temporis et nunc aeternitatis essent mensura unius et ejusdem rei quam contingit stare et fluere, tamen adhuc differrent essentialiter, eo quod unum et idem secundum aliam et aliam rationem mensurari potest alia et alia mensura: quia nos videmus in opposito, quod diversa mensurabilia, quae tamen participant unam rationem, possunt mensurari eadem mensura, sicut loci mutatio et alteratio quae mensurantur tempore, in quantum conveniunt in ratione successivi, habentes prius et posterius. Unde manifestum est, quod quorum mensurabilia differunt in quantum mensurabilia sunt, et ipsa differunt: fluens autem et stans, licet possint esse unum et idem secundum substantiam, quia non differunt nisi in eo quod stans est aliud a fluente, et fluens in eo quod fluens est aliud a stante, ideo mensurantur alia et alia mensura, in eo quod stans et fluens. Et ideo nunc aeternitatis quod est mensura rei ut stans, et nunc temporis quod est mensura rei ut fluens, de necessitate differunt ab invicem.



# OPUSCULUM XLII.

## DE PLURALITATE FORMARUM

(EDIT. ROM. XLV.)

Quoniam sanctum est honorare veritatem praeter caeteris amicis, ut dicit Philosophus in 1 Ethic., ideo virtuosus homines non dimittunt propter veritatem amicis displicere, ea quae contraria reputant veritati reprobando. Sed plerumque verum a falso non recte discernentes, eo quod quaedam falsa probabiliora sunt quibusdam veris, falsum quandoque judicant verum propter apparentiam veri; ac per hoc dum putant falsum prosequi, ipsum tanquam amicum prosequuntur et repugnant veritati. Inter veritates siquidem de principiis naturae de unitate formae in uno individuo ad plurimas se extendit veritates: quam agnoscunt aliqui, sed ipsam esse falsitatem putantes, tractaverunt irreverenter, et penitus repudiaverunt. Quod vero ex ejus cognitione multa dependent consequentia, expediens videtur ipsam manifestare amatoribus veritatis; ut ab eis agnita, non amplius impugnetur, sed potius tanquam praecipua amica honoretur, ipsi autem per ejus cognitionem ad videndum multas veritates illustrentur. Nec tamen oportet novas adducere rationes ad sui manifestationem: sed sufficiat ad praesens quasdam rationes communes in scriptis adductas contra cavillationes fortificare, auctoritatibus scilicet Philosophi et sui Commentatoris eas confirmare, et tandem rationes dissolvere, quae mentes aliquorum ligant, ne dictam videant veritatem. Ostenditur autem propositum tribus viis ad praesens. Prima sumitur ex distinctione formarum a se invicem. Secunda ex ratione entitatis. Tertia ex ratione unitatis.

Secundum primam viam arguitur communiter, quia formae rerum sunt sicut numeri et figurae quantum ad hoc, quod una forma addit perfectionem super aliam, sicut unus numerus addit super alium, et sicut una figura super aliam, et virtute continet ipsam. Forma ergo perfectior virtute continet formam imperfectiorem. Posita ergo forma perfectiori, superfluit ponere imperfectiorem. Cum ergo in natura nihil sit superfluum, non permittit natura quod in eodem composito sint duae formae, quarum una sit perfectior alia. Ad hujus rationis evidentiam considerandum est, quod formae substantiales non distinguuntur ab invicem, sicut distinguuntur calor et sapor, quae sunt diversorum generum physice loquendo;

*S. Th. Opera omnia. V. 17.*

sed omnes formae materiales distinguuntur sicut figurae quae sunt ejusdem generis physici. Formatur ergo principalis ratio sic. Impossibile est duas formas ejusdem generis physici simul perficere idem subjectum. Sed omnes formae substantiales sunt ejusdem generis physici. Ergo impossibile est duas formas substantiales simul perficere eandem materiam. Hujus rationis primo declaranda est secunda propositio, quia ejus declaratio utilis est ad ostensionem primae. Probatur autem tripliciter. Primo quidem per transmutationem formarum ab invicem. Illae enim formae sunt ejusdem generis physici, inter quas est transmutatio per se: ita scilicet, quod una sit terminus a quo per se, non autem per accidens, scilicet cum adjunctione sui cum termino a quo: et alia sit terminus ad quem per se, non per accidens, ex hoc quod adjungitur alicui alteri. Verbi gratia, quando album mutatur in nigrum, si illud etiam mutetur in dulce, est transmutatio albi in dulce per accidens, sed albi in nigrum per se: et hoc ideo, quia album et nigrum sunt in eodem genere. Unde dicit Philosophus 10 Metaph., quod ea quae sunt diversa genere, non habent viam, id est transmutationem ad invicem. Nunc autem inter formas substantiales per se est transmutatio. Et hoc manifestum est de formis quas omnes concedunt esse specificas. In talibus enim manifestum est, quod una abjicitur in inductionem alterius: et hoc non est per accidens ad inductionem et abjectionem aliarum quae sunt termini transmutationis per se: sicut per se fit ignis ex aqua, vel e converso, vel pluvia ex vapore. Non enim generatio quae est in substantia, est per se ex aliquo accidente, ut ex albo; vel etiam quae est per se, terminatur ad aliquod accidens, puta, ad nigrum. Relinquitur ergo quod sit per se inter duas formas substantiales, quarum una abjicitur, et alia inducitur. Omnes ergo formae substantiales sunt ejusdem generis. Si vero ponantur aliquae formae quae non sint specificae, sicut aliqui ponunt in homine formam corporis aliam ab anima; adhuc oportebit per illam rationem ponere talem esse ejusdem generis cum aliis quae sunt specificae, eo quod inter illas formas et formas specificas est per se transmutatio: corpus enim hominis quod post mortem putrescit, resolvitur in elementa: fit enim corpus tale ex semine, et semen ex alimento, et alimentum ex ele-



mentis (1): ex eisdem enim nutrimur et sumus. Forma ergo corporis est ejusdem generis cum formis elementorum. Formae autem elementorum sunt ejusdem generis cum aliis formis specificis. Ergo et forma corporis in animali est ejusdem generis universaliter cum aliis formis specificis. Praeterea, quod non sit instantia in aliqua forma materiali, quantum ad hoc, ostenditur per hoc quod in substantiis semper generatio unius est corruptio alterius et e converso, ut dicit Philosophus in lib. de Gen. et Corr., ubi determinat de generatione et corruptione in universali. Universaliter ergo inter formas substantiales est transmutatio, sic quod in inductione unius est abjectio alterius, et e converso. Talis autem inductio et abjectio non potest esse per accidens ad inductionem et abjectionem aliorum quae sunt per se termini generationis et corruptionis: quia in generatione substantiae vel corruptione nihil potest per se esse terminus, nisi forma substantialis. Est ergo transmutatio inter quascumque formas universaliter. Oportet ergo dicere universaliter, quod omnes sunt ejusdem generis: et haec est prima probatio propositionis.

Secundo probatur per locum a definitione. Dicit enim Philosophus 5 Metaph., quod diversa genere sunt quae non habent idem susceptivum. Omnes ergo actus qui habent idem susceptivum, sunt ejusdem generis. Hoc est manifestum tam de accidentibus transeuntibus, quae sunt operationes, quam de formis permanentibus: visio enim albi et visio rubei sunt actus ejusdem generis, cum habeant idem proximum susceptivum, scilicet potentiam visivam: similiter albedo et rubedo sunt formae ejusdem generis, cum sint in eodem susceptivo, scilicet in superficie corporis terminati. Et hujus ratio est, quia potentiae distinguuntur per actus, ita quod actus diversorum generum habent diversas potentias. Proximum autem susceptivum cujuslibet actus est potentia nata perfici per illum actum. Unde oportet quod omnes actus qui habent idem susceptivum proximum, sint ejusdem generis. Nunc autem omnes formae substantiales habent idem susceptivum, quia sunt perfectiones ejusdem potentiae. Materia enim est illud quod est potentia quaedam ordinata ad formas omnes materiales tamquam ad suos actus sive perfectiones; et est susceptiva omnium formarum materialium, sicut lignum est susceptivum omnium formarum artificialium, ut dicitur 1 Physic. Omnes ergo formae materiales sunt ejusdem generis.

Sed huic probationi potest obviari de anima, quae est actus corporis physici organici. Non enim videtur esse actus primae materiae tamquam potentiae immediate vel proxime, sed solum tamquam remote. Videtur autem esse actus corporis tamquam immediate: unde Philosophus dicit in 2 de Anima, quod ex corpore et anima fit unum tamquam ex potentia et actu. Et sic videtur, quod ejus susceptivum immediatum sit alterum a susceptivo aliarum formarum, licet idem habeant susceptivum remotum. Et ex hoc videtur sequi praedictum, quod anima non sit ejusdem generis cum formis materialibus, cum illa sint diversa genere quae non habent idem susceptivum proximum. Non enim oportet quod illa quae habent idem susceptivum remotum sint ejusdem generis: sic enim color et sapor essent

ejusdem generis, cum sint in eadem substantia. Potentia autem dicitur non quodcumque principium actus, sed principium immediatum ipsius. Materia ergo si sit potentia sive susceptivum aliarum formarum, non sequitur quod sit animae. Sequitur ergo, ut videtur, quod anima sit alterius generis ab aliis formis.

Ad hoc dicendum, quod necesse est idem susceptivum esse animae et aliarum formarum. Si enim accipiamus corpus in actu per aliam formam quam sit anima, quod quidem corpus maneat post mortem secundum aliquos, tale corpus non potest esse potentia respectu animae: quia si sic, posset post mortem suscipere animam; quia quamdiu manet potentia, tamdiu potest per agens duci ad actum naturaliter: sicut quamdiu in oculo manet potentia visiva, potest duci ad actum videndi. Nunc autem corpus mortuum per nullum agens naturale potest animam suscipere, sed tantum per agens supernaturale, quod est Deus: eo mortuo enim non fit vivum naturaliter, nisi per resolutionem ad primam materiam. Corpus autem mortuum nunquam fuit idem numero potentia respectu animae. Eodem modo etiam potest argui de quocumque accepto in corpore mortuo, quod sit compositum: nihil enim tale potest accipi, quod possit fieri vivum sine corruptione: fit enim resolutio corporis mortui usque ad primam materiam, antequam ex ipso generetur vivum: et ita relinquitur quod materia prima sit potentia immediata respectu animae, si accipiamus animam secundum suam propriam rationem, sicut est potentia immediata respectu aliarum formarum. Tamen si consideremus corpus in actu per ipsam animam, tunc ipsum corpus sic consideratum est potentia respectu animae, et secundum quod ipsa dat esse vivum et sensitivum, et sic deinceps: et sic loquitur Philosophus in 2 de Anima, cum dicit, quod ex corpore et anima fit unum, sicut ex potentia et actu: et similiter quando dicit ibi quod anima est actus corporis. Ideo autem sic loquitur, quia in definitione formae debet poni materia prout appropriata est illi formae, non autem secundum quod communis est sibi et aliis. Et similis est modus loquendi cum dicitur, anima est actus corporis, ac si diceretur, calor est actus calefacti. Non autem id cuius calor est actus, est qualificatum alia qualitate priori quam sit calor, quia calor est de primis quatuor qualitatibus; sed intelligitur quod sit qualificatum primo calore, qui est actus ejus. Nec potest dici, quod dispositio susceptivi, per quam appropriatur potentia actui, det ipsi susceptivo rationem potentiae, ita scilicet quod illa dispositione destructa non sit amplius potentia respectu talis formae: sicut si diceretur, quod propria harmonia facit quod corpus est potentia respectu animae; et ideo ipsa harmonia destructa vel soluta, jam non est potentia, scilicet susceptiva respectu ipsius. Si enim hoc esset verum, tot essent potentiae quot actus: et non responderet una potentia diversis actibus ejusdem generis; quia diversi actus requirunt diversas dispositiones in potentia susceptiva. Videmus enim actus activorum esse in patiente et disposito, ut dicitur 2 de Anima. Unde etiam formae elementorum, de quibus manifestum est quod habent idem susceptivum proximum, requirunt in suo susceptivo dispositiones contrarias; puta, forma ignis calorem, forma aquae frigiditatem. Nec valet si dicatur, quod hoc fit propter

(1) *Al.* et alimentum ex alimentis.

defectum agentis naturalis, quod (1) illa potentia passiva quae est corpus mortuum, non potest duci ad actum vitae. Quia cuilibet potentiae passivae respondet aliqua potentia activa, quae possit eam ducere ad actum: alioquin illa potentia passiva esset otiosa. Unde ex hoc quod non est aliqua potentia naturalis quae possit disponere corpus mortuum ad actum vitae, sequitur quod ipsum non est potentia respectu talis actus, et per consequens etiam non est idem corpus secundum formam, quod fuit vivum; illud enim corpus vivum erat potentia respectu animae, secundum quod (2) anima dat esse vivum et ulteriores perfectiones; licet materia sit ejus potentia, secundum quod constituit esse substantiale et esse corporeum, sicut dictum est. Sic ergo oportet quod omnes formae materiales sint ejusdem generis, eo quod omnes habent idem susceptivum proximum, scilicet materiam primam: et haec est secunda (3) propositionis probatio.

Ostenditur hoc idem ex habitudine formarum ad se invicem quantum ad suas essentias. Ad cujus evidentiam considerandum est, quod formae diversorum generum sic se habent, quod una nihil habet in sui natura de virtute alterius, sed sunt penitus diversae naturae, quarum nulla continetur in alia; puta color et sapor, quorum neutrum est virtute in altero, et ex hoc sunt diversa secundum genus. Sed formae ejusdem generis sic se habent, quod semper una virtute continet aliam: illa scilicet quae est perfectior in se continet imperfectiorem cum alio addito. Sicut videmus quod una figura continet aliam, et aliquid amplius: tetragonum enim continet trigonum, et addit unum angulum: pentagonum continet tetragonum, et addit unum angulum: et ita de ceteris. Et sicut est in genere rectilinearum figurarum; ita est in aliis generibus. Cum enim in omni genere sit unum primum quod est mensura omnium quae sunt in illo genere; oportet quod diversae formae ejusdem generis sint ab invicem distinctae per recessum a primo sui generis, et quod multiplicentur secundum quod multum recedunt ab illo primo, quaedam minus et quaedam magis; ut scilicet tot sint formae, quot modis fit recessus ab illo primo. Puta, in genere coloris, tot sunt species, quot modis fit recessus ab illo primo in genere coloris, et mensura totam perfectionem sui generis comprehendente. Unde et Philosophus 10 Metaph., nigrum quod maxime distat ab albo, dicit esse privationem albi, eo quod minime habet perfectionem coloris albi: et ita est in aliis contrariis. Omnia enim contraria sunt in eodem genere: unde unum contrariorum semper est privatio respectu alterius quod est habitus, eo quod continet totam perfectionem sui generis. Ex his concludi potest: quaecumque formae sic se habent ad invicem, quod semper perfectior continet in se imperfectiorem, et super eam addit aliquid, sunt ejusdem generis. Sic se habent omnes formae substantiales: tales (4) enim formae sunt ut numeri, quorum species resultant per hoc quod major addit unitatem supra minorem, sicut dicitur 8 Metaph. et 9. Omnes ergo formae substantiales materiales

sunt ejusdem generis. Sicut enim numeri diversi resultant secundum progressionem naturalem ab unitate, ita quod primus numerus super unitatem addit unitatem, et sic deinceps; ita formae materiales accipiuntur secundum quemdam a materia recessum secundum perfectius et imperfectius. Formae siquidem elementorum sunt propinquissimae materiae primae, et sic imperfectissimae secundum Commentatorem, et quasi parum a materia recedentes: unde corpora elementalia dicuntur prima corpora tamquam a primis formis et materia prima constituta. Istas autem formas propter sui propinquitatem ad materiam non sequitur aliqua operatio excedens qualitates activas et passivas. Consequenter autem magis recedunt ab imperfectione et potentialitate materiae primae formae mixtorum, utpote habentes in se quidquid habent formae elementorum, et adhuc amplius. Unde et ipsas consequuntur operationes excedentes qualitates activas et passivas elementorum: puta adamas trahit ferrum, jaspis restringit sanguinem, et sic de aliis: et in istis etiam sunt multi gradus. Similis est etiam comparatio plantarum ad inanimata: quod scilicet formae plantarum excedunt omnium inanimatorum formam: ex quo quidem excessu habent in seipsis principium sui motus activum, puta, nutritionis et augmentationis, quod nulli inanimato competit. Similiter etiam formae animalium excedunt formas plantarum, et plus elongantur a terrestreitate materiae: propter quod habent in se principium sui motus, sed et cognitiones aliarum rerum. Anima vero humana inter omnes formas receptas in materia perfectissima est. Unde non solum est principium cognitionis quae est per organum corporale: sed quia elevata est super materiam, naturaliter habet cognitionem et intelligentiam separatam a materia: unde oportet quod sit perpetua, sicut inquit Philosophus 12 Metaph., quod inter omnes formas ipsa sola manet post corporis corruptionem. Sic ergo cum sit perfectissima inter omnes formas materiales, et contineat virtualiter vegetativam plantae, et sensitivam bruti, oportet quod contineat virtute omnes alias formas materiales. Et ita quantum ad hoc quod est perfectio corporis, est ejusdem generis cum aliis formis corporalibus vel materialibus. Et sic considerari potest quod semper forma substantialis quae est perfectior continet in se imperfectiorem et amplius. Et ita relinquatur, quod omnes sunt ejusdem generis. Et haec est tertia et ultima probatio propositionis.

Prima vero propositio ejusdem rationis probatur ex his quae dicta sunt. Primo quidem per transmutationem formarum ad invicem. Si enim aliqua duae formae perficiunt simul idem subjectum, illae sunt contingentes, nullam repugnantiam habentes. Inter formas autem contingentes non cadit transmutatio per se: contingens enim non fit ex contingenti nisi per accidens; nec per consequens corrumpitur contingens nisi per accidens, sicut dicitur 1 Physic. Si autem inter formas quae simul sunt in subjecto, non cadit transmutatio per se, sequitur quod non sint ejusdem generis; quia inter formas ejusdem generis cadit transmutatio per se, ut prius ostensum est. Impossibile est ergo duas formas ejusdem generis simul perficere idem subjectum.

Secundo ostenditur idem per hoc quod formae ejusdem generis habent idem susceptivum

(1) *Al.* quia.

(2) *Al.* sed.

(3) *Al.* hoc est secundae.

(4) *Al.* tunc.

immediatum. Non est autem possibile, quod duae formae habeant idem susceptivum numero immediatum simul; quia oportet esse ordinem naturalem inter formas. Nec etiam ponuntur duae formae tales in eodem subjecto, nisi in quantum una est ordinata ad aliam. Neutra etiam perficietur per aliam, eo quod perfectibile praesupponitur perfectioni. Si ergo dicatur quod duarum formarum una perficit susceptivum mediante alia; sequitur quod non habent idem susceptivum immediatum, et per consequens quod non sint ejusdem generis. Impossibile est ergo duas formas aliquo modo perficere idem susceptivum. Nec etiam valet si dicatur, quod una forma est dispositio ad susceptivum, et alia est actus ejusdem. Quia diversae formae ejusdem generis requirunt diversas dispositiones, per quas receptivum eis approprietur. Et licet in via generationis una disponat ad inductionem alterius, tamen in via essendi dispositio propria unius repugnat alteri: si enim dispositio unius staret cum dispositione alterius, jam esset communis dispositio, et nullius propria. Forma autem non est in materia, nisi sit disposita et propria. Si essent duae formae in materia simul, neutra haberet propriam dispositionem: tota enim dispositio materiae esset communis utrique, ex quo utraque forma stat cum illa dispositione. Non solum ergo verum est quod una forma non pertinet ad dispositionem alterius propriam, sed nec etiam compatitur secum aliam in eodem subjecto. Et haec potest esse tertia probatio sumpta ex impossibilitate dispositionum.

Quarto ostenditur idem sic. Semper forma perfectior continet imperfectiorem, sicut est in numeris et figuris quod quinarius continet quaternarium, et pentagonus tetragonum, ut prius ostensum est. Forma ergo perfectiore existente in materia, frustra esset in ea forma imperfectior, ex quo continetur in forma perfectiore, et sit cum forma imperfectiore ejusdem generis in eodem subjecto.

Quinto persuadetur sic per ea quae apparent sensui. Videmus enim in formis sensibilibus quae sunt ejusdem generis, quod non compatiuntur se in eodem subjecto: non enim idem corpus in eadem sui parte est album et rubeum, nec etiam calidum et frigidum; et sic etiam videmus non solum in illis ubi est contrarietas, sed etiam in aliis: non enim aliquod corpus potest esse simul triangulare et quadrangulare. Cum ergo per sensibilia elevemur ad cognitionem intelligibilium, impossibile est quod formae ejusdem generis quae non sunt sensibiles, cujusmodi sunt formae substantiales, compatiuntur se in eodem subjecto.

Sexto probatur idem sic. In formis ubi invenitur contrarietas, puta in coloribus et saporibus, duo est considerare: scilicet quod intenduntur et remittuntur, et quod sunt ejusdem generis. Manifestum est autem quod in talibus duae formae sunt impossibiles ad invicem. Aut ergo sunt impossibiles quia intenduntur et remittuntur, aut quia sunt ejusdem generis. Nec apparet aliqua alia causa impossibilitatis nisi alterum istorum. Sed non potest dici quod sunt impossibiles quia intenduntur et remittuntur; quia per intensionem et remissionem formae in subjecto fit quodammodo accessus ad aliam formam ejusdem generis, vel perfectiorem vel imperfectiorem; et sic per hoc tollitur causa impossibilitatis (1) unius ad alteram. Relinquitur er-

(1) *Al.* aliquid impossibilitatis.

go quod sint impossibiles propter hoc quia sunt ejusdem generis. Cum ergo posita causa ponatur effectus, oportet universaliter quod omnes formae quae sunt ejusdem generis, sint ex hoc impossibiles.

Septimo arguitur sic. Forma imperfectior alicujus generis distinguitur a perfectiore non secundum aliquid positivum quod sit in ea et non in imperfectiore (1): quia, sicut dictum est, perfectior continet imperfectiorem totaliter, et adhuc amplius. Per hoc ergo distinguitur ab ea, quod forma perfectior aliquid ponit in subjecto, ejus privationem ponit imperfectior. Cum ergo impossibile sit aliquid subjectum simul habere in se aliquid positivum, et privationem ejusdem, impossibile est ergo quod forma perfectior et imperfectior ejusdem generis simul sint in eodem subjecto.

Octavo arguitur. Omnis actus quamdiu suam potentiam perficit, totaliter eam perficit, et occupat et continet: de ratione enim actus est perficere, terminare et complere suam potentiam. Sed susceptivum occupatum et completum nihil suscipit quousque evacuetur. Ergo, cum formae ejusdem generis habeant idem susceptivum, impossibile est quod recipiat unam formam post aliam, nisi priore objecta.

Nono et ultimo arguitur. Omnis transmutatio per se est de opposito in oppositum: de non albo enim fit album, et de non igne ignis. Sed inter duas formas ejusdem generis est per se transmutatio, sicut dictum est. Ergo una forma denominat ipsum opposita denominatione a prima, qua denominat ipsum alia forma ejusdem generis. Et hoc apparet in formis sensibilibus. Corpus enim quod est rubeum, est non album, et est non nigrum, et non viride: eodem etiam modo album est non rubeum et non viride, et sic de aliis. Si ergo duae formae ejusdem generis simul perficerent idem subjectum, opposita simul inessent eidem subjecto. Puta, si in eodem subjecto esset albedo et rubedo, denominaretur idem subjectum per rubedinem non album, et per albedinem album; et ita esset album et non album. Hoc autem est oppositum primi principii.

Et ita sufficienter ostensum est, quod diversae formae ejusdem generis non possunt simul perficere idem subjectum. Prius autem probatum est omnes formas substantiales esse ejusdem generis. Relinquitur ergo quod non est possibile aliquid subjectum simul perfici diversis formis (2) substantialibus, sed una sola. Sumpta est autem haec via ex sententia Philosophi in diversis locis; et praecipue ex 10 Metaph.: ubi dicit quod sicut in coloribus est unum primum quod est mensura omnium colorum, scilicet color albus; et in vocibus est unum primum illius generis, scilicet diesis, et in figuris rectilineis est unum primum, scilicet trigonum; ita est in aliis generibus. Et si ita sit, in passionibus et qualitibus et substantiis necesse est similiter se habere. Similiter enim se habet in omnibus. Ex istis verbis Philosophi habetur expresse, quod substantiae omnes de quibus hic loquitur, sunt unius generis physici. Loquitur autem de substantiis materialibus, quia nondum pervenit ad determinandum de substantiis immaterialibus. Dicit etiam in eodem quod privatio est principium contrarietatis, et quod unum

(1) *Ed. Rom.*: et non in perfectiore.

(2) *Al.* modis.



contrariorum est privatio respectu alterius. Ubi etiam dicit Commentator, quod omnia contraria opponuntur secundum privationem et habitum. Uni enim contrariorum accedit ut sit privatio perfectionis, quia alterum contrariorum est perfectus habitus, et alterum diminutus. Ratio autem istorum ditorum Philosophi et sui Commentatoris est: quia contraria sunt in eodem genere; et ideo distinguuntur secundum privationem et habitum sui generis, ut supra expositum est. Consequens ergo est, quod eodem modo distinguantur formae ejusdem generis ubi non est contrarietas, utpote in figuris et in substantiis; ut semper una perficiat subjectum cum privatione alterius. Sed unum contrariorum est ut privatio propter sui maximam distantiam a suo contrario, quod est habitus perfectissimus ejusdem generis: ita et media inter duo contraria cum sint ex ipsis contrariis, aliquid habent de privatione, et aliquid de habitu secundum magis et minus, propter quod quodlibet eorum est impossibile alteri in eodem subjecto. Cum ergo eadem causa in compositis reperiatur, et in aliis generibus, ubi non est contrarietas; non poterunt duae formae ejusdem generis simul perficere idem subjectum. Dicit etiam Philosophus in eod. lib. quod non est permutatio ex uno genere in aliud genus, nisi per accidens: et quanto aliud est perfectius, tanto est simplicius et minus compositum, ut patet in formis accidentalibus ejusdem generis: albedo enim quae est color perfectissimus, est simplicior: et alii colores in quantum ab eo distant vel ei appropinquant, sunt compositiores vel simpliciores. Et praeterea, formarum ejusdem generis una continet aliam virtualiter, scilicet perfectior imperfectiorem: et imperfectior si conjungeretur cum perfectiore, nullam perfectionem daret, sed esset frustra. In natura autem nihil est frustra. Non ergo sic poterit fieri additio in speciebus, ut forma praexistens maneat cum alia superveniente. Oportet ergo similitudinem praedictam sic intelligere, ut forma perfectiore adveniente corrumpatur praexistens; ut semper in composito maneat una forma tantum, continens tamen imperfectiorem et amplius, et per consequens addens super ipsam: ut sicut numerus major continet in se numerum minorem seorsum ab eo existentem, et addit super ipsum, ut quaternarius continet in se virtualiter quantitative seorsum ab eo existentem ternarium, et addit unitatem; ita quod forma perfectior super formam imperfectiorem, quam virtualiter continet, addit aliquam perfectionem. Licet ergo in numeris sit quod minori numero, puta, ternario, potest fieri additio unitatis novae, quae cum tribus unitatibus constituat quaternarium qui est numerus major; tamen ille modus in formis non est possibilis, ut forma adveniens cum forma praexistente in materia constituat perfectiorem formam. Et hujus diversitatis ratio est duplex: quia additio numeri super numerum est secundum partes integrales, sive quantitativas, in quantum unus numerus excedit alium. Ad talem autem excessum habendum nihil refert utrum accepto minore numero addamus aliquid faciendo ipsum minorem numerum partem majoris, vel quod accipiamus majorem numerum seorsum omnino ex omnibus unitatibus: utroque enim modo unus numerus excedit alium secundum quantitatem. Sed additio formae super formam ejusdem generis est secundum perfectionem. Tota

autem perfectio quae est in formae imperfectior (1) est in forma perfectiore per se; et ita nulla perfectio cresceret eis ex formis. Et tanto forma est simplicior, quanto major est et perfectior: licet in numeris sit e contrario: quia quanto numerus est major, tanto est compositior. Et ideo non potest fieri additio formae existenti, sicut fit in numeris additio numero praexistenti. Alia ratio hujus diversitatis est, quia numerus non est quid unum simpliciter, sed unum aggregatione unitatum: et ideo sibi competit habere plures partes, quarum quaelibet est in actu. Et ideo quocumque modo fiat additio partis ad partem, resultat numerus major. Sed substantia materialis est unum quid simpliciter: et ideo non possunt in ea esse plures actualitates, ut infra dicitur: et ideo adveniente una forma substantiali, necesse est aliam cedere. Et secundum hoc convenientior est similitudo formarum ad figuras, quam ad numeros, eo quod figura sequitur formam continui. Quam similitudinem ponit Philosophus in 2 de Anima, sic inquit. Similiter se habent ei quod de figuris est, et quae secundum animam sunt. Semper enim in eo quod est consequenter est potentia quod prius est, in figuris et in animatis; ut in tetragono quidem trigonum. In sensitivo autem vegetativum. Manifestum est autem in figuris, quod ad habendum speciem majorem trigono manenti non est illi addenda aliqua linea ut habeatur tetragonus, quia qualitercumque addatur illa linea non esset figura major, quia non esset alia clausio quam prius. Nec etiam trigono praexistenti potest addi novum quaternarium ad constituendum cum ipso majorem figuram, quia non compatiuntur se in eodem subjecto sive corpore secundum numerum duae figurae ejusdem generis: sed oportet ad hoc quod corpus trigonum fiat tetragonum, amovere per decisionem de corpore, ut destruat figura triangularis vel si (2) sit flexibilis vel ductibilis, oportet in ipso aliamurationem facere, ut habeantur quatuor anguli destructis primis angulis qui fuerunt in figura triangulari. Sic ergo necesse est additionem vel subtractionem in substantiis rerum fieri, ut adveniente nova forma, corrumpatur illa quae praexistebat, sicut in figuris patet, et sicut in numeris quorum unus accipitur post alium seorsum ex aliis unitatibus omnibus, cum unus plures unitates contineat quam alter, et sic cadit super ipsum. Patet etiam, quod tota illa via procedit secundum sententiam Philosophi; quia propositiones ex quibus ostensum est propositum, ab eo sumptae sunt, et secundum sensum quem intellexit. Sed unum dubium restat videre: quia videtur esse probatum, quod in homine non sint plures formae substantiales: quia anima rationalis cum sit incorruptibilis, non videtur esse ejusdem generis cum aliis materialibus quae sunt corruptibiles, quia corruptibile et incorruptibile differunt secundum genus, ut dicitur 10 Metaphysicorum: et ita anima rationalis compatitur secum quasdam formas corporales in homine, ut sint duae formae in homine, scilicet anima rationalis et forma corporis. Ad hoc dicendum est, quod propter hoc anima constituta est in confinio substantiarum separatarum quae sunt incorporeales et formarum materialium: quae sunt corporales: est enim infima formarum incorruptibilium et supre-

(1) *Al.* quae est in forma, imperfectior.

(2) *Al.* omittitur si.

ma formarum corruptibilium: et propter hoc est partim separata a materia, et partim in materia. Secundum intellectum namque et voluntatem separata et incorruptibilis est: et quantum ad hoc pertinet ad genus substantiarum separatarum: sed secundum alias potentias est actus materiae, et secundum illas est corruptibilis: et sic pertinet ad genus formarum materialium quae sunt corruptibiles. Quod patet ex hoc quod per potentias illas, scilicet sensitivam et vegetativam, continet perfectionem quae reperitur in formis brutorum, sed eminentius. Unde impossibile est quod compatiatur secum aliam in eodem subjecto, cum sit ejusdem generis cum unaquaque; sicut et omnes formae aliae sunt impossibiles propter hoc quod sunt ejusdem generis, ut ostensum est.

Sequitur de secunda via ostendendi propositum, quae sumitur ex potestate essentiali formae substantialis, ex hoc scilicet quod quaelibet forma substantialis constituit ens simpliciter. Et ne fiat disceptatio de vocabulo, voco ens simpliciter illud quod est hoc aliquid et subsistens: hoc aliquid enim subsistens a nullo dependet in essendo; quod autem dependet, est ens secundum quid. Unde Philosophus accidentia vocat entia secundum quid, substantias autem entia simpliciter: similiter generationem accidentium vocat generationem (1) secundum quid, generationem substantiarum generationem simpliciter. Quod autem quaelibet forma substantialis constituat ens subsistens, posset probari ex prima via, supposita impossibilitate formarum. Ex hoc enim statim sequitur, quod omne subsistens materiale, cum sit unum subjectum unam tantum habens materiam, quod tantum sit una forma cujuslibet, quae faciat eum esse subsistens. Sed tamen, ut appareat quod ista via in se sit sufficiens, ideo ex propriis hujus viae est procedendum. Pro principio autem hujus viae sumendum est, quod omnis forma naturalis est principium alicujus motus naturalis et quietis. Omnis ergo forma naturalis quae primo advenit materiae, constituit aliquod corpus aptum natum moveri aliquo motu naturali. Tale autem est corpus dimensionatum, grave vel leve, durum vel molle. Ergo ad quaecumque formam primo advenientem materiae sequuntur aliqua accidentia quae sunt necessaria ad motum. Sed talia accidentia necessario fundantur in aliqua substantia subsistente. Ergo omnis forma naturalis substantialis quae immediate unitur materiae, constituit ens subsistens. Praeterea, omne quod per se movetur, est per se ens et per se subsistens: unumquodque enim sicut est, ita operatur. Sed omnis forma primo adveniens materiae constituit ens quod per se movetur, scilicet corpus physicum. Ergo est ens per se subsistens. Et hoc specialiter considerandum est de forma corporis humani, quam quidam ponunt esse aliam ab anima. Cum enim secundum omnes forma illa corporis maneat in materia post mortem; apparet autem sensui, quod tale corpus est quoddam subsistens; sequitur quod ipsa constituit ens per se subsistens. Praeterea hoc ostenditur universaliter de omni forma substantiali sic. Forma substantialis, sicut ex hoc quod est forma vel actus, aliquid in actu constituit; ita ex hoc quod substantialis est, substantiam debet constituere. Ex hoc ergo quod est forma substantialis, debet constituere substan-

(1) *Al. genus hic et infra bis.*

tiam in actu, et per consequens dare esse subsistens. Sed esse substantiae est subsistere, sicut esse accidentis alteri inesse. Omnis ergo forma substantialis constituit substantiam subsistentem. Praeterea hoc persuadetur per signum. Videmus enim formas imperfectas, ejusmodi sunt formae elementorum secundum Philosophos, similiter formam vaporis, pluviae, grandinis et hujusmodi imperfectorum, constituere hoc aliquid subsistens. Quanto autem forma est perfectior; tanto dat esse perfectius; perfectius autem est esse subsistens, quam esse quo aliquid non subsistit. Irrationale ergo est dicere, quod formae perfectiores, ejusmodi sunt formae mixtorum, non debeant esse subsistentes. Sic ergo ostensum est, quod omnes formae substantiales faciunt rem subsistere.

Ulterius considerandum est, quod omne quod advenit rei subsistenti, oportet esse accidens: et hoc probatur per praemissa. Primo: si enim omnis forma substantialis constituit ens subsistens, nulla forma substantialis poterit advenire subsistenti praexistenti; sed necessario constituit aliquod subsistens, et per consequens aliquod suppositum; et sic non advenit supposito praexistenti. Omne ergo quod advenit rei subsistenti, tamquam ipsam informans, accidens est. Praeterea, omne quod advenit rei subsistenti et consequitur esse substantiale, non potest esse de essentia rei; quia tota essentia rei intelligitur ut principium susceptivum ipsius esse. Comparatur enim essentia ad esse, sicut potentia ad actum. Tota ergo essentia rei sive substantia praecognoscitur ipsi esse. Non ergo quod advenit rei subsistenti est de essentia rei. Erit ergo per accidens.

Istas autem rationes putant quidam fallaciter infringere dicendo, quod aliquid est subsistens completum in esse specifico: et omne quod advenit tali, cum habeat esse completum, est extra ejus substantiam, et est accidens ipsius. Aliquid autem est subsistens incompletum, non habens secundum se esse specificum. Et ideo sibi advenit forma substantialis complens ejus existentiam et ejus essentiam. Sed istud sufficienter exclusum est per praedicta. Omne enim subsistens quantumcumque incompletum sit, separatur secundum esse ab alio subsistente. Cum ergo duae formae substantiales constituent duo subsistentia, ut ostensum est; sequitur quod neutra alteri advenit in eodem individuo, sed constituent duo individua separata secundum esse. Duo enim subsistentia quantumcumque incompleta sint, sunt duo distincta individua. Et praeterea, genera non subsistunt nisi in suis speciebus. Esse ergo subsistens quantumcumque incompletum sit, habet esse specificatum, et per consequens essentiam completam quantum possibile est secundum gradum suum.

Propter hoc quidam adveniunt aliam cavillationem, dicendo quod forma substantialis completa perfecta adveniens rei subsistenti dat ei novum esse subsistentiae; sed non manet esse quod praefuit, quia sic essent duae subsistentiae. Et ideo dicunt quod primum esse corrumpitur in adventu formae secundae; et ideo est tantum unum subsistens. Sed illud est magis irrationale: quia esse per se consequitur formam immediatius etiam quam prima passio suum subjectum proprium: esse enim est actualitas formae. Quod autem per se consequitur aliquid, non potest auferri per naturam ipso manente: unde nec propria passio potest separari per naturam a suo subjecto, dum subjectum manet: licet



forte per miraculum hoc possit fieri: quod non est ad propositum. Non ergo forma aliqua, ad quam sequitur esse, potest illud esse amittere absque sui fundamenti destructione. Praeterea, nihil aliud est formam acquirere esse, quam ipsam ad actum produci, vel generari; unde generari non solum est via ad esse, sed etiam ad formam: forma enim est terminus generationis. Ergo, cum corruptio opponatur generationi, nihil aliud est formam acquirere esse, quam ipsam destrui vel corrumpi.

Istis ergo sufficienter intellectis, manifestum est, quod impossibile est in uno individuo esse duas formas substantiales. Uterius etiam possunt concludi manifestissima inconvenientia ex istis. Statim enim sequitur quod forma quae ponitur advenire subsistenti, et esse substantialis, est substantialis ex hypotesi et non substantialis, sed accidentalis, ut ostensum est: et ita de ipsa dicentur duo contradictoria: erit enim accidens et non accidens, substantia et non substantia. Et praesertim de anima, quae ponitur ab omnibus esse substantia, sequitur quod sit accidens, cum ponatur advenire corpori constituto in esse per aliam formam. Uterius etiam; si forma substantialis sit accidens, inductio autem formae substantialis sit generatio simpliciter, inductio vero accidentis sit alteratio: sequitur quod generatio simpliciter sit alteratio, extendendo nomen alterationis ad productionem cujuslibet accidentis, penes quod potest attendi aliqua alteritas in re; sicut Socrates in foro dicitur alter a seipso in theatro. Proprie tamen alteratio est secundum qualitatem. Sumpta est autem ista via probandi propositum a sententia Philosophi et sui Commentatoris in plerisque locis et diversis, quantum ad diversa quae assumpta sunt et probata. Quod enim primo probatum est, quod omnis forma substantialis constituit hoc aliquid, hoc acceptum est a principio 2 de Anima, ubi dividit Philosophus substantiam in tria: scilicet materiam, formam et compositum: in materiam quidem quae secundum se non est hoc aliquid: et formam secundum quam jam est hoc aliquid, et tertium quod est ex his, scilicet hoc aliquid. Unde dicit Commentator, quod omnia de quibus dicitur substantia, sunt tribus modis: quorum unus est ut sit materia prima, quae per se non est formata, nec aliquid per se in actu. Secundum autem est forma, per quam habet esse hoc individuum. Tertium autem est quod fit ex istis ambobus. Vult ergo Commentator, quod substantia non dicitur de aliqua forma, nisi de illa per quam individuum est hoc aliquid. Quod quidem hoc aliquid dicitur fieri ex istis ambobus, scilicet forma et materia tali; et non dicitur ipsum fieri ex istis ambobus et aliqua alia forma. Insufficiens enim esset haec divisio Philosophi de substantia, maxime ad propositum suum concludendum de anima, si esset aliqua forma quae constitueret hoc aliquid, et aliqua quae non constitueret hoc aliquid; nisi hoc poneret in sua divisione. Consequenter Commentator in eod. loco hoc ponit expressius: volens enim ostendere quod anima sit substantia quae est forma, accipit de ejus probatione quod forma substantialis in hoc differt ab accidente, quod subjectum accidentis est compositum ex materia et forma, et est aliquid existens in actu, quod non indiget in suo esse accidente. Subjectum autem formae substantialis non habet esse actu nisi per illam formam, et indiget forma ut sit actu. Et postea quibusdam interpo-

sitis dicit, quod formae naturales sunt substantiae, quia cum fuerint ablatae, auferitur nomen quod demonstrat ens secundum quod est individuum substantiae: et similiter definitio quae fit secundum illud nomen, quia auferuntur genus et differentia, et nihil remanet quod sit aliquod individuum. Et hoc valde manifestatur, ut dicit, in formis rerum simplicium; quoniam cum forma fuerit ablata, nihil remanet. Circa ista verba Commentatoris considerandum est, quod quamvis non sit ita manifestum de anima sicut de aliis formis, quod subjectum ejus non sit aliquid actu nisi per animam, et quod ipsa ablata nihil remaneat in materia; tamen omnia ista adducit ad habendum cognitionem de anima specialiter: ut patet ex processu suo. Accipit enim quod anima est prima perfectio corporis, sicut ipse dicit in definiendo animam: et ex hoc sequitur, quod non sit aliqua forma prior, per quam sit corpus. Si enim esset aliquis actus prior, subjectum animae esset compositum ex materia et forma; et ita anima esset accidens, secundum differentiam quam prius assignavit inter substantiam et accidens, nec haberet corpus esse per animam; quod cum sit impossibile, relinquitur quod sit prima perfectio corporis, ita quod nulla sit prior in corpore, et quod subjectum ejus nullum esse habeat nisi per ipsam, sed indigeat anima ut sit in actu. Et hoc magis expresse dicit idem Commentator in 8 Metaph., in fine, quod corpus et anima non est duo diversa, et corpus non existit sine anima. Vult ergo Commentator quod universaliter subjectum cujuslibet formae substantialis nihil sit in actu nisi per illam formam: et specialiter hoc probat de substantia animae. Et hoc bene considerandum est, quia hoc de subjecto animae ab aliquibus praecipue negatur. Quod autem conclusum est supra, quod omne quod rei advenit post quaecumque formam substantialem, sit accidens, hoc satis dicit Commentator. Dicit enim 1 Physicorum, quod si materia haberet aliquam formam substantialem sibi propriam, nullam aliam reciperet ipsa praesente; sed statim corrumpetur, quam cito alia generaretur. Et paulo post dicit, quod si haberet aliquam formam, vel formae essent accidentia, vel formae esset forma. Ista autem non sequerentur, si esset aliqua forma quae posset aliam formam immediate super se recipere: si enim esset aliqua talis propria materiae (1), etiam si esset de substantia materiae, non oporteret eam corrumpi in adventu alterius formae, sed potius perficeretur: nec etiam oporteret formam supervenientem esse accidens. Ad hoc autem, ut dictum sumus habeat veritatem, oportet quod nulla forma sit quae non constituat hoc aliquid; ita quod omnis forma adveniens sit accidens. Et propter hoc antiqui ponentes principium materiale esse corpus aliquid, puta, ignem aut aerem, dixerunt tamquam necessarium suum consequens poni, quod omnes formae essent accidentia. Unde Commentator in 5 Physicorum, dixit quod si formae elementorum remanent in actu differentes ab aliis formis, necesse esset ut nullum ens generaretur ab eis diversum in forma substantiali, sed tantum in accidentibus. Quod autem conclusum est supra de anima, quod ipsa esset accidens, si adveniret alicui formae, hoc satis habetur ex verbis Commentatoris jam dictis, 2 de Anima. Quod autem ulterius concludebatur, quod

(1) *Al.* propria materia.

generatio esset alteratio, satis diffuse diffamari potest ex verbis Philosophi. Dicit enim 1 de Gen. dans intentionem suam, quod universaliter determinatum est de generatione et corruptione, alteratione, et ceteris transmutationibus. Ubi notandum, quod hoc dicit universaliter, ne quis dicat quod quae sequuntur non se extendant ad omnia generabilia, sed ad quaedam. Et cito post subjungit, quod quicumque putaverunt omnia ex uno aliquo principio materiali quod sit corpus, puta ignis vel aer, necesse habebant ponere generationem alterationem esse, et quod prius generatur solum alterari. Cujus causam assignat postea dicens: Semper enim manet secundum eos, unum et idem subjectum in actu. Tale autem alterari dicimus. Unde ipsi ponentes consequenter suis principiis generationem nihil aliud esse dicebant, quam alterationem, ut ibid. dicitur. Vult ergo Philosophus quod in quacumque transmutatione manet subjectum aliquod in actu, illa transmutatio est alteratio: et si ponatur quod illa transmutatio est generatio, generatio dicetur alteratio. Istud patet etiam ex processu sequenti magis expresse; quia sequitur ibi, universaliter ergo de generatione et corruptione simpliciter. Assignat enim causam, quare universaliter sit dictum de generatione omni, dicens quod Plato insufficienter determinavit de eis: non enim scrutatus est de omni generatione et corruptione, sed de ea quae est elementorum. Ex verbis ergo Philosophi patet, quod ea quae ibi determinavit de generatione, sunt universaliter ad generationem cujuslibet substantiae pertinentia. Ibi autem secundum sententiam propriam determinavit manifeste, quod id ex quo est generatio, et id ex quo est corruptio, est substantia in potentia tantum; nec est actu quid, nec quantum, nec quale, et sic de aliis. Tale autem non est aliquid, nisi materia intellecta sine forma omni. Et ideo oportet per intentionem Philosophi, quod in illo ex quo generatio est, nulla forma remaneat apud generationem, nec substantialis nec accidentalis; illud enim quod manet, est illud ex quo est generatio. Unde vult, quod illud ex quo est generatio, est non ens; et quod illud non est alterum contrariorum, sed materia: et ideo semper in substantiis unius generatio est alterius corruptio, et e contrario. Unde dicit quod nihil actu manet apud generationem; et quod patet ex consequentibus: quia consequenter assignans differentiam inter generationem et alterationem, dicit quod alteratio est quando manente substantia sensibili, fit transmutatio in passionibus; puta quando corpus sanum fit languidum, unum et idem manens. Quando autem totum transmutatur non manente aliquo sensibili in eodem subjecto, sicut ex semine toto fit animal, et ex aqua aer, tunc est ejus generatio, et alterius corruptio. Et addit expresse postea sic: quando nihil manet, ejus alterum sit passio, vel accidens vel generatio et corruptio, est materia proprie et maxime subjectum generationis et corruptionis susceptibile. Ex isto processu habetur maxime secundum sententiam Philosophi, quod nunquam in generatione aliqua una forma advenit alicui subjecto existenti in actu per priorem formam quae remanet: sed oportet cum inductione unius esse abjectionem alterius, et solam materiam esse subjectum: alioquin generatio esset alteratio. Istud autem potest ostendi esse de mente Philosophi, si consideremus quomodo 5 Phy-

sicorum, ostendit generationem non esse motum, propter hoc quod illud quod generatur non est ens. Distinguit enim primo non ens, dicens, quod omnis mutatio est de subjecto in subjectum, vel de subjecto in non subjectum: et quod non subjectum sive non ens dicitur dupliciter: uno modo simpliciter; alio modo secundum quid, ut appareat (1) magis de quo ente dicat vel intendat: et inter alios modos accipit non ens, quod nihil est in actu, unde manifestum est, quod non potest moveri. Et ex hoc sic arguit: illud quod non est aliquid in actu, sed simpliciter non ens, non movetur. Quod autem generatur, est non ens simpliciter. Ergo quod generatur non movetur, et per consequens generatio non est motus. Ad hoc autem quod illa ratio valeat, oportet quod illud quod generatur, sit non ens simpliciter, sic ut non sit mobile. Si autem esset ens per aliquam formam quantumcumque imperfectam, quae constitueret corpus; jam esset aliquo modo ens, sic ut moveri posset, licet non esset in specie completa. Oportet ergo, quod ipsius quod generatur nulla sit forma in materia, ut sic sit simpliciter non ens: et ita sola materia remanebit apud generationem, et nulla forma ejus quod generatur.

Et ut istud manifestius appareat, excludam cavillationem quae istum processum impedire videtur secundum quosdam. Dicunt enim aliqui, quod ratio Philosophi non accipit quod illud quod remanet in generatione sit simpliciter non ens; sed quod illud quod generatur sic, sit simpliciter non ens actu. Licet autem praexistat generationi quandoque quoddam corpus quod manet, et per generationem perficitur; tamen illud corpus praexistens non est illud corpus quod generatur, nisi potentia tantum; generatum autem actu est ipsum compositum ex praexistente subjecto et forma per generationem. Sed ista verba vana sunt: quia si recte consideremus, non differt quantum ad propositum, utrum accipiat in ratione Philosophi: quod subjectum generationis sit non ens simpliciter, vel tertio modo; vel quod illud susceptivum formae quod manet apud generationem sit non ens simpliciter. Quia quodcumque dicatur, oportet quod ratio ad hoc quod valeat, procedat ex non entitate ejus quod manet. Non enim potest ratio procedere ex non ente generato secundum illam formam solam quae inducitur per generationem, ut intelligatur non ens solum propter earentiam illius, ita quod sit ens per aliam formam: sic enim est in omni motu, quod id quod producit, nondum est per formam quae est terminus motus: puta, cum fit homo sanus, dum movetur ad sanitatem, non est sanus, quia deficit sanitas quae est terminus motus. Sed tamen illa non entitas non sufficit ad ostendendum quod sanatio non est motus, eo quod illud susceptivum sanitatis quod manet in sanatione, sit ens quod moveri possit, cum sit homo. Talis ergo non entitas non excludit transmutationem sibi contingentem non esse motum. Procedit ergo ratio Philosophi ex non entitate generali simpliciter, ut scilicet nihil ejus sit in actu, quod maneat in generatione; et hoc patet ex littera Philosophi ibidem. Dicit enim quod aliquid est non ens, aut non album, aut non sanum, quod tamen contingit moveri per accidens, est enim homo. Quod autem simpliciter est non ens actu, vel non aliquid, hoc

(1) *Al.* apparet.

nullo modo contingit moveri. Hoc autem ideo dicit, ut appareat, quod ratio sua non procedit de non ente tali, quod uno modo est aliquid actu, licet alio modo sit non ens: alias ratio sua nullius esset vigoris. Si enim maneret aliquod corpus apud generationem, illud esset ens ad motum se habens passive. Quod autem accipitur in ratione, quod id quod generatur, ante generationem suam non sit in specie completa, sed etiam quod nullo modo actus ejus sit quod maneat apud generationem, verum est: et hoc est nihil in actu, sed per solam materiam subjici generationi oportet. Et hoc est quod Commentator dicit ibidem: quod cum esse materiae primae non admisceatur actus, impossibile est quod moveatur: et paulo post addit, quod generatio in substantia non est motus: quoniam quod generatur in ea est non ens simpliciter, et ens in potentia, quoniam transmutatur, et exit de potentia in actum. Et non est ita de generatione accidentis: transmutatum enim in ea est ens in actu, licet transmutetur secundum quod est in potentia. Ecce secundum Commentatorem, quod ratio Philosophi procedit per causam; et per consequens demonstrative generatio non est motus, ut ibidem dicit. Qui ergo concedit quod generatio non est motus, et tamen apud generationem manet aliquid in actu, ipse concedit effectum, et negat causam ipsius. Aliam cavillationem alii ponunt dicentes propositionem Philosophi, scilicet, Quod generatur est non ens, simpliciter veram esse in rebus animatis, non autem in rebus inanimatis quantum ad generationem, quae est inductio ultimae formae. Sed illud est impossibile: tum quia scientia libri Physicorum est de universalibus naturae, et ita se extendit tam ad animata quam ad inanimata: tum etiam quod littera sua hoc manifeste concludit. Postquam enim ostendit quod generatio et corruptio non sunt motus, sed mutationes per contradictionem; concludit ex hoc, quod tantum necesse est illam mutationem esse motum, quae (1) est ex subjecto in subjectum. Talem autem dicit solum esse inter contraria vel media: et ita, cum in substantiis nunquam sit contrarietas, sequitur quod universaliter

probatum sit de omnibus substantiis, quod generatio earum non est motus. Et praeterea illa cavillatio prius expulsa est per litteram Philosophi lib. 1 de Generatione, ubi dicit hoc idem. Patet ergo secundum Philosophum, quod oportet dicere quod nulla forma maneat in generatione, ut vitemus hoc inconveniens, scilicet generationem esse alterationem. Commentator enim in multis locis ad intentionem Philosophi dicit lib. 1 Phys., quod si materia prima haberet aliquam formam sibi proportionatam, tunc generatio in substantia esset alteratio. Dicit enim in libro de substantia Orbis, quod generatio et alteratio differunt in hoc, quod Aristoteles vocat transmutationem individuorum in suis substantiis cogere suum subjectum non esse ens actu, et non habere formam quae subjiciatur. Si enim haberet formam, nullam aliam reciperet, nisi illa destructa; unum enim subjectum habere nisi unam formam impossibile est. Ecce quod Commentator assignat causam, quia materia dum habet unam formam, non potest recipere aliam, quia impossibile est quod unum subjectum habeat nisi unam formam: et hujus ratio supradicta est, quia scilicet una includit privationem alterius in materia. In libro autem suo de Generatione multa dicit ad istam quaestionem, et similiter in libro Physicorum. Sed quia eadem est sententia cum supradictis, ideo pertransco, ne propter multitudinem auctoritatum, lectori fastidium generetur (1).

(1) Opusculum istud patet esse imperfectum, ex eo quod Auctor parum a principio sic ait: « Ostenditur autem propositum tribus viis ad praesens. Prima sumitur ex distinctione formarum a se invicem. Secunda ex ratione entitatis. Tertia ex ratione unitatis. » In decursu autem tractationis duae tantum priores evolvuntur, facto de tertia silentio. In editione Romana 1570 inter Opusculum quadragesimum quintum, quod est praesens *de pluralitate formarum*, et quadragesimum septimum *de natura syllogismorum* interseritur titulus alterius Opusculi, nempe quadragesimi sexti, *de dimensionibus interminatis*, advertendo quod istud Opusculum nil aliud est nisi repetitio ejus quod cumulatim *de natura materiae et dimensionibus interminatis* inscribitur, quodque a nonnullis ac signanter a Magistro Petro de Bergamo in tabula sua dividitur in duos distinctos titulos, videlicet *de natura materiae* seorsum et *de dimensionibus interminatis* seorsum. Nos communio rem recensioem seculi sub uno titulo utrumque posuimus, Volumine superiori, num. 28.

(1) *Al.* qui.



# OPUSCULUM XLIII.

## DE NATURA SYLLOGISMORUM

(EDIT. ROM. XLVII.)

Quoniam scire est causam rei cognoscere, causae autem cujuslibet entis per se sunt quatuor, scilicet efficiens, materialis, formalis et finalis; ad perfecte cognoscendum unumquodque, oportet has quatuor causas cognoscere. Est ergo causa efficiens syllogismi anima rationalis formans ipsum: unde syllogismus est actus rationis. Materia vero ejus sunt tres termini ut materia remota, et duae propositiones ut propinqua. Et haec similiter est in syllogismo, sicut in aliis rebus constantibus ex materia et forma, quod scilicet est in eis reperire duplicem materiam, quae dicta est. Finis autem ejus est facere fidem, seu notitiam ignotae conclusionis. Forma vero ejus est virtus, seu potestas inferendi conclusionem ex praemissis: et haec tangitur per definitionem syllogismi. Hanc autem formam circumloquuntur figura et modus. Figura enim est dispositio medii secundum subjectionem et praedicationem, quae scilicet dispositio tripliciter variatur. Quia autem medius terminus subjicitur et praedicatur semel in praemissis, et sic est prima figura. Dicitur autem haec dispositio prima figura, quia medium habet perfectiorem rationem medii, quod participat naturam extremorum; in subjiciendo, minoris extremitatis; et majoris in praedicando. Aut praedicatur bis: et sic est secunda figura; quae secunda dicitur, quia deficit a perfectione medii. In prima enim figura medium est medium secundum rationem et secundum positionem; in secunda autem est primum secundum positionem, cum sit supra extremitates. Aut subjicitur bis: et sic est tertia figura; quae dicitur tertia, quia medium est tertium secundum positionem, cum sit infra extremitates. Sciendum autem quod figura proprie reperitur in mathematicis, transumptive autem in syllogismo, et hoc ad similitudinem figurae triangularis: nam sicut triangulus est clausio trium linearum in tribus angulis, ita syllogismus est concursus trium propositionum, scilicet majoris, minoris et conclusionis in tribus terminis. Modus autem est determinata qualitas et quantitas propositionum praemissarum ad hoc ut ex eis sequatur conclusio. Quae quidem ex certis regulis traditis a Philosopho in 1 Prior., colligitur: quarum quaedam sunt communes tribus figuris, quaedam speciales. Communes sunt duae. Primo quod ex puris particularibus vel indefinitis vel singularibus nihil se-

quitur in aliqua figura, sub particulari intelligendo tam indefinitam, quae in materia contingenti aequipollet particulari, ut Philosophus dicit, quam singularem. Oportet ergo, ut dicit, alteram esse universalem. Ratio hujus regulae est, quia non sequitur, quod si aliqua duo participant aliquod medium particulariter, quod propter hoc illa duo sint eadem. Verbi gratia, album et grammaticum participant idem medium quod est homo, cum quidam homo sit albus et grammaticus: sed ex hoc non sequitur quod album et grammaticum sint eadem simpliciter. Unde non valet haec argumentatio: Quidam homo est grammaticus. Quidam albus est homo. Ergo quoddam album est grammaticum: immo est fallacia consequentis, vel secundum quid et simpliciter. Alia ratio potest esse quam Philosophus inducit: quia aut non erit syllogismus, et hoc quia petetur principium, aut non erit ad propositum. Ut, sit haec conclusio probanda, Musica est studiosa: et assumantur hae praemissae: Quaedam voluptas est studiosa. Musica est voluptas. Ergo etc. Major cum sit particularis, aut stabit pro illa voluptate particulari quae est musica, et tunc petitur conclusio probanda: aut stabit pro aliqua alia, et tunc syllogismus erit quidem, sed non ad conclusionem intentam. Sic ergo oportet quod altera praemissarum capiatur universaliter, ut sit syllogismus. Sed contra dictam regulam videtur esse Philosophus, qui docet syllogizare ex puris particularibus per syllogismum expository in tertia figura. Ad hoc dicendum, quod cum dicitur ex puris particularibus non fieri syllogismum, intelligitur vere et simpliciter syllogismum, qui habet perfectam rationem syllogismi. Syllogismus enim expository non est vere syllogismus, sed magis quaedam sensibilis demonstratio, seu quaedam resolutio facta ad sensum, ad hoc ut consequentia, quae vera erat secundum intellectualem cognitionem, declaretur in sensibili. Secunda regula est, quod ex puris negativis nihil sequitur, nec fit syllogismus. Hujus autem ratio potest esse: quia omnis syllogismus, aut affirmat aliquid de aliquo, et est affirmativus; aut negat aliquid ab aliquo, et est negativus. Si affirmat aliquid de aliquo in conclusione, oportet quod hoc sit per aliquid conveniens, quod quidem erit medium; et ideo utraque praemissarum necessario erit affirmativa. Si autem re-



moveat aliquid ab aliquo, oportet quod hoc sit per aliquid quod tertium conveniens uni illorum, et repugnans alteri; quod sic quidem erit medium: et sic patet quod in syllogismo negativo oportet alteram esse affirmativam.

Sunt autem quaedam quae rectificent primam figuram, et sunt duae regulae: quaedam secundam, et sunt etiam duae: quaedam tertiam, et est una. In prima figura regula prima est, quod major debet esse universalis, alias non fieret syllogismus. Cujus ratio est, quia majori existente particulari, contingeret medium esse communius extremis, de quo particulariter sumpto posset praedicari major extremitas affirmative vel negative. Si affirmative, contingeret capere extrema cum medio repugnantia, et tunc non sequeretur vera conclusio affirmativa: ut si fieret sic: Quoddam animal est asinus. Omnis homo est animal; deberet sequi haec conclusio: Ergo quidam homo est asinus: quae esset falsa praemissis existentibus veris. Rursus si capiantur negative et particulariter, continget esse convertibilia, velut superius et inferius, et tunc falso negaretur unum de altero in conclusione; cum tamen ex qualitate praemissarum deberet sequi conclusio negativa: ut si fiat sic: quoddam animal non est homo. Omne risibile est animal; ex his deberet sequi haec conclusio: Ergo quoddam risibile non est homo: quae quidem esset falsa, praemissae tamen verae. Patet ergo, ex quo cum tali dispositione aliquando cum praemissis veris stabit conclusio falsa, quod non est secundum formam syllogismi. Omnis quidem dispositio facta secundum regulas syllogismorum semper eandem conclusionem syllogizat in omni materia, si praemissae sint verae. Secunda regula est, quod in prima figura minor non debet esse negativa: cujus ratio est, quia si aliter fieret, accideret fallacia consequentis, procedendo scilicet cum negatione medii de minori extremitate, quod quidem est inferius, ad negationem majoris extremitatis quae est superior ad medium: ut si fiat sic: Omnis homo est animal. Nullus asinus est homo; non sequeretur: Ergo nullus asinus est animal. Posset autem utriusque regulae alia communis ratio assignari: quia scilicet syllogismi primae figurae perficiuntur per dici de omni, et dici de nullo. His autem praemissis repugnat majorem esse particularem, vel minorem negativam, ut patet intuenti rationes dictorum principiorum. In secunda figura prima regula est, quod major debet esse universalis. Cujus ratio est, quia ejus syllogismi descendunt a syllogismis primae figurae per conversionem majoris in terminis; et ideo sicut ibi oportet majorem esse universalem, ita et hic. Vel potest ostendi necessitas hujus regulae per instantiam in terminis, ut dictum est supra. Nam si major capiatur particulariter, continget majorem extremitatem esse supra medium, et supra minorem extremitatem: nihil enim prohibet inferius praedicari de superiori particulariter sumpto. Et ita medium posset praedicari de majori extremitate particulariter, et contingeret extrema esse convertibilia, vel se habere ut superius et inferius: et tunc non sequitur conclusio negativa vera. Affirmativa autem non potest sequi, quia in hac figura semper concluditur negative: ut si fiat sic: Quoddam animal non est homo. Omne rationale est animal. Secunda regula est quod oportet alteram praemissarum esse negativam; quia ex utrisque affir-

mativis in secunda figura nihil sequitur. Cujus ratio est: quia si utraque sit affirmativa, tunc medium erit superius ad extrema disparata, quorum neutrum de altero praedicatur in conclusione: non enim sequitur, si aliquid unum inest duobus, quod propter hoc unum insit alteri. Posset etiam unum superius affirmari de duobus inferioribus, quorum unum esset sub altero, et ita non posset unum de altero negari. Et ita non sequitur conclusio affirmativa, nec negativa, ubi utraque praemissarum sit affirmativa. Sed tunc quaeritur, si oportet alteram esse negativam, quare non determinate major vel minor, sed indifferenter alteram? Dicitur quod hujus ratio est, quia non determinato altero, medium aequaliter respicit extrema tamquam sub se posita; et ideo quantum ad syllogismum non refert de quo affirmetur vel negetur: utroque enim modo fit syllogismus, licet diversimode. In tertia figura est una regula: scilicet quod minor semper est affirmativa; cujus ratio est, quia non sequitur quod si aliquid inferius sit repugnans alicui tertio, quod propter hoc et superius: quod oporteret fieri hic, si minor esset negativa: quod sic patet. Medium enim est sub extremitatibus; major autem est supra medium et minorem extremitatem: et ideo non oportet quod eidem repugnet major in conclusione: ut si fiat sic: Omnis homo est animal. Nullus homo est asinus; non sequitur: Ergo quidam asinus non est animal; et sic non sequitur conclusio negativa vera. Item nec affirmativa; quia potest esse quod extrema sibi repugnent, ut patet si capiantur hi termini, animal, lapis, homo. Vel potest esse hujus ratio, quia tertia figura descendit a prima per conversionem minoris: et ideo sicut oportebat ibi minorem esse affirmativam, ita et hic. Non autem lateat nos, quod aliquando contingit syllogismum contra praedictas regulas concludere veram conclusionem; sed hoc non erit ex necessitate formae syllogisticae, sed ex necessitate materiae: quia scilicet vel termini sunt convertibiles, ut quando concludetur conclusio affirmativa: vel repugnantes, ut quando concludetur negativa.

Addantur dictis regulis quaedam aliae respicientes magis conclusionem quam praemissas: quarum quaedam sunt communes, quaedam propriae. Communes sunt duae. Prima in omni figura. Si aliqua praemissa est particularis, oportet conclusionem esse particularem. Cujus ratio esse potest, quia si altera praemissarum est particularis, medium convenit alteri extremitati particulariter in illa praemissa. Et quia non est convenientia inter extremitates nisi per naturam medii, non plus conveniet extremitas cum extremitate particulari, quam altera extremitas cum medio. Unde in conclusione oportet extremitatem extremitati convenire particulariter, sicut in praemissa medium conveniebat particulariter alteri extremitatum. Idem est si sit particularis negativa: quia extremitas disconvenit ab extremitate particulariter in conclusione, sicut medium ab extremitate in praemissa. Secunda regula est. Si altera praemissarum est negativa, oportet conclusionem esse negativam. Cujus ratio est, quia quae disconveniunt in tertio oportet quod inter se disconveniant. Cum ergo extremitates disconveniant in medio, quia quod uni convenit, alteri repugnat; necessario inter se disconveniunt. Quare cum conclusio sit ex extremitatibus, oportet unam ab alia remove; et sic conclusio erit negativa, altera praemissarum existente negativa.



Sed propriarum (1) quaedam spectant ad primam figuram, quaedam ad secundam, et quaedam ad tertiam. Pro prima sunt duae. Prima est quod conclusio semper assimilatur majori in qualitate et minori in quantitate: cuius ratio est, quia conclusio est pars majoris quantum ad praedicatum: habet enim idem praedicatum cum majori; et minoris quantum ad subjectum. Qualitas autem est dispositio praedicati quasi formae; quantitas autem est dispositio subjecti quasi materiae. Unde cum conclusio participet praedicatum a majori, et subjectum a minori; assimilatur majori in dispositione praedicati, et minori in dispositione subjecti. Secunda regula est quod omnia problemata concluduntur per primam figuram: hoc est tam universale quam particulare, tam affirmativum quam negativum. In secunda figura est una regula: scilicet quod in ea non concluditur nisi negative: cuius ratio est, quia oportet alteram praemissarum esse negativam, ut ostensum est; et quando ita est, necesse est conclusionem esse negativam. In tertia est una similiter: scilicet quod omnis conclusio est particularis, et nunquam universalis: cuius ratio est: quia licet duo conveniat in uno tertio, etiam quod universaliter tertium illis conveniat, non ideo oportet quod illa duo inter se totaliter conveniant vel sint idem. Quod ideo est, quia contingit majorem extremitatem in minus esse quam minorem: unde in conclusione major non praedicabitur de minori universaliter. Ut: Omnis homo est risibilis. Omnis homo est animal: non sequitur, Ergo omne animal est risibile; sed bene, Ergo quoddam animal est risibile.

Habitis ergo regulas cum suis rationibus, quae rectificent syllogismos de inesse, restat breviter tangere regulas rectificantes syllogismos de modo. Ad cuius evidentiam sciendum est, quod triplex est syllogismus: quidam constat ex propositionibus simplicis inhaerentiae, de quo dictum est: quidam constat ex utraque praemissa de modo: quidam ex altera de modo, et altera de inesse; et dicitur syllogismus mixtus. Si ex utraque modalis: aut erit ex utraque de necessario, aut ex utraque de contingenti. Sub necessario autem intelligitur et impossibile contrarie sumptum, idest cum negatione apposita verbo. Unde idem est, necesse est esse, et impossibile est non esse: idem enim est iudicium utriusque. Sciendum etiam quod hic tam in praemissis quam in conclusione semper accipitur contingens non necessarium, quod dicitur in contingenti nato et indefinito, seu ad utrumlibet. Si ergo fit syllogismus ex utraque de necessario, salvatis regulis praehabitis in omni figura, potest fieri bonus syllogismus concludens de necessario, et per consequens de inesse. Si vero fiat ex utraque de contingenti, semper fit in prima, seu ambae sint affirmativae, seu negativae, seu altera tantum: hoc solo excepto, quod si major sit universalis, conclusio erit de contingenti, et non de inesse; si autem fuerint ex utraque negativa, conversa minori vel utraque in affirmativam, erit syllogismus. Est autem sciendum, quod omnes propositiones de contingenti non necessario, habent affirmativam figuram, et convertuntur ad se invicem affirmativae negativis, et e contra, ut probat Philosophus 1 Prior. In secunda autem figura ex utrisque de contingenti non fit

syllogismus: cuius ratio ex superioribus patet; quia scilicet ex puris affirmativis in secunda figura non est syllogismus. Propositiones autem de contingenti, ut dictum est, affirmativae sunt omnes in secunda figura. In tertia vero figura ex utrisque de contingenti non fit syllogismus, nisi utraque sit particularis.

Si vero fiat syllogismus mixtus; aut ex una de inesse et altera de necessario, aut ex una de contingenti et altera de inesse, aut ex una de necessario et altera de contingenti: pluribus enim modis non fit mixtio. Sciendum ergo quod in omni tali mixtione, scilicet de inesse et contingenti, semper de inesse debet accipi simpliciter, et non de inesse ut nunc. Dicitur autem propositio de inesse simpliciter, in qua praedicatum per se inest subjecto; seu sit de quidditate ejus quantum ad primum modum per se, seu non, sed fluat ex principiis ejus; ut cum propria passio dicitur de subjecto quantum ad secundum modum. Dicitur etiam de inesse simpliciter, quando praedicatur aliquod accidens commune, quod sequitur totam speciem secundum omne tempus, sicut nigredo inest corvo et Aethiopi. Quando autem nullo istorum modorum praedicatur aliquid de subjecto, est de inesse ut nunc, ut haec: Omnis homo currit. Si ergo sit mixtio de inesse et necessarii in prima figura, est talis regula: Majore existente de necessario, et minori de inesse simpliciter, et non ut nunc, sequitur conclusio de necessario. Si autem e converso fiat, scilicet majore de inesse, et minore de necessario: sequitur conclusio de inesse, et non de necessario. Quorum ratio est, quia cum conclusio participet cum majore in praedicato, ut dictum est, modus autem necessitatis et contingentiae sit dispositio praedicati in comparatione ad subjectum; conclusio participabit eodem modo: quod non potest fieri quando minor est de necessario et major de inesse. Bene tamen tunc sequitur conclusio de inesse: in plus enim est inesse simpliciter, quam necessario: quae enim necessario insunt, insunt simpliciter, et non e contra. In secunda vero figura est talis regula. Universali negativa de necessario existente et altera de inesse, sequitur conclusio de necessario. Si vero aliter fiat, non sequitur de necessario: quia si affirmativa fuerit de necessario, et negativa de inesse, sequitur conclusio de inesse. Cuius ratio est, quia secunda figura quantum ad omnes suos modos descendit a secundo modo primae figurae, in quo major est universalis negativa, et in ipsum reducitur, ut supra patet. Et ideo sicut ibi oportebat universalem negativam quae est major, esse de necessario, ut sequeretur talis conclusio; ita in hac figura oportet quod talis negativa post reductionem in prima sit major. Ex quo patet, quod in quarto secundae figurae non potest fieri universalis mixtio quantum ad conclusionem de necessario, cum non habeat aliquam universalem negativam. In tertia figura est talis regula in modum affirmationis et negationis. Universali affirmativa vel negativa existente de necessario, sequitur conclusio talis: aliter non. Cuius potest reddi eadem causa quae et supra; quia post reductionem ad primam figuram universalis fiet major, quam oportet in prima esse de necessario. Per quod patet quod circa primum et secundum tertiae fiunt quatuor syllogismi universaliter mixti, accipiendo utrobique de necessario.

Sequitur de secunda mixtione, scilicet de inesse et contingentis. Ad cuius evidentiam sciendum, quod

(1) *Al.* praemissarum.

ut dicit Philosophus, 1 Prior., contingens capitur uno modo ut etiam necessarium dicitur contingens, id est non impossibile: alio modo ut etiam non necessarium. De his autem duobus modis dicitur contingens aequivoce, sicut de duobus signis significatis. Alio modo capitur ut stat in sua communitate, non respiciens hoc vel aliud tantum, sed indifferenter utrumque, non tamen quod sit tertium significatum. Et hoc modo captum dicitur contingens possibile, seu secundum rationem suae communitatis. Sicut et alius loquendo, animal potest capi tribus modis. Uno modo pro rationali, et alio modo pro irrationali; isti duo modi sunt ejus differentiae: tertio modo potest considerari non pro hoc aut pro illo tantum, sed pro sua forma universali, in quantum scilicet est animal solum. Quod autem necessarium sit contingens, probat Philosophus in libro Perihermenias. Quomodo autem hoc sit, sic potest ostendi. De ratione contingentis quod

dicitur de necessario et non necessario, est solum quod habeat potentialitatem ad esse sine positione alterius differentiae, sicut dicitur de genere. Utrumque autem dictorum habet hanc potentialitatem, licet aequivoce; quia necessarium habet possibilitatem semper actui conjunctam, aliud vero distantem ab actu: ideo utrumque dicitur contingens. Hoc autem necessarium, duas habet species. Una est contingens natum, quod quidem habet causam quare possit esse. Sed quia talis causa aliquando impeditur, est non necessarium, sicut canescere in senectute. Alia est contingens infinitum, id est indeterminatum, vel incertum, sive ad utrumlibet. Dicitur autem sic, quia nullam causam habet quare magis se habeat ad unam partem quam ad aliam, sicut habet contingens naturae: aequaliter (1) enim potest esse et non esse. Et de isto dicit Aristoteles in libro Periherm. quod non sequitur ad necessarium.

(1) *Al.* qualiter.

# OPUSCULUM XLIV.

## DE TOTIUS LOGICAE ARISTOTELIS SUMMA

seu de praedicabilibus, de praedicamentis, de enuntiatione,  
de syllogismis et de demonstratione.

(EDIT. ROM. XLVIII.)

### PROOEMIUM.

Omnes homines natura scire desiderant. Scire autem est effectus demonstrationis; est enim demonstratio syllogismus apodicon, idest faciens scire. Ad hoc autem quod tale desiderium naturale compleatur in homine, necessaria est demonstratio: non enim potest esse effectus, in quantum hujusmodi (1), sine causa. Et quia, ut dictum est, demonstratio est syllogismus; ad cognoscendum eam, necesse est praecognoscere syllogismum. Syllogismus autem cum sit quoddam totum aggregatum ex partibus, cognosci non poterit partibus ignoratis. Ad cognoscendum ergo syllogismum oportet primo cognoscere partes ejus. Partium autem syllogismi quaedam sunt propinquae, ut propositiones et conclusio quae omnes enuntiationes dicuntur: quaedam vero sunt remotae, ut termini qui sunt partes enuntiationis; ideo ista oportet tractare, scilicet de enuntiatione et de terminis, antequam de syllogismo tractetur. Quilibet autem terminus, qui sine complexione dicitur, significat substantiam, aut quantitatem, aut qualitatem, aut aliquid aliorum praedicamentorum; et ideo antequam de enuntiatione tractetur, oportet determinare de praedicamentis. Et quia praedicamentum, ut hic sumitur, nihil aliud est quam ordinatio praedicabilium in ordine praedicamentali; ideo ad cognoscendum praedicamenta, oportet praecognoscere praedicabilia. Ad hoc ergo ut perveniamus ad ipsum scire ab omnibus naturaliter desideratum, iste debet esse ordo quem cum auxilio Dei tenebimus: ut primo tractetur de quinque praedicabilibus: secundo, de decem praedicamentis: tertio, de enuntiatione: quarto, de syllogismo simpliciter: quinto, de syllogismo applicato ad materiam demonstrativam, seu de demonstratione. De syllogismo vero applicato ad materiam probabilem, qui pertinet ad partem logicae quae dialectica dicitur,

de quo tractatur in libro Topicorum, et de syllogismo applicato ad materiam sophisticam, qui opponitur syllogismo dialectico, de quo tractatur in libro Elenchorum, non intendo me ad praesens intronittere.

### TRACTATUS I.

DE QUINQUE UNIVERSALIBUS SECUNDUM REM ET SECUNDUM INTENTIONEM LOGICAM, SEU DE PRAEDICABILIBUS.

#### CAPUT I.

*Quid sit universale, et quomodo originetur.*

Ad cognoscendum quinque universalia, seu praedicabilia, quae Porphyrius ponit, sciendum est quod quia intellectus noster est separatus a materia (non enim est potentia affixa organo corporali seu materiali, et omne quod recipitur in aliquo, recipitur per modum recipientis), ideo illud quod objective in actu recto intellectui repraesentatur, oportet esse denudatum a materia, et a conditionibus materiae, quae sunt hic et nunc. Et dico hic denudatum a materia, non simpliciter ab omni materia, sed a materia signata: res enim naturales intelliguntur cum materia: et propter hoc dictum est, quod debet esse denudatum a conditionibus materiae. Verbi gratia, in nostra phantasia est phantasia seu forma repraesentans hunc hominem, secundum quod fuit in aliquo sensu exteriori: quae forma virtute intellectus agentis agit in intellectum possibilem, sicut colores virtute luminis agunt in potentiam visivam: et causatur tunc in intellectu possibili quaedam forma, quae dicitur species intelligibilis, vel secundum alios actus intelligendi vel verbum: quae forma repraesentat hominem, non tamen ut est hic et nunc, sed abstractum a talibus conditionibus: et hoc dicitur esse universale. Unde in homine sic intellecto, est duo considerare: scilicet ipsam natu-

(1) *Al.* in quantum hujus.

ran: humanam, seu habens eam, et ipsam universalitatem, seu abstractionem a dictis conditionibus materiae. Quantum ad primum « homo » dicit rem, quantum vero ad secundum dicit intentionem: non enim in re invenitur homo qui non sit hic et nunc. Et ipsa natura, ut sic, dicitur esse prima intentio. Sed quia intellectus reflectitur supra se ipsum, et supra ea quae in eo sunt sive subjective sive objective, considerat iterum hominem sic a se intellectum sine conditionibus materiae: et videt quod talis natura cum tali universalitate seu abstractione intellecta potest attribui huic et illi individuo, et quod realiter est in hoc et illo individuo: ideo format secundam intentionem de tali natura, et hanc vocat universale, seu praedicabile vel huiusmodi. Secundum ergo praedicta, res ut est intellecta dicitur universalis; secundum autem quod intellectus talem universalitatem considerat, secundum hoc attribuit sibi aliquid, scilicet esse in pluribus, vel dici de pluribus: et sic dicitur secunda intentio. De quibus secundis intentionibus nunc dicemus: scilicet, de quinque universalibus, seu praedicabilibus. Quae universalia dicuntur prout intellectus attribuit eis esse in pluribus: praedicabilia vero dicuntur prout intellectus attribuit eis dici de pluribus. Sunt autem haec: genus, species, differentia, proprium et accidens.

## CAPUT II.

### *Quid sit genus, et unde originem habeat.*

Genus, ut hic sumitur, est quod praedicatur de pluribus differentibus specie in eo quod quid. Ad videndum autem particulas huius descriptionis, sciendum est, quod genus dicitur praedicari de pluribus speciebus, seu dividitur in plures species. Et cum non sit unum re, sed solum secundum rationem, ideo non dividitur secundum rem. Et quia genus non est unum re; ideo partes subjectivae, seu species in quas dividitur, sunt realiter diversae et distinctae inter se: ideo oportet quod aliquod reale habeant in se, per quod reale una sit diversa ab alia. Ubi nota, quod una et eadem res per suam essentiam cum essentia alterius rei habet aliquam conformitatem seu convenientiam, et aliquam difformitatem realem: quae conformitas vel difformitas potest esse major vel minor per comparisonem ad diversas res. Verbi gratia, Soerates per essentiam suam quae est ex hac anima et hoc corpore, conformatur Platoni, et huic equo, et huic plantae: Soerates enim per suam essentiam est rationalis, sensibilis et vivus: in omnibus his tribus est conformis Platoni: huic autem equo est conformis in duobus, scilicet in sensibili et in vivo, et in uno est difformis, quia in eo est realiter rationale, quod non est in hoc equo: huic vero plantae conformis est in uno, scilicet, in vivo. Quia vero intellectus noster ea quae in re sunt conjuncta potest distinguere, quando unum eorum non eadit in ratione alterius; et eum rationale in se consideratum non sit de ratione sensibilis, nec sensibile de ratione vivi, ideo ea in Soerate separatim accipit, ut dictum est, per respectum ad diversa. Quando ergo intellectus considerat in re illud in quo convenit cum aliis rebus, illi rei conceptae attribuit intentionem universalitatis. Et quia in qualibet re singulari est considerare aliquid quod est

proprium illius rei in quantum est haec res, sicut in Soerate est considerare aliquid quod est ita proprium Soeratis in quantum est hic homo, quod nulli alii convenit. Rei ergo sic conceptae attribuit intellectus intentionem singularitatis, et vocat illud singulare vel individuum: et haec secundae intentiones sunt, scilicet universalitas et singularitas. Unde, licet supra dictum fuerit quod intentiones fiunt ab intellectu, tamen oportet quod aliquod fundamentum habeant in re extra: nam intentioni singularitatis respondet extra illud quod est proprium Soeratis in quantum est hic homo; intentioni vero universalitatis respondet extra ut fundamentum illud in quo Soerates est conformis cum aliis rebus. Cum igitur ea quae in uno conformantur et in alio sunt difformia, dummodo talis difformitas sit secundum formam, et non secundum materiam signatam, vel secundum illud quod est proprium huius individuo in quantum huiusmodi; illi uni in quo talia conveniunt, attribuit intellectus intentionem generis, et vocat genus. Ubi nota secundum Avicennam quod duplex est forma: quaedam est quae est pars compositi, sicut anima est forma hominis: ex anima enim et corpore componitur homo; quaedam autem sequitur totum compositum, ut humanitas, quae etiam est forma hominis: et isto modo sumpta forma dicitur quidditas, et est illud quod intellectus intelligit de re. Quando ergo intellectus intelligit praedictam formam seu quidditatem ut est determinata ad hanc materiam, puta humanitatem ut est in hac materia signata, scilicet in his carnibus et in his ossibus et huiusmodi; tunc faciendo concretum, puta hunc hominem, intelligit singulare, et huic attribuit intentionem singularitatis. Si vero dictam formam intelligit non ut est determinata ad hanc materiam, quia omnis talis forma de se plurificabilis est ad hanc et ad illam materiam; habenti talem formam intellectus attribuit intentionem universalitatis, unde homo est universale. Et si ea quae in hac forma conveniunt, non habent inter se difformitatem pertinentem ad dictam formam, sed solum sunt difformia per materiam signatam istius vel illius, in qua dicta forma determinata est in isto vel in illo, secundum modum qui dicitur in tractatu de specie, illa dicuntur solum differre numero; et concretum substantivum huiusmodi formae acceptae ut plurificari potest, puta homo, dicitur species specialissima. Si vero ea quae conveniunt in aliqua forma plurificabili, ut dictum est, sunt inter se difformia non solum quantum ad materiam signatam, ut dictum est, sed quantum ad difformitatem specificam: puta, quod talis forma est animalitas, in qua conveniunt Soerates et hic equus, qui inter se non solum sunt difformes quantum ad has carnes et haec ossa, sed in hoc quia hic homo habet formam humanitatis, et ille equinitatis; talia dicuntur differre specie: et talis forma in qua conveniunt in concreto sumpta, puta, animal, est genus. Et quia, ut dictum est, talis natura sumpta in concreto, de pluribus formaliter differentibus, quae sunt in diversis speciebus, dici potest; hinc est quod tali naturae intentio generis potest attribui: ideo dicitur quod genus praedicatur, id est praedicabile est de pluribus differentibus specie, seu dicitur dividi in plures species. Et hoc quod dictum est « in concreto sumptum » intelligitur solum in praedicamento substantiae: in aliis vero praedicamentis, et maxime



in absolutis, sumitur genus et species in abstracto. Dicitur autem genus praedicari in eo quod quid est, idest, substantive secundum grammaticos; ut animal quod de homine et de equo praedicatur, est substantivum, et non adjectivum. Sensibile enim quod de animali praedicatur, quamvis sit de essentia animalis, non tamen dicitur praedicari in quid, sed in quale; et causa est quia est adjectivum. Sciendum est autem quod quia ea quae in quid praedicantur sunt de essentia seu quidditate eorum de quibus praedicantur; ideo praedicari in quid non solum potest dicere modum significandi, ut dictum est; sed etiam dicit quidditatem ipsius de quo praedicatur. Et patet quid sit genus.

### CAPUT III.

*Quid sit species, et unde sumat originem.*

Species est quae praedicatur de pluribus differentibus numero in eo quod quid. Licet autem haec praedicta descriptio speciei ex dictis possit intelligi; tamen ad majorem declarationem aliquorum quae supra dicta sunt, sciendum est, quod licet principium individuationis proprium sit a materia signata, ut supra dictum est; non tamen est intelligendum quod aequaliter non sit a forma. Ubi nota, quod aliquid distingui ab aliquo per formam, dupliciter potest esse. Uno modo quod talis distinctio sit per formam ratione formae, secundum quod in formis diversi gradus inveniuntur: et quae sic distinguuntur necesse est ut differant specie, ut supra dictum est. Alio modo potest aliquid distingui ab alio per formam, non secundum absolutam rationem formae, sed secundum quod est haec forma: et sic differunt numero duae quantitates separatae, sive sint separatae per intellectum, ut in mathematicis: sive sint separatae a materia secundum rem virtute divina, ut quantitas duarum hostiarum consecratarum: quantitas enim quaedam forma est. Et sic etiam differunt animae separatae numero: non enim differunt per materiam quam non habent, nec ei conjunguntur; nec per relationem ad materiam cui conjungibiles sunt, cum relatio sit posterior ipsi relato. Ubi nota, quod omnis forma sub se habens multa, idest, quae universaliter sumitur, habet quamdam latitudinem: nam invenitur in pluribus, et dicitur de pluribus. Duplex autem potest esse latitudo in formis. Una secundum gradus formales, quorum unus secundum se nobilior et perfectior est altero; et haec, ut dictum est, latitudo generis est, sub quo sunt diversi gradus formales specificae differentes. Alia latitudo est secundum plurificationem numeralem in eodem gradu. Et quia ista latitudo non est secundum absolutam rationem formae, oportet quod forma, in qua est talis latitudo, importet in sua ratione aliquid per quod conveniat sibi talis latitudo, quod sit aliud ab absoluta ratione formae. Et si loquamur de illa forma quae est pars compositi, puta de anima rationali; illud propter quod sibi talis latitudo convenit, est imperfectio quaedam: secundum, scilicet, quod nata est habere rationem partis alicujus totius: non solum quod sit pars secundum rationem, quia etiam formae specificae sunt partes secundum rationem; sed quod sit pars secundum rem: nam anima rationalis est pars realis hominis; et albedo est pars realis hominis albi. Unde ad hoc quod tales formae

multiplicentur sub specie, oportet quod habeant illam potentialitatem quae facit partes reales: et secundum hoc illa potentialitas per quam anima rationalis per essentiam suam nata est esse pars compositi, dat ei quamdam latitudinem multiplicationis secundum eundem gradum, non obstante quod sit separata, et actu non informet materiam. Et quia talis potentialitas non competit essentiae Angelorum, ideo Angeli non differunt inter se numero, sed quilibet Angelus facit speciem per se: non enim est apta nata natura seu essentia Angeli esse pars compositi, ex qua compositione consequatur speciem, sicut anima humana. Potentialitas ergo formae quam forma habet, scilicet ut jungatur materiae, facit sub ea multiplicari individua: et sic debet intelligi quod supra dictum est, quod scilicet humanitas quae est forma sequens totum compositum, si consideretur ut est determinata ad hanc materiam signatam, facit singulare: humanitas enim, ut dictum est, dicit animam et corpus: unde dicendo hoc corpus et hanc animam, dicit singulare. Et quia anima in eodem gradu existens non posset dividi in plura, ut dictum est, nisi propter potentialitatem quam habet ut uniat materiae signatae; ideo dicendum est quod materia signata est principium individuationis, forma autem non nisi per materiam ad quam habet naturalem potentiam ut sibi uniat. Et sic patet quid est species. Sciendum tamen est, quod licet forma specifica, ut dictum est, de se plurificabilis sit propter potentialitatem quam habet ut materiae uniat, tamen aliquando talis plurificatio accidentaliter impeditur: puta si omnes homines morerentur, et unus solus remaneret, tunc humanitas non esset in pluribus materiis. Vel potest impedi propter conditionem materiae; sicut modo est unus tantum sol; non quod repugnet naturae solari esse in pluribus secundum considerationem formae, sed quia est alia materia non susceptiva talis formae: unde sol est species in uno individuo.

### CAPUT IV.

*De origine differentiae; et quid ipsa sit secundum rem et intentionem.*

Differentia, ut hic sumitur, dupliciter describitur. Primo sic. Differentia est quae praedicatur de pluribus differentibus specie in eo quod quale. Secundo sic. Differentia est qua species abundat a genere. Ad videndum autem primam descriptionem sciendum est, quod, ut supra dictum est, in aliquibus formis potest esse latitudo in eadem forma secundum gradus formales, quorum unus secundum se est nobilior et perfectior alio: et ab hac forma sumitur genus. Ubi nota, quod in entibus sunt diversi gradus essendi, sive sint gradus substantiales, sive accidentales: qui gradus licet in aliquibus entibus sint dispersi, tamen aliquando invenitur aliquod unum plures gradus perfectionis substantiales vel accidentales comprehendens. Verbi gratia, vegetabile, sensibile, rationale, sunt gradus entium substantiales: planta enim substantialiter est vegetabilis: canis vero substantialiter est sensibilis: et homo substantialiter est rationalis; et isti gradus dispersi in multis, aliquando inveniuntur in uno solo, puta in homine: homo namque per suam formam substantialem quae est in una, habet omnes



istas tres perfectiones: nam est vegetabilis, et est sensibilis, et est rationalis: unde Socrates per unam suam essentiam conformatur plantae et cani et Platoni, ut supra dictum est. Haec autem conformitas quae est Socratis ad plantam, potest esse una duorum: sicut enim similitudo duorum nigrorum est una amborum, quia unius ut subjecti, et alterius ut termini; sic talis conformitas est Socratis ut subjecti, et illius plantae ut termini. Nec propter hoc dico quod talis conformitas sit relatio secundum esse; sed est relatio secundum dici, ut fundamentum relationis secundum esse. Talis autem conformitas quae realiter una est, ut dictum est, movet intellectum nostrum ad unum conceptum, puta vivum, a quo conceptu sumitur genus, vel aliquando species, ut ex supradictis haberi potest. Unde talis conformitas se habet ad genus ut fundamentum remotum. Conceptus vero vivi ad quem talis conformitas movet intellectum, se habet ad genus ut fundamentum propinquum: et sic licet unitas generis sit unitas rationis, tamen aliquo modo habet fundari in uno secundum rem. Difformitas vero quae est inter Socratem et plantam, est, quia Socrates sentit, non autem planta: a qua difformitate sumitur differentia, quae dividit vivum quod commune est homini et plantae. Unde per hanc differentiam ostenditur, quod vivum invenitur in habente aliquam aliam perfectionem, quae non est in planta. Et quia in tali perfectione, puta sensibili, convenit Socrates cum cane; similiter inter eos est una conformitas movens ad unum conceptum; a quo, si sumatur in concreto substantive, ita quod tale concretum de suo significato dicat explicite et vivum et sensibile, sumitur aliud genus, scilicet animal. Si vero sumatur in concreto adjective, ita quod de suo significato dicat solam illam perfectionem explicite, scilicet sensibile, sumitur differentia, puta in quantum dicatur sensibile: et sic de aliis usque ad ultimam differentiam specificam, infra quam non est perfectio formalis. Cum ergo de tot possit dici sensibile de quo dicitur animal: sed animal quod est genus, praedicatur de pluribus differentibus specie: similiter et sensibile quod est differentia, praedicatur de pluribus differentibus specie. Notandum quod forma substantialis habet duplex esse. Unum est objective in intellectu; et secundum hoc esse intellectus attribuit sibi nomen abstractum: considerat enim eam intellectus non considerando materiam in qua est; et propterea dat sibi nomen abstractum, ut humanitas. Aliud esse habet in materia: ad quam habet duplicem habitudinem. Una est, quia inhaeret ei tamquam salvata in ipsa; et sic aliquo modo habet modum accidentis: et sic dat ei intellectus nomen concretum adjectivum, quale est nomen accidentis, ut humanum. Secunda comparatio quam habet ad materiam, ut complens et perficiens ipsam; et sic non habet modum accidentis, sed modum substantiae: et sic dat ei intellectus nomen concretum substantivum, ut homo. Notandum, quod animal differt a sensibili: quia animal dicitur ab anima sensibili; sensibile autem dicitur a sensibilitate. Et quia anima ad sensibilitatem (1) se habet, sicut potentia ad actum; ideo differentia magis est actualis quam id cuius est differentia, licet tantum ambient ambo. Dicitur autem differentia praedicari in quale, idest adjective: hujus ratio est. Ut enim dictum est, differentia

divisiva alicujus generis sumitur a perfectione quam non habent omnia quae sunt sub genere: quae perfectio comparata ad illud unde sumitur genus, se habet ut quoddam perfectum, et per consequens ut formale. Et quia adjectiva communiter a formis sumuntur, quae formae habent adjacere; ideo ad designandum quod differentia sumitur a solo formali, et illud solum dicit explicite, perfecta est differentia per modum adjectivum in sui praedicatione.

Ad videndum autem secundam definitionem differentiae, sciendum quod impossibile est partem de toto praedicari; sed quidquid de alio vere praedicatur, oportet quod dicat totum. Cum autem de Socrate praedicetur homo et animal et rationale, oportet quod homo dicat totum formale quod est in Petro: et dico formale, loquendo de forma quae sequitur totum compositum. Similiter oportet quod animal dicat totum formale, et similiter rationale dicat totum formale: sed diversimode: nam rationale dicit totum illud quod dicit homo, non tamen explicite, sed implicite: rationale enim dicit habens rationem. Unde de suo principali significato dicit solum rationem. Sed quia dicit « habens rationem » in hoc quod dicit « habens » intelligitur implicite homo quicumque sit ille: et sic dicit totum quod dicit homo; aliquid tamen explicite, et aliquid implicite. Similiter etiam animal dicit totum quod dicit homo, non tamen explicite; dicit enim animal habens vitam et sensum: unde de suo principali significato solum dicit vitam et sensum: sed in hoc quod dicit « habens » implicite intelligitur homo. Homo vero dicit explicite totum formale quod est in Socrate: nam dicit habens humanitatem: quae humanitas dicit explicite motum et sensum, quod dicit animal, et rationem quam dicit rationale. Unde homo de suo principali significato dicit animal rationale: comparando enim significata istorum explicite: cum genus et differentia, ut dictum est, non significant quodlibet eorum nisi partem, species vero explicite significet illud quod significat. Utrumque ergo significatum explicitum speciei excedit significatum explicitum generis in significato explicito differentiae. Similiter etiam excedit significatum differentiae in significato generis. Bene ergo dicitur in praedicta descriptione, quod differentia est qua species abundat a genere: quia species abundat, idest excedit in suo significato etiam illud quod explicite significat differentia. Et sic patet quid est differentia secundum sui rationem.

#### CAPUT V.

*De genere generalissimo et subalterno: et quod ens non potest esse genus.*

Dividitur autem genus in genus generalissimum et genus subalternum. Genus generalissimum est illud supra quod non est aliud superveniens genus: quod sic debet intelligi. Ut enim dictum est, genus sumitur a conceptu conformitatis aliquorum quae in aliquibus aliis perfectionibus formalibus sunt difformia, a quibus perfectionibus formalibus sumuntur differentiae. Sicut animal est genus, quia dicit motum et sensum, in quibus homo et equus conformantur; qui tamen sunt difformes in aliquibus aliis perfectionibus: puta quia in homine est ratio quae non est in equo; a quo sumitur differentia, scilicet rationale. Conformatur etiam homo cum planta in vivo; ex qua conformitate sumitur

(1) *Al.* a sensibilitate.

aliud genus, scilicet animatum corpus: et haec est minor conformitas quam prima. Et quia ad plura se extendit animatum corpus quam animal, ideo hoc est superius genus. Cum lapide vero conformatur in corporeitate, a qua sumitur aliud genus superius, scilicet corpus. Cum Angelo vero conformatur in substantia, quae adhuc est remotior conformitas, a qua sumitur aliud genus, scilicet substantia. Si vero esset homo difformis alicui rei in substantia, nulla eis conformitas remaneret, nisi entitas. Cum autem ens non possit esse genus, ut dicitur; restat quod substantia sit genus generalissimum: reliqua vero genera quae sub substantia diximus, scilicet corpus, animatum corpus, et animal, sunt genera subalterna, quae aliquando ponuntur esse genera, et aliquando species: quodlibet enim eorum est species respectu superioris generis, et est genus respectu inferioris speciei.

Ex his potest patere, quomodo una et eadem differentia est divisiva et constitutiva. Si enim animatum quod est differentia, addatur corpori; cum illud quod significat corpus, inveniatur in non habentibus hanc perfectionem quae est animatum, haec differentia dividit corpus, quod modo est genus, et constituit unam speciem, scilicet animatum corpus. Unde haec differentia « animatum » modo est divisiva generis et constitutiva speciei: et sic est accipere in aliis generibus, usque ad species specialissimas, quarum non sunt differentiae divisivae. Quae autem sint species specialissimae, ex dictis haberi potest.

Quod autem ens (1) non possit esse genus, sic patet. Ut enim dictum est, illud est genus, quod ita se habet ad suam differentiam divisivam, quod differentia significat aliquid explicite quod non significat ipsum genus, licet implicite ambo totum dicant: unde genus est extra intellectum differentiarum. Et datur exemplum in rebus compositis ex materia et forma: ignis enim et aqua conveniunt in materia prima, differunt autem in forma; quia alia est forma substantialis ignis, et alia aquae. Unde ignis et aqua sic conveniunt in materia, quod materia est pars essentialis eorum: forma vero ignis et aquae (2) conveniunt in materia, sicut in quodam diverso ab essentia eorum, determinabili tamen per ipsas. Sic suo modo species aliter conveniunt in genere quam differentiae: nam species conveniunt in genere sicut in eo quod includitur in ratione ipsarum et in earum principali significato: in ratione enim hominis et in eius principali significato includitur animal. Sed differentiae conveniunt in genere sicut in quodam determinabili secundum rationem per eas, quod est extra intellectum earum: sicut rationale et irrationale conveniunt in animali. Cum ergo nihil possit inveniri extra ejus intellectum sit ens; nihil poterit esse (3) differentia entis, nec per consequens ens poterit esse genus. Assignatur etiam alia ratio quare ens non sit genus: quia non potest esse univocum ad substantiam et accidens.

Notandum, quod in praedicto exemplo aliter sumitur materia quam sumebatur primo, quando dictum est, quod individua distinguuntur per materiam, et quod materia est principium individuationis. Est enim materia prima, et materia signata, seu haec, quae videlicet quantitate signatur, et aliis accidentibus individuantibus. Di-

citur autem materia prima illud quod est in potentia ad omnes formas substantiales, quae consideratur solum in sua nuda potentialitate: quae dicitur una per remotionem omnium formarum, in quantum consideratur una quidem natura potentialis perfectibilis per formas absque hoc quod actu perfecta sit: et de ista materia loquebamur in exemplo supraposito. Materia vero signata, seu haec, dicitur prout habet esse cum hac quantitate et hac qualitate, et in aliis accidentibus: et sic considerata non est una (4) omnium, sed per quaelibet individua est divisa, sicut divisa sunt praedicta accidentia uniuscujusque individui. Et quia omnia individua, et quodlibet eorum habet partem primae materiae, considerando illam partem non ut est signata ex his vel his accidentibus; dicitur ignis et aqua convenire in una materia, ut in dicto exemplo dictum est.

Patet ergo de tribus praedicabilibus essentialibus, quae concurrunt ad ordinandum praedicamentum, scilicet de genere et specie et differentia: quae dicuntur essentialia, quia sunt de essentia eorum, de quibus praedicantur etc.

## CAPUT VI.

### *De origine proprii; et quomodo inest omni individuo speciei et semper.*

Nunc dicendum est de duobus praedicabilibus accidentalibus, scilicet de proprio et accidente. Dicitur autem accidentalium, quia non sunt de substantia sive de essentia subjectorum de quibus praedicantur. Notandum, quod ens reale dividitur in substantiam et accidens; unde sic sumendo accidens prout dividitur contra substantiam, proprium est accidens, et inter accidentia computatur: non enim est de substantia ejus cujus est proprium, nec potest esse in praedicamento substantiae. Alio modo sumitur accidens, non ut dividitur contra substantiam, sed ut est unum de quinque praedicabilibus: et sic proprium non est accidens, immo contra illud dividitur. Describitur autem proprium sic. Proprium est quod inest uni soli et semper, et conversim praedicatur de re. Ad videndum autem particulas hujus definitionis, quia valde est nobis necessarium scire proprium, quod Philosophus propriam passionem vocat, quia in demonstratione nihil aliud concluditur nisi propria passio de subjecto: Sciendum quod aliquid de aliquo dici seu praedicari contingit dupliciter: scilicet per se et per accidens. Praedicatio per accidens potest fieri tripliciter. Uno modo quando accidens praedicatur de subjecto, ut « homo est albus ». Alio modo quando subjectum praedicatur de accidente, ut « album est homo. » Tertio modo quando accidens praedicatur de accidente, ut « album est musicum ». Praedicatio vero per se fit multipliciter, ut patebit in tractatu de demonstratione. Quorum secundus modus dicendi per se est, quando proprium praedicatur de eo cujus est proprium, ut « homo est risibilis ». Cum ergo proprium praedicatur de subjecto, quia non praedicatur per accidens, sicut dictum est de accidentibus respectu suorum subjectorum, sed per se; aliam habitudinem habet ad subjectum suum, quam habent accidentia communia. Illa namque nullam habitudinem habent ad

(1) *Al.* mens.

(2) *Al.* aqua.

(3) *Al.* omne.

(4) *Al.* non.

sua subjecta, nisi ut ad causam materialem; sumendo hic materiam pro subjecto quod est in potentia ad accidentia, sicut ad quosdam actus sibi inhaerentes. Unde si proprium solam hanc habitudinem haberet ad subjectum, ut scilicet subjectum solummodo esset passivum et receptivum ejus; tunc, cum illud quod est receptivum tantum alicujus, non imponat necessitatem essendi ei respectu ejus est tale, sequitur quod proprium non de necessitate sequatur subjectum, nec per consequens per se posset praedicari. Et tamen vidimus oppositum: nam in rebus naturalibus videmus quasdam operationes quae conveniunt semper omnibus quae sunt ejusdem speciei; sicut attrahere ferrum, semper convenit omni magneti. Unde oportet quod tales operationes sequantur aliquod principium intrinsecum permanens in illis corporibus. Hoc tamen principium dicitur potentia sive virtus, quia virtus est potentia quae fertur ad ultimum quod fieri potest. Tale ergo principium necessitatem essendi habet a forma specifica illius rei. Nec potest dici quod tali virtuti subjectum non imponat necessitatem essendi, sed generans: quia si subjectum nullam habeat necessariam habitudinem ad tale proprium, quantumcumque generans semper generet subjectum cum tali passione, tamen talis propria passio per respectum ad subjectum esset per accidens, et non per se; et sic non posset demonstrari: ejus oppositum infra patebit. Restat ergo quod subjectum habeat ad suum proprium habitudinem causae efficientis: quod sic potest patere. Nam propriae qualitates agunt ut instrumenta formarum substantialium, agunt enim ad productionem formarum substantialium: sicut calor ignis agit in ligna ad generandum ignem: quod non posset facere, nisi esset instrumentum formae substantialis hujus agentis. Hoc ergo est, quia recipiunt virtutem a formis substantialibus agendi hoc. Nec recipiunt tales qualitates a formis substantialibus aliquam virtutem differentem ab eis. Nihil ergo aliud recipiunt nisi seipsas. Formae ergo substantiales subjectorum sunt causa effectiva suorum priorum (1).

Verum circa hoc videtur magnum dubium: nam sequitur quod idem subjectum sit secundum idem agens et patiens, et quod idem sit causa agendi et patiendi respectu ejusdem, ad minus in substantiis separatis, quae non habent partem extra partem. Unde eadem substantia Angeli secundum idem, quia indivisibilis est, esset causa effectiva propriae passionis, et receptiva: quod videtur inconveniens. Ad quod intelligendum sciendum est, quod sicut se habet res in patiando, sic suo modo se habet in agendo. In patiando autem non solum dicitur passive se habere illud quod recipit aliud, sed etiam illud quod illud disponit ad hoc recipiendum. Verbi gratia: cera quae recipit figuram, dicitur passive se habere ad figuram: et non solum ipsa cera passive se habet respectu figurae, sed etiam mollities disponens ceram ad talem receptionem passive se habet respectu figurae. Licet enim mollities non sit in quo recipiatur figura sicut in eo quod est ratio recipiendi; est tamen aliquo modo dispositio ratio suscipiendi. Sic etiam suo modo principium originans aliquid quodam ordine et quadam necessaria connexionem mediante aliquo alio aliquid producit: etiam illud quod

producit respectu illius quod producit se habet active. Sicut clavus infixus trahi, si semper motus daretur trahi mediante clavo, quamvis totus motus effective esset ab homine movente utrumque, scilicet trahem et clavum; tamen clavus ad motum se haberet active respectu trahis. Sic suo modo se habet de subjecto respectu suae propriae passionis: nam subjectum est sicut clavus, passio sicut trahis, generans sicut movens utrumque, et dans esse utrique, scilicet subjecto et passioni, sicut motus in clavo et trabe causatur a movente. Et sic salvatur utraque opinio, et omne dubium removetur.

Ex dictis ergo possunt patere duae particulae definitionis proprii: scilicet, quod proprium inest omni et semper. Si enim proprium necessariam et naturalem connexionem habet ad formam specificam, ut dictum est; oportet quod inveniatur in omnibus in quibus est forma specifica. Sed forma specifica invenitur in omnibus individuis ejusdem speciei. Ergo proprium competit omni contento sub specie, et semper sibi convenit, quamdiu formam illam specificam participabit. Et sic patent duae particulae definitionis proprii etc.

#### CAPUT VII.

*Quod proprium inest soli speciei, et conversim de ipsa praedicatur.*

Ad videndum autem aliam particulam definitionis proprii, scilicet, quomodo convenit uni soli speciei; sciendum quod, ut supra dictum est, diversi sunt gradus perfectionis in entibus: quos Philosophus, 8 Metaph., comparat numeris: unde dicit, quod species rerum sunt sicut numeri. Et ideo sicut numeri respectu unitatis diversos habent gradus formales, sicut alius est gradus quaternarii quam quaternarii, et sic de aliis; ita diversi sunt gradus formales specierum rerum per respectum ad quodcumque primum principium incompositum: nec est invenire duas species in eodem gradu, sicut nec duos numeros specie differentes. In qualibet ergo specie est una forma specifica nullo modo existens in gradu essendi vel operandi formae specificae alterius speciei. Cum autem, ut dictum est, proprium sequatur propria principia speciei, nec potest esse nisi in una specie; propter hoc in definitione dicitur quod inest uni. Sciendum est autem quod licet proprium stricto modo sumptum, solum conveniat uni speciei specialissimae; tamen largo modo nihil prohibet proprium etiam convenire speciei subalternae, quae videlicet potest esse genus. Dicimus enim quod proprium trianguli est habere tres angulos aequales duobus rectis; et tamen triangulus multas continet sub se species.

Ex dictis patet illud quod dicit Porphyrius, quod proprium prius convenit speciei, et posterius individuis: quod oppositum autem est de accidente communi. Si enim proprium respicit individua in quantum participant formam specificam, per prius ergo verificatur de specie, quam primo respicit, quam de individuis et per consequens individuis convenit, quia convenit speciei. Accidentem autem eum non respiciat subjectum nisi ratione inhaerentiae; et per prius convenit substare individuis quam secundis substantiis, ut infra dicitur: accidens ergo convenit speciei ratione individui. Deinde in definitione proprii ponitur ista particula, quod scilicet conversim praedicatur.

(1) *Al.* priorum.



dicatur de re. Ubi nota quod, ut infra dicitur, differt aliquo modo praedicari per se, et praedicari primo. Ea enim per se praedicantur, quae necessariam habent connexionem ad subjecta de quibus praedicantur; sed ea praedicantur primo, quae praedicantur dicto modo, et tantum ambit praedicatum quantum subjectum. Unde licet visibile per se praedicetur de Soerate, non tamen primo. Quia proprium, ut dictum est, per prius respicit speciem quam individua; et cum tanti ambitus sit proprium quanti sunt species, ideo dicitur praedicari primo, seu conversim de specie. Notandum, quod licet proprium uni speciei conveniat, tamen nihil prohibet proprium unius speciei participatione multis aliis speciebus convenire: sicut proprium est igni quod sit calidus; et tamen multis aliis speciebus hoc convenit, in quantum hoc participant ab igne. Sciendum est etiam, quod proprium alicujus speciei aliquando sumitur sub uno nomine et uno significato, ut risibile est proprium hominis: aliquando vero sub duobus oppositis cum disjunctione, ut proprium est numeri, quod sit par vel impar. Et sic patet de proprio etc.

### CAPUT VIII.

*De origine accidentis, et descriptione (1) ipsius.*

Accidens (2) vero est, quod contingit eidem inesse et non inesse praeter subjecti corruptiorem. Ad quod intelligendum sciendum est, quod unum potest dependere ab alio dupliciter. Uno modo, sicut ab eo quod est prius eo, ad minus natura. Et isto modo una res dependet ab alia quatuor modis, secundum quod quatuor sunt causae: dependet enim in homine corpus ab anima sicut a forma, et anima a corpore sicut a materia, et homo a Deo sicut a causa efficiente, et a beatitudine sicut a causa finali. Alio modo potest esse dependentia alicujus rei ab alia sicut ab eo quod se habet ad ipsam consecutive: sicut corpus dependet a figura, et linea a rectitudine vel curvitate: non enim potest inveniri corpus in quo non sit figura; vel linea in qua non sit rectitudo vel curvitas: et isto modo dependet omne subjectum a propria passione. Unde quaecumque dependentia sit in rebus, sive causalis, sive consecutiva; et una res ita dependet ab altera, quod esse suum nec actu nec aptitudine sine tali re possit conservari; certum est quod illa sine illa a qua sic dependet, non potest intelligi esse: non enim posset intelligi materia esse sine forma. Ubi nota quod intelligere aliquam rem sine alia potest dupliciter contingere. Uno modo in prima operatione intellectus, in qua scilicet intellectus, intelligit solum significatum termini. Alio modo in secunda operatione intellectus, in qua intelligit componendo vel dividendo per esse vel per non esse; sicut cum intelligo Petrum esse vel non esse album. In prima autem intellectione possum intelligere corpus sine figura, et omne subjectum sine propria passione: non enim figura est de essentia corporis, cum corpus sit in genere quantitatis, figura vero in genere qualitatis. Et ideo intellectus potest intelligere corpus non intellecta figura; non tamen posset intelligere corpus isto modo non intellecto continuo,

quia continuum est de essentia corporis. In secunda vero operatione intellectus non possum intelligere corpus esse sine figura; quia corpus nunquam potest esse sine figura, nec subjectum sine propria passione, ut dictum est. Cum autem subjectum non habeat talem dependentiam ab accidente communi (non enim necessario sequitur subjectum, sicut figura sequitur principia essentialia corporis; nam si corpus est, necessario habet positionem partium in toto, ut infra dicitur, quia positio est differentia quantitatis; ad hanc autem necessario sequitur figura: quod non contingit de accidente communi respectu sui subjecti); ergo subjectum potest intelligi non intellecto accidente communi, et potest intelligi esse non intellecto accidente communi. Sine accidente vero proprio non potest intelligi esse, cum sine accidente proprio esse non possit; nam ablata figura non erit situatio partium, et per consequens non erit corpus. Ergo non poterit intelligi esse sine eo. Potest ergo accidens inesse et non inesse praeter subjecti corruptionem, cum esse subjecti non dependeat aliquo modo ab esse suo, ut dictum est. Et sic patet praedicta descriptio accidentis.

Sciendum tamen est, quod aliquod accidens commune potest inveniri, quod respectu hujus subjecti singularis ita se habet, quod causatur ex principiis essentialibus ejus: puta nigredo corvi, quae causatur ab hac sive ex hac materia signata corvi necessario. Loquendo igitur de tali accidente, dico, quod non posset intelligi hoc subjectum esse sine eo. Et hoc dicitur accidens inseparabile, quod ita se habet ad principium singulare, sicut accidens proprium ad principium speciei. Et quia materia signata est extra intellectum speciei (de intellectu enim hominis est habens humanitatem, et non plus. Utrum autem tale habens sit hoc signatum, vel illud, non est de intellectu explicato hominis, sicut differentiae sunt extra intellectum generis, ut supra dictum est): ideo potest intelligi corvus sive species corvi esse sine nigredine, vel etiam cum albedine. Et propter hoc, accidens inseparabile collocatur cum accidente communi, et non cum proprio: licet aliquo modo conveniat cum utroque, ut dictum est. Sic ergo accidens quoddam est inseparabile, et quoddam est separabile. Accidenti inseparabili convenit praedicta definitio accidentis, scilicet quod subjectum potest intelligi esse sine eo, si sumatur subjectum pro specie, et non pro singulari.

Sciendum est autem quod licet subjectum possit separari ab alio accidente, ut dictum est; non tamen accidens potest separari a subjecto actu vel aptitudine. Et dico aptitudine: nam licet Deus posset aliquod accidens separare a subjecto, ut communiter tenetur de accidentibus hostiae consecratae; tamen quod illa accidentia non habeant aptitudinem ad subjectum, hoc est impossibile. Quod enim est de ratione propria alicujus, ab eo separari non potest. Sed inesse actu vel aptitudine subjecto, est de ratione propria accidentis, quia accidentis esse est inesse. Ergo ab eo separari non potest. Hoc autem potest patere ex his quae supra dicta sunt de specie. Cum enim accidentia et omnes formae substantiales non sint actus purus, qui de se plurificabilis non est; si ipsa plurificentur numero, hoc est propter potentialitatem quam habent essentialiter, ut scilicet sint pars realis alicujus compositi sive substantialis sive accidentalis.

(1) *Al.* dictione.

(2) *Al.* accidentis.



Unde sicut materia et forma sunt partes rei substantiales, ita accidentia sunt partes rei accidentales; sicut albedo quae est pars hujus compositi, quod est homo albus. Cum autem omnia accidentia sint talia, ergo necessario oportet quod insint subjecto actu vel aptitudine. Et sic patet de accidente, et de quinque praedicabilibus.

## TRACTATUS II.

DE PRAEDICAMENTIS QUAE GENERA RERUM DICUNTUR:  
ET PRIMO DE PRAEDICAMENTO SUBSTANTIAE.

### CAPUT I.

#### *De diversis modis praedicandi.*

Nunc dicendum est de praedicamentis. Et quia praedicamentum dicit quaedam praedicabilia ordinata in ordine praedicamentali, videndum est, quot modis fit praedicatio. Ubi nota quod aliquid de aliquo dicitur praedicari tripliciter: idest univoce, aequivoce et denominative. Univoce dicuntur praedicari quae non solum conveniunt his de quibus praedicantur quantum ad nomen, sed etiam quantum ad rationem essentialium. Et dico hic rationem illud quod per definitionem dicitur seu significatur, vel per aliquid quod sumatur loco definitionis. Sicut animal praedicatur de homine et de bove: unde non solum hoc nomen animal convenit homini et bovi, sed etiam definitio ejus essentialis, quae est corpus animatum sensibile. Non solum enim vere dicimus quod homo est animal; sed etiam quod homo est corpus animatum sensibile: et similiter est de bove. Aequivoce vero dicuntur praedicari quae de pluribus praedicantur secundum idem nomen, non tamen secundum eandem rationem; et isto modo praedicatur canis de latrabili et de marino: licet enim secundum idem nomen « canis » de utroque praedicetur, tamen alia ratione convenit cani latrabili quam marino: ratio enim latrabilis est, quod est animal gressibile quadrupes, quae non convenit marino. Sciendum est autem quod sub aequivocis comprehenduntur analogae. Praedicantur enim analogae de pluribus, in quantum dicuntur ad unum: ut sanum dicitur de animali primo et proprie: est enim sanum adaequatum in humoribus, quod non potest esse nisi in animali. Dicitur tamen sanum de urina et medicina: nam dicimus, haec urina est sana, quia est signum sani quod est in animali: et, haec medicina est sana, quia est causa sani, quod est in animali. Unde licet hoc nomen « sanum » de animali et de urina dicatur, tamen ratio sani non potest dici de urina: non enim urina est adaequata in humoribus, sed est signum talis adaequationis. Et sic praedicatio analogae aliquo modo convenit cum aequivoca, ut dictum est, et aliquo modo cum univoce. Licet enim sanum quod de urina dicitur, non dicat suam rationem, scilicet adaequationem humorum, in urina, non tamen dicit aliam rationem, sed eandem adaequationem humorum dicit, cujus urina est signum. Denominative vero dicuntur praedicari, quae concreta sunt adjectiva, et ab aliquibus accidentibus abstractis denominantur seu derivantur: ut album de homine praedicatur, et de equo denomi-

native: quia album derivatur ab hoc abstracto quae est albedo quae est in homine, quae sic in abstracto sumpta de homine praedicari non posset: nulla enim pars, ut supra dictum est, potest de toto praedicari: albedo enim est quaedam pars accidentalis hominis albi, et sic de eo praedicari non posset. Conceritur autem et dicitur album, quod idem est quod habens albedinem: et tale potest de homine praedicari.

Ad videndum praedicamenta, sciendum est quod praedicamentum, seu genus generalissimum, dupliciter potest accipi. Uno modo pro ipsa intentione praedicamentali, seu universalitatis. Alio modo pro ipsa re, in qua talis intentio fundatur, ut dictum est: primo modo praedicamentum est ens rationis; secundo modo est ens reale. Ad majorem autem notificationem horum sciendum est quod ens in sua maxima universalitate dividitur 5 Metaph., in ens per accidens et in ens per se. In ens per accidens tot modis dividitur, quot modis aliquid praedicatur per accidens, de quibus supra dictum est. Ens per se dividitur, quia quoddam est in anima, et quoddam extra animam. Ad sciendum autem quid sit ens in anima, nota quod tripliciter aliquid potest esse in anima. Uno modo effective, sicut dicimus, quod area est in mente artificis antequam fiat. Alio modo subjective, sicut dicimus quod scientia est in anima, vel actus intelligendi, vel verbum, quae sunt in anima sicut accidens in subjecto. Tertio modo aliquid dicitur esse in anima objective, sicut lignum intellectum dicitur esse in anima objective. Duobus primis modis ens in anima est ens reale; et dico reale, non ut hoc nomen « res » dicitur a « reor reris », sed ut dicitur a « ratus rata ratum », idest firmum. Tertio modo sumpto ente, scilicet ut est objective in anima, in eo possumus duo considerare: scilicet id quod est objective in intellectu, puta lignum; et istud adhuc est res: vel illud quod convenit ligno solum ut est objective in intellectu, et non convenit sibi secundum esse reale, scilicet esse abstractum ab hoc ligno et ab illo: et hoc modo ens in anima non est res, sed intentio, cui et (1) nihil extra animam respondet nisi pro fundamento remoto: et sic attribuitur esse non enti: dicimus enim quod caecitas est in oculo. Cum autem caecitas sit non ens, quomodo ergo habet esse, quia dicimus, caecitas est? certe solum esse intentionis, quod nihil habet facere cum ente reali, sed ex opposito ab eo dividitur. Et si quaeratur de tali ente ubi sit subjective, dicitur quod est nusquam: si enim esset in aliquo subjective, esset accidens, et per consequens ens reale, sed solum habet esse objective. Ens autem reale dividitur in decem praedicamenta, quae sunt decem genera rerum. Et quia res est fundamentum intentionis, remotum tamen; secundum istam duplicem divisionem possunt dupliciter accipi praedicamenta. Ad sciendum autem praedicamenta oportet dividere ens reale. Ubi nota, quod licet ens non possit esse genus, quia non invenitur differentia contrahens illud, tamen contrahitur per modos essendi. Modus autem essendi alienius rei potest accipi dupliciter. Uno modo, ut est proprietas realis alienius realiter differens ab eo, sicut dicimus de aliquo, Iste habet bonum modum, quia est mansuetus vel concors. Constat autem quod mansuetudo et concordia quas diximus modos, res

(1) Edit. Rom. ei. Fortasse utrumque redundat.

sunt differentes ab eo cuius sunt. Secundo modo dicitur modus res concepta: uno modo respectu suiipsius: alio modo, ut est concepta (1): qui quidem diversi modi considerandi non sumuntur ex diversis in re existentibus, sed ex habitudine ad diversa, sub qua habitudine res intelligitur: verbi gratia: Substantia secundum quod est subjectum accidentium, significatur per modum substantiae, quia substantia dicitur a substando: secundum autem quod a nullo priori dependet eui innitatur, significatur ut ens per se: et isti modi sunt idipsum quod substantia, differentes sola ratione animae concipientis ipsam secundum diversas habitudines: quae ratio non est ficta, sed accipitur a re, ita enim in re est: nam et substantia substat accidentibus et nulli innititur. Tamen istae non sunt duae res distinctae, sed distinctio inter ista solum est ex ratione. Unde tales modi sunt ens reale, scilicet substantia, quae et substat accidentibus et nulli innititur: distinctio tamen eorum est a ratione. Contrahitur autem ens per modos: non quod modus sit aliqua differentia contrahens ipsum: sed quia in ente reali communiter sumpto inveniuntur aliqua entia habentia inter se diversos modos essendi, quibus non respondet una et eadem res, nisi forte ipsum ens in universali. Primi autem modi quibus contrahitur ens, sunt esse per se, et esse in alio. Esse autem per se est modus praedicamenti substantiae; esse vero in alio est modus aliorum novem praedicamentorum. Alio modo adhuc contrahitur ens per duos modos: quorum unus est esse ad se (2): et iste modus comprehendit tria praedicamenta absoluta; scilicet substantiam, quantitatem et qualitatem. Secundus est esse ad aliud; et iste modus comprehendit septem praedicamenta respectiva, scilicet relationem, actionem, passionem, quando, ubi, situm et habere. Quae omnia qualiter inter se differant, dicitur infra. Notandum est autem quod divisio entis in decem praedicamenta non est divisio univoci, sed analogi: ens enim analogice dicitur de eis: per prius enim dicitur de substantia in qua maxime salvatur sua realitas; de aliis vero dicitur in quantum sunt aliquid ipsius substantiae: quantitas enim est materia extensa, vel extensio substantiae; qualitas vero est ejus affectio, idest dispositio; et sic de aliis: unde de eis praedicatur ens sicut sanum praedicatur de animali, urina et medicina. Dividitur ergo ens in decem praedicamenta, quae sunt substantia, quantitas, qualitas, relatio, actio, passio, quando, ubi, situs et habere seu habitus, de quibus sigillatim dicendum est, et primo de substantia.

## CAPUT II.

*Quid sit substantia secundum intentionem logicam.*

Est autem substantia ens per se existens. Ad videndam particulam hujus descriptionis, sciendum quod licet de ente plura dicta sint, tamen ens est quod primo occurrit nostro intellectui: nos enim sumus rationales, idest discursivi; quicquid enim intelligimus, fere cum discursu intelligimus. Occurrunt autem intellectui nostro primo magis confusa: de potentia enim reducimur ad actum per medium,

scilicet per actum imperfectum, quo intellectus non intelligit determinatam rem, et discurrendo determinat se ad perfectionem sicut possibile est intelligi rem, ut ponit Philosophus 1 Phys., exemplum in sensibilibus: videndo enim in magna distantia aliquid, primo percipio quod sit corpus, deinde accedendo video quod sit animal (1), deinde cognosco quod sit homo, deinde quod sit Petrus. Sic intelligendo discurrit intellectus noster. Primo enim de re concipit quod sit ens, deinde quod sit substantia, deinde quod sit corpus, et sic usque ad speciem specialissimam. Confusius autem quod intelligi potest est ens. Ens ergo est illud quod primo occurrit intellectui nostro. Et sic patet qualiter in praedicta notificatione substantiae sumitur ens. Sed quia dictum est quod substantia est ens per se, notandum quod per se dividitur contra per accidens: sicut dicimus quod homo est animal per se, est autem albus per accidens; et hoc modo nunc sumitur hic per se: nam quantitas et qualitas non sunt entia per accidens, sed per se, ut dictum est, quia ens per se dividitur in decem praedicamenta. Alio modo esse per se dividitur contra esse in alio. Secundo modo solum substantiae convenit esse per se, et iste est modus proprius ejus. Vel potest dici quod substantia est ens per se existens, eo quod sibi proprie convenit existere; aliis vero accidentibus convenit existere per eam: sicut ignis per se est calidus, quia omnia sunt calida per eum, est enim ejus proprietas esse calidum. Sciendum tamen est quod substantia dividitur in materiam, formam et compositum: materia enim non dicitur proprie esse per se, cum non habeat esse nisi per formam: similiter etiam forma non dicitur esse per se, cum solum habeat esse in materia. Compositum autem proprie dicitur esse per se; et dico compositum, scilicet integratum ex suis partibus. Licet enim partes integrales sint compositae, non tamen dicuntur proprie esse per se: compositum enim directe est in praedicamento, ut Boetius in comm. Praedicamentorum dicit. Licet etiam possit dici quod forma et materia et partes integrales sint per se, quia non sunt in alio, sicut accidens in subjecto. Notandum quod licet hic describatur substantia composita, tamen dupliciter potest esse substantia composita: scilicet natura, et suppositum. Dico autem hoc naturam, ut est humanitas: suppositum autem non sumo hic pro singulari in genere substantiae, sed pro concreto naturae ut homo: humanitas enim licet forma dicatur, est tamen composita ex materia et forma, ut supra dictum est: dicit enim humanitas animam et corpus. Ita tamen humanitas, sive quaecumque natura, dicit formam substantialem et materiam, quod de suo principali significato praescindit omne aliud a praedicta forma et materia. Non autem sic est de supposito, quod est homo: homo enim de suo principali significato dicit habens humanitatem, seu habens talem formam et materiam, quam dicit humanitas. Et quia habens humanitatem potest esse suppositum non humanum, ut patet de humanitate Christi, quae suppositatur supposito divino: vel potest habere aliqua alia, puta accidentia, quae humanitas omnino praescindit; ideo in creaturis differunt suppositum et natura. Et quia natura, puta humanitas, est quid habitum existens in habente; licet sit composita, tamen sibi

(1) *Al.* ut est concepta: alio modo.

(2) *Al.* esse ad esse.

(1) *Al.* aliud.

non proprie convenit esse per se. Proprie ergo ens per se dicitur substantia composita quae est suppositum. Et haec est causa quare genera et species substantiae sumuntur in concreto, et non in abstracto, non autem aliorum praedicamentorum. Forma autem substantialis quae est pars compositi, de se non substare accidentibus, sed compositum; forma vero quae est natura seu essentia et humanitas, quamvis sit composita ex materia et forma, tamen in suo signato praescindit substare accidentibus. Alia vero accidentia ita se habent, quod eorum genera et species sunt formae, cum tamen ex eis cum subjecto non sit unum per se. Dicitur autem postea quod existens. Ubi nota quod in creaturis esse essentiae et esse actualis existentiae differunt realiter, ut duae diversae res: quod sic patet. Illud enim quod est extra essentiam alicui differt realiter ab ea. Esse autem actualis existentiae est extra essentiam rei, nam definitio indicat totam essentiam rei. Esse autem actualis existentiae est extra definitionem, quia in definitione ponitur solum genus et differentia, et nulla fit mentio utrum res definita existat vel non existat. Apparet etiam hoc manifeste. Nam impossibile est posse intelligere aliquam rem, non intelligendo ea quae sunt de essentia ejus. Tamen constat quod ego intelligo rosam non intelligendo utrum actu sit, vel non. Ergo actu esse, vel esse actualis existentiae differt realiter ab essentia. Unde circa primum in quacumque substantia creata est compositio esse et essentiae: quae non est compositio materiae et formae, sed est compositio duorum principiorum suppositi, quorum essentia est potentia, et esse est actus. Unde esse respectu essentiae dicitur accidens, quia est extra essentiam rei; et dicitur substantia, quia est in genere substantiae sicut principium suppositi: et est actus simpliciter, quia in genere substantiae, licet non sit forma, quae est actus materiae; et est actus secundum quid, quia essentia cui advenit, non est pura potentia, sicut est pura materia. Sciendum tamen est, quod esse essentiae per prius convenit speciebus, quia, ut supra dictum est, sola species definitur, et definitio significat esse essentiae; et per posterius dicitur de individuo, seu convenit ei. Esse autem existentiae per prius convenit individuis: ablato enim esse individuorum impossibile est aliquid aliud remanere, ut Philosophus dicit libro Praedicamentorum, posterius autem convenit ipsis speciebus. Unde existere sic de genere et specie dicitur sicut accidentia communia: sic enim dicitur « homo existit, quia Petrus existit » sicut « homo currit, quia Petrus currit. »

### CAPUT III.


*De prima et secunda substantia, quid sint;  
et de ordine substantiae.*

Dividitur autem substantia in primam et secundam. Est autem prima substantia, quae proprie principaliter, et maxime dicitur substare, quae nec in subjecto est, nec de subjecto dicitur. Ad videndum autem praedictam descriptionem, sciendum est, quod substare dicitur dupliciter: scilicet pro sub-

stare accidentibus, sicut dicimus quod substantia substare accidentibus: et pro substare universalibus, sicut dicimus quod minus universale substare magis universali: stat enim sub eo in ordine praedicamentali: unde majus universale de minus universali praedicatur. Si substare sumatur primo modo, sic prima substantia proprie substare: sicut enim supra dictum est, illud inest alicui proprie, quod inest per se ei, non per aliud; sicut calor proprie inest igni. Sic eodem modo inest primae substantiae substare accidentibus: licet enim superficies substet colori, et linea curvitati, tale substare habent non per se, sed per aliud, scilicet per substantiam primam: remota enim inhaerentia superficiei et lineae, quam habent ad primam substantiam actu et aptitudine, non erit superficies nec linea. Substant igitur accidentibus, quia substantia prima substare eis. Proprium ergo primae substantiae est substare accidentibus. Ex quo sequitur quod substare accidentibus insit principaliter et primo substantiae primae. Illud enim primo convenit alicui, quod convenit sibi, et non per aliud: Petro enim non convenit primo esse risibile, quia sibi per aliud, scilicet per hominem: unde homini convenit primo esse risibile. Sic, licet substare accidentibus conveniat substantiae primae et secundae, tamen secundis substantiis, scilicet generibus et speciebus, convenit secundo, quia convenit eis per individua, quae sunt primae substantiae: non enim homo currit, nisi quia Petrus vel Socrates currit. Et sic patet qualiter prima substantia substare proprie et principaliter. Sed dicitur quod substare maxime; et sumitur substare secundo modo, scilicet pro esse sub alio, sicut minus universale sub magis universali. Cum autem primae substantiae subjiciantur omnibus speciebus et generibus, quae sunt supra se; species vero et genera non subsunt tot; ergo primae substantiae respectu secundarum isto modo maxime dicuntur substare. Dicitur postea quod non dicuntur de subjecto, quia non sunt praedicabilia de aliis sicut species et genera; et non sunt in subjecto, quia non sunt accidentia. Sola enim accidentia sunt in subjecto, ut hic sumitur esse in subjecto. Et sic patet descriptio primae substantiae, seu individui. Secundae vero substantiae dicuntur species et genera, quae sunt in praedicamento substantiae. Differentiae vero quae cadunt ex latere, non proprie dicuntur substantiae, quia non proprie dicuntur esse in praedicamento, nisi forte reductive. Dicuntur autem secundae substantiae, quia secundo, ut dictum est, substant accidentibus. Inter secundas autem substantias dicuntur magis substantiae species quam genera: non quod substantia suscipiat magis et minus, ut infra dicitur; sed quia utroque modo substandi magis substant species quam genera, ut ex dictis haberi potest. Species vero specialissimae dicuntur aequaliter substantiae, quia aequaliter omnibus substant. Et sic patet de primis et secundis substantiis.

Qualiter autem praedicamentum substantiae sit ordinatum, patet in arbore Porphyrii, quam gratia exempli ponimus: licet non in toto reperiam eam veram: nam rationale animal non est genus, ut ipse ponit, nec dii sunt rationales, ut ipse dicit.

TOTIUS LOGICAE SUMMA  
**A R B O R P O R P H Y R I I**



**CAPUT IV.**

*Quod substantia non suscipit contrarietatem, nec magis et minus: licet sit subjectum utriusque per sui mutationem.*

Restat nunc dicere de communitatibus et proprietatibus substantiae. Habet autem substantia duo communia cum aliquibus accidentibus: scilicet quod non suscipit contrarietatem, et quod non suscipit magis et minus. Ad quae intelligenda sciendum est,

quod quaedam formae habent in se latitudinem, quaedam vero non. Et quia quaedam formae habent praedictam latitudinem, ideo habent contrarietatem; licet non semper sit verum in omnibus. Ad sciendum autem praedictam latitudinem, nota quod in rebus spiritualibus augmentum transfertur a quantitate corporali. Dicitur autem in quantitate corporali aliquid magnum, secundum quod ad debitam perfectionem quantitatis perducitur: unde aliqua quantitas reputatur magna in homine, quae non reputatur magna in elephante: sic etiam in



formis dicitur aliquid magnum ex hoc quod est perfectum. Perfectio autem formae dupliciter potest considerari: vel secundum ipsam formam, vel secundum participationem subjecti. Primo modo dicitur ipsa forma parva vel magna, ut parva albedo. Secundo modo dicitur magis vel minus: ut magis vel minus album. Formae ergo quae de se indeterminatae sunt, ut magis vel minus, seu perfectius et imperfectius sint in subjecto, illae formae dicuntur praedictam habere latitudinem, et praedictos gradus intensiois et remissionis. Ad sciendum autem quae sint illae formae, nota quod in forma tria possumus considerare. Primo si agens potest se diversimode habere ad eam. Secundo si subjectum eam recipiens, aliquando sit magis vel minus dispositum ad ipsam. Tertio qualiter ipsa forma participatur a subjecto. Unde in illis formis in quibus agens non se habet diversimode, nec aliquando subjectum est magis, et aliquando minus dispositum: illae formae non habebunt praedictam latitudinem: sed in ultima perfectione suae speciei, semper recipiuntur in subjecto. Verbi gratia: si enim aer esset semper eodem modo dispositus ad recipiendum lucem, et illuminans aerem eodem modo semper se haberet, nunquam lumen in aere reciperetur magis nec minus, nec aer esset magis vel minus illuminatus: sed quia aliquod istorum variatur, ideo aliter se habet de lumine. Cum autem in formis substantialibus semper eodem modo se habeat agens et subjectum quod est materia prima, sit semper aequae dispositum; forma ergo substantialis non habebit latitudinem praedictam. Quod ipsa materia prima sit semper aequae disposita, non oportet probare, quia clarum est. De agente vero seu producente formam substantialem patet. Licet enim tale agens diversimode se habeat abjiciendo dispositiones contrarias ab ipsa materia, et hoc faciat virtute formarum accidentalium, seu qualitatum, tamen formam substantialem introducit virtute suae formae substantialis, quae uniformiter se habet in omnibus generabilibus ejusdem speciei. Et idem et eodem modo potest concludi de propriis passionibus quae simul cum subjecto producuntur, et subjectum respectu earum aliquo modo se habet active, ut supra dictum est. Tam igitur formae substantiales quam propriae passionis, et quia agens ad eas producendas non se habet diversimode, et quia subjectum eas recipiens semper eodem modo est dispositum, ideo non suscipiunt magis nec minus. Si vero subjectum non esset eodem modo dispositum ad formam, vel agens adhuc diversimode se haberet, oportet considerare tertium quod dictum est: scilicet qualiter ipsa forma participatur a subjecto. Nam si participatur secundum rationem indivisibilitatis, talis forma non suscipiet magis nec minus: sicut patet de speciebus numeri, quae consistunt in indivisibili unitate; et de speciebus quantitatis continuae secundum numeros, ut bicubitum, tricubitum; et de aliquibus relationibus, ut duplum et dimidium; et de figuris, ut trigonum et tetragonum. Et quia omnes quantitates et figurae sic recipiuntur in subjectis, ideo quantitas et figura et haec relationes non suscipiunt magis nec minus. Non solum autem de quantitibus sic consideratis, sed simpliciter loquendo de quantitate, ut linea, superficies et corpus, verum est quod non suscipit magis nec minus. Cujus ratio est, quia perfectio et imperfectio quantitatis est secundum majorem vel

*S. Th. Opera omnia. V. 17.*

minorem extensionem, secundum quam aliquid dicitur majus aut minus. Non autem major vel minor extensio est causa sufficiens quod aliquid dicatur magis vel minus: quia non dicitur esse secundum extensionem; ut patet in aliis formis in quibus est extensio et non intensio, sicut in formis inanimatorum et brutorum: quorum formae sunt extensae, et non dicuntur secundum magis et minus. Patet ergo quae formae suscipiunt magis et minus, et quae non. Quia videlicet habentes praedictam latitudinem, suscipiunt magis et minus. Ex his scitur statim, quae formae recipiunt contrarietatem, et quae non. Nulla enim forma quae non recipit magis et minus, recipit contrarietatem. Ubi nota, quod formae quae habent latitudinem praedictam, quaedam habent eam solam servando eandem speciem, quaedam vero in genere et in specie: nam tales gradus latitudinis sunt usque ad ultimum in quo salvatur species illa: quem gradum si transeat forma, variabit speciem et remanebit sibi idem genus: et in ista secunda specie, habet etiam gradum quamdiu perveniat ad ultimum: quem si transcenderet, non esset in eadem specie. Verbi gratia: croceum habet gradus, et fit magis croceum quamdiu veniat et fiat rubeum: et licet rubedo sit alia species quam crocitas, sunt tamen ejusdem generis; conveniunt enim in hoc quod est participare lucem incorporatam. Et de rubeo venit ad nigrum usque ad ultimum gradum nigri, qui in eodem genere transcendendi non potest. Si etiam crocitas remittatur, fit palliditas et postea albedo: et istae formae istorum duorum graduum, scilicet albedo et nigredo, sunt contrariae. Nota, quod multi moderni tenent, quod duo gradus faciunt unam contrarietatem, sicut albedo et rubedo, albus et magis albus: et apud ipsos duplex est contrarietas, scilicet completa et incompleta. Prima est inter extrema maxime distantia, scilicet inter albedinem summam et nigredinem summam. Secunda est inter gradus medios; quia duo gradus distincti numero, non compatiuntur se ad invicem et denominative in eadem parte subjecti, sicut gradus ut duo et gradus ut tria, et sic de singulis. Unde talis latitudo, scilicet perfectius et imperfectius participari a subjecto, sequitur formas, aut ratione formae, aut ratione subjecti. Ratione formae, ut patet in coloribus: nam lux incorporata magis vel minus participata, causat species contrarias: nam species quae perfectius participat de tali luce, puta albedo, est contraria speciei quae imperfectius talem lucem participat, puta nigredo: et in talibus invenitur contrarietas. Quando vero tali latitudine non participat ratione formae, sed solum ratione subjecti, ut patet de magis vel minus illuminato; tunc talis forma, licet recipiat magis vel minus, tamen non habet contrarium: lumini enim nihil est contrarium; et tamen constat quod aer est aliquando magis illuminatus, et aliquando minus. Ubicumque enim est contrarietas, ibi est magis et minus, et latitudo praedicta in formis. Ubicumque vero talis latitudo non est, ibi non est vera contrarietas. Et dico vera contrarietas; quia quaedam dicuntur contraria, quae opponuntur secundum habitum et privationem, sicut rationale et irrationale par et impar, sicut dicimus: et in unoquoque genere est una prima contrarietas, quae non est vere contrarietas, sed magis est habitus et privatio. Et hoc idem dico de omnibus contrariis immediatis: scilicet quod non opponuntur vere contrarie, licet

sint habitus et privatio: sanitas enim et aegritudo sic opponuntur: nam si sanitas est humorum aequalitas, et aegritudo inaequalitas. Et quia aequale et inaequale opponuntur privative, melius diceretur quod sanitas et aegritudo opponuntur per modum habitus et privationis quam contrarie; et est causa quare non dicuntur habere medium. Sciendum est autem quod licet, ut dictum est, in aliquibus inveniatur latitudo et gradus, non tamen est intelligendum, quod cum una forma intenditur, quod augeatur per additionem gradus ad gradum, ita quod sint ibi duo gradus distincti, quorum unus addatur alteri, et posset ab eo distincte signari. Sed fit tale augmentum in quantum forma imperfecta fit perfecta: ita quod ipsa perfecta habet plusquam prius, non secundum partes signabiles diversas, sed virtute: ita quod primus gradus continetur in secundo virtute, sicut imperfectum continetur in gradu perfecto. Ex istis patet, quod quia substantia non suscipit magis vel minus, ut dictum est, quod substantiae nihil est contrarium. Et sic patent communitates substantiae.

Proprium autem substantiae est, quod secundum sui mutationem sit susceptibilis contrariorum. Dicitur autem hoc esse proprium substantiae, quia sibi soli per se convenit: et si aliqua dicuntur suscipere contraria, sicut linea dicitur recta vel curva; tamen linea non suscipit ista nisi ratione substantiae. Datur etiam instantia de de oratione et opinione, quae eadem manens, aliquando est vera, aliquando est falsa. Ad quam respondet Philosophus, quod hoc non fit secundum mutationem orationis vel opinionis: non enim mutatur oratio vel opinio, dum Soerates sedet, eo surgente, sed mutatur res: non enim per sui mutationem, oratio vel opinio dicitur esse susceptibilis contrariorum, sed per mutationem rei significatae. Soli ergo substantiae hujusmodi convenit: et si aliis convenit hujusmodi, est ratione substantiae in qua habent esse: ut patet de superficie quae est susceptibilis albedinis et nigredinis, de cujus ratione est actu vel aptitudine esse in substantia, ut supra dictum est. Et sic patet de praedicamento substantiae etc.

### TRACTATUS III.

#### DE PRAEDICAMENTO QUANTITATIS.

##### CAPUT I.

###### *De numero qui est quantitas discreta.*

Quantitas dividitur in continuam et discretam. Dicitur autem discreta quantitas, cujus partes inter se ita se habent, quod sunt separatae, et ad unum communem terminum non copulantur: partes enim hujus numeri qui est decem, ad nullum communem terminum copulantur: non enim in numero qui est decem invenitur aliqua particula ad quam copulentur aliae particulae, cum omnes particulae ejus sint separatae una ab alia. Continua vero quantitas dicitur, cujus partes ad unum communem terminum copulantur, quia omnes sunt conjunctae, et non sunt actu separatae, sed sunt separabiles, ut infra dicitur. Dividitur autem quantitas discreta

in numerum et orationem. Est autem numerus multitudo ex unitatibus aggregata. Aliter autem definitur numerus sic: numerus est multitudo mensurata per unum. Ad videndum autem praedictas definitiones, sciendum est quod unum convertitur cum ente et unum est principium numeri. Unum autem primo modo sumptum, nihil aliud est quam ens indivisum. Addit autem unum supra ens, negationem seu privationem divisionis. Et quia omne ens est unum isto modo sumptum, ideo unum sic sumptum non solum est in genere quantitatis, sed in omnibus generibus sicut et ens; et ideo unum est de transcendentibus, et multitudo causata per unum isto modo sumptum, non est numerus qui est species quantitatis; sed est de transcendentibus: dicimus enim esse quatuor Angelos vel tres personas in divinis, et tamen nec in Angelis nec in Deo est quantitas. Unum autem quod est principium numeri, addit super unum quod convertitur cum ente non rem aliquam, sed concernit illud addendo sibi duas rationes: scilicet quia dicit non omnem indivisionem, id est non dicit omne ens in quantum est indivisum, sed dicit ens indivisum quantitatis continuae, et dicit rationem mensurae discretae. Quia enim numerus, qui est species quantitatis, causatur ex divisione (1) continui; supponatur quod divideremus unam lineam in multas partes: cum quaelibet pars lineae quae sic dividitur sit indivisa, et linea sic considerata est unum: unde unum nihil aliud est quam continuum indivisum. Unum ergo quod convertitur cum ente, dicit ens indivisum, quodcumque sit illud. Unum autem quod est principium numeri, dicit ens continuum indivisum: et numerus ex talibus unitatibus aggregatur, ubi sunt multa continua divisa ab invicem, et in se indivisa. Secunda ratio quam addit unum quod est principium numeri, supra unum quod convertitur cum ente, est ratio mensurae discretae. Ubi nota, quod mensurari discreto potest sumi dupliciter. Uno modo, ut idem sit quod certificari apud intellectum, quot sunt aliquae res, in quantum aliquis per unum aliquoties replicatum certificatur de numero illorum quae numerat; et isto modo sumpta mensura est proprietas accidentalis ipsius numeri, et convenit etiam uni quod convertitur cum ente. Alio modo sumitur mensurare pro eo quod est facere tot res formaliter sicut albedo formaliter facit album; et talis mensura est de ratione unius vel numeri. Habemus ergo quid est unum ex cujus aggregatione fit numerus, et qualiter sit mensura essentialiter vel accidentaliter.

Ad videndum autem quid sit multitudo, sciendum quod, ut supra dictum est, primum quod intellectus noster intelligit est ens. Secundo vero intelligit negationem entis, prout intelligitur aliud non esse hoc ens. Ex his duobus statim intelligit divisionem; unde divisio est distinctio per ens et non ens. Tertio intelligit unum, quod privat divisionem: est enim unum ens in quo non est praedicta divisio; et sic intellectus unius posterior est intellectu divisionis, sicut intellectus privationis posterior est intellectu habitus quem privat. Quarto intelligit multitudinem: quae dicit duas negationes: quarum una est, quod hoc non sit illud: altera est, quod quodlibet eorum non sit divisum, et per consequens sit unum. Et propterea multitudo definitur per unum; quia nunquam dicuntur multa, nisi

(1) *At.* ex dictione.

quodlibet eorum sit unum, seu ens indivisum. Et sicut modo sumpsimus ens et divisionem, et unum et multitudinem in transcendentibus, sic sumatur in quantitate; ita quod sicut sumebatur ens, ita hic sumatur continuum, licet aliqua differentia sit inter ea, ut supra dictum est. Sciendum quod haec multitudo quae est in quantitate, est multa continua, quorum unum non est aliud, et quodlibet eorum est indivisum in se, sive unum, quod idem est. Et sic patet prima definitio numeri, scilicet: Numerus est multitudo ex unitatibus aggregata. Patet etiam secunda definitio, scilicet, Numerus est multitudo mensurata per unum: nam quia unum multoties replicatum causat multitudinem, per hoc certificamur de multitudine quanta sit discreta, et sic unum est mensura multitudinis, et patet de numero etc.

## CAPUT II.

*De secunda specie quantitatis discretæ, scilicet de oratione.*

Oratio est vox aggregata ex distinctis syllabis eam mesurantibus, et in partibus suis non habens permanentiam. Ad intelligendum autem praedictam definitionem, sciendum quod vox non ponitur hic pro qualitate: est enim vox in tertia specie qualitatis, ut infra patebit; sed pro aliquo quod fluit (1) in voce: quia in tali voce sunt multae dictiones et syllabae, quae licet indivisibiles sint, tamen sunt successivae: nam una succedit alteri. Unde in talibus syllabis est duo considerare: scilicet indivisibilitatem earum, et successionem. Talis autem indivisibilitas non est indivisibilitas unitatis, alioquin oratio esset numerus: sed est indivisibilitas mesurans durationem, secundum quod tales plures syllabae indivisibiles plus durant quam una. Unde si in oratione consideramus indivisibilitatem syllabarum, per hoc convenit cum numero. Si vero ibi consideratur mensura durabilitatis, quae tamen non est semper stans, sed est successiva; in hoc convenit cum tempore, quod est mensura successiva et successivorum, ut infra patebit. Non tamen oratio est numerus simpliciter, sed est numerus pertinens ad mensuram durationis: nec est tempus continuum, quod nihil aliud est quam successio continuata semper divisibilis; sed est (2) successio aliquorum indivisibilium, puta syllabarum. Sciendum est autem, quod Philosophus libro Praedicamentorum dicit, quod oratio mesuratur syllaba brevi et longa. Alius textus habet quod syllaba brevis et longa mesuratur oratione. Mesuratur autem oratio syllaba eo modo, sicut dictum est, quod numerus mesuratur unitate quae indivisibilis est, in quantum hujusmodi: similiter etiam oratio mesuratur syllaba, quae ut dictum est, indivisibilis est. In hoc autem quod dicitur, talis syllaba brevis est vel longa, non est intelligendum quod talis brevis vel longitudo pertinet ad tempus continuum, ita videlicet quod oratio sit aggregata ex multis temporibus continuis: alioquin non esset alia species a tempore: partes enim temporis non faciunt aliam speciem a tempore. Sed indivisibili durationi syllabae aliquando coexistit tempus

continuum, seu simul cum eo existit: quod tempus aliquando est breve, et aliquando longum: unde tempus continuum est mensura successivorum quae sunt in motu. Syllabae vero existunt in quodam indivisibili, et sine motu, licet sint cum mutatione et successione, sub aliqua tamen mensura, ut dictum est. Unde mensura quae est tempus, et mensura quae est ipsius syllabae, licet sint diversae mensurae durationum seu durabilium, tamen possunt simul existere. Et sic syllaba dicitur brevis vel longa, non ex longitudo vel brevitate continua quae sit in ea, cum ipsa sit indivisibilis; sed ex longitudo et brevitate temporis continui, quod ei coexistit. Aliqui tamen dicunt, quod licet syllabae non sint motus, tamen fiunt per motum. Cum autem omnis motus mesuretur tempore continuo, propter hoc syllabae dicuntur longae vel breves, ex longitudo vel brevitate temporis continui mesurantis motus per quos syllabae fiunt. Alii dicunt aliter de oratione. Secundum enim eos cum numerus causetur ex divisione continui, et nihil addat supra continuum nisi divisionem in qua quodlibet est indivisum, et tamen est alia species quantitatis quam continua; ita accidit de oratione respectu temporis: nam oratio est multa tempora divisa, quorum quodlibet est indivisum; et tamen est alia species a tempore. Et sic patet de quantitate discreta etc.

## CAPUT III.

*De quantitate continua in communi secundum logicam intensionem.*

Continua vero quantitas est cuius partes ad unum communem terminum copulantur. Notandum, quod aliqui sic intelligunt hoc, scilicet quod partes continui copulentur ad unum terminum communem: nam partes lineae terminantur ad unum punctum quae actu eam terminat, non ad punctum in potentia: similiter superficiei partes copulantur ad lineam quae actu eam terminat, et partes corporis ad superficiem terminantem illud. Ad quod intelligendum, sciendum est, quod nos debemus imaginari punctum, quod est indivisibile in linea, moveri, et motu suo causare lineam, et lineam motam causare superficiem, et superficiem motam causare corpus, et Nunc motum causare tempus. Quibus sic causatis et imaginatis, licet non ita sit realiter, intelligimus praedictam definitionem: si enim punctus motus causat lineam, omnes partes lineae per punctum copulantur. Et quia in qualibet parte lineae est imaginari secundum istam viam punctum ad quem se continue habet alia particula sine alia decisione, ideo dicitur linea esse continua. Eodem modo se habet de superficie respectu lineae, a qua mota, ut dictum est, imaginamur eam causari: nam partes ejus per lineam et ad lineam continuantur: similiter etiam se habet de corpore respectu superficiei. Et quia locus superficiei quaedam est, eodem modo habet terminum communem suarum particularum, sicut superficies. Sciendum tamen est, quod Philosophus libro Praedicamentorum dicit, quod partes loci copulantur ad eundem terminum ad quem copulantur partes corporis: quod non bene intelligitur, si locus est superficies corporis continentis. Cum enim terminus communis partium corporis sit superficies, sequitur quod terminus loci

(1) *Al.* fuit.(2) *Al.* sed etiam.



sit superficies; et sic superficies erit terminus superficiei. Ubi nota, quod locus potest dupliciter considerari. Uno modo, pro superficie corporis continentis; et tunc terminus partium ejus dicitur linea, ut dictum est: alio modo sumitur locus pro toto corpore locante, sicut aer dicitur esse locus aquae, et ignis locus aeris; et isto modo dicit Philosophus, quod partes loci copulantur ad eundem terminum ad quem copulentur partes corporis. Partes autem temporis copulantur ad Nunc. Et sic patet de definitione quantitatis continuae.

#### CAPUT IV.

*De quantitate habente positionem,  
et de requisitis ad ipsam.*

Habet autem quantitas continua positionem, licet non omnis. Notandum, quod positio idem est quod ordo partium in loco, et haec est unum de decem praedicamentis, quae etiam dicitur situs, de quo infra dicetur. Alio modo dicitur positio ordo partium in toto: et sic positio est differentia quantitatis. Ad hoc autem quod quantitas habeat positionem, requiruntur tria. Primo, quod habeat partes suas continuas signabiles, et non signatas. Secundo quod secundum hanc signabilitatem habeat partes inter se ordinatas, unam videlicet post aliam. Tertio quod partes illae habeant permanentiam. Ratione primi, numerus qui habet partes suas non signabiles sed signatas, quantumcumque habeat eas ordinatas, puta duo post unum, et tria post duo, et sic de aliis, non habet positionem. Ratione tertii, licet tempus habeat partes continuas signabiles et non signatas et ordinatas; quia tamen non habet eas permanentes, ideo non habent inter se positionem. Oratio vero partes suas neque continuas habet, nec etiam permanentes, ut dictum est: ideo non habet positionem in partibus suis. Species ergo quantitatis habentes positionem, sunt linea, superficies, corpus, locus. Et licet punctus non sit quantitas, quia est quid indivisibile, et principium quantitatis quia est principium lineae; quia tamen habet ordinem ad partes lineae, dicitur habere positionem: nam communiter dicitur, punctus est indivisibile habens positionem, cum sit finis prioris partis, et initium posterioris. Unitas vero est indivisibile, non habens positionem: et sic patet quae quantitas habet positionem, et quae non.

#### CAPUT V.

*De speciebus quantitatis continuae;  
et primo de linea.*

Nunc dicendum est de praedictis speciebus quantitatis continuae; et primo de linea. Est autem linea longitudo sine latitudine et profunditate, cujus extrema sunt duo puncta. Ad quod intelligendum, sciendum est, quod cum quantitas sit mensura sive extensio substantiae, ut supra dictum est, substantia corporea in quantum hujusmodi (1), tripliciter mensurari seu extendi potest, secundum quod tripliciter diametri in angulis rectis possunt se intersecare, et non pluries: si enim unus diameter

debet intersecare alium in angulis rectis, oportet quod sit ad modum crucis sic.



Ubi sunt duo anguli recti ex parte superiori, et duo ex parte inferiori. Dicitur autem angulus rectus, qui causatur ex ductu lineae perpendiculariter cadentis super lineam rectam sic. Unde si talis linea cadit in medio, causat duos angulos rectos, ut dictum est. Habemus ergo duos diametros, se in angulis rectis in cruce supposita intersecantes. Si vero tertius diameter debet praedictos duos diametros intersecare in angulis rectis, oportet quod transeat per punctum ubi quatuor anguli recti junguntur. Nec potest quartus diameter praedictos tres diametros intersecare, quin causet angulum re-

ctum. Unus ergo diameter dictarum trium dicitur longitudo, secundus latitudo, tertius vero profunditas, quae dicuntur tres dimensiones. Unde si consideretur longitudo sine aliis duabus dimensionibus, dicitur linea. Extrema vero lineae, si habet extrema, quod dico propter lineam circularem, quae non habet extrema, sunt duo puncta: terminant enim lineam ad indivisibile secundum illam dimensionem. Si enim semper esset dare divisibile secundum illam dimensionem, cum hujusmodi dimensio sit linea, ut dictum est, tunc linea nunquam terminaretur. Superficies vero continet duas dimensiones de praedictis, scilicet longitudinem et latitudinem, cujus extrema sunt duae lineae, vel una: quod dico propter superficiem circularem, quae una linea terminatur. Sicut enim dictum est, ad hoc quod linea terminetur ad indivisibile secundum illam dimensionem, sic oportet quod superficies terminetur ad indivisibile secundum latitudinem, et haec est linea. Corpus autem continet omnes praedictas tres dimensiones, seu ipsum corpus est ipsa trina dimensio, sicut superficies est duplex dimensio, et linea una. Terminatur autem corpus ad superficiem quae indivisibilis est secundum profunditatem, vel ad lineam quae indivisibilis est secundum latitudinem. Notandum, quod licet corpus sit trina dimensio, scilicet longitudo, latitudo et profunditas; tamen ratio corporis perficitur ex sola profunditate. Similiter etiam licet superficies contineat duas dimensiones, scilicet longitudinem et latitudinem; tamen ratio ejus specifica completur ex sola latitudine: sicut ratio specifica hominis completur ex rationali, quamvis homo sit sensibilis et vivus. Ratio vero bruti ex sensibili completur, licet etiam cum hoc sit vivum. Lineae vero ratio specifica perficitur ex sola longitudo. Et quia quantitas continua hoc habet quod semper sit divisibilis; si corpus in quantum corpus terminari debet ad indivisibile, terminabitur ad superficiem, quae licet sit divisibilis, non tamen secundum profunditatem in qua consistit ratio specifica corporis, ut dictum est: et similiter de superficie respectu lineae. Et sic patet de tribus speciebus quantitatis continuae.

(1) *At. in quantum hujus.*



## CAPUT VI.

*De loco, qui est species quantitatis continuæ.*

Sequitur de loco. Est autem locus superficies corporis continentis immobilis. Licet enim locus sit superficies, non tamen sequitur quod locus sit in genere superficiei; sed est aliud genus quantitatis propter aliam differentiam specificam superadditam, quæ non convenit superficiei in quantum superficies est, nec sibi disconvenit, scilicet immobilis. Sciendum, quod cum non sit dare vacuum in natura, oportet omne corpus alio corpore circumdari. Dimittamus modo de ultima sphaera. Unde superficies corporis circumdantis illam, quæ contigua est corpori circumdato, dicitur esse locus. Nec propter hoc talis superficies dicitur locus, quia circumdat; alioquin navis quæ vadit cum flumine, cum semper sit circumdata superficie ejusdem aquæ, eo quod ipsa semper descendit sicut aqua descendit, diceretur esse in eodem loco, quod tamen falsum est: similiter etiam navis ligata ad ripam fluminis, cum propter fluxum aquæ semper mutet superficiem, tunc semper mutaret locum: quod etiam falsum est. Non ergo ratio loci est ratio superficiei, nec e converso; sed ratio loci consistit in hoc quod est immobilis, scilicet secundum situm universi. Unde dato quod mundus esset vacuus, et esset solum caelum continens vacuum, et unus lapis esset in centro, quantumcumque non circumdaretur superficie corporis continentis, tamen adhuc esset in loco, quia esset in parte, quæ per respectum ad situm universi, seu caeli, esset immobilis. Et sic patet de loco.

## CAPUT VII.

*De tempore, quomodo est quantitas successiva.*

Tempus autem est numerus motus primi mobilis secundum prius et posterius. Ad intelligendum autem prædictam definitionem, sciendum quod duplex est numerus: scilicet quo numeramus, ut duo, tria et hujusmodi; et ista est prima species quantitatis discretæ, de qua dictum est. Alius est numerus numeratus, scilicet istæ res, quibus nos istum numerum applicamus in quantum numerantur, ut duo canes, vel tres lineæ; et isto modo sumitur hic numerus. Sciendum quod in omni motu est quantitas successiva faciens ipsum formaliter quantum quantitate successiva, quæ quantitas successiva non est motus, sed accidens ejus. Motus autem primi mobilis, scilicet ultimi caeli, quia est regularissimus et simplicissimus omnium motuum, ideo quantitas ejus successiva est regularissima et simplicissima omnium aliarum quantitatum successiva. Et ideo applicando illam ad omnes alios motus, qui ut dictum est, successivi sunt, certificamur de duratione ipsorum; et hoc est mensurari, ut supra dictum est. Quia vero anima in illa successione motus primi mobilis, considerat prius et posterius, illa successio sic numerata vel mensurata ab anima per prius et posterius dicitur esse tempus: sicut diem vocamus successionem unius partis motus primi mobilis, prout scilicet partes ejus moventur ab oriente in occidentem. Unde tale prius in successione, prout scilicet pars primi mobilis movebatur in oriente, et tale posterius, prout scilicet

pars movebatur in occidente, considerata ab anima faciunt dictum tempus, puta diem, et sic de aliis; et hoc tempus, ut dictum est, applicando ad omnia successiva, de eis certificamur quantum ad ipsorum durationem in tali successione. Patet ergo qualiter tempus est numerus motus secundum prius et posterius. Notandum, quod quia, ut dictum est, tempus est subjective in motu primi mobilis, sicut est passio in suo subjecto; secundum ea quæ sunt in illo motu, dicimus aliqua esse in tempore. Unde in motu est considerare mobile, et indivisibile ipsius motus, quod dicitur mutatum esse, quod se habet ad motum sicut punctus ad lineam. Et sicut in qualibet parte lineæ est imaginari punctum, sic in qualibet parte motus est considerare mutatum esse: omnis enim motus si terminabilis est, terminatur ad mutatum esse sicut ad terminum intraneum, sicut linea ad punctum. Unde illi motui respondet tempus dupliciter: quia et sicut ejus passio, quia est successio ejus, ut dictum est; et sicut ejus mensura: non enim tempus solum mensurat alios motus, sed etiam partes motus primi mobilis: dicimus enim quod una circulatio facta est in una die. Ipsi vero mutato esse, quod est indivisibile in motu, respondet in tempore nunc, quod est indivisibile temporis, vel est idem re, licet posset ratione differre: et in omni tempore est signare nunc, sicut in linea punctum; et si tempus terminaretur, utique ad nunc terminaretur. Patet ergo de tempore.

## CAPUT VIII.

*Quod quantitas non suscipit magis nec minus, nec habet contrarietatem; sed secundum eam (1) aliquid dicitur æquale vel inæquale alteri.*

Commune est autem omni quantitati, non suscipere magis et minus, nec suscipere contrarietatem. Quod qualiter intelligatur, supra de prædicamento substantiæ dictum est. Sciendum autem quod a Philosopho, lib. Prædicam., ponitur instantia de magno et parvo, quæ videntur esse in quantitate, et videntur esse contraria. Et respondet primo, quod magnum et parvum non sunt in genere quantitatis, licet sint passionem ipsius quantitatis; sed sunt in genere relationis: non enim magnum dicitur aliquid absolute: alioquin non diceretur milium magnum et mons parvus, nisi per respectum ad aliud milium, vel per respectum ad montem magnum. Secundo respondet, quod dato quod magnum et parvum essent in genere quantitatis, non tamen essent contraria: idem enim non potest esse contrarium sibiipsi: et tamen una et eadem quantitas dicitur magna per respectum ad minorem, et parva per respectum ad majorem. Proprium autem quantitatis est secundum eam æquale vel inæquale dici. Ad quod intelligendum, sciendum est quod quantitas dupliciter potest sumi. Uno modo pro magnitudine molis; alio modo pro magnitudine perfectionis. Primo modo quantitas pertinet ad hoc prædicamentum, quia ista est prior et notior acceptio quantitatis. Secundo modo quantitas est de transcendentibus, quia in multis generibus invenitur, sicut et perfectum: dicimus enim, iste est magnus medicus, idest perfectus: et, ista est magna simili-

(1) *Al.* secundum esse.

tudo; et secundum quantitatem utroque modo sumptam dicitur aequale et inaequale: dicimus enim duas lineas esse aequales, et duas albedines similiter. Et quia quantitas primo modo est notior et magis propria, secundo autem modo dicitur transumptive ab illa, ideo aequale vel inaequale dicitur proprie secundum quantitatem primo modo sumptam. Notandum, quod unum convertitur cum ente; et sic quicquid est ens, est unum. Cum autem substantia, quantitas et qualitas sint entia, oportet quodlibet eorum esse unum. Et cum in substantia, quantitate et qualitate possint esse plura entia, ergo in eis possunt esse plura quorum quodlibet est unum, quae sunt multa. In quolibet ergo istorum praedicamentorum est unum et multa. In uno autem in substantia fundatur relatio quae dicitur identitas; in uno vero in quantitate fundatur relatio quae dicitur aequalitas: in uno in qualitate, fundatur relatio quae dicitur similitudo; diversimode tamen. Nam unum dicitur tripliciter: scilicet unum numero, ut Socrates vel Plato: quilibet enim per se est unus numero; aliud est unum specie, ut Socrates et Plato sunt unum in homine; aliud est unum genere, ut homo et equus sunt unum in animali. Identitas autem quae fundatur in uno in substantia, non fundatur in uno in genere, nec in uno in specie, sed in uno numero, ac si essent duae substantiae. Unum vero numero est idem sibiipsi, prout nunc sumitur idem: licet etiam in substantia possit dici idem specie et idem genere, tamen non sic modo sumitur identitas: unde talis identitas non est relatio realis, sed rationis, ut infra dicetur. Aequale vero et simile, non fundatur in uno secundum numerum, quia nihil est aequale vel simile sibiipsi, sed fundatur in uno secundum speciem: nam duas lineas dicimus aequales, et duas albedines similes. Notandum quod aequale et simile sumuntur communiter, scilicet pro utroque fundamento aequalitatis, et utroque ejus termino: aequalitas enim est duorum, unius fundamentaliter, et alterius ut termini, et e converso: similitudo autem est multa (1) terminis: nam ad similitudinem sufficit participatio qualitatis secundum eandem speciem: quae enim sunt alba, sunt similia, et quae participant diversas qualitates quantum ad speciem, sunt dissimilia, ut album et nigrum. Non est autem sic de aequalitate: non enim sufficit ad aequalitatem, quod sint duae quantitates ejusdem speciei: alioquin omnes lineae quae sunt ejusdem speciei, essent aequales, quod tamen falsum est; sed requiritur, quod sint duae quantitates ejusdem speciei cum privatione majoris et minoris, ut scilicet una omnino non sit major, nec minor altera. Inaequale vero non sumitur secundum diversas species quantitatis, ut dictum est de simili in qualitate, sed in eis quae sunt ejusdem speciei sine privatione majoris et minoris. Et sic patet quid sit idem, quid aequale, quid simile. Sciendum quod licet fundamentum identitatis sit substantia, ut dictum est, tamen potest dici de aliis praedicamentis, et in eis fundari: dicimus enim quod haec albedo est eadem sibiipsi, et haec linea est eadem sibiipsi. Et ideo non est proprium substantiae secundum eam dici idem vel diversum, cum haec convenient aliis praedicamentis, licet conveniat substantiae principaliter. Proprium autem quantitatis est secundum eam dici aequale vel

inaequale, quia nihil dicitur aequale vel inaequale nisi secundum quantitatem. Proprium vero qualitatis est secundum eam dici simile vel dissimile. Et sic patet de praedicamento quantitatis.

## TRACTATUS IV.

### DE PRAEDICAMENTO QUALITATIS.

#### CAPUT I.

##### *Quid sit qualitas in genere.*

Nunc dicendum est de praedicamento qualitatis. Describitur autem qualitas sic: Qualitas est secundum quam quales dicimur. Sciendum quod praedicamenta definiri non possunt. Cum enim in definitione ponatur genus et differentia definiti; genera autem generalissima, ejusmodi sunt substantia, quantitas, qualitas et hujusmodi, non habeant genus supra se, ut supra dictum est; ergo definiri non possunt. Possunt autem per aliqua nobis magis nota describi seu notificari. Notandum (1), quod ut ex supradictis colligi potest, intellectus noster non solum abstrahit universale a particularibus, sed etiam formam ab habente talem formam: intelligit enim humanitatem praecise non intelligendo cum ea habentem humanitatem, scilicet hominem, in quo non solum est humanitas, sed etiam multa alia entia, scilicet albedo, et hujusmodi: eodem modo intelligit albedinem abstrahendo ab habente ipsam, quod vocamus album. Unde licet albedo non inveniatur sine subjecto, tamen intellectus eam intelligit abstrahendo a subjecto, eo videlicet non intellecto; et secundum hoc magis pertinet ad intellectum accidens in abstracto, quam in concreto. Et quia cognitio nostra ortum habet a sensu; minus sensibilia sunt nobis minus nota. Abstracta autem, ut dictum est, sunt minus sensibilia. Ergo convenienter notificantur per concreta, sicut per prius nota. Bene ergo data fuit notificatio qualitatis, quae est abstracta, per quale, quod est concretum, dicendo: Qualitas est secundum quam quales dicimur. Sciendum est, quod est differentia inter quantitatem et alia accidentia: nam in ea praedicatur concretum de abstracto: dicimus enim: Haec linea est quanta: quod non contingit in aliis praedicamentis accidentium: non enim potest dici quod haec albedo est qualis. Et inde est, quod quantitas in abstracto non definitur seu describitur per concretum. Si enim unum de alio praedicatur conversim, ita erit male notum unum sicut reliquum. Et sic patet de descriptione qualitatis.

#### CAPUT II.

##### *De prima specie qualitatis quae est habitus et dispositio.*

Sunt autem quatuor species qualitatis, quae sunt genera subalterna. Prima est habitus, seu dispositio. Ubi sciendum est, quod dispositio est genus ad habitum. Omnis enim habitus est dispositio, non

(1) Forte unita.

(1) Al. notificandum.

tamen omnis dispositio est habitus: nam qualitas facile mobilis est dispositio, non tamen est habitus. Unde si sumatur dispositio pro qualitate quae est facile mobilis, tunc est una species qualitatis condivisa habitui; si vero sumatur dispositio prout dicitur tam de qualitate facile mobili quam de difficile mobili, tunc est genus ad habitum et dispositionem, quae habitui condividitur. Definatur autem habitus § Metaph., sic: *Habitus est dispositio qua aliquis disponitur bene vel male, sive secundum se, sive ad aliud.* Ad quam definitionem intelligendam sciendum est, quod dispositio est ordo rei habentis partes: non solum partes quantitativas, sed etiam essentiales vel potentiales. Unde ordo istarum partium inter se vel ad aliquid aliud, dicitur dispositio. Ad rationem quidem habitus requiruntur plura, sive sint partes, sive potentiae vel actus, quae sunt ad invicem commensurabilia diversis modis, ita quod in eis possit inveniri aliquis modus medius commensurationis; et talis modus dicitur habitus. Verbi gratia: sanitas est debita commensuratio humorum diversimode ad invicem commensurabilium, quae tamen reducuntur ad sanitatem, sicut ad determinatum modum commensurationis; et ideo sanitas est habitus. Nam quia qualitates elementales in ipsis elementatis secundum unum modum mensurantur, et non diversimode, ideo in eis non est habitus. Bene ergo dicitur quod habitus est dispositio seu ordo partium diversimode commensurabilium bene vel male, idest, secundum modum medium determinatum. Sed quia dicitur sive secundum se, sive ad aliquid aliud; sciendum quod duplex habitus invenitur. Unus dispositio rei secundum modum et naturam rei intra, prout partes naturales ad invicem secundum unum modum medium commensurantur, ut dictum est de sanitate, quae est debita commensuratio quatuor humorum: similiter pulchritudo, quae est debita commensuratio membrorum, est hoc quod dicitur in definitione habitus, scilicet secundum se. Alius modus habitus est, qui est dispositio rei in ordine ad finem. Et quia finis potentiarum sunt operationes, medius modus determinatur secundum quod ad suas operationes bene vel male ordinantur, sicut sunt virtutes et vitia. Et propter hoc in definitione habitus dicitur « sive ad aliud » scilicet ad finem. Et tales habitus sunt difficile mobiles: quia enim habitus virtuosus ex multis actibus iteratis generatur, ideo non est ita de facili mobilis. Qui vero ex paucis actibus inciperet vel disponi vel habituari ad virtutem, ille diceretur habere dispositionem quae facile mobilis est, loquendo de dispositione non prout est genus ad habitum, sed ut est species sibi condivisa. Et sic patet de prima specie qualitatis etc.

### CAPUT III.

*De secunda specie qualitatis, quae est naturalis potentia vel impotentia.*

Secunda species qualitatis est naturalis potentia vel impotentia, aliquid facile faciendi vel patiendi. Ad intelligendum autem hanc speciem qualitatis, sciendum quod potentia potest sumi dupliciter. Uno modo, ut est de transcendentibus: potentia enim et actus dividunt omne ens, ut patet § Metaphysicorum: et in eo genere in quo est actus, est etiam potentia:

nam si linea in actu est in genere quantitatis, sic et linea in potentia est in eodem genere. De tali autem potentia non loquimur modo. Alio modo sumitur potentia, prout est principium transmutandi aliud in quantum aliud; vel quod est principium transmutandi ab alio, in quantum aliud. Notandum, quod sicut agens artificiale requirit instrumentum per quod agat, et propter limitationem suae virtutis non potest habere simul illud quod est in ipso et in instrumento necessarium ad agendum, ita et nulla substantia creata potest esse per se sufficiens principium ad agendum et essendum: unde requiritur aliud principium in ea, quod immediate se habeat ad operationem: et hoc principium dicimus potentiam. Quod quidem si activum est, sicut sunt potentiae nutritivae in animato, dicitur potentia activa, quae est principium transmutandi aliud in quantum est aliud. Et dico « in quantum aliud », quia nihil simul potest esse activum et passivum respectu ejusdem. Unde si potentia activa est principium transmutandi, non erit principium transmutandi se, sed aliud in quantum aliud. Si vero tale principium sit passivum, ut sunt potentiae sensitivae in animali, tunc est principium transmutandi ab alio in quantum est aliud: et ad hanc speciem qualitatis pertinet durum et molle, pugillator et cursor et hujusmodi. Ita quod non sumitur pugillator ab arte pugillandi, quia sic esset in prima specie qualitatis, sed pro potentia naturali. Et sic patet de secunda specie qualitatis.

### CAPUT IV.

*De tertia specie qualitatis, quae est passio vel passibilis qualitas.*

Tertia vero species qualitatis dicitur passio vel passibilis qualitas. Notandum, quod passio, ut est in motu, est unum de decem praedicamentis, et sic non sumitur hic passio. Sed dicitur passio vel passibilis qualitas, quia infertur per aliquam passionem primo modo sumptam, vel quia infert aliquam passionem. Verbi gratia: calor et frigus dicuntur passibiles qualitates, eo quod inferunt sensui tactus aliquam passionem; sed albedo et nigredo dicuntur passibiles qualitates, quia generantur ex aliquibus passionibus illatis: propter enim magnum aestum agentem in corpora Aethiopum, Aethiopes sunt nigri, Germani sunt albi propter frigus. Licet etiam albedo et nigredo possint dici passibiles qualitates, eo quod inferunt passionem sensui visus: videre enim est quoddam pati. Ubi nota, quod licet quaedam entia absoluta non habeant speciem ab aliquo extrinseco, quod non est de essentia eorum, et quod distinguantur se ipsis, ut patet in simplicibus (albedo enim se ipsa distinguitur realiter a nigredine, vel ab aliqua parte intrinseca sui, sicut homo distinguitur ab equo, et e contrario, per formas eorum: nihil enim extrinsecum quod non est de essentia rei (1) constituit vel distinguit aliud ab alio specificè); tamen nihil prohibet, quin aliquando aliqua distinguantur causis extrinsecis, scilicet finali et efficiente: sicut dicimus, quod potentiae distinguuntur per actus tamquam per fines, et actus distinguuntur per objecta, tamquam per causas efficientes. Et licet hoc modo

(1) *Al.* nota est de essentia rei.



extrinseca distinguuntur non sint de essentia distinctorum, tamen per tales distinctiones cognoscitur ratio specifica eorum: per actus enim definitur potentia, quia est principium transmutandi, ut dictum est, sicut per manifestationem suae rationis specificae; et per objecta definiuntur actus, sicut dicimus quod videre est visum moveri a colore. Sic est in proposito. Licet enim passio et passibilis qualitas, ut formae simplices, se ipsis sint in esse specifico; tamen quaedam definiuntur per actus sicut per fines, quia scilicet habent causare passionem in sensu: quandoque vero per causas efficientes, quia scilicet habent causari ex passionibus. Differunt autem passio et passibilis qualitas, quia passio cito transit; sicut rubedo quae fit ex verecundia, et palliditas quae fit ex timore, dicuntur passiones, quia cito transeunt: nec per talem rubedinem vel palliditatem in lingua graeca denominantur rubei vel pallidi, licet forte non sic in lingua nostra, sed pro nunc denominatur verecundans rubeus, et timens pallidus. Et quia ira, amor et odium et huiusmodi, quae omnia Philosophus 2 Ethic., passiones vocat, fiunt cum aliqua passione et transmutatione corporis, et parum durant; sub istis passionibus computantur. Passibilis vero qualitas dicitur quae non cito transit, sicut dictum est de frigore et calore. Si vero ira, amor, odium et haec quae hic Philosophus passiones secundum animam vocat, diu durarent, passibiles qualitates dicerentur.

## CAPUT V.

*De quarta specie qualitatis, quae est forma, vel circa aliquid constans figura.*

Quarta vero species qualitatis est forma, vel circa aliquid constans figura. Sciendum, quod forma potest sumi dupliciter. Uno modo ut est actus quidam, et sic est de transcendentibus, quia in pluribus praedicamentis invenitur; ideo etiam forma est de transcendentibus, quia invenitur in praedicamento substantiae, quantitatis et qualitatis et huiusmodi. Et isto modo non sumitur forma hic. Ad videndum quid importatur hic per formam, primo videamus de figura, quae est nobis magis nota. Unde sciendum, quod, ut supra dictum est, proprium totius praedicamenti quantitatis est secundum eam aequale vel inaequale dici: unde ipsa primo vel secundo omnis res quanta est. Ratio est, quia illud dicitur esse proprium alienius, quod immediate causatur a principiis suae essentiae. Sed positus duabus quantitibus ejusdem speciei, statim sequitur quod sunt aequales vel inaequales, hoc statim sequitur tamquam immediate causatum ex principiis essentialibus quantitatis. Ergo aequale et inaequale quantumcumque sint in genere relationis, tamen sunt proprium quantitatis. Sic ergo se habet figura respectu quantitatis continuae habentis positionem, eujusmodi sunt linea, superficies et corpus et locus. Nam ad lineam sequitur rectum vel curvum. Ad superficiem sequitur triangulare et quadrangulare et huiusmodi: ad corpus sequitur pyramidale, cubicum et huiusmodi: ad locum materialiter sumptum sequitur variatio figurae secundum variationem contenti. Omnia autem praedicta figurae sunt, quae sunt in quarta specie qualitatis: non enim figura est quantitas, sed qualitas immediate causata a praedictis speciebus quantitatis. Et inde est quod figura ma-

gis ducit nos in cognitionem substantiae tam individualis quam specificae, quam aliquod aliud accidens, Quantitas autem licet sit fundamentum aliorum accidentium, tamen sequitur materiam. Et quia materia de se non est causa cognitionis, sed sola forma; ideo quantitas non bene ducit nos in cognitionem substantiae in qua est. Sed quia figura est tamquam quid formale, et forma absolute se habet immediate ad quantitatem, a qua non potest absolvi quantitas, ut dictum est; quod non est sic de aliis speciebus quantitatis; ideo figura perfectius ducit in cognitionem substantiae: ut clare patet de figuris animalium vel hominum sculptis. Et sic patet de figura. Forma autem, ut hic sumitur, differt a figura, licet ad idem genus reducantur: figura enim, ut dictum est, sequitur quantitatem continuam habentem positionem; forma vero sequitur animam habentem aliqua sacramenta: character enim impressus est in essentia animae ex receptione aliquorum sacramentorum, quod est signum distinctionum inter habentes illud sacramentum et non habentes; sic forma quae est in quarta specie qualitatis, non posset dici figura, quia ibi non est quantitas continua: licet aliqui dicant, quod omnis figura etiam forma dici possit, et quod sint sicut synonyma.

## CAPUT VI.

*De qualitate et conditionibus ejusdem ex tribus modis ejus.*

Quale autem sumitur a qualitate. Ad quod intelligendum sciendum est, quod omnium praedicamentorum duplex est modus intelligendi vel significandi: scilicet abstractus et concretus. Omne enim quod intelligimus vel cognoscimus ut quo est, est habitum: vel ut quod est, est habens: humanitas enim intelligitur ut quo est aliquid; humanitate enim homo est homo: similiter se habet de albedine: albedine enim aliquid est album. Homo vero et album intelligitur ut quod est, et ut habens humanitatem, et ut habens albedinem. Describitur autem quale sic. Quale est, quod secundum qualitatem denominatur. Secundum enim logicum, album denominatur ab albedine, et non e converso: nam vere denominativa tria debent habere. Primo quod convenient in voce cum eo a quo denominantur, scilicet in principio. Secundo quod differant in fine. Tertio quod idem significant; unum tamen ut quo aliquid est, et alterum, ut quod est, et ut habens; sicut se habet de albedine et albo. Convenient enim albedo et album in principio quantum ad vocem, et differunt in fine vocis, et significant idem, licet diversis modis. Sciendum quod quaedam sunt qualia, quae omnia ista tria perfecte habent, ut album: quaedam vero sunt qualia, quae differunt ab his a quibus denominantur, in significatione, sicut cursor et pugillator, prout sunt in secunda specie qualitatis: cursor enim et pugillator denominantur ab arte currendi et pugillandi, et non a potentia, quia non est nomen impositum tali potentiae. Vel dicuntur denominative a cursu et pugna, quae non sunt in secunda specie qualitatis, et ideo non convenient in significatione in significatione cum his a quibus denominantur. Aliqua vero qualia dicuntur denominativa, quae cum his a quibus denominantur, nullo modo con-



veniunt, nec in voce, nec in principio, nec in fine, nec in significatione, ut a virtute dicitur studiosus. Et sic praedieti duo ultimi modi qualis, diminute dicuntur, quia non dicuntur perfecte denominative. Et sic patet de qualitate.

## CAPUT VII.

*De communitatibus et proprietatibus qualitatis.*

Inest autem qualitati contrarietas, licet non omni. Quod qualiter intelligatur dictum est in praedicamento substantiae. Dicit autem Philosophus, quod dubitatur utrum qualitas suscipiat magis et minus, non autem dubitatur de quali: nam dubitatur utrum iustitia sit magis vel minus, non autem utrum justus, quia dicitur justior, seu magis justus: quod qualiter intelligatur, ibidem dictum est. Proprium vero qualitatis est secundum eam simile vel dissimile dici, quod in praedicamento quantitatis declaratum est. Et sic patet de praedicamento qualitatis.

**TRACTATUS V.**

## DE PRAEDICAMENTO AD ALIQUID.

## CAPUT I.

*Quid sit Ad aliquid secundum intentionem logicam.*

Dicto de praedicamentis absolutis, dicendum est de respectivis: et primo de relatione. Notandum, quod quia relatio parum habet de entitate: ideo de ipsa non tractat Philosophus, sed solum de relativis, quae propter concretionem magis a nobis possunt cognosci: vocat enim relativa Ad aliquid, et definit ea sic: Ad aliquid talia dicuntur, quaecumque hoc ipsum quod sunt, aliorum dicuntur, vel quomodolibet aliter ad aliud. Ad intelligentiam huius definitionis sciendum, quod quaedam sunt relativa secundum dici, quaedam secundum esse: quaedam sunt relativa realia, quaedam vero secundum rationem. Relativa secundum dici ea dicuntur, quae de suo principali significato dicunt rem alterius praedicamenti, secundo autem dicunt relationem, seu dicunt respectum: sicut scientia de suo principali significato dicit habitum animae, et sic est in prima specie qualitatis; secundo autem dicit respectum ad scibile, et sensus ad sensibile, quae est quaedam potentia in secunda specie qualitatis, et talia sunt relativa secundum dici. Relativa vero secundum esse sunt quae de suo principali significato significant respectum ad alium. Relativa realia sunt quae habent referri realiter, circumscripto omni actu intellectus, ut pater et filius: circumscripto enim omni actu intellectus, pater refertur ad filium, et filius ad patrem; quia realiter pater genuit filium, et filius a patre fuit genitus. Notandum quod ad hoc ut relatio sit realis, quinque requiruntur: duo ex parte subjecti, duo ex parte termini, et unum ex parte relatorum. Primum ex parte subjecti est, quod relatio supponat aliquod fundamentum reale in eo cuius est ut subjecti: unde non entis non potest esse relatio

*S. Th. Opera omnia. V. 17.*

realis. Secundum ex parte subjecti est, quod in eo sit ratio fundamentalis quare refertur: ut videlicet illud secundum quod dicitur referri, includat aliquid reale, sicut movens in eo quod movet, includit potentiam activam secundum quam potest agere. Unde propter defectum huius conditionis res intellecta non refertur realiter ad intelligentem, quia res intellecta in eo quod huiusmodi (1) denominatur ab actu intelligendi, qui nihil secundum rem ponit in re intellecta, sed solum in intelligente. Tertium quod requiritur, et est primum ex parte termini, est, quod terminus ad quem est relatio, sit res quaedam. Quartum est, quod terminus sit diversus realiter ab alio correlativo, quia ejusdem ad se ipsum non est relatio realis. Quintum autem, quod requiritur (2) ex parte correlativorum est quod sint ejusdem ordinis; ita videlicet quod ambo sint limitata ad genus et speciem, vel ambo sint extra genus, ita quod ex aequo respondeat eis ratio generis aut speciei. Quaecumque autem harum conditionum non existente in quocumque relativo, non erit relativum reale, sed secundum rationem. Unde Dei ad creaturam non est relatio realis, quia quicquid est in Deo, non est in genere relationis. Unde licet Deus realiter sit Dominus creaturae, et creatura realiter serva, tamen Dominus non est in Deo relativum reale, quia illud dominium non est in genere relationis ex aequo ut opposita species servituti creaturae correspondens. De aliis quatuor conditionibus jam exemplificatum est. Notandum quod dominium ex parte Dei est quid infinitum, cui non adaequatur ut possit correspondere servitus creaturae quae est finita. Infinitum non correspondet finito, quia plus habet. Dominium ergo Dei est relatio rationis, servitus vero creaturae est relatio realis. Ex his patet descriptio relativorum supra posita: nam ipsa comprehendit omnia relativa, tam secundum dici quam secundum esse, tam relativa realia quam relativa rationis: omnia namque dicuntur ad alia, scilicet ad correlativa, vel in habitudine casus genitivi, propter quod dicit « aliorum » dicuntur », ut pater filii pater, sive quomodolibet aliter, id est, in habitudine eujuscumque casus, sive dativi (3), ut similis simili similis, sive accusativi, ut majus minore majus. Et sic patet prima definitio.

## CAPUT II.

*De secunda definitione relativorum, quae convenit relativis secundum esse, et realibus.*

Definitur secundo Ad aliquid sic. Ad aliquid sunt, quibus hoc ipsum est esse, ad aliud quodammodo se habere. Haec definitio convenit solum relativis secundum esse, et realibus; eorum namque esse est ad aliud se habere. Notandum, quod ad constitutionem relationis duo requiruntur: unum ut fundamentum, aliud ut terminus: sine quibus relatio non solum non posset esse, sed etiam non posset intelligi. Verbi gratia, similitudo requirit duo alia realia, quorum unum est fundamentum, alterum terminus: similitudo enim Socratis albi ad

(1) *Al.* in eo quod huius.

(2) *Al.* quod ratio.

(3) *Al.* sive dicti.

Platonem album, in albedine Socratis est ut in fundamento, in albedine vero Platonis est ut in termino. E converso se habet de similitudine Platonis ad Socratem: semper enim in duobus similibus sunt duae similitudines: una unius ut fundamentum, et alterius ut terminus; et alia est e converso. Cum autem dico, quod similitudo Socratis habet albedinem ejus ut fundamentum, non est intelligendum quod similitudo Socratis sit aliqua res in Soerate alia ab ipsa albedine; sed solum est ipsa albedo, ut se habet ad albedinem Platonis ut ad terminum. Si enim similitudo adderet supra albedinem Socratis aliquam rem, nullo modo posset aliquis alicui fieri similis sine sui mutatione. Fit autem homo similis alicui sine sui mutatione, ut patet: nam si quis in India fieret modo albus, fieret similis mihi, et ego sibi, nulla in me facta mutatione: similitudo enim in me nullam rem addit supra albedinem, quae realiter sit in me, ut patet.

### CAPUT III.

*Quod relatio differt a suo fundamento realitate extrinseca solum.*

Sed hic oritur dubium. Cum enim decem praedicamenta sint decem genera rerum inter se realiter differentia: si relatio nullam rem addit supra fundamentum, ergo non erit alia res a fundamento, et sic non erit in alio genere similitudo quam albedo: quod omnino falsum est. Dicendum, quod divisio entis in decem praedicamenta est divisio in decem diversa secundum rem, vel quantum ad hoc quod dicant diversas res intrinsece et realiter, sicut substantia, quantitas et qualitas, quae comparata ad invicem, sunt diversae res: vel in quantum dicunt diversas res extrinsece, quia unum importat aliquam rem diversam, quam non importat reliquum; et sic relatio differt a suo fundamento, quia importat oppositum relativi: sicut enim dicimus quod totum differt a sua parte, non sicut res a re, sed sicut illud quod importat plus quam pars (homo enim differt ab anima, quia importat materiam, quam non importat anima): sic relatio differt a suo fundamento, quia relatio dicit rem fundamenti, et oppositum terminum quem (1) non dicit fundamentum. Ex his patet secunda definitio relativorum. Si enim verum esse relativorum in hoc consistit, scilicet quod importat aliquid ut fundamentum, et aliquid ultra, scilicet terminum; esse ergo eorum est ad aliud se habere.

### CAPUT IV.

*Quod entitas relativorum sumitur a fundamentis.*

Et quia entitas relativorum quasi tota est a fundamentis, ideo videndum est in quibus possit relatio fundari. Notandum, quod ut communiter dicitur, relativa fundantur in tribus: scilicet in actione et passione, in mensura et mensurato, et in uno. Nihil tamen obstat quin relatio non possit fundari immediate in substantia, cum materia secundum suam essentiam non per aliquid sibi additum referatur ad formam, et creatura similiter ad creatorem. Sed communiter relatio in tribus prae-

dictis fundatur. Fundamentum enim paternitatis est actio, scilicet generatio qua quis genuit filium: et fundamentum filiationis est passio, scilicet generatio passiva, qua quis genitus est: et similiter se habet de domino et servo. Duplum vero et dimidium, et triplum et subtriplum et hujusmodi fundantur in mensura et mensurato: similiter et relatio quae est inter sensum et sensibile, et scientiam et scibile, fundatur super mensura et mensurato: scibile enim ad scientiam, et sensibile ad sensum, se habent ut mensura ad mensuratum. In uno vero in substantia fundatur identitas: in uno in quantitate aequalitas: in uno in qualitate, similitudo, ut supra dictum est: unde secundum illa diversa fundamenta possunt sumi diversae species relativorum. Possunt et assignari aliter eorum species: scilicet superpositionem ut pater et dominus: sub positionem, ut filius et servus: et aequiparantiam, ut aequalis et similis etc.

### CAPUT V.

*De communitatibus et proprietatibus relativorum.*

Quae autem relativa suscipiunt magis et minus et contrarietatem et quae non: sciendum quod cum (1) relativa quorum fundamenta et termini suscipiunt magis et minus et contrarietatem, ipsa etiam suscipiunt magis et minus et contrarietatem: quorum vero fundamenta et termini non suscipiunt magis et minus nec contrarietatem, nec et ipsa suscipiunt. Notandum quod quaedam relativa quae fundantur in uno, quantumcumque non suscipiant ipsorum fundamenta magis nec minus, ipsa tamen suscipiunt magis vel minus, ut inaequalior, ut dictum est; et ita fundantur in uno secundum speciem, et cum hoc addatur cum privatione majoris et minoris. Et quia talis privatio non consistit in indivisibili, sed potest intendi et remitti, inde est quod aequale suscipit magis et minus, et sic de aliis. Dicuntur autem omnia relativa ad convertentiam, ut pater filii pater, et filius patris filius: et hoc convenit omnibus relativis. Nec oportet quod convertentia fiat semper in omnibus casibus similibus: dicitur enim scientia scibilis scientia, et scibile scientia scibile, et non dicitur scientiae. Ad hoc autem quod talis convertentia fiat, oportet quod fiat ad aliud, et secundum id nomen, secundum quod ad aliud dicitur: non enim dicitur secundum convertentiam caput ad animal: si enim dicitur caput animalis caput, non tamen potest dici animal capitis animal; quia non refertur caput ad animal, secundum hoc nomen quod est animal, sed secundum aliud nomen, scilicet capitatum: unde haec dicuntur ad convertentiam, caput capitati caput, et capitatum capite capitatum. Et ideo si aliquando tale nomen non invenitur, licet illud fingere; ut remus non dicitur navis remus; sed fingamus nomen, et dicamus remus rei remitae remus; et sic omnia relativa dicuntur ad convertentiam. Sunt autem omnia vera relativa simul natura: si enim esse relativi est ad aliud se habere, ut dictum est; posito uno relativo, statim ponitur suum correlativum; et ideo posita se ponunt, et perempta se perimunt. Proprium autem relativorum est, ut qui definite novit unum, definite noscat et reliquum. Si enim definitio est oratio quid est esse rei si-

(1) *Al.* quam.

(1) *Forte redundat cum.*

gnificans; ad esse autem unius relativi requiritur necessario correlativum; qui ergo cognoscit esse unius relativi, oportet quod cognoscat esse sui correlativi. Et sic patet de praedicamento ad aliquid etc.

---

## CAPUT UNICUM

### *De sex praedicamentis et eorum praedicatione in communi.*

Nunc dicendum est de aliis sex praedicamentis quae sex principia dicuntur. Notandum, quod quia praedicamenta sunt ordinationes praedicabilium, ut supra dictum est, ideo per praedicari seu denominare cognoscuntur. Dupliciter autem potest aliquid de alio praedicari denominative, sive illud denominare. Uno modo quod talis praedicatio seu denominatio fiat ab aliquo quod sit intrinsecum ei de quo fit talis praedicatio seu denominatio, quod videlicet ipsum perficiat sive per identitatem sive per inhaerentiam. Et hoc adhuc contingit dupliciter. Uno modo, quod talis denominatio fiat absolute et in se; et sic denominant tria praedicamenta absoluta, scilicet substantia, quantitas et qualitas: unde dicimus Socrates est substantia per identitatem, vel est quantus et qualis per inhaerentiam. Alio modo, quod talis denominatio sit ab intrinseco, importando tamen aliquid extrinsecum ut terminum, ad quem se habet illud quod denominatur; et isto modo denominat relatio, ut cum dicimus, Socrates est aequalis vel similis Platoni. Secundo modo fit denominatio ab extrinseco, scilicet ab eo quod non est in denominato formali, sed est aliquod absolutum extrinsecum, a quo fit talis denominatio: ut cum dicitur Socrates est agens, talis denominatio est ab ipsa forma fluente quae in passo acquiritur. Calor namque causatus in passo ad hoc quod denominet aliquid calidum, quae denominatio est intrinseca, nihil aliud requirit ut sic denominetur per ipsum, nisi subjectum in quo est. Sed ad hoc ut denominetur tale aliquid, puta calefaciens, de necessitate requirit aliam rem a subjecto, scilicet causam effectivam caloris, quia requirit passum in quo est talis calefactio. Similiter est etiam de loco qui est superficies quaedam; superficies enim ad hoc ut denominet illud cuius est superficies, non requirit nisi subjectum in quo est, scilicet corpus continens: sed ad hoc ut denominet aliquid sicut locus locatum, requirit aliud a subjecto superficiei: et isto modo denominant illa sex praedicamenta. Et talia sic denominantia denominatione extrinseca important aliam realitatem quam rem denominatam, quam non important alia praedicamenta quae intrinsece denominant, licet ipsae res a quibus accipitur talis denominatio sint eadem; et talis diversitas sufficit ad distinguendum praedicamenta. Et isto modo ista sex praedicamenta a primis quatuor distinguuntur, scilicet per res extrinsecas quas denominant, quod non faciunt illa quatuor. Sciendum est autem, quod denominatio ab extrinseco requirit aliquem per se respectum inter extrinsecum denominans et denominatum ab eo; quia oportet quod per se et ex conditione rerum talis modus denominandi consequatur res; et ideo oportet quod illud a quo fit talis denominatio, sit fundamentum per se alienius habitudinis. Et quia habitudo rerum non est per se fundamentum habitudinis, alioquin iretur in infi-

nitum; ideo talis denominatio non fit a respectu. Habere enim aliquid a se productum, quod pertinet ad actionem, dicit quemdam respectum, et habere locum, et sic de aliis. Ista tamen praedicamenta non dicunt hos respectus, quia iste respectus pertinet ad genus relationis; sed praedicta praedicamenta solum dicunt absolutum, ut denominans extrinsece: calefactio enim quae est actio, dicit calorem qui est forma absoluta, et denominat causam efficientem, scilicet calefacientem, et sic de aliis. Alii vero aliter dicunt. Secundum enim eos, respectus est de transcendentibus: et non omnis respectus est in genere relationis, sed dicitur respectus de septem praedicamentis, scilicet de relatione, et de sex principiis. Haec est autem differentia inter respectum qui est in relativis, et in sex principiis: nam in relativis omnis respectus coexistit in termino ad quem, alium respectum sibi correspondentem, et dico in veris relativis: sed in sex principiis respectus non requirit in termino ad quem aliquem respectum sibi correspondentem. Actio enim prout est unum de sex principiis, dicit respectum in motu ad agens: unde illud quod fit inter agens et patientem, scilicet motus, respectu agentis dicitur actio; respectu vero patientis dicitur passio. Tamen nec in agente nec in patiente est respectus ad motum praedictum, licet sit respectus agentis ad patientem, et e converso; qui respectus non sunt actio et passio, sed duae relationes, scilicet activi et passivi. Similiter etiam quando dicit respectum temporis ad rem temporalem, et sic de aliis, ut patet.

---

## CAPUT I.

### *Quid sit actio secundum rationem praedicamentalem, juxta utramque opinionem.*

Actio est forma secundum quam in id quod subicitur agere dicimur. Ad quod intelligendum sciendum, quod duplex est actio: una quae vocatur actio immanens, ut calere; alia quae dicitur transiens, ut calefacere. Actio immanens non est causa effectiva rei ut sit in actu, sed est idem quod esse in actu: calere enim idem est quod esse in actu caloris: et secundum talem actionem dicitur agere aliquid quod est formaliter tale, sicut calor facit seu agit formaliter calidum illud in quo est: calere enim comparatur ad calorem sicut actus secundus ad primum. Notandum quod actus primus et secundus potest dici tripliciter. Uno modo sic, quod actus primus sit forma aliqua, et actus secundus sit actio transiens, differens realiter ab ea; sicut se habet calor ignis, et ejus calefactio: et isto modo calere non est actus secundus caloris. Secundo modo dicitur actus primus forma quae subditur, et actus ei inhaerens dicitur actus secundus, ut sunt superficies et calor: nec etiam isto modo calere est actus secundus caloris. Tertio modo dicitur actus primus et secundus, secundum quod unus et idem actus potest accipi ut consideratur in se, et prout consideratur ut alienius habentis ipsum actualiter: sicut consideratur calor ut est quaedam forma in se: calere vero importat eandem formam in habitudine ad aliquid habens, quia calere est habere calorem vel esse in actu caloris. Similiter intelligere et sentire sunt actiones immanentes, quia dicunt actum intelligendi vel sentiendi esse actu in intelligente

vel sentiente. Haec autem actio immanens non est directe in praedicamento actionis, ideo de ipsa satis dictum sit. Secunda vero actio quae dicitur transiens, facit praedicamentum actionis. Notandum, quod ut habetur 5 Physicorum, actio et passio et motus sunt una et eadem res; unde calefactio nihil aliud est quam calor ut est in fluxu, prout scilicet est actus existentis in potentia, quod idem est quod motus. Verbi gratia, dato quod aqua calefieret ab igne, certum est quod in ea esset aliquis calor causatus a calore ignis: qui calor quantum ad esse suum consideratus, est forma quae est qualitas in tertia specie qualitatis; secundum autem quod est in fluxu, scilicet quia magis et magis participatur in aqua, dicitur motus; secundum autem quod denominat ignem calefacientem, dicitur actio: nam ignis secundum eum dicitur calefaciens juxta primam opinionem. Et secundum quod habet respectum ad ignem ut ad causam efficientem, est actio juxta secundam opinionem, et dicitur calefactio actio. Calefactio vero passio dicitur, ut denominat, vel importat respectum ad aliquod recipiens in comparatione ad id a quo recipit: unde ratio actionis prout est praedicamentum, consistit in hoc quod actio dicit formam in motu vel mutatione ut est a causa efficiente. Unde causa efficiens quam denominat, vel ad quam habet respectum, est de ratione actionis. Nec propter hoc sequitur quod actio, quamvis sit eadem fundamentaliter cum calore, quod sit in eodem praedicamento cum calefactione ut est passio. Sicut etiam supradictum est in praedicamento relationis, licet similitudo sit eadem res cum albedine; tamen quia similitudo importat aliquid aliud quod non importat albedo, scilicet terminum ad quem, est in alio praedicamento quam sit albedo. Sic in proposito, licet calefactio ut est actio, dicat calorem in motu; quia tamen dicitur actio ut denominat agens, juxta primam opinionem, vel dicit respectum ad agens, juxta secundam opinionem, ad quod non habet respectum calor, nec calefactio ut est passio; ideo calefactio actio est in alio praedicamento quam calor vel calefactio passio. Ex his patet descriptio actionis supraposita, scilicet, Actio est forma secundum quam in (1) id quod subjicitur agere dicimur. Est enim forma quae est in motu seu in mutatione, secundum quam dicimur seu denominamur agentes, juxta primam opinionem, vel quae habet respectum ad nos qui agimus, sicut ad causam efficientem, scilicet quia agimus in rem quae subjicitur, id est, in rem quae patitur, juxta secundam opinionem. Et sic patet quid est actio. Sciendum quod auctor sex principiorum quaedam dicit de actione corporea vel incorporea, quae vel simpliciter reputo falsa vel extorta indigent expositione. Dicit enim quod actio corporea necessario est cum motu agentis: quod non reputo verum in omnibus actionibus corporum: magnes enim non mota ullo genere motus attrahit ferrum; et de multis aliis agentibus posset hoc inveniri: ideo omnia talia quae ille ibi ponit, praetermitto.

(1) *Al. dicitur in.*

## CAPUT II.

*Quae actio suscipit magis et minus et contrarietatem, et quae non.*

Recipit autem actio magis et minus et contrarietatem, non tamen omnis. Notandum, quod actio vel dicit formam quae est in motu, ut calefactio, quae solum dicit calorem in motu ut denominat agens, vel ut habet respectum ad aliud: vel dicit formam quae est in mutatione et non in motu, ut generatio substantiae et creatio. Et quia, ut dictum est, actio supra formam quam dicit, nihil addit nisi quia denominat, juxta primam opinionem, vel dicit respectum ad agens, juxta secundam opinionem: si forma quam dicit est in motu, dicitur actio suscipere magis vel minus, vel ipsum agens quod est coneretur. Sicut in praedicamento qualitatis dictum est, quod abstracta non suscipiunt magis et minus, sed conereta; ita in isto dicitur aliquid, scilicet calefacere, suscipere magis vel minus, quia est magis vel minus calefaciens. Si vero forma quam dicit actio, non sit in motu, sed in sola mutatione; cum talis forma non sit apta suscipere magis vel minus, nec per consequens contrarietatem, sumendo contrarietatem proprie: nec etiam talis actio suscipit magis vel minus, nec per consequens contrarietatem, sumendo contrarietatem proprie. Unde generans vel creans non dicitur magis vel minus generans vel creans. Et sic patet etc.

## CAPUT III.

*Quod proprium actionis est ex se inferre passionem.*

Est autem proprium actionis ex se inferre passionem. Notandum, quod licet actio et passio et forma qua aliquid movetur, sint una res; tamen propter diversam denominationem quam important, vel propter diversum respectum importatum, sunt diversa praedicamenta. Habent autem se actio et passio in hoc ordine: nam ad omnem actionem egredientem ad extra sequitur passio: si enim agere nihil aliud est quam causare formam in passo cum motu, et pati nihil aliud est quam talem formam recipere, necessario sequitur, quod ad omnem actionem sequitur passio, ad omne agere sequitur pati. Bene ergo dictum est, quod proprium est actionis causare passionem in passo; et sic patet de actione.

## CAPUT I.

*Quid sit passio formaliter, ut est praedicamentum.*

Passio est effectus illatioque actionis. Notandum quod actio et passio sunt una res et eadem, scilicet forma quae est in fluxu vel fieri. Unde non videtur quod passio sit effectus actionis. Si enim considerantur in quantum sunt una forma, tunc, cum idem non possit esse causa et effectus sui ipsius, passio non erit effectus actionis; si vero considerentur in quantum sunt duo, quia actio denominat agens, et passio patiens; nec adhuc sequitur, quod passio sit effectus ipsius agentis. Non ergo passio est effectus ipsius actionis. Sciendum quod aliquid potest dici effectus alienius dupliciter. Uno modo



proprie, prout scilicet causatur vel causatum est ab eo; et isto modo passio non est effectus actionis. Alio modo quia quando utrumque fit, ita fiunt simul, quod unum necessaria connexione intelligitur esse post aliud. Unde primum dicitur esse quodam modo causa efficiens respectu secundi. Quemadmodum in tractatu de proprio dictum est de elavo et ligno cui infigitur, qualiter se habeant ad motum, sic suo modo se habet de passione respectu actionis: nam actio et passio sunt ab ipso agente ordine quodam necessario. Prius enim intelligitur agens agere, quam aliquid a se pati; et sic passio dicitur effectus actionis.

## CAPUT II.

### *Quod denominatio passionis est formaliter ab intrinseco.*

Dubium autem oritur contra ea quae dicta sunt, videlicet quod ista sex principia denominant substantiam extrinsece. Dictum est enim, quod actio quae subjective est in patiente, denominat agens. Hoc enim non videtur esse verum de passione: nam ipsa denominat passum in quo est formaliter et subjective. Dicendum, quod forma in fluxu, quae est ipse motus, secundum se accepta, est in praedicamento absoluto: puta calor qui causatur in aqua prout est in fluxu, est in praedicamento qualitatis, quia motus est in praedicamento termini ad quem est; prout autem est in fluxu, dicitur motus; prout vero habens talem calorem, scilicet aqua quae calefit, transmutatur ab igne calefaciente, talis denominatio pertinet ad passionem prout est praedicamentum: non enim aqua dicitur calefieri quia in ea est calor, sed quia talis calor est a calefaciente: unde si non esset calefaciens, quantumcumque calor esset in aqua, non propter hoc diceretur calefieri vel pati; sed dicitur calefieri et pati in quantum talis calor est a calefaciente. Talis ergo denominatio vel respectus passi est formaliter ab extrinseco, ex quo importat agens, quod est extrinsecum. Sic ergo passio extrinsece denominat subjectum, vel dicit respectum ab extrinseco. Recipit autem passio magis vel minus et contrarietatem eodem modo quo dictum est de actione: quod intelligitur sicut supra de actione expositum est. Et sic patet de praedicamento passionis etc.

## CAPUT I.

### *De praedicamento Quando, quid sit, quia est tempus ut denominat temporale, seu respectus temporis ad temporalia quae mensurat.*

Quando est quod ex adjacentia temporis relinquatur. Vocatur autem hic adjacentia temporis mensura ejus, prout scilicet ipsum tempus est mensura temporalium. Ad sciendum autem particulas praedictae descriptionis, et quid est Quando, notandum, quod de ratione mensurae est quod applicata per intellectum ad mensurata certificeet nos de ipsorum quantitate. Et quia duplex est quantitas, scilicet extensionis et perfectionis; ideo utrobique invenitur mensura. Dicimus enim quod mensura omnium colorum est albedo. Quia enim albedo plus continet de perfectione et participatione lucis quam

alii colores, applicando ipsam ad alios colores per intellectum, certificamur de quantitate perfectionis ipsorum, non tamen de quantitate extensionis: similiter per lineam bicubitalem applicatam ad pannum, certificamur de quantitate suae extensionis. Cum autem tempus nihil aliud sit quam quantitas successiva ipsius motus, secundum hoc tempus potest accipi dupliciter. Uno modo large, scilicet pro omni quantitate successiva motus, etiam accipiendo tempus, quot sunt motus, tot sunt tempora. Quia omnis motus habet quantitatem successivam facientem ipsum formaliter quantum quantitate successiva. Et talis quantitas non est motus, sed accidens ejus faciens ipsum esse quantum formaliter. Vel est accidens ipsius mobilis inexistentis ei mediante motu, sicut qualitas aliqua, scilicet color, inest substantiae mediante superficie, et supra dictum est. Et propter hanc successionem Philosophus, 3 cap. Metaphysic., posuit motum in genere quantitatis. Unde motus non est in aliis generibus, nisi forte ratione termini motus, prout dicimus quod augmentum et decrementum sunt in quantitate non ratione qua motus sunt, sed ratione termini ad quem sunt. Sed ejus successio dicitur tempus, large sumpto tempore: et tali tempore sicut mensura intrinseca habet omnis motus mensurari; quia tantus est motus, quantum ejus successio nos (1) certificat de ejus quantitate. Et quia aliquando talis successio est nobis magis nota, ideo per eam mensuramus successionem primi mobilis, ut Philosophus 4 Physicorum dicit. Mensuramus enim tempus per nostras actiones, ut per tantam viam ivimus (2), ergo tot temporis horae transierunt. Alio modo tempus striete et magis proprie dicitur quantitas successiva primi motus, seu motus primi mobilis, quae successio est uniformissima et simplicissima, et per consequens est apta nata nos certificare de aliis quantitatibus successivis applicata ad eas, juxta quod dicimus, quod duravit per horam vel per diem. Et quia talis successio est una numero, ideo est unum numero tempus omnium temporalium, per quod mensurantur, sicut mensura extrinseca, omnes alii motus, ut successivi sunt. Sciendum, quod praedicta successione primi motus mensurantur omnes alii motus ut mensura extrinseca, et mensurantur partes motus primi mobilis, ut scilicet pars illius motus mensuretur parte temporis mensura intrinseca; sicut dicimus, haec circulatio caeli fuit in ista die, et illa fuit in illa die: sicut est de aliis motibus qui mensurantur suis successionebus mensura intrinseca. Sciendum, quod mensura uniuscujusque potest considerari dupliciter: uno modo absolute, scilicet prout applicabilis est; alio modo, prout applicatur ad ipsum mensurabile. Cum autem tempus sit quaedam mensura, poterit his duobus modis considerari; uno modo absolute, et sic dicitur tempus; alio modo applicata ad motus successivos, sive sint partes motus primi mobilis, sive sint alii motus; vel ad mobilia in quantum mobilia sunt. Et quia talia ut sic mensurata a tempore sic mensurante denominantur, sicut dicimus ambulationem hodiernam, ideo a tali absoluto, scilicet tempore sic denominante, sumitur praedicamentum quando, juxta primam opinionem. Juxta vero secundam opinionem Quando est respectus

(1) *Al.* quantum ejus successiones.

(2) *Al.* per tantam viam vivimus.

temporis ut mensurantis ad ipsum temporale. Propterea dicitur, quod Quando est quod relinquitur ex adjacentia seu mensura temporis. Tempus enim ut mensurat temporale, denominat illud denominatione extrinseca, et hoc relinquit, et hoc dicitur quando, juxta primam opinionem. Juxta vero secundam, Quando relinquitur ex adjacentia temporis, quia ex mensuratione quae est a tempore, relinquitur respectus temporis mensurantis ad mensuratum, quod dicitur quando: et sicut sunt partes ipsius temporis, scilicet praesens, praeteritum, et futurum, sic etiam sunt partes quando, quia ab omnibus talibus partibus denominantur temporalia: dicimus enim, haec est operatio hodierna vel crastina vel hesternum. Et sic patet quid est quando: quia nihil aliud est quam forma absoluta, quae est tempus, prout denominat temporale. Vel juxta secundam opinionem, Quando nihil aliud est quam respectus praedictae formae absolutae ad temporalia quae mensurat.

## CAPUT II.

*Quod Quando non est respectus rei mensuratae ad tempus, sed e converso.*

Sciendum quod aliqui dicunt, quod Quando non est respectus temporis mensurantis ad rem temporales, sed e converso est respectus rei mensuratae ad ipsum tempus. Hoc non reputo verum: quia secundum istos, Quando non esset denominatio extrinseca, sed intrinseca: et sic non esset unum de sex principiis quae extrinsece denominant, ut supradictum est. Et sequeretur juxta secundam opinionem, quod Quando esset relatio, quia esset respectus ab intrinseco, quod falsum est. Sciendum, quod successio primi motus quae tempus dicitur, potest esse mensura partium motus primi mobilis; et isto modo est mensura intrinseca, et ex tali mensura fit denominatio quae pertinet ad praedicamentum quando: sicut dicimus quod haec circulatio est hodierna vel fuit hesternum. Et isto modo, in quo est tempus, in eo etiam quando: quia in motu primi mobilis est tempus subjective. Et ideo talis denominatio est in partibus ejus quae denominantur a partibus motus, ut dictum est. Vel juxta primam opinionem in primo motu est tempus, quod est fundamentum respectus qui est quando. Etiam in eo est terminus ipsius respectus, partes scilicet motus mensuratae quae sunt terminus talis respectus; et hoc est quod dicit auctor sex principiorum, quod in quo est tempus, in eo est etiam quando. Alio modo tempus potest esse mensura aliorum motuum extrinseca, ex quo tunc fit denominatio quae pertinet ad praedicamentum quando, sic dicimus, haec ambulatio fuit hesternum: et sic Quando non est in eo in quo est tempus, quia tempus est subjective in motu primi mobilis, et denominatio facta ab eo est in ambulatione. Vel juxta secundam opinionem, Quando est respectus fundatus in tempore, cujus tamen terminus est ambulatio: et sic aliquo modo non est in eo in quo est tempus etc.

## CAPUT III.

*Quod quando non suscipit magis nec minus, nec habet contrarium, et quod quando est in omni eo quod incipit esse.*

Non suscipit autem quando magis vel minus, nec etiam ipsi quando est aliquid contrarium. Nam hoc praedicamentum sumitur a forma absoluta denominante, vel est respectus talis formae. Et quia tempus a quo sumitur quando non suscipit magis vel minus, nec habet contrarium; igitur nec quando ista suscipiet. Est autem proprium quando esse in omni eo quod incipit esse. Notandum, quod res quadrupliciter incipit esse. Quaedam enim incipit per motum solum, ut calor in aqua quae calefit, incipit esse per motum calefactionis: immo motus ponitur in genere talium: alteratio enim est in genere qualitatis, in qua alteratio invenitur. Quaedam vero incipit esse per mutationem sequentem motum necessario; sicut forma substantialis inducitur in materiam per generationem sequentem alterationem, cujus ipsa est terminus saltem extrinsecus. Quaedam autem incipit esse per mutationem sequentem motum, sed non ex necessitate; sicut illuminatio nostri hemisphaerii de mane, quam illuminationem praecedit motus localis solis, per quem nobis praesens fit. Talem autem mutationem non ex necessitate praecedit motus: quia in primo instanti quando creatus est sol, nullo praecedente motu solis fuit aer illuminatus a sole. Quaedam autem incipit esse per simplicem emanationem, et non per motum nec per mutationem, sicut illa quae creantur. Sciendum est autem, quod tempus, sive sit continuum sive discretum, et aevum sunt quaedam mensurae, secundum quas actus quidam nati sunt mensurari, quia scilicet habent durare tantum vel tantum. Quidam autem actus est in quo uno numero existente est successio, et ejus duratio consistit in accipiendo partem post partem: sicut sunt ea de quibus dictum est quod incipiunt esse solum per motum. Et tales actus quando fiunt, sive quando facti sunt, cum scilicet sunt in quiete, mensurantur tempore continuo. Eorum enim fieri est motus, et factum esse est quies. Motus autem et quies mensurantur tempore continuo. In omni autem tali actu est quando, sicut in tempore, ut dictum est. Et hoc est proprium quando, esse in omni tali actu qui sic incipit esse: talis enim actus quia proprie tempore mensuratur, proprie etiam sumitur denominatio a tempore, ut dicatur de ambulatione hodierna vel hesternum; et hoc est quando, ut dictum est. Vel juxta secundam opinionem, tempus ut mensurans proprie habet respectum ad actus tales, et hic respectus est quando. Proprium ergo quando est esse in omni tali actu qui sic incipit esse ut in termino, ut dictum est. Aliquis vero actus est, cujus duratio non consistit in accipiendo successive partem post partem; sed consistit in hoc, quod idem indivisibile manens stat. Et iste actus est duplex. Quidam enim est actus indivisibilis, in quo nulla est successio, tamen natus est ei alius actus succedere, et ipse natus est succedere alteri, sicut formae substantiales corruptibiles, cogitationes et volitiones successivae Angelorum: horum enim actuum unusquisque est indivisibilis, et unus succedit alteri. Una namque forma succedit alteri in materia prima: et tamen

esse talis formae in indivisibili est: et sic est de dietis cogitationibus et volitionibus Angelorum. Unde tales actus mensurantur tempore discreto; unusquisque enim talium actuum mensuratur nunc temporis discreti; et successio quae est inter tales actus mensuratur tempore discreto. Tempus autem discretum, est in illo genere quantitatis discretae, in quo ponitur oratio: non enim oratio ibi ponitur pro sono, cum sonus sit qualitas: nec pro numero syllabarum, quia sic non esset alia species a numero: nec pro pluribus temporibus continuis syllabarum, quia sic non esset alia species a tempore continuo. Plures enim partes temporis non faciunt aliam speciem a tempore, ut supra dictum est. Sed ponitur pro mensura prolationis illius soni: ibi non solum est dare plura, sed est dare plus durare, secundum quod talia plura indivisibilia plus durant quam unum: ideo oportet ibi ponere aliquem numerum pertinentem ad mensuram alienius durationis: hoc autem est discretum. In talibus, quae sic incipiunt esse et quae sic habent esse, non est quando, secundum quod hic sumitur quando, prout relinquitur ex adjacentia temporis continui; et si in eis esset quando ex adjacentia ipsius nunc temporis discreti, esset alterius rationis quam quando de quo nunc agitur. Alius vero actus indivisibilis est qui non est aptus natus succedere alteri, nec alius sibi; sicut est actus essendi Angelorum, et animae rationalis, et corporum caelestium, et intellectio Angeli, qua videlicet intelligit se, quae non est successiva, et beata visio Angelorum et animarum: et tales actus mensurantur aevo, quod est totum simul. Unde, licet talis actus incoeperit esse per simplicem emanationem, tamen in eis non est quando; non enim habent mensurari tempore. Possumus autem dicere, quod in omnibus dietis actibus sit quando per quamdam coexistentiam quam habet tempus continuuum cum durationibus eorum: dicimus enim, quando fuit Angelus? et respondetur, heri vel hodie. Non tamen quod Angelus quantum ad suum esse mensuretur die hesterno vel hodierno: sed quia dies hesternus vel hodiernus simul fuit cum dieta duratione Angeli, scilicet cum suo aevo, vel aevum suum simul coexistit tempori hesterno vel hodierno, et sic de aliis. Et patet de quando.

### CAPUT I.

*De praedicamento Ubi, quid sit formaliter, et in quo sit subjective.*

Ubi est circumscripcio corporis a loci circumscriptione proveniens. Ad intelligendam praedictam descriptionem, et quid est Ubi, sciendum, quod locus est superficies corporis continentis immobilis. Dupliciter autem potest aliquid esse in loco: scilicet definitive et descriptive. Definitive sunt in loco ea quae licet quanta non sint, nec per se nec per accidens, tamen non sunt ubique; sed ita sunt in una parte mundi quod non sunt in alia, sicut sunt Angeli et animae separatae; unde dicuntur esse in loco definitive, idest determinative, quia ita determinate sunt in una parte mundi, quod tunc non sunt in alia. Et de talibus non potest proprie dici esse in ubi: nam ea quae sunt in ubi, continentur in loco.

Sed huiusmodi magis continent locum quam continentur a loco; non ergo proprie sunt in ubi. Circumscriptive vero dicuntur esse in loco omnia quanta. Dimittamus modo de ultima sphaera qualiter sit in loco. Unde quantitas quae formaliter facit subjectam materiam quantam, efficienter facit eam esse in loco: unde corpus locatum per suam superficiem tangit superficiem corporis locantis: et sicut est signata superficies corporis locati, ita et superficies locantis. Superficies autem corporis locantis potest dupliciter considerari. Uno modo ut est in corpore locante et denominat illud; et sic est quantitas. Alio modo ut denominat corpus locatum; et sic facit praedicamentum ubi, quod nihil aliud est secundum rem, quam locus, ut denominat locatum denominatione extrinseca, sicut dicitur civis a civitate, et pragensis a Praga. Vel juxta secundam opinionem, praedicamentum ubi est respectus circumscribentis locatum. Ex praedictis patet, quod motus localis non est in loco in quantum huiusmodi, sed est in praedicamento ubi: motus autem subjective est in eo quod movetur, seu in mobili. Dicitur autem motus esse in genere formae quae acquiritur per motum, quae est terminus motus. Non autem movetur locus, cum sit terminus continentis immobilis, movetur autem locatum. Locus autem, in quantum huiusmodi, non est forma quae acquiritur in locato, sed est forma locantis. Nihil ergo acquiritur in re mobili nisi ubi, quod est respectus loci ad locatum, ut circumscribit illud. Vel est denominatio supponens praedictum respectum, juxta primam opinionem. Hic autem respectus terminative est in ipso locato, et secundum extensionem loci ejus est talis respectus ut fundamentum, acquiritur in re quae movetur ad aliud et aliud ubi, usque ad terminum motus. Ex his patet, quod in aliis speciebus motus in ipso mobili acquiritur forma intrinseca. Nam in alteratione quae fit de frigore ad calorem, acquiritur calor qui est forma intrinseca inhaerens ipsi calefacto: et in augmento et decremento acquiritur certa quantitas, quae etiam est forma inhaerens intrinsecae. Sed in motu locali acquiritur ubi, quod denominat extrinsecae. Vel juxta secundam opinionem est respectus extrinsecus fundatus in locante, et terminatus in locato, ut dictum est. Patet ergo descriptio ipsius ubi: scilicet, quod est circumscripcio corporis, idest denominatio corporis locati circumscripcio proveniens a circumscriptione loci, idest ab ipso loco circumscribente. Vel juxta secundam opinionem, est circumscripcio corporis locati, idest respectus terminatus in corpore circumscripcio, proveniens a circumscriptione loci, idest fundatus in loco prout circumscribit locatum.

### CAPUT II.

*Quod ubi non suscipit magis nec minus, nec habet contrarietatem; et quod est in omni corpore terminato superficie.*

Ubi vero non suscipit magis nec minus, et non suscipit contrarietatem. Ut enim dictum est, ubi nihil aliud est quam locus, ut denominans rem locatam quam circumscribit. Vel juxta secundam opinionem, est respectus extrinsecus fundatus in loco circumscribente et terminatus in re locata: qui respectus nihil reale addit supra fundamentum,

nisi terminum ad quem, ut supra de relatione dictum est. Unde nullam rem dicit diversam a loco. Sed locus non recipit magis vel minus, nec loco aliquid est contrarium, ut supra dictum est. Ergo nec ubi suscipit magis vel minus nec contrarietatem. Proprium autem ubi est esse in omni corpore terminato vel denominative, vel juxta secundam opinionem terminative: licet enim quaedam alia accidentia sint in corpore, ut calor, dulcedo et hujusmodi; et quidam etiam respectus terminentur ad corpus, ut aequalitas et inaequalitas; tamen non ita proprie conveniunt corpori, sicut ubi: corpus enim est quod superficie vel superficiibus terminatur; et hoc est de ratione corporis in quantum est corpus. Sed quia natura non sustinet vacuum, oportet quod statim sibi jungatur alia superficies, quae ut immobilis est, locus dicitur et circumscribit illud, et hoc est ubi: unde proprie ubi est in corpore, quia immediate sequitur ipsum corpus in quantum hujusmodi (1). Et dico, quod proprium est ubi esse in omni corpore, supple, et non in alio: quia indivisibili in quantum hujusmodi non debetur locus: si enim locus est quantitas continua, oportet quod sit divisibilis. Locatum autem et locus adaequantur. Unde si alicujus indivisibilis esset locus, sequeretur quod locus ille esset indivisibilis. Notandum, quod indivisibile dupliciter potest sumi. Uno modo mathematice; et sic solus punctus est indivisibilis, cui, ut dictum est, non debetur proprie locus. Alio modo sumitur indivisibile naturaliter: est enim devenire ad minimam carnem, quae si dividatur, non erit amplius caro. Hoc tamen indivisibile est quantum, et non punctus; et nullus prohibet tale indivisibile esse in loco. Igitur in eo est ubi. Dico etiam, quod ubi est in corpore terminato: si enim esset corpus infinitum, ut ponebant primi Philosophi esse extra caelum tale corpus, non esset in ubi. Et sic patet de ubi etc.

### CAPUT I.

*De praedicamento situs, an aliquid sit secundum rationem formalem.*

Positio est ordo seu ordinatio partium in loco. Ad intelligendum autem praedictam descriptionem, sciendum est, quod pars multipliciter dicitur, sicut et totum. Est enim triplex totum: scilicet universale, potentiale et integrale. Et si aliud totum dicatur, ut totum in quantitate, totum in tempore, totum in loco, ad ista tria reducuntur. Dicitur autem totum universale genus, cujus partes subjectivae sunt species. Totum vero potentiale dicitur aliquid in quo sunt potentiae, quae nec partes integrales dici possunt, nec partes subjectivae: sicut anima respectu suarum potentialium est totum potentiale, et quaelibet ejus potentia dicitur vis potentialis. Totum vero integrale est duplex. Unum est, quod constituitur ex partibus integrantibus essentiam rei compositae: quarum partium unaquaeque per se accepta non est nata esse naturaliter sine alia, sicut sunt forma et materia. Aliud vero totum integrale est, cujus partes sunt natae divisae a toto quaelibet per se esse; sicut diviso ligno toto in duo ligna, unaquaeque partium potest per se

esse: et haec est passio quanti, in eo quod quantum est, ut dicitur quinto Metaphysicae. Et quia tales partes sicut sunt divisibiles, ita per intellectum signari possunt, quamvis non sint divisae; et quia in se consideratae inter se habent aliquem ordinem in toto (quia una consideratur proprie esse centrum totius: et alia post aliam, et sic de aliis): talis ordo dicitur potentia quae est differentia quantitatis, ut supra dictum est. Nec tamen est credendum, quod talis ordo qui dicitur potentia, sit relatio; quia differentia quantitatis non potest esse in alio praedicamento a quantitate. Sed potest esse relatio secundum dici; sicut dicimus, quod scientia est relatio vel relatum secundum dici: est enim scientia in prima specie qualitatis per prius, secundario autem dicit quemdam respectum ad scibile. Alio modo possunt considerari praedictae partes integrales, ut comparantur ad locum; prout scilicet, cuilibet parti sic ordinatae in toto correspondet pars loci; et talis ordo seu ordinatio partium in loco dicitur positio, quae est praedicamentum situs. Notandum, quod manente eodem toto locato et eodem toto loco, possunt partes diversae locati diversis partibus loci applicari; et ideo est aliqua diversitas inter comparisonem totius locati ad totum locum, et inter comparisonem partium ad partes: et sic potentia quae dicit ordinem partium locati ad diversas partes loci, est aliud praedicamentum quam praedicamentum ubi, quod dicit circumscriptionem locati a loco. Notandum quod superficies corporis continentis quae locus dicitur, et superficies corporis contenti, sunt simul; et secundum quod est figura corporis contenti, sic est figura loci, seu superficiei continentis. Et ideo secundum situationem partium et ejus diversitatem in corpore locato, necesse est locum diversam habitudinem habere ad locatum. Unde a praedicto loco sic diversimode locante partes locati denominant ipsum locatum ratione suarum partium. Dicitur praedicamentum situs seu positionis, sicut dicitur homo sedens, quia partes loci sic circumscribunt partes locati. Vel juxta secundam opinionem, respectus fundatus in loco ratione suarum partium, et terminatus in locato ratione suarum partium, est positio (1) seu situs. Patet ergo quid est situs seu positio.

### CAPUT II.

*Quod positio est denominatio seu respectus sumptus a partibus loci ratione partium locati.*

Sciendum est, quod quidam dicunt quod situs seu positio non est denominatio sive respectus sumptus a partibus loci ratione partium locati, sed potius est respectus sumptus a partibus locati ad partes loci. Et si objiciatur eis, quod si hoc esset, sequeretur quod talis denominatio non esset ab extrinseco, quia respectus fundatus in partibus locati juxta secundam opinionem; ad quam sequitur talis denominatio, juxta primam opinionem, quae est praedicamentum situs, non est extra totum locatum; unde sequitur quod situs esset relatio: Ad hoc respondent, quod de situ accidit sicut de passione supradictum est; quae, licet sit subjective in passo, tamen ab ea denominatur patiens deno-

(1) *Al. in quantum hujus; et sic infra.*

(1) *Al. potentia, ut et infra pluries.*



minatione extrinseca, quia non denominat illud nisi ratione agentis quod est extra. Et sic dicunt quod partes locati sic ordinatae non denominant totum in praedicamento isto, nisi ratione partium loci ad quas habent respectum. Et quia, ut supra dictum est, ista praedicamenta non fecit Aristoteles; et ille qui fecit, non fuit tantae auctoritatis nec habuit aliquem expositorem alienius auctoritatis, ideo de eis quilibet modernorum dicit sicut sibi videtur. Utraque tamen opinio posset salvari: sed prima magis stat ad salvandum quod hoc praedicamentum dicat formam extrinsecus advenientem. Secunda vero videtur magis stare cum significato dictionum quae important positionem: nam sessio et cubatio magis videntur dicere dispositionem partium locati per respectum ad partes loci, quam e converso. Et similiter se habet de aspero et leni: asperum enim est ejus partes non porriguntur aequaliter; lenis vero ejus partes aequaliter porriguntur. Quae autem istarum opinionum sit probabilior, legentis judicio relinquo etc.

## CAPUT II.

*Quod situs non suscipit magis nec minus, nec habet contrarietatem: et quod proprium ejus est proxime assistere substantiae.*

Situs autem seu positio non recipit magis nec minus, sive sit respectus partium loci ad partes locati, sive e converso: quia nec partes loci nec partes corporis locati suscipiunt magis vel minus, ideo nec situs suscipit magis vel minus: similiter nec recipit contrarietatem, ut ex supradictis potest patere. Est autem proprium situs proxime assistere substantiae materiali. Ad quod intelligendum, sciendum est, quod assistere, ut hic sumitur, est esse respectivum. Notandum, quod quantitas afficit rem materialem prius quam aliquod accidens: unde primam materiam prius natura informat forma substantialis quae dat sibi esse: ad quam informationem prius natura sequitur quantitas quam aliquod aliud accidens. Ut autem supradictum est, propria passio quantitatis est, quod sit divisibilis in partes integrales. Et ideo 5 Metaphy., a Philosopho sic describitur. Quantum est, quod est divisibile in semper divisibilia. Ad quas partes integrales terminatur situs, qui est respectus quidam, licet fundatur in loco. Vel secundum alios, fundatur in partibus quantis, et terminatur ad partes loci, ad quem respectum sequitur denominatio quae facit praedicamentum situs, juxta primam opinionem. Proximus ergo respectus substantiae materialis sive terminative sive fundamentaliter est situs sive positio etc.

## CAPUT I.

*De habitu secundum quod est praedicamentum, quid sit formaliter.*

Habitus est corporum et eorum quae circa corpus sunt adjacentia. Ad intelligendum autem praedictam descriptionem, sciendum, quod habere aliquid dicit quemdam respectum. Quaedam enim dicuntur habere aliquas res, sed inter habentem et res ha-

bitas est solus respectus rationis: ut cum aliquid dicitur habere substantiam, vel partes substantiae, sicut pedem vel manum; vel habere quantitatem vel qualitatem: et tamen inter habens et res habitas nullus est respectus realis, sed solum rationis: unde hoc habere pertinet ad praedicamenta absoluta. Quaedam vero dicuntur habere aliquas res, ita quod inter habentem et res habitas est respectus realis et conversivus: sicut pater dicitur habere filium, et filius patrem, et dominus servum vel possessionem et servus vel possessio dominum. Patris autem ad filium et filii ad patrem est respectus realis: et similiter est de domino et servo: et istud habere pertinet ad praedicamentum relationis. Quaedam autem dicuntur habere aliquas res, et inter habentia et res habitas est respectus realis sed non conversivus, sed est respectus habentis ad rem habitam: et isto modo tempus dicitur habere temporalia, et locus locatum, et partes loci partes locati, et continens contentum: et istud habere pertinet ad praedicamenta quando et ubi et situs: nam continens ita dicitur habere contentum, quod reducitur ad praedicamentum ubi, sicut tempus temporale, quod reducitur ad praedicamentum quando, et situs situatum quod pertinet ad praedicamentum situs: nam vas est locus mobilis, et locus est vas immobile, ut dicitur 4 Physic. Quaedam autem dicuntur habere aliquas res, et inter habentia et res habitas est respectus realis non conversivus; ita videlicet, quod respectus talis est rei habitae ad ipsum, quod habeat eam, sicut homo dicitur habere tunicam et respectus est tunicae ad ipsum hominem habentem, et non e contrario: et hoc habere pertinet ad istud praedicamentum, scilicet habitus. Notandum, quod ut Philosophus dicit 13 de Animalib., natura providit aliis animalibus de vestimentis et de armis. Unde quaedam pro vestimento habent pilos, quaedam vero corium grossum vel corticem, vel aliquid hujusmodi (1): similiter etiam aliquibus pro armis dentes dedit, aliis cornua, aliis vero ungues, et hujusmodi: homini autem nihil horum dedit, sed dedit ei intellectum et manus, ut per eas posset sibi providere, et de rebus exterioribus faceret sibi vestimenta et arma. Unde in aliis animalibus tam vestimenta quam etiam arma sunt partes substantiales eorum; et inter habentia et habita non est aliquis respectus realis, sed solum rationis, ut dictum est: unde denominatio quae fit in eis vel a vestimentis vel ab armis eorum naturalibus non pertinet ad hoc praedicamentum. Sed inter vestimenta et arma nostra et nos est respectus realis. Et ideo vestimenta et arma prout denominant nos habentes ea, sunt praedicamentum habitus. Vel juxta secundam opinionem, respectus eorum ad nos est praedicamentum habitus. Unde hoc praedicamentum solum convenit hominibus. Verum est autem, quod etiam quaedam animalia vestimus et armamus vestimentis et armis exterioribus: vestimus enim simias et phaleramus equos; et isto modo hoc praedicamentum potest ad ea pertinere. Et sic patet etc.

(1) *Id.* aliquid hujus.

## CAPUT II.

*Quod habitus potest immediate fundari  
in substantia.*

Videtur autem esse dubium, sive hoc praedicamentum sit denominatio sequens respectum, sive juxta secundam opinionem sit ipse respectus, quomodo hoc praedicamentum pertinebit ad genera accidentium. Constat enim quod vestimenta sive arma sunt in genere substantiae. Denominatio autem sumpta a substantia, non ponitur in alio genere a substantia. Sive juxta secundam opinionem quomodo fundabitur respectus immediate in substantia, cum respectus nihil reale addat supra fundamentum, ut supradictum est? ideo sequitur, quod substantia vel erit accidens, vel quod habitus non erit accidens. Ad quod dicendum, quod non est inconveniens, quod respectus realis in substantia fundetur. Substantia enim creata in quantum hujusmodi (1), realiter refertur ad Creatorem; et talis respectus immediate in ea fundatur: nec propter hoc substantia est respectus vel accidens. Notandum quod differt accidentalitas quantitatis et qualitatis quae sunt accidentia absolute, ab accidentalitate aliorum septem praedicamentorum: nam accidentalitas absolutorum consistit in hoc, quod adveniunt enti in actu per inhaerentiam; et isto modo substantia non potest esse accidens. Accidentalitas autem aliorum septem praedicamentorum consistit in hoc, quod accedit formae seu subjecto formae habere terminum ad quem. Et quia forma substantialis seu substantia composita potest habere talem terminum, isto modo non est inconveniens quod sit accidens, idest ut accidentaliter alteri adveniat: unde accedit vestimento ut adiaceat corpori, et ut talem respectum habeat ad ipsum. Et sic sive sumatur vestimentum ut denominans, accedit sibi sic denominare, et sic est praedicamentum habitus juxta primam opinionem, et est accidens. Vel juxta secundam opinionem accedit vestimento habere corpus pro termino, ad quem ut adiacens habet respectum. Vel potest dici, quod non ex omni substantia indifferenter fiunt arma et vestimenta; sed arma fiunt ex substantia habente aliquam qualitatem, puta duritiem et hujusmodi: similiter vestimenta fiunt non ex qualibet substantia indifferenter, sed ex habente talem qualitatem, puta mollitiem et plieabilitatem, vel hujusmodi; et super his qualitatibus fundatur respectus qui est habitus, vel a dictis substantiis, in quantum habent tales qualitates. Est ergo habitus adjacentia corporum, et eorum quae circa corpus sunt: quod sic intelligitur. Habitus est adjacentia, idest denominatio corporum, sicut eorum quae denominantur, et eorum quae sunt circa corpus, idest eorum a quibus fit talis denominatio; sicut a vestimentis quae sunt circa corpus, dicitur et denominatur homo vestitus. Vel juxta secundam opinionem, habitus est adjacentia, idest respectus corporum terminative. Talis enim respectus, scilicet vestimenti, terminatur ad corpus vestitum, et est eorum quae sunt circa corpus fundamentaliter: nam fundamentum talis respectus est ipsum vestimentum, ut dictum est. Et sic patet descriptio habitus. Notandum, quod licet talis denominatio sit totius habentis talem habitum, nam homo dicitur vestitus et cal-

(1) *At.* in quantum hujus.

ceatus tamen convenit sibi ratione habitus; qui adiaceat parti. Licet enim homo dicatur calceatus, tamen dicitur ratione calceamenti, quod adiaceat pedi, qui est pars integralis hominis, cum totum corpus non sit vestitum, sed ratione illius partis cui adiaceat vestimentum. Patet ergo de habitu etc.

## CAPUT III.

*Quod habitus suscipit magis et minus, licet non  
omnis; et quod habitus non habet contrarietatem.*

Recipit autem habitus magis et minus, licet non omnis. Qualiter autem habitus recipit magis et minus, videtur esse dubium. Si enim respectus in tantum recipiunt magis et minus, in quantum fundamenta recipiunt intensionem et remissionem; et secundum istos respectus denominantur termini respectus magis vel minus: sicut dicitur magis vel minus calefaciens a majori vel minori calore quem efficit: sed cum fundamentum habitus sit substantia, ut dictum est, quae non suscipit magis vel minus; ergo nec habitus suscipit magis vel minus. Ad quod intelligendum sciendum est, quod ut dictum est, ista sex praedicamenta nihil aliud dicunt nisi absolutum, ut denominat aliquid extrinsecum; quae denominatio sequitur aliquem respectum realem qui est inter denominans et denominatum, qui tamen respectus est in genere relationis. Vel juxta secundam opinionem, dicunt praedictum respectum: et talis respectus est communis dictis sex principiis. Unde tale denominatum dicitur magis vel minus ab intensione vel remissione illius absoluti denominantis, ut dictum est. Aliquando vero denominatur magis vel minus, non ab intensione vel remissione denominantis: sed si plura fuerint denominativa ejusdem rationis a quibus denominatum secundum unumquodque quod est, eo denominatur; sicut dicimus, quod ignis calefaciens tria ligna magis calefacit, quam si calefaceret duo eodem gradu caloris. Constat enim quod omnes istae tres calefactiones sunt ejusdem rationis, quibus respondet ignis secundum unam potentiam calefactivam: et isto modo calefaciens potest dici magis vel minus, licet in calefactionibus vel in quibuscumque actionibus non sit consuetum dicere isto modo magis vel minus. Et simile est si sumatur habitus (1) juxta secundam opinionem: quia si plures respectus unius rationis, quibus unus respondet terminus, denominant terminum magis, pauciores vero minus; habitus primo modo non suscipit magis vel minus. Ab uno enim vestimento vel calceamento, scilicet uno numero, nunquam aliquis dicitur magis vel minus vestitus vel calceatus. Et sic intelligitur, quod non omnis habitus suscipit magis vel minus; quia nec vestimentum nec calceamentum suscipit intensionem vel remissionem. Secundo vero modo habitus suscipit magis vel minus; quia unus et idem homo a pluribus vestimentis potest denominari magis vestitus, et a paucioribus minus vestitus; et sic de aliis. Hoc autem non convenit praedicamento quando, cum tempus denominans sit unum omnium temporalium: nec etiam convenit praedicamento ubi, cum unius corporis unus tantum sit locus: nec praedicamento situs, cum cuilibet uni parti locati

(1) *At.* hic.

una respondeat pars loci. Potest autem convenire iste modus dicendi magis vel minus alicui relativo, et alicui agenti vel patienti. Et sic patet qualiter habitus suscipit magis vel minus, et qualiter non. Vel dicendum, quod respectus habitus non immediate fundatur in substantia, ut supra dictum est, nisi mediante aliqua qualitate, puta duritie vel mollitie et hujusmodi, quae qualitates sunt fundamentum talis respectus: cum autem dictae qualitates suscipiant magis et minus, ergo et habitus. Non tamen recipit habitus contrarietatem. Ut enim supra dictum est, ex receptione magis et minus datur contrarietas, quando magis et minus est secundum gradum intensiois et remissionis in speciebus unius generis, ut patet de albo et nigro. Talis autem intensio non est in habitu, ut dictum est. Ergo in habitu non est contrarietas.

## CAPUT IV.

*Quod proprium habitus est existere tam in corpore quam in his quae circa corpus sunt, secundum divisionem partium.*

Est autem sciendum, quod proprium habitus est existere tam in corpore quam in his quae circa corpus sunt, in pluribus secundum divisionem partium. Hoc autem qualiter intelligatur dictum est. Denominatur enim aliquid ab habitu secundum quod habitus adiacet alicui parti integrali signatae; sicut dicitur homo calceatus a pedibus et galeatus a capite, et sic de aliis. Hoc autem nulli aliorum praedicamentorum convenit: licet enim in praedicamento situs fiat denominatio totius ratione partium quibus adjacent partes loci, non tamen ratione alicujus partis signatae, sed ratione omnium, quibus adjacent partes loci aliquando uno modo, et aliquando alio. Sed in praedicamento habitus fit denominatio totius ab una parte signata, cui adiacet singularis habitus. Et quia sicut consideratur in hoc praedicamento corpus habens habitum quantum ad suas partes organicas signatas, sic habitus partium signatarum sunt diversi et divisi: nam in habitu unius hominis divisa est pars vestimenti a calceamento, et sic de singulis; ideo dicitur esse proprium habitus existere secundum divisionem partium corporis, scilicet habentis, et secundum divisionem eorum quae sunt circa corpus secundum divisionem habitus. Et sic patet de praedicamento habitus, et de omnibus praedicamentis hoc modo. Notandum, quod praedicamenta pertinent ad primam operationem intellectus, in quia nulla fit compositio per esse. Quae autem pertinent ad talem primam operationem, possunt dupliciter considerari. Uno modo, quantum ad res intellectas; et sic de eis jam dictum est: omnia enim quae sic pertinent ad talem primam operationem, per decem praedicamenta significantur, ut ex dictis patet. Alio modo possunt considerari quantum ad modum significandi, in quantum scilicet significantur per nomina et per verba, et per alias partes orationis: et de his dicitur immediate. Propterea logica non solum est scientia rationalis, ut puta de syllogismo qui pertinet ad discursum rationis, sed est etiam scientia sermocinalis: tractat enim de syllogismo et partibus ejus quantum ad modum significandi, ponendo quid est nomen, et quid est verbum, et ponendo signa universalis et particularia, quae omnia ad modum significandi pertinent, de quibus omnibus infra dicitur.

## TRACTATUS VI.

DE INTERPRETATIONE, SEU ENUNCIATIONE.

## CAPUT I.

*De nomine, quid sit secundum intentionem logicam.*

Dicto de his quae quantum ad rem significatam pertinent ad primam operationem intellectus, quae est indivisibilem intelligentia, ut in 5 de Anima dicitur, quia videlicet res cognoscitur quantum ad suam quidditatem; nunc dicendum est de his quae pertinent ad secundam operationem intellectus, quae ibi compositio vel divisio nominatur, quae scilicet intellectus noster unam rem cum alia componit, vel ab alia eam dividit, per esse scilicet et non esse. Et dicitur tractatus iste de enunciatione seu propositione, large sumpta propositione. Si enim striete sumeretur, tunc enunciatio esset genus ejus: propositio enim solum dicitur de praemissis ipsius syllogismi; sed enunciatio dicitur tam de praemissis quam de conclusione (1). Ad cognoscendum autem dictam enunciationem dicendum est primo cum Aristotele de partibus suis, scilicet de nomine et verbo; et de ejus genere, quod est oratio. Nomen est vox significativa ad placitum sine tempore, cujus nulla pars significat separata, finita et recta. In ista nominis definitione ponitur vox pro genere. Notandum, quod ut habetur 2 Metaphy., haec est differentia inter definitionem suppositorum et definitionem formarum sive substantialium sive accidentalium: nam in definitione suppositorum nihil ponitur quod sit extra essentiam definiti, sed omnes particulae definitionis sunt de essentia definiti. Formae vero, quia non possunt per se esse, sed in alio, scilicet in subjecto vel in materia; in sui definitione requirunt subjectum vel materiam, quae tamen non sunt de essentia earum; et ideo ipsarum definitiones dicuntur esse per additamenta. Unde formae accidentales in sui definitione requirunt subjectum. Haec est autem differentia inter eas definiendo: nam formae abstractae aliter requirunt subjectum in earum definitionibus quam formae sumptae in concreto. Formae abstractae requirunt subjectum loco differentiae: ut cum dicimus, crispitudo est contractio capillorum: ubi capilli qui sunt subjectum crispitudinis, ponuntur loco differentiae; in concreto vero requirunt subjectum loco generis; ut cum dicimus crispum est capillus contractus. Hoc habito, sciendum est, quod nomen, verbum et oratio sunt quaedam artificialia, et per consequens accidentia: eorum autem subjectum est vox quae est quid naturale: ars enim in voce ut in subjecto format nomina verba et orationes; et ideo in eorum definitionibus debet poni vox ut subjectum. Et quia concreta sunt, ideo in eorum definitionibus ponitur vox pro genere. Dicitur autem vox significativa, ad differentiam vocum non significatarum quaecumque sint illae, quae videlicet pro nihilo proferuntur. Ad placitum autem dicitur ad differentiam vocum significatarum naturaliter: ut sunt latratus canum qui significant iram, prout natura dictavit eis, quoniam non significant secun-

(1) *Al.* de praecoclusionem.

dum institutionem humanam. Sine tempore vero dicitur ad differentiam verbi et participii. Ubi nota, quod ut supra in alio tractatu dictum est, actio, passio et motus sunt una res. Verbum autem significat per modum actionis vel passionis, et per consequens per modum motus seu mutationis. Primum autem quod habet mensurari tempore, est motus. Verbum vero significat eum tempore. Sciendum, quod actio et passio dupliciter possunt significari: vel per modum abstractum, ut sunt quaedam res; et tunc non significant eum tempore; significant enim per modum habitus et quietis, scilicet sine motu, et sic significantur a nomine. Alio modo significantur per modum actionis prout sunt egredientes a subjecto, et sic significantur ut motus vel mutationes, et per consequens, ut mensurantur tempore; et sic significantur a verbis formaliter, et non materialiter sumptis; et etiam a participiis, non a nomine. Nomen ergo significat sine tempore. Deinde dicitur, quod nominis nulla pars significat separata, ad differentiam orationis, ejus partes significant separatae. Ubi nota, quod significatio se habet ad nomen ut forma ejus: littera vero et syllabae sunt ut materia ejus, seu ut partes integrales. Cum autem nulla pars sit quae non habeat formam totius in toto; ideo nulla pars separata habebit per se significationem, nisi solum illam quam habet totum. Unde in nominibus compositis, ut sunt Terranova, castrum Joannis, si significatum esset divisum, puta quod intelligeretur pro terra quae esset nova, tunc non esset nomen, sed oratio: si vero significatum suum esset una res, puta villa vel hujusmodi, tunc erunt nomina. Deinde dicitur finita ad differentiam nominum infinitorum, sicut est non homo. Ubi nota, quod omne nomen accipiendo etiam pronomen pro nomine, aut significat determinatum naturam ut homo, aut determinatam personam, ut ego et tu, aut determinatam naturam et personam, ut Socrates Plato; cum autem nomen infinitum nihil horum significet, non vere poterit dici nomen. Quod autem nihil horum significet, patet: nam nomen quod imponitur a privatione, ad minus requirit subjectum existens: non enim caecum dicitur nomine animalis; sed supponit, quod illud quod est caecum, sit aptum natum habere oculos. Nomen autem infinitum cum a negatione imponatur, nihil supponit; potest enim dici de ente, sicut de non ente: dicimus enim quod chimaera est non homo, ut equus est non homo. Unde talia significant solum per modum nominis quia ad minus est suppositum in comprehensione. Deinde dicitur recta, ad differentiam casuum obliquorum, qui cadunt a recto seu nominativo per quamdam originem declinationis. Solus enim nominativus dicitur nomen principaliter, quia per ipsum facta est impositio nominis ad aliud significandum. Non autem pertinent obliqui directe ad logicum, qui versatur circa verum et falsum; quia tales casus, scilicet obliqui, cum hoc verbo « sum es est », in quod omnia verba resolvuntur, non dicunt verum vel falsum. Nihil tamen prohibet eos cum aliquibus verbis impersonalibus jungi, et significare verum vel falsum, ut, taedet me lectionis. Et sic patet de nomine etc.

## CAPUT II.

*De verbo, quid sit formaliter secundum descriptionem logicam.*

Verbum est vox significativa ad placitum, cujus nulla pars significat separata, finita et recta; et semper est significativum eorum quae de altero praedicantur. In ista definitione, vox significativa ad placitum cujus nulla pars significat separata, intelliguntur eodem modo quo in nomine dicta sunt. Dicitur autem finita ad differentiam verborum infinitorum, ut sunt, non currit, non amat; quae non proprie sunt verba. Ubi nota, quod proprium est verbi significare aliquid per modum actionis et passionis, ut supra dictum est. Praedictae autem dictiones hoc non faciunt: imo remouent actionem vel passionem potius, quam aliquam determinatam actionem vel passionem significant: non ergo proprie sunt verba. Sciendum, quod licet haec proprie non sint verba, tamen aliqua posita in definitione verbi eis conveniunt: primo quia significant eum tempore: sicut enim agere et pati sunt in tempore, ita etiam privatio eorum: unde et quies tempore mensuratur. Dictiones autem praedictae significant privationem actionis et passionis, ut dictum est. Secundum est, quia ponitur in definitione verbi, quod semper ponitur ex parte praedicati, quia est significativum eorum quae de altero praedicantur: quod sic intelligitur. Quia enim subjectum enunciationis significatur ut id cui aliquid inhaeret, verbum autem significat actionem per modum actionis, ut dictum est, de ejus ratione est quod inhaereat; ideo semper ponitur ex parte praedicati, etiam quia in omni praedicatione oportet quod sit verbum, cum verbum importet compositionem qua praedicatum componitur subjecto. Unde sicut verba significando actionem vel passionem significant aliquid ut in alio existens, propter quod semper ponuntur ex parte praedicati, ita etiam praedicta verba infinita, quia significant remotionem actionis vel passionis, semper ponuntur ex parte praedicati: negatio enim reducitur ad genus affirmationis. Sciendum, quod verba infinitivi modi aliquando ponuntur ex parte subjecti, ut cum dicimus « currere est moveri »; et hoc est quia habent vim nominis: unde Graeci addunt eis articulos sicut nominibus: hoc idem facimus nos in logica vulgari: nam dicimus « el corere mio », ubi ly « el » est articulus. Intellectus enim noster processum actionis vel passionis, seu inhaerentiam ejus in subjecto apprehendit et significat ut est res quaedam, et sic habet vim nominis. Si autem verba aliorum modorum aliquando ponuntur ex parte subjecti, ut cum dicimus « curro est verbum », tunc non sumitur verbum formaliter, sed materialiter, secundum quod significat ipsam vocem, quae accipitur ut res quaedam: unde verba et orationes et omnes partes orationis, quando sic ponuntur materialiter, sumuntur in vi nominis. Deinde ponitur in definitione « recta », ad differentiam verborum obliquorum, scilicet praeteriti et futuri temporis, quae non sunt simpliciter verba. Cum enim verba proprie dicta significant agere vel pati, hoc erit proprie verbum, quod significat agere vel pati in actu; quod est agere vel pati simpliciter. Sic (1)

(1) *Al. hic.*



autem significant verba praesentis temporis: agere autem vel pati in praeterito vel in futuro est secundum quid. Et ideo verba praeteriti et futuri temporis non sunt simpliciter verba, sed secundum quid. Dicuntur autem casus verbi praesentis temporis, quia aliquo modo significant tempus praesens: praeteritum enim et futurum tempus dicuntur per respectum ad praesens: est enim praeteritum tempus, quod fuit praesens: et futurum, quod erit praesens. Et similiter verba aliorum modorum quam sit verbum indicativi modi, casus verbi dicuntur, quia earum variatio respicit ipsam actionem vel passionem, sicut et variatio temporum. Et quia variatio verborum in numero et persona non respicit ipsam actionem vel passionem, sed solum subjectum, cui actio vel passio inhaeret; ideo non faciunt casus verbi etc.

## CAPUT III.

*De oratione, quid sit, et de speciebus eius.*

Oratio est vox significativa ad placitum, cujus partes significant separatae. Qualiter autem hujus definitionis particulae sint intelligendae, dictum est in definitione nominis. Dividitur autem oratio in imperfectam et perfectam. Oratio imperfecta dicitur, quae imperfectum sensum generat in animo auditoris. Ubi nota, quod ut dicitur 3 Metaphy., perfectum est cui nihil deest in genere suo. Sensui autem quem generat oratio imperfecta in animo auditoris aliquid deest, quia deest sibi compositio vel divisio: si enim dico « homo albus » quae est oratio imperfecta, nihil dico sibi inesse vel non inesse, et per consequens sensus hujus orationis facit stare animum suspensum, quia sibi aliquid deest, ideo est imperfectus. Sciendum tamen, quod non sine causa oratio perfecta et imperfecta definitur per generare sensum. Ubi nota, quod licet oratio et quaelibet ejus pars sint quaedam res artificiales et non naturales, nec etiam sint instrumenta naturalia virtutis interpretativae, ut Plato dicebat: ejus namque virtutis instrumenta naturalia sunt pulmo, guttur, palatum, lingua, dentes et labia: sunt tamen instrumenta ipsius intellectus, qui non est virtus materialis sed supra omnem naturam corpoream. Instrumentum autem definitur ex fine, qui est usus ejus. Usus autem vocis significativae est significare audienti conceptum intellectus dicentis. Bene ergo definitur oratio perfecta et imperfecta per generare sensum, seu significare. Unde oratio perfecta dicitur, quae perfectum sensum generat in animo auditoris propter complexionem quam dicit. Orationum autem perfectarum quinque sunt species: scilicet enunciativa, interrogativa, vocativa, imperativa et deprecativa. Sciendum quod ratio non solum concepit ipsas res, sed etiam per suum conceptum alia dirigit et ordinat; concipiendo autem res in se format orationem indicativam seu enuntiativam: ordinando autem alia, format alias orationes. Dirigitur autem et ordinatur aliquis ab aliquo ad tria. Primo ad mente attendendum; et ad hoc pertinet oratio vocativa. Secundo ad voce respondendum; et ad hoc pertinet oratio interrogativa. Tertio ad opus exequendum; et ad hoc pertinet quantum ad inferiores oratio imperativa; quantum vero ad superiores oratio deprecativa, ad quam reducitur oratio optativa, quia respectu superioris homo non habet

vim innatam, nisi per expressionem sui desiderii: suppositiva vero, idest conditionalis, et dubitativa reducuntur ad interrogativam. Et quia istae quatuor species orationis non significant verum vel falsum, sed quemdam ordinem ad ista consequentem; ideo non pertinent ad praesens negotium, quod directe ordinatur in scientiam demonstrativam, in qua auris hominis per rationem adducitur ad considerandum verum ex his quae sunt propria rei; sed magis pertinent ad rhetoricam vel poeticam, quae inducunt ad assentiendum per dispositionem audientis. Sola autem enunciativa, quae significat verum vel falsum, ad hoc negotium spectat, et si quae aliae orationes ad eam reduci possunt.

## CAPUT IV.

*De enunciatione, quid sit; et quid est verum et falsum.*

Enunciatio est oratio verum vel falsum significans. Ad intelligendum autem hanc definitionem, primo videndum est quid sit verum vel falsum: secundo videndum est quare soli enunciationi convenit significare verum vel falsum. Quantum ad primum sciendum, quod ut communiter dicitur, veritas est adaequatio rei ad intellectum, secundum I. saae, verum dicitur adaequatum, falsum vero non adaequatum. Haec autem adaequatio seu conformitas non potest esse relatio realis, alioquin verum non converteretur cum ente: quod enim est in uno praedicamento tantum, non potest esse de transcendentibus. Est ergo relatio rationis; et sic verum est relativum secundum rationem, quod nihil prohibet ipsum esse in pluribus praedicamentis vel in omnibus. Quae autem sit haec conformitas, dico quod in intellectu quaedam sunt subjective, ut species intelligibiles, actus intelligendi, et hujusmodi: quaedam sunt objective, ut ea quae intellectus intelligit. Quando ergo res quae est in intellectu objective est conformis sibi ipsi, ut est in rerum natura, tunc talis conformitas dicitur veritas. Unde in hoc consistit veritas, quod res sic apprehenditur ab intellectu sicut est in rerum natura; et per oppositum falsitas est in difformitate rei, ut apprehensa est ab intellectu, ad se ipsam, ut est in natura sua. Et propter hoc Philosophus 4 Metaph. dicit, quod verum est esse quod est, et non esse quod non est; falsum vero est esse quod non est, et non esse quod est. Unde quando intellectus intelligit rem sic esse sicut est in rerum natura, vel non esse sicut non est, talis conformitas dicitur veritas; quando vero apprehendit rem esse ut non est, vel non esse ut est, tunc falsitas. Sciendum, quod in tali conformitate quae veritas dicitur, est considerare quatuor: scilicet rem ut est intellecta, seu ut est in intellectu objective: et ipsum intellectum eam intelligentem: et actum intelligendi, qui est subjective in intellectu: et rem ut est in natura sua. In re autem ut est intellecta, seu ut est objective in intellectu, est per prius veritas, quam sit in intellectu, vel quam sit in actu intelligendi, vel quam sit in re ut est in sua natura: intellectus enim et actus intelligendi non dicuntur veri nisi quia sunt de vero objecto. Intellectus enim dicitur verus, quia apprehendit verum; et actus intelligendi dicitur verus, quia est apprehensio alienius veri; et res in natura sua dicitur vera, quia nata est apud intellectum easare apprehensionem confor-

mem entitati suae. Notandum quod talis conformitas rei, ut intellecta est, ad seipsam ut est in natura sua, potest esse vel in intellectu practico, vel in intellectu speculativo. In intellectu quidem practico, quando scilicet sic est res per suam formam, sicut apprehendit eam artifex per artem suam. Cum autem omnes res naturales per formam suam sint conformes sibi ipsis ut apprehensae sunt ab arte divina, ideo quaelibet res secundum quod habet propriam formam dicitur vera; et sic verum et ens convertuntur. In intellectu vero speculativo est talis conformitas, quia intellectus intelligit rem sicut est: non enim intellectus sic intelligit, sicut res in intellectu practico; sed quia sicut res est, ita eam intelligit intellectus. Et ideo intellectus practicus comparatur ad artificialia ut mensura ad mensuratum; e converso autem intellectus speculativus comparatur ad ea quae intelligit ut mensuratum ad mensuram. Notandum quod aliqui tenent, quod veritas est conformitas rei ad intellectum informatum similitudine rei; falsitas vero est difformitas intellectus sic informati ad rem. Et haec opinio probabiliter potest teneri. Sic ergo patet quid est veritas et falsitas etc.

#### CAPUT V.

*Quod veritas et falsitas sunt tantum in enunciatione, et quare.*

Quantum ad secundum, scilicet, quare veritas et falsitas sunt in enunciatione tantum: sciendum quod veritas non est in voce significativa, sive sit nomen vel verbum vel oratio, nisi sicut in signo. Sunt autem huiusmodi signa conceptionum intellectus. Secundum ergo quod in conceptionibus intellectus erit verum vel falsum, sic dicitur esse in ipsis signis. Sciendum quod, ut dicitur 5 de Anima, duplex est operatio intellectus: scilicet indivisibilium intelligentia, quando scilicet intellectus intelligit quidditatem rei in se: et compositio et divisio, scilicet quando unam rem conceptam componit per esse, vel divisio quando dividit per non esse: et in utraque operatione intellectus invenitur veritas. Ubi nota, quod sicut dictum est, veritas est relatio rationis. Entia autem rationis nusquam sunt subjective, nisi largo modo intelligatur, secundum illud cui ratio attribuit talem respectum rationis. Habet ergo veritas solum esse objective: et similiter dico de falsitate. Unde si consideramus illud quod primo verum est, scilicet rem ut est intellecta, et voce-  
mus verum, dico quod tale verum potest esse in prima operatione intellectus: nam intellectus intelligit ipsam rem ut est in se, et sic intelligit verum. Falsum autem non intelligit intellectus in prima operatione sua: quia vel attingit naturam rei, et tunc intelligit verum; aut non attingit, et tunc ignorat. Et non est ibi proprie difformitas rei intellectae ad naturam eius, quia nec talis res est intellecta, sed aliqua alia; et ideo non est ibi falsitas, quae proprie importat deceptionem, et non ignorantiam solam. Et inde est quod Philosophus 5 de Anima, dicit, quod intellectus comprehendens quod quid est, semper est verus. Hoc autem non est perfecte comprehendere veritatem, quae est conformitas utriusque, scilicet rei ut intellecta est, et rei in sua natura: sed est cognoscere unum conforme, seu verum. In secunda vero operatione intellectus

est perfecte et complete veritas objective: nam apprehendere veritatem, est apprehendere conformitatem rei intellectae ad se ipsam secundum suam naturam, ut dictum est. Hoc autem fit comparando unum alteri, vel idem ad seipsum secundum aliud et aliud esse: quod non potest fieri nisi per secundam operationem intellectus. Ergo perfecte veritas non est nisi in intellectu componente vel dividente: et similiter dico de falsitate. Tenendo vero secundam opinionem praedictam, erunt clariora. Nam si veritas est conformitas rei ad intellectum informatum similitudine rei, in prima operatione intellectus erit verum, quia erit ibi talis conformitas, non tamen erit verum tunc in intellectu ut in cognoscente verum: non enim intellectus aliter cognoscit verum, nisi componendo vel dividendo secundum suum iudicium: quod iudicium si consonet rebus, erit verum, puta cum intellectus iudicat se esse informatum similitudine rei, ut res est: et oppositum est de falso; et hoc totum pertinet ad secundam operationem intellectus, et non ad primam. Ex dictis potest patere, quod in sola enunciatione sit veritas vel falsitas ut in signo. Si enim sola enunciatio est signum eorum quae sunt objective in secunda operatione intellectus, et solum in illum (1) est verum et falsum; in enunciatione erit verum vel falsum, et non in aliqua alia voce, sive sit dictio, sive oratio. Et sic patet quid est enunciatio.

#### CAPUT VI.

*De enunciatione categorica et hypothetica, affirmativa et negativa.*

Dividitur autem ab Aristotele enunciatio tripliciter: et primo, ut analogum in sua analogata. Dicit enim quod enunciationum quaedam est una simpliciter, quaedam conjunctione una. Enunciatio una simpliciter est enunciatio categorica, seu praedicativa. Est autem enunciatio categorica quae habet subjectum et praedicatum principales partes sui, ut « homo est animal »: homo est subjectum, animal est praedicatum, hoc verbum « est », quia praedicatur tertium adiacens, dicitur conjunctio, seu copula verbalis. Conjunctione vero una dicitur enunciatio hypothetica seu suppositiva, ut « si homo est, animal est ». Haec etiam divisio enunciationis est analogi in sua analogata, de quibus per prius et posterius dicitur; nam unum simpliciter est prius uno conjunctione. Secundo dividit enunciationem ut genus in species: dividit enim eam in affirmationem et negationem, quae sunt species enunciationis: licet enim affirmatio sit prior negatione; non tamen propter hoc enunciatio de eis analogice praedicatur, sicut dictum est quod praedicatur de simpliciter una et conjunctione una. Notandum quod unum dividendum aliquod commune potest esse prius altero dupliciter. Uno modo secundum proprias rationes aut naturas dividendum. Alio modo secundum majorem participationem rationis illius communis quod in ea dividitur. Primum autem non tollit univocationem generis; ut manifestum est in numeris, in quibus binarius secundum propriam rationem naturaliter est prior ternario; sed tamen aequaliter participant rationem commu-

(1) Forte in illa.

nis, scilicet numeri: nam ita ternarius sicut et binarius est multitudo mensurata per unum. Secunda autem prioritas impedit univocationem generis: et propter hoc, ens non potest esse genus substantiae et accidentis, quia in ratione entis prius habet esse substantia, quae est ens per se, quam accidens, quod est ens in alio vel in aliud. Sic in proposito. Licet affirmatio primo modo, scilicet secundum suam naturam, sit prior negatione, non tamen secundo modo; immo aequaliter participant rationem enunciationis; utraque enim est oratio verum vel falsum significans. Est autem secundum suam naturam affirmatio prior negatione: nam affirmatio est enunciatio alicujus de aliquo, ut « homo est animal »; negatio vero est enunciatio alicujus ab aliquo, ut « homo non est lapis ». Cum autem enunciatio, ut dictum est, sit vox significativa, non immediate significat rem, sed mediante conceptu intellectus. Unde in omni enunciatione est tria considerare: scilicet ipsam vocem, quae est signum conceptus intellectus; et ipsum conceptum intellectus, qui est ipsa similitudo rei; et ipsam rem. Quantum ad vocem, prior est affirmatio negatione, quia minus habet de compositione quam negatio: plures enim dictiones sunt « Socrates non currit » quam « Socrates currit »: et per consequens est magis composita. Ex parte intellectus prior est affirmatio, quae significat compositionem, quam negatio, quae significat divisionem: posterior enim est divisio compositione, sicut non est corruptio nisi generatorum, sic non est divisio nisi compositorum. Ex parte etiam rei affirmatio quae significat esse, prior est negatione quae significat non esse, sicut habitus naturaliter prior est negatione. Tertia vero divisio ipsius enunciationis est in universalem, particularem, indefinitam et singularem. Sufficientia autem dictarum divisionum potest sic sumi. In ipsa enim enunciatione est considerare totam suam entitatem quae est ex subjecto et praedicato, et ipsorum conjunctionem. Et quia omne quod est, ideo est quia unum numero est; ideo consideratur utrum sit una simpliciter, vel una conjunctione: et ista divisio dicitur pertinere ad substantiam enunciationis. Secundo est in ea considerare ipsum praedicatum, ut componitur subjecto sine negatione vel cum negatione. Et quia praedicatum est pars formalis enunciationis; ideo haec divisio dicitur pertinere ad qualitatem enunciationis; qualitatem scilicet essentialem, secundum quod differentia significat quale quid, ut supra dictum est. Tertio est in ea considerare ipsum subjectum, prout scilicet est praedicabile de pluribus, vel de uno; et sic fit tertia divisio: et haec dicitur pertinere ad quantitatem enunciationis, nam quantitas sequitur materiam. Unde versus: Quae, ea, vel hyp., qualis, ne, vel aff., quanta, uni., par., in., sin. Illic autem versus sic intelligitur: In eo namque sunt tria nomina interrogativa: scilicet Quae, quod quaerit de substantia. Qualis, quod quaerit de qualitate; et Quanta, quod quaerit de quantitate. Unde quando fit interrogatio per quae, quaerendo scilicet de substantia enunciationis, respondetur categorica vel hypothetica: quando fit interrogatio per qualis, respondetur affirmativa vel negativa: quando fit interrogatio per quanta, respondetur universalis, particularis, indefinita vel singularis. De prima divisione enunciationis dicitur in tractatu de enunciationibus hypotheticis. De secunda vero ejus divisione, satis dictum est.

## CAPUT VII.

*De quantitate propositionum categoricarum de inesse: scilicet de universali, particulari, indefinita et singulari.*

Restat dicere de tertia divisione, quae est secundum quantitatem. Ubi nota quod enunciationum categoricarum quaedam sunt de inesse, quaedam vero modales. Dicitur autem enunciatio de inesse, quae est de simplici inhaerentia praedicati ad subjectum, ut « homo est animal ». Modalis vero in qua inhaerentia praedicati ad subjectum modificatur, ut « Socratem currere est possibile », vel « homo est animal necessario. » Unde primo dicendum est de quantitate, aequipollentibus, oppositionibus, quae quantitatem sequuntur in enunciationibus de inesse: secundo de eis in enunciationibus modalibus.

Ad videndum autem quantitatem ipsarum enunciationum de inesse, sciendum quod ea quae intellectus apprehendit, quaedam sunt universalis, videlicet quae apta nata sunt in pluribus inveniri: quaedam sunt singularia, videlicet quae non sunt apta inveniri nisi in uno. Universale autem potest dupliciter considerari: uno modo quasi separatim a singularibus, scilicet secundum esse quod habet in intellectu objective: alio modo secundum esse quod habet in singularibus. Primo modo considerato universali, aliquid de eo potest dupliciter enuntiari. Uno modo quando ei attribuitur aliquid quod pertinet ad solam actionem intellectus; ut cum dicimus « homo est praedicabilis de multis » vel « homo est universale, » vel homo « est species »: hujusmodi enim intentiones format intellectus, et attribuit eas naturae intellectae, puta homini, secundum quod comparat ipsam ad res quae sunt extra animam. Alio modo enuntiatur aliquid de universali sic sumpto, quando attribuitur sibi aliquid prout ipsa natura intellecta apprehenditur ab intellectu ut unum; illud tamen quod ei attribuitur, non pertinet ad actum intellectus, sed ad esse quod habet ipsa natura intellecta in rebus quae sunt extra animam; puta si dicatur « homo est dignissima creaturarum »: hoc enim convenit naturae humanae secundum quod est in singularibus: nam quilibet homo singularis est dignior aliis creaturis irrationalibus; sed tamen omnes homines singulares non sunt unus homo extra animam, ut dicitur in praedicta enunciatione « homo est dignissima creatura » ubi ly « homo » stet pro omnibus singularibus, sed solum in acceptione intellectus est unus. Et quia communiter non est apprehensum quod universalis extra singularia subsistant; ideo communis usus loquendi non habet aliquam dictionem seu aliquod signum quod addatur universali secundum dictos modos quibus aliquid de eo praedicatur. Sed Plato, qui posuit universalis subsistere extra singularia, invenit quasdam dictiones, quas addebat universalibus in talibus modis praedicandi: dicebat enim: per se homo est species, vel: homo praedicabilis est species. Secundo modo enuntiatur aliquid de universali, secundum quod est in ipsis singularibus; et hoc dupliciter. Uno modo cum attribuitur sibi aliquid ratione ipsius universalis, quod videlicet ad essentiam ipsius pertinet, vel consequitur principia essentialia ipsius: ut cum dicitur « homo est animal » vel « homo est risibilis ». Alio modo quando attribuitur ei aliquid ratione singularis in quo invenitur; scilicet quando attribuitur sibi aliquid accidens individuale, ut cum



dicatur « homo ambulat ». Et quia iste modus enunciandi aliquid de universali, cadit in communi apprehensione hominum; ideo inventae sunt quaedam actiones ad designandum modum attribuendi aliquid universali sic accepto. Unde si attribuitur sibi aliquid primo modo, scilicet ratione ipsius ut universale est; quia hoc est universaliter de eo aliquid praedicari, ideo adinventum est hoc signum « omnis » quod designat, quod praedicatum attribuitur subjecto universaliter quantum ad totum illud quod sub subjecto continetur. In negativis vero praedicationibus ad idem inventa est haec dictio « nullus »: per quam significatur, quod praedicatum removetur a subjecto universaliter secundum totum quod continetur sub eo. Si vero attribuitur ei aliquid secundo modo, scilicet ratione singularis; ad hoc designandum in affirmativis inventum est signum particulare, scilicet haec dictio « quidam » vel « aliquis », per quam designatur quod praedicatum attribuitur universali subjecto ratione ipsius particularis. Sed quia indeterminate formam alicujus singularis significat; ideo designat universale sub quadam indeterminatione. Unde et dicitur individuum vagum. In negativis vero non est inventa aliqua dictio, seu aliquod aliud signum: sed dicimus « quidam homo non currit » vel « nonnullus homo currit ». Sic ergo sunt tria genera affirmationum in quibus de universali aliquid praedicatur. Una, in qua de universali aliquid praedicatur universaliter, ut « omnis homo est animal ». Secunda, in qua de universali aliquid praedicatur particulariter, ut « quidam homo est albus ». Tertia, in qua aliquid de universali praedicatur absque determinatione universali vel particulari, ut « homo est animal. » Prima enunciatio dicitur universalis: secunda particularis: tertia indefinita. Quibus si addatur singularis, in qua aliquid de singulari praedicatur, ut « Socrates currit », erunt quatuor modi enunciationum, quae possunt esse negativae sicut sunt affirmativae. Et sic patet etc.

#### CAPUT VIII.

##### *De oppositione propositionum categoricarum existentium in figura quantum ad enunciationes de inesse.*

Nunc dicendum est qualiter praedictae enunciationes universales, particulares et indefinitae opponantur. Notandum quod aliquid alicui quatuor modis potest opponi. Uno modo relative, ut pater et filius; alio modo contradictorie, ut, Socrates currit, Socrates non currit; tertio modo privative, ut visus et caecitas; quarto modo contrarie, ut albedo et nigredo. De oppositis relative dictum est in praedicatione relationis. Contradictio vero est oppositio ejus secundum se non est medium inter esse enim et non esse non est medium. Ad hoc autem quod sit contradictio inter aliqua, requiruntur septem: primo quod opponantur duae propositiones, quarum una sit affirmativa et altera negativa: secundo quod tales enunciationes sint ejusdem subjecti: tertio quod sint ejusdem praedicationis: quarto quod non fiat praedictio secundum diversas partes subjecti, sicut cum dicitur, Socrates est albus dentes, et Socrates non est albus manum: quinto quod non sit diversus modus ex parte praedicti, sicut cum dicitur, Socrates currit tarde, et Socrates non currit velociter: sexto, quod non sit diversitas ex parte mensurae loci et temporis: septimo quod non sit diversitas ex habi-

tudine ad aliquid extrinsecum, sicut cum dicitur, decem homines sunt multi in domo, et non sunt multi in teatro. Privatio vero est negatio in subjecto apto nato. Licet enim caecitas neget visum, non tamen simpliciter, sed in subjecto nato apto videre: bene enim dicitur animal caecum, sed non lapis caecus. Contrarie autem opponuntur quae in eodem genere posita maxime a se distant, et vicissim eodem subjecto insunt: non enim albedini opponitur albedo, sed nigredo, quae a se maxime distant. Sciendum, quod oppositio non praedicatur de dictis oppositionibus sicut genus de suis speciebus, sed ut analogum de suis analogatis: vera namque oppositio est oppositio simpliciter, quae dicitur contradictio. Aliae vero dicuntur oppositiones secundum quid; et in tantum sunt oppositiones, in quantum aliquo modo dicunt contradictionem, scilicet esse et non esse. Sciendum etiam est, quod in contradictione ita opponitur negatio affirmationi, quod nihil ponit. In privatione autem ita opponitur privatio habitui, quod supponit subjectum. In contrarietate vero ita est oppositio, quod supponitur subjectum, et aliqua forma: ita enim albedo opponitur nigredini, quod supponit aliquod subjectum, propter quod dicitur « vicissim insunt: » et albedo etiam ponit aliquam formam, quod non facit negatio nec privatio. Sciendum, quod universalis affirmativa opponitur universali negativae ejusdem subjecti et praedicti contrarie: unde « omnis homo est albus » et « nullus homo est albus » sunt contrariae. Ratio est, quia ut dictum est, contrarie opponuntur quae maxime a se distant: non enim nigrum dicitur aliquid ex hoc solo quod non est album; sed super hoc, quod est non esse album, quod significat remotionem albi, addit nigrum extremam remotionem ad albo. Sic ergo id quod affirmatur per hanc enunciationem « omnis homo currit », oportet quod removeatur per hanc negationem « non omnis homo currit »: oportet enim quod negatio removeat modum quo praedicatum dicitur de subjecto, quem designat hoc signum « omnis » sed super hanc remotionem addit hanc enuntiatio « nullus homo currit » totalem remotionem quae est in extrema distantia. Merito ergo dicuntur contrariae « omnis homo currit » et « nullus homo currit. » Particularis autem affirmativa et particularis negativa nullo modo opponuntur contrarie, id est contraria oppositione. Contrariae namque differunt extrema distantia: particularis autem affirmativa et particularis negativa se habent sicut media inter contraria; media autem non sunt contraria. Nec etiam opponuntur contradictorie: ut enim dictum est, hoc signum « quidam » quod facit propositionem esse particularem, designat universale, seu terminum communem, indeterminate; unde non determinat illud ad hoc singulare vel ad istud. Et propter hoc affirmatio et negatio non erunt in eodem subjecto singulari, quod requiritur in contradictione, ut supra dictum est: ideo nullo modo sibi opponitur. Dicuntur tamen subcontrariae, quia sub contrariis continentur. Universalis autem affirmativa et particularis negativa: universalis negativa, et particularis affirmativa, opponuntur contradictorie. Cujus ratio est, quia contradictio consistit in sola remotione affirmationis per negationem. Universalis autem affirmativa removetur per solam negationem particularem, nec aliquid aliud ex necessitate exigitur: sicut per hanc « quidam homo non currit » removetur haec « omnis homo currit ». Parti-



cularis autem affirmativa non potest removeri per particularem negativam, quia sibi non opponitur, ut dictum est. Oportet ergo quod removeatur per universalem negativam. Sic ergo istae, scilicet « omnis homo currit, » « quidam homo non currit, » et « nullus homo currit, » « quidam homo currit, » sunt contradictoriae. Quaelibet autem particularis dicitur subalterna suae universalis. Et sic patet de oppositionibus propositionum in quibus sunt signa, et singularium. Indefinitae autem sequuntur regulam particularium.

## CAPUT IX.

*De aequipollentiis enunciationum categoricarum de inesse.*

Restat nunc dicere de aequipollentiis dictarum enunciationum. Ubi nota: quod negatio praeposita ante signum, et per consequens ante enuntiationem, aequipollet suae contradictoriae. Posita vero post signum, in compositione scilicet enuntiationis, facit eam aequipollere suae contrariae. Praeposita vero et postposita facit eam aequipollere suae subalternae. Causa autem istarum aequipollentiarum est: nam in enuntiationibus praedictis est considerare quantitatem, videlicet universalitatem, particularitatem: et qualitatem, scilicet negationem et affirmationem. Hoc est autem natura negationis (1), ut neget et tollat totum quod invenit post se. Sic ergo ista enuntiatione « omnis homo currit » est universalis et affirmativa: cui si praeponatur negatio, scilicet « non omnis homo currit », ista negatio tollit universalitatem, et sic remanet particularis, vel indefinita, scilicet sine signo, quae aequipollet particulari; et tollit affirmationem, et per consequens remanet negativa. Aequipollet ergo huic, scilicet « quidam homo non currit », quae erat sua contradictoria. Similiter sit haec enuntiatione « nullus homo currit »: certum est, quod haec enuntiatione sit (2) universalis et negativa: praeponatur sibi negatio, et dicatur « non nullus homo currit »: negatio tollit universalitatem, ergo erit particularis: tollit etiam negationem, et sic erit affirmativa, haec scilicet « quidam homo currit », quae erat sua contradictoria: et idem erit de particularibus: nam haec, « non quidam homo currit », aequipollet huic « nullus homo currit »: et propter hanc causam haec « non quidam homo non currit, » aequipollet huic, scilicet, « quilibet homo currit ». Similiter etiam si sumatur haec enuntiatione « omnis homo currit, » et postponatur negatio signo universali et ponatur ad compositionem sic « omnis homo non currit », quia negatio non invenit post se signum, non negat illud, et per consequens remanet universalis enuntiatione; aufert autem negatio affirmationem, et sic facta est enuntiatione negativa et universalis: aequipollet ergo suae contrariae, scilicet huic « nullus homo currit ». Similiter haec « nullus homo currit », est universalis et negativa: nam signum negativum negat compositionem enuntiationis. Postponatur ergo ei negatio, et dicatur « nullus homo non currit »: quia negatio non habet signum post se, remanet enuntiatione universalis. Et quia erat negativa quantum ad compositionem, aufert negationem, et remanet affirmativa, haec scilicet « omnis homo currit », quae erat sua contraria. Similiter etiam sumatur ista « omnis homo

« currit », quae est universalis et affirmativa et praeponatur sibi et postponatur negatio sic « non omnis homo non currit »: certum est quod secunda negatio negat ejus compositionem. Unde dato quod illa esset negativa, haec scilicet, omnis homo non currit, praeposita ergo negatio invenit post se universalitatem quam tollit, et sic facit eam particularem, invenit et negationem quam tollit, et facit eam affirmativam; et erit haec, scilicet « quidam homo currit », quae erat sua subalterna. Et sic est de omnibus aliis si praeponatur et postponatur in eis negatio: quia aequipollent suo subalterno, sive sit universalis, sive particularis. Notandum quod aliquando contingit quod in eadem enuntiatione sunt duo signa universalis negativa: unum videlicet in subjecto, et alterum in praedicato, sicut in hac, « nullus homo nullum animal est »: dico quod ista aequipollet huic « omnis homo aliquod animal est ». Ratio est, quia quodlibet dictorum signorum et est universale, et habet in se negationem. Et quia non praeponitur negatio primo signo, remanet enuntiatione universalis: ergo negatio inclusa in primo signo, quod est signum universale et negativum, praeponitur negationi, seu secundo signo, quod est signum universale, et signum negativum. Et quia invenit universalitatem, destruit ergo universalitatem, et remanet particularis: destruit negationem, et sic remanet enuntiatione affirmativa, haec scilicet « omnis homo aliquod animal est. » Vel dicatur, sicut communiter dicitur, quod nullus non, aequipollet ei, quod est omnis, et dico « non » scilicet negationem quae continetur in secundo signo; non nullus vero aequipollet ei quod est quoddam, et nullus non, sumo pro negatione quae est in primo signo: et sic remanet « omnis homo aliquod animal est ». De omnibus hic aequipollentiis, datur versus. Prae contradic. post contra., prae postque subalter. Qui sic intelligitur: prae, idest negatio praeposita contradic. idest facit aequipollere suo contradictorio: post, idest negatio postposita, facit aequipollere suo contra., idest contrario, Prae postque idest negatio quae praeponitur et post ponitur facit aequipollere suo subalterno. Et sic patet de aequipollentiis categoricarum.

## CAPUT X.

*Quomodo enuntiationes categoriae de inesse sitae in figura se habent ad veritatem et falsitatem.*

Modo dicendum est quomodo se habent praedictae enuntiationes quantum ad verum et falsum. Ubi nota, quod sicut supra dictum est, de universalis secundum quod est in ipsis singularibus dupliciter potest aliquid enunciari, scilicet affirmative, et removeri negative. Uno modo quando attribuitur sibi aliquid ratione ipsius universalis, vel quod pertineat ad ejus essentiam, vel quod sequatur principia ejus essentialia; ut cum dicitur « homo est animal risibile »: et haec vocatur materia naturalis, seu necessaria. Quod autem isto modo ab universalis removetur ratione ipsius naturae, scilicet universalis, dicitur materia remota, seu impossibilis, ut, homo est asinus. Secundo modo quando attribuitur sibi aliquid ratione alicujus singularis, in quo haec natura universalis invenitur, ut cum dicitur « homo currit »: et haec dicitur materia con-

(1) Al. hoc est a natura negationis.

(2) Al. certum est quod hoc est, cui si universalis etc.

tingens. Sciendum, quod in materia naturali et in materia remota, si una contrariarum est vera, reliqua est falsa, et e converso. Et causa haec est, quia si illa dicitur materia naturalis quae provenit secundum naturam universalis, ipsa ergo convenit omni contento sub eo, sic quod universalis affirmativa erit vera, universalis autem negativa, quae removet hanc materiam ab omni contento sub eo, necessario erit falsa: dicitur enim non esse quod est, quod est falsum, scilicet dicere non esse quod est, vel esse quod non est. Similiter etiam in materia remota, universalis negativa est vera, quia removet tale praedicatum ab omni contento sub tali universali. Universalis ergo affirmativa, tunc etiam dicitur falsa, quia dicit esse quod non est: et simili modo se habebit de suis particularibus sibi subalternis. Materia enim naturalis, quia omnibus contentis sub universali convenit, ideo in tali materia particularis affirmativa erit vera, negativa vero falsa, et contra se habebit in materia remota. In materia vero contingenti ambae contrariae possunt esse falsae: et causa potest haberi ex dictis. Si enim in tali materia non attribuitur universali aliquid nisi ratione particularis alicujus contenti sub eo, affirmare illud de omnibus particularibus falsum est, quia dicitur, quod non est esse: similiter etiam illud negare ab omnibus particularibus seu singularibus falsum est, quia dicitur, quod est non esse. Ambae ergo sunt falsae. Particulares vero, quia quaelibet potest salvari in una singulari, ambae sunt verae. Aliam rationem assignat Aristoteles. Nam ut dicit, contraria mutuo se expellunt, ambae istae contrariae non poterunt simul esse, quod est verum: remotiones tamen earum nihil prohibet simul esse: sicut album et nigrum non possunt esse simul, remotiones tamen amborum nihil prohibet esse simul, falsum enim est remotio amborum. In omni materia sive naturali, sive remota, seu contingenti, si una contradictoriarum est vera, reliqua est falsa, et e converso. Contradictoriae enim enunciationes, vel sunt singulares, ut dictum est, vel una est universalis et altera particularis: et hoc habent, quia una removet aliam. Unde si una est negativa, altera est affirmativa: et si affirmativa erit vera, dicit esse quod est, et hoc est verum, ut dicitur 4 Metaphysicorum; verum enim est esse quod est, et non esse quod non est. Falsum autem est non esse quod est, et esse quod non est. Negativa vero sibi contradictoria, quia dicit non esse quod est, erit falsa. Similiter si negativa est vera, dicit non esse quod non est, et affirmativa tunc dicit esse quod non est, quod est falsum. Et sicut inter esse et non esse non est medium, et unum removet alterum, quia impossibile est dici de eodem et verificari simul esse et non esse; sic etiam contradictoriae, quia una ponit de eodem esse, et altera de eodem non esse, ideo una semper removet alteram. Et quia in tali esse vel non esse consistit verum vel falsum, ut dictum est; ergo sine medio si una est vera, reliqua est falsa, et e converso. Et sic patet de veritate et falsitate dictarum propositionum de inesse etc.

## CAPUT XI.

*Quid sit propositio modalis, et de ejus quantitate.*

Nunc restat ponere vel dicere de propositionibus modalibus. Modus autem, ut hic sumitur, est adjacens rei determinatio; idest, determinatio facta per adjectivum. Est autem adjectivum duplex: scilicet nominis, ut album et nigrum, et verbi, cujusmodi sunt adverbium. Quia enim adverbium stat juxta verbum et semper nititur verbo, ideo dicitur esse adjectivum verbi: et sic modus erit duplex: scilicet nominalis, ut cum dicitur cursus velox; et adverbialis, ut cum dicitur, currit velociter. Notandum, quod adverbium multipliciter possunt determinare verba: quaedam determinant ipsum ratione (1) actionis vel passionis quam verbum significat, ut, curro velociter vel ago fortiter: et hoc faciunt adverbium qualitativa. Quaedam vero ratione temporis, ut adverbium temporalia. Alia vero ratione modi, ut adverbium vocandi et optandi. Quaedam vero determinant verbum ratione compositionis quam facit in oratione: et ista sunt sex: scilicet necessario, impossibiliter, possibiliter, contingenter, vero et falso. Cum enim dicitur, Socrates currit velociter, signatur quod cursus ejus sit velox: sed cum dicitur, necessario Socrates currit, non significatur quod cursus ejus sit necessarius, sed quod ista compositio, scilicet Socrates currit, sit necessaria: et sic de aliis quinque adverbium jam dictis. Sciendum quod praedicta sex adverbium faciunt veras enunciationes modales: quia possunt facere propositiones modales adverbialiter sumpta ut cum dicitur, Socrates currit necessario; et nominaliter, ut cum dicitur, Socratem currere est necesse: et sic de aliis. Verum est autem, quod duo istorum modorum, scilicet, vero et falso, non variant enunciationem quantum ad oppositiones, aequipollentias et hujusmodi: sed eodem modo se habent, seu eodem modo sumuntur in eis sicut in categoricis de inesse: ideo de eis praetermittamus. Sed quia alia quatuor adverbium, scilicet, possibiliter, impossibiliter, necessario, contingenter, praedictas enunciationes variant, ideo de ipsis dicemus. De his autem ad praesens videbimus quatuor: scilicet quantitatem, qualitatem, corruptiones et aequipollentias, quia de conversione ipsarum dicitur in tractatu de syllogismis, ubi etiam dicitur de conversione enunciationum de inesse.

Ad sciendum autem earum quantitatem, notandum quod quaedam sunt propositiones modales de dicto, ut, Socratem currere est necesse; in quibus scilicet dictum subicitur, et modus praedicatur: et istae sunt vere modales, quia modus hic determinat verbum ratione compositionis, ut supra dictum est. Quaedam autem sunt modales de re, in quibus videlicet modus interponitur dicto, ut, Socratem necesse est currere: non enim modo est sensus, quod hoc dictum sit necessarium, scilicet Socratem currere; sed hujus sensus est, quod in Socrate sit necessitas ad currendum. Et clarius apparet de possibili. Cum enim dicitur, Socratem currere est possibile, sensus est, quod hoc dictum, scilicet Socratem currere, est possibile: sed cum dicitur, Socratem possibile est currere; sensus est quod in Socrate sit possibilitas currendi. Sunt autem et aliae enunciationes

(1) *Al. rationes.*

quae videntur modales, et non sunt: quando videlicet modus subicitur, et dictum praedicatur: ut, possibile est Socratem currere. Ratio hujus est, quia denominatio debet sumi a forma: formale autem in enunciatione est praedicatum, et ideo a praedicato debet denominari. Cum ergo in enunciatione praedicatur modus, erit modalis: cum vero praedicatur dictum, non erit modalis. Sciendum quod omnes enunciationes modales de dicto sunt singulares, quantumcumque sit in eis signum universale. Unde haec « omnem hominem currere est possibile », est singularis: et sic de omnibus aliis. Ratio hujus est. Nam, ut supra dictum est, enunciatio dicitur singularis quia in ea subicitur singulare, seu terminus singularis, ut, Socrates currit. Sed in talibus enunciationibus subicitur hoc dictum signatum, scilicet omnem hominem currere, quod totum accipitur pro uno termino signato. Omnes ergo tales enunciationes sunt singulares. In modalibus vero de re, et in his quae videntur modales et non sunt, sumitur quantitas secundum quod in dicto sunt termini et signa. Unde haec « possibile est omnem hominem currere », est universalis: et haec « possibile est aliquem hominem currere », est particularis: et sic se habet de modalibus de re. Patet ergo de earum quantitate.

## CAPUT XII.

*De qualitate propositionum modalium quoad affirmationem et negationem.*

Sequitur de ipsarum qualitate. Ubi nota, quod in enunciationibus de inesse, est tria considerare: scilicet subjectum, praedicatum et compositionem utriusque: quae ita se habent quodammodo, sicut in naturalibus. In homine enim est considerare corpus et animam et humanitatem: corpus est materia: anima est forma, quae est pars compositi, unde forma est respectu corporis; humanitas vero est forma respectu utriusque, scilicet respectu corporis et animae. Sic in proposito, in enunciatione subjectum est sicut materia: praedicatum vero sicut forma, quae est pars compositi: unde est quasi forma respectu subjecti: compositio vero est forma utriusque. Unde in eis affirmatio et negatio sumitur secundum compositionem vel divisionem, ubi est negatio. Unde quando in compositione non est negatio, erit enunciatio affirmativa: si vero in ea est negatio, est enunciatio negativa. In modalibus autem, sicut se habet in illis de inesse praedicatum, sic se habet modus: quia est ut forma respectu dicti. Et ideo, si modus componitur cum dicto affirmative, modalis erit affirmativa: si vero negative, propositio erit negativa. Haec enim « Socratem non currere est possibile, » est affirmativa, quia compositio modi cum dicto affirmatur. Haec autem « Socratem currere non est possibile » est negativa, quia talis compositio negatur. Et hoc clare apparet in veritate et falsitate earum. Affirmatio enim de eodem singulari opponitur contradictoriae negationi; et per consequens, si una est vera, reliqua est falsa. Sed istae « Socratem currere est possibile », Socratem non currere est possibile, ambae sunt verae, quia Socrates potest currere et potest non currere, et de utroque dicto verificatur possibilitas. Non ergo est una affirmativa et alia negativa. Sciendum, quod licet enunciatio modalis dicatur affirmativa et ne-

gativa a modo affirmato et negato; tamen quaelibet potest quadrupliciter variari: quia vel habebit utrumque, scilicet dictum et modum affirmatum, ut, Socratem currere est possibile: vel utrumque negatum, ut, Socratem non currere non est possibile: vel dictum negatum et modum affirmatum, ut, Socratem non currere est possibile: vel dictum affirmatum et modum negatum, ut, Socratem currere non est possibile. Et sic patet de ejus qualitate.

## CAPUT XIII.


*De oppositione et aequipollentia enunciationum modalium.*

Nunc videndum est de earum oppositione. Ubi nota, quod modales hujusmodi variantur secundum affirmationem et negationem in dicto et in modo, sicut immediate dictum est; et sic faciunt inter se oppositiones. Sed quia diversi modi sibi invicem opponuntur, ideo primo dicendum est de oppositionibus modalium secundum diversos modos; postea reducemus unum modum ad alium per aequipollentias; et sic patebunt omnium oppositiones. Notandum, quod possibile dupliciter potest sumi: vel in toto suo significato, et tunc comprehendit necessarium et contingens: et sic quod necesse est esse, possibile est esse; et quod contingens est esse, possibile est esse. Alio modo sumitur solum pro contingenti; et sic sumitur in istis oppositionibus. Unde, licet quatuor sint enunciationes modales, tres tamen earum faciunt diversitatem in oppositionibus et aequipollentibus; quia illa de contingenti et illa de possibili pro eodem sumuntur. De istis ergo tribus modis dicamus; scilicet, necesse, impossibile, possibile. Et licet, ut dictum est, quando modus substant (1) et dictum praedicatur, enunciatio non sit modalis, tamen cito reducitur ad modalem. Et sic modo enunciationibus illis utemur. Sciendum, quod sicut dictum est in enunciationibus de inesse, hoc signum « omnis » designat, quod praedicatum enunciationis attribuitur subjecto quantum ad totum illud quod sub eo continetur: hoc vero signum « nullus » removet a subjecto totum quod sub eo continetur; et propter hoc universalis affirmativa et universalis negativa sunt contrariae. Sic in istis enunciationibus modalibus, iste modus « necesse » facit significare totam inhaerentiam subjecti ad praedicatum, quia quod necessario inest omni tali inest; et ideo tenet eundem locum, scilicet modalis affirmativa de necessario, et universalis affirmativa de inesse. Et sicut « nullus » totam removet, ita etiam « impossibile »; quia quod impossibiliter inest, nulli tali inest; et ideo praepositio de impossibili tenet locum universalis negativae. Et sicut « quidam » affirmando non totam inhaerentiam ponit, similiter etiam negando non totum quod sub subjecto continetur removet, sic iste modus « possibile »: quia quod possibiliter inest, non inest omni; et quod possibiliter non inest, non inest nulli; et ideo possibile affirmando tenet locum particularis affirmativae; et possibile negando tenet locum particularis negativae. Secundum ergo praedieta, istae enunciationes, necesse est esse, et impossibile est esse, sunt contrariae: necesse est esse, et possibile est non esse, sunt contradictoriae: impossibile est esse, et possi-

(1) *Al.* quando modus substantialiter.



bile est esse, sunt contradictoriae: possibile est esse, et possibile est non esse, sunt subcontrariae: necesse est esse, et possibile est esse, sunt subalternae: impossibile est esse, et possibile est non esse, sunt subalternae: ut patet in figura sequenti.



His visis, statim patebit de aequipollentiis earum, et de oppositionibus ipsarum, quando variantur per negationes positas in dicto vel in modo. Aequipollentiae namque modalium, eodem modo fiunt sicut in enunciationibus de inesse, secundum videlicet versum illum, Praecontradic., post contra., prae postque subalter. Negatio enim praeposita modo, facit aequipollere suo contradictorio: unde haec « non necesse est esse » aequipollent huic « possibile est non esse ». Et haec « non impossibile est esse, » aequipollent huic « possibile est esse ». Negatio vero postposita, scilicet modo, facit aequipollere suo contrario: unde haec « necesse est non esse », aequipollent huic « impossibile est esse. » Et haec « impossibile est non esse, » aequipollent huic « necesse est esse ». Prae postque subalter, id est negatio praeposita et postposita modo facit aequipollere suo subalterno: unde haec « non necesse est non esse » aequipollent huic « possibile est esse »; et similiter haec « non impossibile est non esse » aequipollent huic « possibile est non esse ». Ex dictis potest patere qualiter oppositiones propositionum ejusdem modi variantur per negationes: verbi gratia de enunciationibus de necessario, ista « necesse est esse » et haec « non necesse est esse », sunt contradictoriae; et istae, scilicet « non necesse est non esse » et « necesse est esse », sunt subalternae; et sic se habet de singulis aliis enunciationibus modalium, per hunc versum: Amabimus, edentuli, illiac, purpurea, ut satis patet.

#### CAPUT XIV.

##### *De enunciatione hypothetica, et de tribus speciebus ejus.*

Restat nunc dicere de enunciationibus hypotheticis, seu suppositivis, quod idem est. Definitur autem enunciatio hypothetica sic. Enunciatio hypothetica est quae habet duas categoricas principales partes sui, ut « si homo currit, homo movetur ». Patet quod haec « homo currit », est una enunciatio categorica: et illa « homo movetur » est altera. Et dico principales partes: quia termini sunt principales partes propositionis categoricae, non tamen

sunt principales partes propositionis hypotheticae, sed remotae, sicut lapides sunt partes domus remote; et in hoc differt enunciatio hypothetica ab enunciatione categorica: nam principales partes categoricae sunt termini; principales autem partes hypotheticae sunt duae categoricae. Alia etiam differentia est inter propositiones categoricas et hypotheticas: nam in categorica subjectum suscipit nomen praedicati: cum enim dicitur « homo est animal », homo recipit nomen animalis, cum homo dicatur esse animal; non autem sic in hypotheticis: quia unum de altero non praedicatur; sed tantum aliquid dicitur esse, si alterum fuerit. Verbi gratia: cum dicitur « si peperit, cum viro concubuit », non est sensus, quod parere sit cum viro concumbere; sed est sensus, quod partus esse non potuisset, nisi cum viro concubuisset. Similiter etiam cum dicimus « si homo est, animal est », non est sensus quod homo sit animal; sed est sensus, quod si aliqua res est homo, necesse est quod aliqua res sit animal. Dividitur autem propositio hypothetica in tres species: quia quaedam est conditionalis, quaedam disjunctiva et quaedam copulativa. Conditionalis est illa in qua conjunguntur duae propositiones categoricae per hanc conjunctionem « si »: ut « si homo est, animal est ». Haec autem conditionalis potest fieri tam ex parte subjecti quam ex parte praedicati. Ex parte subjecti; ut si dicatur « si homo currit (1), animal currit »; ex parte vero praedicati, ut si dicatur « si homo currit, homo movetur ». Prima autem propositio sive enunciatio categorica quae est in his enunciationibus hypotheticis dicitur antecedens. Secunda vero dicitur consequens; et propter hoc dicitur consequentia. Ad conditionalem autem reducuntur rationales, ut « Socrates est homo, ergo Socrates est animal ». Et omnis causalis, ut « quia Socrates est homo, Socrates est animal », et temporalis, « ut quando Socrates est homo, Socrates est animal », et omnes hujusmodi. Notandum, quod Ammonius ponit duplicem hypothesim: una est quando supponitur aliquod impossibile, ad quod tamen necessario sequitur aliud impossibile. Verbi gratia: supposito quod quatuor sint tria, quaternarius numerus erit impar: constat enim quod hypothesis supponit impossibile, et impossibile subinfert; tamen stante hypothesi, necessario infertur. Ex quo potest intelligi, quod conditionalis potest esse vera, et tamen ambae ejus partes sunt falsae. Unde ista est vera « si homo est asinus: homo est rudibilis »: tamen utraque categoricarum est falsa. Secunda vero hypothesis est quod quandoque aliquid dicitur esse vel non esse si quid fuerit vel non fuerit, ut « si homo est, animal est »: vel « si homo est lapis non est ». Ex dictis potest patere, quod veritas enunciationis hypotheticae est in consequentia terminorum qui sunt in consequente, ad terminos qui sunt in antecedente: quia enim animal necessario sequitur ad hominem, certum est quod quidquid fuerit homo, erit animal; et si ad currere sequitur moveri, sequitur ergo quod quidquid currit movetur. Si ergo est homo, est animal: et si currit movetur. Cuicumque ergo vere vel false attribuetur currere, attribuetur et moveri. Unde ista est vera: « si immobile currit, immobile movetur ». Et propter hoc dicitur quod ad veritatem ejus requiritur quod antecedens non possit esse verum sine consequente:

(1) Al. si homo non currit.



quia tanta est necessitas consequentis ad antecedens, quod sicut se habet antecedens, ita se habet consequens. Si vero aliter se haberet, scilicet quod antecedens esset verum et consequens falsum, falsa esset consequentia; quia terminus in consequente positus non necessariam haberet connexionem cum termino posito in antecedente: ut hic « si homo est albus, homo est musiens », certum est quod haec falsa est; non enim necessario ad album sequitur musicum. Et inde est quod omnis conditionalis vera est necessaria, et omnis falsa est impossibilis; quia ut dictum est, terminus consequentis necessario sequitur terminum antecedentis. Qualiter autem conditionalis varietur per affirmationem et negationem, dicitur, cum de syllogismis hypotheticis agatur. Disjunctiva vero est illa in qua junguntur duae enunciationes categoricae per conjunctionem speciei disjunctivae, ut hic, « animal aut est sanum, aut est aegrum ». Veritas autem praedictae enunciationis est, quod si unum ponitur, alterum removetur; et si unum removeatur, alterum sumatur. Unde videtur quod tantum valeat ista « aut est sanum, aut est aegrum » quantum ista conditionalis, « si non est sanum, est aegrum ». Et licet in praedicta materia verum sit, tamen non semper in omni materia istae duae sibi aequipollent in veritate: nam conditionalis ex una parte negata, et ex altera affirmata salvatur in contradictoriis, contrariis, et disparatis, et erit semper vera: vera enim est ista, « si est album non est nigrum »: ista tamen est falsa, « aut est album aut est nigrum »: posset enim aliquid esse quod nec album esset nec nigrum: et sic etiam est de disparatis. Differt enim disjunctiva a tali conditionali. Unde ad veritatem disjunctivae requiritur quod de tali materia sit in qua unum omnino ponatur, et alterum removeatur, vel e converso: et propter hoc ad ejus veritatem requiritur quod altera ejus pars sit vera. Et si utraque pars ejus erit vera vel falsa, ipsa enunciatio disjunctiva erit falsa. Copulativa vero enunciatio est illa in qua junguntur duae enunciationes categoricae per conjunctionem copulativam, ut « Socrates currit, et movetur »: in ista enunciatio nulla ponitur conditio, sed solum conjunctio enunciationis. Et quia copulativa conjunctio semper debet similia copulare; si antecedens erit verum, etiam consequens necesse est quod sit verum, et e converso. Et sic patet qualiter dictae enunciationes hypotheticae se habent ad veritatem: nam conditionalis potest esse vera, utraque ejus parte existente falsa. Disjunctiva est vera una ejus parte existente falsa. Copulativa vero ad hoc quod sit vera, utraque ejus pars necessario debet esse vera. Et sic patet de enunciationibus hypotheticis. Siquidem autem hoc de ipsis omissum est, dicitur cum de syllogismis hypotheticis agatur etc.

## TRACTATUS VII.

DE SYLLOGISMO SIMPLICITER.

### CAPUT I.

*Quid sit syllogismus, et quae ad ipsum requiruntur constituendum.*

Modo dicendum est de tertia parte, videlicet de his quae pertinent ad tertiam operationem intellectus. Licet enim, ut dictum est, a Philosopho ponantur duae operationes intellectus, scilicet simplicium intelligentia, et compositio vel divisio; tamen additur tertia operatio, quae est discursus ab uno composito vel diviso ad aliud. Hoc autem fit per argumentationem. Est autem argumentatio oratio significativa discursus rationis ab uno cognito ad aliud incognitum, vel a magis incognito ad minus cognitum. Sunt autem argumentationis quatuor species: scilicet syllogismus, enthymema, inductio et exemplum. Sive haec divisio sit generis in suas species, vel analogi in sua analogata, nihil ad propositum. Et quia syllogismus perfectior est omnibus aliis, ad quem aliae species argumentationis reducuntur, sicut imperfectum ad perfectum; ideo de ipso dicendum est. Definitur autem syllogismus sic: Syllogismus est oratio in qua quibusdam positis et concessis necesse est aliud evenire per ea quae posita sunt et concessa. Oratio hic est genus syllogismi. Ut enim in tractatu de enunciatione dictum est, nihil prohibet orationem esse plures et unam ejusmodi est in syllogismo. In hoc autem quod dicit « quibusdam positis » tangit propositiones ipsius syllogismi: per hoc quod dicit « necesse est aliud evenire », tangit conclusionem. Unde oportet scire quid est propositio. Est autem propositio, ut hic sumitur, enunciatio, qua posita ad eam aliud sequitur: non enim omnis enunciatio est propositio; sed solum illa quae ponitur in aliqua specie argumentationis, ad quam sequitur conclusio. Verbi gratia, cum dicitur: omnis homo est animal, omne risibile est homo, ergo omne risibile est animal; ista « omnis homo est animal », est propositio, et similiter illa « omne risibile est homo »; proponuntur enim ut ad eas sequatur illa « omne risibile est animal ». Haec autem « omne risibile est animal », licet sit enunciatio, constat enim ex terminis, non tamen est propositio. Est autem terminus in quem resolvitur propositio, ut subjectum et praedicatum. Cum enim dico, homo est animal, « homo » est terminus qui dicitur subjectum; « animal » est terminus qui dicitur praedicatum. Sciendum, quod licet propositio ex terminis componatur, et in eis resolvatur; non tamen in definitione termini ponitur compositio propositionis, sed resolutio. Hujus causa est: nam Logica, ut Boetius in sua Topica dicit, duas habet partes: scilicet inventivam, et judicativam. Est autem inventio excogitatio rerum verarum aut verisimilium, quae alteram partem contradictionis probabilem reddunt. Probabile autem est quod videtur omnibus aut pluribus aut sapientibus, et his scilicet sapientibus, aut omnibus aut pluribus aut maxime notis. Huic autem parti Logicae deserviunt duo libri: scilicet Topicorum et Elenchorum. Judicium autem, ut hic sumitur, est recta determinatio rationis, in his quorum est judicium. Recte autem de-

terminat ratio quando principiata resolvit in principia. Et ideo scientia quae est recta determinatio scibitum est per causas, scilicet cum ratio resolvit causata in causas: et propterea haec pars Logicae, scilicet iudicativa, dicitur analytica seu resolutoria, quia resolvit principiata in principia. Huic autem parti Logicae deserviunt duo libri; scilicet Priorum et Posteriorum. Et quia de materia libri Priorum hic intendimus, ideo hic definitur terminus per resolutionem propositionis. Est autem subjectum de quo aliquid dicitur. Praedicatum vero quod de altero dicitur: seu sit dicere mentis vel rationis, seu sit oris vel vocis. Dicitur autem terminus eo quod sic per ipsum terminatur propositio, quod non ultra progreditur. In hoc autem tractatu dicemus de syllogismo simpliciter. Est autem syllogismus simpliciter, in quo non consideratur materia in qua talis vel talis syllogismus fit; idest non consideratur utrum talis materia sit probabilis vel necessaria; sed solum consideratur syllogismus ad suam ordinationem. In omni autem materia existentibus veris vel probabilibus praenissis, semper sequitur conclusio vera vel probabilis. Quod autem talis ordinatio sit bona, probatur per duo principia per se nota. Dico autem principia hic primas propositiones per se notas. Haec autem principia sunt « dici de omni », et « dici de nullo ». Est autem dici de omni, quando nihil est sumere sub subjecto, de quo non dicatur praedicatum; dici vero de nullo est, quando nihil est sumere sub subjecto, a quo non removeatur praedicatum. De his autem inferius melius dicetur. Sciendum quod quia syllogismi variantur per diversas figuras, ut infra dicitur; ideo aliqui syllogismi non possunt immediate probari per dicta duo principia. Et propterea tales syllogismi indigent uno alio principio, per quod possunt reduci ad dici de omni, vel ad dici de nullo. Hoc autem principium est: Quando ex opposito consequentis infertur oppositum antecedentis primae conclusionis, tunc prima consequentia fuit bona. Unde omnes illi syllogismi in quibus non potest recte salvari dici de omni, vel dici de nullo, cum dicto tertio principio reducuntur ad formam in qua salvatur dici de omni, vel dici de nullo: et haec reductio vocatur ab aliquibus per impossibile, a Philosopho vero per syllogismum conversivum. Similiter etiam reducuntur praedicti tales syllogismi ad praedicta duo principia per conversionem propositionum. Sed quia conversiones non probantur esse bonae nisi per tertium principium, ideo dicendum est, qui syllogismi reducuntur ad illa duo principia solum in virtute tertii principii. Qualiter autem fiant conversiones, et per dictum tertium principium probentur, dicamus: et primo in propositionibus de inesse, deinde in propositionibus modalibus.

## CAPUT II.

### *De conversione propositionum de inesse, et de speciebus ejus.*

Conversio autem propositionum, ut hic sumitur, est facere de subjecto praedicatum et de praedicato subjectum; ita quod existente conversa vera, etiam ea in quam convertitur, sit vera. Verbi gratia ista propositio, Omnis homo est animal, si convertitur in istam, Omne animal est homo, bene fit de praedicato subjectum, et de subjecto praedicatum;

tamen prima propositio est vera, secunda vero falsa: ideo talis conversio non est bona. Est autem in propositionibus terminorum finitorum, de quibus hic intendimus, duplex conversio: scilicet simplex, et per accidens. Dicitur autem conversio simplex, quando de praedicato fit subjectum, et de subjecto praedicatum, manente secunda propositione in eadem qualitate et quantitate cum prima. Per accidens vero dicitur, quando de subjecto fit praedicatum, et e converso, manente eadem qualitate propositionis, sed mutata quantitate. Primo modo convertuntur propositiones, universalis negativa et particularis affirmativa: secundo modo convertuntur universalis affirmativa, et, ut aliqui dicunt, universalis negativa. Tamen non est necessarium hoc ponere: si enim ad hanc, Nullus homo est lapis, sequitur, nullus lapis est homo, et ista est vera; necessario sequitur hanc esse veram: quidam lapis non est homo. Ut enim supradictum est, existentibus universalibus veris, semper particulares sunt verae, licet non e converso. Primo probemus conversionem simpliciter, et primo universalium. Et quia ut dictum est, in talibus syllogismis et eorum propositionibus non curatur in qua materia sint; ideo utemur terminis transcendentibus, loco quorum possunt poni termini quicumque. Sit ergo propositio convertenda ista Nullum b. est a. Et semper supponatur quod pro b. et pro a. sumantur tales termini significativi qui faciant propositionem veram (1): sicut si pro b. sumatur homo, et pro a. lapis. Dico ergo quod praedicta propositio convertitur in istam, Nullum a. est b.: quod probo per dictum tertium principium sic. Quando ex opposito consequentis infertur oppositum antecedentis, prima consequentia fuit bona: sed sic est in proposito, ergo etc. Cum ergo dico, nullum b. est a., ergo nullum a. est b.; facio consequentiam, cuius antecedens est, nullum b. est a.; consequens vero est, nullum a. est b. Modo videamus si ex opposito consequentis infertur oppositum antecedentis vere. Huic autem propositioni, scilicet, nullum a. est b., quae est consequens, potest esse duplex oppositum: scilicet contrarium, et contradictorium. Sumamus ergo contradictorium ejus, scilicet, quoddam a. est b.: particularis enim affirmativa, et universalis negativa sunt contradictoriae: ad istam autem, scilicet, quoddam a. est b., sequitur ista, scilicet, quoddam b. est a. ut probabo. Sed haec, quoddam b. est a., et illa quae fuit antecedens, scilicet, nullum b. est a., sunt oppositae contradictoriae. Ergo ex opposito consequentis sequitur oppositum antecedentis. Prima ergo consequentia quam vocamus conversionem, fuit bona. Nunc oportet probare quomodo ad illam, quoddam a. est b., sequitur illa, quoddam b. est a. Hoc autem probatur per syllogismum expositoryum. Ponam ergo propositiones primas in terminis significativis, et sicut dicimus, quoddam a. est b., dicamus, quidam homo est animal; et sicut dicimus, quoddam b. est a., dicamus, quoddam animal est homo. Accipiamus primam, scilicet, quidam homo est animal: signetur iste homo et hoc animal: si enim ista est vera, quidam homo est animal, oportet quod ipsa sit vera in aliquo homine signato, puta Socrate vel Platone; et si in nullo homine signato erit vera, nullo modo erit vera. Signetur ergo illa res in qua animalitas et humanitas signatur, et voecetur Socrates: modo

(1) *AI.* variam.

fiat syllogismus expository sic. Socrates est hic homo: Socrates est hoc animal: ergo hoc animal est hic homo, et per consequens, quoddam animal est homo. Ergo ad hanc, quidam homo est animal, quae sumebatur loco hujus, quoddam b. est a. sequitur, quoddam a. est b.: ergo ad hanc, quoddam a. est b., sequitur, quoddam b. est a.: et hoc est quod volebamus dicere. Et sic patet de conversione universalis negativae. Particularis affirmativa convertitur simpliciter, sicut: quoddam b. est a.; ergo quoddam a. est b.: et probatur per idem principium. Ex opposito ergo consequentis infertur oppositum antecedentis. Prima ergo consequentia seu conversio fuit bona. Potest autem probari haec conversio per syllogismum expository, ut dictum est. Universalis autem affirmativa convertitur per accidens sic. Omne b. est a.: quoddam a. est b. Et probatur eodem modo. Oppositum enim hujus, quoddam a. est b., est hoc: nullum a. est b.: quae convertitur in illam, nullum b. est a.: haec autem est contraria primae, quae erat, omne b. est a. Ex opposito ergo consequentis infertur oppositum antecedentis: prima ergo consequentia seu conversio fuit bona. Particularis vero negativa non convertitur, quia ex opposito consequentis non infertur oppositum antecedentis. Verbi gratia: sit propositio convertenda ista, quoddam b. non est a. Convertatur ergo: quia vel convertetur in universalem negativam, vel in particularem negativam. In universalem negativam sic: quoddam b. non est a.: ergo nullum a. est b. Illius oppositum est, vel, omne a. est b. vel, quoddam a. est b. Sed utraque istarum propositionum, scilicet, omne a. est b. vel, quoddam a. est b., convertuntur in istam, quoddam b. est a. quae non est oppositum antecedentis, quod erat, quoddam b. non est a. quia subcontrarietas non est oppositio, ut supra patuit: ergo non valet ista conversio. Ideam etiam sequitur si converteretur in particularem, scilicet in illam, quoddam a. non est b., ejus oppositum est, omne a. est b., quae convertitur in hanc, quoddam b. est a., quae proprie non est opposita, ut dictum est. Quod etiam talis conversio non valeat, patet, quia non tenet in omni materia; et potest ostendi in terminis significativis. Licet enim istud sequatur: quidam lapis non est homo, ergo quidam homo non est lapis; tamen istud non sequitur: quoddam animal non est homo, ergo quidam homo non est animal: imo omnis homo est animal. Fit autem de praedictis conversionibus quidam versus sic. Fei simpliciter convertitur, eya per acci. Per a. enim hic sumitur universalis affirmativa, per e. universalis negativa, per i. particularis affirmativa, per o. particularis negativa. Constructur autem versus sic. Fe. idest universalis negativa, Ci. idest particularis affirmativa, convertitur simpliciter. E. idest universalis negativa. Va. idest universalis affirmativa, convertuntur per accidens. Et sic patet de conversione propositionum de inesse.

### CAPUT III.

#### *De conversionibus propositionum modalium, et differenti modo earum.*

Nunc dicendum est de conversionibus propositionum modalium. Sciendum quod propositiones de necessario et impossibili eodem modo convertuntur sicut propositiones de inesse, et per idem

principium probantur. Propositiones vero de possibili et contingenti non eodem modo convertuntur. Sed quia oppositiones non eodem modo sumuntur in propositionibus modalibus sicut in propositionibus de inesse; ideo oportet manifestare probationes praedictarum propositionum. Et sicut ostendimus de propositionibus de necessario, sic erit de propositionibus de impossibili. Sit ergo propositio ista convertenda, Necessesse est nullum b. esse a. quae convertitur in hanc, necessesse est nullum a. esse b., quia ex opposito secundae propositionis infertur oppositum praecedentis: oppositum enim istius, necessesse est nullum a. esse b., est illud, non necessesse est nullum a. esse b.: sed ista aequipollet huic, possibile est aliquod a. esse b.: nam non necessesse non esse, aequipollet huic quod est possibile esse: quia nonnullus aequipollet huic quod est aliquis: ergo ista, non necessesse est nullum a. esse b. aequipollet huic, possibile est aliquod a. esse b. Ad hanc autem sequitur, possibile est aliquod b. esse a.: quod potest probari per syllogismum expository, ut supra dictum est de particulari affirmativa. Sed ista, possibile est aliquod b. esse a., est contradictoria antecedentis, quae erat, necessesse est nullum b. esse a. Ex opposito ergo consequentis infertur oppositum antecedentis. Prima ergo consequentia seu conversio fuit bona. Particularis affirmativa convertitur eodem modo, et probatur per idem principium sic. Necessesse est quoddam b. esse a.: ergo necessesse est quoddam a. esse b. Cujus oppositum est, non necessesse est aliquod a. esse b., quae, aequipollet huic, possibile est nullum a. esse b., quae convertitur in istam, possibile est nullum b. esse a. Non enim sumitur hic possibile prout idem est quod contingens, quia non convertitur, sicut infra patebit; sed sumitur modo possibile in suo toto significato, ut comprehendit necessarium et contingens, ut supra in alio tractatu dictum est. Haec autem, possibile est nullum b. esse a., est contradictoria huic, necessesse est quoddam b. esse a., quae erat antecedens. Eodem etiam modo probatur (1) conversio universalis affirmativae per accidens, scilicet per conversionem per accidens factam. Notandum quod haec est differentia inter concreta accidentaliter praedicata, et substantialia, seu ipsorum subjecta. Nam ex parte praedicati dicunt formam, ex parte vero subjecti dicunt illud quod habet illam formam. Cum enim dico « Socrates est albus », ly « albus », dicit solam formam albedinis; sed cum dico « quoddam album est Socrates », ly « album », dicit habens albedinem. In tali ergo materia deficit conversio modalium affirmativarum: nam haec est vera, Necessesse est quoddam album esse corpus; et tamen haec est falsa, Necessesse est quoddam corpus esse album: quia haec est contingens. Et sic patet de conversionibus propositionum de necessario. Eodem modo fiunt illae de impossibili in suo toto significato. Conversiones autem propositionum de contingenti, et de possibili, ut est idem quod contingens, fiunt in terminis, scilicet ut, contingit nullum b. esse a., convertitur in hanc, contingit omne b. esse a. Unde istae conversiones alio modo et opposito se habent ad conversiones propositionum de inesse, et modalium dictarum: nam in illis semper de subjecto fit praedicatum, et e converso; et semper in eis servatur eadem qua-

(1) *Al. prior.*



litas, licet non semper eadem quantitas. In istis vero, quod fuit subjectum vel praedicatum, eodem modo remanet, et mutatur qualitas. Ratio horum est: quia, ut dictum est, illa est bona conversio, in qua sicut est veritas in propositione conversa, ita est in illa in quam convertitur. Si autem propositio de contingenti converteretur sic, quod de subjecto fieret praedicatum, et e converso; non inveniretur in omni materia vera; sed in aliqua materia esset antecedens verum et consequens falsum; ergo mala esset conversio. Verbi gratia, in terminis significativis: contingit nullum hominem esse album, haec est vera: quia contingere hoc posset: si convertatur sic, contingit nullum album esse hominem, haec est falsa. Ponatur ergo modo, quod Socrates esset albus; nunquam poterit contingere Socratem non esse hominem. Fit autem ista conversio in diversa qualitate. Nam triplex est contingens: vel ad utrumlibet, ut, contingit hominem esse album: vel ut in pluribus, ut, contingit hominem habere duos oculos: vel ut in paucioribus, ut, contingit hominem esse monoculum. Contingens autem ad utrumlibet dicitur, quia quot possunt inesse, tot possunt removeri. Ergo negativa et affirmativa sunt simul verae. Contingens autem ut in pluribus non convertitur in contingens ut in pluribus, sed in contingens ut in paucioribus. Unde illa « contingit nullum hominem esse caecum », convertitur in istam « contingit omnem hominem esse caecum ». Prima enim est contingens ut in pluribus, secunda vero ut in paucioribus. Eodem modo convertitur contingens ut in paucioribus sicut contingens ut in pluribus, et eodem modo sumitur eorum conversio sicut dictum est de contingentibus ad utrumlibet. Nam si contingit in paucioribus, deficit in pluribus. Et sic patet de conversionibus modalium. Notandum quod aliquae propositiones ponuntur quae carent conversione, cum nihil faciant ad propositum, quia nulla earum posset poni in aliquo syllogismorum qui reducendi sunt, ita videlicet quod illae indigeant conversione: et sic de dictis tractare est superfluum.

#### CAPUT IV.

##### *De syllogismis ostensivis de inesse quoad modum et signum.*

His habitis, modo dicendum est de syllogismis: et primo de syllogismis de inesse, secundo de modalibus, tertio de hypotheticis. Syllogismorum autem de inesse quidam sunt ostensivi, quidam vero ad impossibile. Unde primo dicendum est de syllogismis ostensivis. Sciendum quod omnis syllogismus ostensivus constat ex tribus orationibus, quarum duae vocantur propositiones seu praemissae, ultima vero dicitur conclusio: verbi gratia. Omne animal est substantia: omnis homo est animal: ergo omnis homo est substantia. Istaec duae, scilicet, omne animal est substantia, et, omnis homo est animal, sunt duae propositiones, quarum prima, scilicet, omne animal est substantia, dicitur major: secunda vero dicitur minor, seu assumpta: tertia vero oratio, scilicet, omnis homo est substantia, dicitur conclusio. Et licet praedictae tres orationes sint perfectae constantes ex subjecto et praedicato, non tamen habent nisi tres terminos, qui sunt « homo » « animal » et « substantia. » Et causa est, quia

omnes isti termini sumuntur bis: unde terminus bis sumptus in praemissis, dicitur medium. Terminus in majori propositione sumptus cum medio dicitur major extremitas. Terminus vero sumptus in minori propositione cum medio dicitur minor extremitas. In conclusione vero iterum sumitur major extremitas eum minori: ita scilicet quod si conclusio est directa, major extremitas praedicatur de minori. Si vero indirecta, fit e converso. Unde medium: nunquam ponitur in conclusione. Ad sciendum autem causas dictorum nominum, sciendum quod homo est rationalis. Dicitur autem rationalis et non intellectualis: quia intellectus apprehendit sine discursu: ratio vero licet non sit alia potentia quam intellectus, tamen dicitur ratio, quia quicquid apprehendit, apprehendit eum discursu; non ergo venit ad perfectam apprehensionem alicujus rei nisi discurrat a magis noto ad minus notum. Verbi gratia, ad cognoscendum perfecte quid sit homo, primo intelligimus quod sit ens, deinde quod sit substantia, deinde quod sit corpus, deinde quod sit animatum corpus, deinde animal, deinde rationalis: et sic veniemus in cognitionem hominis discurrendo. Sive autem talis discursus fiat sine complexione, scilicet intelligendo ens, substantiam, corpus, non ponendo ibi « est » ut scilicet non dicamus « hoc est « homo »: vel fiat eum complexione, nihil ad propositum: sufficit quod discurrendo intelligimus, et talis discursus est a magis noto nobis ad minus notum. Magis autem nota nobis sunt magis universalia, ut I Physicorum dicitur, quia sunt magis confusa. Discursus ergo noster in nostra cognitione est a magis universalibus ad minus universalia. Unde magis et prius cognoscimus ens quam substantiam, et substantiam quam corpus, et corpus quam animatum corpus, et animatum corpus quam animal, et animal quam hominem. De tali autem discursu est syllogismus, qui nihil aliud est quam oratio, seu congregatio orationum, ut Boetius dicit, in qua est talis discursus. Et licet in tali discursu multa possint esse media, et multae praemissae ad unam conclusionem; verbi gratia, Omnis substantia est ens, Omnis homo est substantia, quae est corpus, quod est animal; Ergo omnis homo est ens; tamen quia medium semper duarum extremitatum est medium, in tali discursu multos comprehendimus syllogismos. Unus ergo est syllogismus unius medii, et duarum extremitatum. Et quia in praedicto discursu terminorum primus qui universalior est, et per consequens magis notus, primo intellectui occurrit, dicitur major extremitas: extremitas enim dicitur, quia primo occurrit intellectui; et major quia universalior et magis nota. Secundus autem terminus qui intellectui occurrit, est qui non est ita universalis, tamen secundum locum tenet post primum in universalitate, ut est corpus post substantiam. Illic autem secundo termino jam scimus inesse primum terminum, et haec dicitur major propositio, quia prior cognitione. Sed quia nondum scimus secundum inesse alicui minus universali termino, discurret adhuc ratio, et cognoscit corpus inesse animali, ubi sistit, et haec est minor propositio, et statim cognoscit substantiam inesse animali, et haec est conclusio. Certe in istis terminis medium fuit corpus, et ipsum fuit causa quod nos sciremus substantiam inesse animali. Ultimus autem terminus in praedicto discursu fuit animal, ubi stetit ratio, et propter hoc dicitur minor extremi-



tas: extremitas enim dicitur, quia ibi stetit discursus rationis; minor vero dicitur, quia minus universalis, et per consequens minus nota nobis. Habemus ergo causas dictorum nominum, et rationes terminorum, et praemissarum, et conclusionis. Ex dictis potest patere quod dicit Philosophus 1 Poster., quod major propositio est prius nota conclusione natura et tempore; natura, quia termini ejus sunt magis universales, ut dictum est: tempore vero, quia in discursu rationis prius scivi substantiam inesse corpori, quam inesse animali. Minor vero propositio est prius nota natura, non tamen tempore. Natura, quia causa prior est causato: propositiones autem sunt causa conclusionis: et quia etiam iste fuit prior discursus rationis, de medio scilicet ad minorem extremitatem. Non tamen est prius nota tempore. Quia enim sciebam substantiam inesse corpori, in eodem instanti in quo scivi corpus inesse animali, scivi substantiam inesse animali. Et sic patet de partibus syllogismi, et nominibus earum.

Habent autem syllogismi figuras et modos. Dicitur autem hic figura ordo trium terminorum secundum subjectionem et praedicationem. Sicut enim termini linearum in mathematicis aliter et aliter situati variant species figurarum: nam tria puncta quae faciunt triangulum si inter se aequaliter distabunt, erit species trianguli, quae dicitur aequilaterus sive isopleuros; si vero duo aequaliter distabunt a tertio quorum distantia inter se est minor vel major distantia eorum et ad tertium, est species trianguli, quae dicitur isosceles; si vero omnes distantiae punctorum sint inaequales, est species trianguli quae dicitur gradatus, sive scalenon: sic secundum diversitatem istorum trium terminorum in subjiendo et praedicando fiunt tres figurae syllogismorum; licet alio modo quam in figuris superficialibus jam dictis. Si enim medium in una propositione subjiatur et in altera praedicatur, dicitur esse prima figura: et merito: quia tunc medium vere est medium, quia sapit naturam utriusque extremi, scilicet subjecti et praedicati: praedicatur enim et subjiatur, ut dictum est. Si vero medium in utraque propositione praedicatur, dicitur esse secunda figura: quia licet medium non sit vere medium sapiens naturam subjectionis et praedicationis, tamen quia dignius est praedicari quam subji, ideo haec figura secundum locum tenet. Si vero medium in utraque propositione subjiatur, dicitur tertia figura et ultima, quia in ea medium non stat in medio sicut in prima, et subjiatur semper, quod est indignius. Plures figurae non possunt esse, quia tres termini in duabus propositionibus non possunt pluries variari. Unde versus: Sub. prae. prima, bis prae. secunda, tertia sub. bis. Qui sic construitur. Prima, idest in prima figura medium sub. idest subjiatur et prae. idest praedicatur. Secunda, idest in secunda figura medium prae. idest praedicatur bis, idest in utraque praemissarum. Tertia, idest in tertia figura medium sub. idest subjiatur bis, idest in utraque praemissarum. Modus vero ut hic sumitur, est ordinatio duarum propositionum in certa qualitate et quantitate: et dicitur modus, quia est quaedam accidentaliter determinatio ipsarum propositionum syllogismi etc.

## CAPUT V.

*De syllogismis inutilibus in omni figura.*

Restat nunc dicere de ipsis syllogismis. Ubi nota quod, ut supra dictum est, in hoc opere tractatur de syllogismo simpliciter, scilicet de forma ipsius syllogismi in quantum syllogismus est, non applicando ad aliquam materiam; et ideo illa erit vera forma syllogismi, quae applicata cuicumque materiae semper si praemissae erunt verae, sequetur ex eis conclusio vera. Si vero syllogismus in aliqua materia existentibus praemissis veris, sequitur conclusio falsa, licet in aliqua alia materia sequatur conclusio vera, talis non erit verus syllogismus, sed dicitur inutilis conjugatio. Harum autem inutilium conjugationum quaedam possunt fieri in omnibus figuris, quaedam vero in duabus, vel solum in una figura. Quae fiunt in omnibus figuris, sunt quatuor. Prima est si ambae praemissae sunt particulares. Tertia, si ambae sunt indefinitae. Quarta si ambae sunt singulares. Tales enim syllogismi sive conjugationes in quacumque figura fiant, in aliqua materia possunt concludere verum et in alia falsum: et propter hoc dicuntur inutiles. Verbi gratia: de ambabus negativis in prima figura aliquando concluditur verum sic: Nullus homo est lapis. Nullus asinus est homo. Ergo nullus asinus est lapis. Aliquando concluditur falsum sic: Nullus homo est lapis. Nulla margarita est homo. Ergo nulla margarita est lapis; falsa est conclusio: quia omnis margarita est lapis. Et sic potest fieri in secunda et tertia figura. De hac, et de tribus dictis inutilibus conjugationibus datur una regula generalis: scilicet: In omnibus figuris ex puris negativis, particularibus, indefinitis et singularibus nihil sequitur. Inutiles vero conjugationes, quae aliquando non sunt in omnibus figuris, sed in aliquibus, sunt duae. Una est quae convenit primae et tertiae figurae; scilicet quando minor propositio est negativa. Secunda vero convenit primae et secundae figurae; scilicet quando major propositio est particularis. Et de eis dantur regulae generales: scilicet: In prima et tertia figura, minori existente negativa, nihil sequitur. Notandum quod in prima figura hic debet intelligi de syllogismis directe concludentibus. Nam sunt in ea duo modi syllogismorum indirecte concludentes, in quibus minor est negativa, nec tamen sunt inutiles conjugationes. Secunda regula. In prima et secunda figura, majori existente particulari, nihil sequitur. Et similiter in prima intelligitur de concludentibus directe. Dantur autem aliae duae regulae generales: quarum prima est: Si altera praemissarum est negativa, etiam conclusio est negativa. Secunda est: Si altera praemissarum fuerit particularis, conclusio erit particularis. Causa est: ut enim dictum est, major extremitas inest minori in conclusione in virtute medii; in quantum scilicet inest medio in majori propositione, et medium inest minori extremitati in minori propositione, sive alio modo sumatur inhaerentia dictorum terminorum sicut fit in aliis figuris: eo modo quo medium inest alicui extremitati, vel e converso, una extremitas inest alteri. Sed si aliqua praemissarum fuerit particularis, debet medium inesse extremitati vel extremitas in medio particulariter: ergo conclusio quae dicit extremitatem inesse extremitati, erit particu-

laris: et hoc in syllogismis affirmativis sufficit quantum ad secundam regulam. In syllogismis autem negativis eodem modo virtute medii concluditur: si enim medium uni extremitati inest, et e converso ab altera removetur, necesse est extremitatem ab extremitate removeri, et sic erit conclusio negativa: et hoc quantum ad primam regulam. In eisdem etiam syllogismis, si medium particulariter inest vel e converso, vel particulariter removeatur ab aliqua extremitate vel e converso, necessario sequitur extremitatem ab extremitate particulariter removeri: et sic conclusio erit particularis negativa. Verae itaque sunt regulae praedictae etc.

#### CAPUT VI.

##### *De syllogismis primae figurae directe concludentibus, et de syllogismis secundae figurae*

Nunc dicendum est de syllogismis utilibus: et primo de his qui sunt in prima figura; hi autem sunt quatuor. Primus est quando major et minor propositiones sunt universales affirmativae, et sequitur conclusio universalis affirmativa sic, ponendo in terminis transcendentibus. Omne b. est a.: omne c. est b.: ergo omne c. est a. Probatur autem syllogismus per hoc principium quod est dici de omni. Ut enim dictum est, dici de omni est, quando nihil est sumere sub subjecto, de quo non dicatur praedicatum: sic enim in proposito est: ergo etc. Ponamus ergo in terminis significativis, et sit b. animal, a. vero substantia, c. autem sit homo: fiat ergo syllogismus sic. Omne animal est substantia. Omnis homo est animal, Ergo omnis homo est substantia. Certum est quod si ista est vera, Omne animal est substantia, nihil erit sumere sub animali de quo non dicatur substantia. Si ergo omnis homo est animal, tunc omnis homo est sub animali. Debet ergo sumi, sicut substantia praedicatur de animali, ita praedicabitur de homine. Secundus modus est, quando ex majori universali negativa, et ex minori universali affirmativa, concluditur universalis negativa sic: nullum b. est a.: omne c. est b.: ergo nullum c. est a.: et probatur per alterum principium, quod est dici de nullo. In terminis autem significativis ostenditur sic. Sit b. animal, a. vero lapis, c. autem sit homo. Si enim nullum animal est lapis, nihil erit sumere sub animali, a quo non removeatur lapis. Sicut enim « omnis » quod est signum universale affirmativum, est distributivum, et distribuit affirmative pro singulis contentis sub eo cui jungitur; ita etiam « nullus » pro singulis talibus distribuit negative. Tertius modus est, quando ex majori universali affirmativa et ex minori particulari affirmativa concluditur particularis affirmativa sic. Omne b. est a.: quoddam c. est b.: ergo quoddam c. est a.: et probatur per dici de omni. Quartus modus est, quando ex majori universali negativa et minori particulari affirmativa concluditur particularis negativa sic: nullum b. est a.: quoddam c. est b.: ergo quoddam c. non est a. Et probatur per dici de nullo. Sciendum quod licet isti duo ultimi syllogismi probari possint per dici de omni et per dici de nullo, ut dictum est; tamen Philosophus 1 Prior., reducit eos ad duos modos primos, in quibus verius salvatur dici de omni et dici de nullo, propter universalitatem minoris propositionis eorum; et hoc faciemus in fine omnium.

Secunda figura quatuor habet modos. Primus

constat ex majori universali negativa et minori universali affirmativa, ex quibus sequitur conclusio universalis negativa sic. Nullum b. est a. Omne c. est a. Ergo nullum c. est b. In isto enim syllogismo non potest ostendi dici de nullo: quia sub b. cui jungitur signum universale, scilicet « nullum » nihil sumitur a quo possit removeri subjectum: et ideo ad hoc quod probetur per dici de nullo reducitur ad secundum modum primae figurae. Hoc autem dupliciter potest fieri. Vel conversione majoris simpliciter, ut dicatur sic: nullum a. est b.: omne c. est a.: ergo nullum c. est b. Et probatur etiam per tertium principium supradictum quod erat: quando ex opposito consequentis infertur oppositum antecedentis, prima consequentia est bona. Sciendum quod omnis syllogismus est quaedam consequentia, in qua antecedens sunt ambae praemissae, consequens vero est conclusio; unde si ex opposito conclusionis cum altera praemissarum infertur oppositum alterius praemissae in ordinatione in qua salvatur (1) dici de omni vel dici de nullo, prima consequentia, seu syllogismus erit bonus. Sic enim in proposito. Consequens enim sive conclusio est, nullum c. est b.: quae duo habet opposita, scilicet contrarium, et contradictio. Sumatur ejus contrarium, scilicet, Omne c. est b. Sumatur modo major praedicti syllogismi, scilicet, Nullum b. est a. et opposita contraria conclusionis fiat minor, et dicatur sic: Nullum b. est a. Omne c. est b. Ergo nullum c. est a. Iste syllogismus est in secundo modo primae figurae, et ex opposito consequentis seu conclusionis infertur illa, nullum c. est a. quae est opposita unius praemissae, scilicet minoris: quia est contraria minori primi syllogismi, quae erat omne c. est a. Ergo ex opposito consequentis cum una praemissarum infertur oppositum alterius praemissae: prima ergo consequentia seu syllogismus fuit bonus. Secundus modus constat ex majori universali affirmativa, et minori universali negativa, ex quibus sequitur conclusio universalis negativa sic: Omne b. est a. Nullum c. est a. Ergo nullum c. est b. Iste syllogismus reducitur ad secundum modum primae figurae per conversionem minoris simpliciter, et per transpositionem praemissarum; ut scilicet ista quae erat major, fiat minor sic: Nullum a. est c. Omne b. est a. Ergo nullum b. est c. Major istius syllogismi fuit illa in qua conversa fuit minor primi syllogismi, quae erat, Nullum c. est a. Per tertium vero principium seu per syllogismum conversivum reducitur ad secundum modum primae figurae sic. Sumatur propositio contraria conclusioni quae est, omne c. est b.; et fiat minor sic. Omne b. est a. Omne c. est b. Ergo omne c. est a. haec autem quae concluditur in isto secundo syllogismo, scilicet, omne c. est a., est contraria huic, nullum c. est a. quae erat minor: ex opposito ergo consequentis etc. Tertius modus est, quando ex majori universali negativa et minori particulari affirmativa concluditur particularis negativa sic. Nullum b. est a. Quoddam c. est a. Ergo quoddam c. non est b. Hic reducitur ad quartum modum primae figurae per conversionem majoris simpliciter: Nullum a. est b. Quoddam c. est a. Ergo quoddam c. non est b. Reducitur autem per syllogismum conversivum ad secundum modum primae figurae. Oppositum enim conclusionis quod est, quoddam c. non est

(1) Al. solvatur.

b. est istud, omne c. est b.: et fiat minor sic; Nullum b. est a. Omne c. est b. Ergo nullum c. est a.: quae est opposita minoris syllogismi primi quae erat, quoddam c. est a. Quartus modus est, quando ex majori universali affirmativa et ex minori particulari negativa concluditur particularis negativa sic. Omne b. est a. Quoddam c. non est a. Ergo quoddam c. non est b. Iste syllogismus non (1) potest reduci per conversionem praemissarum: major enim quae est universalis affirmativa, non potest converti nisi in particularem affirmativam, et minor est particularis. Ex pluribus autem particularibus, ut dictum est, nihil sequitur. Reducitur ergo per syllogismum quod aliquando vocatur per impossibile, sicut reducti fuerunt caeteri tres syllogismi supradicti, et reducitur ad primum modum primae figurae. Oppositum enim conclusionis, quae erat, quoddam c. non est b., est illud, omne c. est b. quod fiat minor sic. Omne b. est a.: omne c. est b.: ergo omne c. est a. Haec autem est opposita minoris, quae erat, quoddam c. non est a. Et sic patet de syllogismo primae et secundae figurae.

## CAPUT VII.

*De syllogismis tertiae figurae, et de reductione omnium syllogismorum ad duos primos modos primae figurae.*

Tertia vero figura sex habet modos. Primus constat ex majori universali affirmativa et ex minori universali affirmativa, ad quas sequitur conclusio particularis affirmativa sic. Omne b. est a.; omne b. est c.; ergo quoddam c. est a. Iste syllogismus per conversionem minoris per accidens reducitur ad tertium modum primae figurae sic. Omne b. est a.: quoddam c. est b.: ergo quoddam c. est a. Per syllogismum vero conversivum reducitur ad secundum modum primae figurae. Sumatur enim oppositum conclusionis quod est, Nullum c. est a.: et fiat major sic: Nullum c. est a.; omne b. est c.; ergo nullum b. est a. Haec autem est contraria majoris primi syllogismi quae erat, omne b. est a. Sciendum quod in reductione per syllogismum conversivum haec differentia est inter syllogismos secundae et tertiae figurae: Nam in syllogismis secundae figurae ex opposito conclusionis fit minor propositio, et infertur oppositum minoris propositionis; in syllogismis vero tertiae figurae ex opposito conclusionis fit major propositio, et infertur oppositum majoris propositionis. Secundus modus constat ex majori universali negativa et ex minori universali affirmativa, ad quas sequitur conclusio particularis negativa sic. Nullum b. est a.; omne b. est c.; ergo quoddam c. non est a. Haec per conversionem minoris per accidens reducitur ad quartum modum primae figurae sic. Nullum b. est a.: quoddam c. est b.; ergo quoddam c. non est a. Sed per syllogismum conversivum reducitur ad primum modum primae figurae, si accipiatur oppositum conclusionis, et fiat major sic: Omne c. est a.: omne b. est c.: ergo omne b. est a. Haec conclusio est contraria majori primi syllogismi. Tertius modus constat ex majori particulari affirmativa et minori universali affirmativa, ex quibus sequitur conclusio particularis affirmativa sic. Quoddam b. est a.; omne b. est

c.; ergo quoddam c. est a. Haec per conversionem reducitur ad tertium modum primae figurae convertendo majorem simpliciter, et transponendo propositiones sic. Omne b. est c.; quoddam a. est b.; ergo quoddam a. est c. Per syllogismum vero conversivum reducitur ad secundum modum primae figurae sic. Nullum c. est a.; omne b. est c.; ergo nullum b. est a. Haec conclusio est contradictoria majoris, quae erat, quoddam b. est a. Quartus modus constat ex majori universali affirmativa et minori particulari affirmativa concludentibus particularem affirmativam sic. Omne b. est a.; quoddam b. est c.; ergo quoddam c. est a. Haec per conversionem minoris reducitur ad tertium modum primae figurae sic. Omne b. est a.; quoddam c. est b.; ergo quoddam c. est a. Per syllogismum vero conversivum reducitur ad quartum primae sic. Nullum c. est a.; quoddam b. est c.; ergo quoddam b. non est a. Haec conclusio est contradictoria majoris primi syllogismi, quae erat, Omne b. est a. Quintus modus constat ex majori particulari negativa et minori universali affirmativa concludentibus particularem negativam sic. Quoddam b. non est a.; omne b. est c.; ergo quoddam c. non est a. Haec non potest reduci per conversionem, quia major ejus non potest converti, cum sit particularis negativa: minor vero convertitur in particularem. Ex puris autem particularibus nihil sequitur. Per syllogismum vero conversivum reducitur ad primum primae sic. Omne c. est a.: omne b. est c.: ergo omne b. est a. Et haec est contradictio majoris primi syllogismi, quae erat, quoddam b. non est a. Sextus modus constat ex majori universali negativa et minori particulari affirmativa concludentibus particularem negativam sic. Nullum b. est a.: quoddam b. est c.: ergo quoddam c. non est a. Haec per conversionem minoris reducitur ad quartum primae sic. Nullum b. est a. quoddam b. est c., ergo quoddam c. non est a. Per syllogismum vero conversivum reducitur ad tertium primae sic. Omne c. est a.: quoddam b. est c.: ergo quoddam b. est a.: quae est contradictoria majoris primi syllogismi, quae erat, Nullum b. est a. Et sic patet de syllogismis directe concludentibus in omnibus figuris, et de eorum probationibus.

Philosophus autem reduxit omnes syllogismos ad duos universales primae figurae. Unde tertium modum primae figurae reduxit per syllogismum conversivum ad secundum modum secundae figurae; et quartum modum ejusdem primae figurae reduxit per syllogismum conversivum ad primum secundae: illi autem reducuntur ad duos modos universales primae figurae, ut dictum est. Omnes ergo reducuntur ad duos modos universales primae figurae, in quibus salvatur perfecte dici de omni, et dici de nullo. Quod autem reducuntur praedicti duo modi primae figurae ad universales secundae, puta tertio primae figurae, patet sic. Omne b. est a.; quoddam c. est b.; ergo quoddam c. est a. Oppositum conclusionis est, Nullum c. est a.: quae fiat minor, et fiat syllogismus in secundo secundae figurae sic. Omne b. est a.; nullum c. est a.; ergo nullum c. est b.: quae est opposita minoris, quae erat, quoddam c. est b. Quartus vero reducitur ad primum. Est enim quartus modus sic. Nullum b. est a.; quoddam c. est b.; ergo quoddam c. non est a. Oppositum conclusionis est, Omne c. est a.: quae fiat minor, et fiat syllogismus in primo secundae figurae sic. Nullum b. est a.; omne c. est a.; ergo nullum c. est b. Patet ergo qualiter omnes syllogi-

(1) *Al. omittitur non.*

smi reducantur ad duos modos universales primae figurae.

### CAPUT VIII.

*De syllogismis indirecte concludentibus,  
et de reductione ipsorum.*

Restat nunc dicere de syllogismis indirecte concludentibus. Est autem indirecte concludere minorem extremitatem praedicari de minori in conclusione. Tales autem syllogismi sunt numero decem: quinque enim sunt in prima figura, duo in secunda figura, et tres in tertia figura. Sciendum quod omnis syllogismus concludens aliquam conclusionem quae converti potest, etiam potest concludere illam in quam convertitur. Cum ergo omnes conclusiones dictorum syllogismorum possunt converti, exceptis particularibus negativis, omnes tales syllogismi poterunt concludere indirecte. Tales autem in prima figura sunt tres: scilicet primus modus, secundus et tertius: in secunda sunt duo, scilicet primus et tertius et quartus. Adducantur autem in prima figura duo modi, qui sunt contra duo principia sive regulas datas in prima figura. Nam ambo habent minorem negativam, quod est contra illam regulam. In prima figura minori existente negativa, nihil sequitur. Et alter eorum habet majorem particularem contra aliam regulam. Doctores autem moderni, scilicet Boetius, praetermissis quinque, scilicet secundae et tertiae figurae, de solis quinque primae figurae fecerunt mentionem. Quorum primus constat ex majori universali affirmativa et minori universali affirmativa concludentibus indirecte particularem affirmativam sic. Omne b. est a.; omne c. est b.; ergo quoddam a. est c. Reducitur autem ad primum primae, si conclusio particularis convertatur in universalem. Secundus constat ex majori universali negativa et minori universali affirmativa concludentibus indirecte universalem negativam sic. Nullum b. est a.; omne c. est a.; ergo nullum a. est c. Reducitur ad secundum primae conversa conclusione simpliciter. Tertius modus constat ex majori universali affirmativa et minori particulari affirmativa concludentibus indirecte particularem affirmativam sic. Omne b. est a.; quoddam c. est b.; ergo quoddam a. est c. Reducitur ad tertium primae conversa conclusione simpliciter. Quartus modus constat ex majori universali affirmativa et minori universali negativa, concludentibus indirecte particularem negativam sic. Omne b. est a.; nullum c. est b.; ergo quoddam a. non est c. Et reducitur ad quartum primae conversa majori per accidens, et minori simpliciter, et transpositis propositionibus, ut de minori fiat major, et de majori minor sic. Nullum b. est c.; quoddam a. est b.; ergo quoddam a. non est c. Quintus modus constat ex majori particulari affirmativa et minori universali negativa concludentibus indirecte particularem negativam sic. Quoddam b. est a.; nullum c. est b.; ergo quoddam a. non est c. Et reducitur ad quartum primae per conversionem simpliciter utriusque propositionis, et transpositis utrisque sic. Nullum b. est c.; quoddam a. est b.; ergo quoddam a. non est c. Et sic patet de syllogismis indirecte concludentibus.

Sciendum autem quod ad memoriter tenendum praedictos syllogismos inventi sunt quidam versus, qui taliter designantur. Barbara. Celarent. Darii. Ferio. Baralipon. Celantes. Dabitis. Fapesmo. Frisesomorum.

Caesare. Camestres. Festino. Baroco. Darapti. Felapton. Disamis. Datisi. Brocardo. Ferison. Quorum intellectus talis est. In his versibus sunt 19 dictiones, quae secundum ordinem suum deserviunt 19 modis syllogismorum: scilicet novem modis primae figurae, quatuor concludentibus directe, et quinque indirecte; et quatuor secundae figurae, et sex tertiae figurae. Omnes autem hae dictiones sunt trisyllabae: quarum prima syllaba deservit majori propositioni, secunda minori, tertia conclusioni. Et si in aliqua dictione inveniuntur plures syllabae, non sunt necessariae, sed ponuntur causa metri. In praedictis autem syllogismis sunt quatuor vocales: scilicet a, e, i, o, quae sic significant. A. significat universalem affirmativam, E. universalem negativam, I. particularem affirmativam, O. particularem negativam. Unde Barbara qui deservit primo modo primae figurae, in omnibus syllabis habet a. quia omnes ejus propositiones sunt universales affirmativae. Omnes praedictae dictiones incipiunt ab his quatuor consonantibus, scilicet, b. c. d. f. Primae autem quatuor dictiones quae deserviunt quatuor modis primae figurae directe concludentibus, a praedictis quatuor consonantibus incipiunt. Unde si quae aliae dictiones incipiunt a quacumque harum consonantium, significant, quod tales syllogismi sunt reducendi ad illum modum primae figurae, cui deservit dictio incipiens ab illa consonante. Verbi gratia: Cesare quae deservit primo modo secundae figurae, incipit ab ista consonante C. et significat quod talis modus per conversionem majoris reducitur ad secundum modum primae figurae, cui deservit dictio incipiens a c., scilicet celarent, et sic de singulis. In praedictis etiam syllogismis aliquando invenitur ista littera s. post vocalem: et significat quod illa propositio vel conclusio cui deservit syllaba debet converti simpliciter. Aliquando vero invenitur p. et significat quod illa propositio vel conclusio cui deservit syllaba debet converti per accidens. Aliquando vero invenitur m. et significat, quod praemissae illius syllogismi debent transponi, ut de majori fiat minor, et e converso. Aliquando invenitur e. et significat quod iste syllogismus non potest reduci per conversionem, sed solum per syllogismum conversivum: et hoc solum accidit in duobus syllogismis, scilicet baroco et brocardo, ut dictum est. Sciendum, quod praedictae regulae, praeterquam regula de littera e., intelliguntur solum de reductione syllogismorum facta per conversionem, et non de ea quae facta est per syllogismum conversivum. Et sic patet de syllogismis de inesse conversivis.

### CAPUT IX.

*De inventione medii termini in syllogismis omnium figurarum tam affirmativis quam negativis.*

Scitis syllogismis, ut facilius possimus quaecumque conclusionem concludere et syllogizare, sciendum quod omnis conclusio in se continet ambas extremitates, ut dictum est: totus autem syllogismus ex tribus terminis fit. Habita ergo quaecumque oratione concludenda, ad complendum syllogismum egemus uno termino, scilicet medio. Qualiter autem talis medius terminus inveniatur, videamus. Ubi nota, quod Philosophus 1 Prior., tribus utitur nominibus terminorum: scilicet antecedente, consequente et repugnante. Dicitur autem terminus antecedens qui potest subijci, ut homo est antecedens ad animal;



consequens autem dicitur terminus qui potest de alio praedicari; et sic animal est consequens ad hominem. Et quia termini convertibiles inter se et subijci et praedicari possunt, ut proprium quod potest praedicari de specie, et species de ipso, et similiter se habet de definitione et definito; ideo unus respectu alterius, et dicitur antecedens, et dicitur consequens. Repugnans vero terminus dicitur, qui alteri subijci non potest, nec de eo praedicari, ut homo et asinus, quorum neuter de altero potest praedicari, nec sibi subijci. Sciendum quod modi syllogismorum directe concludentium, ut dictum est, sunt quatuordecim: scilicet quatuor in prima figura, quatuor in secunda, et sex in tertia: quia de indirecte concludentibus hic non me intromitto. In prima igitur figura sunt duo modi affirmativi directe concludentes: scilicet primus et tertius; et duo negativi, scilicet secundus et quartus. Ad inveniendum medium in affirmativis, considerandus est unus terminus qui sit antecedens ad praedicatum et consequens ad subjectum. Verbi gratia: si debet syllogizari haec, scilicet, omnis homo est substantia, jam habetur minor et major extremitas. Consequens autem ad subjectum et antecedens ad praedicatum, est animal: ergo est medius terminus per hunc syllogismum in primo primae figurae sic. Omne animal est substantia. Omnis homo est animal. Ergo omnis homo est substantia. Si vero debet concludi haec, quidam homo est substantia: in tertio modo ejusdem figurae est medius terminus animal, et fiet syllogismus sic: Omne animal est substantia. Quidam homo est animal. Ergo quidam homo est substantia. In syllogismis vero negativis ejusdem figurae sumitur pro medio repugnans praedicato, et consequens ad subjectum. Verbi gratia: si debet concludi haec, nullus homo est lapis, vel, quidam homo non est lapis, sumatur pro medio animal: repugnat enim animal lapidi, et potest praedicari de homine. Fiat ergo syllogismus in secundo primae sic: Nullum animal est lapis. Omnis homo est animal. Ergo nullus homo est lapis. In quarto vero sic: nullum animal est lapis. Quidam homo est animal. Ergo quidam homo non est lapis. Et sic patet de inventionem medii termini in prima figura. In secunda autem figura sunt quatuor modi omnes negativi, quorum primus et tertius habent majorem propositionem negativam, minorem vero affirmativam. Secundus autem et quartus e converso majorem habent affirmativam, minorem vero negativam: et ideo aliter utrobique sumitur medium. Unde in primo et tertio sumitur pro medio repugnans praedicato et consequens ad subjectum. Verbi gratia, si debet concludi ista: Nullus homo est lapis, vel illa, quidam homo non est lapis: pro medio sumatur animal, et syllogizetur in primo secundae sic: Nullus lapis est animal. Omnis homo est animal. Ergo nullus homo est lapis. In tertio modo sic: Nullus lapis est animal. Quidam homo est animal. Ergo quidam homo non est lapis. In secundo vero et quarto modo sumatur pro medio consequens ad praedicatum et repugnans subjecto. Verbi gratia, si debet concludi ista: Nullus homo est lapis, vel ista, quidam homo non est lapis, sumatur pro medio inanimatum, quod potest praedicari de lapide et repugnat homini; et syllogizetur in secundo modo sic: Omnis lapis est inanimatus. Nullus homo est inanimatus. Ergo nullus homo est lapis. In quarto modo sic. Omnis lapis est inanimatus. Quidam homo non est inanimatus. Ergo quidam homo non est lapis. Et

sic patet de inventionem medii termini in secunda figura. In tertia vero figura sunt sex modi omnes concludentes particulariter: quorum tres sunt affirmative, et tres negative. In tribus affirmativas, scilicet primo, tertio, quarto, sumitur pro medio antecedens ad utrumque. Verbi gratia, si debet concludi haec in primo modo, scilicet, quoddam animal est substantia, sumatur pro medio homo, de quo animal et substantia praedicari possunt, et syllogizetur sic: Omnis homo est substantia. Omnis homo est animal. Ergo quoddam animal est substantia. In tertio modo sic: Quidam homo est substantia. Omnis homo est animal. Ergo quoddam animal est substantia. In quarto vero sic: Omnis homo est substantia. Quidam homo est animal. Ergo quoddam animal est substantia. In tribus vero negativis sumitur pro medio repugnans praedicato et antecedens ad subjectum. Verbi gratia, si debet concludi haec, quoddam animal non est lapis, sumatur pro medio homo quod repugnat lapidi, et de quo animal praedicatur et syllogizetur etiam in secundo modo sic: Nullus homo est lapis. Omnis homo est animal. Ergo quoddam animal non est lapis. In quinto vero sic: quidam homo non est lapis: omnis homo est animal: ergo quoddam animal non est lapis. In sexto autem sic: Nullus homo est lapis. Quidam homo est animal. Ergo quoddam animal non est lapis. Et sic patet de inventionem medii in tertia figura. Notandum quod ad inveniendum cito antecedens et consequens termini convertibiles possunt esse antecedens et consequens indifferenter: quia definitio et descriptio et interpretatio sunt termini convertibiles cum definito, descripto et interpretato. Accipias terminum cuius vis invenire antecedens et consequens, et definias ipsum vel describas, vel interpreteris; postmodum utere regulis supradictis. Verbi gratia, si vis concludere in primo modo primae figurae istam, omne currens movetur, ubi debes sumere antecedens ad praedicatum, definias vel describas vel interpreteris moveri, quod describitur sic, moveri est mutare locum in tempore: sed omne currens mutat locum in tempore, ergo omne currens movetur. Et sic potest fieri de definitione et interpretatione. Et sic patet de inventionem medii in syllogismis de inesse ostensivis.

## CAPUT X.

### *De differentia syllogismi ad impossibile ab ostensivo.*

Diets de syllogismis ostensivis, et de inventionem medii eorum, dicendum est de syllogismis ad impossibile. Differt (1) enim syllogismus ad impossibile ab ostensivo. Nam ostensivus ex duabus praemissis veris concludit conclusionem veram. Syllogismus vero ad impossibile non sic facit; sed ex altera praemissarum falsa concludit falsum evidentem. Deinde ex contradictione falsi conclusi iterum concludit contradictionem praemissae falsae. Verbi gratia, de utroque. Dato quod adversarius diceret hanc propositionem falsam, scilicet « omnis homo currit », contra eam per syllogismum ostensivum arguo sic: quia sumo duas praemissas veras, et concludo contradictionem propositionis praedictae sic. Nullum quiescens currit. Quidam homo quiescit. Ergo quidam homo non currit. Haec conclusio contradicit propositioni adversarii quae erat « omnis homo currit ». et

(1) *Al.* dicitur.

quia sua est falsa, mea est vera, et e converso. Si vero volo eam reprobare per syllogismum ad impossibile, sumo eam cum altera propositione vera, et facio eas praemissas alicujus syllogismi, et concludo conclusionem falsam evidenter, et assumo contradictorium istius conclusionis falsae, et ex ea concludo contradictoriam falsae praemissae sic: Omne currens movetur. Omnis homo currit. Ergo omnis homo movetur. Sed quidam homo non movetur. Ergo quidam homo non currit. Modo ex falsitate hujus praemissae ostendo veritatem hujus meae propositionis, et ex istius veritate ostendo falsitatem illius. Ratio enim veritatis istius ultimae conclusionis syllogismi ad impossibile est: quia in syllogismis ordinatis in modo et in figura nunquam conclusio erit falsa, nisi aliqua praemissarum fuerit falsa. Concluditur autem primo ostensive conclusio falsa, scilicet « omne currens movetur »: aliqua ergo praemissarum fuit falsa. Non mea, scilicet « omne currens movetur »: ergo propositio adversarii, scilicet « omnis homo currit », est falsa: ergo ejus contradictoria, scilicet « quidam homo non currit », quae est ultima conclusio syllogismi ad impossibile ab ostensivo est vera.

### CAPUT XI.

#### *De syllogismis ad impossibile, in quibus modis et in quibus figuris fiant.*

Nunc dicendum est in quibus figuris, et in quibus modis syllogismi ad impossibile possunt fieri. Ubi primo sciendum, sicut dictum est, quod conclusio syllogismi ad impossibile non est illa quae per syllogismum ostensivum primo false concluditur, sed quae ultimo concluditur, scilicet contradictoria praemissae adversarii falsae. Debet autem semper esse contradictoria, et non contraria: quia, ut supra in alio tractatu dictum est, lex contradictoriarum talis est, quod si una est vera, reliqua est falsa, et (1) e converso. Unde si praemissa assumpta adversarii (2) est falsa, semper sequitur, si conclusio syllogismi ad impossibile est sibi contradictoria, quod sit vera. Si vero esset sibi contraria, quantumcumque illa foret falsa, non tamen necessario sequeretur istam esse veram: duae enim contrariae possunt simul esse falsae, ut supradictum est. Secundum ergo dicta, cum in prima figura nullus syllogismus sit qui habeat aliquam praemissarum particularem negativam, conclusio in prima figura non poterit concludi per impossibile, sed universalis. Quia vero in primo modo primae figurae ambae praemissae sunt universales affirmativae, quarum oppositae sunt particulares negativae, ideo in ea non potest concludi nisi particularis negativa, si sumatur primo major falsa, scilicet: Omnis homo est lapis. Omne risibile est homo. Ergo omne risibile est lapis. Sed quoddam risibile non est lapis. Ergo quidam homo non est lapis. Si sumatur minor falsa, idem sequitur sic: Omne risibile est homo. Omnis lapis est risibilis. Ergo omnis lapis est homo. Sed quidam lapis non est homo. Ergo quidam lapis non est risibilis. In secundo vero modo primae figurae potest concludi particularis affirmativa et particularis negativa sic. Nullus homo est animal. Omne risibile est homo. Ergo nullum risibile est animal. Sed quoddam risibile est animal. Ergo quidam homo est animal. Particularis negativa sic: Nullus homo est lapis.

(1) *Al.* et non e converso.

(2) *Al.* quae est falsa.

Omnis margarita est homo. Ergo nulla margarita est lapis. Sed quaedam margarita est lapis. Ergo quaedam margarita non est homo. In tertio vero modo primae figurae concluditur per impossibile particularis negativa, et universalis negativa. Particularis negativa sic: Omnis homo est lapis. Quoddam risibile est homo. Ergo quoddam risibile est lapis. Sed nullum risibile est lapis. Ergo quidam homo non est lapis. Universalis negativa sic: Omnis homo est animal. Quidam lapis est homo. Ergo quidam lapis est animal. Sed nullus lapis est animal. Ergo nullus lapis est homo. In quarto vero modo concluditur particularis affirmativa sic: Nullum animal est substantia. Quidam homo est animal. Ergo quidam homo non est substantia. Sed omnis homo est substantia. Ergo quoddam animal est substantia. Universalis vero negativa sic. Nullum animal est lapis. Quedam margarita est animal. Ergo quaedam margarita non est lapis. Sed omnis margarita est lapis. Ergo nulla margarita est animal. Et sic patet de syllogismis ad impossibile, qui possunt fieri in prima figura. Et eodem modo possunt fieri in aliis duabus figuris: ut scilicet ex opposito falsae conclusionis inferatur oppositum falsae praemissae; oppositum scilicet falsae praemissae quod est contradictorium ejus. Unde, quia in primo et secundo modo secundae figurae praemissae sunt universalis affirmativa et universalis negativa, quarum oppositae sunt particularis negativa et particularis affirmativa; ergo in eis potest concludi per syllogismum ad impossibile particularis affirmativa et particularis negativa: particularis affirmativa, si sumatur major falsa; negativa vero, si sumatur minor falsa: et sic fiat in omnibus aliis modis tam secundae quam tertiae figurae. Sciendum, quod universalis affirmativa per impossibile non potest concludi nisi in quarto modo secundae figurae, et in quinto tertiae: in his videlicet modis de quibus supradictum est, quod per conversiones propositionum non poterant reduci ad modos primae figurae. Et causa est, quia solum isti duo modi habent praemissam particularem negativam, et non alii: et dico de syllogismis directe concludentibus. Ponamus exemplum de utroque modo qualiter in eis concludatur per impossibile universalis affirmativa in quarto modo secundae figurae sic: Omnis homo est animal. Quoddam risibile non est animal. Ergo quoddam risibile non est homo. Sed omne risibile est homo. Ergo omne risibile est animal. In quinto modo tertiae figurae sic: Quidam homo non est animal. Omnis homo est risibilis. Ergo quoddam risibile non est animal. Sed omne risibile est animal. Ergo omnis homo est animal. Notandum quod Philosophus secundo Priorum facit solum unam praemissam falsam in quolibet modo omnium figurarum, et concludit per syllogismum ad impossibile in quolibet solum unam conclusionem: et tamen nos in quolibet modo dicimus utranque falsam, et concludemus per impossibile oppositam utriusque. Notandum quod in prima et secunda figura magis congrue ponitur minor falsa: quia quod subicitur in opposita conclusionis falsae subicitur postea in conclusione syllogismi ad impossibile. Verbi gratia, in prima figura sic: Omnis homo est animal. Omnis lapis est homo. Ergo omnis lapis est animal. Sed quidam lapis non est animal. Ergo quidam lapis non est homo. Modo « lapis » est subjectum in opposita conclusionis falsae et in conclusione ul-

tima; si vero ponitur major falsa, colorari potest, ut dictum est, et communiter sic utimur. Patet ergo qui syllogismi ad impossibile, et in quibus modis et figuris fiant.

## CAPUT XII.

*De syllogismis ad impossibile, qualiter reducuntur ad syllogismos ostensivos.*

Et quia omnes syllogismi ad impossibile reducuntur ad syllogismos ostensivos, ideo videndum est qualiter id fiat. Sciendum, quod syllogismi qui fiunt ad impossibile in prima figura, sunt ostensivi in secunda et tertia figura. Si enim concluditur opposita majoris propositionis falsae; fit syllogismus ostensivus in tertia figura sic. Verbi gratia, in primo modo primae figurae quando concluditur oppositum majoris sic: Omnis homo est lapis. Omne risibile est homo. Ergo omne risibile est lapis. Sed quoddam risibile non est lapis. Ergo quidam homo non est lapis. Hanc conclusionem, scilicet « quidam homo non est lapis », quatuor enunciationes praecesserunt: quarum duae fuerunt falsae, scilicet major, et conclusio illius syllogismi ostensivi: duae vero fuerunt verae, scilicet minor illius syllogismi, et opposita conclusionis. Ex his duabus veris in tertia figura sequitur praedicta conclusio, scilicet « quidam homo non est lapis »: ita quod opposita conclusionis fiat major, et minor syllogismi ostensivi remaneat minor sic: Quoddam risibile non est lapis. Omne risibile est homo. Ergo quidam homo non est lapis. Hic est quintus modus tertiae figurae. Quando vero per impossibile concluditur oppositum minoris, fit syllogismus ostensivus in secunda figura. Verbi gratia, sit syllogismus ad impossibile iste: Omnis homo est animal. Omnis lapis est homo. Ergo omnis lapis est animal. Sed quidam lapis non est animal. Ergo quidam lapis non est homo. Auferantur duae falsae, scilicet minor, et conclusio syllogismi ostensivi; et fiat syllogismus in quarto modo secundae figurae sic: Omnis homo est animal. Quidam lapis non est animal. Ergo quidam lapis non est homo. Et sic fit in aliis modis primae figurae: ut videlicet si in syllogismo ad impossibile concluditur oppositum majoris, reducitur ad tertiam figuram, opposita conclusionis existente majori, et eum minori vera. Si vero concluditur oppositum minoris, fit talis syllogismus ostensivus in secunda figura; ita quod oppositum conclusionis sit minor propositio, et major vera remaneat minor. Syllogismi vero ad impossibile qui fiunt in secunda figura, sunt ostensivi in prima figura et in tertia. Si enim concluditur per impossibile oppositum majoris, fit ostensivus in tertia figura. Verbi gratia, sit syllogismus ad impossibile iste: Nullus homo est animal. Omne risibile est homo. Ergo nullum risibile est homo. Sed quoddam risibile est homo. Ergo quidam homo est animal. Auferantur falsae, et fiat syllogismus in quarto modo tertiae figurae sic: Omne risibile est animal. Quoddam risibile est homo. Ergo quidam homo est animal. Sciendum quod quando in prima figura syllogismus ad impossibile concludebat oppositum majoris, reducebatur, et fiebat syllogismus ostensivus in tertia figura; et oppositum conclusionis primi syllogismi ostensivi fiebat major in secundo syllogismo, et minor ejusdem syllogismi remanebat minor in secundo syllogismo. Sed hic

non fit ita; sed minor primi syllogismi fit major in secundo syllogismo. Si vero concluditur per impossibile oppositum minoris, fit syllogismus ostensivus in prima figura sic: Nullus homo est lapis. Omne risibile est lapis. Ergo nullum risibile est homo. Sed quoddam risibile est homo. Ergo quoddam risibile non est lapis. Auferantur omnes falsae, et fiat syllogismus in quarto modo primae figurae sic: Nullus homo est lapis. Quoddam risibile est homo. Ergo quoddam risibile non est lapis. Eodem modo syllogismi ostensivi aliorum modorum secundae figurae. Unde si major est falsa et minor vera, tunc minor fit major, et oppositum conclusionis fit minor. Si vero major sit vera, et minor falsa; tunc major remanet major, et oppositum conclusionis fit minor. Syllogismi vero ad impossibile qui sunt in tertia figura, sunt ostensivi in prima figura et secunda. Unde si per impossibile concluditur opposita majoris, fit ostensivus in prima figura: ita videlicet quod oppositum conclusionis primi syllogismi fiat major propositio in secundo syllogismo; et minor quae fuit remaneat minor, sic: Omnis homo est lapis. Omnis homo est risibilis. Ergo quoddam risibile est lapis. Sed nullum risibile est lapis. Ergo quidam homo non est lapis. Fiat autem ostensivus in prima figura sic: Nullum risibile est lapis. Omnis homo est risibilis. Ergo nullus homo est lapis. Ad universalem veram bene sequitur sua particularis vera. Unde si haec est vera « Nullus homo est lapis », quae est conclusio istius secundi syllogismi; erit etiam haec vera « Quidam homo non est lapis »: quae fuit conclusio syllogismi ad impossibile. Si vero per impossibile concluditur opposita minoris, fiat syllogismus in secunda figura ostensivus: ita quod opposita conclusionis primi syllogismi fiat minor in secundo syllogismo, et major primi syllogismi fiat minor, sic: Omnis homo est animal. Omnis homo est lapis. Ergo quidam lapis est animal. Sed nullus lapis est animal. Ergo quidam homo non est lapis. Fiat ergo syllogismus ostensivus sic: Nullus lapis est animal. Omnis homo est animal. Ergo nullus homo est lapis. Ad quam sequitur, Quidam homo non est lapis. Eodem modo fiat in aliis modis tertiae figurae. Et sic patet de syllogismis ad impossibile. Sciendum quod Philosophus in libro Priorum multa alia genera syllogismorum ponit; scilicet irregulares, conversivos, ex oppositis, et multa alia. Sed quia solum ista duo genera syllogismorum de inesse apud modernos sunt in usu, de aliis non me intromisi. Patet ergo de syllogismis de inesse etc.

## CAPUT XIII.

*De syllogismis modalibus, quantum ad propositiones de necessario.*

Nunc dicendum est de syllogismis modalibus. Ubi sciendum quod, quia eodem modo sumuntur propositiones de necessario et impossibili et illae de possibili et contingenti, ut supra in tractatu de conversionibus dictum est; ideo duobus modis fiunt syllogismi modales inter se differentes. Primo dicemus de syllogismis de necessario, ad quos reduci possunt illi de impossibili. Secundo de syllogismis de contingenti, ad quos reducuntur illi de possibili contingenter sumpto. Sciendum quod syllogismi de necessario aliqui habent ambas propositiones necessarias; et tunc in quacumque figura



vel modo fiant, semper conclusio est necessaria. Verbi gratia. Necesse est omnem hominem esse animal. Necesse est omne risibile esse hominem. Ergo necesse est omne risibile esse animal: et sic de singulis etc. Notandum, quod duplex est necessarium: scilicet necessarium simpliciter, quando aliquid inest alicui simpliciter, et non secundum aliquod tempus vel locum, vel hujusmodi: sicut necessarium est hominem esse animal. Aliud est necessarium secundum quid, vel secundum tempus; sicut dicimus quod omne quod est, quando est, necesse est esse; vel secundum locum vel secundum aliquod hujusmodi: et isto modo non sumitur propositio necessaria. Socrates enim quando currit, necessario currit, et tamen haec propositio « Socrates currit », non est necessaria, sed contingens. Si vero syllogismi de necessario alteram propositionem habent necessariam, et alteram de inesse: licet semper concludant majorem extremitatem inesse minori, non tamen semper concludunt ex necessitate: sed quandoque sic, et quandoque non. Ubi nota, quod in prima figura, majori propositione existente necessaria et minori de inesse, sequetur semper conclusio necessaria. Majori vero existente de inesse, quantumcumque minor sit necessaria, non tamen conclusio erit necessaria: quia inveniuntur termini ubi est sic, et ubi non est sic. Verbi gratia: Omnis homo est animal. Omne risibile necessario est homo. Ergo omne risibile necessario est animal. Isti autem sunt termini ubi sic. Termini vero ubi non, sunt isti. Omnis homo est albus. Omne risibile necessario est homo. Ergo omne risibile necessario est albus. Haec autem conclusio non est necessaria simpliciter. Et sic est de aliis modis primae figurae, tam affirmativis quam negativis. In secunda vero figura in tribus primis modis negativis propositione existente necessaria, sive sit major, sive sit minor, conclusio erit necessaria, ipsa existente de inesse, Affirmativa vero existente necessaria, et negativa de inesse, non sequitur conclusio necessaria. Et hoc clare potest apparere reducendo praedictos syllogismos ad modos primae figurae: nam semper in syllogismis reductis, negativa erit major. In prima autem figura, ut dictum est, si major est necessaria, et conclusio: si vero non, nec conclusio. In quarto vero modo secundae figurae quaecumque propositione necessaria, sive affirmativa sive negativa, dummodo altera sit de inesse, non semper sequitur conclusio necessaria: nam si universalis affirmativa non erit necessaria, in eisdem terminis fiet syllogismus in quibus fiet secundus modus ejusdem figurae universali affirmativa existente necessaria. Sed, ut dictum est, si affirmativa est necessaria, non sequitur conclusio necessaria: quod patet per reductionem ejus ad secundum modum primae figurae: ergo nec hic sequitur. Si vero particularis negativa est necessaria, non sequitur semper conclusio necessaria, ut patet in his terminis, scilicet: Omne album est homo: quidam asinus necessario non est homo: tamen non sequitur: Ergo quidam asinus necessario non est albus. In tertia vero figura sunt syllogismi affirmativi, et sunt negativi. Affirmativorum autem quidam habent ambas propositiones universales, quidam vero alteram. Qui habent ambas propositiones universales, quaecumque earum existente necessaria, sive majori sive minori, sequitur conclusio necessaria; quod patet per reductionem ejus ad primam

figuram. Qui vero habent alteram universalem, ea existente necessaria sive majori sive minori, sequitur conclusio necessaria. Si vero particularis sit necessaria, non sequitur conclusio necessaria: quia si reducitur ad primam figuram, major est de inesse: ubi, ut dictum est, non sequitur conclusio necessaria. Negativorum vero quidam habent propositionem negativam universalem, quidam autem particularem. Unde qui habent propositionem negativam universalem, ea existente necessaria, non sequitur conclusio necessaria. Qui vero habent negativam particularem et affirmativam universalem, quaecumque earum existente necessaria, non sequitur conclusio necessaria. Verbi gratia sic: Quidam homo non vigilat. Omnis homo necessario est animal. Ergo quoddam animal necessario non vigilat. Et hoc est affirmativa existente necessaria. Negativa autem existente necessaria sic, Quoddam album necessario non est animal, Omne album vigilat: non sequitur: Ergo quoddam vigilans necessario non est animal: cum omne vigilans necessario sit animal. Et sic patet de syllogismis modalibus de necessario.

#### CAPUT XIV.

##### *De syllogismis contingentibus.*

Sequitur de syllogismis contingentibus. Ubi nota quod duplex est contingens: scilicet contingens quod inest, et contingens quod potest inesse. Dicitur autem hic contingens quod inest, quando praedicatum, licet non sit de essentia subjecti vel proprium ejus, tamen est terminus qui potest praedicari et negari de subjecto, licet nunc actu de eo praedicetur: et talis propositio, licet sit de materia contingenti, tamen dicitur de contingenti quod inest. Contingens autem quod potest inesse, dicitur cum praedicatum est de contingenti, sicut de albo respectu hominis: tamen in propositione non dicitur actu inesse, sed possibiliter: ut cum dico « contingit hominem esse album », non est sensus quod homo sit albus, sed quod potest esse albus. Sciendum quod in prima figura, utraque propositione existente de contingenti, etiam conclusio erit de contingenti sic. Contingit omne album esse musicum. Contingit omnem hominem esse album. Ergo contingit omnem hominem esse musicum. Et sic est de aliis modis. In secunda vero figura si ambae propositiones sunt de contingenti, sive sint affirmativae, sive altera earum sit negativa, sive sint universales, sive altera earum sit particularis; nunquam conclusio erit de contingenti. Verbi gratia: Contingit nullum hominem esse album. Contingit omne risibile esse album. Ergo contingit nullum risibile esse hominem. Non sequitur: quia necesse est omne risibile esse hominem. Et sic de omnibus aliis. In tertia vero figura, praemissis existentibus de contingenti, sive sint affirmativae, sive altera earum sit negativa, sive universales, sive particulares; semper sequitur conclusio de contingenti, ut: Contingit omnem hominem esse album. Contingit omnem hominem esse musicum. Ergo contingit musicum esse album. Et sic est in aliis modis. Si vero altera praemissarum sit de contingenti, et altera de inesse; non semper sequitur conclusio de contingenti. Unde in prima figura majori existente de contingenti, sive sit affirmativa,



sive negativa, minori vero de inesse simpliciter, semper sequitur conclusio de contingenti. Ut: Contingit omnem hominem esse album. Omne risibile est homo, Ergo contingit omne risibile esse album. Majori vero existente de inesse, et minori de contingenti, non semper sequitur conclusio de contingenti, ut perfectus sit syllogismus, sic. Omne sanum est animal. Contingit omnem equum esse sanum: non sequitur: ergo contingit omnem equum esse animal. Sciendum, quia in qualibet propositione de contingenti potest salvari dupliciter dici de omni secundum duplicem ejus sensum supradictum. Unde cum dico, Contingit omnem hominem esse album, comparo hominem ad dici, de quibus potest praedicari, vel secundum esse ipsius albi, ut sit sensus: omne quod est homo, contingit actu esse album. Vel secundum possibilem inhaerentiam, ut sit sensus: omne quod est homo, contingit posse esse album. Propositio de inesse habet solum unum dici de omni, scilicet secundum comparisonem subjecti ad sua inferiora secundum actualem inhaerentiam praedicati: et ex his sequitur, quod virtute dici de omni illa de inesse potest sumi sub illa de contingenti. Unum enim dici de omni sub duobus, quia ad minus in uno est consequentia. Sed illa de contingenti non potest sumi sub illa de inesse: duo enim dici de omni non continentur sub uno. Et ista est causa quare majore existente de contingenti, minori vero de inesse, non sequitur conclusio de contingenti virtute syllogistica, licet sequatur gratia materiae. Sciendum quod propositio de inesse est duplex: scilicet de inesse ut nunc, scilicet quando praedicatum ut nunc solum inest subjecto, ut « Socrates currit », et inesse simpliciter. Unde ad hoc quod sequatur conclusio de contingenti, minori existente de inesse, debet esse de inesse simpliciter, quia praedicatum semper sequitur subjectum: ideo sequitur quod quidquid contingit praedicato, contingit subjecto. Sed quia in propositione de inesse ut nunc, praedicatum non semper sequitur subjectum, non erit semper verum quod quidquid contingit praedicato, contingit subjecto. Nee est instantia quod si minor esset de contingenti, quae tantum valet quantum illa de inesse ut nunc, et major esset de contingenti, sequitur conclusio. Nam si minor est de contingenti, semper praedicatum contingit subjecto; nam haec « contingit hominem currere » semper est vera, quia semper contingit hominem currere, tamen ista « homo non currit » non semper est vera: ideo aliter se habet de utralibet. In secunda autem figura in tribus primis modis negativa existente de contingenti, affirmativa vero de inesse, non fit syllogismus. Et causa est, quia omnes syllogismi in tantum concludunt, in quantum reducuntur ad primam figuram, ubi est dici de omni et dici de nullo. Tales autem syllogismi non possunt reduci ad primam figuram: non enim convertitur universalis negativa de contingenti, ut de subjecto fiat praedicatum, et de praedicato fiat subjectum, ut supradictum est: sed convertitur in terminis. Unde haec « contingit nullum hominem esse album », convertitur in hanc « contingit omnem hominem esse album ». Unde secundum hoc universali negativa existente de contingenti, in tribus videlicet modis, non fit syllogismus, quia non potest probari per dici de omni. Affirmativa vero existente de contingenti et negativa de inesse, fit syllogismus, quia potest reduci

*S. Th. Opera omnia. V. 17.*

talis syllogismus ad primam figuram, per propositionem negativam similiter conversam: tamen non erit conclusio de contingenti ut supra dictum est. In quarto autem modo, nullo modo fit syllogismus, sive major sive minor sit de contingenti. Talis enim syllogismus non potest reduci ad primam figuram per conversionem, sed per syllogismum conversivum. Sed quaecumque existente de contingenti, et altera de inesse, non potest fieri talis reductio: ergo ex eo nihil sequitur. Quod autem majore existente de contingenti talis reductio fieri non possit, patet. Sit talis syllogismus: Contingit omnem hominem esse album: Quidam lapis non est albus: Ergo quidam lapis non est homo; ejus oppositum est, Omnis lapis est homo. Fiat ergo syllogismus in prima figura sic: Contingit omnem hominem esse album. Omnis lapis est homo, Ergo contingit omnem lapidem esse album. Sed haec non opponitur huic « quidam lapis non est albus » quae erat minor: nam ut dictum est, in propositione de contingenti salvatur dici de omni secundum possibilem inhaerentiam: in futuro enim posset esse verum, quod omnis lapis fieret albus, et quod modo quidam lapis non sit albus: et sic isto modo non valet conjugatio. Apparet etiam quod talis syllogismus non valeat: nam propositionibus existentibus veris, aliquando sequitur conclusio falsa sic: Contingit omnem hominem esse album. Quoddam risibile non est album: sequitur: Ergo contingit quoddam risibile non esse hominem: quod est simpliciter falsum. Similiter si minor est de contingenti, nihil sequitur, et fit syllogismus sic: Omnis homo est animal. Contingit quoddam album non esse animal. Ergo contingit quoddam album non esse hominem: ut puta ovum, quod est album, contingit quod aliquando erit animal, aliquando non erit, si sequitur haec de inesse, scilicet « quoddam album non est homo », non tenet. Opposita enim ejus est « omne album est homo, ergo omne album est animal », quae non opponitur huic « contingit quoddam album non esse animal », ut supra dictum est. Si vero sumatur conclusio de contingenti, scilicet, Contingit quoddam album non esse animal, ejus opposita est, Necessesse est omne album esse animal; idem sequitur: et fiat syllogismus in prima figura sic: Omnis homo est animal. Necessesse est omne album esse hominem. Sequitur ergo omne album est animal: ut supra de mixtionibus necessariis et de inesse dictum est: quae non opponitur illi minori, scilicet « contingit quoddam album non esse animal »: et sic est inutilis conjugatio. In tertia vero figura, majore existente de contingenti, minori vero de inesse, sequitur conclusio de contingenti: nam conversa minori in quinque modis syllogismorum, fit reductio ad primam figuram. Verbi gratia fiat syllogismus sic: Contingit omnem hominem esse album. Omnis homo est animal. Ergo contingit quoddam animal esse album: conversa minori per accidens, fit tertius modus primae figurae sic: Contingit omnem hominem esse album. Omne animal est homo, Ergo contingit quoddam animal esse album: et sic est de aliis quatuor modis. Quintus autem modus tertiae figurae reducitur ad primam per syllogismum conversivum sic: Contingit quendam hominem non esse album. Omnis homo est animal. Ergo contingit quoddam animal non esse album. Cujus oppositum est: Necessesse est omne animal esse album. Deinde ponatur sub ea minor pri-

mi syllogismi, scilicet, Omnis homo est animal: et sequitur: Ergo necesse est omnem hominem esse album: quae est contradictoria majoris primi syllogismi. Et sic patet de mixtione propositionum de contingenti et de inesse in tribus figuris etc.

#### CAPUT XV.

##### *De mixtione contingentis et necessarii in tribus figuris syllogismorum.*

Sequitur de mixtione contingentis et necessarii. Notandum quod in prima figura quantum ad modos affirmativos, majori existente de contingenti, minori vero de necessario, syllogismus erit perfectus, et concludet conclusionem de contingenti. Verbi gratia: Contingit omne animal esse album. Necesse est omnem hominem esse animal. Ergo contingit omnem hominem esse album. Si vero sit e converso, scilicet majori existente de necessario, et minori de contingenti, nullus fiet syllogismus. Causa est, quia propositio necessaria haberet unum dici de omni, secundum scilicet actualem inhaerentiam praedicati ad subjectum, et ad contenta sub eo. Sed illa de contingenti habet duplex dici de omni, ut supra dictum est. Non ergo potest illa sumi sub illa de necessario per virtutem principii quod est dici de omni. Sciendum quod in praedicto syllogismo, licet concludatur per dici de omni, potest tamen concludi conclusio de contingenti de possibili, quod scilicet communiter se habet ad necessarium et contingens, in virtute istius regulae: Si aliquod subjectum sit essentialiter sub aliquo praedicato, quicquid contingit sub subjecto, contingit sub praedicato. In syllogismis autem negativis propositione affirmativa existente necessaria, negativa vero de contingenti, sequitur conclusio de contingenti sic: Contingit nullum hominem esse album. Necesse est omne risibile esse hominem: sequitur: Ergo contingit nullum risibile esse album. Si vero propositio negativa sit necessaria, affirmativa vero contingens, sequuntur duae conclusiones: scilicet aliquando de contingenti, aliquando de inesse; quod potest patere: nam ex opposito utriusque conclusionis cum altera praemissarum, infertur oppositum alterum praemissae. Ratio autem quare utraque conclusio sequatur ad unam negativam de necessario est, quia non solum praedicatum non dicitur inesse subjecto, sed nec etiam potest inesse. Unde syllogismus significat quod subjecto non insit praedicatum, nec possit inesse. Unde cum aliquid contingenter ponitur sub tali subjecto, significatur quod tale praedicatum removeatur actu ab eo quod contingenter ponitur sub subjecto: et sic erit conclusio de contingenti; quia quod actu contingenter removeatur, facit enunciationem contingentem, et significatur quod nullo modo possit sibi inesse: et sic non solum contingenter non inest, imo nullo modo inest ei, si sit enunciatio de inesse. In secunda autem figura in tribus primis modis negativa existente de necessario, affirmativa vero de contingenti, sequitur etiam duplex conclusio: scilicet de contingenti et de inesse: quia per conversionem propositionis necessariae reducuntur ad primam figuram. In quarto vero modo affirmativa existente de contingenti, negativa vero de necessario, vel e converso, inutilis erit conjugatio. In tertia vero figura quantum ad syllogismos affirmativos, universales

propositiones vel aliquam universalem habentes, majori existente de contingenti, minori vero de necessario, sequitur conclusio de contingenti. Conversa ergo minori fit syllogismus in prima figura. Si autem major sit de necessario, minor vero de contingenti possibili, quia propositiones de contingenti possibili convertuntur, sicut illae de necessario, minori conversa, fit prima figura, sicut dictum est, quod majori existente de necessario, majori vero de contingenti, sequitur conclusio de contingenti possibili, licet non per dici de omni, sed per primam regulam. Quantum autem ad syllogismos affirmativos habentes aliquam praemissam particularem, si major est universalis, sequitur regulas praedictas. Si vero major est particularis, sequitur secundam regulam. Quantum autem ad syllogismos negativos, dico quod quantum ad duos modos habentes majorem universalem negativam, majori existente de contingenti, minori vero de necessario, sequitur conclusio de contingenti, et reducuntur ad primam figuram per conversionem minoris. Si autem major erit de necessario, minor vero de contingenti, non fit syllogismus: non enim posset reduci ad primam figuram. Si vero minor esset de contingenti possibili, quia converti posset sicut illa de necessario, fieret syllogismus in prima figura, ubi concluderetur duplex conclusio: scilicet de inesse, et de contingenti, ut supra dictum est. Syllogismus autem negativus, cujus major est particularis negativa, ea existente de contingenti, et majori existente de necessario, sequitur conclusio de contingenti, et reducitur ad primam figuram per syllogismum conversivum. Majori vero existente de necessario, non fit syllogismus. Et sic patet de syllogismis modalibus.

#### CAPUT XVI.

##### *De syllogismis conditionalibus ex propositionibus simplicibus.*

Dicto de syllogismis categoricis, nunc dicendum est de hypotheticis. Ut autem supra dictum est, tres sunt species propositionum hypotheticarum: scilicet conditionalis, copulativa et disjunctiva. Syllogismi autem qui sunt ex propositionibus copulativis, eodem modo se habent sicut et syllogismi categorici; et ideo de eis praetermittamus. Sed quia ex propositionibus conditionalibus et disjunctivis aliter fiunt syllogismi quam in propositionibus categoricis; ideo de eis dicendum est: et primo de conditionalibus. Notandum quod propositiones conditionales, vel sunt simpliciter, vel compositae: dico autem simplices, quae tantum ex duabus categoricis componuntur, ut haec « si est homo, est animal »: compositae autem sunt, quae ex pluribus componuntur, ut haec « si est homo, cum sit animal, est substantia ». Haec autem compositae tribus modis fieri possunt: quia vel erit propositio composita ex duabus, conditionali et categorica, ut hic « si est homo, cum sit animal, est substantia »: vel e converso erit composita ex categorica et conditionali sic « si tu es animatum, tu es homo, aut es animal »: vel erit composita ex duabus conditionalibus, ut hic « si est homo est animatum, si est animatum est animal (1) ». Et quia syllogismi qui fiunt ex simplicibus, facilius sciun-

(1) *Al.* si est homo, est animatum si est animal. Et quia etc.

tur illis qui fiunt ex compositis; ideo primo ponemus syllogismos simplices, et postea breviter ostendemus secundum eorum similitudinem, qualiter fiunt syllogismi ex compositis. Sciendum quod simplices propositiones conditionales sunt quatuor. Aut enim habent ambas partes affirmativas, scilicet antecedens et consequens, ut haec « si est homo, est animal ». Vel antecedens affirmatum et consequens negatum, ut haec « si est homo, non est lapis ». Aut consequens affirmatum, et antecedens negatum, ut haec « si animal non est sanum, est aegrum ». Aut ambo negata, ut haec « si non est animal, non est homo ». Syllogismi autem qui ex his propositionibus fiunt, oportet quod sint consequentiae quaedam. Ut autem dicit Philosophus 2 Topic., duplex est consequentia, scilicet, in positione: scilicet quando proceditur pro positione antecedentis; et in contraria, scilicet quando proceditur a destructione consequentis. Secundum ergo ista, ex praedictis propositionibus quae fiunt figurae (1) in quarum una proceditur a positione antecedentis, in altera vero a destructione consequentis: quarum quaelibet quatuor habet modos, secundum quod quatuor sunt propositiones, ut dictum est. Primus modus primae figurae est: Si est homo est animal; sed est homo, ergo est animal. Secundus est: Si est homo, non est lapis. Sed est homo. Ergo non est lapis. Tertius est: Si animal non est sanum, est aegrum. Sed animal non est sanum, Ergo est aegrum. Quartus est: Si non est animal, non est homo. Sed non est animal. Ergo non est homo. Sciendum quod isto modo fiunt syllogismi cum hoc relativo « qui » vel cum hoc nomine « quicumque »: faciunt enim praedicta nomina connotantia oppositionem antecedentis sic: Omnis qui currit, movetur. Sed Petrus currit, Ergo Petrus movetur. Vel quicumque etc. A destructione consequentis sic. Omnis qui currit, vel quicumque currit, movetur. Sed Socrates non movetur. Ergo Socrates non currit. Et sic habet se in omnibus aliis modis dictarum figurarum. Patet ergo de syllogismis conditionalibus ex propositionibus simplicibus.

## CAPUT XVII.

### *De syllogismis conditionalibus ex propositionibus hypotheticis compositis.*

Sequitur de conditionalibus compositis: quarum duae, ut dictum est, consistunt ex tribus categoricis; tertia vero ex quatuor. Sed tres propositiones categoricae secundum affirmationem et negationem octo modis possunt variari. Primo possunt omnes esse affirmativae, secundo omnes negativae, tertio duae primae affirmativae et tertia negativa, quarto duae primae possunt esse negativae et tertia affirmativa, quinto prima affirmativa et duae ultimae negativae, sexto prima negativa et duae ultimae affirmativae, septimo prima et ultima affirmativae et media negativa, octavo prima et ultima negativae et media affirmativa. Ideo in qualibet dictarum potest fieri variatio, et sic sunt octo. Tertia vero conditionalis composita ex duabus conditionalibus, quae quatuor habent categoricas, multipliciter habet variari. De quibus omnibus compositis propositionibus, et earum varietate, et syllogismis qui ex eis fiunt, diffuse dixi in libro quem feci de hypotheticis syllo-

gismis; ideo diffuse de eis nunc tractare praetermitto: sed videamus solum modos syllogizandi in qualibet earum. Fiunt autem secundum quamlibet dictarum propositionum duae figurae, in quarum una proceditur a positione antecedentis, in altera a destructione consequentis. Prima enim propositio, ut dictum est, componitur ex conditionalis et categorica sic: Si est homo, cum sit animatum, est animal. Sed est homo. Ergo, cum sit animatum, est animal. Et consimiliter fiet talis syllogismus, si aliqua pars ejus vel omnes sint negativae: Si est homo, cum non sit inanimatus, est sensibilis. Sed est homo. Ergo cum non sit inanimatus, est sensibilis. A destructione vero consequentis sic: Si est homo, cum sit animatum, est sensibilis. Sed (1) non est sensibilis. Ergo non est homo. In negativa sic: Si est homo, cum non sit inanimatus, est sensibilis. Sed cum (2) sit inanimatus, non est sensibilis. Ergo non est homo. Secunda vero propositio, ut dictum est, composita ex categorica et conditionalis sic: Si cum est animatum est animal, est homo. Fiunt autem ex tribus propositionibus syllogismi a positione antecedentis sic: Si cum est animatum est homo, est animal. Sed cum est animatum est homo. Ergo est animal. Negando vero aliquam partem sic. Si cum est animatum est homo, non est equus. A destructione vero consequentis sic: Si cum est animatum, est homo, est animal. Sed non est animal. Ergo cum sit animatum non est homo. Cum parte vero negativa sic: Si cum est animatum, est homo, non est equus. Sed est equus. Ergo cum sit animatum non est homo. Et quia ut dictum est, quaelibet illarum propositionum habet variari octo modis, ex qualibet possunt fieri sexdecim syllogismi: scilicet octo a positione antecedentis, et octo a destructione consequentis. Tertia vero propositio, ut dictum est, composita est ex duabus conditionalibus sic: Si est homo est animal; si est animal, est substantia. Potest autem haec propositio variari tripliciter secundum triplicem variationem terminorum. Nam in ea est unus terminus bis sumptus: cum autem sint duae conditionales, talis terminus aliquando est antecedens in utraque sic: Si est homo, est animal; Si non est homo, est insensibile. Aliquando est consequens in utraque, sic: Si est homo est animal; si est lapis non est animal. Aliquando est consequens in una, et antecedens in alia sic: Si est homo est animal; si est animal est substantia. Et secundum hoc tripliciter variantur syllogismi, qui fiunt ex hujusmodi propositionibus: et tamen quaelibet istarum propositionum multiplicatur in octo secundum affirmationes et negationes partium ejus, ex quibus fiunt sexdecim modi syllogismorum. Quando vero idem terminus in una est consequens, et in altera est antecedens, fiunt syllogismi sic. Si est homo est animal; si est animal est substantia. Sed est homo. Ergo est substantia. Et hujusmodi fiunt a positione antecedentis. A destructione consequentis sic. Si est homo, est animal; si est animal, est substantia. Sed non est substantia. Ergo non est homo. Et haec dicitur a Boetio prima figura istarum propositionum. Secunda figura secundum cum fit, quando idem est antecedens in utraque, ex quo fit syllogismus a positione antecedentis sic: Si est homo est animal;

(1) *Al.* si est homo, cum sit animatum, non est sensibilis. Ergo etc.

(2) *Al.* incongrue ponitur non.

(1) *Al.* quae fiunt figurare.



si non est homo est insensibilis. Sed est homo. Ergo non est insensibilis. Vel sic: Si est homo est animal, si non est homo non est rationalis. Sed est homo. Ergo est rationalis. A destructione consequentis sic: Si est homo, est animal: si non est homo est insensibilis. Sed non est animal. Ergo est insensibilis. Vel sic: Si est homo, est animal, si non est rationalis non est homo. Sed non est animal. Ergo non est rationalis. Destructo enim animali destruitur homo, quo destructo destruitur rationale. Tertia figura secundum eum est, quando non arguitur a destructione consequentis, sed solum a positione antecedentis sic: Si est homo est animal, si est lapis non est animal. Sed est homo. Ergo non est lapis. Et sic patet de syllogismis conditionalibus.

### CAPUT XVIII.

#### *De syllogismis disjunctivis, et de propositionibus reduplicativis, et de conversione per comparationem.*

De syllogismis disjunctivis nunc dicendum est. Ubi nota quod sicut una propositio conditionalis secundum affirmationem vel negationem suarum partium multiplicatur, et sic sunt quatuor; ita etiam se habet de propositione disjunctiva sic: quia aut ambae partes sunt affirmativae, ut « aut est sanum, aut est aegrum »: vel ambae partes sunt negativae, ut « aut non est sanum, aut non est aegrum »: vel prima est affirmativa, et secunda negativa, ut « aut est sanum, aut non est aegrum »: vel prima negativa, et secunda affirmativa, ut « aut non est sanum, aut est aegrum ». Ad faciendum autem syllogismos de praedictis propositionibus, primo oportet videre quae dictarum propositionum uni simplici conditionalis aequipollet: postea secundum quod fiebat syllogismus ex illa conditionalis simplici, ut supra dictum est, sic fiat de ista disjunctiva. Ad hoc enim videndum oportet supponere, quod ad hoc ut propositio disjunctiva sit vera, semper oportet quod altera pars sit falsa: ita videlicet quod prima pars sit falsa, et secunda vera. Et quia posita quacumque propositione falsa, si verificatur, debet verificari per suam oppositam; verbi gratia, si haec est falsa « non est homo », verificatur per hanc, « est homo », et e converso; ideo videamus in propositione disjunctiva partem primam, utrum sit affirmativa, vel negativa. Si prima pars est affirmativa, aequipollet antecedenti conditionalis negato: nam sicut antecedens conditionalis supponitur quod debet esse verum, ad hoc quod tota conditionalis sit vera; ita prima propositio categorica, quam vocamus in disjunctiva antecedens, semper debet esse falsa. Ad hoc vero quod ista duo antecedentia aequipolleant, oportet quod si unum est affirmatum, quod alterum sit negatum: quia in utraque, scilicet conditionalis et disjunctiva, consequens est verum; ideo ad hoc quod inter se aequipolleant, oportet quod si unum est affirmatum, et reliquum; et si unum est negatum, et reliquum. Verbi gratia, sit disjunctiva ista « aut est sanum, aut est aegrum », quae habet antecedens et consequens affirmativa. Ad hoc quod aequipolleat conditionalis verae, debet conditionalis habere antecedens negatum et consequens affirmatum sic « si non est sanum est aegrum »: et sic de aliis. His habitis, faciliter possunt

sciri syllogismi disjunctivi. Ut enim supra dictum est, quatuor syllogismi conditionales fiunt a positione antecedentis, et quatuor a destructione consequentis. Eodem modo in istis propositionibus. Prima enim propositio conditionalis, ex qua sumebatur primus modus, erat ista. Si est homo, est animal. Secundum ergo dicta, huic aequipollet ista: Aut non est homo, aut est animal. Fiat ergo syllogismus disjunctivus sic: Aut non est homo, aut est animal. Sed est homo. Ergo est animal. Secunda propositio secundi modi erat ista: Si est homo non est lapis: cui aequipollet ista: Aut non est homo, aut non est lapis. Fiat syllogismus disjunctivus sic. Aut non est homo, aut non est lapis. Sed est homo. Ergo non est lapis. Tertia propositio erat ista: Si animal non est sanum, est aegrum: cui aequipollet ista: Aut est sanum, aut est aegrum: et fiat syllogismus disjunctivus sic: Aut est sanum, aut est aegrum. Sed non est sanum. Ergo est aegrum. Quarta propositio erat ista: Si non est animal, non est homo: cui aequipollet ista: Aut est animal, aut est homo: et fiat syllogismus disjunctivus sic: Aut est animal, aut est homo. Sed non est animal. Ergo non est homo. In secunda vero figura proceditur a destructione consequentis, et fit primus syllogismus sic: Aut non est homo, aut non est animal. Sed non est animal. Ergo non est homo. Secundus sic: Aut non est homo, aut non est lapis. Sed est lapis, Ergo non est homo. Tertius sic: Aut est sanum, aut est aegrum. Sed non est aegrum. Ergo est sanum. Quartus sic: Aut est animal, aut non est homo. Sed est homo, ergo est animal. Et sic patet de syllogismis disjunctivis.

Dictum ergo sit de syllogismis hoc modo. De aliis autem speciebus argumentationis non me intromitto. Notandum, ad hoc quod propositio reduplicativa sit vera, requiritur quod quatuor propositiones exponentes ipsam, scilicet tres categoriae et una hypothetica, sint verae: et si aliqua ipsarum esset falsa, ipsa esset falsa. Et quia tales propositiones aliquando fiunt gratia concomitantiae, ut si dicatur « homo in quantum corporeus est coloratus »; aliquando gratia causae, ut « ignis in quantum calidus est calefactivus »; et ideo reduplicativa gratia causae ad veritatem suam non solum requirit quod quatuor ejus exponentes sint verae, sed quod illud super quod cadit reduplicatio exprimat causam importati per praedictum, vel quod sit illud cui primo inest praedictum principale. Verbi gratia, de utraque dictarum propositionum. Ad hoc enim quod sit vera « homo in quantum corporeus est coloratus », requiritur quod haec sint verae, scilicet « homo est coloratus », « homo est corporeus », et « omne corporeum est coloratum », et « si aliquid est corporeum, id est coloratum ». Similiter ad veritatem istius « ignis, in quantum calidus, est calefactivus ». Verum est quod ignis est calefactivus, et quod ignis est calidus, et omne calidum est calefactivum, et si aliquid est calidum, id est calefactivum, et calidum est causa calefactionis. Et convertitur reduplicativa sic. Ignis in quantum calidus, est calefactivus: Aliquid quod in quantum calidum est calefactivum est ignis: et non sic: Calefactivum in quantum calidum est ignis. Notandum quod propositio universalis affirmativa convertitur simpliciter mutatis terminis finitis in terminos infinitos: consimiliter est etiam de particulari negativa. Causa est: nam propositio universalis affirmativa in terminis finitis non conver-



titur simpliciter, quia inveniuntur termini in quibus sic, ut, omnis homo est risibilis, et omne risibile est homo. Inveniuntur etiam termini in quibus non, ut, omnis homo est animal, non sequitur, ergo omne animal est homo: quia in plus se habet animal quam homo. Sed quia terminus qui in plus se habet quam alius terminus, si infinitetur, se habet in minus quam ille qui in minus se habebat: nam de paucioribus praedicatur non-animal, quam non-homo, quia non-animal praedicatur de omnibus entibus, praeterquam de animalibus, non-homo vero praedicatur de omnibus entibus, et de animalibus praeterquam de homine; potest ergo fieri conversio. In particulari vero negativa in terminis finitis non fit conversio; quia inveniuntur termini in quibus non, quando videlicet aliqua species praedicatur negative de suo genere, ut, quoddam animal non est homo, sed non e converso. Sed si infinitantur (1) termini, scilicet non-homo, non-animal (2), in plus se habet non-animal (3) quam non homo. Ergo potest fieri conversio, scilicet: quoddam non-animal (4) non est non-homo. Et sic patet de syllogismis etc.

## TRACTATUS VIII.

### DE SYLLOGISMO DEMONSTRATIVO.

#### CAPUT I.

##### *De syllogismo demonstrativo quid sit.*

Restat nunc dicere de demonstratione. Cum enim scientia sit habitus conclusionis demonstratae acquisitus ex ipsius speculatione; ad sciendum quid sit scientia, et quomodo acquiratur, necesse est scire quid est demonstratio. Est autem demonstratio syllogismus procedens ex veris, necessariis, per se primis, propriis, per se notis, immediatis, et causis conclusionis. Sciendum quod demonstrationum quaedam est propter quid, et quaedam est quia: unde dicta definitio solum convenit demonstrationi propter quid. In praedicta autem definitione quaedam sunt quae pertinent ad formam demonstrationis, in hoc quod dicitur esse syllogismus: quaedam sunt quae pertinent ad materiam demonstrationis, scilicet quod sit procedens ex veris, necessariis etc. Unde primo exponam particulas pertinentes ad materiam de qua est demonstratio. Secundo ponam ea quae pertinent ad ejus formam, scilicet in qua figura vel modo talis syllogismus debeat fieri. Quod enim demonstratio procedat ex veris, necessariis etc., hoc potest patere per finem suum, qui est scire. Cum enim scire nihil aliud sit quam cognoscere causam alienius rei, et non solum causam ut causa est, sed ut est causa illius rei actu (Cognoscere enim causam alicujus rei, et non cognoscere effectum ejus esse in actu, est cognoscere effectum in virtute. Hoc autem non est scire effectum simpliciter, sed est scire solum secundum quid. Etiam quia scire est per certitudinem cognoscere); oportet praedictum

effectum necessario semper ad illam causam sequi. Conclusio ergo demonstrationis, cujus habitus est scientia, seu scire habitualiter, oportet quod procedat ex talibus praemissis, quae sint verae et necessariae causae conclusionis.

#### CAPUT II.

##### *Quid sit dici de omni per se primo, seu universaliter.*

Ad investigandum autem dictas particulas definitionis demonstrationis pertinentes ad materiam de qua est demonstratio, praemittenda sunt quaedam necessaria. Quia enim praemissae demonstrationis sunt universales, ideo oportet scire quid est dici de omni. Et quia in eis praedictum dicitur per se de subjecto, ideo oportet scire quid est per se, et quid primo. Est autem dici de omni, ut hic sumitur, quando nihil est sumere sub subjecto, de quo non dicatur praedictum; nec est sumere aliquod tempus in quo praedictum tali subjecto non conveniat. Haec est autem differentia inter hoc dici de omni et illud quod in tractatu syllogismi dictum fuit; nam ibi sumebatur dici de omni, quandocumque aliquid praedicatur universaliter de aliquo subjecto, sive subjecto insit praedictum necessario et omni tempore: sive contingenter, ut nunc. Unde in illa propositione « omnis homo currit » salvatur hoc modo dici de omni. Sed nunc sumitur dici de omni de eo quod semper inest subjecto, ut « omnis homo est animal »: non enim est dare aliquod tempus, in quo homo non sit animal. Patet ergo de dici de omni. Per se autem dicitur quadrupliciter. Primo modo quando praedictum est definitio, vel aliqua pars definitionis ipsius subjecti: ut, omnis homo est animal rationale mortale, vel, omnis homo est animal. Secundo modo dicitur per se, quando praedictum est propria passio ipsius subjecti, in cujus definitione ponitur subjectum, ut, omnis homo est risibilis: in definitione enim risibilis ponitur homo non ut pars ejus essentialis, sed ut aliquid extra essentialiam suam, sine quo cognosci non posset. Cum enim esse accidentis dependeat a subjecto, oportet quod definitio quae significat esse ipsius, contineat in se subjectum. Tertio modo dicitur aliquid esse per se, quod significat aliquid solitarium, sicut singulare quod est in genere substantiae, ut Socrates et Plato. Album vel ambulans, isto modo non dicitur per se, cum non intelligatur aliquid solitarium per se existens: dicendo enim album, dico accidens et subjectum; sed cum dico Socrates, dico aliquid solitarium, et sic dicitur per se. Sciendum est autem quod iste modus non est modus praedicandi per se, sed est modus essendi. Quarto modo praedicatur aliquid per se, quando aliquid dicitur de aliquo quod est immediata et necessaria causa ipsius; sicut dicimus quod interfectus interiit interfectione: interfectio enim est immediata et necessaria causa ipsius interitus. Et sic patet de per se. Primo autem dicitur aliquid praedicari, quando praedictum et subjectum ita sunt adaequata, ut praedictum non possit inveniri extra subjectum, nec subjectum extra praedictum: sicut cum dicimus, homo est risibilis: ita enim se habet risibile ad hominem, quod de quocumque dicitur risibile, de eodem dicitur et homo, et e converso. Unde dicendo, Socrates est risibilis, licet modo risibile praedicetur de Socrate in secundo

(1) *Al.* verificantur.

(2) *Al.* homo non est albus.

(3) *Al.* non albus.

(4) *Al.* non album.

modo dicendi per se, non tamen praedicatur primo, quia risibile de pluribus praedicatur quam de Soerate. Philosophus tamen hoc quod dictum est praedicari primo, vocat universale: non tale universale de quo in primo tractatu dictum est; sed quia praedicatum de subjecto, et subjectum de praedicato potest universaliter praedicari. Ex his patet quomodo se habent ista tria, scilicet dici de omni, per se, et universale. Namque (1) omne quod primo seu universaliter praedicatur, praedicatur per se, non tamen e converso. Risibile enim primo per se praedicatur de homine: licet autem risibile praedicetur per se de Soerate, non tamen praedicatur primo. Similiter etiam quod per se praedicatur, dicitur de omni; non tamen omne quod dicitur de omni, dicitur per se: nam dicendo « omne animal est homo », est praedicatio de omni, non tamen per se.

### CAPUT III.

*Quod demonstratio procedit ex veris et necessariis.*

His visis, videamus partes definitionis demonstrationis supra positae. Dicitur enim ibi, quod demonstratio procedit ex praemissis veris. Quid autem sit verum, dictum est supra. Ad hoc autem quod conclusio sit vera ex praemissis sicut ex causis, oportet praemissas esse veras. Licet enim ex falsis possit concludi verum, tamen veritas conclusionis non (2) est ex praemissis. Dicimus enim: Omnis homo est lapis. Omnis margarita est homo. Ergo omnis margarita est lapis. Conclusio modo est vera, licet praemissae sint falsae. Et quia omnis causa assimilatur sibi effectum, falsitas dictarum propositionum non potest esse causa veritatis conclusionis. Et ideo in 1 Prior., dicit Philosophus, quod verum concluditur ex falsis, non propter quid, sed quia. Patet ergo quod demonstratio procedit ex veris. Deinde dicitur, quod demonstratio procedit ex praemissis necessariis: quae autem sit propositio necessaria, dictum est in tractatu syllogismorum. Notandum quod conclusio demonstrata oportet quod sit necessaria. Si enim scientia dicit certitudinem, quae non potest esse de contingentibus ut contingentia sunt, sed solum de necessariis; oportet quod conclusio, cujus habitus est scientia, sit necessaria. Hoc supposito, sciendum est, quod licet conclusio necessaria possit concludi ex praemissis contingentibus, vel ex altera ad minus, ut supra dictum est; non tamen potest sciri ex praemissis contingentibus, sed ex necessariis. Si enim scire, ut supra dictum est, est causam rei necessariam cognoscere; si medium contingentem se habebit ad extremitates, non erit ei necessarium; et per consequens poterit removeri conclusione stante: non ergo erit causa conclusionis. Ad hoc ergo quod sit causa conclusionis, necessario debet se habere ad ambas extremitates; et sic ambae praemissae erunt necessariae. Patet ergo quod demonstratio procedit ex praemissis necessariis.

(1) Al. neque.

(2) Al. deest non.

### CAPUT IV.

*Quod demonstratio procedit ex praemissis in quibus est, per se, et non per accidens.*

Deinde dicitur quod demonstratio procedit ex his quae sunt per se et non per accidens. Sciendum quod in demonstratione affirmativa potissima medium est definitio subjecti simul sumpta cum definitione passionis. Unde in majori propositione passio praedicatur de definitione subjecti, in qua exprimuntur principia ipsius passionis. Ut enim in primo tractatu dictum est, subjectum comparatur ad primam passionem non solum in ratione causae materialis, sed etiam in ratione causae efficientis. Definitio ergo subjecti simul sumpta cum definitione passionis, exprimit causam efficientem ipsius passionis immediatam et necessariam. Illic autem est quartus modus dicendi per se, ut supra dictum est. In minori autem propositione praedicatur definitio de subjecto, et hic est primus modus dicendi per se. In conclusione vero praedicatur propria passio de suo subjecto, et hic est secundus modus dicendi per se. Verbi gratia, si vellemus demonstrare quod omnis quaternarius numerus est par, sic fit. Omnis multitudo mensurata per unum, cujus per se non est medium, est par. Sed omnis quaternarius numerus est talis multitudo. Ergo omnis quaternarius numerus est par. Illic subjectum est quaternarius numerus; passio vero ejus est par, seu paritas: medium vero quod fuit sumptum, dicit definitionem numeri, quae est multitudo mensurata per unum; et dicit definitionem paritatis, quia paritas secundum se non est medium. In minori propositione passio praedicatur de definitione subjecti, in qua exprimitur definitio sua; et sic est quartus modus dicendi per se. In minori propositione definitio subjecti praedicatur de suo subjecto, et sic est primus modus dicendi per se. In conclusione vero praedicatur propria passio de suo subjecto, et est secundus modus dicendi per se. Patet ergo quod demonstratio procedit ex his quae sunt per se. Ratio communis hujus fit sic: Syllogismus qui procedit ex necessariis, non procedit ex his quae sunt per accidens, sed ex his quae sunt per se. Sed, ut dictum est, demonstratio procedit ex necessariis. Ergo demonstratio procedit ex his quae sunt per se.

### CAPUT V.

*Quod demonstratio procedit ex primis et immediatis.*

Deinde dicitur quod demonstratio procedit ex primis. Ubi nota, quod in demonstratione potissima praedicatur propria passio de subjecto in conclusione. In praemissis autem vel praedicatur definitio de subjecto, vel propria passio de definitione subjecti et sua. Haec autem omnia convertibilia sunt; et hoc est praedicari primo, ut supra dictum est. Et propter hoc demonstratio supra posita non est potissima; concluditur enim par de numero quaternario; in plus enim se habet par quam numerus quaternarius, quia dicitur de senario, octonario et ceteris. Convenit autem par adaequate alicui communi numero, qui est innominatus; et de illo, si haberet nomen, praedicatur per se et primo: et de illo posset fieri demonstratio potissi-

ma: sicut dicimus quod habere tres angulos aequales duobus rectis, convenit per se primo triangulo, quia convertuntur: omnis enim triangulus habet tres angulos, et omne habens tres angulos est triangulus. Non autem convenit isocheli primo, quia non omne habens tres angulos, est isochelus. Tales propositiones demonstrationum sunt immediatae. Mediata enim propositio est illa, in qua praedicatum inest subjecto propter aliquid praedicatum quod subjecto per prius convenit; sicut risibile Socrati, quia per prius convenit homini. Immediata autem propositio est illa, in qua praedicatum non propter aliud convenit subjecto; sicut risibile convenit definitioni hominis, et omnis propria passio definitioni sui subjecti et suae. Patet ergo quod demonstratio procedit ex primis principiis, et immediatis. Sciendum quod differt primum et immediatum: nam non omne quod primo inest, dicitur immediatum: risibile enim primo inest homini, sed non immediate, quia per prius inest definitioni hominis et suae; aliter definitio non esset medium ad concludendum risibile de homine. Similiter etiam non omne quod immediate inest, primo inest: homo enim immediate inest Socrati, non tamen primo, quia de pluribus dicitur homo quam Socrates. Unde praemissae demonstrationis oportet quod utrumque habeant. Sciendum est quod cum prima principia in demonstratione aliquando sint mediata, quia per aliquod medium possunt demonstrari, tamen demonstrator accipit ea ut immediata et indemonstrabilia: non enim sunt demonstrabilia in illa scientia de qua est demonstratio, sed in scientia superiori. Et ideo licet habeant medium, tamen accipiuntur ut immediata.

## CAPUT VI.

*Quod demonstratio procedit ex propriis, et non ex extraneis, nec communibus.*

Deinde dicitur quod demonstratio procedit ex propriis. Ubi nota quod proprium aliquando dicitur esse aliquid, quia non est extraneum: et aliquando dicitur esse proprium, quia non est commune. Utrouque autem modo procedit demonstratio ex propriis; quia non ex extraneis, nec communibus. Quod autem non procedat ex extraneis, sciendum quod in demonstratione sunt tres termini, sicut in quolibet syllogismo: scilicet major extremitas, quae est propria passio; minor extremitas quae est subjectum; et medium quod est definitio subjecti cum definitione passionis. Si autem medium esset extraneum a majori vel minori extremitate, quod scilicet non esset definitio utrumque comprehendens, tunc major extremitas non praedicatur de eo per se, nec ipsum de subjecto per se praedicaretur. Sed probatum est, quod in majori propositione major extremitas praedicatur per se de medio in quarto modo dicendi per se, et in minori propositione praedicatur medium de minori extremitate per se in primo modo dicendi per se. Ergo nullo modo demonstratio procedit ex extraneis, sed ex propriis. Sciendum quod licet in demonstrationibus non sit descensus ex uno genere in aliud genus extraneum, tamen nihil prohibet aliquando subjectum unius demonstrationis contineri sub subjecto alterius demonstrationis, et contrahere illud. Verbi gratia, dato quod demonstraretur haec passio,

scilicet sensitivum, per definitionem animalis de ipso animali; si eadem passio demonstraretur de homine per idem medium, vel per medium contractum ad definitionem hominis, tunc una demonstratio fieret sub alia demonstratione, et esset subjectum sub subjecto. Sciendum est quod talis contractio aliquando est in eodem genere simpliciter, sicut dictum est de animali et de homine, quia animal (1) contrahitur ad hominem per aliquam differentiam extraneam; aliquando vero talis contractio seu descensus fit in eodem genere secundum quid: quia subjectum contrahitur per differentiam extraneam, sicut visuale est extraneum a genere lineae, et sonus est extraneus a genere numeri: unde linea quae est simpliciter subjectum geometriae, et linea visualis quae est subjectum perspectivae, non sunt simpliciter unius generis, sed solum secundum quid: et similiter se habet de numero, qui est subjectum arithmeticae, et de numero sonoro, qui est subjectum musicae. Et ideo quando ea quae sunt lineae simpliciter, applicantur ad lineam visualem, fit quodammodo descensus in aliud genus. Unde in demonstratione quae fit in scientia perspectiva et in musica proceditur quodammodo ex principiis extraneis. Patet ergo qualiter demonstratio procedit ex principiis seu praemissis propriis, et non extraneis. Quod etiam procedat ex propriis, et non ex communibus, sciendum quod in demonstratione quaedam principia concurrunt actualiter, quaedam vero virtualiter. Quaedam vero principia dicuntur dignitates, seu communes animi conceptiones; quia ita naturaliter intellectus noster inclinatur per lumen suum ad ea cognoscenda, quod statim cognitis terminis cognoscit illa principia, ut, omne totum est majus sua parte: nam statim quod ratio cognoscit quid est totum et quid est pars, cognoscit hoc esse verum, scilicet, omne totum est majus sua parte. Ista autem principia seu propositiones primae sunt majus et minus communia. Unde illud principium commune, De quolibet dicitur esse vel non esse, est commune in omni ente; sed istud principium, Omne totum est majus sua parte, solum convenit enti corporeo, et non substantiis separatis quae nec totum habent nec partem: et sic se habet de multis aliis. Unde dicta principia non intrant actu demonstrationes quae fiunt in scientiis, sed virtute. Quando enim dico quaecumque propositionem, principium (2) intrat in eam virtute. Cum enim dico « Petrus currit », certum est vel quia homo est, vel non est; ergo hoc principium, scilicet, De quolibet dicitur esse, vel non esse; virtute est in qualibet praemissarum demonstrationis: et sic est de aliis principiis minus communibus respectu demonstrationum, in quibus sunt virtute. Unde dicere quod demonstrationes non procedunt ex his principiis virtute, falsum est. Sed dico quod talia principia communia actu non intrant demonstrationem. Unde ille qui voluit demonstrare quadraturam circuli per principia communia sic arguendo: Ubi invenitur majus et minus, ibi invenitur aequale. Sed invenitur quadratum majus circulo et minus circulo. Ergo invenitur aequale: male demonstravit. Ratio est, nam, ut supra probatum est, demonstratio procedit ex primis et immediatis: sed utendo istis principiis, ambae propositiones demon-

(1) *Al.* aliquando.(2) *Al.* primum.

strationis non erunt immediatae et primae: quoniam esse majus vel minus circulo non solum convenit quadrato, sed etiam triangulo, et multis aliis figuris: non ergo in ista propositione est primum, seu quod primo inest. Nec est immediata, quia per multa media posset hoc probari. Non ergo ex talibus procedit demonstratio. Alia vero principia demonstrationis sunt quae actu intrant demonstrationem; quae etiam dicuntur positiones, suppositiones et definitiones. Ad sciendum autem haec nomina, nota quod quidquid in demonstratione ante conclusionem ponitur, dicitur positio, eo quod posita est ante conclusionem. Positionum autem quaedam non assumunt esse vel non esse, et talis est definitio. Non enim dicitur definitio ista « homo est animal rationale mortale »; sed definitio solum est hoc, scilicet « animal rationale mortale », sine hoc quod addatur sibi esse vel non esse; et talis definitio est positio. Aliquando positio assumit esse vel non esse; ut cum dicimus « homo est animal rationale mortale »: et haec dicitur suppositio. Sciendum quod tales suppositiones non sine causa dicuntur suppositiones. Ubi nota quod propositio per se nota dicitur, in qua praedicatum est de ratione subjecti. Tales autem debent esse praemissae demonstrationum, ut infra dicitur. Sciendum quod aliquarum propositionum termini sunt in communi omnium notitia, ut sunt ens, verum, bonum, unum, aliquid et res, et hujusmodi; quae pertinent ad primas conceptiones intellectus, quae statim ut audiuntur, cognoscuntur. Unde propositiones quae ex eis fiunt, non solum sunt per se notae in se, sed etiam quoad nos, ut, De quolibet dicitur esse vel non esse: unde tales non dicuntur suppositiones. Aliae vero propositiones sunt, in quibus licet praedicatum sit de definitione subjecti, tamen definitio subjecti non est omnibus nota, et per consequens non est omnibus notum quod praedicatum sit de ejus definitione; sicut ista: Omnes anguli recti sunt aequales. Aequale enim est de definitione anguli recti: est enim angulus rectus, qui causatur ex linea recta perpendiculariter cadente super lineam rectam, ita quod ex utraque parte anguli reddantur aequales. Quia ergo non omnes hoc sciunt, scilicet quod aequale sit de definitione anguli recti: ideo hoc supponitur, et propter hoc dicitur suppositio. Alio modo propositio demonstrationis potest dici suppositio. Nam quaedam propositiones sunt, quae probantur per principia superioris scientiae, ut infra ostendetur; et ideo inferior scientia oportet quod supponatur (1). Et quia ex talibus principiis, seu praemissis propriis procedit demonstratio, quia actu intrant in eam; ideo procedit ex propriis, non ex communibus. Patet ergo quomodo demonstratio procedit ex propriis etc.

## CAPUT VII.

*Quod demonstratio procedit ex per se notis.*

Deinde dicitur quod demonstratio procedit ex per se notis. Per se notae enim dicuntur propositiones, in quibus praedicatum est de definitione subjecti, vel immediate causatur ex principiis ejus. Sed ea ex quibus procedit demonstratio, sunt hujusmodi: nam in majori propositione praedicatur

(1) *Forte legendum: et ideo in inferiori scientia oportet quod supponatur, vel quid simile.*

propria passio de definitione subjecti et sua, quae est immediata causa sui, seu exprimit immediata principia ejus; in minori vero praedicatur definitio de subjecto. Ergo demonstratio procedit ex per se notis. Sciendum quod quaedam propositiones sunt per se notae in se, et non quoad nos: sicut haec, Omnis febricitans habet pulsum excitatum. Licet enim hoc sit notum in se, quia febris est causa excitationis pulsus, tamen non est per se notum quoad nos, sed e converso cognoscimus febrim per excitationem pulsus. Ex talibus autem per se notis non procedit demonstratio: si enim propter quod unumquodque, et illud magis; propter praemissas autem innotescunt nobis conclusiones: ergo oportet quod praemissae sint nobis magis notae. Unde conclusiones nullo modo possent nobis fieri notae, nisi praemissae essent magis nobis notae. Demonstrationes autem fiunt ut conclusiones fiant nobis notae. Ergo demonstrationes procedunt ex notioribus quoad nos. Quaedam autem propositiones sunt per se notae et in se et quoad nos, ut, Omnis numerus cujus per se non est medium, est par, quia omnis numerus qui non habet secundum se medium, dicitur par, et e converso: et ex talibus procedit demonstratio. Patet ergo quod demonstratio procedit ex per se notis, et notioribus nobis. Ex praedictis potest concludi, quod demonstratio, et scientia quae est habitus conclusionis demonstratae, semper fit de incorruptibilibus et sempiternis. Ubi enim salvatur dici de omni, oportet quod illud sit incorruptibile et sempiternum. Sicut enim supra dictum est, dici de omni, dicitur quod non aliquando inest et aliquando non inest, sed semper inest. Corruptibilia autem non sunt semper. In eis ergo non salvatur dici de omni, sed solum in sempiternis. Sed in demonstratione potissima quae habet ambas propositiones universales, salvatur in omnibus dici de omni. Ergo demonstratio est de incorruptibilibus et sempiternis. Apparet etiam quod definitio est sempiternorum. Licet enim corruptibilia definiantur, non tamen definiuntur in quantum corruptibilia sunt: solum enim particularia sunt corruptibilia, particularia autem non definiuntur. Unde definitio est corruptibilium per accidens, sempiternorum autem est per se. Sciendum quod quaedam sempiterna, seu aeterna, ut ad propositum demonstrationis pertinet, non sunt semper secundum tempus sunt autem per comparisonem (1) ad causam: quia nunquam deficit quin posita tali causa ponatur effectus: sicut defectus solis nunquam deficit, quin interposita luna inter nos et solem sit: tamen defectus solis non est semper, nisi tunc. Quaedam vero non sunt semper nec per comparisonem ad tempus, nec per comparisonem ad causam, quae impediri potest: non enim semper ex semine hominis generatur homo cum duobus oculis; sed quandoque deficit propter impedimentum causae agentis vel materiae. In utrisque autem sic ordinandae sunt demonstrationes ad hoc quod sint ex sempiternis, ut ex universalibus propositionibus inferatur conclusio universalis, removendo illa, in quibus potest esse defectus vel ex parte temporis, vel ex parte causae. Patet ergo quod demonstratio est ex sempiternis, tam in praemissis, quam in conclusione. Scientia ergo quae est habitus conclusionis demonstrationis, est ex sempiternis.

(1) *Al. per compositionem.*



## CAPUT VIII.

*Quod demonstratio procedit ex causis conclusionis.*

Deinde dicitur quod demonstratio procedit ex causis conclusionis: quod dupliciter potest intelligi. Uno modo quod praemissae sint causa quod major extremitas insit minori: et hoc non solum est verum in demonstratione, sed etiam in omni syllogismo, in quo ex veris concluditur verum. Unde in isto syllogismo, scilicet, Omnis homo currit. Socrates est homo. Ergo Socrates currit: dato quod hoc sit verum, scilicet, omnis homo currit, et Socrates est homo, sequitur necessario ut effectus, quod Socrates currit. Alio modo intelligi potest quod praemissae sint causa conclusionis, quia in eis continetur causa tam subjecti, quam etiam praedicati ipsius conclusionis; et sic solum convenit demonstrationi. Sciendum quod quia, ut supra dictum est, scire propter quid, est causam rei cognoscere; medium autem quod est de demonstratione quae est syllogismus faciens scire, est definitio subjecti et passionis; omnis autem bona definitio datur per aliquam causam: ergo medium quod stat in praemissis, est causa subjecti et passionis: aliter tamen subjecti, et aliter passionis. Ubi sciendum est, quod cum quatuor sint causae, scilicet materialis, formalis, efficiens et finalis; a qualibet harum potest sumi definitio. Verbi gratia, dicendo. Domus est cooperimentum cum lapidibus, coemeto et lignis, est definitio per causam materialem. Si vero dicatur, Domus est cooperimentum quadratum, longum et altum, erit definitio per causam formalem. Si vero dicatur, Domus est cooperimentum factum ab artefice cum martellis, tegulis et plumbo, erit definitio per causam efficientem. Si vero dicatur, Domus est cooperimentum prohibens nos a pluviis, frigore et calore, erit definitio per causam finalem. Cum ergo subjectum per tot causas possit definiri, medium quod est ejus definitio, ut dictum est, se habebit ad illud in habitudine tot causarum. Respectu vero passionis habet se medium in habitudine duarum causarum, scilicet materialis et efficientis. Subjectum enim, ut dictum est, comparatur ad propriam passionem et ut subjectum et ut efficiens, et eodem modo se habet definitio subjecti respectu passionis. Sciendum quod quia causae habent ordinem ad invicem, ex una sumitur ratio alterius: ex forma enim sumitur ratio materiae, quia talem oportet esse materiam, qualem forma requirit. Efficiens autem est ratio formae: quia enim omne agens agit sibi simile, oportet quod secundum modum agentis sit modus formae quae ex actione sequitur. Ex fine vero sumitur ratio efficientis; quia omne agens agit propter finem; oportet ergo quod definitio quae sumitur a fine, sit ratio et causa probativa aliarum definitionum, quae sumuntur ex aliis causis, et quae sumitur ab agente aliarum duarum, et quae sumitur a forma ejus quae sumitur a materia: et ideo definitio quae sumitur a materia, potest demonstrari per causam finalem, et sic de aliis. Et propter hoc dicit Philosophus 1 Poster., quod definitio vel est conclusio demonstrationis, scilicet quando est per talem causam, quae concludi possit ex definitione, quae fiat per aliam causam: vel est principium demonstrationis, scilicet quando est e converso ex causa quae sit ratio et causa probativa alterius: vel est demon-

*S. Th. Opera omnia. V. 17.*

stratio sola positione, seu ordinatione differens scilicet quando tales duas causas comprehendit. Et sic patet de partibus definitionis demonstrationis, quas continet ejus materia.

## CAPUT IX.

*Quod demonstratio potissima affirmativa sit solum in prima figura, et in primo modo ejus.*

Nunc restat dicere de ejus forma: nam in ejus definitione dictum est quod est syllogismus. Ubi nota, quod demonstratio aliquando est affirmativa, aliquando negativa. Demonstrationum autem tam affirmatarum, quam negativarum quaedam sunt potissimae, quaedam vero non potissimae. Potissimae dicuntur illae, in quibus observantur omnia illa quae de demonstratione dicta sunt nullo omisso; si vero aliquid omitteretur, non esset potissima. Unde videndum est in quibus figuris fiant demonstrationes potissimae, et primo affirmativae. Sciendum quod demonstratio potissima affirmativa debet fieri solum in prima figura, et in primo modo ejus: quod sic potest patere. Nam in ea figura, et in eo modo ejus demonstratio debet fieri propter quid, ubi medium est causa passionis et subjecti, ita quod praemissae sint per se, in quibus convenienter potest medium assignari causa passionis et subjecti. Sed hoc non potest fieri nisi in prima figura: nam in secunda figura non concluditur affirmativa: in tertia vero figura et si concludi potest affirmativa, tamen quia medium in utraque propositione subjicitur in minori propositione, in qua subjectum praedicaretur de sua definitione, non esset praedicatio in aliquo modo dicendi per se, quod non contingit in prima figura, in qua in minori propositioni praedicatur definitio de subjecto ut dictum est. Ergo in sola prima figura fit demonstratio potissima affirmativa. Etiam oportet quod fiat in primo modo ejus, ut enim supra dictum est, in demonstratione potissima tam in praemissis, quam in conclusione salvatur dici de omni et primum, quod non posset fieri nisi omnes essent universales. Sed hoc solum fit in primo modo primae figurae. Ergo solum in eo potest fieri demonstratio potissima. Demonstrationes vero non potissimae possunt fieri et in tertio modo primae figurae et in tertia figura in modis concludentibus affirmativam. Patet ergo in qua figura et in quo modo potest fieri demonstratio potissima affirmativa.

## CAPUT X.

*Quod demonstratio potissima negativa debet fieri in secundo modo secundae figurae.*

Ad sciendum autem qualiter debeat fieri demonstratio potissima negativa, videamus utrum talis demonstratio possit esse. Dico quod licet in demonstratione negativa non possint esse nec servari omnia supradicta de demonstratione; non enim potest in propositione negativa aliquid per se praedicari, cum dici per se sit affirmativae; tamen sufficit in tali demonstratione quod praemissae sint necessariae et immediatae. Qualiter autem tam affirmativae quam negativae sint necessariae, dictum est in tractatu syllogismorum; et qualiter affirmativa sit immediata, dictum est supra. Restat ergo dicere,

qualiter negativa sit mediata vel immediata. Notandum, quod quando aliquid negatur de aliquo, et e converso, et de altero termino aliquid potest universaliter praedicari, de quo alter terminus potest negari, tunc propositio universalis negativa formata ex primis duobus terminis potest demonstrari mediante illo qui praedicatur universaliter affirmative de altero illorum terminorum. Verbi gratia: homo potest negari de lapide, et e converso, ut, Nullus homo est lapis. Et quia de homine potest praedicari aliquid universaliter, scilicet animal; dicimus enim, omnis homo est animal; et de animali potest negari lapis; ergo illa propositio, scilicet, nullus homo est lapis, est mediata. Potest enim probari per medium sic. Nullum animal est lapis. Omnis homo est animal. Ergo nullus homo est lapis. Et idem sequitur, si aliquid potest praedicari universaliter de lapide quod possit negari de homine, vel de quo posset homo negari. Erit ergo propositio negativa immediata, quando duo termini negati ab invicem ita se habebunt, quod neuter eorum habebit aliquid quod de ipso universaliter praedicetur, quod ab altero termino negari possit, vel ille terminus ab eo. Verbi gratia: Nulla substantia est quantitas: ista est immediata: nullus enim terminus potest universaliter praedicari de substantia, qui negetur de quantitate. De substantia enim praedicatur universaliter ens, quod tamen non negatur de quantitate. Similiter etiam duae definitiones duarum specierum sub aliquo genere immediate contentarum faciunt propositionem negativam immediatam, ut est ista: Nullum animal rationale mortale est animal irrationale mortale: animal enim rationale mortale est definitio hominis, animal vero irrationale mortale est definitio bruti; brutum autem et homo immediate sunt sub animali. Et idem erit de duabus differentiis ex opposito dividendis idem genus; ut, Nullum rationale est irrationale. Secus autem est de speciebus per illas differentias constitutis, ut, Nullus homo est brutum; quia supra hominem est aliquid quod posset negari de bruto, scilicet rationale; et supra brutum est aliquid quod posset de homine negari, scilicet irrationale; ideo sunt mediatæ; licet non proprie possit dici quod rationale sit supra hominem nec irrationale supra brutum; et ideo non proprie sunt mediatæ. Illis habitis, statim potest sciri qualiter fiat demonstratio negativa, et in qua figura. In tertia enim figura quia non concluditur universalis negativa, in ea non potest fieri talis demonstratio potissima. Unde, quia in prima et secunda figura potest concludi universalis negativa, in utraque potest fieri talis demonstratio eam concludens. Sed potissima solum potest fieri in secundo modo secundae figurae. Ratio est, quia licet scientia sit de vero, non tamen de omni vero, quantumcumque syllogizetur ex immediatis. Unde dicendo sic, Omnis habitus est qualitas; Omnis virtus est habitus. Ergo omnis virtus est qualitas: licet talis conclusio sit vera, et ex veris, immediatis, et necessariis, et per se; non tamen per se ea causabitur scientia; sed in demonstrationibus affirmativis solum causatur scientia ex conclusionibus veris quarum praemissae sunt verae et immediatae, et huiusmodi, ut dictum est; in quarum conclusionibus praedicatur propria passio de subjecto proprio. Sic etiam in demonstratione negativa non causabitur scientia ex habitu ejus conclusionis, dato quod conclusio sit vera, et concludatur ex immediatis, nisi

propria passio vere negetur de eo quod non est sibi subiectum, vel ab eo quod non exprimit causam suam, sicut exprimit definitio proprii subjecti; et talis vere erit demonstratio potissima. Haec autem non poterit fieri ex propositionibus immediatis, nisi in secundo modo secundae figurae, sic: Omne risibile est animal rationale ad apprehensionem convenientis emittens spiritum dilatando os. Sed nullum irrationale est tale animal rationale ad apprehensionem. Ergo nullum irrationale est risibile. Certum est quod major est immediata: nam in ea praedicatur definitio passionis et subjecti de ipsa passione. Minor etiam est immediata, ut dictum est. In conclusione vero removetur passio ab eo quod non est sibi subiectum. Hoc autem non posset fieri in prima figura, nec in primo modo secundae figurae: si enim in prima figura diceretur sic, Nullum irrationale est risibile; Omne brutum est irrationale. Ergo nullum brutum est risibile, tunc major non esset immediata. Et si fieret syllogismus in primo modo secundae figurae, licet praemissae possent esse immediatae, non tamen concluderetur removendo passionem a subjecto, sed e converso, sic: Nullum irrationale est animal rationale. Sed omne risibile est animal rationale. Ergo nullum risibile est irrationale. Potest etiam fieri demonstratio particularis negativa in quarto modo secundae figurae. Et sic patet de forma demonstrationis, in quibus figuris et modis fieri debeat. Patet ergo de demonstratione propter quid.

## CAPUT XI.

*Quod demonstratio quia procedit ab effectu ad causam, vel a causis remotis ad effectum.*

Nunc dicendum est de demonstratione quia. Ubi primo videndum est quid significetur per hoc quod dicitur propter quid, et quid per hoc quod dicitur quia. Notandum quod de re quatuor scire possumus: scilicet quid est, an est, quia est, et propter quid est. Ad quae intelligenda, sciendum est quod cum scientia non sit nisi verorum, verum autem et ens convertuntur, de esse ergo erit scientia. Ut autem dictum est in tractatu de praedicamentis, duplex esse invenitur in rebus; scilicet essentiae, et esse actualis existentiae. Et quia esse essentiae dicitur quidditas, seu quid est res: ideo cum scimus esse essentiae alicujus rei, dicimur scire quid est de ipsa. Esse autem actualis existentiae aliter se habet in substantia, et aliter in accidente. Quia enim accidentis esse est inesse, scire autem esse actualis existentiae subjecti est solum scire quod actu sit, et hoc est scire de ipso an est; sed scire de accidente esse actualis existentiae, est scire de ipso quia est. Unde scire quia est, nihil aliud est quam scire hoc inesse huic. Et quia aliquando aliquid inest alicui propter aliquam causam, ideo scire illam causam est scire propter quid. Patet ergo quod scire quia est de aliqua re, est scire ipsam inesse alicui ignorando causam quare inest; scire autem propter quid, est scire aliquam rem inesse alicui, et scire causam quare sibi inest. Demonstratio ergo propter quid est illa, in qua manifestatur causa quare praedicatum inest subjecto in conclusione. Demonstratio vero quia dicitur illa, in qua concluditur

aliquid inesse subjecto alicui, non tamen assignatur causa quare sibi inest. Ut autem dictum est supra, ad demonstrationem propter quid requiritur quod procedat ex causis, et ex immediatis: non enim sufficit scire causam, sed quoniam est causa ejus quod scitur, si erit causa immediata. Demonstratio ergo quia, erit vel quia non procedit ex causis, vel quia non procedit ex immediatis, sed ex causis remotis. Quantum ad primum sciendum quod, ut dictum est, demonstratio dicitur causa innotescendi; scilicet ut per praemissas nobis innotescat conclusio. Hoc autem fieri non posset, nisi praemissae essent nobis magis notae. Et ideo hoc est necessarium, ut scilicet demonstratio procedat ex notioribus quoad nos. Contingit autem aliquando ut immediatus effectus sit nobis magis notus quam causa: ideo in talibus oportet demonstrationem procedere ab effectu ad causam. Verbi gratia: moveri et sentire est immediatus effectus habentis animam sensitivam, et est magis notum nobis quod aliquid moveatur et sentiat, quia hoc sentimus, quam hoc quod habeat animam sensitivam. Et ideo si procedatur sic: Omne quod movetur et sentit, habet animam sensitivam: Sed omne animal movetur et sentit. Ergo omne animal habet animam sensitivam. Modo concluditur de animali quod habet animam sensitivam; non tamen per causam, sed per effectum, qui est moveri et sentire. Si vero fieret demonstratio et conclusio, esset demonstratio propter quid sic: Omne habens animam sensitivam movetur et sentit. Sed omne animal habet animam sensitivam. Ergo omne animal movetur et sentit. Sciendum quod tales demonstrationes quia, aliquando sunt in talibus terminis quae omnes sunt convertibiles inter se, scilicet medium, major extremitas et minor extremitas, sicut est in terminis praedictis: Omne enim animal movetur et sentit, et habet animam sensitivam; et omne quod movetur et sentit et habet animam sensitivam est animal, et omne quod habet animam sensitivam est animal et movetur et sentit: et in talibus terminis fiunt demonstrationes universales. Aliquando autem accidit, quod medium, scilicet effectus, puta moveri et sentire, se habent in plus quam minor extremitas; et adhuc fit syllogismus, sive demonstratio conveniens, sic: Omne quod movetur et sentit habet animam sensitivam. Sed omnis homo movetur et sentit. Ergo omnis homo habet animam sensitivam. Homo enim in minus se habet, quam quod movetur et sentit. Si vero medium in minus se habet quam minor extremitas, non fit demonstratio sic: Omne quod movetur et sentit habet animam sensitivam. Omne corpus movetur et sentit, haec est falsa. E contrario autem si medium se habet in minus quam major extremitas, fit demonstratio sic: Omne quod movetur et sentit, est corpus. Omne animal movetur et sentit. Ergo omne animal est corpus. Si vero medium in plus se habet quam major extremitas, non fit demonstratio. Ex effectu enim, qui est in pluribus causis, non potest concludi una causa: sic ex moveri et sentire non posset concludi rationale. Patet ergo de demonstratione quia, quae procedit ab effectu ad concludendum causam. Ex causis autem remotis procedit demonstratio quia in eadem scientia, et in diversis. In eadem scientia, sicut demonstratio Anacharsidis, quae talis fuit. Ubicumque non sunt vites, non sunt sibyllatores, seu cantores. Sed apud

Seythas non sunt vites. Ergo apud Seythas non sunt sibyllatores, seu cantores. Certe licet vites sint causa cantus; tamen sunt causa multum remota. Vites enim sunt causa uvarum; uvae vero sunt causa vini; vinum autem causa est laetitiae et causa cantus. Certum est quod talis demonstratio est quia. Non enim sic demonstrando cognoscere possumus per causam immediatam, quare Seythae non cantant; sed per multas alias demonstrationes intermedias factas; et sic per eam nescitur propter quid, sed quia etc

## CAPUT XII.

*Quod in demonstratione aliqua sunt praecognita ante conclusionem, et aliqua sunt cogitata postquam demonstrata est.*

Ad cognoscendum autem qualiter fiat demonstratio quia in aliis scientiis, sciendum est quod in qualibet demonstratione, in quacumque scientia fiat, antequam conclusio demonstretur, aliquid praescimus, et aliquid de ea scimus postquam demonstrata est. Ut enim dictum est, in demonstratione sunt tres termini; scilicet subjectum, passio, et definitio utriusque, quae est medium; et sunt in ea prima principia, seu dignitates in virtute. Unde antequam demonstremus, praescimus de dignitatibus quia verae sunt: non enim possunt complexa definiri. Cum autem dignitates sint complexae, ergo non possunt definiri. De eis ergo non possumus scire quid sunt, nec per consequens ante demonstrationem praescire quid est de ipsis; sed praescimus de eis quia sunt: debent enim credi esse vera. Ita enim sunt nota lumine naturalis rationis, quod cognitis terminis cognoscimus quia vera sunt, ut supra dictum est; nec scimus de eis propter quid, cum sint primae animi conceptiones. De passione autem praescimus quid est; quia definitionem habet, quam oportet praecognoscere antequam fiat demonstratio: nisi enim demonstrator praesciat medium, nunquam syllogizabit. Medium autem in demonstratione est definitio subjecti et passionis. De ipsa passione autem non possumus praescire quia est, scilicet esse actualis existentiae ipsius. Cum enim accidentis esse sit inesse, praescire illam inesse est scire ipsius esse actualis existentiae: et sic antequam demonstremus eam, sciremus demonstrationem ipsius: nam demonstratio nihil aliud ostendit, nisi passionem inesse subjecto, ut dictum est. Hoc autem est falsum. Non ergo de ea praescimus quia est. De subjecto autem praescimus quid est, quia jam oportet praescire medium, ut dictum est. Ejus autem definitio simul cum definitione passionis est medium. Praescimus etiam de ipso quia est. De ipso enim quod actu non est nihil sciri potest; et dico esse actu tam in se, quam in sui causis: licet enim rosa jam actu non sit, quia tamen est in causa sua, possumus de ipsa aliquam passionem demonstrare. Patet ergo quid in demonstratione praescimus; quid autem de ipsa scimus postquam facta est. Ad hoc videndum, nota quod in demonstratione sunt praemissae et est conclusio. Praemissae autem vel sunt primae in scientia, vel sunt secundariae. Verbi gratia, in scientia de animalibus primum principium est, Omne corpus animatum sensibile movetur et sentit. Supra istud principium nullum invenitur prius et universalius in eadem scientia, nisi dignitates, quae, ut



dictum est, non actu intrant demonstrationem: unde non continentur in eadem scientia, sed in scientia communi. Secundaria vero principia sunt quae per prima demonstrantur; et sunt primo conclusiones: postea in eadem scientia sumuntur ut principia ad demonstrandum alia. Verbi gratia, facio primam demonstrationem sic: Omne corpus animatum sensibile movetur et sentit. Omne animal est tale corpus. Ergo omne animal movetur et sentit. Postea accipio istam conclusionem, et facio eam praemissam sic: Omne animal movetur et sentit. Omnis homo est animal. Ergo omnis homo movetur et sentit. Istud dicitur principium secundarium. De primis autem principiis in scientia scitur solum quia sunt: si enim sciretur propter quid sunt, oporteret demonstrari; quod non posset fieri nisi per aliqua priora. Non ergo fuissent prima. Sed suppositum est quod erant prima. Ergo de eis non potest sciri propter quod sunt in ista scientia. Et propter hoc communiter dicitur, quod nulla scientia probat sua principia. Sed si probari debent, probantur per scientiam superiorem; sicut naturalis scientia probat principia scientiae de animalibus: est enim naturalis de omni corpore mobili. Vel ad minus possunt probari per mathematicam, vel per dialecticam, quae sunt scientiae omnibus communes, et probant principia omnium scientiarum; sed mathematica demonstrative, dialectica vero probabiliter, seu opinative. De secundariis vero principiis in scientia scitur propter quid; illa enim alibi probantur, ut dictum est. Patet ergo quid in demonstratione scimus de principiis. De conclusione autem in demonstratione propter quid; scimus propter quid: in demonstratione vero quia nescimus propter quid, quia medium vel non est causa conclusionis, sed effectus, ut dictum est: vel quia est causa remota. Notandum quod duae scientiae possunt esse de eodem subjecto: una formaliter, alia naturaliter: sicut geometria est de linea formaliter; perspectiva vero est de linea non in quantum linea, sed in quantum est visualis. Unde quicumque per principia lineae in quantum est linea, demonstraret aliquid de linea visuali, de conclusione illa sciret geometra propter quid, perspectivus vero sciret solum quia. Verbi gratia, fiat talis demonstratio. Omnis longitudo sine latitudine, in qua medium non discrepat ab extremis, est recta. Sed linea transiens per tabellas quadratas est huiusmodi longitudo. Ergo linea tabellarum quadratarum est recta. De ista conclusione scit geometra propter quid: quia scit causam rectitudinis linearum: sed perspectivus eam supponit, quia ignorat causam; et ideo de praedieta conclusione scit quia, et non propter quid; et sic de aliis: et tunc scientia inferior vocatur subalterna, quia scilicet est materialis; superior vero dicitur subalternans, quia est formalis. Sciendum quod aliquando contingit scientiam subalternatam respectu alterius scientiae esse subalternantem; sicut perspectiva respectu geometriae est subalternata, respectu vero scientiae de iride est subalternans. Cum enim scientia de iride sit pars scientiae naturalis, assumit principia perspektivae ad aliquam conclusionem probandam, et sic de illa conclusione solum scit quia: perspectiva vero propter quid. Sciendum quod aliquae scientiae non habent subjectum materialiter sumptum subformali; et tamen in aliqua conclusione accipiuntur principia alterius scientiae, et de illa conclusione

sciunt quia, et non propter quid: verbi gratia, quod vulnera circularia tardius sanentur, est conclusio in medicina, cuius subjectum non est sub subjecto geometriae; et tamen haec conclusio probatur per principia geometriae, quae sunt quod partes circuli, quia carent angulis, minus sibi appropinquant: ex hoc sequitur quod talia vulnera tardius sanentur. Patet ergo de demonstrationibus propter quid et quia etc.

### CAPUT XIII.

*Quod scientia quae est per causam, et quae dicit formam, est certior quam illa quae dicit effectum, et quae dicit materiam.*

Dicto de demonstrationibus, dicenda sunt aliqua de scientiis, quae sunt effectus earum. Circa hoc videnda sunt duo. Primo quid requiritur ad hoc quod scientia sit certa. Secundo quid requiritur ad hoc quod scientia sit una. Quantum ad primum sciendum quod illa scientia simpliciter dicitur certior, quae procedit ex notioribus simpliciter, et ex notioribus quoad nos. Dupliciter autem potest esse aliquid notius alio simpliciter: uno modo causa est simpliciter notior effectui; alio modo forma est simpliciter notior materia. Principium enim cognoscendi materiam est ex forma. Illae ergo scientiae quae dicunt causam et propter quid, sicut dictum est de scientiis subalternantibus, sunt certiores illis quae dicunt materiam: unde certior est geometria, quae est de linea quantum ad sua principia formalia, quam perspectiva quae est de linea visuali; vel scientia de triangulo, quam illa quae est de triangulo aeneo. Et quia, ut 7 Metaph. dicitur, duplex est materia; scilicet materia sensibilis vel materia naturalis, et materia intelligibilis, ut continuitas; ideo scientia quae ab utraque materia abstrahit, est certior illa quae non abstrahit nisi ab una. Geometria enim abstrahit a materia sensibili; et licet tractet de corpore, sicut et scientia naturalis, tamen certior est scientia naturali, quae non abstrahit a materia sensibili. Arithmetica autem quae abstrahit a materia sensibili et continuitate, quae, ut dictum est, materia intelligibilis est ideo certior est geometria. In triplici enim genere sunt scientiae certiores. Primo illae quae dicunt causam et propter quid, sunt certiores eis quae dicunt effectum et quia. Secundo illae quae dicunt formam, sunt certiores illis quae concernunt materiam sensibilem. Tertio illae quae ita dicunt formam quod nec etiam concernunt materiam intelligibilem, sunt certiores eis quae talem materiam concernunt. Patet ergo de certitudine scientiarum etc.

### CAPUT XIV.

*Quod unitas formalis scientiae sumitur ab unitate formali subjecti secundum rationem scibilis.*

Quantum ad secundum, scilicet quantum ad unitatem scientiae, sciendum est quod in scientia est duo considerare: scilicet ipsum subjectum de quo est passio, et ipsa principia ex quibus fit demonstratio ad concludendum passionem de subjecto. Ad hoc autem quod subjectum sit scibile a nobis, oportet quod habeat partes priores se. Ubi nota quod processus scientiae est quasi quidam motus rationis.



In motu autem est duo considerare: scilicet principium et terminum. Terminus autem ad quem scientia terminatur, est subjectum, circa quod est scientia. Quia in speculativis scientiis nihil aliud quaeritur nisi cognitio subjecti: sic in geometria nihil aliud quaeritur nisi cognitio magnitudinis. In practicis autem nihil aliud quaeritur quam constructio ipsius subjecti; sicut in scientia aedificatoria intenditur constructio domus. Subjectum ergo est terminus talis motus; principium autem talis motus est a primis principiis, quae sunt propriae partes ejus, sicut principium processus scientiae naturalis est a materia et a forma. Unde si quae res est quae non habeat talia principia priora ex quibus ratio procedere possit, ejus non est scientia secundum quod hic sumitur scientia, ut est demonstrationis effectus. Unde de substantiis separatis non potest esse scientia isto modo sumpta, quia per scientias demonstrativas non possumus scire ipsarum quidditates. Licet enim substantiae separatae sint per se ipsas intelligibiles ab intellectu ad hoc proportionato, non tamen congregatur eorum notitia qua cognoscitur quod quid est ipsarum per aliqua propria; sed bene potest per scientias speculativas sciri de eis an sint, et quid non sint, ad similitudinem inventam in rebus inferioribus; et tunc ad earum cognitionem utimur posterioribus et prioribus, quae licet sint posteriora quoad naturam, sunt tamen priora quoad nos. Subjectum ergo scientiae, prout hic sumitur scientia, oportet quod habeat partes priores, a quibus fiat processus ad ejus cognitionem: et hoc intelligendum est de partibus integralibus subjecti: sicut literae et syllabae sunt partes dictionis, quae est subjectum grammaticae. Sciendum quod licet dictum sit quod terminus ad quem terminatur processus scientiae, sit subjectum, non est tamen intelligendum quod sit terminus ultimus; sed ultimus terminus ad quem terminatur consideratio scientiae est, ut passio subjecti manifestetur.

His habitis, sciendum est quod illa scientia est una, quae est unius generis subjecti formaliter sumpti, ejus sunt partes et passiones, et eadem habet principia prima, non simpliciter, sed in scientia: diversae vero sunt quae habent diversa principia. Quod autem unitas scientiae debeat sumi ab unitate subjecti, potest patere ex dictis:

unitas enim motus sumitur a termino; subjectum autem est terminus motus rationis in processu scientiae, ut jam dictum est. Tale autem subjectum debet esse unum formaliter, in quantum hujusmodi (1). Ubi nota quod quantum ad hoc sic se habet suo modo subjectum ad scientiam, sicut objectum ad potentiam; materialis autem diversitas objecti non diversificat potentiam, sed formalis. Sic materialis diversitas scibilium non diversificat scientiam, sed formalis. Sumitur ante ratio formalis scibilis, sicut ratio formalis visibilis. Formalis autem ratio visibilis sumitur a lumine, per quod omnia videntur: etiam formalis ratio scibilis sumitur secundum principia ex quibus aliquid scitur. Unde quantumcumque sint diversa scibilia secundum suam naturam, dummodo per eadem principia sciantur, ad unam tamen pertinent scientiam: quia non sunt diversa in quantum sunt scibilia; sunt enim scibilia per sua principia. Sicut patet quod voces humanae multum differunt secundum suam materiam a sonis corporum inanimatorum: tamen quia secundum eadem principia attenditur consonantia in eis, ideo musica quae est de utrisque, est eadem. Et per oppositum, si sunt eadem scibilia secundum naturam, et tamen per diversa principia considerentur, pertinent ad diversas scientias; sicut corpus mathematicum non separatur subjecto a corpore naturali. Quia tamen corpus mathematicum cognoscitur per principia quantitatis, naturale vero per principia motus, propterea non est eadem scientia, scilicet mathematica et naturalis. Unitas ergo et diversitas scientiarum est ex unitate et diversitate formali subjecti, quae formalitas consistit secundum rationem scibilis, id est secundum identitatem et diversitatem principiorum. Et propter hoc, idem est dicere, habere idem subjectum formale, et habere eadem principia: et differre secundum principia, quod habere diversa subjecta formaliter. Sciendum est autem quod principia, de quibus loquimur, sunt principia quae sunt prima in scientia: et secundum communitatem dictorum principiorum, scientiae sunt magis vel minus communes. Cognoscuntur autem prima principia in genere scibilis secundum definitionem subjecti, ut dictum est. Et sic patet de unitate scientiarum. Gratias Deo bonorum omnium largitori.

(1) *Al.* in quantum hujus.



## OPUSCULUM XLV.

### DE SENSU RESPECTU SINGULARIUM, ET INTELLECTU RESPECTU UNIVERSALIUM

(EDIT. ROM. XLIX.)

Circa considerationem sensus, quare sit singularium, et intellectus universalium, et quomodo universalia sint in anima: sciendum est circa primum, quod sensus est virtus in organo corporali; intellectus autem est virtus penitus immaterialis, et non est actus alicujus organi corporalis. Unumquodque autem recipitur in aliquo secundum modum sui. Omnis autem cognitio fit per hoc quod cognitum est aliquo modo in cognoscente, scilicet secundum similitudinem: nam cognoscens in actu est ipsum cognitum in actu. Oportet ergo quod sensus corporaliter recipiat similitudinem sui quae sentitur. Intellectus autem recipit similitudinem ejus quod intelligit immaterialiter et incorporaliter. Individuatio autem naturae communis in rebus materialibus et corporalibus est ex materia corporali sub determinatis dimensionibus contenta: universale autem est per abstractionem ab hujusmodi materia et materialibus conditionibus individuantibus. Patet ergo quod similitudo rei quae recipitur in sensu, repraesentat rem secundum quod est singularis; sed recepta in intellectu, repraesentat rem secundum rationem naturae universalis. Et inde est quod sensus cognoscit singularia, intellectus autem universalia, quorum sunt scientiae.

Circa secundum sciendum est, quod universale potest capi dupliciter. Uno modo pro ipsa natura communi, ut subjacet intentioni universalitatis. Alio modo pro ipsa intentione secundum se. Sicut album potest dici illud cui accidit esse album, vel ipsum secundum quod jam subest albedini. Ipsa autem natura cui accidit intentio universalitatis, puta natura hominis, habet duplex esse. Unum quidem materiale, secundum quod est in materia naturali: aliud autem immateriale, secundum quod est in intellectu. Primo quidem modo non potest ei advenire intentio universalitatis, quia per materiam individuatur. Advenit ergo universalis intentio, secundum quod abstrahitur a materia in-

dividuali. Non potest autem abstrahi a materia individuali realiter, sicut Platonici posuerunt. Non enim est homo nisi in his carnibus et in his ossibus, sicut Philosophus probat, 7 Metaph. Relinquitur ergo quod natura humana non habet esse praeter principia individuantia, nisi in solo intellectu. Nee tamen intellectus est falsus dum apprehendit naturam communem praeter principia individuantia, sine quibus esse non potest in rerum natura: non enim apprehendit intellectus quod natura communis sit sine principiis individuantibus; sed apprehendit naturam communem non apprehendendo principia individuantia: et hoc non est falsum. Sicut si ab homine albo separaretur albedo hoc modo, quod intellectus intelligat eum non esse album, esset apprehensio falsa. Si autem sic separaretur albedo ab homine albo quod apprehendatur homo non apprehensa albedine, non esset apprehensio falsa: non enim exigitur ad veritatem apprehensionis, quod qui apprehendit rem aliquam, apprehendat omnia quae rei insunt. Sic ergo intellectus absque falsitate abstrahit genus a speciebus, in quantum intelligit naturam generis, non intelligendo differentias. Et similiter abstrahit speciem ab individuis, in quantum intelligit naturam speciei, non intelligendo principia individuantia. Sic ergo patet, quod naturae communi non potest attribui intentio universalitatis, nisi secundum esse quod habet in anima et intellectu. Sic ergo solum est unum de multis, prout intelligitur praeter principia individuantia, vel unum in multis ut individuis vel inferioribus quae in superiori sunt unum. Unde relinquitur, quod universalia secundum quod universalia, non sunt nisi in anima: ipsae autem naturae, quibus accidit intentio universalitatis, sunt in rebus. Et propter hoc nomina communia significantia naturas ipsas praedicantur de individuis, non autem nomina significantia intentiones: Socrates enim est homo, sed non est species.

# OPUSCULUM XLVI.

## DE INVENTIONE MEDII

(EDIT. ROM. L.)

Quoniam principium syllogizandi unamquamque propositionem est medius terminus; ideo ut possimus habere modum syllogizandi ad unamquamque propositionem, de inventionem medii termini nunc est determinandum. Cum igitur propositionum alia sit universalis, alia particularis; et universalium alia affirmativa, alia negativa: de inventionem medii ad syllogizandum universalem affirmativam prius est dicendum. Est ergo sciendum, quod ad syllogizandum universalem affirmativam sumendum est pro medio id quod sequitur subjectum, et antecedit praedicatum. Cujus causa haec est: quia universalis affirmativa non syllogizatur nisi in primo modo primae figurae; sed in hoc oportet medium antecedere praedicatum propositionis syllogizando, cum universaliter subjiatur ei, et sequi subjectum ejusdem, cum universaliter praedicetur de ipso. Verbi gratia, si haec propositio est syllogizanda « Omnis homo est animal », conveniens medium ipsius est « risibile », quia id semper sequitur secundum consequentiam ipsum subjectum, et antecedit praedicatum, ut dicatur: Omne risibile est animal. Omnis homo est risibilis. Ergo omnis homo est animal. Ad syllogizandum universalem negativam sumendum est pro medio id quod sequitur subjectum, et repugnat praedicato; et hoc quoad secundum modum primae figurae, et primum secundae: vel quod repugnat subjecto, et sequatur praedicatum, quoad secundum modum secundae figurae. Cujus causa haec est: quia universalis negativa non syllogizatur nisi in tribus modis praedictis; et in duobus primis modis medius terminus sequitur ad subjectum, et repugnat praedicato; in tertio medius repugnat subjecto, et sequitur ad praedicatum. Verbi gratia, si haec propositio est syllogizanda « Nullus homo est lapis », conveniens medium ipsius in duobus primis modis est « risibile », quia id sequitur ad subjectum, et repugnat praedicato. In tertio vero syllogismo, conveniens medium est « sensibile », quia id repugnat subjecto, et sequitur ad praedicatum. Ad syllogizandum autem particularem affirmativam sumendum est pro medio consequens ad subjectum et ante-

cedens ad praedicatum, et antecedens ad subjectum et praedicatum. Cujus causa haec est: quia particularis affirmativa non concludit nisi in prima et tertia figura: et ut concludatur in prima, oportet quod medium antecedit praedicatum, et subjiatur ei, et quod sequatur subjectum cum praedicatur de eo. Si vero concludatur in tertia, oportet medium antecedere utrumque, scilicet subjectum et praedicatum, cum subjiatur utrique. Verbi gratia, si haec propositio est syllogizanda « Quoddam animal est substantia », conveniens medium ejus in prima figura est « sensibile », quia id sequitur subjectum, et antecedit praedicatum. In tertia vero figura conveniens medium est « homo », quia antecedit utrumque, scilicet subjectum et praedicatum. Ad syllogizandum autem particularem negativam sumendum est pro medio id quod sequitur subjectum et repugnat praedicato, vel id quod repugnat subjecto et sequitur praedicatum. Cujus causa haec est: quia particularis negativa concluditur in omni figura; et si concludatur in prima, oportet medium sequi subjectum cum praedicetur de eo, et repugnare praedicato cum removeatur ab eo. Si autem concludatur in secunda, oportet medium sequi subjectum et repugnare praedicato quoad tertium modum, vel repugnare subjecto et sequi praedicatum quoad quartum modum. Si vero concludatur in tertia, oportet medium antecedere subjectum cum subjiatur ei, et repugnare praedicato, cum praedicatum removeatur ab ipso. Verbi gratia, si haec propositio est syllogizanda « Quidam homo non est asinus », conveniens medium eis in prima figura, et etiam in tertio secundae figurae est « risibile » quod sequitur ad subjectum, et repugnat praedicato. In quarto autem secundae figurae conveniens medium est « rudibile », quod repugnat subjecto, et sequitur praedicatum. Conveniens vero medium in tertia figura est « risibile », quod antecedit subjectum, et repugnat praedicato. Convertibilia enim antecedunt et sequuntur ea cum quibus sunt convertibilia: ideo risibile antecedit et sequitur hominem.



# OPUSCULUM XLVII.

## DE NATURA LUMINIS

(EDIT. ROM. LI.)

Considerandum est de natura luminis, et de ejus necessitate ad videndum, et de natura diaphani. Circa primum sciendum est, quod diversi diversimode opinati sunt. Nam quidam dixerunt lumen esse corpus: ad quod falso sunt moti ex quibusdam locutionibus quibus utuntur loquentes de lumine; consuevimus enim dicere, quod radius transit per aerem, et quod radii reverberantur, et quod radii intersecant: quae omnia videntur esse corporum. Quae quidem opinio stare non potest, propter rationes quas Philosophus ponit in lib. de Anima: et plures alias facile est adducere. Non enim facile est assignare, quomodo hujusmodi corpus per totum hemisphaerium nostrum subito multiplicetur, aut generetur aut corrumpatur; quomodo etiam sola interpositio corporis opaci esset causa corruptionis hujus corporis in alia parte diaphani. Quod autem dictum est de motu luminis aut reverberatione ipsius, metaphorice dictum est; sicut et possemus dicere quod calor procedit dum aliqua de novo calefiunt, vel reverberatur dum habet obstaculum. Quidam vero alii dixerunt, quod lux est quaedam alia natura, vel qualitas spiritualis; argumentum sumentes ex hoc quod in rebus intellectualibus utimur nomine luminis: dicimus enim in substantiis intellectualibus esse quoddam lumen intellectuale, seu intelligibile. Sed hoc est impossibile. Impossibile enim est, quod aliqua spiritualis natura et intellectualis cadat in apprehensione sensus: cum enim sensus sit pars corporea, non potest esse cognitivus nisi corporalium rerum. Si quis autem dicat quod aliud est lumen spirituale ab eo quod sensus percipit, cum eo est consentiendum; dummodo hoc habeatur, quod lumen quod visus percipit, non est natura spiritualis: nihil enim prohibet commune nomen imponi rebus quantumcunque diversis. Quod autem lumine et his quae ad visum pertinent utimur in rebus spiritualibus, contingit ex nobilitate sensus visus, qui est spiritualior inter omnes sensus: quod patet ex duobus. Primo quidem ex objecto suo: nam aliqua cadunt sub visu secundum proprietates in quibus communicant inferiora corpora cum caelestibus. Tactus autem est perceptivus proprietatum quae sunt propriae elementis, scilicet calidi et frigidi, et his similium. Gustus vero et olfactus proprietatum quae competunt mixtis secundum diversam rationem calidi

et frigidi, sicut et humidi. Sonus autem causatur ex motu locali, qui est communis etiam corporibus caelestibus et inferioribus. Sed species motus quae causat sonum, non competit corporibus caelestibus, secundum sententiam Aristotelis. Unde ex ipsa natura objecti apparet, quod visus est altior inter sensus, et auditus ei propinquior, et alii sensus magis remoti. Secundo apparet quod sensus visus est spiritualior ex modo immutationis: nam in quolibet alio sensu non est immutatio spiritualis sine naturali: dico autem immutationem naturalem, prout qualitas recipitur in patiente secundum esse naturale, sicut cum aliquid in frigidatur, aut calefit, aut movetur secundum locum. Immutatio vero spiritualis est, secundum quod species recipitur in organo sensus per modum intentionis, et non per modum formae naturalis: non enim sic recipitur species sensibilis in sensu, secundum illud esse quod habet in eo sensibili. Patet autem quod in tactu et gustu, qui est tactus quidam, fiat alteratio naturalis: calefit enim et in frigidatur aliquid per tactum calidi et frigidi, et non fit immutatio spiritualis tantum: similiter immutatio odoris fit cum quadam fumali evaporatione: immutatio soni fit cum motu locali. Sed immutatio visus sola est immutatio spiritualis. Unde patet, quod visus inter omnes sensus est spiritualior, et post hunc auditus. Et propter haec hi duo sensus sunt maxime spirituales, et soli sunt disciplinabiles: et haec de his quae pertinent ad visum. Alii vero dicunt, quod lux non est nisi evidentia coloris. Sed hoc apparet falsum in his quae de nocte lucent, et tamen eorum color occultatur. Alii vero dicunt, quod lux est forma substantialis solis, et lumen a luce descendens habet esse intentionale, sicut color in aere. Utrumque autem horum est falsum. Primum quidem, quia nulla forma substantialis est sensibilis per se, sed solo intellectu comprehensibilis. Et si dicatur, quod id quod videtur de sole non est lux, sed splendor; bene concedendum est de nomine; dummodo hoc quod dicimus quod visu comprehenditur, non sit forma substantialis. Secundum similiter est falsum; quia quae solum habent esse intentionale non faciunt transmutationem naturalem. Radii autem corporum caelestium transmutant totam materiam inferiorum. Unde dicimus, quod sicut corpora elementaria habent qualitates activas per quas agunt,



ita lux est qualitas activa corporis caelestis per quam agit, et est in tertia specie qualitatis. Cum autem sit qualitas primi corporis alterantis, non habet contrarium. Et quia luci nihil est contrarium, ideo in suo susceptibili non potest habere contrariam dispositionem. Et propter hoc suum passum, scilicet diaphanum, semper est in ultima dispositione ad formam; et propter hoc statim illuminatur. Calefactibile autem, quia habet contrariam dispositionem, propter hoc non est semper in ultima dispositione ad formam, et ideo non statim calefactibile calefit. Ipsa ergo participatio lucis effecta in diaphano, vocatur lumen, et fit secundum lineam rectam ad corpus lucidum, et tunc vocatur radius. Si autem causatur ex reverberatione radii ad corpus lucens, vocatur splendor. Lumen autem est commune ad omnem effectum lucis in diaphano. His visis secundum naturam lucis, de facili apparet ratio, quare quaedam corpora sunt lucida actu, quaedam diaphana, et quaedam opaca. Nam cum lux sit qualitas primi alterantis, quod est maxime perfectum et formale in corporalibus, illa corpora quae sunt maxime formalia et mobilia, sunt actu lucida: quae autem sunt propinqua his, sunt receptiva luminis, sicut diaphana: quae autem sunt maxime materialia, neque habent lumen in sui natura, neque sunt luminis receptiva, sed sunt opaca. Ista patent in elementis: nam ignis habet lucem in sui natura, sed ejus lux non apparet nobiscum nisi in materia aliena propter ejus subtilitatem; aer autem et aqua sunt minus formalia quam ignis; et ideo sunt tantum diaphana; terra autem quae est maxime materialis, est opaca. Tamen est sciendum, quod quidam dixerunt, quod lux est necessaria ad videndum ex parte ipsius coloris. Dicunt autem quod color non habet virtutem ut moveat diaphanum, nisi prope: et hujus signum dicant,

quia ille qui est in obscuro, videt quae sunt in lumine, et non e converso. Rationem etiam adducunt ad hoc: quod oportet cum visus sit unus, quod visibile non sit nisi per unam rationem: quod non esset, si color esset per se visibile. Sed hoc est manifeste contra Aristotelem, 2 de Anima; qui dicit, quod color habet in se causam essendi visibile. Unde secundum sententiam Aristotelis dicendum est, quod lumen ad videndum est necessarium non ex parte coloris, eo quod facit colores esse actu, ut quidam dicunt; est enim tantum in potentia cum est in tenebris; sed est ex parte diaphani, in quantum facit ipsum esse in actu, ut dicit Aristoteles. Ad ejus evidentiam considerandum est, quod omnis forma, in quantum hujusmodi, est principium agendi sibi simile. Unde cum color sit quaedam forma, ex se habet quod causet sui similitudinem in medio. Sed tamen sciendum est, quod differentia est inter virtutem perfectam et imperfectam. Nam forma quae est perfectae virtutis in agendo, non solum potest inducere suam similitudinem in suo susceptibili, sed etiam disporre patiens, ut sit proprium ejus susceptivum: quod quidem non potest facere forma imperfecta, cum sit imperfectae virtutis. Dicendum est ergo, quod virtus coloris in agendo est in perfecta ratione luminis. Nam color nihil aliud est quam quaedam lux quodammodo obscura ex admixtione corporis; unde non habet virtutem ut possit illuminare diaphanum, quod tamen faceret lux pura. Ex quo etiam patet, quod cum lux sit quodammodo substantia coloris, ad eam reducitur omne visibile actu. Nec oportet, quod color per lumen extrinsecum fiat actu visibilis. Quod autem colores illuminati videntur ab eo qui est in obscuro, contingit ex hoc, quod medium illuminatur, et hoc sufficit ad visus immutationem.



# OPUSCULUM XLVIII.

## DE NATURA LOCI

( EDIT. ROM. LII. )

Ad sciendum naturam loci, considerari oportet, quod non quaeretur locus, nisi esset aliquis motus secundum locum. Sicut enim ex transmutatione diversarum formarum circa materiam scimus materiam esse aliud ab omnibus formis, sic ex transmutatione diversorum corporum circa eundem locum scimus locum aliquid esse tamquam receptaculum corporum, aliud ab omnibus corporibus. Locus autem naturalis non nominat solum aliquid continens, sed continens et conservans et formans locata, propter quod unumquodque corpus naturaliter movetur ad locum suum tamquam ad conservativum esse sui. Locus vero secundum id quod est, nec materia est nec forma locati, quia materia et forma non separatur a re, locus autem separabilis est a locato: nec etiam spatium dimensionatum infra terminos corporis continentis existens; quia nihil est infra terminos corporis continentis circumscripta magnitudine corporis contenti. Cujus ratio est, quia si circumscripta magnitudine corporis contenti esset aliquod spatium infra terminos corporis continentis, tale esset dimensionatum longitudine, latitudine et profunditate. Dimensiones autem sunt accidentia, cum sint quantitates. Ergo non possunt esse in subjecto, nisi in corpore. Si ergo esset aliquod spatium infra terminos corporis continentis praeter magnitudinem corporis contenti, sequitur quod esset aliquod accidens sine subjecto: quod est impossibile. Locus ergo neque est materia, neque forma, neque spatium infra terminos corporis continentis contentum. Quod non sit spatium probatur aliter sic: quia si locus esset spatium infra terminos corporis continentis, sequitur quod infinita loca essent simul, sicut deducit Philosophus; quia cum aer et aqua, et quodlibet corpus, et quaelibet partes corporis habeant proprias dimensiones et proprias distantias, idem faciunt omnes partes in toto quod tota aqua in vase; quia secundum positionem eorum qui tenent sententiam de spatio quod sit locus, cum aqua est in vase, praeter dimensiones aquae sunt ibi aliae dimensiones spatii penetrantes dimensiones aquae. Constat autem quod eodem modo pars continetur in toto sicut aqua in vase; nisi quod locatum est divisum a loco. Pars autem non est actu divisa a toto. Si ergo dividatur pars a toto, praeter dimensiones partis essent ibi aliae dimensiones totius penetrantes di-

mensiones partium. Manifestum est autem quod divisio non facit de novo esse ibi dimensiones, sed praeeistentes dividit. Sicut autem post divisionem sunt ibi aliae dimensiones totius penetrantes dimensiones partium, sic erunt ante divisionem. Quot ergo partes convenit accipere in aliquo toto, quarum una continet aliam, tot erunt dimensiones se invicem penetrantes. Sed in aliquo toto continuo est accipere infinitas partes, quarum una continet aliam, eo quod quodlibet totum continuum divisibile est in infinitum. Ergo in aliquo toto continuo erunt infinitae dimensiones se invicem penetrantes. Si ergo dimensiones sunt locus, sequitur quod infinita loca sunt simul, quod est impossibile. Ex quo ergo locus non est materia, nec forma, nec spatium; sequitur quod sit quantum, scilicet terminus corporis continentis. Locus autem non solum est terminus corporis continentis, sed etiam est immobilis. Et hanc immobilitatem quidam intelligunt esse respectu locati: locus enim licet moveatur motu continentis, quia ejus ultimum est, non tamen movetur motu locati. Istud est insufficienter dictum; nec est secundum mentem Philosophi; qui vult, quod sicut vas est locus mobilis, ita locus est vas immobile. Majorem ergo immobilitatem oportet dare loco naturali, quam vasi. Cum ergo vas sit immobile motu ejus quod est in vase, et locus sit magis immobilis quam vas, sequitur, quod locus non sit immobilis motu contenti, sed etiam continentis. Et confirmatur, quod circa aliquod contentum manens immobile, puta circa domum vel arborem, contingit mutationem fieri continentis, puta aëris. Si ergo locus moveretur motu continentis, sequitur quod idem manens immobile fieret in diversis locis, quod est impossibile. Locus ergo non solum est immobilis motu locati, sed etiam motu continentis. Propter quod dicit Philosophus, quod si navis sit in aqua fluvii quae movetur, magis utitur ea tamquam vase, quam sicut loco continente: de natura enim loci est, quod sit immobilis. Unde totus fluvius, qui secundum se totum est immobilis, magis debet dici locus navis, quam haec aqua quae fluit et movetur: totus enim fluvius non est locus proprius navis, sed communis; et ideo locum proprium navis in fluvio oportet accipere per comparisonem ad totum fluvium, qui est immobilis. Est ergo accipere locum

proprium in fluvio non secundum hanc aquam quae fluit et movetur, sed secundum ordinem et situm quem habet ad totum fluvium; qui quidem ordo et situs manet in aqua succedente, qui erat in aqua recedente respectu totius fluvii. Quamvis enim aqua materialiter fluat, tamen quia manet idem ordo et situs respectu totius fluvii, manet etiam idem locus: et secundum hunc modum debemus intelligere quod extremitates corporum naturalium sint locus, scilicet per comparisonem et ordinem et situm quem habent ad totum corpus ipsius caeli, quod est primum continens et conservans et locans. Quamvis enim moveatur superficies aeris vel aquae secundum quod est ultimum hujus corporis vel illius, succedit tamen aliud corpus, quod eundem situm et ordinem secundum naturam habet ad primum ordinans sive locans, quod est caelum; propter quod manet idem locus numero. Unde cessat objectio quam faciunt aliqui sic. Locus est ultimum continentis. Sed continens movetur, Ergo locus movetur. Haec enim ratio bene procederet, si ultimum continentis, secundum quod hoc continens est, esset locus. Hoc autem non est verum; quia nihil habet rationem loci vel locantis, nisi per comparisonem ad primum locans. Quod autem diversitas superficierum non impedit unitatem loci, patet: quia uni locato secundum numerum correspondet unus locus secundum numerum simul et semel. Sed baculus unus dimidius existens in aqua et dimidius in aëre, est aliquod unum locatum secundum numerum. Ergo est in aliquo uno loco secundum numerum. Sed est in diversis superficibus aëris et aquae. Ergo diversitas superficierum non impedit unitatem loci. Unitas ergo loci accipienda est secundum ordinem et situm ad primum locans. Et causa omnium istorum est: quia, sicut dictum est prius, locus non solum est continens, sed est continens et conservans. Nihil autem habet rationem conservantis alium nisi per virtutem et influentiam corporis caelestis, quam recipit secundum quod est in determinato situ et in determinata distantia. Et haec est causa quare aliquid habet rationem loci, scilicet per comparisonem ad primum locans. Quia vero locus immobilis est; propter hoc medium caeli, quod est centrum, et ultima superficies corporis circularis, quae est caelum, sic se habent, quod hoc dicitur sursum, illud vero deorsum, quae sunt duae loci differentiae: haec enim maxime manent immobilia. Centrum semper est immobile. Caelum autem licet semper moveatur, tamen semper est in eadem distantia ad nos. Hoc autem quod dictum est de loco, intelligimus de loco naturali, qui est conservativus corporum naturalium. Et iste locus naturalis primo debetur elementis elementatis per elementa: locus enim naturalis ignis est superficies concava orbis lunae, quae manet semper in eadem distantia ad ignem, et ideo dicitur esse immobilis; locus autem aëris est superficies concava ignis, et sic de aliis suo modo; locus autem omnium elementatorum est locus deorsum, quia in omni elementato dominatur terra secundum quantitatem. Contra ea quae dicta sunt, potest objici, quod scilicet locus terrae non sit ultimum aquae, nec locus aquae sit ultimum aëris, quia unumquodque corpus naturale movetur ad locum suum. Terra autem non movetur ad superficiem aquae, sed movetur ad centrum. Ergo superficies aquae non est locus

terrae, sed potius centrum. Praeterea, si terra moveatur a loco suo, aqua descenderet, ut vult Philosophus 4 Caeli et Mundi; et similiter aer in locum aquae si amoveretur aqua. Ergo locus aquae non est superficies concava aëris, nec locus aëris est superficies concava ignis: quod est contra prius determinata. Pro solutione horum intelligendum est quod in loco non est tantum continentia locati, sed est ibi virtus conservans et formans locatum. Et propter hoc dicit Alpharabius, quod causa quare ex hac parte materiae generatur terra, et ex alia aqua vel aër vel ignis, non est nisi locus cum virtute caelesti. Quia enim frigiditas tanta quanta causatur ex distantia quae est ex orbe usque ad centrum, invenit hanc partem materiae in loco terrae, propter hoc inspissat eam inspissatione vehementi; ita quod exprimit ex ea humidum, et facit elementum siccum et frigidum, quod est terra. Frigiditas vero inspissans materiam, sic tamen quod non est ex ea exprimens humidum, sed faciens ad se fluere, generat aquam: et haec frigiditas est solum in tanta distantia, quanta est locus aquae ab orbe. Caliditas enim non consumens humidum, sed secum compatiens, generat aerem; quae quidem caliditas causatur ab orbe in tanta distantia quae est ejus ad locum aeris. Ignis enim cum sit summe calidus, generatur in loco immediato sphaerae lunae ex motu disgregante et calefaciente materiam. Hoc supposito intelligendum est, quod motus locati non est ad ipsam superficiem locantis propter superficiem, sed propter virtutem conservativam et formativam locati. Et ideo cum virtus formativa terrae sit frigiditas, quae causatur ex tanta distantia ad primum calefaciens, quod est caelum, et inchoatio hujus virtutis est in concavo aquae; perfectio autem ejus est in centro; ideo terra movetur ad centrum, et non ad superficiem aquae: et inde est, quod terra est simpliciter gravis. Virtus autem formativa ignis est caliditas perfecta, quae est completa in concavo orbis lunae: propter quod ignis est simpliciter levis. Virtus autem formativa aeris, incipit in concavo ignis, et deficit in convexo aquae: perfecta autem est in medio: et sic est de aqua suo modo. Et ideo motus aquae est a terra et ab aëre ad medium ejus; et motus aëris secundum naturam est ab aqua et igne ad medium locum. Propter quod aqua et aer non sunt simpliciter leves neque graves, sed in respectu. Sic igitur patet causa, quare terra movetur deorsum simpliciter, et non ad concavum aquae, licet sit locus ejus; quia hoc facit virtus formativa quae est in loco, propter quam unumquodque locatum movetur ad locum suum. Ad aliam rationem respondet Alpharabius, quod motus aëris ad locum terrae non est motus naturalis aëris vel aquae, sed est violentus; quod patet, quia est corruptivus utriusque. Nam cum aqua movetur ad locum terrae, inspissatur a frigiditate ipsius loci majori inspissatione quam requiratur ad formam aquae, unde convertitur in terram. Similiter cum aer descendit ad locum aquae, in frigidatur a frigidatione loci illius, et convertitur in aquam. Qualiter autem hoc non obstante aqua dicatur frigida primo, et terra non, quamvis causetur ex majori frigiditate, patet ex 2 de Generatione.

*Quomodo ultima sphaera sit in loco.*

Ex his quae dicta sunt de loco, quod locus est ultimum continentis, concludere possumus, quod corpus cui inest aliquid extra ipsum continens, tale est in loco. Cui autem non est corpus extra continens, ipsum tale in loco non est unum solum, scilicet ultima sphaera; propter quod ultima sphaera non videtur esse in loco. Sed hic est dubitatio, cum nihil videatur moveri in loco nisi sit in loco, si ultima sphaera non est in loco, motus ejus non erit localis: quod est inconueniens. Propter hanc rationem et quasdam alias, Joannes Grammaticus dixit locum non esse terminum continentis, sed spatium quod est infra terminos corporis continentis. Unde dixit caelum per se esse in loco, et per se moveri in loco, quia per se dixit ipsum esse in tali spatio. Istud non potest habere veritatem secundum ea quae determinata sunt de loco; cum ostensum sit, quod locus non est spatium, sed terminus continentis. Est etiam contra intentionem Philosophi, qui dicit caelum non esse in loco per se, sed per accidens. Propter quod dixit Alexander caelum non esse in loco nec per se nec per accidens, nec moveri in loco, quia non est de ratione corporis ut sit in loco, cum locus non ponatur in definitione corporis. Quia tamen oportet omnem motum contineri sub aliqua specie motus, ideo Avicenna secutus eum, dixit motum caeli non esse in loco, sed in situ vel ad situm. Haec est contra intentionem Philosophi 5 Phys., ubi dicit motum tantum esse in tribus generibus, scilicet quantitate, qualitate et ubi. Sed quod illud sit falsum patet: quia ad nulum genus est motus, cujus specierum ratio consistit in indivisibili: propter quod dicimus, quod ad substantiam non est motus, quia ratio substantiae in indivisibili consistit. Non sic autem ratio albedinis, quia potest participare secundum magis et minus a subjecto; nunc autem ita est, quod ratio situs in indivisibili consistit. Ergo ad situm non est motus. Praeterea situs nominat ordinem partium in loco. Locus ergo ponitur in definitione situs. Motus ergo qui non potest esse ad locum, non potest esse ad situm. Sed motus caeli secundum eos non est ad locum. Ergo non est ad situm. Ideo aliter dixit Avempace. Dixit enim quod linea recta et corpus rectum utrumque indeterminata sunt de se: et ideo indigent aliquo finiente et terminante et continente. Linea autem circularis per se ipsam finitur, et similiter corpus circulare: et ideo non indigent aliquo finiente et continente. Propter quod dixit non esse de necessitate corporis circularis ut sit in loco: ideo dixit, quod caelum non est in loco, nec habet motum localem. Hujus enim opinionis fuit Alpharabius, quem adducit Avempace pro testimonio sui dicti. Sed hoc dictum videtur inconueniens: quia, sicut vult Philosophus 8 Physicorum, motus localis est primus motuum. Sed sicut dicit ibid., motus caeli est primus motus. Ergo est localis. Praeterea Philosophus, 4 Physicorum, vult, quod caelum sit in loco saltem per accidens. Propter hoc dixit aliter Themistius, quod caelum est in loco per partes. Ad cujus intellectum considerandum est, quod non esset locus, nisi esset aliquis motus secundum locum. Licet enim de ratione corporis non sit locus, est tamen de ratione corporis moti localiter. Unde secundum quod diversa corpora succedunt sibi in eodem loco, secundum hoc debetur locus alicui

motu localiter. Aliqua enim inveniuntur moveri motu recto, sicut sunt levia et gravia: et haec secundum se tota mutant locum; et ideo secundum se tota sunt in loco. Quaedam autem sunt quae moventur motu circulari; et haec secundum se tota non mutant locum nisi secundum rationem: sed secundum partes mutant locum, et fiunt in alio loco secundum subjectum. Propter quod illud quod movetur circulariter, non de necessitate est in loco secundum se totum, sed solum secundum partes. Et propter hoc, ultima sphaera cum moveatur circulariter, non est in loco per se, sed per partes suas. Sed hoc videtur esse falsum; quia toti convenit moveri et esse in actu, et non partibus (1). Ergo et toti convenit esse in loco et non partibus, quia sicut convenit alicui motus, sic et locus. Propter hoc dicendum est, quod partibus sphaerae ultimae, licet non competat esse in loco actu, sunt tamen in loco in potentia; quia pars si dividatur a toto, erit in toto, sicut in loco. Sic igitur convenit caelo vel sphaerae, quod sit in loco per partes, quibus convenit solum in potentia esse in loco. Et ideo si volumus accipere illud veritatis quod continet haec opinio, possumus dicere, quod caelum simpliciter in loco non est nisi per accidens, quia est circa locum. Ad cujus intellectum sciendum est, quod sicut vult Averrois, omne naturaliter quiescens de necessitate est in loco; non tamen omne motum de necessitate est in loco. Cujus ratio est, quia omne quod quiescit, propter connaturalitatem ad suum continens quiescit; et ideo omne quod quiescit naturaliter, est in continenti sibi connaturali, propter quod de necessitate est in loco. Illud autem quod movetur, non de necessitate est in loco: quia eorum quae moventur quaedam indigent motu ad suum esse et ad suam perfectionem: et talia sunt quae sunt in continente non connaturali: propter quod moventur ad continens sibi connaturale: et omnia talia de necessitate sunt in loco. Alia sunt quae non indigent motu ad suum esse nec ad sui conservationem, sicut est corpus caeleste; et tale non movetur ad continens sibi connaturale nec in continente sibi connaturali, sed movetur ab intelligentia propter explicationem causalitatis causae primae; et tale non de necessitate est in loco: esse enim in loco non est solum contineri a loco, sed contineri et conservari. Et ideo quod non indiget conservante, cujusmodi est corpus caeleste et quodcumque incorruptibile, non de necessitate est in loco.

Sed secundum praedeterminata oritur duplex dubitatio. Prima est, quare orbis inferiores sunt in loco, cum non sit de necessitate corporis caelestis esse in loco. Secunda est, propter quid motus caeli dicatur localis, cum corpus caeleste, saltem prima sphaera, non sit in loco.

Ad primum dicendum, quod accidit orbibus inferioribus quod sint in loco, nec est de necessitate eorum, cum non indigeant conservante, ut dixit Avempace. Propter quod dicuntur aequivoce orbis inferiores esse in loco et elementa; quia orbis inferiores solum dicuntur esse in loco, quia sunt in aliquo exteriori continente: elementa autem et elementata sunt in loco tamquam in continente et conservante.

Ad secundum patet solutio: quia motus non dicitur localis eo solum quod sit in loco, sed

(1) *Al.* et non in partibus.



etiam dicitur motus localis eo quod est circa locum. Propter quod dicit Philosophus, I Caeli et Mundi, quod motus localis est triplex: scilicet a medio, ad medium et circa medium. Motus a medio est levium; motus ad medium est gravium; motus circa medium est corporis caelestis. Et haec est intentio Commentatoris 4 Phys.

Sed juxta haec quae dicta sunt, remanet unum dubium: cum superficies corporis continentis dicatur locus, quomodo locus et superficies dicantur esse diversae species quantitatis? Respondeo: omissis omnibus aliis opinionibus quae sunt circa hoc, dicendum est,

quod propria ratio quantitatis, quae competit quantitati ut quantitas est, ratio est mensurae; propter quod dicit Averrois, quod quantitates sunt differentiae mensurarum. Alia est enim ratio mensurandi aliquid extrinsece et intrinsece. Et ideo ultimum continentis, ut mensura est continentis intrinseca, dicitur superficies: ut autem mensura contenti et locati extrinseca, est locus. Et ideo superficies et locus, licet sint unum materialiter, quantum ad id quod quodlibet est ultimum continentis, tamen diversae sunt species constitutae per diversas formales rationes. Et haec de loco dicta sufficiant.



# OPUSCULUM XLIX.

## DE INTELLECTU ET INTELLIGIBILI

( EDIT. ROM. LIII. )

Sciendum, quod de ratione ejus quod est intelligere, est quod sit intelligens et intellectum. Id autem quod est per se intellectum, non est res illa cujus notitia per intellectum habetur, cum illa sit intellecta quandoque in potentia tantum, et sit extra intelligentem, sicut cum homo intelligit res naturales et lapidem vel animal, vel aliquid hujusmodi; cum tamen oporteat quod intellectum sit in intelligente, et unum cum ipso. Nec etiam intellectum per se est et (1) similitudo rei intellectae, per quam informatur intellectus ad intelligendum; intellectus enim non potest intelligere nisi secundum quod fit actu per hanc similitudinem; sicut nihil aliud potest operari, secundum quod est tantum in potentia; sed secundum quod fit actu per aliquam formam. Haec igitur similitudo se habet in intelligendo, sicut intelligendi principium: ut calor est principium calefactionis: non sicut intelligendi terminus. Hoc est igitur primo et per se intellectus quod intellectus in seipso concipit de re intellecta: sive illud sit definitio, sive aliqua enuntiatio, secundum quod ponuntur duae operationes intellectus, ut dicitur in 3 de Anima. Hoc autem sic ab intellectu conceptum, dicitur verbum interius: hoc enim est quod significatur per vocem: non enim vox exterior significat ipsum intellectum, aut formam ipsius intelligibilem, aut ipsum intelligere; sed conceptum intellectus, quo mediante significat rem, cum dico « homo », vel « homo est animal »: et quantum ad hoc non differt utrum intellectus intelligit se, vel alia a se. Sicut enim cum intelligit aliud a se, format sui (2) conceptum illius rei quam voce significat; ita cum intelligit seipsum, format sui conceptum quem etiam voce potest exprimere. Item in intellectu nostro aliud est intelligere, et aliud est esse intellectum: et ideo verbum conceptum in intellectu nostro non unitur ei natura, sed solum in intelligente. Sciendum quod in natura intellectuali sunt duae solum operationes, scilicet intelligere et velle. Secundum autem utramque harum invenitur aliquid procedens, cum haec operationes perficiuntur per ipsum. Ipsum enim intelligere non est aliud nisi aliquid in mente intelligentis et concipientis intelligatur et concipiatur, quod dicitur verbum. Non enim dicimur intelligere, sed cognoscere potius aliquid intelligendo, antequam conceptio aliqua in mente nostra stabiliatur. Ipsum etiam velle perficitur ab amante per voluntatem praecedentem, cum amor nihil aliud sit quam stabili-

mentum voluntatis in bono voluto. Nos igitur cognitionem intellectualem a rebus exterioribus accipimus, et per voluntatem nostram in aliquid exterius tendimus tamquam in finem. Et ideo intelligere nostrum est secundum motum a rebus ad animam; velle autem secundum motum ab anima ad res. Notandum quod intellectus intelligendo ad quatuor potest habere ordinem: scilicet ad rem quae intelligitur: secundo ad speciem intelligibilem qua fit intellectus in actu: tertio ad suum intelligere: quarto ad conceptiones intellectus. Quae quidem conceptio a tribus praedictis differt. A re quidem intellecta, quia res intellecta est interdum extra intellectum, conceptio autem intellectus non nisi in intellectu: et iterum conceptio intellectus ordinatur ad rem intellectam sicut ad finem: ipse enim intellectus conceptionem rei in se format, ut rem intellectam cognoscat. Differt etiam conceptio a specie intelligibili: nam species intelligibilis qua fit intellectus in actu, consideratur ut principium actionis intellectus, cum omne agens agat secundum quod est in actu per aliquam formam quam oportet esse actionis principium. Differt etiam conceptio ab actione intellectus quae est intelligere; quia praedicta conceptio consideratur ut terminus actionis, et quasi quidam per ipsum constitutum: intellectus enim sua actione format rei definitionem, vel etiam propositionem affirmativam seu negativam. Haec autem conceptio intellectus in nobis proprie dicitur verbum: hoc enim est quod verbo exteriori significatur: vox enim exterior neque significat ipsum intellectum, neque speciem intelligibilem, neque actum intellectus, sed conceptionem, qua mediante refertur ad rem. Hujusmodi igitur conceptio, sive verbum, quando intellectus noster intelligit rem aliam a se, ab alio exoritur, et aliud repraesentat: oritur quidem ab intellectu per suum actum, est vero similitudo rei intellectae ipsum repraesentans. Cum vero intellectus seipsum intelligit, verbum praedictum sive conceptio ejusdem est propagatio et similitudo, scilicet intellectus seipsum intelligentis: et hoc ideo contingit, quia effectus similatur causae per suam formam; forma autem intellectus est res intellecta. Et ideo verbum quod exoritur ab intellectu est similitudo rei intellectae, sive sit idem quod intellectus, sive sit aliud. Hujusmodi autem verbum nostri intellectus est quasi extrinsecum ab esse ipsius intellectus: non enim est de essentia ejus, sed est quasi quaedam passio ipsius. Non tamen est extrinseca ab ipso intelligere intellectus, cum ipsum

(1) *Superfluit fortasse et.*

(2) *An sibi?*

intelligere compleri non possit sine verbo praedicto. Sciendum autem quod intellectus semper habet apud se verbum secundum interiorem intelligentiam: et dicitur interior intelligentia, quae est ipsius animae secundum se, prout est quid subsistens, non autem habet illud semper secundum exteriorem intelligentiam. Et dicitur exterior intelligentia secundum exteriorem cognitionem: et ista proprie est hominis secundum quod convertit se cogitando super ipsa phantasmata, quae sunt potentia intelligibilia; et sic intellectus semper habet apud se verbum informe, non autem verbum semper formatur. Dicitur autem verbum informe propter indistinctam et confusam cognitionem. Iterum etiam, quia non est productum ad exteriorem manifestationem per exteriorem cognitionem. Sed homo non percipit quod intellectus habeat semper apud se verbum illud informe: primo propter extraneitatem sui ad intellectum; secundo propter sui profunditatem; tertio propter sui subtilitatem, et hoc ex parte animae similiter, non ex parte corporis, quia anima est mole carnis oppressa, et ideo non percipit hoc: iterum quia est materialium caligine obscurata. Notandum etiam quod triplex est verbum: verbum cordis, sive intellectuale: verbum imaginationis, sive imaginabile: verbum oris, sive vocale. Primum est manens; secundum disponens, tertium operans. Notandum etiam, quod in tribus partibus imaginis est ordo naturae et ordo temporis; ita quod memoria praecedit intelligentiam interiorem, prout est gignitiva ipsius, offerens vel ostendens ei speciem quam habet; et haec naturaliter praecedit intelligentiam et natura et tempore. Item intelligentia interior praecedit naturaliter voluntatem interiorem; et ratio est, quia oportet, antequam aliquis velit intelligere, quod praeconcepiat quid est intelligere. Et sic intelligentia naturaliter praecedit voluntatem, memoria vero utramque: voluntas autem interior praecedit intelligentiam exteriorem. Sciendum, quod potentia intellectiva primo simpliciter aliquid apprehendit, et hic actus dicitur intelligentia: secundo vero id quod apprehendit ordinat ad aliquid aliud cognoscendum vel operandum, et haec vocatur intentio: dum vero persistit in inquisitione illius quod intenditur, vocatur excogitatio: dum vero id quod est excogitatum examinat ob aliqua certa, dicitur seire vel sapere, quod est phronesis (1), idest sapientia, quia sapere est iudicare, ut dicitur in 1 Metaph. Ex quo autem habet aliquid pro certo examinatum, cogitat quomodo possit illud aliis manifestare; et hoc est dispositio interioris sermonis, ex qua procedit interior (2) locutio. Sciendum, quod sicut secundum actionem quae tendit in exteriorem materiam, est aliqua processio ad extra; ita secundum actionem quae manet in agente, est quaedam processio ad intra: et hoc maxime patet in intellectu, cujus actio, scilicet intelligere, manet in agente. Quicumque enim intelligit, ex hoc ipso quod intelligit, procedit ad (3) aliquid intra ipsum, quod est conceptio rei intellectae, ex ejus notitia procedens, quam quidem conceptionem vox significat: et dicitur verbum cordis signatum verbo vocis. Sciendum, quod intellectus secundum quod est in actu per speciem intelligibilem consideratur absolute: et similiter intelligere, quod ita se habet ad intellectum, sicut ens in po-

tentia ad ens in actu: non enim intelligere actionem nominat ab intelligente manentem (1). Cum ergo dicitur, quod verbum est notitia, non accipitur notitia pro actu intellectus cognoscentis, vel pro aliquo ejus habitu; sed pro eo quod intellectus concipit cognoscendo. Sciendum, quod haec est differentia inter intellectum et voluntatem: quod intellectus fit in actu per hoc quod res intellecta est in intellectu secundum suam similitudinem; voluntas autem fit in actu non per hoc quod aliqua similitudo voliti sit in volente; sed ex hoc quod voluntas habet quamdam inclinationem ad rem volitam. Processio autem quae attenditur secundum actionem voluntatis, non consideratur secundum similitudinem, sed magis secundum rationem impellentis et moventis in aliquid. Unde quamvis similitudo sit de ratione amoris, sicut de ratione verbi; tamen aliter pertinet ad verbum, et ad amorem: nam ad verbum pertinet in quantum ipsum est quaedam similitudo rei intellectae, sicut genitum est similitudo generantis. Sed ad amorem pertinet, non quod ipse amor sit similitudo, sed in quantum similitudo est principium amandi. Item sicut esse consequitur formam, ita intelligere consequitur speciem intelligibilem. Sciendum, quod cum dicitur intellectum in actu existere, duo importantur: scilicet res quae intelligit, et hoc ipsum quod est intelligi. Ipsa igitur natura cui accedit intelligi, non est nisi in singularibus; sed hoc ipsum quod est intelligi, est in intellectu. Sciendum, quod intellectus et ratio in hoc differunt quantum ad modum cognoscendi: quia scilicet intellectus cognoscit simplici intuitu, ratio vero discurrendo de uno ad aliud. Sed tamen ratio per discursum pervenit ad cognoscendum illud quod intellectus sine discursu cognoscit, scilicet universale. Sciendum quod Philosophus dicit 1 Metaph., quod difficilia sunt hominibus ad cognoscendum, quae sunt maxime universalia: quod est contra illud quod dictum est in 1 Physic., quod confusa sunt magis nota quoad nos, qualia sunt universalia. Ad quod dicendum, quod magis universalia secundum simplicem apprehensionem primo sunt nota: nam primo in intellectu cadit ens, ut dicit Avicenna; et prius in intellectu cadit animal quam homo. Ita et in generatione scientiae prius in intellectu concipitur animal quam homo; sed quantum ad investigationem universalium proprietatum et causarum, prius sunt nota minus communia, eo quod per causas particulares quae sunt unius generis vel speciei, pervenimus in causas universales. Ea autem quae sunt universalia in causando, sunt posterius nota quoad nos. licet sint prius nota secundum naturam; quamvis universalia per praedicationem sint aliquo modo prius nota quoad nos quam minus universalia, sed non prius nota quam singularia: nam cognitio sensus, quae est singularium, in nobis praecedit cognitionem intellectivam, quae est universalium. Facienda est autem vis in hoc, quod dicit maxime universalia non simpliciter esse difficillima, sed fere: per hoc enim quod dicit maxime universalia, intelliguntur quae sunt universalia per essentiam, vel sunt illa quae sunt penitus a materia separata secundum esse, sicut substantiae immateriales. Iste enim sunt magis difficiles ad cognoscendum nobis, quam etiam universalissima quaecumque secundum praedicationem.

(1) *Al. phrenosis.*(2) *Forte exterior.*(3) *Videtur praepositio ad superflue.*(1) *Al. manente.*

# OPUSCULUM I.

## DE UNIVERSALIBUS <sup>(1)</sup>

(EDIT. ROM. LV-LVI.)

### TRACTATUS PRIMUS.

Circa universalia multiplex fuit, et diversorum philosophorum opinio. Quidam enim, sicut Epicurei, non ponentes distinctionem esse nisi secundum sensum, dicentes summum bonum esse voluptatem, posuerunt nihil esse quod sentitur et videtur; unde dicebant, quod nihil est universale. Dicebant etiam animam esse quoddam corpus subtile, et perire cum corpore. Horum autem opinio, quia improbabilis est manifeste, et contra sensum et intellectum omnem, non est necessarium eam refellere; et ideo philosophi, tales qui sic posuerunt, appellaverunt porcos. Sed contra eos posset sic argui. Omnes homines natura scire desiderant, ut vult Philosophus 1 Metaph. Sed tale desiderium non est frustra. Contingit ergo habere scientiam. Sed omnis scientia est universalium. Ergo universalia sunt. Minor sic ostenditur: Quae sunt infinita non possunt sciri, alioquin essent finita. Sed singularia sunt infinita. Ergo ipsorum non est scientia, et per consequens universalium. Alii autem ponentes universalia, incidunt in multa inconvenientia; et isti sunt diversi: quoniam quidam posuerunt ea esse et subsistere praeter singularia et praeter intellectum; et isti fuerunt platonici, quorum caput fuit Plato. Hic siquidem videns magnam et continuam transmutationem et corruptionem fieri in rebus ipsis, inductus fuit ponere universalia stare per se, et incorruptibilia esse, quae vocabat ideas, quas quidem dixerunt esse causas exemplares et effectivas istorum singularium. Hanc autem opinionem in 7 Metaph. et multis aliis locis destruit Philosophus. Unde dicit contra Platonem deridendo eum in lib. Poster. Valeant (2) genera et species, monstra enim sunt. Sumamus autem necessarium argumentum, quod format Avicenna contra eum sic. Universale quod intendimus, praedicatur de omnibus inferioribus, quorum unumquodque est ipsum. Tale autem universale quod Plato ponebat separa-

tum, non praedicatur de suis individuis, nec aliquid ipsorum est ipsum. Ergo aut non est ponere universale, aut non est sic ponere separatum, sicut Plato ponebat. Et ideo fuerunt aliqui qui posuerunt universalia solum esse in intellectu, totum oppositum positioni Platonis: et adhuc isti diversificantur. Nam quidam posuerunt universalia nobis innata et concreta, et non fieri universalia per actionem intellectus depurantis et abstrahentis. Et fulciunt positionem suam per dictum Philosophi 2 de Anima: ubi dicit quod intelligimus cum volumus: quod non esset dictum, nisi ipsa nobis universalia innata essent, et semper actu praesentarent ipsi animae. Contra quod est etiam Philosophus, per quem putant se defendere. Dicit enim ipse in fine 2 Post., quod universale venatur sensus via memoriae et experientiae: et Commentator super prooemio de Anima dicit contra eos, quod intellectus agens facit universalitatem in rebus ipsis. Dictum autem quod inducunt pro se, sane est intelligendum: quod ideo hoc Philosophus dicit, quia in nobis est intellectus agens quo est omnia facere; et ideo quando vult potest se convertere supra phantasmata, et illustrare ea et facere actu intelligibilia. Alii vero posuerunt, quod formae intellectuales effluunt in mentem nostram ab intellectu agente. Ponebant autem intellectum agentem non esse in nobis, sed extra nos; et dicebant istum esse Deum, vel aliquam intelligentiam. Contra istos est Philosophus in 3 de Anima, quantum ad utrumque. Dicit enim ibi quod in anima nostra est intellectus iste: et dicit etiam quod est lumen quod facit phantasmata potentia intelligibilia, intelligibilia actu, sicut lumen facit colores potentia visibiles, visibiles actu. Et sic diversimode erratum est circa universalia. Sententia (1) tamen Aristotelis vera est, scilicet quod universale est in multis, et unum praeter multa. Et tangitur in hoc duplex esse universalis: unum secundum quod est in rebus, aliud secundum quod est in anima. Et quantum ad istud esse quod est rationis, habet rationem praedicabilis: quantum vero ad aliud esse, est quaedam natura, et non est universale actu, sed potentia, quia potentia habet, et talis natura fiat universalis per actionem intellectus. Et ideo dicit Boetius « universale dum intelligitur, singulare dum sentitur », quia una

(1) Edit. Rom. 1570 notam hanc apponit: *Sciendum, Sanctum Doctorem scripsisse de universalibus. Utrum tamen unum, aut plura de eis scripserit Opuscula, sub dubio relinquimus. Nec mirum si diversis studentibus ad eorum petitionem diversa sub eadem materia conscripsit Opuscula, cum plura etiam super materia de verbo inveniuntur S. Thom. opera.*

(2) *Al. gaudeant.*

(1) *Al. scientia.*



et eadem natura quae singularis erat et individua-  
tur per materiam in singularibus hominibus, effi-  
citur postea universalis per actionem intellectus  
depurantis ipsam a conditionibus quae sunt hic et  
nunc; unde rationem universalis et praedicabilis  
accipit ab ipso intellectu, ut dictum est. Et quam-  
vis ab ipsa anima recipiat rationem universalis,  
tamen non est in ipsa secundum suam essentiam,  
sed secundum suam similitudinem et speciem: unde  
et Philosophus ait: Lapis non est in anima, sed  
species lapidis. Haec autem similitudo sive species  
existens in anima est una numero et est singularis.  
Ejus autem universalitas non est ex hoc quod est  
in anima, sed ex hoc quod comparatur ad multa  
singularia se habentia opinata. Eorum igitur judi-  
cium quantum ad ipsam est idem. Nec hoc est in-  
conveniens; quia, sicut aliquid diversis respectibus  
potest esse genus et species, ita aliquid diversis  
speciebus potest esse universale et particulare, sive  
singulare. Est enim illa in solo intellectu singula-  
ris, et est universalis in quantum habet rationem  
uniformem ad omnia individua quae sunt extra  
animam, prout aequaliter est similitudo omnium  
ducens in omnium cognitionem, sicut potest appa-  
rere in exemplo: nam si esset una forma corpora-  
lis repraesentans multos homines, constat quod illa  
forma vel species vel figura statuac haberet esse  
singulare proprium secundum quod haberet esse in  
hac materia; sed haberet rationem communitatis, se-  
cundum quod esset communis per repraesentationem  
plurium. Quamvis autem dictum sit quod illa na-  
tura quae est universalis, in quantum est in anima,  
sit una numero; non tamen oportet quod diversarum  
specierum, quarum est idem genus, sit una essentia;  
quia unitas generis ex ipsa indeterminatione procedit,  
vel indifferentia; non autem ita quod id quod si-  
gnificatur per genus, sit una essentia numero in  
omnibus speciebus, vel diversis, cui superveniens  
res aliqua quae est differentia, determinet ipsam,  
sicut forma determinat materiam quae est una nu-  
mero per privationem omnium formarum; sed quia  
genus significat formas, non tamen hanc vel illam  
determinate, quam determinate differentia exprimit,  
quae non est alia ab illa quae indeterminate si-  
gnificabatur per genus. Unde dicit Commentator  
super 1 Metaph., quod materia prima dicitur una  
per privationem omnium formarum; sed genus di-  
citur unum per communitatem formarum signifi-  
catarum; unde per adjectionem differentiae, remota  
illa indeterminatione quae erat causa unitatis ge-  
neris, remanent species per essentiam diversae: et  
hoc est quod dicit Avicenna in sua Metaph. impos-  
sibile est, scilicet, quod una et eadem res numero  
sit praedicata de multis, ita quod unumquodque sit  
ipsa. Videtur tamen Boetius dicere contrarium in  
commento; ubi ait, quod universale ita est com-  
mune, ut eodem tempore totum sit in diversis,  
quorum essentiam naturaliter constituat; et cum in  
specie sit universale, per advenientes differentias  
vel formas fit singulare, sine quibus naturaliter in  
se subsistit, et absque eis actualiter nullatenus per-  
manet. Huic autem dicto adaptat exemplum de cera:  
sicut si ex cera modo statuam hominis, modo bovis  
facias, diversas formas eidem essentiae vere penitus  
manenti adaptando; hoc tamen refert, quod non  
eodem tempore. Sed inconveniens quod sequitur ex  
ista positione est istud, quod idem animal esset  
rationale et irrationale, si eadem essentia generis

*S. Th. Opera omnia. V. 17.*

esset in diversis speciebus. Sic igitur patet quid  
dicendum sit de ipsis universalibus, et quomodo  
habeant se; quia aliquo modo habent esse animae  
extrinsecum, et aliquo modo non. Consequenter  
dico, quod universalia ex hoc quod sunt universa-  
lia non habent esse per se in sensibilibus, quia  
universalitas ipsa est in anima, et nullo modo in  
rebus. Cum autem dicimus quod natura universa-  
lis habet esse in his sensibilibus sive singularibus,  
non intelligimus ex hoc quod natura cui accidit  
universalitas, habet esse in istis signatis. Patet ergo  
quomodo universale corporale, et quomodo sit in-  
corporale: quoniam secundum quod dicit Boetius,  
incorporale et insensibile in simplicitate suae uni-  
versalitati intelligitur, corporeum autem et sensi-  
bile per accidentia subsistunt. Sic igitur declaratae  
sunt quaestiones quas enumerat Boetius de uni-  
versalibus. Utrum autem possit esse destructis sin-  
gularibus, dicendum secundum Avicennam, quod  
sic: quia universale est illud quod secundum in-  
tellectum impossibile est non praedicari de multis,  
et si nullum eorum habet esse in effectu: sicut  
intentio est praeter singulare, quae universalis est,  
eo quod ejus natura est praedicari de multis; sed  
non est necesse esse illa multa, immo nec aliquod  
illorum. Utrum autem sit substantia vel accidens,  
dicendum quod per comparisonem quam habet ad  
animam est accidens, et est dispositio quaedam in  
anima, et est unum de individuis scientiarum vel  
formationum. Averrois tamen dicit supra 1 de Ani-  
ma, quod universale est qualitas existens in anima;  
et hoc dico substantialis, quae quidem non est sub-  
stantia, nec accidens, sed medium; quod non est  
inconveniens: quamvis enim quoad logicum, non  
tamen quoad metaphysicum et naturalem est me-  
dium inter ea, ut vult Commentator in multis  
locis. Sic igitur considerando universale in quan-  
tum universale est, scilicet secundum quod aliqua  
natura habet intentionem universalitatis, idest, se-  
cundum quod consideratur (1) animal vel homo, ut  
unum in multis; universalia non sunt substantiae:  
et hoc modo reprobatur Philosophus circa finem 7  
Metaph., quod universalia non sunt substantiae,  
sicut Platonici posuerunt animal et hominem in sua  
quidditate esse substantias: nam animal commune  
et homo communis non sunt aliquae substantiae  
in rerum natura; sed hanc communitatem habet  
forma animalis vel hominis secundum quod est in  
intellectu, qui unam formam accipit in multis com-  
munem, in quantum eam subtrahit ab omnibus in-  
dividuantibus. Alio modo potest considerari univer-  
sale, scilicet ipsa natura cui intellectus rationem  
universalitatis attribuit: et sic universalia, ut genus  
et species, substantias rerum significant, et praedi-  
cantur in quid: animal enim significat substantiam  
ejus de quo praedicatur, et similiter homo: et hoc  
est quod dicit Philosophus in Praedicam., quod ge-  
nus et species primarum substantiarum sunt sub-  
stantiae secundae. De universalibus autem acciden-  
tium accipienda est alia ratio; quoniam talia uni-  
versalia et quantum ad respectum quem habent in  
anima, et quantum ad respectum quem habent in  
suis inferioribus, substantiae non sunt, prout sub-  
stantia dividitur contra accidens; sed sunt substan-  
tia, prout substantia accipitur pro essentia in suis  
inferioribus. Unde quod universalia accidentia sunt

(1) *Al. continent.*

essentialia suis inferioribus, hoc modo possunt dici substantiae. Utrum autem universale sit prius quam singulare, dicendum quod universale esse prius contingit dupliciter: scilicet universale in essendo, et universale in cognoscendo: si in essendo, tunc universale accipitur pro specie quae est in anima abstracta a conditionibus materialibus, quae sunt hic et nunc, forma et figura: et sic isto modo patet, quod prius est singulare a quo abstrahitur talis forma; et sic est intelligendum quod dicitur De anima: universale aut nihil est, aut posterius est. Alio modo consideratur universale, prout est forma realiter existens in rebus: et hoc dupliciter. Aut enim refertur ad operationem naturae, vel ad intentionem: si primo modo, aut loquimur de universali speciei specialissimae, aut de superiori ad ipsam. Si de superiori, aut comparatur ad suum proprium singulare, quod mediate continetur ab ipso; si ad proprium, prout animal comparatur ad hoc animal, sic prius est in operatione naturae hoc animal quam animal, quia prius terminatur operatio naturae ad hoc animal quam ad animal, eo quod omnis operatio est singularium. Sed ulterius cum habemus hoc animal, intellectus considerans antequam deveniamus ad formam hominis, apprehendit formam universalis in hoc individuo, scilicet animal. Sed ulterius antequam operetur natura ad formam hominis, praecessit animal per considerationem intellectus, et hoc animal per operationem naturae. Et ideo si tunc formamus universale superius ad singulare non proprium, ut animal ad hunc hominem, sic in operatione naturae universale praecedit singulare: et sic patet quid sit dicendum si loquamur de universali superiori. Si autem loquamur de universali inferiori, ut de specie specialissima, sic quantum ad operationem naturae singulare praecedit universale, sicut natura prius generat Socratem quam hominem. Si autem referamus universale quantum ad intentionem naturae, sic adhuc distinguendum est, quia loquimur de universali superiori, ut de genere; aut de inferiori, ut de specie specialissima. Si loquamur de universali superiori, ut de animali quantum ad intentionem naturae universalem, sic dico quod universale, scilicet animal, et hoc animal singulare suum proprium non intenduntur a natura; quia si sic, statim in ipso animali sua operatio cessaret, et nunquam perveniretur usque ad Socratem, et sic nihil perfecte generaretur. Si autem de universali inferiori, ut de specie specialissima loquimur; cum illud sit primo intentum a natura particulari, dicendum quod intentione naturae prius est universale quam particulare; et hoc est quod Philosophus dicit in 2 de Anima. Nostra virtus inest omnibus quae perfecta, et ut imperfecta, ut animal generat animal, et planta plantam, quamvis ipsum esse divinum participant secundum quod possunt: omnia enim illud appetunt, et illius causa agunt quaecumque agunt secundum naturam quae intendit per se esse divinum, idest, sempiternum, sicut ipsemet exponit. Quantum ad operationem naturae sic singulare est prius, sicut natura prius generat Socratem quam hominem. Et sic patet quid sit dicendum de universali quantum ad esse suum.

Si autem loquamur de universali quantum ad cognitionem suam, hoc potest esse dupliciter: quia est aliquid notius quoad nos, et est aliquid notius simpliciter, sive quoad naturam: quia idem

est notius secundum naturam et simpliciter. Simpliciter autem nota sunt, quae per se sunt nota. Sunt autem plus per se quae plus habent de entitate: quia unumquodque cognoscibile est quantum est ens; magis autem entia sunt, quae sunt magis in actu. Unde ista sunt magis cognoscibilia a natura: non quod natura magis cognoscat ea; sed quia sunt nota secundum se, et secundum naturam propriam. Sic igitur species specialissimae sunt notiores secundum naturam, utpote per se existentes, et distinctam habentes cognitionem. Quod autem completum est actu, est prius natura et posterius tempore. Genera vero nota sunt priora quoad nos, et posteriora quoad naturam, utpote habentia cognitionem confusam in potentia. Quod autem est potentia, est prius tempore, natura autem posterius; sicut sunt genera universaliora et in potentia, et magis confusa, quia universalia continent in se sua inferiora in potentia. Et qui scit aliquid in universali, scit illud indistincte. Tunc autem distinguitur ejus cognitio, quando unumquodque eorum quae continentur in universali in potentia, semi actu cognoscunt. Verbi gratia, qui scit animal, non scit rationale nisi in potentia. Prius autem contingit scire animal quam hominem: et sic intelligendum est illud in 1 Phys.: Aliquid prius est in potentia quam in actu. Secundum hunc igitur modum quo procedimus de potentia ad actum, et de magis communi ad minus commune, prius est quoad nos scire animal quam hominem; et sic intelligendum est, quod dicitur 1 Physic., quod universalis sunt nobis prius nota quoad nos, et minus nota naturae; singularia autem e converso: quia ibi non accipitur simpliciter, sed secundum quid, sicut est species respectu generis. Si autem accipiatur singulare simpliciter, sicut accipitur in 1 Posterior., sic dicendum, quod quoad nos singularia sunt notiora secundum quod cognitio sensitiva in nobis praecedit intellectivam, quae est universalium; sed universalis sunt notiora secundum naturam et secundum se simpliciter, quia cognitio universalis est perfectior. Universalis autem sunt intelligibilia in actu, non autem singularia, cum sint materialia. Notandum etiam, quod aliud est dicere animal in quantum animal et animal in quantum universale. Et similiter homo in quantum homo, et homo in quantum species: quia animal in quantum animal, est animal solum, et significat essentiam simplicem, quae de se non est una, nec multa, nec existens in his sensibilibus, nec in anima, nec in aliquod horum potentia vel actu. Unde significat quamdam essentiam, quae nec est universalis, nec particularis: et ideo dicit Avicenna, quod rationalitas non est differentia; et similiter animalitas non est genus, nec humanitas species; et hoc modo nihil est verum de ea dici, nisi quod convenit sibi secundum quod huiusmodi: unde quicquid aliorum sibi attributum fuerit, falsa erit attributio. Verbi gratia, homini ut homini convenit animal rationale, et alia quae in definitione ejus cadunt; album vero aut nigrum aut quicquid huiusmodi est, quod non est de ratione humanitatis, non convenit homini secundum quod homo est. Unde si quaeratur utrum ista natura sic considerata possit dici una vel plures, neutrum concedendum est; quia utrumque eorum est extra intellectum hominis seu humanitatis, et utrumque potest sibi accidere. Si enim pluralitas esset de intellectu ejus, nunquam posset dici una, cum tamen una sit se-

eundem quod est in Socrate. Similiter si unitas esset de intellectu ejus, tunc esset una et eadem Socratis et Platonis essentia, nec posset in pluribus verificari. Et cum ipsi naturae secundum suam absolutam considerationem non conveniat esse in anima nec esse in singularibus, falsum est dicere quod natura hominis in quantum hujusmodi, habeat esse in hoc singulari: quia si esse in hoc singulari conveniret homini in quantum homo, nunquam (1) homo esset extra hoc singulare. Similiter si conveniret homini nunquam homo non esse in hoc singulari, in quantum homo esset in eo. Sed verum est dicere quod homo in quantum homo non habet esse in hoc singulari vel in illo, aut in anima. Ergo patet, quod natura hominis absolute considerata abstrahit a quolibet esse; ita tamen quod non fiat praecisio alicujus eorum. Et quia humanitati secundum suam absolutam considerationem non convenit, quod praedicetur de Socrate: ideo ratio speciei non convenit sibi secundum suam absolutam considerationem; quia de ratione universalitatis est unitas et communitas. Naturae autem humanae secundum suam absolutam considerationem neutrum convenit: si enim communitas esset de intellectu hominis, tunc in quocumque inveniretur humanitas, inveniretur communitas: quod falsum est; quia in Socrate nulla invenitur communitas; sed quicquid in eo est, est individuatum. Et ideo oportet quod sit de accidentibus quae consequuntur eam secundum esse quod habet in intellectu; et ideo nomen speciei non praedicatur de Socrate, ut dicatur, Socrates est species: quod tamen de necessitate accideret, si ratio speciei conveniret homini secundum esse quod habet in Socrate, vel secundum suam absolutam considerationem, scilicet in quantum est homo: quicquid enim convenit homini in quantum homo, praedicatur de Socrate. Alio modo potest considerari secundum esse quod habet in hoc vel in illo: et sic de ipso aliquid praedicatur per accidens ratione ejus in quo est; sicut dicitur quod homo est albus, quia Socrates est albus; quamvis hoc non conveniat homini in quantum homo. Hoc autem modo duplex habet esse: unum in singularibus, et aliud in anima: secundum utrumque esse consequuntur hanc naturam accidentia, et in singularibus habent multiplex esse secundum singularium diversitatem. Secundum autem hoc esse quod habet in singularibus, non potest dici quod ratio alicujus generis vel speciei accidat alicui naturae, quia non invenitur in individuis secundum veritatem, ut sit unum quid omnibus conveniens, quod ratio universalis existit. Relinquitur ergo quod ratio generis vel speciei accidit alicui naturae secundum esse quod habet in intellectu. Verbi gratia, ipsa natura humana in intellectu habet esse abstractum ab omnibus individuatis. Et ideo habet uniformem rationem ad omnia individua quae sunt extra animam, prout est essentialiter similitudo omnium ducens in omnium cognitionem in quantum sunt in eo: quia ejus operatio ad omne individuum quod fuit et est et erit, est una: et qualitercumque primum positum fuerit in intellectu, hanc deputationem habebit et aliud superveniens non augebit. Sic igitur patet, quod aliud est dicere, animal in quantum animal, et homo similiter: et

aliud est dicere, animal in quantum universale: nam animal, et similiter quodlibet aliud universale, est animal solum, et est forma intelligibilis secundum formam quam dicimus, et est natura, de qua potest dici quod esse ejus est prius quam esse naturale, sicut simplex prius est composito; et ipsum ejus esse individuum proprie dicitur esse, quoniam tale esse ex quo est animal, est de intentione. Ipsum vero esse cum accidentibus, et ipsum esse hujus individui, quamvis determinata intentio, attribuitur tamen naturae particulari. Animal ergo in quantum est animal, nec est genus nec species nec individuum, nec unum nec multa quantum de se est, licet concomitetur illud esse aliquod illorum de necessitate. Possunt tamen animal et homo per se considerari, quamvis sit cum alio a se: sed animal in quantum universale, non est animal solum, sed est animal et aliud non animal: consideratum in se, est medium quod cum fuerat animal, et aliud, quod non est animal, tunc erit animal in hoc tanquam pars ejus, et homo similiter. Ergo universale ex hoc quod universale, est quoddam cui accidit pluralitas, et est quoddam aliud. Ex praedictis jam manifestum est, qualiter ratio generis et speciei conveniant alicui naturae; quoniam non conveniunt ei secundum suam absolutam considerationem, nec est de accidentibus quae sequuntur eam secundum esse quod habet extra animam, utpote albedo vel nigredo; sed est de accidentibus quae sequuntur eam secundum esse quod habet in intellectu; et per hunc modum convenit sibi ratio generis, vel speciei, vel differentiae, et aliarum intentionum.

## TRACTATUS SECUNDUS

Quoniam dicit Aristoteles 1 Poster., scientia est sempiternorum et eorum quae nota sunt, et quae impossibile est aliter se habere, haec autem sunt universalia; ideo utile esse existimo aliquid narrare de eis secundum quod universale est, ut cognita natura ejus secundum quod est, facilius etiam alia universalia secundum quod sunt cognoscantur. Dico ergo quod universale, secundum quod universale, comprehendit primam rem, quae de se nata est in pluribus esse secundum intentionem secundam. Sed intentionem secundam appello illud quod intellectus secundo intelligit de re: propter quod intelligendum est, quod cum res sint materiales et particulares extra animam, et unumquodque sit intelligibile secundum quod est a materia separabile, manifestum est quod res secundum quod est in materia particulari intelligi non potest, nisi abstrahatur ab omnibus conditionibus individuatis: lapis enim non potest intelligi, nisi per intellectum abstrahatur ab hoc et nunc, et aliis hujusmodi. Sed quia intellectus illud quod intelligit, abstrahit a sensu; oportet quod lapis prius cognoscatur a virtute imaginativa, sive phantastica, quae abstractior est reliquis virtutibus sensitivis. Hoc autem esse non potest, nisi mediante aliquo phantasmate. Ideo oportet ad hoc quod intellectus intelligat naturam lapidis, quod abstrahat suam speciem intelligibilem a suo phantasmate: ita quod prima intentio quae de lapide est, in intellectu est species lapidis, quae competit lapidi secundum quod lapis: et ab ista prima intentione haec vox, lapis, imposita est ad significandum naturam lapidis quae est extra animam. Et hoc accidit ex hoc, quod species lapidis non est id quod

(1) *Al.* in quantum; et rursus paulo infra. Alia sphalmata permulta in hoc Tractatu passim occurrentia incorrecta relinquimus cum non appareat quomodo corrigenda sint.



intelligitur, sed quo intelligitur, cum intellectus intelligit naturam lapidis: sicut species corporis in oculo est qua visus videt, et species illa est qua vox aliquid significat et non significat: hoc alibi erit manifestum. Tunc videndum est ulterius, cum intellectus intelligit naturam lapidis mediante specie intelligibili quia sibi non repugnat esse in pluribus; secundo intelligit eam ut est participabilis a pluribus, et secundum diversum participationis modum sic diversimode intelligit. Nam in quantum est participabilis a pluribus differentibus specie, intelligit eam sub intellectu generis; et si solum participabilis est a pluribus differentibus numero, intelligit eam sub intellectu speciei. Hoc autem inferius plenius apparebit. Et sic patet quod alius intellectus est intelligere lapidem secundum quod lapis, et alius intellectus cum intelligit lapidem secundum quod participatur universaliter vel particulariter, et ille intellectus est prius (1): quod est, quia potentia rei et habitus rei non sunt de essentia termini, sicut potentia animae non est de essentia animae. Unde habitus essendi in pluribus non est de essentia hominis; quia tunc homo qui est in Socrate, esset habilis ad participationem plurium, quod est impossibile. Et quia unumquodque potest abstrahi ab eo quod non est de essentia ejus, ideo potest intelligi absque hoc quod intelligatur quod sit participabilis a pluribus. Homo enim secundum quod homo, nec est universalis nec particularis: quia si homo secundum quod homo esset universalis, jam non posset esse particularis; et si esset particularis, non esset universalis secundum quod homo: sicut Socrates qui est singularis secundum quod Socrates, non posset esse universalis. Ergo accidit sibi, quod sit singularis vel universalis. Sed debes scire, quod homo non dicitur universalis, nisi quia consideratur universaliter. Haec autem consideratio accidit esse hominis, non secundum quod est in materia extra: nam secundum quod est in materia extra, est individualiter, et homini secundum quod est individuum, non accidit esse universale, quia tunc oppositum accideret opposito; sed solum accidit homini secundum esse quod habet in intellectu. Universale ergo est unum et plura in quantum in pluribus est; alioquin non posset praedicari de pluribus; ut homo in re est plura, quia de pluribus praedicatur. Est autem unum in cognitione; quia licet plura secundum quod plura non constituunt unum intellectum, tamen plura secundum quod similia sunt, constituunt unum intellectum, ita quod intellectus non potest distingui (2) inter similia in quantum sunt similia: et ideo intellectus apprehendit hominem et asinum in quantum conveniunt in una operatione, scilicet sensitiva, unico intellectu apprehendit; et si in re sint multa, talis tamen unitas non apponitur illi multitudini. Et quia res per idem est ens et unum, et e converso; oportet quod universale sit universale per praedicatam unitatem; ita quod naturae talis cognitio facit universale esse in actu universale, et est quoddam formale in universale. Ex quo patet quod intellectus facit universalitatem in rebus, sicut dicit Commentator, quia illa universalitas est ab intellectu. Sed quia talis universalitas a re sumit principium; ideo dicit Aristoteles quod universale aut nihil est, aut posterius est; quoniam talis universalitas in re nihil est.

Quaeritur autem utrum universale sit substantia, vel accidens; et per hoc solvitur ista quaestio: quoniam loquendo de universale secundum quod universale, est solum in anima, et est accidens. Sed loquendo de re subjecta, dicitur, quod quandoque est substantia, et quandoque accidens, secundum diversitatem universalium. Et similiter per hoc patet qualiter debet intelligi illud dictum, Universale est quod potest praedicari de pluribus; nam secunda intentio quam universale includit, formaliter solum est in anima. Illud autem quod est in anima non praedicatur de re extra animam; cum oporteat praedicatum inesse subjecto; sed universale praedicari potest secundum naturam realem quam includit materialiter: ita quod quando dicitur. Universale praedicatur de pluribus, sensus est, quod res subjecta universalitati praedicatur de pluribus, ut homo vel asinus. Quod patet; quia si homo vel asinus praedicaretur de pluribus, ut de Socrate vel Platone, secundum quod universale, tunc Socrates esset universale. Relinquitur ergo quod sola illa natura subjecta universaliter praedicetur. Nam dictum est, licet homo sit in re extra particularis, tamen hoc accidit sibi, secundum quod homo poterit considerari absque hoc quod sit particularis; et sic homo est in pluribus, non tamen unus homo in numero, sed unus in specie: nam homo qui praedicatur de Socrate, idem est quod Socrates: et qui praedicatur de Platone, idem est quod Plato; cum praedicatum insit subjecto, et impossibile sit unam rem in numero esse in pluribus numero indifferentibus, licet homo non praedicetur de Socrate secundum quod est particularis. Cujus ratio est, quia terminus idem praedicat quod significat: ergo qualiter significat, taliter praedicat. Modo iste terminus « homo » significat naturam humanam absque omni participatione et particulari ratione: ergo sic praedicabit eam. Non tamen praedicat sic eam universaliter; quia, sicut dictum est supra, intellectus hominis secundum quod homo, alius est a sua universalitate. Sed unum est advertendum: quod cum dicitur, res subjecta intentioni secundae praedicatur, non est intelligendum quod res illa ita sit subjecta intentioni, quod sit in ea tamquam accidens in subjecto. Sicut subjectum scientiae non dicitur hoc modo subjectum, ut scientia sit in eo tamquam in subjecto; sed in eo est tamquam in objecto: scientia enim non est in seibili, sed in sciente: unde proprie loquendo non dicitur subjectum, sed objectum scientiae; et similiter res subjecta illi intentioni non dicitur proprie subjecta, sed objecta. Ex hoc patet quando universale est unum, et quando non est unum. Non enim est unum in substantia, cum aggreget in se accidens, scilicet intentionem secundam et rem extra animam, quae quandoque est accidens, ut albedo, quandoque substantia ut homo: nec est unum per accidens, sive accidentaliter, cum accidens sit in subjecto. Est igitur universale unum unitate cognitionis; ita quod de ratione universalis non requiritur nisi illa unitas rationalis: et propter hoc dicit Aristoteles quod est unum in multis, scilicet cognitum. Qualiter unum cognitum sit in multis, dictum est. Unde non potest aliquis dicere quod universale sit unum relatione, cum secundae intentiones non referantur ad res, sed potius ad se invicem; ut species dicitur species respectu generis, et non respectu naturae objectae. Hoc autem inferius melius appa-

(1) Forte primus.

(2) An distinguere?



rebit. Et ex hoc patet, quod impossibile est unam et eandem scientiam determinare de universali per se quantum ad illas duas naturas quas includit; sed potius de uno per se, et de alio per accidens. Ergo Logica cum considerat universale, non considerat ipsum quantum ad naturam subjectam per se; non enim considerat hominem in eo quod homo, sed in eo quod species; et sic de aliis animalibus. Et ideo Logica principaliter est de secundis intentionibus. Sed quia secundae intentiones principaliter accipiuntur a proprietatibus rerum median- tibus primis, sicut visum est; ideo dicit Avicenna 1 suae Metaph., quod Logica est de secundis intentionibus adjunctis primis: et sic patet quod logicus non considerat rem subjectam per se. Aliae autem scientiae considerant universale quantum ad rem subjectam: nam Philosophus naturalis non considerat corpus mobile in quantum genus, sed in quantum mobile corpus; et musica non considerat sonum in quantum accidens, sed in quantum sic. Ex quo patet quod huiusmodi scientiae non considerant universale sub prima ratione universalis, cum non considerent illud quod facit formaliter universale: sed dicuntur considerare universale, quia considerant res non ut particulares, sed ut singulares. Sed debes scire, sicut una intentio est genus et species diversis respectibus, ita una intentio est universalis et singularis respectu diversorum. Nam ex hoc aliqua intentio est universalis in quantum relationem habet ad multa: ut intentio hominis quae est apud animam, quia comparatur ad multa, ideo est universalis: et licet hoc sit, tamen huiusmodi intentio est in anima, et est quid singulare. Quod est quia unumquodque recipitur in alio secundum modum recipientis, et non per modum rei receptae. Cum ergo anima sit singularis, ut alibi declarabitur, oportet quod quicquid recipitur in anima, singulariter recipiatur, et sit respectu ejus singulare. Tamen propter hoc non sequitur, quod huiusmodi intentio non sit intelligibilis; nam singularitas ex hoc quod est singularitas, non impedit actionem intellectus: aliter intelligentiae cum sint singulares, non possent intelligi: quod falsum est. Nec volo quod singularitas ex hoc quod sit singularitas, sit intelligibilis, quia tunc Socrates esset intelligibilis. Igitur accidit ei in quantum huiusmodi, quod sit sic vel sic. Ergo non opponitur actioni intelligibilis, nisi cum sit cum materia: sed cum denudatur a materia, erit intelligibilis. Nunc autem intentio quae est in anima, immaterialis est; et oportet quod sit in ea per modum ejus, ut supra dictum est. Et licet anima intelligat res materiales immaterialiter, tamen intelligit eas esse materialiter, quia ea non intelligeret naturas earum materiales. Hoc alibi magis apparebit. Et per hoc patet quomodo debet intelligi illud verbum Boetii, quo dicitur, Omne quod est, ideo est, quia unum numero est: quod planum est in particularibus. Sed in universalibus aliqui negaverunt: et aliqui dixerunt, quod universale esset unum numero numerositate essentiae. Hoc autem falsum est: nam non requiritur ad unitatem universalis unitas essentiae, quoniam genus non dicit essentiam unam sed plures, sicut patebit consequenter; sed ideo dicitur universale unum numero, quia intentio illa quae est in anima, quae facit universale esse universale, sicut dictum est, respectu animae est una in numero.

Non est autem praetermittendum investigare,

utrum quamlibet rem subjectam universalitati oporteat esse extra animam, vel non. Ad quae intelligendum sciendum est, quod Avicenna 3 Metaph. suae dicit, quod tribus modis dicitur universale. Uno modo dicitur universale secundum quod praedicatur de multis in actu, ita quod in multis reperitur, ut homo. Alio modo dicitur universale, quod possibile est praedicari de multis, non tamen praedicatur in actu, nec est in multis, nec aliquo modo extra animam; ut domus octangula, quae solum est in mente artificis. Tertio modo dicitur universale, quod non est in pluribus, sed in uno individuo est; tamen sibi non repugnat esse in pluribus, ut sol et luna, et similia. Ad quorum intelligentiam est sciendum, quod quaedam res habent esse a natura, et quaedam ab arte, ut artificialia. Sed de rebus naturalibus cognitionem habere non possumus nisi praeelegant: quod est quia nostra scientia causata est ab ipsis, et posterior est ipsis; quia noster intellectus non intelligit eas nisi per similitudines earum. Similitudo autem rei posterior est ipsa re: et ad hoc quod sit effectus, oportet quod praeelegat causa. Ex quo sequitur, quod destructis rebus, destruitur scientia. Et non valet dicere quod similitudines remanserunt apud animam: nam de similitudinibus illis non est scientia, sed de rebus, quarum illae sunt similitudines. Et ad hoc dico, quod si scientia sit de similitudinibus rerum, sequitur etiam quod destructis rebus destruat scientia. Cujus ratio est, quia scientia est verorum: nunc autem similitudo dicitur vera, quia vere repraesentat rem cujus est similitudo, sicuti est. Modo similitudo rerum existentium, de quarum ratione est extra animam esse, repraesentat eas ut existentes; alioquin non esset similitudo vera. Tunc componitur (1) quod res extra animam destruat, si eadem similitudines remanerent quae prius repraesentabant res sicut prius, et haec est falsa repraesentatio, quoniam repraesentat res existentes, quae non existunt. Et si tu dicas quod non remanent eadem similitudines sicut prius, vel non eodem modo repraesentant sicut prius, tunc sequitur quod non remanet eadem scientia quae prius: et sic sequitur quod destruat scientia destructis rebus, scilicet scientia illarum rerum. Et hoc est quod innuit Aristoteles lib. Praedie., ubi dicit quod destructis primis substantiis, impossibile est aliquod aliorum remanere, scilicet universalium, vel secundarum substantiarum. Universalium autem sunt subjecta scientiarum; et destructis subjectis scientiarum destruuntur et ipsae: igitur etc. Sed de rebus artificialibus non est ita: nam destructis ipsis, non oportet scientiam earum destrui. Quod est, quia species rei artificialis quae est apud animam, est principium rei artificialis extra animam, ita quod scientia artificis est causa rerum artificialium. Destructo autem causato, non oportet causam destrui; ideo poterat artifex habere cognitionem rei artificialis absque hoc quod res artificialis sit in effectu, quia cognita causa cognoscitur effectus: poterit autem apud se habere similitudinem domus habentis tot angulos, quia potest reperiri in pluribus: et sic in nullo reperitur, de qua artifex habebit scientiam? Ex quo patet solutio quaestionis propositae, quod non oportet omnes res quae sunt subjectae secundis intentionibus, esse extra animam.

(1) Forte legendum, cum ponitur.

Nam licet in rebus naturalibus exigantur, in artificialibus tamen non oportet: et generaliter in omnibus rebus quae sunt ab intellectu non possunt esse secundae intentiones subjectae aliis secundis intentionibus. Sicut syllogismus est genus, vel species est accidens, accidens est genus, hoc est, secundum quod diversimode comparatur. Nam species licet sit species generis, tamen respectu animae accidens est. Et similiter de aliis intentionibus secundis. Et tamen solum habent esse in anima, sicut ex praecedentibus manifestum est. Et ex hoc patet qualiter incertitudinaliter Logica est scientia, quia ipsa inter omnes alias scientias incertior est: quod est, quia certitudo scientiae dependet a certitudine subjecti. Dicitur enim Metaphysica certissima eo quod habet subjectum certissimum, ut ens in quantum ens, et prima principia certissima etiam nota sunt. Sed inter omnia subjecta scientiarum debilissimum et incertissimum est subjectum Logicae; quia unumquodque quantum habet de entitate, tantum habet de veritate et certitudine, ut dicit Aristoteles 2 Metaph.: nunc autem secundae intentiones solum habent esse in anima et ab anima, ex quo sequitur, quod habent debilissimum esse: nam inter omnia genera entium, entia quae sunt in anima minus participant de entitate, ut patet in multis locis ab Aristotele, et alibi declarabitur; ergo minus participant de veritate. Et quia eorum certitudo est veritas, ad plenum sciri non potest nisi per primas intentiones: nam nunquam cognita fuisset hominis intentio quae est species, nisi cognito quod homo secundum quod intellectus participabilis erat a pluribus differentibus solum numero, a quo accipit anima hanc intentionem

quae est species. Ideo impossibile est Logicam scire, nisi fuerit sciens et expertus in aliis scientiis, et specialiter in Metaphysica quae in quolibet ente in quantum huiusmodi facit demonstrationem; ad quam logicus in quantum huiusmodi demonstrationem non attingit. Veruntamen quia huiusmodi secundae intentiones communes sunt in omnibus entibus; ideo logica est comunis omnibus scientiis, et potest arguere in qualibet scientia; nam secundae intentiones ducunt in cognitionem primarum, in quantum fundatae sunt in eis: ita quod per istam intentionem quae est species, possunt cognoscere hominem non in quantum homo, sed in quantum de pluribus differentibus numero praedicatur; et sic per alias intentiones alias species aliarum scientiarum. Sed quia huiusmodi secundae intentiones applicantur rebus ab extrinseco, quia ab anima, et accidunt rebus; ideo per eas solum potest arguere probabiliter: nam sicut patebit in Topicis, arguere probabiliter est notificare rem per accidentalia et per proprietates communes. Ex quo patet quod quia accidentia magnam partem conferunt ad cognoscendum quod quid est, et accidentia propria ut propria notificat logicus, ut patebit capitulo de proprio; ideo logica esset ad alias scientias adducenda. Et hoc manifestum est, quod Logica notum faciat de omnibus entibus in communi probabiliter: nostra autem cognitio incipit a communioribus devenire ad minus communia; ut dicit Aristoteles 1 Physic., quod devenimus in essentiam rei per cognitionem accidentium quae incipit a sensu, cuius accidentia sunt objectum. Ideo Logica debet addisci prius omnibus aliis scientiis, ut ex ipsa tamquam ex praexistente cognitione in aliis scientiis procedatur.



# OPUSCULUM LI.

## DE VENERABILI SACRAMENTO ALTARIS

( EDIT. ROM. LVIII. )

### CAPUT I.

#### *De tribus causis institutionis Sacramenti Corporis Christi.*

Venite, comedite panem meum, et bibite vinum quod miscui vobis. Prov. 9. His verbis Dominus nos invitat ad salutare convivium, in quo praeparavit pretiosum cibum, scilicet corpus et sanguinem suum, juxta illud Prov. 6: « Causam tuam tracta cum amico tuo, et secretum ne reveles extraneo. » Res secreta est altaris Sacramentum, quasi sacrum secretum, cujus causa non infidelibus, sed fidelibus est revelanda. Nota quod causa institutionis est triplex: scilicet memoria Salvatoris, sacrificium altaris, cibus hominis. Haec tria disposuit in hoc Sacramento divina sapientia contra tria vetera mala: scilicet contra oblivionem Dei, contra debitum rapinae alienae rei, contra corruptiones pomi mortiferi. Primi enim parentes in haec tria mala inciderunt serpentina fraude decepti, et per eos successores sunt depravati. De primo Eccl. 10: « Initium superbiae hominis apostatare a Deo, quoniam ab eo qui fecit illum, recessit cor ejus, » scilicet per oblivionem in occupatione damnosae negotiationis cum serpente: quod saepe adhuc quibusdam stultis solet evenire. De secundo Gen. 3: « Videns mulier lignum quod esset bonum ad vescendum, et pulchrum oculis, aspectuque delectabile, tulit de fructu, et comedit, deditque viro suo; » et sic ambo rapinam commiserunt. Illius rapinae similitudinem faciunt, qui in usu creaturarum et rerum per aliam justitiae mensuram excedunt. De tertio Gen. 3: « De ligno scientiae boni et mali ne comedas. In quacumque enim die comederis ex eo, morte morieris: » et in bono immortalitatis corporis. Psalm. 15: « Corrupti sunt, et abominabiles facti sunt. » Sic qui peccati venenum in usum sumunt, animas occidunt et corrumpunt. Igitur contra triplex vetus malum institutum est hoc Sacramentum. Luc. 22: « Accipite et comedite, Hoc est corpus meum, quod pro vobis tradetur: hoc facite in meam commemorationem. » « Hoc facite, » inquit, « in meam commemorationem. » Ecce prima causa, scilicet memoria Salvatoris contra oblivionem. « Quod pro vobis tradetur, » idest, ut agnus Dei offerretur.

Ecce secunda causa, scilicet sacrificium altaris contra rapinam. « Accipite et comedite. » Ecce tertia, scilicet cibus medicinalis contra corruptionem. Memoria ergo Salvatoris contra oblivionem est prima causa, ut hoc scilicet admoniti, totam mentem et omnes sensus nostros quos a Deo avertimus et cum pravis quandoque cogitationibus et delectationibus vagari permisimus, a noxiis abstrahentes, integraliter ad Deum referamus: hinc dicit, « Hoc facite in meam commemorationem. » Eusebius: « Quia corpus assumptum Dominus ablaturus erat ab oculis, et illaturus sideribus, necessarium erat ut die coenae Sacramentum nobis sui Corporis et Sanguinis consecraret, ut offerretur jugiter per mysterium, quod offerebatur semel in pretium: et perennis victima viveret in memoria, et semper praesens esset in gratia. » Nota, ad habendam semper memoriam Salvatoris cogunt nos tria argumenta suae caritatis: scilicet remissio peccatorum, redemptio impignoratorum, continuatio beneficiorum. De primo Isa. 43: « Ego sum qui deleo iniquitates tuas propter me, et peccatorum tuorum non recordabor, reduce me in memoriam. » De secundo, Eccl. 29: « Gratiam fidejussoris tui ne obliviscaris, quin scilicet eum pro ea diligas, et quin orationibus et bonis operibus debitum ei reddas. Cant. 5: « Aperi mihi soror mea, amica mea, quia caput meum plenum est rore, et cincinnati mei guttis noctium. » « Aperi mihi, » idest suscipe me in mentem tuam in memoriam et dilectionem, « quia caput meum, » scilicet divinitas, « plenum est rore, » idest, misericordia ad dimittendum peccata, « et cincinnati mei, » idest, humanitas, « guttis noctium, » idest, effusione sudoris lacrymarum, et sanguinis passionum, ad redimendum hereditatem tuam pro satisfactione peccatorum tuorum impignoratam. De tertio Deuter. 8: « Observa, et cave ne quando obliviscaris Domini Dei tui, et negligas mandata ejus; ne postquam comederis et biberis, et satiatus fueris, habuerisque cunctarum rerum copiam, elevetur cor tuum, et non reminiscaris Domini Dei tui. » Glossa Eccles. 27: « Sicut nullum momentum est quo non utitur homo Dei bonitate, ita semper debet esse in memoria praesens. » Secunda causa institutionis est sacrificium altaris contra quamdam quotidianam delictorum nostrorum rapinam: ut sicut corpus Domini

semel oblatum est in cruce pro debito originali, sic offeratur jugiter pro nostris quotidianis delictis in altari, et habeat in hoc Ecclesia munus ad placandum sibi Deum super omnia legis sacrificia pretiosum et acceptum. Malach. 5: « Placebit Domino sacrificium Juda et Jerusalem quasi regis et militiae, » idest Christi et Ecclesiae. Alexander Papa: « Nihil in sacrificiis Ecclesiae majus esse potest quam Corpus et Sanguis Christi. Nec ulla oblatio hac potior est, sed omnes praecellit, quae pura conscientia Deo offerenda est, et pura mente sumenda. » Et sicut potior est prae ceteris, ita potius venerari debet. Ad hoc sacrificium approbandum notatur triplex ratio mutandi vetus sacrificium. Prima auctoris nostri sacrificii potentia, scilicet Christi, qui non solum ex eo quod est Dominus et rex universae terrae, sed ex summi sacrificii ad eum translatione potuit et debuit suum in melius sacrificium commutare. Ps. 109: « Juravit Dominus, et non poenitebit eum etc. » Non dicit secundum ordinem Aaron, vel secundum ritum Levitarum, qui obtulerunt carnes hircorum et taurorum; sed secundum ordinem Melchisedech, qui obtulit panem et vinum, Heb. 8: « Quod fuit necessarium secundum ordinem Melchisedech alium exurgere Sacerdotem, et non secundum ordinem Aaron: » translato enim Sacerdotio necesse est ut legis translatio fiat. Manifestum est autem quod ex tribu Juda ortus est Dominus, de qua secundum legem non erant Sacerdotes. Secunda est debitorum nostrorum exigentia: tam magnum enim erat debitum primorum parentum ex rapinae magnitudine, ex raptoris ingratitude, ex laesi scilicet Creatoris majestate, quod non solum legis sacrificia, sed totus mundus cum omni creatura non sufficit pro satisfactione. Ad Hebr. 10: « Christus ingrediens mundum dicit, Hostiam et oblationem noluisti, corpus autem aptasti mihi. » Glossa: « ingrediens, idest homo factus dicit: Hostiam de animalibus, et oblationem de aliis rebus noluisti, idest non placuerunt tibi: corpus autem quod praebuit omnibus sacrificiis est, quia sine peccato, aptasti mihi, idest aptum et idoneum dedisti mihi vivendo, quod pro omni redemptione valeat offerri. » Psal. 58: « Quae non rapui, tunc exolvebam: » quando scilicet pro debitis omnium sufficiens sacrificium in cruce offerebam. Tertia ratio mutandi est ipsorum sacrificiorum legis insufficientia. Et hoc probatur a tribus: quia scilicet Deo non placuerunt, quia peccata non abstulerunt, quia gratiam non contulerunt. De primo Jerem. 6: « Holocausta vestra non sunt accepta, victimae vestrae non placuerunt mihi; » Oseae 6: « Misericordiam volo, et non sacrificium. » De secundo, Psal. 29: « Holocaustum et pro peccato non postulasti; » ad Rom. 5: « Ex operibus legis non justificabitur omnis caro coram Deo; » ad Heb. 10: « Impossibile est sanguine hircorum et taurorum auferri peccata. » De tertio Ezechiel. 20: « Dedi praecepta non bona, et judicia in quibus non vivent: » praecepta non bona, » idest minus bona, et sacrificia, scilicet caeremonialia: « in quibus non vivent », quia vitam gratiae non conferebant: ad Heb. 12: « Reprobatio quoque fit praecedentis mandati propter infirmitatem ejus et inutilitatem quasi propter ejus sterilitatem, » quia non conferebat gratiam. Tertia institutionis causa est cibus hominis. Cibus, inquam, medicinalis contra pomi mortiferi

corruptionem, quae tam prava infusa est per primos parentes humano generi, ut esset incurabilis, nisi subveniretur medicina optima, quam posset facere prudentia Dei. Eccles. 58: « Altissimus de terra, » idest carne Virginis, « creavit medicinam, » et vir prudens non abhorrebit eam. Ambrosius: « Corpus Christi medicina spiritualis est, quae cum reverentia degustata sibi devotos purificat. » Ad cognoscendum rationem necessitatis medicinae corporis Christi, sciendum quod serpens malignus infudit homini per venenum cibi vetiti triplicem corruptionem: in anima scilicet tenebras ignorantiae, in corpore morbum pravae concupiscentiae, et mortem utrobique. Contra hoc institutum est corporis Christi medicamentum tenebras ignorantiae illustrans, morbum concupiscentiae sanans, et mortem nostram mortificans. Propter haec tria potest comparari triplici dulci cibo et medicinali: scilicet melli propter primum, ficui propter secundum, fructui uvae propter tertium. De primo Proverb. 54: « Comede fili mel, quoniam bonum est. » Mel corpus Christi dulce significat. Hoc bonum est, quia tenebras mentis illuminat. 1 Reg. 14: « Vidisti, quoniam, illuminati sunt oculi mei, eo quod gustaverim paululum de melle: » Isaiae 7: « Butyrum et mel manducabit omnis qui relictus fuerit, ut scilicet sciat reprobare malum, et eligere bonum. » Psal. 26: « Dominus illuminatio mea etc. Accedite ad eum, et illuminamini. » De secundo Jerem. 24: « Ficus, ficus bonas, bonas valde. » Ficus bis dietae dulci corpus Christi Dei et hominis significant. Haec bis bonae sunt valde, quia mentem et carnem a morbo pravae concupiscentiae sanant. 4 Reg. 20: « Isaias jussit afferri massam ficorum, quam cum posuit super ulcus regis, curatus est. » Ulcus regis est concupiscentia carnalis; massa ficorum corpus Christi continens dulcedinem multorum bonorum ad medicinam malorum desideriorum. De tertio Lucae 1: « Benedictus fructus ventris tui, » corpus scilicet Christi, quod est fructus vitae valens ad destructionem gehennae, et acquisitionem vitae aeternae. Proverb. 5: « Lignum vitae est his qui apprehenderit eam, scilicet sapientiam Dei incarnatam, » Hinc dicitur Oseae 13: « Ero mors tua o mors; » Joan. 6: « Ego sum panis vitae etc. Qui manducat meam carnem etc. » Item: « Qui manducat me, vivet propter me. » Hilarius: « Accepta carne Domini et hausto sanguine, id efficitur ut nos in ipso, et ipse in nobis sit. » Haec est ergo causa vitae nostrae, quod in nobis carnalibus per carnem Christum, qui vere vita est, manentem habemus, victuri per eum ea conditione, qua vivit ipse per Patrem qui in eo est.

## CAPUT II.

*De prima causa institutionis per se, scilicet memoria Salvatoris, et de praeparatione ejus ad judicium.*

Venite comedite panem etc. causam tuam etc. Speciale. Item in memoria aeterna. « Hoc facite in meam commemorationem, » Lucae 2. Thema: Item « Estote parati quia qua hora etc. » Lucae 12. Prima causa institutionis Sacramenti Dominici corporis est memoria Salvatoris, circa quam tria possunt quaeri. Primo, quid mali sequitur, si memoria Domini fuerit relicta. Et dicendum quod triplex: scilicet amis-



sio gratiae divinae, subjectio potestatis diabolicae, magna deformitas culpae. De primo Deuter. 32: « Deum qui te genuit, dereliquisti etc. » Et ait: « Abscondam faciem meam, et considerabo, » idest subtraham gratiam. Ubi fons perit, rivus arescit. Isaiae 13: « Eris deserta, quia oblita es Dei creatoris tui. » Eccl. 20: « Oratio fatuorum effundetur. » De secundo Judic. 4: « Obliti sunt Dei sui, et tradidit eos in manus Sisarae, » idest potestati diaboli. Tobiae 6: « Qui conjugia ita suscipiunt ut Deum a se et a sua mente excludant, in his habet potestatem daemon. » De tertio ad Rom. 1: « Sicut non probaverunt, » idest noluerunt Deum habere in notitia, « tradidit illos in reprobum sensum, ut faciant ea quae non conveniunt. » Et, heu! hoc saepe fit usque ad mortem. Psalm. 9: « Non est Deus in conspectu ejus etc. » Joel. 1: « Computruerunt jumenta in stercore suo. » Jumenta impudica et insipientia sunt homines stulti, carnales, Deum prae oculis non habentes. Hujusmodi in stercore suo putrescere, est in luxuria et aliis peccatis vitam finire. Secundo quaeritur de quibus de nostro Salvatore memoria sit habenda. Et dicendum de tribus: de praeterito, de praesenti, de futuro. De praeterito, ut nostri Redemptoris, quia propter nimiam caritatem a morte mala morte sua liberavit nos. De praesenti, ut omnium inspectoris, qui per occultam praesentiam omnia nostra semper cernit. De futuro, ut justis iudicis, qui per omnipotentiam suam omne pravum incorrectum districte judicabit. De primo Thren. 5: « Recordare paupertatis meae, et transgressionis, » idest maximae humiliationis, « absynthii et fellis, » idest amarae passionis. Ezechiel. 9: « Signa Tau super frontes virorum dolentium et gementium super cunctis abominationibus quae sunt in civitate hac. » Tau figuram crucis habet, idest passionis Christi, quae semper est bonis in mente ferenda. De secundo Psal. 99: « Scitote quoniam Dominus ipse est Deus, » omnia scilicet implens, omnia videns, ubique praesens. Hinc ait: « providbam Dominum in conspectu meo semper, » Psal. 5. Ecclesiastic. 59: « Opera omnis carnis coram Domino, et non est quicquam absconditum ab oculis ejus. » Cant. 2: « En ipse stat post parietem nostrum, » idest induitur parietem carnis nostrae: « prospiciens per cancellos: » quia licet intus degens occultus a nobis videri non possit, tamen omnia nostra videt. De tertio Isai. 50: « Ecce nomen Domini venit de longinquo, ardens furor ejus, et gravis ad portandum. » Ecce venit, idest attendite, quia cito veniet ad districtum iudicium. Matth. 24: « Vigilate etc. » Hieronymus: « Sive comedo, sive bibo, sive aliquid aliud facio, semper intonat in auribus meis quasi tuba vehemens vox illa terribilis, Surgite mortui, venite ad iudicium. » De omnibus tribus simul. Psal. 110: « Memoriam fecit mirabilium suorum: » quasi diceret: Dominus dedit nobis escam, scilicet seipsum ad memoriam suorum mirabilium: praeteritorum, quod nos redemit: praesentium, quod omnia nostra respicit: futurorum, quod districte tandem judicabit. Tertio quaeritur quid valeat memoria nostri Salvatoris. Dicendum ad tria. Primae enim rei memoria, scilicet passionis Christi, valeat ad cor nostrum ejus amore inflammandum. Secundae rei, scilicet ejus continuae inspectionis, valet ad nos a peccato custodiendum. Tertiae rei, scilicet districti iudicis, valet

ad excitandum nos ut praeparemur contra futurum iudicium. Primum facit nos bonum diligere, secundum malum odire, tertium imminens periculum praecavere. De primo Lucae 12: « Ignem veni mittere in terram, et quid volo nisi ut ardeat? » Ignem veni, idest causam amoris nisi in mundum beneficio passionis, quae si pie recordata fuerit, amore magno cor accendit. Psalm. 58: « Concaluit cor meum intra me etc. » Bernardus: « Super omnia te mihi reddit amabilem, Jesu bone, calix quem bibisti, opus redemptionis meae. » Idem: « Quanto pro me Dominus factus est vilior, tanto mihi factus est carior. » De secundo Proverb. 8: « Timor Domini odit malum. » Timor inquam quomens semper Deum praesentem et omnia videntem attendit, a peccato custodit: hinc e converso Eccl. 25: « Omnis homo qui transgreditur lectum suum contemnens animam suam dicens, quis me videt? tenebrae circumdant me: non intelligit quoniam omnia videt oculus Domini, et expellit a se timorem Dei. » Ezechiel. 8: « Certe vidisti, fili hominis, quae seniores faciunt in tenebris. Dicunt enim, non videt Dominus. » Glossa: « Si Dominum praesentem et omnia videntem et judicantem semper cogitarem, aut vix aut nunquam peccaremus. » Boetius: « Magna nobis indicta est necessitas benevivendi, cum agamus omnia ante oculos iudicis cuncta cernentis. » De tertio Exod. 19: « Sanctifica populum, et sint parati in diem tertium: die enim tertio descendet Dominus coram omni plebe; » quasi diceret, Mementote, quia Dominus terribilis descendet ad districtum iudicium: et ideo estote parati in diem tertium. Primus dies est dies nostrae nativitatis: secundus nostrae conversationis: tertius dies mortis, vel adventus districti iudicii. Luc. 12: « Estote parati. » In praeparatione ad iudicium debent tria notari; scilicet modus, providentia non praeparatorum poenam evadere, lucrum cum praeparatis vitam aeternam possidere. De primo Eccl. 18: « Ante iudicium praepara justitiam tibi, » scilicet poenitentiam agendo. Matth. 5: « Poenitentiam agite. Appropinquabit enim regnum caelorum, » idest regis caelestis iudicium justum. Joel 2: « Magnus dies Domini et terribilis valde, quis sustinebit eum? Nunc ergo dicit Dominus: Convertimini ad me etc. »: quasi diceret: Apparate vos ad diem Domini poenitentiam agendo, et peccata mundi non faciendo. De secundo Apoc. 18: « Exite de Babylone, popule meus, et ne participes sitis delictorum ejus, et de plagis ejus non accipietis. » « Exite de Babylone, » idest praeparate vos ad iudicium poenitentiam agendo, et peccata mundi non faciendo: et per talem providentiam evadetis ejus poenam. Luc. 12: « Si sciret paterfamilias etc. » Glossa: « Nesciente paterfamilias, domum fur perfo-dit; quia dum a sui custodia spiritus dormit, improvisa mors carnis habitaculum irrumpit, et animam ad supplicia trahit. Furi autem resisteret, si vigilaret, et adventum iudicis occulte praevientem praecavens, iudici poenitendo occurreret; et sic utique dormientium, idest non praeparatorum poenam evaderet. » De tertio Matth. 25. Cum fatuae virgines, idest animae non paratae, irent emere ad forum diaboli cum Eva, vel cum Dina, ubi pro modica re dant multa bona, venit sponsus, et quae paratae erant etc. Ecce triplex lucrum praeparationis ad iudicium: scilicet possessio caelestis regni, societas amabilis sponsi, deliciae totius boni.

Primum notatur ibi, « Intraverunt: » secundum ibi, « Cum eo: » tertium ibi, « Ad nuptias. » De primo Matth. 25: « Venite benedicti Patris. » De secundo 1 Thessalon. 4: « Semper cum Domino erimus, » sine quo nulli bene, cum quo nulli male esse poterit. Joan. 17: « Pater quos dedisti mihi, volo . . . . ut videant claritatem quam dedisti mihi. » De tertio Isai. 66: « Gaudete cum Jerusalem, » idest cum beatorum omnium pacifica et jucunda societate, « ut repleamini ab uberibus consolationis ejus. »

### CAPUT III.

#### *De secunda causa institutionis Sacramenti Eucharistiae, scilicet Sacrificio Altaris.*

« Venite comedite etc. » Item causam tuam etc. Thema proprium. Sacrificium Juda, quasi regis, et militiae, idest Christi et Ecclesiae. Malach. 3. Secunda causa institutionis Sacramenti Dominici Corporis est sacrificium altaris. Circa quod sacrificium notantur tria: scilicet forma offerendi, quaestio de sacrificio legali, et excellentia nostri sacrificii. De duobus primis hic potest dici; de tertio in sequenti. Primo notatur forma: et haec est triplex. Prima in oblationum veterum praefiguratione; secunda in humanae formae veritate, tertia in panis et vini specie. Prima est synagogae commendata sub lege, secunda caritatis divinae oblata in cruce, tertia fidelis animae consecrata in mensa Ecclesiae. Prima data est in signum, secunda in pretium, tertia in solatium. De prima Levitici 4: « Si omnis Israel per ignorantiam peccaverit: offerat pro peccato suo vitulum, » idest Christum; dicit Glossa: « Hoc autem non erat in persona, sed in figura. » Exod. 12: « Similiter agnus immaculatus, quem occidebant in Pascha, et ejus carnes edebant, » figura Christi erat, ut dicit Gregorius. De secunda forma Isaias 53: « Sicut ovis ad occisionem ductus, » vulneratus est propter etc. Oblatus est, quia ipse voluit. » Hoc vere secundum formam humanam in cruce. Hebr. 10: « Sanctificati sumus per oblationem corporis Jesu Christi semel, » scilicet in cruce. De tertia Psal. 109: « Tu es Sacerdos in aeternum etc. » Qui, ut dicitur Gen. 14, « Obtulit panem et vinum: » sic Christus dat corpus et sanguinem suum in sacrificio altaris sub panis et vini specie. Matthaei 26: « Accepit Jesus panem, » et benedixit, et ait: Hoc est corpus meum. Et accipiens calicem, » idest, vasculum cum vino, » gratias egit dicens, Hic est sanguis meus etc. » Secundo notatur brevis quaestio de sacrificio legali, in qua tria fiunt. Primo contra insufficientiam quae imponitur sacrificiis legalibus, opponitur; secundo contrarietas solvitur; tertio causa illius sacrificii assignatur. Primo contra insufficientiam, quod Deo non placuerunt, et quod peccata non abstulerunt, secundum illud Jer. 6: « Holocausta vestra non sunt accepta, victimae vestrae non placuerunt mihi: » et contra his similia opponitur. Levit 4: « Si peccaverit autem quis de populo terrae, offeret capram immaculatam, et adolebit eam Sacerdos super altare in odorem suavitatis Domini; et dimittetur ei. » Ergo videtur, quod vetus sacrificium placuerit Deo, et propter hoc peccata dimisit. Hebr. 11: « Omnia pene in sanguine mundantur secundum legem, » et per sanguinem animalium sacrificiorum re-

mittuntur peccata delinquentium. » Ergo illa sacrificia Deo placuerunt, et peccata dimiserunt. Secundo horum contrarietas sic potest solvi. In sacrificio semper tria fuerunt: scilicet ipsum sacrificium, personae offerentium, peccatorum remissio. In singulis istorum duo attendebantur in sacrificio; caro, et sanguis animalis quod offerebatur. Et praeterea multo melius, scilicet res spiritualis quae ibi figurabatur, ut in agno vel vitulo Christus, in capra poenitentia, in bove vita robusta et activa, in ave sublimis et contemplativa, et sic de ceteris. Item personae offerentium duae sunt species; aliae dignae, aliae indignae. Indigni erant qui illa sacrificia tantum carnaliter attendebant. Digni autem qui ea spiritualiter attendebant, et in eis Christum figuratum, vel explicite vel implicite credebant, et secundum intellectum spirituales vitam suam regebant. Item ibi erat remissio peccatorum: et hoc quantum ad duo: scilicet quantum ad poenam, idest quantum ad legis irregularitatem: vel quantum ad culpam, idest quantum ad conscientiae maculam. His visis, facile solvuntur quae de sacrificiis in Scripturis sacris contraria dici videntur. Revera enim illa sacrificia secundum se, scilicet opera operata, idest carnes et sanguis hircorum, nec placuerunt Deo, nec propter ea remisit culpam quantum ad culpam, idest, conscientiae maculam; sed tamen apud homines remissa reputabantur quantum ad quamdam legis poenam. Unde cum Apostolus uno loco dicat, « Impossibile est sanguine hircorum auferri peccata; » et in alio, « Omnia pene in sanguine mundantur secundum legem; » primum intelligendum est quantum ad animae culpam; secundum quantum ad carnis poenam. Unde ad Heb. 9: « Sanguis hircorum et vitulorum, et cinis vitulae aspersus inquinatos sanctificat ad emundationem carnis. » Glossa: « Sanctificat, idest a peccato mundat, idest a poena legis, ad emundationem valent non animae, sed carnis. » Verumtamen justorum sacrificia non secundum se, ut dictum est, sed propter fidem Salvatoris, quem in illis venturum, et pro redemptione mundi credebant, Deo placebant, et eis remissionem peccatorum quantum ad poenam supradictam et quantum ad culpam animae valebant. Ad Gal. 5: « Ex operibus legis non justificabitur homo, nisi per fidem Jesu Christi. » Hebr. 11: « Fidem plurimam hostiam Abel, quam Cain obtulit Domino: » plurimam, idest acceptabiliorem, et plus sibi valentem. Intellexit enim et credidit in agno, quem Deo obtulit, hostiam meliorem, idest Salvatorem, quod non Cain, et ceteri indigni. Gen. 10: « Respexit Dominus ad Abel, et ad munera ejus. » Tertio causa institutionis legalium sacrificiorum est assignanda. Cum enim a Deo instituta sint, qui nihil sine causa facit, et tamen mutanda erant; quaeri potest causa institutionis eorum. Ad hoc breviter dicendum, quod licet per se non valuerant ad remissionem culpae, tamen multum utilia fuerunt ad doctrinam sapientiae. Data sunt quippe servis ad tempus tamquam signa rerum meliorum, et quasi parvulis tamquam characteres librorum, in quorum proprietatibus et modulis offerendi proficerent in disciplina verae fidei, ut adepta vera scientia, deficerent elementa, et collata veritate cessarent umbrac et signa. Deut. 11: « Ponite verba mea in cordibus vestris, et suspendite pro signo in manibus, et scribite ea in postibus et januis ». « Po-

« nite in cordibus legalia, » scilicet quantum ad moralia, quae semper sunt servanda: « suspendite « ea pro signo in manibus, » quantum ad manufacta tabernacula et hujusmodi, quae pro tempore sunt tollenda: « scribite in postibus et januis » sacrificia, scilicet oves et boves quasi litteras parvulorum, in quibus multa bona sunt discenda, et praecipue (1): scilicet fides Salvatoris, forma de moribus, spes de caelestibus. Primum poterant discere de sacrificiis ovium, secundum in sacrificio taurorum, tertium in sacrificio animalium extra castra combustorum. De primo Isaiæ 55: « Sicut ovis etc. » Cum ergo ovis offerebatur, poterant tria de vera fide discere: scilicet Salvatoris innocentiam, mansuetudinem humani generis, per mortem Christi redemptionem. De secundo Daniel. 5: « In spiritu « humilitatis etc. » Sicut in holocaustis arietum et taurorum. Cum ergo cornuta animalia in holocaustum, idest per ardorem ignis in cinerem redigenda offerebantur, poterant de bonis moribus tria discere: scilicet ut daemonibus et vitiis resisterent, Dei et proximi amore arderent, cordis et corporis humilitatem in omnibus conservarent. De tertio Lev. 4. Hebr. 12: « Quorum animalium inferitur « sanguis pro peccato in sancta per Pontificem, « horum corpora cremantur extra castra. » Sanguis animalium significat animas justorum. Cum haec fiebant, poterant tria discere de spe obtinendae caelestis gloriae; quae sunt poenitentia viventium, Salvatoris officium, honorum suffragium. Primum discimus in illo quod corpora extra castra cremantur; quia ibi corpora cremare, est fideles extra delicias et voluptates saeculi poenitentiam agere. Secundum in eo quod sanguis inferebatur per Pontificem in sancta sanctorum; quia hoc est animas justorum post hanc vitam beneficio Christi in caelum assumi. Tertium in eo quod sanguis per Pontificem in sancta delatus valuit ad remissionem peccatorum hominum vivorum: quia hoc est animas bonorum jam per Christum in caelum sublevatas intercedere pro peccatis exulum adhuc in mundo relictorum. De primo 2 Timoth.: « Fidelis « sermo. Nam si commortui sumus » scilicet agendo poenitentiam: « et vivemus » recipiendo vitam aeternam: « si sustinebimus, et conregnabimus ». Ad Rom. 8: « Non sunt condignae passiones etc. » Ecce quod poenitentiam agere, et mala in hoc mundo sustinere, valet ad spem obtinendae caelestis gloriae. De secundo Joan. 14: « Iterum venio, et accipiam « vos ad me. » Ecce quod Domini pietatis officium valet ad spem caelestium. Cant. 5, dicunt hujusmodi: « Quo abiit dilectus tuus, o pulcherrima « mulierum? » respondit Beata Virgo: « Dilectus « meus descendit in hortum suum ad areolam a- « romatum, ut pascat in hortis, et lilia colligat, » idest, animas beatas vel castas de mundo assumat, et ad caelestia perducatur. De tertio Oseae 1: « Ego « exaudiam caelum, et illi exaudiant terram, » idest, sanctorum precibus qui sunt in caelis, salvantur qui habitant in terris. Ecce orationes sanctorum valent ad spem caelestium. Apoc. 8: « Ascendit fumus aro- « matum de orationibus, » scilicet de manu Angeli coram Deo, quia scilicet sancti offerunt orationes pro nobis Christo, et Christus Patri suo, ut peccatorum recipiamus remissionem, et ad eorum perveniamus societatem.

## CAPUT IV.

*De tertio circa sacrificium notando, scilicet sacrificii nostri excellentia.*

« Venite comedite etc. » Tertio notatur nostri sacrificii, scilicet corporis Christi excellentia, quae praecellit omnia legis sacrificia triplici ratione: scilicet honestatis, quoad saeculum: dignitatis, quoad Deum: virtutis, quoad suae bonitatis effectum. Primo excellit ratione honestatis: quod probatur a tribus: ab exteriori specie, a virginali origine, a spirituali dulcedine. Primo probatur hujusmodi honestas ab exteriori specie: quia sub nulla alia qualitate cibi posset tam munde, tam pulchre, tam honeste ministrari, sicut sub specie panis et vini. Non enim sequuntur hoc inconvenientia multa, quae sequebantur illa cruenta legis sacrificia. Prov. 14: « Melior est buccella sicca cum gaudio, quam « domus plena victimis cum jurgio. » Buccella sicca est sacrificium nostrum sub munda specie panis et honesta. Zachar. 9: « Quid bonum et « quid pulchrum ejus, nisi frumentum electorum, « et vinum germinans virgines? » Secundo probatur honestas ejus, quod a nulla corruptione, sed a virginali floresumpsit exordium. Ecl. 24: « Flores « mei fructus honoris etc.: » quasi diceret: Flores pudicitiae et virginitatis versi sunt in fructum nobilissimae et honestissimae prolis. Augustinus: « No- « bilitas matris est ex deitate prolis, et nobilitas « prolis ex virginitate matris. » Can. 5: « Egredi- « mini, » Glossa, « ab ignorantia infidelitatis, et « videte regem, idest Jesum Christum, in diade- « mate, idest carne quo coronavit cum mater sua, « idest honestavit in hoc quod est virgo. » Tertio probatur honestas hujus sacrificii a spirituali dulcedine pietatis, qua cunctos christianos ad se attrahit. Ut enim dicit Tullius: « Honestum est, quod sua vi « nos ad se trahit et allicit, ut scilicet res virtuosa, « maxime vero talis qui abundat dulcedine pietatis: » et talis res est Sacramentum dominici corporis. Ecl. 49: « Memoria Josiae in compositione odoris « facta opus pigmentarii. » Memoria Josiae est memoriale Salvatoris, vel sacrificium altaris: hoc factum est opere pigmentarii, scilicet ex pretiosis operibus divinitatis et humanitatis suae, ut suavissimo honestatis et pietatis odore ad se trahat fideles Ecclesiae. Cant. 1: « Oleum effusum nomen « tuum. » Illic omnes qui vere credunt, ob spem gratiae et devotionis ad hoc sacrificium videndum et adorandum ad Ecclesiam frequenter et ferventer accurrunt. Secundo excellit ratione dignitatis: quod probatur a tribus rebus pretiosissimis, ex quibus consistit; scilicet ex carne Christi mundissima, anima justissima, deitate altissima. Haec tria in agno Paschali figurata sunt, in nostro sacrificio vere perfecta sunt. Exod. 12: « Caput agni cum pedibus « et intestinis vorabit. » Caput agni significat deitatem, intestina animam, pedes carnem: ecce in Christo Deus, anima et corpus; propter quod dicitur, Ave salus mundi, deitas integra, verus homo. Ex carne, scilicet, et anima propter tantae dignitatis excellentiam: habet sacrificium nostrum prae aliis triplicem praerogativam: Deo namque secundum se acceptum est, Angelis reverendum, hominibus adorandum. Primum est propter animam justam, secundum propter carnem mundam, tertium propter divinitatem summam. De primo Malach. 5: « Pla-

(1) Forte et praecipua.



« cedit Deo sacrificium Juda, » idest Christi justi regis. Sacrificium Juda Domino placet, quia Corpus Christi oblatum Deus Pater approbat, in quo scilicet se maxime humiliavit usque ad mortem Patri obediendo, de diabolo triumphando, et genus humanum redimendo. Eecl. 50: « Sacrificium justi acceptum est, et odor suavitatis in conspectu Altissimi. » De secundo Matth. 22: « Ubi cumque fuerit corpus, ibi congregabuntur et aquilae. » Leo Papa: « Circa corpus Domini aquilae sunt quae spiritualibus alis circumvolant: videlicet Angeli sancti, spiritus mundi, munditiam amantes, mundum corpus Domini venerantes et praesentes fideles protegentes. » Gregorius: « Quis fidelium dubium habere possit in ipsa hora immolationis caelos aperiri, et in illo Christi mysterio Angelorum adesse choros, summa et ima sociari? » De tertio Psalm. 95: « Adorate scabellum: » et Isa. 66, dicitur: « Terra autem scabellum pedum meorum. » Terra scabellum Dei significat carnem Christi, quae originaliter de terra est. Haec est nobis adoranda, quia sancta, quia Deo unita. Augustinus: Sciendum quia in Christo terra, idest caro, sine impietate adoratur. Qui enim terram adorat, non terram intuetur, sed illum potius cuius scabellum est, propter quam adorat. Augustinus: Dicunt haeretici, quid est quod carnem illius, quam creaturam non negas, cum divinitate adoras, et ei non minus quam divinitati deservis? Respondeo: Dominicam carnem perfectam humanitatem ideo adoro, quia a divinitate suscepta, et divinitati in unitate personae unita. Si hominem separaveris a Deo, illi non credo, nec servio: velut si quis purpuram vel diadema regis per se jacens inveniat, nunquam eam adorabit. Cum vero ea rex fuerit indutus, periculum mortis incurrit, si eam eum rege adorare contempserit. Sic etiam in Christo humanitatem non solam vel nudam, sed divinitati unitam, scilicet unum filium Dei, verum Deum et verum hominem si quis adorare contempserit, aeternaliter morietur. Alexander Papa: « Nihil in sacrificiis majus esse potest, quam corpus et sanguis Christi. » Tertio excellit ratione virtutis, idest propter effectum suae bonitatis. Habet enim triplicem bonum actum in triplici statu fidelium: in mundo, in purgatorio, in caelo. In primo statu peccata relaxat; in secundo poenam gravem alleviat; in tertio gaudium magnum generat. Hinc est, quod tripliciter missae celebrari solent: pro salute vivorum, pro requie defunctorum et pro gloria beatorum. Unde et hostia in tres partes frangitur, ut virtus sacrificii corporis Domini in praedicto triplici statu demonstratur. De primo Levit. 5: « Anima quae peccaverit per ignorantiam offeret arietem immaculatum, » idest Christum. Glossa: « Unde canitur, Agnus Dei etc. » Gregorius: « Dominus dedit nobis Sacramentum salutis, « ut quia quotidie peccamus, et ille jam pro nobis « mori non potest, per hoc Sacramentum remissionem consequamur. » De secundo Levit. 27: « Dedi vobis sanguinem, ut super altare meum expietis pro animabus vestris, et sanguis pro animae piaculo sit; et ideo caro et sanguis Christi recte pro animabus defunctorum offerantur, « ut a poena purgatorii, qua pro residuo poenitentiae ligati sunt, absolvantur. » Augustinus: « Orationibus et elemosynis sanctae Ecclesiae et sacrificio salutari non est dubium defunctorum animas relevari, ut eum eis misericordius agatur

« a Domino, quam eorum peccata meruerunt in hoc mundo. » De tertio Levit. 10: « Pectusculum sacrificii, quod oblatum est, edetis in loco mundissimo tu et filii tui et filiae tuae tecum. » Pectusculum, quod scilicet optimum est et dulcissimum animalis, significat dulcedinem corporis Christi, in quantum comeditur in loco mundissimo, idest in quantum delectat beatos in caelo, in eo quod plurimum gaudent et congratulantur in hoc sacrificio de memoria Redemptoris, de aspectu nostrae salutis, de admiratione divinae bonitatis. Vel certe pectusculum comedetur in loco mundissimo, quia dulcedine corporis Domini, qua hic pascimur in velamine et Sacramento, ea fruuntur beati visione manifesta in caelo. Apocal. 2: « Vincenti dabo manna absconditum, » Glossa, « meipsum, qui sum panis vitae: quod manna et si nunc manet absconditum, tunc fiet manifestum habens omnis saporis suavitatem. » Hinc dicit collecta, « Perficiant in nobis, Domine, Sacramenta quod continent, ut quae specie gerimus, reum veritate capiamus, » idest Christi corpore manifesta visione perfruiamur, secundum illud: « Qui diligit me, diligitur a Patre meo, qui est in caelis. » In illa Domini visione erit nobis omnis (1) boni plena fruitio. Psal. 16: « Adimplebis me laetitia cum vultu tuo, satiabor cum apparuerit gloria tua. »

## CAPUT V.

*De tertia causa institutionis, qui est cibus hominis.*

« Caro mea vere est cibus. » Thema proprium, quod Corpus datur in cibum. Tertia causa institutionis est cibus hominis. Circa hoc quod Dominus Corpus suum dat in cibum, triplex potest ratio sapientiae Dei assignari: scilicet divinae liberalitatis magnitudo. Cum enim summe sit bonus, summa eum decet liberalitas. Sed nulla hac major esse potest. Probatum autem ejus liberalitas in hoc facto quantum ad tria: primo quantum ad magnificentiam doni; secundo quantum ad nobilitatem dantis; tertio quantum ad utilitatem accipientis. Primo quantum ad magnificentiam doni: quia largitor omnium bonorum in hoc Sacramento dat seipsum, et hoc largissime, quia dat proprium corpus in cibum, secundum quod dicit, « Accipite et comedite. » Hic est summus gradus divinae largitatis quantum ad donum. Hic gradus quidam proponi possunt divinae largitatis, quibus homini largitus est omnia bona sua; et sic patebit quod hic est summus. Primus gradus est, quod largitus est homini caelum et terram, et omnes irrationabiles creaturas ad serviendum Eecl. 17: « Deus creavit de terra hominem, et dedit ei potestatem eorum quae sunt super terram. » Gen. 2: « Faciamus hominem ad imaginem et similitudinem nostram; » Deuter. 4: « Solem et lunam et omnia astra caeli creavit Deus in ministerium cunctis gentibus; » Matth. 5: « Deus solem suum facit oriri super bonos et malos; » Actuum 13: « Deus non sine testimonio semetipsum reliquit benefaciens, de caelo dans pluvias et tempora fructifera, implet cibo et laetitia corda nostra non sine testimonio se reliquit benefaciens, » idest per beneficia et creaturae se Deum et libe-

(1) *Al. omnia.*



ratores testatus est. Psal. 18: « Quid est homo quod memor es ejus? » Secundus gradus est, quod homini largitus est illas nobilissimas creaturas rationabiles et caelestes, scilicet sanctos Angelos ad ministrandum. Heb. 1: « Omnes sunt « administratorii spiritus in ministerium missi propter eos qui hereditatem capiunt salutis; » Matth. 18: « Angeli eorum semper vident faciem Patris. » Angeli dicuntur, quia unicuique a nativitate datus est Angelus ad ministrandum. Hinc leguntur hominibus saepe obsequia impendisse, et faciunt quotidie peccatores convertendo, multos a malis defendendo, justos ad caelos deducendo. Exodi 14: « Ecce ego mitto Angelum meum, qui praecedet te, » scilicet lumen virtutum ostendendo, « ut « custodiat in via, » in igne purgatorii defendendo, et introducat te ad sidera caelestis regni perducendo. Tertius gradus est, quod largitus est seipsum. Lucae 1: « Benedictus Dominus Deus Israel. » Dedit autem se multis modis. Primo in socium nostrae peregrinationis. Baruch 5: « Ille etiam « Deus noster qui adinvenit omnem viam disciplinae, et tradidit illam Israel dilecto suo, et « post haec in terris visus est etc.: » quasi diceret: Quia Deus fecit homini vias peregrinationis, dans mandata bonae conversionis ne deficiat: et ne via homini videretur gravis nimis, factus homo est Deus, et per hoc socius viae et peregrinationis. Lucae 8: « Iter faciebat Jesus per castella et civitates, praedicans, et evangelizans regnum Dei, « et duodecim cum illo, et mulieres quae erant « curatae a spiritibus immundis, et Maria Magdalena et Joanna et Susanna, et aliae multae, et « turba multa venit ad eum. » Et vere bonus se dedit in bonum socium, quia socios viae lassos optimis verbi confortavit, in periculis liberavit, infirmos curavit, mortuos suscitavit. Quartus gradus, quod dedit se in servum nostrae necessitatis. Ad Phil. 2: « Exinanivit semetipsum formam servi accipiens etc. » Hinc sitiens potavit, discipulorum pedes lavit. Matth. 20: « Filius hominis non venit ministrari etc. » Luc. 22: « Ego in medio vestrum sum, sicut qui ministrat. » Quintus gradus est, quod dedit se in pretium redemptionis nostrae. Ad Phil. 2: « Christus dilexit nos, et tradidit se pro nobis hostiam et oblationem Deo in odorem suavitatis; » Matth. 20: « Filius hominis venit dare animam suam in redemptionem pro multis. Sextus gradus est, et summus, quod dat homini corpus suum in cibum, Osee 11: « Ego quasi nutritus Ephraim, et declinavi ad eum ut vesceretur. » Joan. 6: « Panis quem ego dabo. » Gregorius: « Bonus Pastor Dominus animam pro ovibus posuit, ut in Sacramento nostro corpus suum, et sanguinem verteret; et oves quas redemerat carnis suae alimento satiaret: » et in hoc est expressio summae largitatis, et praecipui amoris. Magnum est enim dare se in socium peregrinationis, et in servum necessitatis; majus in pretium redemptionis: tamen tale donum adhuc est in aliqua separatione ab eo cui datur; sed cum datur in cibum, datur non ad separationem aliquam, sed ad omnimodam unionem. Uniuntur enim in unitate corporis cibus et sumens. Joan. 6: « Qui manducant meam carnem in me manet etc. » Et sic apparet in tali dono summa largitas divinae bonitatis. Secundo probatur excellens liberalitas Dei in hoc facto quantum ad nobilitatem dantis,

quae tam excellens est in hoc Sacramento, ut corpus suum largiatur large et diffuse, quia non solum dat illud dignis et amicis, sed non subtrahit indignis, malignis et inimicis. Psal. 26: « Appropinquant super me nocentes, ut edant etc. » Qui enim se permisit manibus malignorum semel crucifigi, permittit se sceleratorum manibus tractari et inimicorum, et immundorum dentibus in Sacramento lacerari. Hinc hosti et traditori suo Judae in coena cum aliis dicitur corpus suum dedisse: veritatem enim praesentiae suae ad instar solis oriri facit super bonos et malos, exhibens se in hoc Sacramento dignis et indignis, licet non ab omnibus effectus suscipiatur aequalis: nam dignus effectus bonitatis Dei suscipit, indignus severitatis. Exemplum de sole, et oculo aegro et sano. Nota, quod magnum est dare magna dona proximis et amicis; majus dare servis et ancillis; maximum ignotis et peregrinis, sed nimis inimicis. Unde arguuntur de magna ingratitude. Job 19: « Quare me persequimini sicut Deus, et carnibus meis saturamini? » Ad Rom. 2: « An divitias bonitatis Dei et patientiae et longanimitatis contemnis? Ignoras quoniam benignitas Dei ad poenitentiam te adducit? » Copiosa bonitas et benignitas et liberalitas Dei, quae inimicis et multis contra eum peccantibus tot bona facit; maxime cum tales corpus ejus sumere permittit, ut tanta eos liberalitate convertat. Tertio probatur quantum ad utilitatem suscipientis: quia in hoc Sacramento digne suscipiens efficitur deiformis, id est per gratiam bonitatis, sive per imaginationem imitationis Deo quodammodo similis. Joan. 1: « Quotquot autem receperunt eum etc.; » id est per gratiam bonitatis Deo similes. Ambrosius: « Quia Dominus Jesus consors est divinitatis et corporis; et tu qui accipis carnem ejus, divinae ejus substantiae in illo participas alimento. » Divina substantia bonitas est. In hoc ergo alimento divinae substantiae participare, est assimilari per gratiam divinae bonitati. Prov. 12: « Qui bonus est, hauriet sibi gratiam a Domino. » Gratia vero est influentia divinae bonitatis in animam, per quam assimilata Deo fit ei grata, et vitae aeternae digna. Non enim sufficit liberalitati divinae, quod in Sacramento, vel in cibo intellectum illuminat, quod affectum sanat, quod memoriam delectat, quod totum hominem in bono confortat, et corpori suo mystico associat; quin insuper Deo assimilet in praesenti per gratiam, et in futuro per gloriam: non enim potest ulterius promoveri.

## CAPUT VI.

*De duabus aliis rationibus quibus datur Corpus Christi in cibum.*

« Venite, comedite etc. » et alia themata, ut supra. Secunda ratio quare Dominus Corpus suum dat in cibum, est humanae naturae corruptio, quae hujusmodi cibi exigebat medicamentum; et hoc quantum ad tria. Primo quantum ad congruam curationis inchoationem: quia sicut initium corruptionis et mortis coepit a cibo vetito, scilicet a ligno scientiae boni et mali, sic initium justificationis et vitae incipere debuit a cibo, scilicet ligno vitae, id est a Corpore Dominico. De primo Genes. 2: « De ligno scientiae etc. » De secundo Joan. 6:

« Nisi manducaveritis carnem filii hominis etc. » Secundo exigebat talem cibum quantum ad integram corruptionis curationem. Serpens enim malignus infudit homini per venenum pomi vetiti triplicem corruptionem: in anima tenebras ignorantiae, in carne morbum pravae concupiscentiae, et mortem in utroque. Genes. 3: « Serpens decipit me. » De primo Psal. 48: « Homo cum in honore esset etc. » Genes. 1: « Tenebrae, » idest ignorantiae « erant super faciem abyssi, » idest humani cordis ex diaboli deceptione. De secundo ad Galat. 5: « Caro concupiscit adversus spiritum: » ad Rom. 7: « Video aliam legem in membris meis repugnantem legi mentis meae. » Lex in membris est morbus concupiscentiae movens membra ad actum malitiae. De tertio Sapient. 1: « Invidia diaboli nōrs intravit in orbem terrarum. » De omnibus Augustinus: « Si Angelus de proprio ruens paradiso non esset auditus, non praecipitaremur in mortem. Sed venit de caelo lapsus serpens foris, et emisit venenum de proprio, locutus est de suo, gustate, et eritis sicut dii; et illi appetentes quod non erant, amiserunt quod acceperant, scilicet vim intellectivam, vitae justitiam, non moriendi possibilitatem. » Quia ergo per cibum venenosum triplicem infudit corruptionem, necesse fuit, ut ad integram curationem medicus, idest Salvator noster, cibum medicinalem contra haec tria daret; et hoc est corpus suum, quod pie recipientium ignorantiae tenebras illuminat, morbum pravae concupiscentiae sanat, et mortem destruendo triumphat. De primo Psal. 26: « Dominus illuminatio mea etc.; » et Psal. 55: « Accedite ad eum, et illuminamini: » corpus enim Christi est Verbum Dei, idest vera lux in carne humana quasi in lucerna, qua illuminatur fidelis anima. De secundo Psal. 77: « Pluit illis manna ad manducandum etc. » Exod. 16: « Mane ros jacuit in similitudine pruinae super terram. » Panis igitur caelestis in similitudine pruinae rorisque apparebat, quia corpus Domini a fervore pravae concupiscentiae refrigerat. De tertio Joan. 6: « Patres vestri manducaverunt manna in deserto, et mortui sunt. Hic est panis de caelo descendens, ut si quis manducaverit ex ipso non moriatur: » et sic iste cibus mortem destruit. De his tribus supra primo sermone circa finem actum est. Tertio exigebat talem cibum quantum ad firmam sanitatis conservationem. Quidam enim ad tempus de peccatis compunguntur, et quodammodo curantur; sed tempore tentationis per recidivum iterum corrumpuntur. Psal. 57: « Putruerunt, et corruptae sunt etc. » Ad conservationem autem sanitatis animae, et incorruptionis bonae vitae valet cibus iste. Cant. 1: « Fasciculus myrrhae dilectus meus mihi: » sicut enim myrrha incorrupta servat corpora, sic corpus Domini pie sumptum corda. Tertia ratio sapientiae Dei, qua Dominus dat homini corpus suum in cibum, est humanae naturae conditio quae rationalis creata est, et corpori conjuncta. Rationalis autem creatura potest tribus modis considerari; et secundum hoc indiget triplici cibo. Primo modo consideratur secundum quod est incorporea et pure spiritualis, ut natura angelica. Secundo modo secundum quod est corpori conjuncta, sicut dissimilis dissimili, spiritus carni. Tertio modo secundum quod illae duae naturae, scilicet corpus et anima, in singulis personis hominum

sunt familiari societate miroque amore conjunctae. Sed quocumque istorum trium modorum consideratur rationalis creatura, secundum conditionem suam convenienti indiget alimonia. Primo modo exigit alimentum per quod vivat et subsistat, scilicet Verbum Dei aeternum secundum se incorporeum, quod est aeterna Dei sapientia. Tob. 12: « Ego cibo invisibili et potu qui ab hominibus videri non potest utor. » Prov. 3: « Lignum vitae est his qui apprehenderint eam, » scilicet Dei sapientiam. Ecele. 1: « Fons sapientiae Verbum Dei in excelsis reficiens, » scilicet Angelos in caelis. Secundo modo considerata rationalis creatura, ut est corpori conjuncta, sicut dissimilis dissimili, spiritus carni, pretiosum vili, secundum conditionem utriusque naturae indiget pro utroque cibo convenienti sibi, sed dissimili: quia spiritus spirituali ad modum Angeli, corpus corporali ad modum bruti. De primo Psal. 77: « Patres nostri omnes eandem escam spiritualem manducaverunt etc. » Sapient. 9: « Si quis erit consummatus inter filios hominum sibi ab illo effugerit sapientia tua, in nihilum computabitur: » quia qui spirituali cibo, qui est Dei sapientia, caruerit, a vita spirituali deficiet. Eccles. 15: « Cibavit cum Dominus etc. » De secundo 2 Reg. 12: « Pauper quidam habebat oviculam de pane suo comedens; » Ecl. 59: « Initium necessariae rei vitae hominum lac et panis, mel et uvae et oleum: haec omnia sanctis in bona, et impiis in mala convertentur. » De utroque Deuter. 8, et Matth. 4: « Non in solo pane etc. » Augustinus: « Sicut anima vita est corporis, sed non vivificat sine cibo corporali; ita Deus vita est animae, sed non vivificat illam sine cibo spirituali, idest sine Verbo Dei: et sic haec et illa natura hominis sibi dissimiles dissimilem cibum habuerunt, et alio modo et longe ab invicem comederunt, nec cibus corporis congrebat spiritui, nec cibus spiritus corpori. » Tertio modo considerata rationali creatura secundum quod illae duae naturae, idest corpus et anima, sunt in singulis personis hominum familiari societate et miro amore conjunctae, tunc exigitur ad aeternam salvationem utrorumque unus cibus toti homini, idest utrique naturae convenientis, spiritualis simul et corporalis, scilicet Verbum caro factum, quem simul sub quodam Sacramento comedant, ejus virtute anima de praesenti miseria ad vitam aeternae beatitudinis perveniat, et corpus ad modicum tempus servetur in terra, ut tandem gloriose resurgat. De hoc cibo Joan. 6: « Caro mea, » idest caro Dei, caro humana unita Dei verbo, « vere est cibus, » scilicet totius hominis, valens animae et corpori. Ecl. 1: « Unus est altissimus creator omnium, ipse creavit sapientiam spiritu suo, et secundum datum suum praebet illam diligentibus se. » Creavit sapientiam spiritu suo, idest virtute sua, scilicet creaturam carnis de Virgine sumpsit, et sapientiae suae univit, et secundum datum suum, idest liberalitatem, praebet illam in cibum diligentibus se, scilicet fidelibus, « ut prosit, » sicut dictum est, « corpori et animae. » De hoc convivio corporis et animae Isa. 9: « Vitulus et ursus pascentur simul. » Vitulus significat corpus, quod in sacrificio Deo est manducandum: ursus, spiritum, qui sicut ursus bestiis, sic terribilis esse debet bestialibus motibus et moribus. « Ii pascentur simul, » scilicet vero cibo,

idest carne Christi, ut prosit animae et corpori. De primo Joan. 6: « Qui manducat carnem meam etc. » De secundo sequitur: « Et ego resuscitabo eum. »

## CAPUT VII.

*De forma donationis, videlicet qua ex causa detur velatum hoc Sacramentum.*

« Venite comedite panem etc. » Thema speciale, Quomodo potest nobis carnem suam dare etc. Thema proprium: « Sacramentum regis abscondere « bonum est, » Tob. 12. Secundum principaliter circa Sacramentum dominicum notandum est forma donationis; et circa hanc tria sunt consideranda. Primum quod Dominus corpus suum dat velatum; secundum quod dat velatum sub specie panis; tertium quod dat velatum sub specie panis triticei. Circa primum sciendum, quod datur velatum non nudum, secundum illud Apoc. 2: « Dabo manna « absconditum quasi cibum caelestem velatum. » Sed quia hic humanus sensus haesitat, et miratur cum aliud videtur, hujus velaminis quadruplex est ratio. Prima est indignitas malorum, quae exigit ut veletur, sicut aeger oculus ut sibi sol et quodlibet lumen tegatur. Et in hoc benignissime agit eum eis misericordia Salvatoris. Si pravi nudum aspicerent, et hoc a fidelibus manducari, ex ipso aspectu scandalizarentur, et tripliciter male perirent: videlicet in corde per horrorem, in ore per detractionem, in anima per spiritualem mortem. De primo Joan. 6, ubi Dominus dicit, « Caro mea « vere est cibus etc. » Sequitur: « Ex hoc multi « discipuli abierunt retro, » quasi abhorrentes verba de humana carne comedenda. Ambrosius: « Forte dices. Quomodo verus sanguis? quia similitudinem non vides carnis. Attende verba « Christi, Audientes, quod carnem suam daret « manducare, recedebant: solus Petrus dixit, Verba « vitae aeternae habes, ad quem ibimus? Ne ergo « plures scandalizarentur, et ne velut quidam esset horror humanae carnis, sed magis maneret « gloria Redemptoris, ideo in similitudine accipis « Sacramentum; sed verae naturae gloriam virtutemque consequeris. » De secundo in eodem, ubi Dominus dixit, « Panis quem ego dabo, caro « mea est etc. » Litigabant ideo Judaei etc. Litigatio haec murmur et detractio est, et ideo debuit velari. Psal. 54: « Si is qui oderat me etc. » De tertio. Num. 4: « Aaron et filius ejus intrabunt, « ipsique disponent opera, » idest operient Sacramenta: alii nulla curiositate videant quae sunt in sanctuario priusquam involvantur, alioquin morientur. I Reg. 6: « Percussit Dominus multos, eo « quod vidissent arcam Domini, » quia scilicet non licebat eis videre eam detectam. Arca significat corpus Christi, quod malignis est velandum, ne spiritualiter moriantur si videant: quia causa suae caecitatis putarent esse phantasticum. Eccles. 5: « In pluribus operibus Dei non fueris curiosus. » Non est enim tibi necessarium ea quae abscondita sunt videre oculis tuis. Secunda ratio quare velatum datur, est fides bonorum: et haec ratio potest in tria distingui, quae exigunt hoc velari: scilicet fidei esse verum, infidelitatis pravae remedium, fidei meritum. Primum fidei esse verum exigit, ut velatum detur corpus Christi. Ad Hebr. 10: « Fides est rerum non apparentium, » ut dicit Augustinus: « Fides est credere quod non vides, sci-

« licet credere verbis de re occulta quae vere est, « et tamen eam oculis non vides: nam de re quam « videmus, scientiam potius quam fidem habemus. » 1 Petri 1: « Christus est in quem non videntes « creditis. » Secundo infidelitatis remedium exigit ut veletur corpus Christi, quatenus culpae infidelitatis respondeat modus congruus satisfactionis. Unde sicut primorum parentum incredulitas incoepit ex auditu verbi diaboli suadentis cibum habentem mortem velatam, et in eo sunt sensus eorum vane delectati, sic congruit ut fides salvandorum incipiat ex auditu Verbi Salvatoris suadentis cibum habentem veram vitam absconditam, et in quo nostri sensus pie sunt decepti praeter auditum, ut sit fides ex auditu tantum, et non ex visu vel aliis sensibus, auditus autem per Verbum Christi. Hoc pulchre figuratur Genes. 27, in benedictione Jacob, ubi sensus Isaac sunt decepti putantis sentire Esau, dum sentit similitudinem ejus qui velatus erat, Jacob. Unde sciendum, quod in illa figura dominici corporis quatuor erant personae: scilicet Isaac et Rebecca, quasi masculus et femina, significant duas naturas in nobis, idest, corpus et animam: masculus qui magis solet esse manifestus et exterioribus plus intendit, significat exteriorem hominem, idest, corpus eum suis sensibus: femina, quae domi residet et familiam regit, interiorem hominem, idest animam quae saluti suae et aliarum gerit curam. Jacob bonus et formosus habitans in tabernaculis, quem diligit Rebecca, idest, fidelis anima, significat verum corpus Christi. Esau quem amabat Isaac, idest corpus, eo quod de cibus suis vescitur, significat substantiam panis cum suis accidentibus, scilicet colore, sapore etc. Dum itaque Isaac quasi homo exterior, idest Sacerdos benedicere debet, Esau, idest substantia panis recedit; sed similitudo Esau, scilicet vestes cum odore, pelles pilosae, cibus eum sapore, idest accidentia panis sive similitudo, scilicet color, sapor, odor, durities manent circa Jacob, et sensus nostri falluntur. Ibi fallitur visus Isaac caliginosus, idest debilis corporis nostri, qui putat praec oculis habere Esau, idest panem, et tantum vestes ejus, scilicet speciem panis, et sub illa latet Jacob velatus, idest corpus Christi. Ibi fallitur gustus, quia putat comedere cibum Esau, idest panem, et gustat tantum similitudinem ejus. Ibi fallitur olfactus, quia putat sentire odorem Esau, idest panis, qui vere non est ibi; sed sentit odorem vestimentorum ejus, idest formam panis quibus vestitus est Jacob, idest corpus Christi. Sapiens erat (1) Isaac, sed in judicio cognoscendi Esau fallebatur: sic homo noster exterior in judicio panis Altaris fallitur praeterquam auditu; unde ait, « Vox quidem, vox Jacob etc. » Manus quas tango sunt Esau, nihil falsius: sed vox quam audio dicentem, ego sum, vox est Jacob, nihil verius. Similiter Sacramentum quod tango, substantia panis est, nihil falsius: vox Christi dicentis, Hoc est corpus meum, nihil verius. Primo igitur infidelitatis remedium exigit, quod corpus Christi velatum detur, ut quia sensus primi hominis in cibo perditionis vanae delectabantur, sensus nostri corporis in cibo benedictionis ad instar Isaac decipiantur, ita tamen quod Rebecca, idest anima, in fide sua non fallatur. Credit enim vere in benedictione sacra esse Jacob, idest corpus Christi velatum similitudine Esau, idest specie panis. Ter-

(1) *Al. erit.*



tio fidei meritum exigit, ut veletur corpus Christi, quia ut dicit Gregorius, « fides non habet meritum » cui humana ratio praebet experimentum, » supple sufficiens. Velatum dare voluit Dominus corpus suum, quia in hoc potius credere verbis suis quam sensibus nostris magnum habet meritum. Joan. ult. Beati qui non viderunt. Hujus meritum fidei, sive fructus triplex est: scilicet spiritualium bonorum plena copia, temporalium abundantia aeternorum superfluentia. Hinc ait Rebecca, idest fidelis anima, » In me sit ista maledictio, fili mi, » idest haec triplex benedictio. « Det tibi Deus de » rore caeli, » quantum ad primam: et « de pinguedine terrae abundantiam, » quantum ad secundam: « abundantiam frumenti, vini et olei » quantum ad tertiam. De primo Joan. 7: « Qui » credit in me, flumina etc. » Osee 14: « Ero » quasi ros etc. » De secundo ad Heb. 11: « Sancti » eti per fidem adepti sunt repromissiones, » scilicet temporalium. Isaiae 1: « Si volueritis, et » audieritis me, bona terrae comedetis. » Matth. 6: « Primum quaerite regnum Dei, » recte credendo: « et justitiam ejus, » juste vivendo, « et haec » omnia etc. » De tertio 1 Petr. 1: « Credentes » in Christum quem non videtis, exaltabitur laetitia » inenarrabili et glorificata reportantes finem fidei » vestrae salutem animarum vestrarum. » Prov. 1: « Qui audierit, absque terrore requiescet, et abundantia perfruetur timore malorum sublato. »

#### CAPUT VIII.

##### *De duabus aliis rationibus, quibus datur corpus relatum.*

« Venite comedite etc. » Quomodo potest Sacramentum regis. Tertia ratio quare corpus suum dat velatum, est instructio morum. Job 28: « Trahitur sapientia de occultis. » Tria vero in hoc Sacramento occultantur, in quibus mores instruuntur: scilicet persona Salvatoris, pulchritudo magnae claritatis, mirum opus omnipotentis. De primo Isa. 45: « Vere tu es Deus absconditus, Deus Israel » Salvator. » De secundo Isa. 7: « Expectabo Dominum qui abscondit faciem suam. » De tertio Eccl. 45: « Multa abscondita sunt majora his, pauca enim » vidimus. » In his discimus in nobis quandoque tria virtuose abscondi posse: nostram personam, pulchritudinem corporalem, bonorum operum intentionem: primum a persecutorum furore, secundum a stultorum inspectione, tertium ab humano favore. Primo discit justus abscondere personam propter tria: ut scilicet persecutor quiescat, ut praeceptum a Domino opus perficiat ut gloriosorem coronam aquirat. De primo Isa. 26: « Vade popule meus » abscondere modicum, donec pertranseat indignatio mea in persecutore, » quod multi justorum leguntur fecisse. De secundo 2 Cor. 11: « Damasci praepositus etc. » Similiter Tobias cum eum rex juberet occidi, fugiens nudus latuit, ut scilicet opera misericordiae quae coeperat, impleret. De tertio 1 Reg. 26, « cum fugeret David a facie Saul, absconditus est in colle Achile, idest in Domino. Achila interpretatur eum suscipiens: unde Dominus susceptor meus. Absconditus est autem in Domino, ut per inelyta opera gloriosa regni sibi restaret corona. Joan. 8: « Tulerunt lapides Judaei, ut jacerentur etc. » Secundo discit justus abscondere pul-

chritudinem corporalem ab omnium inspectione, quia exterior pulchritudo et ornatus multis fuit occasio casus. Decor ergo corporalis absconditur tribus modis: per habitus vilitatem: per jejuniorum austeritatem, per boni operis assiduitatem. De primo Job 16: « Saecum consui super cutem meam, » et operui cinere carnem meam: » Genes. 24: « Rebecca conspecto Isaac tollens pallium operuit se: » 1 ad Cor. 11: « Mulier debet habere velamen super » caput propter Angelos, » idest bonos. De secundo Galat. 6: « Mihi mundus crucifixus est, et ego mundo: » quasi diceret: Vilis est mihi mundus propter poenam suae sollicitudinis, et ego vilis mundanis, propter corporis mei macerationem. Augustinus: « Carnem vestram donate etc. » De tertio Psal. 58: « Tabescere fecisti sicut araneam etc. » Sicut aranea ex suis visceribus trahens opus naturae tabescit exinde, sic justus frequentans opera laboriosa ex vera caritate macerator, et pallescit in corpore: Eccl. 55: « Jugum et lora curvant collum » durum, et servum inclinant operationes assiduae. » Cantic. 1: « Nolite me considerare etc. » Sol effectus ardoris, id est opus amoris. Christus formam servi accepit, in qua claritatem divinitatis abscondit. Unde Isa. 55: « Non est species ei neque decor » etc. et absconditus vultus ejus, et despectus. » Tertio discit abscondere virtutum et bonorum operum intentionem ab humano favore. Matth. 13: « Simile est regnum coelorum, » gloria, idest conversatio justorum, « thesauro, » idest bono operi abscondito in agro, idest in corde. Gregorius: « Sic » sit opus in publico, quatenus intentio maneat » in occulto; ut de bono opere proximis praebeamus exemplum, et tamen per intentionem, qua » soli Deo placere eupimus, semper optemus secretum. » Triplex vero bonum praecipue debemus abscondere a favore hominum: scilicet eleemosynam, orationem, et jejunium. De primo Matth. 5: « Cum » facis eleemosynam, noli tuba canere ante te » tuba tumoris et jactantiae » sicut hypocritae faciunt, ut » videantur ab hominibus. Amen dico vobis, receperunt mercedem suam. Te autem faciente eleemosynam, nesciat etc. » Sinistra, idest intentio prava: dextera, idest dilectio pura, « ut sit eleemosyna » tua in abscondito etc. » De secundo Matth. 5: « Et cum oraveris, intra cubiculum etc. » idest secretum mentis, « et clauso ostia ora Patrem tuum in abscondito intentionis, et reddet tibi. » De tertio ibid., « cum jejunas, unge caput tuum, » idest refice Christum operibus misericordiae, quod tibi substrahis, membris ejus, idest pauperibus largiendo: « et faciem tuam lava, » peccata cordis, et sensuum lacrymis poenitentiae purgando, « ne videaris ab hominibus jejunans, sed Patri tuo. » Quarto datur velatum ratione imbecillitatis nostrae: hoc enim exigebat imbecillitas hominum: quod probatur tribus modis. Primo a figura legali Exod. 50: « Videntes filii Israel ex consortio domini cornutam » faciem Moysi, timuerunt prope accedere; » unde posuit velamen super faciem suam, quando loquebatur ad eos. Facies enim Moysi tam magnam recepit radiositatem ex frequenti et familiari approximatione ad divinum lumen, quod videbatur humanis oculis quasi cornuta, unde non poterant claritatem vultus ejus sustinere nisi velatam. Sic nimirum, immo multo magis corpus Christi in resurrectione ejus glorificatum, et spirituale ac deiforme factum, nullus potest mortalibus inspicere



oculis, nisi alia specie velatum. Secundo probatur ex hoc quod accidit matri Dei Mariae, quae non potuit sustinere claritatem praesentiae filii et gloriam, nisi esset obumbrata. Carne autem virginis velata majestas, Spiritus sancti operatione, facta est possibilis a Virgine et etiam a nobis videri, unde Verbum caro factum est. Sed carne illa post passionem per resurrectionem glorificata, et ad similitudinem Dei clarificata, secundum illud Jo. 17: « Clarifica me Pater » facta est impossibilis (1) ab oculis mortalium in propria forma nuda videri, nisi esset velata aliqua specie visibili. Eccle. 11: « Mirabilia opera Altissimi, et gloriosa, et absconsa, et im-  
« mensa. » Exod. 52: « Non videbit me homo, et vivet, » scilicet in specie propria. 1 ad Cor. 15: « Videmus  
« nunc per speculum, » scilicet rationis, « et in  
« aenigmate, » idest figura panis. Tertio probatur idem ratione naturali, quae est nimia dissimilitudo luminis oculi nostri ad claritatem luminis corporis Christi. Oculus enim noster angustus, aeger et corruptibilis est: illius vero claritas incorruptibilis, et quodammodo immensa, ut dictum est, deiformis (2): haec est enim ratio visibilitatis omnis luminis similitudo aliqua videntis ad lumen: et quanto major similitudo ad lumen maximum, tanto limpidior et dulcior est visio. Hinc est quod sanus oculus potest aliquatenus videre nudum corpus solis, et non corpus Christi: quia cum illo habet aliqualem similitudinem luminis et corruptibilitatis, quam non habet corpus Christi. Nisi enim oculus ex aliqua parte caelesti lumini similis esset, nequaquam illud videre posset, sicut nec auris, aut digitus, aut etiam oculus caecus, scilicet propter nimiam dissimilitudinem. Quia ergo ob nostram imbecillitatem, et corporis Christi nimiam claritatem magnificatam, et usque ad incorruptionem roboratam non possumus videre dulciter oculo ad oculum Dominici Corporis claritatem, saltem oculo mentali, idest pura cordis intentione ipsum debemus respicere, secundum illud Lucae 11: « Si oculus tuus simplex fuerit, » idest intentio cordis pura, « totum corpus tuum  
« lucidum erit » ad videndam claritatem Christi. 1 Joan. 5: « Scimus quoniam cum apparuerit, si-  
« miles illi erimus, et videbimus eum sicuti est. » Dignum quidem videtur per superiores oculorum fenestras veritatem intrare debere ad animam. Sed hoc nobis, o anima, servatur in posterum, cum videbimus eum facie ad faciem. Et haec visio erit vita aeterna.

## CAPUT IX.

*De forma donationis, qua datur sub specie panis.*

« Venite, comedite. » Thema proprium, eihavit cum pane etc. Glossa interlinearis. « idest corpore  
« Christi. » Secundo dat Dominus corpus suum sub specie panis propter tria. Propter collatam sibi praeter ceteris cibis habilitatem. Sub una (5) enim alia specie cibi tam respectu ministrantium quam accipientium posset actus exhiberi. Et hoc triplici consideratione. Primo scilicet quantum ad inventionem habilior est species panis quam cibi alterius, quia omni loco, omni tempore facilius invenitur quam alius cibus. Item quantum ad conservationem habilior est; quia si debet levari, portari, sive custodiri, commodius fit sub specie panis quam cibi alterius.

(1) *Al.* impassibilis.(2) *Al.* de informis.(5) *Forte* sub nulla.*S. Th. Opera omnia. V. 17.*

Psal. 109: « Juravit Dominus, et non poenitebit eum,  
« tu es Sacerdos in aeternum secundum ordinem  
« Melchisedech, » qui nec oves nec boves nec capras, sed panem et vinum obtulit. Item quantum ad administrationem habilior est, quia mundius et honestius tractari potest, in altari melius dividi, convenientius a sanis et infirmi sumi potest, quam alius cibus. Secundo dat sub specie panis propter faciendum signationis suae cognitionem et fidem. Augustinus: « Signum est res praeter speciem quam  
« ingerit sensibus, aliquid aliud ex se faciens in  
« agnitionem venire. » Signorum autem tria sunt genera: naturale, artificiale, sacramentale. Signum naturale secundum naturam significat, sicut fumus significat ignem, rubor caeli vespertinus significat futuram serenitatem. Matth. 16: « Facto vespere  
« dicitis, serenum erit, rubicundum est enim caelum. » Signum artificiale secundum impositionem hominis significat: et hoc est duplex: aliud enim non continet quod significat, ut circulus vini (1); aliud continet quod significat, ut pluviarium (2) continet pluvias et significat eas, pastillum significat carnes et continet. Signa sacramentalia secundum impositionem Dei significant, et sunt similiter duplicia: alia enim non continent quod significant, ut Sacramenta legalia, sicut serpens aeneus erectus in creano significabat quidem Salvatorem, sed non continebat eum, sicut circulus suspensus ante domum significat vinum, quod tamen non est contentum. Num. 21: « Fecit  
« Moyses serpentem aeneum, et posuit eum pro  
« signo, quem si percussi aspiciebant, sanabantur. » Sapient. 16: « Habentes signum salutis non per hoc  
« quod videbant sanabantur, » sed per te omnium Salvatorem. Similiter agnus Paschalis et circumcisio significabant rem figuratam, sed non continebant, quia secundum se non justificabant: a! Roman. 5: « Ex operibus legis non justificabitur omnis  
« caro coram Deo. » Item alia sunt signa sacramentalia, quae etiam secundum impositionem significant, ut Sacramenta evangelica, sicut baptismus et eucharistia. Hugo: « Sacramentum evangelicum  
« est materiale elementum foris sensibiliter propo-  
« situm ex similitudine repraesentans, et ex insti-  
« tutione significans, et ex sanctificatione continens  
« aliquam gratiam specialem. » Baptismus significa: animae purificationem, et continet eam, quia efficit quod figurat, scilicet remissionem peccatorum. Act. 2, Petrus ait: « Baptizetur unusquisque vestrum in  
« nomine Jesu Christi in remissionem peccatorum. » Similiter Sacramentum altaris significat vere corpus Christi, et vere continet illud, quia post consecrationem panis sub specie ejus, idest sub illo signo panis, quod Deus posuit ad significandum corpus Domini, totus est Christus, sicut sub signo positivo hominis, scilicet in pastillo, sunt occultatae carnes. Matth. 26: « Accipit Jesus panem, et benedixit, » et ait: « Hoc est corpus meum, » significatum sub specie panis: Joan. 5: « Filius hominis dabit vobis  
« panem, qui permanet in vitam aeternam. » Hunc panem significavit Deus. Igitur si cum video signum positivum hominis, credo ibi sub tenui pane esse carnes, multo magis cum video signum positivum Dei, ut Sacramentum altaris, credere debeo ibi sub specie panis esse verum corpus Christi propter rerum ibi significatarum similitudinem. Tres enim ibi res significantur, quarum species illa panis est

(1) *Forte* ut circulus vinum.(2) *Al.* pluviarum.

Sacramentum, idest sacrum signum, expressam habens in se illarum similitudinem. Prima res ibi significata est naturale corpus Domini, quod ibi continetur. Secunda res corpus ejus mysticum, quod ibi significatur, et non continetur. Tertia res est effectus Sacramenti in anima fidei. Primo species panis primae rei ibi significatae, idest veri corporis Christi, habet similitudinem non ratione sui, sed ratione subjecti quod habuit ante consecrationem, idest panis qui prius fuit: sicut enim ex pluribus et puris granis conficitur, sic corpus Christi ex pluribus membris puris et immaculatis consistit. Cant. 7: « Venter tuus sicut acervus tritici vallatus liliis. » Exod. 25: « Arcam de lignis Sethim compingite. » Glossa: « Area corpus Christi significat. » Haec fit de lignis Sethim imputribilibus, quia corpus Christi consistit ex membris purissimis, et ab omni vitio mundis. Secundo species panis secundae rei ibi significatae tenet similitudinem, idest mystici corporis Christi significati, scilicet Ecclesiae, quae est unitas fidelium. Sicut enim ex multis granis puris conficitur unus panis, sic ex multis fidelibus puris a culpa mortali mundis et vinculo caritatis unitis ecclesiastica unitas consistit; 1 ad Corinth. 9. Illic est sciendum quod in pane triplex unio attenditur, per quam triplex fraternitas, sive causa et vinculum amoris, quod inter fideles esse debet, significatur. Primo grana nobilia et similia colliguntur. Secundo farina conspargitur per aquam et pasta conficitur. Tertio ut panis solidus fiat, igne decoquitur. Primum grana similia significant fraternitatem et amorem naturalem, quia omnes de uno et primo parente sumus nati. Secundum, scilicet pasta, quae est farina aqua perfusa, sacramentalem, quia uno Sacramento baptismali sumus regenerati. Tertium, scilicet panis igne solidatus, spiritualem, quia uno spiritu, scilicet ad unam christianam religionem sumus congregati. De primo Gen. 22: « Descenderunt fratres Joseph ut emerent frumenta in Aegypto, » quia humiliaverunt se fideles, ut amorem naturalem omnium hominum acquirerent. Eccles. 15: « Omne animal diligit sibi simile, et omnis homo diligit proximum suum. » De secundo 1 ad Corinth. 5: « Sitis nova conspersio, sicut estis azymi, » idest unum quid per dilectionem Sacramentalem. 1 Joan. 4: « Hoc mandatum habemus a Deo, ut qui diligit Deum diligat et fratrem suum. » De tertio Exod. 12: « Coxerunt farinam conspersam, » et fecerunt panes, » idest profecerunt usque ad dilectionem spiritualem. Joan. 14: « Hoc est praeceptum etc. » Augustinus: « Non autem carnalis, » sed spiritualis etc. » Tertio species panis secundum quod erat panis, habet in se similitudinem tertiae rei ibi signatae, idest effectus Sacramenti in anima fidei. Sicut enim panis tria facit, scilicet confortat, satiat, vitam conservat; sic panis Sacramenti animam fidelem confortat ad peccatum dimittendum, satiat ad fastidium mundi faciendum, in vita conservat ad Deum semper laudandum. De primo Psalm. 105: « Panis cor hominis confirmet, » ad omne vitium devincendum: unde Psal. 17: « Diligam te Domine etc., » qui, scilicet praecinxisti me virtute ad bellum. De secundo Psal. 104: « Pane caeli saturavit eos. » Ad mundi fastidium faciendum. Prov. 27: « Anima saturata calcabit favum. » De tertio Eccles. 55: « Panis egentium, » vita pauperum est. » Ad Deum laudandum, scilicet semper. Psalm. 145: « Lauda anima mea Do-

« minum etc. » 2 Paral. in fine: « Laudabo te Domine, semper omnibus diebus vitae meae, » quoniam te laudat omnis virtus caelorum. »

## CAPUT X.

*De forma donationis, qua datur sub specie panis triticei.*

« Venite comedite. » Thema proprium. « Convertentur, et vivent tritico, » Osee 14. Vel aliud simile de frumento, vel tritico. Tertio circa formam donationis corporis considerandum est, quod Dominus dat illud sub specie panis triticei, et non alterius: et hoc propter tria. Primo propter hujus grani prae ceteris naturalem nobilitatem. Quod probatur a tribus: quia hoc granum est purissimum, quia ad panem communissimum, quia ad carnem maxime nutritivum. Primo granum tritici est maxime purum, quia haec species sola inter alias attingit complementum, idest summam puritatem: nam, ut dicunt Alchimici, idest aurifices, in speciebus quibusdam licet multae species esse videantur, tamen una est quae attingit complementum: et aliae sunt differentes ab ea quibusdam aegritudinibus, sicut patet de auro. Nam omne metallum purgatione materiae in aurum dicunt transmutari: sic etiam videmus de granis, quod bonitate terrae purgatur siligo, et in triticeum nobilitatur. Et ideo simpliciter et absolute panis triticeus est panis propter excellentiae puritatem, sive nobilitatem. Secundo granum tritici est ad panem communissimum, quia competit sanis et infirmis, immo omni animali panem comedenti: avibus, ut patet in columbis: bestiis, ut catulis magis competit panis triticeus, quia libentius eo vescuntur, et ideo panis triticeus vere est panis propter communis convenientiae nobilitatem. Tertio granum tritici est ad carnem maxime nutritivum, quia puritate naturali et competitibilitate communi, et viscositate sui maxime membris adhaeret nutrimentum exinde sumptum, et quoad haec tria maxime nutrit et confortat: et sic panis triticeus est purus, et granum ejus praecipuae nobilitatis propter communis convenientiae nobilitatem. Et hac ratione congruum est, ut nobilissimum corpus quasi nobilissimum panis filiorum Dei detur filiis sub specie nobilissimi panis. Secundo dat corpus suum sub specie panis triticei propter fidelium discretam in eo significationem. Sicut enim triticeum secundum triplicem statum habet considerari, sic fidelium universitas in tres status solet distingui. Triticeum (1) autem consideratur, secundum quod stat in agris, vel secundum quod grana separantur a paleis, vel secundum quod jam purgata locantur in granariis. Similiter inter fideles tres differentiae sunt; incipientium, proficientium, perfectorum. Primi significantur per triticeum stans in agris: secundi per grana quae purgantur a paleis; tertii per grana purgata quae locantur in granariis. Primi desiderant doctrinam praedicatorum: secundi frequentem purgationem: tertii aeternam requiem beatorum. De primo Job 57: « Frumentum desiderat nubes, et nubes spargunt lumen suum, » quae lustrant euncta per circuitum. Gregorius: « Electi sunt frumentum Dei caelestibus horreis recondendi: frumentum nubes desiderat, » quia electus quisque praesentiam sanctorum Praedicatorum exoptat: lumen spargunt, quia Prae-

(1) *At* tertium.

« dicatores sancti exempla vitae et bene agendo, et loquendo dilatant. Nubes autem cunctas per circuitum lustrant, quia praedicationis luce mundi fines illuminant. » De secundo Jud. 6: « Cum Gedeon exceciteret et purgaret frumenta in torculari, ut fugerent Madian, apparuit ei Angelus Domini. » Gedeon electum quemque significat, qui cum umbra sanctae crucis rectitudine iudicii, confessionis virga, quasi cor suum a vitiorum paleis sequestrat: consolatio eum divina contra tentationes daemonum confortat. Ecl. 2: « Qui timent Dominum, praeparabunt corda sua, et in conspectu illius sanctificabunt animas suas. » De tertio Job 5: « Inreparationem Domini ne reprobos, et ingredieris in abundantia sepulcrum, » idest locum in regno Dei praeparatum, sicut infertur acervus tritici in tempore suo, idest cetera multitudo beatorum. Luc. 5: « Veniet fortior me post me, cuius ventilabrum in manu sua: et congregabit triticum in horreum suum; paleas autem comburet igni inextinguibili. » Tertio dat corpus suum sub specie panis triticeo, propter corporis sui expressam similitudinem. Triticum enim potest considerari tribus aliis modis; scilicet ut jacens in acervo, ut cadens in agro, ut in panis complementum. Penes primum modum, significat corpus Christi in Virgine conceptum: penes secundum, ut in mundo pro nobis passum: penes tertium, ut in caelo glorificatum. In primo mater Christi multum honorificatur, in secundo peccator liberatur, in tertio beatus delectatur. De primo Cant. 7: « Venter tuus sicut acervus tritici. » Venter est corpus Beatae Virginis. Luc. 11: « Beatus venter qui te portavit: » acervus triticeo, munda membra Christi, ut conservata in utero virginali: lilia, decor omnimodae castitatis, quo ornantur membra et sensus Beatae Virginis. De secundo, Joan. 12: « Nisi granum frumenti etc. » usque « multum fructum affert. » Christus enim per mortem suam genus humanum de aeterna morte liberavit. Ad Rom. 5: « Commendat suam caritatem Deus in nobis, quoniam cum adhuc peccatores essemus, Christus pro nobis mortuus est. » Ex hoc quod Dominus dicit se granum frumenti, habet Ecclesia quod sub nulla specie alia consecrat corpus Christi. De tertio Zach. 9: « Quid bonum ejus, et quid pulchrum, nisi frumentum electorum? » quia panis pulcherrimus, dulcissimus et nobilissimus est corpus Christi in gloria beatorum. Hinc sciendum, quod beati habebunt in eo triplex donum: omnium deliciarum praeparationem, omnium desideriorum impletionem, omnium bonorum securam et aeternam fruitionem. De primo Gen. 49: « Aser pinguis panis praebebit delicias regibus. » Psal. 67: « Parasti in dulcedine tua pauperi Deus: » Sap. 15: « Paratum panem de caelo praestitisti eis sine labore, omne delectamentum in se habentem, et omnis saporis suavitatem: » 1 Corinth. 2: « Oculus non vidit, nec auris audivit etc. » De secundo Psalm. 147 et 105: « Lauda Jerusalem Dominum etc. » et Adipe « frumenti satiat te. » Item « Benedic anima mea Dominum. » Jerem. 51: « Inebriabo animam Sacerdotis pinguedine, et populus meus bonis meis adimplebitur. » Sap. 16: « Sapientiam tuam et dulcedinem quam in filios habes, ostendebas: et deserviens uniuscuiusque voluntati, ad quod quisque volebat, convertebatur. » De tertio Luc. 14: « Beatus qui

« manducat panem in regno Dei, » scilicet propter omnium bonorum securam sine fine fruitionem. Isa. 62: « Juravit Dominus in dextera sua. Si dero triticum tuum ultra cibum inimicis tuis, et si biberint filii alieni vinum in quo laborasti. Qui congregant illud comedent; et qui comportant illud, bibent in atriiis sanctis meis. » Illic comedunt mali cum bonis; ibi erunt mali sub aeterno interdicto, et boni securo et aeterno Christi Convivio. Psal. 13: « Adimplebis me lactitia. »

## CAPUT XI.

*De tribus mirabilibus quae sunt in consecratione.*

« Venite comedite etc. » Thema proprium. « Mirabilia opera tua, et anima mea cognoscat nimis. » Vel aliquid simile de mirabilibus operibus Dei vel signis. Tertium principaliter notandum circa Dominicum Corporis Sacramentum, sunt mirabilia divinae operationis, tamquam signa sive mirabilia divinae virtutis. Haec mirabilia signa divinae operationis consideranda sunt in tribus: in Dominicum Corporis consecratione; secundo in ejusdem possessione; tertio in perceptione. Primo enim corpus consecramus, secundo possidemus, tertio percipimus. Primo in consecratione consideranda sunt et credenda tria mirabilia signa divinae operationis. Primum, quod ibi sub specie panis est verum corpus Christi. Secundum, quod tota substantia panis mutatur in corpus Christi. Tertium, quod mutatur in corpus Christi tota substantia panis, ita tamen quod manent accidentia panis. Primum est mirabile, secundum mirabilius, tertium mirabilissimum. De duobus primis hic potest dici; de tertio in sequenti. Primum mirabile signum in consecratione Sacramenti altaris est, quod ibi sub specie panis est verum corpus Christi, quod de Virgine sumpsit: et hoc probatur tribus modis. Primo probatur testimonio fide dignorum; secundo testimonio signorum positivorum; tertio demonstratione miraculorum. Primo probatur primum mirabile testimonio fide dignorum, secundum quod lex dicit Deuter. 19: « In ore duorum aut trium etc. » Audiuntur ergo testes veraces et idonei sufficientes. Augustinus: « Accedit verbum ad elementum, et fit Sacramentum: » hoc est, Dei verbum institutum a Christo, profertur super panem, et mox fit sacrum secretum, scilicet corpus Salvatoris sub specie panis. Item Augustinus: « Hoc est quod omnibus modis probare contendimus, Sacramentum Ecclesiae duobus constare: visibili elementorum specie, et invisibili carne Christi et sanguine, sicut persona Christi constat ex Deo et homine. » Ambrosius: « Panem istum quem sumimus in mysterio, utique intelligo, qui manu sancti Spiritus formatus est in utero Virginis, et igne passionis decoctus in ara crucis: panis enim Angelorum factus est cibus hominum. » Gregorius: « Magnum atque pavendum est mysterium; quia aliud videtur, aliud intelligitur. Figura panis et vini videtur, et faciente Domino corpus et sanguis Christi intelligitur. » Eusebius: « Vere unica et perfecta Ecclesiae hostia, fide aestimanda non specie, neque exteriori censenda visu, sed interiori intellectu; unde caelestis confirmat auctoritas: Accipite, et comedite etc. Recedat ergo omne infidelitatis dubium; quia qui auctor muneris,



« ipse est testis veritatis. » Secundo probatur idem ratione signorum positivorum. Ratio autem eorum est rem ita esse ut signum. Est autem signum duplex, scilicet hominis, et Dei: hominis artificiale, Dei sacramentale. Signum positivum hominis secundum impositionem hominis significat, et est duplex: nam aliud non continet quod significat, ut circulus vini (1): aliud continet quod significat, ut pastillum, quod significat carnes et continet carnes intus absconditas. Similiter signum positivum Dei, quod est in Sacramentis secundum impositionem Dei, significat, et est etiam duplex: nam aliud non continet quod significat, ut Sacramenta legalia, quae non efficiunt quod figurant, sicut agnus Paschalis, et similia; et aliud continet quod significat, ut Sacramenta evangelica, sicut Eucharistia: significat enim secundum impositionem Dei rem sacram, scilicet corpus Christi, et continet illud: unde ait: « Hoc est corpus meum. » Signum mansit foris, scilicet species panis, et intus erat corpus Salvatoris. Ecl. 5: « Innova signa, et immuta mirabilia; » quasi diceret: Quia vetera signa non continebant gratiam quam figurabant, fac nova, quae continent quod figurant. Augustinus: « Ideo dicuntur Sacramenta quasi sacrae rei signa, quia in eis aliud videtur, aliud intelligitur. Quod videtur, speciem habet corporalem; quod intelligitur, fructum habet spirituales. In specie enim panis et vini quam videmus, res invisibiles carnem Christi et sanguinem honoramus. » De hoc supra, sermone 9, circa medium. Tertio probatur idem demonstratione miraculorum. Exod. 54: « Signa faciam, quae nunquam sunt visa super terram, nec in ullis gentibus etc. » Paschasius: « Nemo qui sanctorum vitas et exempla legerit, ignorat quod saepe corporis Christi et sanguinis Sacramenta aut propter dubios, aut certe propter ardentius amantes visibili specie in agni vel pueri forma, aut in carnis et sanguinis colore monstrata sint; ut quod latebat mysterio, patereceret in miraculo ». Beato enim Basilio in die Paschae mysteria celebranti Hebraeus quidam se sicut Christianus populo commisit, officii volens explorare mysterium; qui vidit infantem partiri in manibus Basilii, et communicantibus omnibus, venit ipse, et data ei hostia vere caro est facta: et servans reliquias abiit in domum suam ostendens uxori suae, narrans quae propriis oculis viderat. Credens ergo ait, Vere horribile et admirabile est Christianorum Sacramentum. In crastino venit ad Basilium, et baptizatus est cum omni domo sua. Idem. Quidam Presbyter erat Aegidius nomine, religiosus valde, qui cum sanctam duceret vitam, coepit piis precibus pulsare Deum, ut sibi monstraret naturam corporis et sanguinis Domini. Venit ergo dies ut idem more solito divina celebraret, et post Agnus Dei procumbens genibus, Creator, inquit, et redemptor omnipotens Deus, pande mihi exiguo in hoc mysterio naturam corporis Christi, ut mihi liceat eam prospicere in forma pueri, quem olim sinus matris tulit vagientem. Et ecce Angelus de caelo veniens affatur: Surge prope, si vis Christum videre. Adest praesens corporeo vestitus amictu, quem sacra puerpera gessit. At Presbyter pavidus surgens vidit super aram puerum sedentem. Cui Angelus: Quia Christum videre placuit, quem sub specie panis verbis sacra-

(1) Forte vinum.

mysticis, nunc oculis inspicere, et tracta manibus. Tunc caelesti lumine Sacerdos fretus, quod mirum dictu est, in ulnis trementibus puerum accepit, et pectus proprium pectori Christi adjunxit, deinde perfusus in amplexus dat dulcia Deo oscula, et suis labiis pressit pia labia Christi. Quibus ita peractis restituit puerum in altari, et rursus humi prostratus deprecatur Dominum, ut dignetur ipse verti in speciem pristinam. Et surgens invenit corpus Christi remeasse in formam priorem, et sic sub specie debita communicandi eidem. Secundum miraculum in consecratione Sacramenti altaris est, quod substantia panis mutatur in corpus Christi, quod sumpsit de Virgine; et hoc fit potestate Verbi Dei: quod probatur tribus modis fieri posse: a potestate simili, a minori, a majori. Primo a potestate simili, quia Verbum Dei substantiam unam in aliam commutavit. Hinc legitur Joan. 2, quod Dominus ad nuptias aquam in vinum commutavit: sicut ergo potuit ibi, potest et hic. In similibus enim simile est iudicium: ubi similis praecipit virtus, similis obedit effectus. Secundo probatur a minori, eo quod res quae minus possunt quam verbum Dei, unam substantiam mutant in alteram. Unde sciendum quod providentia Dei mutationes rerum tribus modis fieri voluit, praeter quas verbo Dei facit; arte, natura, gratia. Ars enim hominis unam substantiam mutat in aliam, ut patet in vitrificatione, qui vilem cinerem mutat in praecelsum et nobile vitrum. Ergo multo magis virtus Verbi Dei potest panem in corpus ejus et vinum in sanguinem commutare. Eccles. 8: « Sermo Dei potestate plenus est, nec dicere ei quisquam potest, quare ita facis? » Eusebius: « Invisibilis Sacerdos visibiles creaturas in substantiam corporis et sanguinis sui verbo suo secreta potestate facit et commutat. » Item natura unam substantiam mutat in aliam, sicut in vite aqua mutatur in vinum; et opera apum succus florum per secreta naturae mutatur in favum: similiter in nobis ipsis panis quem manducamus quotidie, per naturam mutatur in carnem. Ergo multo magis virtus Verbi Dei mutare potest panem in substantiam corporis sui. Item gratia hominis mutat unam substantiam in alteram. Hinc Moyses per gratiam specialem mutavit virgam in serpente, et aquam in sanguinem. Ergo multo magis virtus Verbi Dei potest mutare panem in corpus suum, et vinum in sanguinem. Ambrosius: « Virgam tenuit Moyses, et projecit in terram, et facta est serpens, et sic vides Prophetica gratia mutatam esse naturam, et majoris esse potentiae gratiam, quam naturam. Quod si tantum valuit benedictio humana ut naturam converteret, quid dicemus de ipsa consecratione divina, ubi ipsa verba Salvatoris operantur? » Si ergo quaeris, quomodo potest quod panis est, fieri corpus Christi? Respondeo, consecratione, quae fit Christi sermone. Tertio probatur idem a majori, quia Verbum Dei multo facit majora et facere potest, quam quod panem in corpus Christi mutet. Unde « in principio erat Verbum, » usque « omnia per ipsum facta sunt. » Ambrosius: « De totius mundi operibus legitur, quod ipse dixit, et facta sunt etc, Sermo ergo qui potest facere ex nihilo quod non erat, non potest ea quae sunt mutare in id quod non erat? Non enim minus est dare rebus novas quam mutare naturas; et sic quod erat panis ante consecrationem, jam Corpus Christi factum est post consecrationem,



« quia sermo mutat creaturam. Cum itaque irrationalis creatura et inanimata, scilicet panis, mutatur in melius, scilicet in corpus Christi virtute Verbi Dei, mirum quod peccator homo nec multis verbis, nec beneficiis, nec comminatione nec promissione converti potest de mala vita in bonam? »

## CAPUT XII.

*De tertio mirabili quod fit in consecratione.*

« Venite, comedite etc. » Thema proprium: « Mirabilia opera tua etc. » Tertium mirabile, imo mirabilissimum signum in consecratione Sacramenti altaris est, quod mutatur in corpus Christi tota substantia panis: sic tamen quod manent panis accidentia, idest color, sapor et huiusmodi, Christi corpus circumstantia et nostris sensibus objecta. Quod enim in consecratione mutatur panis in corpus Christi, jam probatum est; et quod manent humanis sensibus accidentia, patet. Talis mutatio est supernaturalis, et dicitur proprie conversio, sive transubstantiatio, quia similis ei per omnia non invenitur in natura. Quod tamen ita fieri possit in hoc Sacramento, triplici potest ostendi similitudine. Prima similitudo quod substantia panis possit mutari, ita quod accidentia manent, sumitur de gratia prophetali. Hinc est quod 4 Reg. 2, Eliseus misit sal in aquas amaras, et conversae sunt in dulces. In qua conversione quatuor consideranda sunt; scilicet continens et contentum, operans et operatum. Continens est illa species, sive claritas exterior; contentum amaritudo interior, quae transit atque mutatur in quartum, scilicet operatum, idest in dulcedinem, et hoc per tertium, scilicet operans, idest per gratiam prophetalem. Sic est quodammodo in mutatione panis in corpus Christi. Primum, scilicet continens, idest species panis exterior manet. Secundum, scilicet contentum, idest substantia panis mutatur in quartum, scilicet in corpus Christi, et hoc per tertium, scilicet operans, idest per Verbum Dei. Secunda similitudo ejusdem sumitur a conversione spirituali, de qua 1 Reg. 10, dicit Samuel ad Saul, qui significat peccatorem: « Insiliet in te spiritus Domini, et mutaberis in virum alium: » in qua conversione sive mutatione quatuor jam supradicta consideranda sunt: scilicet continens et contentum, operans et operatum. In statu enim peccati noster homo exterior pulcher et sanus; sed homo interior amaritudine peccati et veneno plenus est et aegrotus. Hic dum per spiritum Dei convertitur, specie corporis manente, exterior amaritudo et languor peccati interior in dulcedinem et sanitatem gratiae commutatur. Primum, scilicet species corporis exterior manet: secundum, scilicet amaritudo peccati interior transit in quartum, scilicet dulcedinem gratiae, et hoc per tertium, scilicet per spiritum Dei; et sic fit, ut dictum est, in consecratione corporis Christi Eugenius ad quemdam conversum: « Quanta et quam celebranda beneficia vis divinae bonitatis operatur! et quod non tibi novum et impossibile esse debeat, quod in Christi substantiam terrena convertuntur, te ipsum interroga, qui praeterita vilitate deposita subito novam indutus es bonitatem. In exteriori nihil additum, totum est in interiori mutatum. » Tertia similitudo ejusdem sumitur de mutatione naturali. Videmus enim quod ova ponuntur sub ave, ut sub

gallina vel sub columba, et per naturam mutantur in carnem, imo in aviculam vivam. In hac mutatione similiter illa quatuor, quae jam dicta sunt, possunt inveniri. Ibi enim est continens, scilicet testa, quasi species ovi exterior; et contentum, scilicet vitellum, quasi substantia ovi interior; et operans, scilicet natura; et operatum, scilicet caro pulli. Primum, scilicet testa, species exterior manet, secundum vitellum, sive substantia interior transit et mutatur in quartum; scilicet in corpus pulli vivi, et hoc per tertium operantem naturam. Et mira similitudo: quia diebus aliquibus integra exterius videtur, quasi adhuc sit ovum, quod non est ovum, sed vivi pulli integrum corpus testa velatum. Sicut ergo in hac re columba per naturam, sic in Sacramento altaris spiritus, scilicet per suam omnipotentem virtutem. Si ergo sub ave ponis unum vel duo vel plura ova, vertit ea per naturam interius in carne, testa manente exterius; quanto magis unam hostiam panis, vel plures in altari, manente specie panis exterius, Spiritus Sanctus eas repente interius in corpus Christi sua virtute convertit? Nota versus de corpore Christi, de hoc quod dicit de substantia panis: non quod sit materia corporis Christi, sed quod panis convertitur in corpus Christi. Corpus de pane, corpus de Virgine natum. Primum conversum, sed materiale secundum Illic moraliter notandum est, cum irrationalis creatura, scilicet panis, per Verbum Dei et spiritus ejus in melius convertitur; quanta sit peccatoris duritia, qui multis verbis et Spiritus Sancti operationibus ad conversionem non perducitur! Jerem. 5: « Induraverunt facies suas supra petram, et noluerunt reverti. » Haec induratio finalis impenitentia est: ejus triplex est causa. Prima longa consuetudo peccandi; secunda incredulitas de justitia Dei; tertia seductio inimici. De primo Sap. 14: « Invalescente iniqua consuetudine error tanquam lex custoditus est: » Jerem. 15: « Si potest Aethiops mutare pellem suam, aut pardas varietates suas, et vos potestis bene agere cum didicistis malum. » Glossa: « Consuetudo peccandi quodammodo in naturam transit. » Sed quod hominibus impossibile est, Deo possibile est, ut non Aethiops vel pardus, longaevis scilicet peccatores, suam naturam per se mutare videantur, sed Deus qui in illis operatur. Augustinus: « Vocabas me Domine, et suspirabam ligatus non ferro alieno, sed mea propria voluntate. Velle enim meum tenebat inveniens; et inde catenam fecerat et constrinxerat me. Quippe ex voluntate perversa facta est libido; et dum servitur libidini, facta est consuetudo; et dum consuetudini non resistitur, facta est necessitas. » De secundo Soph. 1: « Visitabo super viros defixos in facibus suis, qui dicunt in cordibus suis, non faciet bene Dominus, et non faciet male. » Glossa: « Tollunt Dominum providentiam, putantes quod nec bonis bona, nec malis mala possit reddere, sed omnia casu regantur. » Psalm. 15: « Dixit insipiens in corde suo, non est Deus, justus iudex qui dicat peccata: » unde sequitur: « Corrupti sunt, et abominabiles facti sunt in iniquitatibus suis. » De tertio Osee 3: « Non dabunt cogitationes suas ut revertantur ad Dominum, quia spiritus fornicationis in medio eorum, et Dominum non cognoverunt. » Quasi diceret: quia spiritus malignus obsedit eos, et exerceat ut Dominum non a-

gnoscant, et promissionibus falsis seducit, ideo converti non possunt. Ezechieles. 29: « Repromissio « nequissima plurimos perdit. » Genes. 54: « Egressa Dina, ut videret mulieres regionis illius. « Et vidit eam Sichem princeps terrae, » idest diabolus, adamavit, rapuit, dormivit eum ea, et conglutinata est anima ejus cum ea, tristemque blanditiis delinivit, quia mundi prospera, peccata levia, longam vitam false promittit. 5 Reg. 22, dicit Michaeas: « Egressus spiritus ait, ego decipiam Achab. « Egrediar, et ero spiritus mendax in ore omnium « Prophetarum ejus, qui dicebant regi, ascende in « Ramoth Galaad, et vade prospere, et tradet Dominus ininicos tuos in manus tuas: et in hoc « est deceptus. Ingressus enim praelium, quidam « percussit eum casu sagitta inter pulmonem et « stomachum, et graviter vulneratus mortuus est « vesperi. »

### CAPUT XIII.

#### *De tribus mirabilibus, quae considerantur in corporis possessione.*

« Venite, comedite. Mirabilia opera tua etc. » Hic dicendum est de tribus mirabilibus quae fiunt virtute et perfectione consecrationis, et attenduntur in eisdem possessione, et post consecrationem adhuc nobiscum habemus. Primum mirabile signum, quod in possessione Domini corporis magna res, scilicet corpus Domini, continetur sub tam parva specie panis: cujus assignatur triplex ratio. Prima ratio est demonstratio magnitudinis sapientiae artificis tantae rei, scilicet Spiritus Sancti. Videmus enim quod artifices quanto sunt in arte sculpendi peritiores, tanto sculpunt imagines subtiliores. Unde si artificibus ostenditur gemmae vel metalli materia valde parva, et rogetur in ea imago fieri subtilissima, minus subtilis artifex respondebit quod eam facere non possit, quod maxime subtilis in arte facile facit. Sic ad demonstrandam sapientiam Spiritus Sancti, sub minima specie Sacramenti facile esse facit totum corpus Christi. Hinc Sapient. 6: Spiritus Sanctus dicitur esse subtilis: non enim potest ei tam subtilem partem panis proponere in altari quin sciat et possit eam in verum corpus Christi convertere. Damascenus: « Quomodo fiet « hoc, ait Virgo, quoniam virum non cognosco? « Respondit: Spiritus Sanctus superveniet in te etc. « et tu quaeris quomodo panis fiat corpus Christi? « Et ego dico tibi, Spiritus Sanctus superveniet, « et ipse faciet haec quae super naturam sunt, « et super intelligentiam. » Secunda ratio ad idem est similitudo potentiae Christi cum potentia Dei. Quidquid enim potest Dei Filius per naturam, hoc potest filius hominis propter personae unitatem. Matth. ult.: « Data est mihi omnis potestas etc. » Ambrosius super illud, « Hic erit magnus, et Filius Altissimi vocabitur. » « Non ideo erit magnus, quod ante « partum Virginis magnus non fuerit; sed quia potentiam quam Dei filius ante tempora naturaliter habuit, hic erit ex tempore accepturus: quia sicut in « unam personam, ita in unam potentiam conveniunt Dei Filius et hominis; sed Dei Filius Verbum Patris illam habuit potentiam, quod minima parte corporis opere Spiritus Sancti de virtute separata se vestivit, et illi se inclusit, secundum illud, Verbum caro factum est. Ergo « similem potestatem dedit homini Christo, scilicet « ut possit facere corpus suum esse sub minima

« panis specie. » Psalm. 98: « Dominus in Sion « magnus. » Sion interpretatur speculum, ut dicit Papias et Augustinus: « Et dubium non est, « quod magna imago tam expresse, tam integre « apparet in parvo speculo sicut in magno. » Magnus ergo Dominus in Sion, idest in speculo esse dicitur, quia verum corpus Christi tam integraliter esse sub parva specie panis, sicut sub magna, recte creditur. Tertia ratio ad idem, est sufficiens causa ad finem Sacramenti. Finis Sacramenti est animam fidelem spiritualiter cibare, et contra malum et ad bonum confortare. Causa hujus efficiens est corpus Christi; et id potest tam plene esse sub specie panis parva, sicut sub magna; quia sub utraque aequaliter unitum est Deo, ex qua fluit omnis virtus in Sacramento. Quanta-cumque enim parva sit species illa panis, ibi est totum corpus Christi per conversionem, sanguis per connexionem, anima per conjunctionem, et divinitas integra per unionem: unde certum est quod habet plenam rationem cibandi spiritualiter, et confortandi animam. Exod. 16: « Qui minus « collegerat, non reperit minus de manna quam « qui plus collegerat. » Hilarius: « Ubi pars corporis, idest, minima pars Sacramenti, ibi est et « totum corpus. Eadem enim ratio est in corpore « Domini, quae in manna, quod in ejus figura « praecessit; de quo dicitur: Qui plus collegit, non « habet amplius: neque qui minus paraverat, habuit minus: non enim aestimanda est quantitas « in hoc visibilis, sed virtus spiritualis. Unde qui « multum vel magnum panem consecrat, non « habet amplius quam verum corpus Christi ad « salutem suam. » Secundum signum mirabile est, quod unum et idem corpus est in pluribus locis, in pluribus portionibus: et hoc probatur tribus modis. Primo per Prophetam Malachiam, 1 ad Judaeos: « Non est mihi voluntas in vobis, ait « Dominus, et manus non suscipiam de manu « vestra. Ab ortu enim solis usque ad occasum « magnum nomen meum in gentibus, et in omni « loco sanctificatur et offertur nomini meo oblatio « munda. » Ecce loca plurima exprimit, et unam oblationem mundanam fidelium dicit. Exod. 20: « In omni loco in quo fuerit memoria nominis « mei, veniam ad te, et benedicam tibi. » Memoriam nominis Domini sacrificium est altaris, scilicet corpus Christi: quod fieri jussit in commemorationem ejus, hoc fit in multis locis, et in hoc venit unus Dominus ad benedicendum nobis. Secundo probatur hoc per manifestam rationem, quae est quod filius hominis participat potentiam filii Dei propter personae unitatem. Ambrosius: « Sicut in unam personam, ita in unam potentiam « conveniunt Dei et hominis filius. Unde sicut « Dei filius est essentialiter in omnibus rebus; ita « dedit filio hominis ut corpus ejus sacramentaliter esse possit in pluribus locis. » Augustinus: « Intelligendum est corpus Christi esse in « uno loco, idest in caelo, ubi ascendit ad dexteram Patris, idest visibiliter in forma humana. « Veritas tamen ejus, idest divinitas, ubique est. « Veritas etiam ejus, idest verum corpus, in omni « altari sacramentaliter est ubi celebratur. » Innocentius III: « Disposuit caelestis altitudo consilii, sicut tres personae sunt in unitate essentiae, « scilicet Pater et Filius et Spiritus sanctus, ita « tres essent substantiae in unitate personae; sci-

« licet divinitas Christi, corpus et anima. Cum  
 « ergo Christus secundum naturam divinam tribus  
 « modis existeret in rebus, scilicet in omnibus  
 « per essentiam, in solis justis per gratiam, in  
 « homine assumpto per unionem, voluit ut idem  
 « ipse secundum humanam naturam etiam tribus  
 « modis existeret. In caelo localiter, in verbo per-  
 « sonaliter, in altari Sacramentaliter. Unde sicut  
 « secundum divinitatem essentialiter est in omni-  
 « bus rebus, ita secundum humanitatem Sacra-  
 « mentaliter totus est in pluribus locis. » Tertio  
 probatur idem per visibilem similitudinem, quae  
 eunctis in speculo declaratur. Nam si faciei tuae  
 plura proponas specula, in omnibus aequaliter et  
 integraliter una apparebit facies: et si unum spe-  
 culum in plura frusta etiam parva confringas,  
 perfecta tua facies in singulis erit. Et licet specu-  
 lum infringatur in plura, facies tua tamen manet  
 in omnibus una, nec mutatur: sic est revera in  
 Sacramento Christi, qui speculum dicitur et imago  
 bonitatis illius. Si ergo speculum, idest forma panis  
 in partes plures dividatur, in singulis erit unita  
 Deo, idest verum corpus Christi. Hieronymus:  
 « Singuli fidelium accipiunt Christum totum, et  
 « in singulis portionibus totus est, nec per sin-  
 « gulos minuitur, sed integrum se praebet in sin-  
 « gulis. » Tertium mirabile est, quod corpus Do-  
 mini licet sit in pluribus locis vel hostiis, aut  
 portionibus, tamen per partes non est divisum,  
 sed manet in se integrum et conjunctum. 1 Corinth.  
 1: « Divisus est Christus? » quasi diceret, non est  
 divisus: quia licet sit in caelo localiter, in corde just  
 spiritualiter, in multis locis Sacramentaliter, tamen  
 manet in se conjunctus: et est hujus mirabilis rei  
 ratio ineffabilis unio hominis et Dei, carnis et Verbi.  
 Unde sicut Verbum Dei ubique est, et totum replet  
 caelum et mundum manens indivisum, sic dedit cor-  
 pori quod assumpsit de Virgine, et dedit Apostolis:  
 divinitas enim quae ubique est, replet illud, et  
 conjungit, et facit ut sicut ipsa una est, ita veritas  
 corporis Christi unum corpus sit in veritate. Au-  
 gustinus: « Quando manducamus Christum, partes  
 « de illo non facimus, sed in Sacramento fit hoc  
 « unusquisque quod accipit. Accipit unusquisque  
 « partem suam in Sacramento, et manet totus in-  
 « teger in seipso. Manet integer totus in caelo,  
 « manet integer totus in corde tuo. Totus enim  
 « erat apud Patrem quando venit in Virginem,  
 « implevit illam, non recessit ab illo. Venit in  
 « carnem, ut cum homines manducarent; et ma-  
 « nebat integer apud Patrem, ut Angelos pasceret.  
 « Rogandus est ergo Dominus, licet simus cor-  
 « poraliter ab invicem divisi, ut simus semper  
 « spiritualiter in caritate conjuncti, et digne nos  
 « pascat in praesenti suo Sacramento, et plena  
 « cum angelis sui visione in futuro. Amen. »

#### CAPUT XIV.

##### *De tribus mirabilibus in Corporis Christi perceptione.*

« Venite, comedite etc. Mirabilia opera tua etc. »  
 Hic est dicendum de tribus ultimis considerandis  
 in corporis Christi perceptione. Primum mirabile  
 est, quod corpus Domini dum manducatur, non  
 minuitur: et hoc est contra haereticos qui dicunt,  
 si corpus Domini omni monte majus esset, jam diu

clerici illud consumpsissent. Hujus tam mirae rei,  
 scilicet inconsumptibilitatis corporis Christi in man-  
 ducatione triplex est ratio. Prima ratio est quotidiana  
 potestas consecrandi: nam quia omnibus diebus et  
 omnibus fidelium locis, et sub tot hostiis quot suffi-  
 ciunt fidelibus, verum et unicum corpus Christi ex  
 praecepto ejus consecrare possumus, ideirco dum illud  
 manducamus, consumere vel minuere non valemus.  
 Sicut enim in nobis causa salutis aeternae semper  
 manet affectus illud manducandi, sic et potestas  
 et effectus consecrandi: et cum jam consecratum  
 manducamus, nequaquam illud minuimus: quia  
 quod semper in se veraciter integrum perseverat,  
 ne Sacramentaliter in Ecclesia possit deficere, sem-  
 per consecrando in forma panis, quasi Sacramentum  
 nutriendo et renovando conservamus: quod pulchre  
 figuratum est in panibus propositionis, Exod. 23:  
 « Pone super mensam meam panes propositionis  
 « in conspectu meo semper. » Et quomodo dici-  
 tur Levitic. 24, « Accipies panes duodecim, et  
 « statues eos super mensam meam, ut sint panes  
 « in monumentum oblationis Domini, per singula  
 « sabbata mutabuntur foedere sempiterno. » Si-  
 militer de igne dicitur Levitic. 6: « Ignis in altari  
 « meo semper ardebit, quem nutriet sacerdos su-  
 « bjiciens ligna mane per singulos dies. » Ignis  
 iste nunquam deficit in altari; sed mensa illa Ju-  
 daeorum cum panibus et ignis cum altari deficit.  
 Quid ergo? mentitus est Deus? Absit: sed umbra  
 deficit in synagoga; veritas manet, nec deficit in  
 Ecclesia. Sacerdos enim noster semper Sacramen-  
 tum altaris consecrando nutrit, et corpus Christi,  
 quod in illo semper idem est, nunquam mandu-  
 catione fidelium deficit. Secunda ratio est incor-  
 ruptibilitas vera corporis hujus, quod surrexit  
 glorificatum, immortale, immutabile et impassibile,  
 nec potest corrumpi. Psal. 15: « Non dabis san-  
 « ctum tuum videre corruptionem. » Unde cum  
 illud manducamus, non sicut alius cibus corrup-  
 pitur, nec mutatur in corpus nostrum, sed influit  
 nobis sine corruptione sui spirituale nutrimentum.  
 Hoc figuratur 5 Reg. 17, ubi pugillus farinae non  
 deficit in domo viduae per multos dies cibans fa-  
 miliam totam, juxta verbum Eliae. Augustinus:  
 « Qui manducat me, dicit Dominus, vivet propter  
 « me. Quando enim manducatur hic panis, vita  
 « manducatur, nec occiditur quando manducatur:  
 « non occidit, sed mortuos vivificat. Vivit manduca-  
 « tus, quia surrexit occisus. Hinc etiam lapidi pre-  
 « tioso comparatur, de quo virtus exit, ut phan-  
 « tasmata fugandi, vel inflationes sedandi, vel alia  
 « sine diminutione sui. » Deuteron. 32: « Consti-  
 « tuit hominem ut sugeret mel de petra, oleumque  
 « de saxo durissimo. » « Petra autem erat Christus »  
 1 Corinth. 10. Sicut ergo gemma virtutem suam  
 effundendo non minuitur, sic corpus Domini nos  
 pascendo non minoratur. Tertia ratio ad idem,  
 infinita causa pasceudi: qui enim ad eum accedere  
 possunt, pastum sufficienter inveniunt: hinc fons  
 et lux vera dicitur. De primo Genes. 2. « Fons  
 « ascendebat a terra, » idest Christus. Dicit Glossa:  
 « Irrigans universam superficiem terrae, » idest  
 inspirans cordi utilia et honesta. Jerem. 2: « Dere-  
 « liquerunt me fontem aquae vivae. » De secundo  
 Joan. 1: « Erat lux vera etc. » Sicut ergo fons  
 terram rigat, et sine sui diminutione herbas in-  
 numeras et arbores nutrit, sic Christus Ecclesiam  
 pascit. Item sicut sol non deficit toti mundo lumen



suum communicando, sic nec Christus Ecclesiam totam pascendo. Item exemplum de candela, in qua millesies tantus ignis sumi potest quantus in ea est, nec propter hoc minuitur lumen ejus. Igitur multo potius Dominus nos seipso pascit, nec tamen deficit. Psalm. 144: « Oculi omnium in te sperant, Domine. » Idem Psal. 101: « Tu autem ipse es etc. » Secundum mirabile signum in perceptione corporis Domini est, quod si non manducatur, quodammodo minuitur. Ad intelligentiam tam mirae rei sciendum, quod duo sunt corpora mystica in hoc mundo: scilicet corpus mysticum Christi, et corpus mysticum diaboli, sive Antichristi, ad quorum alterum pertinent omnes homines mundi. Corpus mysticum Christi sancta est Ecclesia tamquam ipsius munda et fidelis sponsa, ejus ipse caput est, et singulae personae fidelium sine culpa criminali sunt ipsius membra: et omnes qui corpus ejus digne sumunt, ipsius membra fiunt. 1 ad Corinth. 12: « Vos estis corpus Christi, et membra de membro. » Sicut enim corpus unum est, et multa habet membra, sic et Christus. Item 1 Corinth. 10: « Unum corpus multi sumus, qui de uno pane participamus. » Corpus diaboli universitas est iniquorum tamquam illius nutritrix adultera, ejus ipse caput est, et singulae personae malorum ejus membra. Job 41: « Corpus ejus scuta fusilia compactum squaminis se prementibus. » Gregorius: « Corpus diaboli sunt omnes iniqui, qui quia per obstinationem durissimi sunt, et per vitam fragiles, scutis fusilibus comparantur. » Sciendum, quod sicut Christus per se et per suos semper studet membra diaboli praeseindere, et suis membris incorporare, secundum illud Act. 10: « Surge Petre, occide et manduca: » sic diabolus per se et per suos conatur membra Christi tollere, et membris suae meretricis vilibus unire. 1 Pet. 5: « Sobrii estote, et vigilate etc. » Deuter. 51: « Populus iste fornicabitur post Deum alienos, et derelinquet me. » 1 ad Corinth. 6: « Nescitis quoniam corpora vestra membra sunt Christi? Tollens ergo membra Christi faciam membra meretricis? » quasi diceret: Absit, ut faciam tantum nefas. Quod tamen, heu, multi faciunt. Augustinus: « Non possunt simul esse membra Christi, et membra meretricis. Nec dicendi sunt manducare corpus Christi, scilicet spiritualiter, et si manducant Sacramentaliter. Sed non manducando spiritualiter corpus Christi, et male vivendo, tollunt Christi membra, et faciunt ea membra diaboli, et sic diminuunt, quantum in se est, corpus Christi: quod enim diabolo in animabus accrescit, Christo decrescit: et sic corpus Christi mysticum diminuitur. » Tertium mirabile signum in perceptione Domini corporis est, quod dum manducatur a fidelibus, tunc augmentatur. Hoc probatur dupliciter: ratione et similitudine. Primo probatur ea ratione, quod dum manducatur corpus Christi, non ipsum ut alius eibus in manducantem convertitur, sed e converso vere manducans in illud spiritualiter convertitur et mutatur: nam manducantem se Dominus sui corporis mystici membrum facit, et sibi eum incorporans, eum suo corpore, quod de Virgine sumpsit, quodammodo unum efficit. 1 ad Corinth. 12: « Unum corpus multi sumus, qui de uno pane participamus. » Idem 1 Corinth. 12: « Vos estis corpus Christi, et membra de membro. » Augustinus: « Commendavit Christus in hoc Sacramento

« corpus et sanguinem suum, quod et fecit nos ipsos; nam et nos ipsi sumus facti corpus ejus. » Caro enim nostra carni ejus unita et incorporata unum cum illo efficitur. » Osee ult.: « Convertentur sedentes in umbra ejus, vivent tritico. » quasi diceret, fideles vivent tritico, idest Domini corporis Sacramento. Quod Sacramentum dicitur umbra Christi, quia dat se ibi non in sua luce, sed in velamine, quod sic comedentes convertentur, quia in corpus Christi mutabuntur. Et sic patet, dum multi fidelium comedunt corpus Christi et in illud ipsi mutantur, et membra ejus efficiuntur, quod corpus Christi dum manducatur, augmentatur. Secundo probatur idem similitudine humanae scientiae: nam quanto magis homo scientiam suam aliis distribuit, tanto plus crescit. Matth. 25: « Domine, quinque talenta tradidisti mihi, ecce alia quinque etc. » Boetius: « Scientia est nobilis animi possessio, quae avarum dedignatur possessorem: » nisi enim publicetur, elabitur, et distributa suscipit incrementum. Similiter divina sapientia incarnata multis in cibum donata sapientes facit, et in se quodammodo convertit: et sic dum comeditur, non minuitur, sed augmentatur. Eccle. 1: « Creator omnium creavit sapientiam spiritu: » scilicet, incarnari fecit, « et secundum datum suum praebet illam diligentibus se. » Et in hoc sapientia Dei crescit, dum multos in sapientia crescere facit. Ad Ephes. 4: « Crescimus in illo per omnia, qui est caput nostrum Christus, ex quo totum corpus compactum, » scilicet per fidem, « et connexum per caritatem, in mensuram uniuscujusque membri augmentum corporis facit in aedificationem sui in caritate. »

## CAPUT XV.

### *De qualitate nostrae praeparationis ad Sacramentum.*

Venite, comedite, etc. » Thema speciale. « Probet autem seipsum homo etc. » 1 Corinth. 11. Probet, idest praeparet se, examinet, purget. Item aliud thema: « Praeparate corda vestra Domino. » 1 Reg. 7. Quartum principaliter circa Sacramentum Domini corporis notandum, est qualitas nostrae praeparationis: nam valde justum est, ut ad tam dignum et venerandum cibum, scilicet ad ipsum Dominum omnium, non ineurate et indevote, sed aliquo competenti modo praeparati accedamus. Exod. 19: « Sacerdotes qui accedunt ad Dominum, sanctificentur, ne percutiat eos; » similiter et alii. Praeparatio nostra considerari potest in tribus. In dignitate ipsius corporis sacri: nam quia mundissimum, et Deo vivo plenum et unitum, necesse est illud suscipienti per tria praeparari: scilicet, per fidei plenitudinem. Ad Hebr. 10: « Accedamus eum vero corde in fidei plenitudine: » eum vero corde, idest eum vero intellectu sine errore: in plenitudine fidei, idest in plena fide credentes quae non videmus, scilicet sub specie panis esse totum Christum, verum hominem et verum Deum. Propter hujus fidei magnum meritum dicitur 2 Petri 1: « Credentes in Christum quem non videtis, exultabitis laetitia inenarrabili. » Secundum praeparativum est munditiae magnitudo, quia congruum est ut vas suscepturum corpus mundissimum sit mundum. Exod. 21: « Sume vas unum, et mitte manum ibi. » Vas unum quasi



singulariter et excellenter mundum. Hic Apostolus Hebr. 9, vas istud dicit esse urnam auream; decet enim cor quasi aurum esse purissimum per magnam munditiam, quod capere debet caelestem panem. Alexander Papa: « Nihil in sacrificiis majus esse potest quam corpus et sanguis Christi, nec ulla oblatio hac potior est, sed omnes praecellit, quae pura conscientia offerenda est, et pura mente sumenda. » Hugo: « Pura conscientia est quando non habet de praeterito justam accusationem, de praesenti injustam delectationem, sed de futuro justam voluntatem. » Matth. 27: « Joseph petit a Pilato corpus Jesu. Et accepto corpore, involvit in sindone munda. » Glossa: « Sindone munda involvit Jesum, qui pura mente eum suscipit. » Hinc etiam mos Ecclesiae habet, ut sacramentum altaris non serico, non panno tineto sed puro linteo celebretur. In tribus vero quae perducunt corporale linteum ad candorem intelliguntur tria, quae faciunt ad nostram mundificationem: primo enim lavatur, secundo torquetur, tertio exiccatur. Si quis ad suscipiendum Dominum bene mundus vult fieri, primo debet per aquam lacrymarum emundari: secundo per opera poenitentiae torqueri: tertio per fervorem amoris Dei a carnalium desideriorum humore sicari. De primo ad Hebr. 10: « Accedamus aspersi corda a conscientia mala, et abluti corpus aqua munda, » idest mundati lacrymis a peccatis cordis et corporis. Exod. 50: « Lavabunt Aaron et filii ejus manus et pedes, » idest opera et cogitationes, aqua compunctionis et confessionis, « quando accessuri sunt ad altare ne moriantur. » Jerem. 4: « Lava a malitia cor tuum, Jerusalem, ut salva fias: usquequo morabuntur in te cogitationes noxiae? » Psal. 51: « Lavabo per singulas noctes, » idest pro singulis peccatis lectum meum, idest conscientiam etc. De secundo Exod. 26, cortinas tabernaculi, idest ornatus animae facies de bysso retorta, idest de operibus poenitentiae, jejuniis, orationibus, afflictionibus et hujusmodi. 1 ad Corinth. 9: « Castigo corpus meum etc. » Eccles. 55: « Servo malevolo, » idest corpori, « tortura et compedes, mitte illum in operationem ne vacet. » Psalm. 55: « Multae tribulationes justorum. » De tertio Psal. 10: « In sole posuit tabernaculum suum, » scilicet ad siccandum per amorem divinum, ut fiat valde mundum et pulchrum. Cant. 4: « Tota pulchra es amica mea etc. » quia scilicet bene lota, torta et exsiccata. Numer. 9: « Sanctificamini, eras comedetis carnes. » Tertium praeparativum est orationis devotio. Psalm. 104: « Petierunt, et venit coturnix, et pane caeli saturavit eos. » Job 5: « Antequam comedam, suspiro. » Hinc Maria Magdalena et aliae devotae portabant aromata, dum quaerebant corpus Domini. Lucae 25. Sic nobis accessuris ad corpus Domini praelibanda est orationis devotio, ut quod forte minus parati sumus per jejunium et confessiones, suppleat spiritualium aromatum, idest orationum oblatio. 2 Paralip. 50: « Magna pars populi quae sanctificata non fuerat, comederat Phase, et oravit pro eis rex Ezechias dicens: Dominus bonus propitiabitur cunctis qui in toto corde requirunt eum, et non imputabit eis quod minus sanctificati sunt. » Augustinus: « Quamvis quis peccato mordeatur veniali, peccandi tamen de cetero non habeat voluntatem, satisfaciat lacrymis et ora-

S. Th. Opera omnia. V. 17.

tionibus, et confidens de Domini miseratione accedat ad Eucharistiam intrepidus et securus. » Secundus modus nostrae praeparationis consideratur in hostia panis. Sicut enim grana frumenti arte humana gradatim proficiunt ad panis complementum, sic anima peccatrix gratia Dei proficit ad bonum statum, in quo licenter suscipit corpus Dominicum. Grana ex quibus fit hostia, signant statum peccatoris propter tria: sunt enim dura, et furfure operta, et ab invicem distincta. Sic peccator durus est in corde, qui non vult converti ad dulcem Deum de sua iniquitate. Jer. 5: « Induraverunt facies suas supra petram, et noluerunt converti. » Item peccator opertus est quasi furfure peccati deformitate. Jerem. 2: « Quam vilis facta es nimis intrans vias tuas! » Item peccator divisus est a proximo suo caritatis privatione. Osee 10: « Divisum est cor eorum, nunc interierunt. » Sed grana ad statum in quo sunt in hostia per hunc modum sunt deducta. Primo contrita est eorum durities per molam, et in minimas partes redacta: secundo a furfure sunt mundata: tertio commixta est farina adinvicem per aquam, et per ignem decocta, et in panem solidata; sic peccator qui dignus erit sumere corpus Domini, debet se per tria quae in his signantur praeparare: per cordis contritionem, per oris confessionem, per proximi dilectionem. De primo Isa. 47: « Tolle molam, mole farinam: » quasi diceret, Fac in te molam spiritualem de duobus molaribus, considerando misericordiam Dei, et justitiam ac emolliendam cordis tui duritiam: misericordiam quasi superiorem lapidem qui nunc operatur et circuit, sed post hanc vitam operari cessabit. Psal. 85: « Misericordia tua magna est super me etc. » Item considerando justitiam quasi inferiorem lapidem, qui nunc jacet et quiescit, sed post hanc vitam elevatur, operatur et circuit. Osee 8: « Judicabo te juxta vias tuas, non pareet oculus meus, et non miserebor. » Matth. 21: « Super quem ceciderit lapis iste, conteret eum. » Rom. 11: « Vide Dei bonitatem et severitatem. » Job 5: « Deus emollivit cor meum, et omnipotens conturbavit me. » Deus cui proprium est misereri, omnipotens quem oportet juste judicare. Psal. 50: « Sacrificium Deo spiritus contribulatus. » De secundo Amos 9: « Ego mundabo, et conecutiam domum Israel, sicut conecutitur triticum in cribro: » ubi scilicet furfures separantur a nucleo, impurum a puro, sic per confessionem mundatur anima a vili peccato. Psal. 95, « Confessio et pulchritudo etc. » 1 Mach. 5: « Dixit Judas et fratres ejus, » idest confitentes. « Ecce contriti sunt inimici nostri, ascendamus nunc mundare Sacramenta nostra. Eccles. 2: « Qui timent Dominum, praeparabunt corda sua, et in conspectu ejus sanctificabunt animas suas. » Glossa: « Felix anima quae quotidie mundat cor suum, ut suscipiat habitatorem Deum, cujus possessor nullius eget bono, quia omnium bonorum auctorem in se habet. » De tertio Genes. 17: « Accelera, tria sata similiae commisce, et fac subeineritios panes, ut sic vitulum optimum cum illis comederet. » Qui enim vitulum optimum, idest corpus Christi sumere vult, prius debet tribus satis similiae panem igne coquendo solidare, idest ad tres hominum differentias, scilicet superiores, aequales, inferiores veram dilectionem servare. 1 Corinth. 10: « Unus panis et unum corpus, multi

« sumus qui de uno pane et de uno calice participamus. » Augustinus: « Qui accipit mysterium unitatis, et non tenet vinculum pacis, non mysterium accipit pro se, sed contra se. » Matth. 20: « Intravit rex ut videret discumbentes, et vidit unum non habentes vestem nuptialem, » idest caritatem, « et ait ministris: Ligatis manibus et pedibus etc. » Item ejusdem 5: « Si offers munus tuum etc. » Glossa: « Si fratrem laesisti, reconciliare ei: etiam si adversarius fuerit, esto benevolus, ut fiat amicus; et tunc offeres munus tuum, ut sit Deo gratum. » Propter praedicta in pane notanda dicitur Exod. 21: « Azyma comedes, » idest panem sine fermento, « et erit quasi signum in manu tua, et quasi monumentum ante oculos tuos, » quod scilicet significatur in eo quod dictum est, cordis contritio, oris confessio, proximi dilectio, quibus debemus nos praeparare, ut digne possimus ad Christi corpus accedere.

### CAPUT XVI.

#### *De praeparatione nostra in tertio, scilicet Agno Paschali.*

« Venite, comedite. » Item: « Probet autem seipsum homo. » Thema speciale: « Sanctificamini, cras comedetis carnes, » Num. 9. Thema proprium. « Ecce Agnus Dei, » Joan. 1. Hic dendum est qualiter ex figura agni paschalis consideretur nostrae praeparationis modus, de qua Exod. 12 legimus. Haec figura in tres partes est dividenda. Prima pars est ipse agnus edendus, secunda fercula cum quibus est edendus, tertia personarum edentium habitus. In prima discimus praeparari per fidei integritatem, in secunda per animi virtuositatem, in tertia per vitae honestatem. Prima pars istius est ipse agnus, qui secundum legem manducatur: et in hoc tria considerantur. Primo quando comedendus est, quia in nocte, cum res plene non videtur; in quo credendum significatur quod corpus Christi in praesenti nobis dari debuit non manifestum, sed in Sacramento velatum. Tobiae 12: « Sacramentum regis abscondere bonum est. » 5 Reg. 8: « Dominus dixit ut habitaret in nebula. » In secundo, scilicet quod non comeditur ex eo eradum, significatur quod non debemus credere Christum esse hominem purum. Item quod non comeditur aqua coctam, significat quod non debemus credere Christum secundum communem hominum consuetudinem conceptum aut natum. Item quod comederunt eum tantum assum igni, significat quod Christi incarnatio et ejus corporis consecratio credenda est celebrari per potentiam Spiritus Sancti. In tertio, scilicet quod caput agni cum pedibus et intestinis vorari praecipitur, significatur esse credendum quod in hoc Sacramento totus Christus cum divinitate et corpore et anima continetur et sumitur. Secunda pars hujus figurae sunt fercula tria, cum quibus solebant agnum manducare: scilicet lactucae agrestes, panes azymi et sanguis agni. Exod. 12: « Edetis carnes agni, et azymos panes cum lactucis agrestibus: et sument de sanguine agni, et ponent super utrumque postem, et in superliminaribus domorum. » Primum ferculum, scilicet lactucae agrestes, significant dolorem de peccatis; secundum, scilicet panes azymi, intentionem puram cum operibus bonis; tertium, scilicet

sanguis agni, memoriam et imitationem dominicae passionis, quibus praeparari debet anima fidelis. De primo Gregorius super illud Exod. 12: « Lactucae agrestes valde amarae sunt: carnes vero agni cum his comedendae sunt: quia cum corpus Christi accipimus, compungi pro peccatis debemus, ut amaritudo poenitentiae abstergat amorem perversae vitae. » Isa. 58: « Recogitabo tibi omnes annos meos etc. » De secundo 1 Corinth. 5: « Epulemur non in fermento veteri, » idest in corruptione superbiae, quae fit in Deum: « neque in fermento malitiae, » quae fit in proximum: « et nequitiae, » quae fit in seipsum: « sed in azymis sinceritatis, » idest in sinceritate a vitiis, « et veritate » bonorum operum, ut scilicet studeamus esse in novitate vitae sine omni fraude de fermento veteri. Gregorius: « Panes sine fermento comedit, qui recta opera sine corruptione inanis gloriae facit de fermento malitiae. » Idem: « Panes sine fermento malitiae manducat, qui opera misericordiae sine peccati admixtione exhibet, ne perverse rapiat quod quasi recte dispensat. » Unde per Amos 4 increpando dicitur: « Sacrificate de fermento laudem. » De fermento enim laudem immolat, qui Domini sacrificium de rapina portat de fermento nequitiae. Exod. 12: « Qui comederit fermentatum, peribit anima ejus de coetu Israel. » Fermentatum comedere est delectari peccati corruptione, quod committitur in se. Psal. 25: « Dixit injustus ut delinquat etc. » De tertio ferculo supradicto Gregorius: « Sanguis agni super utrumque postem ponitur, » quando non solum ore corporis, sed etiam ore mentis hauritur, et ad imitationem intenta mente cogitur: nam qui sic Redemptoris sanguinem accipit ut imitari passionem nec dum velit, in uno tantum poste sanguinem ponit. » Item in superliminaribus ponendus est sanguis agni, quia non tantum in memoria, sed in manifesto portari debet crux passionis Christi. Galat. ult.: « Mihi absit gloriari etc. unde et stigmata Domini Jesu in corpore meo porto. » Tertia pars hujus figurae est habitus, sive tria insignia illorum qui manducaverunt agnum: scilicet circulus renum, calceamenta pedum, baculus manuum. Exod. 12: « Sic manducabitis agnum. Renes vestros accingetis, calceamenta habebitis in pedibus, tenentes baculos in manibus. » Primum designat carnis et mentis continentiam, secundum exemplorum patrum custodiam, tertium vitiorum correctionem: et exiguntur ad communicantium praeparationem. Primum praeparativum est mentis et carnis continentia in cingulo rerum figurata. Gregorius: « In renibus accipitur carnis delectatio: » unde Ps. 25: « Ure renes meos et cor meum. » Qui ergo Pascha comedit, renes accingat: quia qui corpus Domini accipit, voluptatem domat, luxuriam refranat. Haec praeparatio continentiae attendenda est quantum ad tria genera hominum; scilicet conjugatos et de incontinentia poenitentes et spirituales. Primi ante sacramunionem continentiam debent servare aliquantam; secundi longiorem, tertii continuam. De primo dicitur ad David 1 Reg. 21: « Si pueri mundi sunt, maxime a mulieribus, manducant, » scilicet panem sanctum: « respondit David: Si de mulieribus agitur, continuimus nos ab heri et nudius tertius. » Dedit ergo eis Sacerdos sanctificatum panem: Exod. 19: « Descendit Dominus coram omni plebe super montem Sinai, scilicet in igne, et

« nubis caligine. Estote ergo parati in diem tertium, « et ne appropinquetis uxoribus vestris. » Si talis continentia servata est ad figuram, quanto magis servanda est ad corporis Christi veritatem? De secundo Levit. 15: « Homo qui fuerit leprosus, aut « patiens fluxum seminis, » idest peccans per incontinentiam carnis, « non vescetur de his quae « sanctificata sunt mihi, donec sanetur, » scilicet per poenitentiam. Hinc statuti sunt ante Pascha quadraginta dies poenitentiae, ut his peractis in jejuniis et orationibus et continentia et bonis operibus, tunc possint communicare poenitentes cum aliis bonis Christianis. Hinc super illud 1 Cor. 11: « Si nos « metipsums dijudicemus etc. » dicit Augustinus: « Ab ipsa mente poenitentis talis sententia proferatur, ut se indignum iudicet participatione corporis et « sanguinis Domini, ut ad tempus per ecclesiasticam « disciplinam sacramento caelestis panis separetur. « Indigne enim accipit, si tunc accipit cum debet « agere poenitentiam, » idest quando incipit. Ergo se prius iudicet, ut a se iudicatus non iudicetur a Domino. De tertio, scilicet de continentia continua et sempiterna, scilicet omnimodam et perpetuam castitatem conservare: Lev. 21: « Sacerdotes sancti « erunt Domino suo, et non polluent nomen ejus. « Incensum enim Domini et panes Dei sui offerunt, « et ideo sancti erunt. » Beda: « Si veteris testamenti Sacerdotes secundum ordinem vicis suae « intraturi templum ad offerendas legales hostias a « propriis uxoribus oportuit abstinere: quanto magis « nostri Sacerdotes, quos ad consecrandum sacrosanctum corpus Domini paratos semper esse « oportet, et continuam et sempiternam semper « debent castitatem conservare? » Secundum praeparativum est exemplorum patrum custodia per calceamenta pedum figurata. Gregorius: « Calceamenta « in pedibus habere, est mortuorum patrum vitam « aspicere, et nostra vestigia a peccati vulnere « custodire: » Cantic. 5: « Quam pulchri sunt gressus « tui in calceamentis, filia Principis! » Gressus sunt profectus operum in calceamentis, idest in consideratione vitae patrum. Tertium praeparativum est correctionis disciplina in baculis manuum figurata. Baculus enim significat rectitudinem justitiae, qua debemus nosmetipsos de nostris excessibus ante communionem iudicare. Psal. 44: « Virga directionis, « virga regni tui etc. Apprehendite disciplinam etc. » 1 Corinth. 11: « Qui manducat et bibit indigne.... « Quod si nosmetipsos dijudicemus etc. » Augustinus: « Ascendas hic adversus te tribunal mentis « tuae, et constituto in corde iudicio adsit accusatrix cogitatio, et testis conscientia, et carnifex timor « Domini; inde quidam sanguis animae confidentis « per lagrimas profluat: et sic cessat vindicta divina, « cum confessio et correctio praecedat humana: et sic « homo dignus erit ad sumendum corpus Christi nunc « in Sacramento, et perfecta fractione in futuro. » De primo Deut. 8: « Afflixit te Dominus penuria, et dedit tibi cibum manna quod ignorabas: » afflixit te idest fecit ut affligeres te et corrigeres, « penuria, » idest poena voluntatis tuae, et voluptatis carentia, et nunc dedit tibi caelestem panem corporis sui. De secundo ad Hebr. 12: « Omnis disciplina in « praesenti non videtur gaudii, » sed moeroris: postea autem fructum pacatissimum exercitatis per eam reddet justitiae. Item praeparativum ad corpus Domini suscipiendum esse potest manducatio spiritualis, secundum quod perfecti manducant ratione

meditationis devotae, de quo « infra sermone de « cimo nono ante medium, et in medio. »

## CAPUT XVII.

*De triplici modo manducandi; et primo de Sacramentali tantum.*

« Venite, comedite etc. » Thema proprium. « Quicumque manducaverit panem hunc et biberit « calicem Domini indigne, reus erit corporis et « sanguinis Domini, » 1 Cor. 11. Quintum principale circa Sacramentum Dominici corporis notandum, est modus manducationis; et hoc triplex: scilicet Sacramentalis tantum, spiritualis tantum, Sacramentalis et spiritualis simul. Ad hoc intelligendum sciendum, quod in cibo altaris duo sunt: scilicet Sacramentum et virtus sacramenti. Sacramentum, ut dicit Augustinus, in duobus consistit, visibili panis et vini specie, et invisibili carne et sanguine Christi; virtus vero Sacramenti est sanatio a damnatione mortis aeternae. Hanc virtutem Sacramenti crediderunt et gustaverunt spiritualiter omnes salvandi ab origine mundi, et quotidie gustant omnes boni Christiani. Secundo modo tam boni quam mali; hoc modo dissimili, quia mali manducant Sacramentum tantum, idest sub visibili specie panis corpus Christi; sed non virtutem Sacramenti manducant spiritualem, idest salutem ad vitam aeternam: boni vero manducant utrumque simul, scilicet Sacramentum et virtutem Sacramenti. Ex his patet triplex modus manducandi. Primus Sacramentalis tantum, secundus spiritualis tantum, tertius Sacramentalis et spiritualis simul. Primo manducant mali Christiani, secundo omnes salvandi, tertio soli boni Christiani. Primi manducant et non manducant; secundi non manducant et tamen manducant; tertii manducant et manducantur. Primus modus manducandi corpus Domini est sacramentalis tantum, quomodo mali Christiani manducant; quia venerandum corpus in peccato mortali ore polluto sumentes, cordis effectum ab influentia virtutis bonitatis ejus, peccatis suis immundis et duris quasi luto et lapide claudunt. Ezech. 14: « Posuerunt immunditias suas « in cordibus suis, et idola, » scilicet scandalum iniquitatis suae statuerunt contra faciem suam. Isti manducant et non manducant: manducant quidem, quia corpus Domini sumunt Sacramentaliter; sed tamen non manducant, quia virtutem spiritualem, idest salutem animae non percipiunt. Eccles. 6: « Est aliud malum quod vidi sub sole, et quidem « frequens apud homines. Vir cui Deus dedit divitias et substantiam et honorem, nec tribuit « ei potestatem ut comedat ex eo. » Hebr. ult.: « Habemus altare de quo edere non habent potestatem « qui tabernaculo deserviunt, » idest peccatis carnalibus. 1 Cor. 10: « Non potestis calicem Domini « bibere, et calicem daemoniorum. » Gregorius: « Est quidem in peccatoribus et indigne sumentibus « vera Christi caro et verus sanguis, videlicet praesentiali essentia, non salubri efficientia. » Augustinus: « Qui discordat a Christo nec manducat carnem ejus, nec bibit sanguinem, etsi tantae rei Sacramentum quotidie sibi sumat a iudicio. Discordat a Christo qui cordis affectum ab eo avertens « ad peccatum convertit; et talis vere miserabilis



• dici potest, ad quem tam magnum bonum frequenter venit, et nullum exinde spirituale lucrum accipit sive percipit. » Hoc modo, scilicet Sacramentaliter manducantium, tria sunt genera: primi malevoli, secundi dolosi, tertii praesumptuosi. Primi sunt qui corpus Domini sumunt in peccandi voluntate. Secundi sunt hypoeritae, qui foris boni apparentes occulte sunt pravi, et tamquam justi accedunt ad altare. Tertii sunt qui maxime mali sunt, et tamen praesumunt communicare. De duobus primis potest hic dici, et de tertio in sequenti. De primo genere malorum communicantium, scilicet de malevolis, Isaias 19: « Appropinquat populus iste ore suo, cor autem eorum longe est a me. » Appropinquat ore per Sacramenti susceptionem, sed cor longe est per peccandi voluntatem. Tales tria mala sequuntur: peccati sui aggravatio, a gratia Christi separatio, ad aeternam poenam condemnatio. De primo Matth. 15: « Non est bonum sumere panem etc. » Canibus, idest malevolis. Augustinus: « Habentes voluntatem peccandi gravari magis dico Euchariae percipione, quam purificari. » De secundo Sap. 1: « Perversae cogitationes separant a Deo etc. » De tertio 1 Cor. 11: « Quicumque manducaverit hunc panem etc. » Ambrosius: « Indignus est qui non devota mente accedit ad Euchariam, aut in voluntate peccandi manens reus est corporis et sanguinis Domini, idest ac si Christum occideret punietur. De secundo genere malorum communicantium, scilicet de dolosis, sive hypoeritis, 2 Timoth. 3: « In novissimis diebus instabunt tempora periculosa, et erunt homines seipsos amantes: habentes quidem speciem pietatis, virtutem autem ejus abnegantes. » Speciem pietatis: Glossa: « idest religionis: » quia eadem Sacramenta habent cum piis: virtutem pietatis, idest caritatem abnegantes, multa scilicet mala occulte perpetrantes et manifesta fallaciter excusando. Tales similiter tria mala sequuntur: socii Judae traditoris efficientur, eorum toto mundo confundentur, extra honorum consortium projicientur. De primo Joan. 55: « Qui manducat panem meum, levabit contra me calcaneum suum. » Hoc dicitur de Juda et de suis similibus: scilicet fictis Domini amicis: unde Glossa: « Qui manducat panem meum non ut proficiat, sed ut lateat, ille me conculcabit, idest trader. Qui ergo vult latere in peccatis sub plena specie religionis et communicationis, similis efficitur et socius Judae traditoris. De secundo Eccles. 1: « Ne sis incredibilis timori Domini, et ne accesseris ad eum duplici corde, nec fueris hypoerita in conspectu hominum, ne forte revelet Deus absconsa tua, et in medio synagogae elidat te, quoniam accessisti maligne ad Dominum, et cor tuum est plenum dolo et fallacia: » Nahum 3: « Ecce ego ad te speciosa dicit Dominus, idest anima foris pulchra, hominibus speciosa, intus immunda: et revelabo pudenda tua in facie tua, et ostendam gentibus nuditatem tuam, et regnis ignominiam tuam, et projiciam super te abominationes tuas, et contumelias te afficiam. » De tertio Matth. 15: « Vae vobis hypoeritis, qui similes estis sepulchris dealbatis, quae foris apparent hominibus speciosa, intus autem plena sunt ossibus mortuorum, et omni spurcitia, idest putredine et verme et foetore; sic et vos a foris quidem apparetis hominibus justi, intus autem pleni estis hypoerisi et ini-

• quitate: hypoerisi, idest amore vanae laudis: • iniquitate, idest cupiditate temporalium et odio veritatis; et ideo praemittitur, « Vae vobis, » idest extra honorum consortium miserabilis projectio: Levit. 7: « Anima polluta hypoerisi, » dicit Interlinearis, « quae ederit de carnibus hostiae pacificorum, » idest corporis Christi, « quae oblata est Domino, peribit de populis suis, » idest ejicietur de salvandis ad damnationem aeternae mortis. Sed ecce contra tria magna mala dat leve remedium divina clementia, quia spiritualis conclusio, scilicet bonum fieri de malo. Psal. 55: « Declina a malo, et fac bonum etc. » Et ex frequenti bene agere fit homo bonus. Et cum bonus est, sequentur enim tria bona: scilicet poenae debitae relaxatio, divinae gratiae restitutio, aeternae gloriae acquisitio. De primo 5 Reg. 1: « Si fuerit vir bonus, nec unus quidem capillus ejus in terra cadet, » idest ab omni peccato erit immunis: Ezechiel. 35: « Si dixerio impio, morte morieris, et egerit poenitentiam de peccato suo, vita vivet, et non morietur. » De secundo Psalm. 124: « Bene fac, Domine, bonis et rectis corde. » Prov. 12: « Qui bonus est, hauriet sibi gratiam a Domino. » De tertio Matth. 24: « Euge, » idest bene gaude, « serve bone, quia in pauca, » idest in bonis quae tibi commissa sunt, bene negotiatus es: « supra multa te constituam, » scilicet aeterni gaudii bona. • Intra in gaudium, » ut scilicet ex omni parte perfruaris gaudio. Isa. 51: « Veniant in Sion laudantes, et laetitia sempiterna super capita eorum, » quia causa aeternae laetitiae erit in Domini regis sui contemplatione. Jerem. 51: « Venient, et laudabunt in monte Sion, et confluent ad bona Domini. » Tunc lactabitur Virgo Beata Maria praecentrix in choro caelesti: juvenes, scilicet omnes beati: senes, scilicet Angeli, isti Deum laudabunt, et in omnibus bonis, idest sine fide (1) gaudebunt.

### CAPUT XVIII.

#### *De tertio genere indigne manducantium, scilicet de praesumptuosis.*

• Venite comedite etc. » Item, « Quicumque manducaverit hunc panem etc. » De tertio genere malorum indigne communicantium est hoc dicendum: scilicet de praesumptuosis, qui non timent communicare vel celebrare in magnis criminibus et manifestis. De his 1 Cor. 11: « Qui manducat et bibit indigne, judicium sibi manducat et bibit, » idest valde malum est illi. Unde sciendum quod duplex est effectus corporis Domini; scilicet bonitatis, quoad bonos: severitatis, quoad malos: et tamen ipsum semper immutabile et bonum in se manet, sed justo judicio effectus ejus mutatur in his qui male eo utuntur. Augustinus: « Sancta malis possunt obesse; quia qui manducat corpus Domini indigne, judicium sibi manducat; non quod res illa mala sit, sed quia malus quod bonum est, male accipit. Hujus rei exemplum est in sole et in vino: nam eandem solis lucem quam oculus sanus ad delectationem et confortationem, aeger suscipit ad turbationem: et vinum quod sanus homo ad jucunditatem et confortationem, febricitans accipit ad majorem infirmitatem, vel certe ad mortem. » Hinc est

(1) An sine fine?



quod indigne communicantes tria mala sequuntur: scilicet magna culpa, Dei offensa, multiplex plaga. Primum malum praesumptuose manducantium est magna culpa. Jerem. 11: « Numquid carnes sanctae auferent a te malitias tuas, quibus gloria es? » Isidorus: « Qui scelerate vivunt in Ecclesia Dei, et communicare non desinunt putantes se tali communione mundari, discant nil ad emendationem proficere sibi, dicente eodem Propheta: Quid est quod dilectus meus in domo mea facit scelera multa? Numquid carnes sanctae auferent a te malitias tuas? » quasi diceret, Non auferunt, sed augmentant. Hujus triplex est ratio: scilicet perversa intentio. Actionis enim voluntariae triplex est radix sive principium: vel natura, vel virtus bona, vel libido. Omnis actio cujus radix est natura vel virtus, bona est; cujus autem radix libido, mala est. Sed ejus qui in peccato mortali est scienter, et sumit corpus Christi, non potest esse radix natura: neque virtus aliquo modo dietaret quod aliquis rem tam pretiosam ac venerandam in loco vel vase immundo poneret. Unde peccatoris, qui corpus Domini sumens ponit in ore suo polluto et corpore, radix est libido, id est perversa intentio, ut lucri temporalis, vel vanae laudis, vel alienjus deceptionis. Secunda ratio culpae istorum est divini praecepti transgressio. Sicut enim Dominus in statu innocentiae lignum vitae ad edendum concessit, et in statu culpae prohibuit, sic nobis in statu bono corpus Christi conceditur, et in malo prohibetur. Matth. 6: « Nolite sanctum dare canibus, » id est immundis peccatoribus: Levit. 24: « Homo qui habuerit maculam, scilicet peccati, non offerat panem Domino, nec accedat ad ministerium ejus. » Tertia ratio culpae istorum est maxima ingratitude. Quae enim potest esse major quam si quis habens Dominum, a quo accepisset quicquid boni haberet, et ipsum insuper morte sua de suspendio liberasset, eundem Dominum in stabulum immundissimum inimici sui traditione duceret, et ibi conculcavit, et rursus occideret? Tanta ingratitude peccant, qui corpus Domini sumunt in peccato mortali. Psal. 54: « Retribuebant mihi mala pro bonis, et odium pro dilectione mea. » Et iterum Psal. 55: « Conculcaverunt me inimici. Hebr. 10: « Quanta putatis deteriora mereri supplicia, qui filium Dei conculcaverit, et sanguinem testamenti pollutum duxerit, in quo sanctificatus est? » scilicet in morte Christi. Ambrosius: « Christum ille conculcat, qui libere peccat absque timore et poenitentia, et qui eo indigne participat. » Idem: « Qui indigne Christum sumit, idem est ac si interficiat. » Augustinus: « Quam temerarium est quamque nefarium est eruentis manibus intemeratae Virginis tractare filium? » Quis auditus sustineret aurium? quis oculus non confunderetur ad intuitum? cujus mens non raperetur in excessum, ubi mundi pretium mittitur in sterquilinum? Non enim minus est detestabile in os pollutum, quam in lutum mittere Dei filium. » Secundum malum istorum est magna Dei offensa. Zach. 1: « Ira magna ego irascor super gentes opulentas, quia ego iratus sum parum, ipsi vero adjuverunt in malum, » quasi diceret Dominus, Parum irascor hominibus propter peccata quae committuntur in proximum, sed maxime eo quod peccant in Deum. 1 Reg. 2: « Si peccaverit vir in virum, placari ei potest Deus; si autem

in Deum, quis orabit pro eo? » Glossa, « Quanto major gloria, tanto major offensa: » Malacli. 1: « Ad vos, o Sacerdotes, qui despiciitis nomen meum, et offertis super altare meum pollutum panem: » Glossa, « Corripit sermo divinus Episcopos et ministros Ecclesiae negligentes, et omnes qui Christi nomine censentur, cur nomen despiciant: quibus aperit causas offensae, quod pollutum panem offerunt. » Polluit enim panem, id est corpus Christi, qui indigne accedit ad altare, et mensam Domini si non scelerata voce, scelerato opere despiciit; et dum Sacramenta violantur, ipse cujus est Sacramentum, violatur. Tertium malum istorum est multiplex plaga, et gravis et justa Dei vindicta. Sicut enim ab antiquo filiis Israel maximum erat peccatum, et pessimarum causa maledictionum, quod per idolatriam Deum projecerunt, et postea Judaeis impiis quod Christum non susceperunt: sic modo Christianis maximum est peccatum et causa plagarum, quod corpus Salvatoris indigne suscipiunt. Gregorius: « Creator omnium per incarnationis mysterium Judaeam visitare dignatus est; sed quia non cognovit tempus visitationis suae, ideo gentibus frequenter in praedam data, novissime Romanis tradita est, et venerunt super eam omnia genera maledictionum, quae in libro legis scripta sunt: similiter his qui gratiam Dei ingrati accipiunt, certa est damnatio. » Si enim quis irritam legem Moysi fecerit, sine ulla miseratione moritur, quanto deteriora supplicia meretur qui filium Dei conculcaverit, et sanguinem testamenti pollutum duxerit? Haec supplicia possunt dici triplices plagae: prima multa damna spiritualium bonorum: secunda sterilitas terrae, sive caristia temporalium: tertia pestes corporum, et strages hominum. De prima Thren. 1: « Manum suam misit hostis ad omnia desiderabilia ejus, quia vidit gentes ingressas sanctuarium tuum, de quibus praeceperas ne intrarent Ecclesiam tuam: » Glossa: « Hostis antiquus ad desiderabilia Ecclesiae manum mittit, et spiritualem ornatum aufert in membris suis, fidem contaminans, baptismum rescindens, » id est gratiam in baptismo datam, doctrinam corumpens, corpus et sanguinem Christi indigne tractans, et vasa pretiosa, » id est oves Christi quasi lupus devastans: et causa tanti mali redditur, quia gentes, » id est carnem amantes, et Christi circumcisionem non habentes, » ministri altaris efficiuntur. » De secunda plaga Deut. 28: « Si audire nolueris vocem Domini Dei tui, ut facias omnia mandata ejus, venient super te omnes maledictiones istae. Maledictus fructus terrae tuae, armenta bovum tuorum, et greges ovium. Mittet Dominus super te famem, esuriam et inreparationem in omnia opera tua. » Haec plagae venient, si audire nolueris mandata Dei, scilicet praecipue de corpore Domini indigne tractando, secundum illud Levit. 24: « Homo qui habuerit maculam peccati, non offerat panem Deo, nec accedat ad ministerium ejus. » Genes. 3: « Quia comedisti de ligno, ex quo praecepi ne comederes, maledicta terra in opere tuo, spinas et tribulos germinabit tibi. » De tertia plaga. 1 Corinth. 11: « Probet seipsum homo etc. Qui enim manducat indigne, judicium sibi manducat etc., » id est ad judicium mortis se obligat: et multi alii propter scelus unius saepe feriuntur: unde sequitur: « Ideo inter vos multi infirmi et imbecilles, et dormiunt

« multi, » scilicet somno mortis, vel Dei verbera, vel praeciorum adversitate. Num. 14: « Adhuc carnes erant « in dentibus eorum, et ecce furor Domini excitatus « in populum percussit eum plaga magna. » Sed ecce contra has plagas et omnia iam dicta mala, triplex remedium. Primum est emendatio vitae per poenitentiam voluntariam: secundum est correctio malitiae per superiorum disciplinam: tertium mutatio incorrigibilis personae per justitiae districtiorem. De primo Joel. 1: « Depopulata est regio, « luxit humus, » idest habitatores humi, « quia « periit messis agri, » idest spiritualia et temporalia. « Accingite vos, et plangite Sacerdotes, ululate ministri altaris, et ingredimini et cubate in « sacco. » Accingite vos Sacerdotes et ministri cingulo poenitentiae, et « plangite » puro corde, « ululate » in confessione et oratione, « ingredimini « Ecclesiam » per poenitentiam, unde existis per culpam « cubate in sacco, » idest delicias, quibus offendistis, per vitae austeritatem recompensate, ut iram Dei possitis mitigare. De secundo Malach. 5: « Ecce venit Dominus quasi ignis conflans, » scilicet per justos Praelatos, « et purgabit filios » Levi, idest ministros altaris, « et erunt Domino « offerentes sacrificia, » et sic utique placatus (1) mitigabitur ira ejus. De tertio Ezech. 21: « Judicabo « vos, dicit Dominus, et subjiciam scepro meo, et « eligam de vobis transgressores et impios, » scilicet ad abjiciendum qui in malo perseverant, idest incorrigibiles, dicit Glossa, « ut scilicet loco eorum « justi restituantur. » Isa. 1: « Convertam manum « meam ad te, et excoquam ad purum scoriam « tuam, et auferam omne stannum tuum, et restituiam judices tuos sicut fuerunt prius, et consiliarios tuos sicut antiquitus, » scilicet tempore Moysi et Machabaeorum et Apostolorum: « post « haec vocaberis civitas justi, urbs fidelis. » 1 Machab. 4 cogitavit Judas de altari holocaustorum, quod profanatum fuerat, quid de eo faceret; et incidit ei consilium bonum ut destrueret illud, ne forte esset illis in opprobrium, quia contaminaverunt illud gentes: et demoliti sunt illud, et posuerunt lapides in monte domus in loco apto, quosque veniret propheta, et responderet de eis, et acceperunt lapides integros secundum legem, et aedificaverunt altare novum secundum id quod fuit prius.

### CAPUT XIX.

*De secundo modo manducandi spirituali tantum.*

« Venite comedite etc. » Thema proprium, « Patres nostri omnes eandem spirituales escam « manducaverunt. » 1 Cor. 10, idest omnes boni veteres in manna cibum invisibilem, scilicet Christum spiritualiter intellexerunt, crediderunt, gustaverunt et ab aeterna morte per eum sanati sunt. Secundus modus manducandi Christum est spiritualis tantum: et isto modo omnes salvati ab initio mundi manducaverunt, et salvandi manducant. Ambrosius: « Non manducans manducat, et manducans non manducat, quia scilicet non manducans « sacramentaliter, manducat spiritualiter, et e converso. » Eccles. 6: « Est vir cui dedit Deus « substantiam et honorem, nec tribuit ei potestatem ut comedat ex eo, sed homo extraneus vorabit illud, » scilicet eum magno desiderio spi-

(1) *Al.* plagatus.

ritualiter manducandi. Circa spirituales manducationem tria sunt consideranda: scilicet differentia personarum sic manducantium, ratio spiritualiter manducandi, effectus manducationis. Hujus primum est differentia personarum sic manducantium, quae est triplex, incipientium, proficientium, perfectorum. Matth. 15: « Manducantium fuerunt quatuor millia virorum « exceptis mulieribus et parvulis. » In parvulis incipientes, in mulieribus proficientes, in viris perfecti significantur. Secundum est ratio, qua dicuntur jam dicti spiritualiter manducare. Unde sciendum, primi, scilicet incipientes, manducant spiritualiter ratione fidei salutaris: secundi ratione bonae conversationis: tertii ratione devotae meditationis. De primis Habacuc 2 et ad Hebr. 10: « Justus ex fide vivit, » tamquam ex cibo spirituali. Augustinus: « Crede et manducasti. Crede « enim in Christum, est credendo in eum ire, « ipsi corde inhaerere, in ipso delectari, et per « veram caritatem membrum ejus incorporari. » Secundi, scilicet proficientes, manducant ratione bonae conversationis. Joan. 4: « Ego cibum habeo manducare, quem vos nescitis... meus cibus est etc. » Ecclesias. 24: « Qui timet Deum, faciet bona... cibus « bavit eum pane vitae etc. » Iste cibus conversationis consistit ex tribus virtutibus quasi ex tribus fereulis: scilicet innocentia, poenitentia et misericordia. De primo Psal. 101: « Percussus « sum ut foenum, quia oblitus sum comedere « panem meum, » scilicet innocentiae, dum delectabar cibo malitiae. Augustinus: « Panem de « altari spiritualiter manducare, est innocentiam « ad altare portare, debitoribus peccata dimittere. » De secundo Psal. 126: « Surgite postquam sederitis « qui manducatis panem doloris, » scilicet poenitentiae pro peccatis. Tob. 1: « Manducavit panem « in luctu et tremore memorans sermonum « Amos, Dies festi vestri, » idest gaudii in peccatis, « convertentur in lamentationem et luctum: » Psal. 101: « Cinerem, » scilicet poenitentiae, « tamquam panem manducabam. » De tertio Prov. 11: « Bene facit animae suae vir misericors; quia « dum pauper ab eo reficitur, ipse multo magis « a Deo spiritualiter pascitur. » Apocal. 5: « Ecce « sto ad ostium, et pulso in paupere, si quis aperuerit mihi etc. » Tertii, scilicet perfecti, manducant spiritualiter ratione devotae meditationis. Et in hac manducatione tria erunt, quae in commensatione corporali consistunt: scilicet appetitus, masticatio et delectatio. Primo debemus esurire spiritualiter Christum cibum nostrum intimo corde desiderando. secundo masticare magna districtione cogitationis: tertio in eo delectari dulcedinem eligendo. Primo debemus spiritualiter esurire Christum ardentem desiderando. Job 51: « Si non dixerunt viri tabernaculi mei, quis det ut de caribus ejus saturemur? » quasi, optabant et desiderabant saturari. Eccles. 25: « Qui edunt me, « adhuc esurient etc. » Gregorius: « In spiritualibus « delitiis saturitas appetitum parit: quia quanto magis « earum sapor percipitur, eo amplius cognoscitur « quod avidius ametur. » Isa. 26: « Domine nomen « tuum et memoriale tuum in desiderio animae etc. » Psalm. 57: « Ante te omne desiderium meum. » Secundo debemus spiritualiter masticare totum Christum, scilicet membra et caput, idest nosmetipsos, et sanctos, et Salvatorem mundi districta discussione cogitare, nos ipsos dijudicando, sanctorum vitam

ad imitandum pertractando, incarnationis Christi beneficia devota mente ruminando. Primo perfecti masticant seipsos, diligenter se examinando et dijudicando. 1 Corinth. 11: « Probet seipsum homo, » idest examinet et purget, et non alium, seipsum totum, scilicet cor, linguam, manum etc. « et sic « postea edat. » Secundo sanctos masticant et bonos adhuc viventes, vitam eorum ad imitandum considerando. Matth. 22: « Ecce prandium meum « paravi, tauri mei et altilia etc. » Tauri sunt Prophetae et Apostoli, qui fortitudine fidei quasi cornu principibus mundi restiterunt, et ab eis passi virtutem nobis exempla reliquerunt. Altilia ab alendo dicta pingua sunt volatilia, et significant sanctos interna caritate saginatos, et contemplationis penna alta petentes: « occisa sunt », vel ab eo quod per poenitentiam, vel per mortem carnis jam in requie posita: haec nobis sunt spiritualiter masticanda, idest ad imitandum diligenter consideranda. Deuter. 14: « Omne quod mundum « est, comedite: quicquid morticinum est, ne vescamini ex eo. » Omne mundum, idest honestis verbis et moribus comedite, in corde ponite imitandum; quod autem morticinum est, idest peccato contaminatum, ne vescamini ex eo consentiendo, vel idem faciendo. Philip. 4: « De cetero « fratres, quaecumque sunt vera, quaecumque pudica, quaecumque justa, quaecumque sancta, quaecumque amabilia, quaecumque bonae famae, si « qua laus disciplinae, haec cogitate: quae audistis « et vidistis in me, haec agite; et Deus pacis erit « vobiscum. » Tertio perfecti masticant spiritualiter carnem Christi, scilicet incarnationis ejus Sacramenta et beneficia devote meditando. Joan. 6: « Qui manducat carnem etc., » idest spiritualiter masticat. Augustinus: « Hoc pertinet ad virtutem « Sacramenti, non ad visibile Sacramentum: qui « scilicet manducat intus non foris, qui manducat « corde, non qui premit dente; et hoc est quod « Apostolus vigilanter dicit tantum de bonis, Omnes eandem escam manducaverunt. » Tertio debemus in spirituali manducatione delectari interna dulcedine, quae elicitur de Christi masticatione. Isa. 55: « Audite audientes me, et comedite bonum, « et delectabitur in crassitudine anima vestra, » idest in dulcedine spiritualis gratiae: Sapient. 8: « Intrans in domum maam, conquiescam cum « Dei sapientia, » idest cum Christo, qui est sapida scientia: « non enim habet amaritudinem conversatio illius, nec taedium convictus illius, sed laetitiam et gaudium, et in amicitia illius delectatio « bona: » Psal. 20: « Quam magna multitudo « dulcedinis tuae Domine! Gustate, et videte etc. » Cant. 5: « Mel et lac sub lingua tua, » idest dulcedo spiritualis in meditatione cordis. Illic dulcedo spiritualis est quaedam praegustatio gaudii caelestis valens contra tria mala quae sunt in mundo. Ibi est falsa dulcedo in delectabilibus utendis, grandis amaritudo in adversis sustinendis, tristis imago in bonis faciendis. De primo Proverb. 9: « Aquae furtivae dulciores sunt, et panis absconditus suavior; » sed dulcedo falsa est, quia animae perditio. Job 54: « Dulcedo illius vermis. » Eccl. 9: « Sicut pisces hamo capiuntur, sic homines tempore malo. » Esca foris delectat, sed aculeus intus perforat. Job 21: « Ducunt in bonis dies suos etc. » De secundo Psal. 105: « Hoc « mare magnum et spatiosum, » quia scilicet in

hoc mundo magna et multa amaritudo: Jerem. 9: « Cibabo populum istum absynthio, et potum dabo « eis aquam fellis. » Job 13: « Homo natus de « muliere etc. » De tertio Matth. 9, dixit Dominus cuidam diviti: « Vade, quaecumque habes vende, et « da pauperibus, et habebis thesaurum in caelis; et « sequere me. Qui contristatus in verbo abiit moerens. » 1 Reg. 23: « Dixerunt pueri David ad « Nabal, Quodcumque invenerit manus tua, da « pueris tuis, et servo tuo David. Qui respondit. « Tollam panes meos et aquam et carnes, et dabo « viris quos nescio unde sint? » Genes. 4: « Factum est post multos dies, ut offerret Cain de « fructibus terrae munera Domino: et non respexit « ad eum Dominus, nec ad munera ejus. » Hujus causa fuit, quia male obtulit, scilicet de tristi corde et facie. Contra hoc valet dulcedo spiritualis, quia falsam dulcedinem mundi facit insipidam, grandem amaritudinem facit dulcem, tristem imaginem reddit jucundam. De primo Proverb. 27: « A « nima saturata calcabit favos. » Gregorius: « Gustato spiritu desipit omnis caro. » Philip. 5: « Quae mihi fuerunt luera, arbitratus sum propter « Christum detrimenta, propter quem omnia arbitratus sum ut stercora. » De beato Augustino dicitur: « Displicebat ei quicquid agebat in saeculo etc. » De secundo Deuter. 33: « Inundatione « maris quasi lac sugent, » idest boni repleti dulcedine spirituali vincunt amaritudinem mundi. 4 Reg. 2: « Eliseus misit sal in aquas amaras, et in « dulces conversae sunt; » sic Christus spirituali sapore sanat amaritudinem. Hinc Stephano lapides torrentis dulces fuerunt, et multis sanctis ardentes prunae, candentes vestes visae sunt tanquam rosae suaves, et multi sancti gaudent in tribulatione. De tertio Dan. 1: « Post dies decem apparuerunt vultus eorum meliores prae omnibus pueris qui « vesebantur cibo regio. » Vultus eorum quos panis satiavit, qui de caelo descendit, dicit Glossa, apparuerunt meliores decore et hilaritate ad benefaciendum. Proverb. 15: « Cor gaudens exhilarat « faciem. » 2 ad Corinth. 9: « Hilarem datorem « diligit Deus. » Tertium circa spiritualem manducationem notandum est effectus hujus manducationis. Et hic est triplex: peccatorum remissio, ab aeterna morte sanatio, vera corporis Christi ad salutem aeternam participatio. De primo « Panem « nostrum quotidianum etc., » idest cibum spiritualem etc. Ambrosius: « Qui manducant spiritualiter virtutem carnis et sanguinis Christi, dicuntur sumere et vere manducare, quia ipsam corporis Christi efficaciam quotidie sumunt, » idest peccatorum remissionem. De secundo Joan. 6: « Hic « est panis de caelo descendens; si quis ex ipso « manducaverit, non morietur, » scilicet morte aeterna. Augustinus super Acta Apostol.: « Patres « nostri eandem escam spiritualem manducaverunt « quam et nos: corporalem vero alteram, idest, « manna, quod significabat Christum, et idem erudentibus efficit. Alii vero qui non crediderunt, « manducaverunt, et mortui sunt aeternaliter, quod « non Moyses et alii boni. Quare? quia cibum invisibilem spiritualiter intellexerunt, spiritualiter « esurierunt, spiritualiter gustaverunt, ut spiritualiter sanarentur, scilicet ab aeterna morte. Similiter et nos spiritualiter manducando ab aeterna « morte liberamur. » De tertio super illud 1 Cor. 10: « Unus panis et unum corpus sumus, qui de uno



« pane participamus, » dicit Augustinus: « Nulli dubium est, tunc quemque corporis sanguinisque dominici participem fieri, quando membrum Christi efficitur, nec alienari ab illius panis consortio, etiam si antequam panem edat, de hoc saeculo in unitate corporis Christi constitutus absecedat; quia illius Sacramenti beneficio non privatur, quando ille cum hoc quod Sacramentum significat, invenitur. Invenitur autem hoc quod Sacramentum significat, quando membrum Christi efficitur, quando credendo et amando spiritualiter manducat, quia sic in corpus Christi vere convertitur, ut cum ipso aeternaliter vivat. »

## CAPUT XX.

*De tertio modo manducandi, scilicet de Sacramentali et spirituali simul.*

« Venite, comedite. Accipite et comedite, » Luc. 22. Tertius modus manducandi corpus Christi est Sacramentalis et spiritualis simul, quo boni Christiani communicant. Unde circa hunc modum possunt tria notari. Primum est multitudo non communicantium, scilicet malorum. Cum enim triplex sit modus manducandi: scilicet sacramentalis tantum, quo mali Christiani manducant, et tamen non manducant: spiritualis tantum, quo boni non manducant, et tamen manducant: sacramentalis et spiritualis simul, quo soli boni Christiani manducant et manducantur. Restat ad divisionis hujus sufficientiam multitudo quaedam malorum, qui nec manducant nec manducantur, quia scilicet corpus Christi non manducant, et ideo aeterna morte peribunt. Istorum tres sunt species sive turmae. Primi infideles, secundi negligentes, tertii contempnentes. Infideles sunt, quorum corda per malitiam fallente diabolo sic excaecata sunt, ut non possint credere et cognoscere divina Sacramenta pro salute mundi mirabili sapientia Dei instituta. Negligentes sunt, qui temporalibus lucris et saecularibus negotiis in tantum se occupant, ut sacram communionem debito tempore sumere negligant. Contempnentes sunt, qui sceleribus tanto amore inhaerent, quod corpus Domini sumere parvipendant. De primis Joan. 6: « Quomodo potest hic nobis carnem suam etc.: » quasi diceret: Non credimus quod possit dare. Sap. 5: « Erraverunt impii; excaecavit enim eos malitia eorum, et nescierunt Sacramenta Dei. » Joan. 5: « Qui incredulus est filio, non videbit vitam, sed ira Dei manet super eum. » De secundis Matth. 22: « Misit rex servos suos vocare invitatos ad nuptias, » dicens: « Ecce prandium meum etc. Illi autem negligentes abierunt alii in villam suam, alii in negotiationem suam. » Glossa, « In villam ire est terreno labori immoderate insistere; in negotiationem vero, terrenis lucris nimis inhiare. Tales qui prandium divini Sacramenti negligunt, quamvis fidem et quaedam opera caritatis habere videantur, tamen nisi poeniteant, peribunt. » Joan. 6: « Nisi manducaveritis carnem filii hominis etc. » Super illud Eph. 3: « Oro ut possitis comprehendere quae sit sublimitas et profundum, » dicit Glossa: « Profunda caritatis sunt Ecclesiastica Sacramenta, quae sunt profunda et investigabilia, et sunt fundamentum caritatis, sine quibus non valet

« caritas, » idest exteriora signa caritatis non valent ad salutem aeternam « sine Sacramentis ea negligentibus. » Num. 9: « Si quis mundus est, et in itinere non fuerit, » idest non habet impedimentum justae necessitatis, « et non fecerit phase, exterminetur anima illa de populis suis, quia sacrificium non obtulit Domino tempore suo. peccatum suum ipse portabit. » De tertiis 2 Paralip. 30: « Perrexerunt cursores cum epistolis ex regis Ezechieae imperio et principum ejus, in universo Israel praedicantes: Revertimini ad Dominum Deum vestrum, et venite ad sacrificium ejus, » scilicet ad faciendum, phase, idest ad suscipiendum corpus Domini. « Et quidam viri acquiescentes consilio venerunt, aliis irridentibus atque subsannantibus eos. » Joan. 5: « Hoc est iudicium, quia lux venit in mundum, et dilexerunt homines magis tenebras quam lucem: erant enim eorum opera mala; » quasi dicat: Justo iudicio excommunicantur et condemnantur qui plus diligunt peccatis inhaerere, quam se praeparare, et Christum suscipere. Canon: « Qui pro sceleribus suis duobus vel tribus annis non communicant, excommunicandi sunt donec poenitentiam agant. » Luc. 14: « Nemo virorum illorum qui vocati sunt, gustabant coenam meam. » Secundum circa hunc modum considerandum, est magnitudo felicitatis bonorum corpus Christi digne sumentium. Et hoc probatur a tribus: ab optima partis electione, a Spiritus Sancti participatione, ab ipsius Christi certa inhabitatione. Primo probatur felicitas digne communicantium magna ex optima partis electione: quia sicut Beata Virgo sibi tribus propositis, scilicet esse matrem et non virginem vel esse virginem et non matrem, vel esse virginem et matrem, ultimam et optimam, scilicet esse matrem et virginem simul elegit; sic inter tres modos corpus Christi manducandi elegerunt optimam partem, scilicet sacramentaliter et spiritualiter simul. Hanc ultimam partem, scilicet de primo modo comedere sacramentaliter, et de secundo modo comedere spiritualiter eligunt; et sic ex utraque parte quod melius est comedunt, et ideo multum felices sunt. Eccles. 2: « Laudavi igitur laetitiam, quod non esset homini bonum sub sole, nisi quod comederet et biberet atque gauderet; » quasi dicat, Expertus sum plurima genera gaudiorum et delectationum carnis et mundi, et haec omnia vanitas, et finis eorum moeror et luctus: unde laudavi praeter omnibus laetitiam, scilicet veram, idest, testimonium bonae conscientiae, et quod non esset homini sub sole, idest melius in hoc mundo, nisi quod comederet panem, scilicet qui de caelo descendit, et biberet vinum quod laetificat cor hominis, scilicet sanguinem Domini. Secundo probatur felicitas istorum magna, a Spiritus Sancti vera participatione. Psal. 80: « De petra melle saturavit eos, » qui scilicet felices de corpore Christi sugunt dulcedinem Spiritus Sancti. Sapient. 12: « Quam suavis est Domine, spiritus tuus in nobis! » qui scilicet fluit in nobis de tuo corpore. Augustinus: « Participatione corporis et sanguinis Christi homo vivit non sumens tantum Sacramentum, quod et mali faciunt, sed pertingens usque ad spiritus participationem, ut in corpore Domini tamquam membrum maneat, et ejus spiritu vegetetur. » Tertio probatur ab ipsius Christi certa inhabitatione. Joan. 6: « Qui manducat carnem meam etc. »



Hilarius: « Accepta carne Domini et hausto sanguine id efficitur, ut nos in ipso, et Christus « in nobis sit: est enim in nobis Christus per carnem, dum carnem ejus accipimus, et in eo sumus. dum se cum hoc quod nos sumus, in « Deo est. » Tertium circa hunc modum considerandum est ratio remanducationis digne manducantium; de qua remanducatione dicitur quod tales manducant et manducantur. Et hujus ratio est, quia dum corpus Domini digne a fidelibus manducatur, non ipsum ut alius eibus in manducantem convertitur; sed e converso illud vere manducans in illud spiritualiter mutatur: nam manducantem se Dominus sui corporis membrum facit, et sibi incorporans per caritatem unit, et imagini suae bonitatis similem efficit. 1 Corinth. 10: « Unum « corpus multi sumus, qui de uno pane participamus. » Item 12: « Vos estis corpus Christi et « membra de membro. » Quod vero manducando corpus Christi non in nobis, sed nos in illo convertimur, triplici similitudine probatur. Prima sumitur de virtute amoris nostri. Haec est enim vis amoris, transformari cor amantis in amatum, id est amati fortunae prosperae et adversae assimilari. Hugo: « Ea vis amoris est, ut talem te esse necesse sit, quale id est quod amas; et cui per affectum conjungeris, in illius similitudinem ipsa « quodammodo dilectionis societate transformaris. » Cantic. 8: « Pone me ut signaculum super cor « tuum, » super eor tamquam super ceram calidam, puram et mollem, aptam suscipere impressam imaginem. Super cor ergo calidum amore Dei, purum munditia sui, molle pietate proximi, corpus Christi ut sigillum ponitur, non ut ipsum quod immutabile est, in nos mutetur, sed nos in imaginem bonitatis ejus transmutemur. Secunda similitudo ad idem sumitur de virtute rei majoris. Nam si gutta aquae in magnum vas vini fundatur, virtute multitudinis vini aqua ex toto in illud mutatur; sed virtus Dominici corporis ineffabilis est magnitudinis, et nos multum exigui respectu illius. Psalm. 146: « Magnus Dominus etc. » Idem « Substantia mea tanquam nihilum ante te: » Isa. 40: « Ecce gentes quasi stilla situlae. » Magnitudo itaque virtutis et dulcedinis Christi infusa exiguo et humili cordi nostro, vincit illud, et a se deficere faciens in illam convertit, ut jam non mundanis hominibus, non nobis ipsis, sed Christo in voluntate, sermone, bona conversatione similes simus. Psalm. 118: « Defecit in salutare tuum anima. » Tertia similitudo ad idem sumitur de virtute rami arboris. Haec est enim proprietas sureuli bonae arboris, si trunco inseratur etiam sylvestri, quod naturali virtute praevalens illius amaritudinem in suam dulcedinem et nobilitatem convertit, et similem sibi bonum fructum proferre facit; sic corpus Christi nobis insitum defectus nostros evacuat, et in suam nos bonitatem trahit, ut quales ipse frondes, flores et fructus justitiae facit, tales et nos per eum faciamus. Hinc Spiritus Sanctus dicit Ezechiel. 17: « Sumam de medulla cedri sublimis, et de vertice ramorum ejus, et plantabo in montem excelsum, « et rumpet in germen, et faciet fructum. » Cedrus sublimis est Deus Pater, rami eminentiores antiqui patres, vertex ramorum beata Virgo, medulla cedri aeterna Dei sapientia, pars de ramorum vertice, caro sumpta de Virgine. Spiritus ergo sanctus medullam cedri et partem de summo ramo sumpsit,

*S. Th. Opera omnia. V. 17.*

quia Christi incarnationem fecit, et hunc quasi sureculum nobilissimum plantat in montem excelsum, cum fidelibus a terrenis desideriis ad caelestia elevatis Dominici corporis tribuit Sacramentum. Hinc fructus erupit, quia cor fidele propria amaritudine relicta vitiorum, virtute corporis Domini similes Christo spirituales frondes, flores, fructus virtutum et bonorum operum facit. Hinc dictum est Augustino: « Cibus sum grandem. » Cant. 2: « Trahe « me post te, » me scilicet mutando in te violentia meae dilectionis, magnitudine tuae dilectionis, virtute firmae insertionis, ut non maneat in me radix amaritudinis; sed praevaleat operando in me virtus et dulcedo tuae bonitatis. Gal. 6: « Vivo ego, jam « non ego etc. »

## CAPUT XXI.

*De duodecim effectibus sive fructibus Corporis Christi contra nostros duodecim languores; et primo de quatuor primis.*

« Venite, comedite etc. » Thema speciale, « Pater meus usque modo operatur etc. » Joan. 5. Aliud. « Altissimus de terra medicinam plasmavit, » Ezechie. 58. Thema proprium, « Benedictus fructus « ventris tui, » Luc. 1. « Ascendam in palmam, » id est in crucem, « et apprehendam fructus ejus, » Cantic. 7. Sextum principaliter circa Sacramentum Dominici corporis notandum, est effectus bonitatis suae, sive virtus spiritualis. Nam quia parentes primi per vetiti a Deo poni gustum corrupti multas infudere miseras suo generi, necessarium fuit medicamento Salvatoris miseriis subveniri. Circa quod sciendum, quod nostrae miseriae sunt tres generales; scilicet vincula culpae, defectus gratiae, mortis plagae. De primo Psalm. 118: « Funes peccatorum circumplexi sunt me: » 2 Paral. 56, in oratione Manasse: « Incurvatus sum multo vinculo « ferri, » id est peccati. De secundo Psalm. 158: « Imperfectum meum viderunt etc. » Item Psalm. 142: « Anima mea sicut terra sine aqua tibi, » id est sterilis sine fluentia gratiarum et germine virtutum. De tertio Psalm. 17: « Circumdederunt « me dolores mortis » Item Psalm. 58: « Amore a « me plagas tuas: » Job 16: « Inimicus meus irruit in me quasi gigas, concidit me vulnere suo per vulnus. » In qualibet istarum trium miseriorum generalium intelliguntur quatuor mala specialia, quasi duodecim languores speciales, ad quos curandos ordinantur duodecim dominici corporis effectus, sive fructus. Apocal. 22: « Ostendit mihi Angelus « lignum vitae afferens fructus duodecim per singulos « menses, » id est ad curandos nostros duodecim defectus, sive languores. Psalm. 102: « Benedic anima « mea Dominum, qui propitiatur omnibus iniquitatibus tuis etc. » Prima quatuor mala nostra sive languores sunt quasi vincula culpae, quibus stringuntur animae: scilicet daemonis tentatio, fomitis repugnatio, cordis macula, creatoris offensa. Contra haec valet fructus Virginis, scilicet corpus Salvatoris. De primo languore ad Ephes. 6: « Induite vos armaturam Dei, ut possitis stare adversus insidias diaboli: » Ezechie. 21: « Multae « sunt insidiae dolosi, » scilicet de diversis vitiis, « et multis modis tentat. » 1 Petr. 5: « Vigilate, « quia adversarius vester etc. » Glossa, « circuit « tanquam hostis, clausos obsidens muros, ex-

« plorat an sit aliqua pars murorum minus stabilis, ejus aditu ad anteriora penetret. » Offert oculis formas illicitas, et faciles voluptates, ut usu destruat castitatem; aures per canora tentat, ut Christianum molliat rigorem; linguam convitio provocat, manus injuriis lacescentibus ad eadem instigat, honores terrenos promittit, ut caelestes adimat. Psal. 142: « Persecutus est inimicus animam meam. » De secundo Galat. 5: « Caro concupiscit adversus spiritum. » Ad Rom. 7: « Video aliam legem in membris meis repugnantem legi mentis meae. » Augustinus: « Video aliam legem, idest fomitem peccati in membris meis, ut in oculo ad concupiscendum, in lingua ad maledicendum, in manu ad malefaciendum, et sic de aliis: repugnantem legi mentis meae, idest legi Dei. De tertio, Jerem. 2: « Si laveris te nitro, tamen maculata es in iniquitatibus tuis coram me: » Proverb. 20: « Quis potest dicere, mundum est cor meum, purus sum a peccato? » Eccles. 7: « Non est homo justus in terra qui faciat bonum et non peccet. » De quarto Deut. 9: « Memento ne obliviscaris quomodo ad iracundiam provocaveris Dominum Deum tuum. » Et quanto major culpa, tanto major contra peccatorem ira divina. Zach. 4: « Ego iratus sum parum, ipsi autem adjuverunt in malum. » Augustinus: « Justitia Dei non sinit esse dedecus culpae sine decore vindictae. » Contra haec quatuor mala ordinantur quatuor dominici corporis fructus primi, qui nos liberant a vinculis culpae: daemonem fugat, fomitem refrigerat, maculam cordis mundat, iram Dei placat. De primo fructu Tob. 6: « Si cordis particulam super carbones posueris, fumus ejus extricat omne genus daemonum. » Flumen, in quo pisces sunt, significat mundum: omnes pisces ejus, diversa genera hominum: piscis ille magnus, gentem Judaeorum: cor piscis, quasi membrum nobilissimum, et ex quo vita procedit, beatam Virginem: particula cordis significat corpus Salvatoris de Virgine sumptum. Hoc debet super carbones poni, idest fidelibus accensis, igne amoris donari: tunc fumus ejus, idest virtus spiritualis, fugat tentationes daemonum. Psal. 67: « Exurgat Deus, et dissipentur inimici ejus etc. » De secundo fructu Psal. eod.: « Selmon mons Dei, mons pinguis. » Mons Dei est Christus, Selmon interpretatur umbra. Christus igitur est umbra nostri refrigerii, quia, ut dicit Glossa, « de corpore Christi manat umbra gratiae, quae nobis defensaeculum est contra incentiva vitiorum, et carnalis concupiscentiae: » unde dictum est de Virgine beata: « Virtus Altissimi obumbrabit tibi, » idest umbram faciet tibi: umbra enim fit de corpore et lumine. Lumen est Verbum Dei, corpus caro Christi. Accessit lumen corpori, idest Verbum carni. « Verbum enim caro factum est. » Dum ergo fidelis corpus Christi sumit, spirituale refrigerium percipit quasi de umbra gratiae, quae de ipso fluit. Osee 14: « Ego quasi ros, et Israel germinabit quasi liliun. » De tertio fructu Isa. 6: « Volavit ad me unus de Seraphim, et in manu ejus calculus quem foreipe tulit de altari, et dixit: Ecce tetigi labia tua, et auferetur iniquitas tua, et peccatum tuum mundabitur. » Lapis iste praecisus sumptus de altari, significat corpus Christi; et dum eo os cordis tangitur, peccatum veniale mundatur. Gregorius: « Dominus dedit nobis Sacramentum salutis, ut qui quotidie peccamus, et ille jam mori pro

peccato non potest, per hoc remissionem consequamur. » De quarto fructu Prov. 21: « Munus absconditum extinguit iras: » Levit. 2: « Si craticula fuerit oblatio similia conspersa oleo, tollet memoriale de ipso, et adolebit super altare in odorem suavitatis Domino. » Panis in craticula coctus et oblatus, et aspersus oleo, Christus in cruce pro nobis passus et totus unctus Spiritu Sancto. Hujus sacrificii memoriale est hostia, quae offertur in memoria passionis dominicae. Haec debet et super altari adoleri, idest, accendi, quia in corde fidei cum fervore desiderii et devotionis suscipi. Ille odor suavitatis est Domino, idest tam gratus Deo, ut ob ejus gratiam remittat iram suam, et nos sibi reconciliet, et ad aeternam pacem perducatur. Amen.

## CAPUT XXII.

*De quatuor fructibus secundis.*

« Venite, comedite etc. » Secunda quatuor mala nostra, sive languores, sunt quatuor defectus gratiae, quibus multae laborant animae: scilicet defectus in cognitione sui, in dilectione proximi, in sapore spirituali, in consumatione boni. Contra haec valet fructus ventris Virginis, corpus Salvatoris. De primo languore, Genes. 1: « Tenebrae erant super faciem abyssi: » quia ab antiquo cor hominis obvolutum fuit ignorantia sui. Jerem. 14: « Pravum est cor hominis et inscrutabile, quis cognoscet illud? » Psal. 18: « Delicta quis intelligit? » etc. quibus scilicet vel alios peccare feci, vel aliorum peccatis consensi. Matth. 7: « Quid vides festucam in oculo fratris tui, et trabem in oculo tuo non vides? » De secundo Matth. 25: « Quoniam superabundavit iniquitas, refrigescet caritas multorum: » Eccles. 45: « Frigidus ventus Aquilo flavit, et gelavit crystallus ex aqua. » Defectus amoris probatur ad exterioribus signis. 1 Joan. 5: « Qui habuerit substantiam hujus mundi et viderit fratrem suum necessitatem patientem, et clauserit viscera sua ab eo, quomodo caritas Dei manet in eo? » Jerem. 9: « Unusquisque a proximo suo se custodiat, et in omni fratre suo non habeat fiduciam: quia omnis frater supplantans supplantabit, et omnis amicus fraudulenter incedet, et vir fratrem deridebit, et veritatem non loquetur. » Prov. 10: « Pondus et pondus, mensura et mensura: utrumque abominabile est apud Deum. » Glossa: « Diversum pondus et diversam mensuram habet in domo sua, ut aliter sibi, aliter proximo metiatur, qui in suis semper actibus quae laudentur, in proximi quae vituperentur quaerit; sed qui in temporalibus sibi majorem, proximo minorem mensuram dare studet, quia defectum dilectionis habet, Deo displicet: similiter est de eo qui malo verbo vel facto proximum contristatur, laedit vel damnificat. » De tertio Jerem. 51: « Omnis qui comederit uvam acerbam, obstupescunt dentes ejus: » Gregorius: « Quid est uva acerba, nisi peccatum? Uva quippe acerba est fructus ante tempus. Quisquis enim praesentis vitae delectationibus satiari desiderat, quasi fructus ante tempus comedere festinat. Sed qui uvam acerbam comedit, dentes ejus obstupescunt: quia qui praesentis vitae et mundi delectationibus pascitur, interni sensus ejus ligantur, ut jam spiritualia

« sapere nequeant. » Hoc figuratum est Num. 11, in populo Israel qui in Aegypto carnibus cum allio et cepis satiatus fuerat, et post in deserto talia concupiscens, panem caelestem, scilicet manna dulcissimum cum nausea respuebat. I Corinth. 2: « Ani-  
 « malis homo non percipit ea quae sunt Dei. » Augustinus: « Animalis dicitur carnalis homo qui  
 « fertur dissoluta lascivia animae suae. » De quarto Gal. 5: « Sic stulti facti estis, ut cum spiritu cae-  
 « peritis, nunc carne consummemini. » Prover. 2:  
 « Relinquunt iter rectum, et ambulant per vias  
 « tenebrosas. » Luc. 8. « Qui supra petram, hi sunt  
 « qui cum audiunt verbum, cum gaudio suscipiunt,  
 « sed radicem non habent, » scilicet stabilitatem  
 firmæ voluntatis, « quia ad tempus credunt etc. » Can.  
 7: « Mane surgamus, et videamus si floruerit vinea  
 « flores fructum pariunt. » Glossa: Non est intuendum  
 si vinea floret, sed si flores ad partem fructuum con-  
 valescunt: quia scilicet non est mirum si quis bona  
 inchoat, sed valde mirabile est si intentione bona  
 in bono opere perseverat. Contra haec quatuor ma-  
 la ordinantur quatuor secundi fructus corporis Do-  
 mini, qui nos hic in gratia perficiunt. Intellectum  
 enim ad se cognoscendum illuminat, voluntatem  
 sive affectum in dilectione Dei inflamat, memo-  
 riam spirituali dulcedine delectat, totum hominem  
 in bono confirmat. De primo fructu Prov. 24:  
 « Comede fili, mel, quia bonum est. » Mel est sa-  
 pientia Dei increata in cibum dulcem nobis prae-  
 parata. Hoc bonum est ad spiritualem medicinam  
 quia illuminat mentem. I Reg. 14: « Vidistis quia  
 « illuminati sunt oculi mei, eo quod gustaverim  
 « paululum de melle? » Isa. 7: « Butyrum et mel  
 « manducabit omnis qui relietus fuerit, ut sciat  
 « reprobare malum et eligere bonum. » Psal. 26:  
 « Dominus illuminatio mea: accedite ad eum, et  
 « illuminamini, » scilicet ad cognitionem vestri. De  
 secundo fructu dicitur Isa. 6, quod Angelus tulit  
 calculem de altari, et tetigit os Isaiae. Calculeus est  
 carbunculus, sic dictus, quia ignitus ut carbo: et  
 significat corpus Domini de altari sumptum, et ca-  
 ritate inflamat, quia accendit amore corda fi-  
 delium. De tertio Psal. 35: « Gustate et videte,  
 « quoniam suavis etc. » Eccles. 49: « Memoria  
 « Josiae in compositione odoris facta opus pigmen-  
 « tarii in omni ore, quasi mel indulebitur. » Josias  
 qui interpretatur fortitudo Domini, significat Chri-  
 stum, dicit Glossa: « Memoria Christi, idest Sacra-  
 « mentum corporis ejus, quod in memoriam sui  
 « jussit consecrari, opus est odoriferum veri pigmen-  
 « tarii, idest Spiritus Sancti, qui illud composuit  
 « de pretiosissimis speciebus, scilicet de carne vir-  
 « ginali et sapientia Dei. illic quasi mel in ore  
 « cordis indulecoratur, si virtus ejus in salutem  
 « humani generis pie cogitatur. » Cant. 2: « Sub  
 « umbra illius quem desiderabam sedi. » Primo  
 fidelis anima Christum desiderans aestuat spiritu  
 et siti. Secundo umbram desiderii in spe fructum  
 obtinendi sentit. Tertio sedet, exspectat, orat ut se  
 totum ad ipsam reficiendam et vivificandam fructus  
 infundat. Quarto infusam ejus dulcedinem suaviter  
 gustat. Nota. Sed diceret aliquis, Ecce saepius ut  
 possum me praeparo, corpus Domini sumo, sed  
 nihil sentio solatii spiritualis dulcedinis. Respondeo.  
 Cibis iste, sive fructus, medicina est hominis. Unde  
 sicut medicus peritas quandoque quibusdam dat me-  
 dicinam dulcem palato corporis, et quandoque non  
 sic, sed dulcem palato mentis, quae quamvis non

gutturi, tamen bene sapit rationi, pro eo quod sa-  
 nam mentem delectat; sic Dominus dat suis fideli-  
 bus dulce semper corpus: sed dulcedinem suam  
 alio modo istis, alio istis, prout cuilibet expedire  
 novit. Hinc est, quod quidam dulcedinem istam  
 sapiunt per affectum, et ardentiori delectantur de-  
 votione; et alii eandem dulcedinem sapiunt per  
 piium intellectum, et sufficienti reficiuntur utilitate  
 in eo quod credunt et intelligunt per hunc cibum  
 sanctum veram vitam obtinere. Igitur quamvis non  
 sapis dulcedinem Domini primo modo, idest per  
 affectum firmæ devotionis; sapis tamen secundo  
 modo, scilicet per intellectum multae utilitatis. De  
 primo Isa. 55: « Audite audientes me, et comedite  
 « bonum. » Ambrosius: « Panis candidissime ha-  
 « bens omne delectamentum, et omnis saporis sua-  
 « vitatem, qui nos semper reficit, comedat cor  
 « meum et dulcedinem saporis etc. Panis dulcis-  
 « sime sana panis etc. ut sentiat suavitatem amoris  
 « tui. Sana illud etc. » De secundo est illud, « Fructus  
 « ejus dulcis gutturi meo, » idest pia et fidei  
 menti, quae credit et intelligit hunc cibum sanctum  
 sibi esse utilissimum. Glossa: « Dulcis fructus gut-  
 « turi cordis, quia in eo intelligit causam vitae,  
 « dum etiam corporaliter percipit. » Haec dulcedo  
 valet contra tria mala quae sunt in mundo. Require  
 supra sermone 19: « Postmodum de quarto fru-  
 « ctu. » Psal. 105: « Panis cor hominis confirmet, »  
 quia scilicet corpus Christi fideles suos in bona vita  
 confirmat et confortat. Finaliter 5 Reg. 19: « Co-  
 « medit Elias panem quem Angelus ministravit etc. »  
 Oreb interpretatur mensa. Mons ergo iste est mons  
 mensae Dei, et significat satietatem caelestis gloriae.  
 Panis itaque corporis Christi confortet nos in vita  
 bona et bono opere quadraginta diebus et noctibus,  
 idest toto tempore praesentis poenitentiae usque ad  
 montem et mensam Dei, idest quousque veniamus  
 ad altitudinem securitatis, et satietatem dulcedinis  
 aeternae gloriae. De his quatuor fructibus simul per  
 figuram dicitur 4 Reg. 4: « Eliseus incubuit super  
 « puerum, posuitque os suum super os ejus, et  
 « oculos super oculos ejus, et manus super manus  
 « ejus, et calefacta est caro pueri. » Per puerum  
 fidelis anima, per Eliseum Dominus significatur,  
 qui sicut sigillum cerae, sic se conjungit animae,  
 oculos suos super oculos ejus ponit, quia intellectum  
 illuminat; carnem calefacit, quia affectum caritate  
 inflamat: os super os ponit, quia gustum memo-  
 riae dulcedine spirituali delectat: manus super ma-  
 nus ponit, quia in bono odore usque in finem  
 conservat, et sic totum hominem perficit, ut ad  
 vitam aeternam perducat. Amen.

## CAPUT XXIII.

*De quatuor fructibus tertiis*

« Venite, comedite. » Vel similia de effectu.  
 Tertia quatuor mala nostra, sive languores, sunt  
 quasi mortis plagae, quibus multae gravantur ani-  
 mae: scilicet debitum mortis aeternae, defluxus  
 bonae vitae, exilium mundanae miseriae, incineratio  
 corporalis materiae. Contra haec valet fructus Virginis,  
 corpus Salvatoris. De primo languore ad Rom. 6: « Ego  
 « carnalis homo, venundatus sub peccato. » Primi enim  
 parentes vendiderunt se et suam progeniem ad perpe-  
 tuam servitutem diaboli, quod est ad aeternam  
 mortem pro modica delectatione peccati. Genes. 2:  
 « De ligno scientiae boni et mali ne comedas. in



« quaecumque enim die comederis ex eo, morte  
 « morieris, » idest te et posteritatem tuam ad  
 aeternam mortem obligabis: ad Roman. 6: « Per  
 « unum hominem peccatum in hunc mundum in-  
 « travit, et per peccatum mors. » Mors, idest cer-  
 titudo mortis temporalis, et debitum aeternae mortis,  
 nisi subveniret redemptio Salvatoris. Ephes. 2:  
 « Eramus natura filii irae, sicut et ceteri debitores  
 « aeternae mortis. » De secundo Psal. 101: « Dies  
 « mei sicut umbra declinaverunt. » Item Psal. 11:  
 « Salvum me fac Domine, quoniam defecit sanctus: »  
 Genes. 44: « Dies peregrinationis meae centum  
 « triginta annorum sunt parvi et mali, et non  
 « pervenerunt ad dies patrum meorum. » Item  
 Genes. 6: « Sensus et cogitatio humani cordis ad  
 « malum prona sunt ab adolescentia sua. » De  
 tertio Genes. 5: « Emisit Dominus Adam de para-  
 « diso voluptatis, ut operaretur terram. » Psalm.  
 119: « Heu mihi, quia incolatus meus etc. » Ad  
 Hebr. 11: « Juxta fidem defuncti sunt omnes non  
 « acceptis repromissionibus, sed a longe eas aspi-  
 « cientes, et salutantes, et confitentes, quia pere-  
 « grini et hospites sunt super terram. » Qui enim  
 hoc dicunt, significant se patriam inquirere: et  
 siquidem illius meminissent de qua exierant, ha-  
 bebant utique tempus revertendi: nunc autem ap-  
 petunt meliorem, idest, caelestem. Hinc flens canit  
 Ecclesia, « Salve Regina misericordiae. » Glossa  
 super Canon. Jacobi: « Ne indignemini, si mali in  
 « mundo florent, si vos patimini; quia non est  
 « Christianae dignitatis in temporalibus exaltari,  
 « sed deprimi potius: mali enim nihil habent in  
 « caelo; vos nihil in mundo. Unde spe illius boni  
 « ad quod tenditis, quicquid in via contingat, gau-  
 « dere debetis. » De quarto Genes. 5: « In sudore  
 « vultus tui vesceris pane tuo, donec revertaris in  
 « terram de qua assumptus es, quia pulvis es, et  
 « in pulverem reverteris. » Job 4: « Memento,  
 « quaeso, quod sicut latum feceris me. » Eccles.  
 14: « Omnis caro foenum, et sicut folium in ar-  
 « bore viridi. » Glossa: « Sicut foenum in terra,  
 « et folium in arbore crescit, virescit, marcescit,  
 « arescit, et dejicitur; ita caro nostra. » Contra  
 haec quatuor mala ordinantur quatuor circumstan-  
 tiae fructus Dominici corporis, quae salvant nos a  
 plagis mortis. Ab aeterna enim morte liberat, me-  
 rita bonae vitae multiplicat, ad patriam vitae de-  
 ducit, ad aeternam vitam corpus resuscitat. De primo  
 fructu Joan. 6: « Ego sum panis vitae: patres ve-  
 « stri manducaverunt manna, et mortui sunt. Hic  
 « est panis de caelo descendens, ut si quis ex  
 « ipso manducaverit, non moriatur; » quia scilicet  
 non solum ab aeterna morte, quae est in inferno,  
 sed etiam ab illa quae fuit in limbo, virtute cor-  
 poris Christi liberatur. Et insuper haec brevis mors  
 corporis in vitam aeternam, quae est in caelo, ei-  
 dem commutatur. Oseae 13: « De manu mortis  
 « liberabo populum meum. » De secundo fructu,  
 Joan. 6: « Panis quem ego dabo, caro mea est pro  
 « mundi vita, » quia pro multiplicandis meritis  
 bonae vitae. Sicut enim puer parvulus per cibum  
 corporalem crescit magnitudine, robore, et decore;  
 sic fidelis per cibum spirituales proficit meritis  
 bonae vitae. Joan. 10: « Ego sum pastor bonus:  
 et infra: « Ego veni ut vitam habeant, et abun-  
 « dantius habeant. » Psal. 137: « Multiplicabis  
 « in anima mea virtutem. » Joan. 14: « Qui ma-  
 « net in me, et ego in eo etc. » De tertio fructu

Joan. 6: « Ego sum panis vivus etc. » idest re-  
 ducam eum de exilio praesentis miseriae ad cae-  
 lum. Ambrosius: « Dominici corporis figura prae-  
 « cessit, quando Dominus in deserto patribus manna  
 « pluit; quia sicut ille panis populum per desertum  
 « ad terram promissionis duxit, haec esca caelestis  
 « fideles hujus saeculi desertum transeuntes in  
 « caelum subvelit. Unde recte viaticum appellatur,  
 « quia in via reficiens in patriam usque perducit. »  
 Jerem. 12: « Reducam virum ad hereditatem  
 « suam. » Proverb. 5: « Lignum vitae est his qui  
 « apprehenderint eam. » Glossa, « sicut in Para-  
 « diso fuit lignum vitae, ita per sapientiam Dei,  
 « quae est Christus, vivificatur Ecclesia, cujus nunc  
 « Sacramento corporis et sanguinis vitae aeternae  
 « accepit pignus. » Si ergo corpus Christi sum-  
 ptum pignus est vitae aeternae, et pignus non di-  
 mittitur donec id pro quo impignoratur accipitur,  
 profecto per hoc ad vitam aeternam perducimur.  
 De quarto fructu, Joan. 6: « Qui manducat car-  
 « nem meam, et bibit meum sanguinem etc. »  
 usque in « novissimo die. » Verum enim hominem  
 resuscitabit. 1 Corinth. 15: « Sicut per unum hominem  
 « mors, » scilicet omnium, « ita per unum ho-  
 « minem, » scilicet Christum, « resurrectio mor-  
 « tuorum. » Sed hoc valde dissimile: unde sequitur:  
 « Omnes quidem resurgemus, sed non omnes im-  
 « mutabimur: » ad Rom. 14: « Omnes stabi-  
 « mus ante tribunal Christi etc. » 1 Corinth. 15:  
 « Omnes nos manifestari oportet ante tri-  
 « bunal Christi, ut referat unusquisque propria  
 « corporis, prout gessit, sive bonum sive malum;  
 « sed non omnes immutabimur » quia soli electi  
 propter corporis Christi participationem, scilicet  
 sacramentalem, vel spiritualem, surgent sole pul-  
 chriores: reprobi vero resurgent infirmi et defor-  
 mes. Daniel. 12: « Qui dormiunt in terrae pulvere,  
 « evigilabunt, alii in vitam aeternam, qui et ful-  
 « gebunt quasi splendor firmamenti: et alii in  
 « opprobrium, » ut vivant semper: quos scilicet,  
 ut dicitur Isa. 15: « Torsiones et dolores ut par-  
 « turientes tenebunt, et facies combustae vultus  
 « eorum. » Quale semen est quod cadit in terra,  
 talis fructus surgit de terra. Similiter qualis est  
 vita tua dum morieris, talis erit tempore suo re-  
 surrectio tua. Seminatur zizania, et surgit ex ea  
 deformis et odibilis herba: seminatur triticum, re-  
 surgit frumentum pulchrum. Haec figurata sunt,  
 Gen. 14, in somnio regis: « Septem spicae pullu-  
 « labant in culmo uno plenae atque pulcherrimae,  
 « et septem aliae de stipula oriebantur tenues et  
 « percussae uredine, » idest vento urente, qui sei-  
 licet eas infirmavit et denigravit. Septem spicae  
 deformes signant omnes reprobos cum magna de-  
 formitate in iudicio apparentes; septem pulcherri-  
 mae, omnes electos cum gloriosis corporibus re-  
 surgentes. De primo Nahum 5: « Ecce ego ad te  
 « malefica, » idest universitas damnatorum, « dicit  
 « Dominus et revelabo pudenda tua in facie tua,  
 « et ostendam genti nuditatem tuam, et regibus  
 « ignominiam tuam. » De secundo Phil. 5: « Sal-  
 « vatorem expectamus etc. » 1 Corinth. 15: « Se-  
 « minatur corpus corruptibile, surget incorrupti-  
 « bile: seminatur in infirmitate, surget in gloria:  
 « seminatur corpus animale, surget spirituale; se-  
 « minatur in ignobilitate, surget in gloria. » Amen.



## CAPUT XXIV.

*De tribus effectibus principalibus.*

« Venite, comedite etc. » vel alia similia de effectu vel fructu. Sacrosanctum corpus Domini tres habet effectus principales. Primus est peccatorum destructio. Secundus bonorum spiritualium largitio vel augmentatio. Tertius animarum confortatio, vel vitae aeternae collatio. De primo Dan. 2: « Videbam donec abscisus est de monte lapis sine « manibus, et percussit statuam, » idest figmenta peccatorum, « et comminuit eam. » 1 Joan. 5: « In hoc apparuit filius Dei, ut dissolvat opera « diaboli. » De secundo Prov. 12: « Qui bonus est, « hauriet sibi gratiam a Domino, quia ipse fons totius gratiae. » Eccl. 24: « In me omnis gratia vitae « est, » usque « ad me omnes ». De tertio Psal. 105: « Panis cor hominis confirmat. » Genes. 18: « Potam nam lucellam panis, et confortate cor vestrum. » Primus effectus principalis corporis Christi est destructio peccatorum; et hoc ad tria: ad dealbandum maculam cordis, ad mitigandum stimulum carnis, ad resistendum cogitationibus pravis. De primo Psalm. 67: « Nive dealbabuntur in Selmon. » Selmons mons Dei est, et interpretatur umbra, et sicut dicit Glossa, « Corpus Christi significat; quia sicut umbra « sit de lumine et corpore, ita in corpore Christi « est lumen divinitatis et caro humanitatis. » In hoc monte umbroso super nivem dealbabuntur fideles, quia virtute corporis Christi incomparabiliter a macula peccatorum emundantur. Isa. 45: « Ego « sum ipse qui deleo iniquitates tuas propter me. » De secundo Exod. 17: « Mane ros jacuit in similitudinem pruinae super terram. » Glossa: « Panis caelestis in similitudinem rosis et pruinae « semper apparebat, quia corpus Christi a fervore « peccatorum refrigerat. » Psalm. 88: « Tu dominaris potestati maris. » Mare significat multas miseras hominis, motus fluctuum stimulum carnis. De tertio Cant. 1: « Fasciculus myrrhae dilectus « meus mihi. » Myrrha servat corpora a vermibus incorrupta; sic corpus Christi corda fidelium a pravis cogitationibus illaesa: quia cum dilectum Dominum suscepimus, si fasciculum myrrhae, idest amaritudinem passionis eius pia mente cogitamus, vermes malarum cogitationum a nobis repellimus. Secundus effectus principalis est bonorum spiritualium augmentatio; et hoc ad tria: ad decorem castitatis, ad fervorem caritatis, ad saporem suavitatis. De primo Daniel. 1: « Apparuerunt vultus eorum meliores prae omnibus « pueris qui vescabantur cibo regio. » Glossa: « Vultus eorum quos panis satiabat, qui de caelo « descendit, apparuerunt meliores, decore scilicet « castitatis ». Unde et pueri illi casti fuerunt. Cant. 7: « Quam pulehra es et decora carissima in delitiis! » Sicut enim bonum nutrimentum facit ad decorem corporis, sic deliciae cibi spiritualis ad pulehritudinem castitatis. Ezechiel. 56: « Similam « et mel et oleum comedisti, et decora facta es « vehementer. » De secundo Eccl. 52: « Gemmula « carbunculi in oramento arri. » Glossa: « Ardentium gemmarum principatum tenet carbunculus, sic dictus, quia ignitus, ut carbo. Significat autem corpus Christi, quod cor accipientis « et ornat castitate, et inflammat caritate. » Psalm. 49: « Ignis a facie eius exarsit, carbones etc. »

Hinc 4 Reg. 4: « Eliseus incumbens incurvavit « se super puerum, et calefacta est caro pueri. » De tertio Genes. 49: « Aser pinguis panis praebens delicias regibus. » Sapient. 16: « Angelorum « esca nutriti populum tuum, et panem de caelo « praestitisti illis, omne delectamentum in se habentem, et omnis saporis suavitatem: substantiam « enim tuam et dulcedinem, quam in filios habes, « ostendebas. » Cant. 5: « Comedi favum cum « melle meo, » idest dulcedinem carnis Christi cum dulcedine divinitatis: « bibi vinum cum lacte « meo, » idest dulcedinem sanguinis Christi cum dulcedine spiritualis consolationis. Tertius effectus principalis est animarum confortatio: et hoc ad tria: ad debellandum daemones, ad sustinendum adversa, ad operandum bona. De primo 1 Reg. 50: « Invenirent viri David virum Aegyptium in agro, « et adduxerunt eum ad David, dederuntque ei « panem ut comederet, et refocillatus est, et adduxit David ad latroneulos, et percussit eos. » Vir Aegyptius significat peccatorem, quem praedicator adducunt ad Christum per conversionem; qui pane Domini corporis confortatus fit dux exercitus Christi ad debellandos daemones. Ephes. 6: « Confortamini in Domino, et in potentia virtutis eius, « ut possitis stare adversus insidias diaboli. » 1 Reg. 7: « Factum est autem cum offerret Samuel « agnum in holocaustum, exterruit Dominus Philiistinim, et caesi sunt a filiis Israel. » De secundo 5 Reg. 22: « Mitte virum justum in carcerem, et « sustenta eum pane tribulationis. » In carcere mittitur, qui in hoc mundo adversa patitur. Panis tribulationis quo sustentatur, est panis vitae aeternae, quo ad sustinenda adversa confortatur. Act. 24, dicit Apostolus existentibus in periculo maris: « Rogo vos accipere cibum pro salute vestra: et « omnes sumpserunt cibum confortati, et animae « quiores facti sunt. » Ad Philip. 5: « Omnia possum in eo qui me confortat. » De tertio Prov. ult.: « Mulier fortis de nocte surrexit, deditque « praedam domesticis suis, et cibaria ancillis suis. » Mulier fortis est Ecclesia de gentibus: haec de nocte surrexit, quia per auditum verbi de tenebris peccatorum ad Christum se convertit: praedam domesticis, et cibaria ancillis dedit, quia Sacramenta Judaeae missa, quae suscipere noluit, haec cum omni desiderio rapuit, et de eis familiam suam, idest fideles pavit. Et hoc ut eos ad tria bona confortaret: ad opera misericordiarum, ad lucrum animarum, ad emptionem caelestium divitiarum. Unde sequitur post praedictum cibum: « Consideravit « agrum, et emit eum: de fructu manuum suarum « plantavit vineam. » Primum notatur per fructum manuum: secundum per plantationem vineae: tertium per emptum agrum. Primo confortamur cibo Domini ad opus bonum. Eccl. 55: « Cibaria et virga « et onus asino, panis et disciplina et opus servo. » Sicut pabulum confortat asinum ad onera portanda, sic panis caelestis servum Dei ad opera bona perficienda. 2 Tim. 1: « Gratias ago ei qui me confortat « in Christo Jesu. » Qui enim vere considerat in hoc Sacramento immensam circa se Dei liberalitatem, valde confortat eum ad proximi pietatem. Secundo confortamur ad lucrum animarum, ibid.: « Vas electionis est mihi iste... nomen meum » scilicet Jesum Christum, quasi caeleste oleum ad sanitatem animarum. Cant. 2: « Oleum effusum nomen tuum. » De corde Christi pleno fluit oleum gratiae ad salutem

animae. Tertio confortamur ad emptionem bonorum caelestium. Hinc supra dictum est, quod mulier fortis post cibum consideravit agrum et emit eum, virtutibus scilicet, et bonis operibus. Jer. 52: « Agri « pretio ementur, et scribentur in libro, et imprimetur signum, et testis adhibebitur. » Agri caelestis hereditatis ementur pecunia virtutum et bonorum operum, et scribentur tam agri quam emptores in libro vitae, et imprimuntur in corde emptoris, signum scilicet crucis Christi, et lumen imaginis Dei pro certo pignore, et adhibebitur testis, quia in die iudicii coram omnibus testis erit Dominus, quod vere emisti regnum caelorum pretio bonorum operum. Vel tertius effectus principalis dici potest vitae aeternae collatio. Joan. 6: « Si quis « manducaverit ex hoc pane, vivet in aeternum. » Et hoc in tribus: in omnium delictiarum praeparatione, in omnium desideriorum impletione, in omnium bonorum segura et aeterna fruitione. Require hoc in sermone decimo, in fine.

### CAPUT XXV.

#### *De effectibus Corporis Christi sumptis ex tribus ejus vocabulis.*

« Venite, come lite etc. » Vel alia ut supra, vel similia de effectu, vel de nominibus corporis Christi. Effectus Domini corporis possunt sumi ex tribus nominibus, quae solent eidem adseribi. Nominatur enim quandoque verus panis, quandoque Sacramentum altaris, quandoque Sacramentum caritatis. De primo Joan. 6: « Pater meus dat vobis de caelo « panem verum. » De secundo Malach. 5: « Placebit Deo sacrificium Juda et Jerusalem. » De tertio 1 Timoth. 5: « Magnum est pietatis Sacramentum, « quod manifestum est in carne, » per partum Virginis: « praedicatum est in gentibus » a sanctis Apostolis « creditum est mundo, » idest concessum fidelibus in cibum salutis. Unde recte dicitur Sacramentum caritatis. Primo corpus Domini nominatur panis verus: et secundum hoc habet tres effectus. Sicut enim panis tria bona praecipue confert corpori, idest satiat, confortat, vitam conservat; sic panis iste satiat spiritum ad fastidium mundi faciendum, confortat animum ad malum culpae devincendum, conservat vitam ad Deum semper laudandum. De primo Psalm. 151: « Pauperes ejus saturabo « panibus. » Complenda: « Satiasti, Domine, familiam tuam muneribus sacris, » et hoc ad fastidium mundi faciendum. Proverb. 22: « Anima saturata « calcabit favum. » Gregorius: « Gustato spiritu « desipit omnis caro. » De secundo Psalm. 105: « Panis cor hominis confirmet » ad malum scilicet culpae devincendum: quia qui carent corroboracione hujus panis, vincuntur a vitiis. 4 Reg. 25: « Rex « Babylonis et exercitus ejus obsedit Jerusalem, et « non erat panis populo terrae, et omnes viri belatores nocte fugerunt ad hortum regis, » idest ad delicias carnis, « et ad campestria solitudinis, » idest ad viam latam, quae ducit ad mortem. De tertio Eccle. 54: « Panis egentium, vita pauperis est. » Joan. 6: « Ego sum panis vivus « qui de caelo descendit. Ego vivo propter Patrem: et qui manducat me, vivet propter me: » et haec est vita ad Deum semper laudandum. Psal. 145: « Lauda anima mea Dominum etc. » De his supra sermone 9. Secundo corpus Domini no-

minatur Sacramentum altaris, et secundum hoc habet triplicem effectum: scilicet in triplici statu fidelium: idest in hoc mundo, in caelo, in purgatorio. In statu mundi peccata relaxat, in statu purgatorii poenam alleviat, in statu caeli gloriam augmentat. De primo, scilicet statu, Levitic. 5: « Anima « quae peccaverit per ignorantiam, offeret arietem « immaculatam, » scilicet Christum, sine quo non fit remissio. Nihil prodest capram, idest austeritatem poenitentiae immolare, nisi studueritis in Christi immolatione plenam fiduciam habere. Joan. 1: « Ecce « Agnus Dei, ecce etc. » Paschasius: « Licet omnia « peccata in baptismo sint donata, infirmitas tamen « peccati, idest fomes in carne remanet. » Et quia ex hoc quod quotidie labimur, saltem in venialibus, ideo Christus pro nobis quotidie immolatur, ut qui semel in moriendo mortem devicit, quotidie recidiva delictorum per haec Sacramenta relaxet. Ambrosius: « Sicut quod ubique offertur unum est corpus, ita « et unum est sacrificium. Christus semel in cruce « hostiam pro omnibus obtulit: ipsam offerimus « et nunc: sed quod nos agimus, recordatio est « sacrificii illius: nec causa suae infirmitatis repetitur, sed nostrae, quia quotidie peccamus. » De secundo Levitic. 17: « Dedi vobis sanguinem, ut « per altari meo expietis pro animabus vestris. » In hoc figuratum est, quod sacrificium carnis et sanguinis Christi valet animabus in poena purgatorii. Hic sciendum quod tres turmae animarum sunt decedentium. Prima peccantium, secunda poenitentium, tertia innocentium. Primam sacrificium non adjuvat: secundam poena alleviat: tertiam sine poena ad caelum sublevat. De primo 1 Reg. 5: « Juravi « Eli, quod non expietur domus ejus victimis et « muneribus in aeternum. » Domus ejus, idest, omnium in peccatis presistentium. Jerem. 7: « Quia « locutus sum ad vos, et non audistis: et vocavi « vos, et non respondistis, projiciam vos a facie « mea, » idest ab omni bono quod est in caelo et in terra. « Tu ergo noli orare pro populo hoc, « nec assumes pro eis laudem, » idest, sacrificium laudis, « et non obsistas mihi, quia non exaudiam te. » Proverb. 7: « Qui adulter est, » idest amans et adhaerens creaturae ultra mensuram justitiae, « perdet animam suam, quia zelus et furor viri non « pareet in die vindictae: nec acquiescet cujusquam « precibus, nec suscipiet pro redemptione dona « plurima, quasi pretiosissimum Christi sacrificium. » De secundo est illud supradictum: « Dedi vobis « sanguinem, ut super altari meo expietis pro animabus. » Sanguinem, idest sacrificium corporis et sanguinis Christi: Sanguinis pro corpore simul et sanguine; pars pro toto; et quia sanguis in altari non est sine corpore, nec corpus sine sanguine. Pro animabus, scilicet quae sunt in purgatorio: Augustinus: « Orationibus et elemosynis sanctae « Ecclesiae, et sacrificio salutari non est dubium « defunctorum animas relevari, ut cum eis misericordius agatur a Domino, quam eorum peccata « meruerunt in hoc mundo. » Zachar. 15: « Partes duae in terra dispergentur et deficient, » idest infideles et mali Christiani damnabuntur, « et tertia pars relinquetur in ea, » idest poenitentes: « et ducam tertiam partem per ignem, » idest animas poenitentium per purgatorium: « et « uram eos sicut uritur argentum, et probabo eos « sicut probatur aurum: ipse invocabit nomen « meum, et exaudiam eum. » Ipse, scilicet populus

Christianus in terra relictus, invocabit me orationibus et eleemosynis et sacrificio altaris pro parte ducta per ignem, idest pro animabus quae sunt in purgatorio; et exaudiam eum, alleviando scilicet poenam illorum, et abbreviando. De tertio Prov. 31: « Munus absconditum extinguit iras, » iras scilicet Dei, idest poenas purgatorii quantum ad animas innocentes: et in praesenti tribulationibus et flagellis satis purgatas. Psal. 57: « Domine, ne in furore tuo arguas me, neque in ira tua corripas me... » Quoniam sagittae tuae infixae sunt mihi etc. » Furor Dei ardet in inferno, ira in purgatorio sagitta sive correptio amoris in hoc mundo. Qui igitur sagittas dominicae correptioni patienter portat, furorem inferni et iram ignis purgatorii duce Domino illaesus evadet. Isa. 43: « Noli timere serve meus: cum transieris per ignem, tecum ero, et flumina non operient te. Cum ambulaveris in igne, non combureris, quia ego Salvator tuus. » Daniel. 3: « Angelus Domini descendit cum Azaria et sociis ejus in fornacem, et fecit ignem fornacis quasi ventum roris flantem: et non tetigit eos omnino ignis, neque contristavit. Tunc laudabant Deum dicentes: Benedicite Domino qui eruit nos de inferno, et eruit nos de medio ardentis flammae. » Isa. 53: « In laetitia egrediemini, et in pace deducemini: montes et colles cantabunt coram vobis laudem, et omnia ligna regionis plaudent manu. » De tertio supra nominato, scilicet quod sacrificium altaris gloriam beatorum quodammodo in caelo augmentat. Levit. 10: « Pectusculum sacrificii quod oblatum est, edetis in loco mundissimo tu et filii tui et filiae tecum. » Pectusculum sacrificii quod optimum et dulcissimum est de animali, signat dulcedinem effectus corporis Christi, in quantum comeditur in loco mundissimo, idest in quantum delectat beatos in caelo: quia plurimum gaudent et congratulantur in hoc sacrificio de memoria redemptionis, de aspectu nostrae salutis, de admiratione divinae bonitatis. Gregorius: « Eodem momento rapitur in caelum ministerio Angelorum sociandum corpori Christi, et ante oculos Sacerdotis in altari videtur. » Rapitur scilicet corpori Christi consociandum, idest ad beatos laetificandum. Complenda: « Sumpsimus, Domine, divina mysteria: quae sicut sanctis tuis ad gloriam, ita nobis ad vitam prodesse perficias. » Tertio corpus Domini nominatur Sacramentum caritatis: et secundum hoc tres habet effectus: quia tria maxime bona operatur in nobis: scilicet Spiritus Sancti veram participationem, ipsius Christi certam inhabitationem, in similitudinem imaginis Dei transformationem. De primo Psal. 80: « Et de petra melle saturavit eos » quia fideles sugunt de corpore Christi dulcedinem Spiritus Sancti. Sapient. 12: « O quam bonus et suavis est, Domine, spiritus tuus in nobis! » qui scilicet de corpore tuo in nos fluit. Augustinus: « Participatione corporis et sanguinis Christi homo vivit, non sumens tantum Sacramentum, quod et mali faciunt, sed pertingens usque ad spiritus participationem, ut in corpore Domini tamquam membrum maneat et ejus spiritu vegetetur. » De secundo Joan. 6: « Qui manducat carnem meam etc. » Hilarius: « Accepta carne Domini et hausto calice id efficitur, ut nos in Christo, et Christus in nobis sit. Est enim Christus in nobis per carnem, dum ejus carnem accipiamus; et sumus in eo, dum secum hoc quod

« nos sumus, in Deo est. » Joan. 1: « Verbum caro factum est etc. » Dum Verbum carnem assumpsit, in nostra carne habitavit: et dum nos Verbum incarnatum in cibum accipimus, ipsum etiam habitat in nobis. De tertio Joan. 1: Quotquot autem receperunt eum, dedit eis potestatem filios Dei fieri, idest deiformes, et Deo secundum imaginem similes: nec potest creatura ad majus promoveri, quam quod assimiletur suo creatori. Assimilatur autem homo Deo virtute corporis Christi in tribus: in interiori cordis bonitate, in exterioris operis fertilitate, in superiori caelestis regni hereditate. De primo 2 Petr. 1: « Christus propria gloria sua et virtute, maxima et pretiosa promissa nobis donavit, ut per hoc efficiamur consortes divinae naturae. » Maxima promissa, idest seipsum. Unde, « Jusjurandum quod juravit ad Abraham patrem nostrum daturum se nobis, » ut efficiamur consortes divinae naturae, idest divinae bonitatis: quia natura Dei bonitas est. Ambrosius: « Quia Dominus Jesus consors scilicet est divinitatis et corporis, et tu qui accipis carnem ejus divinae substantiae in illo participans alimento, idest, vere bonus efficiaris in eo. De secundo Ezech. 12: « Sumam de medulla cedri sublimis, et de vertice ramorum ejus, et plantabo in montem excelsum, et faciet fructum. » Medulla cedri sublimis est aeterna sapientia Dei: alti rami ejus sunt patres sancti: vertex ramorum est beata Virgo, pars de vertice caro Christi sumpta de Virgine. Sureculus igitur sumptus de medulla et vertice est corpus Christi plenum divinitate. Iste plantatus in montem excelsum, idest in cor justi in caelum elevatum, facit similem Christo boni operis fructum. De utroque ad Gal. 2: « Vivo ego, jam non ego, vivit vero in me Christus, » in me scilicet assimilando interiori bonitate, et exteriori bono opere. Hinc dictum est Augustino: « Cibus sum grandium, cresce et manducabis me, nec tu me mutabis etc. » De tertio Joan. 1: « Quotquot autem receperunt eum, dedit eis potestatem filios Dei fieri; » ergo et heredes: ad Rom. 8: « Si filii, et heredes, coheredes autem Christi: » 1 Petr. 2: « Benedictus Deus qui regeneravit nos, idest de filiis diaboli filios Dei fecit, hereditatem incorruptibilem et incontaminatam et immarecensibilem conservatam in caelis. » Amen.

## CAPUT XXVI.

*De effectibus sumptis ex tribus aliis Corporis Christi vocabulis.*

« Venite, comedite etc. » Thema de effectu vel de nominibus corporis Christi. Effectus Dominici corporis possunt sumi ex tribus illis nominibus ejus jam supradictis. Dicitur enim quandoque medicina spiritualis, quandoque manna, idest panis caelestis, quandoque Eucharistia, idest bona gratia animae fidelis. De primo Eccl. 58: « Altissimus de terra creavit medicinam, et vir prudens non abhorrebit eam. » Augustinus: « Suscepit Christus de terra terram, et de carne Mariae carnem accepit, et ipsam nobis ad salutem manducandam dedit. » De secundo Apocal. 2: « Vincenti dabo manna etc.: » quasi dicit: Qui se praeparat per victoriam vitiorum, illi dabo manna, idest caelestem panem, scilicet corpus meum, in quo secreta

reconditum est multiplex bonum. Joan. 6: « Hic  
 « est panis qui de caelo descendit. » De tertio  
 Eccles. 52: « Audi tacens, et pro reverentia accedet  
 « tibi bona gratia: » quasi dicat: Praepara te per  
 auditum verbi Dei et obedientiae, qua taceas, idest  
 cesses a malo, et serves reverentiam in benefacien-  
 do: tunc dabitur tibi bona gratia, quae graece di-  
 citur Eucharistia, idest corpus Christi. Magister, 4  
 Sententiarum: « Sacramentum altaris excellenter  
 « dicitur Eucharistia, idest bona gratia: quia in ea  
 « non solum est augmentum virtutum et gratiae,  
 « sed ille totus ibi sumitur, qui est fons totius  
 « gratiae. » Primo corpus Domini dicitur medicina  
 spiritalis: et secundum hoc habet tres effectus.  
 Serpens ille malignus infudit humano generi per  
 venenum pomi vetiti triplicem corruptionem: in  
 anima tenebras ignorantiae, in carne morbum pra-  
 vae concupiscentiae, et mortem utrobique. Ad haec  
 tria curanda valet corporis Christi medicina: igno-  
 rantiae enim tenebras illuminat, morbum pravae  
 concupiscentiae sanat, et mortem destruendo trium-  
 phat. De primo Psalm. 151: « Paravi lucernam  
 « Christo meo etc. » Lucerna est lumen in dia-  
 phano, idest perlucido corpore; sic corpus Christi  
 est Verbum Dei, quod est lux vera in munda car-  
 ne, quo scilicet pelluntur a nobis tenebrae igno-  
 rantiae. Luc. 1: « Viderunt oculi mei salutare  
 « tuum etc. » Psal. 26: « Dominus illuminatio  
 « mea etc. » Psalm. 55: « Accedite ad eum, et  
 « illuminamini. » De secundo Isa. 58. Item 4 Reg.  
 2: « Jussit Isaias ut tollerent massam de ficis, et  
 « cataplasarent super vulnus regis, et sanaretur. »  
 Vulnus sive ulcus regis est concupiscentia carnis.  
 Psal. 6: « Miserere mei, Domine, quoniam infirmus  
 « sum etc. » De tertio Luc. 1: « Benedictus fru-  
 « ctus ventris tui, » scilicet corpus Christi, quod  
 est fructus vitae valens ad eurationem mortis aet-  
 ernae: Proverb. 5: « Lignum vitae est his qui  
 « apprehenderint eam, » scilicet sapientiam Dei  
 incarnatam: Osee 14: « Ero mors tua, o mors. »  
 De hac triplici corruptione et medicina, supra ser-  
 mone sexto post principium. Secundo corpus Do-  
 minici dicitur manna, idest panis caeli, quod man-  
 na habet similitudinem saporis frumenti, mellis et  
 olei. De duobus primis Exod. 16: « Gustus ejus  
 « sicut similiae. » De tertio Num. 16: « Gustus  
 « ejus quasi similiae cum melle. » De quarto Num.  
 13: « Fecerunt ex eo tortulas saporis quasi panis. »  
 De tribus simul Ezechiel. 16: « Gustus ejus quia  
 « similiae, mel et oleum comedisti. » Et secun-  
 dum haec tria habet corpus Domini triplicem ef-  
 fectum. Operatur enim morum honestatem, cordis  
 suavitatem, proximi pietatem: primum significatur in  
 frumento, secundum in melle, tertium in oleo.  
 De primo Zach. 9: « Quid bonum ejus, et quid  
 « pulchrum, nisi frumentum electorum? » panis de  
 frumento bonus est, et pulcher in se; et etiam  
 in effectu, quia facit pulchrum: sic corpus Christi  
 bonum et pulchrum facit honestatem morum.  
 Daniel. 1: « Apparuerunt vultus eorum meliores  
 « et corpulentiores prae omnibus pueris qui vese-  
 « bantur cibo regio, » Glossa, « vultus eorum  
 « quos panis satiabat, qui de caelo descendit. »  
 De secundo Prov. 53: « Comede filii, mel, quoniam  
 « bonum est, et favum duleissimum gutturi tuo: »  
 Sapient. 16: « Paratum panem de caelo praestitisti  
 « illis, omne delectamentum in se habentem, et  
 « omnis saporis suavitatem. » De tertio Job 29:

« Quis mihi tribuat ut sim secundum dies, quando  
 « secreto Deus erat in tabernaculo meo, et petra  
 « fundebat mihi rivulos olei, » idest gratiam pre-  
 tatis ad bonum proximi: Prov. 21: « Taurus desi-  
 « derabilis, et oleum in tabernaculo justii. » 4  
 Reg. 4: « Offerebant vasa, et mulier infundebat  
 « oleum: et ait Eliseus, Vende oleum, et redde  
 « creditori tuo; tu autem et filii tui vivite de re-  
 « liquo. » Ecce oleum, idest opus pietatis prox-  
 imum reficit, debita solvit, nos ipsos pascit. Primum  
 intelligitur in eo quod fundebat oleum in vasa pro-  
 ximorum: secundum in eo quod reddit per oleum  
 debita creditori: tertium in eo quod ipsa et filii  
 de oleo vixerunt: tertio corpus Domini dicitur Eu-  
 charistia, idest bona gratia. Sicut autem dicunt Ma-  
 gistri, gratia est influentia divinae bonitatis in ani-  
 mam, per quam assimilata Deo fit ei grata, et vitae  
 aeternae digna. Et secundum hoc corpus Domini  
 habet tres effectus: similem Deo animam efficit,  
 gratam et charam Deo reddit, vitam aeternam tri-  
 buit. De primo 2 Epistol. Petr. 1: « Christus pro-  
 « pria gloria et virtute maxima et pretiosa nobis  
 « promissa donavit, ut per hoc efficiamur divinae  
 « naturae consortes, » idest similes Deo per ve-  
 ram bonitatem. De secundo Cant. 10: « Quam  
 « pulchra es et decora in delitiis! » quasi diceret,  
 Delicato cibo et potu corporis Christi et sanguinis  
 es nutrita, facta es multum decora, et ideo grata  
 Deo et chara. De tertio Joan. 6: « Qui manducat  
 « carnem meam etc., habet vitam aeternam. » Item  
 corpus Domini dicitur Eucharistia, idest, bona gra-  
 tia: et secundum hoc habet valde bonum effectum,  
 scilicet cum illud manducamus, non ipsum ut alius  
 eibus mutatur in nobis, sed nos in illo mutamur.  
 Nam quia, ut dictum est, gratia est influentia divina  
 bonitatis in animam, per quam simulatur Deo; haec  
 bona gratia, scilicet corpus Christi, influit nobis:  
 sed nos illi assimilamur, et in ejus bonitatem mu-  
 tamur. Haec nostra in Christum mutatio potest  
 probari similitudine triplici. Prima sumitur de vir-  
 tute nostri amoris: secunda de virtute rei majo-  
 ris: tertia de virtute sureuli arboris. Haec require  
 supra in sermone vigesimo ante finem.

## CAPUT XXVII.

*De consideratione Sanguinis Christi tribus modis;  
 et primo de primo ut in cruce funditur.*

« Venite, comedite panem meum, et bibite vi-  
 « num quod miscui vobis, » Prov. 9. His verbis  
 Dominus nos invitat ad salutare convivium, in quo  
 praeparavit pretiosum cibum et potum corpus et  
 sanguinem suum. Dicto itaque supra de corpore  
 Christi, dicendum est hic de sanguine. « Ille est  
 « qui venit per aquam et sanguinem Jesus Christus, »  
 1 Epist. Joan. 2. Item aliud: « Calicem quidem  
 « meum bibetis, » Matth. 20. Thema proprium:  
 « Dignus es Domine etc., quoniam redemisti nos  
 « Deus in sanguine tuo; » Apoc. 2, vel aliud si-  
 mile. Septimum principaliter circa Sacramentum  
 dominici corporis notandum, est consideratio san-  
 guinis sacri. Unde sciendum, quod sanguis Domini  
 tribus modis potest considerari: primo ut in cruce  
 pro omni salute funditur; secundo ut in Sacramen-  
 to a fidelibus sumitur; tertio, ut a salvandis spiri-  
 tualiter bibitur. Primo modo consideratus, ab ine-



stimabili dignitate commendatur. Circa hanc pretiositatem quatuor praecipue possunt notari. Primum est pretiositatis magnae probatio; secundum tanti pretii dandi ratio; tertium virtutis sanguinis magnitudo; quartum redemptorum sanguine multitudo. Primum circa pretiositatem sanguinis praecipue notandum, est pretiositatis magnae probatio: et hoc probatur a tribus: a virginali origine, a dignitate innocentiae, a Dei unione. De primo Eccles. 24: « Ego quasi vitis fructificavi etc., » fructus vitis, scilicet, beatæ Virginis uva et vinum, idest corpus Christi et sanguis. Vinum igitur honoris ortum de flore vitis, est sanguis Christi pretiosus natus de virginitate. Multum itaque commendat sanguinis Christi nobilitatem et pretiositatem, quod a nulla, ut alius sanguis, corruptione, sed a virginali flore sumpsit exordium. De secundo Psalm. 95: « Captabunt in animam justis, et sanguinem innocentem condemnabunt. » Quanto sanguis innocentior, tanto charior et pretiosior. 1 Epist. Petr. 2: « Non corruptibilibus auro vel argento redempti estis, sed pretioso sanguine quasi agni incontaminati et immaculati Jesu Christi. » De tertio Jerem. 15: « Agglutinaui mihi omnem domum Israel, dicit Dominus, » idest inseparabiliter mihi univi totam hominis naturam, scilicet animam, corpus et sanguinem. Ad Hebr. 2: « Quia pueri communicaverunt carni et sanguini, et ipse Christus similiter participavit eisdem, » idest Filius Dei pro salute hominis habentis carnem et sanguinem assumpsit carnem hominis et sanguinem, et ita univit ea sibi et honestavit, ut vere possint dici caro Dei et sanguis. Act. 20: « Posuit vos Spiritus Sanctus regere Ecclesiam Dei, quam acquisivit sanguine suo. » Ergo sanguis Christi vere est sanguis Dei: ideo tam pretiosus, quod una gutta plus valet quam totus mundus. Secundum circa pretiositatem sanguinis Christi praecipue notandum, est tanti pretii pro homine dandi ratio: et haec est triplex. Prima magni debiti necessaria solutio: secunda magni amoris demonstratio: tertia magni boni perdati recuperatio. Prima ratio tanti pretii dandi pro homine, scilicet pretiosi sanguinis Dei, est magni debiti necessaria solutio. Maximo enim debito obligatus est primus homo, quia tenebatur Deo satisfacere pro se et toto humano genere, quod rapuerat et occiderat pomum vetitum comedendo, unde jussus est eum omni progenie mitti in gehennae carcerem, donec redderet omne debitum per sufficientem hostiam. Justum est enim secundum peccati quantitatem et laesae majestatis dignitatem fieri satisfactionem: et hoc potest tribus gradibus distingui. Pro minore enim culpa minor, pro majori major, pro maxima satisfactio maxima est facienda. Hinc statutum erat in lege pro transgressione diversorum mandatorum peccus aliquod offerri, vel occidi et sanguinem ejus fundi; sed pro majori peccato vel homicidio simplici ipsum homicidam occidi, et sanguinem ejus fundi. Ex hoc sequitur, quod pro tot homicidiis primi parentis, qui omnes homines occidit, quia per eum omnes moriuntur, et pro laesa per hoc maximi Creatoris majestate tam pretiosa hostia debeat offerri Deo et occidi, et sanguis ejus fundi, qui ad minus tantum valeat, quantum omnes homines qui sunt occisi. Sed quia talis in omni creatura non poterat inveniri, necesse fuit ad solvendum tantum debitum, et ad liberandum de inferni carcere genus humanum,

*S. Th. Opera omnia. V. 17.*

Filium Dei hominem fieri omni creatura meliorem, et ipsum pro debito hominis occidi, et sanguinem ejus fundi. De primo Levit. 4: « Anima quae peccaverit per ignorantiam, » in transgressione, scilicet quorundam mandatorum Dei, « offerat Deo vitulum, vel agnum, » vel aliquid hujusmodi ad occidendum et sanguinem fundendum. Ad Hebr. 9: « Omnia pene in sanguine mundantur secundum legem, et sine sanguinis effusione non fit remissio. » De secundo Genes. 9: « Quicumque fuderit sanguinem hominis, fundetur sanguis illius: ad imaginem quippe Dei factus est homo: » Num. 35: « Non aliter expiari potest, nisi ejus sanguine, qui alterius sanguinem fuderit. » De tertio Osee 15: « De manu mortis liberabo eos: de morte redimam eos pretio sanguinis, » dicit interlinearis, « de morte, idest de plaga et debito aeternae mortis. » Bernardus: « Filius Dei jubetur occidi; ut vulneribus nostris pretiosi sanguinis sui balsamo mederetur. Agnosce, anima, quam gravia sunt illa vulnera, pro quibus necesse est Dominum Jesum Christum vulnerari: nisi enim essent ad mortem aeternam, nunquam pro eis Filius Dei moreretur. » Secunda ratio tanti pretii dandi est magni amoris demonstratio. 1 Epist. Joan. 5: « Tres sunt qui testimonium dant in terra, spiritus, aqua et sanguis. » Spiritus quem misit de corpore, aqua quae fluxit de latere, et sanguis quem effudit de corde, testes sunt dilectionis maximae. Psal. 129: « Apud Dominum misericordia etc., » ut scilicet probaretur ad nos amoris ejus magnitudo. Bernardus: « Vere copiosa Christi redemptio, quia undam sanguinis per quinque partes corporis largiter effudit, eum pro redemptione generis humani una gutta pretiosi sanguinis ejus sufficeret; sed data est copia, ut magnitudine muneris virtus innotesceret diligentis. » Ut enim ostenderet quantum te diligeret, non aliter voluit quam moriendo te de morte liberare. » Augustinus: « O anima mea pretiosa, non auro redempta vel opibus, sed agni immaculati sanguine, attende quid valeas, quid pro te datum sit cogita. Noli temetipsam tradere in perditionem, pro qua Christus suum pretiosum fudit sanguinem. » Tertia ratio tanti pretii dandi est magni boni perdati recuperatio: et hoc est triplex: scilicet libertas a servitute diaboli, introitus caelestis Regni, hereditas filiorum Dei. De primo Jerem. 50: « Redemit Deus Jacob, et liberavit eum de manu potentioris, » scilicet pretioso sanguine Christi: Joan. 8: « Si vos filius liberavit, vere liberi eritis. » Psalm. 105: « Redemit eos de manu inimici: » Luc. 1: « Benedictus Dominus Deus Israel etc. » De secundo Hebr. 9: « Christus introivit semel in sancta, aeterna redemptione inventa. » Et infra 10: « Habentes itaque, fratres, fiduciam in introitu sanctorum in sanguine Christi. » Hieronymus: « Sanguis Christi est clavis Paradisi. In passione enim Domini caelum diu clausum, quasi soluto sanguinis ejus pretio est apertum. » Joan. 19: « Unus militum latus ejus perforavit etc. » Glossa: « Vigilanti verbo usus est: non dixit vulneravit, sed aperuit, ut illie vitae quodammodo ostium panderetur, unde Sacramenta Ecclesiae emanaverunt, sine quibus ad vitam non intratur. » Sanguis enim fusus est in remissionem peccatorum, aqua in lavaerum: humanum genus propter debita peccatorum et deformitatem a Paradiso

« caelesti excelsum, necesse habuit ad reditum, et  
 « pretio sanguinis Christi a debito absolvi, et aqua  
 « Baptismi a sorde lavari. » De tertio Levitic. 25:  
 « Si frater tuus vendiderit possessiunculam suam,  
 « si voluerit propinquus ejus, potest redimere quod  
 « ille vendiderat. » Hoc fecit Christus pretio san-  
 guinis sui. Hinc legitur Num. 25, quod homicidis  
 expulsis de terra sua, non dabatur libertas rede-  
 undi, nisi post mortem summi Pontificis. Jerem.  
 12: « Reducam virum ad hereditatem suam. »  
 Eccle. 55: « Servus fidelis sit tibi quasi anima tua;  
 « quasi fratrem sic eum tracta: quoniam in sanguine  
 « animae comparasti eum tibi, » scilicet quod he-  
 reditatem tuam quam redimere non poterat san-  
 guine tuo redemisti sibi; unde tracta eum quasi  
 fratrem, dividendo secum hereditatem. Hinc Luc.  
 52: « Clamat de cruce latro, Domine memento  
 « mei: et dixit illi Jesus: Amen dico tibi, Hodie  
 « mecum eris in Paradiso. »

### CAPUT XXVIII.

#### *De duobus aliis circa pretiositatem Sanguinis Christi notandis.*

Thema de sanguine Christi, ut supra, vel si-  
 milia. Tertium circa pretiositatem sanguinis Christi  
 ut consideratur in cruce fusus, praecipue notandum  
 est virtutis magnitudo: et consistit haec in tribus:  
 in diaboli destructione, in mundi redemptione, in  
 Dei reconciliatione. De primo Job 40, secundum  
 aliam litteram: « Numquid capies Leviathan hamo? »  
 supple, sicut ergo Leviathan est diabolus, hamus,  
 sive aculeus in esca est Dei filios in carne humana  
 assumpta absconditus. Isto hamo captus est dia-  
 bolus, et deceptus; quia dum carnem innocentis  
 Christi in cruce mordere et effundere sanguinem  
 injuste praesumpsit, latens aculeus divinitatis po-  
 testatem ejus perforando destruxit. Amos 5: « Ego  
 « exterminavi Amorrhaeum, » idest amarum inimi-  
 cum, « cujus altitudo cedrorum altitudo est, et  
 « fortis ipse quasi quereus. » Hoc figuratum est  
 Daniel. 14: « Erat draco magnus in Babylone, et  
 « tulit Daniel picem et adipem et pilos, et coxit  
 « pariter, et fecit massam, et dedit in os draconis,  
 « et diruptus est. » Pix et pili significant similitu-  
 dinem carnis peccati: adeps sanguinem Christi: massa  
 ex his sacra membra Salvatoris data in potestate  
 hostis; sed dum haec injuste mordere nititur, juste  
 potestas ejus destruitur. De secundo 1 Corinth. 6:  
 « Empti estis pretio magno: » ad Ephes. 1: « Ha-  
 « bemus redemptionem per sanguinem Christi, in  
 « remissionem peccatorum. » 1 Pet. 1: « Non cor-  
 « ruptibilibus auro vel argento redempti estis etc. »  
 Hinc canit Ecclesia: « Te ergo quaesumus, tuis  
 « famulis subveni, quos pretioso sanguine redemi-  
 « sti. » De utroque Hebr. 1: « Quia pueri com-  
 « municaverunt carni et sanguini, et ipse Christus  
 « similiter communicavit eisdem, ut per mortem  
 « destrueret eum qui habebat mortis imperium, »  
 diabolum scilicet, et liberavit eos. Augustinus: « Quid  
 « fecit Redemptor captivatori nostro? tetendit ei  
 « musculam crucem suam, posuit ibi escam cor-  
 « pus et sanguinem suum. Ille autem sanguinem  
 « fudit non debitoris, propter quod jussus est red-  
 « dere debitores. » Hinc canit Ecclesia: « O crux  
 « gloriosa, per quam diabolus est victus, et mun-  
 « dus Christi sanguine redemptus. » De tertio Eph.

2: « Vos qui aliquando eratis longe, facti estis in  
 « sanguine Christi prope; » ipse est enim pax no-  
 stra, idest faciens nobis pacem cum Deo: ad Coloss.  
 1: « Christus est caput corporis Ecclesiae, pacifi-  
 « cans per sanguinem crucis sive quae in terris,  
 « sive quae in caelis sunt. » Hinc post passionem  
 et resurrectionem ostendit discipulis cruentas ma-  
 nus et latus dicens: « Pax vobis. » Haec pax cum  
 Deo sive reconciliatio fit per sanguinem Christi  
 triplici ratione: ratione pretii sufficientis, quod in  
 eo pro nostris debitis solvit: ratione formositatis,  
 qua nos Deo gratos fecit: ratione gratissimae cari-  
 tatis, quam in hoc facto demonstravit. De primo  
 Psal. 68: « Persecuti sunt me inimici etc. » usque  
 ad mortem crucis, « Quae non rapui exsolvebam, »  
 scilicet pretio sanguinis pro bono pacis. Matth. 26:  
 « Sanguis pro vobis fundetur in remissionem pec-  
 « catorum. » De secundo Ephes. 5: « Christus  
 « dilexit nos, et tradidit semetipsum oblationem et  
 « hostiam Deo » gratam ad effectum nostrae re-  
 conciliationis causa nimiae dilectionis. Nam si Noe  
 justus, ut dicitur Eccle. 44, in tempore iracundiae  
 factus est reconciliatio propter justitiam, multo magis  
 Christus propter nimiam caritatem, qua obtulit  
 pro nobis Deo proprium sanguinem. De tertio Ro-  
 man. 5: « Justificati in sanguine Christi, » idest  
 de reis justis, de foedis pulehri facti, « salvi erimus  
 « ab ira per ipsum, et glorificamur in Deo per  
 « Dominum nostrum, per quem reconciliationem  
 « accepimus. » Item: « Dilectis Dei, vocatis san-  
 « ctis, » idest sanguine Christi tinctis, « gratia  
 « vobis et pax. » Joan. 15: « Misit aquam in pel-  
 « vim. » Glossa: « Sanguinem in terra fudit, et  
 « coepit lavare pedes discipulorum, quia scilicet  
 « sanguine mundo mundans nos fecit pulehros, et  
 « Deo gratos. » Apocal. 1: « Dilexit nos, et lavit  
 « nos a peccatis nostris in sanguine suo, et fecit  
 « nos Deo nostro regnum et sacerdotes. » Ecce  
 peccatores Deus sanguine suo lavit, formosos, ro-  
 seos, et Deo gratos fecit, et sic reconciliavit, ut in  
 curia Dei principes faceret Quartum circa pretio-  
 sitatem sanguinis Christi notandum est, redempto-  
 rum multitudo. Tres enim exercitus magni san-  
 guine ejus sunt redempti; scilicet manifesti inimici;  
 antiqui justis, dubii amici. Primi de vinculo peccati,  
 secundi de limbo inferni, tertii de dubietate fidei.  
 Propter haec tria effudit sanguinem de tribus locis;  
 de manibus, de pedibus, de vulnere lateris. Primo  
 de manibus, ut peccatores virtute sanguinis a vin-  
 culis peccatorum absolveret, absolutos ad se revo-  
 caret. De primo Eccle. 50: « Porrexit Sacerdos  
 « magnus manum suam in liberationem, et liba-  
 « vit in sanguine uvae, » ut scilicet peccatorum  
 vincula solveret. Psal. 115: « Dirupisti vincula etc. »  
 Augustinus: « Christus ob hoc sanguinem suum  
 « fudit, ut peccata nostra deleret. Unde enim dia-  
 « bolus nos tenebat, deletum est sanguine redem-  
 « ptoris: non autem tenebat nos nisi vinculis pec-  
 « catorum. » De secundo, scilicet ut absolutos re-  
 vocaret, Isa. 44: « Convertere ad me, quoniam  
 « redemi te, » Glossa, « sanguine: » quod si fe-  
 ceris, caelum et terra, et omnia elementa in salute  
 tua laetabuntur; e contra, si non feceris, omnia  
 contra te pugnabunt. Sapient. 5: « Armabit crea-  
 « turam etc. » Porrexit itaque Christus manum  
 in cruce, et libavit sanguinem, solvens omnes a  
 vinculis peccatorum; et adhuc quasi aufugientem  
 manu cruenta revocat peccatorem. Isa. 46: « Ego

« sum vocans ab oriente avem quasi de longe, » scilicet de statu peccati revocans instabilem et refugam animam. Secundo de pedibus fudit sanguinem ut antiquos justos de limbo inferni educendos demonstraret, et ad patriam caelestem deduceret. De primo Thren. 1: « Torcular calcavit Dominus virgini Juda, » Arbor et tortura arboris significat passionem Christi in ligno crucis: qui vero in torculari calcat, sanguinem uvae pedibus fudit, ut multos ex eo laetos faciat. Christus ergo virgini Juda torcular calcavit, qui in passione crucis sanguinem effudit, et justos in fide corruptos de inferno liberans laetificavit. Zach. 9: « Tu quoque in sanguine testamenti tui eduxisti vinetos de laeu, » in quo non est aqua, » scilicet caelestis refrigerii. De secundo, ut scilicet eductos de inferno ad caelestem patriam deduceret. Hebr. 9: « Christus assistens Pontifex etc. » usque « introivit » et non solus, sed cum magno exercitu justorum, quos de inferno eruens secum duxit. Psal. 67: « Ascendens in altum etc. » Isa. 60: « Dicunt Angeli, Quis est iste qui venit de Edom etc. » et post: « Gradiens in multitudine virtutis suae, » idest ascendens cum multis fidelibus, quos de infernis potenter secum duxit. Tertio fudit sanguinem de vulnere lateris et cordis, ut discipulos in fide dubios, et alios multos in fide et bonae vitae stabilitate tentatos, et ideo frigidos et quasi mortuos calefaceret et revivificaret, et revivificatis suo sanguine iter caeleste significaret, ut post ipsum ruenter currerent. De primo Joan. 19: « Unus militum lancea latus ejus aperuit, et continuo exivit sanguis, » qui scilicet est calidus et in quo est vita hominis, ut eos frigidos in fide calefaceret, et quasi mortuos in vita bona revivificaret. Psal. 101: « Similis factus sum pellicano solitudinis. » Pellicanus avis est quae mox natos et contra eam se erigentes occidens, et mortuos triduo deplorans, cum rostro latus proprium fodit, et sanguinem in eos fundens revivificat. Sic Christus frigidis in fide, et peccatis mortuis subvenit sanguine cordis. De secundo quasi vivificatis ad instar ferae vulneratae iter caeleste suo sanguine significat, et sequendum demonstrat. Cant. 5: « Vulnerasti cor meum, soror mea sponsa » quia attende me vulneratam propter te vide sanguinem meum, et sequere me. Joan. 20: « Venit Jesus, et ostendit discipulis manus et latus, » scilicet eruentum, non solum ut eos in fide confortaret, sed ut per multas tribulationes monstraret. 1 Petr. 2: « Christus passus est pro nobis, vobis relinquens exemplum etc. » Hebr. 13: « Jesus ut sanctificaret per suum sanguinem populum, extra portam passus est. » Exeamus ergo ad eum extra castra, scilicet delicias carnis fugientes, et passionem ejus imitantes. Cantic. in fine: « Fuge dilecte mi, et assimilare capreae hinculoque cervorum: » quasi diceret: Curre coram nobis, ut fera corde vulnerata, et sanguine tuo caelestem sentiam nobis ostende, donec te comprehendamus, et in te delicias aeternas capiamus. 1 Epist. Cor. 9: « Sic currite, ut comprehendatis. » Amen.

## CAPUT XXIX.

*De consecratione Sanguinis Christi, secundo modo, scilicet ut in Sacramento sumitur.*

« Bibite ex hoc omnes. Hic est sanguis meus, » Matth. 26. Sanguis Christi tribus modis potest considerari. Primo, ut in cruce ab infidelibus funditur: secundo, ut in Sacramento a fidelibus sumitur: tertio, ut praeter Sacramentum a salvandis spiritualiter bibitur. Primo modo consideratur commendatur ab inestimabili pretiositate. Secundo modo a multiplici utilitate. Tertio modo a spirituali suavitate. Quantum ad primum modum semper est memorabilis; quantum ad secundum, venerabilis; quantum ad tertium, desiderabilis. De primo Apocalyp. 5: « Dignus es Domine, quoniam occisus es, et redemisti nos in sanguine tuo. » De secundo Matth. 14: « Hic est sanguis meus novi testamenti. » De tertio 1 Epist. Cor. 10: « Omnes patres nostri eundem potum spirituales biberunt. » De primo modo considerationis jam supra dictum est in duobus sermonibus. Secundo itaque modo consideratur sanguis Christi, ut in Sacramento a fidelibus sumitur. Et circa hoc tria requiruntur: primo, quare sacramentum datur sub specie duplici: secundo, quare populus non sumit sanguinem sicut Sacerdos sub specie vini: tertio, quae sit utilitas sanguinis Christi, ut in Sacramento a fidelibus sumitur. Primo quaeritur quare Sacramentum sumitur sub specie duplici cibi et potus, sive panis et vini. Hujus triplex est ratio: prima ad regalis convivii perfectionem: secunda, ad redemptionis corporum nostrorum, et animarum simul saginationem: tertia, ad memoriam passionis dominicae majorem repraesentationem. De primo Esther 1: « Rex Assuerus tertio anno imperii sui fecit grande convivium cunctis principibus et pueris suis. Cibi inferantur, vinum quoque ut magnificentia regia dignum erat. » Rex iste significat Christum, qui non primo vel secundo anno, idest ante legem, vel sub lege, sed tertio, idest tempore gratiae facit convivium magnis et pueris fidelibus cibi et potus. Ut enim ornatum et perfectionem convivii sui et mensae demonstraret, sub specie panis et vini simul Sacramentum altaris administrat: nam ubi alterum deesset, multum laudabile convivium non esset. De secundo Psalm. 109: « Tu es Sacerdos in aeternum, secundum ordinem Melchisedech, » qui scilicet obtulit in signum panem et vinum. In pane significans futuram nostrorum corporum redemptionem, in vino animarum. Magister 4 Sentent.: « Quare sub duplici specie sumitur Sacramentum altaris, cum sub altera totus sit Christus? Ideo scilicet ut ostendatur totam humanam naturam, idest corpus et animam assumpsisse, et totam simul redemisse. Panis enim ad carnem refertur, quam scilicet nutrit: vinum ad animam, quia vinum sanguinem operatur, in quo sedes est animae, secundum physiocos. Unde si sub alterius specie tantum sumeretur, ad alterius tantum, idest corporis vel animae, non ad utriusque pariter liberationem valere significaretur. » De tertio 1 Epist. 11: « Hic est calix novi testamenti in meo sanguine: hoc facite quotiescumque sumitis in meam commemorationem, » idest sanguinem meum bibetis in memoriam meam passionis. Expressius enim Chri-

sti passio ad memoriam reducitur per considerationem sanguinis quam corporis. Exod. 12: « Erit « sanguis vobis in signum in aedibus, in quibus « eritis. » In signum; sicut enim agnus sine macula occisus est in liberationem Israel de Aegypto, sic sanguis Christi proprium et expressum memoriale est suae passionis. 4 Reg. 5: « Viderunt Moabitae aquas rubeas quasi sanguinem, et dixerunt: « Sanguis est gladii: pugnaverunt reges contra se, « et caesi sunt mutuo. » Reges, scilicet Christus et diabolus; ille humilium, hic superbiorum, pugnant in passione Domini, ut quis eorum hominem ad suum servitium obtineret: ambo sunt graviter vulnerati. De primo Job 16: « Hostis meus « irruit in me quasi gigas, concidit me vulnere « super vulnus. » De secundo Isaiæ 51: « Num- « quid non tu Domine percussisti superbum, vul- « nerasti draconem? » Vulneravit itaque vulnere gravi, qui cum Christi carnem innocentem mordere praesumpsit, latens aculeus divinitatis potentiam malitiae ejus perforando enervavit. Secundo quaeritur, quare populus non accipit sanguinem sub specie vini sicut Sacerdos. Hujus triplex est ratio. Prima est ad habendum vas congruum hujus sanguinis contentivum: sicut enim vinum vas specialius et diligentius praeparatum, in quo servetur, exigit quam panis; sic sub specie vini sanguis Christi sumendus solum Sacerdotibus conceditur, tamquam vasis Domini ad hoc specialiter consecratis, et sacra religione constrictis, et virtutum pulchritudine excellentius praeparatis. Hinc triplici vasi electo comparantur in scripturis; scilicet altari consecrato, craterae ligatae, aureo scypho. De primo Deut. 12: « Carnibus hostiarum ipse visceris: san- « guinem fundes in altari, » id est committes Sacerdoti, qui debet esse vas specialiter consecratum, et sanctum, et altare dignum ad suscipiendum sanguinem Domini: Glossa Exod. 30: « Altare holo- « causti significat vitam justorum, qui carnem suam « quotidie crucifigunt cum vitiis et concupiscentiis, « atque in hostiam Deo viventem offerunt. » Ad Rom. 12: « Altare holocaustorum est fides pura, doctrina « recta, et conversatio bona Christi ministrorum. » Psalm. 85: « Altaria tua Domine virtutum etc.: » quasi dicat: O quam sancta, quam ornata, quam dilecta debent esse sanguinis Christi vasa! De secundo Exod. 24: « Tulit Moyses dimidiam partem san- « guinis victimarum, et misit in crateras. » Cratera est vas vinarium multis circumligatum, significans religiosorum Sacerdotum vitam virtutibus custoditam, ad Christi sanguinem suscipiendum aptam. Eccl. 6: « Injice pedem tuum in compedes « sapientiae, et collum tuum in torques illius. Decor « enim vitae est in illo, et vincula illius alligatura « salutaris. » Item infra: « Timor Domini scientiae re- « ligiositas Religiositas custodit et justificabit eor, ju- « cunditatem atque gaudium dabit. » De tertio Eccl. 50: « Sacerdos quasi vas auri solidum, ornatum « omni lapide pretioso, » id est omni genere virtutum, dicit Glossa: « Tale itaque vas exigitur spe- « ciale et electum, ad suscipiendum sub specie « vini sanguinem Christi. » Secunda ratio est vitandi periculum effusionis propter multitudinem, quae se circa altare comprimit. Hinc est quod Dominus in coena Apostolis paucis, et ut suis Sacerdotibus non solum corpus in specie panis, sed et sanguinem in specie vini dedit; multitudini hominum in deserto panem sine potu distribuit. Tertia

ratio est ad praecavendum erroris periculum. Sicut enim populus rudis acciperet sanguinem sub specie vini, vix crederet illum esse sub specie panis, eum tamen veraciter sit sub utraque specie. Nam sicut sub specie vini consecrati Christi est sanguis per transubstantiationem, ita ibi est corpus per annexionem: et sicut sub specie panis est corpus Christi per transubstantiationem, ita ibi est sanguis ejus veraciter per annexionem. Hic enim duo, corpus Christi et sanguis, immo haec quatuor, corpus, sanguis, anima et deitas, jam ultra non possunt separari. Unde sicut sumit Sacerdos sanguinem Christi Sacramentaliter de calice, sic populus sumit eum intellectualiter sub specie panis de ipso corpore Christi, et est eis tam utilis et tam dulcis, ut Sacerdotibus qui sumunt eum sub specie vini de calice. Cant. 1: « Botrus Cypri di- « lectus meus mihi. » Duo sumo in botro: uvam, scilicet corpus Domini in cibum, et ex uva sugo dulcem sanguinem in potum. Deut. 32: « Consti- « tuit eum Dominus ut sanguinem uvae biberet « meracissimum. » Per hunc potum rectificat Dominus animam, donec perducatur ad vitam aeternam. Joan. 6: « Qui bibit meum sanguinem, ha- « bet vitam aeternam. » De dulcedine hujus sanguinis habetur infra serm. 52 circa medium.

### CAPUT XXX.

*De tertio quod circa Sanguinem Christi quaeritur; et de utilitate Sanguinis digne sumpti.*

« Quae utilitas in sanguine meo, » et similia ut prius. « Qui bibit meum sanguinem, habet vitam « aeternam. » Tertio quaeritur de sanguine Christi, ut in Sacramento sumitur a fidelibus, quae sit utilitas, sive effectus. Ad hoc sciendum, quod sic sumptum possumus considerare tribus modis: scilicet ut potum aquae vivae, ut vinum spirituale, ut sacrosanctum mysterium Ecclesiae. De primo Psal. 77: « Percussit petram, et fluxerunt aquae. » Sicut petra significat Christi corpus, ita aquae illae sanguinem illius, qui verus et vivus est potus aquae. De secundo Prov. 9: « Venite, bibite vinum, « quod miscui vobis, » id est sanguinem Christi multa dulcedine conditum. De tertio Hebr. 15: « Jesus extra portam passus est, ut per suum san- « guinem sanctificaret populum. » Ergo sanguis Christi res sanctificans est et sacrosanta. Complenda: « Quaesumus, Domine, ut sacrosancta my- « steria praesens remedium nobis esse facias et « futurum. » Juxta considerationem et similitudinem cujuslibet istorum trium habet sanguis Christi triplicem effectum. Primo potest considerari potus sanguinis Christi ut potus aquae vivae. Sed potus aquae, ut dicunt Physici, est humectativus aridorum, extinctivus incensurum, delativus ad membra ciborum. Similiter potus sanguinis Christi, ut significatur per aquam, tres habet effectus in anima fidei. Arida ejus humectat et conjungit, male incensa refrigerat et extinguit, cibum Verbi Dei ad membra vehit, ut bene possint operari. De primo Isai. 44: « Effundam aquam super sitientem, et « fluenta super aridam, » ut scilicet anima quasi pulvis arida ad fontale deflua et ad malum prona, potu sanguinis Christi perfusa, conjungatur, conglutinetur et roboretur ad bona. Psal. 1: « Non « sic impii, non sic: sed tamquam pulvis quem



« projicit ventus a facie terrae: » quia tentatio diaboli spargit cogitationes, eorumque desideria, locutiones et opera per diversa vitia. Exod. 5: « Dispersus est populus per universam terram Aegypti ad congregandas paleas, » scilicet mundi vanitates. E contra Joan. 11: « Jesus moriturus erat, » supple, et sanguinem suum daturus, « non tantum pro gente, sed ut filios Dei qui dispersi erant, congregaret in unum, » scilicet per cordis unionem, linguae refraenationem, sensuum et morum disciplinam, vitae religionem. 1 Epist. Cor. 5: « Sitis nova conspersio, sicut estis azymi, » idest per baptismum a vitiis sinceri facti, ita sitis aspersione sanguinis Christi quasi pasta in nova vita et bona compacti. De secundo effectum Psal. 77: « Percussit petram, et fluxerunt aquae » ad refrigerandum scilicet pravae sitis ardorem. Eccles. 5: « Ignem ardentem extinguit aqua, » quia sanguis signatus per aquam destruit fervorem irae, avaritiae et pravi amoris et concupiscentiae. Augustinus: « Scribe, Domine Jesu Christe, in corde meo vulnera tua pretioso sanguine tuo, ut legam in eis tuum dolorem ad sustinendum pro te omnem dolorem, tuum amorem ad continendum pro te omnem pravam amorem: quia sic apparet, quod sanguis Christi ad instar aquae contra male incensa in nobis valet. » De tertio effectum 3 Reg. 19: « Elias comedit et bibit aquam, et ambulavit. » Potus eibum ad membra veliit, et ad eundem, sive operandum movet: sic potus sanguinis Christi eibum Verbum Dei sive praecepti ad corda defert, ut vires animae et membra corporis secundum illud vivant, et regantur, et bene operentur. Prov. 9: « Comedite, bibite, relinquitte infantiam, et vivite, et ambulate per vias prudentiae. » Comedite eibum Verbum Dei et praecepti, et bibite sanguinem Christi, qui scilicet praeceptum ad eor, ad sensus, ad membra deferat, et prava relinquere et bona perficere moneat. Secundo potest considerari sanguis Christi ut vinum spirituale: et secundum hoc habet tres effectus: quia lavat, calefacit, lactificat. Lavat sordes culpa, calefacit corda caritate, lactificat spirituali dulcedine. De primo Genes. 49: « Expectatio gentium lavabit in vino stolam suam, et in sanguinem uvae pallium suum, » idest fidelem animam. 1 Epist. Joan. 1: « Si in lumine ambulamus, societatem habemus ad invicem, et sanguis Jesu Christi filii Dei emundat nos ab omni peccato: » ad Hebr. 9: « Si sanguis hireorum aut taurorum aspersus inquinatos sanctificat ad emundationem carnis, quanto magis sanguis Christi emundabit conscientiam vestram ab operibus mortuis ad serviendum Deo viventi? » Apoc. 22: « Beati qui lavant stolas suas in sanguine agni, ut sit potestas eorum in ligno vitae. » De secundo Deut. 52: « Constituit eum, » ut comederet medullam tritici, » idest dulces corpus Christi, « et sanguinem uvae hiberet meracissimum, » idest purum et calidum; purum ad maculam iniquitatis, calidum in effectu. Esth. 1: « Assuerus, » scilicet beatus, « post nimiam potationem inebuit mero, » idest accensus est caritate. Cant. 2: « Introduxit me rex in cellam vinariam, ordinavit in me caritatem. » Cella vinaria est Ecclesia, ubi propinatur calidum vinum sanguinis Christi ad accendendum corda dilectione Dei et proximi. De tertio Psalm. 105: « Vinum laeti-

« ficat cor hominis: » Eccles. 51: « Exultatio animae et cordis vinum moderate potatum, » idest sanguis Christi cum mensura fidei. Cant. 1: « Botrus Cypri dilectus meus mihi: » quia scilicet sumo cum suo sanguine dulcedinem spiritualis laetitiae ad obliviscendum dolorem praesentis miseriae. Prov. 31: « Date siceram moerentibus, et vinum his qui amaro sunt animo; bibant et obliviscantur egenas suas. » Tertio potest considerari sanguis Christi ut sacrosanctum mysterium Ecclesiae, idest, ut res sacra et secreta, in qua magna virtus Dei est abscondita: et secundum hoc habet tres effectus supernaturales. Daemones enim triumphat, gratiam imperat, in bona vita conservat donec ad vitam aeternam perducatur. De primo Exod. 12: « Cum viderit Dominus sanguinem agni in superliminario, » idest in mente fideli, « non sinet percussorem ingredi domus vestras, et laedere. » Chrysostomus: « Hic sanguis abigit daemones, et longe facit esse. » 1 Epist. Machab. 6: « Ostendunt elephantis sanguinem uvae et mori ad acendos eos in praelium. » Multo magis ergo per sumptum sanguinem Christi vincuntur spirituales inimici. Apocal. 12: « Factum est praelium etc. » Et post: « Ipsi vicerunt eum propter verbum testamenti, et propter sanguinem agni. » De secundo 1 Petr. 1: « In aspersione sanguinis Jesu Christi gratia vobis: » ad Hebr. 12: « Accessistis ad montem Dei, et sanguinis aspersionem melius loquentem quam Abel: » quia scilicet sanguis Abel clamat ad Deum vindictam, sanguis Christi postulat et impetrat gratiam. Bernardus: « O sanguinem Christi summe reverendum, in altari potulum, in cruce pretium, in caelo pro nobis ad patrem advocatum. » De tertio Joan. 6: « Nisi manducaveritis carnem filii hominis, et biberitis ejus sanguinem, non habebitis vitam in vobismetipsis: quod si biberitis, bonam vitam habebitis. » Levit. 17: « Anima omnis carnis in sanguine est: » anima, idest vita. Philosophus: « Corruptio et secessus non nisi paucitas sanguinis est; et postquam corpus caruerit, corrumpitur corpus. » Hinc multi moriuntur propter vacuitatem sanguinis. Sicut itaque in sanguine nostro vita est corporalis, sic in sanguine Christi conservatio vitae spiritualis, et perductio ad statum vitae immortalis. Joan. 6: « Qui bibit meum sanguinem, habet vitam aeternam. »

## CAPUT XXXI.

*De consideratione Sanguinis Christi tertio modo, ut a fidelibus spiritualiter sumitur.*

« Patres nostri omnes eundem potum spiritualem biberunt. » Cor. 10. Augustinus: « Biberunt potum eundem spiritualem quem et nos, corporalem vero alterum: quia aqua quae fluxit de petra, fuit signum sanguinis Christi, quem nos etiam spiritualiter bibimus. » Tertio modo consideratur sanguis Christi ut praeter Sacramentum a salvandis spiritualiter bibitur. Et circa hoc possunt tria inquiri. Primo locus ubi iste potus invenitur: secundo usus ad quem quaeritur: tertio suavitas gratiae, quae de usu ejus exoritur. Primum quaeritur quis sit locus, ubi potus spiritualis sanguinis invenitur. Ad hoc dicendum, quod tot sunt loca, quot Christi vulnera. Psal. 77: « Per-

« cussit petram, et fluxerunt aquae. » Sicut ex foraminibus petrae aquam Judaei, sic fideles ex vulneribus Christi hauriunt spiritualem ejus sanguinem. Zach. 5: « Quid sunt plagae istae in « medio manuum tuarum? » Responsio, ut scilicet sugamus ex eis sanguinem spiritualem. Isai. 12: « Haurietis aquas in gaudio de fontibus Salvatoris, » idest de vulneribus Jesu Christi sanguinem spiritualem ad sitim malorum extinguendam per piam passionis meditationem. Sed ad quid est vulnus lateris? Isai. 40: « Filii tui de longe venient, et « filiae tuae de latere surgent. » Glossa « quia « perforato in cruce latere Christi, effluxit sanguis « redemptionis Filii ergo de longe venient, quia « electi de peccatis poenitentiam agent, et filiae de « latere surgent, quia devotae animae de vulnere « lateris Christi spiritualem devotionis sanguinem « bibent per piam passionis meditationem. » Hinc in locis a dextris crucifixi depingitur puella hilari vultu et pulchra facie et coronata, designans Ecclesiam, quae sanguinem Christi reverenter in calice suscipit, et a sinistris synagoga oculis panno ligatis tristi facie inclinans caput, et corona decedente, quae ipsum sanguinem fundit, et adhuc contemnit in quo figuratur, quod haec et omnis mortaliter peccans tria bona perdit: scilicet lumen gratiae, gaudium conscientiae, coronam gloriae. Hinc dicitur Thren. 5: « Vae nobis, quia peccavi- « mus: ideo obtenebrati sunt oculi nostri, moestum « factum est cor nostrum, cecidit corona capitis « nostri. » Puella in dextris sanguinem Christi in calicem suscipit, quia fidelis anima cor mundum vulneribus Christi applicans, sanguinem ejus spiritualiter cum omni devotione sumit, unde lumen in cordis gaudium et aeternae gloriae coronam acquirit. Secundo quaeritur quis sit usus, ad quem sanguis Christi quaeritur. Et sciendum, quod ad animam totam cum tribus potentiis suis, scilicet intellectu, voluntate, memoria perfundendam sive potendam. Exod. 12: « Fasciculum hyssopi tingite « in sanguine qui est in limine, et aspergite ex « eo superliminare, et utrumque postem. » Fasciculum hyssopi significat perfectionem et integritatem fidei: limen domus est Christus, per quem conceditur ad caelum introitus. Fasciculum autem hyssopi tingere in sanguine qui est in limine, est per fidem rectam sanguinem passionis Christi devorare et confirmare. Sed debemus eo utrumque postem et superliminare aspergere, idest intellectum, affectum, et memoriam ita sanguine Christi perfundere, et spiritualiter inebriare, ut intellectus hujus sanguinis circa genus humanum virtutem recognoscat; affectus tam ingens erga se beneficium diligendo sapiat, et memoria tanti amoris et largitatis Sacramentum nunquam obliviscendo semper teneat. Tertio quaeritur, quae sit spiritualis suavitas gratiae, quae de tali usu. Sive de perfusione praedicta sanguinis hujus exoritur. Et potest dici quod facit animam quasi paradysum Dei de suavitate hujus gratiae. 1 Petr. 1: « De aspersione sanguinis Jesu « Christi, gratia vobis et pax multiplicetur, » gratia virtutum, fertilitas, pax, dulcedo cordis, atque serenitas. Hujus suavitas gratiae per irrigationem sanguinis Christi comparatur paradysum Dei. De suavitate hujus gratiae Eccles. 40: « Gratia sicut pa- « radysus in benedictionibus, » idest sicut hortus Dei in variis deliciarum fructibus: Jerem. 51: « Erit « anima eorum quasi hortus irriguus. » Irrigata

enim anima dulcedine sanguinis Christi profert triplicem suavitate gratiae: scilicet dulces flores virtutum, frondes verborum, fructus operum. Primo ex spiritali effusione sanguinis Christi oriuntur in anima quasi in paradysum Dei dulces et varii flores virtutum: nam sicut sanguis hominis triplicem habet colorem, sanus rubeum; coctus colorem album habet multum, ut lac in mamillis; et maxime coctus nigrum; sic spiritalis influenza sanguinis Christi operatur in anima quasi in paradysum Dei flores virtutum varii coloris: scilicet rosas caritatis, lilia castitatis, violas humilitatis. De primo Eccles. 50: « Justus quasi flos rosarum in diebus vernis; » quia scilicet rutilat roseo sanguine Christi virtute caritatis: Cant. 7: « Comae capitis tui sicut purpura « regis, » quae scilicet tingitur sanguine cujusdam animalis. Comae capitis ejus, idest Christi, sunt fideles bonis cum moribus decorantes. Hi sunt ut purpura regis, quia spiritali sanguine Christi perfusi rubent, ut rosa virtute caritatis. De secundo Eccles. 50: « Justus quasi lilia quae sunt in tran- « situ aquae; » quae scilicet cadent (1) castitate, et bene decocti in corde ejus Christi sanguinis irrigatione. Apocal.: « Laverunt stolas suas, et dealba- « verunt eas in sanguine agni: » Canticor. 5: « Oculi ejus, » idest fideles, « in futurum sibi « providentes, sicut columbae quae lacte sunt lotae, » idest sicut simplicium qui bene decocti in mamillis cordis eorum Christi sanguinis irrigatione dealbati sunt, et casti facti. Osee 14: « Ero quasi ros, et « Israel germinabit quasi lilium. » De tertia Cantic. 2: « Jam hiems transiit, imber abiit et recessit, « flores apparuerunt in terra nostra. » Flores primi post hyemem sunt violae nigri coloris, pulchrae, boni odoris, et terrae vicinae. Hi flores significant animas humiles ex consideratione sanguinis Christi in passione multum torti quasi denigratas, idest sibi viles et eorum superbis despectas. Ezechiel. 51: « Nigrescere faciam stellas caeli, » idest ardentes spiritu caritatis et lucentes verbo veritatis, nigrescere faciam sanguine Christi, ut nigras et pulchras violas virtute humilitatis: Cant. 1: « Nigra « sum, sed formosa. » De his tribus generibus et coloribus florum paradysum Dei, Thren. 4: « Candi- « diores Nazarei ejus, » idest floridi « nive, niti- « diores lacte, » quia simulantur lilio in castitate: « rubicundiores ebore antiquo, » quia simulantur rosae in caritate: « sapphiro pulchriores, » quia simulantur violae in humilitate. Secundo ex spiritali perfusione sive potu sanguinis oriuntur in anima quasi in paradysum Dei frondes verborum bonorum et dulcium eloquiorum. Job 14: « Lignum habet spem, si « pretium fuerit, si senuerit in terra radix ejus, ad « odorem aquae germinabit, et faciet comam quasi « cum primum plantatum est. » Eccles. 59: « Flo- « rete flores, et frondete in gratiam: » quia scilicet electi non solum flores virtutum, sed etiam verborum bonorum proferunt ex potu sanguinis Christi ad triplicem gratiam: scilicet ad peccatorum conversionem, ad inimicorum reconciliationem, ad moestorum consolationem. Hinc arbores irrigatae tripliciter proferre leguntur folia: scilicet medicinalia, pulcherrima et viridia. De primo Apoc. 22. Ezech. 47: « Folia ligni paradysum Dei ad medicinam et sa- « nitatem gentium, » idest peccatorum, quia aquae ejus de sanctuario egrediuntur. Aqua sanctuarii spiritalis potus sanguinis Christi efficit verba san-

(1) Al. cadent.

etae praedicationis ad salutem peccatoris. Malach. 2: « Lex veritatis fuit in ore ejus, et multos aver-  
 « tit ab inquinata. » De secundo Daniel. 4: « Eece  
 « arbor, et folia pulcherrima, et subter eam lati-  
 « tabant animalia et bestiae, et in ramis volucres  
 « caeli; » quasi diceret, Sub folio pulchro animalia  
 sibi inimica, ut lupo et agnus, columba et ursus  
 pacificata erant, quia verba sapientium inimicos re-  
 conciliant. Eccles. 40: « Tibia et psalterium sua-  
 « vem faciunt melodiam, » idest concordiam vo-  
 « cum: » et super utrumque lingua suavis faciet con-  
 « cordiam inimicorum. » Item 6: « Verbum dulce  
 « eucharis, » idest bonae gratiae, « in bono ho-  
 « mine abundabit. » De tertio Jerem. 17: « Be-  
 « nedictus vir qui confidit in Domino, et erit tam-  
 « quam lignum quod transplantatur super aquas,  
 « et erit folium ejus viride. » Viridis color inspe-  
 ctus maxime in herbis et foliis oculos turbatos  
 reparat et confortat. Unde per hujusmodi folia ho-  
 norum verba significantur, quae tristes et miseros  
 consolantur. Eccles. 40: « Gratiam et speciem desi-  
 « derat oculus tuus, et super hoc virides sationes: »  
 Prov. 27: « Unguento et variis odoribus delectatur  
 « cor, et boni amici consilii anima dulcoratur: »  
 Eccles. 48: « Ezechias consolatus est lugentes in  
 « sempiternum: » Job 29: « Cum sedere quasi  
 « rex, eram tamen moerentium consolator. » Tertio  
 ex spirituali potu sanguinis Christi oriuntur in a-  
 nima quasi in Paradiso Dei honorum operum fru-  
 ctus. Ezechiel. 24: « Rigabo hortum plantationum,  
 « et inebriabo partus mei fructum. » Rigabo san-  
 guine Christi hortum animae, inebriabo fructu ho-  
 norum operum caelesti dulcedine: idest irrigati  
 potu sanguinis Christi faciunt dulcem fructum ho-  
 norum operum ad utilitatem proximi, quem etiam  
 ipsi comedunt in retributione caelesti. Amos 9:  
 « Facient hortos, et comedent fructus eorum. »  
 De triplici fructu in sequenti sermone circa finem.

## CAPUT XXXII.

*De triplici potu Sanguinis Christi.*

« Sanguis meus vere est potus, » Joan. 6. Alia  
 themata, ut supra de sanguine Christi. Potus San-  
 guinis Christi triplex est, ut ex supra dictis jam  
 patet. Sacramentalis, intellectualis, spiritualis: sa-  
 cramentalis, qui a solis Sacerdotibus sumitur sub  
 specie vini de calice; intellectualis, qui a populis  
 Christianis sumitur sub specie panis de ipso Christi  
 corpore; spiritualis, qui ab omnibus salvandis su-  
 mitur de passione Christi pia meditatione. Primo  
 modo sumptus peccata quotidiana relaxat: secundo  
 modo fidelem mentem dulcedine sua delectat: tertio  
 modo totam animam irrigando fecundat. Primus  
 potus sanguinis Christi est sacramentalis, qui a  
 solis Sacerdotibus sumitur de calice altaris. Matth.  
 26: « Accipiens Jesus calicem benedixit etc. Bibite  
 « ex eo omnes, » scilicet Apostoli, quasi soli Sa-  
 cerdotes. Iste potus digne sumptus peccata quoti-  
 diana relaxat, et hoc triplici ratione: quia tria mala  
 sunt in peccato veniali: scilicet quaedam macula  
 conscientiae, quaedam poena tristitiae, et quaedam  
 adversitas offensae divinae. Contra haec tria mala  
 proprie valet potus sanguinis Christi, qui est porus,  
 lenis et pretiosus: ratione puritatis lavat, ratione  
 lenitatis sanat, ratione pretiositatis placat: lavat, dico,  
 conscientiam animae maculam removendo: sanat

poenam tristitiae corda fidelium consolando: placat  
 offensam divinae justitiae pro nobis interpellando.  
 De primo ad Hebr. 9: « Sanguis Christi emunda-  
 « bit conscientiam vestram. » Genes. 49: « Expe-  
 « ctatio gentium lavabit in sanguine uvae pallium  
 « suum, » idest animas nostras. De secundo Za-  
 char. 10: « Lactabitur cor eorum quasi a vino. »  
 Vinum est sanguis uvae, et significat sanguinem  
 Christi, quem sumimus in altari. Iste potus cor  
 bonorum lactificat, quia conferendo solatium spiri-  
 tualis laetitiae sanat a tristitia culpae. Psalm. 22:  
 « Calix meus inebrians quam praeclarus est! » De  
 tertio ad Hebr. 21: « Accessistis ad sanguinis as-  
 « persionem melius loquentem quam Abel, » quia  
 sanguis Abel clamat vindictam ad Deum, sanguis  
 vero Christi postulat et impetrat indulgentiam. Ber-  
 nardus: « O sanguinem Christi sumite reveren-  
 « dum, in altari poculum, in cruce pretium, in  
 « caelo pro nobis ad Deum patrem advocatum. »  
 Sciendum, quod tria genera graviter arguuntur in  
 scripturis, quae nimis peccant in sanguine Salvato-  
 ris. Primi sunt corpore immundi, secundi corde  
 indurati, tertii procuratores pravi. Primi sanguinem  
 Christi in magnis peccatis indigne sumunt: secundi  
 ad virtutem sanguinis Christi converti nolunt: tertii  
 lucrum de sanguine Christi ad pravos usus con-  
 vertunt. De primo 1 Corinthi. 10: « Non potestis  
 « bibere calicem Domini, et calicem daemoniorum. »  
 Calix diaboli est luxuria carnis et mundi. Deuter.  
 52: « Fel draconum vinum eorum. » Qui hoc potu  
 turbido et immundo inebriantur, et super eum  
 sanguinem Christi pretium fundunt, quantum in  
 seipsis est, ipsum polluant, et ideo gravi poena  
 digni sunt. Genes. 4: « Maledictus eris super ter-  
 « ram, quae aperuit os suum: » super terram, idest,  
 plus quam caro tua. Ad Hebr. 10: « Irritam quis  
 « faciens legem Moysi sine ulla miseratione duo-  
 « bus vel tribus testibus moritur: quanto patatis  
 « deteriora mereri supplicia, qui filium Dei con-  
 « culcaverit, et sanguinem testamenti pollutum di-  
 « xerit, in quo sanctificatus est et Spiritui Sancto  
 « contumeliam fecerit? » De secundo Jerem. 5:  
 « Induraverunt facies suas supra petram, et no-  
 « fuerunt reverti: » quasi diceret: quidam perti-  
 naces in sua malitia duriores sunt corde quam  
 petra, scilicet quam durus adamas, qui quamvis  
 nulla re possit frangi, scinditur tamen sanguine  
 hirci: sed illi duriores sunt, qui nec virtute san-  
 guinis Christi emolliiri possunt, nec a sua pravitate  
 converti. Item duriores sunt quam petra, scilicet  
 quam quaelibet saxa dura; quia ad clamorem Chri-  
 sti in cruce et ejus sanguinis effusione terra tre-  
 muit, et petrae scissae sunt. Sed isti nec ad terribi-  
 lem vocem praedicationis nec ad virtutem sanguinis  
 Christi possunt emolliiri, et a sua pravitate converti.  
 De tertio Jerem. 22: « Vae qui aedificat domum  
 « suam in injustitia, qui aperit sibi fenestras, et  
 « facit laquearia cedrina, pingit sinopide, » scilicet  
 rubro colore, idest sanguine Christi. dicit Glossa:  
 « Qui domum aedificat materialem de male acqui-  
 « sitis, vel ornat superflue de sanguine Christi,  
 « idest de rebus Ecclesiae acquisitis sanguine Chri-  
 « sti, graviter peccat: sed multo gravius qui domum  
 « spiritualem, idest familiam pravam, ut pravas  
 « mulieres, filios, filias quasi partes domus, ut fe-  
 « nestras, per quas diabolus et fures intrant, et  
 « laquearia quasi laqueos diaboli, injuste aedificat  
 « et pingit, idest vestit, vel ornat sanguine Christi.

« His dicitur vae, idest gravis increpatio, et aeternae poenae comminatio. » Secundus potus sanguinis Christi est intellectualis, qui a populo Christiano sumitur sub specie panis de ipso corpore Salvatoris. Nam sicut sub specie panis consecrati corpus Christi est per transubstantiationem, et sanguis ejus per annexionem: sic sub specie vini consecrati sanguis Christi est per transubstantiationem, et corpus ejus per annexionem. Unde sicut Sacerdos sumit sanguinem Christi sacramentaliter de calice, ita fidelis populus sumit ipsum intellectualiter. De ipso Christi corpore, Job 59: « Pulli aquilae lambunt sanguinem. » Pulli aquilae sunt subditi Ecclesiae: hi lambunt sanguinem Christi non de calice, sed de ipso corpore Christi. Hic potus fidelem mentem dulcedine sua delectat Cant. 1: « Botrus Cypri dilectus meus mihi. » In botro sunt duo: uva in cibum, et in uva dulcis sanguis in potum. Psal. 80: « De petra melle saturavit eos. » Sicut petra corpus Christi incorruptibile, sic mel de petra significat dulcem sanguinem Christi, quem sugunt fideles de corpore Christi. Haec dulcedo tria bona facit: scilicet contemptum vitiorum, gratiam bonorum eloquiorum, desiderium aeternorum. De primo Prov. 27: « Anima saturata calcabit favos. » Qui enim de petra corporis Christi melle sanguinis ejus saturati sunt, omnis peccati suavitatem contemnunt. Judic. 9: « Dicit arbor ficus, » idest fidelis anima: « Numquid deserere possum dulcedinem meam, ut inter cetera ligna promovear? » quasi dicat: Contemno gloriam et delectamenta mundi pulchritudine Dei. De secundo Cant. 4: « Favus distillans labia tua, mel et lac sub lingua tua: » quasi dicat, quia sub lingua, idest in corde plena es spiritali dulcedine, ideo abundas utili et dulci locutione. Matth. 12: « Ex abundantia cordis os loquitur, » sicut de vase, sic est de corde. Vas plenum felle effundit amaritudinem; plenum melle, dulcedinem. Unde Luc. 6: « Bonus homo de bono thesauro cordis sui profert bonum, » et e converso. De tertio Eccl. 24: « Qui bibit me, adhuc sitiet. » Gregorius: « In corporalibus appetitus placet, experientia displicet; spiritalis vero dulcedo quanto magis bibitur, tanto magis sititur: quia dum ex pleno fonte stillatim mundo cordi degustando illabatur, ejus plenitudo potanda magis desideratur. » Psal. 64: « In stillicidiis ejus labitur germinans. » Idem Psal. 41: « Sitivit anima mea ad Deum fontem vivum. » Tertius potus sanguinis Christi est spiritalis, qui ab omnibus salvandis sumitur de passionis Christi pia meditatione. 1 ad Cor. 10: « Patres nostri omnes eundem potum spiritualem biberunt. » Sicut patres boni de foraminibus petrae aquam biberunt, et in illa sanguinem passionis Christi crediderunt figuratum, et per fidem spiritualem gustaverunt; ita boni Christiani de vulnerum Christi pia meditatione sanguinem ejus solent bibere. Isa. 60: « Filii tui de longe venient etc. » Hic potus totam animam

quasi hortum Dei irrigando fructu bono fecundat. Eccl. 24: « Rigabo hortum plantationum, et inebriabo partus mei fructum, » idest animae fideles irrigatae sanguine Christi facient fructum bonorum operum. Coloss. 1: « In omni opere bono fructificantes. » Fructus bonorum triplex est: scilicet honestae conversationis, sacrae devotionis et jucundae pietatis. De primo pascit homo seipsum, de secundo Deum, de tertio proximum. De primo Eccl. 25: « Ego quasi vitis fructificavi .... Et flores mei fructus honoris et honestatis, » idest honestae conversationis. Ad Ephes. 5: « Fructus lucis est in omni bonitate et justitia et veritate. » Quae autem in occulto fiunt a filiis tenebrarum, turpe est dicere. Matth. 7: « Omnis arbor bona fructus bonos facit etc. » Fructu bonae vitae pascit quisque seipsum. Prov. 17: « Qui servat ficum, comedet fructum ejus. » Isa. 5: « Dicite justo, quoniam fructum adinventionum suarum comedet. » Prover. 15: « Secura mens quasi jure convivium. » Secura ex honestate vitae. 2 ad Cor. 1: « Gloria nostra haec est, testimonio conscientiae nostrae, quod in simplicitate et sinceritate Dei, et non in sapientia carnali conversati sumus in hoc mundo. » De secundo Cant. 4: « Hortus conclusus soror mea, emissiones tuae paradus malorum panicorum. » Emissiones istae sunt fructus devotionis. Unde sequitur, « Nardus, crocus, cinnamomum, » quae sunt species aromaticae, et propter odorem bonum et virtutem suam significant fidelium devotionem Deo gratam, quae consistit in sacris desideriis, in variis virtutibus, gemitibus et orationibus. His fructibus pascit fidelis anima Dominum: unde sequitur ibid.: « Veniat dilectus meus etc. ut comedat fructus pomorum suorum. » Exod. 50: « Sume aromata boni odoris, faciesque thymiama. » Papias: « Thymiama, est confectio boni odoris ad incensum cultus Dei. » Gregorius: « Thymiama ex aromatibus facimus, cum in altari cordis virtutum multiplicitate redolemus. » Prov. 8: « Deliciae sunt mihi esse cum filiis hominum, » quia scilicet delectatur in amore et devotione nostra quiescere. De tertio fructu, scilicet pietatis, quo reficitur proximus, Psal. 51: « Ego quasi oliva fructifera in domo Dei. » Oliva portat oleum aliis ad lucendum, sanandum, et reficiendum; et significat opus pietatis quod impenditur proximis. Proverb. 21: « Thesaurus desiderabilis, et oleum in tabernaculo justis ad refectioem, » scilicet proximi. Luc. 10: « Samaritanus quidam videns spoliatum quasi pauperem, et vulneratum quasi subsidio indigentem, misericordia motus est, et appropinquans alligavit vulnera ejus, » idest subvenit necessitatibus ejus, infundens oleum et vinum quasi cibum et potum, et curam ejus egit. 1 ad Tim. 4: « Exerce te ipsum ad pietatem. Pietas enim ad omnia utilis est, promotionem habens vitae quae nunc est et futurae: » ad quam nos perducatur qui est benedictus in saecula. Amen.





## OPUSCULUM LII.

### DE SACRAMENTO EUCHARISTIAE AD MODUM PRAEDICAMENTORUM

( EDIT. ROM. LIX. )

#### CAPUT I.

« Memoriam fecit mirabilium suorum misericors  
« et miserator Dominus, escam dedit timentibus se. »  
Esea ista, de qua loquitur hic Psalmus 110, non  
inconvenienter intelligitur esca Sacramentalis, panis  
scilicet vivus, qui de caelo descendit, quem cum  
timore et reverentia sumunt quotidie in sancta Ec-  
clesia servi Dei: de quo pane et esca dicitur Sap.  
16: « Angelorum esca nutriti populum tuum,  
« paratum panem de caelo praestitisti eis sine labore,  
« omne delectamentum in se habentem, et omnem  
« saporem suavitatis. » Iste est panis, de quo di-  
citur Joan. 6: « Ego sum panis qui de caelo descendi:  
« si quis manducaverit ex hoc pane, vivet in ae-  
« ternum. » In praeparatione et in dispositione et  
ordinatione istius benedicti panis, scilicet Sacramenti  
Eucharistiae, Deus tot et tanta mirabilia inclusit,  
quod in ipso videtur quasi omnium mirabilium  
quae ab initio mundi fecit memoriam renovasse.  
Et ideo dicit Propheta in praedicto versu: « me-  
« moriam fecit mirabilium suorum etc.: » quando  
scilicet escam pretiosam istud pretiosum Sacramen-  
tum et gloriosum suis discipulis dedit. Ad intelli-  
gendum autem excellentiam et celsitudinem dignitatis  
istius Sacramenti mirifici, notandum est quod quam-  
vis omnia Sacramenta Ecclesiae virtutem habeant  
et effectum per fidem passionis Christi, et ex fide et per  
fidem prosint solum fidelibus ad salutem, hoc tamen  
specialiter et specialissime dicitur Sacramentum  
fidei. Unde in canone vocatur mysterium fidei, idest  
secretum sacratissimum soli fidei manifestum: quia  
tot et tanta sunt ibi supra et praeter, et etiam  
contra rationem naturalem, quae nisi per fidem  
tenerentur et crederentur, nunquam intelligerentur.  
Et ideo bene dicitur Isa 6, secundum aliam tran-  
slationem: « Nisi credideritis, non intelligetis. »  
Et Apostolus ad Hebr. 11: « Credere oportet acce-  
« dentem ad Deum quod est, et quia inquirentibus  
« eum remunerator sit. » Credentes igitur intelli-  
gunt, quia sicut dicit Apostolus (1), « Fides adsit, et  
« nulla quaestio remanebit. » Hoc autem non est  
sic accipiendum, quod credentes per fidem, per ratio-  
nem intelligant quicquid credunt: quia si sic esset,  
evacuaretur meritum fidei, secundum dictum Gre-  
gorii: « Fides non habet meritum, ubi humana

« ratio praebet experimentum. » Intelligere autem  
dicuntur credentes, quia innitentes potentiae et  
summae veritati increatae, sciunt et supponunt  
certissime verum esse quicquid a dicta veritate  
procedit; et quamquam per naturalem rationem  
modum ipsius veritatis non comprehendant, non ideo  
minus credunt quod suggerit fides esse verum; quia  
clarissime hoc intelligunt attestari excellentiae et  
majestati et immensitati ipsius primae veritatis ut  
nec in se nec in suis principalibus effectibus com-  
prehendi possit ab angustia et imbecillitate ipsius  
intellectus humani; de quo dicitur 2 Metaph., quia  
sicut se habet oculus noctuae ad radios solis, sic  
intellectus noster ad manifestissima naturae. Unde  
sicut non est defectus ex parte lucis solaris, quod  
a noctua clare videri non possit, sed hoc accidit  
ex parte debilitatis oculi ipsius noctuae: ita etiam  
contingit in nobis, quod intellectus noster non est  
proportionatus immensitati lucis divinae; ideo multa  
sunt quae nequimus comprehendere ratione. Pro-  
pterea clamat Apostolus ad Rom. 11: « O altitudo  
« divitiarum etc. » Quamvis autem comprehendere  
nequeamus, quod nihilominus comprehendere pos-  
sumus, quoquomodo, idest ex parte cognoscimus,  
non in toto, quia per speculum nunc videmus in  
aenigmate. Inde est, quod fidei mysteria per aucto-  
ritates sacrae Scripturae, cui fides catholica innititur,  
plene probari possunt atque perfecte: sed per ra-  
tiones demonstrativas omnino nequeunt omnia pro-  
bari, quamvis forte omnia possunt demonstrari:  
quia si hoc esset, fides nostra jam non fides, sed  
scientia vocaretur. Et sicut supra dictum est, me-  
ritum nostrum, quod principaliter in fide consistit,  
omnino tolleretur: nec jam utique posset dici alicui  
Christiano, fides tua salvum te fecit. Verum est  
autem quod omnes errores infidelium non solum  
per sacram Scripturam, sed etiam per rationes pos-  
sunt elidi, et multae etiam suasiones bene per  
rationem naturalem inveniuntur, quibus intellectus  
fidelium jam credentium adjuvatur et confortatur  
ad veritatem clarius et obnoxius amplectendam. Ut  
igitur ad propositum veniamus, intendimus ostendere  
aliqua mirabilia, et etiam miracula maxima pro sa-  
crosancto Eucharistiae Sacramento, et subjungere ali-  
quas rationes, exempla mirabilia, et quodammodo illis  
similia in scriptura, et etiam in natura, per ea quae  
fidei rationabiliter non incredibilia esse videntur.  
Praedicta vero mirabilia et miracula secundum or-

(1) Non Apostolus videtur legendum, sed Augustinus.  
S. Th. Opera omnia. V. 17.

dinem praedicamentorum intendimus distinguere, ut melius et apertius capiantur. Et primo de praedicamento substantiae ut priore et fundamento omnium praedicamentorum.

## CAPUT II.

Primo igitur est incipiendum respectu praedicamenti substantiae. Ubi sciendum est, quod fides Ecclesiae sanctae credit circa Sacramentum Eucharistiae substantiam panis converti in substantiam carnis, et substantiam vini in substantiam sanguinis Christi ex vi Sacramenti, et per concomitantiam sub utraque specie esse totum, idest animam et corpus et divinitatem ipsius: et ista transubstantiatio, idest conversio panis in corpus Christi, sive in carnem, fit in instanti finitionis et complexionis illorum verborum Christi, scilicet, « Hoc est enim corpus meum, » dummodo iste qui profert, sit Sacerdos, et intendat facere quod facit Ecclesia, et praedicta verba eum tali intentione proferat super materiam debitam, scilicet panis de frumento. Et idem intelligendum est de conversione vini in sanguinem, quod similiter fit in continenti completis his verbis, « Hic est enim calix » etc. » Et istud potest accipi penes praedicamentum substantiae: unde ista conversio proprie transubstantiatio appellatur. Quamvis autem istud sit summum miraculum, et solius divinae virtutis, scilicet facere in continenti talem, tantam et tam ineffabilem conversionem, et substantiarum mutationem; nihilominus hoc non apparebit impossibile, si consideremus aliqua similia in scriptura, et aliqua similia in natura. Uxor enim Lot, quia retrospexit contra mandatum Dei, subito conversa est in statuam salis, ut habetur Gen. 19. Virga etiam Moysi conversa est in colubrum, et postea in virgam. Exod. 4. Et diabolus dicebat Christo sciens divinam potentiam, « Die ut lapides isti panes fiant, » Math. 4. Non est enim multum difficile facere de lapide panem, et de pane carnem. In legenda Beati Joannis Evangelistae legitur, quomodo convertit virgas ligneas in aureas, et lapides arenae in lapides pretiosos, et e converso. Et in Evangelio suo legitur quomodo Christus convertit aquam in vinum, et multa sunt talia in Scriptura. In natura quoque satis similia reperiuntur. Certum est enim quod sunt quaedam aquae, in quibus lignum convertitur in lapidem vel petram, unde optimaes cotes fiunt. Videmus quoque continue quod homo comedit panem, et in corpore suo convertitur in carnem: bibit vinum, et convertitur in sanguinem: et istud est commune hominibus et jumentis, quod eorum cibi et potus in carnem et sanguinem convertuntur. Si ergo Deus dedit talem potestatem ventri et stomacho animalis, non est mirandum si talem potestatem etiam contulit suo vicario, ut mediante Verbo Dei, virtute divina, quae omnia in omnibus operatur, conversionem et mutationem efficiat supradictam. Et hanc similitudinem ponit Joannes Damascenus libro quarto cap. 5, dicens: Sicut panis et vinum transeunt per nutrimentum in carnem et sanguinem animalis, ita panis propositionis, idest qui ponitur in altari, et vinum cum aqua transeunt in corpus Christi, quod prius non erat: et ista duo, scilicet panis et vinum, non sunt duo, sed unum corpus Christi. Et in hoc fecit Deus memoriam suorum mirabilium: quia sicut in principio creavit Deus caelum et terram et omnia quae in eis sunt solo verbo suo: secundum

illud Gen. 1: « Fiat lux etc. » et sicut fecit de omnibus et singulis creaturis ab initio creatis, secundum quod Psalmista dicit Psal. 52: « Verbo » Domini caeli firmati sunt, » sic facit Deus in Eucharistiae sacramento: quia secundum Augustinum, « Accedit verbum ad elementum, et fit sacramentum: » et hoc est quod dicit auctor: « Si tanta » virtus est in sermone Domini, ut inciperent esse » quae non erant; quanto magis operatur ut sint » quae erant, et in aliud commutentur? » De hoc etiam dicit Ambrosius: « Si tantum valuit sermo » Eliae, ut ignem de caelo descendere faceret; non » valebit tantum sermo Christi, ut substantias mu- » tet? » Et Joan. Damascenus ubi supra: « Si » sermo Dei vivus est et activus, qui dixit, Fiat » lux, et facta est lux, verbo cujus caeli firmati » sunt, et omnis decor eorum, qui ex purissimo » sanguine beatae Virginis se hominem fecit, non » potest panem et vinum corpus et sanguinem » suum facere? » Non debet ergo incongruam apparere, si verbum divinum a sacerdote prolato accipiat eandem virtutem, et etiam majorem a Deo, quam accipiat natura, idest vis insita rebus, per quam in animali eibus et potus in carnem et sanguinem convertuntur. Quod etiam in humanis videmus, quod verbum humanum est majoris potentiae et virtutis quam sit proferens ipsum verbum. Verbum enim Papae per suum nuntium promulgatum, facit omnes praelatos ecclesiae in unum concilium convenire, quos sine verbo ipse Papa non potest aliquo modo seu potentia congregare. Et etiam verbum Imperatoris vel regis citissime facit exercitum congregari: et quilibet Dominus plus efficit circa subditos suos verbo, quam possit efficere virtute propria sine verbo. Et ideo non debet quisquam incongruens judicare, si Deus verbo suo per suos nuntios sacros sacerdotes prolato contulit eandem efficaciam et virtutem, etiam amplio-rem quam praestiterit naturae corporali, per quam videmus tot et tanta illic similia provenire: ideo scriptum est in Psalm. 28: « Vox Domini in vir- » tute, vox Domini in magnificentia. » Et haec de ista ineffabili transubstantiatione sufficiunt quo ad praedicamentum substantiae.

## CAPUT III.

Secundo, respectu praedicamenti quantitatis, credit sancta mater Ecclesia et fides catholica sub illa parva hostia contineri et esse veraciter totum corpus Christi ita magnum et ita perfectum sicut fuit in cruce, et ita magnum sicut in die paschae resurrexit: et hoc est summum mirabile. Cum omne corpus sit in loco, et commensuretur locatum loco, et sub tam parvae hostiae quantitate integrum corpus Christi continetur. Sed in hoc facit Deus memoriam suorum mirabilium, quae prius fecit de seipso et in seipso. Primo in nativitate sua, quando exivit per portam clausam, ea semper clausa manente, secundum testimonium Ezechielis Prophetae. Fuit enim beata et gloriosa mater Virgo ante partum, Virgo in partu, Virgo post partum, quia semper constitit incorrupta, et penitus illibata. Idem miraculum facit in sua resurrectione, quia resurrexit, et exivit de monumento omnino existente clauso. Idem etiam miraculum fuit, quando pluries ad discipulos januis clausis introivit. Quae omnia haec mirabilia si discutiantur, sunt similia miraculo supradicto

hujus sacramenti venerabilis. Ad cujus intelligentiam debemus intendere, quod corpus Christi non est sub hostia naturaliter, sed sacramentaliter; et ideo non est ibi ut locatum in loco, nec sub dimensionibus propriis, sed sub dimensionibus quae prius fuerant, scilicet panis et vini. Et ideo cum substantia de se, in quantum substantia, locum non occupet nec requirat nisi in quantum est sub dimensionibus quantitatis, sequitur ex hoc quod corpus Christi sub sacramento non requirat vel occupet plus locum vel de loco, quam dimensiones panis, sub quibus velatur et tegitur, occupant et requirunt: et hoc in sequentibus plenius disseretur. In hoc etiam possumus videre aliqua similia in natura. Anima enim nostra, sicut dicit Augustinus, est tota in toto corpore, et in qualibet parte corporis; et ita magna in solo digito, sicut in toto corpore; et ita magna in corpore infantis, sicut in corpore gigantis: quia propter corporis augmentum et diminutionem, seu alicujus membri truncationem, ipsa anima non minuitur vel augetur: et tamen est tota in toto, et tota in qualibet ejus parte, nec exceditur nec excedit. Si homo non potest perfecte hoc intelligere de seipso et in seipso, quod tamen tam philosophi infideles quam etiam doctores catholici verum esse indubitanter affirmant, non est mirum si hoc perfecte non potest intelligi in hoc dignissimo sacramento. Item tam longa est longitudo turris sicut ipsa turris, et tam lata quam lata est latitudo, et grossities ita grossa: sed species et figura turris tota comprehenditur in oculo et recipitur, qui est parvus: quia si non esset illa species longitudinis in oculo, non posset homo per aspectum de ipsa longitudine judicare, quod tamen patet esse falsum, quia solo visu et aspectu potest fieri multoties vera comparatio et aestimatio de mensura. Et ita potest dici de uno monte, et de sole et luna et sphaera caeli, et de omnibus talibus, quorum magnitudo cum sit quasi immensa, nihilominus capitur ab oculo ita parvo. Si ergo hoc est mirabile et est certum, non est incredibile corpus Christi posse contineri sub hostia tam parva, quamvis hoc perfecte intelligere nequeamus. Et sicut dictum est de oculo, ita potest dici de speculo, in quo videt quilibet manifeste, quod in parvo speculo apparet maxima civitas, et imago maximi hominis, et montis, et caeli. Dic ergo mihi, quomodo potest hoc esse? et ego dicam tibi quomodo in dominico sacramento est illud. Deus enim voluit in utroque ita esse.

#### CAPUT IV.

Tertio, respectu praedicamenti qualitatis, debemus credere, quod quamvis hostiae sint figurae rotundae, et habeant albedinem et saporem panis, illa tamen accidentia non afficiunt corpus Christi, quia non est ita rotundum, nec ita album, nec insunt aut inhaerent ei illa accidentia hostiae quae apparent, species (1) sub esse sacramentali est verum corpus Christi gloriosum. Et quamvis non appareat nobis sensibiliter tale, non tamen debemus propter hoc minus credere ita esse. In hoc igitur fecit nobis Deus memoriam mirabilium suorum similium praecedentium in Scriptura. Sicut enim nobis narrant Evangelistae, Christus adhuc existens mortalis secundum corpus, ostendit se in monte in habitu

(1) *Fortè sed.*

glorioso, Petro, Jacobo et Joanni, et tamen corpus suum nondum erat glorificatum, sed gloriosum. Item quando jam post resurrectionem suam corpus suum erat veraciter gloriosum, nunquam amplius habitum gloriae dimissurum, nihilominus peregrinis euntibus in Emaus se ostendit sub habitu peregrini, et Magdalenae sub habitu hortulani. Sicut igitur rationabilibus causis talem tunc et taliter se ostendit, et non sub habitu glorioso quem gestabat; sic etiam in eucharistia. Rationes vero et causas, quia satis notae sunt, omitto causa brevitatis. In naturalibus etiam similia videmus. Multa enim apparent aliter quam sint. Sol enim apparet quasi cubitalis rotunditatis, quamvis ultra modum quantitatem seu rotunditatem illam excedit. Aliquando etiam apparet rubeus vel sanguineus aut pallidus aut etiam alterius qualitatis, quamvis in se nullo modo recipiat peregrinas impressiones. Item baculus apparet curvus seu fractus in aqua currente, quamvis in veritate sit integer et rectus. Item multis tam infirmis quam sanis, est aliqua palati et linguae passio, quandoque dulcia videntur amara, et multis e contrario. Non est ergo insclitum, si in sacramento supradicto sit aliud in veritate, et aliud videatur. Nec tamen in hoc falsitas est ulla; quia illa accidentia quae apparent ibi, quamquam ut praedictum est, velent et tegant, non afficiunt corpus Christi. Illa enim accidentia quae prius inerant substantiae panis, post consecrationem non insunt corpori Christi, sed sunt ibi sine subjecto alicujus substantiae: unde in hoc est miraculum, et praeter ordinem naturalem, quod quantitas quae prius erat in substantia seu in materia panis, post sacramenti consecrationem remanet absque substantia: alia vero accidentia quae ipsi pani inerant mediante quantitate, modo insunt quantitati sicut prius. Unde et dimensiones et albedo et sapor et figura, et alia similia accidentia, sunt ibi sine primo subjecto, id est sine substantia, sed non sunt sine subjecto proximo, quia modo ipsi quantitati sicut prius insunt. Et quamvis hoc miraculum sit, et supra naturam; non tamen est contra intellectum: quia dicit Beatus Hilarius: « Deus potest dividere per effectum » quicquid possumus per intellectum. » Item si malefici possunt res aliter et aliud quam sunt, ut puta de festuca trabem vel serpentem per sua mendosa praestigia facere apparere, non est mirandum seu discredendum, si Deus per sua vera miracula, faciat talia et majora non ad delusionem vel deceptionem hominum, sed ad salutem. Status enim sub quo sumus, hoc requirit: sub fide enim modo vivimus et ambulamus per fidem. Fides autem, secundum Augustinum « est credere quod non » vides. » Et secundum Apostolum ad Hebr. 12: « Fides est sperandarum substantia rerum, argumentum non apparentium. » Sacramentorum etiam natura hoc requirit, ut videlicet, quia sua signa (1) aliud intus contineant vel significant, et aliud exterius videantur; sicuti circulus quidem lignum est, significat tamen vinum: et sicut dicit Hugo de S. Victore: « Sacramentum est materiale elementum » extrinsecus oculis propositum, ex institutione significans, ex similitudine repraesentans, ex sanctificatione gratiam invisibilem continens. » Est ergo conveniens fidei nostrae et dignitati ipsius sacramenti, quod aliud sit, et aliud significare videatur.

(1) *Fortè quia sunt signa.*



## CAPUT V.

Quarto, respectu praedicamenti relationis credit fides nostra et sancta Ecclesia catholica, quod verbis consecrationis unica voce potest consecrari una hostia vel plures in numero quocumque. Quamvis enim secundum virtutem naturae omnium natura constantium sit ratio et terminus magnitudinis et augmenti, secundum quod ait Philosophus in lib. de Anima; in hoc tamen sacramento quia non natura, sed Dei potentia operatur, non est limitata ad aliquam certam materiae quantitatem, sed unico solo verbo et actu potest consecrari totus panis triticeus de mundo, et totum vinum, dummodo sacerdos illa praesentialiter et visibiliter ante faciem suam haberet, ita quod posset vere tamquam praesentia demonstrare. Verum est tamen, quod aliqui doctores summi et maximi scripserunt et docuerunt, quod si sacerdos intendens consecrari, iret per omnes plateas ubi panis venditur, et per omnia cellaria ubi vina venduntur, et proferret verba consecrationis super panem et super vinum, etiam si in hoc nulla esset necessitas vel utilitas, sed solum hoc faceret in ludibrium et in opprobrium Jesu Christi, nihilominus totum vere esset consecratum, eo quod ibi concurrunt quatuor necessaria in quolibet sacramento: scilicet debitus minister, debita materia, debita forma verborum, et intentio consecrantis. Alii autem dicunt, quod in tali casu talis sacerdos minime consecraret: quia non solum in sacramentis requiritur vel est necessaria intentio ministrantis, ut scilicet intendat facere quod ecclesia intendit vel facit, sed etiam intentio sacramentum instituentis, idest Christi, qui non intendit quod ad talem usum tanto talique ludibrio celebretur aut conficiatur tam nobile sacramentum. Quaecumque autem de his opinio teneatur, in hoc tamen concordant quantum ad potentiam et respectum Dei et sacerdotis: quia panis iste sive sit modicus, sive multus, unico verbo convertitur in corpus Christi, et quod nequaquam in minori minus et majori majus, sed par et pariter in utroque. Cujus memoriale miraculum et exemplum habemus in sancta Scriptura de manna, quod corpus Christi figurabat, de quo legitur Exod. 16: « Et collegerunt alii plus alii minus, et « mensi sunt ad mensuram gomor: nec qui plus « collegerat, habuit amplius: nec qui minus paraverat, reperit minus; sed singuli juxta illud quod « edere poterant, congregaverunt. »

## CAPUT VI.

Quinto respectu praedicamenti actionis credit fides catholica, quod Corpus Christi est cibus mentis non ventris, animae non corporis. Unde in hoc concurrunt duo mirabilia contra usum naturae: videlicet, quod accidentia sine corpore et sine subiecto nutriunt vere corpus, et corpus verum nutrit et reficit spiritum. Constat enim quod si homo multum poneret in sacrificio de pane, et multum de vino, post conversionem panis et vini in corpus et sanguinem Christi, illa accidentia sumpta ab homine ipsum alterarent et nutrent, ac si substantia panis et vini ibi veraciter esset. Corpus autem Christi nutrit et reficit animam, quia ad hoc est istud sacramentum specialiter institutum. Deus autem instituit unum quod nos in esse gratiae generaret, ut baptismum; et aliud per quod nos in gratia regenerationis roboraret, ut sacra-

mentum confirmationis; et tertium per quod roboratos nutriet in gratia et augmentaret, ut sacramentum Eucharistiae. Sicut enim in corpore humano calor naturalis consumeret humidum radicale, nisi potus et cibus extrinsecus sumeretur, et per cibum extrinsecus sumptum conservatur naturae necessarium, et deperditum restauratur, quia aliter vita in homine non duraret; ita spiritualiter ad vitae gratiam conservandum et augmentandam cibus spiritualis necessarius existit nobis. Aestus enim vitiorum et concupiscentiae carnalis, et distractionis, et gravamina mundi, et infestationes spirituum malignorum ita agunt quotidie contra humorem nostrae devotionis, et ita impugnant animam nostram, quod ipse debilitaretur et deficeret, nisi istud benedictum viaticum sumeret, et cibum acciperet spirituale. Corpus autem Christi propter excellentiam sanctitatis et puritatis, et propter unitatem divinitatis ita est spirituale, quod in ipso perfectissime concurrunt et conveniunt ratio cibi propter corporalitatem, et ratio spiritus propter sanctitatem et puritatem, et unitam divinitatem. Et ideo placuit Deo per talem cibum corporalem reducere hominem ad spirituale, pristinam et primariam puritatem, et finalem sanctitatem, ut morbo peccati tribueret medicinam congruentem. Homo enim cedit a vita beata per cibum corporalem a Deo vetitum et ab homine usurpatum diabolo suggerente; et ideo conveniens existit, ut similia similibus, et contraria contrariis curarentur: quod scilicet homo reduceretur ad vitam a qua ceciderat per cibum similiter corporalem a Deo praestitum, et ab homine sumptum, ipso Dei filio ministrante et imperante. De effectu autem hujus cibi et de actione dicit beatus Bernardus: « Corpus Christi aegrotis est medicina, « peregrinantibus diacta, debiles confortat, valentes « delectat, languores sanat, sanitatem servat, fit « homo mansuetior, ad correptionem patientior, ad « laborem ferventior, ardentior ad amorem, sagacior ad cautelam, pronior ad obedientiam, devotior ad gratiarum actionem. » Hujus autem exemplum habemus memoriale in Scriptura 5 Reg. 19. Ubi dicitur, quod Angelus Domini ministraverat Eliae subcinericium panem, de quo comedit Elias, et ambulavit in fortitudine illius quadraginta diebus et quadraginta noctibus etc. Si bene attendatur illa historia, Elias timore Jezabel tunc fugiebat, et erat debilitatus et contractus corde ita quod petivit animae suae ut moreretur; sed postquam de illo bis comedit, scilicet sacramentaliter et realiter, seu spiritualiter: vel bis comedit, quia sacramentum istud bis sumitur, dum sub duplici specie consecratur; effectus autem est fortis (1), ita quod in fortitudine illius ambulavit quadraginta diebus et quadraginta noctibus, idest toto tempore hujus saeculi, quod per quadragenarium numerum designatur, et pervenit in hujusmodi cibi fortitudine usque ad montem Dei Oreb. In natura quoque satis simile est, quod cibus pure corporalis non solum nutrit et confortat corpus, sed etiam animam ipsam alterat et delectat corpore mediante: propter quod in Psalm. 16, dicitur: « Panis cor hominis confirmat « et vinum etc. » Oleo autem, idest sancti Spiritus gratia, quae in isto cibo confertur, tota facies hominis exhilaratur. Item est aliud mirabile in isto sacramento respiciens praedicamentum actionis: quod quamvis sit cibus salutis et vitae, cibus angelicus

(1) *Al. foris.*



et divinus, nihilominus indigne sumentibus eibus iudicii et mortis est: quia secundum Apostolum, 1 ad Corinth. 11: « Qui manducat et bibit indigne, « iudicium sibi manducat et bibit etc. » Et de hoc habemus exemplum memoriale in sacra Scriptura Joan. 13, ubi dicitur de Juda proditore, quod « post bucellam panis introivit in eum satanas. » Hoc etiam fuit figuratum 1 Paralip. 26, ubi dicitur, quod Ozias rex percussus est lepra, quia sacrificium obtulit quod sibi non licebat, et Oza fuit a Deo percussus et occisus, quod indigne fuit ausus contingere arcam Dei, ut habetur secundi Regum octavo. Exemplum huius habemus quotidie in natura, videlicet quod homini febricitanti multoties panis et vinum est causa mortis; quae sanis proficiunt ad salutem. Fructus autem arboris quem Adam et Eva sumpserunt, omnino in se sanus et bonus erat, et tamen propter inobedientiam sumentibus fuit causa mortis; ita de Sacramento Eucharistiae dici potest. Sicut enim eibus seu medicina corporalis mortuis nullo modo prosunt, et omnino ille insanus reputaretur, qui homini mortuo daret eibus, aut aliquam medicinam; ita ad ipsius gratiae conservationem similiter augendam prodesset quidem infirmis, idest, tentatis, aut peccatis venialibus infirmis, et his qui ex mortalibus resurgentes sunt adhuc debiles et infirmi: mortuis autem in peccato mortali actu vel proposito existentibus, nullo modo prodest, imo potius obest: et talis sumptio vere non medicina, sed insania iudicanda est: et taliter sumentibus accidunt multa mala, quae David Propheta enumerat in Psal. 68, dicens: « Fiat mensa eorum coram « ipsis in laqueum, et in retributiones, et in scandalum. Obscurentur oculi eorum ne videant, et « dorsum eorum semper incurva. Fiat habitatio « eorum deserta, et in tabernaculis eorum non sit « qui inhabitet. Effunde super eos iram tuam, et « furor irae tuae comprehendat eos. Quoniam quem « tu percussisti, persecuti sunt, et super dolorem « vulnerum meorum addiderunt. Appone iniquitatem super iniquitatem eorum, et non intrent in « justitiam tuam. Deleantur de libro viventium, et « cum iustis non scribantur etc. »

#### CAPUT VII.

Sexto, respectu praedicamenti passionis in sacramento mirabiliter praedicatur, quod sancti Patres ordinaverunt in tres partes hostiam frangi consecratam, ad significandum spiritualiter triplicem fracturam seu lacerationem et vulnerationem factam in corpore Christi in cruce; scilicet pedibus, manibus et latere. Vel propter tres status Christi, scilicet qui fuit aliquando mortalis, aliquando mortuus, aliquando immortalis. Vel propter tres naturas vel substantias in una persona, scilicet divinitatis, animae et corporis. Vel etiam propter fidem et testimonium beatissimae Trinitatis, idest trium personarum in unius essentiae unitate. Quamvis enim sic frangatur hostia illa in tres partes, si etiam plures essent sive pauciores, nihilominus tamen corpus Christi remanet integrum et illaesum, quia illa fractura non afficit nec attingit ipsum corpus Christi, sed est tantum in quantitate extensiva, sub qua ante conversionem fuit panis, et quae post consecrationem corpus Christi velabat. Et tamen in confessione Berengarii, et in quibus-

dam dietis Sanctorum, corpus Christi dicitur atteri et frangi dentibus, videlicet quia illa quantitas vere frangitur et vere dentibus atteritur, sub qua est in omni parte et post fracturam veraciter et substantialiter corpus Christi. Exemplum autem huius memoriale, seu figura habetur Gen. 22. Abraham enim volente immolare filium, ligato et posito super altare filio suo Isaac, non Isaac, sed aries immolatur: quia Christus in ara crucis clavis perforatus, aries, idest caro ejus per sacrificium passionis immolatur; sed filius Abrahae, idest Christus, in quantum Dominus, illaesus et impassibilis perseverat. Eo quoque modo in fractione hostiae nec frangitur ipsa substantia corporis, nec ipsum corpus, sed tantum quantitas dimensiva, quae ante consecrationem inerat ipsi pani. In natura quoque habemus exemplum in speculo, quod si frangitur, non ibi frangitur imago vel species quae in speculo relucebat, sed in qualibet parte fracti speculi adhuc resultat imago, sicut de corpore Christi superius ostensum est. Simile quodammodo est in animalibus annulosis, in quibus integra est una sola anima sensibilis, sed si dividantur, tot per divisionem sunt animae quot partes, sicut docet Philosophus 2 de Anima. In homine etiam, quod fracto vel inciso membro de corpore hominis, non propter hoc anima rationalis frangi vel incidi dicitur, sed integra et incorruptibilis perseverat. Similiter et hostia fracta vel incisa, corpus Christi, quod nunc est incorruptibile et impassibile, semper integrum permanet et illaesum; et tamen in qualibet parte sensibili dietae fracturae ipsum corpus Christi totum est perfectum, sicut in tota hostia prius erat. Quia sicut anima rationalis tota est in toto corpore, et tota in qualibet ejus parte, ut dicit Augustinus; ita dicunt alii doctores, quod corpus Christi in hostia integra est totum, et sub qualibet ejus parte totum. Sicut enim sub qualibet parte sensibilis carnis salvatur tota essentia carnis, et sicut quaelibet pars panis est panis, et quaelibet pars vini est vinum, sicut et ipsum totum; ita dicunt quod quaelibet pars corporis Christi vel ipsius hostiae est totum corpus Christi, et sub qualibet parte sensibili hostiae servatur perfecte tota essentia Christi. Non tamen propter haec debet dici infinities ibi esse: quia licet continuum sit divisibile in infinitum secundum partes aliquotas, non tamen secundum partes essentielles, in quibus conservari poterit ratio speciei. Caro enim, secundum Philosophum in lib. de Anima, bene potest dividi in partes ita minutas, quod in eis non remaneret ratio carnis, et panis et vinum similiter: et sub talibus partibus corpus Christi non remaneret, nisi videlicet essent partes ita sensibiles, quod in eis panis et vini ratio et essentia posset conservari. Quia tamen circa ista ultima diversae sunt opiniones, ideo ea subtilioribus quaestionibus relinquamus. Item ipsum corpus Christi veraciter sumitur et sumi potest ab impiis et peccatoribus, et ab eis saepissime tractatur indigne. Posset etiam ipsa hostia in lutum projici, vel bestiis tradi, seu ab animalibus comedi, et indigne multis aliis modis tractari. Quamvis autem talia facientes gravissime peccent, tamen corpus Christi per talia nullo modo coinquinatur, nec ullam in se efficiunt laesionem: sicut radius solis per lutum transiens exinde non inficitur, vel gladiis vulneratur, seu quomodolibet aliter. Et in hoc summam dignationis divinae pietatis, et fidei nostrae

certitudo et veritas demonstratur: quia si non posset vere consecrari corpus Christi sive tangi nisi a justis hominibus, nunquam possemus in hoc mundo scire quando esset veraciter corpus Christi; sicut de aliquo homine in hoc mundo non possemus scire certitudinaliter quis esset justus vel injustus. Sicut ergo Christus corporaliter se portari permiserat a diabolo supra pinnaculum templi, Matth. 4, et a peccatoribus crucifigi; ita et adhuc se permittit tangi, comedi et contrectari a peccatoribus immundis.

#### CAPUT VIII.

Septimo, «ubi» respectu praedicamenti quod dicitur credit fides nostra, quod corpus Christi vere est in caelo, et vere est in terra, in quolibet altari, et in quolibet loco ubi est panis triticeus in forma debita per sacerdotem consecratus. In hoc ergo est summum miraculum, quod unum et idem corpus numero est in diversis locis: quod non solum videtur praeter et supra rationem, sed etiam contra, quia intelligibile seu possibile non videtur. Unde inter omnia mirabilia quae sunt in isto sacramento, istud videtur mirabilius et difficilius in intellectu, et ad difficultatem facit: quia dum videmus quod unum et idem secundum diversos respectus et secundum diversa potest esse in diversis locis: secundum quem modum loquitur Dominus in evangelio, quando dicit, «Ubi est thesaurus tuus, ibi est cor tuum;» et Augustinus, quasi dicat (1): «Verius est anima ubi amat, quam ubi animat:» et beatus Bernardus de quibusdam dicit, quod «corpore sunt in choro, et corde sunt in foro:» aliud est enim esse vere, quo anima est in corpore sicut ejus perfectio et forma, et aliud est esse amoris et perfectionis, quo anima dicitur esse ubi amat: secundum quem modum loquebatur Apostolus Phil. 5, dicens: «Nostra conversatio in caelis est.» Hoc modo loquendi satis potest intelligi, si diceretur quod corpus Christi secundum esse naturale est in caelo, et secundum esse sacramentale est in terra. Sed quod secundum unum et idem esse idem corpus numero sit in diversis locis, hoc videtur impossibile omnino communi legi naturae. Et tamen nos credimus et dicimus, quod corpus Christi secundum esse sacramentale est in pluribus et diversis locis, ubicumque scilicet est panis debite consecratus: et hoc videtur penitus contra veri corporis rationem. Sed adhuc potest dici, quod ratio quare unum corpus non potest esse in diversis locis, est: quia naturaliter corpus quod est in aliquo loco, definitur et circumscribitur illo loco, et ei commensuratur, ita quod totum corpus superficialiter toti loco, et partes corporis partibus loci commensurantur, ita quod singulae partes locati, singulis partibus loci assignantur: et hoc modo corpus Christi est in pixide vel in hostia. Non tamen est ibi localiter eo modo quo supradictum est, idest secundum conditionem et commensationem locati et loci: quoniam corpus Christi, quamvis sit in loco, non tamen est ibi sub propriis dimensionibus, nec sub propria quantitate, sed sub quantitate et dimensionibus sub quibus fuit panis. Unde in aliis corporibus quae naturaliter et communiter sunt in loco, ita est quod eorum substantia est in loco mediante propria quantitate. Unde proprie et principaliter esse in loco convenit eorum quantitati, quae loco

(1) Forte qui dicit, vel quando dicit.

commensuratur, sed substantiae convenit ex consequenti. Sed in corpore Christi sub sacramento est e converso; quia ipsum est in loco mediante quantitate quae prius inerat pani. Et quamvis ibi sit vera et propria quantitas corporis Christi, tamen hoc est ex substantia consequente et mediante, quae sine propria quantitate subsistere non potest. Et haec est ratio, quare potest esse in diversis locis, sicut supra de anima ostensum est: quia enim anima indivisibilis est, nec habet in se quantitatem molis, nec quantitatem extensivam; si esset in corpore sicut locatum in loco, oporteret quod esset in aliqua parte corporis indivisibiliter seu minima, et non in aliis partibus. Sed quia non est ibi sicut locatum in loco, sed sicut actus et perfectio, seu forma, et ideo est tota in toto, et tota in qualibet parte ejus; similiter dico quod Christus totus est non solum in qualibet hostia, sed etiam in qualibet parte sensibili cujuslibet hostiae: quod esse nullo modo posset, si omnino esset ibi sicut locatum in loco. Et nihilo minus est ibi verissime et substantialiter totum corpus Christi immolatum in cruce, sicut verissime anima est tota in toto corpore, et in qualibet ejus parte. Non autem credo quod in scriptura vel in natura huic aliquid bene valeat assimilari. Sed interdum consuevit poni exemplum de verbo vocali, quod ab ore loquentis unum et solum procedens, ad aures omnium audientium defertur ubicumque fuerint audientes, et nihilominus idem remanet in corde proferentis; ita corpus Christi semper manet in caelo, et tamen veraciter in altari et in ore omnis sumentis vere existit. Ad quod melius declarandum faciunt aliqui adaptationem secundum definitionem de verbo, quam ponit Augustinus 3 de Trin. Est enim sicut ibid., idem dicit, verbum cordis quod mente concipitur, et est verbum oris quod aure percipitur, et est verbum nutus quod oculo cognoscitur, et est verbum scriptum quod in charta legitur. Primum est verbum hominis ad seipsam: secundum est unius hominis ad alterum praesentem: tertium est similiter ad alium praesentem: quartum est unius hominis ad alium absentem loco vel tempore vel utroque. Et subdit ibi Augustinus, quod cogitatio hominis in corde formata, quae dicitur conceptus mentis, est verbum cordis, quod neque graecum, neque latinum, neque eujuscumque alterius linguae est: et addit, quod verbum, quod foris fit, idest quod foris sonat, est signum verbi quod intus latet, cui magis competit nomen verbi: nam quod ore carnis profertur, vox est verbi. Et docet ibi dictus Augustinus, quod verbum cordis assimilatur Filio Dei in sinu Patris, verbum autem oris vel vocis assimilatur Filio incarnato: unde subdit Augustinus: «Sicut ergo verbum nostrum vox quodammodo fit assumendo eam, in qua manifestatur sensibus hominum; et sicut verbum nostrum vox quidem fit, seu mutatur in vocem; ita verbum Dei factum est caro, sed absit, quod mutetur in carnem.» Secundum ergo praedicta distinguitur, quod Filius Dei genitus a Patre, et a Patre nunquam decedens, est sicut verbum cordis in mente semper existens; sed ipse idem Dei Filius carne vestitus, est sicut verbum in pelle vel charta scriptum. Ipse quoque idem est sub sacramento, sicut verbum in voce prolatum. Primo autem modo Verbum, sive Dei Filius est ubique, sicut ipse Pater, cum quo semper est tam ipse Filius quam ipse Spiritus Sanctus. Secundo

modo Verbum Dei, sive Dei Filius, proprie est in caelo; ubi ad dexteram Dei Patris et in unico solo loco est, ibi modo secundum esse naturale, sicut verbum in charta scriptum non potest esse nisi in uno loco, scilicet ubi est charta in qua scriptum est. Tertio modo dici potest, quod est Verbum, sive Filius Dei sub sacramento, videlicet in pluribus locis; ubicumque videlicet est iste panis consecratus, sicut vox est in aure omnium audientium. Et sicut unum et idem verbum habet istum triplicem actum tripliciter sic acceptum, ita per supra scriptam similitudinem dici potest de Domino nostro Jesu Christo. Ista tamen similitudo non est omnino propria, sed dissimilis est in multis. Adhuc tamen a doctoribus solet una quaedam talis ratio assignari. Omne compositum sapit naturam suorum componentium, et habet quodammodo naturam mediam componentium extremorum: sicut videmus in vino aqua mixto, quia non est ita sicut aqua, nec est ita forte sicut purum vinum, sed habet quemdam vigorem medium utriusque: sic est in proposito et quodammodo dici potest: quamvis enim Christus non est dicendus compositus ex divinitate et humanitate, tamen per assumptionem humanitatis et per unionem ipsius Filii Dei cum homine sunt duae naturae in una persona divina, sicut per compositionem animae et corporis sunt duae naturae, scilicet corporalis et spiritualis, in vero homine. Unde in symbolo Athanasii dicitur: « Sicut anima rationalis et « caro unus est homo, ita Deus et homo unus est « Christus. » Filius ergo Dei, in quantum purus est homo, et verus Deus, est ubique sine dubio: in quantum est caro, est solum in uno loco; sed in quantum est Deus et homo, tenet medium locum utriusque esse, scilicet in pluribus locis. Et hujus ratio quamvis posita est a doctoribus magnis, et licet verum concludat, potius tamen quaedam adaptatio, quam similitudo dici debet. Aliqui enim ponunt exemplum in luce solari, quae cum unica sit in toto mundo, ab uno, scilicet sole, procedens, in pluribus tamen locis et ubique quodammodo incorrupta est: in vitro relucet, ex quo sequitur saepe radios aliquos rubeos aut virides fieri, et ex illo colore vestiri quo depictum est vitrum per quod transeunt radii illustrantes, et tamen illi radii ab illa luce non sunt divisi, nec a sole separantur. Anselmus enim ponit simile exemplum de fonte, rivo et lacu: quia sicut Filius a Patre, et Spiritus Sanctus ab utroque, ita rivus manat a fonte, et lacus ab utroque. Et saepe accidit, quod solus rivus est quodammodo incorporatus, quando scilicet per canales plumbeos, aut lapideos, aut alterius materiae descendit: tunc enim quamvis sit eadem aqua in fonte, rivo et lacu, solus tamen rivus seu solius rivi aqua canalibus est vestita; ita licet eadem sit essentia Patris et Filii et Spiritus Sancti, tamen in solo Filio ista essentia est unita corpori: et sicut ubi sunt canales, ibi est rivus velatus et absconditus sub corporeo tegumento, alibi tamen ista aqua est libera et patens; ita ubi est panis triticeus debite consecratus, ibi est Filius Dei incarnatus; alibi vero ubique est in terra sine corpore, sicut est Pater et Spiritus, cum quibus est ubique ejusdem essentiae seu naturae. Et sicut rivus potest esse in pluribus locis conclusus canalibus, ita Filius Dei potest esse in pluribus locis corpore unitus sub velamine sacramenti. Haec etiam similitudo satis grossa est et extranea, quamvis possit aliqua-

liter satisfacere devotioni eorum, qui non rationibus vel argumentationibus, sed solum fidei principaliter innituntur. Concludendo igitur secundum theologiceam veritatem, dicimus corpus Christi verum esse simul et semel in pluribus locis et diversis, quod in Deo quidem non est impossibile, nec contra intellectum: quia licet ipsum corpus Christi, quantum est de se, sit in uno loco tantum secundum naturam corporalem; tamen quia panis, qui convertitur, est in locis pluribus, ideo necessario sequitur quod ipsum corpus sit in pluribus locis, et non per sui mutationem, sed per alterius conversionem in ipsum. Et ubicumque est iste panis sic consecratus, substantificatur in ipsam, et ab ipsa persona Filii Dei: et quantum ad hoc habet quamdam similitudinem speciei, quae vere est in omnibus suis individuis ubicumque sit. Ipsum autem corpus de sui natura restringitur ad unum locum particularem. Per unionem, quam habet cum deitate, dilatatur quodammodo et extenditur quasi ad quemdam modum universalem, ut sit ubicumque suum individuum reperitur: ita enim ordinavit Dominus, ut panis debite consecratus convertatur et efficiatur corpus Christi. Non debet aliquis ex his rebus assumere materiam vel occasionem calumniae vel erroris, cum protestati fuerimus suprascripta nostro proposito ita adaptari, quod in ipsorum similitudine et proprietatum comparatione multiplex dissimilitudo et improprietas invenitur. Et si forte videatur alicui istud quod dicitur de corpore Christi non esse sibi perfecte intelligibile, quomodo scilicet possit esse in diversis locis, vel aliquid aliud de praedictis, attendat illud quod dicit Joannes Damascenus: « Quomodo fiet istud, dicit Virgo, quia virum non « cognosco? cui respondit Angelus: Spiritus sanctus « superveniet in te, et virtus Altissimi obumbrabit « tibi. Et nunc tu interrogas qualiter panis sit « corpus Christi, et vinum et aqua sanguis. Dico « tibi et ego: Spiritus sanctus superveniet hic, et « haec facit quae sunt supra naturam et supra « intelligentiam. Sufficere debet tibi exemplum de « beata Virgine, quae per fidem quam verbis An- « geli adhibuit, Dei Filium concepit. »

## CAPUT IX.

Octavo, respectu praedicamenti quod dicitur « quando », credit fides catholica, quod ab initio primitivae Ecclesiae usque in finem saeculi, fideles sumpserunt et sumunt quotidie corpus Christi, et tamen non est diminutum propter hoc in aliquo, nec diminuetur in aliquo, etiam si totus mundus sumeret eodem momento. Cujus ratio est, quia corpus Christi non augetur nec diminuitur per unius panis aut plurium consecrationem, et in corpus Christi conversionem: quotcumque enim panes seu hostiae consecrentur, et in corpus Christi convertantur, nunquam tamen multiplicatur ipsum corpus Christi, sed tantum unicum perseverat, et unum solummodo est et idem: quantumcumque etiam a quibuscumque hominibus comedatur, semper est unum, et in nullo diminuitur, sed semper perfectum et integrum perseverat. Cujus memoriale habemus exemplum in sacra Scriptura 5 Reg. 17, de lecytho olei et hydria farinae, de quibus comederunt Elias et vidua et ejus filius circa tres annos et plus, quae secundum naturam per unum annum eis minime suffecisset. Item memoriale exemplum habe-



mus de quinque panibus et duobus piscibus, quos Dominus Jesus multiplicavit intantum, quod tot millia hominum satiabat, et multae sportae de reliquiis sunt repletae. Non est ergo mirum si Deus conservat suum corpus, ut comestum non diminuat nec consumatur, quia dictos panes non solum sic conservare potuit, sed etiam augmentare. Exemplum etiam horum habemus in natura; quia jam sunt sex millia annorum et ultra, quod homines triticeum panem comederunt, et semper per Dei gratiam comedent; et tamen triticeum non est diminutum, sed hodie satis plus est de tritico quam fuit ab initio, quando homines triticeum comedere coeperunt. Si ergo servat et multiplicat triticeum et alia semina per agriculturam, nonne si vellet, posset omnia multiplicare et conservare, sicut fecit de panibus supradictis? Habemus simile exemplum de candela, quia ab una candela accensa infinitae candelae possent accendi, nec primae candelae lumen diminuetur, et omnes aliae tantumdem haberent de lumine sicut ipsa. Et per supradicta patet responsio ad blasphemiam quam consueverunt aliqui haeretici opponere, dicendo: Si corpus Christi esset ita magnum sicut mons, a tot comestoribus esset longo tempore jam consumptum. Cacci et insani! ille qui lumen unius candelae conservat absque diminutione, quamvis aliae innumerabiles candelae accendantur ab ipsa, non potest eodem modo conservare corpus suum sine aliqua diminutione, quamvis a multis quotidie comedatur? Et ista est una ratio, quare fuit ordinatum quod Missa sine candela non celebretur: ut videlicet ipsum Filium Dei, qui est lumen ad revelationem gentium, repraesentaret; vel ut intelligamus veraciter corpus ejus esse ita communicabile omnibus, sicut ipsum lumen. Aliae enim rationes sunt de hoc, quas non oportet ad praesens referre.

#### CAPUT X.

Nono, respectu praedicamenti quod dicitur Situs, dixerunt quidam corpus Christi fore sub hostia sub eodem situ sicut est in caelo ad dexteram Patris. Cum enim Deus Pater sit ubique, secundum illud Isai.: « Caelum et terram ego impleo, » dicit Dominus; « ubicumque est corpus Christi, ad dexteram Dei sedet, idest quiescit in potioribus bonis. Nee obstat, ut dicunt, quod hostia saepe circumfertur, vel circumgyratur, et transvertitur multis modis: quia sicut homo in navi existens vel super equum sedens, quantumcumque moveatur vel currat navis vel equus, nihilominus tamen homo sedet et quiescit, licet anima moveatur, ita et in proposito dici potest. Ex quo enim corpus est in loco, necessario oportet ei locum aliquem designare. Et convenientius esse videtur ut attribuatur ei situs quem habet in caelo, quam alius: quia in Christo propter suam unionem Dei et hominis communicantur sibi idiomata, ita quod sicut de Christo, ita et de corpore ejus glorioso vere dici potest illud Jacobi: « Apud quem non est transmutatio, nec vicissitudinis obumbratio. » Aliqui tamen magni doctores aliter subtilius et melius, ut videtur, docuerunt, dicentes certum situm corporis Christi sub sacramento non posse assignari: quia

supra dictum est, quod illa conversio tantum est transubstantialis substantiae, et substantiae non datur situs, nisi quantum est sub naturali quantitate et dimensionibus extensivis. In sacramento autem vi conversionis non est nisi substantia corporis Christi, quamvis ex consequenti et per concomitantiam sit ibi propria quantitas, et sint ibi propriae dimensiones, et alia propria accidentia corporis Christi, sicut est ibi anima rationalis, et ipsa divinitas. Praedicta autem accidentia sunt tamen ibi mediante substantia. In aliis autem corporibus et locatis et situatis accidit e contrario: quia videlicet substantia est in loco et in situ mediante quantitate: et ideo in eis substantia et subjectum sequitur proprias dimensiones et propriam quantitatem: sed in hoc sacramento fit e contrario: ista enim conversio est tantum substantialis, et ideo transubstantiatio vocatur. Et ideo quantitas et dimensiones et alia accidentia corporis Christi comitantur et sequuntur ipsam substantiam, nec occupant plus de loco et situ quam ipsa substantia, sicut supra dictum est: manet tamen sub quantitate et dimensionibus quae ante conversionem inerant ipsi pani, quia accidentia non mutantur, quia situs substantiae non convenit, ut praedictum est: ideo non deberet in isto sacramento, scilicet corporis Christi, situs assignari. Istud autem et similia, in quibus non est aliquod periculum fidei, subtilioribus disputatoribus relinquamus.

#### CAPUT XI.

Decimo, respectu praedicamenti quod dicitur Habitus, credit similiter fides nostra et ecclesia catholica, corpus Christi gloriosum veraciter esse sub sacramento, et vere in habitu gloriae ibi esse. Hunc tamen habitum corporalibus oculis non ostendit, eo quod illam visionem nobis reservat in patria, et ista ostensio gloriosa non congruit sacramento, nec fidei nostrae, eum adhuc per speculum in aenigmate ambulemus: et de hoc sufficiant quae in praedicamento qualitatis sunt ostensa. Verum est tamen quod de hoc forte secundum aliquos diceretur melius sicut dictum est in praecedenti capitulo de situ. Sicut enim secundum eos, non est ibi corpus Christi sub aliquo situ corporali, quia substantiae ut substantiae non est necesse aliquem habitum talem assignari, sic forte non est ibi sub aliquo habitu. Quid autem horum congruentius dicatur, similiter subtilioribus disputatoribus causa brevitatis nunc relinquamus, quia sufficienter et veraciter alibi determinatum est, dummodo teneamus et firmiter eredamus in hoc sacramento veraciter et essentialiter existere seu subsistere verum corpus Christi gloriosum illud idem numero quod de Virgine natum est, et in cruce passum est, et quod tertia die resurrexit a mortuis, et ascendens in caelum, sedet ad dexteram Dei Patris Omnipotentis.

*Nota. In editione Romana 1370, titulus VIII Capitis bis repetitur: unde factum est, ut erratis pariter titulis duorum sequentium Caputum, decem tantum ea in Editione esse videantur, cum revera sint undecim.*



# OPUSCULUM LIII.

## DE HUMANITATE JESU CHRISTI DOMINI NOSTRI

(EDIT. ROM. LX.)

### ARTICULUS I.

#### *Prooemium.*

Christus Jesus venit in hunc mundum peccatores salvos facere: 1 ad Timoth. 1. In verbis propositis Apostolus describit divinae incarnationis, et humanae redemptionis sacramentum. Primum ibi: « Christus Jesus. » Dicit enim Damascenus, quod « Jesus » significat Deum humanatum; Christus vero e « contra hominem deificatum: quia duae naturae « in una persona Filii se circumdederunt: quia divinitas potentiam exercet in actibus humanis, dum « leprosus tactu mundatur, mortuus tactu vivificatur, cecus tactu illuminatur, et sic de aliis: et « humana natura propria sua servans, in potentia « divinitatis se ostendit, dum solem obscurans moritur, dum petram seindens crucifigitur, dum « potestate propria animam ponens, et iterum eam « sumens sepelitur. » Dicitur autem sacramentum juxta etymologiam, quasi sacrum secretum. Revera hoc sacramentum, scilicet dominicae incarnationis, est et sacratissimum et secretissimum. Sacratissimum, Joan. 10: « Quem Pater sanctificavit, et misit in mundum: » Luc. 1: « Quod nascetur ex te sanctum, vocabitur filius Dei; » unde vocatur sanctus sanctorum. Secretissimum quidem Matth. 11: « Nemo novit Filium, nisi Pater: » unde Apostolus dicit ad Ephes. 3: « Hoc sacramentum absconditum a saeculis in Deo, » idest in sola Dei notitia, ut dicit Glossa. Verumtamen sciendum est, quod hoc sacramentum fuit a principio angelicis spiritibus manifestum, daemonibus vero occultatum, fidelibus etiam misericorditer revelatum. De primo dicit Apostolus 2 Timoth. 3, « quod apparuit Angelis « illud magnum sacramentum pietatis: » unde Augustinus: « Sicut fuit illud mysterium absconditum a saeculis in Deo, ut tamen innotesceret « principibus et potestatibus in caelestibus. » Hujus autem ratio est, quia « omnes sunt administratorii spiritus » ad Hebrae. 1, « missi in misterium propter eos qui hereditatem capiunt « salutis: » quod quidem fit per incarnationis mysterium. Unde oportuit ipsis omnibus hoc mysterium manifestari a principio. Haec autem manifestatio fuit in generali, non in speciali: unde Dionysius dicit, 7 cap. cael. Hier., quod Scriptura sacra

*S. Th. Opera omnia. V. 17*

inducit quasdam caelestes essentias ad ipsum Jesum quaestionem facientes, perfectius scire cupientes ab ipso hujus mysterii rationes, ut patet Isa. 55, ubi quaerentibus: « Quis est iste rex gloriae? » Respondit Jesus: « Ego qui loquor justitiam: » unde Maximus: « Utrum Angeli cognoverunt futuram incarnationem, ambigere non licet: latuit autem eos « investigabilis Domini conceptio, atque modus « qualiter totus in genitore, totus manebat in omnibus, necnon in Virginis cellula. » Secundo fuit sacramentum incarnationis daemonibus occultatum; unde dicitur 1 Cor. 1: « Quem nemo principum « hujus saeculi cognovit, » idest daemonum, ut dicit Glossa. Unde notandum, quod daemones non cognoverunt Christum certitudinaliter propter infirmitatem carnis quam in ipso videbant, sed conjecturaliter propter opera quae divinitus faciebat. Unde super illud Luc. 4: « Scio quod sit sanctus « Dei, » dicit Glossa, idest vehementer opinor. « Si enim cognovissent, nunquam Dominum gloriae « crucifixissent, » idest crucifigi suggestissent, ut dicit Glossa 1 Cor. 2. Unde Rabanus super illud Matth. 27, « Multa passa sum per visum propter « eum: » Tunc « diabolus demoni intelligens per « Christum se spolia sua amissurum, » sicut primum per mulierem mortem intulerat, ita modo per mulierem vult Christum de manibus Judaeorum liberare, ne per ejus mortem mortis amittat imperium. Tertio fuit sacramentum incarnationis fidelibus misericorditer revelatum: unde Luc. 10: « Beati oculi qui vident quae vos videtis: » ubi dicit Glossa Bedae: « Non oculi Scribarum et Pharisaeorum beati sunt, qui tantum corpus Domini « viderunt; sed illi oculi beati, qui possunt ejus « cognoscere sacramenta, de quibus dicitur: Et « revelasti ea parvulis. » Ad Ephes. 3: « Mysterium « Christi aliis generationibus et filiis hominum « non est agnitum, sicut nunc sanctis Apostolis et « Prophetis. » Glossa, « ita plene sicut nunc. »

Notandum vero, quod sacramentum dominicae incarnationis primo fuit ab aeterno praedeterminatum, in veteri lege praefiguratum, a Prophetis praedictatum, a sanctis Patribus desideratum, ab Angelo nuntiatum, in beatissima Virgine Maria consummatum. De primo dicitur Prov. 8: « Ab aeterno praedeterminatum: » ad Rom. 5: « Qui praedeterminatus « est Filius Dei in virtute, » Glossa: « Praedesti-

« natio est gratiae praeparatio, qua ab aeterno  
 « Deus homini Christo, et cunctis quos praescivit  
 « conformes fieri imaginis Filii sui, bona sine me-  
 « ritis praeparavit. » Praeclarissimum enim lumen  
 praedestinationis et gratiae est ipse mediator Dei  
 et hominum homo Christus Jesus. Infra in Glossa:  
 « Apparet itaque nobis in nostro capite ipse fons  
 « gratiae, a quo in cuncta ejus membra gratia dif-  
 « funditur. » Sciendum vero, quod sacramentum  
 istud congruentissime ordinatum fuit ad salutem  
 hominis: quia licet alias modus fuisset Deo possi-  
 bilis, nullus tamen ita congruus, ut dicit Augusti-  
 nus. Congruerat enim ipsi reparatori, et reparabili  
 et reparationi: congruebat reparatori, quem decebat  
 suam sapientiam ostendere, potentiam et bonitatem.  
 Quid autem potius, quam conjungere extrema sum-  
 me distantia? Magna enim potentia fuit in con-  
 junctione disparium elementorum, major in con-  
 junctione illorum ad spiritum creatum: maxima vero  
 in unione ad spiritum increatum, ubi maxima est  
 disparitas. Quid vero sapientius, quam quod ad  
 completionem totius universi fieret conjunctio primi  
 et ultimi, hoc est Verbi Dei, quod est omnium  
 principium, et humanae naturae, quae in operibus  
 sex dierum fuit ultima omnium creaturarum? Quid  
 enim benevolius, quam quod creator rerum com-  
 municare se voluit rebus creatis? et haec benigni-  
 tas magna fuit in conjunctione sui cum omnibus  
 rebus per praesentiam; major quia communica-  
 vit se bonis per gratiam; maxima quia se com-  
 municavit Christo homini, et per consequens  
 generibus singulorum in unitate personae. Fuit  
 etiam iste modus congruentissimus ipsi repara-  
 bili: quia homo per peccatum corrumpitur in in-  
 firmitatem, ignorantiam, et malitiam, per quae  
 ineptus factus est ad virtutem divinam imitandam,  
 ad veritatem cognoscendam, et ad bonitatem dili-  
 gendam; ideo Deus homo factus est, per quod se  
 tradidit homini imitabilem, cognoscibilem, et ama-  
 bilem. Fuit similiter iste modus congruentissimus  
 nostrae reparationi, quod Dominus in forma servi  
 procuraret salutem servi. Sciendum vero, quod licet  
 opera Trinitatis sint indivisa, tamen solus Filius  
 incarnatus est. Exemplum de tribus domicellis in-  
 duentibus tunicam: de quibus dici potest, quicquid  
 facit una, facit et alia, una tamen sola induit tuni-  
 cam; ita in proposito, quia incarnatio non solum  
 dicit operationem, sed etiam terminum operationis;  
 sed licet operatio sit communis, non tamen termi-  
 nus. Fuit autem congruum Filium incarnari: quae  
 quidem congruitas attenditur et secundum propria  
 Filii, et secundum appropriata: secundum propria,  
 quia Filius est Verbum, Imago et Filius: homo  
 vero per peccatum tria perdiderat, scilicet cognitio-  
 nem sapientiae, similitudinem gratiae; et hereditatem  
 gloriae, ideo missum est Verbum, Imago et Filius. Se-  
 cundum appropriata etiam magis convenit: quia in o-  
 pere creationis relucet praecipue potentia, in opere  
 recreationis sapientia et in opere retributionis bonitas.

Secundo sacramentum dominicae incarnationis  
 fuit in veteri lege praefiguratum: unde dicitur  
 1 Cor. 10: « Omnia in figura contingebant il-  
 « lis. » Unde Bernardus de diversis Christum fi-  
 gurantibus dicit sic: « Manna de caelis descendit,  
 « gaudeant esurientes: de vinea caeli botrus erupit,  
 « gaudeant sitientes: oleum effusum est, gaudeant  
 « aegrotantes: inspiravit Deus spiraculum vitae,  
 « reviviscant morientes: lapis de monte praecisus

« est, timeant superbientes: fons ad ablutionem  
 « patet, redcant praeveritatores. A Domino factum  
 « est istud, et est mirabile in oculis nostris. » Idem  
 quod Moysi monstratum est in rubo et igne, Aaron  
 in virga et flore, Gedconi in vellere et rore. Hoc  
 aperte vidit Salomon in forti muliere et ejus pretio;  
 apertius praecidit Jeremias de femina et viro: aper-  
 tissime Isaias in Virgine et Deo. Fuit autem con-  
 veniens Christum praefigurari. Primo quia conna-  
 turale est homini, ut per sensibilia deveniat in  
 cognitionem intelligibilium. Ad Rom. 1: « Invisibilia  
 « Dei a creatura mundi per ea quae facta sunt  
 « intellecta conspiciuntur etc. » Dionysius 1 cap.  
 caelesti Hierarchiae: « Neque possibile est aliter  
 « lucere divinum radium, nisi varietate sacrorum  
 « velamine anagogice circumvelatum, » idest inclu-  
 sum diversis figuris sacrae Scripturae ipsum reprae-  
 sentantibus. Secundo ut mirabili mysterio fidem praee-  
 berent mirabilia acta. Luc. 2: « Non erit impos-  
 « sibile apud Deum omne verbum. » Augustinus: « Di-  
 « cat mihi Judaeus incredulus, quemadmodum virga  
 « arida floruit et fronduit et nubes protulit, et ego  
 « dicam illi quemadmodum Virgo concepit et pepe-  
 « rit. » Tertio ut infidelibus et indignis divina  
 mysteria occultarentur. Isa. 45: « Vere tu es Deus  
 « absconditus: » Matth. 11: « Abscondisti haec a  
 « sapientibus et prudentibus, et revelasti ea par-  
 « vulis, » Glossa, « idest humilibus. » Et sequitur  
 ibid.: « Ita Pater, quoniam sic fuit placitum ante te: »  
 ubi dicit Gregorius: « Illis verbis exempla humili-  
 « tatis accipimus, ne temere discurrere de aliorum vo-  
 « catione aliorumque repulsione praesumamus, quo-  
 « niam injustum esse non potest quod placuit justo. »

Tertio sacramentum dominicae incarnationis  
 fuit a Prophetis praekonizatum: unde dicitur Lu-  
 cae 1: « Benedictus Dominus etc. »: et sequitur  
 ibi: « Sicut locutus est per os sanctorum. » Fuit  
 conveniens autem Christum a prophetis praekoniza-  
 ri. Primo propter ipsius gloriae dilatationem. Isa. 44:  
 « A finibus terrae laudes annuntiamus, » Glossa,  
 « idest praedicari gloriam justis, » idest gloriam  
 Christi omnes justificantis. Augustinus: « Gloria est  
 « clara cum laude notitia. » Per Prophetas Christus  
 laudabiliter claruit in notitia hominum, ita ut om-  
 nes qui praeteribant ejus adventum et sequebantur,  
 clamabant, Hosanna in excelsis filio David, benedi-  
 ctus qui venit in nomine Domini. Secundo propter  
 expectantium consolationem. Prov. 15: « Spes quae  
 « differtur, affligit animam: » Glossa, « tum pro-  
 « pter dilationem honorum, tum propter illationem  
 « malorum. » Sancti vero Patres totam spem po-  
 suerunt in adventum Domini, ideo ex ejus dilatione  
 affligebantur, propter quod conveniens fuit eos  
 Prophetas consolari. Isa. 55: « Dicite pusillanimes  
 « confortamini: » Glossa, « in spe, » et nolite timere. »  
 Tertio propter condignam praeparationem. Amos 4:  
 « Praeparare in occursum Domini tui, » Glossa,  
 « ut veniente ad te per mysterium incarnationis,  
 « avide suscipias liberatorem. »

Quarto sacramentum dominicae incarnationis fuit  
 a sanctis Patribus desideratum; unde dicitur Aggaei 2:  
 « Venit desideratus cunctis gentibus. » Augustinus:  
 « Sciebant antiqui sancti Patres Christum esse ventu-  
 « rum, et omnes qui pie vivebant, dicebant: O si hic  
 « me inveniat illa nativitas! o si quod credo in Seri-  
 « pturis sanctis, videam oculis meis! » Sunt autem  
 tres causae propter quas intantum desiderabant.  
 Primo propter inundantiam terrenae miseriae quam

sustinuerunt; unde in Psal. 17: « In tribulatione  
 « mea invocavi Dominum, et exaudivit de templo san-  
 « cto vocem meam; » Glossa, idest de venturo Chri-  
 sti corpore, in cuius incarnatione effectum exaudi-  
 tionis consecuti sumus. Exod. 4: « Obsecro, Domine,  
 « mitte quem missurus es. Vide afflictionem populi  
 « tui, sicut locutus es veni et libera nos. » Ubi  
 notatur, quod afflictio et liberatio populi Israelitici  
 fuit figura afflictionis et liberationis totius humani  
 generis. Secundo propter abundantiam pacis inter-  
 nae et externae, quae in ejus adventu superabun-  
 daverunt; unde in Psal. 71: « Orietur in diebus  
 « ejus justitia, et abundantia pacis. » Glossa 1:  
 « Pax erit donec morte destructa jam non sit luna,  
 « idest carnis mortalitas. » Cant. 1: « Osculetur  
 « me osculo oris sui: » osculum enim est pacis  
 signum. Petit ergo sponsa incarnationem Filii Dei,  
 quae est quasi praelibatio conjunctionis nostrae ad  
 Deum, ut dicit Glossa: in qua quidem conjunctione  
 pax cordis nostri consistit. Tertio propter affluen-  
 tiam laetitiae internae, quam praegustaverunt. Ba-  
 ruch 4: « Circumspice, Jerusalem, ad orientem, et  
 « vide jucunditatem quae veniet tibi a Deo tuo. »  
 Hanc jucunditatem sancti patres videndo praegu-  
 staverunt. Joan. 8: « Abraham pater vester exultavit  
 « ut videret diem meum: vidit et gavisus est: »  
 Glossa, « Intellexit diem incarnationis meae. » Au-  
 gustinus: « Quale autem gaudium fuit cordis videntis  
 « Verbum manens, splendorem Patris piis mentibus  
 « refulgentem, apud Patrem manentem Deum, et  
 « aliquando in carne venturum, non de Patris gremio  
 « recessurum? » Bernardus: « Cui namque nostrum in-  
 « gerat tantum gaudium hujus gratiae exhibitio, quan-  
 « tum in veteribus accenderat sola ejus promissio? »

Quinto dominicae incarnationis sacramentum  
 fuit ab Angelo nuntiatum: unde dicitur Lucae 1:  
 « Missus est Gabriel Angelus. » Circa hanc vero  
 annuntiationem tria per ordinem sunt notanda:  
 videlicet actus missionis, modus apparitionis, et  
 ordo executionis. Primum tangitur ibi, « Mis-  
 « sus est Gabriel: » ubi tria notare debemus:  
 videlicet tanti nuntii dignitatem, tanti mysterii pro-  
 funditatem, et tanti mysterii congruitatem. Primum  
 ibi: « Angelus est missus: » est enim Angelus dignis-  
 sima creaturarum, eo quod inter creaturas creatori  
 suo similior invenitur: unde dicitur de primo An-  
 gelo Ezech. 28: « Tu signaculum similitudinis: »  
 ubi dicit Glossa: « Quanto in eis natura est subti-  
 « lior, tanto invenitur imago Dei in eis magis  
 « expressa. » Gabriel autem fuit: de numero Ar-  
 changelorum, ideo a agnae dignitatis fuit. Gregorius:  
 « Ad Mariam Virginem non quilibet Angelus, sed  
 « Gabriel Archangelus mittitur. Ad hoc quippe  
 « mysterium summum Angelum venire dignum  
 « fuit, qui summum omnium nuntiavit. » Secun-  
 dum vero innuitur in verbo Gabrielis, quod inter-  
 pretatur Fortitudo Dei. Gregorius: « Ad Mariam  
 « Gabriel mittitur, qui fortitudo Dei nominatur.  
 « Illum quippe nuntiare veniebat, qui ad debellan-  
 « dum aereas potestates humilis apparere dignatus  
 « est; » de quo per Psalmistam dicitur Ps. 25:  
 « Tollite portas etc.: » et infra: « Quis est iste rex  
 « gloriae? » Revera profundum mysterium, in quo,  
 ut dicit Damascenus, « monstratur simul bonitas  
 « et justitia et sapientia et potentia. Bonitas quidem,  
 « quoniam non despexit proprii psalmatis infirmi-  
 « tatem, sed ejus viscera commota sunt in ipso  
 « cadente, et manum porrexit: justitia, quia homine

« victo non alium fecit vincere tyrannum; sed  
 « quem quondam per peccatum in servitutem rede-  
 « git, hunc rursus victorem fecit: sapientia, quo-  
 « niam invenit difficillimi solutionem decentissimam:  
 « potentia sive virtus infinita, quia nihil majus  
 « quam Deum hominem fieri. » Tertium ibi, « A  
 « Deo: » quae enim a Deo sunt, ordinata sunt.  
 Ad Rom. 15: « Atingit enim ad fine usque ab finem  
 « fortiter, » Sap. 8, et « disponit omnia suaviter, »  
 Glossa: « Ab aeterno usque in aeternum ubique  
 « perfecte operatur: finis enim perfectionem signi-  
 « ficat. » Revera hujus mysterii magna congruitas:  
 congruit enim divinae ordinationi, secundum quam  
 divina mediantibus Angelis ad hominem perveniunt.  
 Dionysius c. 4 cael. Hierarch. dicit, quod « caele-  
 « stes essentiae primo in seipsas redeunt, idest reci-  
 « piunt illuminationem, et in nos per se deferunt,  
 « quae super nos manifestationes: » et postea subdit,  
 « quod divinum Christi humanitatis mysterium pri-  
 « mum Angeli docuere, deinde per ipsos in nos  
 « scientiae gratia descendit. Sic ergo Gabriel Zacha-  
 « riam Prophetam edocuit, ex quo Joannem contra  
 « spem divina gratia nasciturum praedixit: Mariam  
 « quoque quomodo futurum foret ineffabile divinae  
 « formationis mysterium: et alius Angelorum Joseph  
 « erudiebat, alius pastoribus evangelizavit, et cum eo  
 « multitudo caelestis exercitus illam valde laudabiliter  
 « canebant his qui in terra sunt doxologiam, idest  
 « gloriam: doxa enim gloria dicitur. » Congruit etiam  
 humanae reparationi: unde Beda: « Aptum profecto  
 « humanae reparationis principium fuit, ut angelus  
 « a Deo mitteretur ad Virginem divino partui con-  
 « secrandam: quia prima humanae perditionis fuit  
 « causa, cum serpens a diabolo mitteretur ad mu-  
 « lierem spiritu superbiae decipiendam. » Congruit  
 virginali perfectioni; unde Hieronymus: « Bene  
 « Angelus ad Virginem mittitur, quia semper co-  
 « gnita est Angelis virginitas: quia in carne praeter  
 « carnem vivere, non est terrena vita, sed caelestis. »  
 Modus angelicae apparitionis est triplex secundum  
 triplicem visionem: scilicet intellectualem, imagina-  
 riam et corporalem. Primo videtur in propria sub-  
 stantia; et iste modus erit in patria. Secundo mo-  
 do videtur sub quibusdam figuris et similitudinibus  
 rerum corporalium: et sic apparuit Joseph in som-  
 nis Matth. 2. Tertio modo apparet in assumpto cor-  
 pore; et sic apparuit Beatae Virgini. Augustinus in  
 persona Beatae Virginis: « Venit ad me Gabriel  
 « Archangelus facie rutilans, veste coruscans, inessu  
 « mirabilis. » Ambrosius super illud Lucae 1: « Tur-  
 « bata est in sermone Angeli: » « Trepidare Virginum  
 « est, et ad omnes viri ingressus pavere, et omnes  
 « viri affatus vereri. » Ex his apparet Gabrielem Ar-  
 changelum apparuisse in visu corporali Fuit autem  
 talis apparitio conveniens, tum ut ostenderetur  
 incarnatio invisibilis Dei; unde et omnes apparitio-  
 nes veteris legis ad hanc ordinantur, qua Filius Dei  
 in carne apparuit: tum etiam quia Beata Virgo non  
 solum in mente, sed etiam in ventre Deum erat  
 conceptura. Congruum etiam fuit, ut ejus sensus  
 corporei angelica visione foverentur: tum etiam  
 propter certitudinem ejus quod annuntiabatur, quia  
 certius comprehendimus ea quae sunt oculis subje-  
 ta, quam illa quae imaginantur: unde Chrysostomus  
 dicit quod Angelus non in somnis, sed visibiliter  
 Beatae Mariae Virgini apparuit. Unde, quia magnam  
 valde ab Angelo accepit revelationem, exigebat tan-  
 tae rei eventus visionem solennem. Quod autem

dicit Augustinus, quod visio intellectualis sit nobilior quam corporalis, intelligendum est si fuerit sola. Virgo beata non solum percepit visionem corporalem, sed etiam intellectualem illuminationem; unde talis apparitio nobilior fuit. Fuisset tamen nobilissima, si angelum in sua substantia vidisset: sed hoc non patiebatur status vitae hujus. Ordo executionis fit congruus: nam primo aggressus est ipsam Virginem salutando, secundo turbatam consolando, tertio conceptum et modum conceptus insinuando. In primo ostenditur Virginis excellentia: in secundo ejus desiderii vehementia, scilicet quam habuit pro salute humani generis: in tertio divinae pietatis magnificentia. Primum ibi, « Ave gratia plena. » Hieronymus: « Vere plena: quia caeteris per partes praestatur, « Mariae vero simul se totam infudit gratiae plenitudo: vere gratia plena, per quam velut largo « Spiritus Sancti imbri superfusa est omnis creatura. » Bernardus: « De plenitudine ejus recipiunt « universi, aeger curationem, captivus redemptionem, tristis consolationem, peccator veniam, justus gratiam, Angeli laetitiam, tota Trinitas gloriam, filius hominis humanae carnis substantiam. » Idem: « In ventre gratia divinitatis, in corde gratia caritatis, in ore gratia affabilitatis, in manibus « gratia misericordiae et largitatis. » Sequitur: « Dominus tecum. » Hieronymus: « Jam erat in Virgine qui ad Virginem mittebat Angelum, et « praecessit nuntium suum Dominus. » Augustinus: « Dominus tecum, magis quam mecum. Ipse enim « est in tuo corde, sit in tuo utero, adimpleat « mentem, impleat ventrem. » Bernardus: « Non « tantum dominus Filius tecum quem carne induis, « sed et Dominus Spiritus sanctus tecum de quo « concipis. » Sequitur, « Benedicta tu in mulieribus, » una prae cunctis mulieribus, ut dicit Graecus. Hieronymus: « Quicquid maledictionis infusum « est per Evam, totum abstulit benedictio Mariae. »

Notandum, quod triplici maledicto subjectae erant mulieres: scilicet maledicto opprobrii, quoad non concipientes; unde Rachel dicit Genes. 30: « Abstulit Deus opprobrium meum; » maledicto peccati quoad concipientes, ut in Psalm. 50: « Eccc enim in iniquitatibus conceptus sum: » maledicto poenae quo ad parturientes. Genes. 2: « In dolore paries filios. » Sola autem benedicta est inter mulieres, ejus virginitati additur fecunditas, fecunditati in conceptu sanctitas, et sanctitati in partu jucunditas. Patet ergo in his Virginis excellentia, tum propter gratiarum abundantiam, tum propter divinam praesentiam, tum etiam propter benedictionis excellentiam. Secundum ibi, « Ne timeas » Maria, invenisti gratiam etc. » Haec enim sunt verba angelicae consolationis. Fuerat autem beata Virgo turbata in sermone, sed non in visione Angeli. Graecus: « Cum assucta his visionibus foret, « angelicae non visioni, sed sermoni attribuiturbationem. » Petrus Ravennas: « Venit Gabriel « Archangelus blandus in specie, sed terribilis in « sermone, et leviter sollicitavit visus, nimium turbavit auditus, cui Angelus. Ne timeas etc. » Bernardus: « Constat eam pro totius generis humani « salute fuisse sollicitam, cui dictum est, Invenisti « gratiam apud Dominum. Invenit enim gratiam « quam quaerebat: sed quam gratiam? apud Deum. » Bernardus: « Dei et hominum pacem, mortis destructionem, vitae reparationem apud Deum invenit. » Ex his patet vehemens Virginis deside-

rium circa salutem hominis: tum quia salutis humanae gratiam quaerebat, tum quia quaesitam inveniebat, tum etiam quia inventam omnibus refundebat. Bernardus: « Vehementia desiderii Mariae « favore dilectionis, puritate orationis fontem attingit tam sublimem, cujus plenitudinem tanquam aquae ductum de corde Patris excipiens, nobis edidit illum, non prout est, sed prout capere poteramus. »

Notandum autem quod Gabriel dixit similiter Zachariae, « Ne timeas, » Lucae 1. Et alius Angelus pastoribus, « Nolite timere, » Lucae 2, quia hoc est proprium boni Angeli, ut legitur in vita beati Antonii. Non difficilis est bonorum malorumque spirituum discretio. Si enim post timorem successerit gaudium, a Deo sciamus venisse Angelum, quia securitas animae praesentis majestatis est indicium. Si autem incussa formido permanet, hostis est qui videtur. Tertium ibi, « Eccc concipiet etc. » « Eccc » adverbium demonstrantis est: quia mira et inaudita beatae Virginis non ad sensum, sed ad intellectum, et sub lumine fidei demonstrantur: unde Hieronymus: « Quod natura « non habuit, visus nescivit, ignoravit ratio, mens « non capit humana, pavet caelum, stupet terra, « creatura omnis etiam caelestis miratur, hoc totum per Gabrielem Mariae divinitus nuntiatur, « et per Christum adimpletur. » Revera hoc magnae pietatis et potestatis indicium esse creditur: unde Lucae 2, beata Virgo dicit: « Quia fecit mihi magna qui potens est. » Bernardus: « Hoc ipsum quod me beatificant omnes generationes, « non mihi attribuo, non meis meritis ascribo, « sed potius qui fecit mihi magna. Magnum est plane quod virgo sum, magnum quod mater sum, magnum quod utrumque simul et mater et virgo sum. » De seipsa fatetur dicens, « Quia « fecit mihi magna: » revera magna, quia mater et virgo, et mater Domini: unde nec primam similem visa est nec habere sequentem. Mystice circa angelicam visionem duo sunt notanda; divini scilicet luminis emanatio, et humanae mentis in Deum reductio. Primum ibi, « Missus est Angelus « Gabriel a Deo. » Ad ejus evidentiam sciendum, quod per Angelum significatur divinum lumen: est enim Angelus signaculum similitudinis Dei, Ezech. 28: sic et lumen divinum signaculum est quo fideles signantur, et ab infidelibus distinguuntur: unde in Psal. 88: « Signatum est super nos lumen vultus etc.: » ubi dicit Augustinus: « Hoc « lumen est totum et verum bonum hominis quo « signatur, ut denarius, regis imagine; quod autem « Angelus Gabriel nuncupatus est, quod interpretatur fortitudo Dei, hoc signat quod divino lumine intellectus humanus divinitus roboratur, et « elevatur supra facultatem naturae suae, ut ipsum « fontem luminis in suo lumine contempletur: » unde in Psalm. 55: « In lumine tuo videbimus « lumen. » Augustinus: « Sicut solem non videt « oculus nisi in lumine solis, sic verum et divinum lumen non potest videre intelligentia, « nisi in ipsius lumine. » Quod autem missus a Deo legitur, hoc signat emanationem divini luminis esse a Deo, qui est fontale principium totius luminis: unde Jac. 1, dicitur, pater luminum, quia ab ipso procedunt quasi radios a sole, ut dicit Glossa Eecle. 24: « Ego feci in caelis, » id est in Angelis et animabus, « ut oriatur lumen indeficiens, » Glossa: « Rationis et intelligentiae. » Isaiae 45:



« Ego Dominus, et non est alter, » Glossa, scilicet Deus, « formans lucem, » scilicet per praesentiam gratiae, « et creans tenebras, » per ejus absentiam. Secundum ibi, « In civitatem Galileae cui « nomen Nazareth; » ubi circa reductionem humanae mentis in Deum tria describuntur juxta sensum mysticum; videlicet terminus, motus et fructus. Terminus reductionis est principium emanationis, et innuitur in nomine civitatis: dicitur enim civitas quasi civium unitas, unde significat unitatem fidelium in Deo, de qua dicitur Act. 1: « Erat « illis cor unum et anima una in Deo; » et hoc est terminus reductionis, ut ipsi Deo uniamur, a quo per creationem exivimus. Apoc. 1: « Ego sum « Alpha etc. » Dionysius 1 cap. cael. Hier.: « Omnis « manifestationis luminis processio in nos large « proveniens, convertit nos ad congregantis patris « unitatem: quia in ipso congregamur et secundum « intellectum, et secundum affectum. Recedendo « enim ab ipso dispergimur prima principia co- « gnoscendo, et varias in singulis rebus rationes « diligendo. Redeundo vero in ipsum, in unum « principium et rationem unam diligendi reduci- « mur. » Modus reductionis notatur in nomine Galilaeae, quod interpretatur transmigratio, quia transmigrando de bono in melius et proficendo de virtute in virtutem, in Deum reducimur: « Nemo « enim repente fit summus, » ut ait Bernardus. Sicut enim divinum lumen gradatim decrescendo in nos descendit gradatim, quia lux divinitatis est per prima media, et per media ultima reducere decrescendo, quia non recipitur aequaliter in natura inferiori ut est in superiori, et pro tanto dicuntur dona tam naturalia quam spiritualia descendere. Jac. 1: « Omne datum optimum etc. » ita quod contrario modo per ipsum lumen in Deum reducimur gradatim et crescendo; unde Psal. 85: « Ibunt de virtute in virtutem, videbitur Deus « deorum in Sion: » Glossa, « in plenitudine con- « templationis. » Prov. 4: « Justorum semita si- « cut lux splendens procedit, et crescit usque ad « perfectum diem; » Glossa, « aeternam vitam quae « est perfecta dies. » Fructus reductionis innuitur in nomine Nazareth, quod interpretatur flos, vel germen; sumitur autem metaphorice in spiritualibus: fructus enim florentis arboris est bonum ultimum quod expectatur et percipitur cum suavitate, unde significat beatissimam fruitionem Dei. Prover. 11: « Fructus justi lignum vitae. » Glossa: « Hunc « fructum vitae justis expectant, dum quasi virens « folium germinant. » Bernardus: « Da mihi Do- « mine fructum dulcem, fructum vitae: altus est, « attolle desiderium: benedictus, sanctifica obse- « quium: imputribilis, purifica affectum: suavis est, « lactifica animum. » Hujus fructus dulcedinem devotae animae quandoque praegustant. Cant. 2: « Sub umbra illius quem desiderabam sedi. » Glossa: « Ab aestu desideriorum carnalium quievi, « et fructus ejus dulcis gutturi meo. » Glossa: « Postquam me protegit umbra fructus illius, idest « caelesti dulcedine saturata sum. »

Notandum vero, quod per reductionem creatura- rum in Deum, nihil Deo accrescit. Eccles. 1: « Omnia « flumina intrant mare, » idest immensitatem Dei, « et mare non redundat: » quia sicut Deus non deficit amando, ita per refluxum non superabundat, quia dicit Augustinus: « Non habet quo accrescat « illa perfectio. » Possumus adhuc tria circa hunc

Angelum juxta sensum mysticum notare: videlicet divinae gratiae effluentiam, influentiam et refluentiam. Primum ibi, « Missus est Angelus Gabriel a « Deo. » Ad ejus evidentiam est sciendum, quod Angelus iste qui nuntiando praeventit Virginis concep- tum, significat gratiam quae praeventit in nobis omnem conceptum bonae voluntatis. Augustinus: « Gratia Dei praeventit nos ut bonum velimus, et « sequitur ne frustra velimus. » Haec gratia se dicit Apostolus praeventum. 1 Corinth. 13: « Gratia Dei « sum id quod sum. » Quod autem Angelus iste missus a Deo legitur, hoc significat effluentiam gratiae esse a solo Deo. Jac. 1: « Omne datum etc. »

Notandum autem quod procedit gratia a Deo tam- quam imago ab artifice: ideo per ipsam reformamur: unde dicit Glossa super illud Psal. 4, « Signatum « est super nos etc. », quod « imago recreationis « per quam reformatur imago creata, scilicet mens « nostra, est Dei gratia, quae menti reparandae « infunditur. » Item quasi radius a sole, ut dicit Glossa Jac. 1: ideo per ipsam ad Deum cogno- scendum et amandum elevamur. Augustinus: « Spi- « ritus rationalis ex dolo creationis habilis est ad « cognoscendum verum et amandum bonum: ta- « men nisi radio interioris lucis fuerit perfusus et « calore succensus, nunquam consequetur sapien- « tiae sive caritatis effectum. » Item sicut rivulus a fonte, ideo per ipsam in bonis operibus fecun- damur; unde in Psal. 2: « Erit tamquam lignum « quod plantatum est secus decursus aquarum, » Glossa « idest gratiarum. » Secundo notatur di- vine gratiae influentia ibi, « Et ingressus Angelus « ad eam ait, Ave. » Per hunc ingressum gratiae influentia designatur. Sapient. 4: « Gratia Dei et « misericordiam sanctis ejus. »

Notandum autem quod gratia est in essentia ani- mae, virtutes in potentiis. Sicut enim per potentiam intellectivam homo participat cognitionem divinam per virtutem fidei: et secundum potentiam voluntatis amorem divinum per virtutem caritatis; ita etiam per naturam animae participat secundum quamdam simi- litudinem naturam divinam per quamdam recreatio- nem sive regenerationem: et sicut ab essentia animae fluunt potentiae ejus, quae sunt operativa principia: ita etiam ab ipsa gratia effluunt virtutes in potentias animae, per quas potentiae moventur ad actus. Quod autem ingressus dixit, « Ave, » quod sonat sine vae, hoc significat quod per fluxum gratiae liberatur anima ab omni vae. Est enim triplex vae quod per peccatum incurrit homo: videlicet vae culpae, poenae et miseriae. Apocal. 8: « Vidi alte- « rum Angelum volentem per medium caeli, voce « magna clamantem et dicentem, vae, vae, vae « habitantibus in terra. » Vae propter culpam quam commiserunt: vae propter poenam quam meruerunt: vae propter miseriam quam incurrerunt. Ab hoc triplici vae liberamur per gratiam. Ad Ephes. 2: « Gratia Christi salvati estis, et conresuscitavit, et « consedere fecit nos. » Glossa: « Spe certa quod « futurum est tenemus. » Tertium ibi, « Et recessit « ab ea Angelus. » Beda: « Accepto Virginis consensu « Angelus rediit ad caelestia: per quod mystice « designatur gratiae refluentia, quae fit per devo- « tam gratiarum actionem. » Eccle. 1: « Ad mare « unde flumina exeunt, revertuntur, ut iterum « fluant. » Bernardus: « Origo fontium et flumi- « num omnium mare est: virtutum et scientiarum « dominus Christus est: siquidem fluminis aqua si

« stare coeperit, computrescit: sic plane cessat gratiarum cursus, ubi non fuerit recursus. Refunde igitur in eum qui supra te est quicquid devotionis in te, quicquid dilectionis, quicquid affectionis; ut si qua in te est gratia, referatur ad ipsum, nec tuam quaeres gloriam, sed ipsius. » Idem: « Ingratitudo est ventus urens, sicca fontem pietatis, rorem misericordiae, fluentia gratiae. »

De sexto dicitur in Psalm. 75: « Deus autem rex noster ante saecula operatus est salutem in medio terrae, » ut dicit Bernardus, idest Virginis Mariae utero, quae mirabili proprietate medium terrae appellatur. Ad ipsum enim respiciunt et qui in caelis habitant, et in inferno, et qui nos praecesserunt, et nos qui sumus, qui sequentur, et natorum, et qui nascentur ab illis: qui sunt in caelo ut resarciantur, qui in inferno ut eripiantur; qui praecesserunt Prophetae, ut fideles inveniantur; qui sequuntur, ut glorificentur. Idem: « Merito in te respiciunt oculi omnis creaturae: quia in te et de te et per te benigna manus Conditoris quicquid creaverat recreavit. » Sciendum vero quod istud sacramentum tunc primum consummatum fuit, cum Virgo diceret, « Ecce ancilla Domini, fiat mihi secundum verbum tuum. » Ubi tria commendabilia de beata Virgine tanguntur: mysterium humilitatis, desiderium caritatis, et mysterium credulitatis. Primum ibi, « Ecce ancilla Domini; » ubi dicit Beda: « Non singularitate meriti se extollit, sed suae conditionis et divinae dignationis per omnia memor, illius ancillam se esse fatetur, cujus mater eligitur: » unde de seipsa dicit: « Respexit humilitatem ancillae suae. » Augustinus: « Quid est respexit, nisi adprobavit? » Idem: « Vere beata humilitas quae caelum innovavit, mundam purificavit, paradysum aperuit, et sanctorum animas de inferno liberavit. Vere beata humilitas, quae porta caeli efficitur, paradysi seala constituitur, per quam Deus ad terram descendit. » Secundum ibi, « Fiat mihi: » Glossa: « Cum magna devotione promissum Angeli optat adimpleri. » Quod autem optando desiderabat secundum promissum Angeli voluntatem Dei in se adimpleri, ex caritate processit; unde Bernardus: « Maria vehementia desiderii, fervore dilectionis, puritate orationis fontem attingit sublimem. » De hoc verbo dicit idem Bernardus: « Multifarie multisque modis olim Deus locutus est patribus: et aliquibus in aere, aliis in ore, aliis in manu verbum domini fuisse memoratur. Mariae autem factum est in aure per angelicam salutationem, in corde per fidem, in ore per confessionem, in manu per contrectationem, in ventre per incarnationem, in gremio per sustentationem, in brachio per oblationem; ideo dicit, Fiat mihi. » Tertium ibi, « Secundum verbum tuum: » Bernardus: « Fiat mihi verbum non declamatorie praedicatum, vel figuraliter aut imaginarie somnium, sed spiritaliter inspiratum, personaliter incarnatum, corporaliter invisceratum. » Fiat quidem generaliter omni mundo, sed mihi specialiter secundum verbum tuum. Magna fuit ista credulitas, et ideo magna apud Deum promeruit: unde dictum est ei Luc. 2: « Beata quae credidisti, quoniam perficentur in te. » Augustinus: « Beatior fuit Maria concipiendo fidem Christi, quam concipiendo carnem Christi. Materna propinquitas nihil in carne profuisset, nisi feliciter corde Christum quam

« carne gestasset. » Notandum, quod huic verbo alludit Bernardus in hunc modum: « Audisti quia concipies et paries filium: audisti, quod non per hominem, sed per Spiritum sanctum. Expectat Angelus responsum tuum. Tempus enim est ut revertatur ad eum qui misit illum. Expectamus et nos, Domina, verbum miserationis, quos miserabiliter premit sententia damnationis. Hoc supplicat a te, o pia Virgo Maria, flebilis Adam cum misera sobole sua, hoc Abraham, hoc David, hoc ceteri sancti flagitant, hoc totus mundus expectat: nec immerito, quia ex tuo ore dependet consolatio miserorum, redemptio captivorum, liberatio damnatorum, salus denique totius generis tui. Da, virgo, responsum festinanter. O domina, responde verbum quod expectat terra, inferi et superi. Ipse quoque omnium rex et Dominus quantum concupivit decorem tuum, tantum desiderat responsum tuum. Responde verbum, et suscipe verbum: profer tuum, et suscipe divinum: emitte transitorium, et amplectere sempiternum. Quid tardas, quid trepidas? Crede, confitere, et suscipe. Aperi, beata Virgo, cor fidei, labia confessioni, viscera creatori. Ecce desideratus cunctis gentibus foris stat, et pulsat ad ostiam, surge, curre, aperi. Surge per fidem, curre per devotionem, aperi per confessionem. Ecce, inquit, ancilla Domini; fiat mihi etc. »

## ARTICULUS II.

### *De quatuor utilitatibus divinae incarnationis.*

Sunt autem quatuor utilitates dominicae incarnationis. Prima humanae naturae exaltatio. Cant. 8: « Quis mihi det ut inveniam te foris? » Glossa: « Intus erat dilectus, quando in principio erat Verbum: foris fuit quando Verbum caro factum est. » « Ut deosculer te, » Glossa, « idest facie videam te, et ore ad os loquar ad te. » « Et jam nemo me despiciat. » Glossa: « Postquam Christus venit suis infundens spiritum libertatis, etiam Ecclesia ab Angelis honoratur: » unde Joanni volenti se adorare dixit Angelus, « Vide ne feceris, conservus tuus sum. » Leo Papa: « Agnosce, o Christiane, dignitatem tuam; et divinae consors factus naturae noli in veterem vilitatem degeneri conversatione redire. » Secunda est adoptio filiorum. Ad Galat. 4: « Misit Deus Filium suum; » et infra: « Ut adoptionem filiorum reciperemus. » Augustinus: « Ideo filius Dei factus est filius hominis, ut homines faceret filios Dei. » Idem: « Multos filios Dei fecit unicus Filius. Emit enim sibi fratres sanguine suo, probavit reprobatus, redemit venditus, honoravit injuriatus, vivificavit occisus: dubietas nulla, dabit tibi bona sua qui non dedignatus est recipere mala tua. »

Notandum vero, quod filiatio adoptionis est quaedam similitudo filiationis naturalis. Filius autem Dei naturaliter procedit a Patre ut verbum intellectuale, unum cum ipso existens. Huic autem verbo potest aliquis tripliciter assimilari. Uno modo secundum rationem formae, non autem secundum intellectualitatem ipsius: sicut forma domus exterius constitutae assimilatur verbo mentali artificis secundum speciem formae, non autem secundum intellectualitatem: quia forma domus in materia non est intellectualis, sicut

erat in mente artificis; et hoc modo Verbo aeterno assimilatur quaelibet creatura, cum sit facta per Verbum. Secundo assimilatur creatura Verbo non solum quantum ad rationem formae, sed etiam quantum ad intellectualitatem ipsius: sicut scientia quae fit in mente discipuli, assimilatur verbo quod est in mente magistri; et hoc modo creatura rationalis etiam secundum suam naturam assimilatur verbo Dei. Tertio assimilatur creatura verbo aeterno secundum unitatem quam habet ad Patrem, quae fit per gratiam et caritatem: unde Dominus orat Joan. 17: « Oro ut sint unum in nobis, sicut « et nos unum sumus; » et talis assimilatio perficit rationem adoptionis, quia sic assimilatis debetur hereditas. Ad Rom. 8: « Si filii, et heredes. » Tertia utilitas est interna mentis reformatio. Matth. 11: « Venite ad me omnes qui laboratis et onerati « estis, et ego reficiam vos. » Augustinus: « Ut « panem Angelorum manducaret homo, creator Angelorum factus est homo. » Bernardus: « Manna « de caelo descendit, gaudeant esurientes etc. » ut supra. Super illud Luc. 2: « Positum in praesepe, » dicit Glossa: « Ut nos carnis suae frumento satiaret. » Quarta utilitas est beatitudinis augmentatio. Joan. 10: « Per me si quis introierit, salvabitur, et in- « greditur, et egreditur, et pascua inveniet. » Augustinus: « Propterea Deus factus est homo, ut « hominem totum in se beatificaret, tota hominis « conversio ad ipsum esset, et tota dilectio esset « in ipso, cum a sensu carnis videretur per carnem, « et a sensu mentis per divinitatis contemplationem; « et hoc totum bonum hominis erat, ut sive in- « grederetur, sive egrederetur, pascua in factore « suo inveniret, foris in carne salvatoris, intus in « divinitate Creatoris. »

## ARTICULUS III.

*De sacramento humanae redemptionis.*

Secundum membrum principale, videlicet sacramentum humanae redemptionis tangitur ibi, « Venit « in hunc mundum peccatores salvos facere; » Glossa Augustini: « Nulla causa veniendi fuit Christi « Domino, nisi peccatores salvos facere. Tolle « vulnera, tolle morbos, et nulla causa est medicinae: » infra: « Venit per quod homo erat; nam « per quod Deus erat, semper hoc erat. » Possumus distinguere triplicem adventum Christi: scilicet in carnem, in mentem, et ad iudicium: unde Bernardus: « Triplicem adventum Christi novimus: ad « homines, in homines, contra homines. In primo « venit in carne et in infirmitate: in secundo in « spiritu et virtute: in tertio in gloria et majestate. « In primo fuit Christus redemptio nostra: in secundo « est requies et consolatio nostra: in ultimo apparebit « vita nostra. » De hoc triplici adventu videamus.

Circa primum adventum, de quo dicitur in verbis propositis, quod Christus Jesus venit in hunc mundum peccatores salvos facere etc., notandum, quod omnia quae Christus fecit mysterio humanitatis assumptae, nobis fuerunt salutaria; et ideo de omnibus videamus. Primo ergo videamus de ejus conceptione, de qua dicitur Luc. 1: « Ecce concipies et paries Filium Dei. » Circa quam tria notare debemus: videlicet matris sanctificationem, Spiritus sancti operationem, et conceptae prolis perfectionem. De primo, scilicet matris sanctifica-

tionem, potest dici illud Psalm. 86: « Sanctificavit « tabernaculum suum Altissimus: » unde Bernardus: « Quod aliis sanctis legimus concessum esse, fas « non est dicere tantae Virgini esse negatum. » Sed sanctificationis beneficium legitur esse concessum Jeremiae, ut patet Jer. 1: « Antequam exires « de ventre, sanctificavi te; » et de Joanne, Luc. 1: « Spiritu sancto replebitur adhuc ex utero matris suae. » Ergo non est fas dicere hoc negatum fuisse tantae Virgini, quae peperit nobis Christum plenum gratia et veritate, Joan. 1. Et quia creditur prae aliis privilegium gratiae accepisse, secundum quod dictum est ei ab Angelo Luc. 1: « Ave gratia « plena etc., » et infra: « Invenisti gratiam apud « Dominum. » Sciendum quod triplex est effectus hujus sanctificationis. Primus est culpae originalis expiatio: quia sanctificatio est motus ad sanctitatem; « Sanctitas » autem, ut dicit Dionysius, 7 capite de div. Nom., « est ab omni immunditia libera et « perfecta et omnino immaculata munditia. » Illic autem sanctificatio non potest intelligi ante animationem: tum quia sanctificatio est emundatio a culpa; culpa autem non expellitur nisi per gratiam gratum facientem, cujus objectum non est nisi creatura rationalis: tum quia etiam cum sola creatura rationalis sit susceptiva culpae, ante infusionem animae proles concepta non est culpae obnoxia; et si concepta beata Virgo quocumque modo ante animationem sanctificata fuisset, non incurrisset maculam culpae originalis, et sic non indignisset redemptione et salute quae per Christum facta est: de qua dicitur Matth. 1: « Ipse salvum faciet populum « suum a peccatis eorum. » Hoc est autem inconveniens, quod Christus non sit salvator omnium, ut dicitur 1 Tim. 1. Relinquitur ergo quod sanctificatio Mariae fuerit post ejus animationem: in cujus figura dicitur Exod. ult.: « Postquam cuncta « perfecta sunt, operuit nubes tabernaculum testimonii, et gloria Domini implevit illud. » Unde, licet sit consuetudo aliquarum Ecclesiarum celebrare festum Conceptionis ejus, per hoc non datur intelligi quod ejus conceptio fuerit sancta; sed quia quo tempore fuerit sanctificata ignoratur, celebratur festum sanctificationis ejus potius in die conceptionis ipsius. Secundus effectus est a peccato praeservatio: unde Bernardus: « Ego puto quod copiosior sanctificationis benedictio in eam quam in « alios sanctos ab utero sanctificatos descenderit, « quae non solum ipsius ortum sanctificavit, verum « etiam deinceps vitam etiam ab omni peccato « immunem conservavit. » Augustinus: « Si omnes « sancti et sanctae, dum adhuc viverent, interrogati fuissent utrum sine peccato essent, omnes « respondissent una voce: Si dixerimus quod peccatum non habemus, nosipsum seducimus, et veritas in nobis non est: excepta hac sacra Virgine, de qua propter honorem Christi, nullam « prorsus volo fieri mentionem cum de peccatis « agitur. Unde scimus quod plus gratiae ei collatum fuerit ad vincendum ex omni parte peccatum, quae illum concipere et parere meruit, « quem constat nullum habuisse peccatum. » Non enim fuisset idonea mater Christi, si aliquando peccasset; tum quia honor parentum redundat in prolem, secundum illud Prov. 18: « Gloria filiorum « parentes eorum; » unde et per oppositum ignominia matris ad filium redundasset: tum etiam quia singularem affinitatem habuit ad Christum, qui



ab ea carnem accepit. Dicitur autem I ad Cor. 5: « Quae conventio Christi ad Belial? » tum etiam quia Christus qui est sapientia Patris, singulari modo habitavit non solum in ejus anima, sed etiam in ejus utero. Dicitur autem Sapient. 1: « In malevo-  
« lam animam non introibit sapientia, nec habi-  
« tabit in corpore subdito peccatis. » Et ideo sim-  
pliciter fatendum est, quod Beata Virgo nullum peccatum actuale commisit nec mortale nec veniale, ut sic impleatur quod dicitur Cant. 4: « Tota  
« pulchra es, amica mea etc. » Sciendum tamen quod per sanctificationem in utero non fuit Virgini sublatus fomes secundum essentiam, sed remansit ligatus: non quidem per actum rationis suae, sicut in viris sanctis, quia non habuit statim usum liberi arbitrii, adhuc in ventre matris existens (hoc enim privilegium speciale Christi fuit); sed per gratiam abundantem quam in sanctificatione recepit, et etiam perfectius per divinam providentiam sensualitatem ejus ab omni motu carnis inordinato prohibentem. Postmodum vero in ipsa conceptione Filii credendum est, quod ex prole redundaverit in matrem totaliter fomite subtracto. et hoc significatur Ezech. 43, ubi dicitur: « Ecce gloria Dei  
« Israel ingrediebatur per viam orientalem, » idest per beatam Virginem: « et terra, » idest caro ipsius, « splendebat a majestate ejus, » scilicet Christi. Tertius effectus est gratiae plenitudo, sive perfectio; unde dicitur Luc. 1: « Ave gratia plena; » ubi dicit Hieronymus: « Bene gratia plena, quia ceteris per par-  
« tes tribuitur; Mariae vero se totam infudit plenu-  
« do gratiae. » Quia quanto magis aliquid est propinquius primo principio in quolibet genere, tanto magis participat effectum illius principii: unde Dionysius cap. 4 cael. Hier., dicit, quod « Angeli qui sunt Deo  
« propinquiores magis participant de bonitatibus divi-  
« nis quam homines. » Christus vero est principium gratiae secundum divinitatem quidem auctoritative, secundum humanitatem vero instrumentaliter: unde Joan. 1: « Gratia et veritas per Jesum  
« Christum facta est. » Beata autem Maria propinquissima fuit Christo, quia ex ea carnem assumpsit. Unde debuit prae ceteris gratiae plenitudinem obtinere. Sciendum vero quod gratia a malo liberat et in bono perficit. Unde et Beata Virgo in sui sanctificatione fuit ab originali peccato purgata: in filii sui conceptione totaliter a fomite mundata: in sui vero assumptione ab omni miseria liberata. In sui etiam sanctificatione adepta est gratiam inclinantem eam ad bonum; in filii autem conceptione confirmata est ejus gratia confirmans eam in bono: in sui vero assumptione consummata est ejus gratia perficiens eam in fruitione omnis boni. De secundo, scilicet Spiritus sancti operatione, dicitur Luc. 1: « Spiritus sanctus superveniet in  
« te etc.: » ubi dicit Beda: « Superveniens in  
« Virgine Spiritus sanctus duobus modis in ea  
« divinae potentiae suae efficaciam ostendit: quia  
« et mentem ejus adeo quantum humana fragilitas  
« patitur, ab omni vitiorum sorde castificavit, ut  
« caelesti esset digna partui, et utero illius san-  
« etum et venerabile Redemptoris nostri corpus  
« sua sola operatione creavit. »

Notandum vero quod conceptionem Christi tota Trinitas operata est, quia indivisa est operatio Trinitatis, ut dicit Augustinus: et tamen Spiritui sancto attribuitur; et hoc propter quinque rationes. Prima est, quia Spiritus sanctus est amor Patris et Filii; unde

Augustinus: « Spiritus sanctus est quo genitus a  
« gignente diligitur, genitoremque suum diligit. » Hoc autem ex maximo amore provenit, quod Deus Filium suum incarnari instituit: unde Joan. 3: « Sic  
« Deus dilexit mundum etc. » unde etiam Bernardus: « Scias amoris fuisse, quod plenitudo effusa  
« est, quod altitudo adaequata est, quod singula-  
« ritas associata est. » Convenienter ergo attribuitur Spiritui sancto. Secunda est, quia Spiritui Sancto attribuitur bonitas: unde Augustinus: « Si-  
« cut potentia Patri, sapientia Filio, ita et bonitas  
« appropriatur Spiritui sancto: » unde opera in quibus relucet potentia, attribuuntur Patri; in quibus relucet sapientia, Filio; in quibus vero bonitas, Spiritui sancto. In hoc vero opere maxime relucet bonitas: unde ad Tit. 3: « Apparuit benigni-  
« tas Salvatoris nostri Dei. » Bernardus: « Appa-  
« ruit potentia Dei in creatione, sapientia in gu-  
« bernatione, sed benignitas misericordiae maxime  
« apparuit in ejus humanitate. » Convenienter ergo Spiritui sancto attribuitur. Tertia est, quia Spiritus sanctus est spiritus sanctificationis, ut dicitur Jerem. 1: et dicit ibidem Glossa quod per ipsum omnia sanctificantur. Quicquid autem in Maria gestum est, totum est sanctum et divinum: unde dicitur ei ab Angelo: « Quod nascetur ex te  
« sanctum, vocabitur filius Dei. » Convenienter ergo attribuitur Spiritui sancto: unde dicit Glossa super illud ad Rom. 1, « Secundum spiritum sanctificatio-  
« nis, » quod « Spiritus sanctus formavit et sanctificavit  
« ipsum hominem in utero Virginis sine virili semi-  
« ne. » Quarta ratio est, quia Spiritus sanctus est omnium gratiarum auctor: unde I ad Cor. 12: « Divi-  
« siones gratiarum sunt, idem autem spiritus. » Glossa: « Dator omnium, quia ipse est primum donum in  
« quo omnia donantur. » Hoc autem fuit superabundantis gratiae, quod humana natura in unitatem divinae personae assumeretur, quia nulla merita praecesserunt: unde ad Tit. 3: « Non ex operibus  
« justitiae quae fecimus nos etc. » Augustinus: « Iste modus quo Christus conceptus est de Spiritu  
« sancto, insinuat nobis gratiam Dei, qua homo  
« ille nullis praecedentibus meritis ex ipso primo  
« exordio naturae suae quando coepit esse, Verbo  
« Dei copularetur in tanta unitate personae, ut es-  
« set Filius Dei. » Quinta est: quia verbum humanum in corde existens gerit similitudinem Verbi aeterni, secundum quod existit in Patre: unde Augustinus: « Quisquis potest intelligere verbum non  
« solum antequam sonet, verum etiam antequam  
« sonorum ejus imagines cogitatione involvantur,  
« jam potest videre aliquam illius Verbi similitu-  
« dinem, de quo dictum est, in principio erat  
« Verbum. » Sicut autem verbum humanum vocem assumit, ut sensibiliter hominibus innotescat; ita etiam Verbum Dei carnem assumpsit, ut visibiliter hominibus appareret. Vox autem humana per spiritum hominis formatur; unde et caro Dei debuit per spiritum formari. Notandum vero, quod formatio corporis Christi fuit in instanti propter infinitam Spiritus sancti virtutem corpus illud formantis: unde Gregorius: « Angelo annuntiante,  
« Spiritu sancto adveniente, mox intra uterum  
« Verbum caro factum est. » Simul ergo fuit corporis formatio, et animae creatio, et utriusque ad invicem conjunctio, et eorum ad divinitatem unio.

Notandum etiam, quod Beata Virgo fuit vera mater Christi, quia mater ministravit: unde dicit Gre-



gorius super illud Luc. 1: « Virtus Altissimi o-  
 « bumbrabit tibi. » « Umbra formatur lumine et  
 « corpore. Deus autem per divinitatem lumen est.  
 « Quia ergo Lumen incorporeum erat in ejus utero  
 « corporandum, recte ei dicitur, Virtus Altissimi  
 « obumbrabit tibi, » idest corpus in te humanita-  
 tis accipiet incorporeum Lumen divinitatis. Fuit  
 autem materia corporis Christi purissimus sanguis  
 Virginis: unde Damascenus: « Filius Dei construxit  
 « sibi ipsi ex castis et purissimis sanguinibus Vir-  
 « ginis carnem animatam anima rationali. » Pos-  
 sumus autem notare mystice, quod conceptio Vir-  
 ginis significat conceptionem fidelis animae. Am-  
 brosius: « Si secundum carnem una est mater  
 « Christi, secundum fidem tamen omnium fructus  
 « est Jesus Christus. Omnis enim anima concepit  
 « verbum Dei, si tamen immaculata et immunis a  
 « vitiis intemerato castimoniam pectore custodiat.  
 « huic conceptioni congruit mystice locus conce-  
 « ptionis Virginis, scilicet Nazareth. Sit tibi hone-  
 « stas conversationis tamquam floris species, vel  
 « odor bonae opinionis tamquam fragrantia, vel  
 « intentio aeternae retributionis tamquam is cui  
 « fructus non desit. »

Notandum vero quod Beata Virgo post conceptio-  
 nem tria legitur fecisse: per quae tria designantur my-  
 stice quibus quaelibet anima sancta post conceptum  
 spiritualem verbi Dei debet insistere: videlicet quod  
 montana conscendit, quod Elisabeth salutavit, et quod  
 dominum magnificavit. Per primum significatur vir-  
 tutum perfectio: per secundum fraternam dilectio: per  
 tertium laus et exultatio. Primum tangitur Luc. 2:  
 « Exurgens Maria abiit in montana cum festinatione; »  
 ubi dicit Glossa: « Accepto Virginis consensu caelestia  
 « petit Angelus, quem Virgo sequitur, quae in mon-  
 « tana progreditur; sic anima quae verbum Dei  
 « concepit, virtutum cacumina aggressu amoris  
 « conscendit, ut civitatem Judaeae, idest confessionis  
 « et laudis arcem penetret, et usque ad perfectio-  
 « nem fidei, spei et caritatis, quasi tribus men-  
 « sibus, in ea commoretur. » In hoc autem ascensu  
 sunt tria: videlicet vallis timoris et humiliatis, a-  
 scensus laboris et difficultatis, cacumen amoris  
 sive caritatis: unde Bernardus: « Virtus vult eum  
 « humilitate doceri, cum labore acquiri, cum a-  
 « more possideri. » Et cum his hominibus digna  
 sit, non aliter doceri, acquiri vel possideri potest.  
 Secundum tangitur ibi, « Et intravit domum Za-  
 « chariae, et salutavit Elisabeth: » salvatio enim  
 est salutis adoptatio; salutem autem optare proximo  
 pertinet ad fraternam dilectionem: quia haec est  
 vera forma diligendi proximum, quae exprimitur  
 Matth. 22: « Diliges proximum tuum sicut tei-  
 « psum. » Glossa, « Ad id quod teipsum. » Augu-  
 stinus: « Quisquis recte proximum diligit, hoc eum  
 « eo agere debet, ut etiam ipse toto corde, tota  
 « anima, tota mente Deum diligat. » Hanc etiam  
 formam diligendi Christus tradidit discipulis suis,  
 Joan. 13: « Hoc est praeceptum meum ut diligatis  
 « invicem, sicut etc. »: ubi dicit Augustinus: « Ad  
 « quid dilexit nos Christus, nisi ut possimus re-  
 « gnare cum Christo? Ad hoc ergo et nos invicem  
 « diligamus. » Huic ergo dilectioni anima sancta  
 postquam spiritualiter Verbum Dei concepit, debet  
 insistere: quia dicitur I Joan. 4: « Si diligimus  
 « invicem, Deus in nobis manet, et caritas ejus  
 « in nobis perfecta est. » Augustinus: « Beatus  
 « est qui amat te, et amicum in te, et inimicum

S. Th. Opera omnia. V. 17.

« propter te. » Idem: « Ubi vera dilectio est, quid  
 « est quod possit deesse? ubi vero non est, quid  
 « est quod potest prodesse? » Tertium sequitur  
 ibi Luc. 2: « Magnificat anima mea Dominum. »  
 Canticum illud est canticum laudis et exultationis,  
 quod qualibet sancta anima concepto verbo Dei  
 potest decantare: unde dicit Ambrosius: « Sicut in  
 « singulis anima Mariae Deum magnificat, sic in  
 « singulis spiritus Mariae in Deo exultat. » Quid  
 autem sit Deum magnificare, dicit Ambrosius: « Ma-  
 « gnificatur Dominus, non quod ei aliquid huma-  
 « na laus adjungat: sed quia magnificatur in nobis,  
 « dum anima nostra, quae ad imaginem Dei est  
 « creata, per justitiam se Christo conformat, qui  
 « est imago Patris. Et sic dum ipsum Christum  
 « imitando magnificat, quadam participatione ma-  
 « gnitudinis ejus sublimior fit, ut ipsam imagineam  
 « splendido bonorum sanctorum colore, et quada-  
 « m aemulatione virtutis videatur in se exprimere. »  
 Origenes: « Quando magnificavero animam meam  
 « opere, cogitatione, sermone, tunc imago Dei  
 « grandis efficitur, et ipse Dominus, ejus imago  
 « est, in anima mea magnificatur. » Beda: « Ejus  
 « anima Deum magnificat, qui omnes sui interioris  
 « hominis affectus divinis laudibus ac servitiis  
 « mancipat. Ejus spiritus in Deo salutari suo e-  
 « xultat, quem nihil in terrenis libet, nulla ead-  
 « eorum rerum affluentia emollit, nulla adversitas  
 « frangit, sed sola illius, a quo speratur salus  
 « aeterna, sui Conditoris memoria delectat. » De  
 tertio, scilicet proles conceptae perfectione, dicitur  
 Luc. 1: « Ille erit magnus, et Filius Altissimi voca-  
 « bitur. » Triplicem vero perfectionem habuit  
 proles ista in instanti conceptionis suae: videlicet  
 naturae, gratiae et gloriae. De perfectione naturae  
 dicitur Jerem. 31: « Creabit Deus novum super  
 « terram, mulier circumdabit virum, » Glossa « per-  
 « fectus vir in ventre femineo continebatur. »  
 Hoc autem non dicitur propter quantitatem virilis  
 corporis, sed propter veritatem humanae naturae,  
 et integritatem tam corporis quam animae, quam  
 proles ista in instanti conceptionis habuit. Unde  
 Damascenus: « Omnia quae in nostra natura plan-  
 « tavit Deus, Dei Verbum assumpsit: scilicet cor-  
 « pus et animam intellectualem, et eorum idio-  
 « mata: totum enim assumpsit me, ut toti mihi  
 « gratificet salutem: » idest gratias faciat. Idem:  
 « Simul Verbi Dei caro simul animata rationali et  
 « intellectuali anima. » Verumtamen sciendum,  
 licet ista tempore simul fuerint, cadit tamen inter  
 ea ordo naturae, ut dicit Augustinus: « Qui invi-  
 « sibilis et incommutabilis veritas per spiritum  
 « animam, et per animam corpus accepit. »

Ad ejus evidentiam sciendum, quod ordo naturae  
 inter aliqua dupliciter potest attendi. Uno modo  
 per gradum dignitatis; et sic anima media inve-  
 nitur inter Deum et carnem: et secundum hoc  
 potest dici, quod Filius Dei univit sibi carnem  
 mediante anima. Alio modo secundum rationem cau-  
 salitatis; et sic ipsa anima est aequaliter causa carnis  
 univendae Filio Dei: non enim esset assumptibilis,  
 nisi per ordinem quem habet ad animam rationa-  
 lem, secundum quam habet quod sit caro humana,  
 quae prae caeteris est assumptibilis. Similiter per  
 spiritum animam assumpsit, tum propter congrui-  
 tatem assumptionis, non enim anima est assum-  
 ptibilis secundum congruitatem nisi per hoc quod  
 capax est Dei ad imaginem ejus existens, quod

est secundum mentem quae spiritus dicitur, secundum illud ad Eph. 4: « Renovamini spiritu mentis vestrae: » tum etiam propter ordinem dignitatis, quia intellectus inter caeteras partes animae est superior et dignior, et Deo similior. Et ideo, ut dicit Damascenus, « Unitum est carni per medium intellectum verbum Dei. » Verumtamen sciendum, quod Christus humanam naturam assumpsit cum quibusdam defectibus: cuius ratio triplex est. Prima, ut pro nobis satisfaceret. Isa. 55: « Vere languores nostros ipse tulit, et dolores ipse portavit. » Secunda, ut veritatem humanae naturae ostenderet. Ad Philipp. 2: « In similitudinem hominum factus, et habitu inventus ut homo. » Tertia, ut exemplo virtutum nos conformaret. Ad Hebr. 12: « Recogitate eum qui talem sustinuit adversus semetipsum contradictionem, ut non fatigemini animis vestris deficientes. » Ex his etiam patet, quod non debuit defectum peccati assumere: tum quia peccatum impedit virtutem satisfaciendi: Eccles. 54: « Dona iniquorum non probat Altissimus: » tum quia ex peccato non monstratur veritas humanae naturae, cuius Deus causa est, cum sit contra naturam seminatione diaboli introductum, ut dicit Damascenus: tum etiam quia peccando non praerberet exempla virtutum, cum peccatum sit virtuti contrarium. Patet ergo, quod nullum defectum peccati assumpsit, nec originalis nec actualis; unde dicitur 1 Pet. 2: « Qui peccatum non fecit, nec inventus est dolus in ore ejus. »

Sciendum vero, quod triplices sunt defectus. Quidam sunt qui contrariantur perfectioni scientiae et gratiae: sicut ignorantia, pronitas ad malum, difficultas ad bonum, quos non deceit Christum assumere, qui plenus fuit gratia et veritate, ut dicitur Joan. 1. Quidam vero sunt qui proveniunt in hominibus ex quibusdam particularibus causis, sicut lepra, et caducus morbus, et alia hujusmodi: qui quidem defectus causantur quandoque ex hominis culpa ex inordinatione vicius, quandoque ex defectu virtutis formativae. Quorum neutrum Christo convenit: quia caro ejus ex Spiritu Sancto concepta fuit, qui est infinitae virtutis et sapientiae, errare et deficere non valens: ipse enim nihil inordinate in regimine vitae suae exerevit. Tertii sunt defectus qui communiter in hominibus inveniuntur ex peccato primi parentis, sicut mors, fames, sitis et hujusmodi. Hos Christus suscepit defectus, quos Damascenus vocat naturales defectus, et indetractabiles passiones: naturales, quia communiter, quia naturaliter consequuntur totam naturam: indetractabiles, quia defectum gratiae et scientiae non important.

Notandum insuper, quod passiones appetitus sensitivi fuerunt in Christo: sed aliter quam in nobis quantum ad tria. Primo quantum ad objectum; quia in nobis feruntur saepe ad illicita, quod in Christo non fuit. Secundo quantum ad principium; quia in nobis saepe iudicium rationis praeveniunt, in Christo vero non oriebantur nisi secundum dispositionem rationis; unde dicit Augustinus quod « Christus hoc eum voluerit motus humana anima suscepit, sicut eum voluit factus est homo. » Tertio quantum ad affectum; quia in nobis quandoque hujusmodi motus non sistunt in appetitu sensitivo, sed trahunt rationem: quod in Christo non fuit, quia omnes modos naturaliter humanae carni convenientes sic in appetitu sensitivo remanebant, quod ratio non impediatur

facere quod conveniebat. Unde Hieronymus dicit, quod « Christus ut veritatem probaret assumpti hominis, vere contristatus est; sed ne passio illius dominaretur animo, per passionem dicitur quod coepit tristari: ut passio perfecta intelligatur, quando animo et rationi dominatur; pro passio vero quae est inclinata in appetitu sensitivo, sed ulterius se non extendit. » De perfectione gratiae dicitur Joan. 1: « Verbum caro factum est, etc. » Ubi triplex gratia secundum ordinem exprimitur: videlicet gratia unionis, gratia habitualis et gratia capitis. Prima gratia, scilicet unionis, tangitur ibi, « Verbum caro factum est; » unde Augustinus: « In rebus per tempus ortis illa summa gratia est, quod homo Deo junctus est in unitate personae. »

Notandum vero, quod sancti Patres non meruerunt incarnationem Christi ex condigno: tum quia opera meritoria hominis propria ordinantur ad beatitudinem, quae est virtutis, et consistit in Dei plena fruitione; unio autem incarnationis cum sit in esse personali, transcendit unionem mentis beatae ad Deum, quae est per actum fruientis: et ita non potest cadere sub merito, quae est principium gratiae, secundum illud Joan. 1: « Gratia et veritas per Jesum Christum facta est: » tum etiam quia incarnatio Christi est reformatio totius humanae naturae; et ideo non cadit sub merito alicujus hominis singularis, quia bonum alicujus hominis puri non potest esse causa totius boni naturae. Tamen ex congruo meruerunt Patres sancti incarnationem petendo et desiderando: congruum enim erat ut Deus exaudiret eos qui sibi obediebant.

Secunda gratia habitualis tangitur ibi, « Plenum gratia et veritate, » Glossa « quia divinitas in eo fuerat replens eum plenitudine redundante in alios. » Hujus autem plenitudinis ratio potest accipi ex propinquitate ipsius ad Deum: quanto enim receptivum aliquod propinquius est causae influenti, tanto abundantius participat influentiam ipsius. Influxus autem gratiae est a Deo, juxta illud Ps. 85: « Gratiam et gloriam dabit Dominus. » Unde, cum anima Christi propinquissime attingebat ad Deum, ex ejus influentia plenitudinem gratiae in ipso instanti conceptionis accepit.

Notandum vero, quod plenitudo gratiae potest accipi dupliciter. Uno modo ex parte ipsius gratiae: quando scilicet aliquis attingit ad suum bonum gratiae et quantum ad essentiam et quantum ad virtutem: quia scilicet habet gratiam in maxima excellentia qua potest haberi, et in maxima extensione ad omnes gratiae effectus: et talis gratiae plenitudo propria est homini Christo. Alio modo potest attendi ex parte habentis gratiam: quando scilicet aliquis habet gratiam secundum suam conditionem, sive secundum intentionem, prout est in eo intensa gratia usque ad terminum ei praefixum a Deo, secundum illud ad Ephes. 4: « Unicuique nostrum data est gratia, secundum mensuram donationis Christi, » id est secundum quod dator Christus mensurat. Est autem mensura divisio donorum: aliud enim habet iste, aliud ille; et quod habet iste non habet ille. Sive etiam secundum virtutem, in quantum scilicet habet facultatem gratiae ad omnia quae pertinent ad suum statum sive officium, sicut dicebat Apostolus Ephes. 4: « Mihi autem omnium, » scilicet sanctorum « minimo data est gratia haec, illuminare caecos etc. » Talis plenitudo gratiae non est propria Christo, sed communicatur aliis per Christum:

sic Beata Virgo dicitur gratia plena, Luc. 2, quae habuit gratiam sufficientem ad statum suum ad quem erat electa a Deo, ut scilicet esset mater Dei. Sic et beatus Stephanus dicitur gratia plenus, Act. 7, quia habuit gratiam sufficientem, ut esset idoneus minister et testis Christi. Harum autem plenitudinum una plenior est quam alia, secundum quod aliquis divinitus est praedeterminatus ad altiorem vel inferiorem statum. Sic etiam sancti communiter dicuntur pleni gratia, secundum illud Ephes. 4: « Ut impleamini in omni plenitudine Dei: » quia habent gratiam sufficientem ad merendum vitam aeternam, quae consistit in plena fruitione Dei.

Notandum etiam, quod gratia Christi habitualis dupliciter consideratur. Uno modo secundum quod est ens quoddam; et sic est finita, eo quod est in anima Christi sicut in subjecto finitam habente capacitatem. Alio modo potest considerari secundum rationem gratiae; et sic potest dici infinita, eo quod non limitatur, quia scilicet habet quicquid potest pertinere ad rationem gratiae, quia collata est animae Christi sicut cuidam principio satisfactionis, seu gratificationis in humana natura, secundum illud Ephes. 1: « Gratificavit nos in dilecto Filio suo; » sicut si dicamus lucem solis esse influentem, non quidem secundum suum esse, sed secundum rationem lucis, quia habet quicquid potest ad rationem lucis pertinere. Verbum autem illud Joan. 4: « Non enim « ad mensuram dat Deus spiritum homini Christo, » potest tripliciter exponi. Uno modo de dono quod Deus Pater ab aeterno dedit Filio, scilicet divinam naturam, quae est donum infinitum. Unde quaedam Glossa dicit ibid., « ut tantus sit Filius, quantus sit pater. » Alio modo potest referri ad donum quod datum est humanae naturae, ut uniatur divinae personae, quod est donum infinitum ut dicit Glossa ibid., « sicut « Pater plenum et perfectum genuit filium, sic plenum « et perfectum est naturae unitum humanae. » Tertio modo potest referri ad gratiam habituales, in quantum se extendit ad statum gratiae; unde Augustinus hoc exponens dicit: « Mensura quaedam donorum divisio. Alii datur per spiritum sermo « sapientiae, alii sermo scientiae: sed Christus qui « dat, non ad mensuram accepit. »

Sciendum vero, quod gratia unionis praecedat in Christo gratiam habituales, non ordine temporis, sed naturae et intellectus: unde dicitur Isa. 42: « Eccc « servus meus, suscipiam eum; » quod quidem pertinet ad gratiam unionis: et postea sequitur. « Et ponam « super eum spiritum meum; » quod quidem pertinet ad donum gratiae habituales. Hujus autem antecessoris ratio potest accipi ex habitudine gratiae ad suam causam: gratia enim causatur in homine ex praesentia divinitatis, sicut lumen in aere ex praesentia solis: unde Ezech. 45, dicitur, quod « gloria Dei Israel ingrediebatur per viam « orientalem, et terra resplenduit a maiestate eius. » Praesentia autem Dei in Christo est secundum unionem humanae naturae ad divinam personam. Unde gratia habitualis Christi intelligitur ut consequens hanc unionem, sicut splendor solem. Sicut autem gratia respicit essentiam animae, sic virtus respicit ejus potentiam. Unde oportet quod sicut animae potentiae derivantur ab ejus essentia, ita virtutes sunt quaedam derivationis gratiae: quanto enim aliquod principium est perfectius, tanto magis imprimit suos effectus. Unde cum gratia Christi sit perfectissima, consequens est, quod ex ipsa processerint

virtutes ad perficiendas singulas potentias animae, et ita Christus habuit omnes virtutes; fidei tamen et spei non habuit propter ipsarum imperfectionem, sed habuit quae correspondet eis in patria, scilicet visionem et comprehensionem, quia fuit verus comprehensor.

Tertia gratia scilicet capitis, tangitur ibi, Joan. 1: « De plenitudine ejus omnes accepimus. » Haec autem gratia eadem est secundum essentiam cum gratia habituali, differens tamen secundum rationem. Notandum vero, quod Christus dicitur caput Ecclesiae secundum similitudinem capitis humani, in quo possumus tria considerare: scilicet ordinem, perfectionem, virtutem: ordinem, quia caput est prima pars hominis incipiendo a superioribus: et inde est quod omne principium caput consuevit nominari: unde in Psalm. 59: « In capite « libri scriptum est etc. » id est in principio libri: perfectionem, quia in capite vigent omnes sensus tam interiores quam exteriores, cum in ceteris membris sit solus tactus: et inde est quod dicitur Isa. 44: « Senex et honorabilis ipse est caput » Virtutem, quia virtus et motus ceterorum membrorum et gubernatio eorum in suis actibus est a capite propter vim sensitivam et motivam ibidem dominantem: unde et rector populi dicitur caput ipsius, secundum illud 1 Reg. 15: « Cum esses « parvulus in oculis tuis, caput in tribus Israel « factus es. » Haec autem tria competunt Christo spiritualiter. Primo enim secundum propinquitatem ad Deum gratia ejus altior et prior est, etsi non tempore, quia omnes alii receperunt gratiam per respectum ad gratiam ipsius, secundum illud Rom. 8: « Quos praescivit et praedestinavit conformes « fieri imaginis Filii sui, ut sit ipse primogenitus « in multis fratribus. » Secundo perfectionem habet quantum ad plenitudinem omnium gratiarum, secundum illud Joan. 2: « Plenum gratia et veritate. » Tertio virtutem habet, virtutem scilicet influendi gratiam omnibus in omnia membra Ecclesiae, secundum illud Joan. 1: « De plenitudine ejus omnes « accepimus: » et sic patet, quod convenienter dicitur caput Ecclesiae.

Notandum vero quod non solum influit quantum ad corpus, sed etiam quantum ad animam; sed principaliter quantum ad animam, secundario vero quantum ad corpus. Uno modo in quantum membra corporis exhibentur arma justitiae in anima existente per Christum, ut dicit Apostolus ad Rom. 6. Alio modo in quantum vita gloriae ab anima derivatur ad corpus, secundum illud Rom. 8: « Qui suscitavit Jesum a mortuis, et vivificabit mortalia corpora nostra propter « inhabitantem spiritum ejus in nobis. »

Notandum vero quod Christus est caput hominum secundum diversos gradus. Primo enim est principaliter caput eorum qui actu uniuntur sibi per gloriam: secundo qui actu uniuntur sibi per caritatem: tertio qui uniuntur sibi actu per fidem: quarto eorum qui uniuntur sibi potentia nondum ad actum redacta, quae tamen ad actum est reducenda secundum divinam praedestinationem: quinto eorum qui in potentia sunt sibi uniti, quae nunquam reducetur ad actum, sicut homines in hoc mundo viventes, qui non sunt praedestinati; qui tamen ex hoc mundo recedentes, totaliter desinunt esse membra Christi, quia jam non sunt in potentia ut Christo uniuntur: nec solum hominum, sed etiam angelorum Christus caput est, secundum illud ad Coloss. 2: « Qui est caput omnis principatus et po-



• testatis: » quia propinquius se habet ad Deum, et perfectius dona Dei participat. Unde ipse Angelis influit sensum cognitionis, ipsum illuminando, purgando et perficiendo. Quia tamen non communicat cum Angelis in natura speciei, non ita proprie dicitur caput Angelorum, sicut hominum.

Sciendum vero, quod dupliciter caput influit in alia membra. Primo quodam intrinseco influxu, prout virtus motiva et sensitiva a capite derivatur ad cetera membra. Alio modo secundum exteriorem quandam gubernationem; prout scilicet secundum visum et alios sensus, qui in capite radicanter dirigitur homo in exterioribus actibus. Utroque modo Christus dicitur caput; sed secundo modo alii etiam possunt dici capita, secundum illud Amos 6: « Optimates capita eorum. » Diabolus etiam in quantum gubernat malos ad suum finem, qui est aversio a Deo, dicitur caput omnium malorum, Job 41: « Ipse est rex super omnes filios » superbiae. Gregorius: « Iniquorum omnium est » caput diabolus. De perfectione tertiae proles, scilicet gloriae, dicitur in Psal. 64: « Beatus quem elegisti » et assumpsisti, habitabit in atriis tuis: » quod exponit Glossa de Christo. Consistit autem beatitudo in visione divinae essentiae, quam anima in instanti creationis suae perfectissime contemplantur; et tanto clarius, quanto propinquius verbo conjungebatur. Sunt autem in hac visione gradus, secundum quod aliqui acutius Deum vident, qui est omnium rerum causa: quanto enim causa aliqua plenius cognoscitur, tanto in ipsa plures effectus cognosci possunt: non enim magis cognoscitur causa, nisi virtus ejus primum cognoscatur, cujus virtutis cognitio sine cognitione effectuum esse non potest: nam quantitas virtutis secundum effectus mensurari solet; et inde est quod eorum qui essentiam Dei vident, aliqui plures effectus vel rationes divinorum operum in ipso Deo conspiciunt, quam alii qui minus clare vident: et secundum hoc inferiores Angeli a superioribus illuminantur secundum Dionysium. Anima ergo Christi summam perfectionem visionis divinae obtinens, inter ceteras creaturas omnia opera divina et rationes ipsorum quaecumque sunt, erant, vel fuerunt, in ipso Deo plene intuetur, ut non solum homines, sed etiam supremos Angelos illuminet: et ideo dicit Apostolus ad Coloss. 2, quod « in ipso sunt omnes thesauri sapientiae et scientiae absconditi: » et Hebr. 4: « Omnia autem nuda et aperta sunt oculis ejus; » nulli enim intellectui glorificato deest, quin cognoscat in Verbo omnia quae ad ipsum spectant. Ad Christum autem et ad ejus dignitatem spectant quodammodo omnia, in quantum subjecta sunt ei omnia, secundum illud Psalm. 8: « Omnia subjecti sub pedibus ejus: ipse est enim iudex omnium constitutus a Deo, quia filius hominis est, » ut dicitur Joan. 5. Et ideo anima ipsius in Verbo cognoscit omnia existentia secundum quodecumque tempus, et etiam hominum cogitatus, quorum ipse iudex est; ita quod de eo dicitur Joan. 5: « Ipse » enim sciebat quid esset in homine; » quod potest intelligi non solum quantum ad scientiam divinam, sed etiam quantum ad scientiam animae, quam habet in verbo; in quo etiam cognoscit non solum omnia quae actu sunt, erant vel fuerunt; sed etiam quaecumque sunt, erant vel fuerunt in potentia solum creative (1), quia in Verbo cognoscit omnis creaturae essentiam, potentiam et virtutem:

(1) Forte solum creaturae.

non autem omnia cognoscit quae sunt in divina potentia, quia hoc esset comprehendere omnia quae Deus facere potest; quod esset comprehendere divinam virtutem, et per consequens divinam essentiam, quod est impossibile omni intellectui creato. Possumus autem distinguere triplicem scientiam, quam habuit anima Christi. Una est beata, per quam cognoscit Verbum, et res in Verbo, ut supra dictum est: de hac scientia dicitur Joan. 8: « Scio » eum, et sermonem ejus servo. » Alia est divinitus influxa: nam sicut in Angelis praeter cognitionem intuitivam, qua cognoscunt Verbum et res in Verbo, est alia cognitio qua cognoscunt res in propriis naturis per species intelligibiles divinitus influxas, ita et in anima Christi praeter scientiam beatam est alia scientia indita, sive infusa, qua cognoscit res in propria natura per species intelligibiles influxas humanae menti proportionatas: unde dicitur Coloss. 2. « In ipso sunt omnes thesauri » sapientiae absconditi. » Secundum hanc scientiam cognoscit anima Christi quaecumque ab homine cognosci possunt per virtutem luminis intellectus agentis, et omnia illa quae per revelationem divinam hominibus innotescunt. Alia vero est scientia experimentalis, sive acquisita: unde dicitur Hebr. 5: « Didicit ex his quae passus est obedientiam. » Secundum hanc scientiam scivit anima Christi omnia illa quae possunt sciri per actionem intellectus agentis. Et licet non fuerit omnia expertus, tamen sicut homo ex virtute intellectus agentis potest procedere ad intelligendum effectus per causas, et e converso, et similia per similia, et contraria per contraria; ita ex his quae expertus est, in omnium devenit notitiam. Sciendum vero, quod scientia experimentalis ponitur in Christo secundum lumen intellectus agentis, quod est humanae naturae connaturale; scientia vero infusa per lumen desuper infusum, qui modus cognoscendi est proportionatus angelicae naturae; scientia vero beata, per quam ipsa essentia Dei videtur, est propria et connaturalis soli Deo.

#### ARTICULUS IV.

##### *De nativitate Christi.*

Secundo videamus de nativitate Christi. Circa quam tria possumus considerare: videlicet parentis virginitatem, nascentis benignitatem, et nativitatis utilitatem. De primo dicitur Isa. 7: « Ecce Virgo » concipiet et pariet filiam: » unde Augustinus: « Speculum non rumpit radius solis, integritatem » Virginis ingressus aut egressus numquid poterat » vitare divinitatis? » Notandum vero, quod fuit conveniens Christum concipi et nasci de Virgine: tum quia Verbum est Patris, cujus similitudinem gerit verbum cordis, quod sine corruptione concipitur, et sine corruptione de corde procedit. Unde etiam conveniens fuit Verbum Dei Patris sine corruptione concipi et nasci: unde in quodam sermone dicitur: « Neque verbum nostrum cum paritur, » corrumpit mentem, neque Verbum Dei specialem » eligens partum, peremit virginitatem: » tum etiam quia Christus venerat peccati corruptionem tollere, secundum illud Joan. 1: « Ecce Agnus » Dei etc. » Ideo dicit Augustinus: « Fas non erat, » ut per ejus adventum violaretur integritas, qui » venerat sanare corrupta. » Tum etiam in signum spiritualis regenerationis, quae non ex voluntate carnis, neque ex voluntate viri, sed ex Deo, ut di-



citur Joan. 11: unde Augustinus: « Oportebat ca-  
 « put nostrum insigni miraculo secundum corpus  
 « nasci de virgine, ut significaret sua membra de  
 « virgine Ecclesia secundum spiritum nascitura: »  
 tum etiam ut imaginem futurae resurrectionis et glo-  
 riae praeferret, « ubi neque nubent neque nuben-  
 « tur, sed sunt sicut Angeli Dei in caelo, » Matth.  
 25. Fuit autem conveniens, ut de Virgine despon-  
 sata viro nasceretur, sicut dicitur Matth. 1: « Cum  
 « esset desponsata mater Jesu etc. » Ideo secundum  
 Glossam, « ut significaret Ecclesiam quae est virgo  
 « et sponsa, et ut per Joseph virgo Maria osten-  
 « deretur; vel ut Joseph esset testis castitatis; vel  
 « ne tanquam adultera lapidaretur, et virgo viri  
 « solatio sustentaretur, et partus virginis diabolo  
 « celaretur, et ne virginibus esset excusatio infa-  
 « miae, quod Mater Christi infamata fuerat. »

De secundo, scilicet benignitate Christi, dicitur Tim.  
 5: « Apparuit benignitas et humanitas etc. » Ubi no-  
 tandum, quod Christus exhibuit nobis benignitatem  
 in divinitatis suae communicatione; sed misericor-  
 diam in humanitatis nostrae susceptione. Primum  
 ibi, « Apparuit benignitas: » ubi dicit Bernardus:  
 « Apparuit Dei potentia in rerum creatione, sa-  
 « pientia in earum gubernatione, sed benignitas  
 « maxime apparuit in humanitate. Magnum enim  
 « indicium benignitatis declaravit, qui humanitati  
 « Dei nomen addere curavit. » Secundum tangitur  
 ibi, « Non ex operibus justitiae quae fecimus nos,  
 « sed secundum suam misericordiam etc.: » unde  
 Bernardus: « Quid tantopere declaravit ejus misericor-  
 « diam, quam quod ipsam suscepit miseriam? Quid  
 « tam pietate plenum, quam quod Dei verbum propter  
 « nos factum est focum? Unde cantat Ecclesia: Chri-  
 « ste Redemptor omnium, ex Patre patris unice etc. »

Notandum vero, quod ratio misericordiae et  
 benignitatis differunt in quatuor. Primo in hoc,  
 quia misericordia respicit remotionem defectus,  
 sed benignitas communicationem perfectionis. Se-  
 cundo in hoc quod misericordia, proprie loquen-  
 do, pertinet ad providentiam divinam, qua bona  
 sua communicat creaturis rationabilibus tantum:  
 respicit enim miseriam, quae cum sit contraria  
 felicitati, non potest esse nisi rationabilium crea-  
 turarum, quarum est esse felices: sed benignitas  
 respicit providentiam divinam respectu quarumlibet  
 rerum. Tertio in hoc quod miseria importat assi-  
 milationem quamdam providentis ad eum cui pro-  
 videtur, in quantum providens alterius miseriam  
 reputat quasi suam: unde non potest esse nisi in  
 natura intellectuali, quae habet aestimationem alie-  
 nae miseriae; sed benignitas habet ordinem ad  
 communicationem simpliciter: unde cuilibet creatu-  
 rae quae habet perfectionem communicabilem, po-  
 test convenire benignitas. Quarto quia miseria  
 removet debitum ab eo cui providetur: non enim  
 dicitur dari misericorditer alteri quod ei debetur.  
 Sed benignitas non removet debiti rationem ab eo  
 cui aliquid datur; unde benignitas se habet com-  
 muniter ad largitionem justitiae et misericordiae.

De tertio, scilicet utilitate Christi, dicitur Isa. 9:  
 « Parvulus natus est nobis, » idest ad utilitatem  
 nostram. Sunt autem quatuor utilitates nati-  
 vitarum Christi, quas possumus considerare ex quatuor con-  
 ditionibus parvulorum: quae sunt puritas, humili-  
 tas, amabilitas et placabilitas: quae in hoc parvulo  
 excellentissime inveniuntur. Primo invenimus in eo  
 summam puritatem, quia est candor lucis aeternae

et speculum sine macula, ut dicitur Sapient. 8.  
 Hanc autem puritatem demonstrat conceptus et  
 partus virgineus: non enim corruptionem parere  
 potuit incorruptio: unde dicit Aleoinus: « Factor  
 « hominum ut homo fieret, nasciturus de homine  
 « talem debuit sibi matrem eligere, qualem et de-  
 « cere sciebat, et sibi placituram noverat. Voluit  
 « ergo esse virginem, de qua immaculata immacu-  
 « latus procederet omnium maculam purgaturus. »  
 Secundo in hoc parvulo invenimus summam hu-  
 militatem. Ad Philip. 2: « Exinanivit semetipsum etc.  
 « Hanc humilitatem ostendit, » ut dicit Bernardus,  
 « locus diversorii, pannorum involutio, et in prae-  
 « sepe reclinatio. » Tertio invenimus in hoc par-  
 vulo summam amabilitatem, quia speciosus forma  
 prae filiis hominum, immo prae millibus Angelorum,  
 ut dicit Bernardus. Hanc amabilitatem facit unio  
 divinitatis cum humanitate. Unde Bernardus: « Ple-  
 « num prorsus omni suavitate daleedine videre  
 « hominem hominis Conditorem. » Quarto inveni-  
 mus in hoc parvulo summam placabilitatem, quia  
 benignus est et patiens, et multum misericors, et  
 praestabilis super malitia; Joel. 2: unde Bernardus:  
 « Christus parvulus est, et leviter placari potest.  
 « Quis enim nesciat quia puer facile donat? Ecce  
 « si non fuerit nobis magnum, pro minimo pos-  
 « sumus reconciliari. Pro minimo, inquam, non  
 « sine poenitentia. » Et sicut benignitas apparuit  
 super omnem spem ultra omnem aestimationem,  
 similem expectare possumus iudicii districtiorem.  
 Primo ergo puer iste natus est nobis, ut ejus hu-  
 militatem imitemur, ut circa ejus amabilitatem af-  
 ficiamur, ut ex ejus placabilitate fiduciam habea-  
 mus. Primo ergo natus est nobis parvulus iste in  
 sacramentum pietatis: unde ipse dicit Matth. 2:  
 « Ipse salvum faciet populum suum etc. » Ber-  
 nardus: « En ipse Christus qui purgationem facit  
 « delictorum, ecce sentinam nostram purgaturus  
 « advenit. » Hinc etiam Augustinus in sermone de  
 Nativ. dicit: « O beata infantia, per quam nostri  
 « generis reparata est vita! O gratissimi et dele-  
 « tabiles vagitus, per quos stridores dentium plo-  
 « ratusque aeternos evasimus! O felices panni, qui-  
 « bus peccatorum nostrorum extersae sunt sordes! »  
 Secundo natus est nobis in exemplum humilitatis.  
 Joan. 15: « Exemplum dedi vobis etc.: » unde  
 Bernardus: « Studeamus effici sicut parvulus iste:  
 « discamus ab eo, quia mitis est et humilis corde:  
 « nec magnus, videlicet Deus, sine causa factus est  
 « homo parvulus. Unde intolerabilis impudentiae  
 « est ut ubi se exinanivit majestas, infletur ver-  
 « miculus et tumescat. » Tertio natus est nobis  
 in augmentum caritatis. Luc. 12: « Ignem veni  
 « mittere in terram etc. » Bernardus: « Magnus  
 « Dominus et laudabilis nimis factus est parvulus  
 « et amabilis. Parvulus, inquit, natus etc. Ipse  
 « enim nobis est omne amabile, ipse est pater,  
 « frater, dominus, minister, praemium, et exem-  
 « plum. » Idem: « Quanto minorem se fecit in  
 « humanitate, tanto majorem se exhibuit in bo-  
 « nitate. Quanto autem majorem bonitatem exhi-  
 « buit, tanto magis affectum nostrum accendit. »  
 Quarto natus est nobis in solatium spei et securi-  
 tatis. Ad Hebr. 5: « Adeamus cum fiducia ad thro-  
 « num gratiae ejus. » Glossa: « idest (1) Christum, in  
 « quo regnat gratia, » ut per ipsum consequamur mi-  
 sericordiam, idest remissionem peccatorum praeece-

(1) Al. Glossa primo Christum etc.

dentium, et inveniamus gratiam et auxilium opportunum. Glossa: « Recedamus de hac vita. » Augustinus: « Dies duleissima nativitas Christi, in qua con-  
« punctio etiam infidelibus venit: misericordia tan-  
« gitur impius, veniam sperat compunctus, reditum  
« non desperat captivus, remedium desiderat vul-  
« neratus: in qua nascitur Agnus qui tollit peccata  
« mundi: in ejus nativitate qui conscientiam habet  
« securam, duleius gaudet: qui miseram, attentius  
« timet: qui bonus est, affectuosius orat: qui pec-  
« cator, devotissime supplicat: duleis dies et vere  
« duleis cunctis poenitentibus, et veniam portans.  
« Promitto vobis, filioli, et certus sum, quia in  
« hac die si quis ex corde poenituerit, et ad vo-  
« mitum peccati reversus non fuerit, quodcumque  
« petierit dabitur ei. »

Possumus autem mystice notare, quod partus Beatae Mariae significat partum poenitentis anime, de quo dicitur Isa. 26: « A timore tuo, Domine, concepimus, et parturivimus spiritum salutis. » Illic partui convenit mystice locus nativitatis Christi, scilicet Bethlehem: unde Bernardus: « Tu quoque si fueris  
« Bethlehem per cordis contritionem, ut sint tibi  
« lacrymae tuae panes die ac nocte, et in earum  
« refectione jugiter delecteris (Interpretatur Bethle-  
« hem domus panis) et si fueris Juda per confessio-  
« nem, civitas David per operis satisfactionem; nasce-  
« tur in te Christus, et dabit cordi tuo gaudium per  
« gratiam in praesenti et per gloriam in futuro. »

Notandum vero quod post partum poenitentiae debet anima poenitentis involvi pannis caritatis contra turpitudinem peccandi, quae consistit in interiori mentis deordinatione: reclinari per affectum humilitatis contra superbiam, quae consistit in aversione: et poni in praesepio asperitatis per condignam poenitentiam contra peccati delectationem, quae est in conversione. De primo dicitur Prov. 4. « Universa delicta operit caritas. » Debemus autem in panno hoc ex omni parte involvi: primo ut Deum qui supra nos est diligamus: secundo hoc quod nos sumus: tertio quod juxta nos est, scilicet proximum nostrum: quarto quod infra nos est, scilicet corpus nostrum. Haec quatuor ex caritate sunt diligenda, ut dicit Augustinus. De secundo dicitur in Psal. 50: « Cor contritum et  
« humiliatum etc. » Unde Bernardus: « Porro hu-  
« militas nos Deo commendat, Deo facit nos sub-  
« ditos, Deo placet in nobis, sicut ait Beata Virgo:  
« Respexit humilitatem ancillae suae. » De tertio dicitur Luc. 5: « Facite fructus dignos poeniten-  
« tiae; » unde dicit Bernardus: « Fuge voluptatem  
« quia in ea mors posita est secus introitum de-  
« lectationis. Age poenitentiam, quia per hanc ap-  
« propinquat regnum Dei. Hoc tibi praedicat sta-  
« bulum, illud praesepe clamat: hoc membra illa  
« infantilia loquuntur, hoc lacrymae et vagitus  
« evangelizant. »

#### ARTICULUS V.

##### *De Christi circumcissione.*

Tertio videamus de ejus circumcissione, de qua dicitur Luc. 2: « Postquam consummati sunt dies  
« octo. » Ubi notandum est quod Christus sicut nobis natus est, ita etiam pro nobis circumcissus est. Ubi nota quod circumcissio Christi fuit nobis medicamentum sanitatis, exemplum humilitatis, do-

camentum sanitatis, ut scilicet spiritualiter circumciderentur in signum et figuram salutiferae circumcissionis, quae erit in generali resurrectione, quando ab omni corruptione circumcidemur. De primo dicitur ad Galat. 4: « Misit Deus Filium  
« suum factum sub lege etc. » Bernardus: « Quid  
« mirum, si caput accepit pro membris curatio-  
« nem, quam tamen in seipso non habuit neces-  
« sariam? Nonne et in membris nostris saepe pro  
« unius infirmitate alteri adhibetur curatio? Dolet  
« caput, et in brachio fit coctura (1); dolent renes, et  
« fit in tibia: ita hodie pro totius corporis putre-  
« dine cauterium quoddam fixum est in capite.  
« Denique quid mirum, si pro nobis dignatus est  
« mori? Totus mihi siquidem datus est, et totus  
« in meos usus expensus est. » De secundo dicitur in Psal. 8: « Minorasti eum paulo minus ab Angelis: » cui verbo alludens Bernardus dicit: « Ideo mino-  
« ratus est multo minus ab Angelis qui non solum  
« formam hominis, sed et formam habet peccato-  
« ris, et insignitur velut quodam cauterio salutis. » Idem: « Habes manifestae humilitatis exemplum:  
« ad quid enim tibi circumcissio necessaria, qui  
« peccatum non fecisti, nec contraxisti? Quod nec  
« feceris, ipsa manifestat aetas: quod non contraxeris,  
« multo certius probat Patris divinitas, et matris inte-  
« gritas. Summus sacerdos es, quem nec super patre  
« nec super matre contaminandum prophetatum in  
« lege potius est quam mandatum. Est tibi pater ab  
« aeterno, sed Deus est in quem peccatum non  
« cadit: est et mater ex partu, sed Virgo: nec pa-  
« rere poterat incorruptio corruptelam. » Idem:  
« Qui sine peccato est, non est dedignatus pecca-  
« torem se reputari: nos et esse volumus, et no-  
« lumus aestimari. » De tertio dicitur Jerem. 4:  
« Circumcidimini, et auferite praepudia cordium  
« vestrorum viri Juda, et habitatores Jerusalem. »

Notandum vero, quod spiritualis circumcissio duplex est, scilicet interior et exterior: unde dicit Beda: « Quia spiritualis circumcissio est omnium, scilicet  
« interiorum exteriorumque hominis nostri sensuum  
« custodia. » Consistit autem exterior circumcissio in tribus: scilicet in habitu, ne sit notabilis: in actione, ne sit reprehensibilis; in sermone, ne sit contemptibilis, ut dicit Bernardus. Interior consistit in tribus: scilicet in cognitione, ut sit sancta: in affectione, ut sit pura: in intentione, ut sit recta, ut dicit idem Bernardus. De quarto dicitur I Cor. 15: « Oportet enim corruptibile hoc induere in-  
« corruptionem, et mortale hoc induere immorta-  
« litatem. » Unde Beda: « Tunc vera, tunc plena erit  
« nostra circumcissio, cum in die iudicii cunctis  
« simul corporis et animae corruptionibus exuti,  
« mox peracto iudicio ad videndam perpetuae crea-  
« toris nostrae faciem, aulam caelestis regni ingre-  
« diemur; quod desideratissimum tempus regni  
« introitus illa octava dies qua circumcissio agitur  
« indicat. Sex enim sunt saeculi aetates, in quibus  
« pro adipiscenda requie sempiterna, ad tempus  
« operari necesse est. Septima aetas non est in  
« hac, sed in alia vita quiescentium usque ad tem-  
« pus resurrectionis corporum. Octava autem dies  
« est dies resurrectionis sine ullo temporum fine  
« beata. Ea sicut nunc a Christo christiani, ita  
« tunc a Jesu salvati vocabimur. »

(1) Forte cauterium.

## ARTICULUS VI.

*De impositione nominis Christi.*

Quarto videamus de nominis impositione: de qua dicitur Luc. 2: « Et vocatum est nomen ejus « Jesus. » Notandum, quod nomina singularium hominum semper imponuntur ab aliqua proprietate ejus cui imponitur: vel a tempore, sicut nomina sanctorum quandoque imponuntur his qui in eorum festis nascuntur; vel a cognatione (1) vel ab aliqua alia proprietate. Nomina vero quae divinitus imponuntur data, semper significant donum aliquod gratuitum divinitus datum eis quibus imponuntur: sicut Gen. 27: « Dictum est Abrahae: « Appellaberis Abraham: quia patrem multarum « gentium constitui te: » et Matth. 16, dictum est Petro: « Tu es Petrus, et super hanc petram aedificabo Ecclesiam meam. » Quia ergo homini Christo hoc munus gratiae collatum erat, ut per ipsum omnes salvarentur, convenienter est vocatum nomen ejus Jesus, idest Salvator.

Sciendum vero, quod hoc nomen Jesus, est magnae et multae virtutis: est enim poenitentibus in refugium, aegrotantibus in remedium, pugnantibus in subsidium, orantibus in suffragium, quia confert veniam a peccatis, gratiam sanitatis, victoriam tentatis, virtutem et fiduciam impetrandae salutis. De primo dicitur 1 Joan. 2: « Scribo vobis, filioli, quoniam « remittuntur vobis peccata propter ejus nomen: » Act. 10: « Huic omnes Prophetae testimonium « perhibent. » Augustinus: « Quid est Jesus, nisi « salvator? Ergo propter temetipsum esto mihi « Jesus: Noli, Domine, noli sic attendere malum « meum, ut obliviscaris bonum tuum. » Sed attendendum quod hoc nomen in circumcissione imponitur: per quod significatur, quod spiritualiter circumcisi salvantur: unde Bernardus: « Nos, fratres, « necesse est circumcidi, et sic nomen salutis accipere: circumcidi plane non littera, sed spiritu « et veritate. » De secundo dicitur Cant. 1: « Oleum effusum nomen tuum. » Oleum enim levamen est doloris, sic et hoc nomen Jesus. Bernardus: « Habes anima mea, reconditum electuarium « in vaseculo vocabuli, quod est Jesus, quod nulli « unquam pesti invenitur inefficax. » Petrus Ravennas: « Hoc est nomen quod dedit caecis visum, surdis auditum, claudis gressum, sermonem « mutis, vitam mortuis. » De tertio dicitur Prov. 18: « Turris fortissima nomen Domini: » et Marc. ult.: « In nomine meo daemonia ejicient: » Luc. 10: « Reversi sunt discipuli cum gaudio dicentes: « Domine, etiam in nomine tuo daemonia subjiciuntur nobis. » Petrus Ravennas: « Totam diaboli « potestatem de obsessis corporibus virtus hujus « nominis, scilicet Jesus, fugavit. » De quarto dicitur Joan. 14: « Si quid petieritis Patrem in nomine meo, dabit vobis. » Augustinus: « In nomine « meo, quod est Christus Jesus. Christus regem, « Jesus salvatorem significat; et per hoc quodcumque « petimus, in nomine Salvatoris petimus, et tamen « ipse Salvator est non solum quando facit quod « petimus, verum etiam quando non facit: quoniam « quod vidit peti contrarium saluti, non faciendo « exhibet se salvatorem. Novit enim medicus quid « pro sua, quid contra salutem suam poseat aegrotus: ideo contrariam poscentis non facit voluntatem, ut faciat sanitatem. » Nota verbum Ber-

(1) *Al.* cognitione.

nardi de Christi circumcissione, et ejus nominis impositione: « Magnum et mirabile sacramentum: « circumciditur puer, et vocatur Jesus. Quid sibi « vult ista connexio? Sed agnosce mediatorem « Dei et hominum, qui ab ipso suae nativitatis « exordio divinis sociat humana, ina summis: Nascitur ex muliere, sed cui fecunditatis fructus « sic accedit ut non decidat flos virginitatis. Pannis « involvitur, sed isti panni angelicis laudibus honorantur: absconditur in praesepio, sed proditur « stella radiante caelo. Sic et circumcissio probat « veritatem assumptae humanitatis; et nomen quod « est super omne nomen, gloriam indicat majestatis. »

## ARTICULUS VII.

*De apparitione Christi.*

Quinto videamus de Christi apparitione: de qua dicitur Matth. 2: « Cum natus esset Jesus in « Bethlehem Judae etc. » Ubi tria commendabilia tanguntur de Magis, quibus Christus per stellam apparuit: videlicet quod Christum per stellam sapienter cognoverunt, cognitum diligenter quaesiverunt, inventum reverenter adoraverunt. Primum ibi, « Vidimus stellam ejus etc. » « Bene dicitur « ejus », quia dicit Fulgentius, quod « haec stella « nunquam ante apparuit, sed tunc cum puer iste « creavit, et Magis ad se venientibus praeviam « deputavit. » Idem: « Differebat autem haec stella ab aliis in tribus: in situ, quia non erat localiter in firmamento, sed pendeat in medio aëris proxima terrae: in splendore, quia splendorem ejus non poterat splendor solis obscurare, immo in meridie lucidissima apparuit. » In motu, quia praecedebat Magos more viatoris: non enim movebatur motu circulari, sed quasi motu animali et processivo.

Notandum vero est, quod sicut dicit Leo Papa, quod « praeter illam stellae speciem quae « corporeum incitavit obtutu, fulgentior veritatis radius eorum corda perdocuit; » et hoc quidem ad illuminationem fidei pertinebat: habebant enim fidem de Christi humanitate; unde dixerunt « Ubi est qui natus est Rex Judaeorum? » et de ejus divinitate; unde subjunxerunt: « Venimus adorare eum, » Matth. 2. De secundo dicitur Matth. 2: « Ubi est qui natus est Rex Judaeorum? » Ubi notandum, quod diligentia inquisitionis in tribus ostenditur. Unde Augustinus: « O anima mea, si diligenter peteres, tribus hoc signis « ostenderes. Primo enim lumen peteres, ne tenebris impedereris. Secundo scientes interrogares « ne quaerens oberrares. Tertio in nullo loco « quiesceres, donec dilectum invenires. » De primo dicitur in Psal. 66: « Deus misereatur nostri, et « benedicat nobis illuminet. . . . ut cognoscamus « in terra viam tuam. » Glossa, « quae ducit ad « caelum. » Prov. 4: « Justorum semita quasi lux « splendens procedit et crescit usque ad perfectum « diem. » Glossa: « Justorum opera luce scientiae « peraguntur et aeternam ducunt ad vitam, » quae est perfecta dies: unde Magi in lumine stellae Dominum quaesierunt, sicut de ipsis cantat Ecclesia: « Ibant Magi quam viderant etc. »

Notandum vero, quod hoc lumen, scilicet gratiae, per peccatum amittitur; unde dicit Remigius de lumine stellae, quod stella gratiam Dei, Herodes diabolum

significat; qui autem per peccatum diabolo subditur, mox gratiam perdit: a quo si per poenitentiam recesserit, mox gratiam invenit, quae non dimittit donec perducat ad domum pueri, idest ecclesiam. De secundo dicitur Jerem. 6: « State super vias vestras, et videte, et interrogate de semitis antiquis quae sit bona via, et ambulate in ea, et invenietis requiem animabus vestris. Unde etiam Magi venerunt Jerosolymam quaerentes et dicentes: ubi est qui natus est rex Judaeorum? » Augustinus: « Annuntiant et interrogant, credunt et quaerunt; significantes eos qui ambulant per fidem, et desiderant speciem. » Sed sciendum quod heu! multi doctores sunt similes Judaeis; qui Magis demonstrato fonte vitae, a mortui sunt siccitate, ut dicit Augustinus. Quos etiam fabris arcae Noe similes esse dicit « qui aliis ut evaderent praestiterant, et ipsi diluvio perierunt: similes lapidibus milliariis, qui viam aliis ostenderunt nec ipsi ambulare potuerunt. » De tertio dicitur Cant. 4: « In lectulo meo quaesivi per noctem etc.: » ubi dicit Gregorius: « Dilectum in lecto quaerimus, quando in praesentis vitae requie aliquantula, in Redemptoris nostri desiderio suspiramus. Per noctem quaerimus, quia etsi jam mens in ipso vigilat, tamen adhuc oculus caligat. Sed qui dilectum suum non invenit, restat ut surgat, circumeat civitatem, idest sanctam Ecclesiam electorum, mente et inquisitione percurrat, per vicum eum et plateas quaerat, idest per angusta et lata gradiens aspiciat, ut si qua in ejus vestigia invenire valeat, exquirat. Quia sunt nonnulli etiam vitae saecularis, qui imitandum habent aliquid de actione virtutis. Unde etiam Magi non quieverunt, donec dilectum, idest Christum invenerunt: ejus signum fuit, quod tam longum spatium in tam modico tempore transierunt. »

Notandum vero, quod fervens desiderium divini amoris non sinit animam quiescere donec dilectum inveniat. Quia vero desiderium si compleatur, delectat animam, ut dicitur Proverb. 8; ideo quanto desiderium fuerit ferventius, tanto delectabilius dilectus invenitur: unde Magi qui ferventissimo desiderio Christum quaerebant, ipsum delectabilissime inveniebant: unde Matth. 2: « Videntes Magi stellam, gavisus sunt gaudio magno valde. » Ubi dicit Glossa Bernardi, quod « gaudio gaudet qui propter Deum, qui est verum gaudium, gaudet. » Addit et « magno » quo nihil est majus et « valde gavisus, » quia de magno potest alius plus, alius minus gaudere. De quarto Matth. 2: « Et procidentes adoraverunt eum. » Unde Augustinus: « O infantia, cui et astra subduntur! cujus est iste magnitudinis et supernae gloriae, ad cujus pannos et Angeli excubant et reges trepidant, et sectatores sapientiae ingenieulant? Quis est hic talis et tantus? stupeo eum video pannos et intueor caelum; aestuo eum inspecio in praesepe mendicium, et supra astra praeclarum. Subveniat nobis fides, ratio naturae deficit. »

Sequitur: « Et apertis thesauris suis pretiosa munera obtulerunt, aurum etc. » Ubi notandum, quod per aurum intelligitur caelestis sapientia. Thren. 4: « Filii Sion inelyti et amicti auro puro. » Glossa: « Ornati caelesti sapientia. » Quomodo. Glossa, « quam miserabilis mutatio, reputati sunt in vasa testea. » Glossa: « Relictis caelestibus terrena curantes. »

Bernardus: « Invenisti plane sapientiam, si prioris vitae peccata desleas, si hujus seculi desiderabilia parvipendas, si aeternam vitam toto desiderio concupiscas. Invenisti sapientiam, si tibi horum singula sapiunt prout sunt, et haec quidem amara et omnino fugienda. » Ista quoque velut caduca et transitoria contemnenda: illa vero ut perfecta bona totis desideriis appetenda, intimo quodam animi sapore dijudices et discernas. Per thus significatur devota oratio: unde in Psalm. 140: « Dirigatur oratio mea, sicut incensum etc. » Glossa, « igne caritatis succensum. » Bernardus: « Oratio quanto efficacior est, callidius ab adversario impediti solet. » Periculum est si fuerit timida, tepida vel temeraria: timida siquidem oratio caelum non penetrat, quia restringit animum timor immoderatus, ut nec procedere queat: tepida vero in ascensu languescit, eo quod non habeat vigorem: temeraria vero ascendit, sed resilit; resistitur enim ei, nec tamen non obtinet gratiam, sed et meretur offensam; quae vero fidelis et humilis et fervens oratio fuerit, caelum sine dubio penetrabit: unde certum est, quod vacua redire non potest. Per myrrham significatur carnis castigatio. Cantic. 5: « Manus tuae distillaverunt myrrham, et digiti tui pleni myrrha probatissima. » Gregorius: « Per manus operationes virtuosae, per digitos discretio significatur. Manus ergo distillant myrrham, quando caro virtuosus operibus castigatur: sed digiti dicuntur pleni myrrha probatissima, quia castigatio bene probata est, quae fit cum discretione. » De his tribus dicit Gregorius: « Nota regi aurum offerimus, si in conspectu illius claritate divinae sapientiae resplendeamus: thus offerimus, si cogitationes carnis per sancta orationis studia in ara cordis accendimus, ut suave aliquid Deo per caeleste desiderium redoleamus: myrrham offerimus, si carnis vitia per abstinentiam mortificamus. » Per myrrham namque agitur, ne caro mortua putrefiat, secundum Glossam, « aurum ad tributum, thus ad sacrificium, myrrha ad sepulturam pertinet mortuorum; et per haec tria in Christo initiatur (1) regia potestas, divina majestas, humana mortalitas. »

## ARTICULUS VIII.

### *De oblatione Christi.*

Sexto videamus de Christi oblatione in templo: de qua dicitur Luc. 2: « Postquam impleti sunt dies purificationis Mariae etc. » Ad cujus evidentiam sciendum quod Christus sub lege voluit fieri, ut eos qui sub lege erant redimeret: ad Galat. 4. Augustinus: « De prole nata duplex praeceptum in lege traditur: unum quidem generale quantum ad omnes, ut scilicet completis diebus purificationis matris offerretur sacrificium pro filio sive pro filia, ut habetur Levitic. 12. » Et hoc sacrificium quidem erat ob expiationem peccati, in quo proles concepta erat et nata; et etiam ad consecrationem quamdam ipsius, quia tunc praesentabatur in templo, et ideo aliquid offerebatur in holocaustum, et aliquid pro peccato. Aliud erat speciale praeceptum in lege de primogenitis tam in hominibus quam jumentis: sibi enim deputaverat Dominus omne primogenitum Israel, pro eo quod per liberationem Israel percusserat primogenita Ae-

(1) Forte nuntiantur.



gypti ab homine usque ad pecus, primogenitis Israel reservatis: et hoc mandatum ponitur Exod. 13. Quia ergo Christus ex muliere natus erat primogenitus, voluit fieri sub lege. Haec Evangelista Lucas circa eum observata fuisse ostendit. Primo quidem id quod pertinet ad primogenitos, eum dicit, « Tu-  
« lerunt eum in Jerusalem, ut sisterent eum Do-  
« mino. » Secundo id quod pertinet ad omnes, eum dicit, « et ut darent hostiam pro eo secundum  
« quod dictum est in lege Domini, par turturum,  
« aut duos pullos columbarum. »

Notandum vero quod, ut dicit Anastasius, « sicut  
« Christus non gratia sui factus est homo et circum-  
« cisus in carne, sed ut faceret nos per gratiam Deos,  
« et ut specialiter circumcidamur, sic et propter nos  
« sistitur Deo, ut discamus praesentare nos ipsos. » Ad haec quatuor sunt necessaria, quae circa oblationem Christi mystice designantur: scilicet mentis puritas, cordis humilitas, animi tranquillitas, bonorum operum fecunditas. Primum designatur per oblationis tempus, quod completis diebus purgationis: per quod mystice innuitur, quod Deo offerri non possumus, nisi purgati prius ab omni immunditia mentis et corporis. Eccl. 25: « Oculi Domini  
« ni multo magis lucent super solem, et ad ini-  
« quitatem respicere non possunt. » Matth. 18:  
« Nisi conversi fueritis, et efficiamini sicut par-  
« vuli etc., » ubi dicit Beda: « Nisi talem habue-  
« ritus innocentiam et animi puritatem sicut par-  
« vuli, non intrabitis in regnum caelorum. » Apoc. 21: « Nihil coinquinatum intrabit in eam. » Duo autem sunt in nobis purganda, ut dicit Bernardus: « Intellectus, ut noverit; affectus, ut velit. » Secundum designatur propter hoc, quod secundum legem voluit offerri, qui huic legi subjectus non erat; quia non ex virili semine, sed mystico spiramine verbum Dei factum est caro: unde in signum humilitatis voluit se offerri, ut doceret per humilitatis meritum, nos dignos fieri divino conspectui. Job 18: « Omne pretiosum vidit oculus meus. » Glossa: « idest animam de se abjectam sapientiae suae  
« et gratiae illustratione respexit: quia tanto quis  
« ante oculos Dei pretiosior, quanto ante oculos sui  
« fuerit despectior. » 1 Reg. 15: « Nonne eum par-  
« vulus esses in oculis tuis etc. » Tertium designatur per hoc quod in Jerusalem oblatus fuit, quae interpretatur pacifica, sive visio pacis. Ad Hebr. 12: « Pacem sequimini in omnibus, et sanctimoniam,  
« sine qua Deum nemo videbit. » Augustinus: « Est autem pax serenitas mentis, tranquillitas animi, simplicitas cordis, amoris vinculum, consortium caritatis: nec poterit ad hereditatem  
« Domini pervenire, qui testimonium pacis noluerit  
« observare: nec potest concordiam habere eum  
« Christo, qui discors voluerit esse cum christiano. » Isa. ult.: « Erit Sabbatum ex Sabbato: » Glossa, « Quia ille quiescet in futuro, qui hic quiescit ab opere malo. » Quartum designatur per hoc quod est oblatus eum muneribus, Exod. 25: « Non apparebis in conspectu meo vacuus, » Glossa « bonis operibus. » Gregorius: « Non erit vacua  
« manus a munere, si area cordis repleta fuerit  
« bona voluntate. »

Notandum vero quod praeceptum fuit filiis Israel tribus vicibus per singulos annos festa celebrare: scilicet Pascha, Pentecosten et Scenopogiam: et ter in anno apparere coram Domino: quod mysterio non vacat: unde Glossa: « Tri-

S. Th. Opera omnia. V. 17.

« bus vicibus per singulos annos, hoc est omni  
« tempore praesentis vitae, in sanctae Trinitatis  
« confessione per fidem, spem et caritatem bono-  
« rum operum, obsequia Deo creatori vestro exhibe-  
« bitis. » Pascha enim celebramus mense novorum, cum per sanguinem agni immaculati ab Aegyptia servitute liberati per spirituales aquas de veteri homine in novum transimus non in vetustate litterae, sed in novitate spiritus, quo in terram promissionis per gratiam Christi pervenimus. Solemnitatem vero mensis primitivorum celebramus, cum operum nostrorum voluntatem et sermonum primitias Domino consecramus. Solemnitatem vero in exitu anni celebramus, quando congregatis frugibus, idest virtutum fructibus, ad finem vitae et introitum regni caelestis pervenire contendimus in tabernaculis septem diebus commorantes, quia per omne tempus vitae praesentis peregrinos nos esse cognoscimus, nec hic sed in futuro requirimus sedulo curantes, ne in conspectu Domini vacui appareamus.

## ARTICULUS IX.

### De baptismo Christi.

Septimo videndum est de Christi baptismo, de quo dicitur Matth. 3: « Venit Jesus a Galilaea in Jordanem  
« ad Joannem ut baptizaretur ab eo. » Ubi tria per ordinem describuntur: videlicet persona, loca et officium. Unde dicit Remigius: « Personae ponuntur eum dicitur, Venit Jesus ad Joannem,  
« dominus ad servum, rex ad militem, lux ad lucernam: loca designantur, eum dicitur, A Galilaea:  
« Galilaea enim interpretatur transmigratio. » Quicumque ergo vult baptizari, transmigret a vitiis ad virtutes, et veniens ad baptismum se humiliet. Jordanis interpretatur descensus. Augustinus: « Multa  
« mirabilia in hoc flumine esse facta Scriptura sacra commemorat: » unde Psalm. 115, dicit: « Jordani conversus est retrorsum. » Ante quidem retrorsum aquae conversae fuerant; modo peccata retrorsum conversa sunt. Sicut enim Elias in Jordane fecit divisionem aquarum, ita Christus in eodem Jordane fecit separationem, et operatus est peccatorum remissionem. Remigius: « Officium designatur eum dicitur, Ut baptizaretur ab eo, » ut dicit Chrysostomus. Non ut ipse reciperet peccatorum remissionem per baptismum; sed ut sanctificatas relinqueret aquas postmodum baptizandis. Secundo, ut idem dicit: « Nam quamvis ipse non  
« erat peccator, naturam tamen accepit peccatricem,  
« propterea et si per se baptismate non egebat,  
« tamen in aliis carnalis natura opus habebat. » Tertio, ut dicit Augustinus, « quia voluit facere,  
« quod omnibus facere imperabat; ut bonus magister doctrinam suam non tam verbis insinua-  
« ret, quam actibus exereret; » et hoc est quod dicit Matth. 4: « Sic nos decet adimplere omnem  
« justitiam: » unde dicebat Ambrosius: « Haec est  
« justitia, ut quod jubes alterum facere, ipse prius  
« incipias, ut tuo alios horteris exemplo. »

Sunt autem tria consideranda circa baptismum Christi divinitas ostensa: videlicet caelorum apertio, Spiritus sancti apparitio, paternae vocis insinuatio. Primum ibi, « Ecce aperti sunt caeli. » Hieronymus: « Non reseratione elementorum, sed spiritualibus  
« oculis, » sicut et Ezechias in principio sui voluminis, caelos apertos commemorat: et hoc probat

*De jejunio Christi.*

Chrysostomus super Matth. dicens, quod « si ipsa  
 « creatura, » scilicet caelorum « rupta fuisset, non  
 « dixisset: aperti sunt ei caeli: quia quod corporali-  
 « ter aperitur, omnibus apertum est. » Secundum ibi,  
 « Et vidit spiritum Dei etc.: » ubi dicit Augusti-  
 nus: « Sicut non oportebat ut Filius Dei homines  
 « falleret, sic etiam non oportebat ut falleret Spi-  
 « ritus sanctus; sed omnipotenti Deo, qui univer-  
 « sam creaturam fabricavit ex nihilo, non erat dif-  
 « ficile verum corpus columbae sine aliarum co-  
 « lunbarum mysterio figurare, sicut non fuit ei  
 « difficile verum corpus in utero Virginis Mariae  
 « sine virili semine fabricare. » Ex his patet hanc  
 columbam verum animal fuisse, quae tamen non  
 in unitate personae Spiritus sancti assumpta fuit,  
 et quae postmodum esse desiit: sicut flamma  
 quae apparuit in rubo, ut dicit Augustinus. Ideo  
 autem Spiritus sanctus speciem columbae accepit,  
 ut dicit Chrysostomus, « Quoniam prae  
 « aliis animalibus cultrix est caritatis. » Omnes au-  
 tem species justitiae quas habent servi Dei in veri-  
 tate, possunt habere filii diaboli in simulatione; so-  
 lam autem caritatem Spiritus sancti non potest  
 immundus spiritus imitari: ideo hanc privatam  
 speciem columbae sibi servavit Spiritus sanctus:  
 quia per nullius testimonium sic cognoscitur ubi  
 est Spiritus sanctus, sicut per gratiam caritatis.  
 Tertium ibi, « Ille est Filius meus dilectus etc. »  
 Augustinus: « Non autem ut ante per Moysen et  
 « Prophetas, nec per typos aut figuras venturum  
 « in carne Pater Filium docuit, sed palam venisse  
 « monstravit dicens: Ille est Filius meus dilectus etc. »

Notandum vero quod Pater non demonstratur in  
 voce nisi sicut auctor vocis, vel loquens per vocem.  
 Et quia Patri proprium est producere Verbum, quod  
 est dicere vel loqui; ideo convenientissime Pater  
 per vocem manifestatus est, quia significat verbum;  
 unde et ipsa vox a Patre emissa filiationem Verbi  
 protestatur. Et sicut species columbae, in qua de-  
 monstratus est Spiritus sanctus, non est natura  
 Spiritus sancti; nec species hominis, in qua demon-  
 stratus est Filius, est natura Dei; ita etiam et ipsa  
 vox non pertinet ad naturam Verbi, vel Patris lo-  
 quentis: unde Job 3, Dominus dicit: « Neque vocem  
 « ejus unquam audistis, neque speciem ejus vidi-  
 « stis. » Mystice per haec tria significatur, quod  
 omnibus per baptismum renatis caelum aperitur,  
 gratia Spiritus sancti infunditur, et in filios Dei  
 adoptantur. De primo dicit Remigius: « ideo dici-  
 « tur, aperti sunt ei caeli, quia omnibus renatis  
 « aperitur janua regni caelestis. »

Notandum autem quod per passionem Christi cae-  
 lum aperitur sicut per causam communem aperitionis  
 caelorum. Oportet tamen hanc causam singulis applicari  
 ad hoc ut caelum introeant: quod quidem fit per ba-  
 ptismum: et ideo potius fit mentio de aperitione cae-  
 lorum in baptismo, quam in passione. De secundo i-  
 dem dicit Remigius: « Sicut omnibus per baptismum  
 « renatis janua regni caelestis aperitur, ita omnes  
 « in baptismo donum Spiritus sancti accipiunt. »  
 De tertio dicit Hilarius: « Ex his quae consumma-  
 « bantur in Christo cognoscimus post aquae lava-  
 « crum de caelestibus portis Spiritum sanctum in  
 « nos advolare, et caelestis nos gratiae unctione  
 « perfundi, et paternae vocis adoptione filios Dei  
 « fieri. »

Octavo videamus de jejunio Christi; de quo di-  
 citur Matth. 4: « Et cum jejunasset quadraginta  
 « diebus et quadraginta noctibus, postea esuriit. »  
 Notandum vero, quod Christi jejunium fuit salutare  
 et exemplare. Salutare quidem, quia pro nobis je-  
 junavit, ut nos epulis aeternis satiaremur. Ubi no-  
 tandum, quod jejunium assumitur principaliter ad  
 tria. Primo quidem ad carnis concupiscentias com-  
 primendas: unde Hieronymus: « Sine Cerere et Bac-  
 « cho, Venus frigescit, » idest per abstinentiam  
 cibi et potus luxuria tepescit. Secundo, ut mens  
 hominis elevetur ad superna: unde dicitur Dan. 10,  
 quod post jejunium trium hebdomadarum revela-  
 tionem accepit a Deo Tertio ad satisfaciendum pro  
 peccatis; unde Joelis 2: « Convertimini ad me in toto  
 « corde vestro, in jejunio etc. » Bernardus: « Bo-  
 « num et salutare jejunium, quo redimuntur ae-  
 « terna supplicia, dimittuntur peccata: non so-  
 « lum autem obtinet veniam, sed et meretur gra-  
 « tiam: non solum delet peccata praeterita quae  
 « commisimus, sed et repellit futura quae commit-  
 « tere poteramus. » Christus vero primo modo  
 non jejunavit, quia contradictiones in semetipso non  
 tolerabat, ut dicit Gregorius: nec etiam secundo mo-  
 do, quia non indiguit per jejunium elevari, quia  
 fuit verus comprehensor; sed tertio modo jejunavit,  
 ut pro peccato satisfaceret: non quidem pro suo,  
 quia peccatum non fecit, ut dicitur 1 Petr. 2, sed  
 pro nostro: unde et esuries post jejunium significat  
 desiderium nostrae salutis, ut dicit Glossa super  
 Matth. Fuit etiam jejunium Christi exemplare:  
 unde Chrysostomus: « Ut autem discas quam bo-  
 « num, quam magnum est jejunium, et qualiter  
 « est scutum adversus diabolum, et quoniam modo  
 « post baptismum non lasciviae, sed jejunio inten-  
 « dere oportet, ipse jejunavit non eo indigens, sed  
 « nos instruens. » Bernardus: « Denique tanto de-  
 « votius imitandum est nobis Christi jejunantis  
 « exemplum, quanto certius est eum propter nos  
 « jejunasse, non propter seipsum. » Debemus au-  
 tem hoc exemplum imitari secundum possibilitatem  
 nostram: unde Gregorius Nazianzenus dicit: « Qua-  
 « draginta diebus Christus jejunavit nihil mandu-  
 « cans: erat enim Deus: nos autem jejunium pos-  
 « sibilitati nostrae proportionemus. » Sciendum  
 vero est, quod per jejunium sic vitia carnis sunt  
 refracnanda, quod tamen naturae necessitas non  
 subtrahatur. Ad cujus evidentiam est sciendum,  
 quod necessarium in rebus accipitur dupliciter.  
 Primo modo ad conservationem vitae; et tale ne-  
 cessarium per jejunium subtrahere non licet, sicut  
 nec interimere seipsum: sed hoc necessarium est  
 valde modicum, quia modico natura contenta est.  
 Alio modo dicitur necessarium ad conservandam  
 valetudinem corporis; quae quidem accipitur in du-  
 plici statu. Primo secundum sufficientiam habito  
 respectu ad ea quae incumbunt ex officio, ex so-  
 cietate eorum cum quibus vivitur, ad quae convin-  
 citur necessario agenda: et tale necessarium etiam  
 subtrahi non debet: hoc enim esset de rapina ho-  
 stiam offerre jejunii, si aliquis impediretur propter  
 jejunium ab aliquibus operibus ad quae obligatur:  
 unde Hieronymus dicit: « Qui de rapina holocau-  
 « stum offert, vel qui ciborum egestate, vel man-

« ducandi vel somni penuria immoderate corpus  
 « affligit, si etiam sit tanta abstinencia, quod homo  
 « ab operibus utilioribus impediatur, quamvis ad  
 « ea non ex necessitate teneatur, indirectum est je-  
 « junium, etsi non sit illicitum. » Idem: « Ratio-  
 « nalis homo dignitatem amittit, qui jejunium  
 « caritati vel vigiliis sensus integritati praefert. »  
 Secundo modo accipitur valetudo corporis secundum  
 optimam corporis dispositionem. Et quia caro in  
 suo robore consistens difficilius spiritui subditur;  
 ideo ad necessariam valetudinem sic acceptam, et-  
 tiam si licite accipi potest, tamen laudabiliter sub-  
 trahi potest; et talis subtractio non multum mortem  
 accelerat, cum corpus humanum inveniatur frequen-  
 tius ex superfluitate quam ex defectu mortales in-  
 currere acgritudines: unde Galenus dicit, quod  
 « summa medicina est abstinencia. »

Notandum tamen super illud Matth. 9: « Non pos-  
 « sunt filii sponsi quamdiu cum eis est sponsus, jeju-  
 « nare, » quod « jejunium duplex est, » ut dicit Au-  
 gustinus: « scilicet jejunium luctus, quod cum amari-  
 « tudine peccatorum et praesentis vitae miseria geri-  
 « tur; aliud est jejunium exultationis, quod cum spiri-  
 « tuali jucunditate a carnalibus vitiis et desideriis  
 « se abstrahit, quia gustato spiritu, desipit omnis  
 « caro. » In istis ergo semper habitu sponsus prae-  
 sens est, sed non semper actu: immo quandoque  
 eis praesens est ut iudex, cum sua peccata recogit-  
 ant vel quae fecerunt, vel in quae cadere possunt,  
 nisi carnem cohibeant: et tunc competit eis jeju-  
 nium moeroris. Aliquando est eis praesens actu, ut  
 sponsus, quando ejus dulcedine perfunduntur: et  
 tunc competit eis jejunium exultationis, non moe-  
 roris.

## ARTICULUS XI.

### *De Christi tentatione.*

Nono videamus de Christi tentatione, et quare  
 tentari voluit: de qua dicitur Matth. 4: « Ductus  
 « est in desertum a spiritu Jesus ut tentaretur a  
 « diabolo, » ut dicit Gregorius. « Tribus modis  
 « agitur tentatio: suggestionem, delectationem, consen-  
 « su. Et nos cum tentamur, plerumque in delecta-  
 « tionem, aut etiam in consensum labimur: quia  
 « de carnis peccato propagati in nobismetipsis ge-  
 « rimus unde certamina toleramus. Deus vero  
 « qui in utero Virginis incarnatus venit in hunc  
 « mundum sine peccato, nihil contradictionis in se-  
 « metipso tolerabat. Tentari ergo potuit per sugge-  
 « stionem, sed mentem ejus peccati delectatio non  
 « momordit: atque ideo omnis diabolica tentatio  
 « foris, non intus fuit. »

Notandum vero quod Christus tentari voluit primo  
 quidem, ut nobis contra tentationes exempla ferret.  
 Gregorius: « Non est indignum Redemptori quod voluit  
 « tentari qui venerat occidi, ut tentationes nostras  
 « suis tentationibus vinceret, sicut mortem nostram  
 « sua morte venerat superare: » omnia enim quae  
 Christus in mysterio assumptae humanitatis vel  
 fecit vel sustinuit, nobis salutaria fuerunt: per ejus  
 enim tentationem, et alia quae sustinuit, roboramur.  
 Ad Hebr. 12: « Recogitate Dominum Jesum qua-  
 « lem sustinuit adversus semetipsum contradictio-  
 « nem, ut non fatigemini animis vestris deficientes. »  
 Maximus: « Si nolumus a diabolo superari, inhae-  
 « reamus ei qui contra diabolum triumphavit. Magna  
 « ergo consolatio membris ex capite. » Bernardus:

« In creatione, in redemptione, caeterisque omnibus  
 « beneficiis est Deus omnium; sed in tentationibus  
 « suis tanquam proprium aliquid habent cum  
 « singuli electorum. Sic enim paratus est cadentem  
 « suscipere et eripere fugientem, ut videri possit  
 « relictis omnibus ei soli operam dare. Propterea  
 « expedit omni animae Deum semper intendere  
 « tanquam proprium, non tantum auditorem, sed  
 « etiam inspectorem. Unde legitur de beato Anto-  
 « nio, quod cum semel a daemonibus in varias  
 « formas mutatis laceratus fuisset, subito quidam  
 « radius lucis daemones effugavit, statimque sana-  
 « tus, et Christum praesentem intelligens, dixit: Ubi  
 « eras bone Jesu? et vox ad eum: Antoni, hic e-  
 « ram, sed expectabam certamen tuum. » Secundo  
 tentari voluit propter nostram cautelam, ut nullus  
 quantumcumque sanctus, a diaboli tentatione secu-  
 rus sit. Joan. 15: « Non est servus major suo  
 « Domino. » Leo Papa: « Nemo de cordis sui pu-  
 « ritate confidat, cum ille pervigil hostis acrioribus  
 « pulset insidiis, quos maxime viderit abstinere a  
 « peccatis. A quo enim dolos suos timeat abstrahere,  
 « qui ipsum Dominum majestatis ausus est tentare? »  
 Unde post baptismum Christum tentavit, quia, ut  
 dicit Hilarius super Matth., « In sanctificatis maxime  
 « tentamenta diaboli grassantur, quia victoria ma-  
 « gis est ei exoptanda a sanctis. » Eecl. 2: « Fili-  
 « accedens ad servitum Dei, sta in timore. » Ter-  
 tio propter exemplum, ut dicit Augustinus, quod  
 Christus se diabolo tentandum praebuit, ut ad su-  
 perandas tentationes ejus mediator esset non solum  
 per adjutorium, verum etiam per exemplum. Dedit  
 autem nobis exemplum non solum pugnae, sed  
 etiam coronae: unde super illud Matth. 4, « Acces-  
 « serunt Angeli et ministrabant ei, » dicit Glossa:  
 « Sicut in hoc agone militia nostra pie instruitur,  
 « ita in obsequio Angelorum gloriosa remuneratio  
 « edocetur. » Unde etiam Bernardus: « Ipse Do-  
 « minus hortatur ut pugnemus, adjuvat ut vince-  
 « mus, certantes expectat, deficientes sublevat, vin-  
 « centes coronat. » Sequitur de modo et ordine ten-  
 tandi: « Et accedens tentator dicit ei: Si filius Dei  
 « es, dic ut lapides isti panes fiant. » Ubi dicit  
 Gregorius: « Antiquus hostis primum hominem gulae  
 « vitio tentavit, cum ligni cibum veritum ostendit,  
 « atque ad comedendum suasit. Vana gloria, cum  
 « diceret, Eritis sicut dii. Avaritia, cum diceret,  
 « Scientes bonum et malum. » Avaritia enim non  
 solum pecuniae est, sed etiam altitudinis, cum su-  
 pra modum sublimitas ambitur. Eisdem modis se-  
 cundum hominem tentavit: primo per gulam; unde  
 dixit: « Si filius Dei es etc. » Hilarius: « Eam con-  
 « ditionem in tentando proposuit, per quam in Deo  
 « ex mutatione lapidis in panes virtutem potestatis  
 « agnoscat, et in homine oblectando cibi patientiam  
 « esurientis illudat. » Huic autem tentationi sic  
 resistit dicens: « Scriptum est, Non in solo pane  
 « vivit homo, sed in omni verbo quod procedit  
 « de ore Dei; » ubi dicit Glossa: « Inferior pars  
 « hominis pane sustentatur, altior vero verbo Dei  
 « reficitur. Quia vero agis de inferiori parte, patet  
 « quod tentator sis. » Secundo tentavit eam per  
 vanam gloriam, ut dicitur Matth. 4: unde sequitur:  
 « Tunc assumpsit eum diabolus etc. » Et postea  
 sequitur, « Si filius Dei es, mitte te deorsum etc. »  
 Haec tentatio fuit vanae gloriae secundum Glossam:  
 cui sic resistit, « Non tentabis Dominum Deum tuum. »  
 Ubi dicit Glossa: « Non debet tentare Deum, quando



« habet ex humana ratione quid faciat. Sed postquam deficit humana ratio, commendet se Deo, non tentando, sed devote confitendo. » Nota etiam, quod hic dicit Glossa omnia haec corporali-  
bus sensibus esse completa: quia enim verba invicem conferuntur, in specie hominis diabolus superasse verisimile est. Tertio tentavit eum de avaritia: unde sequitur, « Assumpsit eum in montem excelsum, et ostendit ei omnia regna mundi, » Glossa, idest omnia concupiscibilia in mundo, in quo homines regnant: vel simpliciter totus mundus eo suggerente ab eo visus est: et dixit: « Haec omnia tibi dabo, si proci-  
dens adoraveris me », quia avaritia idolorum servitus, sicut dicitur ad Ephes. 5. Huic autem tentationi sic resistit, « Vade Satanas. » Cur indignanter sic respondit? Quia dicit Chrysostomus, quod « in propriis injuriis quempiam esse patientem laudabile est: Dei autem injurias simulare, nimis impium est. »

Notandum vero quid mystice Christi tentatio significet: unde Chrysostomus sic dicit: « Jejunium est abstinentia rei malae: esuries desiderium ejus, usus ejus est panis. Qui ergo sibi peccatum convertit in usum, lapidem convertit in panem. Respondeat ergo diabolo persuadenti, quia non in solo pane, idest usu illius rei, vivit homo, sed in observantia mandatorum Dei. Cum ergo quis inflatus fuerit quasi sanctus, ductus est quasi supra templum; et quando aestimaverit consistere in sanctimonii summitate, positus est super pinnam templi: et haec tentatio sequitur primum, quoniam victoria tentationis gloriam operatur, et fit causa jaectantiae. Sed Christus ultro jejunium suscepit. Super templum autem eum diabolus duxit, ut tu ad abstinentiam laudabilem sponte procedas, extolli autem ad fastigium sanctitatis non acquiescas. Fuge exaltationem cordis, et non patieris ruinam. Ascensio autem montis est processio ad altitudinem divitiarum. et gloriam hujus mundi, quae de superbis cordibus descendit. Cum ergo volueris dives fieri, quod ostendens incipis cogitare de divitiis et honoribus acquirendis, et tunc princeps mundi gloriam ostendit regni sui. Tertio loco praevidet tibi causas, ut si volueris illa consequi, servias ei, et negligas justitiam. »

## ARTICULUS XII.

*De triplici tentatione: scilicet Dei, hominis et Diaboli.*

Glossa super Psalm. 2, dicit, quod tentat Dominus, tentat homo, tentat diabolus; sed aliter Dominus, aliter homo, aliter diabolus. Tentat Dominus ut erudiat; homo ut diseat quod nescit; diabolus ut seducat. De tentatione Dei dicitur ibidem in Psal. 25: « Proba me, Domine, et tenta me. » Glossa: « Judica me probatum non tibi, quia omnia probasti: sed mihi et hominibus, ne quid delicti maneat. » Tentatio ergo Dei probatio est, sicut tentavit Deus Abraham Gen. 25. Quod autem dicit Matth. 6: « Ne nos inducas in tentationem, » intelligendum est, ne nos permittas vinei a tentatione. Glossa: « In tentationem ducitur, qui in tentatione frangitur. Non ergo precatur ut non tentetur; quia tentatio necessaria est ad coronam; tamquam si cuiquam necesse est igne probari, non precatur ut non contingatur, sed ut non

« exuratur, » ut dicit Glossa. Augustinus: « De tentationibus hominis sciendum est, quod tentare est experimentum sumere de eo qui tentatur, sicut Samson proposuit problema Philistaeis ad tentandum eos. » Judic. 4: « Si quis autem hominum explorat voluntatem, prudentiam et potestatem Dei, hoc est tentare Deum, quod prohibum est: » Deut. 6: « Non tentabis Dominum Deum tuum; » ubi dicit Glossa: « Deum tentat, qui habet quid faciat, ac sine ratione se committit periculo, experiri volens utrum possit liberari a Deo. Quando vero propter necessitatem vel utilitatem committit se aliquis divino auxilio, et suis petitionibus et factis, hoc non est tentare Deum: » dicitur enim 2 Paral. 2: « Cum ignoramus quid agere debeamus, hoc solum habemus residui, ut oculos nostros ad te dirigamus. » Ad evidentiam autem illius quod dicitur in Psal. 55, « Gustate, et videte quoniam suavis est Dominus, » et illius quod dicitur Rom. 12: « Ut probetis quae sit voluntas Dei bona, beneplacens et perfecta. » Sciendum quod duplex est cognitio divinae voluntatis seu bonitatis: una quidem est speculativa; et quantum ad hanc non licet dubitare, nec probare utrum voluntas bona sit, vel utrum Deus sit suavis; alia autem est divinae bonitatis seu voluntatis cognitio affectiva, seu experimentalis, dum quis experitur in seipsum gustum divinae dulcedinis, et complacentiam divinae voluntatis, sicut de Hierotheo dicit Dionysius 2 cap. de div. Nom., quod didicit divina ex compassione ad ipsa, et hoc movet, ut probemus Dei voluntatem, et gustus ejus suavitatem.

Notandum etiam, quod dupliciter petit aliquis signum a Deo. Uno modo ad explorandum divinam potestatem aut veritatem dicti ejus: et hoc de se pertinet ad Dei tentationem. Alio modo ut instruat quid sit circa aliquid faciendum, aut quod factum beneplacitum est Deo; et hoc nullo modo pertinet ad Dei tentationem. De tentatione autem diaboli supra dictum est. Hujusmodi autem diabolicae tentationis rationes, videlicet quare permittit Deus hominem tentari, tangit Chrysostomus dicens: « Quisquis post baptismum majores sustinet tentationes, non turberis: etenim propter hoc accipisti arma, non ut vaces, sed ut praelieris: ideo autem a te tentationes non prohibet Deus. » Primo quidem ut diseas quomodo fortior factus es. Secundo ut ex magnitudine donorum non extollaris. Tertio ut diabolus cognoscat, quod perfecte ab eo absecessisti. Quarto ut per hoc fortior reddaris. Quinto, ut crediti tibi thesauri signum accipias: neque enim diabolus superveniret tibi ad tentandum, nisi te in majori effectu videret.

## ARTICULUS XIII.

*De Christi conversatione.*

Decimo videamus de Christi conversatione, de qua dicitur Baruch 5: « Post haec in terris visus est, et eum hominibus conversatus. » Notandum, quod Christi conversatio fuit perfectissimum exemplar nostrae conversationis: unde in persona ejus dicitur Joan. 14: « Ego sum via, veritas et vita. » Revera ipse est illa regia via, de qua dicitur Num. 21: « Via regia gradiemur: » et dicit quaedam Glossa super, « Qui habitat » quod via regia est via



Christi regis nostri, qui sic viam mundi cucurrit, ut nec prosperis alliceretur, nec adversis frangeretur, quem etiam nos imitari debemus. Beda: « Se-  
« quamur iter humanae conversationis ejus, si di-  
« vinitatis gloriam volumus intueri, et habitare in  
« domo ejus aeterna omnibus diebus vitae nostrae. »

Notandum vero, quod Christus conversatus fuit secundum legem: primo quidem, ut veterem approbaret: secundo, ut eam in seipso observando consummaret: tertio, ut Judaeis occasionem calumniandi subtraheret: quarto, ut homines a servitute legis liberaret, secundum illud Galat. 4: « Misit Deus  
« Filium suum natum ex muliere, factum sub lege,  
« ut eos qui sub lege erant redimeret. » A transgressione autem legis tripliciter se excusat. Primo quidem modo, quia per praeceptum quidem de sanctificatione Sabbati non interdicitur opus divinum, sed humanum: quamvis Deus in die septima cessaverit a novis creaturis condendis, semper tamen operatur in rerum gubernatione et conservatione. Quod autem Christus miracula faciebat, erat operis divini, ut ipse dicit Joan. 5: « Pater meus usque modo  
« operatur, et ego operor. » Secundo excusat per hoc quod illo praecepto non prohibentur opera de necessitate salutis corporalis: unde ipse dicit Luc. 7:  
« Nonne unusquisque vestrum solvit bovem aut  
« asinum, et ducit adquare? » Et infra 14:  
« Cujus vestrum bos aut asinus in puteum cadit,  
« et non continuo extrahit illum in die Sabbati? » Manifestum est autem, quod opera miraculorum quae Christus faciebat, ad salutem corporis et animae pertinebant. Tertio, quia illo praecepto non prohibentur pertinentia ad Dei cultum: unde dicitur Matth. 12: « An non legistis in lege, quod Sabba-  
« tum sancti violant, et sine crimine sunt? » et Joan. 7, dicitur: « Si circumcisionem homo accipit  
« in Sabbato, ut non solvatur lex Moysi; cur mihi  
« indignamini, quia totum hominem salvum feci  
« in Sabbato? » Quod autem mandavit paralytico in Sabbato lectum suum portare, ad cultum Dei pertinebat, idest ad laudem divinae virtutis.

Notandum quod Christus habuit refugia, ut dicit Remigius, navim, montem et desertum, ad quorum alterum quotiescumque a turbis premebatur, descendebat: et hoc legitur ipsum fecisse propter tria. Quandoque propter corporalem quietem; unde Matth. 6, dicitur quod Dominus discipulis dixit: « Venite  
« seorsum in desertum locum, et quiescite pusillum:  
« erant enim qui veniebant et redibant multi, et  
« nec spatium manducandi habebant. » Quandoque vero causa orationis; unde Luc. 6: « Factum est  
« in illis diebus, exiit orare in montem, et erat  
« pernoctans in oratione: » ubi dicit Ambrosius, quod « ad praecepta virtutum suo nos informat  
« exemplo. » Quandoque ut doceat favorem vitare: unde super illud Matth. 5: « Videns Jesus turbas  
« ascendit in montem, » dicit Chrysostomus, quod  
« per hoc quod non in civitate et foro sed in  
« monte et solitudine sedit, erudivit nos nihil ad  
« ostentationem facere, a tumultibus abscondere, et  
« maxime cum de necessariis disputare oportet. »

#### ARTICULUS XIV.

##### *De doctrina Christi.*

Undecimo videamus de doctrina Christi, de qua dicitur Matth. 22: « Magister, scimus quia verax

« es, et viam Dei in veritate doces. » Sciendum vero quod Christus veritatem doctrinae confirmavit, tum vitae sanctitate, tum miraculorum sublimitate: vitae sanctitate, quia coepit facere et docere, ut dicitur Act. 1: miraculorum sublimitate: Joan. 4:  
« Si mihi non vultis credere, operibus credite. »

Notandum insuper, quod Christus multa docuit in parabolis, ut dicitur Matth. 13. Quod quidem conveniens fuit, tum quia connaturale est homini ut per sensibilia deveniat in cognitionem intelligibilem, ut dicit Dionysius 1 cael. Hier., « nam impossibile  
« est nobis aliter lucere divinum radium, nisi varietate  
« sacrorum velaminum anagogiae circumvelatum, » idest inclusum diversis figuris scripturae ipsum repraesentantibus; tum etiam propter simplicitatem quorundam audientium, ut qui caelestia capere non poterant, per similitudinem terrenam audita percipere potuissent, ut dicit Glossa Matth. 4. Et subditur (1) ibi, in Glossa, quod parabola graece, similitudo dicitur latine, quando quid intelligi volumus per quasdam comparationes indicamus: ut ferreum dicitur ad aliquod durum, et rem velocem ventis comparamus: est enim « parabola, » ut dicit Hieronymus, « rerum natura discrepantium sub ali-  
« qua similitudine facta comparatio. » Tum etiam ut indignis divina mysteria occultarentur: unde Luc. 5: « Vobis datum esse nosse mysterium regni  
« Dei, » Glossa « secreta scripturarum: » et infra: « Ceteris autem in parabolis, ut videntes non vi-  
« deant: » Matth. 7: « Nolite sanctum dare canibus,  
« neque mittite margaritas vestras ante porcos: » Glossa: « Eadem res dicitur sanctum et margarita, » idest « evangelium et ecclesiastica Sacramenta:  
« sanctum, quia inviolabile nec debet ab aliquo  
« corrumpi: margarita, quia in abscondito latet, et  
« de figuris quasi de apertis conchis eruitur. » Gemma est pretiosa quae non potest corrumpi: canes vero sunt quia oblatrant, et quod integrum est dilacerant: porci qui vilipendunt et conculcant.

Notandum vero, quod, sicut Dionysius, 2 cap. cael. Hier., dicit, « magis conveniens est quod di-  
« vina in scripturis tradantur sub metaphora rerum  
« corporalium vilium, quam nobilium: » et hoc propter tria. Primo, quia per hoc liberatur magis humanus sensus ab errore. Manifestum autem est quod haec non secundum proprietatem dicuntur de divinis: quod posset esse dubium, si sub figuris nobilissimorum corporalium describerentur divina, maxime apud illos qui nihil aliud corporibus nobilibus exegitare noverunt. Secundo, quia hic modus est convenientior cognitioni quam de Deo habemus in hac vita: magis enim manifestatur nobis de ipso quid non est, quam quid est: et ideo similitudines eorum quae magis elongantur a Deo, veriore nobis faciunt aestimationem de Deo quid sit supra illud quod de eo dicimus vel cogitamus. Tertio, quia per hujusmodi, divina magis indignis occultantur.

#### ARTICULUS XV.

##### *De Christi miraculis.*

Duodecimo videamus de Christi miraculis, de quibus dicitur Joan. 11: « Hic homo multa signa  
« facit. » Unde notandum quod miraculi nomen ab admiratione sumitur. Admiratio autem surgit cum effectus sunt manifesti et causa occulta: sicut

(1) *Id.* subauditur.

aliquis miratur dum videt eclipsim solis, et ignorat causam, ut dicitur 1 Metaph. Potest tamen causa alicujus apparentis effectus esse alicui nota, quae tamen aliis est incognita. Unde aliquid est mirum uni, quod non est mirum aliis; sicut eclipsim solis miratur rusticus, non autem astrologus. Miraculum autem dicitur quasi admiratione plenum, quod simpliciter est, omnibus causam occultat (1). Haec autem est Deus. Unde illa quae a Deo fiunt praeter causas nobis notas, miracula dicuntur. Describitur autem miraculum sic: Miraculum dicitur aliquid arduum et insolitum supra facultatem naturae et spem admirantis proveniens. Ad ejus evidentiam sciendum est, quod arduum dicitur miraculum non propter dignitatem rei in qua fit, sed quia excedit facultatem naturae. Similiter insolitum dicitur, non quia frequenter eveniat, sed quia est praeter naturalem consuetudinem. Supra autem facultatem naturae est aliquid tripliciter. Uno modo quantum ad substantiam facti: sicut quod duo corpora sint simul, et quod sol retrocedit: vel quod corpus humanum glorificetur, quod nullo modo natura facere potest: ista et similia tenent summum gradum in miraculis. Secundo modo est aliquid supra facultatem naturae non quantum ad id quod fit, sed quantum ad id in quo fit: sicut resurrectio mortuorum, illuminatio caecorum, et similia: potest natura causare vitam, sed non in mortuo, et potest praestare visum, sed non caeco; et haec secundum locum tenent in miraculis. Tertio est aliquid supra facultatem naturae quantum ad modum et ordinem faciendi; sicut cum aliquis subito divina virtute curatur a febre, absque solito et consueto cursu naturae in talibus: et cum aer condensatur in pluvias divina virtute absque naturalibus causis, sicut factum est ad preces Eliae et Samuelis: et hujusmodi tenent infimum locum in miraculis. Quodlibet autem istorum habet diversos gradus, secundum quod diversimode excedunt facultatem naturae. Supra spem etiam naturae miraculum esse dicitur, non supra spem gratiae quae ex fide est. Dicuntur autem miracula virtutes, in quantum excedunt facultatem naturae; signa vero in quantum manifestant aliquid supernaturale. Dicuntur autem portenta vel prodigia propter excellentiam, quasi procul aliquid ostendentia. Attribuitur autem operatio miraculorum fidei, secundum illud 1 Cor. 15: « Si habuero « fidem ut montes transferam: » et hoc propter duo. Primo, quia ordinatur ad fidei confirmationem. Secundo, quia procedit ex Dei potentia, cui fides innitur: et sicut praeter gratiam fidei necessaria est et gratia sermonis ad fidei instructionem, ita etiam opera miraculorum ad fidei confirmationem.

Notandum vero quod divinitus conceditur homini miracula facere. Primo quidem et principaliter ad confirmandum fidem et veritatem quam docet. Quia enim ea quae sunt fidei, humanam rationem excedunt; ideo non possunt per humanam rationem probari, sed oportet quod probentur per argumentum divinae virtutis. Secundo ad ostendendum praesentiam Dei in homine per gratiam Spiritus sancti. Ad Galat. 5: « Qui tribuit nobis spiritum, et operatur virtutes in nobis. » Utrumque autem circa Christum erat hominibus manifestandum: scilicet quod Deus esset in eo per gratiam non adoptionis, sed unionis; et quod ejus super-

(1) *Forte*, quod simpliciter est omnibus causa occulta.

naturalis doctrina esset a Deo: ideo convenientissimum fuit, ut miracula faceret; unde ipse dicit Joan. 5: « Si mihi non vultis credere, operibus « credite: » et ibi etiam: « Opera quae dedit mihi « Pater ut faciam, ipsa sunt quae testimonium « perhibent de me. » Facit autem Christus miracula divina virtute; unde ipse dicit Joan. 10: « Pater in me manens ipse facit opera. » Unde Leo Papa dicit, quod « in Christo sunt duae naturae: una earum est divina, quae fulget miraculis: et alia humana, quae succumbit injuriis: « et tamen una earum agit communicatione alterius, in quantum scilicet natura humana est « instrumentum divinae actionis, et actio humana « accipit virtutem a natura divina. » Blasphemiam vero Judaeorum dicentium in virtute daemonum eum daemonia ejicere, Luc. 2, reprobavit. Primo quidem per hoc quod Satanus contra se ipsum non dividitur. Secundo exemplo aliorum qui daemonia ejiciebant per spiritum Dei. Tertio, quia daemonium expellere non posset, nisi ipsum vicisset divina virtute. Quarto, quia nulla convenientia in operibus nec in effectu erat sibi et Satanus, cum Satanus dispergere cuperet quos Christus colligebat.

Notandum vero, quod miraculorum quaedam non sunt vera, sed phantastica facta, quibus ludificatur homo, ut videatur ei aliquid quod non est: quaedam sunt vera facta, sed non habent vere rationem miraculi, quia fiunt virtute aliquarum naturalium causarum: et haec duo possunt fieri per daemones; sed vera miracula non possunt fieri nisi virtute divina: operatur enim ea Deus ad utilitatem hominum: et hoc dupliciter. Uno quidem modo ad veritatis praedictae confirmationem: et secundum hunc modum possunt etiam mali miracula facere: unde super Matth. 12, « Nonne in « nomine tuo etc. » dicit Hieronymus: « Prophe- « tare et virtutes facere et daemonia ejicere interdum non ejus est meriti qui operatur; sed invocatio nominis Jesu Christi haec agit, ut « mines Deum honorent, ad ejus invocationem « fiunt tanta miracula. » Alio modo ad demonstrandam sanctitatem alicujus; et sic fiunt tantum a sanctis, vel in vita eorum, vel etiam post mortem, sive per eos, sive per alios. Legitur enim Act. 12, quod Dominus faciebat virtutes per manus Pauli, et etiam dum super languidos ferebantur ejus sudaria, recedebant ab eis languores; et sic nihil prohiberet per aliquem peccatorem miracula fieri, per aliquam invocationem alicujus sancti: quae tamen miracula ille non dicitur facere, sed ille ad ejus sanctitatem demonstrandam haec fierent.

## ARTICULUS XVI.

### *De Christi transfiguratione.*

Tertiodecimo videamus de Christi transfiguratione, de qua dicitur Matth. 17: « Et post sex « dies assumpsit Jesus Petrum, Jacobum et Joannem. » Ubi tria per ordinem possumus notare: scilicet luminosam claritatem Christi transfigurati: gloriosam apparitionem Eliae et Moysi, gaudiosam delectationem discipulorum Christi. Primum tangitur ibi, « Et resplenduit facies ejus sicut sol: » ubi dicit Hieronymus: « Qualis futurus est tempore « re judicii, talis Apostolis apparuit. » Ad ejus evidentiam sciendum est, quod claritas illa fuit cla-

ritas gloriae quantum ad essentiam, non tamen quantum ad modum essendi; « claritas enim corporis « gloriosi derivatur ab animae claritate, » sicut dicit Augustinus: et similiter claritas corporis Christi derivata est in transfiguratione a divinitate ejus, ut dicit Damascenus, et a gloria animae ipsius: aliter tamen quam in corpore glorificato: nam ad corpus glorificatum redundat claritas ab anima, sicut quaedam qualitas permanens; sed ad corpus Christi in transfiguratione derivata est claritas per modum ejusdem passionis transeuntis, sicut cum aer illuminatur a sole: et est simile quantum ad animam de visione quam vidit Paulus. Unde ille fulgor tunc in corpore Christi apparens, miraculosus fuit, sicut et illud quod super undas maris ambulavit. Unde non est dicendum, sicut Hugo de sancto Victore dicit, quod assumpsit dotes claritatis in transfiguratione, agilitatis ambulando super mare, subtilitatis egrediendo clauso virginis utero: quia dos nominat qualitatem immanentem corpori glorioso, sed miraculose habuit ea quae pertinent ad dotes.

Notandum, quod tria describuntur circa hanc transfigurationem: scilicet temporis opportunitas, discipulorum numerositas, et loci congruitas, id est quando facta est, quibus, et ubi: quod mysterio non vaet. Primum ibi, « Et post sex « dies: » ubi dicit Origenes: « Mystice cum aliquis « ascenderit sex dies, id est omnes mundi res sex « diebus factas, potest gloriam verbum Dei aspi- « cere, et Jesum transfiguratum ante oculos cordis « sui videre. Diversas enim habet verbum Dei « formas apparentes unicuique secundum quod « videnti expedire cognoverit: et nemini super « quod capit, seipsum ostendit. » Secundum ibi, « Assumpsit Petrum, Jacobum et Joannem. » Per quod datur intelligi, quod dicit Rabanus, quod qui nunc fidem sanctae Trinitatis incorruptam servant, tunc aeterna ejus visione lactantur. Tertium ibi, « Et duxit illos in montem excelsum seorsum: » in quo docet, ut dicit Remigius, quod « necesse « est omnibus qui Deum contemplari desiderant, « ut non in infimis voluptatibus jaceant, sed « amore supernorum semper ad caelestia se eri- « gant; et ut ostendat discipulis quatenus gloriam « divinae claritatis non in hujus saeculi profundo « quaerant, sed in caelestis beatitudinis regno. » Ducimur autem seorsum, quia sancti viri toto animo et fidei intentione separati sunt a malis, funditus autem separabuntur in futuro. Secundum principale membrum tangitur ibi, « Et apparue- « runt illis Moyses et Elias loquentes cum eo: » ubi dicit Hieronymus: « Considerandum est, quod « Scribis et Pharisaeis signum de caelo petentibus « dare noluit: his vero ut Apostolorum augeat fi- « dem, dat signum de caelo, Elia inde descen- « dente quo conscenderat (1), et Moyse ab inferis « resurgente. » Quod non est sic intelligendum, quod anima corpus suum assumpsit; sed quod anima ejus apparuit per aliquod corpus assumptum, sicut Angeli apparent. Elias autem apparuit in corpore proprio, non quidem de caelo empyreo allatus, sed de aliquo eminenti loco, in quo fuerat curru igneo raptus. Sunt autem plures rationes, quare Moyses et Elias ad medium adducuntur, ut dicit Chrysostomus. Prima est, quia dicebant turbae sum esse Eliam, vel Jeremiam, aut u-

(1) *Id.* conscenderat.

num ex Prophetis, capita Prophetarum secum ducit, ut saltem hinc appareat differentia servorum et Domini. Secunda est, quia Moyses legem dedit, Elias aemulator Domini fuit. Unde per hoc quod simul cum Christo apparuerunt, excluditur calumnia Judaeorum accusantium Christum tanquam transgressorem legis, et blasphemum, sibi gloriam Dei usurpantem. Tertia, ut ostendat se potestatem mortis et vitae habere, et esse judicem vivorum et mortuorum, Moysen jam mortuum, et Eliam adhuc viventem secum ducit. Quarta, quia voluit ut discipuli ejus imitarentur Moysi mansuetudinem, et zelum Eliae. Tertium ibi, « Domine, bonum est nos hic esse: » Glossa: « Si Petrus videns glorificatam humanitatem nun- « quam voluit ab ejus visione separari, quid pu- « tandum est de his qui divinitatem ejus videre « meruerunt? » Dicitur autem Matth. 9, quod non sciebat quid diceret stupore fragilitatis humanae. Unde Beda: « Sed in hoc sciebat, quod solum « bonum hominis est intrare in gaudium Domini « sui, » ut dicit Glossa Remigii: Erravit Petrus, qui voluit ut regnum electorum construeretur in terris, quod Dominus promisit dare in caelis: erravit etiam, quia oblitus est se et suos socios esse mortales, et absque gustu mortis voluit subire aeternam felicitatem; et in eo quod in caelesti conversatione tabernacula facienda putavit, in qua domus necessaria non erat, cum scriptum sit, « Tem- « plum non vidi in ea. »

## ARTICULUS XVII.

### *De coena Christi.*

Quartodecimo videamus de coena Christi, et institutione Dominici corporis et sanguinis Christi; de quibus dicitur Matth. 26: « Coenantibus illis, « accepit Jesus panem etc. » Notandum, quod convenienter hoc sacramentum institutum fuit in coena. Primo quidem ratione continentiae hujus sacramenti: continetur enim ipse Christus in Eucharistia sicut in sacramento; et ideo quando Christus in propria specie a discipulis discessurus erat, in sacramentali specie seipsum eis reliquit sicut in absentia imperatoris exhibetur ejus veneranda imago. Unde Eusebius dicit: « Quia corpus assumptum ablatu- « rus erat ab oculis corporalibus, et illaturus side- « ribus, necesse erat ut die coenae sacramentum « Corporis et Sanguinis sui consecraret nobis, ut « coleretur jugiter per mysterium quod semel offere- « batur in pretium. » Secundo, quia sine fide passionis nunquam potuit esse salus, secundum illud Rom. 5: « Quem posuit Deus propitiatorem per « fidem in Sanguine ejus. » Et ideo oportet omni tempore apud homines esse aliquod repraesentativum Dominicae passionis: ejus in veteri lege praecipuum erat agnus paschalis; unde dicit Apostolus 1 Cor. 5: « Pascha nostrum immolatus est « Christus. » Successit autem ei in novo testamento Eucharistiae sacramentum, quod est rememorativum praeteritae Dominicae passionis, sicut et illud fuit futurae praefigurativum; et ideo conveniens fuit imminente passione, celebrato priori sacramento, novum instituere. Tertio, quia ea quae ultimo dicuntur ab amicis recedentibus, magis memoriae commendantur; praesertim quia tunc magis inflammatur affectus ad amicos; ea vero



quae magis afficiunt, profundius animo imprimuntur. Quia igitur, ut beatus Alexander Papa dicit, nihil in sacrificiis potest esse majus quam corpus Christi et sanguis Christi, nec oblatio hac potior; ideo ut in majore veneratione haberetur, Dominus in ultimo discessu suo a discipulis hoc sacramentum instituit: et hoc est quod Augustinus dicit in cit. lib., serm. ad Januarium: « Salvator quo vehementius  
« commendaret illius mysterii altitudinem, ultimi-  
« mum hoc voluit insigere cordibus et memoriae  
« discipulorum, a quibus per passionem erat di-  
« scessurus. »

Notandum vero quod hoc sacramentum triplicem habet significationem: unam quidem respectu praeteriti, in quantum scilicet est commemorativum Dominicae passionis, quae fuit verum sacrificium; et secundum hoc nominatur sacrificium; aliam autem significationem habet respectu rei praesentis, scilicet ecclesiae unitatis, et ut homines per hoc sacramentum congregentur, et secundum hoc nominatur communio. Damascenus dicit 4 lib., quod « dicitur communio, quia communicamus  
« per ipsum Christo, et quia participamus ejus  
« carne et divinitate, et quia communicamur et  
« unimur ad invicem per ipsum. » Tertiam autem habet respectum futuri, in quantum praefigurativum fruitionis Dei, quae erit in patria; et secundum hoc dicitur viaticum, quia praebet nobis viam illuc perveniendi: et secundum hoc etiam dicitur Eucharistia, idest bona gratia, quia gratia Dei vita aeterna est, ut dicitur Rom. 6. Vel quia realiter continet Christum, qui est plenus gratia. Dicitur etiam in graceo metalipsis, idest assumptio, quia, ut dicit Damascenus, per hoc filii Dei divinitatem assumimus.

Notandum etiam quod ipse Christus sumpsit hoc sacramentum in coena, quod aliis sumendum tradidit, ut dicit Hieronymus, et habetur de consecratione, dist. 4: « Dominus Jesus ipse conviva et convivium, ipse  
« comedens et comeditur. » Unde etiam super illud Ruth 4: « Cumque comedisset et bibisset, » dicit Glossa, quod « Christus comedit et bibit in coena  
« corporis et sanguinis sui sacramentum, cum illud  
« discipulis suis tradidit. » Unde, quia ipsi communicaverunt, ipse participavit eisdem; unde quidam metricae dixit: « Rex sedet in coena cinctus turba  
« duodena. Se tenet in manibus, se cibat ipse  
« cibus. » Possumus autem distinguere triplicem coenam Christi: videlicet sacramentalem, spiritualem et aeternam. De prima dicitur Apocal. 19: « Beati  
« qui ad coenam nuptiarum agni sunt vocati. » Vere beati et in praesenti per gratiam, et in futuro per gloriam; unde super illud Sapient. 7: « Venerunt  
« mihi omnia bona pariter cum illa, » dicit Glossa: « Qui Christum corde suscipit vel percipit, noti-  
« tiam omnium hic pariter virtutum habet et gra-  
« tiam, et in futuro vitam aeternam. » Haec est coena, in qua lavit Christus pedes discipulorum suorum, idest affectus nostrae mentis a peccatis venialibus: quia in hoc sacramento fit transformatio hominis ad Christum per amorem. Et quia fervori amoris peccata venialia contrariantur, qui quidem fervor in hoc sacramento excitatur; ideo ex consequenti peccata venialia dimittuntur; unde Bernardus: « In sacramento altaris anima caelesti dulcedine  
« inebriatur, peccatum veniale deletur, homo in gratia  
« roboratur. » De secunda dicitur Apocal. 5: « Ego  
« sto ad ostium et pulso, » Glossa « cordi clauso. »  
« Si quis audierit vocem meam, et aperuerit januam

« mihi, ad eum intrabo, et coenabo eum illo, »  
Glossa: « Fide et opere ejus delectabor. » Haec coena mystice designata est Joan. 15, ubi dicitur, quod « ante sex dies Paschae venit Jesus in Betha-  
« niam, fecerunt autem ei coenam, et Martha mini-  
« stravit etc. » Unde Alewinus: « Mystice coena Do-  
« mini est fides ecclesiae, quae per dilectionem  
« operatur. » Martha ministrat eum fide, eum anima opera suae devotionis impendit. Lazarus unus erat ex discumbentibus, eum hi qui post peccatorum mortem resuscitati sunt ad justitiam, una cum eis qui in sua justitia permanserunt, de praesentia veritatis exultant, et caelestis gratiae muneribus aluntur. Et bene in Bethania, quae domus obedientiae interpretatur. De tertio Luc. 14, dicitur, « Homo  
« quidam fecit coenam magnam, » Glossa, « quia  
« satietatem nobis internae dulcedinis praeparavit. » Haec est coena, in qua Joannes, idest quilibet electus, in quo est gratia, recumbit a strepitu vitae praesentis; quia, ut dicit Bernardus, « ibi est re-  
« quies a laboribus, pax ab hostibus, amoenitas  
« de novitate, securitas de aeternitate, suavitas  
« atque dulcedo de Dei visione. »

## ARTICULUS XVIII.

### *De Christi passione.*

Quintodecimo videamus de Christi passione, de qua dicitur Matth. 20: « Ecce ascendimus Jeroso-  
« lymam et filius hominis tradetur principibus sa-  
« cerdotum etc. » Possumus autem sex notare circa passionem Christi: scilicet Christi patientis voluntatem, patiendi congruitatem, passionis acerbitatem, ignominiositatem, et utilitatem, ultimo persequentium caecitatem, et peccati gravitatem. De prima dicitur Isa. 25: « Oblatus est quia ipse vo-  
« luit. » Ad cujus evidentiam est sciendum, quod mors Christi fuit nostrae morti conformis quantum ad id quod est de ratione mortis, quod est animam de corpore separari; sed quantum ad aliam mors Christi a morte nostra fuit differens: nos enim morimur quasi morti subiecti ex necessitate naturae, vel alicujus violentiae nobis illatae; Christus autem mortuus est non ex necessitate, sed ex potestate, et ex propria voluntate: unde ipse dicit Joan. 10: « Potestatem habeo ponendi animam  
« meam. » Hujus differentiae ratio est, quia naturalia voluntati nostrae non subjacent: conjunctio autem animae ad corpus est naturalis: unde voluntati nostrae non subjacet quod anima maneat corpori unita, vel separetur. Quicquid autem in Christo naturale erat, totum voluntati ejus subjacebat propter divinitatis virtutem, cui subjacebat tota natura. Erat igitur in potestate Christi, ut quamdiu vellet, anima ejus unita corpori maneret, et statim eum vellet, separaretur ab eo. Hujus autem divinae virtutis indicium Centurio cruci Christi assistens sensit, cum vidit eum expirare: per quod maxime ostenditur, quod non sicut homines ex defectu naturae moriebatur: non enim possunt ceteri eum clamore emittere spiritum, cum in illo mortis articulo vix etiam possunt linguam palpando movere: unde quod Christus clamando expiravit, in eo divinam virtutem manifestavit. Et propter hoc dixit Centurio: « Vere filius Dei erat iste, » Luc. 23. Unde Bernardus in sermone de passione: « Vigilare,  
« quis tam facile eum vult obdormiat? Magna in-



« firmitas mori, sed plane sic mori virtus im-  
« sa. Solus habuit potestatem ponendi animam, et  
« solus facultatem liberam eam resumendi, impe-  
« rium habens vitae et mortis. » Non tamen di-  
« cendum, quod Judaei non occiderunt Christum. Ille  
« enim dicitur aliquem occidere, qui causam mortis  
« inducit: non enim mors sequitur nisi causa mortis  
« naturam vincat, quae vitam conservat. Erat autem  
« in potestate Christi ut natura eidem corruptioni  
« cederet, vel resisteret quantum ipse vellet; ideo ipse  
« Christus voluntarie mortuus fuit, et tamen Judaei  
« occiderunt eum.

Notandum, quod voluntas patientis excludit neces-  
« sitatem coactionis; quia dicit Aristoteles in lib. de  
« Anima quod voluntas est animi motus cogente nullo  
« ad aliquid admittendum vel adipiscendum. Unde  
« non fuit necessarium Christum pati necessitate co-  
« actus. Dicitur autem aliquid necessarium ex suppo-  
« sitione finis; quando scilicet finis, nullo modo, aut  
« non ita convenienter potest esse nisi tali fine prae-  
« supposito; et sic necessarium fuit Christum pati  
« necessitate finis. Qui quidem finis potest intelli-  
« gi tripliciter. Primo quidem ex parte nostra, quia per  
« ejus passionem liberati sumus, secundum illud Joan.  
« 12: « Oportet exaltari filium hominis » Secundo  
« ex parte ipsius Christi, qui per humilitatem passio-  
« nis meruit gloriam exaltationis. Luc. ult.: « Opor-  
« tebat Christum pati etc. » Tertio ex parte Dei,  
« ejus definitio est circa passionem Christi praemun-  
« tiata in Scripturis, et praefigurata in observantia  
« veteris testamenti: et hoc est quod dicitur Luc. 22:  
« Filius hominis vadit secundum quod definitum  
« est de illo; » et Luc. ult.: « Necessesse est impleri  
« omnia quae scripta sunt in lege Moysi et pro-  
« phetis et psalmis de me. » Sciendum vero, quod  
« Pater dicitur Filium tradidisse, secundum illud  
« Rom. 8, « qui proprio Filio suo non peperit, sed  
« pro nobis omnibus tradidit illum. » Ubi duo  
« tanguntur: scilicet Dei severitas et bonitas. Severitas  
« quidem est, quod peccata sine poena dimittere no-  
«luit. Quod signavit Apostolus dicens, « Qui proprio  
« Filio suo non peperit. » Bonitas vero in eo,  
« quod eum homo sufficienter satisfacere non posset  
« per aliquam poenam quam pateretur, satisfactorem  
« Filium dedit ei, quem Apostolus signavit dicens,  
« Pro nobis omnibus tradidit illum. »

Unde notandum, quod secundum tria tradidit Do-  
« minus Pater Christum passioni. Uno quidem modo,  
« secundum quod sua aeterna voluntate praedestinavit  
« passionem Christi ad humani generis liberationem, se-  
« cundum illud Isa. 53: « Dominus posuit in eo iniqui-  
« tatem omnium nostrum. » Secundo in quantum  
« inspiravit eo voluntatem patiendi pro nobis infundendi  
« ei caritatem: unde ibidem sequitur. « Oblatus est  
« quia ipse voluit. » Tertio non protegendo eum  
« a passione, sed exponendo eum persequentibus:  
« unde ipse Christus dixit, « Deus Deus meus, ut  
« quid dereliquisti me? » Matth. 28. Glossa: « Dicitur  
« autem Deus eum dereliquisse in morte, quia peccato  
« persequentium eum exposuit: subtraxit enim prote-  
« ctionem, sed non solvit unionem. » De secundo di-  
« citur Sap. 8: « Attingit a fine usque ad finem for-  
« titer, » idest a summo caelo usque ad infernum:  
« fortiter, eiciens scilicet de caelo super-  
« bum, fortiter in inferno, spoliando animas for-  
« titer in medio, scilicet in mundo, superando ibi-  
« dem malignum, » et disposuit omnia suaviter. »  
« Suaviter in caelo stantes Angelos confirmando, in

*S. Th. Opera omnia. V. 17.*

« inferno captivos a diabolo liberando; in mundo ve-  
« numdatos sub peccato redimendo. Potest autem con-  
« gruitas tripliciter attendi: idest ex tempore, ex loco,  
« ex genere passionis. De tempore dicitur Joan. 13:  
« Ante diem festum Paschae sciens Jesus quia ve-  
« nit hora ut transeat ex hoc mundo ad Patrem etc. »  
« Unde in libro novi et veteris Testamenti dicitur:  
« Omnia propriis locis et temporibus gessit  
« Salvator. » Fuit autem congruum quod Christus  
« in juvenili aetate pateretur: tam ut suam dilectio-  
« nem magis commendaret, quod vitam suam pro  
« nobis dedit, quando erat in perfectissimo statu: tum  
« etiam quia non conveniebat ut in eo appareret  
« naturae diminutio, sicut nec morbus, ut supra pa-  
« tuit; tum etiam ut in juvenili aetate moriens et  
« resurgens, futuram resurgentium in seipso qualita-  
« tem praemonstraret: unde dicitur ad Ephes. 4:  
« Donec occurramus omnes in unitatem fidei, et  
« agnitionem Filii Dei, in virum perfectum, in men-  
« suram aetatis plenitudinis Christi. » De loco pas-  
« sionis Christi dicitur Luc. 13: « Non capit prophe-  
« tam perire extra Jerusalem. » Fuit autem con-  
« veniens Christum pati in Jerusalem. Primo, quia  
« Jerusalem fuit locus a Deo electus ad sacrificia of-  
« ferenda: quae quidem figuralia sacrificia figurabant  
« passionem Christi, quod est verum sacrificium,  
« secundum illud Ephes. 5: « Tradidit semetipsum  
« hostiam et oblationem in odorem suavitatis. »  
« Unde Beda dicit in quadam homilia, quod propin-  
« quante hora passionis Dominus appropinquare voluit  
« loco passionis, scilicet Jerusalem, quo pervenit ante  
« quinque dies Paschae, sicut agnus paschalis ante  
« quinque dies Paschae, idest luna decima secundum  
« praeceptum legis ad locum immolationis ducebatur.  
« Secundo, quia virtus passionis ejus ad totum mun-  
« dum diffundenda erat; unde dicitur Psal. 72: « Rex  
« noster ante saecula operatus est salutem in me-  
« dio terrae, » idest in Jerusalem pati voluit, quae  
« dicitur umbilicus terrae. Tertio quia hoc maxime  
« conveniebat humilitati ejus, ut sicut turpissimum  
« genus mortis elegit, ita etiam ad ejus humilitatem  
« pertinuit quod in loco tam celebri confusionem pati  
« non recusaret: unde Leo Papa in quodam sermone  
« Epiphaniae dicit: « Qui formam servi acceperat,  
« Bethlehem elegit nativitati, Jerusalem passi-  
« oni. » Quarto, ut ostenderet a principibus populi exortam  
« iniquitatem occidentium ipsum, in Jerusalem ubi  
« principes morabantur, pati voluit: unde Bernardus:  
« Convenerunt in ista civitate adversus puerum tuum  
« sanctum Jesum, quem unxisti, Herodes et Pon-  
« tius Pilatus cum ipsius gentibus et populis Israel. »

Notandum, quod Christus extra portam pati  
« voluit propter tria. Primo, ut veritas responderet  
« figurae; unde Hebr. 13: « Quorum animalium in-  
« fertur sanguis pro peccato in sancta per Pontifi-  
« cem, horum corpora eremantur extra castra: pro-  
« pter quod Jesus etc. » Secundo ut daret nobis  
« exemplum exeundi a mundana conversatione: unde  
« ib. subditur: « Exeamus igitur ad eum extra castra, »  
« idest conversatione saecularium: vel secundum Glos-  
« sam « voluptates corporum mortificantes, membra  
« cum vitis et concupiscentiis crucifigentes ad  
« eum imitandum: » nos dico, portando patienter  
« ut ipse, improprium ejus, idest passionem crucis,  
« quae videtur improprium esse infidelibus, nobis  
« autem sanctificatio et redemptio. Tertio, ut Chryso-  
« stomus dicit, improprium passionis Christus pati  
« voluit non sub tecto, nec in templo judaico, ne

Judaei subtraherent sacrificium salutare, nec ut putarent pro illa tantum plebe oblatum, ideo foras civitatem, foras muros, ut scias sacrificium esse commune, quod totius terrae est oblatio, quod communis est omnium purificatio. De genere passionis Christi dicitur Philipp. 2: « Humiliavit semetipsum factus obediens Patri usque ad mortem: mortem autem crucis. » Fuit autem conveniens Christum pati hoc genus mortis: primo quantum ad humilitatis exemplum: unde Apostolus notabiliter dicit, « Humiliavit semetipsum etc. formam etc., » ubi dicit Glossa: « Quanta humilitate humiliavit se Christus usque ad incarnationem, usque ad mortalitatis humanae participationem, usque ad diaboli tentationem, usque ad populi derisionem, usque ad sputa, vincula, alapas et flagella, et mortem crucis, quae ignominiosior est. Ecce humilitatis humile exemplum, superbiae medicamentum. Quid ergo tumescis o homo et pulvis morticinus, quid tenderis, o sanies foetida? quid inflaris? princeps tuus humilis est, et tu superbus; caput humile est, membrum superbum? » Secundo quantum ad satisfactionis medicamentum: dicitur enim Sapient. 9: « In quo enim quis peccat, per hoc et torquetur. » Adam vero in ligno peccavit. Genes. 1. Unde Christus affligi se ligno permisit, ut exsolveret quae non rapuit. Unde Augustinus in quodam sermone de passione: « Contempsit Adam praecipuum accipiens ex arbore: sed quicquid Adam perdidit Christus in cruce invenit. » Tertio quantum ad salutis sacramentum, ut ad similitudinem mortis ejus moreremur vita carnali: ut spiritus noster in superna elevaretur: unde Joan. 12: « Ego si exaltatus fuero a terra, omnia traham ad meipsum. » Augustinus: « Spiritum, animam, et corpus. » De hoc etiam Sacramento crucis dicitur in Glossa super illud ad Ephes. 5: « Ut possitis comprehendere quae sit latitudo, longitudo, altitudo et profundum etc. Non frustra tale genus mortis elegit, in quo latitudinis, longitudinis, altitudinis et profunditatis magister existeret: namque latitudo est transversum lignum quod ad bona opera pertinet, quia ibi extenduntur manus: longitudo ab ipso transverso ad terram tendit, ubi corpus crucifigitur et quodammodo stat, et ipsa statio perseverantiam significat: altitudo est, quod ab ipso transverso ligno sursum versus eminet, per quod significatur supernorum expectatio: profundum vero est in illa parte quae fixa terrae occultatur; unde totum illud surgit: quod profunditatem significat gratituae gratiae. » Quarto quia hoc genus mortis pluribus figuris respondet: unde Augustinus in sermone de Passione: « De dilavio aquarum humanum genus arca lignea liberavit de Aegypto Dei populo recedente. Moyses mare virga divisit, et Pharaonem prostravit, et populum redemit. » Idem: « Moyses lignum in aquam inisit, et amaram aquam in dulcedinem commutavit: ex lignea virga de spirituali petra salutaris unda profertur: et ut Amalec vinceretur, contra eum virgam Moyses expansis manibus extendit, ut his omnibus quasi per quosdam gradus ad crucem perveniat. » Tertio, videlicet de acerbitate passionis, dicitur Thren. 1: « O vos omnes qui transitis per viam, attendite, et videte si est dolor etc. »

Notandum vero quod acerbitas passionis causabat in Christo timorem, tristitiam et dolorem. De

timore dicitur Marc. 12: « Coepit Jesus pavere, et taedere. » Unde Damascenus: « Omnia quae a non esse ad esse deducta sunt, a Conditore existendi naturaliter desiderium habent, et non existere naturaliter fugiunt. » Et Deus igitur Verbum homo factus habuit hoc desiderium, quod demonstravit per escam et potum et somnum, quibus scilicet conservatur vita, vivere desiderans: et naturaliter est experientia horum factus; et e converso desiderans corruptionis amotionem. Unde et tempore passionis quam voluntarie sustinuit, habuit mortis timorem naturalem, et tristitiam. Et enim timor naturalis nolens dividi animam a corpore propter eam quae ex principio a Conditore imposita est, naturalem familiaritatem, unde causatur timor in homine. Ad cuius evidentiam sciendum est, quod timor causatur ex apprehensione futuri mali: quae quidem apprehensio si omnimodam certitudinem habeat, non inducit (1) timorem, unde Philosophus 2 Rethor. dicit, quod timor non est ubi aliqua spes non est evadendi malum: nam quando nulla spes est evadendi, apprehenditur malum ut praesens, et sic magis causat tristitiam quam timorem. Sic igitur timor potest considerari quantum ad duo. Uno modo quantum ad hoc quod appetitus sensitivus naturaliter refugit corporis laesionem per tristitiam si sit praesens, et per timorem si sit futura. Alio modo potest considerari secundum incertitudinem eventus, sicut quando nocte timemus ex aliquo sonitu, quasi ignorantes quid hoc sit: et quantum ad hoc timor non fuit in Christo, ut dicit Damascenus in 5 lib. Quod vero dicitur Prov. 18: « Justus quasi leo confidens absque timore erit, » intelligendum est secundum quod timor importat perfectam passionem avertentem hominem a bono rationis; et sic non fuit in Christo, sed solum secundum passionem, ut Hieronymus dicit. Item illud secundum Augustinum in lib. 85 quaest., quod signum perfectionis est absque timore esse, intelligendum est de timore servili, et non naturali. De tristitia autem dicitur Matth. 26: « Tristis est anima mea usque ad mortem, » unde Ambrosius 5 de Trinit.: « Confidenter tristitiam nomino, qui crucem praedico. » Ad cuius evidentiam sciendum est, quod sicut dolor sensibilis est in appetitu sensitivo, ita et tristitia: sed differentia est secundum motivum vel objectum. Nam objectum sive motivum doloris est laesio sensu tactus percepta. Objectum sive motivum tristitiae est nocivum, sive malum, et interius apprehensum, sive per rationem, sive per imaginationem (2). Potuit autem anima Christi aliquid apprehendere ut nocivum quantum ad se, sicut passio et mors ejus, et quantum ad alios, sicut casus discipulorum et peccatum Judaeorum ipsum occidentium. Unde potuit perpendi in eo esse naturalis tristitia, sed secundum propassionem (3), ut dicit Glossa Hieronymi. Magnitudo autem hujus tristitiae perpendi potest ex tribus. Primo quidem ex causalitate ipsius, quae fuit propter tria. Primo quidem peccata omnia generis humani, pro quibus satisfaciebat: unde in Psal. 21: « Longe a salute mea verba delictorum meorum, » Glossa « delicta sunt causa quare longe es a salute mea. » Secundo specialiter casus Judaeorum et aliorum in morte ejus delinquentium; et praecipue scandalum discipulorum, de quo dicitur Matth. 26: « Omnes vos scandalum patiemini in me in ista nocte. » Tertio amissio vitae, quam maxime di-

(1) *Al.* indicat. (2) *Al.* imaginem. (3) *Al.* propagationem.

lexit propter ejus dignitatem: dicit enim Philosophus 4 Ethic., quod « virtuosus tanto plus vitam « suam diligit, quanto scit eam esse meliorem; » unde et in persona Christi dicitur Jerem. 12: « Dedi dilectam animam meam in manus inimicorum. » Secundo perpenditur magnitudo hujus tristitiae ex animae perceptibilitate: ipsa enim anima efficacissime apprehendit omnes causas tristitiae. Tertio perpenditur hujus tristitiae magnitudo ex ejus puritate; nam in aliis mitigatur tristitia interior, et etiam dolor exterior, ex aliqua consideratione rationis per quamdam derivationem seu redundantiam a viribus superioribus ad inferiores: quod in Christo patiente non fuit, quia unicuique permisit agere quod sibi proprium erat; unde dicit Damascenus: « Virtus moralis mitigat tristitiam. » Sciendum vero, quod virtus moralis aliter mitigat tristitiam interiorem, et aliter dolorem exteriorem sensibilem: tristitiam enim interiorem diminuit directe in ea medium constituendo, sicut in propria materia. Medium autem in passionibus virtus moralis constituit, non secundum quantitatem rei, sed secundum quantitatem proportionis; ut scilicet passio non excedat regulam rationis. Et quia Stoici reputabant quod nulla tristitia esset utilis ad aliquid, ideo credebant quod totaliter a ratione discordabat, et per consequens esset totaliter sapienti vitanda. Sed secundum rei veritatem aliqua tristitia laudabilis est, ut Augustinus probat, 14 de civit. Dei: quando scilicet procedit ex sancto amore: ut puta, cum quis tristatur de peccatis propriis vel alienis. Assumitur enim ut utilis ad finem satisfactionis pro peccato, juxta illud 2 Corinth. 7: « Quae secundum Deum est tristitia, poenitentiam « in salutem stabilem operatur. » Et ideo Christus, ut satisfaceret pro peccatis omnium hominum, assumpsit tristitiam maximam quantitate absoluta, non tamen excedentem regulam rationis. Dolorem vero exteriorem sensus tactus virtus moralis directe non minuit, quia talis dolor non obedit rationi, sed sequitur corporis naturam. Diminuit tamen ipsum indirecte per redundantiam a viribus superioribus in inferiores: quod in Christo non fuit, ut dictum est.

Notandum vero, quod superior ratio in Christo tristitiam de proximorum defectibus habere non potuit. Quia enim superior ratio Christi plena Dei visione fruebatur, hoc modo apprehendebatur quod ad aliorum defectus pertinet, secundum quod in divina sapientia continetur, secundum quam decenter ordinatum consistit, et quod aliquis peccare permittitur, et quod pro peccatis punitur. Et ideo nec anima Christi nec aliquis beatus videns Deum, de defectibus proximorum tristitiam habere potest. Secus autem est in anima viatoris quae ad rationem sapientiae videndam non attingit. Sic igitur de eisdem de quibus Christus dolebat secundum sensum et imaginationem et rationem inferiorem, secundum rationem superiorem gaudebat, in quantum ea ad ordinem divinae sapientiae referebat. De dolore dicitur Isa. 53: « Vere languores nostros « ipse portavit, et dolores nostros ipse tulit. » Bernardus: « Volve et revolve corpus Dominicum, « et non invenies in eo nisi dolorem et cruorem. » Ad ejus evidentiam sciendum, quod ad veritatem doloris sensibilis requiritur laesio corporalis. Corpus autem Christi laedi poterat, quia erat passibile et mortale: nec defuit ei sensus laesionis, quin anima Christi haberet potentias omnes naturales.

Unde nulli dubium debet esse, quin in Christo fuerit verus dolor. Magnitudo vero hujus doloris potest perpendi ex tribus. Primo ex ejus causalitate, quae fuit laesio corporalis, quae habuit magnam acerbitatem: tum propter generalitatem passionis, quia « a planta pedis usque ad verticem non fuit « in eo sanitas, » ut dicitur Isaiae 1; tum etiam ex genere passionis, quia mors confixorum in cruce est acerbissima, quia configuntur in locis nervosis et maxime sensibilibus, scilicet in manibus et pedibus: et ipsum corporis pendens pondus continue auget dolorem: adhuc etiam temporis diurnitas, quia non statim morientur, sicut illi qui gladio feriuntur vel interficiuntur. Secundo potest perpendi magnitudo doloris ex perceptibilitate patientis: nam et secundum corpus erat optime complexionatus, cum corpus ejus fuerit formatum miraculose operatione Spiritus sancti, sicut et alia quae per miracula facta sunt, aliis potiora fuerunt, ut dicit Chrysostomus de vino quod de aqua in nuptiis fecit. Et ideo in eo viguit maxime sensitivus tactus, ex cujus perceptione sequitur dolor. Tertio perpenditur magnitudo doloris ex ejus puritate, sicut est dictum supra de tristitia.

Notandum vero, quod innocentia patientis minuit dolorem passionis quoad numerum: quia nocens non solum dolet de poena, sed etiam de culpa. Innocens autem solum de poena; qui tamen dolor in eo augetur ex innocentia, in quantum apprehendit nocementum illatum ut magis indelictum: unde etiam alii sunt magis reprehensibiles, si eis non compatiuntur: unde Isa. 42: « Justus « perit, et non est qui recogitet in corde suo. » Utrum vero passus fuit Christus secundum totam animam? notandum quod totum dicitur respectu partium: partes vero animae dicuntur potentiae ejus. Similiter considerandum, quod duplex est passio animae: una quidem ex parte corporis sive subjecti; alia vero ex parte objecti. Quod in aliqua potentiarum ejus considerari potest; nam potentia visiva patitur quidem ab objecto, sicut ab excellenti fulgido visus obtunditur; ex parte vero organi, sicut cum laesa pupilla visus exaeccatur. Si igitur consideretur passio animae Christi ex parte corporis, sic tota patiebatur et secundum essentiam, et secundum potentias: nam tota animae essentia conjungitur corpori, ita quod tota est in toto, et tota in qualibet parte ejus: et ideo corpore patiente, tota anima secundum essentiam patiebatur. In essentia vero animae omnes potentiae radicanur. Unde relinquitur quod corpore patiente, quaelibet potentia quodammodo patiebatur. Si vero consideretur passio animae Christi ex parte objecti, sic non omnis potentia animae patiebatur, sed tantum vires inferiores, quae circa temporalia operabantur: in quibus inveniebatur aliquid quod erat causa doloris; et secundum hoc superior ratio non patiebatur ex parte sui objecti, scilicet Dei, qui non erat ei causa doloris, sed delectationis et gaudii. Similiter vero intelligendum est de fruitione, quod anima potest intelligi et secundum essentiam, et secundum ejus potentias. Si autem intelligatur secundum essentiam, sic tota fruebatur in quantum est subiectum superioris partis animae, ejus est frui divinitate: ut sicut passio ratione essentiae attribuitur superiori parti animae; ita etiam e converso fruitio ratione superioris partis animae attribuitur essentiae. Si vero accipiamus totam animam ratione omnium



potentiarum ejus, sic non tota fruebatur: nec directe quidem, quia fruitio potest esse actus cujuslibet partis animae: nec per redundantiam, quia dum Christus erat viator, non fiebat redundantia gloriae a superiore parte in inferiorem partem, nec ab anima in corpus. Sed quia nec e converso superior pars animae non impediabatur circa id quod est sibi proprium per inferiorem, consequens est, quod superior pars animae perfecte fruebatur, Christo patiente.

Notandum vero quod tristitia quae erat in anima Christi, non erat contraria gaudio fruitionis; tum quia non erat idem secundum idem, sed vel in diversis potentiis, vel in eadem secundum diversam operationem: tum etiam quia non erat de eodem: tum etiam quia erat materia alterius, sicut accidit de poenitente qui dolet, ac de dolore gaudet. De quarto, videlicet passionis ignominiositate, dicitur Sapient. 2: « Morte turpissima condemnemus eum, » Glossa « idest crucis, quae usque ad passionem Christi poena reorum fuit, nunc trophaeus est victoriae, Ecclesiae gloria ». Augustinus: « Crux Christi quae erat supplicium latronum, nunc transit ad frontes imperatorum. Si Deus tantum honorem contulit (1) supplicio, quid conferet servo suo? »

Notandum vero, quod passio Christi fuit ignominiosa, tum propter ignominiosum locum: Joan. 19: « Bajulans sibi crucem, exivit in eum qui dicitur Calvariae locus. » Hieronymus: « Extra portam enim et extra urbem loca sunt, in quibus capita damnatorum truncantur, idest decollatorum: et Calvariae sumpsere nomen. Propterea autem ibi crucifixus est Jesus, ut ubi prius erat area damnatorum, ibi, erigerentur vexilla martyrum. » Tum etiam propter ignominiosum supplicium. Deuter. 21: « Maledictus omnis qui pendet in ligno. » Glossa super Apostolum ad Galat. 3 dicit, quod haec poena ceteris abjectior et ignominiosior fuit: et ideo in Deuteronomio dictum est, quod suspensus in vespera deponeretur. Est autem duplex maledictio, ut dicitur ibi in Glossa: scilicet culpae et poenae. Unde et maledictum duobus modis dicitur: scilicet active et passive, idest secundum culpam et poenam. Suscepit autem Christus sine reatu supplicium nostrum, ut inde solveret reatum nostrum, et finiret etiam supplicium nostrum: tum etiam propter ignominiosum consortium. Isa. 53: « Et cum iapiis et sceleratis reputatus est. » Hieronymus: « Sicut enim pro nobis maledictum crucis factus est Christus, sic pro omnium salute quasi noxius inter noxios crucifixus est. » Hoc etiam a mysterio non vacat: unde Augustinus super Joannem: « Ipsa crux, si attendas, tribunal fuit. In medio enim iudice constituto, unus latro qui credidit, liberatus est; alter qui insultavit, damnatus est. Jam significabat quid facturus esset de vivis et mortuis: alios positurus ad dexteram et alios ad sinistram. » Beda super Matth.: « Latrones qui cum Domino crucifixi sunt, significant eos qui sub fide et confessione Christi vel agonem martyrii vel quae libet aetioris disciplinae instituta subeunt. Sed qui haec pro aeterna gloria gerunt, dexteri latronis fide designantur: qui vero humanae laudis intuitu, sinistri latronis mentem imitantur et actus. » De quinto, scilicet passionis utilitate, dicitur in Psal. 75: « Deus autem rex noster ante

(1) *Al.* coluit.

« saecula operatus est salutem in medio terrae, » idest « in Jerusalem, » quae dicitur umbilicus terrae, secundum Glossam. Est igitur utilitas passionis Christi salus christianorum.

Notandum quod passio Christi causabat nostram salutem multis modis. Uno modo per modum meriti. Philipp. 2: « Propter quod Deus illum exaltavit etc. » Unde Augustinus: « Humilitas passionis Christi claritatis est meritum; claritas passionis, humilitatis est praemium. » Christus vero clarificatus est non solum in seipso, sed etiam in suis fidelibus, ut ipse dicit Joan. 17. Ergo videtur quod ipsa meruit salutem suorum fidelium. Sciendum insuper, quod ad meritum quatuor requiruntur et sufficiunt: unum est agens, quod sit in statu merendi: alterum est forma, per quam habet opus praemio dignum, scilicet caritas: tertium est, ut ipsa actio sit voluntaria, et in potestate agentis, et de genere honorum: quartum est finis debite intentus per actionem. Haec quatuor fuerunt in Christo, unde ipse potuit mereri. Alio modo causabat Christi passio salutem per modum satisfactionis; unde ex persona ipsius dicitur in Psal. 68: « Quae non rapui, tunc exsolvebam: » quasi dicat, non peccavi, et poenas dedi, ut dicit Glossa. Ad cuius evidentiam sciendum quod ille proprie satisfacit pro offensa, qui exhibet offenso id quod aeque vel magis diligit quam oderat offensam; Christus autem ex caritate et obedientia patientiae magis aliquid Deo exhibuit quam exigeret recompensatio totius offensae generis humani. Primo quidem propter magnitudinem caritatis ex qua patiebatur. Secundo propter dignitatem vitae suae, quam pro satisfactione ponebat, quae erat vita hominis et Dei. Tertio propter generalitatem et magnitudinem doloris assumpti; ideo passio Christi non solum sufficiens, sed etiam abundans fuit satisfactio pro redemptione generis humani, secundum illud 1 Joan. 2: « Ipse est propitiatio pro peccatis nostris, non autem pro nostris tantum, sed etiam pro totius mundi. » Alio modo passio Christi causabat salutem nostram per modum sacrificii: unde ad Ephes. 5: « Christus dilexit nos, et tradidit semetipsum pro nobis oblationem et hostiam Deo in odorem suavitatis. » Quia vero humanitas Christi operabatur in virtute divinitatis, sacrificium illud efficacissimum erat. Propter quod dicit Augustinus 4 de Trinit. quod « convenienter in omni sacrificio quatuor sunt: scilicet cui offeratur, a quo offeratur, quod offeratur, pro quo offeratur. Ideo ipse unus utriusque mediator per sacrificium pacis reconcilians Deo, unum cum illo manens cui offerebat, ut unam in se faceret pro quibus offererebat, unus ipse esset qui offerebatur. » Item in eodem: « Quid tam convenienter ab hominibus sumeretur quod pro eis offerretur, quam humana caro? et quid tam aptum fuit huic oblationi, quam caro mortalis? et quid tam mundum pro mundanis vitiis mortalium, quam si de cogitatione carnalis concupiscentiae caro nata in utero, et ex utero virginali? et quid tam grate offerri possit et suscipi, quam corpus caro sacrificii nostri, corpus effectum sacerdotis nostri? »

Notandum vero, quod homo indiget sacrificio propter tria. Uno modo quidem ad remissionem peccati; unde Apostolus dicit ad Hebr. 5, quod ad sacerdotem pertinet offerre sacrificia pro peccatis. Secundo ut homo in statu gratiae conservetur



semper Deo inhaerens, in quo ejus pax consistit: unde et in veteri lege immolabatur hostia pacifica pro offerentium salute, ut habetur Levit. 3. Tertio ad hoc ut spiritus hominis perfecte Deo uniatur, quod maxime erit in gloria: unde in veteri testamento offerebatur holocaustum quasi totum incensum, ut dicitur Lev. 1. Haec autem per humanitatem Christi nobis conferuntur. Primo quidem per eum peccata nostra sunt remissa, secundum illud Rom. 3: « Traditus est propter delicta nostra. » Secundo gratiam nos salvantem per ipsum accipimus, secundum illud Hebr. 5: « Factus est sibi obtemperantibus causa salutis aeternae. » Tertio per ipsum adepti sumus perfectionem gloriae, secundum illud Hebr. 4: « Fiduciam habemus per sanguinem ejus introire in sancta sanctorum, » scilicet gloriam caelestem. Et ideo ipse Christus, in quantum homo, non solum fuit sacerdos, sed hostia perfecta, simul existens hostia pro peccato et hostia pacifica et holocaustum. Item alio modo per modum redemptionis. 1 Petr. 1: « Non corruptilibus auro vel argento redempti estis de vana vestra conversatione paternae traditionis; sed pretioso sanguine agni immaculati et incontaminati Jesu Christi. » Glossa: « Quanto majus pretium est quo redempti estis a corruptione vitae carnalis, tanto amplius timere debetis, ne revertendo a corruptione vitiorum vitae carnalis, animum vestri Redemptoris offendatis. » Bernardus: « Totus siquidem iste mundus ad unius animae pretium aestimari non potest: non enim pro toto mundo Deus animam daret, quam pro humana anima dedit. » Idem: « Sublimius igitur animae pretium est, quae non nisi sanguine Christi redimi potest. » Idem: « Cognosce, o homo, quam nobilis est anima tua, et quam gravia fuerunt vulnera tua, pro quibus est necesse Christum Dominum vulnerari. Si non essent haec ad mortem, et mortem sempiternam, nunquam pro eorum remedio Filius Dei moreretur. » Ad ejus evidentiam sciendam, quod per peccatum homo dupliciter obligatus erat: primo quidem servitute peccati, quia qui facit peccatum, servus est peccati, ut dicitur Joan. 8: et 2 Petr. 2: « A quo quis superatus est, ejus servus addictus est. » Quia igitur diabolus hominem superaverat in luendo eum ad peccatum, ideo homo servituti peccati addictus erat. Secundo quantum ad reatum poenae quo homo obligatus erat secundum Dei justitiam; et haec erat servitus quaedam. Ad servitatem enim pertinet quod aliquis patitur quod non vult, eum liberi hominis sit uti seipso ut vult. Quia ergo passio Christi fuit sufficiens et superabundans satisfactio pro peccato et reatu generis humani; ideo ejus passio fuit quasi quoddam pretium, per quod liberati sumus ab utraque obligatione: nam ipsa satisfactio qua quis satisfacit sive pro se sive pro alio, quoddam pretium dicitur, quo se redemit a peccato et a poena, secundum illud Dan. 10: « Peccata tua elemosynis redime. » Christus quidem satisfacit non pecuniam dando, aut aliquid hujusmodi; sed illud dando quod fuit maximum, scilicet seipsum pro nobis: et ideo passio Christi dicitur esse nostra redemptio. Si vero alicui videatur, quod nullus emit vel redemit quod suum esse non desinit: sed homo nunquam desiit esse Dei etc. Dicendum quod homo dicitur esse Dei dupliciter. Uno modo in quantum subicitur ejus potestati: et

hoc modo homo nunquam desiit esse Dei, secundum illud Dan. 4: « Dominator excelsus in regno hominum et cuicumque voluerit dabit illud. » Alio modo per unionem caritatis ad illum, secundum quod dicitur ad Rom. 8: « Si quis spiritum Christi non habet, hic non est ejus. » Primo modo homo nunquam desiit esse Dei: sed secundo modo desiit esse Dei per peccatum: et ideo in quantum homo fuit liberatus a Christo a peccato, et Christo passo satisfaciente, dicitur per passionem Christi esse redemptus.

Notandum insuper, quod per passionem Christi consecuti sumus culpae remissionem, poenae dimissionem, a potestate diaboli liberationem, Dei reconciliationem, januae caelestis aperitionem. De culpae remissione facta per Christi passionem dicitur Apocalyp. 1: « Qui dilexit nos, et lavit nos a peccatis nostris in sanguine suo. » Unde Bernardus: « Triplex peccatum virtus crucis expurgat: primum originale, quod non solum personam inficit, sed etiam naturam: secundum personale; gravius quidem cum jam laxatis habenis exhibemus undique membra nostra arma iniquitatis: tertium vero singulare gravissimum quidem, quod commissum est in Dominum majestatis, cum viri impii virum justum injuste occiderunt. Hoc peccatum Christus in se pertulit, qui seipsum fecit peccatum, ut de peccato damnaret peccatum. Per hoc enim omne peccatum tam originale quam personale deletum est, et ipsum quoque singulare eliminatum est per seipsum. » Idem de eodem: « In ipsa elevatione manuum tuarum, cum jam sacrificium matutinum in holocaustum transiret vespertinum, in ipsa inquam virtute incensi, quod caelos ascendebat, et terram aperiebat, infernos respergebat, exauditus es pro tua reverentia clamans: Pater ignosce illis, quia nesciunt quid faciant. » Ad hujus vero evidentiam sciendum, quod passio Christi est remissionis peccatorum causa tripliciter. Primo quidem per modum provocantis ad caritatem: quia, ut dicit Apostolus ad Rom. 5: « Commendat Deus caritatem suam in nobis, quoniam cum inimici essemus, Christus pro nobis mortuus est. » Per caritatem autem consequimur veniam peccatorum, secundum illud Luc. 7: « Dimissa sunt ei peccata multa, quoniam dilexit multum. » Secundo passio Christi causat remissionem peccatorum per modum redemptionis: quia ipse est caput nostrum: per suam passionem enim quam ex caritate et obedientia sustinuit, liberavit nos tanquam membra sua a peccatis quasi per pretium suae passionis: sicut si homo per aliquod opus meritorium quod manu exerceat, redimeret se a peccato, quod pedibus commisisset. Sicut enim naturale corpus est unum ex membrorum diversitate consistens, ita tota Ecclesia, quae est mysticum corpus Christi, computatur quasi una persona cum suo capite, quod est Christus. Tertio per modum efficientiae; in quantum caro Christi, secundum quam Christus passionem sustinuit, est instrumentum divinitatis, ex quo ejus actiones et passionem operantur virtute divina ad expellendum peccatum. De poenae dimissione facta per Christi passionem dicitur Isa. 55: « Vere languores nostros ipse tulit, » idest peccata, « et dolores nostros ipse portavit. » Unde Bernardus: « Duo nobis in hereditate reliquerat ille vetustus Adam; scilicet laborem et dolorem: laborem in

« actione, dolorem in passione: Christus enim non  
 « solum laborem et dolorem consideravit, sed etiam  
 « intravit. Vide, inquit ad Patrem, humilitatem  
 « meam et laborem meum, quia pauper ego sum  
 « et in laboribus a juventute mea: manus meae in  
 « laboribus servierunt. De dolore vide quid dixit:  
 « O vos omnes qui transitis per viam etc. » Et in  
 vita passivam habuit actionem, et in morte pas-  
 sionem activam sustinuit, dum salutem operaba-  
 tur in medio terrae. Ad ejus evidentiam scien-  
 dum, quod per passionem Christi liberati sumus a  
 reatu poenae dupliciter. Uno modo directe, in quan-  
 tum scilicet passio Christi fuit sufficiens et supera-  
 bundans satisfactio pro peccatis totius generis hu-  
 mani. Exhibita autem satisfactio satisfaciendi tol-  
 litur reatus poenae. Alio modo indirecte, in quan-  
 tum scilicet passio Christi est causa remissionis  
 peccati, in quo fundatur reatus poenae. Sed notan-  
 dum, quod satisfactio Christi effectum habet in  
 nobis, in quantum incorporamur ei ut membra capi-  
 titi. Membra autem oportet capiti esse conformia.  
 Et ideo sicut Christus primo quidem in anima cum  
 passibilitate corporis habuit gratiam, et per passio-  
 nem ad gloriam immortalitatis pervenit; ita et nos  
 qui sumus membra ejus, per passionem ipsius li-  
 beramur quidem a reatu cujuslibet poenae; ita ta-  
 men quod primo in anima recipimus spiritum a-  
 doptionis filiorum, quo ascribimur ad hereditatem  
 gloriae immortalitatis, adhuc corpus passibile ha-  
 bentes: postmodum vero configurati passionibus et  
 morti Christi in gloria, et in immortalitate perdu-  
 cimur ad vitam, secundum illud Rom. 8: « Si filii,  
 « et heredes: heredes quidem Dei, coheredes  
 « autem Christi: si tamen compatimur, ut simul  
 « glorificemur. » De liberatione a diabolo facta  
 per passionem Christi dicitur Coloss. 1: « Qui eri-  
 « puit nos de potestate tenebrarum, et transtulit  
 « nos in regnum Filii dilectionis suae. » Glossa:  
 « Dilecti Filii sui, per quem redemit nos: » et in-  
 fra dicitur in Glossa quod « redemptio est destru-  
 « ctio diabolicæ potestatis, facultas libertatis, quæ  
 « nobis data est fuso illius sanguine. » Unde et  
 ipse Dominus imminente passione dixit, Joan. 12:  
 « Nunc judicium est mundi, nunc princeps hujus  
 « mundi ejicietur foras, » Glossa « Diabolus qui  
 « dominatur in malis mundo deditis. » Ad ejus  
 evidentiam sciendum, quod circa potestatem diaboli,  
 quam in homines exercebat ante Christi passionem,  
 tria sunt consideranda. Primum quidem est ex parte  
 hominis, qui suo peccato meruit ut in potestatem  
 diaboli traderetur, per ejus tentationem fuerat su-  
 peratus. Aliud autem est ex parte Dei quem homo  
 peccando offenderat, qui per suam justitiam reli-  
 querat hominem potestati diaboli. Tertium ex par-  
 te diaboli, qui sua nequissima voluntate homi-  
 nem ab assecutione salutis impediabat. Quantum  
 ergo ad primum, homo est a potestate diaboli  
 liberatus per passionem Christi in quantum passio  
 Christi est causa remissionis peccatorum. Quan-  
 tum ad secundum dicendum est, quod passio Chri-  
 sti liberavit nos a potestate diaboli, in quantum  
 nos Deo reconciliavit. Quantum ad tertium, passio  
 Christi nos liberavit a diabolo, in quantum in pas-  
 sione Christi excessit modum potestatis sibi traditæ  
 a Deo, machinando in mortem Christi, qui non  
 habebat meritum mortis, cum esset absque peccato.  
 Unde Augustinus, 15 de Trin.: « Justitia Christi  
 « diabolus victus est: qui cum in eo nihil dignum

« morte inveniret, occidit eum. Inde etiam utique  
 « justum est, ut debitores quos tenebat, liberi di-  
 « mittantur, videlicet credentes in eum, quem sine  
 « ullo debito occidit. »

Notandum insuper, quod potestas diaboli in  
 duobus consistit secundum duas manus ejus: unam  
 qua impellit ad peccatum, alteram qua trahit ad  
 supplicium. Secundum primam primos parentes et  
 in eis totum genus humanum vicerat: secundum  
 alteram omnes ad infernum trahebat et detinebat.  
 Primam debilitavit Christus, dum hostem vicit, et  
 hominibus multa auxilia præparavit: secundam  
 destruxit in hominibus quoad sufficientiam, in mem-  
 bris vero suis quoad efficientiam. De reconciliatione  
 facta per passionem Christi dicitur Rom. 5: « Re-  
 « conciliati sumus Deo per mortem Filii ejus. »  
 Ad ejus evidentiam sciendum, quod passio Christi  
 est causa nostræ reconciliationis ad Deum duplici-  
 ter: uno modo in quantum removel peccatum, per  
 quod homines constituuntur inimici Dei, secundum  
 illud Sap. 4: « Simul odio sunt Deo impius et  
 « impietas ejus: » et in Psal. 5: « Odisti omnes  
 « qui operantur iniquitatem; » alio modo in quan-  
 tum est Deo sacrificium acceptissimum: est enim  
 hic proprius effectus hujus sacrificii, ut per ipsum  
 placetur Deus, sicut cum homo offensam in eo  
 commissam remittit propter aliquod obsequium ac-  
 ceptum, quod ei exhibetur. Unde dicitur 1 Reg.  
 16: « Si dominus incitat te adversum me, odoretur  
 « sacrificium. » Et similiter totum bonum fuit,  
 quod Christus voluntarie passus est, quod placatus  
 est super omni offensa generis humani quantum  
 ad eos qui passo Christo conjunguntur. Hinc est,  
 quod Christus dicitur mediator Dei et hominum.  
 Unde dicit Glossa super illud 1 Tim. 2: « Unus est  
 « mediator Dei et hominum homo Christus Jesus: »  
 « qui mediator dictus est, quia inter Deum im-  
 « mortalem et hominem mortalem est Deus homo  
 « reconcilians hominem Deo. » Dionysius, 4 de  
 div. Nom. dicit: « Angelos esse medios, quia se-  
 « cundum naturam sunt infra Deum et supra ho-  
 « mines constituti: et mediatoris officium exereant,  
 « non quidem principaliter et perfecte sicut Chri-  
 « stus, sed ministerialiter et dispositive. » Unde et  
 Matth. 4, dicitur, quod « Angeli accesserunt, et  
 « ministrabant ei, » scilicet Christo.

Notandum insuper, quod Christus dicitur me-  
 diator secundum naturam humanam; unde dicit  
 Glossa super illud 1 Tim. 2: « Unus est mediator etc. »:  
 « In tantum est mediator, in quantum homo est;  
 « in quantum autem Verbum, non est mediator,  
 « sed unus cum Patre Deus. » Ad ejus eviden-  
 tiam est sciendum, quod medium dicit ordinem  
 inter primum et ultimum. Ordo autem iste impor-  
 tat tria: oportet enim quod sit post primum et  
 ante ultimum; item quod conjungat ultimum pri-  
 mo: item quod participet utriusque proprietates  
 aliquo modo, ita quod in ipso communicent: has  
 tres invenimus in Christo, secundum quod homo:  
 sic enim erat infra Deum gradu naturæ, et supra  
 ceteros homines propter gratiam unionis. Item con-  
 jungit homines Deo officio ut causa proxima, per-  
 ficiendo opera quibus conjunctionis impedimentum  
 removetur. Item participat eum utroque extre-  
 morum, scilicet in conditionibus infirmitatis cum  
 homine, et in conditionibus nobilitatis cum Deo.  
 Prædictas vero conditiones in Christo secundum quod  
 Deus, non invenimus. De aperitione januæ cælestis

facta per Christi passionem dicitur Hebr. 10: « Habemus fiduciam in introitum sanctorum in sanguine Christi. » Glossa: « Certi sumus, quod introibimus in sancta sanctorum caelestia per sanguinem Christi. » Unde cantat Ecclesia: « O admirabile pretium, ejus pondere captivitas redempta est mundi, tartarea confracta sunt claustra inferni, aperta est nobis janua regni. » Ad ejus evidentiam sciendum, quod clausio januae est obstaculum quoddam prohibens homines ab ingressu regni caelestis propter peccata, sicut dicitur Isa. 25: « Via illa sancta vocatur, et non transibit per illam pollutus. » Est autem duplex peccatum impediens ab ingressu regni caelestis; scilicet originale et actuale. Per passionem autem Christi liberati sumus ab utroque peccato: quia communicamus ejus passioni per fidem et caritatem et fidei sacramenta: et ideo per passionem Christi aperta est nobis janua regni caelestis: et hoc est quod dicit Apostolus Hebr. 6: « Christus assistens pontifex futurorum honorum etc., per proprium sanguinem introivit semel in sancta: » Glossa: « idest in caeleste habitaculum, scilicet in sancta sanctorum. » In figura hujus dicitur Num. 33, quod « homicida manebat in civitate refugii, donec sacerdos magnus, qui oleo unctus est, moriatur: » Glossa « idest in cruce. »

Notandum vero, quod « tria sunt consideranda in passione Christi, » ut dicit Bernardus, « videlicet opus, modus et causa: nam in opere quidem patientia, in modo humilitas, in causa caritas commendatur. Patientia autem singularis, quod videlicet supra dorsum ejus fabricaverunt peccatores, et adversus Patrem non murmuravit, a quo missus fuerat; non adversus genus humanum, pro quo quae non rapuit exsolvit; non denique contra populum peculiarem sibi, a quo pro tantis beneficiis tanta mala recepit. Plectuntur aliqui pro peccatis suis et humiliter sustinent, et hoc eis ad patientiam reputatur: flagellantur alii non tam purgandi quam probandi coronandique, et major in his patientia commendatur. Quomodo non maxima in Christo censeatur patientia, qui sicut nullum peccatum omnino habuit nec actu proprio nec contractu, sed nec in quo crescere posset habens? Humilitas autem admirabilis: nempe in humilitate iudicium ejus sublatum est. O novissimum et altissimum, o humilem et sublimem, opprobrium hominum et gloria Angelorum; nemo illo sublimior, et nemo illo humilior. » Caritas vero inestimabilis. Joan. 15: « Majorem, » inquit, « caritatem nemo etc. » « Tu majorem, Domine, habuisti ponens etiam eam pro inimicis. Vix pro justo quis moritur; tu vero pro injustis passus es; moriens propter delicta nostra, qui venisti gratis justificare peccatores, servos facere fratres, captivos heredes, exules reges. » De sexto patet, videlicet de persequentium caecitate et gravitate peccati eorum: de quibus dicitur 1 Corinth. 2: « Si cognovissent, nunquam Dominum gloriae crucifixissent: » et Matth. 25: « Et vos implete mensuram patrum vestrorum: » ubi dicit Chrysostomus, quod quantum ad veritatem excesserunt mensuram patrum suorum: illi enim homines occiderunt, isti Deum crucifixerunt. Ad horum autem evidentiam est sciendum, quod apud Judaeos quidam erant majores, qui eorum principes dicebantur, qui cognoverunt, ut dicitur

in lib. vet. et novi testamenti, sicut et daemones cognoverunt, eum esse Christum in lege promissum: omnia enim signa videbant quae dixerunt futura Prophetae: mysterium autem divinitatis ejus ignorabant: et ideo Apostolus dixit, « Si cognovissent etc. » Sciendum tamen, quod eorum ignorantia erat quodammodo affectata: videbant enim signa ipsius divinitatis, sed ex odio et invidia Christi ea pervertebant, et verbis ejus, quibus se Filium Dei fatebatur, credere noluerunt; unde ipse de eis dicit Joan. 12: « Si non venissem, et locutus eis non fuisset, peccatum non haberent; nunc autem excusationem non habent de peccato suo. » Et postea subdit: « Si opera non fecissem in eis quae nemo alius fecit, peccatum non haberent. » Unde peccatum eorum fuit gravissimum tum ex genere peccati, tum ex malitia voluntatis. Quidam vero apud Judaeos erant minores, idest populares, qui non plene cognoverunt ipsum esse Christum nec Dei Filium, licet etiam aliqui eorum in eum crederent propter signorum multitudinem et efficaciam doctrinae: tamen postea decepti fuerunt a suis principibus, ut eum non crederent nec Christum, nec Filium Dei esse: unde et Petrus dixit eis Act. 5: « Scio quod per ignorantiam fecistis, sicut et principes vestri, » qui scilicet principes seducti erant. Unde licet gravissime peccarent quantum ad genus peccati, in aliquo tamen diminuatur peccatum eorum propter ignorantiam eorum; unde super illud Luc. 25: « Nesciunt quid faciunt, » dicit Beda: « Pro illis rogat qui nescierunt quid fecerunt, zelum Dei habentes, sed non secundum scientiam. » Multo magis fuit excusabile peccatum gentilium, per quorum manus crucifixus est Christus, qui legis scientiam non habuerunt. » Nota quod Judas tradidit Christum non Pilato, sed principibus sacerdotum, qui tradiderunt eum Pilato, secundum illud Joan. 18: « Gens tua et Pontifices tui tradiderunt te mihi. » Horum tamen omnium peccatum fuit majus quam Pilati, qui timore Caesaris Christum occidit, et etiam quam peccatum militum, qui mandato praesidis Christi crucifixerunt non ex cupiditate sicut Judas, nec ex invidia et odio sicut principes sacerdotum.

Notandum tamen, quod eadem actio diversimode judicatur in bono et in malo, secundum quod ex diversa radice procedit. Pater enim tradidit Christum, et ipse seipsum ex caritate: et ideo laudatur: Judas autem Christum ex cupiditate; Pilatus vero ex timore mundano, quo timebat Caesarem; et ideo ipsi vituperantur.

## ARTICULUS XIX.

### *De morte Christi.*

Sextodecimo videamus de morte, de qua dicitur Joan. 11: « Expedi vobis ut unus moriatur homo pro populo. » Unde notandum, quod expediens fuit Christum mori. Primo propter nostrae redemptionis complementum: quia licet quaelibet passio Christi habuit infinitam virtutem propter divinitatis unionem; non tamen per quamlibet passionem conservata fuisset humani generis redemptio, sed per mortem. Unde Spiritus sanctus notabiliter per os Caiphae dixit, « Expedi vobis ut unus moriatur etc. » Psal. 50: « In manus tuas, Domine, commendo spiritum meum. » Glossa, « Po-



« pulus fidelis passione Christi redemptus, dicit gratias agens: Tu Domine Deus veritatis, redemisti me in capite Christo clamante: In manus tuas, Domine, commendo etc. » Unde Augustinus: « Admiremur, gratulemur, jucundemur, amemus, laudemus, adoremus: quoniam per Redemptoris nostri mortem de tenebris ad lucem, de morte ad vitam, de exilio ad patriam, de luctu ad gaudium vocati sumus. »

Notandum vero, quod proprie alicujus causae effectus considerantur secundum similitudinem causae. Unde, quia mors est quaedam privatio vitae, proprius effectus mortis attenditur circa remotionem eorum quae contrariantur nostrae salutis: quae quidem sunt mors animae et mors corporis: et ideo per mortem Christi dicitur destructa etiam in nobis animae mors, quae est peccatum, secundum illud Rom. 4: « Traditus est, » scilicet in mortem, « propter delicta nostra: » et mors corporis, quae consistit in separatione animae a corpore, secundum illud 1 Cor. 15: « Absorpta est mors in victoria. » Secundo fuit expediens mori Christum, propter fidei, spei et caritatis augmentum. De augmento fidei dicitur in Psalm. 140: « Singulariter sum ego donec transeam. » Glossa: « de mundo ad Patrem. » Cum autem transiero ad Patrem, tunc multiplicabor: » Joan. 12: « Nisi granum frumenti etc. » Augustinus: « Se dicebat granum mortificandum in infidelitate Judaeorum, multiplicandum fide omnium populorum. » De augmento spei dicitur Rom. 8: « Qui proprio Filio suo non pepercit, sed pro nobis omnibus tradidit illum, quomodo non cum illo omnia nobis donavit? » Glossa: « in praesenti Dei justitiam, et in futuro aeternam vitam, quod minus est, quia non potest hoc negare: quia minus est omnia donare, quam nostri causa illum morti tradere: quasi » diceret, Non potest hoc negare. Bernardus: « Quis non rapiatur ad spem impetrandi fiduciam, qui attendit crucifixi corporis positionem? videlicet caput inclinatum ad osculandum, brachia extensa ad amplectendum, manus perforatas ad largiendum, latus apertum ad diligendum, pedes affixos ad nobiscum manendum. » Cant. 2: « Veni columba mea in foraminibus petrae. » Glossa 1: « In vulneribus Christi Ecclesia sedet et nidificat, cum in passione Domini spem salutis suae ponit, et per hoc ab insidiis accipitris, idest diaboli, se tutandam confidit. » De augmento caritatis dicitur Ecl. 25: « In meridiano exurit tibi, » idest in passionis fervore accendit terrenos ad amorem. Bernardus: « Super omnia te reddidit amabilem mihi, bone Jesu, calix quem bibisti. Opus nostrae redemptionis, omnino amorem nostrum facile sibi vendicat totum: hoc est quod nostram devotionem et blandius allicit, et justius erigit, et acrius stringit, et afficit vehementius. » Tertio fuit expediens Christum mori propter sacramentum salutis nostrae, ut ad similitudinem mortis ejus huic mundo moreremur. Coloss. 5: « Mortui enim estis, et vita vestra etc. » Glossa, « vanis et caducis. » Job 7: « Suspendium elegit anima mea, et mortem ossa mea. » Gregorius: « Anima est intentio mentis, ossa fortitudo carnis. Quod suspenditur ab imo elevatur. Anima ergo suspenditur ad aeterna, ut moriantur ossa; quia amore aeternae vitae omnem fortitudinem exterioris vitae in se necat. » Hujus autem mortis signum est, si a

mundo quis despicitur: unde dicit Gregorius: « Quia mare viva corpora in se retinet, et mortua mox ex se pellit. » Quarto fuit expediens Christum mori propter perfectae virtutis exemplum: unde 1 Petr. 2: « Christus passus est pro nobis, vobis relinquens exemplum. » Glossa, « tribulationis, contumeliarum, flagellorum, crucis, mortis, ut sequamur vestigia ejus. » 2 Timoth. 2: « Si sustinebimus, » Glossa « pro Christo tribulationes et passiones » et « conregnabimus. » Glossa, « cum illo in aeterna beatitudine. » Bernardus: « Quoniam pauci, Domine, post te ire volunt, cum tamen pervenire ad te nemo sit qui nolit, hoc scientibus cunctis, quod delectationes in dextera tua usque in finem; propterea omnes volunt te frui, at te non ita imitari volunt conregnare cupiunt, sed compati: non curant (1) quaerere, quem tamen desiderant invenire; cupientes consequi, sed non sequi. » Verum etiam hoc exemplo docemur non solum pro Christo pati, sed etiam pro proximis animas ponere; unde 1 Joan. 5: « Quemadmodum Christus animam suam pro nobis posuit, ita et nos debemus pro fratribus animas ponere. »

Notandum vero, ut dicit Damascenus 5 lib., « etsi mortuus est ut homo, et sancta anima ejus a corpore separata est, divinitas inseparabilis ab utroque permansit. » Ad ejus evidentiam sciendum, quod id quod per gratiam Dei alicui conceditur, nunquam absque culpa revocatur: unde dicitur Roman. 11, quod « sine poenitentia sunt dona Dei, et vocatio Dei: » Glossa: « dona Dei, idest promissio, et vocatio Dei, idest electio ab aeterno, sunt sine poenitentia et mutatione, consilii. » Multo autem major est gratia unionis, per quam divinitas est humanae naturae in persona Christi conjuncta, quam gratia adoptionis qua alii sanctificantur; et etiam magis permanentes ex sui ratione; quia haec gratia ordinatur ad unitatem personalem, gratia vero adoptionis ad quamdam unionem effectivalem. Et tamen videmus, quod gratia adoptionis nunquam perditur sine culpa. Cum ergo in Christo nullum fuerit peccatum, impossibile fuit ut solveretur unio divinitatis ipsius a carne sive ab anima: unde de Filio Dei dicitur quod sepultus est, quia corpus ejus sepultum fuit: et quod descendit ad inferos, quia anima ejus separata a corpore descendit ad inferos.

## ARTICULUS XX.

### *De sepultura Christi.*

Decimoseptimo videamus de sepultura Christi; de qua dicitur Isa. 20: « Et erit sepulchrum ejus gloriosum, » idest ab omnibus honorabitur. De modo autem sepeliendi legitur Joan. 19. Fuit autem conveniens Christum sepeliri, tum propter fidem mortis ejus, quia sepeliri mortuorum est: unde legitur Matth. 25, quod Pilatus non concessit Joseph corpus Christi ad sepeliendum, nisi cognito prius a Centurione de morte ejus: tum propter spem resurrectionis, quae datur in membris ex capite. Joan. 5: « Omnes qui in monumentis sunt etc.; » tum propter mysterium sepulturae spiritualis, de qua dicitur Rom. 6: « Consepulti enim sumus per baptismum cum illo in mortem, et in illo consepulti in baptismo, » supple, « ei estis, » idest ad similitudinem sepulturae ejus baptizati sunt, ut non (1) *At.* sed compati non: curant quaerere etc.



videantur quid fuerunt, scilicet veteres peccatores, sed novi justi, sicut Christus in sepulchro positus non videbatur. Nota etiam, quod per sepulchrum caelestis contemplatio significatur: unde super illud Job 5, « Gaudeant vehementer eum invenerint sepulchrum » dicit Gregorius: « Sicut in sepulchro corpus, ita in divina contemplatione anima absconditur mundo mortua, ubi ab omni strepitu saeculi quasi trina immersio per triduum sepulturae est quies. » Psal. 30: « Abscondes eos in abscondito faciei tuae a conturbatione hominum. » Tribulati, et opprobriis hominum vexati mente intrantes ad vultum Dei non turbantur. Sunt autem tria necessaria ad hanc sepulturam spiritualem Dei: videlicet ut mens virtutibus exerceatur, ut tota munda et candida efficiatur, ut huic mundo funditus moriatur: quae circa Christi sepulturam mystice sunt demonstrata. Primum signatum est Marc. 14, ubi legitur, quod beata Maria Magdalena praevenit ungere corpus Jesu in sepulturam, quia unguentum nardi pistici propter sui pretiositatem virtutes designat, quibus in hac vita nihil est pretiosius, secundum illud Eccl. 26: « Non est ponderatio digna continentis animae. » Ideo sancta anima debet prius per exercitium virtutis inungi, quae vult in divina contemplatione sepeliri: unde Job 5: « Ingredieris in abundantia sepulchrum, » Glossa « divinae contemplationis: » « sicut infertur acervus tritici in tempore suo, » Glossa « quia tempus actionis praemium est aeternae contemplationis; et necesse est ut perfectus prius mentem virtutibus exerceat, et eam post in horreum quietis condat. » Secundum signatum est Joann. 19, ubi legitur, quod Joseph mercatus est sindonem etc., quia sindon est pannus lineus, ut dicit Remigius, et cum magno labore ad candorem perducitur: unde significat internum mentis candorem, ad cuius perfectionem cum magno labore pervenitur, Apocal. 22: « Qui justus est, justificetur adhuc; et sanctus, sanctificetur adhuc. » Rom. 6: « In novitate vitae ambulemus, » Glossa: « De bono in melius proficiendo per justitiam fidei et spem gloriae. » Igitur homines internae candore munditiae debent in sepulchro divinae contemplationis recondi: unde super illud Matth. 5: « Beati mundo corde quoniam ipsi Deum videbunt, » dicit Hieronymus: « Mundus Dominus a mundo corde conspicitur. » Tertium signatum est Joann. 19, ubi subjungit « Venit Nicodemus ferens mixturam myrrhae et aloes, quasi libras centum: » quia per libras centum myrrhae et aloes, quibus caro mortua incorrupta conservatur, perfecta mortificatio sensuum exteriorum designatur: quia mens mundo mortua conservatur, ne a vitiis corrumpatur, secundum illud 1 Corinth. 4: « Licet is qui foris est noster homo corrumpatur; tamen is qui intus est renovatur de die in diem, » Glossa « idest assidue purior efficitur a vitiis per ignem tribulationis. » Igitur mens hominis prius debet cum Christo huic mundo mortificari, et postea in secreto divinae contemplationis cum ipso tumulari. Unde Coloss. 5: « Mortui estis cum Christo, » Glossa « vanis et caducis: » et postea subjungitur: « Et vita vestra abscondita est cum Christo in Deo. »

Possumus tamen adhuc circa sepulturam Christi quatuor notare, quibus indigemus ad hoc quod corpus Christi in sepulchro cordis recondatur devoti. Primum est mentis purificatio, quae per

*S. Th. Opera omnia. V. 17.*

sindonem Joseph significatur: unde dicit Glossa super Joann. quod « in sindone munda Jesus involvit, qui cum pura mente suscipit. » Secundum est corporis castigatio, quae per myrrham et aloes, quibus caro mortua conservatur a corruptione, significatur: unde Theodoretus: « Deest autem non solum pura anima suscipere corpus Christi, sed etiam puro corpore. » De Consecratione, distinctione 2: « Omnis homo ante communionem a propria uxore abstinere debet tribus aut quatuor aut sex diebus. » Ratio autem hujus: quia ad assumptionem corporis Christi requiritur elevatio mentis in Deum per caritatem et fervorem dilectionis: quae elevatio maxime impeditur per delectationem veneream, quae deprimit ad sensibilia, ut dicit Augustinus in libro Soliloquiorum. Tertium est totius vitae innovatio figurata per sepulchri novitatem: unde 1 Cor. 5, dicitur: « Ita que epulemur non in fermento veteri etc.: » et infra: « Sed in azymis sinceritatis, » secundum Glossam, « idest novae vitae, » « et veritatis, » « ut sine omni fraude simus, ita ut sinceritas novam vitam faciat, et veritas omnem fraudem excludat. » Quartum est devota Christi meditatio, quae significatur per sepulchrum excisum in petra: unde Theodoretus: « Imitemur et nos Joseph, et conemur Christi corpus suscipere per unitatem, et ponere in monumento exciso in petra, idest in anima memorante, et non obliviscente Deum. » Unde Lucae 25: « Hoc facite in meam commemorationem. » Rabanus: « Discite quo pacto decet edere corpus Christi, in memoriam scilicet obedientiae ejus usque ad mortem; et qui vivunt, non amplius in se vivant, sed in eo qui pro eis mortuus est et resurrexit. »

Notandum insuper, quod ex peccato consequitur homo post mortem quemdam defectum ex parte corporis; videlicet, quod corpus redditur terrae ex qua assumptum est. Hic autem defectus in nobis attenditur secundum duo: scilicet secundum positionem, et secundum resolutionem: quorum primum Christus pati voluit, non autem secundum, juxta illud Psal. 15: « Nec dabis sanctum tuum videre corruptionem, » quod exponit Damascenus 4 libro, de corruptione quae est per resolutionem in elementa. Hujus autem ratio est, quia corpus Christi ejus materiam assumpsit de humana natura, sed formatio ejus non fuit nisi ex virtute Spiritus sancti; et ideo propter substantiam materiae subterraneanum locum qui corporibus mortuis deputari solet, pati voluit: locus enim debetur corporibus secundum materiam praedominantis elementi; sed dissolutionem corporis per Spiritum Sanctum formati pati noluit. Unde quantum ad hoc Christus ab aliis hominibus differebat. Sic ergo in assumptae humanitatis signum, conveniens fuit corpus Christi sub terra poni: sed ad ostensionem divinae virtutis conveniens fuit ut non dissolveretur. Unde Chrysostomus dicit, quod « viventibus aliis hominibus his qui egerunt strenue arident propria gesta; his autem pereuntibus pereunt: sed in Christo totum est contrarium: nam ante crucem sunt omnia modesta et infirma: ut autem crucifixus est, omnia clariora facta sunt: ut noscas non purum hominem crucifixum. »

Notandum insuper, quod Christus tribus diebus et tribus noctibus dicitur fuisse in corde terrae, Matth. 12, illo locutionis modo, quo pars pro toto solet poni. Cum ex die et nocte unus dies naturalis con-

stituitur, quaecumque parte et diei et noctis computata, qua Christus fuit in morte, tota illa die dicitur fuisse in morte. Secundum autem sacrae Scripturae consuetudinem nox eum sequenti die computatur, eo quod Hebraei tempora secundum cursum lunae observant, quae de sero incipit apparere. Fuit autem Christus in sepulchro ultima parte sextae seriae: quae si eum praecedente nocte computetur, erit dies artificialis, et nox quasi unus dies naturalis; nocte vero sequenti sextam seriam computata eum integra die sabbati, fuit in sepulchro; et sic sunt duo dies. Jacuit etiam in sepulchro sequenti nocte, quae praecedit diem Dominicum, in qua surrexit media nocte, vel diluculo secundum aliquos. Unde si computetur nox tota vel pars ejus eum sequenti die dominica, erit dies tertius naturalis. Sicut enim primi dies propter futuri hominis lapsum a luce in noctem, ita iste propter hominis reparationem a tenebris in lucem computantur.

Notandum etiam, quod masculinum genus designat personam, neutrum vero genus naturam: unde de Trinitate dicimus, quod Filius est alius a Patre, non aliud. Secundum hoc Christus in triduo mortis fuit totus in sepulchro, totus in inferno, et totus in caelo, propter personam quae unita erat et carni quae jacebat in sepulchro, et animae infernum spolianti, et subsistebat in natura divina in caelo regnante. Similiter est dicendum, cum unio animae cum corpore faciat hominem, quod Christus in illo triduo non fuit homo, licet caro et anima unita essent eum verbo.

#### ARTICULUS XXI.

##### *De descensu Christi ad inferos.*

Decimo octavo videamus de descensu Christi ad inferos: de quo dicitur Ephes. 4: « Quod autem ascendit, quid est nisi quia (1) et descendit primum in inferiores partes terrae, » Glossa « idest (2) ad inferos. » Ad eujus evidentiam sciendum est, quod infernus quandoque nominat locum, aliquando nominat supplicium: unde dicit Glossa Jacobi 2, quod « daemones semper circumferunt suum infernum, sicut febricitantes ardorem suum. » Christi vero anima non descendit ad inferni supplicia secundum locum. Fuit autem conveniens Christum ad infernum descendere, primo ad suae dignationis manifestationem: unde Matth. 11: « Tu es qui venturus es, an alium expectamus? » ac si aperte dicat, Sicut pro hominibus nasci dignatus es, an etiam pro hominibus mori et ad inferos descendere digneris insinua, ut exponit Gregorius in hom. Secundo ad Patrum liberationem: unde Zach. 4: « Tu autem in sanguine testamenti eduxisti vinetos de lacu in quo non erat aqua. » Unde in persona patrum in inferno existentium cantat Ecclesia, « Advenisti desiderabilis, quem expectamus etc. » Tertio ad daemonum confutationem: unde in Psal. 25: « Attollite portas principes vestras, » Glossa « Angeli praecedentes Christum ad infernum, dicunt: O vos principes inferni, tollite portas vestras, idest auferite potestatem, qua usque nunc homines detinebatis in inferno. »

Notandum vero quod quadruplex est infernus: primus est damnatorum, in quo est carentia lucis divinae et visionis aeternae, et poena sensus: se-

cundus infernus super istum dicitur limbus puerorum, in quo sunt duo prima sine tertio: tertius super istum infernus, qui dicitur purgatorium, in quo sunt duo ultima sine primo. Quartus supra istum est sinus Abrahae, in quo non sunt duo extrema, sed medium, scilicet carentia divinae visionis. A primo nunquam transierunt animae ad secundum, nec e converso: a secundo similiter nunquam transierunt ad tertium, nec e converso: a tertio vero transierunt ad quartum, sed non e converso: in hunc vero quartum Christus descendit, et quos ibi invenit, liberavit: unde dicitur infernum momordisse, secundum illud Osee 13: « Morsus tuus ero inferne, » quia partem inde abstulit. Fuit autem anima Christi in hoc inferno per triduum mortis suae eum sanctis Patribus, ut simul educeretur et corpus de sepulchro, et anima de inferno. Quod autem dicitur latroni, « Hodie mecum eris in paradiso, » Luc. 25, intelligendum est de paradiso spirituali. Est enim triplex paradysus. Primus est terrestris, in quo Adam positus fuit, Genes. 2. Secundus caelestis, de quo dicitur Ezech. 28: « In deliciis paradisi Dei fuisti. » Tertius spiritualis, in quo sunt qui divina gloria perfruntur; de isto dicitur latroni, « Hodie mecum eris in paradiso, » quia latro et alii sancti Patres in inferno eum Christo existentes, divina ejus gloria perfruebantur.

#### ARTICULUS XXII.

##### *De Christi resurrectione.*

Decimonono videamus de Christi resurrectione, de qua dicitur Matth. ult.: « Jesum Nazarenum quaeritis crucifixum, non est hic, sed surrexit. » Possumus autem quatuor notare circa Christi resurrectionem: videlicet resurgendi necessitatem, resurgentis qualitatem, resurrectionis veritatem, ultimo resurrectionis causalitatem. De primo, videlicet resurgendi necessitate, dicitur Luc. ult.: « Oportuit pati Christum, et resurgere a mortuis. » Ad eujus evidentiam sciendum, quod necessarium fuit Christum resurgere: primo ad divinae virtutis ostensionem: unde dicitur Joan. 10: « Nemo tollet a me animam meam, » et sequitur: « Potestatem habeo ponendi animam meam, et iterum sumendi eam: » unde Judaeis signum petentibus dixit, « Solvite templum hoc, et post triduum reaedificabo illud, » Glossa, « virtute Trinitatis: » 2 Cor. ult.: « Et si crucifixus est ex infirmitate, sed vivit ex virtute Dei. » Est enim solius divinae virtutis mortuos resuscitare: unde Damascenus: « Credo resurrectionem futuram divina voluntate, virtute, et nutu. » Ubi tria circa tangit resurrectionem: videlicet, voluntatem Dei quae imperat, virtutem quae exequitur, et facilitatem executionis in hoc quod nutum adjunxit ad similitudinem nostram: illud enim nobis facile est facere, quod ad nutum nostrum fit. Secundo ad divinae justitiae commendationem, ad quam pertinet exaltando remunerare eos qui ex caritate Dei et obedientia humiliantur; unde in persona Christi dicitur in Psal. 138: « Tu cognovisti sessionem meam, » idest humilitatem in passione « et resurrectionem, » Glossa « glorificationem in resurrectione. » Est enim Dei justitia prima causa resurrectionis omnium, ut scilicet corpora praemiantur vel puniantur simul cum animabus, sicut communicaverunt in merito

(1) *Al.* qui.

(2) *Al.* Glossa 1. *Sic et infra pluries.*

vel peccato, ut dicit Dionysius cap. 6 ead. Hier. et Damascenus lib. 5 ad fidei instructionem: unde 1 Corinth. 15: « Si Christus non resurrexit, « inanis est praedicatio nostra, inanis est fides « vestra. » Glossa « idest inutilis, cum nulla sit re- « muneratio futura. » Unde in Psal. 29: « Quae « utilitas in sanguine meo: » Glossa « idest in effu- « sione sanguinis mei: dum descendo, quasi per « quosdam gradus malorum in corruptionem: quasi « diceret: nulla. Si enim statim non resurrexero, « corruptumque fuerit corpus meum, nemini annun- « tiabo, neminem lucrabor. » Quarto ad spei ele- vationem: datur enim ex capite membris spes resurgendi: unde 1 Cor. 15: « Si Christus praedi- « catur quia resurrexit a mortuis, quomodo qui- « dam dicunt in vobis, quod resurrectio non est? » Job 19: « Scio quod Redemptor meus vivit, et in « novissimo die de terra surrecturus sum: » ubi dicit Gregorius: « Nihil nos certius habere credi- « mus, quam quod in sinu tenemus. In sinu ergo « spem repositam tenuit, quia vere certitudine « spem resurrectionis praesumpsit. »

Notandum ergo, quod Christus superata morte, prius ad immortalitatem resurrexit: ut sicut in Adam peccante primo vita mortalis apparuit, ita et in Christo satisfaciente primo immortalitas vitae appareret. Redierunt autem alii ad vitam ante Christum vel ab eo vel a Prophetis suscitati, tamen iterum morituri. « Sed Christus resurgens ex mor- « tuis, jam non moritur, » ut dicitur Rom. 6. Unde quia Christus prius necessitatem moriendi effugit, dicitur « primogenitus mortuorum » Apoc. 1, quia prius a somno mortis resurrexit iugo mortis excusso: « et primitiae dormientium, » 1 Cor. 15, quia prius aliis tempore et dignitate surrexit, ut dicit Glossa, scilicet ad vitam immortalem. Igitur quia Christi resurrectio nostram praecedat ordine temporis, ut dictum est, quia prius ad immortalitatem resurrexit: tum ordine causae, quia resurrectio Christi est causa nostrae resurrectionis, ut infra patebit: tum etiam ordine dignitatis, quia prae cunctis gloriosior resurrexit: Christus dicitur primogenitus mortuorum. De his autem qui cum Christo resurrexerunt, dicit Hieronymus: « Et ta- « men cum monumenta aperta sunt, non ante « surrexerunt, quam resurgeret Dominus, ut esset « primogenitus resurrectionis ex mortuis: » unde dicitur Matth. 27, quod exeuntes de monumentis post resurrectionem ejus venerunt in sanctam civitatem. Utrum vero iterum mortui fuerunt, opi- niones sunt. Dicit enim Hieronymus: « Quomodo « Lazarus a mortuis resurrexit, sic et multa cor- « pora sanctorum resurrexerunt, ut Dominum o- « stenderunt resurrexisse. » Remigius vero dicit, quod « incunctanter debemus credere, quod qui « resurgente Domino a mortuis resurrexerunt, a- « sendente eo ad caelos, ipsi pariter ascenderunt, « quoniam majus illis tormentum esset qui resur- « rexerunt, si iterum morituri essent, quam si non « resurgerent. »

Notandum insuper, quod Christi resurrectio non debuit usque ad finem mundi differri, nec etiam nimis accelerari, ut virtus divinitatis ostenderetur, et veritas mortis infra triduum approbaretur. Tertia vero die resurrexit, ut in veritate Trinitatis se ostenderet resurrexisse. Unde etiam quandoque dicitur eum Pater resuscitasse, quandoque ipse Filius propria virtute surrexisse: quod non est contrarium,

eum eadem sit virtus omnino Patris et Filii et Spiritus sancti. Item in signum spiritualis resurrectionis, de qua potest dici illud Osee 6: « Vivifi- « cabit nos post duos dies, in tertia suscitabit « nos: » primus dies est contritio, secundus est con- fessio, tertius satisfactio. Item ut in novitate vitae ambulemus, ad Rom. 6. Glossa: « De bono in melius « proficiendo, scilicet per fidem, spem et caritatem. » Item sicut diem resurrectionis praecessit dies mor- tis in pasceve, et dies quietis in sabbato; ita resurrectionem nostram gloriosam praecedat morti- ficatio vitiorum, et quies contemplationis aeterno- rum. Sciendum etiam, ut dicit Augustinus in lib. de Trinit., quod Christus in diluculo resurrexit; in quo aliquid lucis apparet, et aliquid noctis tene- brarum: unde de mulieribus dicitur Joan. 20, quod « eum adhuc tenebrae essent, venerunt ad monu- « mentum. » Ratione ergo harum tenebrarum Gregorius dicit, Christum media nocte surrexisse, non quidem nocte divisa in duas partes aequales, sed infra illam noctem. Illud vero diluculum et pars noctis et pars diei dici potest propter conve- nientiam quam habet cum utroque. Quod autem Christus illucescente die resurrexit, mystice desi- gnatur quod nos per suam resurrectionem ad lucem gloriae inducebat: sicut jam mortuus est die ad- vesperascete et tendente in tenebras, ad ostendendum quod per suam mortem destrueret tenebras poenae et culpae. De secundo, scilicet resurgentis qualitate, dicitur Philip. 5: « Reformabit corpus « humilitatis nostrae configuratum corpori clarita- « tis suae, » Glossa « quam habuit in resurrectione. » Hoc idem, videlicet, quod Christus in resurrectione sua habuit corpus gloriosum, patet triplici ratione. Prima quidem, quia resurrectio Christi est exem- plar et causa nostrae resurrectionis, ut habetur 1 Cor. 15. Sancti autem habebunt in resurrectione corpora gloriosa, sicut dicitur ibid.: « Semina- « tur in ignobilitate, surget in gloria. » Unde cum causa nobilior sit causato, et exemplar exem- plato, multo magis corpus Christi resurgentis fuit gloriosum. Secunda, quia per humilitatem passionis meruit gloriam resurrectionis; unde et ipse dicebat Joan. 12: « Nunc anima mea turbata est, » quod pertinet ad passionem: et postea subdit, « Pater, « clarifica nomen tuum, » in quo petit gloriam resurrectionis. Unde dicit Augustinus: « Ut Christus « in resurrectione clarificetur, humiliatus est in « passione: humilitas claritatis est meritum, claritas « humilitatis est praemium. » Tertia, quia anima Christi a principio suae conceptionis fuit gloriosa per fruitionem divinitatis. Est autem dispensative factum ut ab anima gloria non redundaret in cor- pus, ad hoc ut mysterium redemptionis nostrae sua passione impleret. Et ideo peracto hoc mysterio passionis et mortis, anima Christi statim in corpus in resurrectione assumptum suam gloriam derivavit, et ita factum est illud corpus gloriosum. Sunt au- tem quatuor dotes corporis glorificati: videlicet claritas, impassibilitas, subtilitas et agilitas. Ad qua- rum evidentiam sciendum, quod claritas causatur ex redundantia gloriae animae in corpus: et secundum quod anima est majoris meriti, ita etiam differentia claritatis erit in corpore, ut patet 1 Corinth. 15. Impassibilitas vero resultat ex virtute animae corpus suum continentis potenter, ut a nullo exteriori agen- te valeat immutari. Subtilitas vero est in corporibus glorificatis propter completissimam corporis perfe-



tionem; quae quidem completio est ex dominio animae glorificatae, quae est forma, scilicet corporis, ratione cuius corpus gloriosum spirituale dicitur, quasi omnino spiritui subjectum. Prima autem subjectio qua corpus animae subicitur, est ad participandum esse specificum, prout subicitur ei ut materia formae: deinde subicitur ei ad alia animae opera prout anima est motor. Et ideo prima ratio spiritualitatis in corpore est ex subtilitate, et deinde ex agilitate et aliis proprietatibus corporis gloriosi. Has vero dotes tangit Apostolus 1 Cor. 15 dicens: « Seminatur in corruptione, » Glossa « idest sepelitur, » vel mortificatur, ut corrumpatur: « surget in incorruptione, » Glossa « idest immortale et impassibile. » Seminatur in ignobilitate, Glossa « idest sine omni honore: » « surget in gloria, » idest, « gloriosum: » « seminatur in infirmitate, » Glossa « quia non valet se movere vel regere: » « surget in virtute, » Glossa, « idest vere vivum, et vegetativum, » « seminatur corpus animale, » Glossa « idest tale, quod cibus sustentatur, ut vivat: » « surget spirituale, » Glossa, « quia tunc plene spiritui subditur. » Corpus enim jam non repugnabit, sed quasi simile spiritui suo erit, quia nec aliquam corruptionem patitur, nec alimentis indigebit.

Notandum, quod licet Christus haberet corpus gloriosum, tamen cicatrices in corpore suo reservavit: quod quidem conveniens fuit, primo in signum victoriae. Dicit enim Beda super Luc., quod « non ex impotentia curandi cicatrices servavit, » sed ut in perpetuum victoriae suae circumferat « triumphum. » Unde Augustinus, 22 de civit. Dei, dicit, quod « fortassis in illo regno in corporibus martyrum videbimus vulnerum cicatrices, quae pro Christi nomine pertulerunt: non enim difformitas in eis, sed dignitas erit, et quaedam quavis in corpore, non corporis, sed virtutis pulchritudo apparebit seu fulgebit. » Secundo ut discipulos in fide resurrectionis solidarret: unde Dominus Joan. 20 ad Thomam: « Infer digitum tuum huc. » Theodoretus. « Qui prius infidelis erat, post lateris tactum optimum se theologum ostendit: nam duplicem naturam unitamque hypostasim Christi disseruit: dicendo enim, Dominus meus, humanam naturam, dicendo, Deus meus, divinam confessus est, et unum et eundem dicendum Deum et Dominum. » Tertio, ut pro nobis apud Patrem ostensis vulnerum cicatricibus advocaret: unde Rom. 8: « Jesus Christus qui mortuus est, immo qui et resurrexit, » qui est ad dexteram Dei, qui etiam interpellat « pro nobis, » Glossa « non voce, sed miseratione et repraesentatione humanitatis, dum quotidie hominem quem assumpsit et grave genus mortis quod pro nobis sustinuit, vultui paterno offerat, ut nostri misereatur: cuius postulatio, cum tantus sit, non potest contemni. » Sed notandum, ut dicit Gregorius, « quod justus ad vocatus injustas causas non suscipit, neque dare verba pro injustitia sentit. Unde oportet nos juste vivere, si volumus eum patronum habere. » Quarto, ut sua morte redemptis quam misericorditer sint adjuti, propositis ejusdem mortis insinuet signis. Postremo, ut in iudicio quam juste damnentur annuntient: unde Apocal. 1: « Videbit eum omnis oculus et qui cum pupugerunt: » unde in lib. de Symbolo dicit, quod « Christus inimicis sit demonstraturus vulnera, ut convincens eos veritas dicat: Ecce hominem quem cru-

« cifixistis, videte vulnera quae infixistis, agnoscite » « latus quod pupugistis, quoniam et per vos et » « propter vos apertum est, et intrare nolulistis. » De tertio, scilicet resurrectionis veritate, dicitur Luc. ultimo: « Surrexit Dominus vere. » Scien- dum vero, quod Christus resurrectionis veritatem probavit testimonio angelico, et argumento veridico. De primo dicitur Matth. 28, voce Angeli: « Jesum » « quaeritis Nazarenum crucifixum: surrexit, non » « est hic. » Fuit autem conveniens, ut Christi re- surrectio angelico denuntiaretur testimonio, quia dicit Apostolus Rom. 15: « Quae a Deo sunt, or- » « dinata sunt. » Est hic ordo divinitus institutus, ut ea quae supra homines sunt, hominibus revelentur per Angelos, ut patet per Dionysium, 4 cap. cael. Hier. Christus autem resurgens non rediit ad vitam communiter omnibus notam, sed ad vitam quamdam immortalem et Deo conformem; secundum illud Rom. 6: « Quod enim vivit, vivit » « Deo. » Et ideo conveniens fuit ut angelico testi- monio hominibus manifestaretur: unde dicit Hilarius super Matth.: « Misericordiae Dei Patris in- » « signe est resurgenti Filio ab inferis virtutum » « caelestium ministeria mittere. Atque ideo ipse » « prior resurrectionis est iudex, ut quodam famu- » « latu paternae voluntatis resurrectio nuntiaretur. » De secundo dicitur Act. 1, quod Dominus « ap- » « paruit discipulis suis per quadraginta dies in » « multis argumentis. » Dicitur autem argumentum hoc loco signum aliquod sensibile quod inducit ad alienius manifestationem: et sic Christus argu- mentis probavit resurrectionis veritatem et gloriam. Veritatem autem resurrectionis probavit dupliciter. Uno modo ex parte corporis: circa quod tria ostendit. Primo quod esset verum corpus et solidum, non phantasticum vel rarum, sicut est aer. Hoc ostenditur per hoc, quando corpus suum palpabile ostendit: unde Lucae ult.: « Palpate et videte, quia » « spiritus carnem et ossa non habet. » Secundo ostendit quod corpus esset humanum, ostendendo eis effigiem veram, ut oculis corporalibus intuerentur quam discipuli ejus cognoscentes gaudebant: unde Joan. 20: « Gavisissimi sunt discipuli viso Do- » « mino. » Tertio ostendit, quod esset idem corpus numero, quod prius habuit, per vulnerum cicatrices: unde Luc. ult.: « Videte manus meas et pedes » « meos, quia ego ipse sum. » Alio modo ostendit resurrectionis veritatem ex parte animae iterato cor- pori unitae; et hoc per opera virtutum triplicis vitae. Primo quidem per opera nutritivae, hoc est quod cum discipulis suis manducavit et bibit, ut legitur Luc. ult. Ubi tamen notandum, quod Christus, ut dicit Beda super Luc., « manducavit » « potestate non egestate; » et ponit exemplum tale, « quod aliter absorbet aquam terra sitiens, » « aliter radius solaris calens: illa indigentia, iste po- » « tentia. » Unde cibus ille non cessit in nutri- mentum corporis Christi, sed in praejacentem ma- teriam resolutus fuit. Secundo modo per opera vitae sensitivae in hoc, quod discipulis ad inter- rogata respondit et praesentes salutavit, in quo ostendebat se videre et audire: Luc. ult. et Joan. 20. Tertio per opera vitae intellectivae, in hoc quod Scripturas discipulis suis exposuit, Luc. ult. Gloriam vero suae resurrectionis ostendit cum ad discipulos suos januis clausis intravit: unde Gregorius in homil.: « Palpandam carnem Dominus praebuit, quam » « clausis ostiis introduxit, ut ostenderet post resur-



• rectionem corpus suum ejusdem esse naturae  
• et alterius gloriae. • Similiter ad proprietatem glo-  
riæ pertinebat, quod subito ab oculis discipulorum  
evanuit, ut dicitur Luc. ult.; quia per hoc ostendit  
quod in ejus potestate erat videri et non videri,  
claritatem suam ostendere et occultare, quod per-  
tinet ad potestatem corporis gloriosi. Virtutem e-  
tiam divinitatis ostendit per miraculum, quod fecit  
in piscibus capiendis Joan. 12. Et ulterius, quod  
eis videntibus ascendit in caelum: quia, ut dicitur  
Joan. 3, • Nemo ascendit in caelum nisi qui de-  
• scendit de caelo, filius hominis qui est in caelo. •

Notandum etiam, quod Christus quinquies ap-  
paruit ipsa die resurrectionis. Primo Mariae Mag-  
dalenae: unde Matth. ultim.: • Surgens Jesus mane  
• prima subbati etc. • Fuit autem conveniens,  
ut primo Magdalenae appareret: tum propter ejus  
vehementiam dilectionis, de qua dicitur Joan. 20:  
• Maria stabat ad monumentum foris plorans: •  
ubi dicit Gregorius: • Pensandum est hujus mu-  
• lieris mentem quanta vis dilectionis accenderat,  
• quae a monumento Dominico etiam discipulis  
• recedentibus non recedebat. • Origenes: • Amor  
• faciebat eam stare, dolor coegit eam plorare;  
• stabat et circumspiciebat si forte videret quem  
• diligebat: plorabat, quia ablatum aestimabat quem  
• quaerebat: • tum propter diligentiam inquisitio-  
nis, de qua dicitur Joan. 20: • Et dum fletet, in-  
• clinavit se; • ubi dicit Gregorius: • Certe jam  
• monumentum vacuum viderat, jam sublatum  
• Dominum nuntiaverat: quid est quod iterum  
• se inclinat, iterum eundem videre desiderat, nisi  
• quod amanti semel aspexisse non sufficit, quia  
• vis amoris intentionem multiplicat inquisitionis? •  
tum propter perseverantiam expectationis: unde  
Gregorius: • Quaesivit prius et minime invenit:  
• perseveravit ut quaereret, unde contigit ut in-  
• veniret: quia nimirum virtus boni operis est  
• perseverantia. Unde voce Veritatis dicitur: Qui  
• perseveraverit usque in finem, salvus erit; • tum  
etiam propter fiduciam peccatorum: unde dicit  
Beda super Matth.: • Recte haec mulier quae lae-  
• titiam resurrectionis primo nuntiavit, a septem  
• daemonibus curata esse memoratur, ne quisquam  
• digne poenitens de admissorum venia desperet;  
• et ubi abundavit delictum, superbundasse et  
• gratiam demonstraretur: • tum etiam ut mulier  
quae primo fuit nuntia mortis ad honorem, primo  
etiam hominibus vitam Christi resurgentis in glo-  
ria nuntiaret: unde Cyrillus: • Femina quae quo-  
• dammodo fuit ministra mortis, venerandae resur-  
• rectionis mysterium prima percepit et nuntiavit.  
• Adeptum (1) est ergo femineum genus ignomi-  
• niae absolutionem et maledictionis repudium. •  
Similiter etiam per hoc ostenditur, quod quantum  
ad statum gloriae pertinet, nullum detrimentum  
patitur sexus; sed qui majore caritate ferbuerunt,  
etiam majori gloria ex visione Dei potiuntur; eo  
quod mulieres quae ab ejus sepulcro discipulis  
recedentibus non recesserant, primo viderunt Do-  
minum in gloria resurgentem. Secundo vero appa-  
ruit mulieribus de monumento venientibus. Matth.  
25: • Et exierunt cito de monumento eum timore  
• et gaudio magno: • unde dicit Hieronymus,  
quod • primo mulieres meruerunt audire, Avete,  
• ut maledictum Evae mulieris in mulieribus sol-  
• vatur. • Mystice autem per exitum mulierum

(1) Al. adeptum.

de monumento peccatorum conversio significatur:  
unde Ezech. 37: • Ecce ego aperiam tumulos ve-  
• stros et educam vos de sepulchris vestris popu-  
• lus meus, • quod exponit Glossa de his qui  
• instar Lazari peccatorum suorum fasciis colligati,  
• ad vocem Domini suscitantur. • De qua voce  
dicitur Joan. 5: • Venit hora et nunc est, quando  
• mortui audient vocem ejus: • Glossa • in pec-  
• catis audient vocem Filii Dei, et qui audierint vi-  
• vent, • id est obedierint. Quod autem exierunt  
de monumento mulieres cum timore et gaudio,  
per hoc datur intelligi, quod virtus poenitentiae,  
per quam a monumento peccatorum eximus, timore  
poenae concipitur, secundum illud Isa. 26: • A  
• timore tuo, Domine, concepimus et parturivimus  
• spiritum salutis. • Expulso vero timore per ca-  
ritatem, dolor contritionis in gaudium mutatur, se-  
cundum illud Prov. 14: • Cor quod cognovit a-  
• maritudinem animae suae, in gaudio ejus non  
• miscebitur. • Per cursum vero mulierum desi-  
gnatur justitiae operatio: unde in Psal. 118: • Viam  
• mandatorum tuorum cucurrimus etc. •: ubi dicit  
Augustinus, quod • cordis dilatatio est justitiae o-  
• peratio, ut non timore sed dilectione Dei agatur,  
• quod est donum Dei. • Per occursum Christi  
salutantis designatur divinae virtutis subventio: un-  
de dicit Rabanus quod per hoc ostendit se omni-  
bus iter virtutum inchoantibus, ut ad salutem per-  
petuam pervenire queant, adjuvando occurrere. Job  
24: • Operi manum tuarum porriges dexteram. •  
Per pedum detentionem docetur a futuris peccatis  
praeservatio. Sunt autem pedes Dei secundum sen-  
sum mysticum misericordia et iudicium, quorum  
unum sine altero tenere non est securum: unde  
Bernardus: • Fallitur qui sic osculatur pedem mi-  
• sericordiae, ut pedem iudicii non attendat. • Tertio  
apparuit Petro: Luc. ult.: • Surrexit Dominus vere  
• et apparuit Simoni: • unde dicit Chrysostomus,  
quod ideo videtur primo a Petro, ut qui prius  
confessus est Christum, primo ejus resurrectio-  
nem videret; et etiam qui prius eum negaverat,  
prius sibi voluit apparere, consolans eum ne  
desperaret. Unde etiam Gregorius super illud Matth.  
ult.: • Dicite discipulis ejus et Petro, • dicit  
quod • vocatur ex nomine, ne desperet ex nega-  
• tione. • Bernardus: • Magna gratia et magna  
• pietatis dignatio, quod ei et quasi prae ceteris  
• dignatus est apparere, quem prae ceteris de  
• negatione ejus rea conscientia confundebat. •  
Quarto apparebat discipulis ejus duobus enuntibus  
Emaus. Luc. ult.: • Apparuit autem eis in alia  
• effigie, • ut dicitur Matth. ult. Fuit autem con-  
veniens ipsum sic apparere. Primo ad designandum  
prioris status commutationem: unde dicit Severus:  
• Nemo putet Christum sua resurrectione sui vul-  
• tus effigiem commutasse: sed mutatur effigies,  
• dum efficitur ex mortali immortalis, ut hic sic  
• acquisisse vultus gloriam, non vultus substan-  
• tiam perdidisse. • Secundo propter discipulorum  
dubitationem. Sapien. 1: • Apparet autem eis qui  
• fidem habent in illum. • Praedicti autem ejus di-  
scipuli de ejus resurrectione dubitant: unde Gregorius  
in hom. dicit: • Dominus discipulis de se loquentibus  
• praesentiam exhibuit, sed de se dubitantibus spe-  
•ciem suae cognitionis abscondit. • Tertio propter  
nostram instructionem. 2 Corinth. 2: • Quam-  
• diu sumus in corpore, peregrinamur a Do-  
• mino: • ubi dicit Hieronymus: • Quod Do-

• minus ambulatibus ac laborantibus ostensus est  
 • in aliena effigie, mystice designat, quod fides hic  
 • laborat per vitam activam agens, illic per contem-  
 • plationem secunda visione regnat: hic per specu-  
 • lum contuemur imaginem, illic facie ad faciem  
 • videbimus veritatem. » Sciendum quod Dominus  
 finxit se longius ire non mendacium, sed figura  
 veritatis fuit: unde Augustinus libro 5 de veritate E-  
 vangeli: « Non omne quod fingimus, mendacium est;  
 • sed cum illud fingimus quod nihil est, tunc men-  
 • dacium est. Cum enim fictio nostra refertur ad  
 • aliquam signationem, non est mendacium, sed  
 • aliqua figura veritatis: alioquin omnia quae a  
 • sanctis et sapientibus viris, et etiam ab ipso Deo  
 • figurative dicta sunt, mendacium reputabuntur,  
 • quia secundum usitatum intellectum non consistit  
 • veritas in talibus dictis. Sicut autem dicta sic et  
 • facta siue mendacio finguntur ad aliquam rem  
 • significandam: et sic Dominus finxit se longius  
 • ire, quia a fide discipulorum adhuc peregrinus  
 • erat, » ut dicit Gregorius; etiam, ut Augustinus  
 dicit, « quia longe recessurus erat ascendendo in  
 • caelum, qui per hospitalitatem quodammodo deti-  
 • nebatur in terra. » Quinto apparuit discipulis  
 januis clausis, quando Thomas non erat cum eis.  
 Joan. 50: « Cum sero factum esset die illa etc.: »  
 ubi dicit Augustinus, « quod moli corporis ubi  
 • divinitas erat ostia clausa non obstiterunt, cum  
 • ille quippe eis non apertis intrare potuit, quo  
 • nascente virginitas matris inviolata permansit. »  
 Mystice autem circa hanc apparitionem quatuor  
 sunt notanda: videlicet qualitas temporis, diei so-  
 lemnitas, clausurae firmitas, discipulorum societas.  
 Primum ibi, « cum sero factum esset. » Ubi no-  
 tandum est, quod tempus serotinum quando dies  
 deficit, et ad occasum tendit, significat virtutem de-  
 votae mentis, cui prae desiderio aeternitatis deficit  
 et occidit dies mundanae prosperitatis seu vanitatis:  
 unde in Psal. 67: « Iter facite ei qui ascendit su-  
 • per occasum. » Bernardus: « Bonus est occasus,  
 • cum stat virtus, et cadit vitium. Super occasum  
 • hunc ascendit Dominus, quia non excipit eum  
 • nova vita, nisi vetus ceciderit, » ut dicit Augu-  
 stinus. Secundum est ibi, • Una sabbatorum. »  
 Ubi notandum, quod sabbatum idem est quod  
 requies. Est autem triplex sabbatum sive requies:  
 videlicet corporis tantum, de qua dici potest illud  
 Isa. 1: « Sabbatum, et alias festivitates vestras  
 • non feram: » Glossa « idest non sustinebo am-  
 • plius. » Item quoddam sabbatum est mentis, de  
 quo dici potest illud Exod. 21: « Requies sabbati  
 • sanctificata est Domino, » et infra: « Maneat u-  
 • nusquisque apud semetipsum: » Glossa « idest  
 • quiescat, et non egrediatur ad opus. » Item est  
 etiam quoddam sabbatum mentis et corporis si-  
 mul; de quo dicitur Isa. ult.: « Erit sabbatum ex  
 • sabbato: » Glossa « ille quiescet in futuro, qui  
 • hic quiescit ab opere malo. » Primum sabbatum  
 consistit in corporis otio, sive voluptate; secundum  
 in mentis tranquillitate, tertium in aeterna felicitate.  
 Una ergo sabbatorum venit Jesus, quia in mentis  
 tranquillitate Christus per gratiam ad nos declinat.  
 Quia in pace factus est locus ejus, secundum Psal.  
 75. Sed, heu! maligni spiritus, mentis sabbatum  
 nituntur saepe violare: unde dicitur Thren. 1: « Vi-  
 • derunt eam hostes, et deriserunt sabbata ejus, »  
 Glossa « maligni spiritus, vocationis nostrae otia  
 • ad vacationes et ad cogitationes illicitas pertra-

• hunt. » Tertium ibi, « Et fores essent clausae. »  
 Ubi notandum, quod per fores corporis sensus de-  
 signantur, per quos anima solet egredi et delectari  
 in his omnibus exterioribus, ut dicit Bernardus.  
 Per quos etiam exteriora ingrediuntur ad animam,  
 ut dicitur Joel. 2: « Domo descendit: » Glossa,  
 • quas bonis operibus aedificamus, per fenestras  
 • intrabunt quasi fur. • Fores istae claudendae  
 sunt, juxta illud Isa. 26: « Vade populus meus,  
 • intra in cubiculum tuum, claude super te ostia  
 • tua. » Quod autem fores clausae fuerunt propter  
 metum Judaeorum, mystice designat quod per ti-  
 morem Dei fores sensuum clauduntur: unde Eccl.  
 10: « Si non in timore Dei instanter te tenueris,  
 • cito subvertetur domus tua. » Quartum ibi,  
 • Ubi erant discipuli congregati in unum. » Matth.  
 28: « Ubi duo vel tres congregati fuerint in no-  
 • mine meo etc. » Psalm. 42: « Ecce quam bonum, »  
 Glossa « idest utile, » « et quam jucundum, » Glossa  
 • idest delectabile, » « habitare fratres in unum: » et  
 sequitur: « Sicut unguentum in capite: » Glossa:  
 • Aaron sacerdos Christum significat, qui fuit vi-  
 • ctima et sacerdos. In capite ejus est unguentum,  
 • quia in eo habitavit plenitudo divinitatis corpo-  
 • raliter, sed a capite Christo descendit in barbam,  
 • idest fortes et strenuos quos barba significat,  
 • quae est indicium virilitatis, et ab illis descen-  
 • dit in oram vestimenti ejus. Vestis Christi est  
 • ecclesia, quae est sine macula et ruga: ora ve-  
 • stis finis est in perfectis: hi perfecti, qui in unum  
 • habitant: et est sensus: ita est illud bonum et ju-  
 • cundum, sicut unguentum, idest unctio Spiritus  
 • Sancti, quae prius fuit in capite Christo. » Et  
 sequitur: « Sicut ros Hermon. » Nota, montes illi  
 magno intervallo sunt divisi. Unde spiritualiter in-  
 telligendum est, quia Hermon (1) lumen exaltatum  
 dicitur, et Christus prius in cruce, postea in caelo  
 exaltatus est, a quo ros gratiae descendit in Sion,  
 idest Ecclesiam; non enim est in uno ecclesia, nisi  
 ejus dono et gratia. De quarto, scilicet resurrectio-  
 nis causalitate, sciendum quod Christi resurrectio  
 est causa nostrae resurrectionis in futuro: unde 1  
 Cor. 15, « Christus resurgens ex mortuis primitiae  
 • dormientium, quoniam quidem per hominem  
 • mors, et per hominem resurrectio mortuorum: »  
 et hoc rationabiliter: nam principium humanae ju-  
 stificationis est verbum Dei, de quo dicitur in Psal.  
 55: « Apud te est fons vitae; » unde etiam ipse  
 dicit Jo. 5: « Sicut pater suscitavit mortuos et vi-  
 • vificavit etc. » Habet autem hoc naturalis ordo  
 rerum divinitus institutus, ut quaelibet causa opere-  
 tur in id quod sibi est propinquius, et per id operetur  
 in alia magis remota: sicut ignis primo calefacit  
 aerem propinquum, per quem calefacit corpora ma-  
 gis remota; et sic ipse Dominus illuminat primo  
 substantias sibi propinquas, per quas illuminat ma-  
 gis remotas, ut dicit Dionysius 14 cap. cael. Hier-  
 rarch. Et ideo verbum Dei primo attribuit vitam  
 corpori sibi naturaliter unito, et per ipsum opera-  
 tur resurrectionem in omnibus aliis.

Notandum vero quod Christi resurrectio est  
 causa efficiens et exemplaris nostrae resurrectionis,  
 sed non est meritoria. Efficiens quidem, in quantum  
 humanitas Christi, secundum quam resurrexit, est  
 quodammodo instrumentum divinitatis ipsius, et  
 operatur in virtute ipsius: exemplaris vero, quia  
 sicut resurrectio Christi ex eo quod corpus il-

(1) *Al.* haec non.

lud personaliter est verbo unitum, est prima tempore, ita etiam est prima dignitate et perfectione, ut dicit Glossa 1 Cor. 13. Semper autem quod est perfectissimum, est exemplar quod imitantur minus perfecti secundum suum modum; et ideo resurrectio Christi est exemplar nostrae resurrectionis, secundum illud Philip. 3: « Reformabit corpus « humilitatis nostrae configuratum corpori claritatis suae. » Licet autem sufficientia resurrectionis Christi se extendat ad resurrectionem tam honorum quam malorum, exemplaritas tamen ejus proprie se extendit ad bonos, qui sunt facti conformes filiationis ipsius, ut dicitur Rom. 8. Non autem Christi resurrectio fuit causa meritoria nostrae resurrectionis, tum quia Christus jam non erat viator, nec sibi mereri competeret: tum quia claritas resurrectionis fuit praemium passionis, ut patet Philipp. 2. Similiter est dicendum, quod Christi resurrectio est causa resurrectionis animarum, secundum illud Rom. 8: « Resurrexit propter justificationem nostram, » quae nihil aliud est quam resurrectio animarum: et super Psal. 29: « Ad « vesperam demorabitur fletus, » dicit Glossa « quod « resurrectio Christi est causa nostrae resurrectionis, et animae in praesenti, et corporis in futuro. » Est autem resurrectio animarum causa efficiens et exemplaris: efficiens quidem, in quantum Christi resurrectio agit in virtute divinitatis, quae quidem non solum extendit se ad resurrectionem corporum, sed etiam ad resurrectionem animarum: a Deo enim est, quod vivit anima per gratiam et corpus per animam. Sicut enim resurrectio Christi habet exemplaritatem animarum, eo quod Christo resurgenti secundum animam conformari debemus, secundum Apostolum Rom. 7: « Quomodo Christus « resurrexit a mortuis per gloriam Patris, ita et « nos in novitate vitae ambulemus, » Glossa, « de « bono in melius proficiendo per justitiam fidei, « et spem gloriae. Et quomodo Christus resurrexit « non moriturus, ita et vos aeternitate vos mortuos « quidem esse peccato, viventes autem Deo in « Christo Jesu Domino nostro. » Glossa: « Sicut « Christus mortuus est semel, ita peccatum moritur in nobis semel, ut non oporteat iterari; et « sicut Christus semper vivit, ita et vos semper « vivatis in virtutibus, et hoc in Christo Jesu Domino nostro, » idest opere Christi, quia alibi nulla spes.

Notandum vero quod in justificatione animarum duo concurrunt; scilicet remissio culpae, et novitas vitae per gratiam. Quantum ergo ad efficientiam quae est per virtutem divinam, tam passio Christi quam resurrectio est causa justificationis quoad utrumque: sed quantum ad exemplaritatem proprie passio et mors Christi est causa remissionis culpae, per quam moritur peccato. Resurrectio autem est causa novitatis vitae, quae est per gratiam, sive justitiam: et ideo dicit Apostolus Rom. 4: quod « traditus sit in mortem propter delicta nostra. » scilicet tollenda, « et resurrexit propter justificationem nostram. » Sed passio Christi etiam est meritoria, ut dictum est, non autem ipsius resurrectio.

Notandum etiam, quod sicut Christus resurrectionem suam probavit tripliciter: videlicet aspectu: Luc. ult: « Videte manus meas et pedes meos: » tactu; unde sequitur: « Palpate et videte quia spiritus carnem etc. » gustu, ut ibidem infert: « Adhuc

« illis dubitantibus et mirantibus prae gaudio, dixit, « Habetis hic aliquid quod manducetur? » sic etiam resurrectio spiritualis demonstratur: primo quidem aspectu sanctitatis. Matth. 5: « Sic luceat lux « vestra coram hominibus. » Augustinus: « Non « ibi finem constituat homo, sed referat ad laudem « Dei: » unde sequitur: « Ut glorificent Patrem « vestrum qui in caelis est. » Quod autem Dominus ostendit manus et pedes, designat quod resurrectio spiritualis per affectum divinae dilectionis et effectum bonae operationis declaratur. Apocal. 5: « Nomen habes quod vivas, et mortuus es; » scilicet propter defectum divinae dilectionis, et defectum bonae operationis. Secundo, tactu adversitatis. Eccles. 55: « Auram probat fornax, » idest homo tentatur tribulatione. Gen. 27: « Accede ad me, fili « mi, ut tangam te: » Job 6: « Quae prius volebat « tangere anima mea etc. » Glossa: « Moesta saeculi « nunc prae angustia cibi mei sunt. » Glossa: « Jam « dulees cibi sunt prae amore et desiderio caeli. » Quod autem Deus dixit, « Palpate et videte, quia « spiritus carnem et ossa non habet, » mystice designat quod spiritualis homo carnalibus consolationibus non innititur, sed spe caelestis patriae etiam aspera pati non formidat. Job 6: « Et haec « sit mihi consolatio, ut affligens me doloribus « non pareat. » Tertio, gustu internae et aeternae suavitatis. Coloss. 3: « Quae sursum sunt sapite: » unde Bernardus: « Quicumque post lamenta poenitentiae non ad carnales redit consolationes, sed « in fiducia quadam divinae miserationis excedit, « et ingreditur devotionem quandam novam, et « gaudium in Spiritu sancto, nec tam compungitur « praeteritorum recordatione peccatorum quam delectatur memoria, et inflammatur aeternorum « desiderio praemiorum, is plane est qui cum Christo resurget: quia praecoccupatum saecularibus « desideriis animum delectatio sancta declinat. Nec « misceri possunt vera vanis, aeterna caducis, spiritualia carnalibus, ima summis, ut pariter sapias « quae sursum sunt, et quae super terram. » Quod autem Dominus comedit partem piscis assi et favum mellis, mystice designat quod spiritualiter resuscitati debent dulcedinem divinitatis et humanitatis ipsius praegustare, quae quidem per piscem assum et favum mellis designantur. Gregorius: « Quid signare credimus piscem assum, nisi mediatorum Dei et hominum passum? Ipse enim « latere dignatus est in aquis generis humani, capi « voluit laqueo mortis nostrae, et quasi tribulatione « assatus est tempore passionis suae. Sed qui piscis « in passione fieri dignatus est, favus mellis in « resurrectione nobis extitit: et qui in pisce asso « figurari voluit tribulationem passionis suae, in favo « mellis utramque naturam exprimere voluit personae suae: favus quippe mel in cera est: mel in « cera divinitas in humanitate. »

## ARTICULUS XXIII.

### *De Ascensione Christi.*

Vigesimo videamus de Ascensione Christi, de qua dicitur Joan. 20: « Ascendo ad Patrem meum etc. » Augustinus: « meum per naturam, vestrum per gratiam. » Possumus autem quatuor notare circa Christi ascensionem: videlicet ascensionis convenientiam, ascendentis virtutem sive potentiam, loci in quem ascendit eminentiam, et gloriae ipsius excellentiam. De



primo dicitur Ephes. 4: « Qui descendit, ipse est et « qui ascendit. » Fuit autem conveniens Christum ascendere. Primo propter fidei augmentum, quae est de non visis: unde Dominus dicit Joan. 16: « Spiritus adveniens arguet mundum de peccato et de justitia: » unde dicit Augustinus: « De peccato, quia non credit in Christum; de « justitia vero eorum qui credunt. Ipsa quippe « fidelium comparatio infidelium est vituperatio; unde « subdit: Quia ad Patrem vado, et jam non videbitis me. Beati qui vident et credunt. Erit itaque « que nostra justitia de qua mundus arguitur, quoniam « niam nonne quem non videtis, creditis? » Secundo ad spei sublevationem: unde Dominus dicit Joan. 15: « Si abiero et praeparavero vobis locum, iterum veniam, et assumam vos ad meipsum, ut « ubi ego sum, et vos sitis: » per hoc enim quod Christus humanam naturam assumptam in caelo collocavit, dedit nobis spem illuc perveniendi, quia « ubi fuerit corpus, ibi congregabuntur et aquilae, » Matth. 24. Gregorius: « Ac si dicat: Quia caelesti « sedi incarnatus praesidio electorum animas de « carne solutas illuc sublevabo. » Michaeae 2: « Ascendit iter pandens ante eos. » Tertio fuit conveniens ad erigendum caritatis affectum ad caelestia; unde dicit Apostolus Colossen. 3: « Quae « sursum sunt sapite, non quae super terram. » Matth. 6: « Ubi est thesaurus tuus, ibi est et cor « tuum. » In signum hujus, Christo ascendente, stabant Apostoli suspensis vultibus in caelum. Act. 1. « Hinc etiam voce sponsae dicitur Cant. 1: Trahe « me post te, quasi volentem et non valentem, » ut dicit Gregorius. « Huic quidem verbo alludens « dicit, Trahe me post te, in te, ad te. Ad te per dilectionem: post te, ut te imitari valeam: in te, ut « tibi conformis in immortalitate et impassibilitate « fiam. » Quarto etiam conveniens fuit ut fidelibus dona mitteret Spiritus sancti: unde dicitur Ephes. 4: « Qui ascendit super omnes caelos ut adimpleret « omnia, » Glossa « donis suis. » Unde etiam ipse Dominus dicit Joan. 16: « Expedi vobis ut ego « vadam. Si enim non abiero, Paraclitus non veniet ad vos; si autem abiero, mittam eum ad « vos. » Glossa: « Non quod in terra positus dare « non posset; sed quia non sunt idonei recipere nisi « eum secundum carnem desistant noscere. » Postquam autem ab eis subtractus fuerat, traxit post se corda eorum ad caelestia et aeterna; quibus sic elevatis, caelestes et spirituales facti sunt, et ideo Spiritus sancti capaciores. Unde ibid. dicit Glossa: « Mentibus « nostris sic raptis ad caelestia aderit simul Pater « et Filius. Spirituales enim ex carnalibus facti, « capacius fuerant Deum habituri. » De secundo, scilicet ascendente virtute sive potentia. dicitur Isa. 63: « Iste formosus in stola sua, gradiens in « multitudine virtutis suae. » Unde et Gregorius in homil. Ascensionis: « Notandum est, quod Elias legitur in curru igneo ascendisse, ut videlicet « aperte monstraretur, quod homo purus alieno « indigebat auxilio. Redemptor autem noster non « in curru, non ab angelis sublevatus legitur, quia « qui fecerat omnia, sua virtute ferebatur. » Ad cujus evidentiam est sciendum, quod in Christo duplex est natura, scilicet divina et humana: unde secundum utramque naturam potest accipi propria virtus eius. Sed secundum humanam naturam potest accipi duplex virtus: una quidem naturalis, quae procedit ex principiis naturae: et tali virtute

verum est quod Christus non ascendit. Alia virtus in natura humana est virtus gloriae, secundum quam Christus ascendit; quae quidem procedit ex parte animae glorificatae, ex cuius redundantia glorificabitur corpus, ut dicit Augustinus ad Dioscorum: « Erit tanta obedientia corporis gloriosi ad animam « beatam, » ut dicit 21 de civ. Dei, « ut ubi « vult spiritus, ibi protinus erit corpus; nec vult « aliquid quod nec spiritum possit decere nec « corpus. » Decet autem corpus gloriosum et immortale esse in loco caelesti; et ideo ex virtute animae volentis corpus Christi ascendit in caelum. Sicut autem corpus efficitur gloriosum ex redundantia animae glorificatae; ita, ut Augustinus dicit super Joan., « per participationem Dei anima fit beata. » Unde prima origo ascensionis in caelum fuit virtus divina. Sic ergo Christus ascendit in caelum propria virtute: primo quidem virtute divina: secundo virtute animae glorificatae moventis corpus prout vult. De tertio, scilicet loci eminentia, dicitur Eph. quod « ascendit super omnes caelos, » Glossa « loco « et dignitate. » Ad Ephes. 1, dicitur, quod « constituit eum super omnem principatum et potestatem, et super omne nomen quod nominatur « sive in hoc saeculo, sive in futuro: » quia tanto debetur alicui rei locus altior, quanto est nobilior. Corpus autem Christi, licet considerando conditionem naturae corporeae, sit infra spirituales substantias; considerando tamen unionis dignitatem, qua personaliter est Deo unitum, excellit dignitatem omnium substantiarum spiritualium: et ideo ratione praedictae congruentiae debetur sibi locus altior, non solum super omnem creaturam corporalem, verum etiam spiritualem. Unde Gregorius dicit in hom. Ascensionis: « Quia qui fecerat omnia, super omnia « sua virtute ferebatur. » De quarto, scilicet gloriae Christi ascendente excellentia, dicitur Matth. ult.: « Dominus Jesus postquam locutus est eis, « ascendit in caelum, et sedet a dextris Dei. »

Ubi notandum, quod nomine dextrae tria possunt intelligi. Uno modo gloria divinitatis: unde Damascenus: « Dexteram Patres dicimus gloriam et honorem divinitatis, in quo Filius Dei existit ante « saecula, ut Deus et Patri consubstantialis. » Alio modo patris beatitudo: unde Augustinus: « Sedere « habitare intelligitur, quomodo dicimus de quocumque homine, in illa patria sedit per tres « annos: sic ergo Christum credite habitare in dextera Dei Patris: Beatus enim est qui habitat in « beatitudine, quae dextra Patris indicatur. » Tertio modo nomine dextrae intelligitur iudiciaria potestas; unde Augustinus: « Ipsam dextram intelligite ipsam potestatem quam accepit ille homo « a Deo susceptus, ut veniat iudicaturus, qui prius « venerat iudicari. » Igitur Christus, secundum quod Deus, sedet ad dexteram Patris, id est aequalis est Patri in divinitate, secundum primam acceptionem dextrae. Christus vero secundum humanitatem sedet ad dextram Patris, id est in potioribus bonis paternis in aeterna beatitudine habens iudiciariam potestatem, secundum secundam et tertiam acceptionem ipsius dextrae.

Notandum vero est quod super illud Roman. 6: « Consepulti sumus cum illo per baptismum « in mortem, » dicit Glossa: « Quicquid gestum « est in cruce Christi, in sepultura in resurrectione et ascensione et sessione ad dextram « patris, ita gestum est ut his rebus mystice non



« tantum dietis, sed etiam gestis configuraretur  
 « vita Christiana: » et infra dicitur, quod « in  
 « cruce est dolor confessorum, in sepultura requies  
 « absolutorum, in resurrectione vita justorum, in  
 « ascensione profectus perfectorum, in consessu ad  
 « dexteram gloria beatorum. » De primo, scilicet  
 cruce poenitentium, dicitur Gal. 2: « Qui Christi  
 « sunt, carnem suam crucifixerunt cum vitiis et  
 « concupiscentiis, » scilicet desideriorum. Congruit  
 enim devotioni nostrae, ut qui Domini nostri eru-  
 cifixi colimus passionem, reprimendarum carnalium  
 voluptatum crucem nobis faciamus. In hac quidem  
 cruce semper in hac vita debet pendere Christianus  
 ut sit affixus clavis, idest praceptis justitiae, ut  
 Christus in cruce clavis affixus fuit. Glossa super  
 Luc. 22: « Tollitur crux, cum spiritu facta carnis  
 « mortificantur. Per unum a dextris, significatur  
 « mortificatio carnis pro caelesti gloria: per alium  
 « a sinistris, significatur mortificatio carnis pro  
 « aliqua mundi causa. »

Notandum vero, quod ista crux debet habere  
 latitudinem, longitudinem, altitudinem et profun-  
 ditatem: unde Glossa super illud Ephes. 4, « Ut  
 « possitis comprehendere cum omnibus sanctis quae  
 « sit latitudo, altitudo etc. »: « Intelligentes mysterium  
 « crucis mundo crucifigamur, extendentes manus  
 « in latitudinem bonorum operum et longitudinem  
 « usque in finem perseverantiam habentes, atque  
 « habentes cor sursum ubi Christus est totum,  
 « quod non nobis, sed illius misericordiae tribuen-  
 « tes, cujus profunda omnem scrutatorem fatigant. »  
 De secundo, scilicet in sepulchro quiescentium,  
 dicitur Job 5: « Quasi effodientes thesaurum, gau-  
 « dent vehementer cum invenerint sepulchrum,  
 « quia antiquitus mortui cum divitiis recondaban-  
 « tur, » ut dicit Gregorius: « Sic juxta sensum  
 « mysticum anima sancta gaudet, cum invenerit  
 « sepulchrum internae quietis; quia nisi a tumultu  
 « vitiorum perfecte quieverit, thesaurum gratiarum  
 « et virtutum minime reperire poterit. »

Notandum vero, quod sepeliri mortuorum est:  
 unde nisi anima funditus mundo huic moriatur, in  
 sepulchro internae quietis non poterit abscondi.  
 Coloss. 5: « Mortui estis, » Glossa « mundanis et  
 « cadueis »: « et vita vestra abscondita est, » Glossa,  
 « omnibus hic peregrinantibus, sed maxime car-  
 « nalibus et terrenis » cum Christo, « qui est vita  
 « vestra, quae vita est in Deo Patre, qui cum  
 « Christo idem est. » Videat ergo sancta anima si  
 huic mundo mortua sit; et tunc poterit ad sepul-  
 chrum internae quietis anhelare. Hujus autem mor-  
 tis signum est, si a mundo despicitur; quia mare  
 viva corpora in se retinet, mortua vero mox extra  
 se pellit, ut dicit Gregorius. De tertio dicitur Ro-  
 man. 6: « Quomodo Christus surrexit a mortuis  
 « per gloriam Patris, ita et nos in novitate vitae  
 « ambulemus. »

Ubi notandum, quod vetus vita est vita terre-  
 stris verustate peccatorum consumpta, juxta illud  
 Thren. 2: « Vetustam fecit pellem et carnem meam, »  
 Glossa: « Inde gemit anima, dum exterius quasi  
 « pellis inveteratur, conscientia interius decora quasi  
 « caro corrupta tabe peccati consumitur. » Sed  
 nova vita est vita caelestis per gratiam de die in  
 diem renovanda, secundum illud Ephes. 4: « Re-  
 « novamini spiritu mentis vestrae etc. Igitur quo-  
 « modo Christus surrexit a mortuis per gloriam  
 « Patris, ita et in novitate vitae ambulemus. »

S. Th. Opera omnia. V. 17.

Quomodo autem Christus surrexit, subjungitur,  
 « Christus resurgens ex mortuis, jam non moritur: »  
 et infra: « Ita et vos aestimate, vos mortuos esse  
 « peccato, viventes autem in Christo Jesu Domino  
 « nostro. » Nota: sicut Christus mortuus est semel,  
 ita peccatum in nobis moriatur semel, et non o-  
 portet iterari: sicut Christus semper vivit, ita et  
 vos semper vivatis virtutibus; et hoc in Christo  
 Jesu Domino nostro, alibi nulla spes est. Sciendum  
 vero, quod vita per motum manifestatur: unde vita  
 vetus per motum terrenae operationis ostenditur,  
 de qua dicitur in Psal. 16: « Oculos suos statue-  
 « runt declinare in terram. » Vita vero nova per  
 motum caelestis operationis declaratur, de qua di-  
 citur Col. 5: « Si consurrexistis cum Christo, quae  
 « sursum sunt quaerite. » Glossa 1, « cogitate,  
 « inventa autem cum jucunditate tenete: » et hoc  
 est quod subdit, « Quae sursum sunt sapite. » De  
 quarto dicitur in Psal. 85: « Beatus vir cujus est  
 « auxilium abs te, ascensiones in corde suo dispo-  
 « suit: » unde Bernardus: « Ascendamus duobus  
 « pedibus, scilicet meditatione et oratione. » Me-  
 ditatio quidem quid desit, docet: oratio quod desit  
 obtinet: illa viam ostendit, ista deducit. Idem: « Qua-  
 « tuor esse dicimus gradus ascensionis: primus est  
 « ad cor, secundus in corde, tertius de corde, quar-  
 « tus supra cor. In primo timetur Dominus: in  
 « secundo auditur consiliarius: in tertio desidera-  
 « tur sponsus: in quarto videtur Deus, » de quo  
 Ephes. 2: « Resuscitavit, consedere fecit in caelesti-  
 « bus in Christo Jesu; » nunc quidem in spe, ut  
 dicit Glossa, postea vero in re, secundum illud  
 Coloss. 5: « Cum apparuerit Christus vita vestra,  
 « tunc et vos etc. » Joan. 12: « Volo, Pater, ut  
 « ubi ego sum etc. » Augustinus: « Quem hono-  
 « rem majorem poterit recipere adoptatus, quam  
 « quod ibi sit, ubi est unicus? »

#### ARTICULUS XXIV.

##### *Sequitur de secundo adventu.*

Quia vero supra, secundum Bernardum tripli-  
 cem adventum Christi esse distinximus, scilicet in  
 carnem, in mentem, et ad judicium; viso de primo  
 nunc de secundo videamus. Ad cujus evidentiam  
 sciendum est, quod adventus Christi in mentem est  
 per gratiam gratum facientem: quia eum Deus com-  
 munitur est in omnibus rebus, sicut causa in effe-  
 ctibus bonitatem ipsius participantibus, et hoc per  
 essentiam, potentiam et praesentiam: per essentiam  
 quidem in quibus adest omnibus ut causa essendi,  
 sicut anima in corpore et in qualibet parte corporis  
 tota est: per potentiam, in quantum omnia potestati  
 ejus subduntur, sicut rex in regno: per praesentiam,  
 ut in quantum omnia nuda et aperta sunt oculis  
 ejus, sicut paterfamilias in domo. Non sic intelligen-  
 dus est adventus Dei, ut veniat ubi prius non erat,  
 sed ut novo modo existat ubi prius erat. Novus au-  
 tem modus, secundum quem Deus est in creatura  
 rationali, est sicut cognitum in cognoscente, et ama-  
 tum in amante. Cognoscere autem Deum, et amare  
 Deum in quantum est objectum beatitudinis, est  
 per gratiam gratum facientem: unde adventus Christi  
 in mentem, secundum gratiam gratum facientem  
 intelligendus est. Hunc ergo adventum desiderabat  
 sapiens cum dixit Sap. 9: « Mitte illam de caelis san-  
 « ctis tuis, et a sede magnitudinis tuae, ut mecum

« sit, et mecum laboret etc. » Glossa: « Quicquid  
 « de sapientia Dei dicimus, ad ipsum referimus  
 « qui est pax nostra, qui fecit utraque unum,  
 « virtus et sapientia Dei, et imago Dei invisibilis, pri-  
 « mogenitus omnis creaturae »: quasi dicat: Christum  
 mitte Dei virtutem et Dei sapientiam, ut mecum  
 sit per virtutem gratiae gratificantis, et mecum  
 laboret per dilectionem gratiae sublevantis, ut sciam  
 quid acceptum sit apud te per splendorem gratiae  
 illustrantis. Petit igitur adventum Christi in men-  
 tem, ut gratificetur quoad modum essendi, ut con-  
 soletur quoad statum vivendi, ut illustretur quoad  
 actum intelligendi. Primum ibi, « Ut mecum sit, »  
 idest, me sibi gratificando; unde Ephes. 1: « Gra-  
 « tificavit nos in dilecto Filio suo. » Hic est pri-  
 mus effectus gratiae, quem solus Deus in nobis  
 sine nobis operator; unde dicitur 1 Cor. 13:  
 « Gratia Dei sum id quod sum, » Glossa « Reete  
 « gratiam nominat. » Primum enim sola gratia dat  
 Deus, cum non praecedant nisi mala; sed post gra-  
 tiam incipiunt bona nostra. Sciendum vero quod  
 adventus iste per gratiam est occultus et humano  
 sensui investigabilis; unde Rom. 11: « O altitudo  
 « divitiarum sapientiae et scientiae Dei! quam in-  
 « comprehensibilia iudicia ejus, et investigabiles  
 « viae ejus! » Ad ejus evidentiam sciendum, quod  
 tripliciter aliquid scitur. Uno modo per demonstra-  
 tionem quae fit per propriae rei principium: sic  
 enim certitudo habetur de conclusionibus demon-  
 strativis per principia per se nota et universalia:  
 nullus enim potest scire se habere scientiam con-  
 clusionis, si principium illius conclusionis ignora-  
 ret. Principium autem gratiae et objectum ejus  
 est ipse Deus, qui propter suam excellentiam nobis  
 est ignotus, secundum illud Job 56: « Ecce Domi-  
 « nus magnus vincens nostram scientiam. » Et  
 ideo praesentia vel absentia per certitudinem de-  
 monstrationis sciri non potest, secundum illud Job  
 9: « Si venerit ad me, non videbo eum: si abierit,  
 « non intelligam. » Sciendum autem, quod expedit  
 quandoque praesentiam Dei in nobis per gratiam  
 ignorare. Primo quidem ut timor futuri iudicii nos  
 humiliet, secundum illud Prov. 25: « Beatus vir  
 « qui semper est pavidus, » Glossa « pro futura  
 « poena. » Qui autem est durae mentis, scilicet  
 quem non afficit timor futurae poenae, corrumpit in  
 malum. Timor iste hominem humiliat: propter quod  
 expedit gratiam quandoque ignorare in nobis. Gre-  
 gorius: « Ideo Deus bona nostra nobis voluit esse  
 « incerta, ut unam certam gratiam teneamus, »  
 scilicet humilitatem. Secundo ne praesumpta secu-  
 ritas praecipitet: unde, Thess. 5: « Cum dixerint  
 « pax et securitas, tunc repentinus eis superveniet  
 « interitus. » Hieronymus: « Timor custos virtu-  
 « tum est, securitas ad lapsum facilis. » Tertio ut  
 vigilanter et desideranter gratiam Dei expectemus.  
 Prov. 8: « Beatus qui audit me, et qui vigilat ad  
 « fores etc. » Bernardus: « Semper debemus vul-  
 « tus suspensos, et sinus expansos habere ad lar-  
 « gam Dei benedictionem. » Secundo modo scitur  
 aliquid per conjecturam. Et hoc modo secundum  
 quamdam fiduciam spei possumus scire Deum no-  
 biscum esse per gratiam: unde Jud. 15: « Aperite  
 « portas, quia nobiscum Deus est, qui fecit victo-  
 « riam in Israel. » Sunt autem tria signa hujus  
 conjecturationis: scilicet gratiae Dei. Primum est  
 testimonium conscientiae; 2 ad Corinth. 1: « Gloria  
 « nostra haec est testimonium conscientiae nostrae: »

unde Bernardus: « Nihil hac luce clarius, nihil hoc  
 « testimonio gloriosius, eum veritas in mente ful-  
 « get, et mens in veritate se videt: sed qualem?  
 « Pudicam, verecundam, pavidam, circumspectam,  
 « nihilque admittentem quod evacuet gloriam con-  
 « scientiae attestantis, in nullo consciam sibi quo  
 « erubescat in praesentia veritatis. Hoc plane est  
 « quod super omnia bona animae divinos delectat  
 « aspectus. » Secundum est verbi Dei auditus non  
 solum ad audiendum, sed etiam ad faciendum: unde  
 Joan. 8: « Qui ex Deo est, verba Dei audit; »  
 unde dicit Gregorius: « Caelestem patriam veritatis  
 « desiderare jubet, mundi gloriam declinare, aliena  
 « non appetere, propria largiri. Penset apud se  
 « unusquisque, si haec vox Domini in auribus suis  
 « invaluit, et quod jam ex Deo sit cognoscit. »  
 Tertium signum est internus gustus divinae sapien-  
 tiae, quae est quasi quaedam praelibatio futurae  
 beatitudinis; unde in Psal. 55: « Gustate et videte,  
 « quoniam suavis est Dominus, » scilicet per gra-  
 tiam suam in nobis. Augustinus: « Quoniam quam-  
 « diu sumus in corpore, peregrinamur a Do-  
 « mino, gustemus saltem quoniam suavis est  
 « Dominus, qui dedit nobis pignus spiritus, in quo  
 « pulsamus ejus dulcedinem, et desideremus videre  
 « ipsum fontem, ubi sobria ebrietate mundemur,  
 « et irrigemur sicut lignum quod plantatum est  
 « secus decursus aquarum multarum. » Idem:  
 « Fac, precor, Domine, me gustare per amorem,  
 « quod gusto per agnitionem: sentiam per affectum,  
 « quod sentio per intellectum: plus tibi deberem  
 « quam meipsum totum; sed nec plus habeo, nec  
 « hoc ipsum per me ipsum totum possum reddere:  
 « trahite me, Domine, in amorem tuum hoc ipsum  
 « quod sum. » Tertio aliquid scitur per revelatio-  
 nem: et sic Deus ex privilegio gratiae, quibusdam  
 revelavit praesentiam suam gratiosam, sicut disci-  
 pulis, dicens Matth. ult.: « Ecce ego vobiscum sum  
 « usque ad consummationem saeculi, » Glossa  
 « cum finitis laboribus mecum regnabit: » unde  
 Roman. 8: « Ipse Spiritus sanctus testimonium  
 « perhibet spiritui nostro, » idest recognoscere  
 facit, ut dicit Glossa, quod sumus filii Dei. Scien-  
 dum quod revelatio hujusmodi fit quibusdam pro-  
 pter tria. Primo ut omnem timorem humanum tam  
 in agendis quam patiendis abjiciant, ut dicitur  
 Jerem. 1: « Ne timeas a facie eorum, quia ego  
 « tecum sum: » et Psal. 22: « Non timebo mala,  
 « quoniam tu mecum es: » Glossa « In corde per  
 « fidem, ut post umbram mortis tecum sim per  
 « speciem. » Secundo ut gaudium securitatis ha-  
 beant in hac vita. Prov. 12: « Secura mens quasi  
 « juge convivium: » Eccles. 9: « Vade, comede in  
 « laetitia panem tuum, et bibe cum laetitia vinum  
 « tuum, quia Deo placent opera tua. » Tertio, ut  
 vitam in patientia habentes, mortem cum desiderio  
 expectent: qui enim nescit utrum amore an odio  
 dignus sit, formidat mori, ut dicitur Eccl. 9. Qui  
 vero securus, mortem cum desiderio habet. Talis  
 fuit Apostolus desiderium habens dissolvi, et esse  
 cum Christo: Philipp. 1: unde Bernardus: « O vita se-  
 « cura, ubi absque formidine mors expectatur, immo  
 « exoptatur cum dulcedine, excipitur cum devotione. »  
 Secundum membrum principale tangitur ibi,  
 « Et mecum laboret etc. », scilicet in statu  
 vitae praesentis divinis me consolationibus sub-  
 levando: quod quidem expertus fuit qui dixit:  
 « O quam bonus et suavis, Domine, spiritus tuus

« in nobis ! » Augustinus in lib. Confes.: « Quis  
 « dabit mihi ut venias in cor meum, et inebries  
 « illud, et obliviscar mala, et unum bonum meum  
 « amplectar te: iste est adventus solatii. » Sunt  
 autem tria quae disponunt ad hunc adventum. Pri-  
 mum contemptus terrenae voluntatis: unde Col. 4:  
 « Quae sursum sunt sapite; » quasi diceret, Non  
 potestis caelestia simul et terrestria sapere. Bernar-  
 dus: « Errat omnino, si quis illam caelestem dul-  
 « cedinem huic cineri, divinum illud balsamum  
 « huic veneno, charismata illa Spiritus sancti misceri  
 « posse hujus mundi illecebris arbitratur. Putas te  
 « illum meracissimum spiritum posse suscipere,  
 « nisi carnis istis consolationibus renunciaveris?  
 « Revera cum inceperis, tristitia implebit cor  
 « tuum: sed si perseveraveris, tristitia tua vertetur  
 « in gaudium. Tunc enim purgabitur affectus, et  
 « renovabitur voluntas; ut omnia quae prius diffi-  
 « cilia, imo impossibilia videbantur, cum multa  
 « pereurrantur dulcedine et aviditate. » Secun-  
 dum devota meditatio divinae voluntatis. Psal. 76:  
 « Memor fui Dei, et delectatus sum. » Bernardus:  
 « Non deest electis consolatio de memoria Dei,  
 « quibus nondum plena relectio indulgetur. » Sed  
 praecipue bonitas Dei exhibita in homine Christo  
 recogitantem delectat; unde super illud Psal. 76,  
 « Memor ero ab initio mirabilium tuorum, » dicit  
 Glossa: « idest, quae indulsit Deus humano generi  
 « ab initio, scilicet quod Adam ad imaginem suam  
 « fecit, quod Abel hostiam accepit: similiter de Noe  
 « fecit, in cujus arca diversa animalia in myste-  
 « rium ecclesiae servavit; quod de Abraham fecit,  
 « ejus oblatione Christi filii sui incarnationem et  
 « passionem designavit; tandem quod ipse Dominus  
 « venit, haec sunt quae virum sanctum delectant. »  
 Tertium est fervens desiderium caritatis; unde Ber-  
 nardus tractans illud Psal. 96: « Ignis ante ipsum  
 « praecedet et inflammabit, » dicit: « Oportet namque  
 « ut sancti desiderii ardor praeveniat faciem ejus  
 « ad omnem animam, ad quam ipse venturus est,  
 « qui omnem consumat rubiginem vitiorum, et sic  
 « praeparet locum Domino: et tunc scit anima  
 « quia juxta est Dominus, cum senserit se illo igne  
 « succensam. Idem spiritus Dei est, et concupiscit  
 « decorem illius animae, quam fortiter advertit in  
 « spiritu ambulanti, et curam carnis non perfi-  
 « cientem in desiderio, praesertim si sui amore  
 « flagrantem conspexerit. Tali animae frequenter  
 « suspiranti, immo sine intermissione oranti, et se  
 « afflianti prae desiderio interdum desideratus ille  
 « miseratus occurrit. Ergo quisquis ita est vir de-  
 « siderii, ut cupiat dissolvi et esse cum Christo,  
 « cupiat vehementer, sitiatur ardentem, assidue medi-  
 « tetur; is profecto suscipiet Deum. Si quidem se-  
 « cundum desiderium cordis ejus tribuetur ei, et  
 « adhuc peregrinanti in corpore, ex parte tamen,  
 « idest, ad tempus, et ad modicum tempus. Nam  
 « cum vigiliis et obsecrationibus et multo labore  
 « et imbre lacrymarum quaesitus fuerit, subito dum  
 « teneri putatur, illabitur, et non videbitur nisi  
 « iterum requiratur toto desiderio. Ita ergo in hoc  
 « corpore potest esse de praesentia sponsi frequens  
 « laetitia, sed non copia: quia etsi lactificet visi-  
 « tatio, molestat tamen vicissitudo. Nec tamen vel  
 « in transitu praesto erit sic omni animae, sed illi  
 « dumtaxat quam ingens desiderium et devotio  
 « vehemens, praeduleis affectus probat sponsam,  
 « et dignam ad quam gratia visitandi accessurum

« verbum decorem induat, formati sponsi accipiens. »  
 De signis vero adventus verbi et recessus ejusdem  
 dicit Bernardus: « Fateor mihi adventasse verbum,  
 « (in insipientia dico) et pluries. Dumque saepius  
 « intravit in me, non sensi aliquoties, cum intravit,  
 « adesse. Affuisse recordor interdum, et praesentem  
 « potui cognoscere: introitum ejus nunquam potui  
 « sentire, sed nec exitum. » Tria ergo in verbis  
 Bernardi notanda sunt: scilicet quod aliquoties ad-  
 ventum potuit praesentire; quod sensit adesse, et  
 recordatus fuit affuisse. De primo dicit sic: « Cum  
 « per seipsum dignatur Deus animam quaerentem  
 « se, quae tamen ad quaerendum se toto desiderio  
 « et amore devovit; et hoc signum istiusmodi ad-  
 « ventus ejus sicut ab eo qui expertus est edo-  
 « cemur, ignis ante ipsum praecedet etc., » ut  
 supra. De secundo dicit sic: « Quaeris ergo a me,  
 « cum ita sint investigabiles omnino viae ejus,  
 « unde adesse noverim. Vivum et efficax est ver-  
 « bum: mox ut intus venit, expergefecit dormitan-  
 « tem animam meam, movit et emollivit, et vul-  
 « neravit cor meum, quoniam durum lapideumque  
 « erat, et male sanum coepit evellere et destruere,  
 « aedificare et plantare, arida rigare, tenebrosa il-  
 « luminare, clausa reserare, frigida inflammare,  
 « nec non et mittere prava in directa, et aspera  
 « in vias planas, ita ut benediceret anima mea  
 « Domino, et omnia quae intra me sunt nomini  
 « sancto ejus. Igitur ita intrans ad me aliquoties ver-  
 « bum, sponsus, tantum ex motu cordis, sicut prae-  
 « fatus sum, intellexi praesentiam ejus, et ex fuga  
 « vitiorum carnaliumque affectuum; adverti poten-  
 « tiam virtutis ejus; et ex discussione, sive redar-  
 « gutione occultorum meorum admiratus sum pro-  
 « funditatem sapientiae ejus, et ex quantalacumque  
 « emendatione morum meorum expertus sum bo-  
 « nitatem mansuetudinis ejus, et ex reformatione  
 « vel renovatione spiritus mentis meae, idest, in-  
 « terioris hominis mei, percepi utrumque speciem  
 « decoris ejus, et ex comitatu omnium eorum si-  
 « mul expavi multitudinem magnitudinis ejus. » De  
 tertio dicit sic: « Verum quia haec omnia ubi ab-  
 « secesserit verbum, quodam illico languore tor-  
 « pentia proinde et frigida jacere incipiunt, ac si  
 « cacabo bullienti subtraxeris ignem, et hoc mihi  
 « signum absecessionis ejus: et quoties elabitur,  
 « toties repetitur a me: nec cessabo clamitare quasi  
 « post tergum abeuntis ardenti desiderio cordis ut  
 « redeat, et reddat mihi laetitiam salutaris sui, reddat  
 « mihi seipsum. Fateor, fili, nihil interim aliud libet,  
 « dum non praesto est quod solum libet. »

Tertium membrum principale agitur ibi, « Et  
 « sciam, » (1) scilicet praesentia ipsius illustratus, quid  
 acceptum sit apud te, quia candor est lucis aeternae, et  
 speculum sine macula, Sap. 7. Sunt autem tria quae  
 disponunt ad aeternam mentis illustrationem. Primum  
 est in abstractione transitoriae dulcedinis: unde Isa. 28:  
 « Quem docebit scientiam? et quem intelligere fa-  
 « ciet auditum? Ablactatum a lacte, et avulsum  
 « ab uberibus, » scilicet terrenae consolationis, vel  
 delectationis: unde super illud Joan. 1: « Mun-  
 « dus eum non cognovit, » dicit Chrysostomus:  
 « Mundum vocat homines qui soli mundo affixi sunt,  
 « et quae mundi sunt sapiunt. Nihil autem ita turbat  
 « mentem, et liquefieri facit amore praesentium. » Se-  
 cundum est in approximatione ad ipsum fontem lumi-  
 nis: unde in Psal. 55: « Accedite ad eum, et illuminami-  
 « ni. » Augustinus: « Anima inter Deum et creaturas

(1) *Al.* et scientia.



« media posita, conversione ad Deum illuminatur, « melioratur et perficitur: conversione autem ad « creaturas obtenebratur, deterioratur, occiditur. » Tertium consistit in interiori mentis dilatatione, quae fit per conatum hominis ipsius: unde in Psal. 80: « Dilata os tuum, » Glossa « cordis, et ego « implebo illud, » Glossa « pane vitae et intelle- « etus. » Unde Augustinus dicit, quod « sicut Deus « ingenta liberalitate replet omnes creaturas pro « captu earum, sic per Christum Dei virtutem « et Dei sapientiam veniunt nobis omnia bona, « dum in ejus adventum gratificamur quoad mo- « dum essendi, consolamur quoad statum vivendi, « illustramur quoad actum intelligendi. » Sciendum vero, quod non solum Filius, sed et Pater et Spiritus sanctus veniunt per gratiam, et mentem humanam inhabitant, secundum illud Joan. 14: « Ad « cum veniemus, et mansionem etc. » Isa. 40: « Qui dat lasso virtutem, » Glossa « fidei et ope- « ris », « et his qui non sunt fortitudinem et robur « multiplicat. » Haec fortitudine confortatus Aposto- lus dixit: « Omnia possum in eo qui me con- « fortat. » Filius enim venit per sapientiam nos illuminando, quia est lux vera, et illuminans omnem hominem etc. Joan. 1. Glossa: « Nullus « sine illo illuminatur. » Unde sapiens ejus ad- ventum desiderans est. « Mitte illam a sede ma- « gnitudinis tuae etc. » et infra: « Et sciam quid « acceptum sit apud te, » Sapien. 9. Spiritus sanctus venit per bonitatem, nos ad amorem suum inflammando: Thren. 1: « De excelso misit ignem in « ossibus meis, » Glossa « idest Spiritum sanctum « ut timeam. » Unde cantat Ecclesia: « Veni Sancte « Spiritus, reple tuorum corda fidelium, et tui a- « moris in eis ignem accende etc. » Sic igitur per adventum Beatissimae Trinitatis reformatur in nobis quod per peccatum fuerat deformatum, dum nostrum posse per peccatum infirmatum, confirmatur per Patris potentiam: nostrum posse per peccatum obscuratum, illuminatur per Filii sapientiam: nostrum velle per peccatum in frigidatum, inflammatur per Spiritus sancti benignissimam elementiam. Haec enim sunt opera gratuita beatissimae Trinitatis in nobis mirabiliter operantis: unde in Psal. 138: « Mirabilia opera tua, et anima mea cognoscit ni- « mis. » Revera mirabilia opera Dei in nobis: nam potentia Patris confortando debilitat, et debilitando confortat: unde Isa. 40: « Qui sperant in Domino, « mutabunt fortitudinem, » Glossa « sic ut fortes « Deo fiant, debiles mundo, et post mortem carnis « fiant immortales; » et sequitur ibi: « Assument « pennas ut aquilae: » Glossa « quibus volent ad « Deum »: « current et non laborabunt, » Glossa « quia omnia facilia amanti »: « ambulabunt, » scilicet proficiendo « et non deficient. » 2 Corinth. 12: « Cum enim infirmor, » Glossa « exterius », « tunc « potens sum: » Glossa « victor efficiar. » Simili- ter Filii sapientia non videntes illuminat, et viden- tes excaecat: unde Joan. 9: « Ego in iudicium veni « in mundum, ut non videntes videant, » Glossa « humiles caeci qui se videre non putant »: « et qui « vident, eacci fiant, » Glossa « Superbi sapientes « qui se videre putant. » Gregorius super illud Job 36: « Ecce Deus magnus vincens nostram scien- « tiam »: « Quicquid de claritate magnitudinis Dei « scimus, infra ipsum est: et tanto ab ejus scientia « longe repellimur, quanto ejus potentiam nos « comprehendisse suspicamur; cujus tunc aliquid

« quasi ex parte cognoscimus, quando eum nos « digne cognoscere non posse sentimus. Sic etiam « bonitas Spiritus sancti mirabiliter operatur in « nobis: unde Sapiens admirando dicit Sap. 12: « O quam bonus et suavis est, Domine, Spiritus « tuus in nobis! » Ubi notandum quod valde bo- nus in nobis est Spiritus Sanctus, cum nos ad a- morem suum accendit: quia amor Dei fons est to- tius boni, ut dicit Glossa: unde tunc se nobis sum- me communicat: sed valde suavis in nobis est, dum nos interno gustu suae dulcedinis lactificat. Unde super illud Psal. 114: « Suavis Dominis universis, » dicit Glossa « sed maxime se gustantibus. » Ber- nardus: « Solus consolator est qui et inhabitator « caritas Deus, qui etsi justis nunquam desit ad « meritum, plerumque tamen ad solatium abest: « illud jucundius, istud utilius. Habetur igitur, sed « latet, dum sensum cordis minime tangit illa « suavitas habita. Et sicut populus Israeliticus cum « primo sibi Dominus manna plueret, admiratus « dicit Manhu, idest quid est hoc? sic devota ani- « ma gustans in intimis divinae bonitatis suavita- « tem admiratur, tum quia talem in rebus creatis « experta non est. » Unde Anselmus: « Cogita quale « sit illud bonum quod continet omnium bonorum « jucunditatem, et non qualem sumus experti in « rebus creatis, sed tantum differre, quantum creator « a creatura. » Adhuc etiam quia verbis non ex- primitur tantae bonitatis suavitas, nec lingua do- cetur, sed gratia, Apocal. 2: « Vincenti dabo man- « na absconditum, » quia nullis sermonibus aper- ritur. Unde Bernardus: « O quis curiosus scire « quid sit verbo frui. Para illi non aurem, sed « mentem: non docet lingua, docet gratia. » Am- plius etiam, quia excedit omne ingenium et omne desiderium quod plus est, quia multa scimus quae non exprimimus. Divinae vero bonitatis tanta est suavitas, quod non solum verbis ipsam non ex- primimus, verum etiam inquirendo deficimus. Unde in Psal. 76: « Memor fui Dei, » dicit Glossa: « In quo « est suavitas: » et sequitur: « Et exercitatus sum « et defecit spiritus meus. » Unde Bernardus dicit, quod « non capit hoc intelligentia, nisi quantum « attingit experientia. » Sic igitur patet verbum prophetae dicentis, « Mirabilia opera tua, et anima « mea cognoscit nimis, » idest valde, et Patris po- tentiam, et Filii sapientiam, et Spiritus sancti sua- vitatem, ex quo se videt deficere in cognoscendo potentiae magnitudinem, sapientiae altitudinem, et dulcissimae suavitatis abundantiam.

## ARTICULUS XXV.

### *De ultimo adventu Christi.*

Sequitur de ultimo adventu Christi ad iudicium: de quo dicitur Luc. 21: « Tunc videbunt filium « hominis venientem in nube cum potestate ma- « gna et majestate. » Ubi circa adventum Christi ad iudicium tria describuntur: videlicet quod veniet patenter, dominanter sive solemniter, et potenter. Primum notatur ibi, « Tunc videbunt filium ho- « minis: » Glossa: « in hac vita omnis homo Chri- « stum videre non potuit: sed in die iudicii, in « sede majestatis electi et reprobi pariter videbunt; « ut justi remunerentur, et mali in aeternum ge- « rant. » Notabiliter autem dicitur quod videbunt filium hominis: quia in forma humanitatis omnibus



apparebit, in qua iudicabit, secundum illud Joan. 5: « Dedit ei potestatem facere iudicium, quia filius hominis est: » nam secundum quod Dei Filius est, semper habuit, ut Augustinus dicit. Conveniens enim est, ut in forma humanitatis veniat iudicaturus, in qua venerat iudicandus, secundum illud Job 56: « Cum tua causa quasi impii iudicata est, causam iudiciumque recipies. » Unde Augustinus de verbo Domini: « Ad iudicium forma hominis ventura est; forma illa iudicabit quae iudicata est: sedebit iudex qui stetit sub iudice: damnabit veros reos qui factus est false reus. » Idem in eodem: « Rectum enim erat, ut iudicandi iudicem viderent. Iudicandi enim erant et boni et mali: restabat ut in iudicio forma servi et bonis et malis ostenderetur, forma Dei solum bonis servaretur. Beati enim mundo corde, quoniam ipsi Deum videbunt. » Et quia potestas iudiciaria ad Christi exaltationem pertinet sicut et resurrectionis gloria, Christus in iudicio non apparebit in humilitate quae pertinebat ad meritum, sed in forma gloriosa pertinente ad praemium. Unde dicitur Luc. 21, quod « veniet cum potestate magna et majestate etc., » quod pertinet ad ipsius gloriam: unde Origenes dicit, quod « in consummatione mundi totius apparebit in multa gloria, ut videant eum omnes in gloria. » Sciendum vero, quod visio claritatis Christi electis qui eum toto corde dilexerunt, erit ad gaudium, quod eis promittitur. Isa. 55: « Regem in decore suo videbunt, impii autem ad confusionem et luctum: » quia iudicantis gloria et potestas damnationem timentibus tristitiam et metum inducit. Unde dicit in Isa. 56: « Videant et confundantur zelantes populi, » Glossa « Invidentes mihi et meis », « et ignis hostes tuos devoret, » Glossa « Ignis invidiae vel gehennae. » Unde Gregorius dicit, quod « omnipotens Deus ad iudicium veniens, et blandus justis, et horribilis injustis apparebit; quavis in forma gloriosa se ostendat, apparebunt tamen indicia passionis non cum defectu, sed cum decore et gloria. » Apparebit etiam signum crucis in caelo, ut dicitur Matth. 24: ut ex his visis et electi accipiant gaudium, qui per passionem Christi liberatos se esse recognoscant: et reprobi tristitiam, quia tantum beneficium contempserunt. Unde Apoc. 1: « Videbunt in quem transfixerunt, et plangent se super eum omnes tribus terrae. » Unde Chrysostomus dicit, quod « crux apparebit lucidior existens, et non erit tunc necessitas accusationis eam viderint cruceem, et ipsum Christum in corpore suo habentem testimonia passionis. » Sciendum vero quod signum crucis non accipitur hic pro ipso ligno dominicae crucis, sed pro aliqua repraesentatione ipsius. Sic igitur videbunt filium hominis in forma carnis gloriae habentem indicia passionis virtuosae cum signo crucis victoriosae, ut ex his habeant et boni laetitiam, et mali tristitiam: tum etiam ut ex indicibus passionis et crucis appareat gloriosior salus electorum, et justior damnatio reproborum. Secundum notatur ibi, « Venientem in nube: » ubi Chrysostomus dicit, quod « filius hominis in nubibus veniet ut Deus et Dominus, non latenter, sed in gloria digna Deo. » Ubi notandum quod in primo adventu venit tamquam servus, in secundo vero veniet tamquam dominus et iudex: et ideo primo veniens tamquam servus, conveniens

fuit ut ad terras descenderet. In secundo adventu tamquam iudex et dominus: et ideo convenienter in nubibus veniet, ut liquide omnibus appareat, quod « ipse est qui constitutus est a Deo iudex vivorum et mortuorum, » ut dicitur Act. 1. Sciendum vero quod nubes istae non causabuntur ex aliqua evaporatione terrae, quia cessante motu caeli nulla erit alteratio: sed fiet virtute divina propter conformitatem in adventu Domini ad iudicium et ascensionem. Unde super illud Act. 1, « Sic veniet » dicit Glossa: « Creatura ubique obsequitur creatori. Astra indicant nascentem, patienti communiuntur, ascendentem nubes suscepit, redeuntem ad iudicium comitabitur. »

Notandum autem quod probabiliter creditur Christus venturus ad iudicium circa locum montis Oliveti, et vallis Josaphat, quae subiacet monti Oliveti, secundum illud Joel. 5: « Congregabo omnes gentes, et deducam eas in vallem Josaphat, et disceptabo eum eis: » tum ut idem ostendatur esse qui descendit et qui ascendit: tum quia conveniens est ut ibi veniat cum gloria iudicaturus, ubi fuerat cum ignominia iudicatus. Possumus etiam rationem hujus convenientiae sumere ex nominibus locorum. Mons enim Oliveti designat misericordiam. Josaphat, quod interpretatur iudicium, designat justitiam. Quia vero in extremo iudicio tractandum est opus misericordiae et justitiae, convenienter dicitur Christus venturus ad locum praedictum ad iudicandum. Non autem descendet ad terram, sed in spatio hujus aëris sedebit circa locum montis Oliveti ex quo ascendit, ut dicit Glossa, Joelis 5. Tunc fiet separatio bonorum et malorum: nam boni qui Christo fideliter adhaeserunt, secundum Apostolum 1 Thess. 4, « rapientur in nubibus obviam Christo in aëra, » ut conformentur Christo non solum configurati gloriae claritatis ejus, sed loco consociati ei, secundum illud Matth. 24: « Ubicumque fuerit corpus, illuc congregabuntur et aquilae: » et per aquilas sancti significantur. Signanter in Hebraeo Joatham dicit, quod cadaver sonat ab eo quod per mortem cadat, secundum Hieronymum, ad commemorandam Christi passionem, per quam et Christus ibi potestatem iudiciariam promeruit, et homines passioni ejus conformati ad societatem gloriae ipsius assumuntur, secundum illud Apostoli 2 ad Tim. 2: « Si compatimur, et conregnabimus etc. » Impii vero qui Christo non adhaeserunt, remanebunt in terra quam dilexerunt, secundum illud Jerem. 17: « Domine, omnes qui te derelinquunt confundentur, » Glossa « perpetuo recedentes a te »: « in terra seribentur etc. » Glossa « Deleti de libro vitae eum his qui terrena sapiunt. » Gregorius: « O quam angustae erunt tunc reprobis viae! Superius iudex iratus, inferius horrendum chaos, a dextris peccata accusantia, a sinistris infinita daemonia ad supplicium pertrahentia; intus conscientia urens, foris mundus ardens. miser peccator sic deprehensus quo fugiet? Latere erit impossibile, apparere intolerabile. » Sic igitur patet venientis iudicis eminentia, quia in nubibus veniet. Locum iudicii convenientia, quia circa locum montis Oliveti. Differens bonorum et malorum assistentia; quia bonis in aëra sollevatis, impii in terra remanebunt sententiam finalem aeternae damnationis pro suis meritis recepturi. Tertium notatur ibi, « Cum potestate magna et majesta-

« te etc. » Glossa « in potestate magna et majestate visuri sunt quem in humilitate positum « audire noluerunt; ut virtutem ejus tanto districtius tunc sentiant, quanto nunc cervicem cordis ad potentiam non inclinant. » Revera cum potestate magna veniet: « nam virtutes caelorum « movebuntur, » Matth. 24, et Luc. 21. Gregorius: « Quid enim virtutes caelorum, nisi Angelos, Dominations, Potestates et Principatus appellat, « quae in adventu districti judicis tunc visibiliter « oculis apparebunt; ut districte tunc a nobis exi- « gatur hoc quod nos modo invisibilis Conditor « aequanimiter portat. » Chrysostomus: « Si rex « terrenus processurus ad bellum contra aliquem « expeditionem mandat in populo, dignitates mo- « ventur, exercitus excitantur, civitas tota fervet; « quanto magis rege caelesti exurgente judicare « vivos et mortuos, angelicae virtutes commoventur « terribiles ministri terribiliorem Dominum prae- « cedentes? » Sciendum vero quod potestas Christi judicantis erit insuperabilis, inexplicabilis, internominabilis. De primo dicit Chrysostomus: « Nec resi- « stendi virtus, nec fugiendi facultas, nec poeniten- « tiae locus, nec satisfactionis tempus tunc erit. » Ex angustia omnium rerum nihil remanet nisi luctus. De secundo, Augustinus tractans illud Joan. 18: « Ut autem dixit, Ego sum, abierunt retrorsum « et ceciderunt in terram, » sic dicit: « Una vox tur- « bam odiis ferocem, armis terribilem sine ullo « telo percussit, repulit, et stravit virtute latentis « divinitatis. Qui faciet judicaturus qui hoc fecit « judicandus? Quid regnatorus poterit qui moriturus hoc potuit? » quasi dicat, explicari non potest tanti judicis potestas. De tertio dicitur Dan. 7: « Aspicebam in visione, et ecce filius hominis. » Et infra: « Potestas ejus potestas aeterna, » Glossa « quae nullo fine claudetur. » Multum igitur timenda est tanti judicis potestas. Luc. 12: « Timete « eum qui postquam occidit, habet potestatem mit- « tere in gehennam. » Sicut autem potestas Christi judicantis erit insuperabilis, ita sapientia ineffabilis, justitia inflexibilis: unde Bernardus: « Veniet « dies judicii, ubi plus valebunt pura corda quam « astuta verba, et bona conscientia quam marsupia « plena: quoniam iudex ille nec fallatur verbis, nec « flectetur donis. » Haec autem ad faciendum judicium requiruntur: scilicet zelus justitiae, quo ad judicium procedatur: lumen sapientiae, secundum quam sententia proferatur: virtus potentiae qua sententia lata exequatur. Quae excellentissime in Christo iudice reperientur, utpote ejus justitia inflexibilis, sapientia ineffabilis, potentia insuperabilis, Scripturae et sanctorum testimonio comprobatur. Sed notandum summopere, quod tempus adventus istiusmodi omnibus est ignotum, secundum illud Matth. 14: « De die autem illa et hora nemo scit, neque « Angeli in caelo, neque Filius, nisi Pater. » Ubi sciendum quod tunc Deus dicitur aliquid scire, quando alicujus rei notitiam confert, sicut dixit ad Abraham Genes. 12: « Nunc cognovi quod timeas « Deum, » idest cognoscere te feci. Sicut etiam filius dicitur ignorare diem adventus sui, quia nobis notitiam hujus die non dedit. Unde discipulis de hoc die quaerentibus Act. 1, respondit: « Non « est vestrum nosse tempora vel momenta etc. » Ideo autem notitiam hujus diei non donavit, quia non expedit ut semper incerti de adventu judicis sic quotidie vivamus quasi alia die judicandi, ut

dicit Glossa, Matth. 18: « Videte, vigilate et orate « nescitis enim quando tempus sit. » In quibus verbi Dominus notabiliter tria verba inculcat: scilicet videte, vigilate et orate. Ad ejus evidentiam est sciendum, quod primo debemus ferventer videre, diem adventus justis iudicis pensando: semper enim ante oculos nostros ponenda est dies illa dies irae. Unde Deuteron. 32: « Utinam saperent, et intelligerent, « ac novissima providerent. » Hieronymus: « Sive « comedam, sive bibam, sive scribam, sive aliud « operis quicquam faciam, semper sonat in auribus « meis vox illa: Surgite mortui, venite ad iudicium. » Secundo debemus vigilare instanter operando, ut bonis operibus parati inveniamur. Gregorius: « Vi- « gilat qui ad aspectum veri luminis oculis apertos « habet: vigilat, qui servat operando quod credit; « vigilat qui a se corporis et negligentiae tenebras « repellit. Sic igitur vigilandum est quia nescimus « qua hora Dominus noster venturus sit, sive ad « iudicium singulare, quod erit in obitu cujuslibet, « sive ad iudicium universale et finale: » unde Augustinus super illud Matth. 3, « quod uni dicit « omnibus dico Vigilate etc. », « Tunc unicuique, « veniet dies ille, cum venerit ejus dies, ut talis hinc « exeat, qualis est iudicandus illo: ac per hoc vi- « gilare debet omnis Christianus, ne imparatum « eum inveniat Domini adventus. Imparatum autem « inveniet dies ille, quem imparatum invenerit suae « vitae ultimus dies. » Tertio debemus orare ferventer impetrando Christi misericordiam, ut digni esse possimus omnia quae futura sunt mala fugere, et stare ante filium hominis, ut dicitur Luc. 21. Ubi duo tanguntur, pro quibus est orandum: scilicet pro futuris malis vitandis, et pro futuris bonis adipiscendis. Primum ibi, « Ut digni habeamini « fugere ista omnia. » Unde etiam Matth. 24, dicitur: « Orate, ne fuga vestra fiat in Sabbato, » idest ne tunc velitis fugere quando non licet, nec possitis. Spiritualiter autem orare praecipimur, ut non frigescat fides in Deum et caritas, neque otiosi in opere Dei torpeamus virtutum Sabbato, ut dicit Glossa. Secundum tangitur ibi, « Et stare ante « filium hominis, » haec est summa beatitudinis in praesentia judicis sui securum esse. Theodoretus: « Haec enim est angelica gloria, stare ante filium « hominis Deum nostrum, et faciem ejus jugiter « cernere. »

Notandum vero quod ultimum adventum Christi quaedam sunt antecedentia, quaedam vero concomitantia. Antecedentia praecipue sunt tria. Primum est Antichristus cum veritatis contradictione: Unde Apostolus 2 Thess. 2: « Ne terreamini quasi « instet dies Domini: quoniam nisi primo disces- « sio venerit, et revelatus fuerit homo peccati fi- « lius perditionis, qui adversatur et extollitur super « omne quod dicitur Deus, aut quod colitur, ita ut in « templo Dei sedeat, ostendens se tamquam Deus, » dicit Glossa: « Non veniet ad iudicium Dominus, « nisi prius fiat discessio a Romano Imperio, sive « Ecclesiarum a spirituali obedientia Romanae Ec- « clesiae, vel hominum a fide. » Et ubi manifestatus fuerit homo peccati, idest totius peccati servus et fons, idest Antichristus; filius perditionis, idest diaboli, qui adversatur Christo in membris suis: unde Antichristus extollitur super omne quod dicitur Deus aut quod colitur, scilicet falsa opinione, ut dii gentium, ita ut in templo Dei sedeat a Romanis destructo, quod Judaei reaedificabunt. Nasce-

tur autem Antichristus in Babylone de tribu Dan, juxta quod Jacob ait Genes. 49: « Fiat Dan coluber in via, cerastes in semita. » Et cum venerit Jerosolymam, circumcidet se dicens Judaeis, Ego sum Christus vobis promissus. Tunc confluent ad eum omnes Judaei, et reaedificabunt templum a Romanis destructum, et ibi sedebit ostendens se tamquam sit Deus: nam sicut in Christo omnis plenitudo divinitatis habitavit, ita in Antichristo plenitudo malitiae et omnis iniquitas habitabit: quia in ipso erit caput omnium malorum, scilicet diabolus qui est rex super omnes filios superbiae.

Sciendum vero quod Antichristus tribus modis sibi populum subjugabit. Primo per falsam miraculorum operationem; unde Matth. 24: « Surgent pseudo-christi et pseudoprophetae, » idest « Antichristus et ministri ejus, » ut exponit Chrysostomus, « et dabunt signa magna et prodigia, ita ut in errorem ducantur, si fieri potest, etiam electi. » Glossa super illud Apocal. 13: « Et fecit signa magna ut etiam ignem faceret de caelo descendere », « ut Apostolis datus est Spiritus sanctus in specie ignis. » Glossa super illud 2 ad Thess. 2: « ejus est adventus secundum operationem Satae in omni virtute, signis et prodigiis: » quia per magicam artem non veram faciet illa, et per phantasiam deludet homines, sicut Simon magus delusit illum qui putans eum occidere, arietem decollavit pro eo. Secundo per munerum largitionem, ut dicit Glossa super illud Dan. 11: « Dabit illos potestatem in multis et terram dividet gratuito. » Antichristus deceptis multa donabit, et terram suo exercitui dividet: quos enim suo terrore subjugare non poterit; avaritia subjugabit: Tertio per tormentorum illationem; unde Matth. 24: « Erit enim tunc tribulatio magna, » Glossa « tempore Antichristi, qualis nunquam fuit ab initio mundi usque modo, neque fiet: » et « nisi abbreviati fuerint dies illi, non fieret salva omnis caro: sed propter electos breviabuntur dies illi, » Glossa « Erunt enim haec mala tribus annis et dimidio tantum; » unde Dan. 2 dicitur, quod « juravit Angelus per viventem in aeternum quia in tempore, » Glossa « unius anni: » et tempora, Glossa « duorum annorum: » et « dimidium temporis, » Glossa « unius anni. » Hoc spatio dicitur futura desolatio sub Antichristo, ut ibid. in Glossa subinfertur. Sciendum vero quod tempore Antichristi, veniet Elias et Enoch verbo et exemplo poenitentiam praedicantes, et fidem Salvatoris confirmantes: unde dicitur Joelis ult.: Eccc ego mittam vobis Eliam Profetam, antequam veniat dies Domini magnus et horribilis. Apocal. 11: « Dabo duobus testibus meis, » Glossa « Eliae et Enoch », « et prophetabunt diebus centum viginti sex, » Glossa « tribus annis, sicut ipse Christus praedicavit », « amietti saccis, » Glossa « praedicantes poenitentiam, et exemplo ostendentes. » Tandem Antichristus occidet eos: Antichristum vero Dominus Jesus Christus interficiet spiritu oris sui, ut dicitur 2 Thess. 2. Glossa « idest in virtute spiritus sui, » qui a se procedit potentia visionis suae, et jungitur in Glossa, quia secundum Doctores occidetur in monte Oliveti in papilione et solio suo in illo loco, contra quem Dominus ascendit ad caelos. Illo autem interfecto non statim veniet Christus, sed ut in lib. Dan. intelligitur, conceduntur electis dies quadraginta quinque ad poenitentiam. Quantum vero Dominus post ven-

turus sit, penitus ignoratur. Secundum quod praecedet ultimum Christi adventum, sunt signa cum horribili corruseatione; unde Luc. 21: « Erunt signa in sole et luna et stellis, » de quibus expressius dicitur Matth. 24, quod « Sol obscurabitur, et luna non dabit lumen suum, et stellae cadent de caelo, » idest lumine carebunt, ut dicit Glossa Rabani. Nihil prohibet veraciter intelligi solem et lunam cum ceteris syderibus ad tempus suo lumine privari, sicut de sole factum constat tempore passionis: unde Joel. 2, dicitur: « Sol convertetur in tenebras, et luna in sanguinem, antequam veniat dies Domini magnus et horribilis: » quod quidem fieri potest virtute divina, tum ut vicinum indicent Domini adventum, secundum Glossam; tum etiam ad terrorem hominum, ut ad reverentiam judicis venturi et subjectionem homines praeparentur. Peraeto vero die judicii, mundo innovato, majus lumen recipient, ut dicit Glossa super Matth. Tertium quod praecedet ultimum adventum Christi, est ignis cum vehementi flagratione; unde in Psal. 96: Ignis ante ipsum praecedet et inflammabit in circuitu inimicos ejus. » Ubi notandum quod ignis iste quatuor habet effectus. Primus est, quod mundum purgabit; unde Glossa super illud 1 Corinth. 7: « Praeterit figura hujus mundi », « idest pulcritudo, nam substantia hujus mundi mundanorum ignium conflagratione peribit: » et super illud 2 Thess. 1: « In flamma ignis dantis vindictam, » dicit Glossa, quod « ignis erit in mundo, qui praecedet totum spatium aëris occupans, quantum occupavit aqua diluvii; qui ardebit terram et crassitudinem ejus. » Purgabit autem mundum a culpae infectione et impuritatis commixtione, quae sunt contrariae dispositiones ad quamdam gloriae perfectionem, quam Christus in adventu suo mundo conferet, ut sensus carnis glorificatus delectabiliter in ipso mundo Deum contempletur. Secundus effectus ejus est, quod bonos purificabit, ut dicit Glossa super illud 2 Thess. 1: « Inflammatio ignis », « quod ille ignis purificabit electos Domini Jesu. » Unde boni, in quibus nihil purgandum invenitur, nullum dolorem ex igne sentient, sicut nec pueri senserunt in camino, Dan. 3, quamvis eorum corpora nec serventur integra, sicut puerorum, servata fuerunt, et divina virtute fieri poterit, unde sine doloris cruciatu resolutionem corporum patientur. Augustinus: « Hoc erit incendium mundi sanctis, quod fuit caminum tribus pueris, in quibus fuerit aliquid purgandum per illum ignem, aliis vero nullam molestiam ingeret. » Sunt autem tres causae, quare subito illi qui vivi reperientur, purgari poterunt. Una est, quia pauca in eis purganda reperientur, cum terroribus et persecutionibus praecedentibus fuerint praepurgati. Secunda est, quia vivi voluntarie sustinebunt. Poena autem voluntaria in hac vita suscepta, multo plus purgat quam poena post mortem inflata: sicut patet in martyribus, quod si quid in eis purgandum fuerit, passionis flamma tollitur, ut dicit Augustinus, cum tamen poena martyrum fuerit brevis in comparatione ad poenam quae in purgatorio sustinetur. Unde Augustinus: « Hoc erit incendium mundi etc. » ut supra « et tamen iste ignis recuperabit in incensione, quantum amittit in temporis abbreviatione. » Tertius effectus est quod malos cruciabit: unde in Psal. 96: « Ignis ante ipsum praecedet. » Unde dicit Glossa super illud Psal.



ibid.: « Ignis in conspectu ejus exardescit. Ignis  
 « iste materialis erit, quo comburetur facies hujus  
 « mundi, et mali puniuntur, boni vero pur-  
 « gabuntur: poena vero terreat, quos prae-  
 « mia non invitant. » Quartus effectus hujus ignis  
 secundum doctores, est quod tam honorum quam  
 malorum corpora incinerabit, et quantum ad om-  
 nes praedictos effectus praecedet iudicium: quantum  
 vero ad involutionem malorum, et erueiatum etiam  
 iudicium sequetur; unde etiam propter diversa of-  
 ficia hujus ignis praecedentis et subsequenter iudi-  
 cium, dicuntur esse duo ignes, sicut tangitur in  
 Glossa super illud I ad Cor. 5: « Uniuscujusque  
 « opus quale fuerit, ignis probabit, » Glossa modo  
 praedicto a Doctoribus exponitur. Similiter con-  
 comitantia adventum iudicis tria sunt. Primum est  
 mortuorum resurrectio: unde I Thess. 4: « Quo-  
 « niam ipse Dominus in jussu, et in voce Archang-  
 « geli etc., » usque primi. Ubi circa resurrectionem  
 tria notantur, videlicet dominium divinae vir-  
 tutis imperantis, mysterium Archangeli cooperantis  
 signa iudicis venientis et suscitantis. Primum ibi,  
 « Quoniam ipse Dominus in jussu; » unde Dama-  
 scenus: « Crede resurrectionem futuram divina  
 « voluntate, virtute et nutu. » Ubi circa resurre-  
 ctionem tria tangit, scilicet voluntatem divinam,  
 quae impetrat, virtutem quae exequitur, et facili-  
 tatem exequendi in hoc quod nutum adjunxit ad  
 similitudinem eorum quae in nobis sunt, illud enim  
 valde facile nobis est facere, quod statim ad nutum  
 nostrum fit. Nutus autem divinus, ex quo resurre-  
 ctio fiet, nihil aliud est, quam signum ab eo datum,  
 cui tota natura obediet ad resurrectionem mortuo-  
 rum, de quo patebit infra. Secundum ibi, « In  
 « voce Archangeli: » unde Augustinus in 5 de  
 Trin. dicit, quod « corpora crassiora et inferiora  
 « per subtiliora et potentiora quodam ordine re-  
 « guntur, a Deo per spiritum rationalem vitae, »  
 et hoc etiam Gregorius in 4 Dial. tangit. Unde in  
 omnibus quae corporaliter a Deo fiunt, utitur Deus  
 ministerio Angelorum. In resurrectione autem est  
 aliquid ad transmutationem corporum pertinens,  
 scilicet collectio eorum, et eorum praeparatio ad  
 reparationem humani corporis. Unde quantum ad  
 hoc in resurrectione utitur Deus ministerio Ange-  
 lorum; sed anima sicut immediate a Deo creata  
 est, ita immediate a Deo corpori iterato unietur  
 sine aliqua operatione: similiter etiam gloriam cor-  
 poris ipse faciet absque ministerio Angelorum, sicut  
 et animam immediate glorificat: et istud Angelorum  
 ministerium vox dicitur, secundum unam exposi-  
 tionem, quam tangit Magister sententiarum in 4  
 dist. 45. Istud autem ministerium erit principale  
 unius Archangeli, scilicet Michaelis, qui est princeps  
 ecclesiae, sicut fuit synagogae, ut dicitur Dan. 5,  
 qui tamen agit ex influenza virtutum, et aliorum  
 superiorum ordinum. Unde quod ipse faciet, supe-  
 riores quodammodo faciunt. Similiter inferiores  
 Angeli cooperabuntur ei circa resurrectionem sin-  
 gularum, quorum custodiae deputati fuerunt, et  
 sic vox illa potest unius, vel plurium Angelorum  
 dici Matth. 24, dicitur: « Mittet Angelos suos cum  
 « tuba, et voce magna, » Glossa, « tam aperta et  
 « intensa voce, quod ubique a mortuis audiatur,  
 « et congregabit electos a quatuor ventis, idest  
 « a quatuor climatibus mundi, scilicet Oriente,  
 « Occidente, Aquilone, Austro, » ut dicit Remigius.  
 Tertium ibi, « In tuba Dei descendet de caelo. »

Ubi notandum, quod Christus dicitur descen-  
 dere in tuba, tum propter sui adventus evidentiam  
 quia manifeste veniet, ut dicit Glossa: unde dicit  
 Gregorius, quod « tubam sonare, nihil aliud est  
 « quam mundo ut iudicem filium demonstrare: »  
 tum propter suae vocis efficaciam: unde in Psalm.  
 67: « Dabit voci suae vocem virtutis, » idest effi-  
 caciam resuscitandi mortuos, qui prius ut agnus sine  
 voce coram tonde se obmutuit, ut dicit Glossa,  
 et secundum hoc sonus tubae est vox Christi im-  
 perantis, ut quidam exponunt: tum etiam propter  
 quamdam convenientiam ad usus tubae in veteri  
 testamento: tuba enim congregabantur ad concilium  
 commovebantur ad praelium, et vocabantur ab fe-  
 stum. Resurgentes autem congregabuntur ad con-  
 cilium iudicii, ad praelium quo orbis terrarum  
 pugnabit contra insensatos, et ad festum aeternae  
 solemnitatis. Cum igitur Christus sic descenderit  
 in jussu, et voce Archangeli, et in tuba Dei, tunc  
 mortui resurgent. Quod autem Apostolus subjungit,  
 « Deinde nos qui vivimus, » non sic intelligendum  
 est, quod vivi reperti non moriantur, sed ut Glossa,  
 ibidem, dicit, in ipso raptu mors eorum erit, et  
 resurrectio, ut quasi anima per soporem egressa  
 de corpore, eidem in momento reddatur: tunc ven-  
 tilabitur area ministerio Angelorum, et triticum  
 separabitur a palea, quia « boni, » secundum Apo-  
 stolum, « rapiuntur in nubibus obviam Christo in  
 « aera, » impiis in terra remanentibus.

Notandum vero quod licet determinata ho-  
 ra temporis futurae resurrectionis pro certo non  
 potest sciri, tamen satis probabiliter a quibus-  
 dam dicitur, quod resurrectio erit quasi in di-  
 luendo sole existente in Oriente, luna in Occi-  
 dente, quia tali dispositione creduntur sol et  
 luna creata, ut sic eorum circulatio compleatur  
 penitus ad redditum ad idem punctum, unde de  
 Christo dicitur, quod tali hora resurrexit. Secun-  
 dum quod comitatur iudicis adventum, est meri-  
 torum retributio; unde in Psalm. 61: « Tu red-  
 « des unicuique juxta opera sua. » 2 Cor. 5:  
 « Omnes nos manifestari oportet ante Tribunal  
 « Christi, ut referat unusquisque, » Glossa « si-  
 « militudine messorum, propria corporis prout ges-  
 « sit sive bonum, sive malum, » Glossa. Hic enim  
 omne meritum comparatur, « quo post hanc vitam  
 « possit quispiam relevari, vel gravari: quia vero  
 « meritorum retributio per iudicium fiet, ideo de  
 « ipso iudicio videamus. » Unde sciendum, quod  
 post iudicium singulare quod erit in obitu ejus-  
 libet, restat aliud iudicium universale quod erit in  
 novissimo die: quia licet per mortem vita hominis  
 temporaliter terminetur secundum se, remanet ta-  
 men ex futuris secundum quid dependens. Uno  
 modo secundum, quod adhuc vivit in memoriis  
 hominum, in quibus quandoque contra veritatem  
 bonae famae remanet vel malae. Alio modo in  
 filiis qui sunt quasi aliquid patris, secundum illud  
 Eccle. 50. « Mortuus est pater illius, et quasi non  
 « est mortuus, similem enim reliquit sibi post se. »  
 Et tamen multorum honorum sunt mali filii, et e  
 contrario. Tertio quantum ad effectum operum suo-  
 rum, sicut ex deceptione Aarii, et aliorum sedu-  
 ctorum pullulat error infidelitatis usque ad finem  
 mundi, et usque tunc proficit fides ex praedica-  
 tione apostolorum. Quarto modo quantum ad cor-  
 pus, quod quandoque traditur honorifice sepulturae:  
 quandoque vero remanet insepultum, et tandem



intumulatum resolvitur omnino. Quinto modo quantum ad ea in quibus homo suum affectum defixit, puta in quibusdam temporalibus rebus, quorum quaedam citius finiuntur, quaedam diutius durant. Omnia autem haec subduntur existimationi divini iudicii: et ideo de his omnibus perfectum et manifestum iudicium haberi non potest, quamdiu hujus temporis cursus durat: et propter hoc oportet esse finale iudicium in novissimo die, in quo perfecte id quod ad unumquemque hominem pertinet quocumque modo, perfecte et manifeste dijudicetur. Sed circa hoc iudicium tria possumus considerare: scilicet iudicis aequitatem, iudicantium cum Christo dignitatem, et iudicandorum veritatem. De primo dicitur in Psalm. 25: « Judicabit populos in aequitate, » Glossa « in futuro iudicio, » et Matth. 25: « Cum venerit filius hominis in majestate etc. » Ibi iudicis aequitas designatur. Primo quoad bonorum et malorum separationem ibid.: « Et separabit eos quasi pastor segregat oves ab haedis, » id est « bonos a malis, » ut dicit Glossa. Secundo quoad meritorum discussionem, cum dicit bonis, « Esurivi, et dedistis mihi manducare etc. » Tertio quoad sententiae illationem, cum dicit bonis, « Venite benedicti; » malis vero, « Ite maledicti. » Sciendum vero quod totum iudicium et quoad discussionem, et quoad accusationem malorum et commendationem bonorum, et quoad sententiam de utrisque, mentaliter perficietur. Si enim vocaliter singulorum facta narrarentur, inestimabilis longitudo temporis ad hoc exigeretur: sicut etiam dicit Augustinus 20 de civ. Dei, quod « si liber ex ejus scriptura omnes iudicabuntur, » ut dicitur Apoc. 20, « carnaliter cogitetur: quis ejus magnitudinem et longitudinem valeat aestimare? » At quanto tempore legi poterit, in quo scriptae sunt viae universorum? Non enim minus tempus requiritur ad narrandum ore tenus singulorum facta quam ad legendum, si essent in libro materiali scripta: unde probabile est, quod illa quae dicuntur Matth. 25, non vocaliter, sed mentaliter intelligenda sunt et perficienda. Fiet ergo virtute divina, ut statim unicuique occurrant bona vel mala pro quibus est praemiandus vel puniendus, et non solum unicuique de seipso, sed etiam de alio: unde dicitur 1 Cor. 1: « Veniet Dominus, et illuminabit abscondita tenebrarum, » Glossa « id est peccatorum »: « et manifestabit consilia cordium, » Glossa « quae gesta et cogitata, bona vel mala, tunc erunt aperta et nota omnia omnibus. » Apocal. 20: « Vidi mortuos magnos, et pusillos stantes in conspectu throni, et libri sunt aperti, » Glossa, « id est conscientiae singulorum, quae apertae erunt omnibus. » De secundo, scilicet iudicantium cum Christo dignitate, dicitur Matth. 19: « Sedebitis super sedes duodecim, iudicantes duodecim tribus Israel; » ubi dicit Glossa, quod « per duodecim sedes universitas mandatorum intelligitur. »

Notandum vero quod quidam iudicabunt sola comparatione, scilicet boni minus bonos, mali magis malos, secundum illud Matth. 12: « Viri Ninivitae surgent in iudicio, et condemnabunt generationem istam, » non potestate, sed comparationis exemplo. Quidam vero iudicabunt per solam approbationem; et sic omnes justii iudicabunt, secundum illud Sapient. 5: « Iudicabunt sancti nationes. » Quidam vero iudicabunt quasi iudiciariam potestatem accipientes a Christo, secundum illud Matth.

19: « Sedebitis super sedes etc. » Ad cuius evidentiam sciendum, quod cum iudicare importet actionem in alium procedentem, ideo proprie loquendo iudicare dicitur, qui sententiam loquendo in alium confert. Sed hoc dupliciter contingit. Uno modo ex propria auctoritate: et hoc est illius proprie qui habet in alios dominium et potestatem, cuius regimini subduntur omnes qui iudicantur: et sic iudicare est solius Dei. Alio modo est sententiam alterius auctoritate latam in aliorum notitiam ducere, quod est sententiam latam pronuntiare; et hoc modo perfecti viri iudicabunt, quia ducunt in cognitionem divinae justitiae, aut quod juste eis pro meritis debeat, ut ipsa revelatio justitiae iudicium dicatur. Unde Richardus de Sancto Victore: « Iudices coram iudicandis decretorum suorum libros aperire, est ad eorum cordium inspectionem inferiorum quorumlibet visum admittere, sensumque suum in his quae ad iudicium pertinent revelare. » Sciendum vero quod haec dignitas ad illos pertinet, qui relictis omnibus Christum sunt secuti: unde Matth. 19, Petro quaerenti: « Ecce nos reliquimus omnia, et secuti sumus te: quid ergo erit nobis? » dixit Jesus: Amen dico vobis etc. » Unde Gregorius: « Quisquis stimulo divini amoris excitatus hic possessa reliquerit, illic proculdubio culmen iudiciariae potestatis obtinebit; ut simul tunc iudex cum iudice veniat, qui nunc consideratione iudicii spontanea se paupertate castigat. Quia enim pauperes voluntarii soli Deo adhaerentes non impediuntur rerum sollicitudinibus a perceptione sapientiae, nec retrahuntur rerum cupiditatibus a zelo justitiae; et quia etiam depressione paupertatis merentur culmen honoris et excellentiae: ideo idonei et digni iudicantur potestatem iudiciariam possidere. » De tertio, scilicet iudicandorum veritate, dicit Gregorius, quod « in iudicio erunt quatuor ordines: alii enim iudicantur et pereunt: alii non iudicantur et pereunt: alii iudicantur et regnant: alii non iudicantur et regnant. » Ad cuius evidentiam sciendum, quod ad iudicium tria videntur concurrere: primo quidem quod iudici praesentetur iudicandus: secundo quod ejus merita discutiantur: tertio quod sententiam accipiat. Quantum igitur ad primum omnes boni et mali a primo homine usque ad ultimum Christi iudicio subduntur, ut dicitur 2 Corinth. 5: « Oportet omnes nos assistere ante tribunal Christi: » a quorum generalitate non excluduntur etiam parvuli, qui vel sine baptismo vel cum baptismo discesserunt, ut dicit Glossa, ibidem. Quantum vero ad secundum, scilicet ad meritorum discussionem, non omnes iudicabuntur, nec boni nec mali: ibi enim necessaria est discussio iudicii, ubi bona malis permiscantur; ubi vero est bonum absque permixtione mali, vel malum absque permixtione boni, ibi discussio locum non habet. Bonorum igitur quidam sunt qui totaliter bona temporalia contemnunt soli Deo vacantes, et his quae Dei sunt. Quia ergo peccatum committitur per hoc quod spreto incommutabili bono bonis commutabilibus adhaeretur, nulla videtur in his notabilis commixtio boni et mali: non quod absque peccato vivant, cum ex eorum persona dicatur Joan. 1: « Si dixerimus quia peccatum non habemus, ipsi nos seducimus. » Sed quia in eis levia quaedam inveniuntur, quae fervore caritatis quodammodo consumuntur, ut nihil esse videantur; un-

de hi in iudicio non iudicabuntur per meritorum discussionem. Qui vero terrenam vitam agentes rebus saecularibus intendentes utuntur quidem non contra Deum, sed eis plus debito inhaerentes, habent aliquid mali bono fidei et caritatis admixtum secundum aliquam notabilem quantitatem, ut non de facili apparere possit quid in eis praevalcat: unde tales iudicabuntur etiam quantum ad discussionem meritorum: similiter etiam est ex parte malorum.

Notandum quod principium accedendi ad Deum, est fides, secundum illud ad Hebr.: « Accedentem ad Deum oportet credere. » Qui ergo fidem non habent, nihil boni in eis invenitur, cuius aliqua mala permistio faciat eorum dubiam damnationem: et ideo damnabuntur absque meritorum discussionem. Qui vero fidem habet, caritatem autem non, non habet opera bona, nec aliquid unde Deo coniungatur, huius necessaria est meritorum discussio, ut evidenter appareat quid in eo praeponderet, bonum vel malum: unde talis cum discussionem meritorum damnabitur, sicut rex terrenus qui peccantem cum audientia damnat, hostem vero sine omni audientia. Quantum vero ad tertium, scilicet sententiae prolationem, omnes iudicabuntur, quia omnes ex ipsa sententia vel gloriam vel poenam reportabunt: unde dicitur 2 Cor. 5: « Ut referat unusquisque propria corporis, prout gessit, sive bonum sive malum. » Tertium vero quod comitatur adventum iudicis, est mundi innovatio: de qua dicitur Isa. 65: « Ego creabo caelos no-

« vos et terram novam, et non erunt priora in memoria; » Apocal. 21: « Vidi caelum novum, et terram novam. » Ad cuius evidentiam sciendum, quod omnia corpora esse facta propter hominem creduntur: unde et omnia dicuntur ei subiecta. Serviunt ei dupliciter: uno modo ad suam sustentationem corporalis vitae; alio modo ad profectum cognitionis divinae, in quantum homo per ea quae facta sunt, invisibilia Dei conspiciat, ut dicitur ad Rom. 1 cap. Primo ergo ministerio creaturarum homo glorificatus nullo modo indigebit, cum ejus corpus omnino incorruptibile sit futurum, virtute divina id faciente per animam quam immediate glorificat. Secundo etiam ministerio non indigebit homo quantum ad cognitionem intellectivam, quia tali cognitione Deum sancti videbunt immediate per essentiam. Sed ad hanc visionem essentiae divinae oculus carnis attingere non potest. Et ideo ut ejus solatium etiam sibi congruens de visione deitatis praebetur, inspiciet deitatem in suis effectibus corporalibus, in quibus manifesta indicia divinae majestatis apparebunt, et praecipue in carne Christi, et post haec in corporibus beatorum, et deinceps in omnibus aliis corporibus: et ideo oportebit, ut etiam alia corpora majorem influentiam a divina bonitate suscipiant; non tamen speciem variantem, sed addentem eujusdam gloriae perfectionem: et haec erit mundi innovatio: unde similis mundus innovabitur et homo glorificabitur.

# OPUSCULUM LIV.

## DE DILECTIONE DEI ET PROXIMI

(EDIT. ROM. LXI.)

### DE DILECTIONE DEI

#### CAPUT PRIMUM.

##### *Prooemium.*

« Magister, quod est mandatum maximum in lege? ait Jesus: Diliges Dominum Deum tuum ex toto corde tuo, et ex tota anima tua, et ex tota mente tua. Hoc est magnum et primum mandatum. » Hoc, inquam, est maximum: magnum, quia mandat hoc lex naturalis in mentibus omnis creaturae rationalis divinitus indelebiter impressa: majus, quia remandat, et repetens iterum remandat lex Mosaica a Deo data, et per Angelos ordinata. Deut. 6: « Audi Israel, Dominus Deus tuus unus est. Diliges Dominum Deum tuum etc., » usque ab « ostiis domus tuae: » maximum, quia illud confirmat lex evangelica per ipsum Dei Filium tradita. Matth. 22: « Diliges Dominum Deum tuum: » Marc. 12, et Luc. 10. « Et hoc est primum mandatum. » Primum tripliciter: primum in intentione jubentis: finis enim in quolibet ea quae ad finem sunt, in intentione praecedit. 1 Tim. 1: « Finis praecepti est caritas. » Finis non terminans vel consumens, sed consummans, ad quem omne praeceptum ordinatur. Rom. 13: « Plenitudo legis est dilectio: » Psal. 118: « Omnis consummationis vidi finem. » Item primum in necessitate observationis: sunt enim, ut volunt magistri, praecepta quaedam primae, quaedam secundae, quaedam tertiae, quaedam quartae necessitatis. Primae necessitatis sunt, sine quibus Dei similitudo non salvatur; quae a principio naturaliter obligant et in generali et in speciali: tale est diligere Deum. Secundae necessitatis sunt, quae a principio et naturaliter obligant in generali, et non in speciali; ut est satis facere pro peccatis. Tertiae necessitatis sunt, quae ex actu humano obligant, sicut votum: vel quae obligant quosdam, sed non omnes, aut etiam omnes in casu, sicut consilia. Quartae necessitatis sunt, quae praelati Ecclesiarum instituunt, scilicet quae instituit Papa, aut Archiepiscopus in provincia sua, aut Episcopus in dioecesi sua, aut Abbas in abbacia

sua. Primae necessitatis est, contra quod omnino dispensari non potest nec ab homine nec a Deo. Item primum est in ordine dignitatis: hic enim actus dignissimus est, cujus dignitas cognoscitur ex tribus: ex subjecto, vel potentia a qua egreditur actus: haec est voluntas summa, et dignissima potentia animae. Item ex habitu vel dono potentiam informantem, et super se elevante: hoc est caritas quae est summum donum: quod patet, quia ab ipso summus ordo denominatur, scilicet Seraphin, id est ardens. Item ex objecto, quia in summum bonum dirigitur, scilicet in Deum.

#### CAPUT II.

##### *De duplici dilectione.*

« Diliges Dominum Deum tuum etc. » Duplex est dilectio: una concupiscentiae, qua diligimus illud quod nobis volumus et desideramus, ut divitias vel honores; alia amicitiae, qua diligimus illud cui bonum volumus, ut amicos. Utraque dilectione diliges Dominum Deum tuum. Nota autem tria circa actum dilectionis: scilicet antecedentia, concomitantia, consequentia. Antecedentia considerari oportet, ut ea quae ad hunc finem sunt. Nam, ut ait Aristoteles, ponentes finem aliquem, quomodo et per quae intendunt: et si plura videntur fieri, per quae facilius et melius intendunt. Si autem per unum perficitur, quomodo per hoc erit, et illud per quod, usque quo perveniat ad primam causam quae ultimum erit de intentione. Antecedit igitur naturaliter cognitio et necessario dilectionem, et concupiscentiam apprehensio. Ratio est, quia vires ordinatae sunt cognitiva ante affectivam; et in motibus et motoribus ordinatis destructo priori destruitur quod posterius est. Augustinus: « Invisa possumus diligere, incognita nequaquam. Vis ergo Deum amare, et concupiscere? prius oportet dignoscere. » Igitur secundum Philosophum, delectabile apprehensum movet apprehensum ut delectabile. Summum igitur delectabile oportet praeapprehendere cogitando, ut possimus diligere appetendo. Apprehendimus autem sensibili auditu, visu, nonnunquam gustu. Verbi gratia: vinum quod est sensibile exterius, alio modo apprehendo audiens narrari de ipso « vinum illud est bonum », magis au-

tem cum video, quia visus secundum Aristotelem plures rei differentias apprehendit; et ideo certius iudicat de re: magis autem cum praegusto: tunc enim est maxima conjunctio sensibilis ad sensum. Similiter intellectus de summo bono intelligit aliquid, aut per alium, et sic quasi per auditum: aut per se, et sic quasi per visum; sed plenius apprehendit, cum affectus aliquo modo contingens vel modice experitur. Audire autem est incipientium, videre proficientium, gustare perfectorum. Incipiens vis audire ut concupiscas, videre ut movearis, quaerere ut audias: quaerit enim famulus pro potu frigido, quaere igitur et tu: interroga a Deo et Dei hominibus. A Deo in oratione. Boetius: Quid nam agendum censes, ut illius boni summi sedem invenire mereamur? Invocandum, inquit, omnium rerum patrem, sine quo nullum rite fundatur principium. Ab hominibus in sermone; hinc sequitur motus. Isa. 55: « Audite audientes me, et comedite bonum. » Proficiens vis audire, ut possis appetere; vaca ut videas. Psal. 45: « Vacate et videte: » ut vaces, negotia postpone. Quoniam igitur secundum Aristotelem, ultimum de intentione, primum est in executione; primum pro loco et tempore negotia intermitte ut vaces. Anselmus: « Eja nunc pronuncio, fuge paululum occupationes tuas, et abseconde te modicum a tumultuosis cogitationibus tuis, abjice nunc onerosas curas, postpone laboriosas distentiones tuas, vaca aliquantulum mente Deo, et requiesce aliquantulum in eo, fuge occupationes operatum in homine exteriori, abseconde te a tumultu phantasiae, abjice curas rationis, postpone distentiones voluntatis, et vaca aliquantulum mente: sed vide quomodo vaces, ne derideant hostes Sabbata tua. Vaca ergo ut videas, vide intellectu ut concupiscas affectu. Ceterum vos perfecti gustate, et videte, quoniam suavis est Dominus: gustate vel modice ad probandum, et videbitis quia bona est negotiatio ejus, et fastidietis alia bona prae appetitu istius. » Richardus: « Non potest, ut arbitror, ad perfectum exteriorum bonorum fastigium pertingere, qui interiorum dulcedinem bonorum nondum meruit gustando sentire. » Est igitur ordo inter hos apprehensionis modos: nam auditus ordinatur ad visum, ut patet in regina Saba, quae audita fama Salomonis appetebat videre quod audierat. Homo igitur post inceptionem proficiens, ab auditu ad visum transiens, dicit cum propheta Ps. 47: « Sicut audivimus, sic vidimus. » Visus autem ordinatur ad gustum, quo contra euidam dicitur in lib. 4 Reg. 7: « Videtis, et inde non comedetis. » Fac tamen interim quod licet; tene medium, et expecta perfectum; vide et cogita Deum, non ut Dominum vel ut iudicem, sed ut quamdam rem summe bonam et delectabilem. Anselmus: « Excita nunc, anima mea, totum intellectum tuum, et cogita quantum potest quale et quantum sit illud bonum. Cognitione et cogita quod ipse praecellit omne concupiscibile, delectat prae omni delectabili; » quod patet inducendo: « Concupiscit superbia honores, avaritia divitias et res, accidia commodum et quietem, gula et luxuria voluptatem. » Ex his sequitur ira contra laedentem nos in his, quia ira est vindex laesae concupiscencie, ut definit Philosophus, et sequitur invidia contra habentem. Haec Gregorius: « Si quae desideramus, illi invidemus qui accipit ea penitus, vel partem accipiendo,

quantitatem nobis restringit. In concupiscencia igitur horum est peccatum, non quia ipsa sint mala, sed quia pro his deseruntur meliora. » Augustinus: « Peccatum non est appetitus rerum malarum, sed desertio meliorum. » Deus est igitur effective honor incommutabilis prae omni re honorante excellenter honorans: 1 Reg. 2: « Qui me honorificaverit, honorificabo eum. » Me honorificat qui me honori temporali eligendum praeponit. Sed secundum Aristotelem, si simplex ad simplex, et magis ad magis, et maxime ad maximum: ut, si voluptas bonum, major voluptas magis bonum, et sic maxima voluptas maximum bonum. Igitur si honor bonus sicut utique bonus est, et ideo appetibilis est, summus honor est summe bonus, et ideo summe appetendus. Item Deus est rex incommutabilis, et substantia omnem habentem se excellenter ditans. Augustinus: « Res quibus fruendum est Pater et Filius et Spiritus sanctus: eadem Trinitas, quaedam summa res est communis omnibus fruentibus ea, hic si considerans hanc substantiam boni incommutabilis prae omni substantia boni commutabilis concupiscis. » Item si rerum substantia bona, et ideo appetenda; et summa substantia est summe bona, et ideo est summe appetenda. Item: Deus quies incommutabilis et commodum excellenter quietans. Augustinus: « Fecisti nos Domine ad te: inquietum est cor nostrum donec requiescat in te. » Non talis quies accidiae, de qua etiam inquietudo ortum habet. Augustinus: « Stando lassatus eras, sedendo reficeris, et rursus sedendo lassaris; et quicquid est ubi fatigato succurritur, alia fatigatio exoritur. » Item: Si commodum bonum et quies, et summa quies est summe bona. Ergo summe appetenda. Item: Deus est voluptas incommutabilis excellenter delectans: Psalm. 40: « Torrente voluptatis tuae potabis eos. » Igitur si voluptas est bonum et appetibile, et summa voluptas est summe bona, ergo est summe appetibilis. Hac inductione instantiam non habente, infertur illud universale. Prov. 5: « Omnia quae desiderantur, huic non valent comparari. » Contingit autem comparari tripliciter: secundum majus et minus et aequale. Comparatur majus ad minus et excedit, ut tricubitum ad bicubitum. Talis est illa comparatio Sap. 7: « Luci comparata inventur prior. » Item minus ad majus et exceditur, ut monocubitum ad bicubitum: talis illa Deut. 1: « Filios Enachim vidimus ibi, quibus comparati quasi locustae videbamur. » Item aequale aequali, vel simile simili, quod neque excedit, neque exceditur: talis illa, « Comparatus est juvenis insipientibus. » Omnino ergo quae desiderantur, huic summe desiderabili comparari non possunt (1): quia nec minora nec majora nec aequalia sunt, quia respectu ejus omnino nihil sunt. Hieronymus: « Deus solus vere est, ejus essentiae comparatum nostrum esse non est. » Comparatur igitur unitas millenario, sicut pars toti non in infinitum minor: sed nec punctum lineae, nec centrum punctale toti sphaerae circumferentiae; quorum utrumque finitum in se, sed respectu puncti infinitum, et ideo incomparabile. Minus autem comparabilis est creatori creatura, utpote bono simpliciter infinito, quae est bonum simplex et finitum. Confer ergo nunc homo, et vide quid concupiscas. Concupiscas enim

(1) Al. summae.



bonum: nam, ut ait Augustinus, « bonum est  
 « aurum, bonae divitiae. » Si igitur unam maream  
 argenti concupiscis quia bonum, maream auri  
 tanto magis concupisces, quanto magis bonum.  
 Quicquid igitur millies melius esset, millies plus  
 concupisei ratio persuaderet. Et tamen unitas pars  
 est aliquota millenarii, et ideo comparabilis ipsi.  
 Sed Deus cui omnia quae desiderantur comparari  
 non possunt, illa marea infinities melior et ideo  
 infinitis concupiscibilior: similiter de quolibet con-  
 cupiscibili simile fit iudicium. Omnia ergo huic  
 non valent comparari: quomodo igitur singula va-  
 lent? Cuncta igitur bona simul appellantur valde  
 bona, ut dicitur Genes. 1. Singula non valde, sed  
 tantum simpliciter bona: minus enim singula bona  
 sunt, quam omnia collecta. Sed, ut dicit Philoso-  
 phus, ostensa praecellentia una duorum vel  
 plurium, hoc duorum est praecellegendum vel praee-  
 optandum quod est praecellentius. Quomodo ergo  
 praeeptandum aliquid nihilo, ens non enti, infini-  
 tum bonum finito? Anselmus: « Cur ergo per mul-  
 « ta vagaris humuncio, quaerendo bona animae  
 « tuae et corporis? An unum bonum, quod omne  
 « est bonum, et satis est: desidera simplex bonum  
 « quod est summum bonum, et sufficit. » Item, rivuli  
 bonorum concupiscibilium diversi, fons unus o-  
 mnium Deus. Melior ergo et concupiscibilior fons  
 quam rivulus, causa quam effectus: immo incom-  
 parabiliter melior, cuius bonitate, secundum Boe-  
 tium, paulisper disputationis gratia intellecta, dici-  
 mus, jam nihil erit bonum et ideo nihil concu-  
 piscibile. Igitur quod per se tale, magis tale quam  
 quod per accidens, et ideo magis concupiscibile.  
 Psal. 85: « Quapropter concupiscit et deficit a-  
 « nima mea in atria Domini. » Sed nota, quod  
 duplex est concupiscentia: una rei absentis, hoc movet  
 ad habendum: altera rei praesentis causat fruitio-  
 nem per praesentiam concupiscibilis, et ideo dele-  
 ctatur et fruitur concupito. Haec igitur movet ad  
 delectandum: ut patet in vino, quod concupiscens  
 diligo eum abest, et ideo moveor ad operandum pro  
 pretio, quo eman ad praeparandum vas quo re-  
 cipiam; et cum abest, non cesso concupiscere. Se-  
 cundum hoc est caritas viae diligens et concupi-  
 scens Deum ut absentem et ideo alliciens motus  
 et movens ad opera meritoria: sed caritas patriae  
 diligens et concupiscens ut praesentem, et ideo  
 delectans et fruitioem causans. Eecle. 24: « Qui  
 « edunt me, adhuc esurient; et qui bibunt me, a-  
 « dhuc sitient. » Sed desiderium perit, cum anima  
 sitim suam, qua bonum naturaliter appetit, per  
 aquam praesentis insipidae delectationis boni com-  
 mutabilis extinguit. Bene autem sitis accenditur,  
 cum dulcedo summi boni vel modice praegustatur:  
 quae tamen praegustatio mirabiliter et sitim cre-  
 scere facit, et tamen ipsi aliquantulum satisfacit. Au-  
 gustinus: « Angeli illo fruente jam beati sunt,  
 « quo et nos frui desideramus: et quantum in  
 « hac vita fruimur, tanto peregrinationem nostram  
 « et tolerabilius sustinemus, et ardentius finire  
 « cupimus. »

### CAPUT III.

#### *De tribus concomitantibus dilectionem.*

His in apprehensione antecedentibus, irritatur  
 affectus: et si potentia voluntatis per habitum a-  
 moris disposita sit, in actum exit et movens dele-

etabile apprehensum diligens concupiscit. Quem di-  
 lectionis motum tria concomitantur: scilicet qualitas,  
 quantitas et relatio: qualitas, scilicet notabilitas et  
 excellens bonitas, qua dissimilis est omnibus mo-  
 tibus aliis et nobilior genere, utpote prodiens no-  
 bilissima potentia, scilicet voluntate, quae Deo na-  
 turali ordine proxima, et ideo liberrima ab omni  
 coactione creatae jurisdictionis exempta. Item a  
 nobilissimo habitu, scilicet amore, qui summum  
 Dei donum, etiam personae divinae, meruit aequi-  
 vocum esse. Duplex est autem habitus amoris.  
 Unus naturalis, qui unus et summus est, tamen  
 trinitatem in anima perficiens, ut dicit Augustinus,  
 quae sunt mens, notitia et amor. Boetius. Inserta  
 est bonis naturaliter summi boni cupiditas et di-  
 lectio. Alius gratuitus et infusus, qui omnium gra-  
 tuitorum summus dignitate, proprie dicitur caritas.  
 Rom. 5: « Caritas Dei diffusa est in cordibus  
 « nostris per Spiritum Sanctum, qui datus est  
 « nobis. » Secundum autem Dionysium, « Optimi  
 « optima est adducere, » subjecto igitur qualificetur  
 et denominetur actio. Aristoteles: « Non enim  
 « quia bonum facimus, boni sumus; sed quia boni  
 « sumus, bonum facimus. » Optima igitur et no-  
 bilissima actio dilectio. Sed quia motus denomina-  
 tur a termino in genere suo, summe bonus est  
 motus, cui summum bonum in quantum tale est  
 objectum et terminus. In productione igitur actus  
 istius anima nobilissima est, quia cognoscendo con-  
 jungitur, amando unitur illi bono, quod in termino  
 nobilitatis et bonitatis nobile est. Cognoscibile enim  
 cum sit perfectio cognoscentis in esse suo; quo  
 nobiliter cognoscibile est, eo nobilior et perfectior.  
 Cum dilectio et amor transforment amantem in  
 amatum, cum forma Dei sit nobilissima, anima  
 amans Deum fit nobilissima. Item concomitatur et  
 quantitas mensurans motum dilectionis: qui tripli-  
 eiter mensuratur: scilicet secundum intensionem,  
 durationem et numerum vel multitudinem. Con-  
 tingit enim concupiscere summum bonum inten-  
 sione vehementer, vehementius, vehementissime:  
 duratione diu, diutius, diutissime: multitudine,  
 saepe vel frequenter, saepius, saepissime; et secun-  
 dum hoc dilectio actu major est vel est minor  
 dilectione. Igitur si non potest concupiscere vehe-  
 menter, saltem durat parumper: quod si non diu  
 continuare potest, quoniam secundum Augustinum  
 in viatore sunt cogitationes volubiles, et conse-  
 quenter necessariae affectiones, saltem sicut repe-  
 tendo frequenter: nam quo frequentius, eo conse-  
 quenter vehementius concupisces: et quo vehe-  
 mentius, eo diutius. Sed vide quid impedit. Sicut  
 se habet diligere ad cognoscere, sic diligere per-  
 fecte, quod est in patria, ad cognoscere perfecte;  
 sic diligere actu ad cognoscere actu. Scimus autem  
 plura, sed intelligimus unum solum, ut dicit Ari-  
 stoteles. Verum est actu: et ideo diligere possumus  
 actu unum solum. Termini autem oppositi dispa-  
 rate sunt creator et creatura, inter quos sita est  
 anima. Augustinus: « Anima media inter Deum  
 « et creaturas posita conversione ad Deum illu-  
 « minatur, melioratur et perficitur: conversione ad  
 « creaturas obtenebratur, deterioratur corrumpitur. »  
 Et Philosophi posuerunt animam creari in hori-  
 zonte aeternitatis et temporis. Quae cum creatu-  
 ram actu cognoscit et per consequens actu diligit,  
 creatorem tunc actu cognoscere et per consequens  
 actu diligere non potest. Item unitas motus cau-

satur ab unitate nobilis, temporis et termini. Cum igitur anima mobilis sit simplex inter terminos oppositos, simul et semel motibus diversis ejusdem generis moveri non potest; unde dum motu affectionis movetur ad creaturam, tunc motu affectionis moveri non potest ad creatorem. Diliges autem Dominum Deum tuum, unum scilicet prae multis. Augustinus: « Unum est necessarium; praeponitur enim unum multis, etc. » Anselmus: « Cur ergo per multa vagaris homuncio? » Hugo: « Cor hominis quod prius amori divino fixum stabile perstitit et unum amando unum permansit, postquam per desideria terrena defluere coepit, quasi in tot divisum est, quod ea sunt quae concupiscit. Concomitatur et relatio motum concupiscentiae, secundum quam refertur in finem. Scis quid desideras, restat propter quid. Deus summum bonum est subjectum in quod delectando movetur. Sed quis finis, vel propter quid ipsum appetis? Utiq; propter seipsum: nam hoc est proprium amoris Dei, quia idem ei objectum et finis. » Non sic in virtutibus aliis. Nam fides quae etiam theologica est, ipsam primum verum habet pro objecto, bonum summum pro fine: unde credit primae veritati, ut credendo mereatur accipere et participare bonitatem: sed amor amat bonum propter bonum. Sed restat scire quod bonum propter bonum appetitur, aut propter se, aut propter aliud majus: non enim majus propter minus, sed potius e converso appetitur. Nota igitur trinam relationem: est enim secundum Aristotelem desiderium desiderati duplex: nam hujus ut finis, hujus viae ad finem. Verbi gratia, desidero vinum, desidero pretium quo emam vinum, sed aliter vinum, aliter pretium; et magis vinum quam pretium, quia et pretium propter vinum. Aristoteles: « Propter quod unumquodque, et ipsum magis. » Similiter amans appeto Deum, appeto virtutem; sed Deum ut finem, virtutem ut ad finem. Augustinus: « Virtutes si propter se appetantur, nec ad aliud referantur, inflatae sunt; et ideo non jam virtutes, sed vitia appellanda sunt. Sic et a quibusdam propter Deum aliqua temporalia appetuntur; sed quia facile ibi incurvatur ordinis rectitudo, quam deflectit concupiscentia, corrigit et ad finem dirigit castigans disciplina. » Psal. 17: « Disciplina tua correxit me in finem. » Sic et Apostolus desiderium habet dissolvi et esse cum Christo, primum desiderans propter secundum. Item alia relatio desiderii ad desideratum: est enim desiderium hujus per se, hujus per accidens, secundum Aristotelem: ut in vino appetitus dulcis: nam in vino dulce per se appetitur; unde non desiderabitur si aceseit. Tertia relatio est qua dulce appetitur ut delectet. Vide ergo ordinem et relationem dicentem primo, pretium desidero propter vinum, scilicet ad habendum vinum: secundo vinum desidero, quia dulce propter dulce: tertio dulce ut quo delector, quia delector. Haec delectatio quia est passio mulcebris et qualitas derelicta in me a dulcedine vini, est finis simpliciter secundum talem viam; quia haec delectat formaliter vel ut forma, vinum autem dulce materialiter: sed vinum ut objectum commune et ideo per accidens, dulce autem ut materia vel objectum proprium et immediatum, et ideo per se in parte similiter in parte. Secus est in proposito: prima relatio totaliter similis, tertia omnino contraria, secunda medio

modo. Primo igitur sicut appeto vinum et pretium propter vinum, sic appeto Deum ut finem, virtutes et omnia meritoria et utilia ut ad finem; et inter haec quod fini propinquius est, melius est secundum Aristotelem; et ideo appetibilis. Secundo vinum appeto, quia dulce: etiam refertur motus iste ad alium finem; et est vinum ut objectum, dulce ut finis. Et causa hujus est, quia dulcedo vini in re et ratione differt a vino, licet fundetur in ipso, ut accidens in subjecto: quia si dulcedo vino essentialis esset, idem esset secundum rem diligere vinum quia dulce, et diligere vinum quia vinum. Propter hoc in proposito partem sic, partem aliter: omnia enim quae in Deo sunt, idem sunt secundum rem, et essentialia sunt non accidentaliter, sed ratione differunt; non ratione definitionis, sed ratione speculationis. Nam, ut dicit Aristoteles, causa prior et superior est narratione, quia superior est cognitione; sed per effectus utrumque cognoscitur. Roman. 1: « Invisibilia enim ipsius a creatura mundi per ea quae facta sunt intellecta conspiciuntur, sempiterna quoque virtus. » Sic secundum effectus aliquid balbutitur. Effectus autem diversi sunt. Dicitur ergo Deus ens absolute, comparative vero bonus, quia se communicat et diffundit: justus, quia pro meritis retribuitur: severus, quia punit: misericors quia parcit. Omnia haec in re unum et idem sunt et divina sunt essentia, sed ratione differunt. Sed quia Deum non secundum quod est, sed secundum effectus speculamur et cognoscimus; secundum alium et alium effectum aliter et aliter nominamus; et differentem speculationem differens sequitur effectus. Deum ergo ut Deum veneror et revereor, ut justum vel severum tremo et vereor, ut bonum vel dulcem amo et concupisco. Quod si idem esset ratione sicut idem est re misericordem vel bonum esse et justum vel severum esse, identitatem speculationis sequeretur identitas affectionis; et sic diligerem Deum quia severus, sicut diligo et appeto quia dulcis et bonus. Nunc autem illud contremisco, istud concupisco. Appetito ergo Deum quia bonus et suavis: et refertur iste modus ad idem re, et aliud ratione. Tertio dulce vinum appeto, ut delectet. In proposito vero opposita est relatio: nam Dei bonitatem non referimus ad nostram delectationem, scilicet creatam beatitudinem vel qualitatem, sed potius e contra. Causa autem hujus dissimilitudinis patet sic. Omne receptum est in recipiente per modum recipientis, et non per modum recepti. Igitur si receptum est minus nobile recipiente, nobilitatur in ipso; non autem si nobilius ipso. Sicut ergo species rei visibilis recepta in oculo et perficiens ipsam inesse, nobilior est et melior in oculo quam in materia propria; sic dulcedo rei gustabilis recepta in gustu melior et nobilior est quam in sua materia: et ideo dulcedo vini melior est in eo quem delectat, quam in vino. Bonum autem referri habet ad melius, et non e contra: ideo appeto dulcedinem vini propter delectari. E contrario summum bonum et infinitum, quod beatificare et delectare habet affectum, ab affectu recipitur per modum affectus, scilicet finite, et excedit infinite. Sicut ergo minus bonum ad majus bonum, sic beatitudo adcreata in anima per influentiam beatitudinis increatae et summi boni, ad ipsum summum bonum quod influit, est referenda. In infinitum ergo major debet esse mo-

tus quo appeto Deum et summum bonum, quam ille quo appeto vitam aeternam creatam et fruitionem meam. Nam et istud appeto propter illud: istud ut finem quo quiesco, illud ut finem in quo quiesco. Nota ergo quod sex sensus habet haec propositio « Iste diligit Deum propter Deum ». Primo diligit Deum propter Deum, supple, habendum: ut habere Deum vel frui Deo sit finis in quo quiescit: ut, iste vadit ad tabernam propter vinum, scilicet bibendum, bibitio et delectatio plus placet illi quam vinum: et sic diligere est malum et peccatum, quia refertur creator ad creaturam. Secundo diligit Deum propter Deum, scilicet habendum, ut habitus Dei vel fruitio creata sit finis, non in quo quiescit, sed quo quiescit. Beatitudo enim creata potest appeti ut finis quo quiescamus: quia ipsa habita nihil creatum amplius appetimus; sed non debet poni finis in quo non in ipsa quiescamus, sed per ipsam in Deo. Tertio diligo Deum propter Deum, ut « propter » notet causam efficientem sive motivam, et ut sit sensus « Deus sive dulcedo Dei » est causa movens istum ad diligendum Deum: sic ille diligit illum propter beneficia sua quae confert ei, iste motus est magis amicitiae, quam concupiscentiae. De hoc Joan. ult.: « Diligamus Deum, » quia ipse prior dilexit nos, » et ita meruit redamari. Bernardus: « Dignus plane Deus qui redamatur: praesertim si advertamus quis, qualis, quantumque amaverit. » Quarto ut per « propter » notetur causa finalis: et est sensus: « diligo Deum » propter Deum: illud est propter praeceptum Dei, et honorem ipsius. Sexto, diligo Deum propter Deum, idest non propter aliud, ut notetur exclusio finis ulterius, et omnis commodi mei: ergo est gratissime amare. Primum ergo malum, tria sequentia bona, duo ultima optima. Bernardus: « Non sine » praemio diligitur Deus, etsi absque praemii intuitu sit diligendus. » Psalm. 72: « Quid enim » mihi est in caelo, et a te etc. »

## CAPUT IV.

*De quinque consequentibus dilectionem concupiscentiae.*

Dilectionem concupiscentiae secundario quidem plura, principaliter vero quinque consequuntur: scilicet motus, dolor, timor, consolatio et delectatio. Sicut enim corpora quaedam moventur in loco, ut sphaera, quaedam extra locum, ut in motu recto, ut homo sedens movetur in loco cum surgit, extra locum cum procedit; sic ipsa dilectio concupiscentiae motus est essentialis, sed quasi motus surgentis. Delectabile enim apprehensum movet. Sed hunc motum sequitur alius motus quasi procedentis, et ipse duplex: primus quo moveor ad habendum: alius secundus quo moveor ad merendum, qui secundus est intentione, sed prior in esse vel in executione. Sicut vinum diligens primo movetur motu desiderii ad habendum vel bibendum; sed quia non habet, movetur secundo ad illud per quod habeat: et iste modus multiplicatur si plura sint ad habendum necessaria: unde movet homo linguam ad petendum vel interrogandum, manum ad operandum pro pretio, pedes eundo ad tabernam; et sic de aliis: qui motus omnes fiunt propter primum perducendum ad terminum. Unde et terminus primi appetibilior est et prior in intentione terminis omnium posteriorum, sicut motus motibus, secundum illud:

propter quod unumquodque tale etc. Sic apprehensa suavitate et dulcedine Dei, moveor concupiscens, hoc est diligere. Sed cum motus continuus habeat principium, medium et finem; hunc motum sequitur motus quasi processivus, non sicut alius alium, sed sicut pars partem, medium principium, hoc est motus ad habendum vel fruendum. Sed quia non possum habere vel frui sine meritis, secundo moveor me ad merendum: qui motus multiplicatur secundum quod multis modis mereri contingit. Ex hac parte accedit motus impletionis praeceptorum affirmativorum, tamquam eorum quae sunt ad habendum necessaria: consiliorum, tamquam eorum quae sunt utilia: prohibitionum, tamquam motus ad his quae impediunt: hinc est motus ad amandum proximum, quia praeceptum. Secundum hoc Glossa dicit: « Caritas Dei generat amorem proximi, qui motus est principium et causa omnium motuum, qui ordinant ad proximum », etiam extenso nomine motus ad moveri a malo et moveri ad bonum. Secundum hoc dicitur ad Rom. 13: « Plenitudo legis est dilectio: nam non adulterabis » etc. Et si quod est aliud mandatum, in hoc verbo « instauratur: Diliges proximum tuum tamquam teipsum. » Motus igitur primus, scilicet dilectionis Dei in voluntate, ut ens in subjecto, causat alium motum, scilicet dilectionis proximi in eodem subjecto. Cum voluntas habet imperium super potentias inferiores, et in perfluentiam mota movet inferiores potentias, etiam organicas, in comparatione ad Deum propter se primo et principaliter: in comparatione ad proximum propter Deum secundario et consequenter; secundum hoc movet linguam ad Deum laudandum, orandum et similia: aures ad audiendum de ipso: oculos ad intuendum vestigia ejus, scilicet creaturas; et sic de aliis membris et actibus. Sed inter hos motus est ordo: verbi gratia, cum lingua movetur ad orandum, veniam peccati ante omnia petit: et hunc motum motus confessionis naturaliter praecedit quo se peccatorem recognoscit et arguit; et sic de aliis. In comparatione ad proximum voluntas mota movet organa multipliciter, ut patet: pedes ad eundem ad visitandum proximum, manus ad dandum vel ad juvandum, oculos et aures ad similia etc., linguam ad consolandum, corripiendum, instruendum, excusandum et similia. Hinc patet quod omnes virtutes motrices sunt, et quasi motores moti ad alia, et secundo movent. Caritas autem est quasi motor primus. Secundum dilectionem sequitur dolor: nam quo magis moveor ad habendum, eo magis affligor de dilatione, secundum illud: « Spes quae differtur » affligit animam: » quo magis appeto conjunctionem, eo magis doleo et affligor de distantia. Jerem. 4: « Idecirco plorabo, et oculus meus deducet aquas, » quia longe factus est a me consolator convertens » animam meam etc. » Tertio sequitur timor: nam quo magis concupisco habere, eo magis timeo perdere: quo magis conjungi, eo magis separari. Poeta:

Res est solliciti plena timoris amor.

Hic timor nobilissimus inter omnes timores viae, et utilissimus in patria, tamen secundum hunc actum evacuandus, solo ibi reverentiae actu contentus. Quarto sequitur consolatio ex appropinquatione, sicut exhilarescit esuriens viso vel odorato



cibo, utpote adunc distante, sed tamen vicino. Hinc intenditur motus: sicut velocius movetur lapis, quo vicinior est centro. Bernardus: « Qui amat ardentius, currit velocius. » Quinto sequitur delectatio de adeptione. Proverb. 15: « Desiderium si com-  
« pleatur, delectat animam. » Est enim delectatio secundum Aristotelem conjunctio convenientis cum convenienti. Deus igitur sicut praececlit omne concupiscibile, sic delectat prae omni delectabili: et hoc tripliciter: quia generalius, intimius, durabilius. Alia enim delectant particulariter, ut sapida solum gustum, non autem auditum: sonora auditum, non autem visum, sic de singulis. Deus autem generaliter, quia generale bonum ipse est, et omnis boni particularis causa. Anselmus: « Si enim singularia  
« bona delectabilia sunt, cogita intente, quam de-  
« lectabile sit illud bonum quod continet in se ju-  
« cunditatem omnium honorum; et non qualem in  
« rebus creatis sumus experti; sed tantum differen-  
« tem, quantum differt creator a creatura. » Item alia delectant superficialiter, et quasi exterius; Deus autem intime, et ideo profunde: solus enim Deus substantiam animae substantialiter penetrat, et ideo medullitus delectat. Augustinus: « Cum in-  
« haesero tibi ex omni mente mea, nusquam erit  
« labor et dolor, sed tota erit vita mea, tota ple-  
« na te. » Idem: « O Domine Deus, quid est quod  
« amo cum te amo? non speciem corporis, nec  
« decus temporis, nec candorem lucis istius aui-  
« cum oculis; non dulces melodias cantilenarum  
« omnimodarum, non florum et aromatum suave  
« olentium suavitatem, non manna et mella, non  
« membra acceptabilia carnis amplexibus, non hoc  
« amo cum Deum meum amo. Et tamen amo quam-  
« dam lucem, quamdam vocem, et quemdam odorem,  
« et quemdam cibum et quemdam amplexum. Non  
« amo Deum meum lucem, vocem, odorem, cibum,  
« amplexum exterioris hominis, sed interioris ho-  
« minis mei: ubi fulget animae meae quod non  
« capit locus, et ubi sonat quod non rapit tempus,  
« ubi olet quod non spargit flatus, ubi sapit quod  
« non minuit edacitas, ubi haeret quod non divel-  
« lit satietas: hoc est quod amo cum Deum meum  
« amo. » Augustinus: « Qui intrat in te, intrat in  
« gaudium domini sui, et non timebit, sed habebit  
« se optime in optimo. » Idem: « Alia delectant  
« transitorie et terminabiliter, Deus autem aeter-  
« naliter. » Augustinus: « Miser est omnis animus  
« vincetus amicitia rerum inferiorum, et dilaniatur  
« cum eas amittit: te vero nemo amittit, nisi qui  
« dimittit. » Et ratio est, quia omnis creatura de se mutabilis est: sed quoniam anima satiata calcabit favum, anima quae creaturas diligens concupiscit, quoniam concupiscibile praesens est, et ideo in motu ipsum faciliter consequitur, consequens et adipiscens fruitur et delectatur, quo plenior bono creato, tanto minus esurit increatum: et ideo jejunandum ab his, ut illud concupiscatur. Psal. 76: « Renuit consolari anima  
« mea. » Augustinus: « Cetera creatura vilescat,  
« ut creator in corde dulcescat. » Sed quoniam in delectabilibus melius est facere quam fecisse vel facturum esse, ideo anima concupiscit concupiscentia respectu boni incommutabilis; unde Psal. 118: « Concupivit anima mea desiderare etc. » E converso dicitur respectu boni commutabilis male. Psalm. 105: « Concupierunt concupiscentiam in  
« deserto. »

## CAPUT V.

*De dilectione amicitiae.*

Diliges Dominum Deum tuum etiam dilectione amicitiae. Haec est dilectio qua diligimus illud cui bonum volumus. Haec ergo Dominum diliges prae omnibus, et etiam prae teipso; et hoc dupliciter. Quantum ad objectum majus, ut ei velis majus bonum quod tibi ipsi vel cuiquam. Item quantum ad modum volendi, ut magis velis ei bonum quam tibi vel cuiquam: quod dignum est: nam potentia volendi ab ipso est, et ideo sua est; et a te non est, sed tibi concessa. Potius ergo vult, et magis vult bonum ei a quo est, quam ei a quo non est. Sed nota quod Dominus relative ad servum dicitur, quia dominium et homagium relationem faciunt: nam et illum dominum appello, cuius homo sum, etsi servus non sum. Item: Nunquam aliquis homo fit alterius hominis, non quia illi sibi quicquam de bonis suis porrigat, sed ille bona propria illi assignat, et recipit in feudum ut homo fiat. Utique in tali casu potius homo meus esset, quam e converso: nam plus a me habet quam ego ab ipso: ipse a me rei meae, non suae, proprietatem habet et dominium, et ego ab ipso rei meae solummodo possessionem et usum; et tamen dominium hunc appello. Verum multo potius homo Dei sum, a quo sum omnino quod sum, habeo totum quod habeo, expecto totum bonum quod habiturus sum. Dominus ergo et Deus meus est, gloriatorque non immerito liberum me esse et nobilem, utpote immediate imperatori summo subjectum, eum etiam Angelus non sit mihi dominus, sed conservus. Ceterum alia relatio est qua refertur homo vel servus ad dominum, alia qua amicus ad amicum: et nobilior secunda quam prima. Augustinus: « Ob-  
« stupesce igitur, anima mea, dignatione Dei tui  
« erga te: nobilitavit te, o homo, Deus inferius con-  
« stituens dominum irrationabilium. » Psalm. 8:  
« Omnia subiecisti sub pedibus ejus. Qui domi-  
« naris brutis, non mirum esset, si Angelorum, sal-  
« tem Seraphim dominio subdereris. Sed nunc  
« non sic, sed nobilis es in relatione ad superius  
« solus Deus vere est dominus tuus. Sed dilatare  
« usque ad mortem prae admiratione: cui debue-  
« ras servus esse, jubet ut sis amicus. Diliges,  
« inquit, Dominum Deum tuum etc. » Joan. 15:  
« Jam non dicam vos servos, sed amicos. » Stude igitur amicus esse ei a quo amaris, servus esse ei cui obligaris.

## CAPUT VI.

*De triplici exitu scientiae.*

Nota igitur quod animam rationalem est considerare tripliciter: scilicet in quantum natura est, in quantum deliberativa, et in quantum gratificata. Secundum hoc tripliciter in anima Dei amicitia generatur. Est enim secundum Anselmum, triplex exitus rerum in esse: scilicet naturalis, voluntarius et mirabilis. Anima igitur ut natura, efficitur amans innumeris et affluentibus beneficiis; hoc patet: nam et catulus beneficium sibi amplexatur, et ovis sola aestimativa non discretione utens, lupum fugiens, pastorem ut beneficium sequitur. Joan. 10: « Cum



« proprias oves emiserit etc. » et oves illum sequuntur; sic in anima per beneficia Dei amicitia quasi quodam exitu naturali generatur. Anima ut deliberativa amans Deum efficitur infinitis et evidentibus praeceminentiis: nam in deliberatione recte praeceminens praecelligitur et praecamatur secundum Aristotelem. Nullus dubitat utrum beatitudo vel divitiae praeceminentes sint magis eligendae, propter nimiam praeceminentiam beatitudinis ad divitias. Sic nemo deliberans dubitat an creator amandus sit praecreaturis. Hic exitus amicitiae quodammodo est voluntarius. Anima ut gratificata, amans efficitur per gratiae influentiam: nam Deo influente gratificatur et informatur animae substantia per gratiam una uni, scilicet Deo per unam. Et sicut Deus dans animae primum esse creavit substantiam, et concreavit ei potentiam; sic dans secundum esse influit gratiam substantiae animae, et caritatem virtutem summae potentiae. Item, sicut voluntas procedit a substantia animae, sic caritas ex gratia. Sed et aliae virtutes in potentiis ex gratia sunt. Sed omnes praeter caritatem informes sunt, et sine gratia esse non possunt. Influxa ergo a Deo essentia et forma, et gratia in substantia animae influitur, et habitus caritatis in potentia voluntatis: et hic est amicitiae exitus mirabilis. Rom. 5: « Caritas Dei diffusa est in cordibus nostris etc. » Item hic quoniam super naturam est, postulatione et oratione opus est magis quam deliberatione.

## CAPUT VII.

*De primo exitu.*

Primus ergo exitus amicitiae est quasi naturalis, secundum quem in anima proportionabiliter quodammodo generatur haec nobilissima forma accidentalis, sicut in materia naturaliter generatur forma substantialis. Quod patet sic: Generatio naturalis fit per coactionem et per contactum: contrarium enim contingens contrarium agit in ipsum et alterat, et si in agendo praevalet, sibi assimilatur: ut patet cum ignis agit in terram, et caliditate frigiditatem expellens, frigidam facit calidam; et cum aetus continuatur, tandem necessitas dispositionem sequitur, et in summo calens terra ignis efficitur, et ex altera fit altera, cum generatio alterationem comitetur. Sic Deus amans hominem non amantem, inimo amicus inimici. Rom. 5: « Cum inimici essemus etc. » Ardenter amans ut ignis est. Deut. 4: « Deus non ignis consumens est. » Homo autem frigidus et non amans ut terra: unde Genes. 5: « Terra es et in terram ibis etc. » Qui ignis terrae appropinquans beneficiis ipsam tangit, et sic tangendo disponit ad formam suam, scilicet amicitiam: et primo calfaciens alterat, secundum illud Psal. 145: « Tange montes, et fumigabunt. » Tandem frequenter et continue agens, quia non cessat vel ad momentum a beneficiis, tandem terram igneam reddit, et inimicitiam expellens, formam amicitiae in corde hominis introducit. Soph. 9: « In igne zeli mei devorabo terram. » Luc. 12: « Ignem veni mittere in terram: et quid volo nisi ut accendantur? » Breviter igitur quoniam natura est vis insita rebus ex similibus similia procreans, naturaliter quodammodo amicitia Dei in nobis amicitiam generat, cum amicum, etiam si nolis, tandem amare cogaris. 1 Joan. 4: « Diligamus Deum, quoniam ipse prior dilexit nos. »

*S. Th. Opera omnia. V. 17.*

## CAPUT VIII.

*De secundo exitu.*

Secundus exitus est quasi voluntarius, cum homo Deum diligere incipit, et in amicum suscipit quasi per voluntariam electionem. Deut. 26: « Dominum elegisti hodie, ut sit tibi Deus. » Sed electionem deliberatio antecedit. Ad habendum igitur amicum voluntas deliberat, et tandem eligit. Seneca: « Tu cum amico tuo omnia delibera, sed de ipso primum. Prius vide an tibi in amicitia aliquis recipiendus sit, et eum eum placuerit fieri, toto illum pectore admitte. » Deliberare est diversa librare; eligere est duobus praecipientibus praecoptare alterum alteri. Ecce modo duo libranda, Deus et homo, creator et creatura, quem horum in amicum eligamus. In libra hominis ponderant multum quaedam generalia: et praecipue tria: scilicet naturae conformitas: Prov. 15: « Omne animal diligit sibi simile: » nec est per se vera, et ideo magis simile sibi magis. Prov. 27: « Volatilia ad similia sibi conveniunt etc. » Item praesentialitas: unde arguit 1 Joan. 4: « Qui non diligit fratrem suum quem videt, Deum quem non videt quomodo potest diligere? » Haec praeponderat quandoque consanguinitati. Prov. 27: « Melior est vicinus juxta, quam frater procul. » Item utilitas, secundum illud Poetae: « Vulgus amicitias utilitate probat. » Quaedam specialia multum praeponderant in libra hominis, et praecipue tria: ut consanguinitas, secundum quam praeponderat pater extraneo, et similia. Item uxor parentibus. Genes. 2: « Relinquet homo patrem suum et matrem suam, et adhaerebit uxori suae. » Item fidelitas, item amicitabilitas, item gratiositas. 1 Machab. 10: « Aptus es ut sis amicus regis. » Prov. 18: « Vir amicitabilis ad societatem magis amicus est quam frater. » Ex oppositis in libra ex parte Dei praeponderant multa, quae si praeponderant, faciunt deliberationem. Deliberationem sequitur electio, qua Deus homini praecoptatur, et in amicum eligitur. Cantic. 5: « Dilectus meus candidus et rubicundus, electus ex millibus. » Vide nunc, et pone in libra Dei etiam ea quae in hominibus libra praeponderant; et primo specialiter et proprie ea quae homo non habet, sed solus Deus propter quae sit merito diligendus.

## CAPUT IX.

*De naturae conformitate.*

Es ergo amicus hominis propter naturae conformitatem, quia homo est. Ne in hoc praeponderaret, et ideo praeceligeretur homo Deo, Deus factus est homo. Unde filium hominis Christus creberime se appellat. Hic ergo magis amandus est quam aliquis homo propter tria: scilicet causam, statum et durationem. Primo propter causam. Amicus igitur es hominis, qui tecum fit vel factus est homo? potius ejus qui propter te factus est homo, utique propter te, scilicet redimendum morte humanitatis, propter te nutriendum sacramento Corporis et Sanguinis. Augustinus: « Ut panem Angelorum manducaret homo, creator Angelorum factus est homo. » Item propter te erudiendum exemplis, et beatificandum dupliciter duabus naturis, ut

ingredderis et egredderis, et pascua invenires, secundum illud Joan. 10: « Ingredietur et egredietur, et pascua inveniet. » Secundo propter statum. Amicus es hominis, qui simplex homo. Ergo debes esse amicus potius ejus qui summus est homo, cum etiam inter homines magis appetas esse amicus magnatorum. Item propter durationem amicus es hominis, qui quotidie corrumpitur, et tendit ad hoc ut desinat esse homo, quia mortuus homo non est homo. Sed potius ejus amicus sis, qui resurgens ex mortuis jam non moritur, et ideo incorruptibilis, et nunquam desinens esse homo. Sed dices: Sic diligo Christum hominem, sed non sic Deum. Vide quod et Deum sic. Si amari possit imago depicta, nonne magis amaret imaginem in mente artificis et pietoris secundum quam facta est, quam imaginem aliam pietam sibi necessario magis dissimilem cum qua est? Sic si propter conformitatem hominis amicus esse volo, conformitatem, inquam, in genere logico et praedicabili, merito ideam meam secundum quam in mente Dei sum, et vita sum, magis amo. Joan. 10: « Quod factum est in ipso vita erat. »

## CAPUT X.

*De praesentialitate.*

Amicus es hominis, quia praesens. In hoc autem Deus praeponderat tripliciter: quia praesens est intime, semper et ubique; homo vero praesens est quasi praesens, quia juxta te; sed Deus praesentior, quia intra te. Augustinus, 4 Confess.: « Intimus cordi est, et cor aberravit ab eo. Sed dices, quomodo non sentio si praesens est? Respondeo: nec in homine hoc habes, cujus corpus tantummodo vides; quia si sine anima praesens esset, malles abesse. Patet ergo praesentiam animae amici tui te magis amare: quam cum non videas, ex motibus corporis praesentem intelligis, et verbis qualitatem ejus erga te tibi signantibus non demonstrantibus credis. Sic licet, prohibente statu viae, Deum qui est in te praesens per essentiam, videre non valeas in se: per effectus tamen causam interim potes cognoscere et videre; donec intellectu confortato et mundato facie ad faciem intueri liceat et cognoscere posteriora per priora, effectum per causam, creaturam per creatorem. » Item: Homo praesens quandoque, et quandoque absens est necessario: sed nunquam Deus absens est tibi, licet tu quandoque elongans te absens es. Augustinus 10 Confess.: « Intus eras, et ego foras; et ibi te quaerebam, et in ista formosa quae fecisti deformis irnebam: mecum eras: et tecum non eram. Ea me tenebant longe a te, quae si in te non essent, non essent. » Item: Homo cujus amicus es, alicubi tibi est praesens, alicubi absens. Deus ubique est tibi praesens. Augustinus: « Veritas ubique praesidens omnibus consulentibus te etc. » Unde cum moriens praesentiam amicorum, qui tunc maxime indigeres, habere non possis, hujus amici praesentia consolabiliter poteris. Psal. 22: « Si ambulem in medio umbrae mortis etc. »

## CAPUT XI.

*De utilitate.*

Amicus es hominis, quia utilis. In hoc autem tripliciter praeponderat Deus. Vide enim circa hominem utilem tibi quam magna utilitas, quam multa, quam diuturna! Excedit Deus quantitate continua et discreta, et duratione; quia ab ipso tibi utilitas major, multiplicior et diuturnior. Quod ut saltem in genere pateat, nota quod trina est generalis utilitas, quam ab amico habere volens ipsum amas: scilicet adeptio boni sui, intentio boni tui, diminutio vel annihilatio mali tui. Amicus ergo es qui tibi communicat bona sua. Prov. 19: « Multi colunt personam potentis, et amici sunt bona tri-buentis. » Praeponderat evidenter Deus qui tibi communicans, et dat sua et se. Donat, inquam, dona digniora in substantia, majora in quantitate continua, plura in discreta quantitate, permanentiora in duratione et tempore, meliora in relatione ad finem, opportuniora secundum quando et ubi: quia secundum Aristotelem unumquodque in quo tempore et loco plus valet, magis est eligendum. Rom. 8: « Qui etiam proprio Filio suo non pepercit, sed pro nobis omnibus tradidit illum, quomodo non omnia cum illo nobis donavit? » Jacob. 1: « Omne datum optimum, et omne donum perfectum etc. » Quis amicorum filium suum vel spiritum suum tibi donaturus est ut Deus fecit? Ceterum de donis datis, magna et multa donavit in praeterito, donat et donare non cessat in praesenti: sed maxima et plurima donabit in futuro. Ceterum quod homo amicus tibi dat, potius dat mutuum quam donum: quia redditionem expectat. Luc. 11: « Quis vestrum habet amicum, et ibit ad illum media nocte, et dicet, Amice accommoda mihi tres panes? » Sed secundum Aristotelem, donum est datio irredibilis. Hoc in illo amico solum modo locum habet, qui bonorum nostrorum non eget. Amplius autem, id ipsum bonum quod amicus tibi dat, non ab ipso est, sed a summo bono, a quo velut a fonte boni per illum fluit ad te. Quem nunc potius amas, an fontem effluentem, an canalem tibi deferentem? quem nimirum etiam ipse Deus, ut auctor, ad te dirigit potius quam ad alium, inclinando voluntatem habentis ut tibi dare velit, qui dedit facultatem qua tibi dare possit. Prov. 27: « Sicut divisiones aquarum, ita cor regis in manu Dei: quocumque voluerit inclinabit illud. » Amicus est hominis secundo qui tecum sciens bona tua, et communicans ipsa tibi reddit jucundiora. Seneca: « Nullius boni sine socio jucunda est possessio; » unde secundum Aristotelem magis est eligendum quod contingit amicos participare, quam quod non. Ceterum hoc amicos non prodit: quoniam in hoc secundum superficiem non differt fictus amicus a vero. Eccles. 12: « Non agnoscitur in bonis amicus. » Non agnoscitur, inquam, utrum amicus personae vel rerum, tuus vel tuorum: nam prius invenies inter homines qui diligat propter tua te, quam qui tua propter te: quoniam est amicus socius mensae, et non permanet in tempore necessitatis. Poeta:

Cum fueris felix, multos numerabis amicos:  
Tempora si fuerint nubila, solus eris.

Verus autem amicus esset, si bono tuo propter

te congauderet, etiam si participaturus non esset. Aristoteles: « Amicos justos esse volumus etiam si « media sint. » Sed in hoc nullus ad amicitiam tibi Deo aptior, qui sciens bona tua utpote dona sua, et de his tibi congaudet, et dans, communicare a te vel participare non eget. Joan. 2: « Gaudeo « propter vos, ut credatis. » Amicus est hominis tertio qui tecum participans mala tua annihilat, vel ad minus diminuat, et talem quaere. Quaerendus enim est, quia difficilius invenitur quam primus vel secundus, quamvis utroque magis iste sit necessarius. Sed in hoc tertio signo multi deficiunt, quia prima duo fecerunt. Psal. 57: « Amici mei « et proximi mei adversum me appropinquaverunt « et steterunt: » amici communicantes mihi bona sua, proximi participantes bona mea. Verum dignitas Dei in hoc tertio signo evidens est: qui cum in natura propria stans (1) bona mala tecum communicare non posset, naturam tuam assumpsit, in qua tibi compatiens, et poenae tuae socius fiens (2), misero tibi consolationem faceret, et per naturam suam bonam tandem malum tuum annihilaret. Sunt autem, secundum Aristotelem, quinque mala et terribilia: scilicet opinio mala, inopia, aegritudo, inimicitia, mors: in quorum ultimo evidens est fortitudo. Vide in his malis tuis Christum tecum participantem. De primo Matth. 27: « Seducitor ille dicit: » Joan. 7: « Quidam dicebant quia bonus est; alii autem, Non, sed seducit turbam: » Luc. 19: « Venit « filius hominis quaerere et salvum facere quod « perierat, » et vocatur homo vorax, et potator vini, publicanorum et peccatorum amicus. De secundo Luc. 9: « Vulpes caveas habent, et volucres « caeli nidos: filius etc. » 2 Corinth. 8: « Videte, « fratres, gratiam Dei, quoniam cum dives esset, « propter nos egenus factus est » ut illius inopia nos divites essemus. De tertio Isa. 25: « Vere « languores nostros ipse tulit, et dolores nostros « ipse portavit. » Item: « Vidimus eum novissimum « virorum, virum dolorum, et scientem infirmitates. » De quarto Joan. 15: « Nunc autem viderunt et oderunt et me et Patrem meum. » De quinto Cant. 8: « Fortis est ut mors dilectio, quoniam « niam majorem dilectionem hac nemo habet, ut « animam suam ponat quis pro amicis suis. » Ecce mors, et talis mors. Quid ultra facere debuit tibi, et non fecit: quid ultra debuit pati tecum et non sustinuit? Prae omnibus igitur utilis: et ideo propter utilitatem prae omnibus etiam amabilis: amplius autem quia tua mala tecum sentiens, ea tibi alleviat in praesenti, et eadem annihilat, bona sua tibi plene impartiens in futuro.

## CAPUT XII.

### *De amabili'ate.*

Inter specialia ponderantia etiam consanguinitati praeponderat amicitia, quia vir amabilis ad societatem magis amicus erit quam frater: et hoc in tribus est, quae sunt haec. Gratositas in vultu. Esther 2: « Indieibili pulchritudine omnium oculis « grata videbatur, et ideo amabilis. » Eccl. 40: « Gratiam et speciem desiderat oculus. » Item affabilitas in convictu vel verbo. Prov. 22: « Propter « gratiam labiorum habebit amicum regem. » Item mansuetudo in gustu vel actu. Eccl.: « In mansue-

« tudine tua opera perfice, et super hominum glo-  
« riam diligere: » e contra Prov. 22: « Noli esse  
« amicus homini iracundo. » Praeponderat in his Deus per ordinem. Nimum enim fallax gratia et vana pulchritudo quam confert sanitas, complexionis bonitas et juvenilis aetas. Apparet enim, quoniam aufert ipsam vel aegritudo fugans sanitatem, vel senectus excludens juventutem, vel mors dissolvens complexionem. Ceterum amabilis ille qui gratiosior in facie, cujus facies plena est gratiarum, in quem desiderant Angeli prospicere, cujus pulchritudo non languescit, sed intuentes salvos reddit: Gen. 52: « Vidi dominum facie ad faciem, et « salva facta est anima mea. » Non senescit, sed juvenescere facit. Psal. 102: « Qui replet in bonis « desiderium tuum: renovabitur ut aquilae juvenus « tua. » Non moritur, sed vivificat in aeternum, Joan. 17: « Haec est autem vita aeterna, ut co-  
« gnoscant te solum verum Deum, et quem mi-  
« sisti Jesum Christum. » Tibi ergo tibi Domine dixit cor meum, exquisivit te facies mea. Augustinus: « Videbimus, et amabimus, et laudabimus. » Item amabilis ille qui affabilior in sermone: Exod. 19: « Loquebatur dominus Moysi, sicut loquitur « homo ad amicum suum. » Affabilis ergo non solum justis, quinimo et injustis; utpote cui opponitur quod sit publicanorum et peccatorum amicus. Plane valde affabilis, cujus verbum non est rhetoricum vel transitorium, sed aeternum: quod ut caperetur, « Verbum caro factum est, et habitavit « in nobis. » Item, mansuetus in actione. Isa. 11: « Ego quasi agnus mansuetus. »

## CAPUT XIII.

### *De consanguinitate.*

Consanguinitas praeponderat multum. Hoc tripliciter secundum tres lineas consanguinitatis: scilicet ascendentem, in qua, ut proximos diligis parentes, scilicet patrem et matrem, et plusquam avum vel aviam: descendentem, in qua proximi, scilicet filius et filia: transversalem in qua frater et soror. In linea ascendenti pondera Deum erga patrem sic: Ex duabus partibus consto, anima et corpore: quarum una corruptibilis, alia incorruptibilis. Sap. 9: « Corpus quod corrumpitur, aggravat animam etc. » Aristoteles: « Hoc solum est separabile, sicut in-  
« corruptibile a corruptibili. » Una imperans, alia obsequens naturaliter: una assimilans brutis, alia associans Angelis. Salustius: « Omnis nostra vis « in animo et corpore sita: illa nobis cum diis, « corpus cum bestiis commune: animi imperio, cor-  
« poris servitio magis utimur. » Tripliciter igitur nobilior est anima quam habeo a Deo creante, quam corpus quod a patre generante. Quod enim horum a quo habeatur, imago utriusque testatur: cum corpus patris, anima Dei praeferat imaginem, quam nimirum Deus immediate sibi similem et bonam fecit, quae corpus ad vitam animando perfecit: quam versa vice corpus infecit, et ream ac peccatricem efficit. Verumtamen et ipsum corpus, quod a patre generante natura dedit, Deus naturae principaliter cooperans utroque parente nesciente, et ad hoc insufficiente, organizavit. 2 Mach. 7: « Nescio enim qualiter in utero meo etc. » Anio ergo patrem, a quo solummodo habeo materiam corporis, causam libidinis, originem reatus: potius amabo patrem qui corpus formavit, animam inspi-

(1) *Al.* famae.

(2) *Al.* fines.



ravit. Deut. 52: « Numquid non ipse est pater tuus, « qui possedit et fecit et creavit te? » fecit corpus, creavit animam, possedit utrumque. Item in linea transversali fratres amantur ut proximi, et specialius diligunt se genelli: sed Filius Dei amabilior frater. Item (1) amas fratrem qui tecum dividit, dividendo diminuit tibi paternum affectum: nam « secta « bipartito (2) » cum mens discurrit amore, alterius vires subtrahit alter amor. Gen. 57: « Videntes Joseph « fratres sui, quod a patre etc. » Dividet etiam et diminuet dividendo paternum censum. Luc. 12: « Magister, dic fratri meo ut dividat mecum possessionem. » Amas specialiter tecum genitum, qui statim natus tibi quasi injurians diminuit lac maternum, et adhaerens uberi occupavit locum tuum. Hunc fratrem aurā potius, per quem erga te crevit quantum ad affectum amor paternus, per quem heres efficeris, et ad paternum censum admitteris, quamvis patri rebellans exheredari merueris: per quem nullum bonum tibi debitum diminuitur, sed multiplex bonum indebitum tribuitur. Postremo tradit frater fratrem in mortem: sed hic pro fratribus semetipsum tradidit in mortem. Genes. 45: « Ego sum frater vester Joseph, nolite timere etc. » Hebr. 2: « Non confunditur eos fratres « vocare. » In linea descendenti ut proximus amatur filius: ergo volens Deus etiam sic ab homine amari ut proximus, factus est filius hominis: quod etiam de se saepissime repetit, ne tanta consanguinitatis propinquitas dari oblivioni possit: sed dicit, filius quidem est hominis, nec tamen mulieris (5), sed Virginis. Audi. « Quicumque fecerit voluntatem « patris mei etc. » Voluntatem viri provocantis faciens aliqua virgo fit mulier, ac deinde mater: tu voluntatem Dei facito, Christi mater eris et virgo. Amat ergo mater filium, et quidem tenerius quam pater. 2 Reg. 1: « Sicut mater unicum amat filium, « ita te diligebam. » Amat filium quem concipit cum sorde, pregnat cum pallore, non sine timore parit eum periculo vitae, educat eum solitudine et labore; qui ingratus post omnia vix praeceptis cogitur, promissis allicitur honorem rependere parentibus. « Honora » inquit « patrem et matrem, « ut sis longaevus super terram. » Tu ama potius filium, quem Spiritu sancto superveniente in utero mentis concipis mundius, gestas jucundius, paris securius, educas facilius: qui sit senectutis tuae baculus, cecutientis oculus; qui filiali fide in morte tua meminerit tui, eum etiam in morte sua matris oblitus non fuerit. Verum inter sponsam et sponsam non est accipere graduum distantiam, eum duo faciant jam carnem unam, et duo animi in unam foederentur amicitiam; propter quod dicitur Ephes. 5: « Viri, diligite uxores vestras: » et « Propter hoc relinquet homo patrem et matrem, et « adhaerebit uxori suae, et erunt etc. » Sed quantum res significata praecellit signum, tantum amor et unitas Dei ad animam, amorem sponsi ad sponsam, animae ad Deum, sponsae ad sponsum. « Sacramentum enim magnum est: ego autem dico « inter Christum et Ecclesiam: » inter Deum et animam. Vide hoc evidenter. Tria sunt bona matrimonii: fides contra adulterium: inseparabilitas, quae dicit Sacramentum, contra divortium; proles contra sterilitatis opprobrium: sed in hoc conjugio

fides inviolabilior, inseparabilitas major, proles utilior. Fides inviolabilior Dei ad animam. Osee 2: « Sponsabo te mihi in fide: » Cant. 2: « Dilectus « meus mihi, et ego illi. » Quinimo fidelior est sponso omni qui fidelis est etiam animae fidem non servanti. Isa. 57: « Juxta me disco operuisti, « et suscepisti adulterum: » Jerem. 5: « Tu fornicata es cum amatoribus multis, tamen revertere « ad me. » Quare hoc? certe ut per virum fidelem sanctificetur mulier infidelis, adultera per misericordem maritum, peccatrix anima per Christum. Sed objicies: Non sola solius, unica unici, cum scriptum sit « Qui amas animas » quasi non unam, sed plures. Sed scriptum est Act. 4: « Multitudinis « credentium erat cor unum et anima una. » Numquid propterea sponsus non unam sponsam amat, si in ipsa caput et manus et pedes et cetera membra diligit? An indignabitur caput sponsae fidem debitam sibi violari, si depraeheudat etiam sibi pedes unitos amari? Amplius, non diminuitur in individuo species, licet ipsam participant plures: nec plenius individuo species inesset, si sola inesset. Sic miro modo Deus te, o anima mea, diligit, totus totam, ut non minus diligit te diligens tecum et aliam: aliam, inquam, a te in substantia, unam autem tecum in caritate et amicitia: nec plus te amaret si solam amaret: quinimo si tibi socias non dedisset, minus forsitan quam nunc amare posset. Non sic Jacob, cui permissum est plures sponsas habere, nec tamen datum est ut unamquamque ipsarum posset ut solam totus amare. Ceterum hoc video in Deo esse omnipotentiae, et omnipotentis bonitatis. Augustinus in Confess.: « O « tu bone omnipotens, qui sic unumquemque nostrum curas, tanquam solum cures: et sic omnes, « tanquam singulos. » Item, inseparabilitas major. Illi enim duo unum carnaliter effecti inseparabiles dicuntur, quia dum vivunt, nequeunt separari, sed et necessario separantur, quia necessario moriuntur. Rom. 7: « Si dormierit vir ejus, soluta est a lege « viri. » Verum inter te, o anima mea, et Deum matrimonium quod in baptismo initiatum, in bona vita ratum, in patria fuerit consummatum, post illius unius primum consortium impossibile est esse divortium. Verumtamen et modo die cum Apostolo: Rom. 8: « Quis nos separabit a caritate Christi? Tribulatio, an angustia? » Ceterum quod subjungitur, et rato et consummato (1) congruit: « Certus sum quod neque mors, neque vita, neque instantia etc., poterunt nos separare a caritate quae est in Christo Jesu. » Item: Proles utilior et multiplicior, bonorum scilicet operum. Feundat enim sponsus sponsam, Deus animam per gratiam. Progrediturque proles ab ambobus unitis non ab altero tantum, sed a matre ut a principio materiali, a patre ut formali, et ideo principali. Sic et proles operum non a gratia sola, nec a libero arbitrio solo, sed a libero arbitrio vel voluntate ut a principio materiali et incompleto, a gratia vel a Deo ut a completo vel formali et ideo principali. Joan. 10: « Sine me nihil potestis facere: » 1 Corinth. 15: « Abundantius « omnibus laboravi, non autem ego, sed gratia Dei « mecum. » Haec utilis proles quae matrem non perimit, sed ei vitam aeternam acquirit: sicut e contrario concupiscentia cum conceperit parit peccatum, peccatum autem cum fuerit consummatum

(1) Al. ibi.

(2) Al. bipartita.

(5) Al. meus.

(1) Al. et rapto et unito.



generat mortem. Psal. 7: « Conceptit dolorem et « peperit iniquitatem. » Ille non Bennoni filius doloris: sed si prius forte filius laboris, postmodum filius gaudii et honoris: quoniam etsi mulier cum sic parit, tristitiam habet; cum autem peperit, jam non meminit pressuræ propter gaudium.

## CAPUT XIV.

*Amandus est Deus propter fidelitatem.*

Quoniam amico fideli nulla est comparatio, amari solet et merito amatur qui fidelis in amicitia comprobatur. Fidelis est autem qui stabilis et immutabilis est. Sunt autem tria amici fidelitatis experimenta: scilicet novitas, prosperitas, adversitas. Fidelem amicum mihi hunc aestimo quem in his erga me immutabilem invenio, a cujus animo me novus amicus superveniens non excludit, immo nec a gradu vel loco quem in animo mihi dedit, immo qui propter supervenientem novum non reputet me antiquum: quod enim antiquatur et senescit, prope interitum est; nisi forte ad modum vini me quanto antiquiorem, tanto reputet amicum puriorem. Eccl. 9: « Ne dimittas amicum antiquum, « novus enim non erit ei similis: vinum novum « amicus novus: veterascet, et cum suavitate libes « illud ». Luc. 5: « Nemo bibens vetus statim vult « novum; dicit enim, vetus melius est. » Item quem prosperitas sua insperata non reddit mihi extraneum, nec adversitas mea inopinata me sibi ingratum, sed implet illud Eccles. 22: « Fidem « posside cum amico tuo in paupertate ipsius, et « ut in bonis illius coheres sis. » Ceterum homines multi misericordes vocantur. Virum autem fidelem quis inveniet? Luc. 18: « Cum venerit filius hominis, putas inveniet fidem super terram? » Ecce enim omnis homo mendax et mutabilis, mutatur novitate. Gaudent enim novitate moderni, et novis supervenientibus vetera projiciunt; et si forte aliquantulum fidelis esse volens non projiciat me propter novum ex animo, quodammodo tamen subordinat gradu, vel post ordinat loco, dicens mihi, da locum huic novo. Sed ille evangelicus invitator cum quem locum dare jubet, amicum non nominat, sed absolute dicit, « Da huic locum: » illum vero amicum dicit quem ascendere facit, « Anice » inquit « ascende superius. » Amari me scirem si in affectu ejusquam ascenderem. Si vero novo jubeor locum habitum dare, quid ex hoc possum convenire (1)? saltem medium teneat in gradu: non me dimittat: non aegre feram si novum utpote dignum amplius supponat. Ceterum non est Deus ut homo ut mutetur novitate; sed ut amicus stabilis et fidelis elegit sine initio quos diliget sine fine, nullum excludens pro alio, omnes volens superius ascendere, nullum alteri locum dare. De hoc Prov. 17: « Omni tempore diligit qui amicus est: » immo iste amicus ante omne tempus, et post omne tempus. Joan. 15: « Cum dilexisset suos qui erant « in mundo, in finem dilexit eos, » non in finem terminantem, sed in finem consummantem: Ps. 118: « Omnis consummationis vidi finem, latum mandatum tuum nimis. » Item mutantur et prosperitate, quoniam honores mutant mores, et succedentibus prosperis, pincerna sui obliviscitur interpretis, Genes. 40. Item mutantur adversitate; nam quos

felices diligunt, miseros nec cognoscunt. Job 2: « Audientes tres amici etc. », usque « elevantes autem « oculos suos procul non cognoverunt ». Verum apud patrem luminum non est transmutatio, nec vicissitudinis obumbratio; quoniam nec sua sublimitas cum tibi extraneum, nec tua humilitas te sibi efficit alienum. Psal. 157: « Quoniam excelsus Dominus et humilia respicit. » Ubi amor, ibi oculus: vide de hoc exemplum grossum et ideo sensui aptius in Christo, quem prosperitas sua non mutavit in amicitia: nam quos in fratres et amicos mortalis et passibilis elegit, glorificatus et immortalis factus fratres nihilominus recognovit. Joan. 20: « Vade, dic fratribus meis: Ascendo ad Patrem « meum et patrem vestrum, Deum meum et Deum « vestrum. » Confundere nunc, anima mea, confundere de infideli amicitia: quæ si impassibilis esses, et de vita corporis diutina, non dicam perpetua, certa esses, fortasse ipsum quem nunc te diligere aestimas, vix cognoscere velles. Item nec mutavit Christum, nec diminuit amicitiae affectum mutatio status in amico, qui adversitate repentina factus est alter ex altero, miserior ex misero. Joan. 11: « Diligebat Jesus Mariam et Martham et Lazarum, » amabat sanum: sed quid aegrum? audisti « Domine, ecce quem amas, infirmatur; » quem amas in praesenti, non quem ut in praeterito amasti. Amavit igitur et infirmum: secuta est mors, crevit miseria, non decrevit amicitia. « Lazarus » inquit « amicus noster dormit, » amicus noster, non quia amet cum sit mortuus, sed quia ametur. Cedit tempus, corrumpitur corpus, ad tumulum venit Christus, « Tollite » inquit « lapidem: » ajunt: « Domine jam foetet. » Ecce jam tempus est ut erga tam miserum amicitia cessaret. Et si mutabilis esset, flet Jesus et turbatur, hoc scio: si nares obstruxerit, nescio: « ecce » inquit « quomodo amabat eum. » O Judæi, non amatis qui nec de amicitia loqui proprie scitis: quinimo, ecce quomodo amat (1) eum: ut sit in amando praesens perfectum, ejus fletus est signum; non praeteritum imperfectum. O si ad talem miseriam Christus deveniret, quam paucos amicos retineret! Captus quidem, sed non mortuus fuerat, cum ille suus amicissimus se eum non tantum non amasse, sed nec nosse jurabat. Eja nunc, homo stultissime, si quaeris amicum, cur non amas hunc, qui mutatus in honore non mutatur ab amore; qui te mutat per miseriam, non mutat amicitiam. His omnibus hinc inde collatis, et in libra positis, deliberat anima; post deliberationem eligit, et sic tandem confirmatur amicitia. Ceterum haec analogice quidem, et communia Deo et homini quæ Deus homini contulit, volens etiam hominem amari; sed in his eisdem ineffabiliter hominem excellit volens homine precamari. Sed quis ponderabit ea quæ de Deo sunt propria; omnipotentiam, omniscientiam, summam bonitatem et similia? Nimirum haec digne librari non possunt, utpote quæ incomprehensibilia et immensa, libram non tantum angusti cordis humani, sed etiam angelici intellectus excedunt. In summa tamen advertite quis in amicum eligi dignior debeat; creator an creatura, dominus an servus, princeps an vasallus, omnipotens an infirmus, immensus an modicus, omnisciens an stolidus, dives an egenus; et postremo, ut multa transeam, summe bonus et beatus, an miser et malus?

(1) Edit. Rom. convincere. Forte neutrum legendum, sed conjicere.

(1) Al. amabat.

## CAPUT XV.

*De tertio exitu.*

Tertius exitus est tertius modus quasi mirabilis, cum Deus animam quam per se solus subito mirabiliter creando facit, per se solus subito mirabiliter gratificando reficit, et in ipsa caritatem efficit; ad quod nec naturae potentia, nec voluntatis industria sufficit. Uno ergo modo efficitur Deus amicus noster quasi postulatus, quia pro amicitia sua infundenda orare debemus. Secundo modo ut electus, in quem vel omnes, vel ad minus plures voces desideriorum et virium concordant: nam si sensualitas sola discordet et amicos eligat alios, non obstat: quia jus eligendi non habet, quod perdidit male eligendo. Verumtamen si et ipsa assentiat et omnes voces habeantur, ut ibi, « Cor meum et caro mea exultaverunt in Deum vivum, » Psal. 85, tunc indubitanter electus confirmabitur. Quamdiu autem vires inferiores excipiunt contra electionem superiorum, quamvis non sit rationabilis exceptio, tamen differtur confirmatio, donec post litem diutinam sensualitas succumbat, et vieta cedat, vel transiens per arbitrium forsitan electioni consentiat. Sed si ratio in lite religiose praevalet, ut ejus electus et electio exceptionem transcendat; in expensis merito sensualitas condemnatur, ut opera poenitentiae pro satisfactione portet, pro eo quod rationem lite indubitata fatigavit. Haec autem validissima contra electionem rationis obstat exceptio, si nimis ultra tempus debitum dilata sit electio. Secundum hoc non in peccantibus primo, quia ratio recta tempus negligit, et differt eligere personam eligibilem et idoneam in amicum. Sensualitas praeveniens non eligendum eligit, et rationem ad consensum allicit et trahit. In poenitentibus contra eligentem et electum, et electione excipitur, et lis movetur; et cum in contritione cassatur electio, ratio partem sensibilem ad confitendum movet, quae in satisfactione refundit expensas. In incipientibus ratio vult eligere, sed reclamatur sensualitas. Galat. 5: « Caro concupiscit adversus spiritum. » In perfectis, immo perfectissimis caro assentit: in morientibus lis decidit, et sensualitati silentium imponitur, et electus rationis in amicum sibi perpetuum confirmatur. Primo autem modo habetur vi intrusus, sicut in generatione violenta per actionem praedominantis una forma destruitur, et alia generatur et inducitur.

## CAPUT XVI.

*De exitu caritatis.*

Quoniam, ut dicit Hieronymus, Omnis res per quascumque causas generatur, per easdem dissolvitur, versas scilicet in contrarium; et secundum Philosophum, idem est causa contrariorum, hujus per praesentiam, illius per absentiam: quot modis et quibus amicitia generatur, eisdem et tot corrumpitur. Exit ergo caritas in esse modo quasi supernaturali, scilicet cum datur vel infunditur postulanti; e contrario desinit esse, cum peccans deest influenti. Quo contra Apostolus ad Hebr. 12: « Videte ne quis desit gratiae Dei. » Sicut ergo sol lucens in aëre, causa est efficiens et conservans luminis, et ideo cessante causa, scilicet influenza solis, cessat ejus effectus, scilicet luminositas aëris; sic Deus

continue influens causa est in animo caritatis. Sed si sole stante et effluente lumine aer mortuus recederet, ipse sibi tenebrae causa esset, et quod influxum erat non subtrahitur, sed corrumpitur quando non continuatur: sic verus sol fons caloris et lucis, cognitionis et dilectionis stat, quia immobilis effluit, quia dives et liberalis; sed si animus movens gratiae se absentat, vel nubem peccati interponat, quod influxum erat corrumpitur, quia non continuatur. Secundo modo caritas exit in esse modo quasi voluntario, cum per deliberationem Deus homini praeponitur, et in amicum eligitur: e converso corrumpitur et desinit esse, cum anima nomen Dei in vanum accipit, et quasi sine re in libram ponit cui hominem vel aliam creaturam cum circumstantiis generalibus vel specialibus aggravantibus praeponit; et declinans adhuc hominem vel creaturam aliquam Deo eligendo praeponit. Generalia librat illa in Oseae 2: « Vadam post amatores meos, qui dant panes mihi, et aquas, et oleum etc. Et haec nescivit, quia ego dedi ei frumentum, vinum et oleum etc. » Quod si scire et advertere voluisset, Deus praeponderasset. Specialia ponderant illi, de quibus Matth. 10: « Qui amat patrem aut matrem super me, non est me dignus. » Tertio modo caritas exit in esse quasi naturaliter, cum simile a simili generatur, et anima beneficia Dei continue gratanter accipiens auctorem redamare cogitur: e converso desinit esse et corrumpitur, cum anima ingrata beneficio, paulatim torpens ad frigiditatem primam revertitur. Jerem. 5: « Quomodo si contempsit mulier amatorem suum, sic contempsit me Dominus Israel. » Matth. 24: « Quoniam superabundavit iniquitas, refrigeret caritas multorum. » Incipit iniquitas in cogitatione, crescit in delectatione, abundat in consensu, superabundat in actu vel in usu. Nota igitur, Cor hominis vel animus quantum ad statum viae habet se ad caritatem sicut materia ad formam elementarem, per quam appetitus ejus non terminatur totaliter; et ideo possibilis est generatio et corruptio circa ipsam. Quantum autem ad statum patriae est sicut materia quintae essentiae, quae contenta est forma sua, utpote terminante appetitum ejus, et non movet ad aliam, et ideo non incidit corruptio circa ipsam: sic corruptibilis est in via caritas circa cor; incorruptibilis in patria ex simili causa. Quoniam igitur, secundum Philosophum, omnes transferentes secundum aliquam similitudinem transferunt, licita fit translatio ubi aliqua, etsi non omnimoda, similitudo. Sunt autem quatuor elementa unam communem materiam habentia, ejus pars uni formae, pars subicitur alteri, inter quas est pugna, et actio et passio mutua. Ignis calidus, Deus benedictus, et diligens; aer humidus, carnales amici nostri, quibus humore sanguineo communicamus; aqua fluida bona temporalia; terra deformis et quasi faex elementorum, vitia et peccata. Cor igitur amando vitia et peccata, fit quasi terra. Psal. 10: « Qui diligit iniquitatem, odit animam suam. Dilexisti malitiam super benignitatem. » Amando temporalia, immoderate tamen, citra Deum, fit quasi aqua. Psal. 4: « Filii hominum usquequo gravi corde? » Amando amicos carnales pure naturaliter, fit aer. Gregorius: « Sunt qui diligunt proximos, sed per affectum cognationis et carnis. » Amando Deum fit ignis. Cant. 8: « Fortis est ut mors dilectio etc. Lampades ejus, lampades

« des ignis. » Primus amor mortalis: secundus venialis: tertius debitus, sed tamen indifferens, quia naturalis: quartus meritorius, cum sit gratuitus. Ignis aerem ut symbolum secum habentem amplectitur, et facilis est ibi transitus. Aquam ut magis distantem tolerat, quam impugnans diminuit, sed ab ipsa non extinguitur propter distantiam. Cantic. 8: « Aquae multae non poterunt extinguere caritatem. » Sapient. 19: « Aqua extinguentis naturae non obliviscitur. » Sed cavendum ne aqua crescens horizonta ignis attingat; quoniam tunc ignem ardentem extinguit aqua, cum amor temporalium venialis excrecendo fit mortalis. Terrae vero sic ignis contrariatur, ut ipsam vel corrumpat, vel corrumpatur. Tria igitur sunt simul in uno animo, ut in una communi materia, sed in parte alia et alia, quae tandem in ignem omnia convertuntur. Sic fervet ignis agens in aquam, tandem etiam propter Deum tantum diligis temporalia, factusque es ignis de aqua. Calefacit ignis aërem tandem; et cognatos tantum propter Deum diligis, et sic ignis fit ex aëre. Terra autem incensa quae igni, etsi non naturali oppositione, tamen locali positione et distantia maxime est remota, in hac metaphora secum compatitur in eodem animo aquam et aërem; sed fugat penitus vel fugit ignem: quae secundum suas qualitates, scilicet siccitatem, frigiditatem et gravitatem et alias, in aquam et aerem agit, eaque tandem in suam naturam convertit. Quasi enim terra ex aqua generatur, cum amor temporalium rerum primum venialis ens, postmodum ingrossatur, et mortalis efficitur. Sed et aer in terram degenerat, cum amor naturalis nimietate in culpam declinat, secundum illud Matth. 10: « Qui amat patrem aut matrem plusquam me, non est me dignus. »

## CAPUT XVII.

*De augmento caritatis.*

In caritate notanda sunt quatuor: essentia, habitus secundum se, radicatio vel inhaerentia in subjecto, motus vel actus, et fervor in motum. Ultima tria augeri possunt, et minui, unde per veniale diminuuntur, ex quibusdam etiam causis augentur et intenduntur. Primum autem corrumpi potest et augeri, non autem minui: quod patet, quia minimam habens caritatem, venialiter peccare potest: quod veniale si habitum caritatis minueret, iam aliquid minimo minus esset. Aristoteles: « Nil minus minimo est, augeri tamen potest: » Cujus augmenti causam nota et effectum. Circa causam nota. Regulariter omnis res per quascumque et ex quibuscumque causis generatur, ex eisdem si est nutritibilis nutritur, si augmentabilis augetur. Habetur autem caritas et generatur, quia Deus dat et homo recipit. Duplex igitur causa: una proprie et propter quam; scilicet influentia dantis. Alia proprie et sine qua non; scilicet dispositio recipientis. Quae dispositio conversio est animae ad Deum per potentias, secundum quas est imago Dei. Nota igitur, Deus est dives, cujus divitiae communicatae non minuuntur, ideo dare potest. Aristoteles: « Primum principium est dives per se, et dives in aliis est et bonus: » bonum autem est diffusivum sui, et ideo liberalis, et ideo dare vult, et quia vult dat. Sed quia actio activorum est in patiente dispositio, actio dico quae est ad aliud, sicut sol lueet semper, non

semper illuminat, ignis calet semper, sed non semper calefacit nisi dispositum; sic Deus effluit semper, sed non influit nisi recipienti et disposito. Influire est dare. Sed ejus est dare, ejus est et augere, vel magis dare: unde dicitur Luc. 17: « Adauge nobis fidem. » Verum, quia receptum est in recipiente per modum recipientis, non recepti; quod Deus sine mensura effluit, tu cum mensura recipis: non enim ad mensuram dat Deus spiritum, et tamen unicuique nostrum data est « gratia secundum mensuram donationis Christi. » Accipe ergo magis, et sic augetur quod acceperas; quoniam augmentum est praeeexistens additio quantitatis, ut dicit Aristoteles. Sed nota, est gratia magna, et est major gratia: gratia datur sine merito, sed non sine dispositione, quae quandoque large meritum congrui appellatur. Sicut igitur formam naturalem introducendam antecedit positio nuda, dispositio et necessitas: quorum primum et ultimum intelligitur simplex, et quasi punctuale: medium autem habens latitudinem, quam contingit dispositioni plus et plus, ut sic haec extensio durationis quasi lineae a puncto ad punctum; sic et haec est potentiam animae liberum arbitrium accipere, ut nudum, ut dispositum; quae dispositio est per conversionem ad Deum in usu vel actu, secundum quod patet ex naturalibus et gratis datis. Quando autem facit totum quod potest, et quod in se est, tunc est necessitas ad habendam gratiam: non necessitas coactionis Deo debitum imponens: sed necessitas immutabilitatis, qua necesse est Deum esse: Deum, et ideo bonum; et ideo effluentem et ideo accipienti dantem. Immo nec hanc ultimam dispositionem et necessariam liberalissimus dator expectat, sed aliquo modo convertenti se et disponenti, etsi non secundum totum quod in se est, multoties dat. Jacob. 1: « Qui dat omnibus affluenter. » Augustinus: « Anima instrumenta cognoscendi et diligendi Deum habet a natura; cognitionem tamen veritatis et ordinem dilectionis a gratia. Vasa namque quae creatrix gratia creavit ut sint, adjutrix gratia replet, ne vacua sint. » Haec plenitudo (1) causat levitatem. Augustinus: « Tu quos imple, sublevas eos; et quia tui plenus non sum, oneri mihi sum. » Sicut vesica plena corpore levi sursum movetur, e contrario vas plenum corpore gravi gravatur; sic et creatura. Psal. 4: « Filii hominum usquequo gravi corde? » Major autem gratia dupliciter dicitur. Primo in comparatione ad minorem ab altero habitam: haec sine meritis habetur, sed non sine dispositione majori, ut patet in parvulis differentibus in substantia naturalium, sed indifferentibus in usu vel actu ipsorum: et ideo aequae dispositis, et aequae indispositis aequalis in baptismo datur gratia: adultis attritis dissimiliter dispositis non in substantia naturalium, sed in conversione ipsorum ad Deum per actum et usum sine meritis infunditur gratia dissimilis, scilicet major vel minor; quod ostendit dissimilitudo contritionis. Anselmus: « Gratia datur secundum praepurgationem. » Vel in comparatione ad minorem praehabitam, haec est meritis, quoniam conversio qua talis anima ad Deum convertitur et disponitur, gratuita est, non tantum naturalis, vel gratiae gratiae; et ideo meritoria. Unde optime dicit Augustinus: « Restat ut intelligamus Spiritum sanctum

(1) *At. similitudo.*



« habere qui diligit, et habendo mereri ut plus  
 « habeat, et plus habendo plus diligit. » Item  
 Augustinus: « Gratia meretur augeri. » Non gratiae  
 substantia, quoniam haec non est meritoria, sed  
 usus. Quoniam igitur natura omnium constan-  
 tium causa Deus est, et ratio magnitudinis et au-  
 gmenti; similiter et constantium per alias causas:  
 « constituit enim terminos ejus, qui praeteriri non  
 « poterunt, » Job 14. Unde dicit Augustinus: « Ca-  
 « ritas ut perficitur nascitur; cum fuerit nata, nu-  
 « tritur: cum fuerit nutrita, roboratur: cum fuerit  
 « roborata, perficitur: cum fuerit perfecta, dicit:  
 « Cupio dissolvi et esse cum Christo. » Signa au-  
 tem vel effectus augmenti caritatis tria sunt. Pri-  
 mum major perfectio subjecti, scilicet potentiae.  
 Haec est causa propria, necessaria et immediata,  
 et in genere causae formalis, ut patet: virtus enim  
 est quae habentem perficit, et haec est per se. Et  
 ideo si simplex ad simplex, et magis ad magis.  
 Sicut ergo qui habet gratiam, est Deo gratus, et  
 qui majorem magis; sic habens caritatem Deo cha-  
 rus est, et qui majorem magis. Prov. 8: « Ego  
 « diligentes me diligo, » magis et magis. Secun-  
 dum est major impermixtio contrarii. Sunt autem  
 contraria caritatis duo: scilicet timor et cupiditas.  
 Timor autem alius servilis, cui opponitur amor  
 caritatis, ut calidum frigido, et ideo non compa-  
 tiuntur se simul; alius initialis, cui opponitur  
 ut extremum medio, ut calidum tepido: et ideo ex  
 his quasi fit mixtio, excellentiis relegatis, non habitis  
 sed haberi possibilibus, ut in elementis contrariis  
 in mixto convenientibus. Ceterum si calor augea-  
 tur in mixto, fortius pugnabit contra frigidum, et  
 citius praedominabitur, et ideo mixtio dissolvetur:  
 et similiter omnino in proposito. 1 Joan. 10: « Per-  
 « fecta caritas foras mittit timorem, » et e con-  
 verso, timor initialis excreseens in quantum timor,  
 et degenerans in servilem, foras mittit caritatis  
 amorem. Verum timor castus crescente caritate cre-  
 scit ut ejus effectus: nam quem magis amo, magis  
 revereor, magis offendere vereor. Cupiditas alia  
 mortalis, cui opponitur caritas, ut album nigro;  
 alia venialis, vel etiam innata, cui opponitur ut  
 album pallido. Album et nigrum mutuo se expel-  
 lunt, sed album pallido quodammodo permiscetur.  
 Albius est ergo nigro impermixtius, et albissimum  
 quoque nigro impermixtissimum est: sic nimirum  
 in proposito. Augustinus: « Concupiscentia cum  
 « qua nati sumus, minui potest, non finiri dum  
 « vivimus. Quod si praevaluerit concupiscentiae  
 « cupiditas, expellitur caritas. » Matth. 23: « Quo-  
 « niam superabundavit iniquitas, refrigescit ca-  
 « ritas multorum. » Tertium est major extensio  
 actus proprii, scilicet dilectionis: quod signum tenet  
 aliis paribus, aliter enim falleret. Hunc enim actum  
 habet forma cum subjecto, caritas cum potentia:  
 et ideo sicut virtus visiva conjuncta organo expe-  
 ditur et impeditur secundum ipsum, unde aequae  
 bona potentia visiva in juvene et sene, non tamen  
 aequae vident, organo impediente; sic potentia sub-  
 jectum caritatis potest ex toto ligari, et prorsus  
 non erit hic actus, ut patet in parvulo, furioso et  
 dormiente, et aliis: potest occupari, vel expediri: et  
 secundum hoc accidit major vel minor actus. Unde  
 major est alicujus viatoris caritas caritate alicujus  
 comprehensoris, non tamen plus diligit actu. Sed  
 aliis paribus tenet. Qui majorem habet caritatis  
 habitum, majoris elicit actum dilectionis: et qui

magis diligit Deum sive amando eum, sive concu-  
 piscendo ipsum, magis vult; et qui magis vult,  
 magis operatur si potest. Unde sicut voluntas mo-  
 trix est virium inferiorum, sic caritas omnium  
 virtutum: unde « Caritas patiens est, benigna  
 « est etc. » Augetur autem radicatio duratione,  
 secundum illud « Caritas aut proficit, aut deficit. »  
 Ephes. 4: « In caritate radicati etc. » Radicatur  
 potentia in caritate, caritas in potentia, sicut est  
 digitus in anulo, et anulus in digito. Cum igitur  
 caritas in potentia continuat possessionem, quodam-  
 modo tendit ad faciendam praescriptionem, ut quo  
 diutius influit, difficilius expelli possit. Item motus  
 crescit ex frequentatione. Aristoteles: « Actus desi-  
 « derii suum simile, et tale additum tali sit ma-  
 « gis tale. » Item fervor duplex est. Alius enim  
 sensualis vel sensibilis, qui generatur et augetur  
 quandoque ex dispositione complexionis; unde aliis  
 paribus ferventius amat sanguineus quam melan-  
 cholicus. Quandoque ex recentia vel novitate actio-  
 nis: unde ferventius amat novitius, quam ipseidem  
 proventus. Alius intellectualis: haec generatur et  
 augetur ex eo quod potentia affectiva expedita et  
 libera aliquid per cognitivam apprehendit circa ama-  
 tum, ex quo irritatur et fortificatur ad amandum;  
 unde ferventior contemplativus, actio majoris cari-  
 tatis; comprehensor minor viatore majori.

## CAPUT XVIII.

*Quomodo diligendus sit Deus.*

« Diliges Dominum Deum tuum ex toto corde  
 « tuo. » Diligere cum sit actio, egredietur a sub-  
 stantia mediante vi vel potentia; quia haec tria  
 secundum Dionysium ordinate se habent: substantia,  
 virtus et operatio. Praecipitur igitur haec actio  
 dilectionis, secundum quod convenit homini, non  
 Angelo proprie, qui nec cor habet nec animam.  
 Homo autem substantia composita essentialiter ex  
 duobus, scilicet corpore inter ejus membra cor  
 principale est, et spiritu, qui simplex in substantia,  
 respectu fit duplex: habet enim respectum ad cor-  
 pus quod perficit et vivificat; sic dicitur anima;  
 habet respectum ad Deum, cujus imago est natura-  
 liter: sic dicitur spiritus vel mens vel intellectus,  
 et secundum hoc potest esse separata ut Angelus.  
 Tota igitur substantia hominis quodammodo obli-  
 gatur, cum praecipitur, « Diliges Dominum Deum  
 « tuum ex toto corde tuo, et ex tota anima tua: »  
 ut sive in corpore sit, sive extra; sive conjuncta  
 anima sit, sive separata; ad diligendum sit obligata.  
 Sed quia inter substantiam et operationem interci-  
 dit potentia, secundum illud 9 Metaph.: « Omne  
 « agens habet potentiam in qua potest, » additur  
 tamen hic, « ex omnibus viribus tuis. » Luc. 10,  
 « vel ex tota fortitudine tua, » Matth. 22, « et  
 « ex tota virtute tua. »

## CAPUT XIX.

*Quid sit ex toto corde Deum diligere.*

« Diliges Dominum Deum tuum ex toto corde  
 « tuo. » Corde, ore et opere contingit mereri et  
 demereri; sed inter haec primum est cor, quod  
 influit super alia in malo et bono. Matth. 15:  
 « De corde exeunt cogitationes malae. » Matth. 12:



« Bonus homo de bono thesauro suo profert bona. »  
 Ex corde ergo jubemur diligere, ut ordo influentiae ostendatur. Sine opere etenim sermo non diligit. Joan. 5: « Carissimi, non diligamus verbo neque lingua, sed opere et veritate: » Psal. 77: « Dilixerunt cum in ore suo, et lingua sua mentiti sunt ei. » Sine amore autem cordis cassa sunt verba et opera. 1 Corinth. 15: « Si linguis hominum loquar etc. Et si distribuero etc. » Natura autem humani cordis cognata est actioni dilectionis, et patet sex proprietatibus ejus. Est enim cor in complexione calidum et siccum, haec est ignea natura: sicut naturale igni calere est, ita naturale est cordi amando ardere. Hugo: « Vita cordis amor est, ideo impossibile est ut sine amore sit cor, quod vivere quaerit: » Psal. 58: « Concaluit cor meum intra me etc. » Calidum consequitur leve et sursum mobile: sed heu! filii hominum usquequo gravi corde, graves nimirum, quia frigidi. Matth. 24: « Quoniam superabundavit iniquitas. » Item secundo est cor in substantia solidum, ne facile a voluptate dissolvatur, quo contra Judith cor Holofernis concussum est. Item tertio quoad formam, inferius acutum, superius latum: inferius acutum, ut ad temporalia hic et inferiora modice attingat, superius latum, ut ad caelestia dilatet affectum. Isai. 60: « Mirabitur et dilatabitur cor tuum. » Item quarto interius concavum, in signum quod per creaturas sufficienter impleri non valet. Bernardus: « Capax quippe Dei rationalem animam quicquid Deo minus est, non implebit. » Item duplici motu movetur continue: scilicet constrictionis, quo expelluntur fumositates superfluae: et dilatationis, quo attrahatur aer ad mitigationem nimii caloris innati. Ex corde ergo amat, qui prudenter discernens expellit superflua et impediencia, et attrahit necessaria ad amandum adjuvantia. Augustinus: « Prudentia est amor, ea quibus adjuvatur, ab his quibus impeditur, prudenter secernens » Cor ergo, quod est secundum Philosophum originale domicilium vitae, naturali excitatur praecepto, ut suo modo cooperetur ad eliciendum actum vitae gratuita. 1 Joan. 5: « Nos scimus quoniam translati sumus de morte ad vitam: » quasi diceret, « Qui non diligit, manet in morte. » Est etiam secundum Aristotelem, primum organum sentiendi, et ideo congrue primi mandati actio ab ipso et per ipsum debet sensibilis fieri. Sed nota, « Diliges Dominum Deum tuum ex toto corde, » non dimidio. Divisio cordis causat mortem. Osee 1: « Divisum est cor eorum, nunc interibunt. »

## CAPUT. XX.

*Quid sit ex tota anima diligere Deum.*

« Diliges Dominum Deum tuum ex tota anima: » oportet ergo nosse quid sit anima. Aristoteles: « Anima est actus primus corporis organici, id est forma completiva, et perfectio dans corpori esse et vitam. » Est autem duplex esse: naturale, et moris: et cum vivere viventibus sit esse, secundum Aristotelem similiter duplex erit vita, scilicet naturalis et moralis. Primum esse et primam vitam habet corpus ab anima tamquam a sua forma substantiali et completiva. Secundum esse et secundam vitam habet anima a Deo summa et prima forma, et sui effective (1) completiva. Est ergo quodam-

(1) Forte sui affectus.

modo Deus anima animae, si loqui liceat improprie. Considera ergo te, o anima, secundum quod es anima, scilicet in quantum habes corpus animare; et cogere ex hoc animam tuam, id est Deum amare. Vide tres status tui corporis; animandi, animati, exanimis; scilicet status in fieri, in esse, post esse. In animando tria sunt: potentia susceptiva animae, naturalis appetitus ad habendum, virtus dispositiva organizans embrionem, et disponens tandem ad suscipiendum. Completa vero dispositione animatur corpus, et sequitur esse post fieri; et est status secundus, in quo anima adveniens corpori ut forma materiae, et ut perfectio perfectibili, dat ei tria, vivere, sentire et moveri: moveri non tantum secundum locum et situm, sed etiam secundum operationem et nutrimentum et augmentum. Ceterum si ex aliqua causa vel corrumpantur organa necessaria, vel solvatur harmonia in medio unionis, solvitur unio, et separatur anima, exanimatur corpus: et est status tertius, in quo corpus deterioris conditionis efficitur, quam (1) esset nondum animatum, amittens irrecoverabiliter in via naturae tria praediata, scilicet motum, sensum et vitam. Et quod in primo statu tendebat naturaliter ad esse completivum continua dispositione, relabitur nunc ad non esse continua corruptione. O anima mea, qualis es ad corpus, talis quodammodo ad te Deus tuus; ab ipso habes in primo statu tria. Primo potentiam susceptivam, quia sui capax es, et ab ipso solo perfectibilis es: habes et naturalem appetitum, quoniam omne incompletum appetit suum complementum, et omne imperfectum perfectibile appetit suam perfectionem, omnis materia suam formam: habes et virtutem dispositivam, scilicet potentias naturales. Fac ergo anima tuae vitae habendae quod facit corpus suae. Sicut per virtutem dispositivam continue sine interpolatione se disponit ut suscipiat te suam vitam, sic tu per naturales potentias ad vitam tuam te dispone: quod si feceris, cum sufficienter te disposueris, animaberis, perficeris, compleberis. Augustinus: « Anima media est inter Deum et creaturas posita, conversione ad Deum illuminatur, melioratur et perficitur: conversione ad creaturas obtenebratur, deterioratur, corrumpitur. » Eris ergo anima in statu secundo habens a Deo tuo tria quae das corpori tuo, vitam, sensum, et motum moralem. Et quodcumque corpus te vult abjicere, tunc liceat et tibi vitam tuam, scilicet Deum, abjicere. Quod si hoc est impossibile, fac vitae animae tuae, scilicet Deo, quod corpus suae. Appete continuare conjunctionem, horre praee omnibus separationem. 1 Joan. 4: « Deus caritas est etc. » Ceterum si solutum fuerit, quod absit, medium unionis, spiritualis harmoniae temperantia, scilicet caritas et gratia, non abjicit te, sed abjicitur a te anima tua: et tunc sequitur status tertius miserabilis prorsus et longe deterior quam primus, in quo vita et sensu et motu debito careas, et de die in diem corruptione crescente vilior fias. Solvitur hic medium uniens extrema et contemperans caritas et gratia, cum praedominatur morbida et distemperans concupiscentia, quae cum ex conversione ad sensibilia nata sit in anima, ex eisdem nutritur et augmentatur, donec tandem caritati praedominetur: et sic per ipsam anima corrumpitur. Augustinus: « Anima media inter Deum et creaturas posita etc. » Miraculum est si redeat anima

(1) Al. quoniam.

ad corpus quod ipsa deseruit: mirabilius quod ad animam quae ipsum deseruit redit Deus: mirabilius quidem si esset rarius: sed nunc propter frequentiam mirabile desiit esse. Quae nimirum frequentia probat, quod paratior est Deus uniri animae quam penitus non indiget, quam anima corpori quo multipliciter eget. Taliter igitur ex anima Deus diligitur. Bernardus: « Valde mihi amandus es, Domine, » per quem sum, vivo et sapio: » quasi diceret anima, valde a corpore amor, quod habet ista a me. Valde ergo mihi amandus es Domine, cum habeam ista potiora a te.

## CAPUT XXI.

*Quid sit diligere ex tota mente.*

« Diliges Dominum Deum tuum ex tota mente, » vel intellectu. Substantia illa quae in quantum alligatur corpori quod amat, anima dicitur, secundum se ratione absolutionis, quia separabilis est, et separata manet ut angelus, spiritus vocatur; qui spiritus a theologis mens, a philosophis intellectus vocatur. Aristoteles enim vocat spiritum angelicum intelligentiam in lib. de Caus. ut ibi: « Omnis intelligentia est plena formis »: spiritum humanum intellectum in lib. de Anim. ut ibi: « Solus intellectus » est ab extrinseco. » Quandoque etiam intellectus nominat potentiam ejusdem substantiae: similiter mens quandoque est nomen potentiae, quandoque autem substantiae, ut ibi, « Renovamini spiritu mentis » vestrae, » Glossa « Spiritu, » qui est mens: ita nunc sumimus. Ex hac ergo substantia jubetur diligere Deum: quoniam, in quantum spiritus est, primo proprie diligere Deum potest. Haec enim divinae imago substantiae substantia est, aut substantiae divinae imago simplex invisibilis et incorruptibilis: et ideo valde nobilis, omne sensibile et omne corruptibile nobilitate et naturali bonitate transcendens, et ipsam solummodo summum bonum et simplex invisibile et immutabile complere et perficere potest. Hoc igitur ei solummodo propter se absolute amandum et desiderandum est. Aristoteles: Nam uniuscujusque desiderare quod melius est. Noli ergo, o homo, noli fieri sicut equus et mulus, quibus non est intellectus: et ideo involvuntur sensibilibus. Aristoteles: Non habenti intellectum omnino insatiabilis est appetitus delectabilis. Sed attende nobilitatem intellectualis substantiae, et contemne sensibilia, et intellectuali bono intende clamans cum Propheta ps. 15: « Benedicam Dominum qui tribuit » mihi intellectum. »

## CAPUT XXII.

*Quid sit diligere ex totis viribus.*

« Dilige Dominum Deum tuum ex omnibus » viribus tuis, » hoc quoad potentiam, quae intercedit ad actum immediate. Sunt autem tres virium differentiae in homine: scilicet rationabiles, sensibiles et vegetabiles: rationabiles sunt proprie hominis, hae dividuntur in intellectum et affectum, vel aliter in voluntatem et memoriam et intelligentiam: voluntas vel affectus summum est in anima et Deo simillimum, et proximum et immediatum: in hac enim libertas, quae cogi non potest, imperium super alias vires omnes habet. Haec subjectum caritatis est; et ideo hujus est diligere primo et per se.

Voluntate ergo Deum diligis dilectione concupiscentiae, cum ipsum vis. Isa. 26: « Anima mea desideravit te in nocte. » Haec est bona voluntas, immo optima quae vult summum bonum. Luc. 2: « In terra pax hominibus bonae voluntatis. » Pax eis, quia nemo diminuit quod volunt. Item dilectione amicitiae, cum voluntatem tuam suae conformas: quia amicorum est idem velle et nolle. Haec est recta voluntas. Marc. 5: « Quicumque fecerit voluntatem Patris mei qui in caelis est, ipse meus » frater, soror et mater est. » Voluntas et affectus idem sunt in re. Motus autem affectus affectio est: haec quadroplex est, scilicet spes vel concupiscentia, gaudium, timor, et dolor. Isterum autem omnium radix est amor. Igitur si diligis Dominum ex affectu dilectione concupiscentiae, primo concupisces et speras, ut habeas. Psal. 85: « Concupiscit et deficit anima mea in atria Domini. » Sed quantum concupisces, tantum secundo gaudes cum habueris. Joan. 5: « Amicus » autem sponsi qui stat et audit eum, gaudio gaudet etc. » Galat. 5: « Fructus spiritus, gaudium, pax. » Augustinus: « Quis bene gaudet, » qui bonum non diligit unde gaudet? quantum » gaudes, tantum tertio times amittere, et quarto » doles si amiseris. » Gregorius: « Nihil sine dolore amittitur, nisi quod sine amore possidetur. » Thren. 1: « Ideo ego plorans, et oculus meus etc. » De his Augustinus super Joan.: « affectiones nostrae » motus animarum sunt, cupiditas animi progressio, laetitia animi diffusio, tristitia animi contractio, timor animi fuga est. » Item dilectione amicitiae, si diligis Deum affectu, concupisces et vis et appetis ei bonum, scilicet gloriam et honorem et similia: et magis quam tibi, cum diligas eum plus quam te: Psal. 115: « Non nobis Domine, » non nobis etc. » Secundo quantum appetis, tantum gaudes: Philipp. 1: « Sive per veritatem Christus, sive per occasionem annuncietur, in hoc » gaudeo, sed et gaudebo. » Tertio quantum gaudes, tantum times. Quarto doles tantum si vadit in contrarium: hic est zelus. Ezech. 9: « Signa Tau » super frontes virorum gementium et dolentium ». Vis intellectiva dividitur in memoriam et intelligentiam, quae vis affectui et voluntati immediate deservit et supponitur: unde et actus ejus praecedat voluntatis actum, ut Joannes Christum, praecursor Dominum. In hac ergo et in omnibus inferioribus viribus est dilectio et caritas ut in signo, non ut in subjecto; et motus earum sunt caritatis imperativae, non electivae. Igitur penes intellectum est vis inquirens incognita, scilicet ingenium; intelligens inquisita, haec proprie intelligentia; sed vis qua conservamus intellecta haec est memoria. Sic igitur caritas fit in voluntate, et Deum diligis ex affectu, diligis et intellectu dilectione concupiscentiae, ut inquiras voluntati et affectui ingenio tuo illud summum bonum, quid sit, quomodo et per quae haberi possit; et si plura, per quae facilius. Facilius enim orando quam legendo. Boetius: « Quid nunc agendum censes, ut illius summi boni » sedem invenire mereamur? » Invocandum, inquit, omnium rerum Patrem, sine quo nullum rite fundatur principium. Item si amitti potest, quomodo conservari oportet? Psal. 55: « Inquirentes Dominum, » non minuentur omni bono. » Anselmus: « Excita nunc, anima mea, totum intellectum tuum, » et cogita quantum potes quale et quantum sit

« illud bonum. » Secundo ut inquisitum bonum intelligas. Tertio intellectum in memoria conserves, et voluntas inveniat cui affici velit. Psal. 144: « Memoriam abundantiae suavitatis tuae eructa-  
« bunt. » Item dilectione amicitiae dilige ex intellectu, ut amicum inquiras ingenio si absens est. Cantic. 5: « In lectulo meo per noctem quaesivi. » Augustinus: « Quae-rite quod petitis; sed ibi non  
« est ubi quaeritis; beatam vitam quaeritis in re-  
« gione mortis, non est illic. » Item ut inquisitum intelligas. Joan. 5: « Amicus sponsi stat, et au-  
« dit etc. » Quo contra Isai. 1: « Cognovit bos  
« possessorem suum, et asinus praesepe Domini  
« sui. » Psal. 141: « Considerabam ad dexteram,  
« et videbam etc. » Item intellectum in memoria reponas: Eecl. 57: « Ne obliviscaris amici tui in  
« animo tuo, nec immemor etc. » Vis sensibilis dividitur in apprehensivam et motivam: apprehen-  
siva duplex: exterior quae in quinque sensibus: interior, scilicet imaginatio, et sensus communis. Diliges ergo ex sensibili in actibus sensuum exte-  
riorum dupliciter: scilicet cohibendo visum, ne vi-  
deat non videnda, jubendo ut videat videnda: ex  
auditu similiter dupliciter, et ex odoratu, gustu, et  
tactu. Item in actu sensus interioris dupliciter: co-  
hibendo imaginationem ne imaginetur non imagi-  
nanda, et praecipiendo ut imaginetur imaginanda.  
Si vis scire quae sint sentienda, quae non, nota  
regulam. Sensus est propter intellectum, intellectus  
propter affectum, qui est caritatis subjectum, in-  
mediate se habens ad summum bonum et finem  
ultimum. Sicut igitur ordinatur potentia ad poten-  
tiam, sic actus ad actum, objectum ad objectum.  
Nihil ergo debet sensus recipere, quod per intelle-  
ctum receptum affectum ab objecto suo, scilicet  
summo bono, possit avertere. Gregorius: « Non  
« licet intueri quod non licet concupisci: » Job  
1: « Pepigi foedus cum oculis meis: » Aristoteles  
11 Metaph.: « Quaedam non videre melius est, quam  
« videre: » ea vero sensibus apprehendenda sunt, quae  
licite et utiliter imaginari possunt, et quae imagi-  
natio intellectui offeratur, intellectus affectui, ad  
actum amoris fortius eliciendum, et objectum  
suum citius adipiscendum. In hac via amor et  
caritatis praeceptum implet alia et affirmativa et  
negativa ad sensus pertinentia, ut est illud « Si  
« oculus tuus nequam scandalizat te », et similia. Mo-  
tiva similiter duplex: interior, et ista imperans: et  
exterior exequens motum. Diliges igitur ex motivo  
exteriori, ut ex amore moveas pedes per vim gres-  
sibilem ad ambulandum debite, ex eodem amore  
cohibeas ne moveantur indebite. Item manus simi-  
liter amor moveat et contineat: linguam etiam et  
universaliter membra corporis. Sic implet caritas  
praecepta pleraque decalogi et affirmativa et nega-  
tiva. « Honora patrem et matrem, Non occidas,  
« Non furtum facias, Non falsum testimonium di-  
« ces etc. » Dilige etiam ex motiva interiori ir-  
ascibili et concupiscibili, ut irascibilem amor man-  
suetudine temperet, ut dissimulet dissimulanda, ne  
irrationabiliter irascatur, quoniam caritas non irri-  
tatur. Humilitate premat, et timeat timenda, ne  
praesumptuose efferatur, quia caritas non inflatur,  
zelo inflammans animam: et confidentia corroboret,  
ut audeat audenda, ne terrore frangatur, quoniam  
caritas omnia sustinet, et audacem facit amor. Au-  
gustinus: « Fortitudo est amor facile tolerans om-  
« nia propter id quod amatur. » Diliges et ex con-

cupiscibili dupliciter: scilicet cohibendo ne concu-  
piscat quae impediunt, jubendo ut concupiscat quae  
nutriunt caritatem. 1 Corinth. 12: « Non simus  
« concupiscentes malorum: » Psal. 118: « Concu-  
« pivit anima mea desiderare justificationes tuas in  
« omni tempore. » Diliges et ex vi vegetabili, ut  
ex amore ordines nutritivam per abstinentiam, et  
generativam per continentiam: nutritivam quidem  
temperabis ministrans necessitatem, ne corpus de-  
ficiat amantis animae organum, au. putans volupta-  
tem, ne proterviat in Domini sui, scilicet spiritus,  
detrimentum. Eecl. 55: « Cibaria et virga et onus  
« asino: panis et disciplina et opus servo, » id est  
corpori proprio: ad Rom. 15: « Carnis curam ne  
« feceritis. » Generativa quae nunquam bona fide  
mansuescit, cognata libidinis, semper suspecta est  
habenda caritati, quam fere facilius est violenter  
restringere, quam imperanter domare; cui amor  
caritatis adhibet continentiam castitatis, quae con-  
jugium permittit infirmis, ut minus bonum: post  
conjugium viduitatem consulit, ut magnum bonum:  
firmis autem virginitatem consulit, ut majus bonum.  
1 Cor. 7: « Beatior autem erit si sic permanserit  
« secundum consilium meum. De virginibus prae-  
« ceptum Domini non habeo, consilium autem do,  
« tanquam misericordiam consecutus. »

## CAPUT XXIII.

*Diligendus est Deus ex tota virtute.*

« Diliges Dominum Deum tuum ex tota virtute  
« tua, » Matth. 22; et ibid.: Et « ex tota fortitu-  
« dine tua. » Nota: differunt vis et virtus: vis e-  
nim idem est quod potentia; sed secundum Philo-  
sophum, virtus est ultimum potentiae: unde equus  
habet vim eundi, virtutem currendi. Verum ipsa  
potentia vis gressibilis dicitur, quasi a gradiendo,  
non a currendo. Quaelibet igitur potentia habet  
ultimum, et ideo virtutem et fortitudinem: quae  
licet secundum rem idem sint, tamen distingui se-  
cundum rationem possunt; ut sit virtus ultimum  
potentiae ad agendum, et fortitudo ultimum po-  
tentiae ad sustinendum. Diliges ergo Dominum non  
tantum ex vi, sed etiam ex virtute, cum diligendo  
et laborando experiris summum potentiae: quod si  
in hoc summo et ultimo termino actum dilectionis  
semper continuas, tunc non tantum ex virtute,  
sed etiam ex tota virtute diligeres. Verum hoc vis  
non est nec esse potest. Igitur, ut vides, potentia  
secundum aliquid quod potest, etiam minimum, po-  
tentia est, vel vis: secundum autem summum vel  
maximum quod potest, virtus est. Inter vim et vir-  
tutem quantum proficias videris: quia etsi nec  
modum diligendi ex virtute in via contingat attingere,  
contingit tamen magis et magis propinquare,  
secundum quod in majoribus et pluribus actibus  
vires studueris exercere, ut proponas eum Propheta  
de futuro, dicens: « Omnia ossa mea dicent, Domine  
« quis similis tibi? » et moriturus glorieris cum Jacob  
de praeterito dicens: « Nosti quod totis viribus  
« meis servierim tibi. » Pone ergo te in terminis  
extensionem potentiae, ut DE MI FA SOL LA. Totum  
hoc extensum potentia vel vis est; solum LA vir-  
tus est. In hac spiritali musica potentiarum tua-  
rum actiones dijudica, et erubescet semper in gra-  
vibus et infimis Deo SOL FA RE cum videris multos  
in servitio diaboli etiam quasi voces mutare, qui



non tantum LA tenent ut faciant totum quod possunt, sed mutando ascendunt, et cum diaboli adiutorio faciunt quodammodo plusquam possunt. Jeremias: « Plus fecit quam potuit, propterea perii: » Isa. 48: « Superbia ejus et arrogantia ejus plusquam fortitudo ejus, eo quod non sit juxta eam virtus ejus. » O Simon, dormis, et Judas non dormit, sed festinat.

## CAPUT XXIV.

*Diligere ex tota fortitudine quid sit.*

« Diliges Dominum ex tota fortitudine tua. » Aristoteles: « Nullus magis sustinet terribilia quam fortis. » Augustinus: « Fortitudo est amor facile tolerans omnia propter id quod amatur. » Qui omnia dixit, nihil excepit. Quinque autem distinguit Aristoteles terribilia: scilicet malam opinionem, inopiam, aegritudinem, inimicitiam, mortem ultimum et maximum; et in hoc sustinendo proprie patet fortitudo. Diliges ergo Dominum Deum tuum fortiter, primo ut pro ipso sustineas inopiam rerum, si oportuerit. Cant. 8: « Si dederit homo omnem substantiam domus suae pro caritate, quasi nihil despiciet eam: » Matth. 5: « Inventa sapiens negotiator una pretiosa margarita, vendit omnia quae habuit, et emit eam. » Sic fortis ille omnia arbitrabatur ut stereora, ut Christum luerifaceret, Philipp. 5. Nondum fortiter, sed heu nimis debiliter diligit Deum, qui mavult peccando perdere Christum summum bonum, quam modicum corruptibilis substantiae necessario periturae. Item diliges Deum fortiter, studendo, si oportebit, malam opinionem et infamiam patienter sustinere cum illo qui dixit: « Mihi autem pro minimo est ut a vobis judicer aut ab humano die per infamiam et bonam famam. » Nisi sic fortis fueris, detractorem falso te fama privantem et de infamia maculantem, amare vix poteris; quem tamen nisi diligas, nanes in morte. Item diliges Deum fortiter sustinendo pro ipso, si oportet, inimicitiam et damnum favoris. Omnes in Deo habeas amicos generaliter, quosdam et specialiter; sed inter haec Deum diliges fortiter, ut pro nullius amicitia generali vel speciali acquirenda, ipsum offendas. Non sic fortiter dilexit Adam qui offendit Deum propter Evam. Augustinus: « Amicabili quadam benevolentia plerumque fit ut offendatur Deus, ne offendatur amicus; sed qui amat patrem aut matrem, filium aut filiam super me, non est me dignus. » Item diliges Dominum fortiter sustinendo pro ipso aegritudinem: hic jam agitur in personam. Vocatur autem aegritudo omne incommodum corporis citra mortem. Fortiter ursus mel diligit, a quo nec verberibus si immineant, nec spinis si interpositae sibi obviant, avelli poterit: sic Deum fortiter dilexerunt et diligunt, qui eum Apostolo dixerunt et dicunt: « Quis nos separabit a caritate Dei? Tribulatio, an angustia, an fames, an persecutio, an gladius etc. » Item ultimo Deum fortiter diliges, mortem pro ipso, si oportuerit, immo si locus fuerit, sustinendo: hoc est proprie ex fortitudine diligerere. Cant. 8: « Fortis est ut mors dilectio: » Joan. 15: « Majorem hac dilectionem nemo habet, ut animam suam ponat quis pro amicis suis. » « Certus sum, inquit ille, quod neque mors neque vita poterunt nos separare a caritate Dei. » De hoc Bernardus:

« Disce, christiane, a Christo quomodo diligas Christum; disce amare dulciter prudenter, et fortiter: dulciter ne illectus, prudenter ne deceptus, fortiter ne oppressus ab amore Christi avertaris. » Possumus ergo et debemus nunc in via diligere Dominum Deum nostrum ex corde et anima, ex mente et intellectu, quae comprehendunt totam compositam diligentis substantiam: et ex viribus, et ex virtute, et ex fortitudine, quae comprehendunt substantiae potentiam. Possumus quidem diligerere, sed ex parte; quae imperfectio essentialis est statui viae: sed totum et omne, quae secundum Aristotelem idem sunt quod perfectum est, possibilis et debita sunt patriae: nam cum venerit quod perfectum est, evacuabitur quod ex parte est. Propterea Augustinus dicit hoc praeceptum non impleri in via, sed in patria. Datum tamen est viatoribus ut suo modo impleant, et sciant quo tendere debeant; quia non recte curritur, si quo currendum est, nesciatur.

## CAPUT XXV.

*Quare in via nec Deum videre, nec plene in ipso possumus delectari.*

Intellectus in viatore non potest Deum, quamvis sit praesens, videre in essentia propter suam debilitatem, quae causatur ex tribus: scilicet conditione naturae: nam ordo est inter esse primum, scilicet naturae, et esse ultimum quod est esse gloriae, ubi et intercidit esse gratiae. Quia igitur creaturam rationalem creavit Deus talem, quae beatitudinem haberet ex meritis, non ex natura; cum in visione essentiae beatitudo consistat et fruitio, non potest ad hoc natura intellectus de se; et ideo per gratiam elevatur in via plus et plus, ut per gloriam consummatus plene videat in patria. In hoc communicat nobiscum intellectus angelicus in statu naturae, licet major sit sua naturalis cognitio quam nostra. Item ex unione ad corpus. Licet enim non sit alligatus organo per quod agat, tamen propter unionem permistus est quodammodo phantasiae. Aristoteles: « Dispositio intellectus qui est in anima, ad illud quod est in natura valde manifestum, similis est dispositioni oculorum vespertilionis ad lucem solis. » In hoc communicat nobiscum primus homo pro primo statu; tamen secundum quod nobilior erat corpus, cui erat unitus, eo minus impediatur intellectus. Sap. 9: « Corpus quod corrumpitur, aggravat animam, et deprimit terrena inhabitatio sensum multa cogitantem. » Item et tenebra culpae, quae quantulumcunque minima impedit, quia intellectum illi luci improporcionabilem reddit. Augustinus: « Summum bonum non nisi purgatissimis membris cernitur. » Igitur anima separata a corpore, vel reunita eidem incorruptibili et non impediendi, mundata ab omni tenebra, etiam veniali, elevata per gratiam potest Dominum videre per essentiam.

## CAPUT XXVI.

*De dilectione affectus circa Deum.*

Sicut Deus prima veritas est objectum intellectus et finis, et ideo quies ejus; sic Deus summum bonum est objectum et finis affectus et quies:



quod bonum eum sit praesens affectui, quia ubique, tamen affectus modo non delectatur usque ad quietem, sed parum. Causa hujus triplex. Imperfectio ex conditione naturae, ex qua est impropotionabilis per naturam, nisi elevetur super se, et perficiatur per gratiam creatam, scilicet caritatem, ut intellectus per fidem: et hoc est, quia creatus est quasi circa finem per meritum ascensus in finem. Item alligatio ad corpus animale, in quo anima movens secundum indigentiam ejus, et consequens in termino motus delectationem sensibilem, retrahitur et impeditur ne tota virtute moveat potentias superiores ad sua objecta, et ideo minus consequitur delectationem spiritualem. Gregorius: « Tanto quisque a superno amore disjungitur, quanto inferius delectatur. » Augustinus: « Cetera creatura vilesceat, ut creator in corde dulcescat. » Item infectio culpae, quae relinquit in affectu quasi contrariam qualitatem: quod patet sic. Corpus, quia animale, concupiscit praeter spiritum; sed quia infectum et vitiatum concupiscit adversus spiritum, ex primo est delectatio naturalis, quae elausa terminis suis non est mala nec illicita, sed necessaria et debita: ex secundo est delectatio innaturalis ex adeptione superflui et voluptatis, non tantum necessitatis: haec quandoque venialis, quandoque mortalis. Hinc palatus affectus inficitur, ne Deo delectabiliter pascatur. Augustinus: « Palato non sano poena est panis, qui sano est suavis. » Primum commune nobis et Angelis in primo statu: secundum nobis et Adae (1) in primo statu: tertium proprium huic statui, scilicet naturae lapsae. Primum impedimentum tollitur a caritate, secundum a morte; quia licet anima in resurrectione uniatur denuo corpori, non tamen animali. Tertium habet duo: scilicet substantiam culpae, et vestigia vel reliquias. Reliquiae expurgantur per poenam, substantia per caritatem vel gratiam. Sed substantiam delectationis mortalis tollit etiam caritas minima; venialis autem perfecta, et magis secundum quod magis perfecta. Est autem, secundum Philosophum, delectatio conjunctio convenientis cum convenienti; et ideo major delectatio tripliciter: vel quia magis conjungitur cum magis convenienti, vel propter utrumque. Est autem delectatio in Deo alia naturalis, alia gratuita: naturalis sequitur cognitionem naturalem, gratuita gratuitam. Intuenti patet ex his, quare delectatione naturali unus Angelus alio, Angelus homine, unus homo alio actualiter in Deo magis delectatur, et quare in Deo delectari possit creatura rationalis, et non irrationalis, cum tamen summum bonum essentialiter sit in utraque indissimiliter quoad se, licet dissimiliter participetur. Boetius: « Omne receptum est in recipiente per modum recipientis, non per modum recepti. » Aristoteles: « Primum uno modo se habet ad omnia, sed non omnia similiter se ad ipsum. » Ex his similiter patet conferenti, quare delectatione gratuita magis delectetur in Deo actualiter minimus comprehensor, quam maximus viator in quantum talis: magis actualiter imperfectus liber et sine venialibus, quam perfectus occupatus et contra habens venialia.

## CAPUT XXVII.

## De diversitate videntium Deum.

Deus lux est, et tenebrae in eo non sunt ullae. Sicut ergo lux corporalis per seipsam visibilis indissimiliter lucet ubique, quam tamen quaedam vident, quaedam non vident, diversitatis causa in ipsis existente, non in luce; similiter Deum non videntium, quinque sunt differentiae: non videt lapis et omne insensibile, cui tamen lux praesens est, item catulus ante diem nonum: item dormiens, vel aliter oculos clausos habens: item caecus: quinto talpa. In lapide non vidente nec aptitudo nec potentia, nec poena de non videndo. In catulo et talpa aptitudo, sed non potentia exquisita, expedita scilicet, nec poena, sed differenter absque potentia; quia catulo ad tempus, talpae semper. In dormiente aptitudo et potentia, sed non poena: in caeco aptitudo et poena, sed non potentia, scilicet expedita. Tob. 5: « Quale mihi gaudium est, qui in tenebris sedeo, et lumen caeli non video? » Lux enim oculorum laetificat animam. Sic Deum verum solem, primam lucem, ubique fulgentem indissimiliter quantum in se est, non videt creatura irrationalis, ut lapis: anima vel intellectus parvuli nascentis, ut catulus: sine baptismo morientis ut talpa: adulti peccatoris viatoris, ut dormiens expergiscibilis: damnati ut caecus. Videntium vero lucem alia vident ipsum in fonte, scilicet solem in sua sphaera, ut aquila; alia tantum in subiecta natura, scilicet aëre vel corpore resplendente. Similiter contingit videre Deum. Primum proprium est comprehensorum qui vident Deum facie ad faciem in sua essentia: secundum viatorum, qui vident per speculum et similitudinem. Videre autem corporale egreditur non a potentia visiva tantum, nec ab organo corporali tantum, sed a conjuncto: ab organo materialiter, a potentia formaliter. Melius igitur videre est tripliciter: vel propter melius organum, ut lincx quam homo, juvenis quam senex: vel propter meliorem potentiam simpliciter (1): sic melius homo quam brutum etiam lincx: vel propter utrumque. Similiter est de intelligere Deum. Nota igitur regulas. Ex aequalibus causis aequales effectus, ex inaequalibus inaequales. Regula in comparatione ad cognoscendum Deum. Praeeminentia in gratia est praeeminentia simpliciter, in natura secundum quid. Videre igitur Deum non est gratiae tantum, sed nec naturae tantum; sed naturae vel intellectus gratificati. In quibus duobus, scilicet natura et gratia, aequale, majus et minus faciunt multas differentias videntium: verbi gratia: Petrus comparatus ad alium, aut aequalis est in utroque, aut inaequalis in utroque, aut partim aequalis, partim inaequalis. Secundum membrum habet quatuor differentias: nam cui Petrus est inaequalis in utroque, aut est in utroque major, aut in utroque minor, aut major in naturalibus et minor in gratuitis, aut e converso, major in gratuitis et minor in naturalibus. Tertium similiter quatuor: nam cui Petrus est partim aequalis, partim inaequalis: aut est aequalis in naturalibus et major in gratuitis, aut aequalis in naturalibus et minor in gratuitis, aut aequalis in gratuitis et major in naturalibus, aut aequalis in gratuitis et minor in naturalibus. Et secundum hoc differunt visiones et viatorum et comprehensorum. Hoc patere potest aliquantulum in proportionem suppo-

(1) *Al.*, et adde.(1) *Al.* similiter.

sita. Sed nota, nobilitas intellectus alia essentialis a Creatore indita absolute, secundum quod unus Angelus excellit alium, et una anima aliam naturaliter: alia accidentalis: haec duplex. Una ex unione ad corpus nobilior, unde Aristoteles: « Anima « conjuncta corpori complexionem corporis imitatur. » Acutius enim quidam in vere, quidam in aestate, quidam in hyeme speculantur, secundum instrumenti complexionem. Aristoteles: « Fortes carne, « duri mente: molles autem carne, bene apti « mente. » Alia ex usu vel actu quo acquisita est ars vel habitus perficiens potentiam intellectus. Utraque accidentalis nobilitas viae est; et, sicut opinamur, evacuabitur in patria cum corpus glorificabitur, et acquisita scientia destruetur, et remanebit sola nobilitas prima per gratiam perfecta, et habitus gloriae de novo infusus in patria consummata. Nota: caritas aufert omne peccatum. Salomon: « U- « niversa delicta operit caritas: » 1 Petr. 4: « Ca- « ritas operit multitudinem peccatorum. » Vel confert omne meritum. « Si linguis hominum loquar « et Angelorum. » Hieronymus « Quilibet motus ejus « valet regnum caelorum. » Qui dederit calicem aquae frigidae etc. Facit participare omne bonum per compassionem et gratitudinem, vel est finis omnium praeceptorum. Finis praecepti est caritas de corde puro. Vel est summum donorum etc. Augustinus: « Nullum donum majus est caritate: « hoc solum est quod dividit inter filios regni et « filios perditionis. » Dantur et alia per Spiritum sanctum munera, sed sine caritate nihil possunt. Vel est effectus sacramenti sacramentorum: corpus enim suum dedit nobis in augmentum caritatis: vel denominatur a summo choro Angelorum, vel est activa in summum bonum.

## DE DECEM GRADIBUS AMORIS

### SECUNDUM BERNARDUM

Ut dicit Bernardus, « Magna res est amor, » sed sunt in eo gradus. Loquendo ergo aliquantum magis moraliter quam realiter, decem amoris gradus distinguere possumus, per quos contingit a statu viae ad statum patriae scandere ordinate, quos gradus cognoscere per actus. Primus, in quo facit languere utiliter. Secundus, in quo quaerere incessanter. Tertius, in quo operari indesinenter. Quartus, in quo sustinere infatigabiliter. Quintus, in quo appetere impatienter. Sextus, in quo currere velociter. Septimus, in quo audere vehementer. Octavus, in quo stringere inamissibiliter. Nonus, in quo ardere suaviter. Decimus, in quo assimilari totaliter.

#### *Primus gradus.*

Est igitur primus gradus, in quo caritas facit languere utiliter. Cant. 5: « Nunciate dilecto, quia amore « languco. » Super hunc gradum anima pedem affectus ponit, cum primo amare Deum incipiens, a peccato languescit. Verum infirmitas haec non est ad mortem, nisi forte ad mortem mortis, scilicet peccati mortalis. O infirmitas, Glossa « non periculosa. »

Libenter ergo cum Apostolo gloriabor in infirmitatibus meis. Nimirum utilis infirmitas haec multipliciter. Primo quia animae aufert gressum ad illicita. Secundo mutat situm, ut jaceat prona per humilitatem, quae stabat erecta per elationem. Tertio mutat gustum, ut amarescat animae peccatum quod ante libuit, sapiat aliquantulum summum bonum quod ante non sapuit. Item mutat pulsum in brachio operis, cujus causa est spiritualis mutatio cordis. Cantic. 8: « Pone me ut signaculum super brachium tuum. » Igitur per brachium de corde datur judicium. Item mutat vultum. Poeta: « Paleat omnis aetans; color hic est aptus amanti. » Illic utique mutatio dexteræ Excelsi, omnis naturae creatae virtutem excellens, et ad illum solum pertinens, qui pluviam voluntariam gratiae segregabit hereditati suae ut infirmetur, et ipse perficiet eam, quoniam virtus in infirmitate perficitur.

#### *Secundus gradus.*

Secundus gradus est, in quo facit quaerere incessanter. Gregorius: « Vis amoris intentionem multiplicat inquisitionis. » Super hunc gradum pedem animam ponit, cum per infirmitatem prius mutata; Deum quem quaesivit aliquantulum in lecto aegritudinis, convalescens ad bonum frequenti et diligenti discursu rationis inquit dicens: « In lectulo meo per « noctes quaesivi quem diligit anima mea »: quaesivi infirma infirmiter; « surgam et circumibo civitatem » totam creaturae universitatem; « per vias et plateas « quaeram quem diligit anima mea ». Ps. 140: « Quae- « rite faciem ejus semper »: semper quaerite, sed non invenietis ubique. Augustinus: « Quaerite quod « quaeritis, sed ibi non invenietis ubi quaeritis: « beatam vitam quaeritis in regione mortis, non « est illic: quomodo enim beata, ubi nec vita? » O anima mea, si sapienter, et cum hoc diligenter quaereres, hoc tribus signis ostenderes. Primo quia lumen peteres, ne tenebris impedireris. Ps. 66: « Deus misereatur nostri, et benedicat no- « bis: illuminet vultum suum super nos, et misereatur nostri, ut cognoscamus in terra viam suam. » Secundo scientes interrogares, ut ad inveniendum expedireris. Matth. 2: « Ubi est qui natus est Rex « Judaeorum? » Cantic. 5: « Invenerunt me vigiles, « num quem diligit anima mea vidistis? » Tertio in nullo quod a requisito aliud est, sisteres; sed sine mora transiens ad aliud oculos projiceres, donec tandem quaesitum invenires; ut illa quae inclinavit se, et videns in monumento dilecti sui etiam Angelos, nec alloquitur ipsos, nec diu intuetur; sed respondens interrogantibus breviter ab ipsis se avertit. Et sequitur: « Et conversa Ma- « ria vidit Jesum stantem. » Cant. 5: « Paululum cum pertransissem eos, inveni quem diligit « anima mea. »

#### *Tertius gradus.*

Tertius gradus est, in quo amor facit operari indesinenter. Gregorius: « Nunquam est amor Dei « otiosus: operator enim magna, si est; si autem « operari renuit, amor non est. Nimirum probatio « dilectionis exhibitio est operis ». « Beatus vir, inquit « Propheta, qui timet Deum, in mandatis ejus cupit nimis, » Psal. 111. Si vult nimis qui timet, quantum volet in mandatis qui amat? Dilectio enim

primogenita est filia gratiae, et ideo prior et potior timore. « Ego, inquit, mater pulebrae dilectionis, » et deinde « timoris ». Timor ergo amorem sequitur, ut posterior dignitate priorem. Et tamen qui timet, cupit nimis in mandatis opere implendis. Amor ergo amplius volet et amplius faciet. Nec primus quidem gradus sine opere est penitus; sed valde dissimilis huic. Super hunc enim gradum anima proprie pedem ponit tripliciter, cum operatur magna et reputat parva; operatur multa et reputat pauca; operatur diu et reputat breve: et videntur ei pauci dies prae amoris magnitudine. Bernardus: « Labor meus vix est unius horae; et si plus est, » « non sentio prae amore. » Nec mirum si amor multa opera pauca reputet, cum in mandatis etsi multa faciat, plura tamen cupiat, quoniam in mandatis ejus cupit nimis. Si punctus ad omnia haberet concupiscentiam ad quae habet potentiam, non reputaret multas de se fluentes centum vel mille lineas, cum habeat potentiam ad infinitas. Ceterum amor violentior est quam potentior. Nec mirum si non reputet amor opus magnum: non amanti enim aliquid magnum est, amanti nihil. Seneca: « Cogitare praeter animum principaliter » « nihil est mirabile, cui magno nihil est magnum. » Magnus autem est qui magnum amorem habet. Bernardus: « Qui magnam habet caritatem, magnus » « est; qui modicam, modicus est; qui nullam, nullus est. » Augustinus: « Nihil majus est animo habente caritatem, praeter eum qui dedit caritatem. » Nec mirum si non reputet se amor diu servisse, etiam multo elapso tempore, cum hoc appetat semper et sine fine facere; nam in comparisonem aevi omne tempus est sicut ad lineam punctus. Ubi nunc sunt qui in hoc tertio gradu pedem ponunt, qui non in hoc tertio gradu deficient? Pauca tamen est caritas, quae opera sua numerat ut multa: parva, quae ponderat ut magna vel difficilia: brevis amor qui mensurat ut longa. Sed vos qui tertium gradum calcatis, cum omnia bene feceritis, dicite, « servi » « inutiles sumus ». « Desidiam quippe, » ut dicit Gregorius, « facit in opere bono minor amor Dei, » « fraudem minus amor sui. Sed etsi non sit » « desidia in operando, caveatur superbia in reputando. »

#### Quartus gradus.

Quartus gradus est, in quo amor facit sustinere infatigabiliter. Augustinus: « Omnia gravia et immania, facilia et prope nulla facit amor. » Glossa super illud Joan. 21: « Duce te quo tu non vis »: « quantaecumque sit molestia mortis, vincit eam vis » « amoris. » Mors, secundum Aristotelem, ultimum est et maximum inter terribilia et sustinenda. Igitur si vincit amor mortem, et infatigabiliter sustinet, quanto magis ea quae circa mortem? Verum hic gradus elevatus valde et praedietis satis altior; et ideo ascensio rarior. Nam et ille praecipuus amator quia omnia reliquerat bene respondens, claviger deputatus fuerat, in montem ascenderat, in hoc gradu stare se credidit. « Paratus sum, inquit, tecum » « in carcerem et in mortem ire »: sed eadem nocte patuit, quod nondum in eo pedem posuerit. Probatio quidem dilectionis exhibitio est operis; sed validior probatio sustententia tribulationis. In hoc gradu existentis Dominus specialiter semper meminit. Jer. 2: « Recordatus sum tui, miserans adolescentiam

» tuam et caritatem desponsationis tuae, quando » « secuta es me in deserto. » Meminit inquam, et visitat hic amicum. Psal. 90: « Cum ipso sum in tribulatione. » Utique gradus ille utilis est et necessarius, quia secundum Aristotelem difficile facili magis eligendum: magis enim amamus, cum habemus quod non est facile sumere.

#### Quintus gradus.

Quintus gradus amoris est, in quo facit appetere impatienter. Hieronymus: « Hoc habet impatiens » « amor, ut quod desiderat, semper invenire se » « credat. » Amor impatiens non accipit ex difficultate remedium, neque ex impossibilitate solatium. Amor impatiens, quod amat, non potest videre. Nimirum enim ubi amor, ibi oculus. Sicut in naturalibus appetitus vehementiam causat inanitio et praegustatio. Stomachus enim sentiens se exinanitum appetit: quod si esca vel videri vel odorari contingat, appetitus crescit. Aristoteles: « Videbit quis » « aliquos, quando famescunt, laetari odore ciborum » « quod si cibus appetibilis fuerit aliquantulum praegustatus, irritatur appetitus amplius. » Sic anima exinanita a bono sensibili et mutabili, et praegustans aliquantulum bonum immutabile, pedem cum impetu elevans de quarto gradu quintum cogitur etiam impatienter appetere, secundum illud Ecel. 24: « Qui edunt me, adhuc esurient. » Imo hic non tantum esurit, sed et holismum patitur summi boni; hiat et inhiat, concupiscit et deficit. Ps. 85: « Concupiscit et deficit anima mea in atria » « Domini. » Accipe Rahelem impatientis desiderii exemplar. Da mihi, inquit, liberos, alioquin morior. Prae impatientia flentes vidi, morientes vidisse me non memini. Quid vita carius, quid molestius morte? Nonne ergo impatienter desiderat, qui minatur etiam vitam abjicere, si desiderium non obtineat, malens non esse quam sine eo quod appetit esse, et se, quam illo carere? Sed vide, anima mea, mori vult illa, nisi detur quod quando datum fuerit morietur. Mortua est enim in partu Benjamin. Cum quanta ergo impatientia et vehementia ibi est appetendum, quo dato non morieris, sed vives in aeternum? Dicat ergo laudabiliter in hoc gradu impatiens anima: summum bonum, melius es tu mihi, quam decem filii. Da ergo te mihi, alioquin moriar.

#### Sextus gradus.

In sexto gradu facit currere velociter. Bernardus: « Qui amat ardentius, corrit velocius, et apprehendit citius. » Nam quia in quinto gradu famem patiuntur ut canes, restat ut sextum ascendant et circummeant civitatem; totum scilicet universum: nec tantum circummeant, sed circumcurrant, ut in creaturis moram non faciant, sed post creatorem discurrant. Ad hunc gradum pertinet illud Psal. 190: « Quemadmodum desiderat cervus ad fontes aquarum, ita desiderat anima mea etc. » Velox est cervus, piger asinus. Desideret ergo ut asinus, ille, de quo in Prov. 22: « Desideria occidunt perigrum ». Desiderat ut cervus ille qui dicit: « Curri in siti; » sed quomodo ecurristi? respondit, « sine iniquitate ecurri et direxi. » Directus autem est cursus a summo deorsum, vel ab imo sursum. « Exultavit » enim quidem « ad currendam » « viam, a summo caeli egressio ejus et occursum



« ejus. » Igitur si desiderabis ut cervus ad fontes aquarum, si in hoc desiderio quasi in siti cucurreris, et direxeris (1) a summo usque deorsum quinque in genere invenies differentias substantiarum, quasi quinque fontes aquarum: scilicet corpus quintum, quod quinta essentia a Philosophis dicitur, sub qua elementum ignis, sub quo aer, sub quo aqua, sub qua terra. Primus fons limpidissimus, ultimus turbidissimus: hos si transeurreris velociter, et rursus (2) currens direxeris ab imo sursum, invenies alia quinque genera substantiarum, velut quinque fontes aquarum: primo mistum, secundo vegetabile, tertio sensibile, quarto rationale, quinto substantiam separatam, scilicet intelligentiam vel Angelum. Primus turbidissimus, ultimus limpidissimus; si in hoc gradu fueris, nusquam cum mora bibes, sed subito gustu quodammodo probans et experiens, quia summum bonum non sunt, et ideo siti tuae non sufficiunt, transibis et dices: « Sitivit anima mea ad Deum » fontem vivum. »

#### *Primus fons.*

Primus fons a summo bono deorsum directe currenti occurrens est corpus quintum in quatuor caelos distinctum: scilicet empyreum, crystallinum, sidereum et caelum planetarum. Igitur, ut dicit Aristoteles, Substantia materiae cum forma causa est omnium actuum et passionum. Fons igitur dicitur metaphoricè omnis substantia, cum de ipsa fluunt accidentia, ut de causa effectus, de fonte rivus. Ad primi igitur fontis superficiem philosophi venerunt, secundum non invenerunt, quia crystallinum et empyreum ignoraverunt. De ipso tamen quod invenerunt, biberunt; de rivulis accidentium ex substantiae fonte fluentium diversas scientias intellectui potabiles hauserunt. Et de unico rivulo motus hujus substantiae et partium ejus bibit Ptolomaeus Astronomiam hauriens mathematicae. Aristoteles scientiam libri de caelo et mundo hauriens physicae. Verum quia omnia disposita sunt in numero, pondere et mensura, Euclides in substantia et ista et alia considerans, quantitatem continuam mensurae abstraxit mathematicae, et hausit scientiam geometricae. Alius autem ad rivulum discretæ quantitatis intellectum posuit, et de rerum numero Arithmeticam bibit. Alius, Gerosius scilicet, proportionem levitatis et gravitatis et harmoniam proportionalis substantiae distrahere didicit, et musicam bibit de pondere. Biberunt omnes hi de multis aliqua; et consopiti sunt, satiati non sunt. Impossibile enim est humano intellectui per scientiam creaturae satisfieri. Verum tamen et parum est quod biberunt respectu ejus quod dimiserunt; quia nec Geometer dimensus est caeli altitudinem, nec Arithmeticus dinumeravit stellarum multitudinem. Ceterum de crystallino non gustaverunt, cum et ipsum sidereo contiguum in substantia sit, et ideo sine virtute et operatione non sit, et aliis accidentibus scibilibus, et ideo intellectui potabilibus. Prorsus autem indigni fuerunt attingere fontis fundum limpidissimum, scilicet empyreum a faece materiae inter omnia corpora depuratissimum, quod sit tamen positione ultimum, et ideo locans non locatum. Nam primum nobilitate summum sine emanationibus non est, sed effluit virtute sua etiam usque ad intimum terrae centri

(1) *Al.* et dixeris.

(2) *Al.* et cursum.

punctum. Aristoteles: « Omnis causa primaria plus est influens super causatum, quam causa secundaria universalis. » Ceterum totum hoc finitum est, quia creatum est, et ideo intellectui sufficere non potest, quia solo Deo infinito ente perfici natus est: ex quo concludo, quod si totus fons iste cum omnibus suis rivulis totaliter in fauces animae Deum sitientis flueret, sitim ejus nec ad modum guttae extingueret. Stare ergo ibi non potest, sed ulterius currit in siti. Sed ex quo hic remedium sitis non invenit, currit deorsum et dirigit, et ad alium fontem venit.

Secundus fons huic contiguus, et ab ipso influentiam virtutis reaccipiens, nec tantum proprios, sed et primi fontis rivulos super inferiores fontes influens, est substantia ignis cum accidentibus ab ipsa derivatis; valde quidem nobilis, sed valde inferior primo ut positione, sic et substantiali nobilitate, quantitate, et virtute, et breviter omnibus accidentium rivulis valde dissimilis. Nihilominus tamen etiam de hoc fonte naturales philosophi gustaverunt, qui naturalia ignis accidentia ex substantia manantia aliqua aliquid per ceperunt, et sitim inquisitionis quodammodo etiam calore ignis refrigererunt, et quod biberant digerentes, aliqua de igne scripserunt, quod calidus, splendidus et levis, et sursum mobilis, inter elementa subtilissimus, ut activissimus, quia virtuosissimus loco et nobilitate supremus: aliqui sitibundi non contenti venis accidentium investigantes caput et principium venarum, ex partibus essentialibus, scilicet materia et forma, ipsum componi intellectu viderunt: alii in partes quantitativas ipsam fontis substantiam dividentes, hoc caelum in ipso igneum et olympium distinxerunt. Sed et quidam non tantum biberunt, quinimo et in fonte isto submersi sunt, qui ignem pro Deo coluerunt, sicut in primo fonte quidam qui solem et lunam vel gyrum stellarum rectores terrarum Deos putaverunt. Venit ergo etiam ad hunc fontem in directo cursu suo anima, sitiens respicit, sed respuit; non sitit talia, et ideo non moratur, sed cogente siti ad alia currit, sed directe currit, et ideo ad tertium fontem venit.

Tertius fons secundo contiguus, sed inferior ipso et in se et in rivis est elementum aeris cum suorum accidentium rivulis, qui quanto nobis vicinior, tanto ad hauriendum facilius. Ceterum fons iste non tam nobilis quam necessarius et utilis, nimirum est substantia, sine qua vivere non possunt animalia: haec est enim quae introcedit ad habendum vitalem flatum, cedit ad incessum, introcedit ad sensum, circumcedit ad locum. Et cum fons de eodem foramine aquas contrarias non solet emanare, mirabiliter in hoc fonte secundum diversam necessitatem bibentium diversificantur rivuli accidentium: nam cum sit semper naturaliter calidus, fit quandoque actualiter nunc calidus, nunc frigidus, ut aestatem et hyemem habeamus. Et eodem tempore simul, sed in diversis partibus suis hic calidus hic frigidus fit, quandoque tenebrosus, quandoque luminosus, ut diem et noctem habeamus: ut utroque tempore nunc subtilior, et ideo clarior et effective laetior; nunc grossior et obscurior, et ideo tristior: fit quandoque quietus et tranquillus, quandoque concitus et tempestuosus, ut impressiones in ipso generabiles, nives scilicet et imbres, quandoque habeamus, quandoque careamus. Dudum ad hunc fontem Aristoteles os aperiebat, ut potaret



antequam secundum et tertium librum meteororum ebiberet. Sed illi in fonte hoc de quantitatis rivulo gustaverunt, qui caelum aëreum et caelum aethereum distinxerunt. Sunt multa valde alia in hoc fonte, quae intellectus bibit post inquisitionem inveniēdo, et corpus realiter utens imbibit naturaliter delectando; sed et quandoque inebriatur eum in his libidine delectatur. Ad hunc ergo fontem in cursu suo veniens anima sitiens, corpori quidem suo velut equo indulget potum necessarium, sed dedignatur ut Jacob cum equo bibere, et ideo festinat transeurrere, cum siliat fontem vivum.

Quartus fons, a quo et omnes alii metaphorice mutuunt nomen fontis, est substantia aquae quae contiguatur aeri superius et terrae inferius, ejus naturam et nobilitatem in accidentibus manifestat locus ejus; et ita ex his duabus ripis cognoscitur fontis fluxus, de ejus rivulis naturalibus bibit realiter animale corpus utendo: sed de accidentibus a substantia manantibus bibit figuraliter intellectus, post sitim investigationis in cognitione delectando. De quo aliquantulum Aristoteles hiberat, cui, sicut patet in 2 Meteororum, maris et fluminum fluxus influxerat. Sitivit etiam hujus fontis rivulos, qui investigaverat quomodo fit aqua diaphana per naturam in proprio loco sphaerica, per figuram fluxibilis, et ideo omnium liquabilium primordiale principium, male terminabilis proprio termino, bene alieno, habilis ad recipiendum impressiones magis quam ad retinendum, secundum qualitates primas frigida et humida, et ideo proprium appetibile sitis. Est enim sitis, ut ipse definit, appetitus frigidi et humidi. Item quod ignis extinctiva, sordium purgativa, vegetabilium irrigativa, natatiliū proprie contentiva. Qui nimirum fons plus aliis fontibus ripas suas transiens, venas terrae penetrat ut subtilior et virtuosior, non ut gravior; et per virtutem corporis quinti tractus sursum aliam ripam violenter transit, aerem intrans ut fortior, non ut levior, ibidem vel in naturam fontis illius mutatus aer efficitur, vel peregrinationis suae signa referens in forma nivis vel grandinis, vel alterius impressionis, ad propria revertitur. Bibant haec qui non sitiunt alia; sed transcurrat haec et similia Deum fontem vivum sitiens anima.

Sequitur hunc fontem quintus et loco et natura ultimus omnium fontium turbulentissimus: hoc est elementum terrae quod secundum Aristotelem, minimum habet de specie, et plurimum de materia; et ideo faex elementorum omnium reputatur. Sine rivis tamen hic fons non est; quia substantia creata sine accidentibus nulla est. De quibus rivulis Aristoteles aliquid gustare curavit, eum in libro Meteororum terraemotum investigavit. Verum multi quasi substantiam fontis quantumcumque faeculentam (1) glutire conantur, qui terrenam non tantum intellectu gustantes, sed et toto affectu haurientes bibant, nec satiantur, sed ad ultimum suffocantur. Absit, absit ab anima has faeces non dico gustare, sed vel respicere, quae fontem vivum coepit, Deum scilicet, tanto cursu inquirere.

His decursis, quia fontem vivum anima non invenit, os patulum desiderii fauces affectus nusquam apponit. Nimirum ergo dilatione potus, et ex vehementia cursus sitis creseit, sed et ex siti cursus intenditur natura, quo amplius sitit, vehementer

tius currere incipit. Non stat ergo anima, sed continuat cursum, et ab imo dirigit sursum; cui ascendenti primum occurrit fons primus nobilis valde, scilicet substantia misti, in quo fluunt omnes fontes praedicti, elementa quatuor secundum substantiam, quinta essentia secundum virtutem: quoniam elementa cum sint contraria in misto, non foederarentur nisi per naturam lucis conciliarentur. Hic fons quamvis unus genere, multis tamen constat ex partibus, quae partes sunt aurum, argentum et omnia mineralia, et generaliter singula mista; quis autem investigabit omnia? Quod si propter infinitatem non contingit etiam dudum haurientes exhaurire species mistorum, quanto minus rivulos accidentium, cum multa valde et pene innumera sint accidentia singulorum? Nihilominus tamen ad hunc fontem potandum, sed non epotandum, tres celebres potatores accedunt, physicus, mechanicus et avarus. Bibit ergo de purissimo physicus naturalis, qui intellectu speculando considerans haurit misti praecedentem causam et subsequenter naturam: sic Aristoteles qui propinavit quod bibit in quarto Meteororum determinans naturam corporum mineralium. Propinaverunt et alii scribentes de virtutibus gemmarum, quomodo lapis alius ferrum trahit, alius sanguinem stringit. Verum infiniti rivuli transierunt, de quibus nunquam gustaverunt. Bibit post hunc de puro quidem, sed non tam puro, artifex manualis, qui intellectu practico hauriens et manum adhibens, de materia naturali formam extrahit artificialem, nunc deponendo, ut in figura incisionis et caelaturis, nunc apponendo, ut in picturis, nunc componendo, ut aurum cum gemma, ut compleatur annuli forma; nunc alterando accidentia remanente substantia, ut cum variat figuram et facit scyphum de massa argenti: nunc etiam, quod plus est, ipsam resolvendo, et mutando substantiam, ut faciat ex alia aliam: non aliam naturalem, quod est impossibile, quamvis praesumpserit hoc ars alchimiae; sed aliam artificialem, ut vitrum ex cinere, panem ex aqua et farina. Bernardus: « Verum mechanicus potatores res bibunt in ordine, alius prius, alius post: « prius enim ars molendinaria granum conterens « farinam facit, post ars pistoria panem de farina: « unus bibens ante lapidem de minera extrahit, et « solutum calore artificialiter in aes vertit, alius haurit « post, et arte sua aes in varia vasa convertit, alius « arte miranda de cinere vitrum efficit, alius fenestram, quam amplius mireris, de vitro conficit. » Et cum propter necessitatem hominis ars tota mechanica sit inventa, posterior artifex semper fini propinquior, et ideo melior. Multi autem horum praeter indigentiam necessitatis etiam curiositatis sitim patientes, bibunt et rebibunt quotidie, novas formas artificiales ex naturalibus materiis hauriunt, sed semper latent infinitae. Et quoniam, ut dicit Aristoteles, impossibile est infinita pertransire, necesse est ante potatores quam potum deficere: qui cum sitiunt nova semper inquirere, testantur se inventionem bibitis satiatos non esse. Bibet post haec de grossissimo, et ideo turpissimo, possessor temporalis, qui non intellectu, sed corrupto affectu per avaritiam sitivit mistorum substantiam, aurum scilicet et argentum et alia, ideo inquirens hausit ut biberet, sed hydropicus factus ex nimio potu aquae, bibens amplius sit, quia quo plus habet, plus concupiscit. Unde crescit amor nummi etc. Sitit miser iste mistorum corpora, secundum quod sunt naturaliter,

(1) *Al. facultatem.*

et aurum et aurea, et argentum et argentea, utpote  
eius sitis major, et ideo insatiabilior: quoniam  
cum non possit adipisci solus et ebibere omnia  
multis aequae sitientibus et secum bibentibus, cre-  
pabit miser ante et morietur quam satietur. Qua-  
propter sapiens est anima quae hunc fontem in  
cursu sitis suae respicit quidem, sed despicit, quo-  
niam alium incomparabilem concupiscit, « Omnia »  
inquiens « detrimentum feci et arbitror ut stercora  
« ut Christum lucrifaciam, » et fontem vivum tan-  
dem bibam.

*Fons secundus (1).*

Sequitur fons in ascensu secundus primo con-  
tiguus, scilicet substantia vegetabilis, fons nimirum  
mirabilis, qui primum includat in se, sicut ternarius  
binarium, quadrangulus triangulum. Primi igitur  
fontis naturam secundus sorbet, nomen absorbet,  
et gloriatur nemine proprio, quod sibi non  
dat incorporea substantia, quae in ipso mirabiliter  
unita commisto per naturam lucis melius temperato,  
sibi dat essentiam propriam et vegetabilem vitam;  
ex qua primo et per se duo celebres potentiarum  
rivuli derivantur, scilicet nutritiva qua se conservet,  
generativa qua simile generet. Gen. 1:  
« Germinet terra herbam virentem cujus semen etc. »  
Sed et hic fons etiam praeter rivulos accidentium  
et naturalium proprietatum a substantia manantium  
late diffunditur per venas differentiarum in capite  
innumerabilium specierum; quoniam substantia  
vegetabilis una genere generali in multa dividitur  
genera subalterna. Uterius subdividitur in species  
specialissimas plures, et pene innumeras: amplius  
vero in individua, individua sine numero. Aristoteles  
in Elench.: « Sunt autem nomina finita, rerum  
« vero multitudo infinita »: et quoniam impossibile est  
infinita pertransire, impossibile est et hunc fontem  
ebibere. Igitur anima non discurrans post haec in-  
finita deorsum, sed ad caput fontis cursum dirigens  
sursum, ut subito transire possit, miratur tamen  
praedictos tres praecedentis fontis potatores etiam  
hujus fontis venas et rivos cum maligno appetitu  
bibentes. Bibit enim primo philosophus naturalis de  
limpidissimo causas hujus substantiae, differentias  
aliquas essentiae et naturas, hic physicus pura  
speculatione contentus. Sic Aristoteles bibit, et ut  
naturalis librum de plantis aliis propinavit. Bibit  
ex eadem vena in parte aliter medicus qui specu-  
lationem intendit ad opus: sic Macer inter vires her-  
barum de quibus aliquid biberat, etiam aliis scriben-  
da propinat. Sed et Galenus et Hippocrates multas  
propinaverunt vegetabilium naturas his qui non  
habuerunt per se in quo haurirent de ipso puteo  
naturae. Qui nimirum pincernae, quandoque de  
potu non sufficienter judicantes, falsum pro vero  
aestimaverunt: et sicut ipsi biberant, sic in vasis  
librorum suorum aliis naserunt. Bibunt post hos  
artifices mechanici prorsus ex eodem foramine, quia  
non de limpidissimo, ut Philosophi, nec de grossis-  
simo ut cupidi, sed de medio bibere sunt consueti.  
Eodem etiam modo, quia deponendo, apponendo,  
componendo facit de lignis lignea, sicut potator  
mechanicus primi fontis de lapidibus lapidea. Eo-  
dem etiam modo, quia nunc substantiam mutando  
ut in materia transeunte, nunc tantum accidentia

(1) Al. fons tertius.

alterando, ut in materia permanente. Eodem etiam  
ordine: quia unus bibit ante qui de lino fila facit,  
alius post qui de filis pannum textit, tertius adhuc  
posterior, qui de pannis vestem componit. Bibit  
tertio cupidus ex eodem foramine eodem modo,  
cum eadem sitis ariditate, eadem insatiabilitate, ea-  
dem ebibendi impossibilitate qua prius. Nimirum  
autem ad augmentum sitis multum facit etiam ipsa  
delectabilitas, fontis amoenitas, substantiae vegeta-  
bilis, mirabilis diversitas, et diversa utilitas, vir-  
tutum naturalium diversitas et delectabilis specio-  
sitas, colorum mirabilis diversitas, et allectiva sua-  
vitas odorum in radicibus, in floribus, in fructibus.  
Ideoque vidit mulier lignum, quod esset pulchrum  
visu et ad vescendum suave, et vidit et concupivit  
et dedit viro, et ipse comedit. Heu si sic ad fon-  
tem istum se jam natura curvavit (1) non infecta, et  
recta, quid faciet curva et infecta? nimirum ut a-  
estimo, bibens bibit. Mirabile igitur in his quod  
natura dedit, mirabile et quod ars addidit; ars, in-  
quam, non tantum per industriam deserviens ne-  
cessitati, sed per curiositatem superfluum blandiens  
voluptati, sed et idola fingens miserrimae caecitati.  
Quid ergo mirum si illiciant hic et retinent ani-  
mam vivi fontis ignaram? Praesertim sistit et im-  
pedit et ad bibendum inclinat carnalitas, nisi eri-  
gatur et ad transeurrendum expediat illuminata  
caritas.

*Fons tertius.*

Sequitur continue fons tertius includens praecedentem,  
ut figura figuram, numerusque posterior prio-  
rem, substantia sensibilis: a qua praeter nutritivam  
et generativam sibi cum vegetabili communes, sed  
in ipsa nobiliores, gemini rivi proprii derivantur,  
scilicet potentia apprehensiva et motiva. Igitur fons  
ille unus in ortu, multiplex in fluxu: et cum sub-  
stantia sit causa sive subjectum sive fons acciden-  
tium, fundus abundantia accidentium fit fons iste  
profundus generum et specierum et individuum,  
latitudine ripas numeri transiens, et continuac ge-  
nerationis latitudine usque ad mundi terminum se  
extendens. Dividitur tamen in quatuor principalia  
capita fons iste sensibilis substantiae; scilicet in re-  
ptilia, gressibilia, natatilia, volatilia. Fons iste quanto  
nobilior, tanto potatoribus desiderabilior. Accedunt  
ergo sitibundi tres potatores praedicti etiam hunc  
experiri, quasi ab aliis nec dum satiati. Excipiuntur  
a fonte, excipiunt sub trina foraminum distinctione:  
de quorum summo haurit philosophus: quorum  
unus, Aristoteles scilicet, fontis hujus gustans dul-  
cedinem, diutius immoratur quam in aliis fontibus;  
sed plus hausit et amplius propinavit, scribens li-  
brum magnum de Animalibus, alium de Sensu et  
Sensato, alium de Somno et Vigilia, alium de Morte  
et Vita. Cum autem secundo Ambrosium « Omnis  
« mora longa sit desiderio, » morosum esset ani-  
mae fontem vivum desideranti, de omnibus his non  
dico inebriari bibendo, sed vel haec experiri gu-  
stando. Bibant ea qui nesciant dulciora. Ex eodem  
quidem foramine, sed inferius, cum physico me-  
dico, considerans sensibilia secundum convenientiam  
et disconvenientiam ipsorum ad usum ratio-  
nalem, bibit in theorica, propinavit in practica.  
Bibunt ex secundo foramine artifices mechanici,

(1) Al. curavit.

modum et ordinem et gradum habentes: modum in componendo, apponendo, deponendo, mutando et alterando: ordinem secundum prius et posterius, secundum naturam graduum, secundum sub et supra, quantum ad dignitatem: nam alii biberunt artem sensibilia pascendi, alii capiendi, alii occidendi, alii ad esum praeparandi. Quibus alii in ordine succedunt; et partim animalis partes singuli singulas rapiunt; et quod biberunt in theoria, propinant in practica; operanturque alii de pilis, alii de pellibus, alii de cornibus, alii de ossibus, alii de aliis partibus. Quorum omnium Reipublicae quidam propinant necessaria, quidam vero utilia, etsi non usquequaque necessaria: quidam pro parte utilia, sed pro majori parte superflua: quidam vero penitus superstitiosa facientes et vana, ut talos, et consimilia. Ad foramen ultimum ultimus ille cupidus potator accedit, qui nulli propinaturus, substantias sensibus haurit; et quasdam ambit ex spirituali avaritia ad habendum; quasdam et ex carnali concupiscentia ad sumendum. Quanta autem sit sitis avaritiae, furta probant et rapinae, et populus ille qui carnaliter flagravit desiderio carnum, fletu prodidit appetitum. Detinentur et morantur potatores primi et medii, et merguntur ultimi. « Nam qui volunt divites fieri etc. Quae mergunt hominem in interitum etc. » 1 Tim. 6. Sed animae currenti ad fontem vivum, facilius est per hunc fontem transitus, quoniam « omnia subiecta sunt sub pedibus ejus, oves et boves universi, insuper et pecora campi. »

#### *Fons quartus.*

Sequitur fons quartus immediate substantiae sensibilis rationalis, quae animal rationale dicitur, a quo per ordinem primus fons totaliter absorbetur. Nimirum fons iste mirabilis, et prae omnibus praedictis sitibilis, utpote eunctis nobilitate dissimilis, quem natura inchoat ponens fundum corporis, Creator solus consummat creans et infundens substantiam animae rationalis: quae praeter communes sibi et praemissis fontibus intellectum et affectum quasi proprios ebullit rivis mirabiles. Fons iste etsi angustus videatur, eo quod in modo aliorum non dilatetur per species; nihilominus tamen latus est valde per individua plurima, et omnem speciem specialissimam excellit ac latitudine excedit, excedit et omnes praedictos accidentium profunditate inscrutabili, excedit et durationis longitudine interminabili; praecedit non tantum per generationis continuæ lineam usque ad terminum mundi fluens, sed per regenerationem ultima tantum temporis aevi interminabilitate excedens. Hic est igitur homo; qui cum sit species specialissima, et non habeat rivis specierum, quinque tamen scaturit mirabiles fluxios statuum: scilicet statum naturae, statum culpae, statum poenae, statum gratiae et statum gloriae. Quorum primus fluit cum omnibus; secundus autem et tertius fluunt ex opposito contra quartum et quintum; nam illi fluunt deorsum, isti saliant sursum. De his fluxiis omnibus multi multa quae sitierant investigando, biberant inveniando, in vasis verborum propinaverunt docendo. Tres tamen invenies generales hujus fontis potatores cum tribus diversis-hauritoribus, substantiam sensibilem rationalem, scilicet hominem. haurientes; quorum primus patiens sitim concupiscentiae haurit cum affectu corrupto; secundus sitibundus scientiae, haurit

cum intellectu studioso: tertius summus propter aestum caritatis et sitim amicitiae, haurit cum affectu gratuito et virtuoso. Venit ergo primus, cujus affectus est per superbiam spirituales, aut per concupiscentiam carnalem. Sed si tunc vas per superbiam, currit ad fontem, venit ad hominem, tentat modis omnibus haurire de fundo cordis placentiam et favorem de ore famam et laudem, de operis superficie reverentiam et honorem. Sed stultum nimis est hic sitire; quoniam continue et de facili fons ille turbatur, ex quo oportet ut amarum pro dulci sumatur: nam homo nunquam in eodem statu permanet, sed mutatus subito reprobatur quod approbavit, et vituperatur quod laudavit. Infectus autem per concupiscentiam carnalem alia via et ex alia causa venit ad fontem; scilicet ut hauriat ab homine voluptatem, quae inchoatur in visu, progreditur in auditu, consummatur in tactu. Vilia haec et faeculentia valde, et ideo brutis relinquenda, rationalibus contemnenda. Accedit ad fontem superius potator secundus, venit cum vase suo intellectu, studiosa sitit, haurit et sibi et aliis. Sed alius haurit de substantia animae et potentiis secundum quod sunt absolute, et propinat nobis in tertio de Anima, et in scientia metaphysica: alius haurit de corpore, et propinat scientiam medicinae propter humanum corpus determinans aegrum et sanum: alius haurit de humanis moribus, et propinat utilem doctrinam Ethicae distinguentis bonum et malum eligendum et spernendum: alius haurit de sermonibus, et propinat scientiam triviam, docens quod didicit distinguere per grammaticam congruum ab incongruo, per logicam verum a falso, per rhetoricam ornatum ab inornato. Herum igitur aliqua etiam currenti animae utile est gustare: sed sitis vivi fontis non permittit ebibere, quia non patitur diu stare. Accedit tertio et summo loco potator ille cum affectu virtuoso; consideransque in summo fontem, intuens hominis mentem, cognoscit vivi fontis imaginem. Nimirum delectatur et bibit, et ex potu sitis crescit, omniaque inferiora prae isto fonte parvipendit: nec tamen hic sistit, sed imaginem propter rem diligens, rem imaginis vehementius concupiscit. Augustinus: « Si placent corpora, Deum ex illis lauda, et in artificem eorum retorque amorem; ne in his quae tibi placent, tu displiceas. » Si placent animae, in Deo amentur, quia et ipsae mutabiles sunt, et ex illo fixo stabiliantur: alioquin irent et perirent. In illo ergo amentur.

#### *Fons quintus.*

Sequitur fons quintus in ascensu summus, quartum non includens, sed limpitudine et nobilitate excedens, ad fontem vivum signaculo imaginis magis accedens: qui ab ipso simplicissimo simplex, a purissimo purus immediate sed inordinate profluit, statimque subito bipartitus est; et pars una miserabiliter diffluit in mare mortuum, et pars alia mirabiliter refluxit in suum principium fontem vivum. Ceterum fons ille altus est, nec omnes in quo hauriant habent. Hausit tamen et aliis propinavit de hoc fonte Aristoteles, considerans et describens intelligentias quantum ad esse primum in libro de Causis; hausit et propinavit Dionysius in Hierarchia sua describens esse secundum. Sed et moderni multi multa propinaverunt, quae magis



gustaverunt opinando, quam biberent sciendo. Verum et hunc fontem transeurit anima sitibunda dicens, Psal. 41: « Sitivit anima mea ad Deum « fontem vivum. » Creaturae magis proprie sunt rivi quam fontes aquarum: quorum veritas, bonitas et vita aliunde est derivata, ut vena, ab illa fontali veritate, bonitate et vita. Advertens ergo anima, quod per causam effectus plene et certe cognoscitur, et hausto fonte de venis omnibus cognitio habeatur, venarum haustu non contenta clamat: « Da « fontem lustrare boni; da luce reperta, In te con- « spicuos animi configere vultus. »

*Septimus gradus.*

Septimus gradus est, in quo amor facit audere vehementer. De hoc nota: tres potentiae partes rationalis animae, scilicet rationalis, irascibilis, et concupiscibilis, sunt quasi tres sorores unius substantiae, quasi ejusdem matris filiae: quarum prior rationalis apprehensiva et cognitiva est, et ideo praecedere habet: aliae duae non tantum sorores, sed et gemellae sunt, quia ambae motivae; et ideo diligentius se adjuvant quam Maria et Martha, quarum una motiva et activa, altera quiescens et contemplativa. Potior tamen et dignior concupiscibilis. Hae tres sorores tres habitus perfectivos ducunt, quasi tres maritos: nam rationalis scientiae, concupiscibilis amori, irascibilis ausui nubit. Igitur concupiscibilis mota sororem movet, et audacia ex amicitia exultat: utrique autem rationalis apprehensiva cum sua cognatione deservit. Facta ergo apprehensione, irascibilis aut discomfortatur aut confortatur. Si apprehensum est discomfortativum, irascibilis statim in participio timens fugit. Augustinus: « Timor animi fuga est. » In medio si continuatur et augetur discomfortatio, tunc crescit et pusillanimitas fit: quae si intendatur, tandem in termino desperatio sequitur. Si autem apprehensum sit confortativum, irascibilis in principio sperat, in progressu audet, in termino summe confortata, certa et segura fit. Igitur anima Deum apprehendens, si apprehendat sub conditionibus discomfortativis, timet. Sunt autem sex species timoris secundum Damascenum. Segnities: haec est timor futurae operationis: erubescencia est timor in expectatione convicii: verecundia est timor in turpi actu: stupor est timor ex re inconsueta: admiratio est timor ex magna imaginatione: agonia est timor per casum, scilicet per infortunium: timentes enim infortunate accidens agonizamus. Deus ergo influens mediante rationali apprehensiva super irascibilem motivam, apprehenditur, aut in comparatione, aut absolute. Si in comparatione: si ut jubens, sequitur segnities; si ut cognoscens transgressionem, sequitur verecundia; si ut redarguens, sequitur erubescencia; si ut puniens, sequitur agonia, sive respectu poenae damni, sive respectu poenae sensus. Si absolute: aut apprehenditur aliquod magnum, ut majestas Dei et similia, et sequitur admiratio: aut aliquod rarum, ut Trinitas in unitate et similia, et sequitur stupor. Omnia haec timor. Timor animi fuga. Animae igitur irascibilis discomfortatae, et ideo non audentis (1) exemplum habes Exod. 4: « Moyses perrexit ad videntium rubum etc. respondit Dominus, ne appropies huc. » Sic Dominus animae loquitur ne

appropiet, cum influit in apprehensivam, secundum conditionem irascibilis discomfortativam, majestatem scilicet, vel aliam; et ideo anima sistit quasi procedere non audens. Et ait Dominus, « Solve calceamentum de pedibus tuis: » quasi diceret animae: Affectus tuus nisi nudetur ab habitu brutali pelle pecuali, disconvenit huic itineri. Et addit, « Ego « sum Deus Abraham, et Deus Isaac, et Deus Jacob: » quasi diceret: Ego sum ejus una essentia Deus, et Deus, et Deus; ejus tres personae: quod innuit copula, quae diversitatem exigit: aliter enim suffecisset dicere, Ego sum Deus Abraham et Isaac et Jacob. Haec igitur loquitur Deus cogitationi apprehendenti ipsum esse unam et trinum; et sequitur stupor timoris irascibilis motivae: unde abscondit Moyses faciem, nec audebat respicere contra Dominum. Hoc per se patet expertis. Quandoque etiam timor vel stupor intenditur, ut in anima contemplante. Ex pusillanimitate amentia sequitur, ut figuratur in Esther: viso enim rege in Throno majestatis, Regina corrumpit et pene exanimata est: et 5 Reg.: « Regina Saba videns et stupens sapientiam et « gloriam Salomonis, non habebat ultra spiritum. » Verum quando amor claudit oculos rationalis apprehendentem Deum ut discomfortantem, et Deus imprimit in apprehensivam secundum condiciones confortantes, post apprehensionem irascibilis confortata movetur progressionem: et primo erigens se sperat: 1 Cor. 15: « Caritas omnia sperat: » crescit confortatio, et fit audens Poeta: « Audacem faciebat amor. » Vide de hoc in amore libidinoso honoris rerum vel voluptatis. 2 Esdr.: Accipit homo gladium, et facit furia etc. et leonem videt etc. et amabili suae aufert. Tandem quando summe confortatur, securatur. 1 Joan. 4: « Perfecta veritas foris mittit timorem: » Rom. 5: « Certus sum quod neque mors neque « vita etc. poterit nos separare a caritate quae est « in Christo. » In hac vita sperare multorum, audere paucorum, securitas paucissimorum, immo nullorum nisi excellentissime privilegiatorum. Augustinus: « In hac vita, quae tota plena periculis « est, nemo debet esse securus; ne qui fieri potuit « ex deteriori melior, fiat ex meliori deterior. » Vide exemplum hujus evidens in Genes. 43: « Non « se ultra poterat cohibere etc. » usque illuc, « post quae ansi sunt loqui ad illum. » Historiam oculus legat, affectus exponat. Sic omnino Deus facit animae in hoc septimo gradu positae. Stupet anima Christo imprimente in cognitivam se Filium Dei esse. Ego sum Joseph filius accrescens, filius naturalis, et ideo patri aequalis, non potens crescere, sed in tua apprehensione crescens et accrescens. Sed excrescens inde stupor qui est species timoris, sistens animam et ligans. Unde nec poterant respondere fratres Joseph etc. timore perterriti. Variatur impressio invariato imprimente mutatur apprehensio immutato apprehendente. Apprehenditur Joseph secundum condiciones confortativas, verba, amplexus, oscula et fletus. Verba triplicia: quia primo advocat, ad quos ille clementer, « accedite, » inquit: hoc dissimile illi, « ne appropies huc. » Secundo consanguinitatem memorat. « Ego sum frater vester. » hoc dissimile illi, « ego sum Deus patris tui. » Tertio culpam excusat: « non vestro consilio, sed Dei voluntate etc. Nec durum vobis « videatur, quod vendidistis etc. »: hoc dissimile illi, « Solve calcamentum de pedibus tuis. » Ibi quasi inculpatur affectus interior pecualis; hic exeu-

(1) *Al.* audientis.



satur etiam actus exterior bestialis. Non contentus est amor movere linguam ad benigne loquendum; movet et brachia ad amplexandum, et oculos ad flendum: vel potius cerebrum liquefacit, et resolvit ad lacrymandum: unde, « Cumque amplexatus recidisset in collum Benjamin, flevit: » recidisset, inquit, quasi non accessisset ad collum, sed eccidisset; nec tantum eccidisset, sed iterum atque iterum cadens, recidisset. Movet et labia ad osculandum; unde « osculatus est Joseph omnes fratres suos, et ploravit super singulos: » et sequitur, « Post quae ausi sunt loqui ad eum, » Cum illie dicatur, quod non audebat Moyses vel respicere contra Deum. Omnia tempus habent: tempus timendi, et tempus audendi. Post quae, inquit, ausi sunt loqui ad eum: post quae, non ante quae. Cum ergo has impressiones a Christo interius senseris, aude (1) et loquere quod vis. Senseris inquam tripliciter ut illi, scilicet auditu, visu et tactu (2). Cum audieris primo « accedite ad me » scilicet dissimulantem quod est lux inaccessibilis sistens Moysen, « Ne appropies huic ad rubum, » scilicet ubi lux est flamma sine combustione, sed elementer se tibi captabilem praebentem, et te ad se mulcebritate sua elementer allicientem. Cum audieris secundo, « Ego sum frater vester, » quasi tacentem relationem superpositionis, secundum quam est Deus patris tui, sicut dicit Moysi, et insonantem auribus cordis tui relationem quasi equiparantiae, secundum quam est similis tibi homo hominis filius, et ideo frater tuus. Cum audieris tertio, « Nec durum vobis videatur, quod vendidistis me, » quasi non solum non redarguentem affectum superficialiter brutalem sicut in Moyse « solve calceamentum de pedibus tuis », sed conscientiae tuae remittentem et annihilantem actum quemlibet totaliter bestialem, sicut audivit Magdalena post lacrymas, « Mulier, remittuntur tibi peccata tua. » Beati certe « quorum remissae sunt iniquitates, et quorum tecta sunt peccata. Beatus vir enim non imputavit Dominus peccatum, » Psal. 51. Item cum videris visu spirituali qui non fallitur in objecto, non praesumptuose et phantastice imaginando, sed humiliter et certissime intelligendo oculos Jesu erga te distillare, non adhuc quidem curiose considerantes quid reliqueris, de quo in Job 11: « Videns iniquitatem nonne considerat? » nec furiose flammantes in testimonium indignationis, ut ibi « oculi ejus velut flamma ignis », et in Esther 15: « Ardentibus oculis furorem animi indicavit, » sed effluentia ejusdem miri humoris prodentis vehementiam intimi amoris, et ostendentis evidentissime summum arcanum divini capitis erga te liquefactum esse. Cum videris secundo brachia Jesu laxari ad amplexandum, quasi oblita percussio quam merueris peccatis gravioribus, oblitaque et castigationis quae debetur minoribus; gladio carentia, sed nec baculum nec virgam habentia, viresque suas in te non blactendo (3), non distringendo, sed astringendo exereentia. Postremo cum senseris tactu qui cognoscit de proximo et in conjunctione maxima, labia illa Jesu, labia distillantia myrrham primam, vel non myrrham, sed mellis stillam primam, polluta olim animae tuae labia non abominari, sed mirabiliter ipsis impruui, ineffabiliter osculari, quasi oblita invectionis « exploratores estis »,

oblita comminationis « per salutem Pharaonis non exhibitis » (4). Deinde et quasi oblita jussionis, non judicem vel dominum, vel magnum praetendere metuendum, sed sponsum amantem tenerrime, et teneriter reamandum. Post quae, inquit, ausi sunt loqui ad eum: sic audet illa quae loquitur: « Osculetur me osculo oris sui. » Bernardus: « O sancta anima, reverentiam habe, quia ipse est Dominus Deus tuus fortasse non osculandus, sed adorandus, fateor: quia honor regis judicium diligit: sed praeceps amor nec judicium praestolatur, nec consilio temperatur, nec pudore fraenatur, nec rationi subjicitur. » Scito tamen quod ad praecipitium disponeris, si hunc septimum praesumpseris antequam sex priores transieris.

#### Octavus gradus.

Octavus gradus est in quo facit stringere indissolubiliter. Omnia quidem praecedentia fieri possunt in distantia, verum hic primum est conjunctio amantis cum amato. Qui enim stringit tenet, qui tenet tangit, qui tangit non distat. Languens distat, similiter et quaerens: nec enim langueret et quaereret nisi distaret; sed et currens distat, et ideo currit ne distet, et sic de aliis. Stringens autem non adhuc distat, sed astat, vel magis instat. In praecedentibus ergo gradibus anima amat et amatur, quaerit et quaeritur, vocat et vocatur; in hoc autem gradu quodam miro et indissimili modo rapit et rapitur, tenet et tenetur, stringit et stringitur, et una uni per amoris copulam sociatur. Dionysius: « Amor est copula amantis cum amato. » Trina quidem copula a tribus professoribus traditur: scilicet conjunctio a Grammatico, verbalis a Dialectico, carnalis a Jurista vel Ethico, qui judicare habet de matrimonio. Prima copulat dictionem dictioni, quandoque congrue, quandoque incongrue: secunda praedicatum subjecto, quandoque vere, quandoque false: tertia sexum sexui, feminam viro, quandoque bene, quandoque male. Nec talis copula haec, sed omnem artem et facultatem transcendens, copulat animam Deo, creaturam creatori, finitum infinito, semper congrue, semper vere, semper bene. Hoc igitur est astringere. Sed nota: aliud est pedem ponere in gradu, aliud statuere: ponens enim nunquam retrahit et deponit, statuens autem figit: propter quod Dan. 9: « Daniel vir desideriorum etc. » Et « sta in gradu tuo »: quasi dicat, Non tantum calca super gradum, sed sta et firmare super ipsum. In hoc gradu quidam sunt hospites et transitorii, quidam vero incolae et mansionarii, ut hospites. Ad hunc gradum eunt et redeunt, qui stringunt et postea dimittunt. Mansionarii autem sunt, qui insolubiliter stringunt ut illa: « Inveni quem diligit anima mea, tenui illum nec dimittam, donec introducam illum in domum matris meae... non offendat te donec etc. » Non enim ponit post, sed negat ante: nam non ideo vult introducere non dimissum, ut dimittat introductum; quinimo quando hac cautela foris inventum introduxerit, plenius tenebit, fortius stringet et minus dimittet. Primi autem, scilicet hospites, sunt in triplici differentia: quia tribus modis dimittitur Christus. Primo enim dimittitur non volens a volente, cum brachia quae strinxerat caritas, distringit carnalitas, vel remissa

(1) Al. audeat.

(2) Al. et actn.

(3) Forte plactendo.

(4) Al. exhibitis.

tepiditas. Sic demittere est amittere. Augustinus: « Te nemo amittit, nisi qui dimittit etc. » Sic autem dimissus et quasi coactus recedere, cogitur nimirum dimissorem demittere. Psal. 80: « Audi « populus meus, et contestabor te. Israel, si audie-  
« ris me, non etc. Ego enim sum Dominus Deus  
« tuus qui eduxi te de terra Aegypti » in praeterito.  
« Dilata os tuum, et implebo » quicquid appetis in futuro: « et non audivit populus meus vocem meam,  
« et dimisi eos secundum desideria cordis eorum. » Secundo dimittitur volens non a volente, cum brachia stringentis affectus corporis corruptibilis infirmitas laxat, necessitas relaxat Genes. 52: « Dixit  
« Angelus ad Jacob: Dimitte me, jam enim ascendit  
« aurora: respondit: Non dimittam te, nisi bene-  
« dixeris mihi. » Hoc demittere est contemplationem ex carnis necessitate remittere. Sic tamen dimissus dimittenti benedictionem praestat, et nomen mutat. Quod totum tibi plenius exponet et planius modica experientia, quam longa verborum sententia. Tertio dimittitur volens a volente, cum praevideatur utilitas, et sequitur quasi tracta voluntas. Hoc tale demittere est contemplationem ex utili causa intermittere, ut vel opposita juxta se posita et majora et minora clarius videantur, ut ferventius appetat jucundius recipiatur, firmiter stringatur, ejus carentia qualis sit agnoscitur. Vide hoc evidenter in Tob. 5: « Heu me! fili mi, ut quid te misimus pe-  
« regrinari baculum senectutis nostrae, qui susten-  
« tat impotentiam nostram? » Lumen oculorum nostrorum, quod illuminat ignorantiam, solatium vitae nostrae, quod solatur tristitiam, et hoc in praesenti. Spem posteritatis nostrae, spem in futuro: et breviter omnia in te uno habentes, non te debuimus demittere a nobis. Sic dimissus, sic cum fletu desideratus, cum desiderio expectatus, rediens refert antidotum caecitatis, remedium paupertatis: qui legit intelligat. Omnia autem in uno habemus, de quo Roman. 8: « Proprio Filio suo non pepercit, quo-  
« modo autem non cum illo omnia nobis donavit? » Hunc igitur demittere non debuimus: quod si dimittimus, sic dimittamus: sic rediturum expectemus, et tunc sic recipiemus.

#### *Nonus gradus.*

Nonus gradus est in quo facit ardere suaviter. Non omnis qui calet ardet, nec omnis qui ardet bene ardet: et bene ardet qui suaviter ardet. Nota ergo originem ardoris, et differentiam in esse naturali, et secundum hoc procede in esse morali. Origo ardoris est calor: nam omne ardens est calidum, sed non e converso. Calor autem est qualitas corporis inter primas elementares qualitates nobilissima, naturaliter sursum movens, homogenea congregans, heterogenea disgregans: quae secundum se directe, sed non immediate frigiditati opponitur, quae deorsum movet, homogenea disgregat, heterogenea congregat. Est enim calor in corpore quandoque naturalis et innatus, quandoque accidentalis vel adventitius, et illa quandoque conveniens, quandoque disconveniens. Secundum haec autem calor spiritus est amor, et hic duplex: alius innatus, alius additus: et iste duplex; alius conveniens, et hic est caritas; alius disconveniens, et ideo spiritum distemperans, et iste cupiditas. Plane ergo haec qualitas spiritus, scilicet amor, inter primas spiritus qualitates prima et nobilissima I Corinth. 13:

« Major horum est caritas. » Primo sursum movet ut calor. Augustinus: « Unaquaeque res suo pondere ad locum suum tendit. » Ponderus ignis et olei, et universaliter calidorum secundum sursum, lapidis et gravium omnium deorsum. Quod autem est pondus in corporibus, hoc est amor in spiritibus. Et in hoc motu, quod amor naturalis inchoat, caritas consummat, quae non permittit spiritum quiescere extra Deum, sicut calor ignem citra horizonta extra naturalem, et locum proprium. Augustinus: « Fecisti nos Domine ad te, et  
« inquietum est cor nostrum, donec requiescat  
« in te. » Item heterogenea iste calor disgregat. Heterogenea valde spiritus et corporalia, corruptibile et incorruptibilia, perpetuum et temporalia dissociat: ergo hoc calidum caritatis. Sed homogenea congregat conjungens spiritum a corporalibus segregatum cum spiritu incorporeo, I Corinth. 6: « Qui adhaeret Deo, unus spiritus est, » conjungens incorruptibile incorruptibili a corruptibilibus segregatum, scilicet animam intellectivam incorruptibili primo bono. Itemque perpetuum a temporalibus segregatum perpetuo et aeterno. Augustinus: « Junge te aeterno, et aeternus eris. » Nota ergo: sicut in naturalibus, ita et in moralibus tria sunt: scilicet frigus, et tepor, et calor. Tepidum est medium inter extrema quae opponuntur ut contraria. Per tepidum est transitus a frigido ad calidum; et sic tepidum laudabile aliquantulum et bonum, quia via est et dispositio ad generationem caloris; sed non sufficiens, quia frigus in ipso non moritur, sed remittitur. Augustinus, « Non moritur frigus, nisi  
« in calore. » Frigus igitur est status culpae prorsus amoris expers; tepor status gratiae gratis datae: calor gratiae gratum facientis. Ubi primo frigus expulsus a contrario perimitur, et non moritur. Est et per tepidum reditus a calido ad frigidum, etsi vituperabile. Apocal. 5: « Quia tepidus es, incipiam  
« te vomere de ore meo. » Item in calido tres sunt diversitates: scilicet calens, fervens et ardens. Calor initium, fervor incrementum, ardor complementum. Differunt ergo ut majus et minus: nam fervor est calor valde intensus: ardor est fervor summe intensus. Calor ergo in positivo, fervor in comparativo, ardor in superlativo. Calent incipientes, Psal. 58: « Concealuit cor meum intra me: » fervent proficientes, Rom. 12: « Spiritu ferventes,  
« Domino servientes: » ardent perfecti. Psalm. 58: « In meditatione mea exardescit ignis. » In ardore jam, et tunc primo ignis forma et natura est. Unde in I Metaph.: « Ignis est in fine caliditatis. » Sunt autem tres species ignis, secundum Aristotelem: scilicet carbo in materia terrea, flamma in materia aerea, lux in materia propria. Tres ergo sunt ardoris differentiae secundum tres status; scilicet poenitentium, activorum et contemplativorum. Status poenitentium habet ardorem carbonis, ubi est ignis in materia terrea. Joan. 64: « Si abluerit Dominus  
« sordes filiae Sion, et sanguinem Jerusalem laverit de medio ejus in spiritu judicii et spiritu  
« ardoris. » Verum in hoc statu, scilicet poenitentiae, inveniuntur nonnulli tepentes, pauci vero calentes, pauciores fruentes, paucissimi ardentes. Accipe tamen exemplum ardoris a Magdalena, de qua Gregorius: « Incendit plene Maria peccati rubiginem, quae ardet valde per amoris ignem. » Gregorius: « Disce quo dolore ardet, quae flere inter  
« epulas non erubescit. » Item status progredien-

tium in itinere bonae actionis habet ardorem flammæ, quæ magis sursum tendit; et de carbone quidem nascens, patre suo nobilior est in materia, clarior in forma. Verum et in hoc statu invenies non omnes ardentes, sed quosdam tepidos, alios calidos, paucos fervidos, rarissimos ardentes, de quibus Luc. 24: « Nonne cor nostrum ardens erat  
« in nobis de Jesu, dum nobis loqueretur in via,  
« et aperiret Scripturas? » Vide ibi, et discere quales itinerantes, et ex quibus causis ardent. Vide in his duo: scilicet motum et actum. In motu considera quatuor concurrentia: quod: ibant duo simul; quales: ex discipulis; quando: ipsa die; quo in Emaus. In numero concursus societas, Propheta: « Numquid ambulabunt duo pariter nisi conveniat eis? » Utile melius est duos simul esse, quam unum. Unus enim quomodo calefiet? et si non calefiet qui unus et singularis est, quomodo ardebit? In professione humilis docilitas: ex discipulis, inquit, non ex magistris, in tempore lumen discretionis. Ibant enim in die non in nocte. Qui enim ambulat in tenebris, nescit quo vadat. In termino desiderium perfectionis. Ibant in Emaus, quod interpretatur desiderium consilii. Illie eunt, qui non contenti implere mandata, desiderio moventur etiam ad implenda consilia. Item actus eorum triplex describitur: scilicet quid cogitarent corde, quid dicerent ore, quid facerent opere. Cogitabant autem passionem Christi, et ideo tristes, non saeculariter gaudentes. Unde « ambulantes, et estis tristes ». Conferrebant in verbo, non de vanis aliquibus, sed de his omnibus quæ acciderant: scilicet de passione Christi. Quo contra Joan. 9: « Ipsi de mundo sunt, « et ideo de mundo loquuntur. » Exhibebant in facto hospitium peregrino, ut pateret ipsorum tristitiam non fuisse accidiam quæ taedium boni inducit. Nimirum talibus viatoribus Jesus propinquat, simul vadit, increpat nonnunquam, Scripturas aperit, et sic ardorem causat: nec tamen agnoscitur, donec panis frangatur. Tertius est status quiescentium in pace contemplationis: hic habet ardorem lucis; sed tamen et inter contemplativos invenies calentes, ferventes, perpaucos autem ardentes. Tales illi in Jerusalem sedentes, et ignem divinum excipientes. De quibus Gregorius: « Dum Deum in ignis visione suscipiunt, per amorem suaviter arserunt. » Primi ergo ardent multum utiliter, sed et multum poenaliter: secundi magis utiliter et minus poenaliter: tertii maxime utiliter et minime poenaliter, et ideo suaviter. Hi, scilicet suaviter ardentes, in hoc novo gradu sunt Seraphim, in proximo cognitionis gradu attinentes, de quibus dicit Dionysius: « Seraphim est calidum fervidum et superfervidum. » Haec est visio magna, ardor sine poena, suavis non gravis, ita ut Moyses miraretur quod rubus arderet et non combureretur.

#### *Decimus gradus.*

In decimo gradu facit similari totaliter. Sed nota: tres sunt similitudinis differentiae. Prima fundatur super proportionem: sic nigrum in comparatione ad congregare proportionabiliter, simile est albo comparato ad disgregare. Proportionalem ergo similitudinem disparata etiam opposita habere possunt. Secunda fundatur super communem qualitatem: sic album albo similatur. Aristoteles: « Similitudo est eadem rerum differentium qualitas. »

Tertio fundatur super receptionem: sic cera similatur sigillo, speculum rei oppositæ, cuius speciem recipit, aqua rei objectæ, oculus rei visæ. Secunda similitudo expressior quam prima, tertia quam secunda. Similitudine proportionis similatur anima Deo per naturam, et hoc multipliciter: quod patet sic. Divina enim essentia potest considerari dupliciter: ut comparata ad personas, et ut comparata ad creaturas. Comparata ad personas quarum est, et in quibus est. Repraesentat anima in suprema sui portione tripliciter: scilicet trinitatem personarum in unitate essentiae, trinitate (1) potentiarum in una mente. Item originem et ordinem origine et ordine: quia sicut Pater origo filii, et ambo simul Spiritus sancti, similiter memoria origo intelligentiae, utraque voluntatis. Item aequalitatem aequalitate et circuminsessione, ut totum probat Augustinus. Item ad creaturas comparatur dupliciter: ut causans, et conservans. Ut causans, tripliciter: efficienter, et sic ab uno Deo omnia, et quodammodo similiter secundum tenuem proportionem ab uno homine omnis homo. Formaliter: sic idea omnium in Deo spiritualium et corporalium. Similiter intellectus aptus est omnibus similari ideas recipiendo, quas habet Deus non receptas. Aristoteles: « Intellectus quodammodo est « omnia. » Finaliter: Eccles. 58: « Universa propter « semetipsum creavit Altissimus. » Aristoteles: « Sumus quodammodo nos finis omnium. » Item ut conservans: Sic Deus in universo totus, et in qualibet ejus parte totus: similiter anima in corpore. Sed nota hic: similitudo recipit majus et minus: est enim duorum similitudo parva convenientia proportionalis in aliquibus paucis vel modicis: magna in multis, major in pluribus, maxima in plurimis. Item similitudine qualitatis, similatur anima Deo partim per naturam, partim per gratiam. Sed praenotandum illud Augustini: « Credamus Deum « sine qualitate bonum, sine quantitate magnum etc. » Est ergo bonitate bonus, cuius bonitas non est qualitas accidentaliter, sed veritas substantialiter. Anima autem est bonitate, qualitate et accidente: tamen propter actum consimilem bonitatis hujus et illius, improprie et analogice, et exiliter valde, bono Deo bona anima similis dicitur: « Fecit enim Deus hominem ad imaginem et similitudinem » in gratuitis. Divinam igitur essentiam quam ut comparatam repraesentat anima similitudine proportionis, ut absolutam imaginatur aliquo qualitate similitudine qualitatis. Est enim Deus bonus, simplex, insensibilis, immortalis. « Fecitque hominem ad suam « imaginem » secundum animam: bonam (2) simplicem insensibilem, quæ scilicet in substantia sua sentiri non possit: immortalem: Augustinus: « Anima non « esset imago, si mortis termino clauderetur. » Naturalia haec et ideo inamissibilia. Accedunt gratuita naturalibus, accrescit imaginari similitudo. De sapienti, justo et benigno similis (3) fit anima sapiens, justa et benigna, et sic de aliis. Dionysius: « Oportet eum qui cum benigno Deo loquitur, « configurare se maxime simillimum, ut est possibile, sibi que conscium esse benignæ operationis. » Secundum hoc dicit Dominus Matth. 5: « Estote « perfecti, sicut et Pater vester perfectus est. Esto-

(1) *Al.* trinitatem.

(2) *Al.* hominem.

(3) *Al.* simul; et iterum infra.



« te misericordes, sicut et Pater vester misericors  
 « est; » et in Lege: « Sancti eritis, quia ego san-  
 « ctus sum. » Haec similitudo habet exordium in  
 natura, incrementum in gratia, complementum in  
 gloria, quando beati eritis, et ex hoc bene similes.  
 Sed ex hoc secunda similitudinis species in quali-  
 tatibus et naturae et gratiae et gloriae recipit ma-  
 gis et minus. Nam sicut albo summe parum album  
 est parum simile, et minus minus, et minime mi-  
 nime, et multum album simile, et plus plus, et  
 maxime maxime: sic cum Deus omnia in termino  
 habeat, et in summo, immo et ultra terminum;  
 summe simplici anima per naturam simplex similis,  
 et minus minus, et magis magis etc., et sic de aliis  
 naturalibus. Item summe benigno anima per gra-  
 tiam benigna similis, et minus minus, et magis ma-  
 gis, et sic de aliis gratuitis. Item summe beato  
 anima per gloriam beatam similis, et minus minus,  
 et magis magis. Excedit autem similitudo similitu-  
 dinem tripliciter: scilicet quantitate continua tantum,  
 vel discreta tantum, vel utraque. Proprie loquendo,  
 primum dicitur magis simile, secundum plus simile,  
 tertium magis et plus fortasse. Secundum haec  
 Angelus et anima in Dei similitudine habent se  
 ut excedentia et excessa. In tertia similitudine quae  
 plenissima est, anima Deo similatur non jam imi-  
 tatione sed receptione: hoc inchoat cognitio, con-  
 summat dilectio. Sed utrumque recipit magis et  
 minus: hoc incipit in via, completur in patria, utro-  
 que magis et minus. De cognitione 2 Corinth. 5: « Nos  
 « revelata facie gloriam Domini speculantes, in ean-  
 « dem imaginem transformamur: » 1 Joan 5: « Cum  
 « apparuerit, similes ei erimus, quoniam videbimus  
 « eum sicuti est. » Sicut est, non sicut facit: ut modo  
 videmus cum Deum non secundum essentiam, sed  
 secundum effectum cognoscimus; et ei similes modo  
 non sumus, sed tunc erimus, cum in speculum ani-  
 mae quasi propriam speciem projiciet, et in intelle-  
 ctum secundum essentiam cadet. De amore, Hugo:  
 « Scio anima mea, quia quidquid diligis, vi amoris  
 « in ejus similitudinem transformaris. » Fit autem  
 hujusmodi assimilatio quandoque ex sola oppositio-  
 ne, ut patet in speculo et specie: quandoque ex  
 impressione, ut patet in cera et sigillo. Prima as-  
 similatio fieri potest inter distantia, secunda solum  
 inter conjuncta. Primam gignit intellectus cogno-  
 scentis, secundam affectus amantis. Augustinus:  
 « Anima eo imago Dei est, quo ejus capax et par-  
 « ticeps esse potest: capax cognoscendo; particeps  
 « amando. » Quoniam igitur intellectus praecedit  
 affectum, cognitio amorem necessario; necesse est  
 ut prius speciem Dei capiat intellectus, Deo ut spe-  
 culum assimilandus, quam participet affectus, a Deo  
 praesente ut cera sigillandus. In primo diversifica-  
 tur similitudo ut sit completior vel incompletior  
 ex duplici causa: scilicet qualitate recipientis, et  
 distantia recepti. Trina ad minus qualitas in reci-  
 piente exigitur ad hoc ut aptum sit ad plenam et  
 evidentem recepti similitudinem. Prima, ut sit ter-  
 minatum: quod deficit in aëre: et ideo licet prius  
 in ipso recipiatur species quae ipso mediante de-  
 fertur ad speculum vel ad oculum, non tamen e-  
 videns est in seipso. Quod autem sit in ipso, patet  
 sic. Sit a, b, c, d, aer medius contiguus rei in a,  
 speculo in d: non potest esse species in speculo,  
 nisi prius fuerit et sit in medio. Secunda, ut sta-  
 bile et quietum, non mobile vel fluidum: quod  
 deficit in aqua; quae licet evidenti similitudine re-

ceptam speciem repraesentet, propter motum tamen  
 integram repraesentat ut fractam, quietam ut mo-  
 tam. Tertia, ut sit tersum: quod deficit in terra,  
 et quolibet opaco corpore; unde haec recipit um-  
 bram non speciem. Omnia haec in speculo. In vita  
 praesenti anima cognitiva divinae speciei naturaliter  
 receptiva est, quasi aërea per vacuum interminatum  
 vanitatis. Psalm. 95: « Dominus scit cogitationes  
 « hominum, quoniam vanae sunt: » Roman. 8:  
 « Vanitati subjecta est omnis creatura: » Psalm. 58:  
 « Universa vanitas, omnis homo vivens. » Et quasi  
 aqua per motum, et fluxum instabilitatis. Augusti-  
 nus: « Cogitationes viatorum sunt volubiles. » Et qua-  
 si terra opaca et indetersa per grossitiam cujus-  
 dam materialitatis: sed in futuro erit ut specu-  
 lum, quando vanitatem excludet complens, et  
 terminans veritas, fluiditatem sistet quieti stabili-  
 litas. Non enim erunt tunc cogitationes volu-  
 biles, ut vult Augustinus. Opacitatem absterget, et  
 superficiem tersam reddet mundissima limpeditas;  
 de qua Matth. 5: « Beati mundo corde, quoniam  
 « ipsi Deum videbunt. » Distantia autem rei spe-  
 ciem projicientis et speculi recipientis causat etiam  
 diversitatem similitudinis. Nam quo minor distan-  
 tia, major similitudo. Vera enim facies resultat et  
 tota secundum veritatem in speculo etiam distante;  
 sed in minus distante plenius secundum quantita-  
 tem. Cujus ratio patet in naturalibus: quia nulla  
 res materialis projiciens speciem, projicit eam sub  
 parallelis: unde oculus videt rem sub triangulo,  
 cujus angulus est in oculo, basis in re visa: eodem  
 modo et speculum recipit objecta. Causa hujus est,  
 quia res habet quantitatem ratione materiae, spe-  
 ciem autem ratione formae, quae simplex est, et  
 indistensa secundum se: elongatio autem a materia,  
 et in specie causat contractionem quantitatis. Quan-  
 to autem magis distat speculum, magis concurrunt  
 lineae terminales, sub quibus projicitur species, ex  
 quo sunt aequae distantes; et tanto minor recipitur  
 species. Unde patet esse possibile, quod duorum  
 speculorum speciem aliquam recipientium unum  
 recipiat et repraesentet totam, aliud non totam; et  
 tamen secundum magis recipere quam primum.  
 Igitur in proposito, etsi in Deo non sit quantitas  
 materialis, est tamen quantitas virtualis, vel potius  
 immensitas, quam speculum glorificati intellectus  
 cum dimensum sit et finitum, non potest recipere  
 infinite. Totam ergo secundum veritatem recipit  
 Dei faciem, cum simplex sit non habens partem et  
 partem; sed recipit tamen non secundum infinitam  
 quantitatem recepti, sed secundum aliquantam ca-  
 pacitatem recipientis. Et licet in omnibus speculis  
 resultet Dei facies secundum plenitudinem veritatis,  
 tamen secundum minorem vel majorem distantiam  
 recipientis et recepti est major vel minor contractio  
 quantitatis. Quod ergo minime distat, plenissime  
 repraesentat; et intellige distantiam non spatii lo-  
 calis, sed aptitudinis. Dionysius: « Quilibet ornatus  
 « circa Deum divinius est magis alio distante, et  
 « lucidiora simul et magis illuminativa quae pro-  
 « pinquiora sunt vero lumini: et non accipies hoc  
 « localiter, sed secundum divinam similitudinem  
 « et propinquitatem. » Verum, quia regulariter in  
 comprehensoribus, quantum quisque cognoscit, tan-  
 tum diligit; quantum ergo recipit Dei faciem su-  
 perficiis tersi et specularis intellectus, tantum si-  
 gillatur ex impressione faciei ejusdem profunditas  
 mollis et cerei affectus; et sic similitudo consum-



matur, cum anima secundum intellectum et affectum in Deum transformatur. Gradus ergo decimus in quo amor facit assimilari totaliter ultra Seraphim, est qui tam similatur excellenter, utpote quibus in summo convenit Angeli definitio, quam ponit Dionysius: « Angelus est imago Dei, manifestatio oculi culti luminis, speculum clarum, clarissimum, immaculatum, incoinquinatum, incontaminatum, totum, si conveniens est dicere, suscipiens in se pulchritudinem omniformis deiformitatis, munde resplendere faciens in se bonitatem silentii. » Fecit ergo summus artifex in ostentationem plenioris artis suae speculum unum clarissimo clarior, Seraphim tersius et purius; et tantae puritatis, ut purius intelligi non posset, nisi Deus esset: personam scilicet gloriosissimae Virginis. De quo Anselmus: « Decebat ut illius conceptio hominis de matre purissima fieret ea puritate qua major sub Deo nequit intelligi. » De hujus speculi formatione Bernardus: « Hanc, Domine, fecisti imaginem bonitatis tuae, in ea valde artifex ostendens magisterium pietatis tuae. » Sed rursus ex isto mirabiliter produxit aliud nobilius, quod ineffabiliter in unitatem divinae personae assumptum ut conjuncta summae et immediatissimae faciei divinae ipsam plenissima et totali similitudine repraesentat. Nee jam dicitur homo divinus ut a Deo sigillatus, sed homo Deus; una persona, gemina natura. Sit ergo a. intellectus animae Christi, b. anima beatae Virginis, c. summus Angelus de Seraphim, d. summus de Cherubim, e. summus de Thronis, f. summus de Dominationibus, g. summus de Principatibus, h. summus de Potestatibus, i. summus de Virtutibus, k. summus de Archangelis, l. summus de Angelis. Divina igitur essentia per nudam cognitionem et intimam dilectionem recipitur, et aliquali similitudine repraesentatur ab omnibus his ut facies a speculis, non secundum indifferentem essentiae veritatem, sed differentem quantitatem, secundum capacitatis et aptitudinis diversitatem. Quamvis ergo in Deo unum sint essentialia omnia, et ideo idem virtus et essentia simplex, tamen essentia et virtus est infinita. Ex quo accedit ut etiam cognoscibilis sit et apprehensibilis non sit; et ideo infinitum a finito totum cognoscitur et amatur, quia simplex; sed non totaliter, quia non infinite: hoc enim solum ejus cujus tanta sapientia quanta virtus, qui tantum se novit quantum est, et tantum se diligit quantum cognoscit. Isidorus: « Trinitas sibi soli nota est, et homini assumpto. » Sed sicut nota, ita et amata sibi infinite; et humanitati assumptae, etiam infinite: sed sibi infinite simpliciter et absolute, humanitati vero infinite solum respective, scilicet in comparatione ad omnem creaturam. Omnis enim creaturae esse et fines humanitas illa in essendo, cognoscendo et diligendo quodammodo infinite excessit, quae ad ipsum vere infinitum in unitatem personae accessit. Intellige igitur specula novem sub novem diversis gradibus faciem aliquam recipientia et repraesentantia. Ultimum repraesentabit vere faciem secundum quod est, sed non vere quanta est, quia et essentiam nasi, et essentiam et numerum et figuram oculorum, genas, faciei latitudinem, mentum et frontem longitudinem terminantes. Omnia haec in secundo non plura, sed majora; nec in summo plura, sed maxima: sic omnino in proposito. In l. recipit divina essentia, potentia, bonitas et omnia essentialia Trinitas per-

S. Th. Opera omnia. V. 17.

sonarum, et omnia ad beatitudinem facientia. Sed et ipsum e. eadem recipit et non plura, sed majora, quia majus est: sed tamen non infinite infinita recipit, quia et ipsum finitum est. In g. autem universi communis est finis, et in cognitione et dilectione ejus communis est terminus divinae similitudinis. Verum ipsum a. universo melius, quia finem hunc infiniti unione transcendit; ibi per copulam admittitur ubi omnis creatura excluditur, cum Trinitas sibi soli et homini assumpto nota, et per consequens amata esse dicitur. Pro solo igitur a. amore decimum gradum fecit; quia infinita cognitione et dilectione amato non quidem aequavit, sed quodammodo totaliter similavit, cui ipsum personaliter univit. Sed et mirabiliter inter a. et c. b. medium intercessit, persona scilicet gloriosissimae Virginis, quae in cognoscendo et diligendo omnium quidem creaturarum personarum communitatem inestimabiliter excessit; sed ad personae increatae unitatem rationabiliter non accessit.

## DE DILECTIONE PROXIMI.

### CAPUT PRIMUM.

#### Prooemium.

Vivit Dominus cujus ignis est in Sion, scilicet Ecclesia militante, per fidem speculante; et caminus in Jerusalem in Ecclesia triumphante, jam pacem vidente. Illic ignis, ibi locus ignis: non tamen vacuus locus, nec caminus extinctus. Dicit autem Augustinus: « Unaquaeque res suo pondere ad locum suum tendit, pondus autem ignis sursum. » Ignis ergo amoris hic est quasi violenter, illic quasi naturaliter. Illinc vero mittitur huc: hinc vero movetur illuc. Thren. 1: « De excelso misit ignem in ossibus meis: » et in Ezech. 10: « Ignis de medio Cherubin accipitur, et datur manus viri lineis indati. » Ignis vero inferius et ignis superius, quia Deum et in via amamus, et in patria amabimus: sed sursum solummodo proprius ignis locus. et ideo praecipitur, « Diliges Dominum Deum tuum etc. » Quod mandatum, secundum Augustinum hic implere non possumus, cum non sit ignis locus. Sed ideo accipimus ut ad caminum tendere sciamus, ubi totaliter ardendo, mandatum quod hic accipimus et servare incoepimus, sine desertione impleamus. Nota ergo quinque conditiones illius ignis. Est in materia nobilis, in forma cognoscibilis, in quantitate magnus, in virtute inextinguibilis, in pondere stabilis. Primum quidem amor in patria, ignis in camino est, et in materia nobilis, cum ejus materia sit ipse Deus, quem tunc sic amabimus, ut nihil amemus nisi quod ipse sit, vel ab ipso, in ipso, secundum ipsum, et ad ipsum sit. Illic vero diversorum ignium sunt diversae materiae. Alii enim aliud amant: et hoc quod est causa amoris, hoc materia ardoris. Vide ergo quomodo alii pro materia ignis fimum boum in larem cordis componunt, alii toruones, alii stramina, alii ligna viridia, alii carbones. Voluptuosi fimum boum incendunt, quia vitia et peccata, et ea quae brutalia sunt, ardentem diligunt. Verum hic ignis foeti-

dus, et tantum inficiens quantum calefaciens. Item in affectionibus avarorum congesti sunt in pabulum ignis cespites terrestrium, idest temporalium bonorum. Item alii de straminibus et calamis qui vacui sunt ignem faciunt, qui vanos honores diligunt. Ignis stramineus laetabilis quidem dicitur, sed durabilis non esse cognoscitur. In momento flamma in altum consurgit, sed continuo evanescit. Lux clara famae saecularis procul aspicitur, et repente non nisi favilla nigra et inutilis invenitur; quam sic ventus dispergit, ut locus ejus inveniri non possit. Psal. 56: « Vidi impium superexaltatum et elevatum sicut cedrus Libani, et transivi, et ecce non erat: quaesivi, et non est inventus locus ejus. » Nonnulli etiam de spinis et tribulis, quae nec sine poena tractari possunt, incendium faciunt: scilicet iracundi et invidi, qui vindictam appetunt, et poenas aliorum ardentem concupiscunt. Item alii ligna viridia incendunt, qui uxorem et filios nimis ardentem diligunt. Hic ignis fumum generat, qui et faciem animae denigrat, et oculos cognitionis vehementer deturpat. Item alii carbonibus in lare cordis ignem affectionis nutriunt, qui bonos homines diligunt; qui more carbonum in oculis carnalium nigri sunt et despecti: sed siccitate laudabili et aliis conditionibus ad ignem sunt aptissimi. Verum ut audivi, et de igne carbonum caput frangitur, nisi sale aspergantur. O quantorum capita insensibiliter fracta sunt, et in quandam periculosam insaniam inciderunt! qui sine sale discretionis etiam bonos homines dilexerunt, qui spiritu coeperunt, et carne consummaverunt. Caeterum in camino patriae ignis in materia nobilis est, ubi pure Deus diligitur in seipso, sed et forte nihil nisi Deus diligitur in proximo. Deuter. 4: « Deus noster ignis consumens est. » Mira res, materia ignis nostri tantum agit cum pati debeat. Deus noster non solum amatur, sed et amat: et quia ardentem amat, ipse est materia ignem nutriens: sed quia ardentius amat, ipse est ignis consumens. Finitum enim quantumcumque magnum, infiniti comparatione consumitur. Item est et ille ignis in fornace cognoscibilis, quia non in cineribus sepelitur, sed effusione flammae omnibus aperitur. Cant. 8: « Fortis est ut mors dilectio. Lampades ejus lampades ignis atque flammarum. » Modo quidem ignis caritatis cinere coopertus invisibilis est adeo (1), ut et ipsum hospitem domus lateat, utrum super larem cordis aliquid de igne caritatis habeat: et timetur aliquoties non esse, ubi tamen est: et e converso nonnunquam praesumitur esse, ubi in veritate non est. Eccl. 9. Sunt justi atque sapientes, et opera eorum in manu Dei, et tamen nescit homo utrum amore an odio dignus sit. Item est in quantitate magnus. Modo parum cognoscimus, et ideo parum diligimus, et ideo parvum igniculum habemus, vix manum plenam, ut signatur in Ezech.: « Praecipit Dominus viro qui indutus erat lineis, dicens: Sume ignem de medio rotarum quae sunt inter Cherubim: et ingressus ille stetit juxta rotam, et extendit Cherub manum de medio Cherubim ad ignem qui erat inter Cherubim, et dedit in manus ejus qui indutus erat lineis: qui accipiens ingressus est, et apparuit in Cherubim similitudo, et manus hominis subtus pennas eorum. » Cherubim plenitudo scientiae. Cherubim ergo nobis ignem mensu-

rat, et vix manum plenam dat, quia parva cognitio, et ideo parva dilectio. 1 Corinth. 13: « Nunc cognosco ex parte; sed cum venerit quod perfectum est, evacuabitur quod ex parte est, » et tunc perfecte videbimus, perfecte amabimus et vehementer ardebimus. Joan. 17: « Notum feci eis nomen tuum, et notum faciam, ut dilectio qua dilexisti me in ipsis sit, et ego in ipsis. » Nec miremur, si magnus ignis efficitur, ubi de tot cordium millibus quasi infinitis laribus amoris flamma effunditur, et in unum ignem caritatis inconfuse confunditur. O si interim plenam nobis Cherub mensuret! Ut video, quatuor ad hoc habere oportet: scilicet, ut viri simus, lineis induamur, ingrediamur, juxta rotas stemus. Esto igitur vir virilitate constantiae, induere lineis continentiae, ingredi in interiora conscientiae, sita juxta rotas Scripturae: sic aliquid de igne accipies, quo accepto egredieris, et alios incendes. Item est in virtute inextinguibilis. Ignis extra caminum, ignis caritatis extra caelum: virtuosus quidem valde, sed tamen extinguitur! nunc penuria lignorum, nunc inundantia aquarum, cum vel desunt necessaria, vel adsunt contraria. Prov. 27: « Si defecerint ligna bonorum operum, extinguitur ignis. » Similiter ignem ardentem extinguit aqua fluida, scilicet concupiscentia. Ita quidem modo; sed quomodo in futuro? Ita hic: sed qualiter in camino virtus ignis inextinguibilis est, nota. Cant. 8: « Aquae multae non poterunt extinguere caritatem, nec flumina obruent illam. » Ex isto sequitur alia conditio illius ignis, scilicet quod sit duratione perpetuus; et hoc est quod dicit Apostolus 1 Corinth. 13: « Caritas nunquam excidit. » Item est in pondere stabilis. Ponderus naturale quod rem ad locum proprium inclinatur, in eodem loco rem sistit, et extra illum quiescere non permittit. Sicut igitur lapis, quem ponderus suum deorsum movet, in centro accipit quietem; sic ignis semper in motu existens, et semper suo pondere sursum tendens, in horizonte sphaerae suae eodem pondere fixus adipiscitur stabilitatem, ibique ab aliena materia absolutus, et propria contentus, in actione sua uniformiter se habet. Nam extra sphaeram suam secundum diversas materias sortitur conditiones diversas, et pro diversis conditionibus multiformiter diversificatur in actionibus. Nunc enim impeditur, nunc expeditur; et secundum hoc motus ejus nunc tardior, nunc velocior: nunc minuitur, nunc augetur; et ex hoc actus ejus nunc debilior, nunc fortior. Sic omnino ignem amoris ponderus suum movet et agitur, donec in camino patriae sistat. Hic ergo caritas movet ad opera per quae sursum veniatur; et sic est meritum praemii: ibi sine opere in amati praesentia delectatur, et sic est praemium meriti. Hic ergo locus motus et activi et passivi: nam ignis caritatis et movere habet, et moveri potest: movere habet, ut dictum est, ad opera; moveri etiam potest quinque speciebus motuum: motu generationis de non esse ad esse, motu corruptionis de esse ad non esse, motu augmenti cum intenditur, motu diminutionis cum habitus per peccatum corruptus in contritione minor revertitur, motu alterationis vel cum expedita fervet, vel impedita torpet: et secundum hoc in motu quem elicit, et in actu quem efficit, fortior vel debilior est. Nihil horum patitur ignis in sua sphaera, caritas in patria. In camino ergo patriae locus est stabilitatis, ubi pondere suo ignis iste si-

(1) *Al.* a Deo.

situr, ut nec moveat ulterius, nec moveatur. Non enim ibi ulterius movere habet ad operationem difficilem, sed beatificare habet per fruitionem Dei indicibilem: nec moveri potest, quia nec generari in non habente, nec corrumpi in habente, nec augeri in minoribus, nec minui in majoribus: quia nec illi de hypophania ad epiphania ascendere per amoris augmentum, nec illi possunt descendere per ipsius detrimentum: sed nec alterari potest, cum nec impediri nec expediri valeat, semper aequae expedita in eodem statu, in eodem actu, in eodem fervore stabilis perseverat. Hic est caminus Jerusalem, ad quem movet et elevat bonos ignis caritatis: cui proposito caminus Babylonis opponitur, ad quem permittit et agitat malos ignis cupiditatis, de quo Matth. 15: « Exibunt Angeli, et separabunt malos de medio justorum, et mittent eos in caminum ignis; ibi erit fletus et stridor dentium. » Hic erit risus et júbilus gaudentium; ibi poenaliter ardent corpora damnatorum materiali igne inextinguibilis gehennae: hic suaviter ardent animae honorum spirituali igne interminabilis amicitiae. O si modo respicere detur oculis cordis, qualis erit ille respectus quo electi respicient sine timore gaudentes, de camino palatii regalis illos miseris sine spe dolentes in camino carceris gehennalis.

## CAPUT II.

### *De convenientia duorum mandatorum.*

Secundum autem simile est huic: « Diliges proximum tuum sicut teipsum. » Similitudo est rerum differentium eadem qualitas. Mandatum igitur proximum est quo jubemur diligere Deum, et secundum quo proximum: quoniam duo mandata sunt numero differentia, et ordine differunt non solum jubendi, sed etiam implendi: quoniam illud primum, et istud secundum; non secundum prius et posterius in tempore, sed in dignitate et necessitate: quia dignius, potius, intensius et fructuosius diligimus rem, quam ejus imaginem, Deum quam hominem. Multa tamen convenientia et similitudo mandati secundi cum primo. Et est triplex convenientia: nam idem est actus in specie, qui utrobique recipitur, scilicet dilectio; idem numero habitus caritatis, a quo uterque actus elicitur: et unus idemque, scilicet Deus, in quem uterque dirigitur, quia propter Deum et Deus et proximus diligitur. Cum ergo proximus diligitur propter Deum, solus Deus diligitur propter seipsum. Aristoteles: « Ubi unum propter alterum, utrobique unum tantum. » Primum igitur mandatum et actus quidem nobilitate et objecti dignitate et implendi necessitate praecedit omnia et excedit: ad ejus similitudinem secundum per multas communes cum ipso qualitates prae omnibus aliis mandatis plenius et propius accedit. Secundum ergo simile est primo. Primo quidem in obligatione, quia mandatum est sicut primum, non consilium; et ideo non persuadetur ad placitum, sed imponitur ad debitum. Joan. 15: « Hoc est praeceptum meum, ut diligatis invicem etc. » De virginibus, ait Apostolus, 1 Cor. 7, « praeceptum Domini non habeo, consilium autem do etc. » Et Dominus, Matth. 16, juveni ait: « Si vis perfectus esse, vade et vende etc. » Possessio ergo castitatis, et abdicatio proprietatis, et quaedam similia consuluntur ut utilia. Dilectio autem proximi, sicut dilectio Dei, man-

datur, et praecipitur ut necessaria. Itemque mandatorum aliud divinum, aliud humanum. Secundum simile est primo in auctoritate, quia divinum et non humanum, et ideo omnibus humanis praediceat, cum minor in majorem imperium non habeat. 1 Joan. 5: « mandatum habemus a Deo, ut qui diligit Deum, diligat et fratrem suum: » a Deo, inquit, non ab homine. Obedire autem oportet Deo magis quam hominibus: et ideo traditiones humanae tanquam vanae non obligant, quae huic divino mandato directe vel indirecte obviant. Matth. 12: « Quare vos transgredimini mandatum Dei propter traditionem vestram? Nam Deus dixit, Honora patrem etc. Vos autem dicitis, Manus quodcumque est ex me, tibi prodest: et irritum fecistis mandatum Dei propter traditionem vestram » Col. 2: « Si mortui estis ab elementis mundi hujus, quid adhuc tamquam vivi decernitis? Ne tetigeritis etc. Quae sunt omnia in interitum secundum praecepta et doctrinas hominum. » Item mandatorum divinorum aliud caeremoniale, ut de oblatione vitulae rufae et similia: aliud judiciale, ut de emptione servi, et teconaria, ut de erutione oculi, et similia: aliud morale, directe pertinens ad veritatem morum et vitae, ut decalogus: omnia haec divina. Sed Christus Deus et homo legifer noster, rex noster et iudex noster, figuras per veritatis exhibitionem adimplens, caeremonialia generaliter abrogavit, judicialia derogavit, moralia prorogavit: et secundum hoc finis legis Christus ad justitiam omni credenti, rigorem mansuetudine temperans, judicialibus derogavit. Matth. 5: « Audistis quia dictum est, Oculum pro oculo etc. Ego autem dico vobis, non resistere malo. » Moralia equidem confirmando et ampliando, interpretando, moralia prorogavit: unde: « audistis, quia dictum est, Non occides: Ego autem dico vobis, Nolite irasci etc. » Non enim veni solvere legem, sed adimplere. Moralia igitur inter mandata divina firmissima et dignissima sunt. Morale autem est mandatum primum; sed et in hoc simile est illi secundum; et ideo non tollitur abrogatione, non stringitur vel minuitur derogatione, sed extenditur prorogatione. Matth. 5: « Audistis quia dictum est: Diliges proximum tuum, et odio habebis inimicum. Ego autem dico vobis, diligite inimicos vestros. » Hinc etiam mandatum diligendi proximum novum dicitur, non quia de novo mandatum, sed quia novis discipulis nova interpretatione appositum, et novis exemplis novi hominis evidentius declaratum Novum, inquam, ad differentiam veterum, quae et veteribus data sunt, et vetustate sua abrogata sunt. Joan. 15: « Mandatum novum do vobis etc. » Dicendo novum, veteravit prius. Quod autem antiquatur et senescit, prope interitum est. Item mandatorum novae legis aliud est naturale, quia naturae inditum, cum natura est conditum: aliud est positivum. Prima praecipuntur quia bona; secunda bona sunt quia praecepta, ut sunt mandata de Sacramentis, Baptismo, Confirmatione, et quibusdam aliis, quibus potentiam suam Deus praecalligavit. In quibusdam etiam consuetudo bona pro lege habetur, et mandato aequivalet, quoniam longaevae et bonae consuetudinis non est levis auctoritas. Inter haec ergo naturale magis est firmum, et amplius necessarium. Et in hoc iterum primum mandatum et secundum similia sunt, quia origine convenient: utrumque enim naturale, non positivum vel consuetudinale: id enim naturale est, quod natura docuit



omnia animalia. Omne animal, natura docente, diligit simile sibi, et ipsa etiam volatilia conveniunt ad sibi similia. Unde Laelius philosophus: « Ipsi in nobis intelligimus a natura gigni sensum diligendi. » Ex his sequitur, quod mandatum hoc idem sit apud omnes. Nam ut dicit Boetius, quod natura est, idem apud omnes: consuetudine vero quod apud aliquos permutatur. Item mandatorum aliud conditionale, aliud absolutum: conditionale dicitur, quod sub conditione explicita vel implicita imponitur, ut illud, « Vovete et reddite. » et illud, « Poenitentiam agite: » nam si voverimus, teneamur reddere, et si peccaverimus, praecipimur poenitere; et si conditio non existat, praecceptum non obligat. Boetius: « Poenitentia malum factum comitatur: quod quia in sapiente non contingit, non convenit nec poenitentia. » Absolutum autem est, quod non conditione suspenditur, sed pure et praecipue indicitur. Si nimirum jubemur diligere Deum, sic et diligere proximum. In hoc ergo similia sunt mandatum primum et secundum, quia utrumque non conditionalibus praefendum. Item mandatorum aliud affirmativum, aliud negativum. Affirmativum, quod est de bono faciendo, et proprie vocatur praecceptum: aliud negativum quod est de malo cavendo, et dicitur prohibitio. Primum autem mandatum affirmativum est; sed et secundum simile est huic, quia et ipsum affirmativum est: et ideo negativis dignius est; quia plus est bonum facere, quam malum non facere. Omne etiam mandatum affirmativum infert et implicat negativum, sed non e converso. Unde qui jubetur diligere, consequenter prohibetur odire, non autem e converso: et sic de aliis. Affirmativum ergo dignius negativo. Item mandatorum aliud generale, quod omnes astringit, aliud speciale, quod aliquos tantum. Distinguitur enim in mandatis in sexu: quia quaedam obligant mares, et non obligant feminas; quaedam e converso, ut illud, « Mulieres in Ecclesia taceant. » 1 Corinth. 14. In statu, quia quaedam Praelatos tantum, alia subditos tantum. In conditione, nam aliud dominos, aliud servos. In professione, aliud clericos, aliud laicos. In fortuna aliud divites, aliud pauperes; et sic de aliis hominum differentiis. Sed mandatorum primum generale est, et secundum simile illi, et sine differentia et distinctione obligans omnes naturam rationalem participantem, et libero arbitrio utentes. 1 Joan. 5: « Qui non diligit, manet in morte. » Nullus excipitur omnino: nec Angelus, nec homo. Huic generali nullum derogat speciale: nec solum generale est in subjectis, sed latum etiam in objectis. Generale respectu eorum quae jubemur amare, latum respectu eorum quae jubentur amari. Psalm. 118: « Latum mandatum tuum nimis. » Glossa: « Latum mandatum caritas est, in qua nullae sunt angustiae, in qua universa lex pendet et Prophetiae. » Sicut igitur omnis homo sine exceptione jubetur diligere, ita et omnis diligatur, domesticus, extraneus, amicus, et inimicus. Diliges proximum tuum sicut teipsum. Origenes: « Vos benigni, vos imitatores mei, diligite inimicos vestros, sive paganos, sive haereticos: omnes amate, ergo omnes benigni estote. » Et cum terna sit dimensio, scilicet in longum, latum, profundum; latum mandatum caritatis, et non profundum dicitur, quia ad damnatos amandos non extenditur. Item mandatum primum lucidum, ut et interpretatione non egeat, ut plerumque in sim-

plicibus plenius quam sapientibus liqueat: et hoc ad differentiam mandatorum ut legum obscuritate vel ambiguitate difficilium. Sed et secundum est simile huic, lucidum valde, nil obscurum continens, admonitione magis, quam expositione indigens. Ps. 18: « Praecceptum Domini lucidum, illuminans oculos. » Item mandatum primum perpetuum, ut finem non habeat: et hoc ad differentiam temporalium. Temporalia autem sunt, quae vel relaxantur pro tempore, ut ea in quibus quandoque dispensatur; vel mutantur in tempore ut mandatum de sabbato; vel terminantur cum tempore, ut mandatum de fide, spe et patientia: a quibus absolvemur, cum videntes erimus quod credimus, tenentes quod speramus. Credere ergo et sperare ulterius non cogemur summo bono fruente, et nihil de cetero mali patiemur. Secundum autem simile est huic: ad quod ita ligamur in via, ut non absolvamur in patria: ad quod sic tenemur omni tempore, ut teneamus illud etiam post omne tempus in aeternitate; et tunc amplius eo ligemur, cum a plerisque aliis absolvemur. Prov. 17: « Omni tempore diligit qui amicus eius est: sed non semper credet qui fidelis est. » 1 Corinth. 13: « Caritas nunquam excidit. » Ex his patet aliquantulum quale sit mandatum primum, et huic quam simile sit secundum: quia, ut breviter epilogetur, utrumque est praecceptum ad differentiam consiliorum, utrumque praecceptum divinum ad differentiam humanorum, utrumque morale ad differentiam caeremonialium, utrumque naturale ad differentiam positivorum, utrumque absolutum ad differentiam conditionalium, utrumque affirmativum ad differentiam negativorum, utrumque generale ad differentiam specialium, utrumque lucidum ad differentiam obscurorum, utrumque perpetuum ad differentiam temporalium. Gregorius: « Cum cuncta sacra eloquia dominicis sint plena praecceptis, de dilectione quasi de singulari mandato Dominus dicit Joan. 13: Hoc est praecceptum meum ut diligatis etc. Quia quicquid praecipitur in sola caritate solidatur. » Praecepta ergo dominica et multa sunt, et unum: multa per diversitatem operis, unum in radice dilectionis.

### CAPUT III.

#### *Quomodo debeat homo seipsum diligere.*

« Diliges proximum tuum sicut teipsum. » Primum adverte quomodo teipsum diligere debeas, et consequenter quae sunt proximi tui ex teipso cognoscas. Diligere aliquem, est velle ei bonum; igitur diligere seipsum, est sibiipsum velle bonum. Sed refert non modicum quod bonum mihi velim, et unde, et quomodo velim, quod objectum terminet, quae origo principiet, et quis modus ipsum velle formet. Primum ergo in objecto distingue: quia aliud est bonum increatum, quod est primum et summum bonum, et ideo a diligente seipsum primo et summe volendum: aliud creatum, quod ideo bonum est, quia a summo bono profluit ut a principio, et ad ipsum refluit ut ad finem. Genes. 1: « Vidit Deus cuncta quae fecerat, et erant valde bona. » Dionysius: « Optimum est optima adducere. » Quamvis autem horum bonorum sit quaedam analogica convenientia, multa tamen differentia: nam primum bonum est bonum essentialiter, secundum participative. Primum finis, secun-



dum ad finem. Primo fruendum, et ideo illud propter se appetendum et volendum. Augustinus: « Frui est amore alicui rei inhaerere propter se ipsam. » Secundo utendum, et ideo propter aliud appetendum. Augustinus: « Uti est id quod in usum venerit referre ad optimum id quo fruendum est. » Verum inter utilia ordo est: nam quaedam secundum se magis, quaedam minus ad finem dirigunt, et ideo secundum se quaedam magis, quaedam minus utilia et volibilia sunt. Unde sicut in scibilibus, secundum Aristotelem, plurima propter se volumus quidam scire, propter aliud autem volumus, ut per haec aliquid aliud cognoscamus: ita et in volibilibus aliqua non propter se sed propter aliud volumus. Bonum autem creatum aliud naturae, aliud fortunae, aliud gratiae; quorum quodlibet multiplex esse cognoscitur, si a generibus ad species descendatur: sed bona haec omnia, quoniam non summe bona sunt, magis et minus recipiunt, et regulariter unumquodque eorum tanto melius, quanto summo bono propinquius. Bonum aliud simplex bonum, aliud secundum quid; ut quod bonum est cum determinatione diminvente, ut bonum nunc vel hic, vel huic. Nota ergo pro regula, cum diligere se sit sibi bonum velle, velle sibi bonum simpliciter est diligere se simpliciter; et velle sibi bonum secundum quid, est diligere se secundum quid: verbi gratia: Bonum est aurum, ut dicit Augustinus: Bonae divitiae, bonae possessiones. Velle ergo sibi aurum et divitias, est bonum sibi velle: non tamen est hoc simpliciter se diligere, sed tantum secundum quid, quia et bonum volitum bonum est secundum quid; bonum hic non ubique, nunc non semper, huic bene utenti non cuilibet abutenti. Gratiam autem et gloriam sibi velle, cum haec simpliciter bona sint, est simpliciter se diligere. Et quia bono creato malum opponitur; cum multa sint bona, multa et mala: aliud enim est malum culpae, aliud poenae, quorum quodlibet multiplex, ut patet speculanti. Et sicut est bonum bono melius, ita et malum malo pejus. Et est malum aliud simpliciter, aliud secundum quid. Nota ergo, accessus ad unum oppositorum est recessus ab alio; unde si me diligens, bonum mihi volo, consequenter malum oppositum mihi nolo: et sicut inter bona quae mihi volo, quaedam propter se, quaedam propter alia appeto, quaedam magis, quaedam minus volo; ita et inter mala quae nolo, quaedam propter se, quaedam propter alia, quaedam magis, quaedam minus fugio. Sed, ut dicit Aristoteles in 2 Caeli et Mundi, quando unum contrariorum ponitur oppositum alteri, est cognitio eorum velocior. Nota ergo, ei quod est diligere contrarium est odire; sicut ergo bonum sibi velle vel malum sibi nolle est se diligere, ita bonum sibi nolle et malum sibi velle est se odire: nam si oppositum de opposito, et propositum de proposito. Sunt autem contraria mediaia haec duo habentia neutrum pro medio: sicut velle et nolle medium habent nec velle nec nolle. Et sicut volendo sibi bonum simpliciter vel secundum quid, contingit se simpliciter vel secundum quid diligere; ita bonum tale vel tale nolendo, et malum simpliciter vel secundum quid volendo, contingit se odire simpliciter vel secundum quid. Nihil autem prohibet contraria eidem inesse, sed non eodem modo, sed alterum simpliciter alterum secundum quid: ut patet quia Aethiops est albus

dentem secundum quid, et niger simpliciter: et cygnus e converso albus simpliciter, et tamen secundum oculum niger secundum quid. Sic aliquando simpliciter me diligens, secundum quid odio, aliquando e converso. De primo Lucae 14: « Si quis venit ad me, et non odit. . . adhuc autem et animam suam. » Gregorius: « Bene animam nostram odimus, cum ejus appetitum frangimus, cum ejus desiderii non acquiescamus. » Joan. 12: « Qui odit animam suam in hoc mundo, in vitam aeternam custodit eam; » quam nisi simpliciter diligeret, ad tantum bonum non custodiret. De secundo Psal. 10: « Qui diligit iniquitatem, odit animam suam. » Joan. 12: « Qui amat animam suam, perdet eam. » Augustinus: « Noli amare ne perdas; noli amare in hac vita, ne perdas in vita aeterna. » Cum diligere se sit sibi velle bonum, secundum multiplex velle, multiplex est diligere. Triplex autem velle distinguit Augustinus super illud Apost. « Velle mihi adjacet: » « Est enim velle naturae, velle vitii, et velle gratiae. » Velle naturae per se impotens est, nec sufficit ad meritum, sed vincitur a velle vitii, nisi velle gratiae subveniat; sed velle vitii fugat, et velle naturae liberat. Igitur secundum triplex velle triplex est dilectio: scilicet naturalis, libidinosa et gratuita. Prima indifferens, de qua Apostolus Ephes. 3: « Nemo unquam carnem suam odio habuit, sed nutrit et fovet eam. » Secunda mala, de qua Apostolus 1 Tim. 5: « In novissimis diebus instabunt tempora periculosa, et erunt homines se ipsos amantes. » Tertia bona, de qua dicitur, « Diliges proximum tuum sicut teipsum. » Verum quodlibet velle geminum, et consequitur diligere bipartitum. Est enim naturam considerare dupliciter: primo ut natura est, et sic habet velle naturae: secundo ut deliberativa, et sic habet velle rationale. Unde Damascenus distinguit voluntatem duplicem: naturalem qua volumus nobis bona naturalia, sicut esse, vivere, et intelligere et similia, quae non possumus non velle: et rationalem qua possumus aliquid velle et aliquid nolle. Item vitium aliud sensualitatis, aliud rationis; et secundum hoc velle vitii duplex; vel vitiatæ sensualitatis, vel vitiatæ rationis. Item gratia duplex: scilicet gratis data et gratum faciens; unde et duplex velle gratiae. Sex ergo differentiae ipsius velle, et sex constituunt differentias in diligere: quorum primum est pure naturale. Hoc indifferens est, quia propter naturalia nec laudamur nec vituperamur. Item necessarium est, quia potentiae naturales non habent se ad opposita, sed ad alterutrum determinate. Unde sicut necessarium est se amare, sequitur quod impossibile est naturaliter se odire. Augustinus super illud Joan. ult. « Ducet quo tu non vis »: « Amorem vitae, nec Petro senectus abstulit. » Item commune est rationalibus et brutis, et etiam quodammodo inanimatis, quia sequitur naturam communem, de qua Aristoteles « natura inquirimus desiderare quod melius est »: melius autem esse quam non esse: et cum esse sit quoddam bonum, et omnia naturaliter bonum appetunt, omnia suo modo se diligunt. Secundum deliberativum est sive rationale: hoc proprium est naturae rationalis in quantum talis; sic diligere se praecipitur naturali jure, cujus transgressio sufficit ad demeritum, sed observantia per se non sufficit ad meritum. Et quia potentiae rationales habent se ad opposita, hoc modo possum

me diligere, possum et odire: ut patet in his qui bonum, quod naturaliter necessario sibi volunt, hoc ex deliberatione nolunt, et malum oppositum sibi volunt, ut qui seipsos occidunt, vitam nolentes, et mortem volentes, naturae legem se odiendo transgredientes, et de eo ipso mortaliter peccantes. Similiter omnes homines, secundum Aristotelem, naturaliter scire desiderant, et tamen quidam ignorantiam affectant. Quia vero natura non stetit in sua rectitudine et integritate, sed vitiata est et corrupta; ex corruptione ejus surgit velle vitii, quo sibi homo bonum vult vitiose, et diligit se libidinose. Vult, inquam, sibi bonum sensibile, ut, honores ex vitio superbiae, divitias ex vitio avaritiae, voluptates ex vitio carnis concupiscentiae, et sic de aliis: et haec quidem omnia bona sunt, et ratione qua bona appetuntur, et delectant adeptae: sed naturae rationali mala, quia disconvenientia: natura enim rationalis non his sensibilibus bonis delectanda est, sed potioribus, scilicet intelligibilibus, a quibus se avertit, cum ad ista fruenda se convertit, et ideo peccat, quia male se amat, et verius se odit quam diligit, quia plus sibi nocet quam prosit. Joan. 12: « Qui amat animam suam, » perdet eam. » Boetius: « Vos Deo mente consimiles, a rebus infimis excellentis naturae ornamenta captatis, nec intelligitis quantam Conditori vestro injuriam faciatis. Ille genus humanum terrenis omnibus praestare voluit, et vos dignitatem vestram infra infima quaeque detruditis. » Nam si omne quod cujusque bonum est, id eo ejus est constat esse pretiosius; cum vilissima rerum bona vestra esse judicatis, eisdem vosmetipsos vestra existimatione submittitis. » Augustinus in Confes.: « Bonum quod amatis a Deo est; sed quoniam ad illud bonum non refertur quod bonum est et suave, sed amatum erit juste, quia injuste amatur deserto illo a quo est quicquid bonum est. » Sed quia semper accessus ad unum oppositum est recessus a reliquo; quando si amans me volo mihi bonum sensibile, nolo et fugio malum oppositum, ut humiliationem, paupertatem, et similia. Est igitur tertium diligere, quo libidinose me diligo, cum sine consensu rationis per vitium sensualitatis haec bona sensibilia mihi volo, non secundum exigentiam naturalis necessitatis, vel providentiam opportunae utilitatis, sed secundum concupiscentiam voluptatis. Quartum est cum vitio sensualitatis ratio vitiosa consentit; et hoc se diligunt, qui plena voluntate haec omnia sibi non ad utendum, sed ad fruendum et abutendum improbe concupiscunt. Sapient. 2: « Venite et fruamur bonis quae sunt. » Utrumque horum malum est et peccatum: sed primum veniale, et ideo cohibitum. Secundum mortale, et ideo prohibitum. Illic est amor sui, de quo dicit Augustinus, quod est fundamentum civitatis diaboli. Ex eo enim quod diabolus privato amore nimis se amavit, bonum excellentiae immoderate sibi appetivit, et sic aeternae confusionis Babyloniam sibi et suis imitatoribus inchoavit. Item de hoc Gregorius dicit, quod sicut in bono opere desidia facit minor amor Dei, sic fraudem nimius amor sui. Fraudem enim facit in opere Dei, qui vel vires subtrahit, eo quod diligens se vult sibi bonum commodi per vitium accidia, vel opus ad utilitatem propriam convertit, volens sibi bonum laudis per vitium vanae gloriae. Cavendus igitur valde talis amor, qui et malum initiat, et bonum vitiat. Cete-

rum gratia naturam vitiata reparat, et elevat curvatam, et perficit imperfectam. Duplex autem est gratia: una gratis data: haec et multiplex est, sed hic exempli causa (1) accipe pro gratis data virtutes informes; alia gratum faciens, ut gratia caritatis: haec vera gratia dicitur, quia per hanc primum homo Deo gratus efficitur. Quintum ergo diligere est secundum velle gratiae gratis datae, cum rationem naturalem et naturam rationalem virtus adjuvat, ut malas et deformantes circumstantias actui dilectionis per vitium additas abiciat, et bonis aliquibus ipsum vestiatur. Etsi enim virtus informis, quia informis, non usquequaque sufficit ad meritum; eo tamen quod virtus est, aretat vitium, et cavet demeritum. Unde humilitas etiam informis non permittens hominem bonum pompae per superbiam sibi velle, diminuit vitiosum diligere; et inde est quod dicit Gregorius: « Qui non amat gloriam, » non sentit contumeliam: et sic de virtutibus aliis » et vitiis similiter judicamus. » Sextum autem diligere ex caritate procedit, quod primum filios regni a filiis perditionis dividit, et ad meritum sufficit. Virtus enim caritatis omni arte certiori velle vitii penitus fugans, et velle naturae penitus liberans, vestit actum dilectionis omnibus circumstantiis debitis et necessariis, ut diligit homo quod debet, quantum et quomodo, et cujus gratia debet, et sic de aliis. Quod debet, quia se hominem, scilicet corpus et animam, sed propter animam corpus, et ideo magis animam quam corpus; quamvis dicat Gregorius: « Nemo proprie ad semetipsum habere » caritatem dicitur, sed dilectionem, ipse in alterum tendit, ut caritas esse possit; » quod supplendo verificatur, quia homo per caritatem non tantum seipsam, sed et proximum diligit; et etiam cum seipsum diligit, idem est secundum rem dilectum et diligens, alterum tamen secundum rationem ut agens et patiens. Item quomodo debet, ut sapienter, scilicet ut cum se diligens bonum sibi velit, magis bonum magis velit, et minus minus, et minimum minime, et maximum maxime. Tria autem distinguit Augustinus bonorum genera; scilicet bona magna, minima et mediocria. Virtutes, inquit, quibus recte vivitur, magna bona sunt. Species autem quorumlibet corporum, sine quibus recte vivi potest, minima bona sunt. Potentiae vero animi sine quibus recte vivi non potest, media bona sunt. Quod ergo tibi et proximo eligas vel respuas, discreta edocet caritas. Unde etiam secundum Bernardum, « Zelus sine discretionem errat; » quod si errat, a caritate degenerat. » Item quantum, ne plus vel minus debito, scilicet ut minus diligit se quam Deum, et magis quam proximum, hoc spectat ad ordinem caritatis, de quo Augustinus: « Ille est qui inordinatam habet dilectionem, aut » qui diligit quod non est diligendum, aut non diligit quod est diligendum, aut aequae diligit quod minus vel amplius diligendum, aut minus vel amplius quod aequae diligendum. » Item cujus gratia, id est propter quid, ut scilicet propter Deum, quem summe prae omnibus dilectis caritas diligit, etiam propter ipsum diligit quicquid amat. Cum diligere se sit bonum sibi velle, refert quomodo velis; utrum voluntate habituali, an actuali. Si actuali, utrum absoluta vel conditionali. Si absoluta, utrum semiplena, de qua dicitur Prov. 5: « Vult et non

(1) *Al. ex causa.*

« vult piger: » an plena, quae pro facto reputatur, secundum illud Augustini: « Si desit facultas, non quaeritur nisi voluntas. » Omnes igitur, ut ait Augustinus, volunt esse beati. Beatitudo autem est status omnium bonorum aggregatione perfectus. Omnes igitur sibi bonum volunt, et simpliciter bonum, et ita omnes simpliciter se diligunt: sed plerique non plene se diligunt, quia illud plenum bonum semiplene sibi volunt. Plenae autem voluntatis haec sunt experimenta. Aut enim est respectu habiti, aut respectu habendi. Si respectu habendi, quicquid actuali absoluta et plena voluntate mihi volo, id si possum acquirere acquirō; et quo plenior voluntas, eo amplius quid possim examino; quid possum per me, et quid per alium, quid possum viribus, quid ingenio et artibus, quid possum faciliter, quid vix vel difficulter. Item si impeditus fuero, doleo; et quo voluntas plenior, amplior et dolor. Item si adeptus fuero, gaudeo; et plenitudo iucunditatis respondet plenitudini voluntatis. Item ejus oppositum nolo, et ideo si possum effugere effugio; quod vero habitum plena voluntate mihi volo; id si possum conservare conservo, et quanto voluntas plenior, tanto sollicitudo conservantis diligentior. Omnibus igitur praemissis collatis, patet esse tres divisiones generaliter dilectionis sui: nam alia simpliciter, alia secundum quid. Item alia naturalis, alia libidinosa, alia gratuita. Item alia plena, alia semiplena. Dilectio autem sui naturalis semiplena est, et non plena. Dilectio autem sui libidinosa, secundum quid est, et non simpliciter. Dilectio autem sui gratuita, et simpliciter est, et plena. Utrum ergo ex caritate teipsum diligas, et velle gratiae bonum tibi velis, ex bono voluto et ex volendi modo aliquantulum conjicere potes.

## CAPUT IV.

*De multiplici proximitate.*

« Diliges proximum tuum sicut teipsum. » Duplex est proximitas, vel propinquitas. Una extrinseca secundum convenientiam localem, secundum quam procul dicitur, quod in spatio locali distat multum, prope quod parum, propius quod minus, proximum quod minime. Alia intrinseca secundum convenientiam realem, secundum quod procul est quod parum convenit, prope quod multum, propius quod plus, proximum quod plurimum: de hac dicitur: « Diliges proximum tuum etc. » Sed nota, quod superlativus quandoque idem significat quod suus positivus cum hoc adverbio « summe, » et tunc proprie ponitur, nec recipit magis et minus: quandoque idem quod positivus cum hoc adverbio « valde », et tunc proprie recipit magis et minus, ita hic: unde inter proximos alius magis, alius minus proximus est. Est autem haec realis convenientia generaliter in tribus: in natura, in mutua indigentia, et in gratia; et secundum haec multiplicatur proximitas. Natura autem hominis bipartitur, quia naturaliter ex corpore et anima componitur: hinc surgit duplex convenientia, et consequitur proximitas gemina. Una generalis, qua ratione spiritus cum omnibus rationalibus convenis, et conformitate naturae proximi tibi proximus efficeris: quasi enim procul a te est natura entis inanimati, prope te natura vegetabilis, propius natura sensibilis, proxima rationalis. Conformitate ergo naturae rationalis mutuo sibi proximi sunt omnes naturam rationalem participantem,

anima intellectiva et intelligentia, scilicet homo et Angelus, non distincto utrum bonus vel malus sit. Porphyrius: « Sumus enim rationales et nos et dii, sed mortale nobis additum separat nos ab his. » Sed haec proximitas magis et minus recipit: nam cum spiritus angelicus et spiritus humanus specie differant, propior est homo homini et anima animae quam Angelus animae: similiter si Angelorum aliqui ab his specie differunt, si qui specie conveniunt, naturali convenientia mutuo sibi propiores sunt. Alia specialis, qua ratione corporis cum consanguineis convenis: quamvis enim omnes tecum ab eodem primo parente descendendo quodammodo generaliter cognati sint; tamen quantum ad specialem sanguinis propinquitatem, quidam tibi quasi procul sunt, quidam prope, quidam propiores, quidam proximi: et proximi tripliciter: vel in linea ascendente, sicut pater et mater, vel in descendente, ut filius et filia, vel in transversali, ut frater et soror. Ad hanc proximitatem reducitur legitima affinitas velut ad suam originem. Sed haec magis et minus recipit: comparamus enim interdum proximos lineae ascendentes ad proximos descendentes, scilicet parentes nostros; et nonnunquam haesitamus quos praepone in diligendo vel postponere debeamus omnibus aliis circumstantiis paribus. Item in linea transversali proximus est frater. Sed differenter prope est mihi frater meus ex matre tantum, propior frater ex patre tantum, proximus frater ex utroque. Item sicut homo es per naturam, ita indigens es per necessitatem et carentiam. Unde sicut forma convenit materiae quam perficit, et e converso; sic tibi convenit et proximus sit qui beneficium impendit; prope enim cogitando, propior volendo, proximus faciendo. Luc. 10: « Quis tibi videtur proximus fuisse illi qui incidit in latrones? » et ait: « ille qui fecit misericordiam: » qui fecit, inquit, non tantum cogitavit vel proposuit. Haec convenientia proximus est Angelus homini quem custodit, magister discipulo quem instruit, et generaliter quilibet alii cui beneficium impendit. Appellatio autem proximi relativa est: non enim aliquis proximus nisi proximo. Mutuo ergo proximi sunt et conveniunt, et qui impendit, et qui recipit beneficium. Potenti enim beneficium impendere, quasi prope est qui indiget, propior qui magis, proximus qui maxime. Geminatur autem quodammodo haec propinquitas, cum mutua est necessitas, et mutua benefaciendi facultas. Unde, cum uterque proximorum alterius beneficio in aliquo indiget et recipit, in aliquo abundat et indigenti impendit, secundum illud 2 Corinth. 8: « Vestra abundantia illorum inopiam suppleat. » Secundum hanc proximitatem omnem contingit reducere societatem: beneficium enim mutuo impendit et recipit vir uxori, et uxor viro, dominus servo, servus domino, et sic de aliis omnibus aliqua societate convenientibus: de quibus Propheta Amos 5: « Numquid ambulabunt duo pariter, nisi convenerit eis? » Sed nota; sicut secundum magis et minus diversificantur beneficia, sic et ista proximitas. Sicut es homo per naturam, sic gratus et bonus per gratiam; in qua qui tecum conveniunt, et boni sunt, et proximi tui sunt: tibi enim actualiter bono quasi prope est aliquis per potentiam nudam qua fieri potest bonus, propior per dispositionem, proximus per necessitatem, quae conjuncta est actu. Sed et hic sunt gradus: quoniam inter bonos alius



minus, alius magis bonus. Hoc modo proximi sunt comprehensores viatoribus bene justis, quia una est in specie, licet statu differens gratia gratificans utrosque. Item et Angeli hominibus: qui licet specie distent, et differant quoad naturalia, eadem tamen in specie sunt eorum gratuita. Large autem hoc modo tripliciter est tibi aliquis proximus: vel in re, sic quilibet vere bonus: vel opinione, sic quilibet qui nescitur malus, et ideo praesumitur bonus: vel spe: sic quilibet viator malus, de quo cum non sit desperandum, et si modo sit malus, speratur tamen futurus; et ita spe conversionis est proximus. Secundum hoc dicit Magister in Sententiis, quia proximus dicitur quatuor modis: conformitate naturae, propinquitate sanguinis, beneficiorum exhibitione, spe conversionis. Prima proximitas et secunda ortum habent a natura, quae est principium stabile, et ideo stabiles. Tertia et quarta, a voluntate; et ideo mutabiles, quia voluntas est principium mutabile. Cum enim sit potentia rationalis, habet se ad opposita: et ideo qui nunc est proximus meus proximitate tertia in beneficium impendendo, potest fieri non proximus voluntate mutata malum mihi faciendo; et similiter in quarta proximitate contingit, cum bonus a bonorum similitudine se elongans, malus fit, et postmodum in malo finaliter perseverans, damnatione perpetua inconvertibilis factus, spe conversionis proximus esse desistit.

#### CAPUT V.

*Quomodo diligendus proximus dilectione amicitiae.*

• Diliges proximum tuum etc. • Dupliciter proximus: scilicet dilectione amicitiae et concupiscentiae. Primo ergo quantum ad dilectionem amicitiae, secundum considerationes supra positas de dilectione tui, nunc procede regulariter in dilectione proximi. Et cum diligere proximum per amicitiam, sit velle ei bonum; ad cognoscendam dilectionem, et bonum volitum, et volendi modum, et voluntatis radicem vel principium distingue. Sicut enim simpliciter vel secundum quid, semiplene vel plene, naturaliter, gratuite, vel libidinose contingit diligere seipsum, similiter et proximum. Item consideratio radicis, etsi difficilior, tamen principalior: si enim radix sancta, et rami. Secundum ergo tres radices volendi tripliciter distinguitur dilectio proximi, scilicet naturalis, gratuita et libidinosa. Quarum prima bona, sed nec meritoria nec demeritoria, et ideo indifferens quantum ad hoc; secunda bona, tertia mala. Sed eum radicem quaelibet sit gemina, sex inde pullulant generales motus dilectionis proximi logice convenientes, ethice differentes: quorum quatuor consequenter se habent: scilicet naturalis, deliberativus, gratuitus a gratia gratis data, et gratuitus et gratia gratum faciente: quorum posterior semper addit super priorem, et completior est ipso, eum fortassis motus unus et idem in substantia sic diversificatur, sicut eadem linea aliter a physico, aliter a mathematico consideratur. Primus ergo motus dilectionis in proximum est pure naturalis, surgens ex natura ut natura: quae etiam in deliberatione circumscripta, tres primas proximitates cognoscit, et super eas motum facit, unde ratione conformitatis non solum animal rationale, sed omne animal diligit sibi simile. Matth. 15. Ratione consanguinitatis non solum homo, sed etiam gallina congregat pullos suos sub

alas potius quam alienos. Joan. 10. Ratione beneficii impensi ovis lupum fugiens sequitur pastorem. Catulus in extraneos latrans, domino suo cauda blanditur. Tob. 11. De quo Matth. 5: « Si diligitis eos » qui vos diligunt etc. Si salutatis fratres vestros » etc. » Gregorius: « Sunt qui diligunt proximos, » sed per affectum cognationis et carnis etc. » Sed aliud est quod sponde impenditur naturae: aliud quod praeceptis dominicis ex caritate debetur obedientiae. Secundus est deliberativus vel rationalis, surgens ex natura in quantum collativa, quae per deliberationem haec eadem advertit, et plenius cognoscit: quicquid enim cognoscit virtus inferior, et superior, sed non e converso. Naturae vero in quantum rationalis, indita est lex naturalis, quam conferendo legit, et exinde commonefacta fortius proximum diligit, quia debitum, quia naturale praeceptum, quia non diligens omittit, odians in legem committit, omittens et committens poenae reatum incurrunt. Sed quia potentiae rationales habent se ad opposita, radix haec una, sed non uno modo se habens, nunc motum dilectionis, nunc motum odii germinat, interdum etiam quasi prorsus a germine vacat, secundum illud Rom. 1: « Sine affectione. » Isa. 49: « Numquid oblivisci poterit mulier infantem » suum, ut non misereatur filio uteri sui? » Glossa: « Duritia mentis vincens juri naturae. » Tertius est imperfecte gratuitus, surgens ex natura mediante aliqua gratia gratis data, qualis est virtus informis, et similia; quae naturam disponit, ut praemissa intimius advertat, et insuper ad considerandam in proximo Dei imaginem, et similia deliberationis naturalis cognitionem transcendentia sublevat, eademque deliberationem adjuvat ad vestiendum motum dilectionis aliquibus circumstantiis bonis, ad quod per se deliberatione non sufficere. Quartus est perfecte gratuitus et gratus, surgens a natura per gratiam gratum facientem perfecte, quam rationalis potentia, scilicet voluntas deliberativa, per habitum caritatis tres primas proximitates secundo, sed quartam principaliter considerantis adjuta, omnibus debitis circumstantiis vestit, et meritorium producit. Septem autem generales circumstantias enumerat Aristoteles in Ethic.: Quis, quid, circa quid, quo, cujus gratia, quantum, et quo modo. Haec per ordinem in actu dilectionis hujus invenies. Primo quis agens; quia anima gratificata in quantum talis: in quo tangitur et subjectum agens, scilicet rationalis animae natura, et forma cujus virtute agitur, scilicet caritas vel gratia, qua circumscripta non esset debitus agens: virtus enim est quae habentem perficit, et ejus opus bonum reddit. Aristoteles: « Non » quia bonum facimus boni sumus, sed quia boni » sumus bonum facimus. » Secundo quid agat; quia diligit: haec est debita actio quam et natura docet, et lex jubet: lex naturalis, et lex scripta, et vetus et nova. Roman. 13. « Qui diligit proximum, » legem implevit. » Haec est dilectio amicitiae, quae in duobus motibus intra consistit: movetur enim amans in dilectum et pro dilecto. Primus motus est complacentia, qua affectus amantis amico per recordationem intellectum actualiter venienti statim occurrit, et ut placenti se aperit, et ut convenienti conjunctus est, et quadam dilectione stringit. Proverb. 27: « Ne obliviscaris amici tui in animo tuo: » Matth. 17: « Ille est Filius meus dilectus, in quo mihi » bene complacui. » Hoc tamen sic non in Deo intelligas ut in homine Secundus est a concupi-



scientia, qua moveor pro amico, cum ipsi bonum volo. Aristoteles: « Amicos justos esse volumus. » Tertio circa quod agat, quia circa proximum; haec est debita materia. Sed nota, sicut visio habet unam materiam propriam, vel objectum super quod transit, scilicet colorem, et aliam communem, scilicet substantiam vel quantitatem colori substantem; sic dilectio ex caritatis habitu prodians, habet proximum proximitate quarta pro materia principali et propria, aliis autem proximitatibus proximos habet pro materia communi secundaria. Sicut ergo non coloratum non videtur; sic omne illud in quo est proximitas deficit, si ex caritate non diligitur; sicut sunt damnati, qui quantumcumque consanguinei vel benefici fuerint, ex caritate non diliguntur, quia beati non sunt nec fieri possunt: et ideo cum caritatem habentibus, nec potentia nec actu conveniunt sed fortassis naturali amore amantur, ad quem et naturalis compassio sequitur, de qua dicitur Luc. 16: « Inter nos et vos etc. Et qui ad vos transire volunt etc. » Actus ergo dilectionis initiatur a natura subjecti respectu conditionum naturae objecti; progreditur in gratiam in subjecto respectu conditionum gratiae in objecto; consummatur in gloria subjecti respectu conditionum gloriae objecti. Caritas ergo facit diligere proximum in quantum justificabilis vel justus per gratiam, beatificabilis vel beatus per gloriam: et in hoc forsitan tenet regula Aristotelis: Si simpliciter simpliciter etc. quamvis ex dilectione naturali feratur instantia. Quarto quo, videlicet instrumento. Nota: potentiae animae sunt veluti instrumenta ejus ad agendum. Augustinus: « Anima « instrumenta cogitandi et diligendi habet a natura. » Duo autem sunt genera instrumentorum, secundum duas differentias potentiarum, scilicet animales et spirituales. Instrumentum igitur dilectionis est potentia voluntatis, sive affectus; signum autem dilectionis est operis effectus. Est autem affectus duplex, sicut voluntas: unus animalis sive sensibilis vel brutalis, qui conjungitur phantasiae, et communis est homini et brutis: ex hoc est dilectio sensibilis; alius rationalis sive spiritualis, qui conjungitur intellectui, qui communis est Angelo et homini. Ex hoc est dilectio intelligibilis. Sed non sufficit potentia ad actum, nisi disponatur per habitum. Potentiam ergo voluntatis ad eligendum actum dilectionis disponit habitus amoris: Hic autem est duplex: unus naturalis, qui dividitur contra mentem et notitiam, secundum Augustinum: alius gratuitus, qui dividitur contra fidem et spem, secundum Apostolum, « Haec est caritas. » Quo ergo diligendum est materialiter potentia voluntatis, et formaliter habitu caritatis? Augustinus in Confess.: « Aliter non « est vera amicitia, nisi tu, Domine, eam agglutines « inter haerentes tibi caritate diffusa in cordibus « eorum. » Quintus, cujus gratia: haec est causa finalis. Debito fine caritas motum nescit, quia proximum non fruens, sed ut utens diligit: hic non adhaeret amore homini propter seipsum, sed refert ulterius ad finem ultimum, scilicet Deum, qui est summum bonum quo solo fruendum est, quia propter se amandum. Nam etsi dicat Apostolus homini, « Ego te fruar, » addit tamen « in Domino. » Augustinus: « Qui homine in Deo fruitur, Deo potius quam « homine fruitur. » Sexto, quantum. Nota: duplex est quantitas in dilectione: una mensurans quasi extra, scilicet duratio: alia mensurans intra, scilicet magnitudo: et haec duplex: intensionis et extensio-

S. Th. Opera omnia. V. 17.

nis. Facit ergo caritas proximum diligi quantum debet. Quantum duratione, quia semper, idest finaliter. Prov. 17: « Omni tempore diligit qui amicus « est. » Amplius quantum intensione, quia magis quam corpus proprium. Ubi quidam distinguunt inter corpus passibile et impassibile, dicentes proximum amandum (1) corpore proprio passibili, sed minus impassibili: sed indistincte dicit Augustinus: « Amplius autem homo diligendus est quam corpus « nostrum, quia propter Deum omnia diligenda sunt: « potest nobiscum Deo perfrui, quod non potest corpus etc. » De hoc Joan. 15: « Majorem hac dilectionem nemo habet etc. » Item quantum: quia multo magis quam res nostras. Gregorius: « Praedicatorum sancti, ut possent proximos perfecte « diligere, studuerunt in hoc saeculo nihil amare, « nihil vel affectu possidere. » Gregorius: « Dum « rem diligimus temporalem, veram amittimus caritatem: dum pro terrena re pax a corde cum « proximo scinditur, apparet quod plus res quam « proximus amatur. » Amplius quantum, minus quam nos. Augustinus de doctrina Christiana: « Quatuor diligenda sunt ex caritate: quod supra nos, « scilicet Deus: alterum, quod nos sumus: tertium « quod juxta nos est, scilicet proximus: quartum « quod infra nos, scilicet corpus. » Sicut igitur Deum nobis, sic nos et proximo praeponimus in amando, ad minus in via secundum omnes, quamvis secundum aliquos non sic forsitan in patria. Unde Anselmus: « In illa perfecta caritate innumerabilem Angelorum et hominum, ubi nullus « minus diligit alium quam seipsum, non aliter « quisque gaudebit pro singulis, quam pro seipso. » Ex hac positione plura sequuntur forsitan vera, sed valde inopinata, et ideo pertranseo. Amplius quantum, in infinitum minus quam Deum: cum non sit diligendus nisi propter Deum; et propter quod unumquodque tale, et ipsum magis. Augustinus: « Deus « propter se omni homini amplius diligendus est. » Amplius quantum in comparatione unius ad alterum. Ex diversis causis alium alii aequae, vel minus vel magis, et hoc tripliciter: vel secundum intensionem; et sic magis diligo illum cui magis volo bonum, et minus cui minus, et aequae cui aequae: vel secundum intensionem; sic magis diligo illum cui magis volo bonum, vel plura, vel secundum utrumque. Super hoc quantum fundatur ordo caritatis ad proximum, quae secundum diversas causas alios alius magis, vel minus diligit, et secundum hoc praeponit vel postponit. Augustinus: « Ille est qui ordinat etc. » De hoc tamen ordine proximorum diligendorum, tam in via quam in patria, quaedam superficialiter adversa a sanctis diata inveniuntur, quae secundum diversas opiniones diversimode determinantur. Septimo, quomodo. Nota: modus aliquando significat mensuram, et sic dicit quantitatem. Augustinus: « Modius modo nomen « imposuit. » Aliquando dicit quodammodo formam, et sic dicit qualitatem: ita hic sumitur, unde contra quantum dividitur. Debito ergo modo caritas diligit proximum, secundum illud Joan. 12: « Mandatum « novum do vobis etc. » Christo ergo in amando proximum conformari debemus, ut eo modo quo ipse dilexit, diligamus. Hic autem modus in multis est. Quomodo igitur diligendus est? primo discrete, non fatue: quae discretio in tribus est: scilicet, ut

(1) *Supple magis.*

discernas in amando inter substantiam et substantiam, inter substantiam et accidens, inter accidens et accidens. Primo inter substantiam et substantiam. Duplex enim est in homine proximo substantia, scilicet corpus et anima: anima propter Deum, corpus propter animam est amandum; et ideo magis anima quam ipsum corpus. Aristoteles: « Propter quod unumquodque etc. » Augustinus: « Si placent corpora, Deum etc. » Si sic discrete diligis, et corpus non propter se, sed propter animam, indifferenter amas masculinum et feminam, cum in anima conveniant, licet in sexu corporis differant. Iterum inter substantiam et accidens: substantia enim et natura semper bona, quia a Deo, et ideo semper amanda; accidens aliquando malum et contra Deum, et ideo odiendum. Augustinus: « Sic diligendi sunt homines, ut eorum non diligantur errores. » Gregorius: « Et diligamus in proximis quod sunt, et odio habeamus quod in itinere Dei nobis obsistunt. » Psal. 158: « Nonne qui oderunt te Domine oderam etc. » Cum igitur in eodem subjecto sint natura et culpa, opus Dei et opus hominis; cavendum est discrete, ne vel propter malum bonum odias, vel propter bonum substantiae malum diligas, sed discrete singula singulis reddas amorem naturae, et odium culpa. Luc. 14: « Si quis venit ad me, et non odit patrem et matrem etc. » Gregorius: « Constat quia amando debet odisse proximum, qui sic eum odit sicut semetipsum. » Item inter accidens et accidens: accidentium enim quaedam sunt bona et ideo amanda, ut virtutes et gratia: quaedam his contraria, et ideo mala, et non amanda, ut vitia: quaedam indifferentia, ut naturalia, sicut pulchritudo, facundia et similia: vel advenientia, ut opulentia, scientia et similia. Haec omnia quae in uno subjecto unum sunt, facile incautum decipiunt, ut nonnunquam aliquis credat se ex caritate diligere Susannam quia timet Deum, et diligit forsitan ex carnalitate, propter id quod praemittitur, pulchram nimis. Sed si inter accidentia discernis hominem bonum, in quantum hujusmodi ex caritate diligis, non curans utrum senex, juvenis, pulcher vel deformis, pauper vel dives, et sic de aliis. 1 Joan. 5: « Omnis qui diligit eum qui genuit diligit et eum qui natus est ex eo. » Hieronymus: « Illa necessitudo etc. » Et hominem in quantum peccator non diligis, sed misericorditer odis. Boetius: « Dilige jure bonos, et miserere malis. » Augustinus: « Omnis peccator in quantum peccator, non est diligendus. » Sic Christus dilexit, qui Petrum amicissimum suum propter aliud et aliud accidens, nunc beatum dixit, nunc Satanam appellavit. Amplius, quomodo? spiritualiter, non carnaliter. Sic Christus dilexit, qui Petrum Joanni praeposuit, et ad matrem vocatus respondit: « Quae est mater mea etc. » « Quicumque fecerit voluntatem patris mei etc. » Sed et omnes amicos suos tribulationibus transitoriis exposuit, magis volens eis bonum spiritui utile, quam bonum carni delectabile. Apoc. 3: « Ego quos amo, arguo etc. » Proverb. 5: « Quem diligit Dominus, corripit etc. » Quomodo contra? Gregorius: « Sunt qui diligunt proximos etc. » Illi nimirum et proximos diligunt, et tamen illa supernae dilectionis praemia non assequuntur, quia amorem suum non spiritualiter, sed carnaliter impendunt. Amplius, quomodo? veraciter, non fictive vel simulate. Roman. 8: « Dilectio sine simula-

« tione: » 2 Corinth. 6: « In caritate non ficta: » 1 Joan. 4: « Non diligamus verbo neque lingua, sed opere et veritate: » Proverb. 11: « Simulatore ore decipit etc. » Joan.: « Senior Gajo, quem ego diligo in veritate. » Est autem veritas adaequatio signi ad signatum. Nota igitur, sicut intellectus habet signa, sic affectus sua. Notae et signa intellectuum sunt voces. Aristoteles: « Sunt ea quae sunt in voce, earum quae sunt in anima passionum notae. » In hoc signo veritas est, cum significat esse quod est, vel non esse quod non est. Aristoteles: « Contingit enuntiare quod est etc. » Et quia, ut dicit lex, in majore minus, et in toto pars intelligitur; et verum signum est quod esse partem significat, cum totum est. Unde si quatuor currentibus dicam quatuor currere: verum significo: similiter si dicam tres currere, verum significo, et adaequatur signum signato. Falsitas autem est in signo, cum deficit adaequatio: quod fit tripliciter. Vel cum significatur plus esse quam est, ut si tantum quatuor currentibus, dicam, sex currunt. Vel cum significatur esse quod non est, ut si non album, dicam album. Vel significatur id cui contrarium est, ut si album dicam nigrum esse. Sic omnino est in signis affectuum et amoris. In his enim est veritas, cum signum adaequatur signato, vel totum significat, vel partem in toto. Veraciter ergo diligit, qui vel tantum interius diligit quantum se diligere per familiaritatis signa exterius ostendit; vel plus diligit quam ostendat, quia totum affectum significare vel non potest vel nescit, vel ob aliquam causam non vult. Unde nec fallaciter Christus dilexit, qui quaedam signa dilectionis exterius majora Joanni, quem minus, quam Petro, quem magis dilexit, ostendit, quia Joannem non minus dilexi quam ostenderet, licet Petrum plus dilexit quam foris significaret. Nec signavit magis se diligere Joannem quam Petrum, sed magis signavit in quibusdam se magis diligere Joannem, quam significaret se diligere Petrum. Est autem falsitas in signo dilectionis tripliciter. Magna, cum significatur plus esse quam est, ut cum diligens significet se magis diligere quam diligit. Major, cum significatur quod non est, ut cum diligens se diligere significat. Psal. 77: « Dilexerunt Deum in ore suo. » Maxima, cum ostenditur id cuius contrarium est, ut cum odians amorem praetendit. Proverb. 27: « Meliora sunt vulnera diligentis, quam fraudulenta oscula odientis. » Habac. 2: « Vae qui potum dat amico in scens fel. » O quam veraciter Christus nos secundum utramque naturam amat, qui essentialem, et ideo infinitam dilectionem ostendit, qua ut Deus nos diligit beneficiorum effectibus magnis quidem valde et pene innumeris, sed tamen finitis, et ideo infinitum non plene significantibus ostendit: quinimo hanc dilectionem totam, et tantam quanta est, plene significare creaturae per effectum aliquem, etiam ipse omnipotens potenter non potest, quia causae immensae effectus ex necessitate mensuram habens aequari non potest. Sed et humanae dilectionis affectum, quamvis magnum esse erga nos plurima et maxima in nobis et pro nobis ut homo faciendo et patiendo significaverit, tota tamen et praecisa quantitas affectus ostensa non est, quia effectibus signantibus adhuc major est. Ecl. 25: « Beatus qui invenit amicum verum. » Si beatus qui invenit, qualis est qui perdit? Amplius quomodo? Efficaciter, non tepide. Gregorius: « Probatio dile-

« ctionis exhibitio est operis. » 2 Reg. 13: « O-  
 « stendisti amicitiam et fidem. » O quam efficaci-  
 ter Christus nos dilexit et diligit, qui humanae  
 dilectionis affectum tantis effectibus ostendit! Joan.  
 13: « Majorem hac dilectionem nemo habet etc. »  
 1 Joan. 4: « Si Christus nos dilexit, et nos debe-  
 « mus invicem diligere. Si Christus pro nobis a-  
 « nimam suam posuit, et nos debemus pro fratri-  
 « bus animas ponere. » 1 Joan. 3: Qui habuerit  
 substantiam etc. Amplius, quomodo? Gratis, non  
 mercenarie, ut non hominem propter res vel dona,  
 sed potius e converso. Aristoteles: « Amicos justos  
 « esse volumus etc. » Quo contra, Prov. 19:  
 « Multi colunt personam potentis, et amici sunt  
 « dona tribuentis; » et ideo dicitur Eecl. 12:  
 « Non agnosceetur in bonis amicus. » Poeta:

Cum fueris felix, multos numerabis amicos:  
 Tempora si fuerint nubila, solus eris

Non ita Christus. Psal. 23: « Bonorum meo-  
 « rum non indiges. » Amplius quomodo? Stabiliter,  
 non mutabiliter vel transitorie. Sic Christus Joan.  
 13: « Cum dilexisset suos, in finem dilexit eos: »  
 Proverb. 17: « Omni tempore diligit qui ami-  
 « cus est. » Si omni, ergo tempore prospere-  
 ritatis propriae, et tempore adversitatis alienae.  
 Quo contra, Eecl. 6: « Est amicus qui convertitur  
 « ad inimicitiam. » Vides igitur quemadmodum  
 motus dilectionis amicitiae in proximum producit  
 a natura: in quantum talis bonus bonitate naturae.  
 A natura deliberativa bonus in genere: a natura  
 adjuncta per gratiam gratis datam, bonus ex aliqua  
 circumstantia: a natura elevata per gratiam gratum  
 facientem, bonus meritorie. Verum ex natura vitio  
 libidinis depravata, quasi ex radice corrupta oritur  
 dilectio inordinata, qua proximum diligendo pecca-  
 mus: et si extra Deum, venialiter: si aequae vel  
 supra, mortaliter. Matth. 10: « Qui amat patrem  
 « aut matrem supra me etc. » Cum autem dile-  
 ctio et amicitia in duratione sua habeat principium,  
 medium et finem; quandoque in principio, quan-  
 doque in medio, et quandoque in fine vitiatur. Un-  
 de aliquando dilectio ex vitio libidinis nascitur. Non-  
 nunquam etiam amicitia quae sine vitio naturaliter  
 vel spiritualiter inchoatur, subintrante vitio carna-  
 liter terminatur. Galat. 3: « Sic stulti facti estis,  
 « ut eum spiritu coeperitis, carne consumnemini? »  
 Poeta:

Coepisti melius quam desinis: ultima primis  
 Cedunt: dissimiles hic vir et ille puer.

Quandoque etiam, licet vix et raro, contingit e con-  
 verso. Sic David Bersabee primum illicite in adul-  
 terio, postmodum debite dilexit in matrimonio. Sed  
 vix bono peraguntur exitu, quae malo sunt inchoa-  
 ta principio.

## CAPUT VI.

*Diligendus est proximus dilectione concupiscentiae.*

« Diligitur etiam proximus dilectione concupi-  
 « scentiae. » Nota: propinquitatis secundum conve-  
 nientiam realem duplex est: una logica, quae est  
 inter similia substantiali vel accidentali forma con-  
 formia: hanc operatur dilectio amicitiae. Alia phy-  
 sica, qualis est inter materiam et formam, quae

mutuo appetitu ad invicem inclinantur, donec na-  
 turaliter in termino convenientiae uniantur: haec  
 est inter masculum et feminam. Genes. 2: « Erunt  
 « duo in carne una. » Super hanc fundatur dile-  
 ctio concupiscentiae: sicut enim naturaliter concu-  
 piscit homo conveniens nutrimentum nutritivae ad  
 conservationem individui, sic et generativae ordina-  
 tae ad conservationem speciei. Haec dilectio est  
 appetitus vel desiderium, quod semper bonum est  
 bonitate naturae, sed in genere moris aliquando  
 est bonum in genere ex circumstantia, vel meri-  
 torie; aliquando malum venialiter vel mortaliter.  
 Quando vero bonum vel malum, et quando magis  
 vel minus bonum vel malum, cognoscitur distin-  
 guendo principium a quo est, finem vel terminum  
 ad quem est, materiam in quam, et modum vel  
 formam secundum quam est. Principium a quo est  
 motus iste, est natura. Haec autem duplex est: sci-  
 licet sensualitas, et ratio. Sensualitas dupliciter  
 consideratur: ut brutalis et ut humana. Humana  
 tripliciter consideratur: ut instituta et innocens, ut  
 vitiata fomite et corrupta, ut reparata per gratiam  
 et exercitium boni. Et consideratur dupliciter in  
 motu: quia movet aut per se, aut imperio supe-  
 rioris virtutis, scilicet rationis. Ratio dupliciter con-  
 sideratur: ut natura, et ut deliberativa. Haec triplex  
 in statu: ut instituta, vel vitiata fomite vel luxuria,  
 vel ut reparata: hoc dupliciter: vel per gratiam  
 gratis datam, scilicet per virtutem castitatis infor-  
 mis et politicae, de qua agit Aristoteles in Ethic.  
 Vel per gratiam gratum facientem, scilicet castita-  
 tem caritate formatam. Quoad terminum vel quoad  
 finem distinguitur; quia desiderium multiplex, secun-  
 dum Aristotelem. Hujus ut finis, hujus ut ad finem.  
 Finis duplex est: primus quid intendis facere, se-  
 cundus quid consequi vel acquirere. Intentio facien-  
 di terminari videtur in commixtione: intentio con-  
 sequendi in prole, voluptate vel simili. Potest ergo  
 esse appetitus et desiderium, vel ipsius finis, ut  
 coeundi et generandi, vel similitum: vel ejus quod  
 ad finem, ut videndi, et alloquendi: versus:

Visus, alloquium, contactus et oscula, factum.

Regulariter, cujus finis malus et illicitus, et i-  
 psum. Ubi ergo coitus illicitus, et igitur ipsum malum,  
 et ad hunc finem relata; sed secus est si ad hunc finem  
 non referantur, sed sistatur in ipsis: tunc enim judica-  
 buntur secundum se; secus si ad finem alium for-  
 tasse bonum referantur, cum de se indifferentia sint.  
 Unde dicitur. « Qui viderit mulierem; » non ab-  
 solute, « sed ad concupiscendam eam, moechatur. »  
 Augustinus: « Feminas videre non prohibemini,  
 « sed appetere etc. Non solum affectu, sed a-  
 « spectu appetitur et appetit concupiscentia femi-  
 « narum etc. » Regula Aristotelis: « Quod fini bono  
 « propius est, melius est in quantum tale; quod  
 « malo pejus. » Bonum est igitur homini mulierem  
 non tangere, sed et non sine causa audire vel vi-  
 dere: Vox enim blanda, et nequam digitos habet.  
 Job 31: « Pepigi foedus cum oculis meis etc. »  
 Gregorius: « Non licet intueri quod non licet con-  
 « cupisci. » Quoad materiam, supposita unitate na-  
 turae, diversitate personae, una specie duobus in-  
 dividuis, distinguitur inter masculum et feminam  
 sexu, inter suam et non suam lege; et sic de aliis  
 materiae circumstantiis, ex quibus fit actio licita  
 vel illicita. Ephes. 5: « Viri diligite uxores. » Prov.



5: « Serva carissimam tibi, in amore illius delectare jugiter. » Quo ad modum vel ad formam distinguitur inter voluntatem semiplenam et plenam, inter appetitum moderatum et immoderatum, et hoc vel parum vel multum, ut secundum hoc vel majus vel minus malum, veniale vel mortale. Regulariter idem est iudicium generale plenae voluntatis et actus. Unde prohibiti actus prohibita est voluntas, et cohibiti cohibita, liciti licita, debiti debita. Sed nota: hunc motum dilectionis proprie loquendo non elicit habitus caritatis, eum ipsum secundum diversitatem personarum et statuum imperat, tentat vel tolerat vel amputat vel fugiens declinat.

## CAPUT VII.

### *De causis et effectibus dilectionis.*

« Diliges proximum tuum sicut teipsum. » Dilectio gratuita, eum sit actio vel motus, causas habet et effectus. Causarum quatuor sunt genera: efficiens, materialis, formalis et finalis. Efficiens causa est unde principium motus, secundum Aristotelem: haec in motu dilectionis duplex est. Motor primus qui movet non motus, scilicet Deus. Boetius: « Stabilisque manens dat cuncta moveri. » Hic est Deus qui dat mandatum de diligendo, ut debeamus. Joan. 13: « Hoc est praeceptum meum. » 1 Joan. 1: « Hoc mandatum habemus a Deo, » non ab homine vel Angelo, sed a Deo, « ut qui diligit Deum, diligat etc. » Item addit exemplum ut sciamus. Joan. 13: « Mandatum novum do vobis, ut diligatis invicem sicut dilexi vos. » Item donat et spiritum et caritatis habitum, ut possimus. Augustinus: « In terra datur Spiritus sanctus « ut diligatur proximus. » Item promittit praemium ut velimus: comminatur supplicium ne omittamus: operatur motum, ut cooperantes agamus. Joan. 15: « Sine me nihil potestis facere. » Motor secundus qui movet motus, est anima rationalis in quantum talis, quae a Deo grata per formam gratiae quae inest substantiae per potentiam liberi arbitrii vel voluntatis dispositam habitu naturalis amoris et caritatis, producit hunc actum. Cum ergo cognitiva apprehendens objectum, vel materiam debitam conferendo, advertit conditiones ejus ipsam disponentes respectu motivae, et motum provocantes. Sunt enim decem moventia per modum efficientis: sex proprie et quatuor improprie. Proprie movet Deus Pater et Filius et Spiritus sanctus, qui tres sicut unus Deus, unus creator: et ita unus motor movens in hoc motu mirabiliter, insensibiliter, suaviter et utiliter. Item substantia animae, forma gratiae, potentia voluntatis. Voluntas enim est instrumentum seipsum movens, secundum Damascenum. Habitus naturalis amoris, habitus gratuiti amoris, scilicet caritas improprie et large movet objectum dispositum: delectabile enim apprehensum movet: sic et amabile, in quantum tale apprehensum intellectu, movet affectum: et fit intelligendo quasi motus ad animam, in diligendo quasi motus ab anima. Item finis. Aristoteles: Finis factivus non est nisi secundum metaphoram: principiat enim motum finis, prout est in intentione et spe; terminat autem motum et quietat, prout est in adeptione et re. Item mandatum. Item exemplum. Poeta: « Sanguis irritant animum demissa per aures etc. »

Utrumque ergo irritat, et ita movet, licet alterum magis altero. Seneca: « Homines magis etc. » Ad Hebr. 10: « Considerantes invicem in provocatione caritatis. » Circa materiam nota. Dilectio eum sit accidens, non habet materiam ex qua, sed in qua; et in quantum est accidens vel forma accidentalis, sic subjectum in quo est, et quod informat, et est ejus materia. In quantum vero est actio vel motus, sic materia ejus dicitur objectum proprium in quo est. Objectum autem considerari potest dupliciter: scilicet secundum substantiam, vel secundum rationem objecti; ut patet in colorato, quod est objectum visus et materia visionis in quantum coloratum, non in quantum substantia. Est autem duplex habitus amoris: scilicet naturalis et gratuitus: et secundum hoc duplex actus, et duplex materia vel objectum. Ex habitu naturalis amoris dilectione amicitiae diligo me principaliter et summe, etiam plus quam Deum. Ex habitu amoris gratuiti, e converso Deum principaliter, et summe, et Deum plus quam me. Propria ergo materia amoris naturalis ego: gratuiti Deus. Uterque amor intuetur proximum: habet enim proximus convenientiam mecum, secundum hanc cedit in materiam amoris naturalis: habet convenientiam cum Deo, secundum hanc in materiam gratuiti, scilicet caritatis. Augustinus de vera Religione: « Non sic homo ab homine diligendus est, ut diliguntur carnales fratres, vel filii etc. » Nec hoc inhumanum videri debet. Magis enim inhumanum est non amare in homine quod homo est, sed amare quod Filius est: hoc enim est non in eo amare quod ad Deum pertinet, sed amare illud quod ad se pertinet. Similiter si meipsum apprehendero tamquam alium, possum ad me vel ad Deum referre; et secundum haec pro materia amoris naturalis vel gratuiti habere. Nota tamen, quod sicut diversi artifices ex una eademque materia diversimode operantur, et sicut unam et eandem lineam aliter considerat physicus, aliter mathematicus: sic amor naturalis et gratuitus conveniunt in substantia dilecti quasi in communi materia; sed differunt in ratione diligendi et modo, quasi in operis forma. Nota etiam, quod sicut ignis aquam alterans naturaliter frigidam, actualiter contra naturam suam calidam facit, et tamen humidam dimittit, licet ipse sicut calidus, ita etiam siccus sit: et gratia caritatis naturam alterans in amore ejus quaedam tollit, et ad contrarium actum ipsam elevat supra se et quasi contra se quaedam secum compatitur, quae etsi sint cum ea, non tamen ab ea: sicut ab igne est, quod aquam calefacit, calefacta autem humectat; hoc tamen non est ab igne, sed a se. Cum igitur amor gratuitus primo et principaliter et summe diligat Deum pura caritate, nec in me ipso nec in proximo aliquid diligo nisi Deum; quamvis naturalis amor quaedam non quidem mala, sed imperfecta bona admisceat in statu viae, quae caritas non causat, sed tolerat et evacuat forsitan in statu patriae. 1 Cor. 13: « Cum venerit quod perfectum est, evacuabitur etc. » Conditiones igitur proximi per relationem ad Deum sunt ratio gratuite diligendi ipsum. Hae diversificentur secundum triplex esse, naturae, gratiae et gloriae. Quoad esse naturae, quatuor in proximo considero. Primum est, quod ille quem ex caritate summe diligo, eum fecit, et utique diligit quem fecit. Sap. 11. Diligitur autem effectus necessario ab eo qui causam efficientem



diligit, ut liber vel scriptura ob amorem scriptoris, pictura ob amorem pictoris, et generaliter omne opus ob amorem amati opificis diligitur. Quamvis autem Deus omnia fecerit et omnia diligit; ideo qui gratuite et intime diligit ipsum, omnia generaliter diligit propter ipsum; hominem tamen specialiter et Angelum, idest rationalem creaturam ex arte generali quasi specialius factam, juxta illud Gen. 1: « Faciamus hominem ad imaginem etc. » Secundum quod amicissimi mei imago est ipsum mihi in multis repraesentans, ut patet supra in decimo gradu amoris, magis debeo amare. Cara igitur sunt mihi generaliter omnia etiam irrationabilia, quia dicuntur et sunt carissimi mei quasi vestigia, cum quodlibet ipsorum sit ens, sit unum, verum et bonum: et ideo ducit ad illum qui summa et prima essentia est, unitas, et veritas et bonitas. Sed haec differenter mihi sunt cara, sicut differenter, secundum magis et minus impressa sunt eis cari mei vestigia. Specialiter tamen carus Angelus et homo in quo carissimi mei imago est: sicut enim honor imaginis ad prototypum pertinet secundum Damascenum, ita et amor. Diligitur imago Christi per hominem pieta in tabula vel panno debili, et hominem solum, non Deum, immo corpus hominis tantum, non animam, exiliter repraesentans. Similiter imago matris Mariae cum puero incisa in ebore, vel fusa metallo. Quantum ergo diligenda est ab amatore Dei haec indelebilis et incorruptibilis imago Dei facta secundum Deum et a Deo, repraesentans non puerum cum matre, sed Filium cum Patre, et Spiritum sanctum cum utroque. Quam clarum speculum esset, quod amanti cernere semper amati speciem repraesentaret! Tertium, quod amicissimus meus in ipso est non tantum ut causa in effectum, quae ingreditur aliquando secundum virtutem, non secundum substantiam, scilicet efficiens et finalis; non ut rex in regno, qui est secundum potentiam solum, et non semper secundum personalem praesentiam; non ut accidens in subjecto, quod separabile est et continetur et continet, indiget et indiget; non ut sigilli forma in cera quae deleri potest, non ut facies in speculo, non species rei cognitae in cognoscente, sed verissime, plenissime et intime in substantia virtute et operatione intimius quam anima in corpore. Quod si in omnibus sit, et ob hoc omnia mihi cara sunt; quia tamen receptum est in recipiente per modum recipientis, in rationabilibus firmiter inest, quia perpetua; plenius, quia magis capacia, et ideo magis amabilia. Et licet omnino e converso in ipso sint, et ideo amabilia; specialius et durabilius et plenius tamen rationabilia: et ideo magis amanda, quia in amicissimo meo, ad Rom. 10: « Ex ipso, per ipsum, et in ipso sunt omnia. » Act. 17: « In ipso enim vivimus, movemur et sumus. » Quoad esse gratiae sunt quatuor, quae super praemissa quatuor fundantur. Primum, quod amicissimus meus ipsum perfecit informando, et reformando per gratiam, qui ipsum fecerat formando per naturam. Ex quo sequitur quod sit amicissimi mei famulus, et filius; et ideo necessario amandus. 1 Joan. 3: « Omnis qui diligit eum qui genuit etc. » Item amicus amans et amatus. Joan. 16: « Jam non dicam vos servos etc. » Item sponsa. Oseae 2: « Sponsabo te mihi in fide etc. » 1 ad Corinth. 6: « Qui adhaeret Deo, unus spiritus est. » Secundum, quod amicissimo meo cujus imago est per

naturalia, similis etiam est per gratuita; per justitiam justo, per benignitatem benigno, et sic de aliis. 1 Cor. 11: « Imitatores Dei estote sicut filii carissimi. » Luc. 6: « Estote misericordes etc. » Matth. 5: « Estote perfecti. » Tertium, quod amicissimus meus in ipso est secundum effectus gratiae multipliciter: ut hospes in domo: cara mihi domus, cujus hospes carissimus: ut hortulanus in horto evellens et destruens: ut Pontifex in templo consecrans aspergendo, scribendo et unguendo etc.: ut magister in schola docens: ut sponsus in thalamo quiescens: ut gemma in annulo ornans, et similia. Quartum est, quod ipse est in amicissimo meo speciali modo. 1 Joan. 4: « Deus caritas est etc. » Manet, inquam, mirabiliter, quia multo conjunctius multoque utilius sibi quam membrum in corpore, palmes in vite, planta in terra, piscis in aqua, animal spirans in aere, carbo in igne, liquor in vase, scriptura in libro, locatum in loco conveniente et proprio. Et tamen in his omnibus non possum non diligere quod manet, si illum diligerem intime in quo manet. Augustinus: « Si placent animae, in Deo amentur etc. »

Ex praemissis collige quatuor condiciones in proximo quoad esse gloriae, quae sunt materia et ratio diligendi gratuite. Est enim gloria gratia consummata. Secundum haec igitur video, quod amicissimus meus ipsum perfecit ultima perfectione, et ipse amicissimo meo similis est ultima assimilatione, et amicissimus meus in ipso, et ipse in amicissimo meo, ultima, completissima, et inseparabili unione. His omnibus quoad amorem gratuitum tenet regula, Si simplex ad simplex etc. Praeter haec omnia ratio gratuite diligendi proximum est voluntas amicissimi mei hoc volentis et hoc jubentis, qui etsi catulum vel lapidem vel minus aliquid propter ipsum diligi non quidem mandasset, sed voluntatem suam tantummodo, vel nutu minimo insinuasset, caritati pure perfectae et non impeditae satis praeceptum esset. 1 Petr. 5: « Castificantes corda vestra in obedientia caritatis: » non tantum necessitatis. Unde etiam ob hoc caritas damnatos simpliciter non amat, quia amicissimi sui aeternae voluntati omnino concordat. Cantic. 1: « Recti diligunt te. » Augustinus: « Recti sunt qui voluntatem suam dirigunt secundum voluntatem Dei, quae regula est; et voluntatem melioris praeponunt voluntati suae. » De qua forma nota: sicut substantiarum duplex est forma, una quae est extra, scilicet forma exemplaris secundum quam facta est: exemplar enim et idea cujuslibet rei factae, sive artificialis sive naturalis, formaliter est in mente factoris, secundum quod distinguit Augustinus arcam in mente, et arcam in opere. Alia quae est intra, est duplex: substantialis, dans esse primum et simplex, ut in homine anima vel humanitas: et accidentalis, dans esse secundum et secundum quid, ut quantitas, qualitas et similia. Sic et actionum. Dilectio igitur, cum sit actio, ad substantiam relata, cujus accidens est, est forma ejus: sed secundum se considerata, quasi triplicem formam habet: exemplarem in mente divina: videt enim Deus cum proximum diligo, et videt non solum intellectu speculativo, sed etiam practico: ipse enim facit me diligere, et scit utique quod facit, cum volens faciat, et ideo non ignorans. Scit autem per ideam non quae sit in ipso ab actione creata, sed quae sit actionis causa substantialem; haec est bonitas gratuita in-

separabilis. Quod sic patet. Actionum alia bona, alia mala in genere moris, quamvis omnia bona in genere naturae. Malorum alia mala in se, ut occidere hominem: alia secundum se, et haec est mala formaliter, ut mendacium, furtum, et similia, quae non solum dicunt actionem, sed concernunt deformitatem: et ideo haec ita sunt mala ut non possint fieri bona, vel saltem non mala; licet aliqua magis, aliqua minus mala. Ita ex opposito in bonis. Cum igitur caritas sit forma omnium virtutum, actus ejus tantummodo bonus est formaliter in se et secundum se, et ideo non potest non esse bonus bonitate gratuita, quae in viatore non est meritoria. Omnium autem aliarum virtutum actus informes esse possunt, nec necessario meritorii sunt. Augustinus: « Dilectio Dei et proximi, propria et specialis » virtus est bonorum, cum ceterae virtutes bonis » et malis possint esse communes. » Accidentalem formam habet; hic est fervor: et hic duplex, scilicet fervor in actu et in affectu. Fervor autem alius sensualis, alius intellectualis vel rationalis. Cant. ultim. « Lampades ejus lampades ignis atque flammae. » Et videtur primus esse quasi accidens separabile, sed secundus quasi inseparabile. Stante ergo bonitate gratuita in actu dilectionis quasi substantiali forma, fervor secundum diversas causas ad modum accidentis nunc intenditur nunc remittitur, nunc adesse nunc abesse videtur. De fine loquitur Aristoteles in 7 Metaph., dicens, quod omne agens habens intellectum, non agit illud quod agit nisi propter rem aliquam, quae est ultimum actionis: ultimum enim est finis ad quem intenditur. Dicitur autem finis dupliciter: respective, scilicet respectu praecedentis, hoc est secundum quid: absolute, hoc est simpliciter, et hoc est vere ultimum, quia non refertur nec ordinatur ulterius. Primo modo sic ipsum diligere est finis; nam ad ipsum ordinari habent omnes actus cognitivae et inferiorum potentiarum, sicut potentia ad potentiam, et habitus ad habitum: volo enim proximum noscere, ut agnatum diligam; quia, secundum Augustinum, invisam possumus diligere, incognitam nequaquam. Sicut igitur secundum Aristotelem, somni finis est vigilia, sentire vero et sapere vigiliae finis; omnibus quidem inest alterum horum. Bona enim haec, finis autem optimum. Sic diligere quod his melius, finis est horum. Ipsam autem diligere ulterius ordinatur, donec ad finem finium veniatur. Habet autem actio diligendi duplicem finem: primus est id quod intendo facere diligendo proximum. Intendo autem diligendo implere Dei mandata. Jacob. 2: « Si tamen legem perfeceris » legalem; » ad Rom. 15: « Qui diligit proximum, » implevit legem ». Imitari Christi exemplum. 1 Corinth. 11: « Estote imitatores Dei, sicut filii carissimi, et ambulate in dilectione. » Exercitare in actum habitum donatum. 2 Corinth. 6: « Videte » ne in vacuum gratiam Dei recipiatis. » Dare exemplum, et provocare proximum ad bonum. 1 Timoth. 4: « Exemplum esto fidelium in caritate: » Ad Hebr. 10: « Considerantes invicem provocantes » in caritate: » Lucae 10: « Vade et tu fac similitudinem. » Et horum finis honorare Deum et Dominum meum carissimum. Honorate carissimi, Deum meum: ad ejus gratiam si referre debeo quod manduco et bibo, multo potius quod diligo. Ad hoc ultimum caritate ordinante tendunt omnia praecedentia, et uniuntur in ipso. Nec ista ita in numerum ponuntur cum actu diligendi, sicut connumerantur

in supposito genus cum specie, ut animal cum homine: nec sicut intentio vel intellectus cum re, ut homo cum Socrate: nam ubi unum propter alterum, in utroque unum. Secundus finis est id quod intendo consequi vel acquirere. Hoc est autem vitare supplicium, ut finis a quo: assequi praemium, ut finis ad quem. Vitatur autem per dilectionem supplicium vel poena duplex: praesens, quae est in odio et invidia: concomitans et annexa, ut accidens inseparabile. Versus:

Justius invidia nihil est, quia protinus ipsum  
Auctorem rodit, cor cruciatque suum.

Futura, quae infligetur pro dilectionis omissione et oppositi commissione: utraque multiplex valde. Praemium similiter duplex: praesens et futurum. In praesenti quidem multiplex est utilitas: primum quidem quoniam si gratuite diligatur proximus, habetur ex hoc certitudo vitae aeternae: sicut enim vita naturalis quam habet corpus ab anima, cognoscitur et definitur sensu et motu; sic et vita gratiae, quam habet a Deo substantia animae. 1 Joan. 5: « Nos scimus quoniam translati sumus de morte ad vitam. » Nota: scitur effectus per causam demonstratione propter quid: sic scio quod luna eclipsatur, quoniam terra interponitur. Causa per effectum demonstratione quia: terram interponi scio, quoniam luna eclipsatur. Ita hic per motum gratuita dilectionis quasi per proprium effectum vitae nos vivere cognoscimus. Dicitur ergo, « Scimus quoniam translati sumus etc. »: quasi diceret: non opinamur tantum: opinio enim est acceptio unius partis contradictionis cum formidine alterius: scientia vero sine formidine. Quoniam translati sumus, haec ergo mutatio non liberi arbitrii, sed dexteræ Excelsi. De morte ad vitam, cum a privatione ad habitum non sit regressus per naturam. Quoniam diligimus fratres, dilectione gratuita. 1 Joan. 5: « Qui non diligit, manet in » morte. » Amplius, operimentum culpae. 1 Petr. 4: « Ante omnia mutuam in vobismetipsis caritatem » continuam habentes, quia caritas operit multitudinem peccatorum. » Quod patet. Peccavimus in proximum ex eo quod non diligentes ipsum, omisimus faciendam, et ex eo quod odientes, commissimus cavendam; sed dilectio superveniens haec omnia operit non solum ut non appareant, sicut hypocrysis operit et abscondit peccata, sed etiam ut non existant: forma enim superveniens deformitatem operit, ut nec appareat nec existat. Prover. 10: « Odium » suscitatur rixas, et universa delicta operit caritas. » Amplius, illuminatio intellectus. 1 Joan. 2: « Qui » odit fratrem suum, in tenebris ambulat etc.: » et e converso, « Qui diligit fratrem, in lumine est. » O quam utile est in hoc lumine esse! non solum enim clarum, sed dulced lumen et delectabile etc. In hoc lumine multa necessaria videt homo de faciendis et cavendis pro proximo: quid fieri vel non fieri conveniat ex debita necessitate, quid ex congrua acqutate, quid ex mera et libera voluntate. Videt quomodo diligendo sic prosit uni ut non obsit alteri, secundum illud, Noli fieri pro amico inimicus proximi. 2 Cor. 8: « Non ut aliis sit » remissio, vobis autem tribulatio. » Videt quomodo erga eundem proximum non mutans caritatis affectum, pro loco, tempore et causa mutet vultum et exhibitionis effectum. Videt et plura his similia, in quibus virtus certior est omni arte, et unctio

divina docens de omnibus, efficacior eruditione humana, quae deficit in pluribus. Sed nota, quod differunt lumen videre, et in lumine esse. Lumen quasi videt qui aliqua de dilectione cognoscit per litterarum scientiam, vel exempla dilectionis aspiciunt per diligentium praesentiam: in lumine vero est, qui diligit effectu, vel saltem affectu. Nota ergo quatuor differentias. Quidam enim vident lumen, sed non sunt in lumine: de quibus Isa. 42: « Qui vides multa, nonne custodies? » Quidam e converso. Psal. 70: « Quoniam non cognovi litteraturam, introibo in potentias Domini. » Augustinus: « Surgunt indocti et caelum rapiunt, et nos cum litteris nostris sine corde sumus. » Quidam neutrum, qui dicere possunt: « In tenebris sedeo, et lumen caeli non video. » Tob. 5. Quidam utrumque. Psal. 15: « In lumine tuo videbimus lumen. » Amplius delectatio affectus: motui enim dilectionis quasi inseparabiliter adnexa est delectatio, sicut oppositum opposito, scilicet poena odio. Galat. 5: « Fructus autem spiritus sunt caritas, gaudium etc. » Amplius verum testimonium est, quod simus filii nobilissimi patris. I Joan. 5: « Qui diligit fratrem suum, ex Deo natus est. » Matth. 5: « Diligite inimicos vestros, ut sitis filii patris vestri: filii non servi. Servus non manet in domo in aeternum, filius manet in aeternum. Filii, non nepotes vel pronepotes, quasi attinentes gradu remoto, sed proximo. O vere appetenda nobilitas, ejus tam mira dignitas, tam multa utilitas! Nam si filii, et heredes. Amplius, proprium indicium, quod simus discipuli magistri sapientissimi. Joan. 15: « In hoc cognoscent omnes quia mei estis discipuli etc. »: quasi diceret: In aliis bonis operibus opinabuntur et praesument, sed in hoc cognoscent, quia mei estis discipuli, non mundi, non carnis vel diaboli, sed nec hominis vel Angeli, nec ipsius Cherubin, qui dicitur plenitudo scientiae, sed mei qui sum fons sapientiae. Sed nota, cognoscitur quandoque res per communia, et haec cognitio est imperfecta: interdum per propria, haec perfecta. Licet enim ignoratis communibus res ignoretur, non tamen scitis scitur, sed solis propriis. In hoc igitur quasi in proprio indicio cognoscent omnes quia mei estis discipuli, si dilectionem habueritis ad invicem. Non in hoc si multum jejunaveritis, quia etiam pharisaei et discipuli Joannis jejunaverunt frequenter. Non in hoc si multas caeremonias servaveritis, ut discipuli Moysi. Joan. 9: « Nos Moysi discipuli sumus. » Nec etiam in hoc saltem si omnia reliqueritis. Hieronymus: « Hoc etiam Socrates (1) Philosophus fecit, et sui discipuli; » tamen Christus dicit: « Nisi quis renuntiaverit omnibus quae possidet, non potest esse meus discipulus etc. » Igitur renuntiare omnibus, ad minus affectu, superius est, et quasi commune ad discipulum esse. Posito autem superiori, non ponitur inferius, quamvis destructo destruat: nec cognito illo cognoscitur, licet ignorato ignoretur. Diligere autem gratuite proximum, est proprie proprium discipulorum Christi, sicut risibile hominis convenit omni, et soli, et semper, quia nunc et in futuro. Amplius est efficax meritum, ut augeatur mihi gratia et influentia datoris liberalissimi: sicut enim peccatum est poena peccati praecedentis, sic et meritum causa sequentis meriti. De primo Apocal. 22: « Qui in sordibus est, sordescat adhuc. » De secundo Joan. 1, « plenitudine

(1) Hieronymus, Crates.

« omnes accepimus gratiam pro gratia. » Ratio autem merendi primo et principaliter consistit in actu dilectionis. Gregorius: « Non habet aliquid viriditatis ramus boni operis etc. » Quia vero secundum Ecclesiasticum, amor proximorum probatus est non solum coram Deo, sed etiam coram hominibus; etiam ipsi qui diliguntur intercedendo ad augmentum meriti adjuvant. Ad Ephes. 1: « Ego audiens fidem vestram quae est in Christo Jesu, et dilectionem in omnes sanctos, non cesso gratias agens pro vobis, memoriam vestri faciens in orationibus meis, ut Deus Domini Jesu Christi Pater gloriae det vobis spiritum sapientiae et revelationis in agnitione ejus, illuminatos oculos cordis vestri. » Sub his septem generalibus utilitatibus dilectionis proximi, innumeras speciales invenies, si a genere ad species dividendo descendas, et ex adjunctis adjuncta, ex antecedentibus consequentia meditando perpendas. Hoc quidem in praesenti. Quis autem in futuro finis assequendus, quod praemium dilectionis proximi, quis aestimare potest? Magnum quidem et multiplex bonum creatum tibi, et in teipso pro amato etiam non electo, et in ipso si electus proinde datur. Augustinus: « Si quis alius esset quem omnino sicut te diligeres, eadem beatitudinem haberet, duplicaretur gaudium tuum, quia minus pro eo quam pro te gauderes. » Si vero duo, triplicaretur etc. Sed de bono simpliciter increato maximum erit gaudium omnibus. Aristoteles: « Summum et ultimum bonum finis est omnium finium: » quod secundum Augustinum, verius cogitatur quam dicitur, et verius est quam cogitatur et dicitur.

## CAPUT VIII.

### *De duplici praecepto, affirmativo et negativo.*

« Diliges proximum tuum sicut teipsum. » Non dicit quantum. Rom. 12: « Qui diligit proximum, legem implevit. » In duobus enim mandatis dilectionis universa lex pendet et Prophetarum. Naturalis, scripta vetus, et nova; quorum unumquodque ad aliud naturali et artificiali ordine refertur sicut exemplar ad exemplatum, inter quae assimilatio est, non necessaria adaequatio. Quod patet sic: quia sicut secundum exemplar domus aliquantae et aequalis potest fieri domus similis, major tamen vel minor vel aequalis; et sic in istis non oportet, quod ista assimilatio sit per omnia adaequata. Item sicut domus perficitur tecto, et sermo ultimo verbo, et vas decem pugillos capiens impletur pugillo novissimo; sic tota lex in mandato secundo, dilecto proximo. Lex autem universalis in parte ultima duo habet generalia mandata, quae ex hoc uno nascuntur, et proximum diligendo totaliter implentur. Unum affirmativum. Matth. 12: « Quaecumque vultis ut faciant vobis homines etc. » « Quaecumque » licita, decentia, expedientia, « vultis » voluntate rationali, ratione distinguente inter debita et indebita, debita necessitatis et honestatis; indebita, bona quae consuluntur, et indifferentia quae in lege non continentur, « ut faciant » vel dimittant, corde, ore vel opere, « vobis » vel pro vobis « homines » non bruta: homines in quantum homines: « et vos » facite illis » in casu simili: facite, inquam, voluntarie et pleno affectu; et, si potestis, opere et effectu. I Joan. 2: « Non diligamus verbo etc. » Secundum hanc regulam dilectio proximi causat et efficit imperando omnes motus virtutum tendentes ad pro-



ximum, et interiores et exteriores: verbi gratia, motus misericordiae: nam « qui habuerit substantiam huius mundi etc., quomodo caritas Dei manet in eo? » Amans enim proximum apprehendens per cognitivam miseriam ejus, secundum affectivam necessario movetur motu compassionis, et est haec misericordia. Augustinus: « Cum ipsi patimur miseriam, ex compassione discimus misericordiam. » Ex hac compassione si sit sufficiens, est velle relevare pro posse: et hoc est relevare. Primi duò motus interiores sunt, tertius exterior; qui cum fiat per corpus, secundum diversitatem et multitudinem organorum fit multiplicatio motuum. Moventur enim oculi ad flendum. Job 50: « Flebam quondam super eo qui affligit etc. » Aures ad audiendum, os et lingua ad consolandum et docendum; manus ad dandum vel ad juvandum, pedes ad ambulandum et visitandum etc. Ecclesiast. 7: « Non te piget visitare infirmum etc. » Sed hoc exemplum vide etiam in humilitate, et aliis virtutibus. Caritatis imperium et processum motuum. Ad Galat. 5: « Per caritatem spiritus servite invicem. » Causat similiter omnes affectiones ad proximum: nam ei quam diligo bonum volo, et cui bonum volo illud ei cupio; et quasi doleo dum ei abest, gaudeo dum adest. Timeo ne oppositum, scilicet malum, ei eveniat, doleo si evenerit: et omnia haec proportionantur, secundum tantum et quantum. Augustinus: « Quantum quisque diligit alium, tantum ejus bono congaudeat. » Distingue tamen in affectione sicut in dilectione, inter ea quae procedunt ex affectu partis sensitivae conjuncto phantasiae secundum se, et ea quae ex affectu partis intellectivae conjuncto intellectui secundum se, et quae praecedunt affectum partis intellectivae. Cognitio intellectiva secundum se est et quae affectum naturalem et humanum praecedunt, est cognitio humana, et rationis discernentis. Primum animale, et pene brutale. Secundum spirituale et quasi angelicum, quod sequitur animam separatam. Tertium humanum propriè: et ideo secundum Aristotelem corrumpitur corrupto homine. Aristoteles in primo libro de Anima: « Intelligere et amare ac odire etc. » Ecl. 9: « Viventes sciunt. » Interdum igitur sensibiliter minus gaudeo vel doleo de eo quod intelligibiliter plus diligo. Aliud negativum. Quod ab alio rationabiliter odis fieri corde, ore, opere tibi, vide tu alteri facias voluntate, ore vel opere, affectu vel effectu, Tob. 4. Secundum hanc regulam dilectio proximi causaliter reprimat et cohibet omnes motus et actus vitiorum respectu ejus. Verbi gratia, superbiae, qua proximum, de primo ut praecellam. Quo contra. « Caritas non inflatur, non est ambitiosa. » Avaritiae, « non quaerit quae sua sunt. » Irae, « non irritatur, omnia suffert, omnia sustinet. » Ephes. 4. « Supportantes invicem in caritate. » Gregorius: « Quem minus amamus, minus etiam toleramus. » Gregorius: « Quia ab amore recedere laesa caritas nescit. » Invidiae, « congaudet autem veritati. » Gregorius: « Semper per invidia a bona voluntate discordat. » Et sic de aliis vitiis generalibus et specialibus respectu proximi deordinantibus. Cohibet enim dilectio motus omnium virium tam interiores quam exteriores, qui multiplicantur per genera secundum multitudinem organorum: ligat enim universaliter omnia membra officialia exteriora, ut oculos, aures, manus, linguam, pedes etc. Et sic implet omnia praecepta negativa in exterioribus de proximo data.

Matth. 19: « Non occides, non adulterabis etc. Et si quod aliud est mandatum, in hoc verbo instratur, Diliges proximum tuum sicut teipsum. » Ligat etiam interiores, quae diversificantur secundum diversitatem potentiarum. Ligat igitur potentiam motivam, scilicet voluntatem vel affectum, ne moveatur volendo malum proximo, et sic implet « Non concupisces uxorem proximi tui » et similia: vel afficiendo, ne de bono proximi quem diligo, timorem vel dolorem habeam, de malo spem vel laetitiam. 1 Cor. 13: « Non gaudet super iniquitate. » Ligat etiam aliquo modo cognitivam. 1 Corinth. 15: « Non cogitat malum » poenae vel culpa. Hoc perfectum est valde: si enim malum culpa vel poenae proximo non cogitat, sequitur necessario quod non vult, nec facit, nec optat. Si malum culpa proximi non cogitat, sequitur quod non judicat de malo dubio vel occulto, non despicit de praeterito certo, non damnat de praesenti, non praesumit temere de futuro. Distingue tamen in hac regula inter prohibita quae facere de proximo est mortale, et cohibita quae veniale, et dissuasa quae facere non culpatur, sed non facere consulitur et laudatur, et indifferentia regulam non contingunt: caritas enim incipiens, diligendo proximum sufficienter, cavet prima; proficiens, diligenter laborat contra secunda; perfecta, etiam sollicita est circa sequentia. Et secundum hoc, quandoque unctione docente, a licitis quibusdam quasi ab illicitis cohibet, ne proximum quem diligit scandalizet. 1 Corinth. 8: « Si esca scandalizet fratrem meum etc. » et infra: « Jam non secundum caritatem ambulas. » Secundum hoc sententiat Apostolus generaliter Rom. 13: « Nemini quicquam debeatis etc. » Glossa: « Cetera ita solvere debetis, ut nihil teneamini: caritatem autem ita ut semper teneamini. »

## CAPUT IX.

### *De impedimentis caritatis.*

« Diliges proximum tuum sicut teipsum. » In terra, in caelo, in via, in patria: sed aliter hic ubi caritas multipliciter impeditur, aliter illic ubi penitus expedita: ibi enim semper pure et sinceriter, semper ferventer et uniformiter, semper actualiter, semper manifeste et efficaciter, semper mutuo et familiariter; hic autem multiformiter, quia nunc minus, nunc magis, nunc nihil, ubi minor est spiritus. Caritatis habitus gratia incipiente, et major crescente, et nullus deficiente. Hic habens caritatem, licet semper diligas habitu, saepius tamen impeditus non diligis actu. Est autem dilectio motus ab amante in amabile, a subjecto in objectum, sicut visio actus est visus super visibile. Sicut ergo visio, sic et dilectio impedi potest vel in subjecto, vel in objecto, vel in utroque; quod patet sic. Diligere gratuite in via est actus partis motivae humanae, scilicet voluntatis vel affectus, quam necessario praecedit actus cognitivae, scilicet rationis vel intellectus. Augustinus: « Invisa possumus diligere, incognita nequaquam. » Quia igitur impedito priori, et posterius; regulariter omne quod impedit vel perpetuo vel ad tempus actualem cognitionem, impedit consequenter et dilectionem. Secundum hanc causam infantes, dormientes, dementes et occupati aliis actibus intendentes vel oppositis vel disparatis (1) impediuntur, ne actualiter diligant aliquem pro-

(1) *Al.* desperatis.



ximum; et actu diligens unum, ne tunc actu diligat alium. Posita vero cognitione, aut apprehenditur proximus sub conditionibus affectum respicientibus, aut non. Et hoc aut quia sine, si sine; aut quia in ipso simpliciter non sunt, sicut in damnatis: aut quia secundum quid sunt mali, ut in praesenti, aut quia sunt boni, ratio tamen avertit nec deliberat: sic super proximum non fit dilectionis motus, sicut abstracto colore super corpus non fertur visus. Si autem sub convenientibus affectui caritate informato, ut sunt illae quae dictae sunt in causa materiali et consimiles, et sic actum cognitionis sequitur dilectio actualis. Aut sub oppositis et disconvenientibus, et tunc sequitur cognitionem motus oppositi, scilicet odire: diligere enim et odire sunt motus oppositi contrarie, qui causantur a contrariis, et causant effectus contrarios, et in eodem subjecto respectu ejusdem objecti mutuo se impediunt: inter haec est medium per abnegationem utriusque, scilicet nec diligere nec odire. Igitur quoties dicitur unum oppositorum, et reliquum. Sicut ergo contingit diligere diligendum et non diligendum, sic et odire odiendum, licet bonum: Luc. 14: « Si quis venit ad me, et non oderit etc. » Gregorius: « Diligamus quod sunt, et odio habeamus quod in Dei nobis itinere obsistunt. » Et odire non odiendum, licet malum. Aliquando veniale et sic cohibitum, et sic impedit fervorem dilectionis: aliquando mortale, et sic prohibitum, et sic impedit actum penitus, quia expellit habitum. Non diligere vero diligendum est dupliciter: negative: sic nec bonum nec malum: sic dormientis: privative: sic malum: sic omittentis. 1 Joan. 1: « Qui non diligit, manet in morte: » 1 Joan. 4: « Qui non diligit fratrem suum quem videt, Deum quem non videt quomodo potest diligere? » Nota igitur ubicumque diligere est bonum, odire est malum: et e converso, ubicumque bonum diligere, non odire bonum, sed minus. Ubi odire malum, et non diligere privative similiter malum, sed minus. Regulariter igitur omne quod motum odii causat vel impedit, motum oppositum, scilicet dilectionis, impedit: et quicquid tollit odium, est hujus impediendi remedium. Hic puritas et sinceritas plurimum impeditur, quia in dilectione proximi motui caritatis et gratiae semper vel saepissime motus naturae animalis et quandoque motus fomitis admiscetur, ut proximus carus mihi primo quidem et principaliter propter Deum, sed aliquantulum plus carus secundo propter aliquam meam utilitatem et commodum, et adhuc aliquantulum plus propter quemdam carnalem affectum. Talis dilectio pro prima parte est omnino bona et laudabilis, pro tertia vitiosa et venialiter culpabilis, pro media indifferens. Aristoteles: « Propter naturalia nec laudamur, nec vituperamur. » Ac si in uno vase multo vino forti modicum vini debilis vel minimum aquae effundatur, et ad pastam magnam faciendam multo tritico pars siliginis et modicum hordei componatur, et ad denarios fabricandos cupri vel plumbi minimum miscetur. Inter haec quantum potes intente distingues, sollicite cavens ne vel modica spernens, paulatim crescentibus ipsis, principale corrumpi negligenter permittas; vel rursus nimis appetens purum, et abhorrens omne mistum, sic modicum imperfectionis immoderate restringas, ut totum extinguas. « Qui enim nimis emungit, elicit sanguinem, » Prov. 30. Hic tepide proximus diligitur, quia fervor

S. Th. Opera omnia. V. 17.

multipliciter impeditur. Fervet autem animus in diligendo proximum cum devotus est circa ipsum, et promptus et suo modo agilis propter ipsum, sicut in naturalibus calidum et fervidum naturaliter, et leve est consequenter. Hugo: « Devotio est « fervor bonae voluntatis, quem mens occultare « non valens, certis manifestat indicibus. » Sed nota, fervor qualificans diligentis animum et dilectionis actum in patria est sicut fervor ignis existens in materia et sphaera propria, qui magnus purus et perpetuus. Sed fervor in via sicut calor ignis in materia aërea, quem quaedam faciunt et generant vel per se, ut carbo incensus alium incendit: vel per accidens, ut collisio vel confriatio: quaedam nutriunt, ut ligna et alia materialia; quae sicut diversa sunt, sic differenter nutriunt, ut patet, si in ignem mittas ligna, stipulam et oleum, et sic de aliis, haec consequenter augent ignem: quaedam excitant, ut flatus et motus: quaedam conservant, ut cinis carbones. Haec omnia circa fervorem dilectionis in via spiritualiter contingunt. Quandoque per sensibilia, ut sunt beneficia. Ad Rom. 12: « Si « esurierit inimicus tuus, ciba illum etc., » usque « carbones ignis. » Item per mutua obsequia, Ad Rom. 12: « Honore invicem praevenientes: » Glossa: « Aliter non est fraternus amor, nisi mutuis se « praeveniant obsequiis, » et sic de aliis. Quandoque per intelligibilia. Impeditur ergo fervor primum quidem ex absentia horum, deinde de praesentia (1) oppositorum. Sed nota, sicut cognitiva partis sensitivae ordinatur ad cognitivam partis intellectivae, ita et affectiva ad affectivam, et utrobique cognitiva ad affectivam. Unde sicut ratio per sensum quandoque procurat intellectui splendorem in cognoscendo, Rom. 1: « Invisibilia Dei a creatura mundi, per ea quae facta sunt intellecta conspiciuntur; » ita et per affectum inferiorem quandoque superiorem fervorem in diligendo. Gregorius: « Regnum « caelorum idcirco terrenis rebus.... quasi confriatus « incalescat etc. » Sic Eliseus psalterium canere fecit, et ad harmoniam secutus est prophetia. Et sicut hi duo affectus quia coordinati sunt mutuo fervescunt, ita quandoque vicissim tepescunt: sicut de utroque simile potes videre in duabus candelis, quarum una ardens, aliam si adjungatur accendit, quae ipsam si extincta fuerit, reaccendit. Hic dato etiam quod actualiter proximum diligam sinceriter et ferventer, impediatur tamen ne evidenter. Homo enim solum videt in facie: Deus autem intuetur cor; et ideo hic an diligam aliquem et quantum et quomodo, praesumptibile quidem est homini, sed evidens soli Deo. Sed in caelo, secundum Augustinum, uniuscujusque mentem ab alterius oculis corpulentia non abscondet; et ideo ibi ubi nuda sunt omnia, nec simulatio nec praesumptio locum habent. Impediatur autem etiam ne efficaciter; quia multoties vel non possum vel nescio bonum facere proximo in effectu, quod tamen ei volo et vehementer desidero in affectu. Postremo impediatur hic multipliciter ne diligam mutuo et familiariter: quandoque enim diligo me non diligentes; ut bonos aliquos non cognoscentes me, et ideo non diligentes, ego ex fama vel aliter cognosco et diligo: vel malos aliquos etiam odientes me, quos tamen propter Deum diligo. Matth. 5: « Diligite inimicos vestros: » Psal. 54: « Retribuebant mihi mala pro bonis etc. »

(1) *Ad. poenitentia.*

Quosdam negative, non privative, non diligo actu me forsitan diligentes, cum non cognoscam: et tunc est dilectio tantum, sed non mutua; et ideo proprie loquendo, non amicitia. Dilectio enim est motus ab amante in amatum, ab uno in alium: amicitia vero est copula, vineulum vel colligatio duorum vel plurium mutuo amantium secundum motum reciprocum. Unde videtur relationem dicere, et si superpositionis vel suppositionis, seu equiparantiae sicut societas, licet quandoque non equiparetur dilectio hinc inde, secundum illud Apostoli 2 Cor. 1: « Licet vos plus diligens, minus diligar etc. » Sicut similitudo est relatio equiparantiae inter duos albos, licet alter magis, alter minus sit albus. Cum igitur super duos mutuo amantes fundetur amicitia, secundum illud Gregorii « minus quam inter duos « caritas haberi non potest »: destructo uno relativorum, cessat relatio, scilicet amicitia, non autem dilectio; sicut si duorum alborum similium unus desinit album esse, cessat similitudo, licet maneat alterius albedo. Quandoque etiam est mutua dilectio, sed quodammodo variatur mutuati solutio. Nam inter plures me amantes, et dilectionem quasi mutuo mihi dantes, quandoque plus amo eum qui minus amat me, quam alium qui magis, et e converso. Multos igitur hic diligo cum quibus proprie loquendo amicitiam non habeo, quamvis large omnis qui vel diligit vel diligitur, amicus vocetur. Quorundam autem proprie amicus sum, eum quibus diversis causis impediens hic familiaritatem habere non possum: plus enim est familiaritas quam amicitia, sicut amicitia plusquam dilectio: dilectio enim transformat amantem in amatum. Hugo: « Scio, anima mea etc. » Quod si sit amicus, fit dupla conformitas et mutua: si autem familiaritas, fit multa conformitas: familiares enim amici conformantur pro posse et interius et exterius. Interius, quoad intellectum, quia idem sciunt, communicant enim secreta. Seneca: « Cum amico tuo omnes curas, omnes cogitationes tuas misce; tam « secure cum illo loquere quam tecum. » Joan. 15: « Jam non dicam vos servos. . . . Vos autem « dixi amicos etc. » Hoc impedit diffidentia. Ecl. 11: « Non omnem hominem inducas in domum « tuam: secretum extraneo non reveles. » Quo contra, Seneca: « Ante amicitiam judicandum, post « amicitiam credendum: tu quidem nihil tibi committe, quod non committere etiam inimico possis. » Item idem sentiunt, quia conformant iudicia. Matth. 18: « Si duo ex vobis consenserint etc. » 1 Cor. 1: « Sitis perfecti in eodem sensu etc.: » hoc impedit proprii sensus pertinacia. Quo contra Jac. 5: « Suadibilis, bonis consentiens. » Item quoad affectum idem volunt et nolunt. Act. 4: « Multitudinis credentium erat cor unum et anima una. » Haec est concordia non respectu finis ultimi, sed respectu eorum quae ad finem. Hoc impedit voluntas propria, quam oportet flectere, et interdum amicitiae causa frangere, salva semper voluntate Dei et summi amici. Item idem sperant et timent respectu futuri boni et mali. 1 ad Cor. 4: « Sicut « vocati estis in una spe vocationis vestrae. » Item idem dolent et gaudent respectu praesentis vel praeteriti. Ad Philipp. 1: « Socios gaudii mei omnes vos esse. » Thren. 1: « Audite, obsecro, omnes populi: » Glossa: « Talis est humanae naturae affectus, ut doloris nostri et gaudii consortes quaeramus, quorum participatione levius feramus. » Multa

in his utilitas est: et ideo consulit Apostolus Ephes. 4: « Solliciti servare unitatem spiritus in vinculo « pacis. » Conformantur etiam exterius pro posse, quia in eodem loco manent vel manere desiderant qui familiariter se amant. Joan. 18: « Pater, quos « dedisti mihi, volo etc. » Psal. 152: « Ecce quam « bonum etc. » Ruth 1: « Quae te moriente terra « susceperit, in ea moriar. » Commansio autem haec multis causis impeditur: quandoque spiritualibus, ut cum disjunctae sunt localiter amantes familiariter pro malo cavendo. Zach. 12: Familiae seorsum, et mulieres seorsum. Vel pro majori bono faciendo, ut dicitur Tob. 2: « Confitemini Domino « filii Israel. . . ideo dispersit vos inter gentes »: quandoque pro temporalibus, ut cum disjungitur prae magna temporalium copia, ut Abrahae et Loth: vel nimia inopia, et sic de aliis. Item idem dicunt. 1 Cor. 1: « Idipsum dicatis omnes etc. » Hoc impedit contentio: quo contra ad Tim. 2: « Servum Dei non oportet litigare. » Gregorius: « Ego « melius credo salva fide alieno intellectui cedere, « quam contentioibus deservire. » Item idem faciunt. Psal. 67: « Qui habitare facit unius moris « in domo: » 4 Reg. 5: « Ut ego et tu, populus « meus, populus tuus. » Hoc impedit singularitas. Item idem patiuntur. 2 ad Cor. 7: « Si fueritis « socii passionum etc. » 1 Reg. 22: « Qui quae « sierit animam meam, quaeret et tuam. » 1 Mach. 10: « Quae nostra sunt sentias nobiscum: » 1 Mach. 8: « Si institerit bellum Romanis etc. » Hoc impedit pusillanimitas. Item idem habent. Jo. 17: « Omnia mea tua sunt: » Act. 4: « Erant illis « omnia communia. » Seneca: « Nullius boni « sine socio jucunda est possessio. » Utile est multipliciter talem familiaritatem habere, damnosum carere. Ecl. 4: « Vac soli, si ceciderit etc. » Gen. 2: « Non est bonum esse hominem solum. » Poeta: « Tristis eris, si solus eris etc. »: sed vide cui jungaris. Seneca: « Prius vide an tibi in amicitia « aliquis recipiendus sit: cum plaueit fieri, toto « illum pectore admitte. » Vide ergo ante contractum amicitiae, qualis sit in se cui adhibes te: ne stultus, quia cum sapientibus gradieris: Prov. 15: « Amicus stultorum efficitur similis: » ne impius quoad Deum: 2 Paral.: « Impio praebes auxilium etc. » Item ne turpis quoad seipsum. Seneca: « Conciliari « nisi turpi ratione amor turpium non potest. » Item ne iracundus quoad proximum. Ecl. 4: « Noli « esse amicus hominis iracundi. » Vide quid in te diligat qui tecum foederari desiderat: ne sit amicus temporalis felicitatis, ut multi sunt. Poeta:

Cum fueris felix, multos numerabis amicos.

Vel corporaliter convivantis. Ecl. 6: « Est amicus « solius mensae etc. »: vel potentis. 2 Mach.: « Audivimus de te, quod vir potens. . . . aptus es ut « sis amicus. » Item vel donantis. Prov. 19: « Multi « colunt personam potentis, et amici sunt donantis. » Quem igitur pulsabis amando, ut aperiat redamando? Bonum, virtuosum, Dei amicum, cui aperies pulsanti. Taliter amanti, ut consiliatrix amicitiae sit virtus, medium uniens Deus: nihil enim diligitur nisi bonum; et ideo verum bonum verae amicitiae nodus est et fundamentum. Verum autem bonum creatum, gratia vel virtus; increatum Deus. Augustinus: « Aliter non est vera amicitia, « nisi cum tu eam agglutines inter haerentes tibi

« caritate diffusa in cordibus eorum. » Hieronymus: « Illa vera necessitudo et Christi glutino copulata, quam non praesentia tantum corporum, « non subdola et palpans adulatio, sed Dei timor, « et divinarum Scripturarum studia conciliant. » 1 Joan. 1: « Et vos societatem habeatis nobiscum, « et societas nostra sit cum Patre et Filio. » Ecl. 28: « Quemcumque cognoveris observare timorem « Dei, cum illo assiduus esto. » Cujus animus est secundum animum tuum. Ezech. 27: « Accesserunt « ossa ad ossa etc. » Seneca: « Pares cum paribus facillime congregantur. » Hoc Christus, in cujus persona una familiarissime sunt unita, petivit simplicissime. Joan. 17: « Pater sancte, conserva eos « in nomine tuo . . . ut sint unum, sicut etc., » et infra: « Non pro his rogo tantum etc., ut omnes unum sint etc. Et ego claritatem etc. Ut unum sint: » et infra: « Ego in eis, et tu in me, ut sint consummati in unum. » Nota, quod quinquies repetit unum. Item meruit poenalisime. Joan. 11: « Jesus moriturus erat ut filios Dei qui « dispersi fuerant, congregaret in unum: » sicut lineae juxta circumferentiam sparsae congregantur in centrum punctum. Sic igitur amicitia initiatur in dilectione, completur in familiaritate. Familiaritas vero incipit et proficit in via, perficit in patria: haec enim mutabilis virtus, et per consequens amissibilis. Laelius: « Cum conciliatrix amicitiae virtutis « opinio fuerit, difficile est amicitiam manere, si a virtute defeceris. » Ibi immutabilis ubi non distringitur fibula constringens mentes, non antiquatur caementum compaginans voluntates, non solvitur bitumen affectus conglutinans, non dividitur punctus animos continuans.

## CAPUT X.

*De remediis contra impedientia caritatem.*

Contra omne dilectionis impedimentum ex quatuor conjunctis sufficiens trahitur remedium, quae sunt meditatio, doctrina, oratio et exercitium. Quoniam ergo « non intellecti nulla est curatio morbi », a meditando incipe. Meditare ergo primo dilectionis mandatum et debitum: exemplum diligentium Christi capitis et membrorum, diligendi fructum et praesentem et futurum; quam justum et rationabile, quam facile et delectabile et utile sit proximum diligere. Augustinus: « Potest mihi aliquis dicere, « non possum vigilare etc.: numquid potest dicere: « non possum amare? » Meditare postmodum tuum in diligendo defectum; quam raro, quam puro, quam tepido affectu diligis, quam modico effectu affectum ostendis, quam diminute amantibus te vicem repondis. Dehinc meditare et causam defectus, scilicet ipsum impedimentum cum circumstantiis ejus quid sit, unde sit, quantum sit, magnum vel parvum, unum vel plura, et his similia. His propria meditatione inventis, praemissa oratione aliqua, haec duo conquerere, dehinc ad doctrinam recurre, scriptam quae in libris oculis legentis objicitur, dictam quae ab ore loquentis per aures ingreditur. Lege ergo si seis, intellige et retine. Luc. 10: « In « lege quid scriptum est, quomodo legis? Diliges. » Verum, ut dicit Hieronymus, « habet nescio quid latentis energiae vivae vocis aetus etc. » Gregorius: « Collocationis vox plusquam lectionis sermo corda « torpentia excitat. » Et ideo a mortua pelle ad

vivum hominem recurre, Deum in homine consulere, aperi impedimentum, quaere medicamentum, ausculta intente non hominem de se mendacem, sed per hominem Deum veracem respondentem, docentem, consulentem, exhortantem; et discere diligenter, ne sensu proprio pro tollendo impedimento, tali forsitan utaris remedio, de quo postmodum nascatur impediementi majoris occasio: sicut aestuans contra aestum aqua se infrigidat, et exinde postea magis aestuat. Post haec orando ad Deum convertere penitus gratias agens, laudans et obsecrans; et ora desideranter, supplica humiliter, confidenter et frequenter; ut qui mandatum dedit interpretetur tibi canonem quem condidit, det quod jussit, conservet quod dedit, augeat et perficiat quod incepit, expediat impeditum, compleat incompletum. Postremo quod aperitur discenti, quod datur oranti, exerce in actibus cordis, oris et operis. Exercitium enim est causa potentiae, ut probat Aristoteles. Assueti enim contemnere terribilia et sustinere, firmus fortes, et flentes maxime possumus sustinere: sic et in castitate exemplificat similiter: ergo in caritate. Ad Rom. 9. « Nemini quiequam etc. » Glossa: « Cetera ita solvite, ut non debeatis aliquid: caritatem « ita solvite, ut semper eam debeatis. » Sola enim caritas est quae etiam reddita semper detinet debitorem: redditur enim dum impenditur, debetur etiam cum reddita fuerit: quia nullum tempus est in quo impendenda non sit: nec cum redditur amittitur, sed potius reddendo multiplicatur: habendo enim redditur, non carendo, ut pecunia.

## CAPUT XI.

*Conclusio.*

« In his duobus mandatis tota lex pendet et « Prophetarum. » O caritas ordinis, regula electorum, lex universalis universos ligans, virtus virtutum, canon canonum, lex legum, non constitutio populi, sed principis placitum; sententia regis regum, quam non solum edidit vel condidit jubendo, sed et edixit et promulgavit personaliter docendo, et adimplevit servando. Isa. 55: « Dominus legifer noster, Dominus rex noster etc. » Deuter. 55: « Dominus « de Sinai venit etc. in dextera ejus ignea lex. « Dilexit et populos etc. » quasi lex terrena, mandata judicialia ad modum terrae gravia, praemiantia, obruentia non eruentia: quasi lex aërea cetera moralia: sed amandi lex ignea, lucens, incendens, sursum movens, carbo incipientibus, flamma proficientibus, lux perfectis: hoc est lex in dextera, non tantum in corde ejus ad dictandum et dijudicandum: prius enim est, ut dicit Augustinus judicare de lege, quam secundum legem. « Erit autem lex, ut dicit Isidorus, justa, « honesta, possibilis, secundum naturam, secundum « consuetudinem patriae, loco temporibusque « conveniens, necessaria, utilis, manifesta quoque, ne « aliquid per obscuritatem in captione contineat, nullo « privato commodo, sed communi utentium utilitate « conscripta. » Quae singula huic legi conveniunt singulari excellentia: non tantum in labiis ad jubendum, ad docendum, ad exhortandum, secundum illud Psal. 95: « Beatus quem tu erudieris Domine, et « de lege tua etc. » Job 11: « Utinam Deus loqueretur tecum . . . et intelligeres quod multiplex « sit lex ejus: » sed in manu: et non in sinistra, sed

in dextera, ad implendum, ad cooperandum, ad praemiandum. Psal. 85: « Etenim benedictionem « dabit legislator etc. » Ecce lex Domini convertens animas, mater et origo legum divinarum, magistra et domina humanarum rationabilium et aequarum, hostis iniquarum, ejus observantia per gratiam in hac vita initiatur, et continuata usque ad mor-

tem in alia vita consummatur, cum in ea deserviente miles de novitio professus, de sponsa subharata, fit conjux consummata, per Jesum principem summae majestatis, Abbatem summae sanctitatis, sponsum divinae caritatis, qui cum Deo Patre et Spiritu Sancto vivit etc.





# OPUSCULUM LV.

## DE DIVINIS MORIBUS

(EDIT. ROM. LXII.)

### *Prologus.*

« Perfecti estote, sicut et Pater vester caelestis perfectus est. » In sacra Scriptura nihil nobis impossibile consulitur vel praecipitur. In hoc verbo Domini Jesu non sunt nobis praecepta facta divina vel mores divini, ad quos nemo perfecte potest attingere: sed invitamur ut ad eos imitandos pro possibilitate nostra accedere studeamus, quia haec possumus mediante gratia, et debemus: et nihil dignius, ut dicit Joannes Episcopus, quam ut homo sui Conditoris sit imitator, et secundum modum propriae facultatis divini operis executor.

### *Deus immutabilis est.*

Est igitur unus mos sive perfectio in Deo, quod immutabilis est in sua natura, ipso testante in propheta: « Ego sum Deus, et non mutor: » et beatus Jacob. 1: « Apud quem non est transmutatio. » Et ideo immutabilia sunt opera ejus secundum essentiam, scilicet Angelus, anima, caelum, et quatuor elementa: etsi quandoque mittit Angelos, quandoque non mittat: aliquando subtrahat gratiam hominibus, aliquando conferat: quandoque peccata vindicet, quandoque dissimulet: mutabilitas est in creaturis, nullatenus in creatore. Praecipue vero in novissimo die ordinatio sua circa bonos et malos immutabilis permanebit, cum bonis mercedem supra meritum, malis poenam citra merita mensurabit. Et sic et nobis studendum esset ad mentis constantiam, ut nec adversis fracti, nec prosperis illecti aliquatenus a via rectitudinis flecteremur, sicut beatus Job 27: « Justificationem, » inquit, « quam coepi tenere, non deseram. » Sed et Apostolus, Roman. 8: « Certus sum, quod neque mors neque vita . . . poterunt nos separare a caritate Dei. » Sed, heu, nimis inconstantes sumus in sanctis meditationibus, ordinatis affectionibus, in conscientiae securitate, in recta voluntate. Heu quam subito mutamur de bono in malum, de spe in timorem injustum, et e contrario: de gaudio in dolorem injustum, et e contrario: de taciturnitate in loquacitatem, de maturitate in levitatem, de caritate in rancorem vel invidiam, de fervore in accidiam, de humilitate in vanam gloriam vel superbiam, de mansuetudine in iram, de spirituali laetitia vel

amore in carnalem, ita quod nunquam uno momento in eodem statu stabiles permanemus, nisi quod, heu, constantes sumus in inconstantia, in infidelitate, in ingratitude, in spiritualibus defectibus, in imperfectione, in temporis amissione, in levitatibus, in cogitationibus et affectionibus impudicis. Instabilitas autem exteriorum sensuum et membrorum, mutabilitatem indicat affectionum et motuum interiorum. Ad haec tamen merito nitentur, ut nos frequenter uno eodemque modo, idest mature et benigne in statu et in incessu, in omni conversatione nostra aequaliter haberemus.

### *Bonum Deo placet.*

Alius est mos in Deo, sive perfectio, quod omne bonum sibi ex natura placet omni tempore et omni loco, sive in Angelis sive in hominibus sive in aliis creaturis, sive sit bonum naturale corporis, ut est pulchritudo, fortitudo, suavitas, naturalis maturitas; aut animae, ut est ingenii perspicacitas, tenax memoria, subtilis intelligentia, naturalis bona voluntas, arbitrii libertas et similia; sive bonum gratis datum, ut est bene legere, bene cantare, bene praedicare, facundum, continentem, abstinentem esse, compositos mores habere, et similia; sive bonum gratuitum, quod maxime Deo placet, ut est fides, spes, caritas, humilitas, patientia, obedientia, misericordia, veritas, temperantia, justitia, prudentia et scientia. Item omne malum sibi displicet, semper et ubique in quolibet. Sicut enim justitia injustitiae, immunditia munditiae inimica est, ita divinae bonitati malitia contraria est, quia bonum gratiae privat vel diminuit quod bonus Deus naturae contulit. Similiter nobis placere debet omne bonum semper et ubique et in qualibet creatura, et deberemus bonum sollicite tueri et fovere, omnibusque bonum impugnantibus audacter resistere; malum quoque semper et ubique ex corde detestari, et quantum possimus quocumque consilio impedire propter injuriam Dei et dandum proximi, et multo amplius propter contumeliam creatoris quam propter periculum hominis: sed, heu, frequenter res vertitur in contrarium. Cum enim laudatur quis vel diligitur ad gratiam humilitatis, religionis, devotionis, praedicationis, vel alterius gratiae, et nos ex hoc tristitiam concipimus, vel illius gratiam diminuimus;

quid aliud quam quod bonum nobis non placeat demonstramus? aut cum quis otiosa loquitur, detrahit, ridet, et alias levitates seu peccata committit, et nos conridemus, colloquimur, aut cum delectatione cordis talia mala videmus et audimus; quid aliud facimus, nisi quod mala nobis non displicent testes sumus?

*Deus praevidet omnia.*

Alius mos sive perfectio est in Deo, quod omnia futura bona et mala prudenter praevidet, et antequam omnia fiant cognoscit, et quid boni et quid mali possit ex eis oriri discernit: sicut casum Angeli et primi hominis praescivit, et tentari permisit, et quid sequi potuit praecognovit, scilicet generis humani; et quid boni, scilicet Filii de incarnatione, et ex hoc major ex unione quam ante est hominis glorificatio. Similiter praevidenda nobis essent omnia verba et opera nostra, nutus et incessus nostri, et quid boni, quid mali nobis, quid scandali, quid emendationis ex ipsis aliis possit evenire. Item praecogitandum esset, si tentationes fortassis in futurum insurgerent, sive a daemonibus sive ab hominibus amicis carnalibus sive spiritualibus, qualiter resistendum, qualiter tolerandum, qualiter evadendum, quia minus feriunt jacula quae praevidentur. Item praevidendum quid futurum in separatione corporis et animae: quantus dolor imminet corpori, quantus timor animae, quantum periculum. Item ubi manendum, cum Deo vel cum diabolo, in caelo vel in inferno: quanta jucunditas cum Deo manentibus, quanta infelicitas ab ipso recedentibus, utile esset omnibus in mente jugiter hoc versari: ideo Moyses optavit Deuter. 32: « Utinam « saperent et intelligerent, et novissima providerent! »

*Deus patiens est.*

Alius modus sive perfectio est in Deo, quantumcumque a creatura sua offenditur et contemnitur, nunquam tamen ipsam naturam odit, sed vere eam diligit, et bonum ejus ferventer Deus desiderat, licet malum ejus detestetur, et providet ei temporalia absque suo desiderio, et spiritualia si ea concupiscit: facit enim solem suum oriri super bonos et malos, et pluit super justos et injustos. Ad hanc perfectionem similiter tendere deberemus, ut quantumcumque nos homo laederet, nunquam tamen naturam suam odiremus, sed omne bonum ei optarem, et quantumcumque corporale vel spirituale auxilium a nobis expectaret, subsidium a nobis protinus inveniret. Perfectum enim odium habet Deus, et nobis licitum est, ut non propter hominis dilectionem, vitia diligamus, nec propter detestationem vitiorum naturam hominis detestemur, sed naturam diligamus, vitia detestantes.

*Justitia Dei.*

Alius mos in Deo, quod nunquam ex parte ipsius unus de alterius malitia recipit detrimentum. Nihil enim nocet sancto Michaeli casus Luciferi, nec Judae malitia beato Petro caritatem diminuit. Sed, heu, nos miseri unius religiosae personae excessum in totum claustrum refundimus, immo in totum ordinem; sed et omnes religiosos pro peccato unius penitus condemnamus; et si ab uno inimico nostro

laedimur, totam progeniem et multos pauperes innocentes persequimur, et amicos et familiares ipsius quantum possumus indebite molestamus, quod Dominus in lege prohibuit dicens: « Non portabit « filius iniquitatem filii, sed unusquisque onus suum « portabit, » dicit Apostolus Galat. 6. Heu, quoties contingit cum aliquis turbatus est, quod etiam ipse Deus, licet immerito, de hoc frequenter recipit detrimentum, ex eo quod tunc non vult cantare vel studere, nec legere nec orare.

*Rectitudo Dei.*

Alius mos est in Deo, quod nunquam propter misericordiam justitiam deserit, nec propter justitiam misericordiam derelinquit: nunquam enim aliquem judicat vel condemnat sine misericordia, nec alicujus miseretur sine justitia: sed nos miseri cum justitiam servare contendimus, misericordia extinguitur; et cum alicui misericordiam exhibemus, justitia penitus sepelitur, licet Scriptura utrumque simul commendat, Proverb. 3: « Misericordia et « veritas non te deserant, » et Psal. 109: « Misericordia et judicium etc. »

*Patientia Dei.*

Alius mos est in Deo, cum omnes sancti et omnes creaturae aliquando clamant vindictam Dei contra peccatorem, sicut in Apoc. 6 legitur quod omnes clamabant, « Usquequo, Domine, verus et sanctus, non judicas, et vindicas sanguinem nostrum « de his qui habitant in terra? » Deus tamen patienter et misericorditer expectat peccatorem usque ad mortem, ut misereatur sui, si converti velit a via sua mala, quia non delectatur misericors Deus in perditione vivorum. Sed nos impatientes in momento antequam ad plenum fodiat peccatori fovea, maledicentes, et vindictam clamantes, cum proponimus sepelire, impropereantes Deo, quare tamdiu sustineat peccatorum malitiam, contra bonos, non considerantes quanta bona sapiens Deus ordinavit de malitia impiorum: quia tantum laudandus est Deus, et tantae misericordiae est sustinere malum in malitia, ac si mundum conservaret a peccato, vel eriperet a peccatis: hoc enim commendat omnipotentiam suam: non enim est magnae potentiae iniquum in foveam inferni demergere, sed misericordiam suam parcendo maxime et miserando manifestare.

*Liberalitas Dei.*

Alius est mos Dei sive perfectio, quod creaturis communicat quicquid communicabile et ab eis receptibile est, etiam singulis momentis communicat, cum habilitatem invenit, licet videat in eis non proficere: humanam naturam univit cum Filio suo in una persona, quod maximum est, et animam creavit capacem Trinitatis praeter alia dona spiritualia reficiens eam carne et sanguine dilecti Filii sui. Item nihil incommunicatum reliquit. Hoc est proprium divinae bonitatis: nam quod sibi naturale est, communicavit Deus per gratiam creaturis; angelis communicavit beatitudinem, nunquam expertis miseriam, choro apostolorum potestatem, ut quicquid solvant vel ligent in terra, solutum et ligatum sit in caelo: choro prophetarum sapientiam

praenoscendi futura omnia quaecumque facere disposuit: choro martyrum fortitudinem contra adversa: choro confessorum inter prospera et adversa constantiam: choro virginum continentiam inter carnis illecebras. Item quibusdam spiritualiter communicavit aliquod quod habet ex natura, ut Abrahae largitatem, Moysi mansuetudinem, qui mitissimus hominum fuit; Joseph providentiam super Aegyptum, Samsoni fortitudinem, Eliae zelum justitiae, patientiam Job et Tobiae, Eliseo mortuorum suscitationem, Danieli iudicii discretionem, Samueli fidelitatem, David contra persequentes misericordiam, Salomoni prudentiam, Joanni Baptistae sanctitatis et veritatis amorem, beatae Virgini humilitatem, Petro caritatem, Joanni Evangelistae castitatem, beato Paulo zelum animarum et cognitionem supernorum: singuli in istis aliis excellabant, licet omnes eandem habuissent. Sic nos invicem communicare debemus, non solum oculos videre pro aliis, aures ad audiendum confessiones, os ad praedicandum, ad dandum consilia, pedes ad ambulandum, cor ad meditandum pro aliorum salute: verum etiam quicquid habemus in spiritualibus sive in temporalibus, quicquid possumus exterius per opera, intus per desideria, et quicquid sumus in corpore et in anima, singulis in purgatorio et qui nunc vivunt et postmodum non erunt, ut secundum voluntatem Dei vivant in praesenti et in futuro.

#### *Placabilitas Dei.*

Alius est mos Dei, quod graves et multas injurias suas statim paratus est remittere, cum quis firmiter cessare et veraciter emendare proponit: immo propter unicum gemitum cordis contriti obliviscitur, sicut dicit Scriptura, quod postea nunquam damnat ulciscendo, si sic permanserit, nec improperat confundendo, nec minus diligit imputando, nec alienatur eidem familiaritatem subtrahendo. Nos vero miseri, cum vestigia Dei sequi merito deberemus, vix etiam unquam petenti veniam, ut pro posse satisfaciendi volumus ex corde modicam injuriam semel nobis illatam dimittere, aut si dimittimus, vix unquam tamen obliviscimur, quoniam de suo incommodo gaudemus: et si contingit adversitas, minime dolemus, aut minus quam ante diligimus: aut si non improperamus illatam injuriam vel non conquerimur, quae duo rara sunt, familiaritatem tamen nostram sibi subtrahimus, et consilium aut auxilium necessitatis tempore denegamus, cum etiam veniam non petenti nec emendam exhibenti merito parceremus exemplo Jesu Christi, qui pro crucifixoribus suis veniam non petentibus sed iridentibus exoravit: cum nihil faciat Deo sic similem, sicut dicit Chrysostomus, quemadmodum malignis et laedentibus esse placabilem; et cum sit cumulus perfectionis inimicos diligere et pro ipsis orare, sicut Dominus Jesus fecit, sicut dicit Glossa super Matthaeum.

#### *Misericordia vel sufficientia Dei.*

Alius est mos in Deo, quod a nemine quicquam exigit supra posse in jejuniis, orationibus, vigiliis et elemosynis, castigationibus corporalibus, disciplina regulari et similibus: et si deficit in magnis operibus ad diluenda peccata, sufficit Deo in minimis, scilicet in lacrymis ex corde procedentibus,

ut de Ezechia legitur, cujus lacrymas respexit Dominus, et quindecim annos sibi adiecit, mutans sententiam mortis quam protulerat per Prophetam. Similiter lacrymas beati Petri pro peccato gravissimo misericorditer exaudivit, cum ex audito gallo flevit amare pro peccato negationis. Si vero lacrymas quis habere non posset, sufficit Deo in verbo ex corde contrito venienti, sicut legitur de latrone; qui cum diceret Domino, « Memento mei etc. » respondit: « Hodie mecum eris etc. » Si vero usum linguae amitteret, gemitum cordis contriti pro pleno Deo reciperet, sicut dictum est: « Quaecumque « hora peccator ingemuerit, omnium iniquitatum « ejus non recordabor. » Sed si infirmitas omnium membrorum usum abstulisset, quod nec membrum movere posset, nec gemere prae debilitate; adhuc sufficeret Deo in bona et sincera hominis voluntate pro offensa gravissima. Item et nos a nullo amplius desiderare quicquam debemus, sive saeculari sive religioso, quantumcumque sit astrictus voto, si fideliter fecerit pro suo posse.

#### *Compassio Dei.*

Alius est mos Dei, quod nulli imputat defectus corporis naturales, sicut est caecitas, surditas, membrorum deformitas qualisemque, vel defectus naturales in anima, sicut est stoliditas, defectus intelligentiae, ingenii, memoriae, rationis, aut timor naturalis: propter hujusmodi defectus Deus neminem abjicit aut contemnit; sed defectus spirituales, quos auxilio Dei ex facili quilibet posset evincere, graviter imputat; scilicet magnitudinem quorumlibet donorum, appetitum superfluum, tristitiam de profectu bonorum, gaudium de afflictione justorum, bonorum operum perversionem seu detestationem, bonae famae aliorum denigrationem vel diminutionem, privatam amorem firmiter tenere, singularem sensum nullatenus relinquere ad placentiam hominum, frequenter studere, odire correctionem, amare adulationem, quaerere extraneas consolationes, fovere carnales affectiones et similia. Ita et nos neminem debemus despiciere, si non est in eo sanitas, membrorum integritas, corporis fortitudo, formae pulchritudo, eloquentia vocis, habilitas ad cantandum et legendum; quae nullus per se habere potest, sed pro habentibus Deo gratias agere, pro non habentibus patientiam habere, et quantum possumus, defectus eorum supplere.

#### *Largitas Dei.*

Alius mos est in Deo, quod unicuique gratiam praestat secundum suam capacitatem, sicut legitur in Evangelio: « Quod uni dedit quinque talenta, « alii duo, alii unum, unicuique secundum pro- « priam virtutem. » Unde quanto magis cor hominis per caritatem Dei et proximi dilatatur, et quanto amplius per bonas meditationes, per ferventes orationes, per justa desideria, per opera humilitatis et supererogationis habilitatur, tanto majorem gratiam Deus omnipotens elargitur; et quanto diligentius collata gratia conservatur, et ea quisque utitur ad laudem Dei et universitatis utilitatem, tanto ad ulteriorem gratiam praeparatur in praesenti, et gloriam in futuro. Dilatandum est igitur cor nostrum, et frequenti desiderio praeparandum, ut Deus dives in omnes qui invocant

illum secundum suam magnificentiam, abundanter super nos possit effundere gratiam suam. Quemcumque etiam contingit dispensare bona spiritualia in praedicatione et in consiliis, advertat diligentissime ne sanctum det canibus, et margaritas projiciat ante porcos; sed dies dici eructet verbum, et nox nocti indicet scientiam, hoc est perfectis perfectiora, imperfectis minus perfecta, tamquam prudens dispensator provideat, sicut Apostolus 1 Cor. 2: « Sapientiam loquatur inter perfectos, » sed simplicibus nisi Jesum Christum, et hunc crucifixum. Temporalia vero unicuique indigenti secundum capacitatem, idest secundum puram necessitatem, et non amplius, subministret.

#### *Discretio Dei.*

Alius mos est Dei, quod ab eo plus exigit cui plus committit, sicut dicitur in Evangelio Luc. 12. Cui enim abundantius providet in temporalibus, ab eo exigit ut abundanter procuret eleemosynas pauperibus; et cui majorem confert sanitatem et corporalem fortitudinem, ab eo jejuniorum, vigiliarum, orationum, peregrinationum et bonorum operum magis expedit exercitium. Item cui plurima et gravia peccata dimittit, seu a peccatis custodit, majorem dilectionem et digniores poenitentiae fructus ab eo requirit. Item cui excellentiora dona gratuita, scilicet virtutes, et meliora naturalia, scilicet ingenium, intellectus, memoria, voluntas, arbitrii libertas et membrorum integritas, et spiritualia plura et digniora, scilicet devotio, securitas conscientiae, frequentior confidentia, spirituale gaudium, maturitas sermonis, ad perfectionem fidelitas, diligentia ad bona opera, pura intentio, zelus animarum, fervor orationis, a Deo frequentius conceduntur, ab eo frequentius gratiarum actiones merito exquiruntur. Item quem plus benignus Deus ad cognitionem bonitatis, aeternitatis, immensitatis, omnipotentiae, largitatis, caritatis, sapientiae, misericordiae, justitiae, veritatis, fidelitatis, patientiae, humilitatis, suavitatis et nobilitatis suae plenius et frequentius admittit, ab ipso abundantiorum laudem et frequentiorum et ferventiorum requirit. Item quem ad quaerendam et cognoscendam majorem perfectionem illuminat, ut eam opere compleat, et in cognitam magis et magis proficiat, ab ipso magis expostulat: nihilominus necesse est, ut ipse ad eandem cognoscendam et imitandam verbis et exemplis, orationibus, et desideriis, quocumque habiles cognoscit quantum potest inducat. Providendum igitur nobis est, ut singula praedicta dona nobis commissa, cum usura Domino referamus, ne in ratione reddenda quod nobis commiserat auferri jubeat, et cum servo pigro recondente Domini talentum in sudario, in tenebras nos miserabiliter mitti jubeat exteriores.

#### *Justum judicium Dei.*

Alius est mos Dei, quod facta hominum non judicat sicut apparent exterius, sed secundum intentiones cordium interius omnia discernit in sua immensa et ineffabili sapientia, ideoque opera secundum intentionem punit graviter, vel remunerat excellenter. Similiter secundum visionem oculorum aut secundum auditum aurium judicare non convenit opera hominum; sed sive benignum vultum,

sive seriosum nobis ostendant, sive blande, sive aspere nobis loquantur, sive dent munuscula, sive non dent; in omnibus quantum possumus, non tantum quod fiat, sed etiam qua intentione fiat studeamus advertere, et secundum talem intentionem regere nos debemus. Potius autem sustinenda sunt ab amicis veris qui bona intentione emendandi gratia, dura verba loquuntur, quam blanda verba et dulcia ab eis qui non vere diligunt, nec aliquem fructum intendunt, sed tantum placere contendunt: quia meliora sunt vulnera diligentis, dicit Salomon, quam fraudulenta oscula odientis.

#### *Veritas Dei.*

Alius mos est in Deo, sive perfectio, quod verax est in promissis. Facilius est enim, ipso teste, caelum et terram transire, quam unicum verbum suum falsificari vel mutari: non enim accepit Dominus Jesus verba in vento, sicut nos facimus; sed singula verba quae loquebatur in tempore, dicta sunt ab aeterno in sua sapientia. Sicut autem verificavit verba Prophetarum ardua de ipso praedicientium, scilicet incarnationem, nativitatem, passionem, resurrectionem, ascensionem, Spiritus sancti missionem; ita complebit resurrectionem generalem promissam, et judicium futurum; et solvet promissum pauperum, cum eos ad judicandum duodecim tribus Israel in judicio super sedes duodecim sublimabit; et promissum lugentium, cum ipsos sicut mater filios personaliter consolabitur: et promissum humilium, et superborum, cum eos secundum quod humiliati et despecti sunt, exaltabit, et superbos quantum se glorificaverunt humiliabit, et promissum oppressorum, cum de mandato Dei colla opprimentium conculcabit: nam fidelis Deos in omnibus verbis suis, et quaecumque promisit, potens est facere. Sic et nos veraces esse decet, ut promissum quo nos in baptismo patrini nostri obligaverunt, fideliter servemus, scilicet tenere totam fidem catholicam, et renuntiare diabolo et pompis ejus, implere decem praecepta. Insuper quae postea sponte promissimus, sive obedientiam, sive continentiam, sive abstinentiam, sive religionem et similia. Item veraces esse debemus ad proximum, ut sit sermo noster, est, non est; idest omne quod loquimur corde intendamus; ut si quicquam alicui promissimus, aut si alicui mortuo aut vivo in aliquo obligati sumus, solvere non tardemus, quia veritatem requirit Deus, et retribuet abundanter veritatem contemnentibus. Heu heu quam odiosa est veritas, quae optima est, per quam est omnis salus: qui autem odit veritatem, odit Christum; immo etiam sunt veritatis proditores; unde Joannes Chrysostomus: « Non solum ille proditor est veritatis qui palam pro veritate mendacium loquitur; sed etiam ille qui veritatem libere non pronuntiat, quam libere pronuntiar oportet: aut non libere veritatem defendit, quam libere defendi convenit, proditor veritatis. »

#### *Deus non est personarum acceptor.*

Alius mos est in Deo, quod non est personarum acceptor, sicut dicitur Act. 10. Neque enim in veteri lege potentes et nobiles, sed humiles constituit iudices super populum suum, sicut Moysen et Josue, Gedeon, et similes: neque postea elegit ad regnum potentes et nobiles, sed de humili stirpe gemini



Saul filium Cis, et David minimum inter fratres de pascuis ovium in regem sublimavit. In primitiva etiam Ecclesia non potentes, sapientes et nobiles, sed piscatores ignobiles constituit principes super omnem terram, ipsis regimen Ecclesiae committendo, et quae stulta sunt mundo, elegit, scilicet idiotas, ut confundat sapientes, sicut dicit Apostolus Cor. 1. Item hodie nulli confert gratiam gratuitam propter potentiam, nobilitatem, fortitudinem, aut pulchritudinem corporalem: « sed in omni gente qui « timet Deum et operatur justitiam, acceptus est « illi, » sicut dicit Petrus Act. 10. Nec solum divites, potentes et formosos vocat ad caelum, sed etiam pauperes, coecos et claudos, debiles, infirmos et ignobiles compellit intrare, et humiles personae maxime proficiunt in Ecclesia Dei, et in gratiis spiritualibus abundant. In postremo etiam iudicio personas regum et principum non accipiet, sed magnum et parvum aequaliter iudicabit: nec secundum potentiam, nobilitatem aut pulchritudinem, sed secundum humilitatem, caritatem, unumquemque in gloria sublimabit. Similiter nec nos personam cuiusque debemus accipere: quia, ut dicit Gregorius, hominem ad hoc quod homo est, id est quia ad imaginem Dei factus est, debemus honorare, non ob aliquid quod circa ipsum est, id est propter divitias, vestes pretiosas, potentiam, nobilitatem, amicorum et cognatorum multitudinem: nam acceptio personarum in sacra Scriptura pro magna imperfectione reputatur. Absit etiam ut praedicator vitam divitum, nobilium et potentium habentium hic consolationem suam in praedicatione commendat: vitam vero pauperum et afflictorum hic gementium irrationabiliter repraesentat. Absit etiam ut confessor propter juventutem, pulchritudinem, potentiam, divitias et nobilitatem, et propter suum lucrum et commodum potius audiat quam alium, vel ad ipsum eat cum labore, aut plus temporis expendat cum ipso, quam cum sene, paupere, infirmo, ignobili, qui forte amplius indigeret; sed talibus haec intentione amplius est insistendum, quia possunt magis quam alii peccare, et plures ad peccandum inducere. Absit etiam ut dantes eleemosynas pauperum personas accipiant; sed ubi major est indigentia, major et frequentius detur eleemosyna: et qui ad majorem perfectionem proficere cognoscuntur, majori subsidio adjuvantur. In omnibus tamen, secundum doctrinam Apostoli, Rom. 13: « Cui debemus timorem, timorem, et cui « honorem honorem, » et cui amorem amorem et cui familiaritatem familiaritatem, ratione majoris sanctitatis, vel praelationis, vel ratione ordinis clericalis.

#### *Cura Dei de creaturis.*

Alius est mos Dei, quod ipsi cura est de omnibus creaturis tam de minimis quam de maximis, animalibus natatilibus, volatilibus, etiam de passeribus, quorum duo veneunt dipondio, nec unus est in oblivione coram Deo. Item de magnis et parvis vermibus. Haec enim omnia in esse conservat, eisque vitae necessaria continue subministrat. Item de quatuor elementis curam habet, et omnium quae ab eis nascuntur vel nutriuntur, sive vegetantur, ut herbae et arbores, sive vivant, ut cetera animalia. Praecipue vero gerit curam hominum, quos ad imaginem et similitudinem suam fecit, quos membra dilecti Filii sui constituit, et templum Spiritus

*S. Th. Opera omnia. V. 17.*

sancti ordinavit, singulis singulos ad custodiam deputans, in carne et sanguine pretioso. Unigeniti sui reficiens; quodque praestantius est, peccatoribus inimicis suis vitae necessaria providet abundantius quam amicis. Item curam gerit animarum, quibus oblationes sacerdotum proficiunt ad poenarum remedium, licet ipsis sacerdotibus ex ejusdem oblationibus indigne offerentibus damnatio generetur. Similiter per desideria triumphantis, et per suffragia militantis ecclesiae adjuvantur. Et licet homines orationibus, eleemosynis, jejuniis, peregrinationibus extra caritatem factis propria peccata delere non sufficiant, pie tamen credi potest quod ex eisdem mitigationem et absolutionem poenarum ex benignitate Dei suscipiunt, cum pro eis fiunt, si viventes in hoc saeculo meruerunt. Angelorum curam etiam magnam habet, quos in tanta beatitudine creans, absque omni mali experientia conservavit immunes et conservat. Similiter et nos curam gerere debemus quarumlibet creaturarum, ut singulis secundum Dei ordinationem utamur, ne in die iudicii ipsas in malitiae nostrae testimonium habeamus. Item curam omnium hominum, ut commodum et incommodum singularum nobis medullitus sumamus, ipsosque ab justitia retrahentes desideriiis, orationibus et bonis exemplis in Domino confortemus. Item curam animarum in purgatorio, ut ipsarum poenas operibus misericordiae frequenter mitigare curemus. Item curam Angelorum, ut praemium quod ipsis ex eorum obsequio et custodia de nostro profectu debetur, ex culpa nostra ipsis nullatenus subtrahatur. Item curam Dei prae omnibus gerere debemus sollicite, ut semper et ubique quicquid ei de nobis maxime placeat, et ad quae nos maxime ordinaverit, exequamur.

#### *Aequanimitas Dei.*

Alius est mos Dei, quod nunquam turbatur: et licet Scriptura saepe referat de ira et furore Dei, nequaquam credendum tamen est ipsum posse turbari; sed cum peccata vindicat, vel ex justitia gratiam subtrahat, irasci et turbari. Ipse vero impassibilis non habens contrarium, et tantae simplicitatis, et tanta sibi jucunditas et felicitas est in natura, quod in ipso nulla turbatio locum habet. Similiter et nos quantumcumque possumus,urbationem nostram vitare debemus, quia modica vel potius nulla gratia quiescere potest in anima turbata. Ad vitandum ergourbationem, necessaria est vehementis circa Deum occupatio, et dilectio fortis ut mors, quae virtutem mortis operetur in nobis, ut nulla opera proximorum videntes non videamus, et verba noxia, vel nobis contraria audientes, non audiamus: nec corda nostra in talibus occupemus, sed simus quasi caeci et surdi, et quasi muti, et quasi non habentes corda, sicut David de se dicit Psal. 57: « Ego tamquam surdus, et sicut mutus « etc. » Instantes tantum fideliter et ferventer his quae Dei sunt, et alios in omnibus propriae conscientiae relinquentes, sive iudicio praelatorum, sive extremae vindictae Dei dicentis: « Mihi vindictam, « et ego retribuam eis in tempore ». Similiter et aliorumurbationem quantumcumque possumus, vitare debemus, ne ipsi nos e contrario perturbent, ut saepe fieri solet, ut ex hoc remordentem conscientiam ipsi habeamus. Quicquid in sanctis meditationibus, justis desideriiis, orationibus, aliisque

bonis operibus subtrahatur universitati, sive in caelo sive in terra, bonis et malis, sive in purgatorio nobis turbationem ex justa causa promoventibus, omnipotens Deus amator justitiae inultum in novissimo die non relinquet.

*Deus non quaerit commodum suum.*

Alius est mos Dei, quod in omnibus operibus suis et ordinatione nihil commodi sui respicit, sed pure et principaliter aeternae et immensae bonitatis suae abundantiam, et hoc ad humanae et angelicae creaturae utilitatem. In creatione quippe et conservatione caelorum, quatuor elementorum, et omnium quae in eis sunt, non considerat suum commodum, sed hominum et angelorum fructum. Similiter quicquid ordinat in creatoris quibuscumque, sive sit temperies sive intemperies, sive penuria fructuum sive abundantia, sive sanitas sive pestilentia: quicquid etiam facit circa homines conferendo gratiam sive subtrahendo, sive permittit eos sanos esse, fortes, debiles vel infirmos pauperes sive divites, vivere sive mori, sive permittit regnare bonos sive malos, intueri, sive affligere pauperes, sive juste judicare, sive iudicium pervertere; omnia ordinat, omnia facit, omnia permittit propter suam inaestimabilem bonitatem, et hominum communem utilitatem. Similiter in omnibus desideriis, orationibus, jejuniis, eleemosynis, verbis nostris. et in aliis omnibus quae facimus, dimittimus, sustinemus a Deo, pura debet esse intentio nostra, ut nec placentiam nec displicentiam hominum aut nostrum commodum attendamus, aut gratiam in praesenti, aut gloriam in futuro; sed tantummodo pure et principaliter propter Dei admirabilem bonitatem, et secundo proximorum salutem. Sed quanto magis et purius partem Dei respicimus, et quanto minus nostram et aliorum utilitatem attendimus, tanto acceptabilius est Deo, et tanto universitati fructuosius opus nostrum. Heu quantum Deo deperit, et universitati, quod in factis nostris aliquid respicimus, nisi pure Dei bonitatem. Cum enim ventilabro suo separabit paleam a tritico, sicut dicitur Matth. 13, per sapientiam suam purum dividet ab impuro, tunc solum triticum in horreum assumet, palea comburente, id est solum id quod propter Deum factum est pure vel dimissum vel passum, in caelo remunerabitur, et universitati utile redditur, dicente Propheta, 17: « Retribuet mihi Dominus minus secundum justitiam meam, et secundum puritatem manuum mearum in conspectu oculorum eius. »

*Deus omnia bene fecit.*

Alius est mos Dei, quod omnia opera sua in summo bene fecit: opus quippe caeli et terrae, Angelorum et hominum et aliarum creaturarum adeo bene fecit, ut melius excogitari non posset. Similiter opus redemptionis, quod nemo alius in caelo nec in terra facere potuit, sicut legitur in Apoc. In summo bene fecit, prudenter vincendo diabolum in ligno quo vicerat, sub humana fragilitate semper celans divinam potentiam: quia si daemones cognovissent, ut dicit Apostolus 1 Corinth. 2, « Nunquam Dominum gloriae crucifixissent, » id est crucifigi persuasissent. Similiter quicquid hodie facit, sive peccata vindicet, sive dissimulet propter

poenitentiam, sive gratiam subtrahat electis, sive conferat, sive fidei animae quandoque se familiarum, quandoque alienum exhibeat, sive sit ventus, sive pluvia, sive aura frigida, sive calida, sive sicca sit via, sive madida, sive fructus terrae abundet, sive pereat, pro illo tempore melius fieri non posset; quia ex nimia caritate et benignitate immensa sua sapientia singula debito tempore operatur. Opus vero remunerationis in summo benefaciet, cum singulis peccatis, et singulis membris quae fuerunt arma iniquitatis, reddet justam poenam pro quantitate et qualitate commissionis, et tamen singulis bonis voluntatibus, verbis, factis, et exemplis justam mercedem restituet pro quantitate caritatis. Similiter et nos diligentiam apponere debemus ut singula opera nostra quantum unquam melius possumus, faciamus ex omni virtute Domini nostri Jesu Christi, et cum omni desiderio triumphantis et militantis ecclesiae, et sub nomine creatoris, quasi tota salus nostra et omnis laus Dei et universitatis utilitas ex uno opere dependeat, quasi nunquam ad id opus reversuri, neque opus aliud postmodum incepturi. Quoties enim aliquod opus facimus, aut ad aliud opus ferventer properantes ex solo desiderio alterius operis, statim flaccescit animus in opere in quo sumus; verbi gratia, cum sumus in oratione vel in alio opere, et proponimus scribere vel aliud opus facere, statim orationem minuit noster affectus, et citius absolvi-mur ab incepto.

*Benignitas Dei.*

Alius est mos Dei, quod nullum judicat secundum praeteritam vel futuram malitiam vel bonitatem quam ipse cognoscit in homine, sed secundum praeteritam justitiam: sicut Paulum non damnavit propter praeteritam malitiam, nec Judam salvavit propter praeteritam justitiam. Sed nos miseri, quantumcumque aliquis proficiat in virtutibus vel sanctitate, frequenter tamen praeteritae recordamur injustitiae: si autem justus cadens a via justitiae in aliquo seculi excidit, et si resipiscat, nequaquam tamen sanctitatis praeteritae recordamur.

*Misericordiae Dei.*

Alius est mos Dei, quod nunquam bis punit in idipsum, si una poena sufficiat, et si sequitur correctio inter flagella. Nos autem miserrimi pro una nobis illata injuria, centum si esset possibile, graviores molestias inferremus.

*De conformatione animae ad Deum.*

Fidelis anima toto nisu conformare se debet praedictis divinis moribus pro posse suo: quanto enim conformior erit in istis anima creatori suo in saeculo, tanto conformior erit in futuro: et quanto conformior, tanto beatior, et tanto laudabilior Deo, et universitati utilior. Jam gaudendum est fidei animae, quia praedictos mores Dei habebit in aeterna vita, cum ei similes erimus, et videbimus eum sicuti est.

*Oratio.*

Eja piissime Deus, qui animae nostrae tuam imaginem absque nostro desiderio impressisti, petimus per omne quod tu es, cum omni quod tu es, praedictos mores misericorditer imprimere nobis digneris, ne in vanum circa nos laboraveris, ne in vacuum, immo periculose vivamus, si non tuum servitium circa nos ad finem debitum perducamus.

*In omnibus non possumus Deum imitari.*

Sunt et alii mores in Deo, in quibus non est imitandus, sed potius admirandus: scilicet quod ipse solus occulta cordium scrutatur, solus seipsum perfecte cognoscit et amat, et fruitur ac laudat, ipse sibi solus sufficit, et non indiget extrinseco: ab ipso solo omne bonum procedit, omnium beatitudo in ipso solo consistit, ipse solus habet immortalitatem et inhabitat lucem inaccessibilem, ipse solus de nihilo aliquid fecit, ipse solus omnia in esse conservat, ipse solus peccata condonat, ipse solus scit horam iudicii, ipse solus scit numerum electorum; benedictus Deus, Amen.

# OPUSCULUM LVI.

## DE BEATITUDINE

(EDIT. ROM. LXIII.)

### PROLOGUS.

« Beati qui habitant in domo tua Domine. » Domus Dei est aeterna beatitudo, quam naturaliter omnis homo desiderat, ut dicit Augustinus. Illa beatitudo consistit in Dei cognitione, dilectione, fruitione, unione, laude, gratiarum actione et congratulatione. In praesenti vita cognoscitur Deus per speculum et in aenigmate, ut dicit Apostolus 1 Cor. 13: per fidem vel per creaturas obscure: nam magnitudine, pulchritudine, bonitate creaturae, ut dicitur in lib. Sap., cognoscibiliter creator poterit intueri: unde dicit Augustinus: « Qui fecit magna, major est: qui fecit pulchra, pulchrior est: qui fecit bona, optimus est. »

### CAPUT I.

#### *Primum principale cognitionis per Deum.*

Sed in illa beatitudine cognoscitur Deus facie ad faciem sicut est, hoc est, Deus per Deum: unde Psal. 53: « In lumine tuo videbimus lumen, » hoc est Deum Patrem in Filio Deo, et Filium Deum in Patre Deo, et Spiritum Sanctum in utroque. Haec tanta res est, ut dicit Augustinus, ut in ejus comparatione nihil sit totum. De isto dicit Apostolus 1 Cor. 13: « Tunc cognoseam sicut cognitus sum. » Deus enim cognoscit nos non per creaturam, sed per se Deum: ita et ipsum similiter cognoseimus. Tunc oculo ad oculum Deus manifestabitur in omni divina natura sua, scilicet potentia, sapientia, bonitate etc.: de quo dicit Isa. 45: « Vere tu es Deus absconditus. » Hanc cognitionem non operabitur Angelus in Angelo vel in homine, vel homo in Angelo vel homine, dicente Domino per Jerem. 51: « Non dicet vir fratri suo, Cognosce Dominum, A minimo enim usque ad maximum omnes cognoscent me, dicit Dominus. » Sed solus Filius Dei operabitur in quolibet Angelo et homine illam cognitionem, quia, ipso teste, « Nemo novit patrem nisi Filius, et cui voluerit Filius revelare, » sicut dicit in Joan. 13: « Pater, quos dedisti mihi, volo ut ubi ego sum, et illi sint mecum, ut videant claritatem meam. » Claritas Filii est claritas Patris. Haec ergo beata cognitio justitiam consummatam facit et immortalitatem ad-

ducit, juxta illud Sapient. 13: « Nosse te consummata justitia est, » scire justitiam virtutem tuam, id est totam divinam naturam, totam sapientiam, potentiam, bonitatem tuam, quae radix est immortalitatis. De hac sola cognitione gloriandum est electis, juxta illud Jer. 9: « Non gloriatur sapiens in sapientia sua, nec dives in divitiis suis, nec fortis in fortitudine sua; sed in hoc gloriatur qui gloriatur, scire et nosse me. »

#### *Secundum principale cognitionis ad Deum.*

Item cognoscitur ibi Deus ad Deum. In illa beata cognitione quicquid cognoscitur in Deo vel de Deo, ducit ad Deum et in Deum, sive sit potentia, sapientia, bonitas, caritas et similia. Tanta est enim in Deo jucunditas et amabilitas, ut cognitus ab anima statim ipsam ad se trahat, eamque vehementer in se absorbeat ad similitudinem adamantis, qui virtute sua fortiter ferrum ad se trahit. Hoc testatur Spiritus sanctus in Canticis: « Oleum effusum nomen tuum: ideo adolescentulae dilexerunt, » hoc est, tanta est suavitas quae a te, Domine, incessanter effunditur, quod ad amorem tuum ferventes et fortes animae pertrahuntur. Sic cognoscens Dominum Saulus per vocem dicentem, « Ego sum Jesus Nazarenus, » mox tractus fuit ad obediendum divinae voluntati, dicens: « Domine, quid me vis facere? » Sic et beata Maria Magdalena, ut cognovit quod Jesus accubuit in domo Pharisaei, statim venit in fervore, afferens alabastrum unguenti pretiosi.

#### *Tertium principale cognitionis propter Deum.*

Item cognoscitur ipse Deus propter Deum: nam finis cognitionis ipse est. Licet enim anima ex illa cognitione percipiat aeternam beatitudinem, sicut Dominus testatur Joan. 17: « Haec est enim vita aeterna, ut cognoscant te solum Deum, et quem misisti Jesum Christum: » illam beatitudinem non percipit finaliter pro utilitate sua, sed pro manifestatione gloriae Dei, ut glorificetur in anima beata Trinitas. Ibi limpide cognoscit anima quod intellectus capere non potest, videlicet quomodo aeternus Deus et immensus, Deus unus est in substantia, et trinus in personis. Item lucide cognoscit quomodo Filius aeternaliter nascitur a Patre, et quomodo Spiritus sanctus continue procedit aqua-



liter ab utroque. Nec tamen una persona major vel minor est altera, nec dignior vel prior, nec posterior est altera, sed in singulis aeternitas vera, coequalis majestas. Item ibi perspicue cognoscit anima quomodo divinitas et humanitas inseparabiliter unita est in una persona Jesu Christi, et quicquid Deus habet per naturam, habet ille homo per gratiam. Et in hac cognitione trinitatis et unitatis, divinitatis et humanitatis Christi, maxima ejus beatitudo consistit. Item teste Salomone, omnium operum Dei nemo rationem aliquam invenire poterit in hac vita: et quanto magis investigare laborat, tanto minus inveniet: illic vero manifeste cognoscit anima omnia opera divina et maxima, et omnium rationem, creationem caeli et terrae et omnium elementorum ex nihilo, distinctionem ordinum angelicorum, sapientissimam doctrinam donorum gratuitorum naturalium: nam singuli Angeli specie et numero differunt sicut stellae. Et in singulis operibus divinis delectabitur anima supra modum, cognoscens opera Dei esse optima suo tempore, et optimo modo facta, teste Damasceno: « Si divina « voluntas est providentia, omnino necesse est quae « providentia fiunt, secundum certam rationem, et « ut optima et Deo decentissima fieri, et ut non « est melius fieri. » Item aperte videbit anima singula dona a fonte divino fluentia, non sic effluere tanquam ab ipso recedant, sicut rivus a fonte recedit; sed semper in ipso integraliter manent, sicut lucerna non amittit suam plenitudinem ex eo quod lucerna alia accenditur ab ipsa, et sine sui diminutione omnibus lumen communicat, et dividitur in multa sine omni sua mutatione et sui diminutione. Ideoque sine damno omnibus desiderantibus dat affluenter, ut dicit beatus Jacobus. Alioquin si ex donatione pauperior fieret, sicut homo qui quod dat non retinet, jam non esset summe perfectus, immo continue sua perfectio minueretur. Similiter dona sua semper nova sunt, quia non est ibi praeteritum et futurum, sed semper praesens; et quod semel dat, semper dat: alioquin mutatio esset apud Deum: ideoque semper merito gratitudo debet esse tanta nobis de singulis donis Dei, sicut cum ipsa percipimus prima hora. Ex eadem ratione singula opera Dei nova sunt, et quicquid semel facit, semper facit propter immutabilitatem suam: unde Pater dicit ad Filium, Psal. 2: « Ego hodie genui te, » licet multis annis ante fuerit facta divina generatio et humana. Ideo cum eadem gratitudine nobis semper debet esse prae oculis, sicut quando primitus fecit, et ea gratitudine omnia opera sua facit. Item lucidabit anima quod hic occultum est, quomodo Deus ipse idem immutabilis, simplex et indivisibilis, secundum magis et minus participatur ab Angelis et Sanctis, secundum quod magis et minus divinis moribus simulantur: ad instar Solis, qui unum magis, alium minus calefacit, similiter ad instar cibi, qui uni est occasio infirmitatis, alii sanitatis, qui uni est sapidus, alteri insipidus, secundum quod plus vel minus natura illorum cum cibo illo convenit, vel cum sole. Item, ibi cognoscat anima summam bonitatem et sapientiam Dei principium esse omnium creaturarum et operum divinorum. Nam bonitas Dei producit in esse creaturas: sapientia vero constituit doctrinam inter ipsas. Ex summa igitur sapientia et bonitate inscrutabili facit auram nunc frigidam, nunc calidam, nunc siccam, nunc madidam, nunc procellosam, nunc tranquillam. Ex

eadem sapientia et bonitate facit unum divitem, alium pauperem, unum fortem, alium debilem et infirmum, et alium deformem. Ex eadem sapientia et bonitate modo facit unam creaturam sensibilem, aliam rationalem, aliam sine ratione; uni dat unam formam, alteri aliam: ideoque teste Ecclesiastico 1: « Opera Dei omnia bona sunt, et non est dicere, « Hoc est nequius illo. » Omnia enim tempore suo comprobabuntur, nec est infernus pejor caelo, dicente Isidoro: « Sicut caelum sideribus, ita infernus « damnatis hominibus et daemoniis ornabitur: aqua- « liter enim commendat justitiam iudicis iniquorum « devastatio, sicut innocentum defensio. » Item, licet teste Apostolo, incomprehensibilia modo sunt judicia Dei de damnandis, et investigabiles viae ejus de salvandis; ibi tamen comprehendet anima quod universae viae Domini fuerunt misericordia et veritas ad iudicandum. Misericordia restrinxit justitiam, ne nimis (1) severe ageret, juxta illud Tob. 3: « Cum iratus fueris, misericordiae « recordaberis. » Et justitia temperavit misericordiam, ne nimis parceret: nam facultas veniae incentivum tribuit delinquendi. Justitia semper misericorditer punit, et misericordia semper secundum justitiam parcit. O quam occulta sunt in praesenti divina judicia! Quis enim investigare potest, cum dixerit Dominus Malach. 1: « Jacob dilexi et Esau « odio habui », antequam nati essent, quod vitium detestaretur in Esau, et quam virtutem diligeret in Jacob? cum nullum iudicet, nisi secundum praesentem justitiam. Similiter cum duo pueri portantur ad baptismum, unus natus de fidei moritur ante baptismum descendens in limbum, alter natus de infidei post baptismum moriens, statim evolat ad caelum. Similiter quare Dominus Jesus uni latroni tantam gratiam dedit, alteri vero nullam. Similiter quare Judam finaliter cadere permisit, et nullum alium Apostolorum. Et quare ab uno die gravia et multa peccata sustinet ut a David, alium vero post primum peccatum damnat sicut Saul. Haec solvit Glossa super Genes. dicens: « Novit « Dominus cui pareat usque ad commutationem « in melius, sicut pepereit Aaron, quem non per- « didit cum aliis in conflatione vituli aurei: sic « pepereit Ezechiae, contra quem dederat sententiam « mortis, et tamen postea quindecim annos ad viven- « dum dedit. Item novit cui pareat ad tempus, quam- « vis praescierit eum in melius non mutari: sicut pec- « catoribus ante diluvium dedit centum annorum « spatium poenitendi, et postea omnes homines « perdidit per diluvium, praeter octo. Item novit « cui non pareat, ut nec mutationem ejus expetet, « sicut igne et sulphure cito perdidit Sodomitas, « Datan et Abiron terra vivos absorbit in momen- « to. Haec omnia lucide videbit in speculo aeternitatis, « et quicquid augere potest suam beatitudinem, et « de singulis habebit gaudium cum electis. » Item cognoscat ibi anima quomodo sapiens Deus omnia opera divina, angelica et humana semper convertit ad optimum, hoc est manifestationem gloriae suae, et Angelis et hominibus ad fruitionem divinae naturae vel sapientiae. Et licet malum in se nec speciem habeat nec ordinem (2), singula tamen mala opera ordinat ad magnum bonum sapientissimus Deus, qui in domo sua nil inordinatum derelinquit. Mirabilem et irrecoverabilem casum Angelorum, et

(1) *Al.* minus.(2) *Al.* originem.

obstinatam malitiam eorum ordinavit ad exercitium et coronam justorum, juxta illud Bernardi: « Jucundum Dei judicium est, quod superbus ille humilium malleator, ipso nesciente fabricat eis coronas perpetuas, ipsos impugnando. » Similiter unicum casum solius hominis Adae convertit in admirabilem totius humanae naturae exaltationem. Ex hoc enim humana natura divina inseparabiliter unita est in persona Domini Jesu, non conversione divinitatis in carnem, sed assumptione humanitatis in Deum. De quo Chrysostomus: « Revera magnum et mirabile est carnem nostram sursum sedere, et ab Angelis et Archangelis adorari, quod nequaquam factum fuisset, si Adam non peccasset. » Unde Leo Papa: « Si homo ad imaginem Dei factus in suae naturae honore perstitisset, nec diabolica fraude deceptus a lege sibi posita deviasset, creator mundi creatura non fieret, nec sempiternus temporalitatem subiret Deus, nec aequalis Deo Patri Filius formam servi et similitudinem carnis peccati assumeret. » Similiter iniquam venditionem Joseph mutavit in salutem maximam fratribus venditoribus et Aegypto: qui si venditus non fuisset, tota Aegyptus et circumjacentes provinciae inedia periissent: quod propriis fratribus venientibus in Aegyptum pro annona comparanda testabatur dicens: « Nolite timere, pro salute etc. » et ipsi similiter testabantur respondentes ei: « Salus nestra etc. » Similiter gravissimum peccatum quod ab initio factum fuit, cum de consilio et invidia promotione Judaeorum venditus fuit Filius Dei, et traditus, et blasphematus, ad mortem turpissimam condemnatus, crucifixus, inter latrones suspensus. Hoc malum pessimum ordinavit Dominus Jesus ad peccati destructionem, angelicae reparationem, diabolicae potestatis diminutionem, captivorum in limbo creptionem, caelestis januae aperitionem et reserationem, et ut quilibet peccator multo facilius quam antiqui patres sanctissimi promereri posset immediatum transitum post praesentem miseriam ad divinam fruitionem. O ineffabilis sapientia, quae tantum malum convertit in tantum bonum! Similiter illud grave peccatum beati Petri pro prima negatione Domini convertit ad bonum magnum peccatoribus, ut apud eum quem ecclesia caput habere debebat, uberiores compassionem et misericordiam invenirent. Dicit enim Eccles. 35: « Qui non est tentatus, qualis sit. Et qui non est expertus, pauca cognoscit. » Quomodo enim medicus qui non patitur, compati potest aegroto? Non compatitur famelico saturatus, neque peccatori justus. Ex eodem casu beati Petri Dominus Jesus praesumptionem omnibus hominibus amputavit. Similiter grave peccatum infidelitatis beati Thomae redegit Dominus Jesus ad bonum totius Ecclesiae. Magis enim credi oportebat de resurrectione Dominica beati Thomae ex visu et tactu cicatricum, quam beatae Mariae Magdalenae, quae solis verbis crederat Angelorum. Similiter pertinaciam Sauli convertit Deus in salutem omnibus ecclesiis, cum prostratus saevissimus persecutor, factus est evangelii fidelissimus predicator. Valde enim laudabile fuit nomen Domini Jesu coram regibus, Judaeis et gentibus constanter annunciare, quod tanto fervore in Damasco expugnare venerat et delere. Similiter grave peccatum et contumeliam quam sustinuit in nuntiis suis Prophetis, Apostolis, martyribus, convertit in fulcimentum nostrae spei cunctis fidelibus. Nisi enim fidem catholicam suo sanguine

defendissent, nequaquam Domini Jesu nomen ad nos cum fide catholica cum tanto robore pervenisset. Unde Isa. 1: « Nisi Dominus reliquisset nobis semen, » supple in Apostolis et martyribus, « sicut Sodoma fuisset, et quasi Gomorrha etc. » Ita etiam sapiens qui olim convertit aquam in vinum, mutabit omnem tentationem et tribulationem hujus miseriae in statum aeternae gloriae, et responderabit aeterna et immensa mercede, juxta illud Apostoli, 2 Cor. 5: « Id enim quod in praesenti momentaneum et leve est tribulationis, supra modum in sublimitate aeternum pondus gloriae operatur in nobis. » Ibi enim cognoscet anima vehementem diligentiam creatoris circa salutem generis humani, quae in primo apparuit cum unumquemque hominem ad imaginem et similitudinem suam fecit. Deinde unicuique angelum deputavit, qui cum in materno utero custodiret, natum ab insultu daemonum defensaret: necessaria corporis singulis momentis convenientissima ministravit, deinde ab originali peccato unda (1) baptismatis animam emundavit conferens Spiritum sanctum cum omnibus donis suis et singulis virtutibus; in filium quoque adoptavit; postmodum in adolescentia, quandoque in somno, quandoque interna inspiratione ad aeternam salutem mutavit. Foris autem per creaturas; quas singulis sic instituit, ut ad invisibilem creatorem animam introducant efficacissima exempla mortuorum hominum et vivorum. Similiter per sacram Scripturam quae nobis viam caelestem lucidissime demonstrat, qualiter homo se habere debeat ad Deum, qualiter ad proximum, qualiter ad amicos, quomodo ad inimicos, qualiter ad praelatos, qualiter ad subditos, qualiter ad vivos, qualiter ad mortuos. Sed quia non omnes Scripturam intelligunt, addidit Doctores et nuntios fidelissimos, qui eam exponunt universis fideliter et devote. In eadem Scriptura per praedicatores nunc minis terret, nunc blanditiis et promissis allicit miseris peccatores ad salutem. Qui nuntii dum quandoque ab exteriorum sollicitudinem in contemplatione divina quiescunt, quod Deo placet super omnia; ad innuendam tamen diligentiam suam circa peccatores, qui forte nunquam curant salvari, advocat multitudinem nuntiorum ab ea quiete quae sibi delicias facit, ad sollicitudinem peccatorum, dicens in Cant. 5: « Aperi mihi soror mea, quia caput meum plenum est rore. » Quae Gregorius exponit dicens: « Dum sponsa dormit, dilectus ei ut aperiat pulsat; quia dum mens sibi per otium intendit, Christus multa opera peccatorum in hoc mundo tolerat: quia nisi spirituales viri ad doctrinam se accingant, nunquam seipsos carnales cognoscunt, vel corrigere curant. Vult igitur sponsus ut aliquando otium dimittatur; et ad aedificationem proximorum spirituales quique sollicitantur; quia dum perfecti viri sibi solum per interiorum quietem intendunt, dolet sponsus quod saeculares magis ac magis, ac ad pejora corruunt, dum eum propter silentium spiritualium minus ac minus cognoscunt. » Quoniam autem haec omnia pro salute minime suffecissent propter diversa et gravia vulnera peccatorum; ideo Deus Pater ineffabili motu diligentia, misit unicum Filium suum; qui diligenter (2) considerans quomodo in singulis membris omnipotentem Deum peccatores offenderent, abundantiorum emendam quam meruerat genus humanum, exhibuit

(1) *Al.* unde.(2) *Al.* qui diligeret.

in cruce in membris singulis Deo Patri: in qua cum clamore valido et lacrymis in membris singulis vulneratus, salutem perditam humano generi restituit, a Patre pro sua reverentia exauditus. Et ne salus obtenta periret, verba sua, mores et exempla conscribi fecit in quatuor Evangeliiis, ex quorum imitatione salutem perpetuam meremur. Super haec omnia pro manifestatione diligentiae suae, sanctissimum Corpus suum et Sanguinem consecravit, et vim dedit consecrandi non tantum uni homini bono, nec tantum uno tempore vel uno loco, immo sacerdotibus criminosis eandem contulit potestatem, ut omni tempore et loco in Eucharistia et sacramentis ceteris consolationem spiritus et peccatorum medicinam homines invenirent. Si enim tantum perfecti Episcopi et sacerdotes, Chrisma, et Corpus Dominicum consecrare possent, innumerabiles homines sine extrema unctione et viatico morerentur. Insuper praelatos spirituales et saeculares constituit, qui etiam invitos egerent ad observantiam praeceptorum; et manifestis criminibus, poenis variis, et sententiis mortis subditos coercerent. Haec omnia sine adjutorio nostro et desiderio facere potuit et fecit, et nihil omisit eorum quae necessaria fuerunt ad nostram salutem, teste Domino in Isaia 2: « Quid « ultra debui facere tibi, et non feci? » praeter hoc solum quod non violenter ad caelum nos (1) trahit. Hoc ideo dimittit, quia justitiae suae non convenit invitum aliquem coronare, cui liberum arbitrium dederit; in hoc hominem sibi assimilans quod a nemine cogi potest. Unde Augustinus: « Qui creavit « te sine te, non justificabit te sine te. Creavit te « nolentem, non justificabit nisi volentem. » Et quia consensum liberae voluntatis exigit, ideo fere tota salus hominum perit. Veniet tempus cum apparebit innocentia creatoris circa salutem humani generis (licet Deus apud plurimos iudicetur reus, quasi salvare nolit quos redemit), quando manifestabit eum quanto serio Filius Dei pro salute suorum inimicorum laboravit. In tota enim machina mundi, teste Bernardo, non tantum laboravit. In aliis enim operibus dixit, et facta sunt: pro hominis vero salute sustinuit in verbis contradictores, in factis observatores, in morte illusores. Qui etiam in testimonium diligentiae suae cicatrices vulnerum ad caelum duxit, quibus iram Patris fortius mitigaret, et gratiam peccatoribus impetraret.

## CAPUT II.

### *Primum principale dilectionis per Deum.*

Ex illa cognitione beata amabitur Deus per Deum ab anima glorificata, hoc est per Spiritum sanctum. Quicquid autem creatura facit sub nomine creaturae, imperfectum est. Istud enim impetravit Dominus Jesus fidelibus suis, cum dixit ad Patrem: « Notum feci eis nomen tuum » per fidem, « et « notum faciam » per speciem, ut dilectio qua dilexisti « me, in ipsis sit. » Et dilectio qua Pater diligit Filium, est aeterna et immensa, scilicet per Spiritum sanctum, qui est nexus utriusque. Eadem dilectio, dicit Glossa, qua Pater diligit Filium, est in omnibus justis: per eandem enim anima glorificata diligit Deum et diligitur a Deo: alioquin anima, teste Augustino, quae non quiescit nisi in Deum, ad quem facta est, nunquam vere et perfecte quiesceret, nisi creatori suo in amore vicem rependeret. Cum autem, teste Bernardo, Deus animam amet, aeternitas amat,

(1) *Al. repetitur non.*

immensitas amat, cujus magnitudinis non est finis, cujus sapientiae non est numerus: necesse est animam Deum immense et aeternaliter reamare, si debet in Deo perfecte quiescere. Hoc non fit nisi per Spiritum Sanctum, de quo dicit Apostolus Roman. 5: « Caritas Dei diffusa est in cordibus nostris « per Spiritum Sanctum, qui datus est nobis: » ubi dicit Glossa: « Caritas Dei et Deus est, et donum Dei est. » Et quia Deus dilexit nos ut a nobis diligeretur, Spiritum sanctum dedit nobis. Si autem in caritate, quae virtus est, in illa beatitudine diligeremus Deum, superflue dedisset sapientissimus Deus Spiritum sanctum. Haec fuit olim opinio Magistri in Sententiis. Moderni autem aliter sentiunt: tene quod placet. Sed ad hoc dedit Spiritum sanctum, ut anima beati ipsi vicem rependeret in amore, et sic in ipso quietem omnimodam reperiret. Ad intelligentiam hujus notandum est, quod in Joanne scriptum est, quod Pater diligit Filium. Et iterum scriptum est in persona Christi, Joan. 17: « Ego « diligo Patrem. » Haec dilectio non est minor quam diligens et dilectus; quia Spiritus sanctus est amor Patris et Filii; nec minus amatur ab amante et amato ipse amor, quam amans ab amato, vel amatus ab amante. Et haec est illa serenissima, jucundissima et perfectissima trium personarum in una substantia dilectio, ubi amans est idem quod amatus, et amatus idem quod amans, amor idem quod amans et amatus, amatus et amans idem quod amor: ubi amans, amatus et amor penitus unum esse communicant, in uno velle conveniunt, unum nolle habent, idem posse participant immo totum possident. Ibi unum summum quod est omne bonum, in communi, et tamen in solidum possidetur. Nullius ibi boni sine dilectione est possessio. In hac dilectione nullus defectus, nulla omissio, nulla unquam turbatio, nulla interpolatio: de hac dilectione totum mutum est quod loquimur, etiam si summo studio loqueremur. Haec est cujus unio animam sibi unitam vere beatam facit: haec est gaudium de quo dicitur Joan. 15: « Ut gaudium meum in vobis sit, et gaudium vestrum « impleatur. » Quod est gaudium Patris et Filii nisi amare et amari, et taliter amari? Quomodo anima famelica saturabitur, nisi huic gaudio uniatur, ut ipsa in hoc gaudio, et gaudium hoc in ipsa sit, et ejus sic gaudium impleatur cum amanti ita unita fuerit et amato, quod se in tam felicissima unione amare sentiat et amari.

### *Secundum principale dilectionis ad Deum.*

Ibi etiam amatur Deus ad Deum. Nam amor Dei vehementer ducit Deum in animam, et animam in Deum, juxta illud 1 Joan. 4: « Qui manet in caritate, in Deo manet, et Deus in eo. » Quare? « quia Deus caritas est. » O quam felix anima, quae se absque interpolatione ex omni virtute sanctae Trinitatis ad omne et propter omne quod ipsa sentit se amari, et Deum tanto amore circa se occupari quasi omnium creaturarum sit oblitus: cujus beatitudo augetur, cum e converso amore sanctissimae Trinitatis cum omnibus viribus suis penitus se immergit. Tunc implebit illud beatissimum praeceptum, quod secundum expositionem beati Augustini in hac vita impossibile est impleri: « Diliges Dominum Deum tuum ex toto corde, » idest intellectu sine errore: « ex tota anima, » idest memoria sine oblivione: « ex tota mente, »



idest voluntate sine contradictione. Tunc enim anima nunquam errabit in amore Dei, ut Deo aliquam creaturam aequet vel praeponat: nunquam obliviscetur ad momentum amoris divini, qui semper praesens est: nunquam contrarium sentiet amori Dei, sicut, heu, in ista vita frequenter aliquid aequiparat Deo vel praeponderat, vel aliquid diligit propter quod Deum minus diligit, et saepe Dei obliviscitur, vel appetit aliquid divinae voluntati contrarium. Ibi etiam implebitur hoc praeceptum, secundum expositionem Chrysostomi dicentis: « Quid  
« est Deum diligere ex toto corde, nisi ut eor  
« tuum ad nullius rei dilectionem magis inclinatum  
« sit quam Dei, nec deleeteris in specie amplius  
« quam in Deo, non in honoribus, non in auro,  
« non in amicis etc. sed prae his omnibus Deum  
« ames. Si autem in aliquo horum occupatus fue-  
« rit amor cordis tui, jam non ex toto corde Deum  
« amas. » Pro quanta enim parte fuerit cor tuum  
ad aliquam rem, pro tanta parte minus est ad Deum. Quid est Deum diligere tota anima? certissimum habere animum in veritate, et firmum esse in fide. Quid est Deum diligere tota mente? ut omnes sensus tui Deo vacent, intellectus, sapientia cognitio, memoria. Qui ergo aliquid horum occupat circa temporalia, jam non ex tota mente diligit Deum. Hoc etiam impossibile est hic impleri.

*Tertium principale dilectionis propter Deum.*

Ibi etiam diligitur Deus propter Deum. Anima enim ibi diligit Deum non ob hoc solum quod sibi bonus est, largus et misericors; sed ob hoc multo fortius, quod simpliciter in se bonus, largus, et misericors est. Et quanto sincerius amat Deum propter innatam sibi bonitatem, et non propter participationem beatitudinis ipsius, tanto beatior est anima; licet communicatio beatitudinis divinae nequaquam ipsam moveat ad illam sinceritatem amoris. Eja quanta jucunditatis animae nascitur quanto creatori vicem rependit in sinceritate amoris, quam nulla sanctitas vel bonitas in anima, vel utilitas traxit ad amorem animae; sed innata bonitas, ut communicaret animae aeternam beatitudinem in se ipso, pro qua conferenda cum diligentia maxima laboravit. De hac diligentia dicit Episcopus Parisiensis: « Hoc est proprium bonitatis ubique, ut ad  
« sui fuitionem aliquos associet, et se eorum malis  
« portandis atque dolendis omnino exponat. » Tanta autem bonitas Dei, cui non est mensura, vel numerus, tantam requirebat societatis conjunctionem, ut de omnibus bonis suis nullum incommunicatum retineret, et de malis suorum nullum in susceptum relinqueret: ipsa enim bonitatis ejusdem immensitas pro ipsa fontis abyssali copiositate fluxus habere debuit usque ad ultimum et supremum, ut essent opera misericordiae et benevolentiae ab ipso fluentia, ultra quae et supra quae quo se extenderet non haberet: et hoc indubitanter erat sui ipsius largitio, quo nihil magis in bonis habeat ut conferat, et mortis amicorum susceptio quo nihil amici in malis magis habent ut ipse suscipiat. Vehementer ibi accenditur ad amorem Dei anima ex singulis quae in Deo sunt naturaliter, scilicet potentia (1), sapientia, bonitate etc. Specialius tamen inflammatur, cum fervore totius Trinitatis, quasi

omnium oblitus totaliter sit, et continue sentiet se infundi (1), teste Ezechiele: « Vultus animalium, » idest omnium sanctorum, « sunt ut carbonum ignis  
« ardentium: » nam teste David, Psal. 18: « Car-  
« bones succensi sunt ab eo, et non est ibi quis-  
« quam qui se abscondere valeat a calore ejus. » In praesenti vita nuntiavit sponsa sponso, quia amore tuo languco, ut dicitur in Canticis. In patria (2) vero praesentialiter dicitur: Amore tuo incessanter ardeo. Languor homini somnum subtrahit, cibum delicatum insipidum reddit, vires corporis et decorem adimit, omnem ornatum postponit, carnalis amicitiae oblivionem inducit. Haec omnia verus amor in anima similiter operatur. Ardor etiam humorem exiecat, materiam sibi conjunctam penetrat; ita etiam in patria fidelis anima per caritatem ab omni carnali concupiscentia separatur, et incessanter divinis gaudiis penetratur. Et valde mirabile est, cum teste Moyse, Deus noster ignis consumens sit, et natura ignis sit consumere omnia in se et juxta se posita, quod anima ex tanto fervore non consumitur. Item licet anima ex singulis Dei operibus parvis et magnis amore Dei accendatur, specialius tamen ex quibusdam Dei operibus Domini Jesu Christi vehementius inflammatur, ut est incarnatio, nativitas, circumcisio, baptismus, jejunium, corporis et sanguinis sui consecratio, in coena humilis pedum ablutio, mirabilis passio, gloriosa resurrectio, mirabilis ascensio, Spiritus sancti missio, sui ipsius frequens in Sacramento exhibitio, aequitas circa omnes in extremo judicio: nam haec omnia quaelibet anima propter se solam reputat esse facta. Est ibi aliud inflammans animam ad amandum Deum; scilicet divina humilitas, de qua nimis admiratur anima: nam Deus omnipotens singulis Angelis sanctisque animabus in tantum se subjicit, quasi sit servus emptitius singulorum, quilibet vero ipsorum sit Deus suus. Ad hoc innuendum transiens ministrabit illis, dicens in Psalm. 81: « Ego dixi, dii  
« estis. » Summe quippe perfectus Deus ibi (3) complebit quod hic docuit: quanto major es, humilia te omnibus: qui quamvis praesit omnibus dignitate et divina majestate, omnibus tamen subjicitur humilitate. O quam raro conveniunt ista duo, omnibus praesse per justitiam, et tamen omnibus subesse per humilitatis gratiam: ideo numeratur haec anima cum amore. Valde autem inflammatur amicitiam et conservat, nunquam velle praesse vel parem esse, sed omnibus et in omnibus velle subesse. Haec autem humilitas causatur ex multitudine bonitatis et divinae nobilitatis, sicut arbor ex multitudine fructuum inclinatur. Similiter inflammatur ad diligendum Deum specialiter humilitas Christi, qui cum in forma Dei esset aequalis Deo Patri, non solum minorari voluit ab Angelis, sed et carnis peccati similitudinem assumens, immo etiam excelsus super omnes homines, factus est abjectio plebis, et opprobrium pessimorum hominum. O immensa humilitas, quae Deum impassibilem et immortalem coegit creatorem Angelorum et hominum inclinari ad infimam partem corporis piscatoris, hoc est ad pedes Apostolum in lotura. Eadem humilitas incomprehensibilem Dominum majestatis coegit frequenter venire sub specie panis ad consolationem fidelium in Sacramento. Est et

(1) *Al.* in se fundi.

(2) *Al.* in prima.

(3) *Al.* sibi.

(1) *Al.* potentialiter.



aliud inflammans animam ad amandum Deum; scilicet patientia divina, quae ibi apparuit, quando inimicis suis centum annorum spatium ad vivendum dedit, quamvis in eadem malitia eos perdurare praesciverat. O quanta dissimulavit in illo tempore in paganis et Judaeis, quando electi sui et Judaei praecepta sua contempserunt ipsumque in deserto variis malis et novis inventionibus irritaverunt, et cum carissimos Prophetas suos nuncios occiderunt, et ipsum morte turpissima damnaverunt et memoriam ipsius de terra penitus delere disposuerunt, et Apostolos suos, quibus mundus non erat dignus, miserabiliter tractaverunt. Heu quantas injurias dissimulat a paganis, judaeis, haereticis et falsis christianis, qui etiam ab his qui christiani videntur, et boni christiani, immo etiam religiosi, et in sanctis religionibus constituti, tamquam inimicus continue impugnatur. Sub veste enim religiosa diversa crimina infidelium committere non verentur: et Glossa dicit super Matth., quod « detestabilior est qui sub nomine fideli agit opera infidelium, quam aperte paganus. » Pro singulis vicibus patientiae divinae a principio mundi usque ad finem provocatur anima valde ad amandum Deum aeternaliter: quia tanta luget virtus divina cum vitia peccatorum dissimulat, quanta luget cum peccatores a vitiis emundat: et tanta fulget cum damnatos aeternaliter erueat, quanta fulget cum electos in aeternum remunerat. Est ibi aliud animam inflammans ad amandum Deum, videlicet cognitio divinae fidelitatis, quae in hoc apparuit, quod super multiplicem consolationem spiritualem proveniente ex scripturis et lacrymis, ex desideriis sanctis, ex divinis officiis, ex Sanctorum doctrinis et exemplis, et laude et gratiarum actione, et oratione et confessione et similibus, Deus Pater corpus et sanguinem unigeniti dilecti Filii sui Domini nostri Jesu Christi sub specie panis et vini ad delectabilem refectionem animarum tam continue ministravit, in quo totum quod ipse est et habet cum Spiritu sancto, in summo dedit. Nihil enim est extra corporalem et spiritualem, et divinam naturam. Corporalis vero apprehendit omne quod quinque sensibus percipitur. Spiritualis natura continet Angelos, animas, et omnia dona spiritualia et virtutes: divina natura totum quod est optimum naturaliter in se habet. Cum ergo corpus et sanguinem Filii sui Deus Pater sub Sacramento dedit, tunc corporalem substantiam in summo contulit: quando vero animam ejusdem Filii dedit, tunc spiritualem substantiam in summo tradidit, cujus anima omnibus Angelis et sanctis animabus perfectior gratia in omni sanctitate fuit. Insuper in eo totam divinam naturam obtulit omne bonum in se naturaliter et aeternaliter continentem: nec hoc semel tantum aut bis in tota hominis vita fecit: immo quocumque tempore, quocumque loco, a quocumque sacerdote fideli bono vel malo salutare illud sacrificium in forma Ecclesiae oblatum fuerit, toties Deus Pater cum Spiritu sancto singulis animabus se totum ad fruendum exhibet. Sed heu, pauci sunt qui hanc fidelitatem perspicaciter recognoscunt: et heu, pauciores sunt qui ad perceptionem tanti muneris, ut in eis secundum ordinationem Dei continue proficiant, cum debita gratitudine se habilitare contendunt. O admirabilis fidelitas Jesu Domini nostri! qui mille ducentis annis et amplius ab indigne conscientibus et sumentibus, et incantantibus, in

*S. Th. Opera omnia, V. 17.*

Sacramento tantam elegit contumeliam sustinere, ut in hoc tempore posset corpore et sanguine suo unam animam satiare, cui nihil sufficit, teste Augustino, quod sit Deo minus. Est et aliud inflammans animam ad amandum Deum totis viribus: scilicet divini mores perfectissimi, de quibus est alia materia specialis. Similiter vehementer accendunt animam ad diligendum Deum exempla sanctissima Jesu Christi, videlicet exempla castitatis, humilitatis, altissimae paupertatis, obedientiae, constantiae, innocentiae, diligentiae, patientiae, sollicitudinis, taciturnitatis, asperitatis, poenalitatis, fidelitatis, gratuitatis, despectionis, purae intentionis, perfectionis, zeli animarum, dilectionis inimicorum. Singula exempla gratissima sunt hae animae, et omne desiderabile in terris his comparari non potest in conspectu ipsius, qui valde aeternaliter in singulis delectatur. Et quanto magis despecta et poenalia in saeculo hoc reputantur, tanto ea amici Dei in praesenti et et in futuro majori gratitudine venerantur. Et quicquid bonum et perfectum est, et ab omnibus collaudatur, hoc non tantum ex gratia, immo etiam naturaliter appetitur, et ideo ex facili et hominum propria placentia coram Deo illius boni praemium minoratur: et quod bonum et vere perfectum est, et non solum a malis, sed etiam a bonis vituperatur et despicitur, hoc ex gratia tantum appetitur, et non ex natura; ideoque merces ejus coram Deo integra reperitur. Et ideo appetenda sunt magis exempla Jesu Christi, et bona opera, quae ab hominibus reprobantur, sed a Deo laudantur. De hoc dicit Hieronymus: « Quis se maledici non desideret, ut mereatur voce Christi laudari, et caelesti copiosaque mercede remunerari? » Utinam ob Domini mei nomen atque justitiam cuncta infidelium turba me persequatur et tribulet! Utinam in opprobrium meum stolidus hic mundus exurgat tantum ut ego a Christo merear laudari, et suae pollicitationis sperare mercedem! Hinc opprobria et detractiones patienter toleremus, ut Dei laudibus digni esse possimus: nam si humanam laudem inquirimus, divinam amittimus. Quisquis enim ab hominibus laudatur, a Christo culpatur, sicut scriptum est, Luc. 6: « Vae vobis divitibus etc. » Eja, quam beata est illa anima, in qua apparent singula vestigia Jesu Christi! Sic e converso maledicta est anima illa, in qua vestigia diaboli locum habent. Diaboli vestigia sunt singula peccata mortalia. In quacumque anima singula exempla Christi expressius apparebunt, de illius animae praesentia omnipotens Deus et omnes electi Dei abundantius aeternaliter exultabunt. Est et aliud ibi inflammans animam vehementer ad amorem Dei: scilicet miserabilis et veneranda passio Domini nostri Jesu Christi: de qua Bernardus: « Hoc est quod magis movet, magis accendit, calix, Domine Jesu Christe, quem bibisti; opus redemptionis nostrae, quod opus nemo alius neque in caelo neque in terra perficere potuit. » In quo opere inestimabilis fidelitas apparuit amoris: in mente punitus fuit taedio, tristitia et pavore: in corpore incomparabili dolore, juxta illud Thren. 1: « Attendite omnes si est dolor sicut est dolor meus ». « Caput enim tremendum » dicit Bernardus « Angelicis spiritibus, spinarum densitate coronatur. Facies pulehra prae filiis hominum sputis peccatorum deturpatur. Oculi lucidiores sole caligant in morte. Auris quae audit in caelis angelicos cantus, audivit in

« terris peccatorum insultus, crucifige, crucifige.  
 « Os quod docuit Angelos, potatur aceto et felle.  
 « Manus quae fundaverunt caelos, extenduntur in  
 « cruce. » Dorsum virgarum et flagellorum per-  
 cussionibus plenum fuit, niles latus lancea perfo-  
 ravit, nec erat aliquod membrum in eo, quin spe-  
 ciali poena innocenter pro nostris reatibus plecte-  
 retur. De hac innocentia exclamat Ambrosius:  
 « Quid commisisti, dilectissime puer, ut judicare-  
 « ris? Ego sum culpa occisionis tuae. O ineffabilis  
 « mysterii dispositio! peccat iniquus, et punitur  
 « justus: quod perpetrat servus, exsolvit Dominus:  
 « quod committit homo, sustinet Deus. Ego inique  
 « egi, tu poena mulctaris. Ego superbivi, tu hu-  
 « miliaris. » Eja, quantus in patria animae amor  
 accenditur, ubi in singulis lacrymis Jesu Christi,  
 opprobriis, irrisionibus, colaphis, alapis, afflictioni-  
 bus, vulneribus, livoribus, guttis sanguineis in omni  
 vita sua effusis, aeternaliter anima delectatur. Haec  
 enim passionem quaelibet anima totam pro se sola  
 reputat factam esse, secundum quod dicit Apostolus  
 de Domino Jesu, Gal. 2: « Qui dilexit me, et tra-  
 « didit semetipsum pro me: » non dicit, pro nobis,  
 sed, pro me; pro se solo reputans passum Dominum  
 Jesum Christum. In praesenti vita singulorum prae-  
 dictorum memoria cordibus nostris infixae esse de-  
 beret cum amaritudine continua ad provocandum  
 in nobis divinum fervorem, juxta illud sponsae in  
 Cant. 1: « Fasciculus myrrhae, » idest cumulus amari-  
 tudinis, « dilectus meus mihi, inter olera mea com-  
 « morabitur. » Quanto enim inest hic animae de  
 praedictis tristitia, tanto major de eo animae et  
 cunctis amicis Dei erit laetitia, quando juxta ver-  
 bum Christi tristitia in gaudium convertetur. Simi-  
 liter jugis recordatio praedictorum cedit in cumu-  
 lum meritorum. Unde Bernardus: « Ego, fratres,  
 « ab ineunte mea conversione pro acervo merito-  
 « rum quem mihi deesse sciebam, hunc mihi fa-  
 « sciculum colligare, et inter olera mea collocare  
 « curavi, collectum ex omnibus anxietatibus et a-  
 « maritudinibus Domini Dei. » Primum quidem in-  
 fantiae ejus necessitatem, deinde laborum quos per-  
 tulit in praedicando, fatigationum in discurrando,  
 vigiliarum in orando, in jejunando, lacrymarum in  
 compatiendo, insidiarum in colloquendo, postremo  
 periculorum in falsis fratribus, convitiarum, sputo-  
 rum, colaphorum, subsannationum, clavorum, ho-  
 rumque similium quae in salutem nostri generis  
 in silva evangelica copiosa legitur pertulisse. Simi-  
 liter horum frequens memoria monumentum est  
 cuilibet animae ad rependendam Domino Jesu vi-  
 cissitudinem in hac vita, quae etiam ex sola vo-  
 luntate vicissitudinis nimium beatificatur, teste Hieronymo:  
 « Vere illa anima felix est, et angelis  
 « exaequanda, quae nomine et opere Christi tanta  
 « quanta pro nobis ille sustinuit, voluerit susti-  
 « nere. » Est ibi aliud inflammans animam ad  
 amandum Deum: scilicet veritas divina in promissis.  
 Quicquid enim figuris, scripturis, figuraliter  
 seu expresse, per se vel per sanctos suos, bonis  
 vel malis Deus omnipotens repromisit, hoc totum  
 absque ambiguitate complebit, sicut omnia comple-  
 vit quae de eo scripta fuerant usque ad turpissimam  
 mortem crucis: ideo in fine gustato felle dixit:  
 « Consummatus est, » supple, quicquid de me  
 scriptum est. Promisit autem malis in Deuteron.  
 52, dicens: « Congregabo super eos mala. » Nun-  
 quam tot stillae pluviarum descenderunt in terram,

sicut diversa mala impios aeternaliter occupabunt:  
 de quibus beatus Augustinus scribit apertius: « Vae  
 « his quibus paratus est dolor vermium, ardor  
 « flammae, sitis sine extincto, fletus et stridor den-  
 « tium, oculorum lacrymae, tenebrae exteriores,  
 « poena interminabilis: ubi nullus ordo, sive co-  
 « gnitio proximi, sed continuus dolor et gemitus:  
 « ubi mors optatur, et non dabitur: ubi non est  
 « honor senioris et regis, nec dominus super suum  
 « servum, nec mater diligit filium nec filiam, nec  
 « filius honorat patrem: ubi omne malum, omnis  
 « indignatio et foetor et amaritudo abundat. »  
 De hac amaritudine dicit Job 3: « Quare data est  
 « misero lux, et vita his qui in amaritudine animae  
 « sunt? » qui quaerunt mortem propter acerbiteriam  
 mortis: ibi autem mori desiderant propter amaritudi-  
 nem vitae, et fugiet mors ab eis. Eja quanta mi-  
 seria ubi mors depascet eos, tamen mori nequeunt!  
 Ibi in veritate sine fine vivunt, sine fine moriuntur:  
 ibi odiunt Deum et seipsos, et nunquam venient  
 in memoriam ante Deum, sicut vulnerati dormien-  
 tes in sepulchris, quorum non est memor amplius.  
 Anselmus: « Ibi tormenta sine fine, sine intervallo,  
 « sine temperamento: ibi tortores horribiles, qui  
 « nunquam lassescunt, nunquam miserentur. Ti-  
 « mor conturbat reum, conscientia confundit, cogi-  
 « tationes increpant; fugere non licet; ligatis ma-  
 « nibus projiciuntur in tenebras exteriores. » De  
 hoc dicitur in Ecl. 40: « Factus est super impios  
 « cataclysmus, » idest diluvium universale poena-  
 rum. Promisit etiam bonis in Evangelio quod su-  
 per omnia bona sua constituet eos, et unumquem-  
 que. Quae ista bona sint, dicit Isaias 64: « Oculus  
 « non vidit, Deus, absque te, quae praeparasti ex-  
 « pectantibus te. » Sed de his nemo scit nisi qui  
 accipit, et qui dat: unde Augustinus: « Facilius  
 « invenitur in aeterna vita quid ibi non sit, quam  
 « quid ibi sit. Non erit ibi lassari et dormire, non  
 « erit ibi esurire et sitire, non erit quiescere, se-  
 « nescere et crescere: quia nasci non erit ibi, ubi  
 « vivi integri manent. » Tamen alibi aliquantulum  
 tangit quid sit in vita aeterna, in libro de cor-  
 poris et animae misera vita. « O caro, inquit,  
 « illam vitam amplecti debuisti, ubi vita est sine  
 « morte, juvenus sine senectute, lux sine tenebris,  
 « gaudium sine tristitia, pax sine discordia, volun-  
 « tas sine injuria, regnum sine disjunctione, hoc  
 « est Deus summum et incommutabile bonum ca-  
 « rens principio et fine, in quo omne bonum et  
 « immensum naturaliter et aeternaliter, a quo om-  
 « ne bonum fluit temporaliter. » Ibi dicit Augu-  
 stinus: « Nihil extra quod appetatur, nihil intus  
 « quod fastidiatur. Nullum bonum deerit neque  
 « bonis neque malis. » Ex his praedictis patet  
 quia fidelis Deus in omnibus verbis suis. Modo  
 etiam multa latent sub pallio, et infinita quae vi-  
 dentur valde bona et non sunt, et infinita viden-  
 tur mala quae justa et bona sunt: sed in judicio  
 in omnibus veritas patefiet, quando Deus manife-  
 stabit consilia cordium. Unde in Ecl. 41: « In fine  
 « hominis denudatio operum ejus. » De quo Au-  
 gustinus dicit: « Multa facta quae ab hominibus  
 « improbanda videntur, testimonio tuo, Domine,  
 « probata sunt; et multa ab hominibus laudata te  
 « teste damnantur: cum saepe se aliter habeat spe-  
 « cies facti, et aliter animus facientis, atque aliter  
 « articulus occulti temporis. » Est ibi aliud ani-  
 mam inflammans ad Dei amorem; scilicet divina

miseriordia: de qua in Eccl. 2: « Secundum magnitudinem ejus, sic et misericordia ejus cum ipso est. » Sed « magnitudinis ejus non est finis » dicit. Psal. 114. Et Dominus Jerem. 25: « Caelum et terram ego impleo. » Ita et misericordia sua mensuram non habet, et omnia implet quae sunt in caelo et in terra et sub terra. In caelo apparet ejus misericordia in Angelis et Sanctis, quia singulis contulit beatitudinem plusquam meruerunt, quam speraverunt, quam desideraverunt, quam cogitaverunt. In terra luget ejus misericordia circa bonos, quia eos praevinit per gratiam ut bonum velint, et subsequitur per gratiam ut bonum volitum perficiant, et in bono opere perseverent: quibus tantum unicus est per misericordiam, ut quicquid eis sit in bono vel malo, sibi reputet esse factum; juxta quod ipse dicit: « Qui tangit vos, quasi qui tangit pupillam oculi mei. » Item « Qui vos recipit, me recipit: et qui me recipit, recipit eum qui me misit: et qui vos spernit, me spernit. Et quod uni ex minimis meis fecistis, mihi fecistis. » Ubi dicit Glossa: « Minimi sunt, qui nihil penitus habent in hoc mundo, et judices erunt cum Christo. » Et Saulo persequenti christianos dixit: « Quid me persequeris? » cum ipsum nunquam tangeret, sed fideles. Circa malos in terra similiter luget ejus misericordia, cum eis diu pareat, quos juste subito damnare deberet pro primo peccato: et quodcumque necessitas cogit ad poenitentiam, nec vitae enormitas, nec horae extremitas, si pura sit voluntatis commutatio, excludit a venia; sed mater caritas in sinus amplissimos filios prodigos recipit poenitentes. Immo dicit Bernardus: « Plene et misericorditer indulget Deus: non damnat ulciscendo, nec improperat confundendo, nec minus diligit imputando. » In inferno etiam luget ejus misericordia circa daemones et damnatos homines, eo quod singulos punit citra condignum. In tantum enim contrariatur vitium summo bono, quod Deus sapientissimus excogitare non potest poenam aliquam mortali peccato digne respondentem. Cum Deus immensus sit, et omnipotens, qui gravissime per peccatum offenditur, eoque omnis poena taxari debeat secundum conditionem ejus qui offenditur, et cum Deus omnia disponat in numero, pondere et mensura, nequaquam possent ad digne puniendum mille inferni unico vitio respondere. In Purgatorio similiter apparet ejus misericordia ex eo quod ibi purgat animas, quae sine purgatione claritatem vultus ejus minime ferre possent: qui etiam ex immensa misericordia ordinavit, ut quibus propria desunt merita, alienis suffragiis adjuventur. In hoc apparet maxima ejus misericordia, cum Deus non exaudiat peccatores pro seipsis, sicut dicit in Evangelio. Omnia tamen valent eis qui sunt in Purgatorio, quae a peccatoribus inimicis Dei fiunt pro ipsis. Et cum sacerdos in mortali peccato missam celebrat pro defunctis, licet in tali opere damnationem aeternam mereatur, ipsis tamen valet ad poenarum diminutionem: Deus enim non recipit illud sacrificium in persona sacerdotis mali, sed in persona eorum qui in caritate de saeculo migraverunt. Similiter luget ejus misericordia circa eos qui sunt in limbo, quia nulla poena corporali punit illos, videlicet fame, siti, vel frigore, calore, lassitudine, labore vel aegritudine, quia etiam potius volunt esse quam non esse: nec isti, nec illi qui sunt in inferno Deum non possunt arguere, quia non fecit

eis injuriam, quibus non tenetur dare gloriam sempiternam. Unde dicit Glossa super illud, « An non habet potestatem figulus etc. » « Totum genus humanum in apostolica radice damnatum est; ut etiam si nullus in deliberaretur, nemo tamen posset vituperare Dei sententiam. » Unde tamen Dominus dispensavit, ut nec omnes damnaret, nec omnes liberaret. Si enim omnes liberarentur, lateret quid peccato per justitiam deberetur: si vero damnarentur, lateret quid gratia largiretur. Est et aliud animam ad amandum Deum inflammans: scilicet Dei justitia, quae primo ibi apparuit, cum quosdam Angelos sponte avertentes se a summo et aeterno bono, nullo extrinseco impellente, in miseriam aeternam dejecit: alios vero adhaerentes summo bono mox in gratia confirmavit. Post haec justitia Dei apparuit, quando ex praevagatione Adae solius totum genus humanum poenalitatibus diversis et morti subiecit. Et merito quidem: nam sicut omnes homines, si solus Adam in praecepto Dei continuo perstitisset, aeternae vitae gloriam percepissent, ita omnes homines de limbo ejus procedentes merito mortis sententiam acceperunt. Sed in hoc etiam apparuit divina justitia, quod angeli a nullo juvari poterant nec debebant, qui per se absque ulla extrinseca tentatione ceciderunt. Homo vero per virtutem alterius juvari poterat et debebat, qui per fraudulentam alterius suggestionem ceciderat. Et hoc est factum per Dominum nostrum Jesum Christum. Benedictus Deus in aeternum. Item ibi apparebit justitia Dei, quae nunc occulta est, quare uni dat gratiam, alteri negat: sicut dicit Apostolus de Esau, quod propter unam escam vendidit primogenita sua, et postea cupiens hereditare benedictionem, reprobatus est, quamvis eum lacrymis inquisisset eam. Sed propter lacrymas Ezechiae regis, sententiam mortis quam contra ipsum tulerat, subito revocavit, quindecim annos vitae ipsius adjiciens, faciensque magnum prodigium in sole, quod per decem lineas quas iverat, retrocessit. Similiter David petenti veniam, peccatum indulsit; Sauli vero cum peteret, non indulsit, sed pro vindicta peccati regnum illi tradidit quem odit. Similiter quibusdam dat ex occulto judicio quandoque magnam et multiplicem gratiam, quos scit secum aeternaliter non mansuros, ut Judae, de quo dicit Petrus: « Sortitus est sortem ministerii hujus » in signis et prodigiis faciendis. Aliis vero dat minorem gratiam, quos scit secum finaliter permansuros. Unde Glossa, super illud Rom. 2: « Quem vult indurat »: « obdurat non impartiendo malitiam, sed non impartiendo misericordiam his quibus non esse impartiendam occulta aequitate et ab humanis sensibus remotissima judicat. » Circa eos qui sunt in Purgatorio luget Dei magna justitia, quod electos suos tantam asperitatem permittit ibi pro suis reatibus sustinere, qui in hac vita brevi tempore per modicam sententiam omnia peccata, teste Augustino, poterant abolere. De qua asperitate dicit Augustinus: « Ignis purgatorius, etsi aeternus non sit, excellit tamen omnem poenam. Nunquam in carne inventa est tanta poena, licet martyres innumerabiles passi sunt tormenta. » Item justitia summa apparebit in extremo judicio, cum nullius personam accipiet, sed judicabit parvum et magnum; cum nullius acquiescet precibus, nec suscipiet pro redemptione dona plurima. De quo in Eccl. 11: « Cuncta quae fiunt adducet Deus in judicium pro omni errato, sive bonum sive malum sit. » Ubi



dicit Glossa, quod « etiam pro verbo otioso, etiam « ignoranter prolato. » Unde Augustinus in 2 lib. de domo disciplinae Dei dicit: « Quid faciemus in « die illa, cum coeperit sedere adversus nos, et « disceptare, atque ante faciem nostram peccata « nostra statuere, accusatores acerbissimos adhibere, « et omnia sua quae nobis contulit beneficia, com- « parare cum nostris sceleribus? » Omnia enim appendentur in statera iustitiae, verba et facta et cogitationes nostrae. Non erit tempus olei mutuandi a prudentibus virginibus, vel comparandi a vendentibus: non erit tempus ullius dilationis, sed terribile et justum iudicium de omnibus praedictis. In hac vita merito esset Deus ab anima super omnia diligendus.

### CAPUT III.

#### *Primum principale fruitionis per Deum.*

Ibi etiam fruatur anima Deo per Deum. Fruitio est delectatio proveniens ex conjunctione intellectus et affectus in Deum. Cum enim anima figit intellectum in aeternitatem, immensitatem, onnipotentiam, sapientiam, bonitatem, largitatem, caritatem, nobilitatem Dei etc. statim affectus animae delectatur in singulis intellectis. Non solum autem delectatur in singulis quae in Deo sunt; immo etiam fruatur Deo in singulis Angelis et Sanctis, et singulis virtutibus et donis eorum gratuitis et naturalibus. Et ita, secundum Apostolum, 1 Corinth. 15: « Deus erit « omnia in omnibus, » idest ipse in omni quod ipse plene et proprie, possidebitur in singulis quae ab ipso sunt, scilicet in Angelis et Sanctis. De hac fruitione dicit Isa. 50: « Tunc videbis et afflues, « et mirabitur et dilatabitur cor tuum. » Videbis intellectu divinam naturam et divina opera; et afflues delitiando in singulis, et mirabitur cor tuum Trinitatem in unitate, et unitatem in Trinitate, et singula opera divina, et quomodo in singulis ipse sit totus: et dilatabitur cor tuum ad suscipiendam Trinitatem cum omni quod habet et potest. Hanc delectationem non operabitur in anima neque fides, neque spes, neque devotio, neque aliqua virtus, sicut modo operatur delectationem in anima: sed ipse Deus, sicut ipse per Isaiam testatur. » Quo- « modo si cui mater blandiatur, ita ego ipse con- « solabor vos »: quia delitiae meae esse cum filiis hominum. Ad hanc delectationem vocabat Dominus olim per prophetam Isaiam, dicens, 55: « Omnes « sitientes venite ad aquas: et qui non habetis pre- « tium, venite, bibite absque ulla commutatione « vinum et lac. » Vinum divinitatis, et lac humanitatis. Et postea cum magno desiderio personaliter invitavit. Stabat enim in die magnae festivitatis, ubi multi conyenerant; et clamabat, Jo. 7: « Si quis sitit, « veniat ad me, et bibat: » et in Matth. 11: « Venite « ad me omnes qui laboratis et onerati estis, et « ego ipse reficiam vos, » non per aliquos ministros, sed per meipsum. Et in Apoc. gratis affert delectationem, dicens: « Qui vult, accipiat aquam « vitae gratis, » neminem ad hoc cogens. Quod in hac vita tam frequenter exhibuit, fideliter ibi dabat.

#### *Secundum principale fruitionis ad Deum.*

Ibi anima fruatur Deo ad Deum. Omnis quippe delectatio quam percipit anima in creaturis in hac

vita quamplurimum elongat a Deo, quia non tota revertitur in Deum, sed haeret aliquantulum in creaturis, juxta illud Gregorii: « Anima sine delectatione « nequaquam esse potest. Aut enim delectatur in « infimis, aut in summis: et quanto acriori cura « inardescit ad infima, tanto torpore damnabili « frigescit a summis. » Cessante vero omni delectatione circa creaturas, in futuro introducet Dominus Jesus fidelem animam in delectatione solius creatoris, per illud verbum Psal. 56: « Delectare in Domino etc. » Quae delectatio hic tam modica est quod tota intrat in animam; illie vero tanta est quod non potest tota in animam intrare, sed anima intrabit in illam, juxta illud Augustini: « Non totum gaudium intra- « bit in gaudentes, sed toti gaudentes intrabunt in « gaudium. » Quod autem ex delectatione creaturarum anima impediatur a delectatione creatoris, hoc praefiguratum est in Judaeis, quibus nequaquam dedit manna durante farina circa triginta dies quam tulerant ex Aegypto: qua cessante praestitit eis panem de caelo habentem in se omne delectamentum, et omnem saporem suavitatis, et unjuscujusque voluntati deserviens ad id quod quisque volebat convertebatur. Eja quanta erit delectatio in Creatore, qui tantam delectationem posuerat in pane? Hoc manna promittit Dominus Jesus in Apocal. 2: « Nemo novit nisi qui accipit, » idest experitur, hoc est ille solus qui gustat, juxta illud Psal. 55: « Gustate, et videte quoniam suavis « est Dominus. » Amantibus nota est dulcedo quae timentibus est abscondita et incognita. Aliquantulum tamen explicat Augustinus quae sit illa multitudo dulcedinis: haec est summus Deus, de quo sic dicit in lib. de Trin: « Quicquid amabitur aderit, et sum- « num bonum erit; atque fruendum amantibus « praesto erit: quodque omnino beatissimum erit, « ita semper fore (1) certum erit. » O quanta jucunditas ex Dei praesentia, ubi tanta est ex Dei memoria in hac vita! Unde Augustinus: « Quid est « quod in dilecti mei recordatione quandoque me « tangere solet, et tam vehementer et tam suaviter « me afficit, ut a meipso quodammodo alienari et « attrahi incipiam? subito totus innovor et immutor, « et bene mihi esse incipit plus quam dicere suf- « ficio. » Ambrosius de eod.: « Memoria tua super « mel duleis, meditatio de te plus quam cibus « suavis. »

#### *Tertium principale fruitionis propter Deum.*

Ibi etiam anima fruatur Deo propter Deum. Hoc proprium est frui rei amore inherere propter seipsam, non propter aliud commodum. Delectatio qua anima Deum comprehendit, accendit eam ad desiderandum multo vehementius divinae gloriae manifestationem quam propriam beatitudinem. Valde enim manifestatur divina gloria, dum se fideli animae Deus exhibet ad fruendum; et tanta puritate afficitur anima circa Deum, si unum deberet eligere de duobus, vel aeterna carere beatitudine, vel divinam voluntatem in se vel in aliis impedire, multo libentius vellet aeterna felicitate privari, quam Dei voluntatem in aliquo retardare; et magnam sibi reputaret beatitudinem cum proprio detrimento divinam in omnibus implere voluntatem. Sic Eleazarus, sicut scriptum est in lib. Mach., potius voluit

(1) *Al. forte.*



in inferno puniri, quam prae timore mortis mandatum legis transgredi. Eja quam justum est ut creatura multo abundantius intendat in omnibus Creatori(1) quam sibi, qui tam fideliter curam generis humani peregit, qui pro homine factus homo, ut per hoc fieret homo Deus, qui tam dura sustinuit vulnera, qui in verbis habuit contradictores, in factis observatores, in morte illusores. Unde Apostolus: « Qui vivit, jam non sibi vivat, sed ei qui pro omnibus mortuus est. » Cui si vellet homo vicem rependere, non posset, teste Job, unum pro mille respondere. Hoc etiam testatur Bernardus dicens: « In opere creationis me mihi dedit, in opere redemptionis ubi se mihi dedit, me mihi reddidit. » Datus ergo et redditus me pro me debeo et bis debeo. » Quid ergo retribuam Deo digne pro se? Nam si millesies me rependere possem, quid sum ego ad Deum? Ibi etiam fruitur anima bonitate Dei. Deus bonus est, et valde bonus, et solus bonus, et super omnia bonus. Quod bonus sit, et multum bonus, testantur pariter omnes creaturae ab ipso procedentes: nam scriptum est Gen. 1: « Vidit Deus cuncta quae fecerat, et erant » singula per se bona, in universo « bona valde. » Unde sicut unaquaeque arbor ex fructu bono bona cognoscitur, ita omnis creatura bona et multum bona Deum bonum et valde bonum efficaciter protestatur. Item, ipse solus bonus est, juxta illud verbum Domini Jesu, cum cuidam responderet, « Nemo bonus, nisi solus Deus, » seipsum et Spiritum sanctum non excludens, cum uterque sit solus et verus Deus, et solus Deus naturaliter est bonus. Bonitas creaturarum visibilium et invisibilium non est ipsis innata, sed ab ipso solo duxit originem, juxta illud Jac. 1: « Omne datum optimum, » scilicet naturale, « et omne datum perfectum, » scilicet gratuitum, « descendens a Patre luminum. » Item super omnia bonus est, juxta illud Augustini: « Neque ulla anima poterit cogitare vere aliquid quod sit te melius, qui es summum bonum et optimum bonum. » Omnis enim bonitas caelestium et terrestrium comparata divinae bonitati, malitia est. » Haec immensa bonitas neque scribi neque dici potest neque cogitari: si enim omnes caelestes spiritus et maligni, et omnes animae creatae et creandae scribere vellent bonitatem divinam, et si quilibet haberet maris abundantiam pro incaastro, et caelum pro pergamento, tam immensus est Deus, quod antequam mediam partem bonitatis scriberet, mare ejuslibet esset siccum, et caelum ejuslibet esset repletum quod nec capere unam literam posset. Sed verbum citius est dictum quam scriptum: et si omnes stellae et singulae guttae pluviarum essent linguae, et proponerent divinam bonitatem eloqui, tam ineffabilis est bonitas Dei antequam tertiam partem bonitatis enarrarent, omnes pariter essent mutae. Citius vero est aliquid cogitatum, quam vel dictum vel scriptum. Unde si tota arena maris, et singula semina orta de terra essent corda, et vellent scrutari bonitatem Dei, tam super bonus est, antequam decimam partem bonitatis ejus investigarent, omnia corda citius scinderentur. Haec immensa et aeterna bonitas principium est et causa omnium creaturarum, ad ejus fruitionem aeternam angeli et homines creati sunt. Unde Augustinus: « Credimus rerum creaturarum, visibilium et invi-

bilium, caelestium, terrestrium, non esse causam nisi bonitatem creatoris, qui est Deus unus et verus. » Cujus tanta est bonitas, ut summe bonus beatitudinis suae, qua aeternaliter beatus est, aliquid velit esse particeps, qua vidit communicari posse, et minui omnino non posse. Illud ergo bonum quod ipse erat et beatus erat, sola bonitate, non necessitate aliis communicare voluit, quia summi boni erat prodesse velle, et omnipotentissimi nocere non posse; quia non valet aliquis beatitudinis ejus particeps existere nisi per intelligentiam, quae quanto magis intelligitur, tanto plenius habetur. Fecit Dominus rationalem creaturam quae summum bonum intelligeret, et intelligendo amaret, amando possideret, possidendo frueretur, et sic aeternaliter beatificaretur. Ibi etiam fructur anima condelectatione Patris et Filii et Spiritus sancti, quae summum bonum est, et vita aeterna. Deus Pater supra modum delectatur in beatitudine Filii, et Filius similiter in beatitudine Patris, et Pater et Filius in beatitudine sancti Spiritus, et similiter Spiritus sanctus in beatitudine utriusque. Quaelibet trium personarum delectatur tantum in altera quantum in seipsa, nam omnium trium una est et eadem beatitudo. Et haec condelectatio est eis ex mutua et verissima caritate. Unaquaeque trium personarum dicit alteri verbum illud in Joan., quod dixit Dominus Jesus Patri, « Omnia mea tua sunt, et tua mea sunt: » ideo quicquid tu es, ego sum. Et quicquid ego sum, et vere tu es. Ad desiderium hujus condelectationis invitat fideliter fideles suos Dominus Jesus, « Petite, » inquit, « ut gaudium vestrum plenum sit, et accipietis. » Plenitudo aeterni gaudii est fruitio condelectationis sanctae Trinitatis. Haec est torrens voluptatis, de quo David dicit Psalm. 55: « De torrente voluptatis tuae potabis eos. » Qui torrens dicitur propter abundantiam quae in Deo est. Unde vero producat iste torrens, dicit Psal. ibid.: « Apud te est fons vitae. » Fons vitae est Dei aeterna et immensa largitas, a qua fontis est gaudium sempiternum. Nec sufficit semel aut bis aut millesies potare de isto fonte: ideo fidelis anima aeternam habebit in illo fonte quietem et beauissimam mansionem, cum unicuique dicet Dominus: « Intra in gaudium Domini tui. » In hac vita gaudium totum divinum intrat in gaudentes, quia modicum est et momentaneum quod hic percipitur. Illic vero non totum gaudium intrabit in gaudentes, sed toti gaudentes intrabunt in gaudium, ut dicit Augustinus. Qui in hac delectatione sanctae Trinitatis fruitur semper, quid est quod illi erit, et quid est quod illi non erit? Certe « quicquid volet erit, et quicquid nolet non erit, » dicit beatus Augustinus. Ibi etiam anima valde delectabitur in continua visione delectabilis vultus Dei: de qua dicit Glossa super Psalm., quod « visione nihil delectabilius, quia semper amabunt quem semper videbunt. » In ea tanta est delectatio, quod teste Augustino « si possent, mali mallent esse in poenis et Deum videre, quam esse extra poenas et Deum non videre. » Illa enim facies delectabiliter mirabilis est, et plena gratiarum. Itaque omnis poena eorum citius deleretur ex intuitu faciei, quam una scintilla in medio maris extingueretur. Similiter nimis delectabitur (1) in vultu corpo-

(1) *At. creaturis.*(1) *At. delectabiliter.*

reco Jesu Christi, in quem, teste beato Petro, Angeli desiderant prospicere. Ubi causam desiderii ponit Glossa dicens: « Tanta est ejus qui pro nobis  
 « passus est, hominis gloria posterior, ut etiam  
 « angelicae virtutes in caelo, cum sint aeterna  
 « felicitate perfectae, non solum immortalis deita-  
 « tis magnificentiam, sed assumptae ejus humani-  
 « tatis claritatem semper aspicere gaudeant. » Sed  
 cur cernere ejus faciem desiderant, et nunquam  
 cernere cessant? nisi quod contemplatio divinae  
 praesentiae adeo angelos beatificat, ut semper ejus  
 visa gloria satientur, et semper ejus dulcedinem  
 quasi novam insatiabiliter esuriant. Ibi ergo ange-  
 licae virtutes et beatae animae semper esuriunt, et  
 semper satiantur. De qua satietate Gregorius: « Ne  
 « in desiderio sit anxietas satiantur; ne autem in  
 « satietate sit fastidium, satiari desiderant. Deside-  
 « rant ergo sine labore, quia desiderium satietas  
 « comitatur; et satiantur sine fastidio, quia satietas  
 « ex desiderio semper accenditur. » Ibi singula  
 sputa, singulae lacrymae, singulae guttae sangui-  
 neae, quae tempore passionis per illam venerandam  
 faciem defluebant, singulis Angelis et Sanctis ge-  
 rebant specialem delectationem aeternam. De hac  
 facie passibili et mortali dixit olim Dominus Jesus  
 discipulis Luc. 10: « Beati oculi qui vident etc. »  
 Ergo beatissimi sunt oculi qui continue gloriosam  
 eandem faciem intuentur.

Notandum; de claritate vultus Jesu Christi, in  
 Evangelio scriptum est. In resurrectione fulgebunt  
 singularia corpora sanctorum sicut sol, et animae  
 justorum multo amplius fulgebunt, et anima luci-  
 dior lucidius corpus habebit; insuper singuli Angeli  
 clariores sunt sole. Omnem istam claritatem con-  
 gregatam excellit claritas vultus Jesu Christi, sicut  
 dies clarissima excellit noctem tenebrosam: et « ei-  
 « vitas caelestis non eget sole neque luna neque  
 « stellis, sed claritas vultus illius Agni, » teste Joane  
 in Apoc. « illuminabit eam. » Vultus istius Agni  
 « est candor lucis aeternae, et speculum sine macula, »  
 ut dicitur in libro Sapientiae. Qui olim dixit  
 ad Patrem, Joan. 17: « Quos dedisti mihi, volo  
 « ut ubi ego sum, et illi sint mecum, ut videant  
 « claritatem meam. » Ibi dicit Glossa: « Claritatem  
 « quam dedisti mihi, des singulis ad fruendum  
 « aeternaliter. » Similiter in hac vita continue  
 deberemus frui Deo tamquam re plenissime propria  
 in omnibus operibus, et ad omnia opera; in omni-  
 bus donis, et ad omnia dona. Ad hoc enim, teste  
 Isaia, Filius Dei datus est nobis proprie ad fruendum.  
 Magna caecitas est nimia stultitia est in multis  
 qui semper Deum quaerunt, continue ad Deum  
 suspirant, frequenter Deum desiderant, quotidie in  
 oratione ad Deum clamant et pulsant, cum ipsi,  
 secundum verbum Apostoli, sint templum Dei vivi,  
 et Deus veraciter habitet in eis, cum anima ipso-  
 rum sit sedes Dei, in qua continue requiescit. Quis  
 unquam nisi stultus quaerit instrumentum foris  
 scienter quod habet reclusum; aut quis utiliter uti  
 potest instrumento quod quaerit, aut quis confortatur  
 cibo quem appetit sed non gustat? Sic etiam  
 vita cujuslibet justi Deum semper quaerentis, sed  
 nunquam fruentis; et omnia opera ejus minus per-  
 fecta sunt.

## CAPUT IV.

*Primum principale unionis per Deum.*

Ibi etiam unitur Deo per Deum, cum consue-  
 tudines et mores Dei non (1) incessanter tenere vel  
 habere dignoscitur, cum divinae voluntati et exem-  
 plis Jesu Christi sanctissimis conformatur, cum sin-  
 gulis virtutibus et donis Spiritus sancti secundum  
 ordinationem Dei aeternam perfuitur, eumque di-  
 vine potentiae, sapientiae, bonitatis, veritatis et to-  
 tius divinae beatitudinis particeps efficitur. Haec  
 unio praefigurata est in lib. Reg. ubi anima Jo-  
 nathae conglutinata est animae David, et dilexit  
 eum quasi animam suam: quando fidelis anima sic  
 Deo conjungitur, quod omne communicabile percipit  
 per gratiam quod Deus per naturam; quia Deus  
 Pater dicit unicuique fideli: fili, tu mecum semper  
 es, et mea omnia tua sunt. Ideoque singuli electi  
 fiunt dii, juxta quod in Psal. 81 dicit: « Ego dixi,  
 « dii estis. » Haec unio fidelis animae ad Deum  
 fit per Dei Filium, quia ideo naturam assumpsit  
 humanam, ut per ipsam eandem transiret ad unio-  
 nem divinam. Hanc unionem impetravit Filius Dei  
 in oratione devotissima, dicens ad Patrem: « Sicut  
 « tu, Pater, in me, et ego in te, ut et ipsi in nobis  
 « unum sint, et iterum ego in eis, et tu in me,  
 « ut sint consummati in unum. » Ibi est consum-  
 mata unio, ubi Pater et Filius unum sunt, et Filius  
 existens caput Ecclesiae cum membris suis, idest  
 cum cunctis fidelibus, ad paternam transit unionem.

*Secundum principale unionis ad Deum.*

Ibi anima unitur Deo ad Deum, et illa unio  
 animae fidelis cum Deo non habet interpolationem,  
 sed jugiter fidelem animam constringit ad Deum,  
 quia per Deum fit. De qua dicit Dominus « iterum  
 « videbo vos, » scilicet in morte vel in extremo judi-  
 cio, « et gaudium vestrum nemo tollet a vobis. » Vi-  
 dere Jesu Christi nihil aliud est, quam fidelem ani-  
 mam inseparabiliter uniri Deo Patri. Gaudium ani-  
 mae est quod nemo aufert, delectabiliter uniri, et  
 taliter uniri ut praedictum est, sanctae Trinitati.  
 In mundo vero unio ad Deum miserabilis et in-  
 constans est, quae nunquam in eodem statu per-  
 manet, teste Job, quae ex facili levissimis tentatio-  
 nibus a Deo penitus separatur, quae etiam a fami-  
 liaritate Dei, peccatis venialibus elongatur. Eja quam  
 vehementer suspirandum esset ad illam beatam  
 unionem! Quantam putas delectationem anima fide-  
 lis sentiet in illa beatissima unione, quae tantam  
 percipit suavitatem in Domini recordatione! de qua  
 Psal. 76: « Renuit consolari anima mea, » in ali-  
 quibus transitoriis. « Memor fui Dei, et delectatus  
 « sum. » Sed quid sequitur illam delectationem? Re-  
 spondit Isaia: « Memoria memor ero, » de illius  
 unionis delectatione, « et tabescet in me anima mea »  
 in eo quod elongor ab ejus fruitione. Unde Gre-  
 gorius super illud Cant.: « Meliora sunt ubera tua  
 « vino: » « Quia in aeterna per speciem et per subli-  
 « mitatem contemplationis transcenditur quicquid  
 « de te modo per fidem vel per Scripturam scitur. »  
 Et « odor unguentorum tuorum super omnia aro-  
 « mata »: idest bona illa quae per contemplationem  
 praeparas, omnia hujus vitae transcendunt munera.

(1) Al. nos. *Utraque lectio dubia.*

*Tertium principale unionis propter Deum.*

Item anima fidelis unitur ibi Deo propter Deum. In illa namque unione non attendit anima principaliter quod sibi utile est, sed pure super omnia quod Deo magnificentum est. Valde enim magnificentum est Deo et honorificum homini uniri Deo in aeterna beatitudine. Unde Job 7: « Quid est homo, quia « magnificas eum? » Istam magnificentiam manifeste pronuntiabunt omnes electi Dei, juxta illud Psal. 114: « Magnificentiam gloriae sanctitatis tuae « loquentur, et mirabilia tua narrabunt. » Mirabilia sunt infimum unire summo, et aeternaliter conjungere veritatem aeternam vanitati. « Est autem « Deus verax, » secundum Apostolum Rom. 5: « Et omnis homo mendax: » et « vanitas » secundum Psalmum. Magna mirabilia sunt, quod illa unione obliviscitur naturae suae, hoc est quod semper super se reflectitur quaerens propriam utilitatem suam, et non alterius: ubi vero nihil quaerit, nisi quod est laudabile creatori. Ibi anima unitur Deo in libertate, quae est de praecipuis donis inter omnia Dei dona, licet libertas in hoc mundo sit initium omnis mali. De hac dicit Apostolus Rom. 8: « Crea- « tura liberabitur a servitute corruptionis in liber- « tatem filiorum Dei. » Vera libertas est in caelis, ubi nemo ligatur peccatorum vinculis, quae vera vincula sunt, juxta illud Prov. 5: « Iniquitates « suae capient impium, et funibus peccatorum « suorum quisque constringetur. » Quod autem peccatis involuti liberi non sint, omnino testatur Dominus in Joanne: « qui facit peccatum, » non est liber, sed « servus peccati. » Unde dicit Anselmus: « Peccare non est libertas, nec pars libertatis: pos- « se enim peccare potius est non esse, quam posse. « Quisquis enim hoc potest quod ei non expedit, « quanto magis hoc potest, tanto magis adversitas « et perversitas possunt in illum. » Heu quanta facit et sustinet miser homo pro explenda libidine, quae gravissima essent ei qui ex corde peccata odiret! non in promptu est, quia graviter peccatorum vinculis constrictus est. Item ibi facit quilibet quicquid vult, quia nihil mali vult, sed omne bonum quod Deo placet, quia radix omnium operum est ibi caritas: de qua dicit Augustinus: « Habe « caritatem, et fac quicquid vis. » Item ibi habet quilibet quicquid vult, quia nihil mali vult: nam velle quod non deest, est esse miserrimum, ut dicit Augustinus in lib. de Trinit. Item ubicumque vult unusquisque, ibi est in Deo, qui est vera quies animae, de qua nunc dicit anima aliquando, « In « pace in idipsum, » idest in eo qui est immutabilis, « dormiam et requiescam: » et Psal. 114: « Convertere, anima mea, in requiem tuam, » idest in Deum. Similiter ubi volet esse spiritus, protinus erit et corpus, dicit Augustinus. Item ibi nemo turbat alium, sed « sedebit » dicit Dominus per Isaiam « po- « pulus meus in plebitudine pacis etc. » Quoniam teste Psal. 147: « Confortavit seras portarum Je- « rusalem, et benedixit filiis suis in ea. » Item ibi nullus alteri subicitur: nam teste Apostolo, ibi cessabit omnis praelatio; sed soli Deo omnes subiecti sunt, cui subicere, et servire est vere regnare. Item ibi nihil extra Deum desideratur: « nam ipse « est finis omnium desideriorum, » ut dicit Bernardus. Item ibi voluntas cujusque per omnia semper et ubique complebitur. juxta illud Augustini: « Omnipotentes erunt voluntates suae, sicut Deus

« suae: quia nihil aliud volunt quam quod Deus « vult: et quod ipse vult, non potest non esse. » In his omnibus vera libertas comprehenditur. Differt autem libertas unius ab alterius, sicut differunt claritas corporum, et incrementa virtutum. Quanto enim amplius in hoc mundo quisque fit servus omnium propter Deum, sicut Apostolus qui cum esset liber, fecit se servum omnium, quantoque magis homo seipsum stringit sponte in viis praeceptorum, et semitis consiliorum sacrae Scripturae observatione regulari, castigatione corporali, tanto liberior erit in patria caelesti: et quanto minus quilibet occupatur vanitatibus, sollicitudinibus, officiis, administratione rerum temporalium: et quanto quis minus appetit dignitatem et honorem, saecularem praelationem, hominum laudem, inimicorum vindictam, temporalium rerum affluentiam, carnalem amicitiam, saecularem laetitiam, hominum placentiam, et similia, quae ablegant a Deo; tanto liberior in mundo, et tanto liberior fit in caelo. Horum singulorum appetitus hic et in futuro valde cujuslibet diminuit libertatem. Item anima Deo unitur in perfectione, ipso Deo jubente: « Perfecti « estote, sicut et Pater vester etc. » In duobus divina perfectio comprobatur: in odio vitiorum, et in amore virtutum. Bonus Deus odit vitium, quia bono malum contrarium est, sicut lux tenebris et aqua igni. Et quia vitia Dei habitationem polluunt in anima, scilicet conscientiae puritatem; quia lumen mentis obscurant, scilicet rationem, ne verum a falso discernatur, vel limpide veritas cognoscatur secundum quam vivere oportet; quia liberum arbitrium subvertunt, ne melius bonum a viatore eligatur. Omnia gratuita dispergunt, scilicet virtutes, quibus homo Deo gratus efficitur, quia dona naturalia corrumpunt, in quibus est imago Dei in anima, scilicet memoriam, intelligentiam, voluntatem: quia affectiones animae a Deo avertunt, scilicet spem, timorem etc. per quas Deus delicias habet in anima, ipso teste, Proverb. 8: « Deliciae meae « esse cum filiis hominum: » quia omnia bona opera viva in caritate facta mortificant. Similiter Deus amat virtutes et omne bonum semper et ubique, quia quilibet diligit naturaliter sibi simile; et quia ipse summe bonus est, ideo summe amat bonum. Amat autem ideo virtutes, quia vitium enecant, quia firmiter Deo animam jungunt, quia ad omnem gratiam spiritualem habilitant, quia opera peccatis mortificata vivificant, quia hominem interius in affectionibus, exterius in moribus secundum divinam voluntatem ordinant. Ita etiam sancta et perfecta anima vehementer in patria odit vitia et amat virtutes et omne bonum. Sed hic oportet addiscere in hac vita, ut sciat in aeterna vita. Aliquis abstinet a vitiis, qui tamen ea non odit. Ille vero peccata odit, qui ea nunquam nisi cum amaritudine mentis recogitat, qui semper cum dolore cordis de peccatis loquitur et audit loqui, cui gravis est poena videre delinquentes, vel ipsos audire, vel cum ipsis conversari, vel cum eis sedere; qui nunquam sponte praesens est ubi vitia committuntur: et si quandoque cogitur ibi esse, ex hoc gravis sibi crescit afflictio spiritus: qui detestatur omnia incitamenta peccantium, sicut sunt superflua ornamenta, et organica instrumenta. Idem nunquam in vita sua praestat doctrinam, et similiter auxilium vel favorem, exemplum vel occasionem aliquam ad peccandum; sed semper et ubi-



que peccata dissuadet et prohibet quantum potest. Haec omnia verba signa sunt odii. Qui vero delectabiliter cogitat de peccatis vel audit loqui, vel de ipsis loquitur, aut videt delectabiliter delinquentes, vel ibi libenter sedet ubi exercentur, vel aliquos excitat doctrina, consilio, auxilio aut favore, exemplo vel aliqua occasione ad peccandum, nec omnes etiam a peccatis prohibet aut dissuadet quantum potest, ille nullatenus adhuc odit peccatum. Anima autem in hac vita debet addiscere virtutes amare et bona opera, ut statim sciat in aeterna vita. Aliquis exerceat se in operibus virtutum, nec tamen amat virtutes. Ille solus amat virtutes et opera virtutum, qui non propter timorem alicujus poenae, nec propter favorem vel placentiam hominum, nec propter aliquod temporale lucrum, sed pure et simpliciter propter Deum in bonis operibus continue se exerceat; qui pro virtutibus obtinendis incessanter toto nisu laborat; qui mente vehementer affligitur eo quod in virtutibus incessanter crescere se non sentit, et quod bona opera secundum voluntatem suam et secundum ordinationem divinam semper et ubique non perficit: qui veraciter congratulatur omnibus spirituales gratias et virtutes habentibus, et in virtuosis operibus jugiter se exercentibus: qui omnia impedimenta virtutum et honorum operum quasi venenum fugit, qui nullum a virtutibus quaecumque occasione retrahit, nec bona opera cuiquam prohibet vel dissuadet: sed omnes ad hoc promovet doctrinis, consiliis, auxiliis, exemplis, minis, promissis, orationibus, desideriis, quantum potest. Quanto amplius quidam in amore virtutum et odio vitiorum crescit, tanto se perfectiorem esse cognoscat in hac vita praesenti et futura. Ibi etiam unitur in beatitudine; nam quicquid beatitudinis habet Deus per naturam, ipse habet per gratiam. Hoc impetravit Dominus Jesus dicens: « Pater, quos dedisti mihi volo ut »  
 • ubi ego sum, et ipsi sint mecum, ut videant  
 • claritatem meam quam dedisti mihi, et dedi eis. »  
 Claritas a Patre Filio collata est beatitudo, quam dedit singulis electis suis. Deus autem summe perfectus est in beatitudine, quia omne bonum immensum naturaliter et aeternaliter in se habet, et nullum bonum extra seipsum quaerere oportet, et nullius bono, nullius auxilio, aut consilio indiget, cum nihil boni sibi desit, et nemo quicquam boni sibi auferre possit: nam bonum suum sibi innatum est, et natura nullum sibi subjectum ex facili derelinquit: et a nemine cogi potest, quia omnipotens est: et nemo super ipsum est, nemo sibi aequalis est, et a nullo turbari potest, quia mitissimus: et nihil contrarietatis habet, et nunquam mutari potest in sua beatitudine, quia idem semper est, sicut ipse dicit Malach. 4: « Ego Deus et non mutor, » et nihil sibi praeteritum est aut futurum, sed semper praesens. Singula horum pertinent ad beatitudinem veram. In hac ergo beatitudine anima unum fit cum Deo, quae ibi nullius indiget creaturae: nam omne bonum in se continentem continet. Cui nemo aliquid boni auferre potest, promittente Domino Jesu, Joan. 17: « Gaudium vestrum nemo tollet »  
 « a vobis. » Gaudium animae est unio ad Deum in illa beatitudine. Item ibi nullus cogere potest, quia nihil adversitatis est ibi, nam omnia adversa superavit: ibi nunquam mutari potest, nam semper in eodem fervore beatitudinis est: sicut, heu, in hac vita anima misera nunquam in eodem statu

permanet, sed semper mutatur de spe in timorem et e contrario, de amore in odium et e contrario, de bono in malum et e contrario: de facili turbatur, ex facili amore vel timore vel favore cogitur, ex facili gratia sibi aufertur. Indiget etiam continue consilio et auxilio Angelorum et hominum, et nihil boni per se habet, nec quid boni per se potest. Ideo misera anima semper suspirare deberet ad illam beatitudinem, cum Apostolo dicens Rom. 7: « Quis me liberabit de corpore mortis hujus? » et cum David Psal. 41: « Quando veniam, et apparebo ante faciem Dei mei? »

## CAPUT V.

### *Primum principale laudis per Deum.*

Ibi etiam anima laudat Deum ex omnibus viribus suis. Ad hoc enim creata est, ut dicit Dominus per Isa. 43: « Populum istum formavi mihi, »  
 « laudem meam narrabit. » Ad hoc movet Eccl. 45: « Laudate Deum quantum potestis; adhuc supervalebit, adhuc dignior est omni laude. » Ad hoc movet Joannes in Apoc. 3: « Laudem dicite »  
 « Deo nostro, omnes sancti ejus. » Ista laus erit per Deum unigenitum Filium Dei, per quem etiam majestatem Dei omnes Angeli laudant, ut cantatur in praefatione, quia unionem habent cum ipso in quantum est creatura, sicut et ipsi. Haec laus est tanto amabilior sanctae Trinitati, tanto utilior communitati quam facit anima per Dei Filium, quam si faceret per seipsam, quanto creator dignior est creatura. Ista laus est animae refectio, cui nulla similis videtur delectatio, ut dicit Cassiodorus. Haec laus procedit ab anima ex nimio fervore caritatis, et ex nimia delectatione ad Deum. O quanta jucunditas ubi omnibus Sanctis una erit lingua jubilationis indefessa! ut dicit Bernardus: « Ubi omnes Sancti et Angeli concorditer Deum laudant, et tamen »  
 « dissimiliter. » Sicut enim differunt in cognitione et amore, ita etiam in laude. Hoc opus laudis divinae non abstrahit nec elongat a Deo, nec generat laudanti fastidium, licet sit opus continuum, sicut alia opera ex continuatione saepe ingerunt tedium in hac vita: et haec est ratio, quia laus Dei non tantum est operatio, sed et remuneratio, ut dicit Cassiodorus super Psalm.: et de perceptione muneris et premii nemo lassatur. In laude vero Dei ipse actus est merces, ut dicit Glossa quaedam super psalterium.

### *Secundum principale laudis ad Deum.*

Laus ista ducit animam incessanter propter sui detestationem in Deum et ad Deum; et fidelis anima vere tanto est beatior, quanto in laude Dei frequentior. Ideoque sicut homines naturaliter semper appetunt beatitudinem, ita et laudem. Hanc laudem continuam promittit Dominus per Isaiam 62: « Tota die ac nocte non tacebunt laudare nomen Domini. »

### *Tertium principale laudis propter Deum.*

Ibi etiam anima laudat Deum propter Deum. Licet enim anima fidelis in laude Dei sine delectatione magna nequaquam esse posset, nullatenus tamen ibi Deum desiderat laudare propter proprium



commodum, sed pure et simpliciter propter Deum, qui aeternaliter ordinavit ab anima se semper laudari non propter suam sed propter animae beatitudinem ampliandam. Illa puritas aeterna causatur ex hujus vitae puritate. Quanto enim anima fidelis in laude Dei propriam partem minus respicit, et quanto amplius Dei partem quaerit in hoc mundo, tanto laus ejus apparet hic purior, tanto erit excellentior, tanto erit utilior communitati et jucundior, et tanto consequenter Deus qui talem dedit puritatem, apparebit gloriosior. Eja quantum delectabitur anima in Deo, et Deus in anima, quando secundum divinam generationem singula membra corporis et singulae vires animae in laude Dei continue movebuntur. Ibi laudabit anima singula per se quae sunt in Deo per naturam, scilicet potentiam, sapientiam, bonitatem etc. Et totam virtutem suam effundet super singula in laude. Similiter laudabit singula in omnibus simul, scilicet solam potentiam in sapientia, bonitate, caritate etc. Et sic singula in omnibus conjunctim. Item laudabit omnia simul in singulis singillatim; scilicet potentiam, sapientiam, bonitatem, largitatem, misericordiam et justitiam. In potentia singillatim, in sapientia singillatim, in bonitate singillatim, et de aliis. Haec signata sunt quatuor Alleluja in Apoc. 19. Alleluja est laus humanis verbis inexplicabilis. Ibi non laudabit anima omnia quae in Deo sunt successive, scilicet modo potentiam, modo sapientiam, modo bonitatem, et sic de aliis: quia ibi non est successio temporis, et quia omnia videt simul et cognoscit in Deo, et amat, et fruitur, ideo etiam simul omnia laudabit. Item non laudabit anima ea quae in Deo sunt, unum minus, aliud magis; sed aequaliter omnia, quia aequae immensa sunt singula in Deo, et aequaliter laude digna. Similiter anima cognoscit ibi et amat singula per se, quae in Deo sunt, et singula in aliis singillatim, et singula in omnibus communiter, et omnia simul in singulis. Similiter fruitur ibi et unitur singulis per se, et singulis in aliis singillatim, et singulis in omnibus in communi, et communiter omnibus in singulis singillatim. Ex hoc delectabitur anima supra modum, ita quod hoc similiter hic esset faciendum. Ibi laudabit anima Deum in singulis actibus et in singulis momentis secundum dignitatem suam, ut impleatur illud Propheticum Ps. 57: « Secundum nomen tuum, Deus, sic et laus tua. » Si enim non sufficeret digne laudare Deum in uno actu laudis, similiter nec in alio posset, nec in tertio, et sic de aliis; et sic careret pleno gaudio, quod promissit Dominus Jesus fidelibus suis: « Petite et accipietis, ut gaudium vestrum plenum sit, » Joan. 15. Gaudii plenitudinem anima percipit, quando Deum in singulis actibus suis et singulis momentis secundum condecenciam suam laudat. Etiam ibi non compleretur desiderium animae, quod promittit Psalm. 102: « Replebitur in bonis desiderium tuum. » Fidelis igitur anima hic semper desiderat ut Deum secundum majestatem suam in futuro aeternaliter laudare valeat. Ibi laudabit anima divinam potentiam, quae in sua natura nobis incognita in hoc mundo, aliquantulum tamen est divinis operibus patefacta. Primo magna Dei potentia manifesta fuit, cum Deus ex nihilo cuncta fecit: « Dixit enim et facta sunt. » Idem tanta velocitate fecit omnia, sicut si aliquis unicum proferret verbum: et licet omnes mirentur potentiam et magnitudinem Creatoris ex magnitudine creaturae, magis

*S. Th. Opera omnia. V. 17.*

admirandum est quod ex tanta potentia tam modica processerunt: et nimis mirabile est quod superbonus Deus, cujus natura est diffundi et communicare bonitatem sibi innatam, tamdiu potuit continere, quod non fecit creaturas quae bonitate sua et beatitudine fruerentur. Postea apparuit eadem potentia, cum omnia viventia delevit aquis diluvii praeter ea quae in arca, ipso jubente, pro semine salvabantur. Item lucebat potentia sua in diversis miraculis in Aegypto: et cum populum suum per mare rubrum transvexit sicco vestigio cunctis Aegyptiis insequentibus, descendentibus in profundum quasi lapis: et cum eum populum, scilicet sexcenta millia et amplius, per annos quadraginta uno cibo pavit, scilicet manna. Item centum octaginta quinque milia quasi una hora per unicum Angelum interfecit. In novissimis vero temporibus valde eluxit divina potentia, quando creator potuit fieri creatura, impassibilis potuit pati, immortalis potuit mori, invisibilis potuit videri, immutabilis potuit et potest sub speciebus panis et vini ab homine sacramentaliter manducari et bibi: haec enim non sunt impotentiae, sed verissimae et maximae potentiae argumenta. Similiter in hoc tempore valde clarescit divina potentia in hoc, quod Deus omnipotens detestans peccata, et vindicans in tertiam et quartam generationem, continere potest vindictam contra tot paganos, Judaeos, haereticos, falsos christianos, quorum nihil indiget, ipsum continue tam graviter offendentes; quos in uno momento delere posset sine suo damno: unde illud: « Deus qui omnipotentiam tuam parendo maxime et miserando manifestas etc. » Et in lib. Sapient. 12, « quod omnium Deus es, omnibus te parere facit. » Fragilitatis indicium est subito contra inimicos expetere vindictam, sicut fortissimus Samson fecit; sed « melior est patiens viro forti; et qui dominatur animo suo, » dicit Salomon, « expugnatore urbium. »

## CAPUT VI.

### *Primum principale gratiarum actionis per Deum.*

Ibi anima fidelis refert gratias Deo pro singulis donis naturalibus et gratuitis animae et corporis, pro singulis spiritualibus et temporalibus, specialibus et communibus collatis et conservatis in terra, et conservandis in patria. Nec gratias aget modo pro istis modo pro illis donis successive, sed pro omnibus simul quae unquam effluerunt a Deo, et effluisent si habilitatem alicubi reperissent. Haec gratiarum actio erit per Deum Dei Filium, sicut Apostolus dicit: « Gratias ago Deo meo per Jesum Christum. » Per ipsum solum gratias referre praesumo, cui sola veraciter cognita est magnitudo et multitudo donorum, et nobilitas et utilitas ipsorum: et per magnitudinem virtutum suarum respondere praesumo magnitudini donorum, et per multitudinem virtutum suarum multitudini donorum, et utilitatem donorum digne offerre praesumo Deo Patri placentiam Filii, cui olim dixit Matth. 12: « Tu es Filius meus dilectus, in te complacui mihi, » idest beneplacitum meum summe perfecit. Beneplacitum Dei Patris in Filio est pro universis donis suis digna gratiarum actio.

*Secundum principale gratiarum actionis ad Deum.*

Ista gratiarum actio vehementer ducit ad Deum. Quanto enim amplius dantis qualitas et affectus sinceritas, quantitas donorum et utilitas ipsorum ibi ab anima ponderatur, tanto anima Deo gratior efficitur: et quanto omnipotenti Deo fit gratior, tanto fit Omnipotenti semper propinquior. Ibi tantum anima gratulatur divinae sapientiae, quae singulis creaturis convenientissime singula dona reddit et distribuit, quod pro singulis donis Angelorum et Sanctorum uberiores gratias reddit quam si ipsa sola perciperet, et potius singula dona esse vult in singulis quam omnia in se sola: sicut nemo in aliqua parte corporis membrorum aliud esse vellet quam divina providentia ordinavit, teste Apostolo 1 Cor. 12: « In uno corpore multa membra habemus: omnia autem membra eundem actum non habent »: ita corpus Christi mysticum, quod est Ecclesia, ex diversis Angelis et Sanctis, et ex diversitate donorum constituitur. Si ergo totum corpus esset oculus vel manus, ubi corpus? et si unus tantum haberet omnia dona et officia, ubi esset Ecclesia? Nec tamen sequitur ex hoc, quod animam amplius afficiat praemium accidentale, idest gratitudo quam habet ex donis aliorum, quam substantiale, idest gratitudo quam habet ex donis propriis, enim ex uno substantiali magis beatificetur, quam ex omnibus accidentalibus: sed ex parte qua considerat ordinationem Dei sapientissimam et optimam, vult singula dona esse in singulis potius quam in se sola: sed ex ea parte qua bonum proprium naturaliter magis appetit quam aliorum, potius vellet omnia se habere quam alios: sed ubi gratia superat naturam, fidelis anima divinam ordinationem magis quam propriam utilitatem amplectitur.

*Tertium principale gratiarum actionis propter Deum.*

Ibi etiam anima gratias agat Deo propter Deum. Non enim fidelis anima principaliter ad gratias agendum ibi movebitur, eo quod ex gratiarum actione grata Deo efficitur; sed pure movebitur ex divina largitate, ex qua omnia dona effluerunt ab initio, et effluent absque fine: et quanto anima minus sibi et magis Deo intendit in gratiarum actione, tanto beatior erit, licet illam beatitudinem principaliter non intendat; et tanto ejus beatitudo communitati jucundior, et tanto Deo gloriosior. Ibi anima gratias agat Deo, qui ei imaginem sanctae Trinitatis impressit, juxta illud Psal. 4: « Signatum est super nos lumen vultus tui, Domine. » Et quia Spiritum sanctum cum donis suis et omnibus virtutibus in baptismo contulit, et quia cum Corpore et Sanguine suo delectabili saepe refecit, et quia ei sacram Scripturam concessit divinam naturam occultam manifestantem, omnem voluntatem suam manifestantem, indicantem nobilitatem, et utilitatem omnium donorum demonstrantem, viam certissimam ad caelestia ostendentem per exempla sanctissima Jesu Christi: et quia sine i. eritis suis fidem Christianam sibi dedit, qua credere posset sacrae Scripturae promissis et minis, consiliis et doctrinis.

## CAPUT VII.

*Primum principale congratulationis per Deum.*

Ibi etiam anima continue congratulatur Deo in omnibus operibus sui parvis et magnis, in omnibus judiciis circa bonos et malos, in omnibus moribus suis perfectissimis, in omnibus exemplis Jesu Christi, sanctissimis, in omni beatitudine et perfectione sua, quae consistit in potentia, sapientia, bonitate aeterna et immensa etc. Similiter in omnibus non successive, nam haec omnia praedicta perfectissima in Deo esse cognoscit; et haec congratulatio erit per Deum Dei Filium, in quo solo vere gaudere Deo possumus, qui solus beneplacitum Patris semper in summo perficit et perfecit, sicut ipse testatur Joa. 8: « Quae placita sunt ei facio semper: » et David dicit de omnibus aliis, Psal. 135: « Omnes declina-  
« verunt etc. » usque ad unum, idest Jesum Christum: et Salomon Eccl. 7: « Unum virum ex omnibus reperi, qui supplex Deo Patri per omnia et in omnibus complaceret. Mulierem autem non inveni. »

*Secundum principale congratulationis ad Deum.*

Haec congratulatio vehementissime ducit in Deum et ad Deum, propter delectationem quae in ipsa est. Si enim omnia corda essent unum cor, investigare non posset quantum delectationem habet anima in congratulatione Dei. Specialiter congratulatur Deo de redemptione generis humani, ad quam invitat Dominus Jesus omnes amicos, dicens Luc. 13: « Congratulamini mihi omnes, quia inveni draclimam quam perdidit. » Draclimae perditio fuit totius generis humani a congratulatione separatio: draclimae inventio fuit Christi per passionem ejusdem congratulationis recuperatio. Et notabile est, quod non dicit se emisse, sed invenisse, licet pretioso sanguine et aspera passione genus humanum comparaverit: quia intantum desideravit salutem generis humani, quod inventionem reputavit tali modo se posse hominem a potestate diabolica liberare, et ad beatitudinem aeternam ad quam creatus fuerat, revocare. Similiter notabile est, quod etiam omnes Angelos convocat ad congratulandum, non draclimae, non homini, sed sibi, quasi homo Dei Deus esset, et tota salus divina in ipsius inventionem dependeret, et quasi sine ipso beatus esse non posset.

*Tertium principale congratulationis propter Deum.*

Ibi etiam anima congratulatur Deo, non propter se, sed pure propter Deum. Tanta enim puritate anima afficitur in congratulatione Dei, quod potius vult ipsum esse beatum, quam seipsam esse beatam: immo anima fidelis mallet eligere omni beatitudine se semper carere, quam Deum alienius beatitudinis et perfectionis defectum habere. In omnibus his septem membris praedictis Deus ipse est causa efficiens, materialis, formalis et finalis: ipse est causa movens animam ad cognoscendum, ad amandum, ad fruendum, vivendum, laudandum, gratias agendum, et congratulandum: similiter ipse est materia in se habens totum quod provocare potest animam ad cognoscendum, amandum etc. hoc est sapientiam etc. Item ipse est causa formalis informans animam, qualiter se habere debeat in Dei cognitione, amore

etc. Similiter ipse est finis, ad quem tendit rationis cognitio etc. De his septem potest intelligi illud Salomonis Proverb. 9: « Sapientia divina aedificavit sibi domum, excidit columnas septem. » Domus est caeli empyrei creatio: septem columnarum excisio est septiformis praedicta gratia, in qua consistit plenissima vera beatitudo. Qualiter autem unusquisque se habere debeat in hac vita ut ad illam beatitudinem perveniat, docet Anselmus, dicens: « Tantum desiderium tibi esse debet in hac vita « perveniendi ad quod factus es, tantus dolor quod « nondum ibi es, et tantus timor quod non perve-

« nies, quod nullam debes sentire laetitiam, nisi « tantum de his quae dant spem vel auxilium « perveniendi. » Circa praedicta debet versari intentio nostra et totum negotium nostrum in hac vita, sicut servis suis fidelibus committit Dominus Jesus in Luc. 19 dicens: « Negotiamini dum venio, » singulis de commissis sibi negotiis singulos judicare. Obsecro ergo te, Domine, propter omnem beatitudinem tibi innatam, praesta cunctis fidelibus in hac misera vita in praedictis crescere de hora in horam, ut manifestetur abundantia gloriae tuae per infinita saecula saeculorum. Amen.





# OPUSCULUM LVII.

## DE MODO CONFITENDI, ET PURITATE CONSCIENTIAE

(EDIT. ROM. LXIV.)

### *Prologus.*

Quoniam fundamentum et janua virtutum, omnisque gratiae ac spiritualis consolationis principium est conscientiae puritas ac cordis munditia, ad quam principaliter et praecipue per puram et veram ac integram et perfectam confessionem peccatorum acceditur, nobis qui vocati sumus ad statum gratiae et ad acquirendas virtutes ac vitanda vitia, de sufficienti confessione, ac modo confitendi, ut deceat viros ad statum perfectionis electos, cum summa diligentia et sollicitudine continua praeceteris mortalibus principaliter est videndum.

### *Confessio debet esse pura.*

Est igitur primo videndum, quod confessio debet esse pura; quia peccata debent simpliciter dici absque duplicitate et excusatione, sicut homo credit ea manifesta esse coram Deo. Nec debent verba dici palliantia, aut cooperientia vel minuentia peccatum, sicut faciunt multi, magnas phylacterias et historias longas dicentes antequam peccatum explicent, ut sic per illas ostendant se minus culpabiles de peccato, quod quidem peccatum in fine illorum verborum superfluum excludunt. Vitanda sunt igitur superflua et excusatoria verba, sed pure dic peccata tua ac simpliciter te accusa. Similiter non debet dici quod cadat in infamiam alicujus, aut quod possit praebere confessori occasionemurbationis contra aliquem, aut materiam contemnendi. Unde si expediret nominare peccata alterius confitendo propria, tunc taliter explicentur, quod confessor nullo modo possit intelligere personam cum qua peccasti, nec possit venire in notitiam complicitis in peccato: sicut si dedisti Petro occasionem peccandi cum peccavit, non debes nominare; sed sufficit tibi dicere, Fui causa committendi tale peccatum cuidam personae.

### *Vera.*

Confessio debet esse vera, ita quod nulla falsitas dicatur scienter, nec aliquod dubium affirmetur; sed certa ut certa, et dubia ut dubia sunt dicenda. Et ideo quando confiteris, non dicas, Dico meam culpam si feci tale quid, aut si dedi materiam tur-

bationis tali, aut fecissem tale peccatum si potuissem; sed dic simpliciter, feci sic et sic, et appetivi sic et sic: habui voluntatem deliberatam faciendi tale peccatum, et non dimisi nisi quia non potui vel quia nescivi, vel quia timui verecundiam aut poenam temporalem. Sunt tamen quidam qui nescientes, aut verecundantes, aut non curantes specificare peccata, aperte mentiuntur in confessione quam faciunt, dicendo quaedam generalia ad quamdam cautelam, quibus comprehendant peccata omnia quae fecerunt. Dicunt enim: Dico culpam meam de quinque sensibus meis male custoditis, scilicet, visu, auditu etc. Et tamen si interrogarentur de quolibet per se, invenirentur non offendisse in altero praemissorum istorum praedictorum, maxime postquam confessi fuerint: et sic dicunt etiam de septem vitiis capitalibus; cum tamen non offenderint in omnibus, sicut sonant verba eorum. Talis ergo modus, ab his maxime qui saepe confitentur, est vitandus: sed dicant vera et necessaria, et dimittant falsa et superflua. Similiter ante confessionem diligenter seipsos examinent, et dicant primo omnia vitiosa et gravia quae pro certo noverint se fecisse, ita quod sub humilitatis specie aut causa quacumque nullatenus mentiantur; sed postea possunt dicere generalia et levia quae non possunt specialiter explicare, sicut sunt cogitationes otiosae, verba otiosa, negligentia et pigritia circa orationem, amissio temporis, distractio cordis dicendo horas vel orando, ingratitude beneficiorum Dei, superflua cura de corpore et de rebus temporalibus,urbationes leves contra proximum, iudicium leve alieni cordis, despectio proximi quoad personam et vitam sive mores, non contentari de omnibus quae Deus facit aut fecit, aut fieri facere permittit; et his similia, quae cum sint inevitabilia ab anima infirma, non possunt in numero declarari, sed potius expedit ea quotidie delere cum lacrymis, aut per ipsam infirmitatem animae recognoscere, et in humilitate debita permanere.

### *Integra.*

Confessio debet esse integra, ut omnia peccata quae habes in memoria, aut quae oblitus fueras confiteri, et modo recordaris, integre confitearis; nec dicas partem uni confessori et partem alteri,



quia nullo modo debes dividere. Hoc faciunt illi qui timent despici a confessore, vel reputari minus boni, plus timentes humanam verecundiam quam divinam offensam: et plus amantes laudem extrinsecam, quam intrinsecam pacem mentis et conscientiae puritatem. Similiter si oblitus es quando confiteris, aliqua peccata, et postea die sequenti vel alia die recordaris, si potes, debere recurrere ad eundem confessorem, ut confitearis si potes habere copiam, aut alium; alioquin sufficit tibi bona voluntas; quod si non ex oblivione, sed ex malitia et verecundia oblitus es, vel omisisti confiteri aliquod peccatum, teneris recurrere ad primum confessorem; et si vis recurrere ad alium, teneris confiteri omnia peccata prius confessa, et illud quod prius omiseras, et omnia quae postea commisisti prima confessione facta: et teneris confiteri de mendacio aut simulatione quam commisisti, quia dedisti intelligere confessori tuo quod primo integre fuisti confessus.

#### *Locus.*

Item confessio debet esse plena, quia debet continere circumstantias aggravantes peccata: quae sunt: locus in quo peccasti, quia gravius est peccare in Ecclesia aut in loco sacro quam in domo; et gravius est cogitare aliquod inhonestum quando dicis missam vel officium, vel quando horas, quam quando scribis: et gravius est respicere vel tangere animo impudico corpus hominis sub pannis, quam manum vel pedem; quia magis libidinosa delectatio est ibi. Et sic facies differentiam inter locum et locum.

#### *Tempus.*

Tempus in quo peccasti; quia gravius est caveri a Missa vel otari in die dominico vel in festo solemni, quam in die alio simpliciter: et gravius est quodcumque peccatum in magna solemnitate quam alio tempore: et gravius est non vacare orationi vel esse dissolutum in lingua vel relaxatum in gula quando homo debet communicare, et in die quo homo communicat, quam in alio tempore.

#### *Coram quo.*

Gravius est dicere et facere aliquid coram eo qui potest ex hoc sumere occasionem peccandi, quam illud dicere et facere occulte: et gravius est simulare se esse patientem habendo iram in corde, quam ostendere se esse turbatum sicut est, non dando tamen alicui per hoc turbationis vel mali exempli occasionem, ut dicit Gregorius. Et ideo non sufficit dicere, Fui iratus de verbo mihi dicto: sed debet dicere et addere, Et simulavi me esse patientem in verbis et signis exterioribus, ut reputarer humilis ubi eram: superbus; ita quod cum illa simulatione addidi mendacium ad iram quam occultavi. Adhuc est gravius tangere Bertam osculando, quam ipsam in eodem loco tangere cum pede: quia iste modus tangendi est magis impudicus. Unde non sufficit dicere, Tetigi Bertam impudice; sed oportet dicere locum corporis: si tetigisti manum vel pectus; supra pannos vel ad nudum; et dicas modum: scilicet cum ore, manu, vel cum pede et cetera.

#### *Mora quae contrahitur.*

Quoniam ibi majus est peccatum ubi major mora contrahitur, sive sit delectatio corporalis, sive mentalis, sive iram sive odium teneas per mentem aut annum: et diligenter est mora examinanda in peccato cogitationis; quia videndum est si in ipsa mora ratio succumbat sensualitati consentiendo in opus voluntate deliberata si posset: et tunc non est minor culpa quam si peccatum opere perfecisset, quia sic voluntas pro facto reputatur. Si autem succumbat ratio consentiendo in delectationem sensualitati tantum, quam non vult in opus procedere, sed vult tantum interius in delectatione voluptari: tunc licet ibi non sit plenus consensus, tamen est ibi peccatum mortale, sicut dicit Augustinus: sed est minus grave quam primum, ubi est consensus in delectationem et in opus. Si vero in neutrum consentit, sed ibi facit moram invite, quia scilicet nescivit vel non potest expellere, tunc dicat occasionem datam: quamvis haec sententia satis dura locum habeat in peccatis carnalibus sive criminalibus, potest etiam notificari in homicidio, et in aliis multis peccatis. Quicquid autem est, expedit conscientiae mundae facere praedictam examinationem in quibuscumque cogitationibus vitiosis morose multum pertractis.

#### *Quoties.*

Nam gravius est facere quodcumque peccatum cum corde aut cum aliquo sensu corporis bis quam semel; et ideo si potes recordari, debes specificare vices cogitationum malarum, aut motus libidinosos in carne et voluntatem faciendi aliquod peccatum: aut quoties iterasti respicere in faciem alicujus propter delectationem visus: aut quoties turbasti aliquem aut murmurasti, et sic de aliis. Quod si non es memor de numero, dic bona fide, secundum quod judicas te toties iterasse peccata. Et attende quod cogitationes leves et levia verba non sunt numero explicanda, nisi essent occasiones alicujus gravis peccati vel vitii, aut essent de se in aliquo genere septem vitiorum capitalium. Si tamen propter aliquam cogitationem levem haberes nimis longam distractionem mentis in oratione vel in psalmodia, credo quod bonum esset explicari si esses memor, propter magnum dispendium quod facit. Si etiam propter aliquod verbum solatiosum vel leve aliquando turbaris, aut oriretur aliqua mala suspicio, aut aliquod malum, tunc debet specificari propter malum ipsius effectus: sic quod talia otiosa et levia sunt specificanda, quando propter ea incurritur aliquod grave vitium vel delictum, aut datur alicui materia peccandi. Sufficit ergo dicere simul omnes distractiones mentis habitas in oratione et in officio propter cogitationes leves, sic dicendo: Dico meam culpam de nimia distractione et mentis evagatione quam habui in oratione, audiendo Missam et dicendo horas, propter cogitationes inutiles et otiosas, in quibus cor meum nimis occupavi, sic quod ibi non fui intentus ut debui et potui. Cogitationes autem vitiosae procuratae, et cum delectatione receptae, omnes sunt explicandae quantum potest homo, quantum ad quantitatem, moram et vices, ut supra dictum est. Cogitationes vero quantumcumque malarum et vitiosae, si non sunt studiose procuratae, nec cum delectatione receptae, nec cum

mora servatae in corde, nec dedisti occasionem veniendi propter cibi et potus intemperantiam, aut propter occasionem, sed subito venerunt et recesserunt, et displicentiam habuisti in illis, et statim quando sensisti, ut potuisti, expulisti aut expellere procurasti occupando te in lectione aut in meditatione sancta, tales dico non sunt confitendae, quia non solum in istis homo non offendit, sed multam meretur tanquam pugil, puginator et victor. Unde Hieronymus: « Ille praedicatur beatus, qui « statim ut coepit cogitare, cogitatus interficit, et « allidit ad petram, » idest Christum. Sed hodie quidam tales cogitationes confitentur potius ad laudem et vanam gloriam, ut confessor reputet eos spirituales, cum tamen talia essent occultanda et in confessione tacenda, quia solum confitens debet se simpliciter ostendere peccatorem: unde tales sunt thesauri Dei latrones, quia vanae gloriae appetitores, et ideo poena latronum sunt puniendi: nam de talibus cogitationibus, quibus sic resistitur, dicit Apostolus 1 Cor. 10, quod « Deus « facit eum tentatione proventum: » quod ideo dicit, quia homo talibus resistendo meretur: et ideo intelligo quod digni sunt suspendio, qui sub specie caritatis, aut petendi consilii, aut alterius causae coloratae, quae soli Deo sunt aperta manifestant et aperiunt malitiose et sub dolo.

*De motibus vanae gloriae.*

Quia gravius est habere vanam gloriam de gratia spirituali a Deo recepta, quam de hominis opere manuali. Unde confiteri habes de vana gloria, aut spirituali aut corporali: et gravius est dolere de bono spirituali alterius, quam de bono corporali ipsius: quia primus dolor est de invidia fraternae gratiae, quae est peccatum in Spiritum sanctum, quia est irremissibile: secundus dolor ex simplici procedit invidia. Et ideo non sufficit dicere, Dolui de bono alterius propter invidiam; sed debes specificare si de bono spirituali vel temporali: et eadem ratione gravius est gaudere de spirituali damno proximi, sicut de peccato quod fecit, aut de ipsius infamia, aut quia amisit Dei gratiam quam habebat, quam gaudere de temporali damno ipsius. Cavendum tamen est qualiter confitearis praedictum peccatum vanae gloriae de gratia spirituali, ne forte incurras majorem vanam gloriam in confitendo illum defectum: nam dando intelligere confessori quod habuisti vanam gloriam, quia fuisti visus orare, vel in Missa plorare, vel laudatus quod bene praedicaveris, quod ex hoc potest incurrere vanam gloriam, sive peccatum vanae gloriae, quod confessor ex hoc reputet te spirituales. Debes igitur eante explicare confessori tuo gratiam tibi a Deo datam in oratione seu lacrymis, et huiusmodi. Potes tamen dicere sic, Dum dicerem vel audirem missam, vel praedicarem, feci actum aliquem propter quem personae aliqua me videntes cogitavi quod crederent me habere aliquam spiritualem gratiam ibidem. Et quia in ipsa cogitatione habui complacentiam et consensum, nec dolui, ideo me aequo. Vel sic, Appetivi quod aliqui sic crederent me habere, cum non haberem; et ad hoc credendum feci aliquos actus cum simulatione: et idem intelligas de aliis peccatis. Similiter caute confitearis vanam gloriam quam habuisti in exercendo aliquos actus virtuosos. Sufficit tibi non explicando

dicere, Feci aliquem actum, propter quem non appetivi in totum laudem Dei, sed potius hominum; quia non solum volui reputari ab illo cui feci vel dixi quoddam bonum, sed etiam appetivi ut aliis publicaretur. Et nota, quod cogitationes de vana gloria non sunt confitendae, nisi quando est ibi complacentia et consensus et delectatio morosa. Si autem quando veniunt, cognoscis eas non debere venire, et ex hoc statim displicet tibi quod veniant, ac per hoc statim recurris ad Deum ut eas expellat, aut saltem te consentire non sinat, sis certus quod in eis non peccas, sed potius per eas coronam acquiris. Die ergo statim in corde tuo, quando sentis eas, « Deus in adiutorium meum « intende: » vel, « Domine vim patior, responde pro « me. » Et caveas ne per huiusmodi tempestuositates seu tempestuosas cogitationes dimittas aliquod bonum opus incipere, vel incoeptum continuare, ex quo principale motivum est bonum; sicut hodie multi faciunt credentes spiritui diffidentiae, qui facit credere quod perdunt quicquid agunt, quod in bonis actibus suis cogitationes vanas contrahunt. Respondeas ergo tali spiritui: Nec propter te facio nec facere volo istud bonum, nec propter te dimittam. Unde quantumcumque habeas in istis cogitationibus aliquando complacentiam et consensum, doleas et pure confitearis, nec propter hoc cesses a bono propter Deum principaliter incoepo; sed pugna viriliter et constanter, orando Deum, ut custodiat suum opus. Si autem naturaliter es passionatus et stimulatus de vana gloria, sicut sunt quidam qui nihil boni quasi faciunt aut dicunt sine ipsa, tunc consulo tibi ut non delecteris in loquendo multum de Deo aut de vita spirituali, docendo alios sub specie caritatis, quia pro certo sub hoc velo caritatis latet dulce venenum; sed puto esse securius et magis expediens humiliare et silere a bonis, ne forte curando infirmeris; quia mens tua adhuc eget custodia, et fraenum necessarium est linguae tuae, donec illa pestis in corde tuo fluctuare non cessat: alioquin, sicut dixi, salvando et sanando alios, tuam destruis sanitatem. Experto crede: nam docere et curare alios, est eibus perfectorum. Si vero necessitas inevitabilis vel magna, vel rationabilis congruentia loquendi occurrat, tunc loquendum est taliter, quod ita te sicut et alios videaris arguere et docere. Et quia ibi etiam non deerit spiritus vanae gloriae, cupiens per hunc modum loquendi reputaberis humilis et discretus, si etiam occurrit tibi loqui quando tacebis, vel quando de locutione humiliter excusabis; nescio aliud tibi remedium nisi confessionem puram, et lacrymas adhibere contra hanc maledictam pestilentiam. Est autem valde timendum, ne timore despectionis humanae toties hoc vitium confiteri negligas, quoties ab ipso te noveris superari; nec ut minus vereunderis, mutes saepius confessorem; imo ut plus confundaris, studeas eidem saepius et elarius solito confiteri. Sic enim virtute humilis confessionis spiritus ille citius expellitur. Et si etiam tuae confessioni se ingerat, ut de pura et humili confessione appetas commendari; certe si te senseris vulneratum, non timeas in fine confessionis detegere ipsum vulnus.

*De inobedientia.*

Et est sciendum, quod gravius est esse inobedientem vel irreverentem patri vel matri propriae, quam illi cui non sic tenetur obedientiam vel reverentiam exhibere: et gravius est turbare unum sanctum hominem, aut deridere ipsum, quam hominem vitiosum: et gravius est provocare unam personam religiosam ad aliquod peccatum, quod est contra professionem ejus, quam unam personam saecularem inducere ad idem peccatum. Et gravius est inspicere unam juvenem impudice religiosam mulierem, quam saecularem; quia secundum beatum Gregorium: « Non licet intueri, quod non licet concupisci. » Et ideo dico esse gravius illud vitiose respicere, quod est gravius concupiscere vitiose. Hoc idem intelligo de tactu, et quocumque actu et verbo impudico. De conditione personae cum qua peccasti, sufficit exemplum jam dictum. Non ergo sis contentus dicere, Non bene custodivi visum, aut dicere, Iteravi pluries aspectum in faciem cujusdam personae cum complacentia et imaginatione impudica; sed qualitatem et conditionem personae. Et si de visu sic expedit dicere, multo magis de verbo impudico dante provocationem ad peccatum, et de tactu aut commotione carnis libidinosa habita ex allocutione vel appropinquatione ad corpus alicujus.

*De intentione habita in peccatis.*

Gravius est facere quodecumque peccatum cum intentione peccandi, seu provocandi aliquem ad simile aut aliquod aliud peccatum, quam ad faciendum sibi ipsi tantum, ut si noveris defectum alicujus, facias ipsum despici aut minus reputari propter invidiam tuam, vel aliam malitiam. Aut si fecisti aliquem actum cum oculis aut manibus adversus aliquem, vel aliquam personam, ut provocares eam ad malum: et sic de aliis peccatis studiose factis, non tantum in damnum facientis, sed etiam in proximi detrimentum. Quae quidem peccata non sufficit confiteri, nisi explicentur intentiones malitiosae. Tales recte assimilantur daemonibus, et sunt inimici Christi, quia student animas perdere, pro quarum salute Christus sanguinem suum effudit. Item deseensus de peccato in peccatum est diligentius perscrutandus. Non est ita grave unum peccatum simplex, sicut est illud ejus occasione plura alia peccata sunt commissa. Unde, si studiose fecisti aliquem defectum tali modo quod alius fuit culpatus de hoc, et non excusasti innocentem, sed permisisti eum injuste pati: vel si pro defensione unius mendacii verba injuriosa protulisti, aut incurristi plura alia mendacia: aut pro excusatione unius mendacii, commisisti perjurium, et ob hoc fuit suspicio de alio, vel facta injusta punitio super aliquem, aut ortum est odium aut turbatio aliqua inter aliquos, omnia haec et similia quae ex peccato primo sunt consecuta, debent cum primo principali peccato plenius explicari.

*De occasione et causa peccatorum.*

Similiter de plenitudine confessionis est dicere non solum circumstantias praedictas vel similes, sed etiam occasiones et causas peccatorum, propter quas incurristi ipsa peccata; videlicet quia neglexi-

sti ea vitare, sicut potuisti et scivisti. Hujusmodi autem causae sunt taliter dicendae, quod te cum peccatis accuses et non excuses, sicut quidam faciunt imponentes culpam diabolo, sicut Eva quae dixit, « Serpens decepit me. » Dicunt enim, Me tantum tentavit de tali peccato, quod oportuit me consentire, nec potui me defendere ullo modo. Sed ista non est confessio, nec expressio causae peccati; immo est excusatio tui et accusatio diaboli illius, qui forte non est culpabilis tibi: non enim omne peccatum fit semper ex suggestionem diaboli, nec omnis tentatio est a daemone; sed secundum beatum Jacobum 1: « Unusquisque tentatur a concupiscentia sua abstractus vel illectus. » Multi ergo mentiuntur dicentes, Daemon me seduxit ad tale peccatum, quod sibi consensi, qui a sola sua concupiscentia tentatus cecidit. Et ideo oportet dicere, Cum sentirem me stimulari ad tale peccatum perpetrandum, fui negligens in evitando occasiones me incitantes ad hoc, scilicet locum, tempus et personam: et fui negligens in adjuvando me cum jejuniis et oratione et aliis necessariis sicut scivi et potui. Unde propter negligentiam et malitiam meam commisi ipsum peccatum, potius eligens servire diabolo, superbiae et carni meae hoc suggerenti, quam Spiritui sancto mihi per illud non facere inspiranti. Aliqui vero imponunt culpam proximo, sicut fecit Adam quando dixit Deo, « Mulier quam dedisti mihi sociam, dedit mihi de ligno, et comedi. » Dicunt enim, Quaedam persona tantum instetit mihi rogando et blandiendo et aliqua dona dando, quod nullus de mundo potuisset se defendisse; sic quod oportuit me finaliter consentire. Aliqui dicunt, Quidam dixit mihi tantum malum de quodam, quod fecit me murmurare de illo, et illum despiciere. Sed haec est vitiosa confessio. Dic ergo sic de primo: Cum viderem expresse, quod locutio et conversatio cum quadam persona esset mihi inutilis et periculosa, et sentirem affectum cordis ad ipsam personam, aut ipsius ad me, non esse parum, nec secundum Deum, sed potius secundum carnem, et in conspectu et in praesentia ejusdem haberem nimiam complacentiam et sensualem, et ex hoc semper haberem imaginationes impudicas de illa cum libidinis motibus carnis, et ita propter hoc debebam fugere eam, nihilominus fui secutus voluptatem carnis in tantum, quod ad talem actum deveni cum ea, unde me et ipsam illaqueavi. De secundo sic dicet: Audiens dici aliqua mala de quadam persona, facilius ea credidi quam credidissem bona si audissem, propter levitatem cordis mei et defectum caritatis: et quando debui compati murmuranti, et excusare in corde meo omnia de quo ille murmurabat, ego statim murmuravi cum illo, confirmando malum de quo dicebat, vel addendo ad illud quod dicebat; ac per hoc dedi sibi occasionem magis murmurandi. Et nota, quod hic non debet quis murmurantem nominare, nec factum de quo murmuravit, nec personam de qua murmuravit, quando scilicet talis nominatio esset in excusationem sui vel infamiam proximi. Item si te accuses de turbatione proximi aut de turbatione habita contra aliquem principaliter propter defectum ejus, non debes exprimere illum defectum, ne per hoc ostendas te habuisse rationabiles causas turbationis, et sic videaris minus peccasse, aut motus zelo justitiae. Sunt enim quidam qui dicunt in confessione: Vidi fieri talem defectum, vel audivi



dici tale verbum, et de hoc fui valde turbatus, quia erat contra honorem Dei, contra bonos mores, et in malum exemplum aliorum. O stulte hypocrita quid dicis? nam te simpliciter laudas, et nihil penitus confiteris: taces peccatum tuum quod fecisti videndo alienum defectum, et non tuum qui forte fuit gravior quam iste defectus alterius, quia despexisti peccantem cui debebas compati, et mentiris dicendo te fuisse turbatum propter amorem Dei et proximi, cum tamen fueris turbatus propter superbiam tuam, et quia non habes caritatem proximi quae non permittit aliquem contra proximum turbari. Sic ergo dicas: Videns vel audiens fieri vel dici aliquod quod iudicavi esse malum, et forte esse pejus quam fuit, propter malitiam meam, quae non permisit me excusare factum vel intentionem dicentis vel facientis sicut poteram et debebam, non fui motus ad compatiendum illi, vel ad orandum pro ipso, sicut debui ex caritate; sed magis fui commotus ad iram contra ipsum, contemnendo et iudicando ipsum et appetendo statim punitionem ejus, vel habere potestatem puniendi: et hoc accidit mihi propter duritiam cordis mei, et quia non recognosco patientiam Dei quae supportavit me in gravioribus peccatis absque ulla punitione, et sic de aliis. Sunt alii qui se clarius laudant in confessione dicentes, Per gratiam Dei satis bene custodivi me a tali tempore vel citra a tali et tali peccato: nam bene continuavi officium, missas, praedicationes et orationes meas: faciant qui volunt facere mala, quia ego intendo bene facere facta mea, et me custodire a peccatis melius quam facit major pars vicinorum meorum. Et quia prius me permitterem occidi quam facere tale peccatum, et in me non sentio alium defectum, nisi quia sum ingratus de beneficiis Dei, nec sum sufficiens ad regratiandum Deo, qui me liberavit ab his peccatis, quae faciunt multi alii. O Deus, isti sunt similes Pharisaeo, qui ascendit in templum ut oraret, cujus oratio fuit tota sui exaltatio super alios. Sic et isti qui debent se simpliciter accusare in confessione, super alios se laudant narrando bona quae faciunt. De superbia autem et praesumptione quae latet interius, nihil dicunt. Sunt alii qui confitendo peccata sua, totam culpam imponunt Deo: sic enim dicunt: Dominus Deus dedit mihi naturam ita perversam et promptam ad tale peccatum, quod non possum mihi cavere. Isti dicunt cum Adam qui dixit: « Mulier quam dedisti mihi etc. » Quasi diceret, Si non dedisses mihi, non peccassem. Sed isti aperte mentiuntur: nam secundum Gregorium, « Diabolus non potest vincere, nisi volentem; cum tamen de ipso dicatur quod non est potestas super terram quae illius potestati valeat comparari: ergo multo minus potest quis violentari a concupiscentia naturali. » Sunt alii qui dicunt, Fui deceptus a tali tentatione, quia Deus noluit me adjuvare, cum tamen saepe jejunarem et orarem, et ad ipsum recurrerem. Sed isti non accusant pigritiam suam et negligentiam, qua noluerunt vitare occasionem peccandi, et perseverare in oratione: asserunt enim Deum impium et mendacem; qui tamen dicit in Psal. 90: « Clamabit ad me, et exaudiam eum: » et alibi Matth. 11: « Venite ad me omnes qui laboratis: » et alibi: « Petite et accipietis: » et Apostolus 1 Cor. 10: « Fidelis Deus qui non patietur vos tentari ultra quam potestis, sed faciet cum tentatione proventum. »

Sciant ergo quod ideo relinquuntur a Deo, quia insipide et sine fide orant, nec volunt pugnare contra seipsos, nec perseverare patienter postulantes auxilium Dei sicut decet, sed volunt habere gratiam statim sine labore, petentes etiam illam a Domino non humiliter, sed praesumptuose tamquam digni, ac si esset Deus obligatus eis. Orant etiam cum securitate quadam, ut exaudiantur statim ut ipsi volunt, et non sicut ipse vult; sicque putantes ipsum ducere ad auxiliandum, potius provocant ad derelinquendum, quia superbe et praesumptuose accedunt ad ipsum. Causa ergo lapsus eorum est superbia et negligentia sua, quam debent simpliciter accusare.

#### *Occasiones quae dantur aliis in peccando.*

Sunt etiam in confessione explicandae occasiones datae aliis ad peccandum; quia omnium peccatorum homo est particeps, quibus occasionem praebuit malitiose vel non malitiose. Unde confiteri debes, si malitiose vel ignoranter dedisti alicui occasionem peccandi; nec nominare debes directe vel indirecte personam cui dedisti causam, sed sola occasio est dicenda. Peccatum vero quod factum est ab alio occasione tui, potest dici explicite, quando est notum confessori; non illum qui fecit. Alioquin dic solam qualitatem delicti, sic dicendo, Feci fieri peccatum quoddam mortale vel grave propter talia verba quae dixi, aut propter tale malum exemplum quod dedi. Item si habuistiurbationem cum socio in itinere, vel in aliquo opere, aut propter socium dixisti male officium, quia male proferebat, non debes dicere, Socius meus turbavit me in tali facto, aut dixi male officium meum propter defectum socii mei; quia sic accusas socium, in cuius notitiam confessor potest venire. Dic ergo, Turbationem habui cum aliquo propter meam superbiam, quia ipsi dixi verba injuriosa, et ipsum provocavi ad dicendum mihi. Et si est illius culpa, dic, Habuiurbationem cum quodam propter impatientiam meam, quia nolui supportare eum in caritate propter aliqua verba ab eo dicta: vel: Dixi male officium cum aliquo in tali hora, et dicente mihi conscientia ut redicerem, propter pigritiam meam non redixi.

#### *De pollutione.*

Si habuisti pollutionem carnis vigilando, dic causam expresse. Si dormiendo, dic causam quam dedisse te credis. Causae possunt esse cibus et potus, intemperantia diei praecedentis, aut alio modo. Aut si dicendo ipsum propterea non dabis intelligere confessori viam dierum praeteritorum, cogitationes inhonestae habitae ante dormitionem, quas explicare potes, potissime quando somnias ea quae praecogitasti. Nec sunt recitanda somnia vitiosa vel inhonesta, nisi ante cogitasses ea, aut post somnum cum delectatione et mora et motu carnis cogitasses. Et sunt dicenda tamquam cogitata, magis quam somniata. Si vero somniasti te habere aliquem actum impudicum cum persona ad quam habes sensualem affectum, aut quam ante conspexisti oculo impudico, hoc debes exprimere, ut causam illius somnii. Et quia homo plus in talibus delectatur, et multi post somnum gaudent se talia somniasse: ubi vero non fuerit aliqua de praedictis causis



vel similibus, nihil de somnio est dicendum, quia nulla culpa est ibi, sufficit dolere in corde. Et ad quietandum conscientiam, potes dicere, Inhonestum habui somnium; cui si dedissem causam, quam nescio, tunc dico culpam meam.

*De causa pollutionis.*

Secundum sanctos Patres triplex est causa pollutionis nocturnae. Prima provenit ex voracitate gulae, et superabundantia cibi et potus, quae est diligenter examinanda ab illis qui vocati sunt ad spirituale exercitium: nam quandoque accidit aliquos relaxari in gula nimis aliquo tempore, et postea quando abstinent polluuntur in somnis: credunt quod hoc non accidat ex culpa immoderantiae, sed potius ex debilitate et necessitate naturae; sed errant; quia debent cavere et judicare an venerit ex nimietate saturitatis praeteritae. Quod enim fuerat per voracitatem et ingluviem congregatum in medullis, necesse est ut aliquando per pruritus vel per insensibilitatem corporis jejuni afflicti egeratur; propter quod non solum abstinendum est a delicatis cibis, verum etiam a vilibus, et cum aequali continentia temperandum est; imo panis et aquae satietas est timenda, ut possit in nobis acquisita puritas permanere. Isti ergo qui nondum aequalis continentiae et moderantiae gratiam sunt adepti, non minus perfectam pollutionem considerant, quae ipsis etiam hominibus abstinentibus sic accidit. Secunda causa est, quando per incuriam et immunditiam mentis elabitur: nam mens spiritualibus exercitiis vacua, et disciplinis interioribus non intenta, sensu corporis per vanas et immundas cogitationes evagatur, ex quibus merito culpae eliciuntur humores. Et ideo volentibus obviare, necesse est privare, et hanc causam eradicare, videlicet mentis torporem excutere, et sensus refrænare, ne mens ad vana et noxia discurrat, et illis assuefacta excessibus ad immundissima incitamenta luxuriae somnians perturbetur. Praedicta ergo negligentia acquirendi munditiam et evitandi immunditiam, in confessione pure explicetur. Tertia causa potest esse, quando illudentis inimici invidia pollutio proeuretur. Dum enim videt sanctum virum per sollicitam vietus moderationem, et integram et perfectam ac frequentem peccatorum confessionem, perpetuam munditiae puritatem acquirere, conatur ejus conscientiam perturbare, maxime in diebus illis quibus considerat divino aspectui complacere fluxus illius emissionem polluere, ut sic a sancta communione trahatur. Quibusdam vero contingere dicitur ex debilitate naturae, quae non est ita fortis et valida, sicut antiquitus dicitur extitisse. Hanc causam potest quis in seipso advertere, quando in illo turpi, moderamine vietus frequentius plus solito polluitur absque turpis somnii interventu; sicut ego quosdam cognovi hac peste certis temporibus ter et quater in hebdomada sordidari, quamvis non minus praedictae illusioni possit ascribi.

*Utrum propter pollutionem nocturnam sit vitanda sacri altaris perceptio.*

Secundum Patrum sanctorum sententiam, vigilantibus circumspeditione cavendum est ad communionem salutaris convivii accedere tempore, quo sentimus non somnii illusionem pollutos. Sed si hostis

*S. Th. Opera omnia. V. 17.*

invidus taliter menti nostrae illuserit, ut nobis caelestis remedii subtrahat medicinam; dummodo nullus reprehensibilis interveniat pruritus, aut oblectationis assensus; si fluxus ille fuerit naturali necessitate profusus, aut impugnatione hostis antiqui procuratus, et absque sensu voluptatis adductus, debemus ad gratiam salutaris cibi nihilominus accedere confidenter. Quod si creditur evenisse occasione vitiosa, die illa debet se humiliter subtrahere ab altari, ne in nobis verificetur sententia Apostoli 1 Cor. 11: « Qui manducat et bibit indigne, iudicium sibi manducat et bibit, non dijudicans corpus Domini, » id est non faciens differentiam inter perceptionem cibi caelestis et carnalis; nec judicans ipsum corpus Domini esse tale, quod non nisi pura mente et carne liceat manducare. Et ideo subinfert idem Apostolus: « Ideo inter vos multi infirmi et imbecilles, et dormiunt multi; » quasi diceret: Multi ex hac praesumptione et manducatione indigna spiritualiter infirmantur, et somno mortali dormiunt multi per peccatum quod ex ipsa indigna manducatione et assumptione incurunt. « Probet autem seipsum homo, » id est examinet seipsum homo antequam sacramentum percipiat, et diligenter se videat, utrum sit mundus vel immundus, utrum devotus vel indevotus, utrum reverens vel irreverens, utrum timens vel praesumens; accedat etiam si certus sit, vel certum se putet quod non sit vitiose pollutus, vel aliquo tali peccato infectus: non enim debet volens istum caelestem panem sumere esse contentus se non habere peccatum mortale, neque praecedenti nocte vitiosa occasione fuisse pollutum; quia licet haec duo redant quemlibet ipso cibo indignum, alia tamen plura sunt quibus se homo debet ab hoc subtrahere reverenter, quae explicare non audeo, quia a sanctis et doctoribus ipsa expressa non reperi; atque illustratione gratiae Dei ea securius simpliciter relinquenda decrevi. Id tamen quod pro meipso retineo, est verbum illius qui hoc instituit sacramentum, quem non credo illud frustra protulisse: dixit enim: « Haec quotiescumque feceritis, in meam memoriam facietis. » Ex quo quidem verbo arguo mihi ipsi, quod quoties volo id agere quod ille instituit, et modo praedicto reliquit, nequaquam sine remorsu conscientiae ac praesudicio animae timeo ad illum posse accedere, nisi praememorata ipsius instituentis caritate, ac ejus passione et morte; in cujus memoriam perpetue recolendam, illud sacramentum debere confici et perfici ipse clare asseruit et injunxit. Considerans insuper circa hujus sacramenti primordia lotionem pedum factam non absque mysterio et sacramento, ibidem fuisse dictum a Domino: « Si non laveris te, non habebis partem mecum; » agnosco per haec, et judico, non sine praesumptionis et gravis offensae periculo aliquem velle habere partem secum ipsum Sacramentum sumendo, non praehabita alicujus gratiae spiritualis lotionem. Quam quidem lotionem non solum per compunctionem et lacrymas puto fieri, verum etiam per intentionem mentis, devotionem et fidem, in qua ipse Dominus vocat et invitat animam et trahit, et quodammodo cogit ad ipsum cibum angelicum et caelestem. Unde et ipse dixit illis quos laverat: « Jam mundi estis propter sermonem quem locutus sum vobis: » non dixit, propter aquam qua loti estis, sed propter sermonem. Hoc autem est verbum fidei,

« quod praedicamus, » secundum Apostolum. Unde in Actibus Apostolorum legitur, « Fide purificans « corda eorum. » Hanc autem devotionem et fidem celebrantis seu Sacramentum sumentis credo esse illam, quae celebrat, et quae facit ipsum Sacramentum percipi cum effectu, sicut et verba Christi sunt illa quibus consecratur et transubstantiatur panis et vinum in corpus et sanguinem Christi. Quam quidem devotionem voco Dei gratiam quae praevenit et disponit, subsequitur et infundit. Ad hoc ergo Sacramentum cum instantia ferventis et assiduae orationis procuremus modo praedicto vocari a Domino; videlicet praehabita ipsius memoria, atque compunctionis et devotionis et fidei lotionem, ad quae nos praeparari oportet per mentis et corporis munditiam, et per linguae et sensuum refrenationem, et per nostrarum passionum continentiam ac moderationem.

#### *De fluxu libidinis.*

Praetermittendum quoque non est, quod quibusdam contingit interdum conscientiae dubietas et perturbatio magna, unde ipsis vigilantibus absque ulla commotione carnis et cogitatione immunda, humor quidam per membrum secretum egreditur sine delectatione, et quasi insensibiliter; ita ut multi de hoc non perpendunt, nisi cum pannos senserunt madefactos. Cujus causam aliqui ignorantes, turbantur et errant, putantes se pollutos esse. Et ideo sciendum, quod illius humoris effusio non est pollutio: quia, ut dicunt medici, sine libidinosa delectatione et carnis motione nullus potest pollui vigilando. Ad ipsius tamen effusionem humoris, videtur naturalis conditio causam exhibere primariam: sed deinde id aliud quod ad naturam disponit, causa vitiosa et evitabilis perficit et consumit. Quibusdam hoc provenire agnovi propter solam praesentiam et allocutionem alicujus personae, in cujus conspectu habuit complacentiam sensualem et vanam, seu ad quam inordinato amore afficitur, aut per tactum impudicum levem, aut imaginando aliquos actus impudicos fortiter et morose: in his enim casibus et aliis similibus, multi inveniuntur habere calefactiones et commotiones carnis libidinosas, dictumque humorem emittere velint nolint. Sed eas causas, et similes quae sunt evitabiles, debet quilibet fugere et evitare pro posse; maxime qui sentit de hoc se passionatum, seu ad hoc naturaliter inclinatum sive ex vitio mentis sive ex debilitate naturae. Et qui occasiones hujusmodi non evitaverit pro posse, relinquendo amicitiam et familiaritatem personarum ad quas inordinate afficitur, fugiendo etiam allocutiones et aspectum personarum; licet non credam ipsum per dictam effusionem peccare mortaliter, nisi forte aliter concupisceret, aut impudice tangeret personam quae est causa istius effectus; tamen credo eum graviter peccare, et magno peccati mortalis periculo: et ideo consilium do tibi, quod absque dilatione morosa ipse sibi violentiam faciat in hac parte fugiendo personas hujusmodi, atque cum eis omnem opportunitatem loci et temporis evitet. Ille itaque praedictus fluxus, qui a quibusdam vocatur libido, si potest evitari ipsius occasio, et si studiose non evitetur, est omnino confitendus cum suis occasionibus, et negligentia habita circa ipsas. Si vero contingit ex causa quae vitari non potest, sicut quando audiuntur verba impudica ex casu, vel lo-

quitur cum persona, vel sedet juxta eam, de cujus praesentia habet complacentiam vanam, et ab ea separari non valet: in his et similibus credo sufficere, quod tam de occasione habita et impotentia vitandi, quam de fluxu illius libidinis dolor est simpliciter habendus: quia tamen dubitare de talibus quae spectant ad conscientiae puritatem: est quandoque valde proficuum, poteris hoc confiteri propter quietudinem mentis et pacem, quamvis expedire non credam.

#### *De complacentia habita in memoria peccati.*

Sciendum est, quod quando cogitas de injuriis receptis, et in illa memoria turbaris intra te cum aliqua mora, et appetis vindictam fieri, aut factam esse, aut doles quod non fuit facta per te aut per alium: aut imaginaris aliquid facere, aut aliquem motum tenere animo vindicativo; haec omnia sunt confitenda, et alia quaecumque similia, si sentis in mente tua ratione istius injuriae. Si autem rememorando mala praeterita quae fecisti, non haberes dolorem, sed potius delectationem in eis, et propter hanc delectationem facis moram ibidem, non credo expedire quod specifies ipsa peccata rememorata, si alias integre confessus es ea; et si non habuisti aliud quam delectationem in mente, sufficit dicere, Mibi venerunt ad memoriam quaedam vindictae vel injuriae quas feci, vel quaedam peccata gravia quae commisi, de quibus non solum non habui dolorem in tali cogitatione, sed de ipsis cum multa complacentia cogitavi: et si aliud tibi occurrit in carne vel in mente propter dictam complacentiam quod tibi videtur aggravare peccatum, ipsum etiam debes confiteri: verbi gratia, si de peccato luxuriae per te facto habuisti memoriam, et de hoc habuisti motum carnis et poenitentiam quia ipsum peccatum non fecisti pluries vel cum pluribus; tunc enim debes sic dicere, Ex imaginatione quam habui de quodam peccato luxuriae, habui motum carnis et complacentiam in mente, et appetivi illum fecisse multoties, et cum multis personis. Et sic non oportet te indicare confessori te jam fecisse illud peccatum, nisi forte alias idem indicasses, et nisi pro majori humilitate et merito velis ipsum ei similiter explicare. Si autem recordaris te habuisse opportunitatem faciendi aliquod peccatum quod non fecisti, et in illa recordatione non gaudes te evasisse illud peccatum, nec regratiaris Deo qui custodivit te ab ipso, et abstulit oportunitatem et voluntatem faciendi ipsum, omnia ista sunt plenius referenda: videtur enim in hoc magna ingratitude, et peccati commissio voluntaria. Sed si in praedicta recordatione peccatorum, et maxime carnalium, non posses vitare complacentiam et motus carnis, dum velles ea studiose recolere causa te ipsum excitandi ad compunctionem et dolorem, consulo tibi quod non ea specialiter recolas, nec etiam alia peccata quae non potes sine complacentia recolere, sicut est vindicta facta per te vel per alium de inimico tuo, aut damnum aut mors ejus quem occidisti. Debes ergo omnia peccata tua, si vis, confiteri generaliter sub duobus, scilicet superbia et delectatione carnis, confitendo sic corde meditando et ore proferendo: Dico meam culpam de superbia quam habui contra Deum et proximum, irascendo, invidendo, alios provocando, mundi gloriam appetendo, proximos judicando, Dei creaturam contemnendo, meipsum bonum reputando

alios vilificando, de Dei operibus ac judiciis et ejus permissionibus murmurando, bonas ejus inspirationes et omnia beneficia negligendo, impetus vitiosos sectando, blasphemando, et nomen Dei in vanum proferendo, et linguam meam contra veritatem per mendaciones et simulationes, per duplicitates et adulationes, per juramenta et multa alia verba vitiosa laxando, otiose ac accidiose vivendo, de me nimis confidendo, de fide dubitando, de occultis Dei operibus rationem praesumptuose quaerendo, plus quam oportet sapere de Deo et de proximo et de saeculo scire cupiendo, gratiam Dei non humiliter affectando, bona Dei occulta temerarie propalando, non in veritate, sed in hypocrisi et falsitate coram Deo et hominibus ambulando, et multa alia per superbiam mentaliter et corporaliter exereendo.

*De tempore mortis.*

Postquam confessus es, die animae tuae, maxime quando te vides proximum morti. O anima mea, egressus tuus appropinquat, et prope est terminus tuae superbiae, et finis delectationis hujus mundi, et miserae carnis tuae, quam delectationibus corporalibus pertulisti plus ipsam amando quam Deum, plus sibi compatiendo quam tibi, plus laborando pro ipsa quam pro te, plus obediens ejus concupiscentiis quam divinis inspirationibus et consiliis, scilicet dum consensisti tibi satisfacere in delectationibus gulae et luxuriae multis diversis modis opere et voluntate, atque satiare ejus visum, auditum, gustum tactum et odoratum, quantum et qualiter potuisti consensisti amoris ipsius carnis amittere partem maximam tui temporis superflue dormiendo et acquiescendo in multis operationibus vitiosis ac occupando, in nimia cura et sollicitudine rerum temporalium et corporalium te exereendo plus propter avaritiam et delectationem, quam propter necessitatem. Consensisti ejus pigritiei quam habuit semper ad operandum bonum, et ejus sollicitudini quam habuit ad peragendum malum quod potuit: in his fuit vita mea, in his expendi tempus meum. Ubi ergo es, o vanitas mea et superbia mea: quo perrexistis delectationes carnis meae? quid mihi attulistis? quid mihi reliquistis pro subiectione et obedientia, qua vobis tot annis deservivi? Pro vobis commutavi vitam aeternam, amisi Deum et acquisivi infernum, perdidisti gaudia infinita et lueratus sum lamenta aeterna. Privatus sum societate Sanctorum et Angelorum, et merui fieri socius civium infernorum. Considera ergo, o anima mea, qualem te fecit Deus, quia ad imaginem et similitudinem suam, et modo sic es denigrata peccatis, nec aliquam virtutem in te agnoscis. Considera in te potius imaginem tentatoris tui, qui te depinxit colore superbiae, gulae, luxuriae, avaritiae, vanae gloriae, invidiae, accidiae et ingratitude et negligentiae, odii et vindictae. Tibi suasit contemptum Dei, et opposuit amorem saeculi: te induxit contra proximum ad murmurandum, judicandum, decipiendum, despiciendum, contemnendum, detrahendum et aliorum defectus ponderandum, et tua gravia vitia non videndum. Non video ergo, o anima mea, nisi ut provoceris ad gemitum, fletum, planetum, tristitiam et lamentum, et clamores humiliter et ferventer ad Dominum. « Domine, ne in furore tuo arguas me » etc. Miserere mei Deus secundum etc. »

*De cogitationibus inhonestis.*

Plerique dubitant, si cogitationes inhonestae sint exterius explicandae. Credo quod hoc facere sit puritatis et perfectionis et magni meriti, sed non credo esse necessitatis semper, nisi quando ex nimia mora facta in cogitatione illa homo sentiret se inclinari ad faciendum et perficiendum cogitatum, si opportunitatem haberet quam vellet, aut si pollueretur ex illa vehementi cogitatione morosa, aut si inordinate afficeretur ad aliquam personam, et de ipsa multo molestaretur in cogitatione habendo motus carnis, et imaginando habere aliquos actus impudicos cum ipsa persona: hunc enim affectum inordinatum debes exprimere cum cogitationibus et motibus carnis procedentibus, dicendo ex ipso affectu sic: Habui affectum sensualem et inordinatum ad quamdam mulierem vel quemdam juvenem talis conditionis, et hunc affectum concepi ex complacencia habita in aspectu et colloctione ac praesentia corporali ipsius de ipso vel de ipsa. Habui tot vicibus ac multoties imaginationes turpes, respiciendo cum oculis corporeis vel mentis faciem vel aliam partem corporis ejus, et imaginando cum ipsa persona habere amplexus et oscula, vel talem actum impudicum: et in his feci moram per magnum spatium habendo ibi motus carnis libidinosos. Et specialiter accidit mihi in oratione existendo, aut missam dicendo: et semper fui negligens ad laborandum pro posse ad expellendum talia propter nimiam delectationem quam habebam ibidem, nec curavi quantum potui refranare oculos ab aspectu illius personae, quando habui praesentiam ejus. Quicumque igitur tales et tali modo cogitationes et affectus exprimeret vitiosos, ab eis cito liberaretur, dummodo cum tali confessione continuaret orationem et eustodiam sensuum: quia daemon non potest sustinere humilitatem purae confessionis, cum sit superbus et immundus, et omnis humilitatis et immunditiae inimicus. Et ideo non est melior et facilius ad evadendum tentationes superbiae et luxuriae, et omnes cogitationes vitiosas cum suis circumstantiis concurrentibus in carne vel in mente, quod saepe et clare detegere confessori, et toties exprimere quoties renovantur.

*De motibus carnis.*

Sciendum est quod motus in carne qui non provenit ex cogitatione impudica absque voluntate et sine causa, scilicet visus vel auditus, sine aliqua causa extrinseca inhonesta, sine dubio provenit ex nimia repletionem prius facta in cibo et potu. Quidam tamen putant quod provenit ex nimia vigilia; quod potest esse, maxime quando constat eis quod non provenit eis ex aliqua causa praedieta. Et ideo oportet hominem esse parem in dieta quoad qualitatem et quantitatem, quando de talibus molestatur contra voluntatem et cum displicentia: nam intra corpus oritur causa, quia secundum Hieronymum; « venter et genitalia proxima sunt. » Et hoc intelligo, quando non a causa exteriori; et tunc oportet cavere ipsum ab aspectibus, colloctione, et ab approximatione personarum, in quarum praesentia sensit se sensualiter delectari; alioquin ille qui videtur motus naturalis, fieret vitiosus. Et quamvis sit securum confiteri tales motus procedentes sine causa vitiosa, quorum intemperantia videtur



causa; dum tamen per ipsos non turbetur amor et desiderium puritatis in corde, corporalis castitas non maculatur. Si vero procedunt a causa vitiosa, confitenda sunt, causae, locus et tempus, mora contracta in eis, et vices motuum, sicut supra de circumstantiis peccatorum dictum est: non enim sufficit generaliter dicere culpam de motibus; sed debes dicere sic: Dum essem in Ecclesia vel in oratione, vel dum audirem missam aut praedicationem, cogitavi talem actum turpem, aut habui memoriam alicujus personae, in cujus aspectu jam habui unam concupiscentiam, aut inordinatum amorem: aut aspexi in Ecclesia talem personam cum complacentia impudica, cujus causa habui motus carnis impudicos toties, et per tantam moram. Et si dixisti illi aliqua verba gratiosa prolixè, aut fecisti aliquod servitium malitiose, ut scilicet haberes complacentiam libidinosam et motus carnales per majorem moram, totum confiteri debes; maxime quia si verba non dixisses, aut servitium non fecisses sic prolixè, de istius praesentia delectationem non habuisses.

*De periculo familiaritatis dominarum,  
vel mulierum.*

Quoniam multi videntur negligere ut agnoscunt affectus suos vitiosos, et per consequens non curant confiteri, cum tamen diligenter sunt perscrutandae, et cum suis vitiis orientibus ex ipsis exprimendae; ideo praetermittere non intendo, quod multi nimis afficiuntur ad seipsos, quidam ad aliquas personas, quidam ad honores, quidam ad divitias temporales. Et quia haec sunt sicut murus inter Deum et animam, ideo nullus homo habens aliquid de praedictis, potest in via Dei proficere, nec habere puram orationem, et maxime quando est carnalis affectio ad personam: et de hac intendo loqui modo: nam talis affectio multos spirituales sub specie amicitiae spiritualis a statu orationis impedit et impedit. Haec est inquietudo mentis pestifera, orationem mentis et oris inficiens et dispergens, et affectus contrarios orationi in mente generat et exercet: nam sicut oratio pura mentem purificat et illuminat, laetificat, fortificat et impinguat; sic carnalis affectio et immunda mentem inficit et obscurat, contristat, debilitat et siccit, et corpus ejusdem maledictionibus implicatur. Et quoniam spiritualibus loquor, propter quos ista scribuntur; noverint ipsi, quod licet carnalis affectio sit omnibus periculosa et damnosa, eis tamen pernicioosa est magis, maxime quando conversantur cum persona quae spiritualis videtur: nam quamvis eorum principium videatur esse purum, frequens tamen familiaritas domesticum est periculum, delectabile detrimentum, et malum occultum bono colore depictum: quae quidem familiaritas quanto plus crescit, tanto plus infirmatur principale motivum, et utriusque puritas maculatur. Non tamen de hoc statim perpendunt, quia sagittarius a principio non mittit sagittas venenatas, sed solum aliquantulum vulnerantes, et amorem augmentantes. Ad tantum vero in brevi deveniunt, ut jam non velut Angelus sicut coeperant se invicem alloquantur et videant, sed tamquam carne vestitos se mutuo intueantur, et sentiant mentes quibusdam commendationibus ac verbis blanditoriis, quae videntur ex prima devotione procedere. Exinde unus incipit appetere alterius praesentiam corporalem, quia forma vel species cor-

poris in utriusque mente concepta incitat eos ad volendum praesentiam corporalem, qua insit eis praesentia mentalis; sicque spiritualis devotio paulatim convertitur in corporalem et carnalem, et sic ipsorum mentes quae solebant in oratione cum Deo absque intermedio loqui, nunc inter se et Deum alter ponit alterius corporalem effigiem, quam velant et obtenebrant ponentes sibi ipsis faciem Dei cum facie creaturae. Et non minus horrendum est, cum hi proprium errorem percipere et emendare deberent, in ipsius potius nutrimento erroris totum illud judicant ex maxima caritate procedere, cujus merito puto et sibi invicem mentientes, referunt quod in oratione unus alteri praesentatur magis eis delectabile, ac si pro se invicem orare cogantur gratia et virtute divina; ac per hoc consolationem simpliciter sensualem, quam habent in illarum praesentatione de se invicem facta in oratione praedicta, aestimant et affirmant ac asserunt esse spiritualem gratiam et divinam. Quales autem illusiones recipiunt a sagittario supradicto specialiter mulieres, quae citius fidem adhibent illusioni mentali, esset horribile et quasi impossibile declarare. Sentiant namque in oratione praefata et repraesentatione mentali calorem quemdam ignitum a sagittario illo illatum, quem credunt et dicunt esse ignem caritatis a Spiritu sancto transmissum, volentem conjungere spiritum unius spiritui alterius vinculo caritatis, cum inde sit ignis libidinosi amoris, prout sequentia manifestant: et tamen deliberant se tamquam spirituales unitos posse securius ac prolixius sinuul loqui, atque in hoc tempus non perdere, sed lucrari. Proinde modos insolitos et cautelas mirabiles adinvenunt, quibus procurant simul colloqui et frequenter, allegantes unus alteri causas utilitate ac necessitate depictas, cum tamen in veritate nihil aliud sit causa, nisi onus cui ratio jam succumbit. Sic itaque carnali concupiscentia, seu complacentia excaecati, tempus, quod olim consueverunt in oratione expendere ac spiritualiter occupare, nunc in hujusmodi familiaritatibus et colloquiis perdunt; et sic, quod dolendum est, allocutiones divinas pro carnalibus commutantes, a modo nisi mora serotina cogente, aut alia inevitabili causa, non possunt ab invicem discedere, et tunc invite et tristes discedunt. Haec autem tristitia est certissimum indicium, quod carnis vinculo sunt alligati; et per hoc visitationes et consolationes divinae a carnalibus et diabolicis discernuntur. Denique quamvis se multis exponant periculis, et multa mala incurrant, dum eorum obtenebratis conscientiis judicant tamquam spiritualibus sibi quaedam esse licita, quae fieri nequeunt absque periculo et peccato; putavi tamen melius esse non multa de hoc calamo exarare: haec tamen tacere non valeo, quin aliquantulum referam; maxime quia non longe a temporibus istis similia contigerunt. Tandem spirituales praedicti quandoque se deduci permittunt, ut se invicem familiariter tangant sub specie caritatis, reserantes sibi invicem immensum cordis amorem, quod impudenter caritatem appellant. Sed in hac reseratione amoris est summum periculum, quia ex hoc fabricantur sagittae, quae mentes eorum vulnerant mortaliter, ac venenant. Et quod super omnia videtur mihi horrendum, Deo, Angelis, hominibus ac daemonibus, fuerunt vel aliquae spirituales nomine spiritu luxuria imbutae, quae in exsultationem suae libidinis praesumpserunt dicere



se habuisse in illis actibus impudicis magna sentimenta de Deo: quod nihil aliud iudico esse, nisi quoddam incitamentum inductivum ad similia securius intrandum, et pejora perpetrandum. Dic mihi qui talibus credis et adhaeres: Si isti sunt vere spirituales ut asseris, quid aliud loqui aut facere deberent, nisi quod a Spiritu sancto procedere potest, vel procedit? Ab illo autem nihil procedit noxium, sed solum quod utile et honestum. Quid enim ad Spiritum sanctum de tactibus et osculis, aut qualem honorem inde consequitur Deus, et quae utilitas aut quae necessitas tibi ad salutem vel alteri, ut hos tactus facias vel patiaris? Quae conventio spiritus ad libidinem carnis? Quae igitur tua praesumptio, ut hanc contumeliam inferas Spiritui sancto, scilicet attribuendo sibi tuae impudicitiae factorem, quem vix daemones patiuntur? Quae, inquam, temeritas tua, mulier hypocrita a facie Dei projecta, ut dicas delectationem carnis libidinosam esse gratiam et consolationem divinam? Recede ergo, fera pessima, de finibus meis, quia daemones nequeunt tuam praesentiam sustinere. Haec itaque, fratres carissimi, non incongrue huic operi sunt inserta, ut sciat unusquisque quod haec venenosa affectio sub colore spiritus acquisita, summe impedit puritatem confessionis et cordis munditiam, ut sic hanc fugiat tamquam vitiosam rubiginem, quae vix potest aboleri de mente, si alicui fuerit applicata; praecipue quia tales personae quamdiu sunt hac sagitta percussae, quasi nunquam pure et integre confitentur, eo quod ipsum morbum despectabilem in persona spirituali verecundantur toties detegere plene et integre confessori, quia verentur exprimere aliquas circumstantias tali affectioni annexas, quas vel tacent vel exprimunt imperfecte, utentes verbis operientibus dictum morbum, sic occupationem mentis quasi continuam circa personam dilectam et in oratione et in cunctis actibus suis, et imaginationes turpes de ipsa vana complacentia cordis in memoria et aspectu mentali ipsius, et negligentia in evitando ejus praesentiam, et colloquuntur quae ipsi experiuntur. Propterea saepe mutant confessorem, aut vellent mutare si possent, sic quod tristes sunt et accidosi frequenter tam ratione affectionis fluctuantis in mente, quam ratione confessionis imperfectae, de qua ipsimet contristantur. Sed quod pejus est, cum ipsi deberent quaerere medicos spirituales cautos et peritos ac expertos, qui scirent illam aegritudinem et causas ejus agnoscere et congruum remedium adhibere; non solum non faciunt; sed potius si semel ad aliquem talem pervenerint, ipsum ex tunc fugiunt, nec revertuntur ad ipsum. Quaerunt ergo confessores idiotas et simplices, qui nec morbum intelligunt, nec causas ejus agnoscunt, nec ideo sciunt congruam adhibere medicinam. Tantum de hac materia dixisse sufficiat, ut per hoc animentur per viam puram et immaculatam incedere, et fugere periculosam pestem familiaritatem mulierum spiritualium, quae non melius quam fugiendo vitatur. Satis enim posset quis hac sagitta percussus se jejuniis, vigiliis ac disciplinis affligere et orare, quia si non fugiat personam, et omnem occasionem despiciat, nunquam curabitur ab illo morbo, sed magis augebitur illud vulnus. Propter quod sequamur auxilium sive consilium B. Hieronymi dicentis: « Feminam quam vides bene con-

« tia: quia initium libidinis in visitatione mulierum  
 « est, et mundus cum mulieribus non melius quam  
 « fugiendo vincitur; quia cum ceteris vitiis et mor-  
 « bis quis posset resistere, huic tamen non potest  
 « nisi per fugam. » Et alibi: « Si mulier potuit  
 « vincere eum qui jam erat in paradiso, non est  
 « mirum si eos impediat qui nondum ad paradi-  
 « sum pervenerunt. » Et idem: « Solus cum sola  
 « non sedeas in secreto absque arbitro et teste. »  
 Et iterum. « Ne sub eodem tecto cum muliere  
 « manseris: nec in praeterita castitate confidas; quia  
 « nec tu Samsone fortior, nec Salomone sapientior.  
 « Si forte dicas, jam corpus mortuum est, dicam  
 « tibi quoniam diabolus vivit, cujus flatus prunas  
 « extinguit ardere facit. » Item idem dicit: « Om-  
 « nes virgines Christi et puellas aut aequaliter di-  
 « lige, aut aequaliter ignora. » Item B. Augustinus dicit: « Sermo brevis et rigidus cum mulieri-  
 « bus est habendus. Nec tamen quia sanctiores  
 « fuerint, ideo minus cavendae. Quo enim sanctiores  
 « fuerint, eo magis alliciunt, et sub praetextu blandi  
 « sermonis immiscet se viscus impiissimae libidinis.  
 « Crede mihi, Episcopus sum, Episcopo loquor, non  
 « mentior. Cedros Libani, idest contemplationis al-  
 « tissimae homines, et gregum arietes, idest magnos  
 « Praelatos Ecclesiae sub hac specie corruisse reperi,  
 « de quorum casu non magis praesumebam, quam  
 « Hieronymi et Ambrosii. » Sicut etiam ait Bernardus: « Quotidie conversaris cum muliere, et con-  
 « tinens vis putari? Esto quod sis, maculam tamen  
 « suspicionis portas, scandalum mihi es. Tolle ma-  
 « teriam et causam scandali: quia vae homini illi  
 « per quem scandalum venit. »

*De verbis otiosis.*

Sciendum quod verba vitiosa et gravia distincte sunt confitenda secundum differentias suas, et cum circumstantiis et occasionibus eorundem. De murmuratione quae fit quando narratur defectus personae absentis si confiteri habes, dic utrum vere vel false, et propter quam causam, scilicet propter odium vel vindictam; si induxisti vel inducere cogitasti aliquem ad hoc, vel despexisti ex hoc, si alicui ex hoc nocuisti, vel alicui audienti generasti taedium de illo de quo dixisti, vel aliquid male accidit, aut velle accidere desiderasti. Non ergo sufficit dicere, Multoties murmuravi, et de multis, nisi ista explices. Non tamen dicas defectum de quo murmurasti si est verum, nec nomen personae; sed dicatur qualitas personae aggravans peccatum, sicut si de patre tuo, de sancto viro, de praelato, et propter quam causam. Et si defectus est falsus, confiteri debes defectum et personam cui falsum imposuisti. Et debes revocare coram illis coram quibus propalasti, maxime si defectus illi esset gravis. Sunt tamen quidam, ut minus displiceant confessori, exprimunt personam cui fecerunt injurias, vel de qua murmuraverunt, quando ipsa persona reputatur mala quasi ab omnibus, vel quasi omnibus odiosa, ut per hoc iudicentur minus peccasse. Sed hoc est vitiose dictum; quia debent in cordibus suis reputare et per confessionem ostendere se ipsos esse peiores quam illa persona, quam in sui excusationem nominare praesumunt. Quidam adhuc pejus faciunt; qui ut placeant confessori, personam exprimunt de qua murmuraverunt, aut offenderunt, auferendo rem, aut impediendo ejus bonum; quia

sciunt illam personam displicibilem confessori. Isti gravius peccant sic confitendo, quam sit peccati confessio, quia contra caritatem proximi dupliciter peccant, quia faciunt confessorem de peccato gaudere quod confitentur, et de injuria quam alteri inferunt: et sequitur quod non dolcant de peccato quod confitentur, sed potius gaudeant, putantes per hoc captare benevolentiam confessoris quae gravior quam detractio est: quoniam detractio est quoddam homicidium spirituale occultum: sicut quando aliquis audit aliquem laudari de aliqua virtute et fiducia, conatur auferre de corde laudantis aut cujuslibet audientis, illam bonam opinionem quae habetur de illo, negando illud, et potius defectum istius declarando, aut hypoeritam appellando: quia dicit quod quicquid facit pro humana laude facit. Hoc autem vitium facit propter invidiam aut vanam gloriam: nam detractor quaerit laudari super alios, et potissime super illum cui detrahit, aut timet minus reputari quam ille qui laudatur. Et inde oritur grave peccatum, quia affectant mortem aut expulsionem aut tribulationem aut casum illius de cujus laude tristantur. Et statim sunt dispositi ad audiendum hoc de ipso cum gaudio: quod vitium nonnullos spirituales pulsat, qui nondum paraetum receperunt. Quidam autem ore non murmurant, nec detrahunt aliis, ne et ipsi despiciantur aut murmuratur de ipsis: appetunt tamen illud ab aliis fieri. Et omnia talia cum motivis et causis sunt confitenda integre.

#### *De mendacio.*

De duplicitate quae dicitur mendacium, quaedam est quando lingua et intentio non concordant, quia facit intelligi et eredi quod non est. Tales duplicitates sunt quandoque proditoriae, sicut fuerunt in Juda, quando dixit: Ave Rabbi. Isti mel in ore gerunt, et retro pungere quaerunt, sicut fecit Judas: nam post osculum fecit capi Christum.

#### *De simulatione.*

De simulatione quae est in verbis, signis, et operibus exterioribus, ejus contrarium est in mente. Hoc est proprium hypoeritae. Est autem simulatio falsitas veritate depicta, vel vitium verbis et actibus virtuosus opertum. Simulatio in verbis est, quando dicis te insipientem et vitiosum, ut per hoc humilis reputeris, et cum hoc praecogitas ut sic non credatur nec reputeris, quia appetis virtuosus et sufficiens reputari, et e contrario turbaris si talis reputeris. Est ergo humilitas in verbis, superbia in mente. Simulatio in opere est, quando fit actus virtuosus, ut acquiratur fama solum. Simulatio in signo est, quando praetenditur honestas in sensibus, sed cor est plenum inhonestate; nec trahitur quis ab opere, nisi quia caret opportunitate quam vellet. Sic quidam religiosi de die quando videntur, ut putentur sancti et honesti, sensus suos valde componunt, et maxime in officio et in choro inclinationes profundas et similia faciendo; sed de nocte nulla signa devotionis ostendunt, dum non sentiunt se videri. Sic quidam se macerant abstinendo, ut religiosi appareant et judicentur. Aliqui exterius apparent patientes subridendo, qui tamen pleni ira et tristitia dolent de injuria eis facta. Et sic omnis hypoerita est simulator, duplex et falsus, et per

consequens proditor et inimicus veritatis. Et ideo quia huic vitio multa sunt adnexa alia, cum diligenti examinatione debent in confessione evomere virus suum. Mendacia sunt secundum suas species confitenda. Quaedam sunt aliis noxia, et haec graviora non noxiis: quaedam deliberate prolata, graviora illis quae proferuntur a casu: quaedam jocosa ad gaudium provocantia: quae tamen a viris perfectis sunt arcenda. Qui vero dicunt mendacia per quamdam inadvertentiam, sicut narrantes historias, aut multum aut prolixè loquentes, debent confiteri quae noscunt falsa. Qui vero in praedicationibus narrant miracula non vera, aut historias derisivas seu fabulas, aut textum sanctae Scripturae trahunt indebite, ut coaptent verba, male faciunt et confiteri debent, quia tot veritates sunt in sacra Scriptura, quae possunt dici, quoniam mendacio non eget Deus. Adulator verba blanditoria ad complacendum proferens, vel ut commendetur, vel ut benevolus fiat, vel ut servitium recipiat, sunt confitenda tamquam mendacia, exprimendo intentionem quam habuerunt in praedictis, et potissime qui adulantur gestibus corporis et actibus manuum et oculorum, ut ostendant affectionem et compassionem ad aliquem; quia tales omnes mendaces et falsi.

#### *Eruditio utilis ad omnia ista supradicta.*

Ut autem scias melius confiteri, studeas semel in die examinare quomodo tempus expendisti, et discurrere per singulas horas cogitando in quibus fuisti aut quibus personis; quid cogitasti, quid dixisti, quid audivisti, quid fecisti, ut cognoscas relaxationes linguae, cordis et sensuum in quibus et quoties offendisti, aut dedisti aliis materiam offendendi, et sic ordina in mente tua, sicut ea fueris memor commisisse, quia memor explicabis omnia quorum fueris memor, et illa pluries pertracta et ordinate repete in mente tua, nec te pigeat in tali examinatione exercere, quia pax et laetitia mentis, quam inde consequeris, excedit omne mundanum gaudium. Quod si absque difficultate magna et cum multa tranquillitate animi istum modum volueris observare, stude in paucis delinquere, ut pauca possis recolere et confiteri. Confessorem eligas compassivum, probatum in tentationibus, et in via continentiae se exercitantem, cui saepe confitearis, et aperias omnes defectus clare et lucide, et stimulos quibus molestaris. Sit ille caritativus et humilis, discretus et intelligens, sic quod possis ad ipsum confidenter recurrere, et sciat tibi remedium adhibere. Aliter autem si caecus caeco ducatum praestet, ambo in foveam cadunt. Ad ista melius obtinenda, necessaria est tibi solitudo, quae est via primaria ad cordis munditiam, et tutela ad custodiam. Unde si es religiosus, si pacem quaeris, hinc minus egredieris. Versus:

Cella quasi caelum tibi sit, qua caelica cernas.  
Hic legas, hic ores, mediteris, crimina plangas:  
Pax est in cella, foris autem plurima bella.

Si autem es saecularis, fuge consortia quantum potes, nisi pro evidenti utilitate aut necessitate. Expedi etiam ut portes in corde propositum tibi cavendi pro posse ab omni offensa Dei et proximi; et debes armare te cum oratione dicendo, Deus in adjutorium meum intende, quia sine auxilio Dei impossibile est te a quocumque peccato liberari. Et

quamvis Deus permittat, quantumcumque ipsum rogaveris in oratione, ne in aliqua peccata incidas, non tamen propter hoc desistas a bono proposito bene operandi; quia hoc Deus permittit, ut cognoscas te infirmum, et continue divino auxilio indigere, nihilque boni per te ipsum posse perficere, quantumcumque cupias et proponas. Propter quod oportet semper orare, et non deficere. Ille autem semper orat, qui non cessat bene facere et mala vitare desiderat. Si autem ab incepto bono desisteres eo quod in oratione non exaudireris, tunc est signum, quod spiritualis aedificii, quod est conscientiae puritas, cares principio, cui est adnexa cognitio propriae utilitatis, ad quod consequitur virtus humilitatis quae mentem in bono confirmat, et facit hominem contentari de omnibus judiciis et permissionibus divinis, circa omnes creaturas et se. Dum enim in veritate te ipsum agnoscis, omnibus compateris, nullum odis, nulli inimicaris, plus gaudes de passionibus et poenis corporalibus quam de consolationibus carnalibus, quia te vides ista meruisse, esse utilia, haec autem periculosa. Si ergo omnia praeter peccatum diligis, nihil praeter peccatum timeas, nihil te praeter Deum afficiat, nihil te nisi culpa contristet. Et quoniam cognitio et accusatio suiipsius quae acquiritur per mentis munditiam, in solitudine et mentali oratione acquiritur, necesse est, ut quisquis ad hanc puritatem pervenire affectat, solitudinem velut matrem omnis munditiae amplectatur, et ibi in lectione et sui cordis serutatione, sic se quotidie exerceat, quod omni otiositate vitata, omnique humana verecundia postposita et despecta, ad puram et integram et plenam confessionem, nunc se praeparet et disponat.

#### *Modus cognoscendi seipsum.*

Postremo qui vult ad sui perfectam cognitionem cito et faciliter venire, ac perfecte pacem conscientiae possidere, primo cor suum spoliat omni amore et affectione sensuali a quacumque persona et re temporali, sic quod intra Deum et cor suum nullum sit medium impediens, et nihil diligat extra Deum; et tunc talis affectio non erit medium impediens, sed adjuvans et coaptans. Secundo exuat cor suum ab amore inordinato ad seipsum, videlicet quod non sit fur et latro honoris et laudis, appetendo aliquid de his quae debentur soli Deo simpliciter: nihil etiam terrenum appetat, nisi pro Dei servitio, et utilitate animae suae vel proximi; abneget propriam voluntatem, cupiat alienum velle potius quam suum perficere, nec a voluntate Dei ac ejus permissione animus suus discordet, Tertio ad suae conscientiae stimulum frequenter se exerceat, memorando praeterita delicta, se ipsum arguendo de negligentia, concupiscentia et nequitia. De negligentia quidem se arguat, si cor suum non bene custodivit, si tempus suum inutiliter expendit, si opera sua in finem debitum non reduxit. Adhuc si fuit negligens in oratione et in lectione et boni operis executione; quorum unum non sufficit sine altero. Adhuc si fuit negligens ad agendum poenitentiam de commissis, ad resistendum temptationibus a Deo permissis, ad proficiendum in bonis sibi ostensis. De concupiscentia autem se reprehendat, cogitando si in se vivit aut vixit concupiscentia et voluptas, appetendo dulcia et mollia, et cibaria sapida, vestimenta delitiosa, et oblectamenta luxu-

riosa, cum omnia in primo motu sint fugienda. Item si vivit in se vel vixit concupiscentia curiositatis, appetendo scire occulta Dei aut creaturarum, videre pulchra, habere pretiosa, et similia, quae omnia procedunt ex avaritia. Item si in se vivit aut vixit concupiscentia vanitatis, appetendo humanum favorem, vel honorem, laudem, propriam gloriam. Haec omnia quae faciunt hominem vanum sunt fugienda a quocumque, et maxime religioso, qui debet ambulare in veritate coram Deo et hominibus in cunctis bonis operibus suis, et ordinare cor, verba et opera in laudem Dei, et aedificationem proximi, et utilitatem sui, nihil extra Deum ullatenus appetendo. De nequitia vero se arguat, cogitando si in se vivit aut vixit iracundia in verbo, in animo, vel in exteriori signo; et si aliquem ad iracundiam provocavit. Hoc autem vitium non potest corrigi, nisi per spiritum veritatis: ut scilicet homo consideret quid meruit per peccatum mortale, ac per hoc bonitatem Dei attendat et patientiam, quae ipsum sustinuit usque nunc, nec adhuc eum damnare vult, cum juste possit ac poterit quoties mortaliter deliquit. Cum ergo veritas ingreditur animam et ibi permanet, omne cor impatiens et furiosum efficitur humile et mansuetum, et omne cor durum, et ipsum efficitur pium et compassivum. Haec autem virtus ingreditur solummodo in cor mundatum. Item cogitet si in se vivit, aut vixit nequitia invidiae, quae de bono alterius contristatur, et de malo jucundatur; quod vitium directe contradicit Spiritui sancto: et ideo ex invidia oritur peccatum in Spiritum sanctum, quod dicitur invidentia: contra quod scriptum est in Matth: « An oculus tuus nequam est, quia ego bonus sum? » et ideo peccatum hoc non remittitur in hoc saeculo neque in futuro. Item cogitet si in eo est vel fuit nequitia accidiae quae consurgit ex taedio boni, aut ex otiositate nimia, aut ex timore, vel dolore alicujus mali. Et ex hoc oriuntur pessimae suspiciones, malignae cogitationes, blasphemiae, diffidentia de Deo, et finalis desperatio. Ad hanc saepissime veniunt insolentiae dediti, et qui se negligunt in bonis exercere, et tempus suum utiliter expendere: necnon qui nimis est vitiosus, ambitiosus appetendo excessive honorem: talis qui appetit supra meritum suae sufficientiae, nunquam habet quod appetit: sed pejus est quod justo Dei iudicio, tanto magis ad ima trahuntur, quanto magis seipsos elevaverunt et procuraverunt per alios trahi sursum. Qui ergo hoc vitium vitare desiderat, studeat otium evitare, ac mentis et corporis superare pigritiam, eorumque occasiones praescindere, quae sunt amor quietis, et immoderantia vietus. Propter has duas causas et peccata pessima perpetrata sunt. Ex his occasionaliter venit ira Dei super Sodomam et Gomorrhham. Ideo sancti Patres fugientes de hoc saeculo ad desertum, contra illud vitium accidiae, quae inficit et dissipat omne bonum, statim armis temperantiae et occupationis et continentiae, ne otiositatem radicem omnis mali incurrerent, se principaliter muniebant.

#### *Peccatorum origo.*

Omnium vitiorum capitalium unum est initium, scilicet ingratitude. Duplex enim radix est: scilicet timor male humilians, et amor male inflammans. Triplex fomentum est; scilicet concupiscentia ear-



nis et oculorum, superbia vitae. Septiforme caput est superbia, ira, invidia, accidia, avaritia, gula, luxuria. Inter quae sunt quinque peccata spiritualia et duo carnalia, cum tamen peccatum mortale non sit aliud quam recessus a Deo per ipsius contemptum in se vel in suo praecepto. Contemptus autem Dei fit superbia: igitur necesse est, ut omnis peccati mortalis culpa sumat initium a superbia. Quia vero nullus contemnit Deum vel suum praeceptum nisi quia aliquid ab ipso timet perdere aut vellet acquirere; ideo oportet quod omne peccatum actuale trahat originem ab hac duplici radice aut amoris aut timoris. Omnis autem timor habet ortum ab amore: quia nullus timet perdere nisi quod amat; et ideo amor et timor ab eodem foveantur. Et quia amor inordinatus est respectu boni temporalis, et illud est interius excellentia, et exterius pecunia, inferius carnis lascivia; ideo tria sunt fomenta peccatorum et vitiorum actualium, et radicalia; ad quae dum anima inordinate fertur, omnia peccata actualia ordinantur. Et quia hoc fit secundum septiformem modum: ideo sunt septem peccata capitalia, ex quibus generatur universitas peccatorum.

*Peccata in Spiritum sanctum.*

Quamvis omne peccatum sit contra Deum trinum et unum, appropriatur tamen Deo aliquod peccatum esse in Patrem, aliquod in Filium, aliquod in Spiritum sanctum. Peccatum autem in Spiritum sanctum est irremissibile in hoc saeculo et in futuro: non quia in hoc saeculo non possit dimitti; sed quia non dimittitur nisi raro aut vix in hoc saeculo quantum ad culpam, et modicum in futuro quantum ad poenam. Hujus autem peccati sex sunt differentiae: invidia fraternae gratiae, impugnationis veritatis agnitae, desperatio, praesumptio, obstinatio, et finalis impenitentia. Primum est contra caritatem Dei, in quantum dolet quod Dominus Deus est bonus, qui ex bonitate sua dat gratiam: et est contra caritatem proximi. Secundum est contra veritatem fidei, quae est fundamentum nostrae salutis. Tertium est contra misericordiam Dei, quia credit se plus peccasse, quam Deus possit parcere. Quartum est contra justitiam Dei, quia tantum praesumit de misericordia Dei, quod credit se non debere puniri de peccatis, ac per hoc se relaxat ad peccandum, et poenitere non curat. Quintum est contra gratiam poenitentialem quae facit resilire a peccatis commissis. Sextum est contra gratiam poenitentialem quae facit praecavere a committendis, secundum quod ipsa finalis impenitentia dicitur propositum non poenitendi: sic enim est species peccati in Spiritum sanctum: secundum autem quod finalis impenitentia dicit continuationem peccati usque in finem, sic est sequela omnium mortalium peccatorum quae in hac vita non remittuntur, et maxime omnium specierum peccati in Spiritum sanctum. Et sic omne peccatum initium sumit a superbia, et finem habet a finali impenitentia: in quam qui devenit, ponitur in gehennam, a qua finali impenitentia nullus peccans mortaliter potest liberari, nisi interveniat gratia mediatoris Christi.

*Peccati descriptio.*

Cum omne peccatum dicat recessum voluntatis a suo primo principio, in quantum ipsa voluntas nata est agi ab ipso, et secundum ipsum, et propter ipsum; ideo omne peccatum est inordinatio mentis sive voluntatis, circa quam natae sunt esse virtutes et vitia. Peccatum igitur actuale est actualis inordinatio voluntatis. Vel secundum Augustinum: « Peccatum actuale est dictum vel factum vel concupitum contra legem Dei. » Inordinatio autem ista, aut est tanta quod ordinem exterminat justitiae; et sic dicitur peccatum mortale, quod natum est auferre vitam ab anima ipsam separando a Deo, per quem vivificatur anima justae: aut est tam modica quod ordinem istum non perimit, sed aliquantulum perturbat, et sic dicitur veniale peccatum, quia de ipso cito possumus veniam obtinere pro eo quod ipsum non tollit gratiam, nec per ipsum incurritur inimicitia Dei. Ordo autem justitiae est, ut bonum aeternum praefertur bono temporali, et bonum honestum praefertur utili, et Dei voluntas praefertur voluntati propriae, et iudicium rationis praesit sensualitati humanae. Et quia lex Dei praecipit hoc et vetat oppositum: ideo quando aeterno temporale, honesto utile, sensualitas rationi et voluntas propria praefertur Dei voluntati, committitur peccatum mortale, de quo dicit Ambrosius, quod « est praeveritatio legis Dei et caelestium « inobedientia mandatorum. » Haec autem committitur, quando omittitur quod lex praecipit, sive fit quod lex vetat. Ex quo oritur duplex genus peccati; scilicet delictum et omissum. Quando vero bonum temporale plus debito modo diligitur, sed non praefertur aeterno, et honesto praefertur utile, et voluntas naturalis plus debito amatur, sic tamen quod non praefertur divinae, et caro concupiscit, non tamen praefertur iudicio rectae rationis, tunc est peccatum tantum veniale: quia licet hoc sit praeter legem divinam, non tamen est directe contra eam. Sensualis autem appetitus non praefertur rectae rationi, nisi quando ratio ei consentit; et ideo peccatum mortale non committitur sine consensu. Si autem sensualitas inordinate moveatur, cum ista inordinatio ad malum declinet, et hic ratio non consentiat ad aliquod peccatum, quia aliquo modo laedit ordinem justitiae, et quia in statu innocentiae non movebatur sensualitas nisi secundum motum rationis; ideo stante hoc non poterat ibi esse veniale peccatum. Nunc autem quia rationi repugnat sensualitas velimus nolimus, ideo necesse habemus committere veniale peccatum aliquod per primos motus. Et licet quaedam particulariter ac singillatim possint devitari, omnia tamen nullo modo possunt caveri; quia sicut peccata sunt, ita et poenae peccati originalis et actualis: et ideo merito dicuntur venialia, quia haec ipsa digna sunt venia. Verum quia ratio his consentire non compellitur; si post consensum delectationis consentiatur in opus, tunc est plenus consensus ac per hoc est peccati consummatio, quae provenit usque ad supremam portionem rationis, ex qua pendet plenitudo consensus. Quia vero non solum consensu in opus, verum etiam in delectationem consensus est, in quo inferior pars sequitur sensualitatem; ideo si in delectationem sensualem ratio sensualitati consentiat et succumbat, propterea fit subversio ordinis recti, et sic fit subversio justitiae propter



quod committitur peccatum mortale, quavis minus grave, quia non solum imputatur inferiori parti rationis, sed etiam superiori, quae debuit compe-  
scere et cohibere inferiorem ne consentiat.

*Confessio, seu humiliatio sui ipsius.*

Eecce descripsi cor mundum et conscientiam puram. Vir ergo immundus et maculatus multum me sciens ostendere, et meipsum nesciens, alienos defectus dijudicans, et meos non inspiciens, vitia et occasiones vitiorum vobis aperiens, et ipsa vitia in meipso corrigere negligens, festucam in oculo alieno prospiciens, et in meo trabem non considerans, alienae vitae dux esse praesumens, et moderamina vitae propriae non tenens, omnium mores discutens, et meos non deserens, erga meipsum caccus permanens, et circa alios oculatus existens: fraterna tamen caritate coactus: quia omnium fratrum animas sincere amplector, eo maxime quo eos sentio perfectam cordis affectare munditiam mundumque cor sollicite ac studiose perquirere, quo ipsam attingere valeatis, ut supra scriptum est, vestra caritativa dilectio humiliter et benigne suscipiat ubique, et sicut in speculo et exemplo verissimo viam et januam per quam ingreditur

anima in atrium domus Domini, quod est conscientiae puritas, diligentissime speculetur, firmiter attendens, quod ad dictum atrium nullus unquam in hac vita pervenit, nisi modo praedicto seipsum agnoscere studeat secundum notitiam sibi datam a Domino, suamque conscientiam mundam et immaculatam servare, et per confessionem puram, veram et integram superius memoratam. Ipse namque modus confitendi super humilitate perfecte fundatur procedens ex filiali Dei timore, qui non patitur in corde habitare peccatum, nec circumstantias peccati, quibus putet Deum offensum: dummodo statim evomat per confessionem secundum sui possibilitatem et notitiam habitam de offensa. Et huiusmodi sollicitudo servandi cor mundum et conscientiam puram, est signum congruum et evidens, quod quis inter Dei electos filios computetur. Unde talis anima secure potest dicere, Domine, dilexi decorem domus tuae, idest, munditiam animae meae, et locum habitationis gloriae tuae, idest puritatem conscientiae: et ratio, quia in voluntate tua praestitisti decori puritatis meae virtutem, et in justitia apparebo purus et mundus in conspectu tuo, et satiabor cum apparuerit gloria tua, ad quam nos perducet ipse Deus qui vivit et regnat etc.

# OPUSCULUM LVIII.

## DE OFFICIO SACERDOTIS

(EDIT. ROM. LXV.)

### *Prologus.*

Quia Sacerdotis officium circa tria principaliter versatur: videlicet circa divinatorum officiorum celebrationem, ecclesiasticorum Sacramentorum collationem, et populi instructionem; de his omnibus aliqua per ordinem sub brevitate ad laudem et gloriam Dei et Salvatoris Domini nostri Jesu Christi et communem utilitatem et maxime simplicium sacerdotum eruditionem, prout occurret nobis ex inspiratione Domini, et de Sanctis et sanctorum Patrum et sanctorum constitutionum regulis melius et subtilius describemus.

### *De horis canonicis.*

Divina quidem officia in septem horas canonicas distinguuntur; scilicet Matutinum, Primam, Tertiam, Sextam, Nonam, Vesperas et Completorium. Has septem horas debet sacerdos quilibet die Domino reddere horis competentibus, ut 91 distinct.: « Presbyter mane », et extra. de celeb. Miss.: « Presbyter » nisi esset infirmus, in quo casu excusatur. 91 dist.: « Clericus victum. » Ex quo patet, quod non debet miscere horas sub una oratione, sicut quidam faciunt et male; sed singulas horas dicat et distincte. Si vero justo impedimento detentus, horis competentibus non possit reddere, reddat postea quando poterit, arg. de do. et contu.: « Cum dilecti. » Debet autem ipsas reddere in Ecclesia si potest, juxta illud, « In Ecclesiis benedicite Deum: » aliter reddat ubique et honeste, quando commode poterit. Ad has septem horas tenetur sacerdos et alii clerici constituti in sacris ordinibus, sive habeant beneficium sive non, et omnes illi qui percipiunt ecclesiastica stipendia in quocumque ordine sint; arg. extra. de pos. cap. 1, et ad Hebr. 2. Sunt autem ecclesiastici redditus deputati, ut ex eis sustententur qui in Ecclesia reddunt Domino divina officia, ut extra. de cleric. resid. in Eccles. vel prael. cap.: « Cum ad hoc », et de vit. et honest. cleric. cap.: « Cum ab omni. » In modo vero et ordine officii, quaelibet Ecclesia se conformare debet Ecclesiae matri, id est Metropoli, ut de Cons., dist. 2: « Instit. », et 22 dist.: « De his. » Diebus tamen dominicis, 18 Psalmos et 9 Lectiones, et 9 Psalmos dicimus; aliis diebus minus solemnibus

et profestis, 12 Psalmos et tres Lectiones. In septimana vero Paschali et in septimana Pentecostes 5 Psalmos et 5 Lectiones dicimus. Illi vero qui in aliis diebus tantummodo 5 Psalmos et 5 Lectiones celebrare volunt, non ex regula sanctorum Patrum, sed ex fastidio et negligentia probantur hoc facere, et de Cons., dist. 5: « In die Resurrectionis ». Nec debet praetermittere officium mortuorum, quando dies sollemnis non impedit, ut extra. de celeb. Miss.: « Quidam, » cap. « Cum creatura. » Missas quidem nullus celebret nisi jejunos, et semel in die, excepto die Natalis Domini, in quo tres Missae celebrantur, ut de Cons., dist. 1: « Nocte nativitatis sanctae. » Si vero necessitas immineat, puta quia oportet sacerdotem celebrare pro defuncto, vel pro sponsalibus, vel scrutinio, et pro die: tunc potest bis celebrare, ut de Cons., dist. 1: « Sufficit, » et extr. de celeb. Miss.: « Consuluisti ». Debet autem vino Sacerdos perfundere digitos postquam accepit totum Eucharistiae Sacramentum, et illud sumere, nisi eodem die aliam Missam debuerit celebrare; quia si vini perfusionem eodem die perciperet, non posset postea celebrare, utpote non jejunos, ut extra. de celeb. Miss.: « Ex parte vestra. » Debet autem sacerdos ponere in sacrificio Missae panem azymum infermentatum, scilicet hostiam de puro frumento, non de alio blado, et vinum aqua mistum, ut de Consecr., distinct. 2: « In Sacramento »: et debet plus ponere de vino, et longe minus de aqua, ut extra. de celeb. Miss.: « Perniciosus ». Et quoties celebrat sacerdos, toties sanguinem et corpus Domini accipiat, ut de Cons., dist. 1: « Relatum. » Paret autem sacerdos calicem perse, vel paretur ipso praesente, vel faciat parari coram se, non committat ulli scholari suo tantum, ne omittat vinum vel aquam ex oblivione, sicut jam plures stulti fecerunt. Si vero non habeat vinum, potest uvas maturas in calice comprimere, et illud expressum aqua mistum conficere, ut de Consecr., dist. 2: « Cum omne crimen. » Missam tamen celebret in jejunio in hora nona; alias, Missas celebret in mane ab aurora usque ad tertiam, ut de Cons., dist. 1: « Jejunos, » et cap. « Solent ». Celebrat autem in Ecclesia, et non in aliis locis, ut de Cons., dist. 1: « Sicut non alii. » Si vero cogat necessitas, puta quia est in itinere, potest celebrare sub divo. Ita tamen, quod habeat supra altare, tabulam per Episcopum consecratam, ut de

Consec., dist. 2: « Concedimus. » Debet autem illa tabula esse lapidea, non lignea, ut de Cons., dist. 1: « Altaria. » Calix vero in quo conficitur, debet esse aureus, argentus vel stanneus, ut de Consecr., dist. 1: « Calix. » Corporale vero debet esse album, nullo colore tinctum, ut de Cons., dist. 1: « Consulto. » Debent etiam omnia ista, scilicet calix, vestes et utensilia altaris in quibus sacrificatur, consacerari, et per Episcopum benedici, ut de Consecr., dist. 1, cap. 1, ut extra. de sacra unctione: « Cum venissent. » Quae postquam fuerint niuia vetustate consumpta, comburantur et cineres in loco mundo jaentur, ut pedibus transeuntium non coinquentur, ut Cons., dist. 1: « Altaris » « palla. » Habeat autem sacerdos crucem ad altare cum celebrat, quia in illo mysterio passio Christi repraesentatur in memoriam dominicae passionis, sicut in reverentiam passionis Christi facimus festum de sancta Cruce, ut de Cons., dist. 3: « Crucis Domini », et cap. « Sextam ». Debet autem Sacerdos verba canonis Missae ab illo loco « qui » « pridie quam pateretur », usque in finem consecrationis, cum summa diligentia et sollicitudine proferre, ut non erret in eis, et non omittat aliquid ibi, nec reiteret; quia cetera quae praecedunt et quae sequuntur, sunt de solemnitate Missae, sed illa sunt de substantia Missae, utpote in quibus fit consecratio corporis et sanguinis Christi: illis omissis non fieret consecratio, ut de Cons., dist. 2: « Panis in altari est. » Debet autem sacerdos perficere totam formam verborum illorum in consecratione panis, scilicet usque hic, « Hoc enim est » « corpus meum: » et tunc, scilicet, quia jam facta est consecratio corporis Christi et ipse Dominus noster Jesus Christus est in altari inter manus sacerdotis, cum Angelis sanctis, ut de Consecr., distinct. 2: « Quid sit sanguis »: Sacerdos se reverenter inclinet adorans verum corpus Christi. Et postea elevet in altum spectante populo, ut populus simul adoret. Alias, si ante consecrationem elevaret, faceret idolatrare populum, et populum idolatria deciperet. Habeat autem sacerdos lumen accensum, quando conficit et cum sumit Sacramentum Eucharistiae in Missa, et quando portat illud ad infirmum communicandum, extra. de celeb. Miss.: « Sane, » et cap. « Litteras, »: et si distillaverit aliquid de sanguine, lambat illud si potest; et si ceciderit in ligno vel lapide, vel in terra, radat illud sacerdos et comburat, et intus altare abscondat. Si vero ceciderit in pannum, lavet illud tribus vicibus, sumens loturam in calice, et ponat pannum juxta altare, ut de Consecr., distinct. 2: « Si per negligentiam. » Debet autem abstinere a celebratione, si habet conscientiam mortalis peccati, nisi confiteatur primo, ut 1, quaest. 1: « Sacerdos. » Si vero ex culpa sua ceciderit in pollutionem nocturnam, puta quia cogitavit peccatum ex delectatione, et ex hoc pollutus est, debet abstinere donec confiteatur. Si vero sine culpa sua, puta ex naturae superfluitate, eodem die celebrare potest. Si vero ex alia levi causa, puta ex superflua potatione, seu ingurgitatione, eodem die abstinere debet, nisi imminet necessitas, et non habeat alium sacerdotem, ut de Cons., distinct. 6: « Testamentum. » Abstineat etiam sacerdos si sit in notoria fornicatione, ut 21 dist.: « Qui sciunt, » quia peccat ipse mortaliter celebrando, peccant etiam qui audiunt Missam ab eodem, ut 22 dist.: « Nullus ele-

ricorum, » et cap. « Quaesitum. » Abstineat autem omnino si sit suspensus vel interdictus, aut excommunicatus, quia efficeretur irregularis per hoc. Et quia talis suspensus est quoad se et quoad alios, peccat qui a tali recipit ecclesiastica Sacramenta scienter; si tamen sit ligatus minori excommunicatione, non est suspensus quoad alios; quia licet ipse peccet in conferendo ecclesiasticum Sacramentum, non tamen peccat in hoc, qui ex fide ab ipso recipit, ut extra. de clerice. excomm. min. simon.: « Celebrat », de cohabit. cleric. et mulier: « Vestra. » Et propter hoc, quodcumque Sacerdos communicat excommunicato in verbis vel in aliis, faciat se absolvere a quocumque sacerdote si potest. Si vero sacerdos in ipsa celebratione recordatur alicujus peccati mortalis, confiteatur si potest, vel saltem conteratur et perficiat. Si vero non potest confiteri, nihilominus conficiat, quia gravius peccaret, si deluderet populum, ut extra. de celeb. Miss., cap. « Cum homine. » Si vero in ipsa celebratione sacerdos intercipitur in aliqua passione, et non possit perficere, alius sacerdos incipiat ubi ipse dimisit, et perficiat, ut 7, quaest. 1: « Nihil. » Debet etiam sacerdos habere scholarem in Missa, qui juvet ipsum, quia illud officium facere non potest solus, extra. de fil. Presbyt.: « Proposuit. » Immo debet habere duos, si potest, ad minus, ut illa salutatio, Dominus vobiscum, verificetur; extra. de Cons., dist. 1: « Hoc quoque. » Potest autem sacerdos pro pecunia celebrare, et locare operas suas ad annum vel mensem, vel ad diem, sicut voluerit, si ad hoc non tenetur ratione beneficii vel officii: extra. de prae.: « Signatum », et 12, quaest. 2: « Caritatem; » quia si tenetur, non potest sine peccato pecuniam petere, vel aliquo modo exigere, ut extra. de simon.: « Cum in Ecclesiae corpore »: tamen sponte oblatam potest pecuniam recipere, ut 1, quaest. 2: « Quam pio. » Unde sacerdos pro diaconis Ecclesiae suae non potest ex pacto exigere, nec pignora petere, ut 1, quaest. 1: « Placuit ut » « unusquisque. » Sed pro diaconis aliquarum Ecclesiarum potest, quia ad hoc non tenentur: sed si volunt solvere, solvant quod in talibus est consuetum. Sacerdos postquam fecerit suum officium, libere et absolute potest illud petere, et ad solvendum illud per superiorem compellere, extra. de sim.: « Ad audientiam. » Tamen non potest sacerdos illa intentione celebrare vel officiare, ut ex hoc pecuniam consequatur, quia peccaret mortaliter, licet non sit simonia, ut extra. de simon.: « Tua nos. » Pecunia ergo non debet esse causa celebrandi, sed occasio excitans et inducens. Causa enim debet esse id ad quod talia sunt inducta seu instituta. Si vero offerentes habeant corruptam intentionem, credentes talia obtinere pro pecunia, non obest sanae intentioni sacerdotis, ut 1, quaest. 1: « Judices. » Ita tamen, quod sacerdos intentione sua, vel in usu pecuniae non offendat. Caveat autem sacerdos ne recipiat oblationes pro defuncto excommunicato vel praeciso, vel qui decessit in peccato mortali notorio, quia pro talibus non debet orare, 90 dist., cap. « Oblationes, » et 15, quaest. 2: « Pro obeuntibus. » Si vero in confessione verae fidei decessit, etiam si sit in inferno, quia dubium est, tamen licet orare pro ipso, quamvis non possit proficere ei. 15, quaest. 2: « Non extimemus. » Tales enim non debent sepeliri in coemeterio Ecclesiae; immo si possent discerni sepulti, deberent

exhumari et eijci extra coemiterium: extra. de sepulcris sacris. Coemeteria in quibus corpora mortuorum excommunicatorum sunt sepulta, debent reconciliari aspersione aquae benedictae, sicut fit in dedicationibus Ecclesiarum, extra. de cons. Eecl. vel altar.: « Consuluisti ». Soli etenim catholici sepeliendi sunt apud Ecclesias, ut fideles euntes et redeuntes orent pro ipsis, ut 15, quaest. 2: « Non extimemus. » Utrum autem celebrare quotidie, vel ex reverentia aliquando abstinere sit melius sacerdoti, hoc relinquitur intentioni suae, ut faciat in quo Deo credat magis vel melius placere: et ponitur exemplum de Zachaeo et Centurione, quorum unus placuit recipiendo, alter propter reverentiam abstinendo, dicens: « Domine, non sum dignus ut intres sub tectum meum, » de Cons., dist. 2: « Quotidie. » Sicut mulier quae patitur menstruum, si vult communicari, et intrare Ecclesiam ex devotione, non est prohibenda; sed si ex reverentia vult abstinere, est laudanda, ut 5 dist.: « Ad ejus vota. » Ex negligentia tamen nunquam sacerdos debet omittere, ut extra. de celebr. Miss.: « Cum creatura. »

#### *De Sacramentis Ecclesiasticis.*

Viso de officiis Ecclesiasticis, videndum est de Sacramentis ecclesiasticis, quae sunt septem, scilicet Baptismus, Confirmatio, Poenitentia, Eucharistia, Extrema Unctio, Ordo, conjugium seu Matrimonium. Et primo de Baptismo, qui ordine prior est, et necessarium est. 17 dist.: « Verum ». Est enim janua, seu fundamentum Sacramentorum, extra. de Presb. non bapt.: « Veniens. » Unde si quis omisso Baptismo ordinatur, non reciperet characterem, ut 1, quaest. 1, « Si quis confugerit »: ut si quis presbyter deprehenderet se non esse baptizatum, debet baptizari, et iterum ordinari, extra. de Presbyt. non baptizatis: « Veniens. » Consistit autem hoc Sacramentum in duobus: in elemento aquae, et forma verborum, ut 1 quaest. 1: « Detrahe » et extra. de Baptismo et ejus effectu: « Non ut apponeret ». In aqua enim debet baptizari, non in alio liquore; et undecumque sit illa aqua, sufficit, sive de mari, sive de fonte, sive imbribus, sive de glacie resoluta. Forma verborum est illa quam Dominus dedit Apostolis dicens: « Ego baptizo te in nomine Patris et Filii et Spiritus sancti, » extra. de Baptis. et ejus effectu: « Non ut apponeres » ita quod nihil omittatur de his verbis: et si omiserit aliquam de tribus personis, non dicitur baptizatus, de Cons., distinct. 4: « In synodo. » Nec debet omitti hoc verbum, dum dicitur, ego baptizo te, extra. de baptismo et ejus effectu: « Si quis puerorum. » Si tamen corrumpat verba sacerdos ex ignorantia latinae locutionis, non nocet Sacramento: de Cons., dist. 4: « Retulerunt. » Ex satisfactione autem debet immergere ter, secundum hujus nostrae regionis consuetudinem, de Cons., dist. 4: « De terna. » Et debet formam verborum ore exprimere: et dum dicit verba baptizando, debet immergere in aquam, ut 1, quaest. 1: « Detrahe. » Cetera verba quae adhibentur ante et post oleum et chrisma, non sunt de substantia baptismi, sed de solemnitate. Si tamen sacerdos illa omittat ex contemptu, peccat graviter, quia sunt introducta ex generali consuetudine Ecclesiae, de Cons., dist. 4: « Sive parvuli, » et generales consuetudines servari debent, sicut evangelia, ut 11 distinct.: « Ecclesiasticarum. »

Sit autem sacerdos cautus, ut per sese immergat, et per se elevet puerum de sacro fonte, propter contingens periculum pueri; et postea tradat eum astantibus, et seiat se patrem spiritualem pueri et compatrem parentum ex sola immersione, sicut alii elevantes: 20, quaest. 1: « Omnes, » ita quod filia carnalis sacerdotis contrahere non potest eum baptizato ab ipso et matrimonium contractum; et consummatum dissolvetur, sicut inter filios duorum compatrum, extra. de cognat. spirit.: « Ex litteris. » Si vero imminet necessitas, vel infirmitas baptizandi, ut non possint solemnitates observari, quia timetur de morte baptizandi; tunc sacerdos habeat aquam paratam in fonte vel in vase, et immergat puerum ter in aqua dicendo: « Ego baptizo te in nomine Patris et Filii et Spiritus sancti, » et postea, si habeat opportunitatem, repetat ea quae omisit, extra. de sacr. unct. cap. « Pastoralis, » et cap. « Presbyter. » Si vero contingat imminente necessitate, quod puer baptizatus sit per aliquam mulierem vel laicum, quia sic fieri aliquando consuevit presbytero absente, sacerdos in tali casu, quia probabiliter dubitat, baptizet eundem sub ista forma verborum: « Si tu es baptizatus, non te baptizo: sed si non es baptizatus, ego te baptizo in nomine Patris et Filii et Spiritus sancti », ut extra. de Baptismo et ejus eff.: « De quibus. » Si autem puer inveniatur in platea vel coemeterio, et dubitetur utrum sit baptizatus, sicut saepe fit de expositis et projectis, baptizari debet, de Consecr., dist. 4: « Parvulos. » Si vero aliquis magnus et adultus venit ad baptizandum, quem sacerdos prae mole corporis non possit immergere, tunc sacerdos fundat aquam super corpus ejus, dicens « ego baptizo te in nomine Patris et Filii et Spiritus sancti »; et sic recipit Baptismum. Tali enim adulto non imponitur poenitentia de commissis ante Baptismum: sufficit enim tali peccatori Baptismi Sacramentum ad remissionem peccatorum omnium tam originalium quam actualium, ut de Cons., dist. 4: « Si ne poenitentia. » Requiritur tamen in eo cordis contritio, sine qua non sequeretur veniam de actualibus peccatis, ut de Consecr., dist. 4: « Omnis. » Et talis adultus debet respondere de fide per se, non per alium, cum sacerdos quaerit de articulis fidei, dicens: « Credis in Deum Patrem etc. » « Credis et in Jesum Christum etc. » ut de Cons., dist. 4: « Parvulus. » Sed parvuli respondent per alios, quia per se non possunt hoc proferre: de Consecr., dist. 4: « Parvulus. » Habeat autem sacerdos orarium sive stolam ad collum cum baptizat, 15 dist.: « Eecl. ». Habeat etiam cereum accensum, ut ostendatur sub typo luminis corporalis lux illa quae illuminat omnem hominem venientem in hunc mundum, sicut 21 distinct.: « Clericos, » vel cleros, ut ex hoc apud homines fides augeatur: similiter extra. de celebr. Miss.: « Sane. » Admoneat autem sacerdos parochianos suos, ut in septimana ante passionem Domini Nostri mittant pueros suos ut instruantur de symbolo: de Cons., dist. 4: « Ante Baptismum etc. » ante 20 dies. Credo quod si sacerdos sit in tali loco quod non possit habere aquam de fonte vel de rivo, vel aliam, defodiat terram, si possit invenire; et si non poterit habere, imploranda est bonorum omnium largitoris gratia, ut 20 dist.: « De quibus. » Si enim sacerdos facit quod potest, et quod non potest committit Deo; tunc ipse supplet



defectum, ut 22 dist.: « Qui quaeritur. » Parvuli delati ad Baptismum respondeant per alios, quia per se non possunt. Idem est de mutis, surdis et aegrotis, qui per se non possunt, ut de Cons., dist. 4: « Parvuli. » Potest autem dari Baptismus quandoque eadem hora quando natus est puer, ne interveniente morte, paganus mori valeat, qui redimitur per Baptismum, ut de Cons., dist. 4: « Beati. » Generalis autem Baptismus non debet celebrari, nisi in Sabbato sancto, et Sabbato Pentecostes, ut de Cons., dist. 4: « Duo tempora. » Nemo autem potest baptizare seipsum: sed alter debet esse baptizans, et alter baptizatus, ut extra. de Baptismo et ejus effectu: « Debitum. » Ista duo sunt necessaria homini ad salutem, fides et Sacramentum; sed ubi alterum deest ex necessitate, ipse Deus supplet quod deest: in puero supplet fidem, in adulto supplet Sacramentum: ubi utrumque deest, anima in aeternum damnatur, ut de Cons., distinct. 4: « Firmissime. » Compaterni vero qui confitentur fidem pro puero in Baptismo, tenentur instruere ipsum puerum jam adultum de fide et caritate, ut de Cons., dist. 4: « Vos autem omnia. » Cavere autem debet sacerdos, ne vir teneat filium uxoris suae ad Baptismum, sive habeat de se sive de alio, neque uxor filium viri sui. Si tamen factum fuerit ex simplicitate vel ex malitia, non sunt propter hoc separandi, ut 50, quaest. prima: « Dictum, » et extra. de cognat. spir. capitul. « Si quis. » Si tamen pater vel mater filium suum baptizaverit in mortis articulo, cum non potest habere alium qui baptizaret, non sunt separandi: nec aliquo modo peccaverunt, ut 50, quaestione prima: « Ad limina. » Potest autem ille idem qui tenuerit puerum ad Baptismum tenere ad Chrisma, cum ex pluribus filiis aliquis compater fieri possit. De Cons., dist. 4: « In catechismo. » Ille tamen qui non baptizatur vel chrismatur, nec ad Baptismum nec ad Chrisma tenere potest, ut de Consecr., dist. 4: « In baptismo. »

#### *De Sacramento Confirmationis.*

De Sacramento Confirmationis, sive chrismationis, breviter transeamus, prout spectat ad sacerdotem, quia illud Sacramentum spectat ad collationem Episcopi. Presbyter enim ungit puerum sacro chrismate jam baptizatum in vertice; sed Episcopus ungit cum sacro chrismate in fronte, ut de Cons., dist. 5: « Novissime. » De hoc plene tractatur extra de sacr. unct. cap. « Cumque venisset; » et in hoc Sacramento contrahitur compaternitas, sicut in Baptismo, ut de Cons., dist. 4: « In catechismo. » 50, quaest. 4: « Si quis ex uno. » Debet enim sacerdos monere parochianos suos, ut filios suos chrismari faciant, quia in Confirmatione vel chrismatione plene efficiuntur christiani: de Cons., dist. 1: « Omnes fideles: » quia licet omissio Sacramenti non obsit puero morienti ad salutem, prodest tamen viventibus, quia dat robur ad agones et praelia hujus mundi: de Cons., dist. 5: « Spiritus sanctus. » Obest tamen praesentibus si omittant ex contemptu, quia peccant graviter, cum sit Sacramentum necessitatis.

#### *De cautela in confessione habenda.*

De Poenitentia multa in libris sanctorum Patrum et scriptis inveniuntur Doctorum declarata. Quaedam tamen quae in usu ordinario magis occurrunt, duximus praelibanda; debet namque sacerdos advertere utrum jurisdictionem habeat in illum vel in illam, quando audit ejus confessionem, puta si est parochianus ejus; alias si esset alterius, non posset ipsum absolvere, sine petita et obtenta licentia illius sacerdotis cujus parochianus existit, ut de Cons., dist. 3: « Placuit, » et extra. de poen. et remiss.: « Omnis utriusque sexus, » nisi in articulo necessitatis: puta si poenitens et percussus vel infirmus ad mortem et non possit haberi proprius sacerdos, in tali casu posset cuilibet confiteri etiam laico, et obtinere veniam ex desiderio sacerdotis, confitendo laico turpitudinem criminis, ut de poen. dist. 6, cap. 1. Circa poenitentiale iudicium, duo sunt necessaria sacerdoti: scilicet munditia vitae, et scientia discernendi inter lepram et lepram. Munditia vitae necessaria est, ut in nullo eorum sit iudicandus, quae in aliis est iudicare paratus, juxta illud Domini, « Qui sine peccato est, prius in illam lapidem mittat. » Scientia iudicandi similiter necessaria est, ut cognoscat quid debet iudicare, ut de poenitent. dist. 5, cap. 1. Circa medium, ut ex errore non imponat falsas poenitentias, per quas animae ad inferna trahuntur, ut de poenit. distinct. 5: « Fratres; » quia juxta sententiam Veritatis, si caecus caecum praesumat ducere caecum, « in foveam ductor primus cadit, inde secutor. » ut 58 dist. cap. « Ipsi, » et de poen. dist. 6, cap. 1. In primo autem inquirat sacerdos diligenter in confessione peccata et circumstantias peccatorum, scilicet tempus, modum, locum, et causam etc. Ut poenitentes ex ignorantia vel verecundia non celent in confessione peccata, ut de poen. distinct. cap. 1 circa finem, extra. de poenit. et remiss.: « Omnis utriusque sexus. » Et dum poenitens confitetur, sacerdos se exhibeat benevolum et affabilem et humanum, ut poenitens non impediatur in confessione sua ex austeritate sacerdotis; et audita confessione, confortet ipsum utendo diversis experimentis ad sanandum aegrotum, nunc levando et consulendo per spem veniae et gaudium aeternae vitae, postea terrendo per poenas aeternas, et incendia gehennae ostendendo: sicut viderit expedire, ut de poen. distinct. 6, cap. 1 in fine, et extra. de poenitent. et remiss.: « Omnis utriusque sexus: » sicut videmus in medico corporali, qui pluraenicum per levia mitigat et ad sanitatem reducit, et gulosum animum a vino et a carnibus asperè prohibet, ne per ea incurrat mortem. In quolibet autem peccato poenitentia est arbitraria, ut sacerdos consideret qualitatem peccati et peccantis, ut si est senex aut juvenis, aut dives aut pauper, debilis aut fortis, si est bene compos, aut compunctus, et alia; et omnibus bene consideratis, imponat ei poenitentiam, et prout in arbitrio suo viderit expedire, ut 26 quaest. 7 « Tempora: » et de poen. dist. « In mensuram. » Ita tamen, quod juvenibus, maxime mulieribus, non imponantur itinera et vagationes propter aetatis fragilitatem, ut 50 dist.: « Poenitentes. » quia in eundo et redeundo audit et videt aliquid, per quod mulier juvenis colligit venenum mortis, et infundit aliis; quia non solum tactu

et ejus effectu, sed etiam aspectu quaecumque appetitur, et quisque appetit concupiscentiam feminarum, ut 52, quaest. 5: « Non solum. » Masculis autem injungat poenitentiam, scilicet, genuflexiones et alias satisfactiones in Ecclesia faciendas, ad tollendam malam consuetudinem de non veniendo ad Ecclesiam diebus dominicis et festivis. Sit autem sacerdos ita cautus, ut non imponat poenitentiam ita gravem et austeram poenitenti, ut poenitens totam dimittat; sicut adolescens qui fascem dejecit a tergo, quem super humeros portare non potuit, ut 26, quaest. 4: « Alligant. » Sed nec ita levem imponat, ne peccator contemnat peccatum, et ut ex levitate poenitentiae relabatur libentius ad peccatum, ut 50 dist., cap. 1. Faciat ergo quoddam temperamentum ex misericordia et severitate, ut poenitentia non sit nimis dissoluta, nec nimis rigida, ut 10, quaest. 5: « Sunt namque: » tamen tutius est ponere minorem debito, quam majorem; quia melius exeamur apud Deum propter multam misericordiam, quam per nimiam severitatem, ut 26, quaest. 4: « Alligant » in fin: quia talis defectus in Purgatorio supplebitur, 25 dist.: « Quaelis, » et cap. « Se. »: tamen reiteranti peccatum gravior est poenitentia injungenda. Vulnus enim iteratum si incuratur, gravius est ad sanandum, ut de poenitent. distinct. 4: « Inanis est poenitentia. » Ut autem sacerdos ad ista sit doctus et cautus, meditetur Scripturas sacras et dicta Sanctorum, in quibus ista inveniat: nam propter hoc Dominus ponit verba sua in ore prophetarum, et post committit sibi curam animarum, dicens ad Jeremiam: « Ecce dedi verba mea in ore tuo, Ecce constitui te super gentes et regna, » ut 56 distinct. cap. « Ecce. » Certe cum videamus medicos corporum revolvere quotidie et legere libros physicales et medicinales corporum in quibus docentur curare corpora moritura: magna stultitia est non legere libros Sanctorum medicinales animarum in quibus docemur curare animas in aeternum victuras. Majus est damnum unius animae, quam de morte innumerabilium corporum, ut 24, quaest. 3: « Si habetas, » circa finem. Instruat sacerdos confidentem, ut confiteatur omnia peccata pure et sine palliatione, ut sicut peccata sunt in conscientia confidentis per memoriam, ita sint in ore ipsius per confessionem; nec dividat confessionem propter verecundiam, ut unum confiteatur uni et aliud alteri, ut de poenit. dist. 5, cap. 1: « Ut cautus, » et ut confiteatur per se non per nuntium vel per scripturam, ut de poen. dist. 1: « Quem poenitet » in principio. Veruntamen dum sacerdos inquit de peccatis aut de circumstantiis peccatorum, ita caute inquirat, ut non instruat eum ad peccandum, quia nulli debemus parare laqueum, 17 dist.: « De viduis sub nullo. » Debet autem sacerdos monere parochianos suos, et si opus fuerit cogere, ut saltem semel confiteantur in anno, et communicent in Resurrectione Domini: extra. de poen. et rem.: « Omnis utriusque sexus: » Si vero sacerdos timeat scandalum alienius potentis de populo, et timet probabiliter ut pejus inde oriatur, saltem denuntiet rectoribus ac superioribus, ut per illos tales potentes inducantur ad poenitentiam, ut quae non potest facere per se, faciat per alium: sufficit enim sacerdoti ut faciat quod potest. Si autem poenitens voluerit de aliquo peccato satisfacere, et in aliquo peccato remanere, puta ab usuris, et non a forni-

catione; sacerdos non debet omnino illam confessionem spernere, et sic secretum dimittere a se inconsultum: sed ipsam audire, et dare sibi consilium, ut jejuset vel eleemosynas et alia bona faciat et exercent. Non tamen illum absolvat, nisi de omnibus confiteatur et satisfaciatur: extra. de poen. et remiss.: « Quod quidem. » Dominus enim noster totum hominem sanavit, et nullum sanavit quem non omnino liberavit: de poenit. dist. 5: « Sunt plures. » Denuntiet tamen, quod illa bona quae facit in mortali peccato, non prosunt sibi ad vitam aeternam: sed ad hoc prosunt, ut disponant et habilitent ad poenitentiam, ut legitur de Cornelio 26 dist. Deinde prosunt etiam ad praemium temporale: de poen. dist. 5: « Quid ergo. » Vel ad supplicium in inferno, de poen. dist. 5: « Si quis autem. » Curet autem sacerdos residere in tali loco, quando audit confessionem, maxime mulierum, quod ab aliis videatur manifeste, sed a nemine audiatur, ne laici qui clericis opido sunt infesti, et sunt prони ad suspicandum malum, ex sinistra suspitione cordis pereutiantur; sed a nullo audiantur quae ibi dicuntur, ut illud iudicium soli sacerdoti confessori, et poenitenti confitenti sit notum. Sufficit autem in illo divino officio testimonium Dei et sanctorum Angelorum qui illic assistunt, et eorum quibus illud iudicium agitur, ut de poen. distinct. 1: « Quem poenitet, » et 50 dist.: « De his vero. » Sacerdos autem summa cura et sollicitudine curare debet, ne revelet aliquid de his quae dicta sunt sibi in confessione, neque per verbum, neque per aliud signum; sed si dubitat de aliquo peccato, et super hoc vult consulere magis peritum, ita caute quaerat consilium de peccato, ut nullus aliquid perpendat de peccatore: alias esset in causa depositionis, ut de poen. dist. 6: « Sacerdos » et extra. de poen. et remiss.: « Utriusque sexus. » Exhibeat se sacerdos multa maturitate, ne verbosus aut loquax sit, ne propter hoc videatur ut suspectus in confessione; nec sedeat in conviviis in multitudine frequenter loquentium, ne aliquod verbum exeat ex ore suo quod noceat ipsi de revelatione confessionis; et si audiat verbum injuriosum a parochianis suis, non reddat eis vicem pro vice, ne propter hoc insinuetur revelasse confessionis peccatum. Caveat autem sacerdos ne dum audit confessionem mulierum, respiciat vultum earum, nec advertat qualitatem membrorum: propter quod bonum est et congruum, ut mulier teneat in confessione locum magis imum, et sacerdos magis altum, ut non de facili se videant mutuo, ne insidiante diabolo illa impediatur in confessione propter verecundiam, vel sacerdos insidiatur ex illicita cogitatione: propter quod etiam sacerdos expedita confessione juvenularum mulierum non immoretur illa immiscere verba quae confessionem perturbant vel non adjuvent, nec ultra quam necesse est excoGITARE confessionem earum, inquirendo vitiose innotus membrorum suorum et usus; quia ubi talis esca jacet, antiqui hostis stimuli non desunt ad tentandum, 81 dist.: « Oportet. » Nec recipiat sacerdos manus mulierum inter manus suas, sicut aliqui stulti faciunt vel fecerunt, nec aliquo modo tangat mulierem: quia bonum est omnino sacerdoti non tangere, ut 52 dist.: « Hospitiolum. » Timeat autem sacerdos instigationem versuti hostis, qui cum habeat mille nocendi modos, conatur a principio ruinae suae caritatem hominum et bona opera

perturbare, ut 16, quaest. 2: « Visus. » Debet autem sacerdos omni tempore dare poenitentiam, postulanti, et in ultimo articulo vitae: de poen. dist. 6 in princip., et 36, quaest. 6: « Si « presbyter » Nec contrahat moram quodcumque advocatus fuerit ad poenitentiam imponendam; aliter puniri debet. Sed si infirmus petit poenitentiam, et antequam sacerdos veniat ad eum sit mortuus, vel amiserit loquelam, sacerdos habeat eum pro confesso, et post mortem absolvat eum, ut de poen. dist. 1: « Multiplex, » ut extra. de sent. excom.: « A nobis. » Si autem aliquis confiteatur aliquod peccatum de quo satisfacere non potest, puta rapuit aliena quae prae nimia paupertate reddere non potest, sacerdos injungat sibi poenitentiam; dicat tamen sibi quod si veniat ad pinguiorem fortunam restituat ablatum, si restitui potest, ut 14, qu. 6: « Si res aliena. » Item si mulier sibi supposuit partum alienum, ne bona viri sui convolverentur ad alias, vel suscepit filiam de adultério quae nutritur de bonis viri sui, in hoc casu audiat confessionem ejus sacerdos, et similibus casibus, si qui tales occurrant, et absolvat eam, ut ext. de poenit. et rem.: « Officii. » Item si mulier habeat certam et discretam conscientiam ex causa probabili et vera, quod vir ejus sit consanguineus ejus, et ad hoc non vult contra conscientiam reddere debitum viro suo excommunicato, sacerdos audiat confessionem suam, et absolvat eam, et communice illi in occulto iudicio animarum; vitabit ipsam in publico, extra. de restit. spol.: « Littera », extra. de sent. excom.: « Inquisitum. » Si autem aliquis confiteatur sacerdoti aliquod peccatum vel furtum, de quo satisfacere non possit aut non vult, et mulier, aut dominus rei furtivae petat excommunicationem inde fieri, sacerdos debet excommunicare in genere, non in specie; sed dicat, Excommunico illum vel illam qui fecit tale furtum, non nominando personam. Persona non debet nominari expresse, nisi convictus sit aliquis in iudicio; extra. de offic. jur. ord.: « Si sacerdos. » Et quodcumque sacerdos excommunicat aliquem, scribat causam quare excommunicat, et in scriptis profirat; aliter incidit in illam constitutionem, ut extra. de sent. excom.: « Medicinalis. » Caveat autem sacerdos ut non recipiat ad confessionem excommunicatos, interdictos, antequam absolvantur: quia cum tales sunt remoti a Sacramentis Ecclesiae, non posset eos absolvere durante vinculo interdicti vel excommunicationis: sed si sit excommunicatus ab ipso sacerdote, vel ab antecessore suo, potest ipsum absolvere praemissa satisfactione, et poenitentiam impendere, ut 11, qu. 5: « Si Episcopus ». Si autem sit excommunicatus a sacerdote alio, non posset ipsum absolvere jure ordinario, sicut nec posset aliorum parochianos excommunicare, ut extra. de sent. excom.: « A nobis. » Tamen in articulo mortis potest vel posset simplex sacerdos a quacumque excommunicatione absolvere: extra. de sepulchr., cap. ult. Potest autem sacerdos de omnibus peccatis venialibus et mortalibus privatam poenitentiam injungere, et absolvere fideliter confitentes, ut extra. de poen. et remiss.: « Deus, » nisi prohibeatur ab homine vel a jure; ut si sint enormia crimina, in quibus requiritur major poenitentia, et illa pro quibus requiritur solemnitas poenitentia. Solemnem enim poenitentiam imponit Episcopus, non simplex sacerdos: 50 dist. in cap. « Quadrage-

« simae ». Instruet autem sacerdos parochianos suos, ut addiscant symbolum, scilicet, Credo in Deum, et Pater noster, et confessionem: ista tria debent scire qui nesciunt legere, extra. de poenit. et remiss.: « Deus qui Ecclesiam. » Et quando homines intrant Ecclesiam, aspergantur aqua benedicta, quam sacerdos habet semper in Ecclesia paratam, quia in conspersione aquae benedictae remittuntur per gratiam peccata venialia, et debilitatur potentia inimici, ut de Consecr., dist. 5: « Aquam. » Et quando sacerdos audit confessionem alicujus, post auditam confessionem injungat ei poenitentiam salutarem: deinde faciat confessionem generalem, scilicet, Confiteor Deo. Et dum facit confessionem, instruet confitentem stare flexum ad terram pro reverentia absolutionis, ut ex hoc fides et devotio augeatur poenitenti. Finita confessione, dicat sacerdos: « Misereatur tui omnipotens Deus etc. Indulgentiam etc. » Et absolvat eum a peccatis et ab excommunicatione, restituens ipsum Ecclesiae Sacramentis. Caveat autem sacerdos, ut si quis vult confiteri ei alio audiente, non recipiat eum, sed quemlibet audiat separatum, ne unus audiat confessionem alterius nisi solus sacerdos, ut extr. de poen. et remiss.: « Omnis. »

#### *De Sacramento Eucharistiae.*

De Sacramento Eucharistiae plura dicam sub eruditione simplicium sacerdotum. Videamus ergo, quoniam iste tractatus excedit intellectum humanum, et hoc sacramentum percipitur potius fide quam doctrina, juxta illud dictum Domini, « Nisi « credideritis, non intelligitis: » plus enim in eo operatur credulitas mentis quam perceptio corporis, ut de Cons., distinct. 2: « Ad quid. » Hoc sacramentum Eucharistiae sequitur poenitentiam, quia non debet sacerdos vere poenitentibus illud denegare. ut de Cons., dist. 1: « Neminem. » Est enim sacramentum humanae reconciliationis ad Deum, in eo quod Filius Dei assumpsit carnem humanam, et fecit se unum nobiscum; unde dicitur Emmanuel, quod est « nobiscum Deus ». In eo vero quod nos sumus corpus Domini et sanguinem ejus, effici-mur unum cum ipso, et sic per ipsum tendimus ad unitatem cum Patre, et sic per Christum mediatorem reconciliamur aeterno Patri; ut de Cons., dist. 5: « Sic ipse Salvator dicit ad Patrem: « Volo Pater, quod fideles sint unum nobiscum « sicut unum nos sumus, » ut extra. de summa Trinit. et fide cathol.: « Damnamus ». Nec debet solum istud sacramentum ministrari per Episcopum vel per presbyterum: potest enim per diaconum ministrari, ut de Consecr., dist. 2: « Pervenit » et 95 dist., cap. « Praesente », et cap. « Diaconos. » Est enim sacramentum necessitatis, sicut baptismus et poenitentia; unde dicitur viaticum a sanctis Patribus, ut 26, qu. 6: « Qui recedunt: » quia maxime dari debet morientibus, sicut viatoribus transeuntibus, ut extra. de poen. et remiss.: « Quod vitae. » Unde sacerdos debet esse sollicitus, ut post poenitentiam receptam communice infirmum, ut sine communionem non recedat, ut extra. de poen. et remiss. « Deus qui Ecclesiam. » Ideo sacerdos debet servare Eucharistiam, et habere paratas hostias consecratas pro infirmis communicandis: de Consecr., dist. 2: « Presbyter: » quam reponat in loco muni-



do et singulari, ubi alia communia non ponantur, de quibus communicet infirmum quodcumque fuerit opportunum. Et quando ibit sacerdos ad communicandum, portet plures hostias in eundo et redeundo, ut populus se inclinans adoret verum corpus Christi, quod portatur manibus sacerdotis. Portet autem sacerdos illud publice, honeste et honorifice ante pectus, indutus veste sacerdotali, cum reverentia et timore, cum gausape modo et decenti, praecedente ministro cum lanterna cum lumine, vel cum candela. Doceat autem sacerdos populum in Ecclesia, ut quando levatur corpus Domini manibus sacerdotis in altari, et quando portatur ad infirmum, omnes se reverenter inclinant flexis genibus adorantes, ut extra. de celeb. Miss.: « Sane. » Reponat autem sacram Eucharistiam et chrisma et oleum in loco clauso, et consignato clavi, ut non possit aliqua temeraria manu extrahi, ut extra. de custodia. Euchar. cap. 1. Curet autem sacerdos hostias consecratas reponere in loco decenti, ubi non marcescant: et si locus esset adeo humidus quod non possent ibi durare, recenscat eas et revolvat frequenter, quia ex hac causa sacerdos potest etiam in tempore generalis interdicti semel in hebdomada celebrare, januis tamen clausis, campanis non pulsatis, interdictis et excommunicatis exclusis, ut extra. de sent. excomm.: « Permittimus. » Quod si marcescerent et veterascerent, sicut in aliquibus locis aliquando factum est, prout audivimus, jam desineret ibi esse corpus Christi, ut de Consecr., dist. 2: « Qui bene. » Unde talis hostia non debet dari communicanti. Item dari debet corpus Christi jejuno stomacho ante cibum in honore tanti sacramenti, non post: de Consecr., dist. 2: « Liquido. » Si vero timeatur de morte, dari potest quodcumque, ante et post. Quando vero oportet sacerdotem veteres hostias renovare, et consecrare de novo, sumat hostias veteres, et comedendo consumat jejuno stomacho, vel post missam celebratam antequam sumat perfusionem, seu abluitionem digitorum. Illud idem faciat quando supersunt hostiae consecratae communicationi populi, sicut in festo Natalis Domini vel Resurrectionis, vel in aliis festivitatibus, quibus communicant, ut de Consecr., dist. 2: « Tribus gradibus. » Debet autem sacerdos dare panem seorsum, et calicem seorsum; nec debet Eucharistiam vinu intingere, ut de Cons., dist. 2: « Cum omne. » Caveat autem sacerdos ut nunquam porrigat sano vel infirmo hostiam non consecratam pro corpore Christi, quia non debet populum deludere, cum falsa remedia sint veris periculis graviora, ut extra. de celebratione Missae: « De homine. » Habeat autem sacerdos orarium sive stolam ad collum suum, quando communicat aliquem, ut 25 distinct.: « Ecclesiastica. » Si vero aliquis sit infirmus, ita quod non possit hostiam totam sumere, quia forte patitur in gutture, sacerdos frangat hostiam et sumat inde aliquam particulam, et det ei aliam particulam, quia pro qualibet parte sumitur corpus Christi, quia in sacramento per partes manducatur, et manet totum integrum, ut de Consecratione, distinct. 2: « Qui manducat. » Sive plus sive minus quis inde percipiat, omnes aequaliter integerrime sumunt generaliter, et specialiter unusquisque, ut de Consecratione, distinct. 2: « Quid sit sanguis. » Cum autem sacerdos communicat sanum vel infirmum, debet in porrectione sacrae Eucharistiae facere signum crucis cum ipsa hostia in facie recipientis

dicens: « Corpus et sanguis Domini nostri Jesu Christi conservet et custodiat te in vitam aeternam. » Cum vero porrigit calicem, dicat: « In nomine Domini nostri Jesu Christi: quia illud est purum vinum cum aqua, et non sanguis, cum non sit consecratum mystica prece sacerdotis: sanguis enim datur cum corpore per modum unionis, quia non est corpus sine sanguine; ideo debet dicere sacerdos qui porrigit Eucharistiam: « Corpus et sanguis Domini nostri Jesu Christi conservet te in vitam aeternam, Amen. » Secus est in sacramento Altaris, ubi sacerdos recipit seorsum sanguinem sub specie vini; tunc ipse recipit verum sanguinem Christi prece mystica consecratum: nam ante consecrationem erat vinum, post consecrationem vero est sanguis, quia benedictio consecravit, ut de Consecratione, distinct. 2: « Nos autem. » Debet autem sacerdos monere communicantes, ut sumunt de calice tribus vicibus ad minus, non propter aliquod mysterium, sed ut bene laventur ora sumentium, ne remaneant aliquae reliquiae inter dentes communicantium vel gingivas, et ut maleficae mulieres non possint ita de facili reservare in ore corpus Christi ad aliquod earum maleficium perpetrandum, sicut saepius intelleximus quod plures maledictae fecerunt. Debet autem teneri dum communicant, aliquod gausape ante pectus sub mento, saltem ante caput illius gausapis in quo sacerdos tenet Eucharistiam, am-babus manibus expansis; ut si tota ceciderit hostia vel aliqua particula, non possit cadere in terram vel conculcari: non est enim sine culpa, quando corpus Christi ex negligentia cadit in terram, ut de Consecratione, dist. 2: « Qui bene, » et 1, quaest. 1: « Interrogo. » Si vero aliqui pueri de parochia sacerdotis venerint ad communicandum in festo Nativitatis vel Resurrectionis Domini, et tantae adhuc innocentiae sint, quod nullo adhuc gravati sint gravi peccato, et sint tantae discretionis et compunctionis, quod sumant cum aliqua reverentia et timore, potest sacerdos dare eis corpus Christi post aliqualem confessionem, quae inducit in illis devotionem et assuefactionem confitendi: quia licet non habeant actualem discretionem confitendi et conterendi: tamen in ipsis operatur sacramentum, cum non inveniat obicem malitiae in eis, ut extra. de Baptismo, et ejus effectu: « Majores in fine. » Si autem indiscreti fuerint et malitiosi, utpote in quibus malitia excedit aetatem, non debet sacerdos indistincte talibus dare corpus Christi. Parvulis vero ita teneris quod sumere illud non possunt, debet sacerdos in mortis articulo vinum cum aqua in calice pro confirmatione porrigere, non quod sit sacramentum, sed fides et assuefactio sacramenti. Illud autem credo, et rogo omnino vitandum, quod quidam sacerdotes facere consueverunt, ut videlicet quando portant Eucharistiam ad infirmum, non portant vinum de ecclesia sua, sed accipiunt de domo infirmi. Portet ergo sacerdos vinum de Ecclesia sua cum ipsa Eucharistia de segete sua si habet, ad domum infirmi: si vero non habet, acquirat unde possit vel emat, et ab Ecclesia sua deferat ad infirmum; ne per hoc laedatur in tanto Sacramento fides illius infirmi, qui sic mortaliter et perniciose sumeret, cum in illo sacramento plus operetur fides percipientis quam sacramenti perceptio, ut de Consecratione, distinct. 2: « Ut quis. » In omnibus enim sacramentis, et in isto praecipue, quia magis caligat oculus rationis, debemus infor-



mare viros et mulieres ad fidem et devotionem non solum per verba, sed etiam per actus nostros exteriores, ut extra. de celebratione Missae: « Sane. » Sed si sacerdos sit suspensus vel excommunicatus aut interdictus, vel remotus a collatione et perceptione hujus sacramenti, in hoc casu peccat sacerdos in conferendo, et peccat ille qui scienter recipit ab eo. Si vero probabiliter ignoret de facto, non peccat, ut extra de clericis interdictis vel excommun.: « Ministrum Apostolicum ». Si vero sacerdos ligatus sit minori excommunicatione tantum, peccat sacerdos in conferendo, sed non peccat ille qui recipit; quia in casu sacerdos, etsi sit remotus a perceptione sacramentorum, non tamen a collatione, ut extra. de clericis interdictis vel excommunic.: « Celebrationis. »

#### *De Sacramento Unctionis.*

Extrema Unctio debet dari adultis infirmis, poenitentibus, et petentibus, de quorum morte timeatur: sanis enim et pueris et non poenitentibus dari non debet: et debet dari ab Episcopis, vel presbyteris, et non ab aliis, ut 95 dist.: « Quod illud » et c. sequenti. Consistit autem hoc sacramentum in unctione quae fit ex oleo sancto, et oratione quae funditur a presbytero super infirmum, ut cap. praecallegato. Debet autem adhiberi in hac unctione oleum benedictum per Episcopum, quod dicitur oleum infirmorum, et non oleum catechumenorum, quia illud adhibetur in sacramento baptismi, extra. de sacra unctione: « Cum venissent. » Unde peccant sacerdotes qui inungunt de alio oleo: peccant etiam in illa capitula, qui volunt dare illud oleum capellanis suis cum alio oleo, facientes quamdam divisionem sacramentorum ex avaritia vel ex jaetantia, quia faciunt illos errare, dum unguunt infirmos de oleo catechumenorum. Si vero sacerdos deprehenderit se errasse, et ex errore de alio oleo unxisse, debet adhuc de alio oleo debito ungere, et supplere quod omisit, ut extra. de sacra unctione, cap. 1. Et ille sacerdos qui inungit, debet super infirmum fundere orationem: non enim unus debet inungere et alius orationem dicere, sicut quidam fatui sacerdotes facere consueverunt, ut non sit divisio sacramenti, ut 25 dist.: « Quorumdam. » Possunt tamen alii sacerdotes simul cum ipso sacerdote inungente et orante orare. Et debent etiam plures sacerdotes adhiberi in collatione hujus sacramenti, si fieri potest: nec hic est taxatus numerus quot sacerdotes debeant interesse; quia sufficiunt duo, si plures haberi non possunt: possunt etiam communicare centum si volunt; sed quando non possunt esse plures sacerdotes, potest unus sacerdos cum scholare suo, et ex causa potest solus sacerdos illud sacramentum conferre infirmo, ut extra. de verborum significatione, « Quae sunt. » Debet autem sacerdos istud oleum, et aliud oleum et chrisma in die quintae feriae hebdomadae sanctae per singulos annos de anno in annum renovare ad sacramenta conferenda, et vetus in Ecclesia coneremare, ut de Consecr., dist. 5: « Litteris: » et de oleo novo per Episcopum benedicto baptizare et inungere, et non de veteri; alias esset graviter puniendus, nisi hoc faceret ex gravi necessitate, ut de Cons., dist. 4: « Si quis de oleo. » Et si oleum vel chrisma ex frequenti usu deficeret, potest sacerdos adhibere

oleum non consecratum oleo consecrato, et totum efficitur consecratum, ut extra. de cons. Ecclesiae vel altaris: « Quod in dubiis. » Nec debet sacerdos in collatione hujus sacramenti pecuniam exigere, nec aliquo modo petere, quoniam hoc esset simoniaeum; sponte tamen oblatum potest recipere. In nullo enim sacramento permittitur pecuniam postulare, sed dari, ut 1, quaestione 5, cap. ultimo. Si vero infirmus voluerit alios clericos praeter clericos Ecclesiae suae convocare ad ipsum inungendum, sacerdos parochialis Ecclesiae licet non debeat pecuniam petere, potest tamen denuntiare sibi, et dicere: Ego et socii mei nihil petimus, parati sumus sine aliqua satisfactione. Aliis vero cum sint extranei, est honestum et consuetum ut aliqua elemosyna tribuatur. Item potest illud sacramentum iterari, sicut et poenitentia: nam ista tria sacramenta, scilicet baptismus, confirmatio et ordo, iterari non possunt; reliqua possunt iterari, quae sunt quatuor: quia enim iteratur morbus peccati, necesse erat ut posset iterari medicina sacramenti. Prodest autem istud sacramentum ad duo: primo quia citius sanantur infirmi si sint convalituri: secundo quia tollit peccatum veniale, sicut patet auctoritate Jacobi, unde sumitur istud sacramentum: ubi dicitur Jacobi 5: « Alleviabit eum Dominus, et si in peccatis fuerit, dimittentur sibi. » Si autem infirmus qui petit unctionem, amisit notitiam vel loquelam antequam sacerdos veniret ad eum, nihilominus ungat eum sacerdos, quia in tali casu debet etiam baptizari, et a peccatis absolvi, ut extra. de baptismo et ejus effectu: « Majores. » Potest autem corpus defuncti lavari, ut moris est apud quosdam, etiam si eadem die qua natus decesserit; quia talis lotio non obest defuncto nec prodest, sed prodest vivis qui per hoc reddunt testimonium fidei suae, quia tale corpus in generali resurrectione habet resurgere, ut 12, quaest. 2: « Non extimemus. »

#### *De Sacramento Ordinis.*

De Sacramento Ordinis dicendum est, quod novem sunt ordines ecclesiastici, ad quos clericus finaliter promovetur, ut 25 dist.: « Perlectis. » In quorum collatione talis est ordo: in primis enim tonsura efficitur clericus, ut extra. de aetate et qualitate ordinandi praed.: « Cum contingat », qui aliter dicitur psalmista, 25 distinct.: « Perlectis », ubi ad « Psalmistam: » deinde efficitur ostiarius, deinde exorcista, deinde lector, deinde acolythus, deinde subdiaconus, deinde diaconus, deinde presbyter, deinde Episcopus, ut 77 distinct., cap. 1. Ad instar caelestis militiae ubi sunt novem ordines Angelorum, in quibus alii majores, alii minores; et dum minores exhibent reverentiam majoribus, et majores minoribus dilectionem impendunt, fit in eis vera concordia ex diversitatis contentione, ut 79 distinct.: « Ad haec autem. » Possunt autem semper recipi minores ordines; sed sacri ordines non possunt recipi nisi septies in anno; videlicet in quatuor sabbatis temporum, et in sabbato sancto, et in sabbato ante Dominicam de passione Domini, ut extra. de tempore et dispensat.: « De eo ». Sacros autem ordines dicimus a subdiaconatu et supra, ut 52 dist.: « Erubescant. » Isti enim qui ad hos ordines promoventur, coguntur omnino continere, et profiteri castitatem, ut 58 distinct.: « Nullum facere

« subdiaconum. » Debet autem quilibet clericus a suo Episcopo ordinari, vel de licentia sui Episcopi, ut 9, quaest. 2 lug. Si vero aliquis clericus de ignorantia vel oblivione omisso aliquo medio fecerit se ad altiorem ordinem promoveri, debet se abstinere ab executione illius ordinis, donec tempore debito et statuto ad hoc receperit ordinem quem omisit, ut 52 dist.: « Sollicitudo. » Et nota, quod quilibet praedictorum ordinum habet privilegium fori sui et enormitatis, unde non potest conveniri nisi in foro Ecclesiae. Et quicumque percutit aliquem clericum, eo ipso incidit in excommunicationem, a qua non potest absolvi nisi in articulo mortis, vel auctoritate Papae, ut 17, quaest. 4: « Si quis suadente. » Et debet deferre tonsuram rotundam, non quadratam vel fenestratam, desuper caput ad modum sphaerae, alias debet puniri, ut 25 dist.: « Prohibete. » Aliter non conceditur ei ministrare ad altare, nisi cum tonsura et veste congrua, ne faciat inde scandalum aliis; 25 distinct. cap.: « Presbyter. » Debent etiam benedicere mensam, quandocumque comedunt, et cibo sumpto gratias referre Deo, ut 45 dist.: « Non liceat. »

#### *De Sacramento Matrimonii.*

De Sacramento Matrimonii pauca dicemus, quae spectant ad officium sacerdotis. Est enim sacramentum laicorum; laicis enim concessum est uxores ducere, filios procreare, terram colere, et temporalia possidere. Clericis convenit ab omni strepitu temporalium cessare, vacare contemplationi et orationi, quod designat rasura capitis, et corona quam habent in signum regni quod expectant in Christo, utpote in sorte Domini electi, ut 12, quaest. 1: « Duo sunt; » tamen quidam clerici possunt habere temporalia ad communem utilitatem indigentium, exemplo Domini; 12, quaest. 1: « Habebat et Dominus, » et 12, quaest. 2: « Aurum Ecclesia habet. » Quicquid enim habent clerici de redditibus, debet esse pauperum, et domus eorum debent esse communes ad susceptionem peregrinorum, ut 16, qu. 1, cap. ult. Aliter autem si ex avaritia retinent et accumulunt, apud strictum iudicem rei sunt omnium illorum quibus convenire possunt, ut 47 distinct.: « Sicut hi. » Clerici in minoribus constituti possunt contrahere matrimonium si contrahere volunt; sed in sacris ordinibus a subdiaconatu et supra nunquam, ut 52 distinct.: « De illo clerico. » Perdit tamen beneficium clericus conjugatus: quia non potest habere Ecclesiam et uxorem, seu beneficium ecclesiasticum cum uxore, et extra. de clericis conjug.: « Joan. » Potest autem redire ad clericatum si habuerit unicam uxorem, tamen virginem, ut 52 distinct.: « Nemo. » Ad sacerdotem pertinet curare ne in parochia sua contrahantur clandestina matrimonia et incestuosa; et ideo inveniri debent publica sponsalia, et aliae solemnitates consuetae, per quas excluduntur et revelantur ista impedimenta. Propter quae celebrat sacerdos Missam specialem: in qua benedicit sponsam cum sponso, ut 50, quaest. 5, per totum. Requiritur tamen quod sponsa benedicatur per sacerdotem si sit virgo, ut habeat in se signaculum sacramenti: signat enim Ecclesiam quae virgo Christo nupsit, et virgo in fide permansit, juxta illud Apostoli 2 Corinth. 11: « Despondi enim vos uni viro virginem castam ex-

hibere Christo, » ut notatur extra de bigamis: « Debitum; » propter quod etiam mulier corrupta non potest in sacram virginem consecrari, ut 12, quaest. 5: « Ille autem, » et 26 distinct.: « Acutius: » et ita quantum ad hoc requiritur major castitas in muliere quam in viro. Prius tamen quam sponsalia contrahantur, sacerdos denutiet publice in Ecclesia personas inter quas matrimonium debet contrahi; ut quicumque sciverit aliqua impedimenta, infra certum terminum dicat; aliter sacerdos non celebret sibi Missam, quia graviter puniretur a jure: extra. de clandestinis sponsalibus: « Cum inhibito. » Illud autem non omitto, quod quando sacerdos celebrat Missam sponsalium, facta consecratione, antequam dicat « Pax Domini », benedicat sponsam cum sponso, et peracta benedictione redeunt ad altare recepturi Corpus et Sanguinem in altari. Ego autem laudo, et tutius reputo meo iudicio, ut sacerdos prius sumat Corpus et Sanguinem Domini, propter periculum quod posset intervenire in tanto strepitu hominum de Corpore Christi, et propter periculum conscientiae sacerdotis; et sic peracto illo divino mysterio, sacerdos vadat ad benedicendum illos: sed ante benedictionem sacerdos interroget illos utrum unus consentit in alterum per verba de praesenti, et velit ipsam in conjugem habere; et hoc facto fundat benedictionem super capita amborum, principaliter tamen super mulierem, ratione cujus celebratur Missa, et datur benedictio, sicut patet ex verbis et forma ipsius benedictionis. Et data benedictione, sicut moris est, sacerdos accipiat manum dexteram sponsae in manu sua involuta pallio quo induitur, et assignet eam sponso per verba consueta; et facto signo crucis dimittat eos in pace. In his solemnitatibus maxime attenditur consuetudo; quia in quibusdam Ecclesiis haec solemnitas non servatur. Debet etiam sacerdos curare, ut aliquis de parochia non contrahat cum consanguinea sua vel affine sua usque ad quartum gradum, nec in ipso gradu, ut extra. de consang. et affin.: « Non debet, » et 55, quaest. 5: « Aequaliter. » Si autem ab una parte in quinto gradu, ex altera vero in secundo, vel in tertio, vel quarto; possunt contrahere; quia quoto gradu remotior quis distat a stipite, tanto gradu differt a quolibet per aliam lineam descendantium ab eodem, ut extra. de consang. et affin. cap. ult. Nec debet aliquis contrahere cum affine data consanguineo suo; et hoc si sponsalia contracta fuerint post septennium; quia tale matrimonium non potest contrahi, et contractum dirimitur, extra. de spons. imped. cap.: « Litteras. » Nec inter filios duorum compatrum potest contrahi matrimonium, si per eos vel per alterum eorum compaternitas est contracta, ut extra. de con. spirituali: « Super eo. » Nec debet quis contrahere cum altera quam duxit de facto vivente uxore sua, vel cui dedit fidem contrahendi post mortem uxoris suae, ut extra. de eo qui duxit in matrimonium quam polluit per adulterium, cap. ult. Secus si uxor secunda nescia fuit de prima uxore: nam in hoc casu post mortem primae uxoris remanet matrimonium cum secunda, nec dissolvitur ad petitionem viri, ut extra. de eo qui duxit in matrimonium, cap. 5 et penult. Nec debet quis contrahere mortua uxore cum illa cujus filium uxor sua dum viveret de sacro fonte levavit: secus si aliqua levavit alium ipsius uxoris suae tantum, quia cum illa posset contrahere, ut 59, quaest.

4: « Qui spiritualem, » et cap. « Post uxoris; » quia vir et mulier communicant sibi actiones, et non passiones, ut ibidem notatur: uxor enim viro acquirit compaternitatem, et vir uxori post contractum matrimonium et consummatum tam in baptismo quam in confirmatione sacri chrismatis agendo, idest tenendo filium alterius ad baptismum vel ad chrisma, secus patiendo, idest si ejus filius vel filia teneatur. Dicit enim magister Hugo, quod non solum in baptismo, sed in omnibus praeludiis contrahitur compaternitas, ut 5 quaest. cap. 1: « Vin. » et alii dixerunt, quod non, ut extra. de cognatione spirit.: « Contracto ». Sed quia adhuc sub iudice lis est, ideo de ipsis praeludiis quae praecedunt baptismum, et eorum causis, aliqua disseramus. Cum puer defertur ad Ecclesiam baptizandus, sacerdos primo sufflat in modum crucis in faciem ipsius pueri, ut proprium sacerdotis mysterium Spiritui sancto cedat fugiens malignus spiritus, ut de Consecratione, dist. 4: « Postquam. » Post sufflationem vero signatur baptizandus signaculo sanctae Crucis tam in fronte quam in toto corpore, et ut tunc diabolus recognoscens signaculum suae mortis, sciat eum jam esse signatum per signaculum alienum, ut de Consecratione, distinct. 4: « Postea » Signatur deinde pabulo salis in ore, ut sapientiae sale conditus, foetore careat iniquitatis, ne putrefiat vermibus peccatorum, ut de Consecratione, distinct. 4. Ex hinc postea tanguntur nares et aures baptizandi de saliva sacerdotis, et dicitur ei verbum quod Dominus dixit quando sanavit infirmum mittens digitum suum in auriculam dicens: « Ephpheta, » quod est « aperire, » ut aperiantur nares ad recipiendum notitiam Dei, et aperiantur ei aures ad audiendum mandata Dei, ut de Consecratione, dist. 4: « Postea. » Deinde ungitur in pectore de oleo sanctificato, ut cor illius confortetur in fide sanctae Trinitatis, ut nullae reliquiae latentis inimici remaneant in ipso. Ungitur etiam inter scapulas seu spatulas de eodem oleo sanctificato, ut per Dei gratiam roboretur ad bona opera facienda, ut de Consecratione, distinct. 4. Deinde post baptismum jam receptum ungitur in vertice sive cerebro chrismate, ut regni Christi particeps fiat, et sit paratus reddere rationem de fide quam suscipit in baptismo, ut de consec. distinct. 5: « Postquam. » Et nota quod ante baptismum ungitur oleo sancto, sed post baptismum de chrismate sacro, quia sic est christianus a Christo, ideo ungitur chrismate quia dicitur a Christo: ob hoc etiam omnes baptizati dicuntur christiani, quasi uncti: extra. de sacra unctione: « Cum venisset. »

Circa instructionem populi duo sunt necessaria: scilicet doctrina, et vita pura; ut doceat populum verbo et opere, aedificet exemplo. Debet enim frequenter exponere verba sacrae Scripturae, idest sanctorum Patrum exempla, prout juxta congruitatem temporis et moris viderit expedire ad cognitionem veritatis; et per exempla suae conversationis et vitae aedificare auditores, et adprobare quod dicit in cordibus auditorum ad amorem et affectionem veritatis: ad quod designandum in Exodo ve-

stimentis sacerdotis tintinnabula inserta leguntur, ut audiantur sonitus, quando ingrediuntur sanctuarium in conspectu Domini, ut non moriatur, quia contra se iram iudicis caelestis erigit, nisi vita sacerdotis simul cum linguae sonitu uniformiter elamitet: modumque teneat in praedicando, ut juxta capacitatem audientium praediceat utilia et intelligibilia, non alta quae non possunt intelligi, vel quae aliquo errore vulnèrent conscientias audientium: neque superflua, quae fastidium generant aut taedium in animas auditorum, 45 distinct.: « Sit » rector: » non enim sufficit vita bona sine doctrina. Si enim sacerdos ex ignorantia vel negligentia non praediceat populo suo veritatem, nec exponat eis viam salutis, reus erit apud Deum animarum illarum quae sub ipso perierunt ex defectu doctrinae, 45 distinct.: « Fessus, » et 50 distinct.: « Si » quis diaconus. » Si vero sacerdos diligenter doceat populum, et quantum in se est annuntiat eis viam salutis, et illi non acquiescentes ei pereant, sacerdos sine culpa erit in die iudicii apud Deum, et illi soli remansuri sunt in poenis, ut 47 distinct. cap. ult. Aliter autem quantumcumque sacerdos sit bonae vitae, non sufficit ei ad salutem, si curam habeat animarum: ex sola enim negligentia quam habet ad subditos, damnaretur, ut 40 distinct.: « Sic » propterea. » Heli sacerdos in se sanctus fuit, sed quia filios non erudit in omni disciplina et correctione, superius cecidit, et mortuus est, ut extra. de simon.: « Licet Heli in principio. » Nec iterum sufficit doctrina sine vita. Si enim sacerdos malae vitae sit, perdit fructum doctrinae: quia cum ipse sit criminis, non habet frontem corripiendi criminis, ut 25 distinct. cap. ult. Laici enim de facili corrumpuntur per exempla malae vitae sacerdotis, et ex hoc contemnunt verbum Dei et sacrificium, et ex pravis exemplis sacerdotis peiores fiunt, ut 50 distinct.: « De his vero. » Cujus enim vita despicitur, restat ut ejus praedicatio contemnatur, ut in qu. quarta idem testatur. Tot enim sacerdotes digni sunt mortibus, quot ad subditos perditionis exempla transmittunt, ut 11 quaest. 4: « Praecipue. » Sacerdos autem qui nec habet regimen in se nec rationem, nec delicta detersit, nec filiorum crimen correxit, canis impudicus dicendus est magis quam Episcopus: 2, quaest. 4: « Qui nec. » Sic ergo patet, quod sacerdos debet utrumque habere, scilicet puritatem vitae, et doctrinam, quantum cumque sit hoc difficile. Nam, ut dicit Augustinus: « Nihil in hac vita, et maxime » in hoc tempore difficilius officio Episcopi vel presbyteri, si perfunctorie vel adulatorie res agatur; « sed apud Deum nihil beatius, si eo modo militent, quo noster imperator jubet, » ut 40 distinct.: « Ante omnia. » Dominus noster Jesus Christus, qui est fons omnium bonorum, de cujus plenitudine omnes accipimus, tales faciat sacerdotes nostris temporibus, quales descripti sunt, qui cum Patre et Filio et Spiritu sancto vivunt et regnant per infinita saecula saeculorum. Amen.





# OPUSCULUM LIX.

## EXPOSITIO MISSAE

quid significant illa quae fiunt ibi.

(EDIT. ROM. LXVI.)

### *Prologus.*

In virtute sanctae Crucis, et Sacramenti altaris magna est convenientia et magna efficacia, cum per utrumque excludantur contraria, et renovetur et sanctificetur Ecclesia. Duplici autem ratione renovamur; ut scilicet prius exuamur a vetustate, deinde induamur novitate. Septem sunt quae in Sacramento altaris attenduntur universaliter: scilicet quae sit causa Missae, quae differentia, quis finis, quae virtus, quis ordo, quae ratio, et quae utilitas.

### *De causa Missae.*

Causa Missae est tripartita, scilicet honor sanctorum, salus vivorum, et requies defunctorum. Praemittitur autem quasi prologus oratio et invocatio Trinitatis, in quo praelibatur et ostenditur quae sit causa Missae sequentis: « Suscipe sancta « Trinitas etc. » Ibi continetur, ut sanctis proficiat ad honorem, nobis autem ad salutem, defunctis ad requiem.

### *De differentia Missae.*

Tripartita est ergo differentia: nam secundum differentiam partium Ecclesiae tres sunt missarum differentiae: ut scilicet alia dicatur pro sanctis, alia pro vivis, alia pro defunctis fidelibus. Sunt enim tres partes Ecclesiae: scilicet pars in exultatione, pars in peregrinatione, et pars in expectatione. In exultatione sunt sancti qui Christi vestigia sunt secuti: in peregrinatione sunt vivi, subjacentes veritati et tribulationi: in expectatione sunt fideles defuncti, qui expectant opem et requiem.

### *De fine Missae.*

Secundum harum trium partium differentiam sunt tres differentiae finium missarum et officiorum: alium enim finem habet Missa pro sanctis, quia Ite Missa est; alium finem Missa pro vivis, quia Benedicamus Domino; et alium finem Missa pro defunctis, quia Requiescant in pace. In fine Missae pro sanctis invitamur ad illam gloriam

in qua sancti jam requiescunt, per Ite Missa est, quasi dicat: hostia a patre nobis Missa est, vel a nobis ad Patrem remissa est, ideo festinate ingredi ad illam requiem. Finis vero Missae pro vivis hortatur nos qui sumus in hac peregrinatione, ut deus jugiter Deo benedictionem et gloriam, juxta illud Ps. 115: « Nos qui vivimus, benedicimus « Domino etc. » In fine Missae pro defunctis, eis optamus requiem per Requiescant in pace, quod in principio petimus similiter per Requiem aeternam etc.

### *De virtute Missae.*

Crux Christi est, quae sacramentum est altaris, et quae sacramentum Ecclesiae consecrat et sanctificat.

### *De ordine crucis in serie canonis.*

Et nota quod septem ordines crucis in serie canonis sunt, quos Spiritus sanctus multa sapientia ordinavit. Primus ordo, a « Te igitur ele- « mentissime Pater, » usque ad « Qui pridie: » et tertius est a « Qui pridie » usque ad « unde et « memores: » quartus est ab « Unde et memores, » usque ad « Per quem haec omnia: » quintus est a « Per quem haec omnia, » usque ad « Per ipsum. » Sextus est a « Per ipsum, » usque ad « Pax Do- « mini: » septimus est a « Pax Domini, » usque ad finem Missae. In singulis autem ordinibus sunt causae profundae, et rationes, quae rationabiles movent quaestiones quas spiritus cui vult aperit. In primo ordine canonis tria apponimus, et pro tribus rogamus Deum, et tria petimus: et ideo tres cruces facimus.

### *Quare ibi ponimus panem, vinum et aquam.*

Tria apponimus, idest panem, vinum et aquam. Quare autem ista tria potiusquam alia apponuntur, quaestio oritur. Tripartita vero causa. Prima causa, quia inter omnia humanae vitae sustentandae necessaria, praecipua sunt panis, vinum et aqua, et magis communia, et utiliora, et magis necessaria: propterea potius debuerunt apponi quam alia, et



in illud quod melius et utilius est omnibus et super omnia ad vitam capessendam magis necessarium transformari, idest in Corpus et Sanguinem Christi. Secunda causa est, quia in his res ipsa et virtus sacramenti intelligitur, sine qua ad hoc sacramentum indigne acceditur, et ad iudicium non ad salutem sumitur: in aqua enim intelligitur fides quae latet, et nutritur in aquis; in vino, quod lactificat et accendit, intelligitur spes; in pane, qui confirmat et reficit, intelligitur caritas. Vel in pane qui corroborat, intelligitur Pater, qui est omnium fortitudo. In vino, quod lactificat, intelligitur Filius qui est gaudium omnium nostrum, quod nemo tollet a nobis. In aqua quae mundat et lavat intelligitur Spiritus sanctus. Unde Ezech. 36: « Effundam super  
« vos aquam mundam, et mundabimini ab omni-  
« bus inquinamentis vestris. » Vel in aqua intelligitur munditia castitatis, in pane fortitudo et opera pietatis, in vino quod accendit, rectitudo intentionis. Haec enim tria accedentibus ad altare, ita necessaria sunt, ut sine his cum salute nemo accedere possit: ideo in eminentiori loco paratur altare, ut ascensuri his gradibus studeant seipsos praeparare. Unde in quarto ordine canonis antequam dicamus, « Pa-  
« nem sanctum vitae aeternae, et calicem salutis  
« perpetuae, » pro necessario offerimus hostiam puram, hostiam sanctam, hostiam immaculatam. Sed de his in consequentibus dicendum est. Tertia causa est, quare praedicta tria apponuntur, scilicet panis, vinum et aqua: quia pro tribus generibus hominum rogamus, etiam trina nobis donari petimus. Igitur secundum hoc, tria, panem vinum et aquam ponimus: pro tribus autem rogamus. Primo simul generaliter pro omnibus, ubi dicimus, « In  
« primis quae tibi offerimus pro Ecclesia etc. » Secundo pro familiaribus nostris absentibus, ubi dicimus, « Memento, Domine, famulorum famularum-  
« que etc. » Tertio pro circumstantibus, ubi dicimus, « Et omnium circumstantium. » Tria etiam petimus: primo ut dies nostri disponantur in pace: secundo, ut eruamur ab aeterna damnatione: tertio, ut mereamur numerari in dominico grege. Quae omnia ibi habemus ubi dicimus, « Diesque nostros  
« in tua pace disponas, atque ab aeterna damna-  
« tione nos eripi, et in electorum tuorum jubeas  
« grege numerari. » Quia ergo tria ponimus, tria rogamus, tria petimus, propterea tres cruces facimus, ut per virtutem crucis primo quae apposita sunt benedicantur: secundo, ut hi pro quibus apponuntur roborentur: tertio autem, ut quae petimus, impetrentur.

#### *Quare primo tres cruces facimus.*

Soluta ergo est haec quaestio, quare in hoc ordine tres cruces fiant: ut quando dicimus, « Haec dona,  
« haec munera, haec sancta sacrificia illibata, » scilicet majestati divinae; ut haec dona referantur ad naturam, haec munera ad gratiam, haec sancta sacrificia illibata ad incorruptionis gloriam. Quare autem hoc sacramentum iteretur, vel quomodo bene sumatur, vel quid bene sumptum operetur, vel quare sub hac specie sacramenti veritas lateat, rationabiles quaestiones oriuntur.

#### *Causa quare hoc sacramentum iteretur.*

Quare hoc sacramentum iteretur, triplex est causa. Prima est, ut qui quotidie labimur, per hoc quotidie relevemur. Secundo, ut sicut in medio paradisi erat lignum vitae, ita sit corpus Christi assidue in medio Ecclesiae, quo criminaliter peccantes arceantur, donec per poenitentiam satisficientes ad hoc, et per hoc reconciliati revertantur vel redeant. Tertia est, ut per hoc unum corpus efficiamur cum Christo, et mediante Christo, unum efficiamur cum Deo: unde Jo. 5: « Qui manducat carnem  
« meam, et bibit meum sanguinem, in me manet,  
« et ego in eo. »

#### *Quomodo bene sumatur.*

Deinde bene sumitur, si quis per fidem integram, confessionem puram et poenitentiam dignam ad hoc praeparatur.

#### *Quid bene sumptum operetur.*

Deinde sumptum tria operatur. Primo peccata purgat, secundo virtutes roborat, tertio in vitam aeternam resuscitat. Joan. 6: « Qui manducat meam carnem,  
« et bibit meum sanguinem, habet vitam aeternam,  
« et ego resuscitabo eum in novissimo die. »

#### *Quare hoc Sacramentum speciebus sit velatum.*

Quare sub specie sacramenti veritas lateat vel veletur, triplex est causa. Prima est interrogatio fidei. Secunda augmentum meriti. Tertia defectus infirmi. Primo enim homo fidem interrogat, ut interrogando probet et consentiat. Secundo, ut per fidem probatam majus meritum acquirat. Tertio, ut nostrae infirmitati pareat, dum seipsum in suae majestatis claritate non manifestat, sed sub quodam velamine occultat. In primo ordine petimus ut quae apposita sunt benedicantur. In secundo vero petimus, ut quae in primo benedicta sunt, in verum et summum sacrificium transformentur.

#### *Quare secundo facimus quinque cruces.*

Quinque vero cruces facimus: quia quae benedicta sunt, in id transformari petimus, quod in quinque praecellit omnibus: scilicet in triplici praerogativa et caritate gemina: ideo dicimus, « be-  
« neditam, » omni scilicet plenitudine gratiarum,  
« et ascriptam, » summa dignitate et honore, « Ratam, » summa et aeterna potestate. Sed quia hic triplex praerogativa parum nobis prodesset, nisi caritatem geminam exhiberet; propterea dicimus, « ut nobis  
« corpus et sanguis fiat dilectissimi filii tui Domini no-  
« stri Jesu Christi »: cujus caritas gemina fuit, quam habuit ad Patrem et gregem, Patri obediendo, et pro grege moriendo; vel caritas gemina, qua corpus et animam posuit. Aliter: vel ideo quinque cruces facimus, ut ex praedictis quinque necessaria nobis impetremus: scilicet ex participatione sanguinis remissionem peccatorum, ex participatione corporis, unitatem et societatem sanctorum, ex summa et aeterna potestate, timorem et sollicitudinem mandatorum, ex summa dignitate et honore, honestatem vitae et morum, et ex plenitudine gratiarum impetremus plenitudinem praemiorum.

*Quare tertio duas cruces facimus.*

In tertio ordine petimus, ut quae in primo et secundo benedicta sunt, in verum et summum sacrificium Corporis et Sanguinis Christi transformentur: et ideo duas cruces facimus. Et nota, quod iste ordo brevior est quam alius, sed profundior et magis sapientia plenus. Unde in hoc duplex quaestio movetur: prima est quare non nisi duae cruces fiant: secunda quare in hoc ordine potius quam in ceteris substantia panis et vini in verum corpus Christi et sanguinem transeat. Solutio primae quaestionis est: quia nulla alia nisi hominis natura sola duplex redimenda erat: scilicet corpus et anima. In hoc autem ordine nostra redemptio et reparatio celebratur, per quam humana natura liberatur; et ideo duplex crux fit hic propter redemptionem duplicis naturae. Solutio secundae quaestionis est: quia triplex est ordo, scilicet naturae, justitiae et gratiae. Ordine naturae flos praecedit fructum, ordine justitiae poena sequitur peccatum, ordine gratiae superabundat gratia peccatum, et misericordia impenditur, ubi nullum praecedit meritum. Et ideo nec natura potuit, nec justitia debuit, ut panis et vinum fieret corpus vel caro et sanguis; sed sola gratia divina hoc potuit et voluit, hoc fecit et facit. Sicut autem sunt tria tempora, scilicet tempus ante legem, tempus sub lege, et tempus post legem, vel tempus gratiae. Venit Dominus Jesus Christus, qui hoc sacramentum celebravit et instituit, sicut et in hoc tertio ordine canonis de pane et vino, corpus et sanguinem consecrat et conficit. Et nota, quod haec tria ad hoc sacramentum sunt necessaria: scilicet ordo, actio, et intentio. Ordo, ut sit sacerdos; actio, ut verba proferat, quae Christus dixit in coena; intentio, ut ad hoc proferat: et haec tria requiruntur in aliis sacramentis, praeterquam in baptismo qui est necessitatis. Quandoque vero proferuntur jocosae verba pertinentia ad sacramenta, vel ad instruendum ignaros, et non habent tunc efficaciam illam vel effectum sacramenti. In quarto ordine, praesente vero et summo sacerdote, jam apud Patrem innotescunt preces nostrae; praesente summa et vera hostia, jam minor praetenditur mora; trium magnalium quae fecit celebratur memoria, ut tam per eum quam per ea quae fecit Patris flectatur clementia.

*Quare quarto fiunt quinque cruces.*

Quinque ergo cruces facimus, non quod eum qui praesens est sanctum sanctorum sanctificemus, sed ut per ejus poenitentiam offeramus et sumamus hostiam salutarem, et eidem conformati sanctorum consortiis mereamur admitti. Dominus enim Jesus Christus in passione sua fuit hostia pura, in resurrectione fuit hostia sancta, in ascensione hostia immaculata, panis vitae aeternae esurientibus, calix salutis perpetuae justitiam facientibus. Ei ergo assimilari et conformari debemus, qui ad ipsum offerendum et sumendum accedimus.

*Quare sacerdos extendit brachia per modum crucis.*

Sed quia hoc non potest fieri nisi passionem, resurrectionem et ascensionem ejus studeamus imitari, propterea trium istorum memoriam facimus, cum dicimus: « Unde et memores, Domine, nos tui

« servi, sed et plebs tua sancta ejusdem Christi  
 « Filii Domini Dei nostri tam beatae passionis, nec  
 « non ab inferis resurrectionis, sed et in caelos  
 « gloriosae ascensionis, » ut scilicet ex imaginatione passionis per munditiam castitatis simus puri, et offeramus hostiam puram ex imitatione resurrectionis obtineamus rectitudinem intentionis, et offeramus hostiam immaculatam, ex perceptione panis sancti, vitae aeternae obtineamus virtutem et fortitudinem caritatis, et participatione calicis salutis perpetuae, obtineamus magnitudinem et aeternitatem. Tria ergo in hoc ordine sancto praecedere invenimus, quia tria praedicta necessario primum offerre debemus, ut ad panem sanctum vitae aeternae et ad calicem salutis perpetuae digne perveniamus.

*Alia ratio quare quinque fiunt cruces in hoc quarto ordine.*

Vel ideo quinque cruces facimus, quia propter quinque rogamus, et quia quinque petimus. Propter quinque rogamus. Primo generaliter pro fidelibus vivis omnibus ibi, « Supra quae propitio  
 « ac sereno vultu respicere digneris. » Secundo specialiter pro altaris sacrificio participantibus: ibi, « supplices te rogamus etc. ut quotquot etc. » Tertio pro defunctis familiaribus, ibi, « Memento  
 « etiam, Domine, famulorum famularumque tuarum  
 « etc. » Quarto generaliter pro fidelibus defunctis omnibus, scilicet « ipsis et omnibus in Christo etc. » Quinque petimus: duo scilicet nobis, idest vivis, et tria fidelibus defunctis. Duo nobis, scilicet « ut  
 « omni benedictione caelesti et gratia repleamur. » Tria fidelibus defunctis: scilicet refrigerii sedem, quietis beatitudinem, et luminis claritatem. Ideoque in hoc quarto ordine de omnibus Patribus qui ante legem fuerunt, scilicet Abel, Abraham, Melchisedech praecipue ponitur memoria: quia in eorum personis et sacrificiis, persona et sacrificium Christi praefigurabatur.

*Quare ponuntur duo ordines Sanctorum novi testamenti, primo et quarto ordine, et majores in primo, et plures.*

Sed quare in hoc ordine et in primo ordine canonis duo ordines Sanctorum novi testamenti ponuntur, in primo vero ordine plures et majoris auctoritatis sancti commemorantur? Quia cum isto officio et ministerio, mirabilia et incomprehensibilia agantur, idest substantia panis et vini in veram carnem et verum sanguinem Christi consecretur, majoribus et pluribus auxiliis indigemus. In hoc vero, idest in quarto ordine, idest post consecrationem et pauciores, idest quindecim et minores sancti ordinantur, ut per virtutem sacramenti, quod tractamus et offerimus, eorum adjuti precibus et meritis, quindecim caritatis gradibus ascendamus, et invicti ad sanctorum consortium transeamus. Multo ergo majus est et mirabilius substantiam panis et vini in verum corpus et sanguinem Christi converti quam in sanctorum consortium admitti.

*Quare quinto fiunt tres cruces.*

In quinto ordine, ut petitionum nostrarum consequamur efficaciam, captamus benevolentiam triplicem: quia commendamus personam Patris, perso-

nam Filii, et personam Spiritus sancti. Commendamus personam Patris per ineffabilem potestatem, ubi dicimus, « Domine sancte Patet etc. »: personam Spiritus sancti per multiplicem largitatem, ubi dicimus, « et praestas nobis; » personam Filii, ubi dicimus, « per quem haec omnia. » Permirabilem sapientiae profunditatem! qua ita ordinavit cano- nem, ut ad verbum creationis crucem non faciamus, ad tria autem consequentia faciamus, scilicet « san- ctificas, vivificas, benedicis ». Et quare ter? haec est causa; quia humana natura ex statu pristinae conditionis, nec habuit profectum virtutis, nec sta- bilitatem boni operis, nec consummationem beati- tudinis. Ex prima ratione creationis pollebat naturali ratione, gaudebat arbitrii libertate, per se autem non poterat stare nec proficere sine gratia adjutrice et sanctae Crucis virtute. Ex virtute autem sanctae Crucis et gratiae adjutricis stabilis afficitur et be- nedicta. Propterea ad primum verbum creationis non facimus signum crucis. Et adhuc tria facimus: « sanctificas, » scilicet fide et remissione peccato- rum, « vivificas », scilicet sacramento fidei et virtute bonorum operum; « benedicis, » scilicet plenitudine gratiarum et consummatione bonorum. Ideo ergo tres cruces facimus: quia per ejus virtutem et amo- rem tria obtemus, quibus super omnia indigemus: vel commendamus personam Filii per multiplicem potestatem, ostendentes eum esse primo Deum na- turae, secundo Deum veniae, tertio fontem vitae, quarto regem gloriae. Prima potestas est, quia potest omnia ex nihilo creare: secunda est, quia potest gratiam et virtutem dare et augere: quarta, quia potest emendatos vel perseverantes in bono gloria et beatitudine coronare. Et « per quem Domine « haec omnia semper bona creas; » ecce Deus naturae: « sanctificas, » ecce Deus veniae: « vivi- ficas, » ecce Deus fons vitae, et plenitudo virtu- tis et gratiae: « benedicis, » ecce rex corona ae- ternae gloriae.

In sexto ordine per eum qui venit in sex- ta aetate, et per virtutem crucis ejus, jam ple- nius omnem veritatem cognoscimus, et per eum Deum Patrem honoramus et glorificamus, ubi ma- jori sumpta fiducia et audacia, ut ad summam pa- cis omnium petitionum pertingamus et bravium, colligimus orationem, Pater noster etc.

#### *Quare est ibi tanta diversitas in crucibus.*

In hoc enim ordine quinque cruces facimus, ut per virtutem et amorem crucis, quinque gradus in cognitionem veritatis ascendamus, sine quibus salvi esse non possumus. Primus gradus est fidei de aeternitate Patris; secundus de aequalitate Filii; tertius de unitate essentiae; quartus est de modo essendi; quintus de unitate Spiritus sancti cum utroque, idest cum Patre et Filio. Et nota, quod in hoc ordine longe alius modus et alia ratio quam in aliis ordinibus observatur: eo quod in crucibus faciendis magna diversitas ostenditur, et corpus Domini integrum manu tenetur, et in eodem oratio dominica continetur, unde et inde multae quaestio- nes oriuntur. Prima quaestio est, quare in crucibus faciendis tanta diversitas ostenditur. Sed quae di- versitas ostenditur? prima est quia crux ex utraque protenditur ultra calicem: secunda quia calici coae- quatur, tertia est quia infra calicem coaretatur, quarta et quinta quia ante calicem deprimitur. In

prima ergo cruce aeternitas Filii cum Patre intel- ligitur, in secunda aequalitas, in tertia unitas Spi- ritus sancti, in quarta et quinta quod est aeternus et unus Deus. In eo autem quod dicitur, « Per « ipsum, » intelligitur creatio; in eo quod dicitur, « Cum ipso, » intelligitur operatio; in eo quod dicitur, « In ipso, » intelligitur conservatio. Per Filium enim Pater creavit et creat universam crea- turam, eum Filio Pater etc. cum Spiritu sancto regit et disponit, et conservat: unde dicitur, « Est « tibi Deo Patri omnipotenti in unitate Spiritus « sancti omnis honor et gloria. »

#### *Quare corpus Christi integrum tunc manu teneatur.*

Secunda quaestio est, quare corpus Christi in- tegrum in eisdem crucibus faciendis manu teneatur: quod ideo fit, quia in sexta aetate ita integer et perfectus homo apparuit, et ipsum perfectum et integrum exhibuit, et pro nobis se obtulit: ideo in sexto ordine eum integrum manu tenemus, quem fide et opere perfecte imitari debemus.

#### *Quare oratio dominica dicatur hic.*

Tertia quaestio est, quare in hoc ordine potius quam in aliis dicatur oratio dominica. Dicendum, quod ideo fit, quia in sexta aetate Dominus iste veniens orationem dominicam docuit: et ideo in se- xto ordine convenientius quam in aliis ponenda fuit.

Septimus ordo a pace incipit, et ad pacem tendit: unde, « Pax Domini. » Est enim pax inordinata superbiorum, qui contempto superiori obediunt inferiori. Est pax simulata proditorum, Jerem. 20, Eccles. 12: est pax immunda fornicato- rum, est pax celebrata rebellium et schismatico- rum; est pax gratiosa justorum. Haec est pax Domini ordinata quae ordinem diligit, vera quae neminem fallit, munda quae omnia inquinamenta refugit, pudica et aeterna quae finem nescit. In hoc autem ordine quaestiones multae oriuntur, quae Spiritu sancto revelante solvuntur. Prima quaestio est, quare tres cruces fiant ibi, « Pax Domini etc. » Solutio haec est, quia tres sunt vitae humanae naturae: prima est animae simul cum corpore: se- cunda est animae relicto corpore; tertia est resump- to corpore. In prima vita pax est necessaria, quae longe facit a erimine; in secunda quae longe facit a terrore; in tertia quae longe facit ab utroque consummata gloria et beatitudine, et ideo dicimus, « Pax Domini sit semper vobiseum. » Secunda quaestio est, quare ista non supra vel extra calicem, sed tantum intra fiant. Solutio, quia nec in septima aetate, quando accipietur ab octava pax consummata, non erit quidem unde exterius sit dolendum, sed unde interius potius sit gauden- dum: propterea cruces non extra, sed intra facimus. Tertia quaestio est, quare tertia particula dominici corporis manu teneatur in crucibus faciendis. So- lutio. Tertia pars dominici corporis quam manu teuemus cum cruces facimus, pars est Ecclesiae quae est in exultatione, et gaudet cum Christo in aeterna beatitudine. Quarta quaestio est, quare ea- dem particula factis crucibus descendit in calicem, Solutio. Dicendum, quod quia laborem signat et imitationem dominicae passionis, habet suum interius et suum exterius: exterius pressuram et tri- bulationem, interius gaudium et consolationem:

propterea tertia particula descendit in calicem, quia post laborem cum Christo aeternam recipiet requiem. Quinta quaestio est, quare duae partes extra calicem remaneant. Solutio. Duae partes dominici corporis quae extra calicem remanent, duae partes sunt Ecclesiae: una pars quae est in peregrinatione, alia quae est in expectatione. Sexta quaestio est, quare Agnus Dei dicitur ter, et quare in duobus primis est convenientia, et quare in uno sit dif-

ferentia, ibi, « Dona nobis pacem. » Solutio. Tria sunt tempora; quorum duo sunt tempora misericordiae, tertium est pacis et justitiae. Quia ergo in tempore tribulationis, speratur et expectatur misericordia, in tempore vero resurrectionis pax conservatur atque justitia: propterea quando dicitur Agnus Dei, etc., in duobus primis est convenientia, in tertio vero est differentia.







## OPUSCULUM LX.

### DE EMPTIONE ET VENDITIONE AD TEMPUS

(EDIT. ROM. LXVII.)

Carissimo in Christo fratri Jacobo Viterbiensi. Lectori Florentino, frater Thomas de Aquino salutem. Recepi litteras vestras in quibusdam casibus, super quibus Electi Capuani et meam sententiam petebatis, super collatione habita cum Electo Capuano eodem, et post cum Domino Hugone Cardinali. Duxi ad primum casum taliter respondendum. Quod supposito quod ista consuetudo de dilatione solutionis usque ad spatium trium mensium, sicut proponitur, sit ad commune bonum mercatorum, scilicet pro expediendis mercantiis sive mercationibus, et non in fraudem usurariam introducta: videtur esse distinguendum: quia aut vendit venditor mercationes ad terminum praedictum ultra quantitatem justii pretii propter expectationem, aut secundum justii pretii quantitatem. Si primo modo, non est dubium, usurarium esse contractum, cum expectatio temporis sub pretio cadat. Nec potest esse excusatio, si secundus venditor sit primi minister; cum ad nullam causam liceat pro tempore expectationis pecuniae pretium augeri. Si autem secundo modo, non est usura. Non obstat si pro minori daret, si statim sibi pecunia solveretur: quod per simile potest in aliis debitis videri. Quia si alicui debeatur aliquid ad certum terminum; quodcumque de eo quod est sibi debitum dimitteret si sibi citius solvatur, immunis esset a peccato usurarum talis. Licet enim plus debito accipere propter temporis dilationem usuram sapiat, minus tamen accipere ut sibi citius solvatur, usuram non sapit, maxime ex parte ejus qui minus recipit: quamvis ex parte ejus qui minus dat ubi citius solvat, videatur esse aliquis modus usurae, cum spatium temporis vendat. Unde etiam in casu proposito, plus esset de usura timendum emptori, qui ut ante tres menses minus solvat, justa aestimatione pannos emit, quam venditori qui minus appetit ut citius solvatur.

Ex quo patet quid sit ad secundum casum

respondendum vel dicendum: quia si mercatores Tusciae portantes pannos de nudinis Litinati, ut usque ad tempus Resurrectionis expectent pretium, plus vendant pannos quam debeant secundum commune forum, non est dubium esse usuram; si autem non plus quam valent, plus tamen quam acciperent si eis statim solveretur, non est usura.

In tertio casu similiter videtur, si illi qui pecuniam mutuo cum usuris accipiunt, illam usuram recuperare volunt plus vendendo pannos quam valeant propter expectationem praedictam, non est dubium esse usuram, cum manifeste tempus vendatur. Nec excusantur propter hoc quod volunt se conservare indemnes; quia nullus debet servare indemnitate mortaliter peccando. Et licet alias expensas licite factas, puta in portatione pannorum, possint licite recuperare de eorum venditione, non tamen possunt recuperare usuras quas dederant, cum haec fuerit injusta datio; et praesertim etiam cum dando usuras peccaverint tanquam occasionem peccandi usurariis praebentes: cum necessitas quae ponitur, scilicet ut honorabilius vivant et majores mercationes faciant, non sit talis necessitas, quod sufficiat ad excusandum peccatum praedictum. Patet enim a simili, quia non possit quis in venditione pannorum recuperare expensas quas incaute et imprudenter fecisset.

Patet etiam ex praedictis, quod in quarto casu quaerebatur: nam ille qui ad certum terminum debet, si ante terminum solvit ei de debito aliquid dimittatur, usuram committere videtur: quia manifeste tempus solutionis pecuniae vendidit, unde ad restitutionem tenetur. Nec excusatur per hoc, quod solvendo ante terminum gravatur, vel quod ad hoc ab alio inducitur: quia eadem ratione possent usurarii excusari omnes. Valet.



# OPUSCULUM LXI.

## EPISTOLA EXHORTATORIA AD QUEMDAM

in qua proponit idoneum modum salubriter acquirendi scientiam  
sive humanam sive divinam.

( EDIT. ROM. LXVIII. )

Quia quaesisti a me, in Christo mihi charissime Joannes, qualiter te studere oporteat in thesauro scientiae acquirendo: tale a me tibi super hoc traditur consilium, ut per rivulos non statim in mare eligas introire, quia per faciliora ad difficiliora oportet devenire. Haec est ergo monitio mea et instructio tua. Tardiloquum te esse jubeo, et tarde ad locutorium ascendentem: conscientiae puritatem amplectere, orationi vacare non desinas, cellam frequenter diligas, si vis in cellam vinariam introduci. Omnibus te amabilem exhibe, nihil quaere penitus de factis aliorum, nemini te multum familiarem ostendas, quia nimia familiaritas parit contemptum, et subtractionis a studio materiam sub-

ministrat. De verbis et factis saecularium, nullatenus te intromittas. Discursus super omnia fugias: sanctorum et bonorum imitari vestigia non omittas: non respicias a quo audias, sed quicquid boni dicatur, memoriae recommenda. Ea quae agis et audis, fac ut intelligas; de dubiis te certifies, et quicquid poteris in armariolo mentis reponere, satage sicut cupiens vas implere. Altiora te ne quaesieris. Illa sequens vestigia frondes et fructus in vineam Domini Sabaoth utiles, quamdiu vitam humeris (1) proferes ac produces. Haec si sectatus fueris, ad id attingere poteris quod affectas.

(1) *Forte quamdiu vitam tenueris, sive habueris.*





# OPUSCULUM LXII.

## IN LIBRUM BOETII DE HEBDOMADIBUS, EXPOSITIO

( EDIT. ROM. LXIX. )

### PROLOGUS S. THOMAE

Præcurre prior in domum tuam, et illuc advocare, et illic lude, et age conceptiones tuas.

Eccli. 52, 45.

Habet hoc privilegium sapientiae studium, quod operi suo prosequendo magis ipsa sibi sufficiat. In exterioribus enim operibus indiget homo plurimorum auxilio; sed in contemplatione sapientiae tanto aliquis efficacius operatur, quanto magis solitarius secum commoratur. Et ideo Sapiens in verbis propositis hominem ad seipsum revocat, dicens: « Præcurre prior in domum tuam, » idest ad mentem tuam ab exterioribus sollicite redeas, antequam ab alio occupetur, per cuius solitudinem distrahatur: unde dicitur Sapient. 8, 16: « Intrans in domum meam, conquiescam cum illa, » idest cum sapientia. Sicut autem requiritur ad contemplationem sapientiae quod mentem suam aliquis præoccupet, ut totam domum suam contemplatione sapientiae impleat; ita etiam requiritur quod ipse totus per intentionem interius adsit, ne scilicet ejus intentio ad diversa trahatur: et ideo subdit: « Et illuc advocare; » idest totam intentionem tuam ibi congrega. Sic igitur interiore domo totaliter evacuata, et homine totaliter per intentionem in ea existente, quid agendum sit exponit subdens, « Et illic lude. » Ubi considerandum est, quod sapientiae contemplatio convenienter ludo comparatur, propter duo quae est in ludo invenire. Primo quidem, quia ludus delectabilis est, et contemplatio

sapientiae maximam delectationem habet: unde Eccl. 24, 27, dicitur ex ore sapientiae: « Spiritus meus super mel dulcis. » Secundo, quia operationes ludi non ordinantur ad aliud, sed propter se quaeruntur. Et hoc idem competit in delectationibus sapientiae. Contingit enim quandoque quod aliquis apud seipsum delectatur in consideratione eorum quae concupiscit, vel quae agere proponit. Sed haec delectatio ordinatur ad aliquid exterius, ad quod nititur pervenire: quod si deficiat vel tardetur, delectationi hujusmodi adjungitur non minor afflictio, secundum illud Proverb. 14, 15: « Risus dolore miscbitur. » Sed delectatio contemplationis sapientiae in seipsa habet delectationis causam: unde nullam anxietatem patitur, quasi expectans aliquid quod desit. Propter quod dicitur Sap. 8, 16: « Non habet amaritudinem conversatio illius, nec taedium convictus illius, » scilicet sapientiae. Et ideo divina sapientia suam delectationem ludo comparat, Proverb. 8, 50: « Delectabar per singulos dies, ludens coram eo: » ut per diversos dies, diversarum veritatum considerationes intelligantur. Unde et hic subditur: « Et illic age conceptiones tuas, » per quas scilicet homo cognitionem accipit veritatis.

## LECTIO I.

Postulas a me (1) ut ex hebdomadibus nostris, ejus quaestionis obscuritatem quae continet modum quo substantiae in eo quod sunt, bonae sunt (2), cum non sint substantialia bona, digeram, et paulo evidentius monstrem. Idque eo dicis esse faciendum quod non sit omnibus notum iter hujusmodi descriptionum. Tuus vero testis ipse sum, quam haec vivaciter fueris ante complexus. Hebdomadas vero ego ipse mihi commentor, potiusque ad memoriam meam speculata conservo quam cuiquam participo: quorum lascivia ac petulantia, nihil a joco risuque palitur esse conjunctum (3). Pro hinc tu ne sis obscuritatibus brevitatis adversus: quae cum sint arcani fida custodia, tamen (4) id habent commodi quod cum his solis qui digni sunt loquuntur. Ut igitur in Mathematica fieri solet, ceterisque disciplinis (5), proposui terminos regulasque quibus cuncta quae sequuntur efficiam. Communis animi conceptio est enuntiatio quam quisque probat auditam. Harum duplex modus est. Nam una ita communis est ut omnium sit hominum: veluti si hanc proponas: « si a duobus » aequalibus aequalia demas (6), « quae relinquuntur, aequalia esse; nullus id intelligens negat (7). Alia vero est doctorum tantum, quae tamen ex talibus communibus animi conceptionibus venit, ut est « quae incorporalia sunt, in loco non esse »; et cetera quae non vulgus, sed docti comprobant.

Hujus ergo exhortationis sectator Boetius de suis conceptionibus librum nobis edidit, qui de Hebdomadibus dicitur, idest de editionibus (8): quia in Graeco hebdomada idem est quod edere. In quo quidem libro Boetius duo facit. Primo enim praemittit prooemium; secundo procedit ad operis tractatum, ibi, « Diversum est esse, et id « quod est. » Circa primum tria facit. Primo ostendit de quo sit intentio; secundo quomodo sit tractandum, ibi, « Idque eo dicis esse faciendum « quod non sit omnibus notum iter hujusmodi « descriptionum; » tertio tradit ordinem quo procedendum est, ibi, « Ut igitur in mathematica fieri « solet. » Scribit autem hunc librum ad Joannem diaconum Romanae Ecclesiae, qui ab eo petierat ut ex suis hebdomadibus, idest editionibus, dissere-ret, et exponeret quamdam difficilem quaestionem, per quam solvitur quaedam apparens contrarietas. Dicitur enim, quod substantiae creatae, in quantum sunt, bonae sunt; cum tamen dicatur, quod substantiae creatae non sunt substantialia bona, sed hoc dicitur solius Dei proprium esse. Quod enim convenit alicui in quantum est, videtur ei substantialiter convenire: et ideo si substantiae creatae, in quantum sunt, bonae sunt, consequenter videtur quod sint substantialia bona.

Deinde cum dicit, « Idque eo dicis esse faciendum, quod non sit omnibus notum iter hujusmodi « modi descriptionum, » ostendit per quem modum hic tradere velit, idest non plane, sed obscure: et circa hoc tria facit. Primo ostendit quod intendit obscure dicere; secundo ostendit hunc modum esse sibi assuetum, ibi, « Hebdomadas vero ego

« ipse mihi commentor; » tertio ostendit quod hic modus debeat ei esse acceptus, ibi, « Pro hinc ut « ne sis obscuritatibus brevitatis adversus. » Dicit ergo primo, quod ille ad quem scribit haec, ita petebat praedicta esse scribenda, quod via eorum quae hic scribenda sunt, non esset omnibus nota, qui non eodem desiderio ad haec afficiebantur quo ipse, cui Boetius testimonium perhibet quod praedicta fuerit vivaciter ante complexus, idest vel perspicaciter intelligendo, vel ferventer desiderando.

Deinde cum dicit, « Hebdomadas vero ego ipse « mihi commentor, » ostendit hunc modum etiam sibi esse consuetum; et dicit, quod ipse solitus erat sibi commentari, idest componere vel excogitare quasdam hebdomadas, idest editiones, seu conceptiones, quas potius conservabat eas considerans ad sui memoriam, quam participem eorum faceret aliquem illorum qui propter sui lasciviam et petulantiam, idest luxuriam, et levitatem, « nihil » aliud » a joco et risu patiuntur esse conjunctum, » id est ordinatum vel constructum. Detestantur enim si quis aliquem sermonem conjunxerit aut ordinaverit non ad ludum, sed ad seria pertinentem.

Deinde cum dicit, « Pro hinc tu ne sis obscuritatibus brevitatis adversus, » concludit ex praemissis, quod obscurum sermonem debeat grater suscipere, utpote qui talem sermonem ipse petierat; et hoc est quod dicit: « Pro hinc, » quia scilicet hoc fecisti, ne iter nostrarum descriptionum esset omnibus pervium, « ne sis adversus, » idest contrarius, « obscuritatibus brevitatis, » idest obscuritati praesentis libri, quae est brevitati conjuncta. Ex hoc enim quod aliqua breviter dicuntur, magis solent esse obscura. Obscuritas autem cum secretum fideliter custodiat, hoc affert utilitatis quod loquitur « solum cum illis qui digni sunt, » idest cum intelligentibus et studiosis, qui digni sunt ad secreta sapientiae admitti.

Deinde cum dicit, « Ut igitur in mathematica « fieri solet, ceterisque disciplinis, proposui terminos regulasque, quibus cuncta quae sequuntur « efficiam, » ostendit quo ordine sit procedendum, utpote (1) per ea quae sunt per se nota: et circa hoc duo facit. Primo ponit ordinem procedendi; secundo notificat illa ex quibus procedere intendit, ibi, « Communis animi conceptio est enuntiatio quam « quisque probat auditam. » Dicit ergo primo, quod ipse intendit primo proponere quaedam principia per se nota, quae vocat « terminos et regulas. » « Terminos » quidem, quia in hujusmodi principiiis stat omnium demonstrationum resolutio; « regulas » autem, quia per eas dirigitur aliquis in cognitionem sequentium conclusionum. Ex hujusmodi autem principiiis intendit concludere et facere nota omnia quae consequenter tractanda sunt, sicut fit in geometria, et in aliis demonstrativis scientiis; quae ideo dicuntur disciplinae, quia per eas discipulis aggregatur scientia ex demonstratione quam magister proponit.

(1) *Al. deest a me.*

(2) *Al. quod sint, bonae sint.*

(3) *Al. disjunctum.*

(4) *Al. tum.*

(5) *Al. additur etiam.*

(6) *Al. auferas.*

(7) *Al. neget.*

(8) *V. Dissertat. in fine praeced. Vol.*

(1) *Al. ut patet.*



Deinde cum dicit, « Communis animi conceptio est enuntiatio quam quisque probat auditam, » notificat principia per se nota: et primo per definitionem; secundo per divisionem, ibi, « Harum autem duplex est modus. » Circa primum considerandum est, quod huiusmodi principia, quae sunt termini, quia regulae demonstrationum sunt, vocantur communes animi conceptiones. Definit ergo animi conceptionem communem, dicens: « Communis animi conceptio est enuntiatio quam quisque probat auditam, » id est quam quilibet approbat statim ut eam audit. Aliae enim propositiones quae his demonstrantur, non statim ex ipso auditu approbantur, sed oportet ut per alia aliqua fiant nota. Hoc autem non est procedere in infinitum: unde oportet pervenire ad aliqua quae statim per se sunt nota: unde dicuntur communes animi conceptiones, et communiter cadunt in conceptione cujuslibet intellectus: cujus ratio est, quia praedicatum est de ratione subjecti; et ideo statim nominato subjecto, et intellecto quid sit, statim manifestum est praedicatum ei inesse.

Deinde cum dicit, « Harum autem duplex est modus, » dividit praedicta principia, dicens, quod praedictarum communium animi conceptionum duplex est modus. Quaedam enim animi conceptiones sunt communes hominibus omnibus; sicut ista,

« Si ab aequalibus aequalia auferas, quae relinquantur sunt aequalia. » Alia vero animi conceptio est communis solum doctis, quae derivatur a primis animi conceptionibus, quae sunt omnibus hominibus communes: et huiusmodi est, « incorporea non esse in loco: » quae non approbantur a vulgo, sed solum a sapientibus. Hujus autem distinctionis ratio est, quia cum communis animi conceptio, vel principium per se notum, sit aliqua propositio ex hoc quod praedicatum est de ratione subjecti; si illud idem quod significatur per subjectum et praedicatum, cadat in cognitionem omnium; consequens est quod huiusmodi propositio sit per se nota omnibus; sicut quid sit aequale, notum est omnibus, et similiter quid sit subtrahi; et ideo praedicta propositio est (1) omnibus per se nota: et similiter, « omne totum est majus sua parte », et aliae huiusmodi. Sed ad apprehendendam rem incorpoream solus intellectus sapientium consurgit: nam vulgarium hominum intellectus non transcendunt imaginationem, quae est solum corporaliu rerum; et ideo ea quae sunt propria corporum, puta, esse in loco circumscriptive, intellectus sapientium statim removet a rebus incorporeis; quod vulgus facere non potest.

(1) *Al.* in omnibus.

## LECTIO II.

Diversum est esse, et id quod est: ipsum enim esse nondum est. At vero id quod est, accepta essendi forma, est, atque consistit. Quod est, participare aliquo potest, sed ipsum esse (1) nullo modo aliquo participat. Fit enim participatio, cum aliquid jam est. Est autem aliquid cum esse susceperit. Id quod est, habere aliquid, praeterquam quod ipsum esse (2), potest; ipsum vero esse nihil aliud praeter se habet admixtum. Diversum est tamen esse aliquid in eo quod est (3), et esse aliquid: illic enim accidens, hic substantia significatur. Omne quod est, participat eo quod est esse, ut sit; alio (4) vero participat ut aliquid sit; ac per hoc id quod est, participat eo quod est esse, ut sit; est vero, (5) ut participare alio quolibet possit. (6) Omni composito aliud est esse, aliud ipsum est. Omne simplex, esse suum, et id quod est, unum habet. Omnis diversitas discors; similitudo vero appetenda est. Et quod appetit aliud, tale ipsum naturaliter esse ostenditur quale est illud (7) ipsum quod appetit. Sufficiunt igitur quae praemisimus: a prudente vero interprete rationis suis unumquodque aptabitur argumentis.

Supra Boetius dixerat, hoc ordine se processurum ut prius praemitteret quosdam terminos et regulas, ex quibus ad ulteriora procederet; et ideo secundum ordinem praetaxatum, primo incipit praemittere quasdam regulas, sive conceptiones quasdam sapientium; secundo ex illis incipit argumentari, ibi, « Quaestio vero huiusmodi est. » Sicut ante dictum est, illae propositiones sunt maxime notae quae utuntur terminis quos omnes intelligunt. Ea autem quae in omni (8) intellectu cadunt, sunt maxime

communia; quae sunt ens, unum et bonum. Et ideo ponit hic Boetius primo quasdam conceptiones pertinentes ad ens; secundo quasdam pertinentes ad unum, ex quo sumitur ratio simplicis et compositi, ibi, « Omni composito aliud est esse, aliud ipsum est: » tertio ponit quasdam conceptiones pertinentes ad bonum, ibi, « Omnis diversitas discors. » Circa ens autem consideratur ipsum esse quasi quoddam commune et indeterminatum: quod quidem dupliciter determinatur: uno modo ex parte subjecti, quod esse habet; alio modo ex parte praedicti, utpote cum dicimus de homine, vel de quacumque alia re, non quidem quod sit simpliciter, sed quod sit aliquid, puta album vel nigrum. Primo ergo ponit conceptiones quae accipiuntur secundum comparisonem esse ad id quod est; secundo ponit conceptiones quae accipiuntur secundum comparisonem ejus quod est esse simpliciter, ad id quod est esse aliquid, ibi, « Diversum est tamen esse aliquid in eo quod est, et esse aliquid. » Circa primum duo facit. Primo ponit differentiam ejus quod est esse, ad id quod est; secundo manifestat huiusmodi differentiam, ibi, « Ipsum enim esse nondum est. » Dicit ergo primo, quod diversum est esse, et id quod est. Quae quidem diversitas non est hic referenda ad res, de quibus adhuc non loquitur, sed ad ipsas rationes seu intentiones. Aliud autem significamus per hoc quod dicimus esse, et aliud (1) per hoc quod dicimus id quod est; sicut et aliud significamus cum dicimus currere, et

(1) *Al.* deest esse.

(2) *Al.* est.

(3) *Al.* diversum est, tantum esse aliquid, et esse aliquid in eo quod est.

(4) *Al.* alia.

(5) *Al.* est vero, ut participat alio quolibet.

(6) *Al.* hae duae sententiae inverso ordine ponuntur.

(7) *Al.* additur hoc.

(8) *Al.* in omnibus.

(1) *In editione Romana anni 1570, et duabus Venetis Nicolini et Scotti, et aliud significamus cum dicimus currere, intermediis omissis.*

aliud per hoc quod dicitur currens. Nam currere et esse significantur in abstracto, sicut et albedo; sed quod est, id est ens et currens, significantur sicut in concreto, velut album.

Deinde cum dicit, « Ipsum enim esse nondum est, » manifestat praedictam diversitatem tribus modis: quorum primus est, quia ipsum esse non significatur sicut ipsum subjectum essendi, sicut nec currere significatur sicut subjectum cursus: unde, sicut non possumus dicere quod ipsum currere currat, ita non possumus dicere quod ipsum esse sit; sed sicut id ipsum quod est significatur sicut subjectum essendi, sic id quod currit significatur sicut subjectum currendi: et ideo sicut possumus dicere de eo quod currit, sive de corrente, quod currat, inquantum subicitur cursui et participat ipsum; ita possumus dicere quod ens, sive id quod est, sit, inquantum participat actum essendi: et hoc est quod dicit: « Ipsum esse nondum est, » quia non attribuitur sibi esse sicut subjecto essendi; « sed id quod est, accepta essendi forma, » scilicet suscipiendo ipsum actum essendi, « est, atque consistit, » id est in seipso subsistit. Non enim ens dicitur proprie et per se, nisi de substantia, cujus est subsistere. Accidentia enim non dicuntur entia quasi ipsa sint, sed inquantum eis subest aliquid, ut postea dicitur.

Secundam differentiam ponit ibi, « Quod est, participare aliquo potest: » quae quidem differentia sumitur secundum rationem participationis. Est autem participare quasi parte capere; et ideo quando aliquid particulariter recipit id quod ad alterum pertinet, universaliter dicitur participare illud; sicut homo dicitur participare animal, quia non habet rationem animalis secundum totam communitatem; et eadem ratione Socrates participat hominem; similiter etiam subjectum participat accidens, et materia formam; quia forma substantialis vel accidentalis, quae de sui ratione communis est, determinatur ad hoc vel ad illud subjectum; et similiter effectus dicitur participare suam causam, et praecipue quando non adaequat virtutem suae causae; puta, si dicamus quod aer participat lucem solis, quia non recipit eam in ea claritate qua est in sole. Praeternisso autem hoc tertio modo participandi, in possibile est quod secundum duos primos modos ipsum esse participet aliquid. Non enim potest participare aliquid per modum quo materia vel subjectum participat formam vel accidens: quia, ut dictum est, ipsum esse significatur ut quiddam abstractum. Similiter autem nec potest aliquid participare per modum quo particulare participat universale: sic enim ea quae in abstracto dicuntur, participare aliquid possunt, sicut albedo colorem; sed ipsum esse est communissimum: unde ipsum quidem participatur in aliis, non autem participat aliquid aliud. Sed id quod est, sive ens, quamvis sit communissimum, tamen concrete dicitur; et ideo participat ipsum esse, non per modum quo magis commune participatur a minus communi; sed participat ipsum esse per modum quo concretum participat abstractum. Hoc est ergo quod dicit, quod « id quod est, » scilicet ens, « participare aliquo potest; sed ipsum esse nullo modo participat aliquo: » et hoc modo probat ex eo quod supra dictum est, scilicet quod ipsum esse nondum est. Manifestum est enim quod id quod est, non potest aliquo participare: unde consequens est quod participatio con-

veniat alicui cum jam est. Sed ex hoc aliquid est quod suscipit ipsum esse, sicut dictum est. Unde relinquitur quod id quod est, aliquid possit participare; ipsum autem esse non possit aliquid participare.

Tertiam differentiam ponit ibi, « id quod est, habere aliquid, praeterquam quod ipsum est, potest. » Sumitur ista differentia per admixtionem alicujus extranei. Circa quod considerandum est, quod circa quodcumque abstracte consideratum, hoc habet veritatem quod non habet in se aliquid extraneum, quod scilicet sit praeter essentiam suam, sicut humanitas, et albedo, et quaecumque hoc modo dicuntur. Cujus ratio est, quia humanitas significatur ut quo aliquid est homo, et albedo quo aliquid est album. Non est autem aliquid homo, formaliter loquendo, nisi per id quod ad rationem hominis pertinet; et similiter non est aliquid album formaliter, nisi per id quod pertinet ad rationem albi; et ideo hujusmodi abstracta nihil alienum in se habere possunt. Aliter autem se habet in his quae significantur in concreto. Nam homo significatur ut qui habet humanitatem, et album ut quod habet albedinem. Ex hoc autem quod homo habet humanitatem vel albedinem, non prohibetur habere aliquid aliud, quod non pertinet ad rationem horum, nisi solum quod est oppositum his: et ideo homo et album, possunt aliquid aliud habere quam humanitatem vel albedinem. Et haec est ratio quare albedo vel humanitas significantur per modum partis, et non praedicantur de concretis, sicut nec sua pars de suo toto. Quia igitur, sicut dictum est, ipsum esse significatur abstractum, id autem (1) quod est ut concretum; consequens est verum esse quod hic dicitur, quod « id quod est, potest aliquid habere, praeterquam quod ipsum est, » scilicet praeter suam essentiam (2); sed « ipsum esse nihil habet admixtum praeter suam essentiam. »

Deinde cum dicit, « Diversum tamen est esse aliquid in eo quod est, et esse aliquid, » ponit conceptiones quae accipiuntur secundum comparisonem ejus quod est esse simpliciter, ad id quod est esse aliquid: et primo ponit utriusque diversitatem; secundo assignat differentias, ibi, « Illic enim accidens, hic substantia significatur. » Circa primum considerandum est, quod ex quo id quod est, potest aliquid habere praeter suam essentiam, necesse est quod in eo consideretur duplex esse. Quia enim forma est principium essendi, necesse est quod secundum quamlibet formam habitam, habens aliquam esse dicatur. Si ergo forma illa non sit praeter essentiam habentis, sed constituat ejus essentiam; ex eo quod habet talem formam, dicitur habens esse simpliciter, sicut homo ex hoc quod habet animam rationalem. Si vero sit talis forma quae sit extranea ab essentia habentis eam, secundum illam formam non dicitur esse simpliciter, sed esse aliquid: sicut secundum albedinem homo dicitur esse albus: et hoc est quod dicit, quod « diversum est esse aliquid, » quod non est esse simpliciter, et quod aliquid sit « in eo quod est, » quod est proprium esse subjecti.

Deinde cum dicit, « Illic enim accidens, hic substantia significatur, » ponit tres differentias inter praemissa: quarum prima est quod « illic, » id est ubi dicitur de re quod sit aliquid, et non sit simpliciter, significatur « accidens, » quia forma

(1) *Al. deest* autem.

(2) *Al. praeter* quod essentiam.

quae facit huiusmodi esse, est praeter essentiam rei; « hic » autem cum dicitur esse aliquid in eo quod est, « significatur substantia, » quia scilicet forma faciens esse constituit essentiam rei. Secundam differentiam ponit ibi, « Omne quod est, participat eo quod est esse, ut sit: » ubi dicit, quod ad hoc quod aliquid sit simpliciter subjectum, participat ipsum esse; sed ad hoc quod sit aliquid, oportet quod participet alio aliquo; sicut homo ad hoc quod sit albus, participat non solum esse substantiale, sed etiam albedinem. Tertiam differentiam ponit, ibi, « Ac per hoc id quod est, participat eo quod est esse, ut sit; est vero, ut participare alio quolibet possit: » quae quidem accipitur secundum ordinem utriusque, et concluditur ex praemissis. Est autem haec differentia quod primo oportet ut intelligatur aliquid esse simpliciter, et postea quod sit aliquid; et hoc patet ex praemissis. Nam aliquid est simpliciter per hoc quod participat ipsum esse; sed quando iam est (1), scilicet per participationem ipsius esse, restat ut participet quocumque alio, ad hoc scilicet quod sit aliquid.

Deinde cum dicit, « Omni composito aliud est esse, aliud ipsum est, » ponit conceptiones de composito et simplici, quae pertinent ad rationem unius. Est autem considerandum, quod ea quae supra dicta sunt de diversitate ipsius esse et ejus quod est, est secundum ipsas intentiones; hic autem ostendit quomodo applicetur ad res: et primo ostendit hoc in compositis; secundo in simplicibus, ibi, « Omne simplex, esse suum et id quod est, unum habet. »

Est ergo primo considerandum, quod sicut esse et quod est differunt in simplicibus secundum intentiones, ita in compositis differunt realiter: quod quidem manifestum est ex praemissis: dictum est enim supra, quod ipsum esse neque participat aliquid, ut ejus ratio constituatur ex multis; neque habet aliquid extraneum admixtum, ut sit in eo compositio accidentis; et ideo ipsum esse non est compositum. Res ergo composita non est suum esse: et ideo dicit, quod in « omni composito aliud est esse, et aliud ipsum » compositum, quod est « participatum (2) ipsum esse. »

Deinde cum dicit, « Omne simplex, esse suum et id quod est, unum habet, » ostendit qualiter se habet in simplicibus; in quibus necesse est quod ipsum esse, et id quod est, sit unum et idem realiter. Si enim esset aliud realiter id quod est et ipsum esse; iam non esset simplex, sed compositum.

Est tamen considerandum, quod cum simplex dicatur aliquid ex eo quod caret compositione, nihil prohibet aliquid esse secundum quid simplex, in quantum caret aliqua compositione, quod tamen non est omnino simplex: unde ignis et aqua dicuntur simplicia corpora; in quantum carent compositione quae est ex contrariis, quae invenitur in mixtis; quorum tamen unumquodque est compositum tum ex partibus quantitatis, tum etiam ex forma et materia. Si ergo inveniantur aliquae formae non in materia; unaquaeque earum est quidem simplex quantum ad hoc quod caret materia, et per consequens quantitate, quae est dispositio materiae; quia tamen quaelibet forma est determinativa ipsius esse, nulla earum est ipsum esse, sed est habens esse. Puta, secundum opinionem Platonis, ponamus formam

(1) *Al.* sed qui est.

(2) *Al.* participandum.

immaterialem subsistere, quae sit idea et ratio hominum materialium, et aliam formam quae sit idea et ratio equorum: manifestum erit quod ipsa forma immaterialis subsistens, cum sit quiddam determinatum ad speciem, non est ipsum esse commune, sed participat illud: et nihil differt quantum ad hoc, si ponamus illas formas immateriales altioris gradus quam sint rationes horum sensibilium, ut Aristoteles voluit: unaquaeque enim (1) illarum, in quantum distinguitur ab alia, quaedam specialis forma est participans ipsum esse; et sic nulla earum erit vere simplex. Id autem erit solum vere simplex, quod non participat esse, non quidem inherens, sed subsistens. Hoc autem non potest esse nisi unum; quia si ipsum esse nihil aliud habet admixtum praeter in quod est esse, ut dictum est; impossibile est id quod est ipsum esse, multiplicari per aliquid diversificans: et quia nihil aliud praeter se habet admixtum, consequens est quod nullius accidentis sit susceptivum. Hoc autem simplex unum: et sublime est ipse Deus.

Deinde cum dicit, « Omnis diversitas discors; similitudo vero appetenda est; » ponit duas conceptiones pertinentes ad appetitum, ex quo definitur bonum. Nam bonum dicitur quod omnia appetunt. Est ergo prima conceptio, quod « omnis diversitas est discors, et similitudo est appetenda. »

Circa quod considerandum est, quod discordia importat contrarietatem appetitus: unde illud dicitur esse discors quod repugnat appetitui. Omne autem diversum, in quantum huiusmodi, repugnat appetitui: cuius ratio est, quia simile augetur et perficitur suo simili. Unumquodque autem appetit suum augmentum et perfectionem; et ideo simile, in quantum huiusmodi, est unicuique appetibile; et pari ratione diversum repugnat appetitui, in quantum diminuit, et perfectionem impedit: et ideo dicit, quod « omnis diversitas » est « discors, » id est ab appetitu discordans; « similitudo vero est appetenda. » Contingit tamen per accidens quod aliquis appetitus abhorret simile et appetit diversum sive contrarium. Nam sicut dictum est, unumquodque primo et per se appetit suam perfectionem, quae est bonum uniuscuiusque, et est semper proportionatum suo perfectibili, et secundum hoc habet similitudinem ad ipsum. Alia vero quae sunt exterius, appetuntur vel refutantur in quantum conferunt ad propriam perfectionem: a qua quidem deficit quandoque aliquid per defectum, quandoque autem per excessum. Nam propria perfectio uniuscuiusque rei in quadam commensuratione consistit: sicut perfectio corporis humani consistit in commensurato calore; a quo si deficiat, appetit aliquod calidum per quod calor augetur: si autem superexcedat, appetit contrarium, scilicet frigidum, per quod ad temperamentum reducatur, in quo consistit perfectio conformis naturae. Et sic etiam unus figulus abhorret alium, in quantum scilicet aufert ei perfectionem desideratam, scilicet lucrum.

Secundam autem conceptionem ponit ibi, « Et quod appetit aliud, tale ipsum naturaliter esse ostenditur quale est illud ipsum quod appetit: » quae concluditur ex praemissis. Si enim similitudo per se est appetenda, consequenter id quod appetit aliud, ostenditur tale naturaliter esse quale est hoc quod appetit, quia scilicet naturalem inclinationem habet ad id quod appetit: quae quidem naturalis

(1) *Al.* mittitur enim.



inclinatio quandoque sequitur ipsam essentiam rei, sicut grave appetit esse deorsum secundum rationem suae essentialis naturae; quandoque vero consequitur naturam alicujus formae supervenientis, sicut cum aliquis habet habitum acquisitum, desiderat id quod convenit ei secundum habitum illum. Ultimo

autem epilogat, et dicit, quod sufficiunt ad propositum ea quae praemissa sunt; et quod ille qui prudenter interpretatur rationes dictorum, poterit unumquodque eorum adaptare congruis argumentis: applicando scilicet ea ad debitas conclusiones, ut patebit in sequentibus.

### LECTIO III.

Quaestio vero hujusmodi est. Ea quae sunt, bona sunt: tenet enim omnis (1) sententia doctorum, omne quod est, ad bonum tendere. Omne autem tendit ad simile. Quae igitur ad bonum tendunt, bona (2) sunt. Sed quemadmodum bona sint, inquirendum est, utrumne participatione, an substantia, Si participatione, per seipsa nullo modo sunt bona: nam quod participatione album est, per se, idest eo quod ipsum est, album non est; et de ceteris qualitatibus eodem modo. Si igitur participatione sunt bona, ipsa per se nullo modo bona sunt. Non igitur ad bonum (3) tendunt. Sed concessum est. Non igitur participatione bona sunt, sed substantia. Quorum vero substantia bona est, id quod sunt, bona sunt. Id autem quod sunt, habent ex eo quod est esse. Esse igitur ipsorum bonum est. Omnium igitur rerum ipsi esse bonum est. Sed si esse bonum est, ea quae sunt, in eo quod sunt, bona sunt, idemque est illis esse quod bona esse (4). Substantialia igitur bona sunt, quoniam non participant bonitatem. Quod si ipsum esse in eis bonum est, non est dubium quin (5) substantialia, cum bona sint, primo sint bono similia; ac per hoc ipsum bonum (6) erunt: nihil enim illi praeter seipsum simile est. Ex quo fit ut omnia quae sunt, Deus sint: quod dictu nefas est. Non sunt igitur substantialia bona, ac per hoc non in (7) his est esse bonum. Non igitur in eo quod sunt, bona sunt (8). Sed nec participant bonitate: nullo enim modo ad bonum tenderent. Nullo igitur modo bona sunt.

Praemissis quibusdam principiis quae sunt necessaria ad propositae quaestionis discussionem, hic accedit ad quaestionem propositam; et circa hoc tria facit. Primo proponit quaestionem; secundo adhibet solutionem, ibi, « Huic questioni talis poterit adhiberi solutio: » tertio excludit quasdam objectiones contra solutionem, ibi, « At non alba in quod sunt alba, esse oportebit ea qua alba sunt. » Circa primum duo facit. Primo praemittit quod quaestio praesupponit; secundo quid in quaestione versetur dubium, ibi, « Sed quemadmodum bona sint, inquirendum est. »

Dicit ergo sic esse ad propositam quaestionem accedendum, ut praesupponamus quod omnia ea quae sunt, bona sint: et ad hoc probandum inducit rationem secundum praemissa, quae talis est. Unumquodque tendit ad suum simile. Unde supra praemissum est: Quod appetit aliud, tale ipsum esse naturaliter ostendit, quale est hoc ipsum quod appetit. Sed omne quod est, ad bonum tendit. Et hoc quidem inducit secundum communem doctorum sententiam. Unde et in principio Ethic., Philosophus dicit, quod bonum enuntiant sapientes esse id quod omnia appetunt. Est enim proprium objectum appetitus bonum, sicut sonus proprium

objectum est auditus. Unde sicut sonus est qui percipitur ab omni auditu; ita oportet bonum esse in quod tendit omnis appetitus: et ita, cum cujuslibet rei sit aliquis appetitus, vel intellectivus, vel sensitivus, vel naturalis; consequens est quod quaelibet res appetat bonum: et ita concluditur quod omnis res sit bona: quod quaestio intenta supponit.

Deinde cum dicit, « Sed quemadmodum bona sint, inquirendum est, » ostendit quid dubium in quaestione versetur; et circa hoc tria facit. Primo proponit quaestionem; secundo objicit contra utrumque membrorum quaestionis, ibi, « Si participatione per se ipsa nullo modo sunt bona; » tertio ex hoc ulterius procedit ad excludendum primam suppositionem, « Non igitur in eo quod sunt, bona sunt (1). » Dicit ergo primo, quod, supposito omnia esse bona, inquirendum est de modo, quomodo scilicet bona sint. Dicitur autem aliquid de aliquo dupliciter. Uno modo substantialiter, alio modo per participationem. Est ergo quaestio utrum entia sint bona per essentiam, vel per participationem.

Ad intellectum hujus quaestionis considerandum est, quod in ista quaestione praesupponitur quod aliquid esse per essentiam et per participationem sint opposita (2). Et in uno quidem supradictorum participationis modorum manifeste verum est: scilicet secundum illum modum quo subjectum dicitur participare accidens, vel materia formam (est enim accidens praeter naturam subjecti, et forma praeter ipsam substantiam materiae): sed in alio participationis modo, quo scilicet species participat genus, hoc verum est quod species participat genus. Hoc etiam verum est secundum sententiam Platonis, qui posuit aliam esse ideam animalis, et bipedis hominis. Sed secundum sententiam Aristotelis, qui posuit quod homo vere est id quod est animal, quasi essentia animalis non existente praeter differentiam hominis; nihil prohibet, id quod per participationem dicitur, substantialiter praedicari. Boetius autem hic loquitur secundum illum participationis modum quo subjectum participat accidens; et ideo ex opposito dividitur id quod substantialiter et participative praedicatur, ut patet per exempla quae subsequenter inducit.

Deinde cum dicit, « Si participatione, per seipsa nullo modo sunt bona, » objicit contra utrumque membrum quaestionis: et primo contra hoc quod res sint bonae per participationem; secundo contra hoc quod sint bonae secundum suam substantiam, ibi, « Quorum vero substantia bona est, id quod sunt, bona sunt. » Dicit ergo primo, quod si omnia sunt bona per participationem, sequitur quod

(1) *Al.* communis.

(2) *Al.* additur ipsa.

(3) *Al.* ad bona.

(4) *Al.* illud est esse quod bonum esse.

(5) *Al.* additur etiam.

(6) *Al.* bona.

(7) *Al.* deest in.

(8) *Al.* non sunt igitur in eo quod sunt bona.

(1) *Al.* non ergo sunt in eo quod sunt.

(2) *Al.* proposita.



nullo modo sint bona per se. Et hoc quidem verum est, si per se accipiatur inesse quod ponitur in definitione ejus de quo dicitur, sicut homo per se est animal: quod enim ponitur in definitione alicujus, pertinet ad essentiam ejus; et ita non dicitur de eo per participationem de qua nunc loquimur. Si vero accipiatur per se secundum alium modum, prout scilicet subjectum ponitur in definitione praedicati, sic esset falsum quod hic dicitur: nam proprium accidens secundum hunc modum per se inest subjecto, et tamen participative de eo praedicatur. Sicut igitur Boetius hic accipit participationem, prout subjectum participat accidens; per se autem quod ponitur in definitione subjecti; et sic ex necessitate sequitur quod si res sint bonae per participationem, quod non sint bonae per se: et hoc manifestat per exemplum: « nam id quod est album per participationem, non est album per se, idest in eo quod est ipsum, » quod pertinet ad primum modum dicendi per se: et simile est de aliis qualitatibus. Sic igitur si omnia entia sunt bona per participationem, sequitur quod non omnia sunt bona per se, idest per suam substantiam. Ex hoc ergo sequitur quod substantiae entium non tendant ad bonum; cujus contrarium superius est concessum, scilicet quod omnia in bonum tendant. Videtur ergo quod entia non sint bona per participationem, sed per suam substantiam.

Deinde cum dicit, « Quorum vero substantia bona est, id quod sunt, bona sunt, » objicit in contrarium in hunc modum. Illa quorum substantia bona est, necesse est quod bona sint secundum id ipsum quod sunt: hoc enim ad substantiam cujuscumque rei pertinet quod concurrit ad suum esse. Sed quod aliqua sint, hoc habent ex eo quod est esse: dictum est enim supra, quod est aliquid cum esse susceperit. Sequitur igitur ut eorum quae sunt bona secundum subjectum, ipsum esse sit bonum. Si igitur omnia sunt bona secundum suam substantiam, sequitur quod omnium rerum ipsum esse sit bonum. Et quia praemissa ex quibus argumentando

processit sunt convertibilia, procedit e converso: sequitur enim e converso quod si esse omnium rerum sit bonum, quod ea quae sunt, inquantum sunt, bona sint; ita scilicet quod idem sit unicuique rei esse, et bonum esse: sequitur igitur quod sint substantialia bona ex hoc quod sunt bona, et tamen non per participationem bonitatis. Ex hoc autem quod inconueniens sequatur, ostendit subdens; et dicit, quod si ipsum esse rerum omnium sit bonum; cum ex hoc sequatur quod sint substantialia bona, consequens est etiam quod sint primo bono similia, quod est substantiale bonum, et cui idem est esse et bonum esse: et ex hoc ulterius sequitur quod omnia sint ipsum primum bonum, quia nihil praeter seipsum est simile illi, scilicet quantum ad modum bonitatis. Nihil autem aliud praeter primum bonum eodem modo est bonum sicut ipsum, quia ipsum (1) solum est primum bonum. Dicuntur tamen aliqua ei similia, inquantum sunt secundo bona derivata ab ipso primo et principali bono. Si ergo omnia sunt ipsum primum bonum; cum ipsum primum bonum nihil sit aliud quam Deus, sequitur quod omnia entia sunt Deus: quod dicere nefas est. Sequitur igitur et ea quae praemissa sunt, esse falsa. Non igitur entia omnia sunt substantialia bona, neque in eis ipsum esse est bonum, quia ex his conclusum est quod omnia sunt Deus: et ulterius sequitur quod non omnia sint bona inquantum sunt.

Deinde cum dicit, « Sed neque participant bonitatem, » procedit ulterius ad removendam primam suppositionem; et dicit, quod si huic quod est entia non esse substantialiter bona, adjungatur alia conclusio quae supra inducta est, scilicet quod entia non sunt participative bona, quia per hoc sequeretur quod nullo modo ipsa ad bonum tenderent, ut supra habitum est; videtur ulterius posse concludi, quod nullo modo entia sunt bona: quod est contra id quod supra praemissum est.

(1) *Al. omittitur* quia ipsum.

## LECTIO IV.

Huic quaestioni talis poterit adhiberi solutio. Multa sunt quae, cum actu separari non possint, animo tamen et cogitatione (1) separantur; ut triangulum vel cetera a subjecta materia nullus actu separat, mente tamen segregans ipsum triangulum proprietatemque ejus, praeter materiam speculatur. Amoveamus igitur primi boni praesentiam paulisper ex animo, quod quidem esse constat (2): idque ex omnium doctorum indoctorumque sententia, barbararum quoque gentium religionibus cognosci potest. Hoc igitur paulisper amoto, ponamus omnia esse quae sunt bona; atque ea consideremus (3), quemadmodum bona esse possent, si a primo bono minime defluxissent. Hic intueor in eis aliud esse quod bona sunt, aliud quod sunt. Ponatur enim una eademque substantia bona esse, gravis, alba, rotunda: tunc aliud esset illa ipsa substantia, aliud ejus rotunditas, aliud color, aliud bonitas. Nam si haec singula idem essent quod ipsa substantia, idem esset gravitas quod color, bonum quod album, et quod rotundum (4): quod fieri natura non sinit. Aliud igitur

tunc in eis esset esse, aliud aliquid esse; ac tunc quidem bona essent, esse tamen ipsum minime haberent bonum. Igitur si nullo (1) modo essent non a bono, bona quidem essent, ac non idem essent quod bona; sed eis aliud esset esse, aliud bona esse. Quod si nihil omnino aliud essent nisi bona, neque gravia, neque colorata, neque spatii dimensione distincta (2), neque ulla in eis qualitas esset, nisi tantum bona essent; tunc non res sed rerum viderentur esse principium; nec potius viderentur, sed videretur: unum enim solumque est hujusmodi, quod tantum est bonum, aliudque nihil sit. Quae quoniam non sunt simplicia, esse omnino non poterant nisi ea id quod solum bonum est, esse voluisset. Ideo quoniam esse eorum a boni voluntate defluxit, bona esse dicuntur. Primum enim bonum in eo quod est, bonum (3); secundum vero bonum, quod (4) ex eo fluxit, ejus ipsum esse (5) est bonum, ipsum quoque bonum est; sed ipsum esse omnium rerum ex

(1) *Al. cum cogitatione.*

(2) *Al. contingit.*

(3) *Al. quae consideramus.*

(4) *Al. quod bonum, et bonum quod gravitas: quod fieri etc.*

*S. Th. Opera omnia. V. 17.*

(1) *Forte si cuncta, vel quid simile.*

(2) *Al. distenta.*

(3) *Al. quoniam est, eo quod est, bonum est.*

(4) *Al. quoniam.*

(5) *Al. deest esse.*

eo fluxit quod est (1) primum bonum, et quod bonum tale est ut recte dicatur: In eo quod est, bonum est: Ipsum igitur eorum esse bonum est. Tunc enim in eo quod essent, non essent bona, si a primo bono minime defluxissent.

Praemissa quaestione, et rationibus hinc inde inductis, hic Boetius adhibet solutionem: et circa hoc tria facit. Primo determinat veritatem quaestionis; secundo solvit objectionem, ibi, « Qua in re soluta « est quaestio; » tertio inducit quasdam objectiones contra solutionem, et solvit eas, ibi, « At non alba, « in eo quod sunt alba, esse oportebit ea quae « alba sunt. »

Circa primum tria facit. Primo praemittit quamdam suppositionem; secundo ostendit quid illa suppositione facta sequatur circa bonitatem rerum, ibi, « Hoc igitur paulisper amoto, ponamus omnia « esse quae sunt bona; » tertio ostendit qualiter se habeat bonitas rerum secundum rei veritatem, nulla suppositione facta, ibi, « Quae quoniam non « sunt simplicia, esse omnino non poterant, nisi « ea id quod solum bonum est, esse voluisset. » Circa primum duo facit. Primo praemittit quiddam quod est necessarium ad ostendendum quod possit fieri talis suppositio; secundo suppositionem inducit, ibi, « Amoveamus igitur primi boni praesentiam « paulisper ex animo. »

Dicit ergo primo, quod multa sunt quae non possunt actu separari, quae tamen animo et cogitatione separantur: ejus ratio est, quia alio modo sunt res in anima, et alio modo sunt in materia. Potest ergo esse quod aliquid ex eo ipso modo quo est in materia, habeat inseparabilem conjunctionem ad aliud; et tamen secundum quod est in anima, non habeat inseparabilem conjunctionem ad ipsum, quia scilicet ratio unius est distincta a ratione alterius: et ponit exemplum de triangulo, et aliis mathematicis quae a materia sensibili actu separari non possunt, cum tamen mathematicus abstrahendo mente consideret triangulum et proprietatem ejus praeter materiam sensibilem, quia scilicet ratio trianguli non dependet a materia sensibili.

Deinde cum dicit, « Amoveamus igitur primi « boni praesentiam paulisper ex animo, » ponit suppositionem quam intendit, ut scilicet consideratione mentis removeamus ad tempus praesentiam primi boni a ceteris rebus: quod quidem possibile est secundum ordinem cognoscibilium quo ad nos. Quamvis enim secundum naturalem ordinem cognoscendi, Deus sit primum cognitum, tamen quo ad nos prius sunt cogniti effectus sensibiles ejus; et ideo nihil prohibet in consideratione nostra cadere effectus summi boni, absque hoc quod ipsum primum bonum consideremus. Ita tamen primum removeamus a consideratione mentis, quod omnino constet (2) nobis illud esse. Hoc enim « cognosci potest ex communi omnium sententia tam doctorum « quam indoctorum, » et ulterius etiam « ex ipsis « religionibus gentium barbararum, » quae nullae ossent, si Deus non est.

Deinde cum dicit, « Hoc igitur paulisper amoto, « ponamus omnia esse quae sunt bona, » ostendit quid hae suppositione facta sequatur circa bonita-

tem rerum: et circa hoc duo facit. Primo manifestat quod intendit; secundo probat quiddam quod supposuerat, ibi, « Quod si nihil aliud omnino essent « nisi bona . . . tunc non res, sed rerum videntur esse principium. » Dicit ergo primo, quod remoto per intellectum primo bono, ponamus quod cetera sint bona: quia ex bonitate effectuum devenimus in cognitionem boni primi. Consideremus ergo qualiter possent esse bona, si non processissent a primo bono. Hae autem suppositione facta, videtur in eis aliud esse ipsa bonitas, et ipsum eorum esse. Si enim « ponatur una et eadem substantia esse bona, alba, gravis, rotunda, » sequetur quod « aliud » in illa re esset ejus « substantia, aliud rotunditas, aliud color, aliud bonitas. » Intelligitur enim bonitas uniuscujusque rei virtus ipsius, per quam perficit operationem bonam. Nam virtus est quae bonum facit habentem, et opus ejus bonum reddit, ut per Philosophum patet in lib. Ethic. Quod autem ista sit aliud quam substantia rei, probat per hoc quod singula praemissorum si essent idem quod rei substantia, sequeretur etiam quod omnia illa essent eadem ad invicem; scilicet quod idem esset gravitas quod color, et quod bonum, et quod album, et quod rotunditas: quia quae uni et eidem (1) sunt, sibi invicem sunt eadem. Hoc autem natura rerum non patitur quod omnia ista sint idem. Relinquitur igitur quod, praemissa suppositione facta, aliud esset in rebus ipsum esse, et aliud aliquid esse, puta vel bonum, vel album, vel quidquid taliter dicitur: et sic, praedicta positione facta, res esset quidem bonae, non tamen ipsum eorum esse esset bonum. Sic ergo si aliquo modo essent non a primo bono, et tamen in se essent bona, sequeretur quod non idem esset in eis quod sint talia, et quod sint bona; sed aliud esset in eis esse, et aliud bonum esse.

Deinde cum dicit, « Quod si nihil aliud omnino essent nisi bona . . . tunc non res, sed « rerum viderentur esse principium, » probat quod supposuerat, scilicet quod praedicta suppositione facta, aliud esset in eis bonum esse, et aliud simpliciter esse, vel quidquid aliud esse: quia si nihil aliud esset in eis nisi quod sunt bona, ita scilicet quod « neque essent gravia, neque colorata, neque « distincta aliqua spatii dimensione, » sicut sunt omnia corpora, « nec esset in eis ulla qualitas, » nisi hoc solum quod bona essent; tunc non videretur quod essent res creatae, sed quod essent ipsum primum rerum (2) principium: quia id quod est ipsa essentia bonitatis, est primum rerum principium: et per consequens sequeretur quod non oporteret dicere pluraliter de omnibus eis quod viderentur esse principium rerum, sed singulariter quod videretur esse primum rerum principium, tanquam res bonae omnes essent simpliciter unum: quia solum unum est quod est hujusmodi ut sit tantummodo bonum, et nihil aliud. Hoc autem patet esse falsum. Ergo et primum; quod scilicet res creatae, amoto primo bono, nihil aliud essent quam hoc quod est esse bonum.

Deinde cum dicit, « Quae quoniam non sunt « simplicia, esse omnino non poterant, nisi ea id « quod solum bonum est, esse voluisset, » ostendit quid sit judicandum de bonitate rerum secundum veritatem; et dicit, quia res creatae non habent

(1) *Al. omittitur est hic, et infra.*

(2) *Al. ita tamen quod primum bonum removeamus a consideratione mentis, quod omnino constat nobis illud etc.*

(1) *Supple eadem.*

(2) *Al. iterum.*

omnimodam simplicitatem, ut scilicet nisi aliud sit in eis quam essentia bonitatis; nec etiam omnino esse possent in rerum natura, nisi voluisset ea esse Deus, qui est id quod solum est, in quantum scilicet est ipsa essentia bonitatis; sequitur quod quia esse rerum creatarum effluxit a voluntate illius qui est essentialiter bonum, ideo res creatae bonae esse dicuntur. Primum enim bonum, scilicet Deus, « in eo quod est, bonum est, » quia est essentialiter ipsa bonitas; sed secundum bonum, quod est creatum, est bonum secundum, quod fluxit a primo bono, quod est per essentiam bonum. Cum igitur esse omnium rerum fluxerit a primo bono, consequens est quod ipsum esse rerum creatarum sit bonum, et quod unaquaeque res creata, in quantum est, sit bona. Sed sic solum res creatae non essent bonae in eo quod sunt, si esse earum non procederet a summo bono. Redit ergo ejus solutio ad hoc quod esse primi boni est secundum propriam rationem bonum, quia natura et essentia primi boni nihil aliud est quam bonitas; esse autem secundi boni est quidem bonum, non secundum rationem propriae essentiae, quia essentia ejus non est ipsa bonitas, sed vel humanitas, vel aliquid

aliud hujusmodi; sed esse ejus habet quod sit bonum ex habitudine ad primum bonum, quod est ejus causa: ad quod quidem comparatur sicut ad primum principium et ad ultimum finem; per modum quo aliquid dicitur sanum, quo aliquid ordinatur ad finem sanitatis; ut dicitur medicinale secundum quod est a principio effectivo artis medicinae.

Est enim considerandum secundum praemissa, quod in bonis creatis est duplex bonitas. Una quidem secundum quod dicuntur bona per relationem ad primum bonum; et secundum hoc esse eorum, et quidquid est eis (1) a primo bono, est bonum. Alia vero bonitas consideratur in eis absolute, prout scilicet unumquodque dicitur bonum, in quantum est perfectum in esse et in operari: et haec quidem perfectio non comperit creatis bonis secundum ipsum esse essentiae eorum, sed secundum aliquid superadditum, quod dicitur virtus eorum, ut supra dictum est; et secundum hoc, ipsum esse non est bonum, sed primum bonum habet omnimodam perfectionem in ipso suo esse, et ideo esse ejus est secundum se et absolute bonum.

(1) *Al.* in eis.

## LECTIO V.

Qua in re soluta est quaestio. Ideo enim licet in eo quod sunt, bona sint, non sunt tamen similia primo bono, quoniam non quoquo modo sint res, ipsum esse earum bonum est. Sed quoniam non potest esse ipsum esse rerum, nisi a primo esse defluerit (1), id est a bono, ideo ipsum esse bonum est, nec est simile ei a quo est. Illud enim quoquo modo sit, bonum est in eo quod est: non enim aliud est praeter quam bonum (2): hoc autem nisi ab illo esset bonum, fortasse esse non posset (3); sed bonum in eo quod est esse non posset: tunc enim participaret forsitan bono; ipsum vero esse quod non haberet a bono, bonum habere non posset. Si (4) igitur sublato ab his primo bono, mente et cogitatione, ista, licet essent bona, tamen in eo quod essent bona, esse non possent: et quoniam actu non potuerunt existere, nisi ea (5) quod vere bonum est produxisset: ideo et esse eorum bonum est, et non est simile substantiali bono id quod ab eo effluxit: et nisi ab eo fluxisset, licet essent bona, tamen in eo quod sunt bona esse non possent: quoniam et praeter bonum, et non ex bono essent, cum illud ipsum primum bonum (6), et ipsum esse sit et ipsum bonum, et ipsum esse bonum. At non (7) alba, in eo quod sunt alba, esse oportebit ea quae alba sunt, quoniam ex voluntate Dei fluxerunt, ut essent alba? Minime (8): aliud enim est esse, aliud album esse: hoc ideo, quoniam qui ea ut essent effecit, bonus quidem est, minime vero albus. Voluntate igitur boni communicatum est (9) ut essent bona in eo quod sunt; voluntate vero albi non communicatum ut talis esset proprietas (10), ut esset album in eo quod est: neque enim ex albi voluntate defluerunt. Itaque quia voluit ea esse alba qui erat non albus, sunt alba tantum; quia vero voluit ea esse bona qui erat bonus, sunt bona etiam (11) in eo quod sunt. Secundum igitur hanc rationem cuncta oportet justa esse,

(1) *Al.* ut ipsum esse rerum non a primo esse defluerit.

(2) *Al.* praeterquam quod bonum est.

(3) *Al.* hoc autem, nisi ab illo, nisi esset bonum, fortasse esse posset.

(4) *Al.* omittitur si.

(5) *Al.* additur illud.

(6) *Al.* illud ipsum bonum primum est.

(7) *Al.* additur etiam.

(8) *Al.* vel essent alba minime.

(9) *Al.* voluntatem igitur boni comitata sunt.

(10) *Al.* voluntatem vero albi non sunt comitata, ut talis esset proprietas.

(11) *Al.* deest etiam.

quoniam justus est ipse qui ea esse voluit. Nec hoc quidem: nam bonum esse ad essentiam, justum vero esse ad actum respicit. In Deo autem idem est esse quod agere (1): igitur idem est esse bonum quod justum. Nobis vero non est idem esse quod agere: non enim simplices sumus. Non igitur nobis idem est bonos esse quod justos; sed idem nobis est esse omnibus in eo quod sumus (2). Bona igitur omnia sunt, non autem (3) justa. Amplius. Bonum quidem generale est, justum vero (4) speciale; nec species descendit in omnia: ideo alia quidem justa, alia aliud. Omnia igitur bona (5).

Postquam determinavit veritatem praemissae quaestionis, hic solvit objectionem, ex qua concludabatur quod bona creata sunt bona in eo quod sunt similia primo bono; et circa hoc duo facit. Primo solvit objectionem; secundo colligit quae dicta sunt, ibi, « Si igitur sublato ab his primo bono mente et cogitatione, ista, licet essent bona, tamen in eo quod essent bona, esse non possent. . . ideo et esse eorum bonum est, et non est simile substantiali bono id quod ab eo effluxit. »

Dicit ergo primo, quod ex praemissis patet hanc quaestionem esse solutam; ideo enim non sunt similia primo bono, per hoc quod sunt bona in eo quod sunt, quia ipsum esse rerum creatarum non est bonum absolute, quocumque modo se habeat; sed solum secundum habitudinem ad primum bonum. Sed quia ipsum esse rerum creatarum non potest esse nisi deriventur a primo bono, ideo ipsum (6) eorum esse bonum est; nec est tamen simile in bonitate primo bono: quia illud absolute est bonum, quomocumque se habeat, quia nihil

(1) *Al.* idem autem est in eo esse quod agere.

(2) *Al.* ordine aptiori. Sed idem esse est nobis omnibus in eo quod sumus.

(3) *Al.* etiam.

(4) *Al.* non speciale. Forte non, sed speciale.

(5) *Al.* alia non; omnia vero bona.

(6) *Al.* deest eorum.

est in eo aliud nisi ipsa essentia bonitatis: et hoc ideo est, quia non est in eo perfectio per additionem, sed in suo simplici esse habet omnimodam perfectionem, ut dictum est. Sed bonum creatum forsitan posset esse bonum etiam in se consideratum (1), etiam si detur per impossibile quod non procederet a primo bono, scilicet bonitate quae sibi competeret absolute; sed sic non esset bonum in eo quod est, quia tunc esset bonum per participationem bonitatis superadditae; sed ipsum esse ejus non esset bonum, si a bono non derivaretur, ex cuius habitudine ipsum esse rerum creatarum est bonum.

Deinde cum dicit, « Si igitur sublato ab his « primo bono mente et cogitatione, ista, licet essent bona, tamen in eo quod essent bona, esse « non possent . . . . ideo et esse eorum bonum « est, et non est simile substantiali bono id quod « ab eo effluxit, » colligit in unum quae dicta sunt: et dicit, quod si a rebus per intellectum removeatur primum bonum, omnia alia, licet detur quod essent bona, non tamen possunt esse bona in eo quod sunt. Sed quia non poterunt esse in actu, nisi in quantum sunt producta a primo bono, quod est vere bonum; ideo etiam esse eorum est bonum; et tamen esse fluens a primo bono non est simile primo quod est substantialiter bonum; a quo nisi fluxissent, licet essent bona, non tamen essent bona in eo quod sunt, in quantum scilicet non essent ex primo bono; cum tamen ipsum bonum primum sit et ipsum esse, quia ejus esse est substantia sua; et ipsum bonum, quia est ipsa essentia bonitatis: et ipsum esse bonum, quia in eo non differt esse et quod est.

Deinde cum dicit, « At non alba, in eo quod « sunt alba, esse oportebit ea quae alba sunt, » movet duas objectiones contra praedicta: quarum secundam ponit ibi, « Secundum igitur hanc rationem cuncta oportet justa esse, quoniam justus « est ipse qui ea esse voluit. » Circa primum ponit talem objectionem. Dictum est, quod omnia in eo quod sunt, bona sunt, quia ex voluntate primi boni processit ut essent bona. Numquid ergo omnia alba, in eo quod sunt, alba sunt, quia ex voluntate Dei processit ut alba essent? Sed ipse respondet quod minime hoc oportet: quia his quae sunt alba, aliud est esse simpliciter, quod competit eis secundum principia essentialia, et aliud est ex quo sunt alba: et huiusmodi differentiae inter album et bonum ratio est, quia Deus qui fecit creata bona, et alba, est quidem bonus, non est autem albus. Sic igitur ad voluntatem primi boni consecutum est ut creata essent bona, in quantum voluit ea esse

(1) *Al.* considerandum.

bona, et quod essent bona in eo quod sunt, in quantum sunt a bono producta, quia esse rerum creatarum ex hoc ipso quod est a bono, habet rationem boni, ut dictum est; sed voluntatem Dei non est consecuta talis proprietates, ut id quod est creatum, in eo quod est, sit album, propter hoc quod non defluxit ex voluntate albi, sicut bona fluxerunt ex voluntate boni; ut posset dici quod esse eorum est album, in quantum sunt a primo albo. Sic igitur manifestum est quod quia Deus, qui non est albus, voluit aliqua esse alba; potest quidem hoc solum dici de eis quod sunt alba, non autem in eo quod sunt; sed quia Deus qui est bonus, voluit omnia esse bona, ideo sunt bona in eo quod sunt, in quantum scilicet esse eorum habet rationem boni propter hoc quod est a bono.

Deinde cum dicit, « Secundum igitur hanc rationem cuncta oportet justa esse, quoniam justus « est ipse qui ea esse voluit, » ponit secundam objectionem. Posset enim aliquis dicere: Omnia sunt bona in eo quod sunt, quia ille qui est bonus, voluit ea esse bona: pari ratione omnia oportet esse justa, quia ille qui est justus, voluit ea esse. Sed ipse respondet, quod hoc non sequitur, duplici ratione. Primo quidem, quia hoc quod est bonum, significat naturam quamdam sive essentiam. Dictum est enim quod Deus est ipsa essentia bonitatis, et unaquaeque res secundum perfectionem propriae naturae dicitur bona: sed justus dicitur per respectum ad actum, sicut et quaelibet virtus. In Deo autem idem est esse quod agere, unde in ipso idem est bonum esse quod justum esse; sed nobis non est idem esse quod agere, quia deficiamus a simplicitate Dei: unde nobis non est idem esse bonos et justos; sed esse convenit nobis omnibus in quantum sumus, et ideo etiam bonitas omnibus nobis convenit; sed actus quem recipit (1) justitia, non convenit omnibus, nec in his quibus convenit, est idem quod esse ipsorum: unde relinquatur quod non omnia sunt justa in eo quod sunt.

Secundam rationem ponit ibi, « Amplius. Bonum quidem generale est, justum vero speciale. » Bonum enim est quoddam generale, cuius quaedam species est justitia sicut et ceterae virtutes. In Deo autem invenitur omnis ratio bonitatis; et ideo non solum est bonus, sed justus. Non autem omnes species bonitatis inveniuntur in omnibus, sed diversae in diversis; et ideo non oportet quod species quae est justitia, derivetur ad omnia entia, sicut derivatur bonitas. Unde entium quaedam sunt justa, quaedam vero habent aliam speciem bonitatis; et tamen omnia sunt bona, in quantum derivantur a primo bono. Et in hoc terminatur expositio hujus libri. Benedictus Deus per omnia. Amen.

(1) *Forte* respicit.







# OPUSCULUM LXIII.

## IN LIBRUM BOETII DE TRINITATE, EXPOSITIO.

(EDIT. ROM. LX.)

### PROLOGUS S. THOMAE

Ab initio nativitatis investigabo, et ponam in lucem scientiam illius.

SAP. 6, 24.

Naturalis mentis humanae intuitus pondere corruptibilis corporis aggravatus in prima veritatis luce, ex qua omnia sunt facile cognoscibilia, defigi non potest: unde oportet quod secundum naturalis cognitionis progressum ratio a posterioribus in priora deveniat, et a creaturis in Deum. Rom. 1, 20: « Invisibilia ipsius a creatura mundi per ea quae facta sunt, intellecta conspiciuntur: » et Sap. 13, 5: « A magnitudine speciei et creaturae cognoscibiliter poterit Creator horum videri: » et hoc est quod dicitur Job 56, 25: « Omnes homines vident eum, unusquisque intuetur procul. » Creaturae enim, per quas naturaliter cognoscitur Deus, in infinitum ab ipso distant. Sed quia in his quae procul videntur, facile visus decipitur, ideo ex creaturis in Deum cognoscendum tendentes, in errores multiplices inciderunt: unde Sap. 14 dicitur quod creaturae factae sunt muscipulae pedibus insipientium: et in Psal. 65, 7: « Defecerunt servantes. » Et ideo Deus humano generi aliam tutam viam cognitionis providit, suam notitiam per fidem mentibus hominum infundens: unde dicitur 1 Corinth. 2, 11: « Quae Dei sunt nemo novit nisi Spiritus Dei: nobis autem revelavit Deus per Spiritum suum: » et hic est spiritus quo effeicimur credentes. 2 Corinth. 4, 13: « Habentes eundem spiritum fidei ( sicut scriptum est: Credidi, propter quod locutus sum ) et nos credimus, propter quod et loquimur. » Sicut ergo naturaliter cognitionis principium est creaturae notitia a sensu accepta, ita cognitionis desuper datae principium est primae veritatis notitia per fidem infusa; et hinc est quod diverso ordine hinc inde proceditur. Philosophi enim, qui naturalis cognitionis ordinem sequuntur, praecordinant scientiam de creaturis scientiae divinae, scilicet naturalem metaphysicae; sed apud theologos

proceditur e converso, ut Creatoris consideratio considerationem praeveniat creaturae. Hunc ergo ordinem secutus Boetius, ea quae sunt fidei tractare intendens, in ipsa summa rerum origine principium suae considerationis instituit, scilicet de Trinitate unius simplicis Dei: unde ei competunt verba praemissa: « Ab initio nativitatis investigabo, et ponam in lucem scientiam illius. » In quibus verbis circa praesens opusculum, quod ad Symmachum patritium urbis composuit, tria possunt notari: scilicet materia, modus et finis. Materia quidem hujus operis est in una divina essentia Trinitas personarum, quae consurgit ex prima nativitate, qua divina Sapientia a Patre aeternaliter generatur. Prov. 8, 24: « Non dum erant abyssi, et ego jam concepta eram: » et Ps. 11, 7: « Ego hodie genui te. » Quae quidem nativitas initium est omnis nativitatis alterius, cum ipsa sola sit naturam perfecte capiens generantis: omnes autem aliae imperfectae sunt; secundum quas genitum aut partem substantiae generantis accipit, aut solam similitudinem: unde oportet quod a praedicta nativitate omnis alia nativitas per quamdam imitationem derivetur. Ephes. 5, 13: « Ex quo omnis paternitas in caelo et in terra nominatur. » Et propter hoc dicitur Filius primogenitus omnis creaturae, Col. 1, ut nativitatis origo et imitatio designetur, non eadem generationis ratio: et ideo convenienter dicitur: « Ab initio nativitatis investigabo. » Proverb. 8, 22: « Dominus possedit me in initio viarum suarum. » Nec solum creaturarum est initium praedicta nativitas, sed etiam Spiritus sancti, qui a generante genitoque procedit. Per hoc autem quod non dicit, Initium nativitatis investigabo, sed « Ab initio, » designatur quod in hujusmodi nativitatis initio ejus perscrutatio non finitur, sed quod ab hac incipiens ad alia procedit:

ejus namque doctrina in tres partes dividitur. Prima namque de Trinitate personarum, ex quarum processione omnis alia nativitas et processio derivatur, continetur in hoc libro quem prae manibus habemus, quantum ad id quod de Trinitate et Unitate sciendum est. In alio vero libro quem ad Joannem diaconum Ecclesiae Romanae scribit, agit de modo praedicandi, quo utimur in personarum distinctione, et essentiae unitate: qui sic incipit, « Quæro an « Pater. » Secunda vero pars est de processione bonarum creaturarum a Deo bono, in libro qui ad eundem Joannem scribitur de Hebdomadibus, qui sic incipit, « Postulas a me. » Tertia vero pars est de separatione creaturarum per Christum: quae quidem in duo dividitur. Primo namque proponitur fides quam docuit Christus, qua justificamur, in libro qui intitulatur de Fide christiana, qui sic incipit, « Christianam fidem; » secundo explanatur quid de Christo sentiendum sit, scilicet quomodo duae naturae in una persona convenient, et hoc in libro de duabus Naturis et una persona Christi, ad eundem Joannem scripto, qui sic incipit, « Anxie « te quidem. » Modus autem tractandi de Trinitate

duplex est, ut dicit Augustinus in 1 de Trinitate; scilicet per auctoritates, et per rationes: quorum utrumque Augustinus complexus est, ut ipsemet dicit. Quidam enim sanctorum Patrum, ut Ambrosius et Hilarius, alterum tantum prosecuti sunt, scilicet per auctoritates; Boetius vero elegit prosequi secundum aliud modum, scilicet secundum rationes, praesupponens hoc quod ab aliis fuerat per auctoritates prosecutum. Et ideo modus hujus operis designatur in hoc quod dicit, « investigabo; » in quo rationis inquisitio designatur. Eccli. 59: « Sapientiam, » scilicet Trinitatis notitiam, « antiquorum, » scilicet quam antiqui sola auctoritate asseruerunt, « exquiret sapiens, » idest ratione investigabit. Unde in prooemio praemittit: « Investigatam diutissime. » Finis vero hujus operis est ut occulta manifestentur, quantum in via possibile est. Eccli. 24, 51: « Qui elucidant me, vitam aeternam habebunt. » Et ideo dicit, « Ponam in lucem scientiam illius. » Job 28, 2: « Profunda fluviorum scrutatus est, et abscondita produxit in lucem. »

## PROOEMII TEXTUS ET EXPLANATIO

Investigatam diutissime quaestionem, quantum nostrae mentis igniculum illustrare lux divina dignata est, formatam rationibus, litterisque mandatam, offerendam vobis communicandamque curavi, tam vestri cupidus iudicii, quam nostri studiosus inventi. Qua in re quid mihi sit animi, quoties stylo excogitata commendo, tum ex ipsa difficultate materiae, tum ex eo quod viris (1), idest vobis, tantum colloquor, intelligi potest. Neque enim famae jactatione, et inanibus vulgi clamoribus excitamur; sed si quis est fructus exterior, hic non potest aliam nisi materiae similem sperare sententiam. Quocumque igitur a vobis deieci oculos, partim ignava segnitias, partim callidus livor occurrit; ne contumeliam videar divinis tractatibus irrogare, qui talibus hominum monstris non agnoscenda hic potius quam conculcanda projecerim. Idecirco stylum brevitate contraho, et ex intimis sumpta philosophiae disciplinis novorum verborum significationibus velo; ut haec mihi tantum, vobisque, si quando ad ea converteritis oculos, colloquantur; ceteros vero ita submovimus, ut qui capere intellectu nequiverint, ad ea etiam legenda videantur indigni. Sane tantum a nobis oportet quaeri, quantum humanae rationis intuitus ad Deitatis valet excelsa conscendere. Nam ceteris quoque artibus idem finis (2) est constitutus, quousque potest via rationis accedere. Neque enim medicina aegris semper affert salutem. Sed nulla erit culpa medentis, si nihil eorum quae fieri oportebat, omiserit: idemque in ceteris (3). At quantum haec difficilius quaestio est, tantum facilius debet esse ad veniam. Vobis tamen illud etiam inspiciendum est an ex beati Augustini scriptis semina rationum (4) in nos venientia fructus attulerunt (5). Nunc de proposita quaestione hinc sumamus initium.

(1) *Al. caris.*

(2) *Al. quasi quidam finis.*

(3) *Al. idem quoque sit in ceteris.*

(4) *Al. additur aliquos.*

(5) *Al. intulerint, ac de proposita etc.*

Huic ergo operi prooemium praemittit, in quo tria facit. Primo breviter causas operis praelibat, in quo reddit auditorem docilem; secundo excusationem subjungit, in quo reddit auditorem benevolum, ibi, « Idecirco stylum brevitate contraho: » tertio ostendit sui operis originem et quasi doctrinam esse S. Augustini, in quo reddit auditorem attentum, ibi, « Vobis tamen id inspiciendum an « ex beati Augustini scriptis semina rationum in « nos venientia fructus attulerint. »

Proponit autem quatuor causas operis in prima parte. Primo materialem, cum dicit, « Investigatam « diutissime quaestionem, » scilicet de Trinitate personarum unius Dei: in quo et difficultatem materiae insinuat, quae diutina investigatione indiguit, et studii diligentiam, qua ipse eam diutissime investigavit, ut intelligatur « investigatam » a nobis, quamvis etiam intelligi possit « investigatam » a pluribus, quia a principio nascentis Ecclesiae haec quaestio ingenia fidelium maxime fatigavit. Secundo tangit causam efficientem et proximam, sive secundariam, cum dicit, « Quantum mentis nostrae igniculum: » et primam, sive principalem, ibi, « Illustrare lux divina dignata est. » Proxima quidem causa hujus investigationis fuit intellectus auctoris: qui recte igniculum dicitur. Ignis enim, ut dicit Dionysius, 15 caelest. Hier., maxime competit ad significandas divinas proprietates, tum ratione subtilitatis, tum ratione luminis, tum ratione situs et motus. Quae quidem maxime Deo convenient, in

quo est summa simplicitas et immaterialitas, perfecta caritas, omnipotens virtus et altissima sublimitas; Angelis autem competit medioeriter; sed humanis mentibus infimo modo, quarum propter corpus conjunctum puritas inquinatur, et lux obscuratur, et virtus debilitatur, et motus in summo retardatur. Unde humanae mentis efficacia recte igniculo comparatur. Unde nec ad hujus quaestionis veritatem inquirendam sufficit nisi divina luce illustretur: et sic divina lux est causa principalis, mens autem humana, causa secundaria. Tertio tangit causam formalem, cum dicit, « Formatae rationibus: » et tangit modum agendi quantum ad tria. Primo quantum ad hoc quod argumentando procedit; et ideo dicit, « Formatae rationibus. » Quaestio namque quamdiu probabilibus rationibus sub dubio agitur, quasi informis est, nondum ad veritatis certitudinem pertingens; et ideo formata dicitur quando ad eam ratio additur per quam certitudo de veritate habetur: et in hoc providit intelligentia; quia quod credimus, debemus auctoritati; quod intelligimus, rationi, ut Augustinus dicit. Secundo in hoc quod non solum verbis disseruit, sed etiam scripto mandavit: unde dicit, « Litterisque mandatae: » in quo providit memoriae. Tertio in hoc quod non ad praesentem per modum doctrinae, sed ad absentem per modum epistolae conscripsit. Sic enim et Aristoteles diversimode libros suos composuit: quosdam quidem ad praesentes qui ab ipso audiebant, et hi libri dicuntur auditus, sicut dicitur liber de naturali Auditu: quosdam autem ad absentes scribens, sicut libros de Anima conscriptos esse significatur in 1 Eth., ubi nominantur exteriores locutiones, ut Commentator Graccus ibidem dicit. Unde sequitur: « Offerendam vobis, » quasi majori ad judicandum, « communicandamque curavi, » quasi socio ad profectum: et in hoc iudicium requirit: unde sequitur: « Tam vestri cupidus iudicii, quam « mei studiosus inventi. » Ex hoc enim quod fuit studiosus ad invenendam praedictam quaestionem, rationibus formavit: ex hoc vero quod fuit cupidus iudicii Symmachi, ei formatam obtulit. Quarto tangit causam finalem, cum dicit: « Qua in re quid mihi « sit animi, » idest quem finem intendam ex supradicta re, « quoties excogitata » animo de praedictis, vel quibuscumque aliis, « stylo commendo, « intelligi potest » ex duobus: « tum ex difficultate « materiae, tum ex eo quod colloquor » non multitudini, « sed viris » sapientibus, idest « vobis « tantummodo. » Non enim hunc librum scripsit ut recitaret multitudini, quod quandoque fit propter vulgi favorem; sed tantum uni sapienti: unde sequitur: « Neque enim excitamur, » scilicet ad scribendum « famae jactatione, » idest commendatione, « et « clamoribus vulgi, » sicut poetae recitantes carmina in theatris « inanibus, » quia tales clamores frequenter sine ratione sunt. Et sic removet finem inconvenientem, et subjungit finem debitum: insinuans quidem finem principalem, qui est interior, scilicet perceptio divinae veritatis; et explicans finem secundarium, scilicet iudicium sapientis: unde dicit: « Sed si quis est fructus exterior (1): » quasi dicat: Principaliter incitat me fructus interior: « sed « si aliquis est exterior, hic non potest aliam expectare, » vel « sperare sententiam, nisi materiae similem, » idest convenientem; quasi dicat:

(1) *Al.* interior.

Non aliud necessarium requiro (1) pro fructu exteriori, nisi quod deceat tantam materiam; de qua iudicium concedi non debet neque ignaviter pigris, neque callide invidis, sed solum benevolo sapienti: unde sequitur: « Quocumque igitur a vobis deieci « oculos, » idest ad quoscumque respexi, non ad vos tantum, « considerationi meae occurrit partim, » idest in aliquibus, « ignava, » idest stulta, « se- « gnities, » idest pigritia; « partim livor, » idest invidia, « callidus, » idest astutus ad nocendum; intantum « ut contumeliam videatur irrogare divinis tractatibus, qui haec, » scilicet divina, « projecit, » idest inordinate exposuerit, « talibus « monstris hominum. » Monstra dicuntur homines qui in corpore humano cor gerunt bestiale, per peccatum similes effecti bestiis in affectu. « Non « agnoscenda potius quam conculcanda projecerim: » quia non tam quaerunt agnoscere, quam vituperare quaecumque dicuntur, propter invidiam: unde Matth. 7, 6: « Nolite sanctum dare canibus, neque « mittatis margaritas vestras ante porcos, ne forte « conculcent eas. »

Ne ergo si aliter facerem, videar quod proiecero conculcanda, « ideo stylum brevitate con- « traho. » Haec est secunda pars prooemii, in qua subjungit excusationem: et primo excusat operis difficultatem; secundo operis imperfectionem, ibi, « Sane tantum a nobis oportet quaeri, quantum « humanae rationis intuitus ad Deitatis valet ex- « celsa conscendere. » Tangit autem triplicem difficultatem, quam sponte huic operi adhibet. Prima est ex brevitate scripturae: unde dicit: « ideo « stylum brevitate contraho, » secundum illud Horatii:

Dum brevis esse laboro,  
Obscurus fio.

Secunda ex subtilibus rationibus quas inducit: unde dicit: « Ex intimis disciplinis philosophiae sum- « pta: » quae sunt disciplinae a sensibus abstrahentes, quarum principiis et conclusionibus utitur, et metaphysicae et logicae. Tertia ex novitate verborum: unde dicit: « Velo significationibus novo- « rum verborum. » Quae quidem nova dicuntur vel quantum ad materiam, quia alii tractatores hujus quaestionis non sunt usi talibus verbis; vel quantum ad illos qui legunt, qui talibus verbis non sunt assueti. Tres autem has difficultates quartae addit, quam supra tetigit, quae est materiae difficultas: ut in his quae in hoc libro scribuntur, tantum sapientibus colloquatur, qui haec intelligere poterunt, sicut est auctor ipse, et ille ad quem liber scribitur; alii vero qui capere intellectu non possunt, a lectione excludantur. Non enim libenter leguntur quae non intelliguntur. Et quia ratio ex praecedentibus connectitur, praemisit, « ideo, » quae est nota conclusionis. Littera plana est.

« Sane tantum a nobis oportet quaeri, quantum « humanae rationis intuitus ad Deitatis valet « excelsa conscendere. » Hic excusat operis defectum, quia scilicet non debet requiri ab eo in hoc opere plus certitudinis quam quantum ratio humana valet ad alta Deitatis conscendere: quod probat per locum a minori in aliis artibus, in quibus iste terminus unicuique artificii constituitur ut tantum faciat quantum humana ratio sinit. Non enim sem-

(1) *Al.* aequiro.

per medicus curat; sed si non omittit de his quae facere debet, sine culpa erit; et similiter est in aliis artibus. Unde in hoc opere, ubi est materia difficilis, sensum humanae naturae excedens, magis debet auctori venia dari, si non ad perfectam certitudinem quaestionem deducat.

Deinde cum dicit, « Vobis tamen illud etiam « inspiciendum est, an ex beati Augustini scriptis « semina rationum in nos venientia fructus attulerint, » dicit cujus auctoritatem instruendo sequatur, scilicet Augustini; non ut ea tantum dicat quae in libris Augustini inveniuntur; sed quia ea quae Augustinus de Trinitate dixit, scilicet quod in absolutis divinae personae conveniunt, et in relativis distinguuntur, accipit quasi semina et principia, quibus utitur ad quaestionis difficultatem enodandam; et sic ipsa veritatis explicatio per multas rationes sunt fructus ex seminibus Augustini in ipso provenientes. Qui autem sint convenientes et uberes, ei ad quem scribit, inspiciendum committit, ad propositam quaestionem accedens.

## QUAESTIO I.

### DE DIVINORUM COGNITIONE.

Hic incidit duplex quaestio: prima de divinorum cognitione; secunda de eorum manifestatione.

Circa primum quaeruntur quatuor.

Primo, utrum mens humana ad cognitionem veritatis nova illustratione divinae lucis indigeat.

Secundo, utrum possit ad Dei notitiam pervenire.

Tertio, utrum Deus sit primum quod a mente cognoscitur.

Quarto, utrum ad divinae Trinitatis cognitionem mens humana pervenire per naturalem rationem sufficiat.

### ARTICULUS I.

*Utrum mens humana ad cognitionem veritatis indigeat nova illustratione divinae lucis.*

Ad primum sic proceditur. 1. Videtur quod mens humana in cognitione veritatis cujuslibet indigeat nova illustratione divinae lucis. 2 Corinth. 5, 5: « Non quod sufficientes simus cogitare aliquid a nobis quasi ex nobis; sed sufficientia nostra ex Deo est. » Sed perceptio cujuslibet veritatis non potest esse sine cogitatione (1). Ergo humana mens non potest veritatem aliquam cognoscere, nisi de novo lumine (2) illustretur a Deo.

2. Item. Facilius est aliquam veritatem ab alio addiscere quam per seipsum inspicere: unde qui per seipsum sciunt, praeferuntur aliis qui ab aliis addiscere possunt, in 1 Ethic. Sed non potest homo ab alio addiscere, nisi mens ejus interius doceatur a Deo, ut dicit Augustinus in libro de Magistro, et Gregorius in hom. Pentec. Ergo nec per seipsum potest aliquis veritatem inspicere, nisi de novo lumine mens ejus illustretur a Deo.

3. Item. Sicut se habet oculus corporalis ad corporalia intuenda, ita intellectus ad intelligibilem veritatem inspiciendam, ut patet in 5 de Anima. Sed oculus corporalis non potest videre corporalia, nisi illustretur a sole materiali. Ergo

(1) *Al. cognitione.*

(2) *Al. omittitur lumine.*

nec intellectus potest veritatem inspicere, nisi lumine solis invisibilis, qui est Deus, illustretur.

4. Item. Illi actus in nobis esse dicuntur ad quos exercendos in nobis principia sufficienter habemus. Sed in nobis non est omnino cognoscere veritatem, cum quandoque multi laborent ad veritatem cognoscendam, qui tamen eam cognoscere nequeunt. Ergo non habemus in nobis sufficientia principia ad veritatem cognoscendam: ergo oportet, ad hoc quod eam cognoscamus, ab exteriori nos juvari; et sic idem quod prius.

5. Item. Magis dependet operatio mentis humanae a luce divina quam operatio creaturae sensibilis vel inferioris a luce corporis caelestis. Sed corpora inferiora quamvis habeant formas quae sunt principia naturalium operationum, non tamen possent operationes suas perficere, nisi lumine stellarum superveniente juvarentur: unde Dionysius in 4 cap. de div. Nomin. dicit, quod lumen solis ad generationem corporum visibilium confert, et ad vitam ipsa movet, et nutrit, et auget. Ergo nec menti humanae sufficit ad videndam veritatem lumen naturale, quod est quasi forma ipsius, nisi aliud lumen superveniat, scilicet divinum.

6. Item. In omnibus causis ordinatis per se, et non secundum accidens, effectus non procedit a secunda causa nisi per operationem primae causae, ut habetur in prima propositione de Causis. Sed mens humana ordinatur sub luce increata ordine essentiali, et non accidentali. Ergo operatio mentis humanae, quae est ejus effectus proprius, scilicet cognitio veritatis, non potest provenire ex ea nisi operante prima luce increata. Ejus autem operatio non videtur esse aliud nisi illustratio: ergo etc.

7. Item. Sicut se habet voluntas ad bene volendum, ita intellectus ad recte intelligendum. Sed voluntas non potest bene velle nisi divina gratia adjuvetur, ut dicit Augustinus. Ergo nec intellectus potest veritatem intelligere nisi divina luce illustretur.

8. Item. Id ad quod vires nostrae non sufficiunt, reprehensibiliter nostris viribus adscribimus. Sed reprehensibile est quod aliquis scientiam veritatis suo adscribat ingenio; quinimo jubemur illam Deo adscribere, secundum illud Eccl. ult. 25: « Danti mihi sapientiam, dabo gloriam. » Ergo ad cognoscendum veritatem vires nostrae non sufficiunt; et sic idem quod prius.

Sed contra. Mens humana illustrata est divinitus lumine naturali, secundum illud Psal. 4, 7: « Signatum est super nos lumen vultus tui, Domine. » Si igitur hoc lumen, quod creatum est, non sufficit ad veritatem cognoscendam, sed requirit novam illustrationem; pari ratione lumen superadditum non sufficiet, sed indigebit alio lumine; et sic in infinitum: quod nunquam compleri potest; et sic impossibile est cognoscere aliquam veritatem. Ergo oportet stare in primo lumine; ut scilicet mens lumine naturali sine aliquo lumine superaddito possit veritatem videre.

Item. Sicut visibile in actu sufficiens est ad hoc ut moveat visum, ita intelligibile sufficiens est ut moveat intellectum, si sit proportionatum. Sed mens nostra habet in se unde possit facere intelligibile in actu, scilicet intellectum agentem, et tale intelligibile est ei proportionatum. Ergo non indiget aliqua nova illustratione ad hoc quod veritatem cognoscat.



Item. Sicut se habet lux corporalis ad visionem corporalem, ita se habet intellectus ad intelligibilem visionem. Sed quaelibet lux corporalis, quantumcumque sit parva, facit aliquid videri corporaliter, ad minus seipsam. Ergo et lux intelligibilis, quae est menti connaturalis, sufficit ad veritatem aliquam cognoscendam.

Item. Omnia opera artificialia ex cognitione aliqujus veritatis dependent, cum eorum principium sit scientia. Sed quaedam sunt opera artificialia in quae potest liberum arbitrium per seipsum, secundum Augustinum, ut aedificare domos, et hujusmodi. Ergo ad aliquam veritatem cognoscendam sufficit homo sine nova illustratione divina.

Respondeo dicendum, quod haec est differentia inter virtutes activas et passivas: quod passivae non possunt exire in actum propriae operationis nisi moveantur a suis activis, sicut sensus non sentit nisi moveatur a sensibili; sed virtutes activae possunt operari sine hoc quod ab aliquo moveantur, sicut patet in viribus animae vegetabilis. Sed in genere intellectus invenitur duplex potentia; activa, scilicet intellectus agens, et passiva, scilicet intellectus possibilis. Quidam igitur posuerunt, quod solus intellectus possibilis est potentia animae, intellectus vero agens erat quaedam substantia separata, et haec est opinio Avicennae: secundum quam opinionem sequitur quod anima humana non possit in actum propriae operationis, qui est cognitio veritatis, exire, nisi lumine exteriori illustretur, illius scilicet substantiae separatae, quam dicunt intellectum agentem. Sed quia verba Philosophi in 5 de Anima, magis videntur sonare quod intellectus agens sit potentia animae, et haec etiam auctoritas Scripturae consonat, quae lumine intellectuali nos insignitos esse profitetur, cui Philosophus comparat intellectum agentem: ideo in anima ponitur respectu operationis intelligibilis, quae est cognitio veritatis, et potentia activa et passiva. Unde sicut aliquae potentiae activae naturales suis passivis conjunctae sufficiunt ad operationes naturales; ita etiam anima hominis habens in se potentiam activam et passivam sufficit ad perceptionem (1) veritatis. Cum autem quaelibet virtus creata sit finita, erit ejus efficacia ad determinatos effectus limitata. Unde in aliquos effectus non potest, nisi nova virtus addatur. Sic igitur sunt quaedam intelligibiles veritates ad quas se extendit efficacia intellectus agentis; sicut principia quae naturaliter homo cognoscit, et ea quae ab his deducuntur; et ad haec cognoscenda non requiritur nova lux intelligibilis, sed sufficit lumen naturaliter inditum. Quaedam vero sunt ad quae principia praedicta non se extendunt; sicut sunt ea quae sunt fidei, et rationis facultatem excedentia, ut futura contingentia, et alia hujusmodi; et haec cognoscere mens humana non potest, nisi divinitus novo lumine illustretur, superaddito lumini naturali. Quamvis autem non requiratur novi luminis additio ad cognitionem eorum ad quae naturalis ratio se extendit, requiritur tamen divina operatio; praeter operationem enim qua Deus naturas rerum instituit, singulis formas et virtutes proprias tribuens, quibus possent suas operationes exercere, operatur etiam in rebus opera providentiae, omnium rerum virtutes ad actus proprios

dirigendo et movendo. Ita enim universa creatura divinae gubernationi subicitur, sicut instrumenta subduntur gubernationi artificis, et qualitates naturales virtuti animae nutritivae, ut dicitur 2 de Anima. Unde sicut ex calore naturali sequitur opus digestivae secundum regulam quam imponit calori ipsa vis digestiva, et omnes virtutes inferiores corporum operantur secundum quod diriguntur et moventur ex virtutibus corporum caelestium; ita omnes virtutes activae creatae operantur secundum quod diriguntur et moventur a Creatore. Sic igitur in omni cognitione veritatis indiget mens humana divina operatione; sed in naturaliter cognitis non indiget nova luce, sed solo motu et directione ejus; in aliis autem etiam nova illustratione. Et quia Boetius de talibus loquitur, ideo dicit: « Quamtuam divina lux igniculum nostrae mentis illustrare dignata est. »

Ad primum ergo dicendum, quod quamvis nihil simus sufficientes cogitare ex nobis sine operatione Dei, non tamen oportet quod in qualibet nostra operatione novum lumen nobis infundatur.

Ad secundum dicendum, quod secundum hoc Deus nos interioriter docet in naturali cognitione quod naturale lumen in nobis causat, et illud dirigit in veritatem; in aliis vero etiam lumen novum infundendo.

Ad tertium dicendum, quod oculus corporalis ex illustratione solis corporalis non consequitur lumen aliquod sibi naturale, per quod possit facere visibilia in actu, sicut consequitur mens ex illustratione solis increati; et ideo oculus indiget semper exteriori lumine, et non mens.

Ad quartum dicendum, quod lumen intellectuale ubi est purum, sicut in Angelis, sine difficultate omnia cognita naturaliter demonstrat, ita quod in eis est omnia naturalia cognoscere; in nobis autem lumen hujusmodi est obumbratum per conjunctionem ad corpus et ad vires corporeas; et ex hoc impeditur, ut non possit libere veritatem etiam naturaliter cognoscibilem inspicere, secundum illud Sapient. 9, 15: « Corpus quod corrumpitur, aggravat animam, et terrena inhabitatio deprimit sensum multa cogitantem. » Et ex hoc est quod non est in nobis omnino veritatem cognoscere, scilicet propter impedimenta. Sed unusquisque hoc magis vel minus habet in potestate, secundum quod lumen intellectuale est in ipso purius.

Ad quintum dicendum, quod corpora inferiora quamvis indigeant ad hoc quod operentur, corporibus superioribus, ut ab eis moveantur; non tamen indigent ad proprias operationes perficiendas, quod novas formas ab eis recipiant; et similiter non oportet quod mens humana, quae movetur a Deo ad cognoscendum naturaliter cognita, nova luce perfundatur.

Ad sextum dicendum, quod sicut dicit Augustinus, 8 super Gen. ad litteram, sicut aer illuminatur a lumine praesente, quod si fuerit absens continuo tenebratur; ita mens illustratur a Deo: et ita etiam lumen naturale semper Deus in anima causat, non aliud et aliud, sed idem: non enim est causa fieri ejus solum, sed etiam esse ipsius. In hoc ergo continue Deus operatur in mente quod in ipsa lumen naturale causat, et ipsum dirigit; et sic mens non sine operatione causae primae in suam operationem procedit.

Ad septimum dicendum, quod voluntas nun-

(1) *Al.* ad perfectionem.

quam potest bene velle sine divino instinctu; potest autem bene velle sine gratiae infusione, sed non meritorie; et similiter intellectus non potest sine divino motu veritatem quantumque cognoscere; potest autem sine novi luminis infusione, quamvis non ea quae naturalem cognitionem excedunt.

Ad octavum dicendum, quod hoc ipso quod Deus in nobis lumen naturale conservando causat, et ipsum dirigit ad videndum, manifestum est quod perceptio veritatis sibi praecipue debet ascribi; sicut operatio artis magis ascribitur artificio quam arti.

## ARTICULUS II.

### *Utrum mens humana possit ad Dei notitiam pervenire.*

Ad secundum sic proceditur. 1. Videtur quod Deus nullo modo possit cognosci a nobis. Illud enim quod in summo gradu nostrae cognitionis nobis incognitum remanet, nullo modo est a nobis cognoscibile. Sed in perfectissimo gradu nostrae cognitionis Deo non conjungimur nisi quasi ignoto, ut dicit Dionysius, 1 cap. mysticae Theologiae. Ergo Deus nullo modo est a nobis cognoscibilis.

2. Item. Omne quod cognoscitur, per aliquam formam cognoscitur. Sed, sicut dicit Augustinus, Deus omnem formam nostri intellectus subterfugit. Ergo nullo modo est a nobis cognoscibilis.

3. Item. Cognoscentis et cognoscibilis oportet esse aliquam proportionem, sicut et potentiae cujuslibet ad suum objectum. Sed inter intellectum nostrum et Deum nulla potest esse proportio, sicut nec inter infinitum et finitum. Ergo intellectus nullo modo potest Deum cognoscere.

4. Item. Cum potentia et actus reducantur in idem genus, utpote quae dividunt omnia genera entis, nulla potentia potest in actum qui est extra genus suum, sicut sensus non potest cognoscere substantiam intelligibilem. Sed Deus est extra omne genus. Ergo non poterit aliquo intellectu cognosci, qui sit in genere aliquo. Sed noster intellectus est hujusmodi: ergo etc.

5. Item. Remoto primo, necesse est omnia consequentia removeri. Sed primum intelligibile est quidditas rei: unde quod quid est, dicitur esse proprium objectum intellectus in 3 de Anima; et quid est, est medium demonstrandi an est, et omnes alias rei conditiones. Sed de Deo non possumus scire quid est, ut dicit Damascenus. Ergo nihil possumus de Deo cognoscere.

Sed contra. Rom. 1, 20: « Invisibilia Dei a creatura mundi per ea quae facta sunt intellecta conspiciuntur, sempiterna quoque ejus virtus et divinitas. »

Item. Jerem. 9, 24: « In hoc gloriatur qui gloriatur, scire et nosse me. » Sed hoc esset inanis gloria, nisi eum cognoscere possemus. Ergo Deum cognoscere possumus.

Item. Nihil diligitur nisi cognitum, ut patet per Augustinum in 2 de Trinit. Sed Deum diligere jubemur. Ergo eum cognoscere possumus; cum non praecipitur impossibile.

Respondeo dicendum, quod dupliciter aliqua res cognoscitur. Uno modo per formam propriam, sicut oculus videt lapidem per speciem lapidis: alio modo per formam alterius similem sibi, sicut co-

gnoscitur causa per similitudinem effectus, ut homo per formam suae imaginis. Per formam autem suam aliquid dupliciter cognoscitur. Uno modo per formam quae est ipsa res, sicut Deus cognoscit semper essentiam suam et Angelus seipsum; alio modo per formam quae est aliud ab ipso, sive abstracta sit ab ipso, quando scilicet forma est immaterialior quam sit ipsa res, sicut forma lapidis abstrahitur a lapide; sive sit impressa intelligenti ab eo, utpote quando res est simplicior quam similitudo per quam cognoscitur; sicut Avicenna dicit, quod intelligentias cognoscimus per impressionem earum in nobis. Quia igitur intellectus noster secundum statum viae habet determinatam habitudinem ad formas quae a sensu abstrahuntur, eum comparetur ad phantasmata ut visus ad colores, ut dicitur in 5 de Anima, non potest ipsum Deum cognoscere in hoc statu per formam quae est essentia sua; sed sic cognoscitur in patria a beatis. Similitudo etiam quaecumque impressa ab ipso in intellectum humanum, non sufficit ad hoc ut faciat ejus essentiam cognosci, cum in infinitum excedat quamlibet formam creatam; ratione cujus intellectui non potest esse Deus per formas creatas pervius, ut Augustinus dicit. Nec etiam in statu viae hujus cognoscitur Deus a nobis per species pure intelligibiles quae sint aliqua similitudo ipsius, propter connaturalitatem intellectus nostri ad phantasmata, ut dictum est. Unde relinquitur quod solum per formam effectus cognoscatur. Effectus autem est duplex. Quidam qui adaequatur virtuti suae causae; et per talem effectum cognoscitur plene virtus causae, et per consequens quidditas ejus; alius effectus est qui deficit a praedicta aequalitate; et per talem effectum non potest comprehendi virtus agentis, et per consequens nec essentia ejus; sed cognoscitur de causa tantum quod est. Et sic se habet cognitio effectus ut principium ad cognoscendum de causa an est, sicut se habet quidditas ipsius causae, cum per formam suam cognoscitur. Hoc autem modo se habet omnis effectus ad Deum; et ideo non possumus in statu viae pertingere ad cognoscendum de ipso nisi quia est. Et tamen cognoscentium quia est, unus alio perfectius cognoscit; quia causa tanto ex effectu perfectius cognoscitur, quanto ex effectu magis apprehenditur habitudo causae ad effectum. Quae quidem habitudo in effectu non pertingente ad aequalitatem suae causae, attenditur secundum tria: scilicet secundum progressum effectus a causa, et secundum hoc quod effectus consequitur de similitudine causae suae, et secundum hoc quod deficit ab ejus perfecta consecutione. Et sic tripliciter mens humana proficit in cognitione Dei; quamvis ad cognoscendum quid est non pertingat, sed an est solum. Et primo secundum quod perfectius cognoscitur ejus productio et efficacia (1). Secundo prout nobiliorum effectuum causa cognoscitur; quia eum ejus similitudinem altiori modo gerant, magis eminentiam ejus commendant. Tertio quod magis ac magis cognoscitur elongatus ab his omnibus quae in effectibus apparent. Unde dicit Dionysius de div. Nom., quod cognoscitur ~~omnium~~ causa et excessu et ablatione. In hoc autem profectu cognitionis maxime juvatur mens humana, cum lumen ejus naturale nova illustratione confortatur; sicut est lumen fidei et doni sapientiae

(1) Al. productio (item improductio) res, efficacia.

et intellectus, per quod mens supra se in contemplatione elevatur, in quantum cognoscit Deum esse supra omne id quod naturaliter apprehendit. Sed quia ad ejus essentiam videndam penetrare non sufficit, dicitur in seipsum quodammodo ab excellenti lumine reflecti; et hoc est quod dicitur Genes. 32, 30, super illud, « Vidi Dominum facie ad faciem, » in Glossa Gregorii: « Visus animae, eum in Deum intenditur, immensitatis coruscatione reverberatur. »

Ad primum igitur dicendum, quod secundum hoc dicimur in fine nostrae cognitionis Deum tamquam ignotum cognoscere, quia tunc maxime mens in Dei cognitione perfectissime invenitur quando cognoscitur ejus essentiam esse supra omne id quod apprehendere potest in statu hujus viae; et sic quamvis maneat ignotum quid est, scitur tamen quia est.

Ad secundum dicendum, quod ex hoc quod divina essentia formam nostri intellectus subterfugit, apparet quod non potest cognosci quid est, sed solum an est.

Ad tertium dicendum, quod proportio nihil aliud est quam habitudo duorum ad invicem convenientium in aliquo, secundum quod conveniunt aut differunt. Possunt autem intelligi aliqua esse convenientia dupliciter. Uno modo ex hoc quod conveniunt in eodem genere quantitatis vel qualitatis, sicut habitudo superficiei ad superficiem; aut numeri ad numerum, in quantum unum excedit aliud vel aequatur ei, vel etiam caloris ad calorem: et sic nullo modo potest esse aliqua proportio inter Deum et creaturam, cum non convenient in aliquo genere. Alio modo possunt intelligi convenientia, ita quod conveniunt in aliquo ordine; et sic attenditur proportio inter materiam et formam, faciens et factum; et talis proportio requiritur inter cognoscentem et cognoscibile, cum cognoscibile sit quasi actus potentiae cognoscentis: et sic est proportio creaturae ad Deum ut causati ad causam et cognoscentis ad cognoscibile. Sed secundum infinitum excessum Creatoris super creaturam, non est proportio creaturae ad Creatorem, ut recipiat influentiam ejus secundum totam virtutem ejus, neque ut ipsum perfecte cognoscat, sicut ipse seipsum perfecte cognoscit.

Ad quartum dicendum, quod intellectus et intelligibile sunt unius generis, sicut potentia et actus. Deus autem quamvis non sit in genere intelligibilem quasi sub genere comprehensus, utpote generis naturam participans; pertinet tamen ad hoc genus ut principium. Ejus autem effectus non sunt extra genus intelligibilem: unde et hic per effectus, et in patria per essentiam cognosci poterit. Et praeterea intelligibile videtur magis dici per remotionem quam per positionem. Ex hoc enim unumquodque est intelligibile quod est a materia immune et separatum. Negationes autem in divinis verificantur, quamvis affirmationes sint incompactae, ut Dionysius dicit in 2 cap. caelest. Hierarch.

Ad quintum dicendum, quod quando aliquid cognoscitur non per suam formam sed per suum effectum, forma effectus supplet locum formae ipsius rei; et ideo ex ipso effectu scitur an causa sit.

## ARTICULUS III.

*Utrum Deus sit primum quod a mente cognoscitur.*

Ad tertium sic proceditur. 1. Videtur quod primum quod a mente cognoscitur sive percipitur, sit ipse Deus. Illud enim in quo omnia alia cognoscuntur, et per quod de omnibus (1) quae cognoscimus judicamus, est primo cognitum a nobis; sicut lux est prius nota oculo quam quae per lucem videntur, et principia intelliguntur prius quam conclusiones. Sed omnia in prima veritate cognoscuntur, et per ipsam de omnibus judicamus, ut Augustinus dicit in lib. de Trin. et de vera Religione. Ergo prima veritas est primum cognitum a nobis.

2. Item. Quando sunt plures causae ordinatae, prima causa influit prius in causatum quam causa secunda, et ultimo dimittit ipsum, ut dicitur in lib. de Causis. Sed cum scientia humana sit causata a rebus, scibile vel intelligibile est menti humanae causa intelligendi. Ergo primum intelligibilem prius influit in ipsam. Sed influxus intelligibilis in intellectum, in quantum hujusmodi, est ut intelligatur: ergo Deus, qui est primum intelligibilem, ab intellectu nostro prius intelligitur.

3. Item. In omni cognitione in qua ea quae sunt priora et simpliciora prius cognoscuntur, id quod est primum et simplicissimum, primo cognoscitur. Sed in cognitione humana ea quae prius occurrunt, sunt priora et simpliciora, ut videtur; quia ens est illud quod primo cadit in conceptione humana, ut Avicenna dicit: esse autem est primum inter creata. Ergo et cognitioni humanae primo occurrit Deus, qui est simpliciter primum et simplicissimum.

4. Item. Finis qui est ultimus in consecutione, est primus in intentione. Sed Deus est ultimus finis humanae voluntatis, ad quem omnes alii fines ordinantur. Ergo est primus in intentione. Sed hoc non potest esse nisi sit cognitus: ergo quod primo occurrit cognoscendum, est Deus.

5. Item. Id quod non indiget aliqua praecedente operatione ad hoc quod circa ipsum sit operatio alicujus operantis, prius cadit sub operatione illius operantis, quam hoc quod indiget aliqua operatione alia; sicut lignum jam dolatum prius cadit sub operatione facientis scammum quam lignum adhuc non dolatum. Sed res sensibiles indigent quod abstrahantur a materia per intellectum agentem, antequam intelligantur ab intellectu possibili: Deus autem per seipsum maxime est a materia separatus. Ergo ipse prius intelligitur ab intellectu possibili quam res sensibiles.

6. Item. Naturaliter cognita, et quae non possunt intelligi non esse, sunt illa quae primo nostrae cognitioni occurrunt. Sed cognitio existendi Deum omnibus est naturaliter inserta, ut Damascenus dicit: nec potest Deus cogitari non esse, ut Anselmus dicit. Ergo Deus est primum quod a nobis cognoscitur.

Sed contra. Secundum Philosophum, omnis nostra cognitio ortum habet a sensu. Sed Deus est maxime remotus a sensu. Ergo ipse non est primo cognitum a nobis, sed ultimo.

Item. Secundum Philosophum, ea quae sunt

(1) *Al.* ex omnibus.



posteriora secundum naturam, sunt prius nota quo ad nos; et minus nota secundum naturam, sunt magis nota quo ad nos. Sed creaturae sunt posteriores et minus notae secundum naturam quam ipse Deus. Ergo ipse posterius est notus quo ad nos.

Item. Id quod promittitur ut ultimum praemium, non est primum, quod praecedit omnia merita. Sed cognitio Dei promittitur nobis ut ultimum praemium omnis cognitionis et actionis. Ergo Deus non est primo a nobis cognitus.

Respondeo dicendum, quod quidam dixerunt quod primum quod a mente humana cognoscitur etiam in hac vita, est ipse Deus, qui est veritas prima, et per hunc omnia alia cognoscuntur. Sed hoc aperte est falsum: quia cognoscere Deum per essentiam est hominis beatitudo: unde sequeretur omnem hominem beatum esse. Et praeterea, cum in divina essentia omnia quae dicuntur de ipsa, sint unum, nullus erraret circa ea quae de Deo dicuntur: quod experimento patet esse falsum. Et iterum: ea quae sunt prima in cognitione intellectus, oportet esse certissima: unde intellectus certus est se ea intelligere: quod patet in proposito non esse. Repugnat etiam haec positio auctoritati Scripturae, Exod. 33, 20: « Non videbit me homo et vivet. » Unde alii dicunt, quod divina essentia non est primum cognitum a nobis in via, sed influentia luminis ipsius; et secundum hoc Deus est primum quod a nobis cognoscitur. Sed hoc etiam stare non potest: quia prima lux influxa divinitus in mentem est lux naturalis, per quam constituitur vis intellectiva. Haec autem lux non est primum cognita a mente, neque cognitione qua scitur de ea quid est, cum multa inquisitione indigeat ad cognoscendum quid est intellectus; neque cognitione qua cognoscitur an est, quia intellectum nos habere non percipimus nisi in quantum percipimus nos intelligere, ut patet per Philosophum 9 Ethic. Nullus autem intelligit se aliquid intelligere nisi in quantum intelligit aliquid intelligibile. Ex quo patet quod cognitio alienius intelligibilis praecedat cognitionem qua quis cognoscit se intelligere, et per consequens cognitionem qua quis cognoscit se habere intellectum. Et sic influentia lucis intelligibilis naturalis non potest esse primum cognitum a nobis, et multo minus quaelibet alia influentia lucis. Et ideo dicendum, quod primum cognitum homini potest accipi dupliciter: aut secundum ordinem diversarum potentiarum; aut secundum ordinem objectorum in una potentia. Primo quidem modo, cum cognitio intellectus nostri tota derivetur a sensu, id quod cognoscibile est a nobis a sensu, est primo notum nobis quam id quod est cognoscibile ab intellectu, scilicet singulare vel sensibile intelligibile. Alio modo, scilicet secundum ordinem objectorum in una potentia, cuilibet potentiae est cognoscibile primo suum proprium objectum. Cum autem in intellectu humano sit potentia activa et passiva, objectum potentiae passivae, scilicet intellectus possibilis, erit id quod est actu per potentiam activam, scilicet intellectum agentem: quia potentiae passivae debet respondere suum activum. Intellectus autem agens non facit intelligibilia formas separatas, quae sunt ex seipsis intelligibiles; sed formas quas abstrahit a phantasmatis; et ideo hujusmodi sunt quae intellectus noster intelligit. Et inter haec illa sunt priora quae intellectui abstrahenti primo occurrunt. Haec autem sunt quae plura comprehendunt,

vel per modum totius universalis, vel per modum totius integralis; et ideo magis universalis sunt primo nota intellectui, et composita componentibus, ut definitum partibus definitionis. Et secundum hoc quaedam imitatio intellectus in sensu est, qui etiam quodammodo abstracta a materia recipit. Etiam apud sensum singularia magis communia sunt nota primo, ut hoc corpus quam hoc animal. Unde patet quod Deus et illae substantiae separatae nullo modo possunt esse primo intellecta, sed intelliguntur ex aliis, ut dicitur Rom. 1, 20, « Invisibilia Dei a creatura mundi per ea quae facta sunt, intellecta conspiciuntur. »

Ad primum ergo dicendum, quod ex verbis illis Augustini, et similibus, non est intelligendum quod ipsa increata veritas sit proximum principium quo intelligimus et iudicamus; sed quia per lumen nobis inditum, quod est ejus similitudo, cognoscimus et iudicamus. Nec hoc lumen habet aliquam efficaciam nisi ex prima luce; sicut in demonstrationibus secunda principia non certificant nisi in virtute primorum. Nec tamen oportet quod etiam ipsum lumen inditum, sit primo a nobis cognitum. Non enim eo alia cognoscimus sicut cognoscibili quod sit medium cognitionis: sed sicut eo quod facit alia cognoscibilia: unde non oportet quod cognoscatur nisi in ipsis cognoscibilibus, sicut lux non oportet quod videatur ab oculo nisi in ipso colore illustrato.

Ad secundum dicendum, quod non omnium causarum ordinarum est influentia unius rationis in ultimum effectum. Unde non oportet quod primum intelligibile hoc modo influat in intellectum nostrum quod intelligatur, sed quod praestet intelligendi virtutem. Vel dicendum, quod quamvis Deus sit in ordine intelligibilium primum simpliciter; non tamen est primum in ordine intelligibilium nobis.

Ad tertium dicendum, quod quamvis illa quae sunt prima in genere eorum quae intellectus abstrahit a phantasmatis, sint prima cognita a nobis ut ens et unum; non tamen oportet quod illa quae sunt prima simpliciter, quae non continentur in genere proprii objecti, sicut et ista.

Ad quartum dicendum, quod quamvis Deus sit ultimus finis in consecutione, et primum in intentione appetitus naturalis, non tamen oportet quod sit primum in cognitione mentis humanae, quae ordinatur in finem; sed in cognitione ordinantis; sicut et in aliis quae naturali appetitu tendunt in finem suum. Cognoscitur tamen a principio et intenditur in quadam generalitate, prout mens appetit se bene esse et bene vivere, quod tunc solum est ei cum Deum habet.

Ad quintum dicendum, quod substantiae separatae quamvis abstractione non indigeant ad hoc quod intelligantur, tamen non sunt intelligibiles per lumen intellectus agentis: unde non primo ab intellectu nostro cognoscuntur.

Ad sextum dicendum, quod Deum esse, quantum est in se, est per se notum, quia sua effluentia est suum esse; et hoc modo loquitur Anselmus: non autem nobis, qui ejus essentiam non videmus. Sed tamen ejus cognitio nobis innata dicitur esse, in quantum per principia nobis innata de facili percipere possumus Deum esse.



## ARTICULUS IV.

*Utrum ad divinae Trinitatis cognitionem mens humana per naturalem rationem pervenire sufficiat.*

Ad quartum sic proceditur. 1. Videtur quod ad cognitionem divinae Trinitatis mens humana per naturalem rationem sufficiat. Quidquid enim convenit enti inquantum est ens, oportet maxime in primo ente inveniri. Sed trinitas convenit enti inquantum est ens, cum in omnibus entibus invenitur, eo quod omnia habeant speciem, modum et ordinem, ut Augustinus dicit. Ergo naturali ratione sciri potest quod in Deo sit Trinitas.

2. Item, Nulla perfectio est subtrahenda Deo. Sed ternarius est numerus perfectionis omnis rei, ut dicitur 1 Caeli et Mundi. Ergo Trinitas Deo est attribuenda: et sic idem quod prius.

3. Item. Omnis inaequalitas ad aequalitatem reducitur priorem, sicut multitudo ad unitatem. Sed inter Deum et primum ens creatum est inaequalitas. Ergo oportet praecedere aliam aequalitatem: quae cum non sit nisi plarium, oportet esse aliquam pluralitatem in divinis.

4. Item. Omne aequivocum reducitur ad univocum. Sed exitus creaturae a Deo est aequivocus. Oportet ergo ante hunc ponere processionem univocam qua Deus procedit a Deo, ex qua Trinitas personarum sequitur.

5. Item. Nullius boni sine consortio potest esse jucunda possessio. Sed in Deo est ab aeterno jucundissima boni possessio. Ergo habet aeternum consortium; quod non est nisi divinarum personarum, quia nulla creatura est aeterna: ergo oportet in Deitate plures personas ponere.

6. Item. Quod Deus sit intelligens, ratione naturali potest haberi. Sed ex hoc quod est intelligens sequitur quod Verbum concipiat, quia hoc est commune omni intelligenti. Ergo naturali ratione potest cognosci Filii generatio, et eadem ratione amoris processio.

7. Item. Richardus de S. Victore in lib. de Trin. dicit: « Credo sine dubio ad quorumlibet « explanationem quae necesse est esse, non modo « probabilia, sed etiam necessaria argumenta non « deesse. » Sed Deum esse trinum et unum est necesse, quia est aeternus. Ergo ad hoc sunt rationes necessariae, et sic idem quod prius.

8. Item. Platonici non habuerunt cognitionem de Deo nisi per rationem. Sed ipsi posuerunt ad minus duas personas, scilicet Patrem et Mentem ad ipso genitam, qui omnium rerum rationes continet, quod nos dicimus de Filio. Ergo et ratione naturali potest personarum pluralitas cognosci.

9. Item. Philosophus in 1 de Caelo et Mundo dicit: « Per hunc quidem numerum adhibuimus « nosmetipsos magnificare Deum Creatorem: » et sic idem quod prius.

10. Item. De Deo in statu viae nullo modo possumus cognoscere quid est, sed solum an est. Cognoscimus autem aliquo modo Deum esse trinum et unum, quia per fidem. Ergo hoc non pertinet ad quid est Dei, sed ad an est ipsius; sed an est, possumus naturali ratione cognoscere de Deo: ergo et Deum esse trinum et unum naturali ratione sciri potest.

Sed contra. Fides est de non apparentibus rationi, ut patet Hebr. 11. Sed Deum esse trinum

et unum est articulus fidei. Ergo ad hoc videndum ratio non sufficit.

Item. Omnis ratio naturalis ex primis principiis naturaliter cognitis efficaciam habet. Sed Deum esse trinum et unum, non potest deduci ex principiis naturaliter cognitis quae a sensu accipiuntur; cum in sensibilibus nihil simile invenitur, ut sint tria supposita unius essentiae. Ergo Deum esse trinum et unum non potest sciri per rationem.

Item. Ambrosius: « Cuicumque impossibile est « generationis scire secretum. Mens deficit, vox « silet, non solum mea, sed etiam Angelorum. » Ergo ratio naturalis non sufficit ad cognoscendam generationem divinam, et per consequens nec Trinitatem personarum.

Respondeo dicendum, quod Deum esse trinum, est solummodo creditum, et nullo modo potest demonstrative probari; quamvis ad hoc aliquales rationes non necessariae, nec multum probabiles, nisi credenti, haberi possint: quod patet ex hoc quod Deum non cognoscimus in statu viae nisi ex effectibus, ut ex dictis patere potest. Et ideo naturali cognitione de Deo cognoscere non possumus nisi quod percipitur de Deo ex habitudine effectuum ad ipsum; sicut ea quae designant causalitatem ipsius et eminentiam supra creata, et quae remouent ab ipso imperfectas condiciones effectuum. Trinitas autem personarum non potest percipi ex ipsa causalitate divina, cum ipsa causalitas communis sit toti Trinitati: nec etiam dicitur secundum remotionem tantum. Unde nullo modo potest demonstrative probari Deum esse trinum et unum.

Ad primum ergo dicendum, quod ea quae in creaturis sunt plura, in Deo unum sunt secundum rem: et ideo quamvis in quolibet ente creato invenitur aliqua trinitas, ex hoc tamen non potest necessario concludi quod in Deo sint aliqua tria nisi secundum rationem; et haec pluralitas non sufficit ad distinctionem personarum.

Ad secundum dicendum, quod perfectio ternarii invenitur in Deo etiam secundum essentiae unitatem; non quia ipsa essentia numeretur, sed quia virtute continet omnis numeri perfectionem, ut dicitur in Arithmetica Boetii.

Ad tertium dicendum, quod etiam remota distinctione personarum est aequalitas in divinis, secundum quod ejus sapientia ejus potentiae aequatur. Vel potest dici, quod in aequalitate est duo considerare: scilicet pluralitatem suppositorum inter quae attenditur aequalitas et unitatem quantitatis, quae est causa aequalitatis. Reductio igitur inaequalitatis ad aequalitatem non fit ratione pluralitatis suppositorum, sed ratione causae: quia sicut unitas est causa aequalitatis, ita inaequalitas est causa pluralitatis. Et ideo oportet quod causa aequalitatis sit ante causam inaequalitatis, non quod ante quaelibet inaequalia sint aliqua aequalia: alias oporteret in ordine numerorum esse aliquid ante unitatem et dualitatem, quae sunt inaequalia; vel in ipsa unitate inveniri pluralitatem.

Ad quartum dicendum, quod quamvis omne aequivocum reducat ad univocum, non tamen oportet quod generatio aequivoca ad univocam reducat, sed ad generans quod est in se univocum. In rebus enim naturalibus videmus quod generationes aequivocae sunt priores generationibus univocis: eo quod causae aequivocae habent influentiam super totam speciem, non autem causae univocae,

sed solum super unum individuum: unde sunt quasi instrumenta causarum equivocorum, sicut corpora inferiora corporum superiorum.

Ad quintum dicendum, quod ex hoc non potest homo habere vitam jucundam sine consortio, quia non habet in se unde sibi quantum ad omnia sufficiat; et propter hoc animalia quae habent in se omnia unde sibi sufficiant, consortium vitae non requirunt, sed sunt solitaria. Deus autem est maxime sibi sufficiens: unde remota distinctione personarum, adhuc manet in eo jucunditas summa.

Ad sextum dicendum, quod in Deo idem est intellectus et intellectum; et ideo non oportet quod ex hoc quod intelligit ponatur in eo aliquid conceptum realiter distinctum ab ipso, sicut est in nobis. Trinitas autem personarum requirit distinctionem realem.

Ad septimum dicendum, quod intellectus illius verbi apparet ex hoc quod sequitur: « Quamvis contingat nostram industriam latere. » Omnia ergo necessaria in seipsis sunt vel per se nota, vel per alia cognoscibilia: non tamen oportet quod ita sint quo ad nos: unde possumus ad omnia necessaria probanda secundum nostram industriam rationes necessarias invenire.

Ad octavum dicendum, quod Platonicorum positio nihil facit ad propositum secundum rei veritatem, quamvis videatur facere secundum verba. Non enim posuerunt quod illa mens esset ejusdem essentiae cum Deo Patre, sed quod esset quaedam alia substantia separata a prima procedens; et tertiam ponebant animam mundi, ut patet per Macrobius. Et quia omnes substantias separatas deos vocabant, inde est quod istas vocabant seu dicebant tres deos, ut dicit Augustinus 10 de civ. Dei. Quia tamen non ponebant aliquid Spiritui sancto simile, sicut Patri et Filio (anima enim mundi non est nexus illorum duorum secundum eos, sicut Spiritus sanctus Patris et Filii); ideo dicuntur in tertio signo defecisse, idest in cognitione tertiae personae. Vel dicendum, sicut communiter dicitur, quod cognoverunt duas personas quantum ad appropriata potentiae et sapientiae, non autem quantum ad propria. Bonitas autem quae Spiritui sancto appropriatur, maxime respicit effectus quos illi non cognoverunt.

Ad nonum dicendum, quod Aristoteles non intendit dicere quod Deus sit magnificandus ut trinus et unus; sed quia ternario numero sacrificiorum et orationum ab antiquis honorabatur propter ternarii numeri perfectionem.

Ad decimum dicendum, quod omnia quae in Deo sunt, una et simplex ejus essentia sunt; sed ea quae sunt in ipso unum, sunt in intellectu nostro multa; et propter hoc intellectus noster potest apprehendere unum illorum sine alio. Inde est quod in statu viae de nullo eorum possumus cognoscere quid est, sed solum an est; et contingit quod cognoscatur an est unum eorum, et non alterum; sicut scit aliquis an sit sapientia in Deo, qui tamen non cognoscit an insit omnipotentia: et similiter potest ratione naturali sciri an Deus sit, non autem an sit trinus et unus.

## QUAESTIO II.

### DE MANIFESTATIONE DIVINAE COGNITIONIS.

Deinde quaeritur de manifestatione divinae cognitionis: et quaeruntur quatuor.

Primo, utrum divina liceat investigando tractare.

Secundo, utrum de divinis quae fidei subsunt possit esse aliqua scientia.

Tertio, utrum in scientia fidei quae est de Deo, liceat rationibus philosophicis uti.

Quarto, utrum divina sint velanda novis et obscuris verbis.

### ARTICULUS I.

#### *Utrum divina liceat investigando tractare.*

Ad primum sic proceditur. 1. Videtur quod divina investigare non liceat arguendo. Eccl. 3, 22: « Altiora te ne quaesieris, et fortiora te ne scrutatus fueris. » Sed divina sunt maxime homine altiora, et praecipue ea quae sunt fidei. Ergo hujusmodi scrutari non licet.

2. Item. Poena non infertur nisi pro culpa. Sed, sicut dicitur Proverb. 25, 27, « qui scrutator est majestatis, opprimetur a gloria. » Ergo perscrutari ea quae ad divinam majestatem pertinent, est illicitum.

3. Item. Ambrosius: « Tolle argumenta ubi fides quaeritur. » Sed in divinis, maxime circa Trinitatem, requiritur fides. Ergo in hac materia non licet per argumenta veritatem inquirere.

4. Item. Ambrosius de generatione divina loquens, dicit: « Scrutari non licet mysteria superna. Licet scire quod natus sit, non licet discutere quomodo natus sit. » Ergo eadem ratione nec aliquid eorum quae ad Trinitatem pertinent, licet argumentis investigare.

5. Item. Gregorius in hom. in oct. Pasch.: « Fides non habet meritum, ubi humana ratio praebet experimentum. » Sed malum est fidei meritum evacuare. Ergo non licet rationibus de his quae sunt fidei perscrutari.

6. Item. Omnis honorificentia Deo debetur. Sed secreta per silentium honorificantur: unde dicit Dionysius in fine cael. Hier.: « Super nos secretum silentio honorificantur: » et huic consonat quod dicitur in Psalm. 64, secundum litteram Hieronymi: « Tibi silet laus, Deus; » idest, ipsum silentium est laus tua, Deus. Ergo debemus a perscrutatione (1) divinorum silere.

7. Item. Nullus movetur ad infinitum, ut Philosophus dicit 1 de Cael. et Mund.; quia omnis motus est propter consecutionem termini, qui non invenitur in infinito. Sed Deus in infinitum distat a nobis. Cum ergo perscrutatio sit quidam motus rationis in id quod perscrutatur, videtur quod divina perscrutari non debeamus.

Sed contra est quod dicitur 1 Petr. 3, 15: « Parati semper ad satisfactionem omni poscenti vos rationem de ea quae in vobis est fide et spe. » Sed hoc non potest fieri, nisi ea quae sunt fidei argumentis perscrutemur. Ergo perscrutatio per argumenta de his quae sunt fidei est necessaria.

(1) *Al.* a persecutione.

Item, ut dicitur ad Titum 1, ad Episcopum pertinet ut sit potens exhortari in doctrina sana, et contradicentes revincere. Sed hoc non potest fieri nisi argumentis. Ergo in his quae sunt fidei, argumentis oportet uti.

Item. Augustinus dicit I de Trin.: « Adjuvante « Domino Deo nostro suscipiamus et eam quam « flagitant rationem, quod Trinitas sit unus Deus. » Ergo Trinitatem potest homo rationibus perscrutari.

Item. Augustinus (1) contra Felicianum (cap. 2): « Quia non nimis inconvenienter (2) duo ista « discernis, cum ratione praemissa etiam testimonia « non omittis. . . . fateor secuturum quod ipse « probaveris, » scilicet quod rationibus et auctoritatibus utar. Et sic idem quod prius.

Respondeo dicendum, quod cum perfectio hominis consistat in conjunctione ad Deum, oportet quod homo ex omnibus quae in ipso sunt, quantum potest ad divina innitatur et adducatur, ut intellectus contemplationi, et ratio inquisitioni divinorum vacet, secundum illud Psal. 72, 27: « Mihi « adhaerere Deo bonum est. » Et ideo Philosophus in 10 Ethic. excludit dictum quorundam, qui dicebant quod homo non debebat se de rebus divinis intromittere, sed solum de humanis: sic dicens: « Oportet autem non secundum suadentes humana « sapere hominem, ut mortalia mortalem; sed in- « quantum convenit mortale facere, et omnia facere « secundum optimum eorum quae in ipso. »

Tripliciter tamen potest homo in hoc peccare. Primo ex praesumptione, quia scilicet sic ea scrutatur aliquis quasi ea perfecte comprehensurus; et huiusmodi praesumptio arguitur Job 11, 7: « Forsitan vestigia Dei comprehendes, et usque ad « perfectum Omnipotentem reperies? » et Hilarius dicit: « Ne te inseras in illud secretum et arcanum « inopinabilis nativitatis, ne te immergas, summam « intelligentiae comprehendere praesumens; sed « intellige incomprehensibilia esse. » Secundo ex hoc quod in his quae sunt fidei, ratio praecedat fidem, non fides rationem; dum scilicet aliquis hoc solum vult credere quod ratione potest invenire, cum debebat esse e converso. Unde Hilarius: « Cre- « dendo inspicere (scilicet inquire) percurrere (3), « persiste. » Tertio ultra modum suae capacitatis ad divinorum perscrutationem se ingerendo. Unde Roman. 12, 3: « Non plus sapere quam oportet « sapere, sed sapere ad sobrietatem, et unicuique « sicut Deus divisit mensuram fidei. » Non enim omnes eandem mensuram sunt consecuti: unde aliquid est ultra modum unius quod non est ultra modum alterius.

Ad primum ergo dicendum, quod illa dicuntur altiora homine quae capacitatem ejus excedunt, non quae sunt digniora secundum naturam: quia his quae sunt digniora quanto magis homo, servato suo modo, intendit, tanto magis proficit. Sed etiam in minimis considerandis, dum aliquis modum suae capacitatis excedit, de facili incidit in errorem: unde Glossa ibidem dicit: « Haeretici « duobus modis fiunt: scilicet cum de Creatore « vel de creaturis ultra modum intendentes, in « errores incidunt, et a veritate discedunt. »

Ad secundum dicendum, quod perscrutari est

quasi ad finem scrutari. Hoc autem illicitum et praesumptuosum est, ut aliquis sic divina scrutetur, quasi ad finem comprehensionis venturus.

Ad tertium dicendum, quod ubi fides quaeritur, argumenta tolluntur quae fidei adversantur, et eam praecedere conantur; non illa quae eam modo debito sequuntur.

Ad quartum dicendum, quod non licet hoc modo scrutari divina mysteria, ut ad eorum comprehensionem intentio habeatur; ut patet ex hoc quod sequitur: « Licet scire quod natus sit, non licet « discutere quomodo natus sit. » Ille enim modum nativitatis discutit qui quaerit quid sit ipsa nativitas; cum de divinis possimus scire quid non sint, et non quid sint.

Ad quintum dicendum, quod duplex est humana ratio. Una demonstrativa, cogens intellectum ad credendum; et talis non potest haberi de his quae sunt fidei, sed potest haberi ad evacuanda ea quae fidem destruunt vel impossibilem asserunt. Quamvis enim ea quae fidei sunt, demonstrari non possint, non tamen possunt demonstrative improbari. Si autem talis ratio ad probandum ea quae sunt fidei, induceretur, evacuetur meritum fidei: quia jam assentire his non esset voluntarium, sed necessarium. Ratio autem persuasoria sumpta ex aliquibus similitudinibus ad ea quae sunt fidei inducta, non evacuat fidei rationem, quia non facit ea esse apparentia; cum non fiat resolutio usque ad prima principia, quae intellectu videntur: nec iterum meritum fidei evacuat, quia non cogit intellectum ad consentiendum; unde assensus remanet voluntarius.

Ad sextum dicendum, quod Deus honoratur silentio, non quod de ipso nihil dicamus vel inquiramus: sed quia intelligimus nos ab ejus comprehensione defecisse. Unde Eceli. 45, 52: « Glo- « rificantes Dominum quantumcumque potueritis, « supervalebit adhuc, et admirabilis magnificentia « ejus. Benedicentes Dominum, exaltate illum quan- « tum potestis: major est enim omni laude. »

Ad septimum dicendum, quod cum Deus in infinitum a creatura distet, nulla creatura movetur in Deum ut ipsi adaequetur, vel recipiendo ab ipso, vel cognoscendo ipsum. Hoc igitur quod creatura in infinitum distat, non est terminus motus creaturae; sed quaelibet creatura movetur ad hoc quod Deo assimiletur plus et plus quantum potest: et sic etiam humana mens debet semper moveri ad cognoscendum de Deo plus et plus secundum modum suum. Unde dicit Hilarius: « Qui pie infi- « nita persequitur, etsi non contingat aliquando, « tamen proficiet prodeundo. »

## ARTICULUS II.

### *Utrum de divinis quae fidei subsunt, possit esse scientia.*

Ad secundum sic proceditur. 1. Videtur quod de divinis quae fidei subsunt, scientia esse non possit. Sapientia enim contra scientiam dividitur. Sed sapientia est divinorum. Non ergo scientia.

2. Item. Sicut dicitur 1 Posteriorum, in qualibet scientia oportet de subjecto supponere quid est. Sed de Deo nullo modo possumus scire quid est, ut dicit Damascenus. Ergo de Deo scientia haberi non potest.

(1) Liber S. Augustino attributus.

(2) Al. inconsequenter.

(3) Al. credendo inquire, percurrere etc.



5. Item. Cujuslibet scientiae est, partes et passiones sui subjecti considerare. Sed Deus, cum sit forma simplex, nec partes habet in quas dividatur, nec passionibus aliquibus subiecti potest. Ergo de Deo non potest esse scientia.

4. Item. In qualibet scientia ratio praecedat assensum. Demonstratio enim facit in scientiis scibilibus assentiri. Sed in his quae fidei sunt, oportet esse e converso; scilicet quod assensus fidei praecedat rationem, ut dictum est. Ergo de divinis, praecipue quae fide capiuntur, non potest esse scientia.

3. Item. Omnis scientia procedit ex principiis per se notis, quae quisque probat audita, aut ex principiis quae ab his fidem habent. Sed articuli fidei, qui sunt prima principia in fide, non sunt hujusmodi: quia nec sunt per se nota, neque ad per se nota resolvi possunt demonstrative, ut dictum est. Ergo de divinis quae fide tenentur, non potest esse scientia.

6. Item. Fides est de non apparentibus. Sed scientia est de apparentibus; quia per scientiam apparent ea quae per scientiam traduntur. Ergo de divinis quae fide tenentur, non potest esse scientia.

7. Item. Cujuslibet scientiae principium est intellectus, quia ex intellectu principiorum venit in scientiam conclusionum. Sed in his quae sunt fidei, intellectus non est principium, sed finis: quia ut dicitur Isaiae 7, 9, « Nisi credideritis, non intelligetis. » Ergo de divinis quae fide tenentur, non potest esse scientia.

Sed contra est quod dicit Augustinus, 12 de Trinitate: « Huic scientiae tribuo illud tantum quod fides saluberrima, quae ad veram beatitudinem ducit, gignitur, defenditur, roboratur. » Ergo de his quae sunt fidei est scientia.

Item. Sap. 10, 10: « Dedit illi scientiam sanctorum, » idest fidei: quia de alia intelligi non potest nisi de ea qua sancti ab impiis discernuntur, quae est scientia fidei.

Item. Apostolus de cognitione fidelium loquens 1 Corinth. 8, 7, dicit: « Non omnium est scientia. » Et sic idem quod prius.

Respondeo dicendum, quod cum scientiae ratio consistat in hoc quod ex aliquibus notis alia ignotiora cognoscantur, hoc autem in divinis contingat; constat quod de divinis potest esse scientia. Sed divinorum notitia dupliciter potest aestimari. Uno modo ex parte nostra; et sic nobis cognoscibilia non sunt nisi ex creaturis, quarum notitiam a sensu accipimus. Alio modo ex natura ipsorum; et sic ipsa sunt ex seipsis maxime cognoscibilia; et quamvis secundum modum suum non cognoscantur a nobis, tamen a Deo cognoscuntur et nobis a beatis secundum modum suum. Et sic de divinis duplex scientia habetur. Una secundum modum nostrum, quae sensibilibus principia accipit ad notificandum divina; et sic de divinis philosophi scientiam tradiderunt, Philosophiam primam divinam scientiam dicentes. Alia secundum modum ipsorum divinorum, ut ipsa divina secundum seipsa capiantur: quae quidem perfecte nobis in statu viae est impossibilis, sed fit nobis in statu viae quaedam illius cognitionis participatio, et assimilatio ad cognitionem divinam, inquantum per fidem nobis infusam inhaeremus ipsi primae veritati propter seipsam. Et sicut Deus ex hoc ipso quod cognoscit se, cognoscit alia modo

suo, idest simplici intuitu, non discurrendo; ita nos ex his quae fide capimus, primae veritati inhaerendo, venimus in cognitionem aliorum secundum modum nostrum, scilicet discurrendo de principiis ad conclusiones. Unde primo ipsa quae fide tenemus, sunt nobis quasi prima principia in hac scientia, et alia sunt quasi conclusiones. Ex quo patet quod haec scientia est altior illa divina quam Philosophi tradiderunt, cum ex altioribus principiis procedat.

Ad primum ergo dicendum, quod sapientia non dividitur contra scientiam, sicut oppositum contra oppositum; sed quia se habet ex additione ad scientiam. Est enim sapientia, ut dicit Philosophus 6 Ethic., caput omnium scientiarum, regulans omnes alias, inquantum de altissimis principiis est: propter quod etiam dea scientiarum dicitur 1 Metaph.: et multo magis haec quae non solum de altissimis, sed ex altissimis est. Sapientis autem est ordinare; et ideo ista scientia altissima, quae omnes alias ordinat et regulat, sapientia dicitur: sicut in artibus mechanicis sapientes dicimus illos qui alios regulant, ut architectos; scientiae vero nomen aliis inferioribus relinquitur. Et secundum hoc scientia dividitur contra sapientiam, sicut propriam contra definitionem.

Ad secundum dicendum, quod, sicut supra dictum est, quando causae cognoscuntur per suos effectus, effectus cognitio supplet locum cognitionis quidditatis causae, quae requiritur in illis scientiis quae sunt de rebus quae per se ipsas cognosci non possunt: et sic non oportet quod ad hoc quod de divinis scientiam habeamus, praesciatur de Deo quid est. Vel potest dici, quod hoc ipsum quod scimus de Deo quid non est, supplet in divina scientia locum cognitionis quid est: quia sicut per quid est distinguitur res ab aliis, ita per hoc quod scitur quid non est.

Ad tertium dicendum, quod partes subjecti in scientia non solum sunt intelligentiae partes subjectivae vel integrales; sed partes subjecti sunt omnia illa quorum cognitio requiritur ad cognitionem subjecti, cum omnia hujusmodi non tractentur in scientia (1), inquantum habent ad subjectum ordinari. Passiones etiam dicuntur quaecumque de aliquo probari possunt, sive negationes, sive habitudines ad alias res. Et talia multa de Deo probari possunt et ex principiis naturaliter notis, et ex principiis fidei.

Ad quartum dicendum, quod in qualibet scientia sunt aliqua quasi principia, et aliqua quasi conclusiones. Ratio ergo quae inducitur in scientiis, praecedat assensum conclusionis, sed sequitur assensum principiorum, cum ex eis procedat. Articuli autem fidei in hac scientia non sunt quasi conclusiones, sed quasi principia, quae etiam defenduntur ab impugnantibus, sicut et Philosophus 4 Metaph. disputat contra negantes principia: et manifestantur per aliquas similitudines contra principia naturaliter nota per inductionem, non autem ratione demonstrativa probantur.

Ad quintum dicendum, quod etiam in scientiis humanitas traditis sunt quaedam principia in quibusdam earum quae non sunt omnibus nota, sed oportet ea supponere a superioribus scientiis, sicut in scientiis subalternatis supponuntur et creduntur

(1) *Al.* in conscientia.



aliqua a superioribus scientiis subalternantibus; et hujusmodi non sunt per se nota nisi superioribus scientiis. Et hoc modo se habent articuli fidei qui sunt principia hujus scientiae, ad cognitionem divinam: quia ea quae sunt per se nota in scientia quam Deus habet de seipso, supponuntur in scientia nostra; et creditur ei nobis hoc indicanti per suos nuntios. sicut medicus credit physico quatuor esse elementa.

Ad sextum dicendum, quod apparentia scientiae procedit ex apparentia principiorum. Unde scientia non facit apparere principia; sed ex hoc quod apparent principia, facit apparere conclusiones: et per hunc modum scientia de qua nunc loquimur non facit apparere ea de quibus est fides; sed ex eis facit apparere alia per modum quo de primis certitudo habetur.

Ad septimum dicendum, quod enjuslibet scientiae principium est intellectus, semper quidem primum, sed non semper proximum; immo aliquando fides est proximum principium scientiae: sicut patet in scientiis subalternatis: quia earum conclusiones sicut ex proximo principio procedunt ex fide eorum quae supponuntur a superiori scientia; sed sicut a principio primo, ab intellectu superioris scientis, qui de his (1) per intellectum habet certitudinem. Et similiter hujus scientiae principium proximum est fides; sed primum est intellectus divinus, cui nos credimus; sed fides est in nobis, ut perveniamus ad intelligendum quae credimus; sicut si inferior sciens addiscat superioris scientiam, tunc fiunt ei intellecta et scita quae prius erant tantummodo credita.

### ARTICULUS III.

*Utrum in scientia fidei, quae est de Deo, liceat rationibus physicis uti.*

Ad tertium sic proceditur. 1. Videtur quod in his quae sunt fidei, non liceat rationibus physicis uti. 1 Cor. 1, 17: « Non misit me Christus baptizare, sed evangelizare, non in sapientia verbi: » Glossa: « In doctrina Philosophorum. » Et super illud 1 Corinth. 1, 20: « Ubi inquisitor hujus saeculi? » dicit Glossa: « Inquisitor est qui naturae secreta rimatur: tales non recipit Deus inter praedicatores. » Et super illud 1 Corinth. 11, 4: « Sermo meus et praedicatio mea, non in persuasionibus humanae sapientiae verbis, » dicit Glossa: « Etsi persuasibilia fuerint verba, non tamen per humanam sapientiam, ut verbum pseudoapostolorum. » Ex quibus omnibus videtur quod in his quae sunt fidei, non liceat uti rationibus physicis.

2. Item. Isai. 15, 1, super illud, « Nocte vastata est Ar, » dicit Glossa: « Ar, idest adversarius, scilicet scientia saecularis, quae adversaria est Deo. » Ergo etc.

3. Item. Ambrosius dicit: « Secretissimum fidei a physicis argumentis est liberum, » Ergo ubi de fide agitur, philosophorum rationibus et dictis uti non licet.

4. Item. Hieronymus refert in epistola ad Eustochium, se in visione divino iudicio verberatum, pro eo quod in libris legerat Ciceronis; et qui astabant precabantur ut veniam tribueret adolescen-

tiae, exacturus deinde cruciatum, si in libris Gentilium aliquando legisset: unde obtestans nomen Dei clamavit: « Si unquam habuero saeculares codices, si legero, te negavi. » Si ergo non licet in eis studere, ergo multo minus licet eis in divinis tractatibus uti.

5. Item. Sapientia saecularis in Scriptura per aquam frequenter significatur, sapientia vero divina per vinum. Sed Isai. 1, vituperantur caupones aquam vino miscentes. Ergo vituperabiles sunt doctores sacrae Scripturae physica documenta miscentes.

6. Item. Sicut dicit Hieronymus in Glossa Osee 11, « Cum haereticis nec nomina debemus habere communia. » Sed haeretici utuntur ad fidei corruptionem physicis argumentis, ut habetur in Glossa Proverb. 7, et Isai. 15. Ergo catholici eis in suis tractatibus uti non debent.

7. Item. Quaelibet scientia principia habet propria; ita et sacra doctrina; articulos scilicet fidei. Sed in aliis scientiis non recte proceditur, si sumantur alterius scientiae principia; sed oportet in unaquaque ex propriis procedere, secundum doctrinam Philosophi 1 Posteriorum. Ergo nec in sacra doctrina recte proceditur.

8. Item. Si alicujus doctrina in aliquo repudiatur, ejus auctoritas invalida erit ad aliquid confirmandum: unde dicit Augustinus, quod si in sacra doctrina concesserimus aliquid esse falsitatis, peribit ejus auctoritas ad fidei confirmationem. Sed sacra doctrina philosophorum doctrinam in multis repudiat, quia in multis errasse inveniuntur. Ergo eorum auctoritas non est efficax ad aliquid confirmandum.

Sed contra. Apostolus, Tit. 1, 12, utitur Epimenidis poetae versiculo, dicens: « Cretenses semper mendaces, malae bestiae, ventres pigri: » et 1 Corinth. 15, 35, verbis Menandri: « Corruptunt bonos mores colloquia mala: » et Act. 17, 28, verbis Arati: « Ipsius ( scilicet Dei ) et genus sumus. » Ergo et aliis divinae Scripturae doctoribus licet physicis argumentis uti.

Item. Hieronymus in epistola ad Magnum urbis Romae oratorem, enumeratis pluribus Scripturae doctoribus, ut Basilio, Gregorio, subjungit: « Qui omnes intantum philosophorum doctrinis atque sententiis suos resperserunt libros, ut nescias quid in eis primum mirari debeas; utrum eruditionem saeculi, vel scientiam Scripturarum: » quod non fecissent, si non licuisset, vel inutile fuisset.

Item. Hieronymus in epistola ad Pammachium de dormitione Paulae: « Si adamaveris mulierem captivam, scilicet sapientiam saecularem, et pulchritudine ejus captus fueris, decalva eam, et illecebras erinium atque ornamenta verborum cum tenacibus unguibus seca: lava eam prophetali nitro (1): et requiescens cum illa dicito: Sinistra ejus sub capite meo, et dextera illius amplexabitur me: et multos tibi captiva fetus dabit, ac de Moabitude efficietur tibi Israelites. » Ergo fructuosum est ut aliquis sapientia saeculari utatur.

Item. Augustinus 2 de Trinit. dicit: « Non ero segnis ad inquirendam scientiam Dei sive per Scripturam, sive per creaturam. » Sed cognitio Dei per creaturam in philosophia proponitur. Ergo non est inconveniens quod aliquis in sacra doctrina rationibus philosophicis utatur.

Item. Augustinus lib. 2 de doctrina Christiana: « Philosophi autem si qua forte vera et fidei ne-

(1) *Al. additur creaturis.*

*S. Th. Opera omnia. V. 17.*

(1) *Al. vitro.*

« sacrae accommodata dixerunt, non solum formidanda  
« non sunt, sed ab eis tamquam ab injustis pos-  
« sessoribus in nostrum usum assumenda. » Et sic  
idem quod prius.

Item. Super illud Daniel. 1, 8: « Proposuit au-  
« tem Daniel in corde suo, ne pollueretur de mensa  
« regis, » Glossa: « Si quis imperitus mathematicae  
« artis contra mathematicos scribat, aut expertus  
« philosophiae contra philosophos agat; quis etiam  
« ridendus, vel ridendo (1) non rideat? » Sed o-  
portet doctores sacrae Scripturae quandoque contra  
philosophos agere. Ergo oportet eos philosophia uti.

Respondeo dicendum, quod dona gratiarum hoc  
modo naturae adduntur quod eam non tollunt, sed  
magis perficiunt; unde et lumen fidei, quod no-  
bis gratis infunditur, non destruit lumen naturalis  
cognitionis nobis naturaliter inditum. Quamvis au-  
tem naturale lumen mentis humanae sit insufficientis  
ad manifestationem eorum quae per fidem manife-  
stantur, tamen impossibile est quod ea quae per  
fidem nobis traduntur divinitus, sint contraria his  
quae per naturam nobis sunt indita: oporteret enim  
alterum esse falsum: et cum utrumque sit nobis a  
Deo, Deus esset nobis auctor falsitatis: quod est  
impossibile. Sed magis, cum in imperfectis invenia-  
tur aliqua imitatio perfectorum, quamvis imperfecta;  
in his quae per naturalem rationem cognoscuntur,  
sunt quaedam similitudines eorum quae per fidem  
tradita sunt. Sicut autem sacra doctrina fundatur  
super lumen fidei, ita philosophia super lumen  
naturale rationis. Unde impossibile est quod ea quae  
sunt philosophiae, sint contraria iis quae sunt fidei,  
sed deficiunt ab eis; continent tamen quasdam si-  
militudines eorum, et quaedam ad ea praeambula,  
sicut natura praeambula est ad gratiam. Si quid  
autem in dictis philosophorum invenitur contra-  
rium fidei, hoc non est philosophiae, sed magis  
philosophiae abusus ex defectu rationis. Et ideo pos-  
sibile (2) est ex principiis philosophiae huiusmodi  
errorem refellere, vel ostendendo omnino esse im-  
possibilem, vel non esse necessarium. Sicut enim  
ea quae fidei sunt, non possunt demonstrative pro-  
bari; ita quaedam contraria his non possunt demon-  
strative ostendi esse falsa, sed potest ostendi non  
esse ea necessaria. Sic igitur in sacra doctrina  
philosophia possumus tripliciter uti. Primo ad de-  
monstrandum ea quae sunt praeambula fidei, quae  
necessaria sunt in fidei scientia, ut ea quae natu-  
ralibus rationibus de Deo probantur, ut Deum esse,  
Deum esse unum, et huiusmodi de Deo vel de  
creaturis in philosophia probata, quae fides supponit.  
Secundo ad notificandum per aliquas similitudines  
ea quae sunt fidei, sicut Augustinus in libris de  
Trinitate utitur multis similitudinibus ex doctrinis  
philosophicis sumptis ad manifestandum Trinitatem.  
Tertio (3) ad resistendum his quae contra fidem  
dicuntur; sive ostendendo esse falsa, sive ostendendo  
non esse necessaria. Tamen utentes philosophia in  
sacra Scriptura possunt dupliciter errare. Uno modo  
utendo his quae sunt contra fidem, quae non sunt  
philosophiae, sed potius error vel abusus ejus,  
sicut Origenes fecit. Alio modo, ut ea quae sunt  
fidei, includantur sub metis philosophiae; ut si nihil  
aliquis credere velit nisi quod per philosophiam

haberi potest; cum e converso philosophia sit ad  
metas fidei redigenda, secundum illud Apostoli 2  
Corinth. 10, 5: « In captivitatem redigentes omnem  
« intellectum in obsequium Christi. »

Ad primum ergo dicendum, quod ex omnibus  
illis verbis ostenditur quod doctrina philosophorum  
non sit utendum quasi principali, ut scilicet propter  
eam credatur fidei; non tamen removetur quin ea  
possint uti sacri doctores quasi secundaria. Unde  
ibidem super illud 1 Corinth. 1, 19: « Perdam  
« sapientiam sapientium, et prudentiam prudentium  
« reprobabo, » Glossa: « Non ideo hoc dicit, ut  
« veritatis intelligentia possit a Deo reprobari; sed  
« quia eorum prudentia reprobatur qui in sua eru-  
« ditione confidunt. » Ut tamen totum quod est  
fidei, non humanae potentiae aut sapientiae tribueretur,  
sed Deo, voluit Deus ut primitiva Apostolorum  
praedicatio esset in infirmitate et simplicitate, cum ta-  
men potentia et saecularis sapientia postea superveniens  
ostenderit per victoriam fidei mundum esse Deo  
subjectum et quantum ad potentiam, et quantum  
ad sapientiam.

Ad secundum dicendum, quod sapientia saecularis  
dicitur contraria Deo quantum ad ejus abu-  
sum, sicut ea haeretici abutuntur; non quantum  
ad ejus veritatem.

Ad tertium dicendum, quod sacramentum fidei  
pro tanto dicitur esse liberum a philosophicis dictis,  
quia sub philosophiae metis non coaretatur.

Ad quartum dicendum, quod Hieronymus adeo  
afficiebatur ad aliquos libros Gentilium quod sa-  
cram Scripturam quodammodo contemnebat: unde  
ipse dicit: « Si quando in memet reversus Prophe-  
« tas legere coepissem, sermo horrebat incultus. »  
Et hoc esse reprehensibile nullus ambigit.

Ad quintum dicendum, quod ex tropicis locu-  
tionibus non est assumenda argumentatio, ut dicit  
Magister 6 dist. libr. 1: et Dionysius dicit in epi-  
stola ad Titum, quod symbolica Theologia non est  
argumentativa, et praecipue cum hoc non sit ex-  
positio alicujus auctoris. Et tamen potest dici, quod  
quando alterum duorum transit in naturam alterius,  
non reputatur mixtum; sed quando utrumque a  
sua natura alteratur. Unde illi qui utuntur philo-  
sophicis documentis in sacra Scriptura redigendo  
in obsequium fidei, non miscent aquam vino, sed  
convertunt aquam in vinum.

Ad sextum dicendum, quod Hieronymus loqui-  
tur de illis rationibus quae ab haeticis sunt in-  
ventae, accommodatae suis erroribus. Philosophicae  
autem doctrinae non sunt tales, immo solum in  
errorem ducunt (1); et ideo non sunt propter hoc  
vitandae.

Ad septimum dicendum, quod scientiae quae  
habent ordinem ad invicem, hoc modo se habent  
quod una potest uti principiis alterius, sicut scien-  
tiae posteriores principiis priorum scientiarum, sive  
sint superiores, sive inferiores. Unde Metaphysica,  
quae est omnibus superior, utitur his quae in aliis  
scientiis sunt probata: et similiter Theologia, cum  
omnes aliae scientiae sint ei quasi famulantes et  
praeambulae in via generationis, quamvis sint di-  
gnitate posteriores, potest uti principiis omnium  
aliarum.

Ad octavum dicendum, quod in quantum sacra  
doctrina utitur physicis documentis propter se, non

(1) Forte irridendo.

(2) Al. impossibile.

(3) Al. ergo.

(1) Forte addendum volentes.

recipit ea propter auctoritatem dicentium, sed propter rationem dictorum: unde bene dicta recipit et alia respuit. Sed quando utitur eis propter aliquos errores refellendos, utitur eis in quantum sunt in auctoritatem aliis qui refellantur, quia testimonium adversarii efficacius est.

## ARTICULUS IV.

*Utrum divina sint velanda novis et obscuris verbis.*

Ad quartum sic proceditur. 1. Videtur quod divina in scientia fidei non sint obscuritate verborum velanda: quia, ut dicitur Proverb. 14, 6, « Doctrina prudentum facilis. » Ergo sine obscuritate verborum proponi debet.

2. Item. Eccl. 4, 28: « Non abscondas sapientiam tuam in decore suo: » et Proverb. 11, 26: « Qui abscondit frumenta ( Glossa, praedicationis ) maledicetur in populis. » Ergo verba sacrae doctrinae non sunt velanda.

3. Item. Matth. 10, 17: « Quod dico vobis in tenebris ( Glossa, in mysterio ) dicite in lumine: » Glossa, aperte. Ergo obscura fidei sunt magis reseranda, quam occultanda difficultate verborum.

4. Item. Doctores fidei sunt sapientibus et insipientibus debitores, ut patet Rom. 1. Ergo ita debent loqui ut a magnis et parvis intelligantur, id est sine obscuritate verborum.

5. Item. Sap. 7, 15, dicitur: « Quam sine fictione didici, et sine invidia communico. » Sed qui occultant, non communicant. Ergo videntur invidiae rei.

6. Item. Augustinus, 4 de doctrina Christiana: « Expositores sacrae Scripturae non ita loqui debent tamquam seipsos exponendos simili auctoritate proponant; sed omnibus sermonibus suis primitus et maxime ut intelligantur laborent ea quantum possunt perspicuitate dicendi, ut multum tardus sit qui non intelligat. »

Sed contra est quod dicitur Matth. 7, 6: « Nolite sanctum dare canibus, neque mittatis margaritas vestras ante porcos. » Glossa: « Res absconsa avidius quaeritur, celata venerabilius conspicitur, diu quaesita carius tenetur. » Cum igitur sacra documenta expediat summa veneratione intueri, videtur quod expediat ea obscure tradi.

Item. Dionysius, 1 cap. eccl. Hierar.: « Omnem sanctam laudem non tradas alicui: praeter aequae ordinatas Dei formas ( id est divinas laudes ) quibus omnia sacramenta complectitur, non tradas nisi tibi similibus. » Sed si verbis conspicuis scriberentur, omnibus paterent. Ergo secreta fidei sunt obscuritate verborum velanda.

Item Luc. 8, 10: « Vobis datum est nosse mysterium regni Dei, » id est intelligentiam Scripturarum, ut patet per Glossam; « ceteris autem in parabolis. » Ergo oportet verborum obscuritate aliqua a multitudine velare.

Respondeo dicendum, quod verba docentis ita debent esse moderata ut proficiant, non noceant audienti. Quaedam autem sunt quae audita nulli nocent, sicut ea quae omnes scire tenentur; et talia non sunt occultanda, sed manifeste omnibus proponenda. Quaedam vero sunt quae proposita manifeste auditoribus nocent: quod quidem contingit dupliciter. Uno modo, si arcana fidei infidelibus fidem abhorrentibus denudentur: eis enim venient in derisum;

et propter hoc dicitur Matth. 7, 6: « Nolite sanctum dare canibus: » et Dionysius, 2 cap. cael. Hierar.: « Audi sancte dicta, divinus divinorum, in doctrina factus, et mentis occulto sancta circumabscondens ab immunda multitudine ut quam uniformia custodi. » Secundo autem modo si aliqua subtilia rudibus proponantur, ex quibus perfecte non apprehensis materiam sumunt errandi. Unde 1 Corinth. 5, 1: « Non potui vobis loqui tamquam spiritualibus, sed quasi carnalibus: tamquam parvulis in Christo lac vobis potum dedi, non escam. » Unde super illud Exod. 21, 55: « Si quis aperuerit cisternam, » dicit Glossa Gregorii: « Qui in sacro eloquio jam alta intelligit, sublimis sensus coram non capientibus per silentium tegat, ne per scandalum interius aut fidelem parvulum, aut infidelem qui credere potuisset, interimat. Haec ergo ab eis quibus nocent, occultanda sunt; sed in colloquutione potest fieri distinctio, ut eadem sapientibus seorsum manifestentur, in publico taceantur. » Unde Augustinus, 4 de doctr. Christ.: « Sunt quaedam quae vi sua non intelliguntur, aut vix intelliguntur, quantumlibet, et quantumlibet dicentis plenissime versentur eloquio: quae in populi audientia vel raro, si aliquid urget, vel nunquam omnino mittenda sunt. Sed in scribendo non potest talis distinctio adhiberi: quia liber conscriptus ad manus quorumlibet pervenire potest; et ideo sunt occultanda verborum obscuritatibus, ut per hoc prosint sapientibus qui ea intelligunt, et occultentur simplicibus qui ea capere non possunt. » Et in hoc nullus gravatur: quia qui intelligunt, lectione detinentur; qui vero non intelligunt non coguntur ad legendum. Unde Augustinus in eodem: « In libris autem qui ita scribuntur, ut ipsi sibi quodammodo lectorum teneant cum intelliguntur; cum autem non intelliguntur, molesti non sint nolentibus legere; non est hoc officium deserendum, ut vera, quamvis ad intelligendum difficillima, ad aliorum intelligentiam perducamus. »

Ad primum igitur dicendum, quod auctoritas illa non est ad propositum. Non enim intelligitur quod doctrina prudentium sit facilis active, id est quod faciliter doceant; sed passive, quia faciliter docentur, ut patet per Glossam.

Ad secundum dicendum, quod auctoritates illae loquuntur de illo qui abscondit ea quae manifestanda sunt: unde Eccl. 4, 28, praemittitur: « Ne timeas verbum in tempore salutis. » Per hoc autem non removetur quin ea quae sunt occulta, debeant obscuritate verborum celari.

Ad tertium dicendum, quod doctrina Christi est publice et plane docenda, ita quod unicuique sit planum id quod expedit ei scire, non autem ut publicentur illa quae scire non expedit.

Ad quartum dicendum, quod doctores sacrae Scripturae non sunt ita sapientibus et insipientibus debitores, ut eadem proponant utrisque; sed ita quod utrisque proponant quod eis expedit.

Ad quintum dicendum, quod non ex invidia subtilia multitudini occultantur, sed magis ex debita discretione.

Ad sextum dicendum, quod Augustinus loquitur de expositoribus qui ad populum loquuntur, non de his qui scripto tradunt, ut patet ex consequentibus.



## LECTIO I.

Christianae religionis reverentiam plures usurpant; sed ea fides pollet maxime ac solitarie, quae tum propter universalium praecepta regularum quibus ejusdem religionis intelligitur auctoritas, tum propterea quod ejus cultus per omnes fere mundi terminos emanavit, catholica vel universalis vocatur: cujus haec de Trinitate sententia est (1). Pater, inquit, est (2) Deus, Filius est Deus, Spiritus sanctus est Deus. Igitur Pater, Filius et Spiritus sanctus Deus unus, non tres dii: cujus conjunctionis ratio est indifferentia. Eos enim differentia comitatur qui vel augent vel minuunt; ut Ariani, qui gradibus meritorum Trinitatem variantes, distrahunt, atque in pluralitatem deducunt. Principium enim pluralitatis, alteritas est. Praeter alteritatem enim nec (3) pluralitas quid sit, intelligi potest. Omnium (4) namque rerum, vel quotlibet, tum genere, tum specie, tum numero diversitas constat. Quoties enim dicitur idem, toties et diversum praedicatur. Idem vero dicitur tribus modis; aut genere, ut idem homo quod equus, quia his idem genus, ut animal: vel specie, ut idem Cato quod Cicero, quia eadem species, ut homo; vel numero, ut Tullius Cicero, quia unus est numero. Quare diversum etiam vel genere vel specie vel numero dicitur. Sed numero differentiam facit accidentium varietas. Nam tres homines neque genere neque specie sed suis accidentibus distant. Nam si vel animo cuncta ab his accidentibus separemus, tamen locus cunctis diversus est, quem unum fingere nullo modo possumus. Duo enim corpora unum locum non continent, qui est accidens: atque ideo sunt numero plures, quoniam accidentibus plures fiunt.

Post prooemium hic Boetius incipit tractatum de Trinitate personarum, et unitate divinae essentiae: et dividitur liber iste in duas partes. Primo prosequitur ea quae pertinent ad unitatem divinae essentiae contra Arianos: secundo ea quae pertinent ad Trinitatem personarum, contra Sabellium, ibi, « Sed hic interim ad eam dictum sit significationem monstrationemque qua ostenditur, non omnem unitatum repetitionem, numerum, pluralitatemque perficere. » Prima in duas. Primo proponit catholicae fidei sententiam de unitate divinae essentiae: secundo investigat propositae sententiae veritatem, ibi, « Age igitur, ingrediamur, et unumquodque, ut intelligi atque capi potest, discutiamus. » Prima in duas. Primo describit fidei conditionem, cujus sententiam prosequi intendit; secundo proponit descriptae fidei sententiam de proposito, ibi, « Cujus haec de Trinitate sententia est. » Describit autem eam dupliciter: scilicet ex comparatione haeresum quibus praepollet, et proprio nomine, quia « catholica vel universalis vocatur. »

Dicit ergo: « Plures, » idest diversarum haeresum sectae, « usurpant, » idest indebite sibi attribuunt, « reverentiam christianae religionis, » idest quae christianae religioni debetur, ut scilicet ei omnes subdantur. 1 Joan. 5, 4: « Haec est victoria quae vincit mundum, fides nostra. » Vel « reverentiam » quam christiana religio Deo exhibet, credendo his quae divinitus sunt praedicata. « Sed ea fides pollet maxime et solitarie. » Haec duo adjungit ut descriptionem faciat ejus quod est secundum veritatem, et ejus quod est secundum opinionem. Secundum enim rei veritatem haeretici

Christiani non sunt, cum a doctrina Christi recedant: et quantum ad hoc catholica fides solitaria pollet; sed secundum apparentiam et hominum opinionem, haeretici Christiani dicuntur, quia saltem voce nomen Christi confitentur; et quantum ad hoc fides catholica non sola, sed magis pollet. Ipsa enim communius et diffusius est recepta. Unde subdit: « Quae vocatur catholica » in Graeco, « vel universalis » in Latino, quod idem est: catholicum enim Graece, Latine universale dicitur. Cujus nominis assignat duas rationes, dicens: « Tum propter praecepta universalium regularum: » praecepta enim quae fides catholica proponit, non uni tantum genti observanda, sed omnibus proponit: in quo praecipue differt a lege Moysi, quae uni tantum populo praecepta proponebat. Similiter etiam singulae haereses suis tantum sectatoribus praecepta accommodata tradunt; sed fides catholica de omnibus curam gerens, omnibus praecepta accommodata tribuit, non solum continentibus, ut Manichaei, sed etiam conjugatis; et non solum innocentibus, ut Novatiani, sed etiam poenitentibus, quibus illi salutem denegant. Unde subdit: « Quibus, » scilicet universalibus regulis, « intelligitur auctoritas ejusdem religionis, » per quas omnes ei subditi esse debent. Vel dicuntur universales regulae quia nihil eis falsitatis aut iniquitatis admiscetur in quocumque articulo, sive in quocumque casu. Deinde subjungit aliam causam, dicens: « Tum propterea quod ejus cultus per omnes fere mundi terminos emanavit: » quod planum est, secundum illud Psalm. 18, 5: « In omnem terram exivit sonus eorum, et in fines orbis terrae verba eorum. »

« Cujus haec de Trinitate sententia est. » Hic ponitur praenotatae fidei sententia de proposita quaestione: et circa hoc tria facit. Primo proponit catholicae fidei sententiam de unitate Trinitatis; secundo ejusdem sententiae rationem, ibi, « Cujus conjunctionis ratio est indifferentia; » tertio ostendit praedictae rationis convenientiam, ibi, « Principium enim pluralitatis, alteritas est. » Proponit autem catholicae fidei sententiam per modum cujusdam argumenti, eo quod fides dicitur argumentum non apparentium, Hebr. 11. In quo quidem argumento ex hoc quod Divinitas singulis personis conformiter attribuitur, concluditur quod de omnibus non pluraliter, sed singulariter, hoc nomen Deus praedicatur.

Deinde hujus sententiae rationem assignat: et primo ponit rationem; secundo per contrarium exponit, ibi, « Eos enim differentia comitatur qui vel augent vel minuunt. » Dicit ergo: « Cujus conjunctionis, » idest conjunctae argumentationis, « ratio est indifferentia; » scilicet Deitatis in tribus personis, quam fides catholica confitetur. Ex hoc enim est quod ex praemissis praedicta conclusio sequitur, quia indifferens Deitas tribus personis indifferenter attribuitur. Quam quidem rationem per contrarium exponit, dicens: « Eos enim comitatur differentia, » Deitatis scilicet, « qui vel augent vel minuunt, » idest qui ponunt unam personam majorem alia vel minorem, « ut Ariani, » ponentes Patrem majorem Filio: unde subdit: « Qui, » scilicet

(1) *Al.* haec est de Trinitatis unitate sententia.

(2) *Al.* hic et infra omittitur est.

(3) *Al.* haec.

(4) *Al.* trium.



Ariani, « variantes Trinitatem gradibus meritorum; » idest dignitatum, dum Patri Filium subjiciunt, Spiritum sanctum utrique, « distrahunt, » idest in diversa trahunt, Deitatem in eis dividendo, « atque « in pluralitatem deducunt: » ex divisione enim sequitur pluralitas. E converso vero catholici aequalitatem personarum confitentes, indifferentiam profitentur, et per consequens unitatem.

Deinde ostendit praemissam rationem esse convenientem, dicens: « Principium enim pluralitatis, « alteritas est: » et primo (1) praemonstrat praesignatae rationis necessitatem; secundo quiddam quod in sua demonstratione suppositum fuerat, probat, ibi, « Omnium namque rerum, vel quotlibet, tum « genere, tum specie, tum numero diversitas « constat. » Circa primum duo facit. Primo ostendit quod alteritas est principium pluralitatis, alteritatem intelligens differentiam qua aliqua inter se altera constituuntur. Et mavult dicere alteritatem quam arietatem; quia non solum substantiales differentiae pluralitatem constituunt, quarum est facere aliud; sed etiam accidentales, quarum est facere alterum: ad arietatem vero sequitur alteritas, non e converso. Ex hoc autem habetur ratio arianicae deductionis. Si enim alteritas est principium pluralitatis, et posita causa ponitur effectus: ergo ponentibus eis alteritatem per augmentum et diminutionem, sequitur pluralitas Divinitatis. Secundo proponit alteritatem esse proprium principium pluralitatis: quia praeter eam pluralitas intelligi non potest, ex quo habetur ratio catholicae conjunctionis: remota enim propria causa, tollitur effectus. Si igitur in tribus personis non est alteritas aliqua Deitatis, non erit pluralitas aliqua, sed unitas.

Deinde probat quod supposuerat, scilicet alteritatem esse proprium principium pluralitatis, cum dicit: « Omnium namque rerum, vel quotlibet, tum « genere, tum specie tum numero diversitas constat: » et est ratio sua talis. Omnium rerum genere vel specie vel numero differentium, est aliqua alteritas sive differentia causa pluralitatis vel diversitatis. Sed omnes res plures, sive sint tres, sive quotlibet, sunt diversae vel genere, vel specie, vel numero. Ergo omnium plurium principium est aliqua alteritas.

Circa hanc rationem tria facit. Primo ponit minorem; secundo probationem, ibi, « Quoties « enim dicitur idem, toties et diversum praedicitur: » et est probatio. Quoties dicitur idem, toties dicitur diversum. Sed idem dicitur tribus modis; scilicet genere et specie et numero. Ergo et diversum. Primam supponit ex hoc quod dicitur 1 Topic. quod quoties dicitur unum oppositorum, totiens et reliquum; et ex hoc quod dicitur 10 Metaph., quod idem et diversum sunt opposita. Secundam manifestat per exempla, et supponit eam per hoc quod dicitur 1 Topic. Tertio vero probat majorem quantum ad id quod circa eam poterat esse dubium, ibi, « Sed numero differentiam facit « accidentium varietas. » Quod enim diversitatis illorum quae sunt diversa genere vel specie, principium sit aliqua alteritas, manifestum est ex ipso nomine. Ex hoc enim aliqua sunt diversa genere, quod est eis genus alterum; et diversa specie, quod sub altera specie continentur. Sed in his quae dicuntur esse diversa numero, non est manifestum ex ipso nomine quod aliqua alteritas sit principium

pluralitatis; immo videtur magis e converso secundum nomen, quod pluralitas quae in numero designatur sit principium diversitatis, cum ita dicantur esse aliqua diversa numero secundum nomen, sicut genere vel specie. Et ideo ad verificandam majorem sui syllogismi, ostendit quod hanc etiam differentiam qua aliqua dicuntur differre numero, facit aliqua alteritas sive varietas: quod probat per hoc quod in tribus hominibus, qui conveniunt genere et specie, et differunt numero, inveniuntur altera accidentia, sicut in homine et bove species altera, et in homine et lapide genus alterum. Unde sicut homo et bos distant specie, ita duo homines distant accidentibus. Et quia posset aliquis dicere quod varietas accidentium non est causa pluralitatis secundum numerum: quia remotis accidentibus vel secundum rem, ut separabilibus, vel animo et cognitione, ut inseparabilibus, adhuc remanet substantia; cum accidens sit quod adest et abest praeter subjecti corruptionem: ideo huic responsioni obviat dicens, quod quamvis omnia accidentia possint saltem animo separari, tamen alicujus accidentis diversitas nullo modo potest etiam animo a diversis individuis separari, scilicet diversitas locorum. Duo enim individua non possunt esse in eodem loco nec secundum rem nec secundum animi fictionem: quia hoc nec intelligi nec imaginari potest. Unde concludit quod ex hoc sunt aliqui homines plures numero, quod sunt accidentibus plures, idest diversi: et in hoc terminatur sententia hujus partis.

### QUAESTIO III.

#### DE HIS QUAE PERTINENT AD COGNITIONEM FIDEI.

Hic est duplex quaestio: prima de his quae pertinent ad fidei communionem; secunda de his quae pertinent ad causam pluralitatis.

Circa primum quaeruntur quatuor.

Primo, utrum humano generi sit fides necessaria.

Secundo, quomodo se habet fides ad religionem.

Tertio, utrum convenienter vera fides catholica vel universalis nominetur.

Quarto, utrum haec sit verae fidei confessio, quod Pater et Filius et Spiritus sanctus singulus est Deus, et tres sunt unus Deus absque omnis inaequalitatis distantia.

#### ARTICULUS I.

##### *Utrum humano generi fides sit necessaria.*

Ad primum sic proceditur. 1. Videtur quod non fuerit necessarium humano generi fidem habere. Ut enim dicitur Eccle. 7, 1, « quid necesse « est homini majora se quaerere? » quasi dicat, nihil. Sed ea quae fide creduntur, majora sunt homine, utpote rationem ejus excedentia; alias ad ea cognoscenda sufficeret ratio causans scientiam, nec requireretur fides. Ergo non fuit necessarium homini ut ea quae sunt fidei, extra doeretur.

2. Item. Naturam humanam Deus in sua conditione perfecte instituit. Deut. 22, 4: « Dei perfecta sunt opera. » Sed ex his quae menti humanae in sua conditione sunt indita, non potest homo pertingere ad ea quae sunt fidei cognoscenda: alias posset per scientiam haberi, quae causatur

(1) *Al. deest primo.*

ex eo quod conclusiones resolvuntur in principia naturaliter nota. Cum ergo perfectum dicatur aliquid cui nihil deest eorum quae debet habere, ut dicitur 5 Metaph., videtur quod homo fide non indigeat.

5. Item. Unusquisque sapiens ad perveniendum in finem viam eligit breviorē. Sed difficilius videtur creaturae ea quae super rationem sunt credere, et valde periculosum hominibus, cum multi a statu salutis decidant per hoc quod non credunt. Ergo videtur quod Deus, qui est sapientissimus, non debuit viam fidei praeparare hominibus ad salutem.

4. Item. Ubicumque est acceptio aliquorum cognitorum sine iudicio, est via facilis ad errorem. Sed non habemus aliquid in nobis per quod possimus iudicare de his quae per fidem accipiuntur, cum naturale iudicium ad huiusmodi non se extendat, utpote rationem excedentia. Ergo patet via facilis ad errorem; et ita videtur homini potius esse noxium quam utile ut dirigatur in Deum per fidem.

5. Item. Ut dicit Dionysius, malum hominis est praeter rationem esse. Sed homo fidei inhaerens a ratione discedit, et in hoc etiam assuescit rationem contemnere. Ergo videtur quod via illa sit hominibus mala.

Sed contra. Hebr. 11, 6: « Sine fide impossibile est placere Deo. » Sed hoc est maxime homini necessarium ut Deo placeat, sine quo nihil potest boni facere vel habere. Ergo fides est maxime homini necessaria.

Item. Homini est maxime necessarium cognoscere veritatem, cum gaudium de veritate cognita sit beatitudo, ut Augustinus dicit. Sed fides collocat credentes in veritate, et in eis veritatem, ut dicit Dionysius 7 cap. de div. Nomin. Ergo fides est homini maxime necessaria.

Item. Id sine quo non potest conservari humana societas, est homini maxime necessarium, et toti generi humano, cum homo sit animal politicum, ut dicitur 8 Ethic. Sed sine fide humana societas servari non potest, quia oportet ut unus homo alteri credat in promissis et in testimoniis, et in aliis huiusmodi quae sunt necessaria homini ad commanendum. Ergo fides humano generi est maxime necessaria.

Respondeo dicendum, quod fides habet aliquid commune cum opinione, et aliquid cum scientia et intellectu; ratione cuius ponitur medium inter opinionem et intellectum sive scientiam, ab Hugone de Sancto Victore. Cum intellectu autem, et scientia commune habet certum et fixum assensum; in quo ab opinione differt, quae accipit alterum oppositorum cum formidine alterius, et a dubitatione quae fluctuat inter duo contraria. Sed cum opinione commune habet quod est de rebus quae non sunt intellectui naturaliter possibles: in quo differt a scientia et intellectu. Quod autem aliquid non sit apparens humano intellectui, potest contingere ex duobus, ut dicitur in 2 Metaph.: scilicet ex defectu ipsarum rerum cognoscibilium et ex defectu intellectus nostri. Ex defectu quidem rerum, sicut in singularibus et contingentibus quae a nostris sensibus sunt remota, sicut sunt facta hominum, et dicta et cogitata: quae quidem talia sunt ut uni homini possint esse nota, et alii ignota. Et quia in convietu hominum unus homo

oportet quod alio utatur sicut seipso in quibus ipse sibi non sufficit, ideo oportet quod stet illis quae alius scit, et sunt sibi ignota, sicut his quae ipse cognoscit: et inde est quod in hominum conversatione est fides necessaria, qua unus homo dictis alterius credit; et hoc est iustitiae fundamentum, ut Tullius dicit in lib. de Officiis: et inde est quod nullum mendacium est sine peccato, cum per omne mendacium huic fidei tam necessariae derogetur. Ex defectu vero nostro sunt non apparentia, ut res divinae et necessariae, quae sunt secundum naturam maxime notae. Unde ad horum inspectionem non sumus statim in principio idonei, cum oporteat ex minus notis et posterioribus secundum naturam ad magis nota et priora naturaliter pervenire. Sed quia ex nullo horum quae ultimo cognoscimus, sunt nota ea quae primo cognoscimus, oportet nos etiam primo aliquam notitiam habere de illis quae sunt per se magis nota: quod fieri non potest nisi credendo. Et hoc etiam patet in ordine scientiarum: quia scientia quae est de causis altissimis, scilicet Metaphysica, ultimo occurrit homini ad cognoscendum; et tamen in scientiis praecambulis oportet quod supponantur quaedam quae in illa plenius innotescunt. Unde quaelibet scientia habet suppositiones, quibus oportet addiscentem credere. Cum igitur finis humanae vitae sit beatitudo, quae consistit in plena cognitione divinorum, necessarium est ad humanam vitam in beatitudinem dirigendam statim in principio fidem divinorum habere, quae plene cognoscenda expectantur in ultima perfectione humana. Ad quorum quaedam cognoscenda plene possibile est homini pervenire per viam rationis in statu viae: et horum quamvis possit haberi scientia, et a quibusdam habeatur, tamen necessarium est habere, propter quinque rationes, quas Rabbi Moyses ponit. Primo propter profunditatem et subtilitatem materiae, per quam occultantur divina ab hominum intellectu. Unde ne sit homo sine qualicumque horum cognitione, provisum est ei, ut saltem per fidem divina cognoscat. Unde Eccl. 7, 25: « Alta profunditas: quis cognosceat illam? » Secundo propter imbecillitatem intellectus humani a principio. Non enim provenit ei sua perfectio nisi in fine; et ideo ut nullum tempus sit vacuum a Dei cognitione, indiget fide, per quam ab ipso principio divina accipiat. Tertio propter multa praecambula quae exiguntur ad habendum cognitionem de Deo secundum viam rationis: exigitur enim ad hoc fere omnium scientiarum cognitio, cum omnium finis sit cognitio divinorum: quae quidem praecambula paucissimi comprehendunt vel consequuntur. Unde ne multitudo hominum a divina cognitione remaneat vacua, provisum est ei divinitus via per fidem. Quarto quia multi hominum ex naturali complexione sunt indispositi ad perfectionem intellectus consequendam secundum rationem, vel viam rationis. Unde ut hi divina cognitione non careant, provisum est via fidei. Quinto propter occupationes plurimas, quibus oportet homines occupari: unde impossibile est quod omnes consequantur per viam rationis id quod est de Deo necessarium ad cognoscendum; et propter hoc est via fidei procurata; et hoc quantum ad illa quae sunt ab aliquibus scita, et aliis proponuntur ut credenda. Quaedam vero divinorum sunt, ad quae plene cognoscenda nullatenus ratio humana sufficit; sed eorum plena co-

gnitio expectatur in futura vita, ubi erit plena beatitudo; sicut Trinitas et Unitas unius Dei: et ad hanc cognitionem homo perducitur non ex debito suae naturae, sed ex sola divina gratia. Unde oportet quod ad huiusmodi etiam scientiae perfectionem quaedam suppositiones ei primo credendae proponantur, ex quibus dirigatur in plenam cognitionem eorum quae a principio credit, sicut etiam in aliis scientiis accidit, ut dictum est: et ideo dicitur Isa. 7, 9, secundum aliam translationem: « Nisi credideritis, non intelligetis. » Et huiusmodi suppositiones sunt illa qua sunt credita quantum ad omnes, et a nullo in hac vita sunt scita vel intellecta.

Ad primum igitur dicendum, quod licet ea quae sunt fidei, sint maiora homine, viribus naturae consideratis; non tamen sunt maiora homine divino lumine illustrato: et ideo non est necesse homini ut huiusmodi propria virtute quaerat; sed est ei necessarium ut ea divina revelatione cognoscat.

Ad secundum dicendum, quod Deus in prima rerum conditione hominem perfectum instituit perfectione naturae: quae quidem in hoc consistit ut homo habeat omnia quae sunt suae naturae debita: sed supra debitum naturae adduntur postmodum humano generi aliquae perfectiones ex sola gratia divina, inter quae est fides, ut patet Ephes. 2, ubi de fide dicitur, quod est Dei donum.

Ad tertium dicendum, quod cuilibet in beatitudinem tendenti necessarium est cognoscere in quibus beatitudinem quaerere debeat, et qualiter: quod quidem facilius fieri non potest quam per fidem; cum rationis inquisitio ad talia pervenire non possit, nisi multis praecognitis, quae non est facile scire. Nec etiam potuit cum minori periculo, cum humana inquisitio propter imbecillitatem intellectus nostri sit facilis ad errorem: et hoc etiam aperte ostenditur ex ipsis philosophis, qui per viam rationis finem humanae vitae quaerentes et modum perveniendi in ipsum non inventes, in errores multiplices et turpissimos inciderunt, adeo sibi invicem dissentientes, ut vix duorum aut trium esset de his per omnia communis una sententia: eum tamen per fidem videamus in unam sententiam etiam plurimos convenire populos.

Ad quartum dicendum, quod quaecumque acceptis aliquo modo assentitur, oportet esse aliquid quod inclinet ad assensum; sicut lumen naturaliter inditum in hoc quod assentitur primis principiis per se notis, et ipsorum principiorum veritas in hoc quod assentitur conclusionibus scitis, et aliquas verisimilitudines in hoc quod assentimur his quae opinamur: quae si fuerint aliquantulum fortiores, inclinant ad credendum, prout fides dicitur opinio iuvata rationibus. Sed id quod inclinat ad assentiendum principiis intellectis aut conclusionibus scitis, est sufficiens inductivum: unde cogit ad assensum, et est sufficiens ad iudicandum de illis quibus assentitur. Quod vero inclinat ad opinandum qualitercumque, vel etiam fortiter, non est sufficiens inductivum rationis; unde non cogit; nec per hoc potest haberi perfectum iudicium de his quibus assentitur. Unde et in fide qua in Deum credimus, non solum est acceptio rerum quibus assentimur, sed aliquid quod inclinat ad assensum; et hoc est lumen quoddam, quod est habitus fidei, divinitus menti humanae infusum: quod quidem sufficientius est ad inducendum quam aliqua demonstratio, qua

etsi nunquam falsum concludatur, tamen frequenter in hoc homo fallitur quod putat esse demonstrationem quod non est. Sufficientius etiam quam ipsum lumen naturale, quo assentimur principiis; cum lumen illud frequenter impediatur ex corporis infirmitate, ut patet in mentecaptis. Lumen autem fidei, quod est quasi sigillatio quaedam primae veritatis in mente, non potest fallere, sicut Deus non potest decipere vel mentiri. Unde hoc lumen sufficit ad iudicandum. Ille tamen habitus non movet per viam intellectus, sed magis per viam voluntatis: unde non facit videre illa quae creduntur, nec cogit assensum, sed facit voluntarie assentiri. Et sic patet quod fides ex duabus partibus est; a Deo scilicet ex parte interioris luminis, quod inducit ad assensum: et ex parte eorum quae exterius proponuntur, quae ex divina revelatione initium sumserunt: et haec se habent ad cognitionem fidei, sicut accepta per sensum ad cognitionem principiorum, quia utrisque fit aliqua cognitionis determinatio. Unde sicut cognitio principiorum accipitur a sensu, et tamen lumen quo principia cognoscuntur est innatum; ita fides est ex auditu, et tamen habitus fidei est infusus.

Ad quintum dicendum, quod vivere secundum rationem est bonum hominis in quantum est homo; vivere autem praeter rationem potest uno modo sonare in defectum, sicut est in illis qui vivunt secundum sensum, et hoc est hominis malum; alio modo sonare in excessum, ut cum homo divina gratia adducitur in id quod est supra rationem; et sic praeter rationem vivere non est hominis malum; sed bonum supra hominem. Et talis est cognitio eorum quae sunt fidei; quamvis et ipsa fides non omnibus modis sit praeter rationem. Hoc enim naturalis ratio habet quod assentiendum est his quae a Deo dicuntur.

## ARTICULUS II.

### *Utrum fides sit distinguenda a religione.*

Ad secundum sic proceditur. 1. Videtur quod fides a religione distinguenda non sit: quia, ut dicit Augustinus in Ench., fide et spe et caritate colendus est Deus. Sed cultus Dei est actus religionis; ut per definitionem Tullii patet, qui dicit: « Religio est quae cuidam superiori naturae, quam divinam vocant, cultum caeremoniamque affert. » Ergo fides ad religionem pertinet.

2. Item. Dicit Augustinus de vera Relig. quod « vera religio est qua unus Deus colitur, et purgatissima pietate vel puritate cognoscitur. » Sed cognoscere Deum est fidei. Ergo fides sub religione continetur.

3. Item. Offerre Deo sacrificium, est opus vel actus religionis. Sed hoc pertinet ad fidem: quia, ut dicit Augustinus 4 de civ. Dei: « Verum sacrificium est omne opus quod agitur ut sancta societate inhaereamus Deo. » Prima autem inhaesio hominis ad Deum est per fidem. Ergo fides praecipue ad religionem pertinet.

4. Item. Joan. 4, 24: « Spiritus est Deus; et eos qui adorant eum, in spiritu et veritate oportet adorare. » Magis autem adoratur Deus cum ei prosternitur intellectus, quam cum ei prosternitur corpus. Sed per fidem ei substernitur intellectus, dum se omnino subiecit ad assentiendum his



quae de Deo dicuntur. Ergo fides ad religionem maxime pertinet.

5. Item. Omnis virtus quae Deum habet pro objecto, est virtus theologica. Sed religio habet Deum pro objecto: non enim nisi Deo cultum debitum offert. Ergo est virtus theologica. Sed magis videtur pertinere ad fidem quam ad aliquam aliarum, cum non dicantur esse extra religionem christianam nisi qui sunt extra fidem. Ergo religio videtur esse idem quod fides.

Sed contra est, quod Tullius in 2 veteris Rhetoricae, ponit religionem partem justitiae, quae est virtus moralis. Ergo cum fides sit virtus theologica, religio erit alterius generis quam fides.

Item. Religio consistit etiam in actu qui est ad proximum, ut patet Jac. 1, 27: « Religio munda » et immaculata apud Deum et Patrem haec est, « visitare pupillos et viduas in tribulatione eorum. » Sed fides non habet actum nisi qui est ad Deum. Ergo religio est omnino a fide distincta.

Item. Religiosi dicuntur communiter, qui quibusdam specialibus votis astringuntur; non autem soli illi dicuntur fideles: ergo non est idem fidelis et religiosus: ergo nec idem fides et religio.

Respondeo dicendum, quod, sicut patet per Augustinum, 10 de civit. Dei, theosebia, quae cultus Dei dicitur, religio, pietas et latria, ad idem pertinere intelliguntur, scilicet ad Deum colendum. Cultus autem cuiuslibet rei impensus nihil aliud esse videtur quam debita operatio circa id adhibita; et ex hoc diversimode dicuntur aliqui colere agros, parentes, patriam et alia huiusmodi, quia diversis diversae operationes coaptantur. Deus autem non hoc modo colitur quod ei nostra operatio aliquid prosit aut subveniat, sicut in praedictis est; sed solum in quantum ei nos subdimus, et subditos demonstramus. Illic ergo cultus divinus absolute theosebiae nomine designatur. Sed religio importat quamdam religionem, secundum quod homo se astringit quodammodo ad cultum istum: unde dicit Augustinus in lib. de vera Relig.: « Religio a religando dicta creditur: » vel etiam recte eligendo, ut dicit 4 de civit. Dei. Ex propria enim electione aliquis ligat se ad aliquid faciendum. Oportet etiam nos reeligere quae amisimus negligentes, ut ibidem dicit: et inde est quod illi qui vitam suam totam et seipsos ad divinum obsequium votis quibusdam obligant, religiosi dicuntur. Sed pietas animum colentis respicit, qui non fide nec mercenario affectu ei obsequitur. Et quia his quae sunt supra nos, quasi quaedam veneratio divina debetur; beneficia etiam quae miseris exhibentur, sunt quasi quaedam sacrificia Dei, secundum illud Hebr. ult. 16: « Beneficentiae et communionis nomine oblivisci: talibus enim hostiis promeretur Deus: » hinc est quod nomen pietatis et religionis ad opera misericordiae transfertur, et maxime ad beneficia quae in parentes et patriam exhibentur. Sed latria importat debitum colendi, sive rationem cultus, ex hoc scilicet quod sumus servi ejus quem colimus: non hoc modo quo homo servus hominis dicitur propter quodcumque accidentale debitum; sed quia totum quod sumus, ei debemus tamquam Creatori: unde et latria servitus dicitur, non quaelibet, sed illa tantum qua homo servus Dei est. Sic ergo religio consistit in operatione qua homo Deum colit, se ei subjiciendo: quae quidem operatio debet esse conveniens et ei

qui colitur et colenti. Ipse autem qui colitur, cum sit spiritus, non potest corpore, sed sola mente contingi: et sic cultus ejus principaliter in mentis actibus consistit, quibus mens ordinatur in Deum; et hi sunt praecipue actus theologiarum virtutum; et secundum hoc dicit Augustinus, quod Deus colitur fide, spe et caritate; et his adjunguntur actus donorum ordinantium in Deum, ut sapientiae et timoris. Sed quia nos qui Deum colimus, corporei sumus, et per corporeos sensus cognitionem accipimus, inde est quod ex parte nostra requiruntur ad cultum praedictum etiam aliqua corporales actiones; tum ut ex toto quod sumus Deo serviamus, tum ut per huiusmodi corporalia nosmetipsos et alios excitemus ad actus mentis ordinatos in Deum. Unde dicit Augustinus lib. de Cura pro mortuis habenda: « Orantes de membris sui corporis » faciunt quod supplicantibus congruit, cum genua » figunt, cum manus extendunt, vel etiam se pro » sternunt solo, et si quid aliud visibiliter faciunt; » quamvis eorum invisibilis voluntas et cordis » intentio Deo nota sit, nec ille indigeat his in » diciis, ut animus pandatur humanus; sed hinc » magis seipsum incitat homo ad orandum et ge » mendum humiliter atque ferventius. » Sic ergo omnes actus quibus se homo subjicit Deo, sive sint mentis, sive corporis, ad religionem pertinent. Sed quia ea quae proximis propter Deum impenduntur, ipsi Deo impenduntur, constat quod ad eandem pertinent subjectionem, in qua cultus religionis consistit; et sic diligenter consideranti apparet omnem actum bonum ad religionem pertinere. Unde Augustinus (loc. cit.) dicit, quod « verum sacrificium est omne opus quod agitur ut sancta » societate inhaereamus Deo, tamen quodam or » dine. » Primo enim et principaliter ad cultum praedictum pertinent actus mentis ordinati in Deum; secundo actus corporis qui ad hos excitandos vel designandos fiunt, ut prostrationes, sacrificia et huiusmodi; tertio ad eundem cultum pertinent omnes actus alii in proximum ordinati propter Deum. Et tamen sicut magnanimitas est quaedam virtus specialis, quamvis omnium virtutum actibus utatur secundum specialem rationem objecti, utpote coniectans magna in actibus omnium virtutum; ita etiam religio est specialis virtus, in actibus omnium virtutum specialem rationem objecti considerans, scilicet Deo debitum: sic enim est justitiae pars. Illi tamen actus specialiter religioni assignantur qui nullius alterius virtutis sunt, sicut prostrationes, et huiusmodi, in quibus secundario cultus Dei consistit. Ex quo patet quod actus fidei pertinet quidem materialiter ad religionem, sicut et actus aliarum virtutum; et magis in quantum fidei actus est primus motus mentis in Deum; sed formaliter a religione distinguitur, utpote aliam rationem objecti considerans. Convenit etiam fides cum religione praeter hoc, in quantum fides est religionis causa et principium. Non enim aliquis eligeret cultum Deo exhibere, nisi fide teneret Deum esse creatorem, gubernatorem et remuneratorem humanorum actuum. Ipsa tamen religio non est virtus theologica: habet enim pro materia quasi omnes actus, ut fidei, vel virtutis alterius, quos Deo tamquam debitos offert; sed Deum habet pro fine. Colere enim Deum est huiusmodi actus ut Deo debitos offerre.

Et per haec patet responsio ad objecta omnia.



## ARTICULUS III.

*Utrum fides christiana convenienter nominetur catholica, vel universalis.*

Ad tertiam sic proceditur. 1. Videtur quod fides christiana, catholica non debeat nominari: quia cognitio debet esse cognoscibili proportionata: non enim quodlibet quolibet modo cognoscitur. Sed fides est cognitio Dei, qui non est universalis neque particularis, ut Augustinus dicit in lib. de Trin. Ergo nec fides debet dici universalis.

2. Item. De singularibus non potest haberi cognitio nisi singularis (1). Sed fide quaedam singularia facta tenemus, ut passionem Christi, resurrectionem, et hujusmodi. Ergo fides non debet dici universalis.

3. Item. Ab eo quod est commune multis, non debet alicui eorum nomen proprium imponi, cum nomen causa innotescendae rei imponatur. Sed quaelibet traditio vel secta proponit ea quae tradit ut universaliter (2) ab omnibus credenda vel observanda, ut universaliter vera. Ergo non debet fides christiana specialiter catholica dici.

4. Item. Idolatria ad omnes mundi angulos pervenit. Sed christiana fides nondum invenitur ad omnes mundi fines pervenisse, cum aliqui barbari sint qui fidem Christi non cognoscunt. Ergo secta idolatriae magis debet dici catholica quam christiana fides.

5. Item. Quod non convenit omnibus, non potest dici universale. Sed fides christiana a multis non recipitur. Ergo inconvenienter universalis vel catholica dicitur.

Sed contra est quod dicit Augustinus lib. de vera Religione: « Tenenda est nobis christiana religio, et ejus Ecclesiae communicatio quae catholica est, et catholica nominatur, non solum a suis, verum etiam ab omnibus inimicis. »

Item. Universale et commune idem videntur. Sed fides christiana ab Apostolo fides communis dicitur, Tit. 1, 4: « Tito dilecto filio secundum communem fidem. » Ergo convenienter catholica dicitur.

Item. Quod universaliter omnibus proponitur, maxime debet dici universale. Sed fides christiana omnibus universaliter proponitur, ut patet Matth. ult. 19: « Docete omnes gentes. » Ergo ipsa merito debet dici catholica vel universalis.

Respondeo dicendum, quod fides, sicut quaelibet alia cognitio, duplicem habet materiam: scilicet in qua, idest ipsos credentes, et de qua, idest res creditas: et ex parte utriusque materiae fides christiana catholica dici potest. Ex parte quidem credentium: quia illam fidem veram asserit Apostolus Rom. 3, quae testificata est a lege et prophetis. Cum autem prophetarum temporibus diversae gentes diversorum deorum cultibus insisterent, solus vero populus Israel Deo vero cultum debitum exhiberet, et sic non esset una universalis religio; praedixit per eos Spiritus sanctus cultum veri Dei ab omnibus esse assumendum: unde Isai. 14, 24: « Mihi curvabitur omne genu, et confitebitur omnis lingua; » quod quidem per fidem et christianam religionem impletur. Unde merito catholica nominatur, utpote a cujuslibet conditionis hominibus

(1) *Al.* universalis.

(2) *Al.* ut singularis.

recepta. Et sic illi qui ab hac fide et religione communiter promissa et recepta in quasdam sectas declinaverunt, non catholici, sed quasi a communione divisi, haeretici nominantur. Sed ex parte etiam rerum creditarum in fide christiana veritas catholica invenitur. Fuerunt namque antiquitus diversae artes et viae, quibus hominibus quantum ad diversa providebatur, vel provideri credebatur. Quidam namque bonum hominis in solis corporalibus ponebant, vel in divitiis, aut honoribus, aut voluptatibus. Quidam autem in solis animae bonis, ut in virtutibus moralibus vel intellectualibus. Quidam autem, ut Augustinus dicit lib. de civit. Dei, existimabant deos esse colendos propter corporalia bona istius vitae; quidam vero propter bona quae sunt post hanc vitam. Porphyrius etiam ponebat, quibusdam gentilibus teletis (1) animae imaginativam partem purgari, et non totam animam; dicebatque, ut Augustinus dicit 10 de civit. Dei, nondum receptam esse unam sectam, quae universalem viam contineat animae liberandae (2). Haec autem est religio christiana, ut Augustinus dicit ibidem: ipsa enim docet Deum esse colendum non solum propter aeterna, sed etiam propter temporalia beneficia; nec solum in spiritualibus, sed etiam in usu corporali hominem dirigit, et beatitudinem animae et corporis repromittit. Et ideo regulae ejus universales dicuntur, utpote totam vitam hominis, et omne quod ad ipsum (3) quolibet modo pertinet, continentes et ordinantes. Et has duas rationes universalitatis assignat Boetius, ut in littera patet.

Ad primum igitur dicendum, quod quamvis Deus in se nec universalis nec particularis sit, est tamen universalis omnium rerum causa et finis; et sic cognitio quae de ipso habetur, ad omnia quodammodo universalis est.

Ad secundum dicendum, quod illa particularia facta tenet fides ut universalis remedia ad totum genus humanum redimendum et liberandum.

Ad tertium dicendum, quod aliae sectae hoc sibi vindicare nituntur quod est proprium fidei christiana; sed non possunt pertingere: unde eis proprie universalitatis non competit nomen.

Ad quartum dicendum, quod idolatria non erat una religio, sed apud diversos diversa, cum diversi diversos deos colendos sibi instituerent: nec iterum ipsa ab omnibus nationibus est recepta, cum a veri Dei cultoribus fuerit reprobata, et etiam a sapientibus gentilium, qui dicebant hujusmodi caeremonias esse observandas tamquam legibus jussas, non tamquam diis placitas, ut de Seneca dicit Augustinus in lib. de civit. Dei.

Ad quintum dicendum, quod christiana fides non dicitur catholica vel universalis propter singula generum, sed propter genera singulorum: quia ex omni conditione hominum ei aliqui adhaeserunt.

## ARTICULUS IV.

*Utrum haec sit vera confessio, quod Pater et Filius et Spiritus sanctus sunt unus Deus.*

Ad quartum sic proceditur. 1. Videtur quod non sit fidei catholicae confessio, quod Pater et Filius

(1) *Teletas* vocabant expiationes, et sacrificia quaedam perfecta, quibus nihil deesset.

(2) *Al.* libertatem.

(3) *Al.* ad ipsam.

et Spiritus sanctus sint unus Deus: quia, ut ipse Boetius dicit, ad inaequalitatem sequitur pluralitas deorum. Sed catholica Scriptura quae est caput catholicae religionis, ut dicit Augustinus de vera Religione, ponit inaequalitatem Patris et Filii, ut videtur per hoc quod dicit Joan. 14, 28: « Pater major me est, » ex persona Filii. Ergo non est confessio catholicae fidei quam dicit.

2. Item. 1 Corinth. 15, 28: « Cum subiecta fuerint illi omnia ( scilicet Filio ), tunc et ipse Filius subjectus erit illi ( scilicet Patri ) qui sibi subiecit omnia. » Et sic idem quod prius.

3. Item. Orare non est nisi inferioris ad superiorem. Sed Filius orat pro nobis. Roman. 8, 34: « Christus Jesus, qui etiam interpellat pro nobis: » similiter et Spiritus sanctus: ibidem 26: « Spiritus postulat pro nobis gemitibus inenarrabilibus. » Ergo Filius et Spiritus sanctus sunt Patre inferiores, secundum confessionem catholicae fidei: et sic idem quod prius.

4. Item. Joan. 17, 3, dicit Filius loquens ad Patrem: « Ut cognoscant te solum verum Deum, et quem misisti Jesum Christum. » Ergo solus Pater est verus Deus: non ergo Filius et Spiritus sanctus: ergo videntur esse creaturae: et sic idem quod prius.

5. Item. 1 ad Timoth. ult. 15, dicit Apostolus: « Quem ( scilicet Christum ) suis temporibus ostendet beatus et solus potens, Rex regum, et Dominus dominantium, qui solus habet immortalitatem, et lucem habitat inaccessibilem. » Ergo haec omnia soli Patri conveniunt: et sic idem quod prius.

6. Item. Marc. 15, 32, dicitur: « De die autem illa vel hora nemo scit, neque Angeli in caelo, neque Filius, nisi Pater. » Ergo major est scientia Patris quam Filii: ergo et major essentia: et sic idem quod prius.

7. Item. Matth. 20, 25: « Sedere ad dexteram meam vel ad sinistram meam, non est meum dare vobis, sed quibus paratum est a Patre meo. » Ergo Filius non est aequalis potestatis Patri: ergo etc.

8. Item. Coloss. 1, dicitur de Filio, quod est primogenitus omnis creaturae. Sed comparatio non est nisi eorum quae sunt unius generis. Ergo Filius est creatura.

9. Item. Eccli. 24, 14, dicitur ex persona divinae Sapientiae: « Ab initio et ante saecula creata sum: » et sic idem quod prius.

10. Item. Ille qui clarificatur, minor est illo qui clarificat. Sed Filius clarificatur a Patre, ut patet Joan. 12. Ergo Filius est minor Patre.

11. Item. Mittens major est eo qui mittitur. Sed Pater mittit Filium, ut patet Galat. 4, 4: « Misit Deus Filium suum: » et etiam mittit Spiritum sanctum: Joan. 14, 26: « Paraclitus Spiritus sanctus, quem mittet Pater in nomine meo. » Ergo Pater major est Filio et Spiritu sancto. Et sic ista sententia quam dicit, non videtur esse fidei catholicae.

Sed contra est quod dicitur Joan. 1, 1: « In principio erat Verbum, et Verbum erat apud Deum, et Deus erat Verbum: » et: « Omnia per ipsum facta sunt etc. » Ex quo habetur quod Filius sit aeternus, alias non esset in principio; et quod sit Patri aequalis, alias non esset Deus; et quod non sit creatura, alias per ipsum omnia facta non essent.

Item. Cum Filius sit veritas, de se mentitus

non est. Sed Filius dicebat se Patri aequalem. Joan. 5, 18: « Patrem suum dicebat Deum, aequalem se faciens Deo. » Ergo ipse est aequalis Patri.

Item. Philipp. 11, 6: « Non rapinam arbitratus est esse se aequalem Deo. » Esset autem rapina si arbitraretur, et non esset. Ergo est aequalis Deo.

Item. Joan. 10, 50: « Ego et Pater unum sumus: » et ibid. 14, 11: « Ego in Patre, et Pater in me est. » Ergo unus alio major non est.

Item. Roman. 9, 5: « Ex quibus Christus, qui est super omnia Deus benedictus. » Ergo nullus superior eo est; et sic non est minor Patre.

Item. 1 Joan. ult. 20: « Dedit nobis sensum ut cognoscamus verum Deum, et simus in vero Filio ejus: hic est verus Deus, et vita aeterna. » Ergo non est minor Patre.

Item. Ostenditur quod Spiritus sanctus sit verus Deus, et aequalis Patri, per hoc quod dicitur Philip. 5, 5, secundum Graecam litteram: « Nos sumus circumcisio, qui Spiritui Deo servimus: » et intelligitur de servitute latriae, ut in Graeco patet: et talis nulli creaturae debetur: Deut. 6, et Matth. 4, 10: « Dominum Deum tuum adorabis, et illi soli servies. » Ergo Spiritus sanctus non est creatura.

Item. Membra Christi non possunt esse templum alicujus qui sit minor quam Christus. Sed corpora nostra quae sunt membra Christi, secundum Apostolum, sunt templum Spiritus sancti, ut dicitur 1 Corinth. 6. Ergo Spiritus sanctus non est minor Christo, et sic nec Patre. Et ita verum est quod auctor dicit esse catholicae fidei sententiam.

Respondeo dicendum, quod Arianorum positio, inaequalitatem in divinis personis constituens, non est catholicae fidei confessio, sed magis gentilis impietas: quod sic patet. Apud gentiles enim omnes substantiae immortales dii dicebantur. Inter has autem dicebant vel ponebant Platonici tres personas principales, ut patet per Augustinum de civ. Dei lib. 10, et per Macrobius super somnium Scipionis: scilicet Deum omnium creatorem, quem dicebant tantum Patrem propter hoc quod ab ipso omnia deducebantur; et quamdam inferiorem substantiam, quam paternam mentem, sive paternum intellectum dicebant, plenam omnium rerum ideis, et hanc factam a Deo Patre dicebant; et post haec ponebant animam mundi quasi spiritum vitae totius mundi. Et has tres substantias tres principales deos nominabant, et tria principia, per quae animae purgarentur. Origenes autem Platoniciis documentis insistens, arbitratus est, hoc modo in fide ponendum esse; quia dicitur 1 Joan. ult. 7: « Tres sunt qui testimonium dant in caelo: » sicut Platonici tres principales substantias posuerunt: unde posuit Filium esse creaturam et minorem Patre in lib. qui dicitur Periarchon, id est de principiis, ut patet per Hieronymum in quadam epistola de erroribus Origenis. Et cum ipse Alexandriae docuerit, ex ejus scriptis suum errorem Arius hausit: et per hoc dicit Epiphanius, quod Origenes fuit pater Arii et fons. Tantum ergo christianae catholicae fidei positio Arii est contraria de Trinitate, quantum error gentilium, qui creaturas deos dicentes, eis latriae servitatem exhibebant. Quod arguit Apostolus Rom. 1, 25, dicens, quod « coluerunt et servierunt creaturae potius quam Creatori. »

Ad primum ergo dicendum, quod, sicut dicit

Augustinus, 2 de Trinit., de Patre et Filio dicitur aliquid in Scripturis tripliciter. Quaedam namque unitatem substantiae et personarum aequalitatem ostendunt, ut Joan. 10, 50: « Ego et Pater unum sumus. » Quaedam vero Filium minorem ostendunt propter formam servi, secundum quam factus est seipso minor, secundum illud Philipp. 2, 7: « Semetipsum exinanivit, formam servi accipiens. » Quaedam vero ita dicuntur ut neque minor neque aequalis ostendatur, sed tantum quod Filius sit de Patre, sicut Joan. 5, 26: « Sicut Pater habet vitam in semetipso, sic dedit et Filio vitam habere in semetipso. » Ipsae autem primae auctoritates sunt catholicis in adminiculum ad defensionem veritatis. Sed ea quae secundo et tertio modo dicuntur in Scriptura, assumpserunt haeretici ad sui erroris confirmationem, sed vane. Non enim quae de Christo dicuntur secundum humanam naturam, sunt referenda ad ejus Divinitatem: alias sequeretur quod secundum Deitatem esset mortuus, cum hoc de ipso secundum humanitatem dicatur. Similiter nec ostenditur Patre minor Filius, quamvis Filius sit ex Patre: quia Filius omnia a Patre quae Pater habet, accepit, ut habetur Joan. 16, et Matth. 11. Unde per hoc ordo originis, non inaequalitas Divinitatis astrui potest. Quod ergo dicitur, « Pater major est me, » dictum est de Filio secundum humanam naturam, secundum Augustinum; vel secundum Hilarium, secundum divinam, ita quod majoritas non importet inaequalitatem (quia Filius non est minor Patre, cui datum est nomen super omne nomen) sed importat auctoritatem principii, secundum quod hoc quo Filius est aequalis Patri, habet a Patre.

Ad secundum dicendum, quod Filio subiecit omnia non solum Pater, sed etiam ipse sibi ipsi, secundum illud Philipp. 5, 21: « Secundum virtutem qua potens est subicere sibi omnia, » hoc est secundum Deitatem, qua aequalis est Patri. Unde cum dicitur quod Christus erit subjectus, non fit comparatio Filii ad Patrem secundum Deitatem, sed magis secundum humanitatem Filii ad Deitatem Patris, quae toti Trinitati communis est. Et tunc apparebit maxime secundum humanam naturam divinae subjectus, quando divina natura perfecte cognoscitur: non tali subiectione, sicut quidam haeretici dixerunt, quod ipsa natura humana a divina assumpta transeat in divinam; sed secundum quod minor est Patre humanitate: quod maxime apparebit cum regnum, idest fideles, tradet Patri, non sibi adjiciens, sed ad Patris visionem adducens, qua visione etiam ipsius Deitas videbitur.

Ad tertium dicendum, quod, secundum Augustinum 5 de Trinit., ex hoc Filius orat quo minor est Patre; ex quo vero aequalis est Patri, exaudit cum Patre. Sed Spiritus sanctus interpellare dicitur, in quantum nos interpellantes facit, et nostris orationibus efficaciam praestat.

Ad quartum dicendum, quod secundum Augustinum 6 de Trinit., solus unus verus Deus non est tantum de Patre intelligendum, sed similiter de Patre et Filio et Spiritu sancto, qui dicuntur solus unus verus Deus: quia nihil praeter Trinitatem illam est verus Deus. Unde sic est intelligendum: Ut cognoscant te Patrem, et quem misisti Jesum, esse unum solum verum Deum. Et tacet de Spiritu sancto, quia cum sit nexus amborum, ex utroque intelligitur.

Ad quintum dicendum, quod, secundum Augustinum, 1 de Trinitate, verbum illud non est intelligendum de sola persona Patris, sed de tota Trinitate: tota enim Trinitas est beata et potens; tota etiam Trinitas Filium ostendit. Si tamen dixisset, Quem ostendet Pater beatus et solus potens, non propter hoc separaretur Filius, sicut nec Pater separatur, cum dicitur Ecl. 24, 8, ex persona Filii qui est Dei Sapia: « Gyrum caeli circunvi sola. » Et hoc ideo quia in his quae ad essentiam pertinent, Pater et Filius sunt omnino unum; et ideo quod de uno dicitur per dictionem exclusivam, non removetur ab alio, sed solum a creaturis.

Ad sextum dicendum, quod Filius non solum secundum divinam naturam scit diem et horam illam, sed etiam secundum humanam: quia anima ejus scit omnia. Dicitur autem ideo diem illam nescire, ut dicit Augustinus 1 de Trinit., quia non facit nos scire eam: ut de de hoc quaerentibus, dixit: « Non est vestrum nosse tempora vel momenta, quae Pater posuit in sua potestate. » Act. 1, 7: per quem modum dicit Apostolus 1 Corinth. 2, 2: « Non judicavi me scire aliquid inter vos nisi Jesum Christum, et hunc crucifixum: » quia scilicet alia eis dicere noluerat, quia capaces non erant. Vel hoc intelligendum est de Filio, non in persona capitis, sed in persona membrorum: quia Ecclesia nescit, ut Hieronymus dicit. In hoc autem quod Pater solus dicitur scire, ostenditur etiam Filius scire secundum praedictam regulam.

Ad septimum dicendum, quod, sicut dicit Augustinus 1 de Trin., sic exponendum est verbum illud: « Non est meum dare vobis; » idest, non est humanae potestatis hoc dare; ut per hoc intelligatur illud dare per quod est Deus et aequalis Patri.

Ad octavum dicendum, quod, secundum Augustinum 1 de Trin., hunc Apostolicum locum haeretici non intelligentes, in contumeliam Filii Dei saepe prorumpunt, dicentes et astruentes quod creatura sit, minus considerantes verborum vim. Primogenitus quippe dictus est, et non primus creatus; ut et genitus pro natura divina quam habet, et primus propter perpetuitatem credatur. Quamvis autem Filius non sit de genere creaturarum, tamen secundum Basilium habet aliquid cum creaturis commune, scilicet accipere a Patre; sed hoc habet praecreaturis, quia per naturam habet quae a Patre accepit; et propter hoc potest ordo inter genituram Filii et creaturarum productionem notari.

Ad nonum dicendum, quod illud verbum et omnia similia quae de sapientia Dei leguntur, vel sunt referenda ad sapientiam creatam, sicut sunt Angeli, vel ad ipsum Christum secundum humanam naturam; et sic dicitur ab initio vel initio creatus, quasi ab aeterno praedestinatus creaturam assumere.

Ad decimum dicendum, quod sicut dicit Augustinus 2 de Trin., ex hoc quod Pater clarificat Filium, non ostenditur Filius minor Patre: alias esset etiam Spiritu sancto minor, quia dicit Filius de Spiritu sancto, Joan. 16, 14: « Ille me clarificabit. » Illa enim clarificatio non ostendit aliquid in persona Filii fieri; sed vel in noticia hominum, secundum quod clarificare est ipsius notitiam claram facere; vel in corpore assumpto, prout refertur ad claritatem resurrectionis.



Ad undecimum dicendum, quod Filius et Spiritus sanctus dicuntur missi a Patre, non quod essent ubi prius non fuerant, sed ut aliquo modo quo prius non fuerant; quod est secundum aliquem effectum in creatura. Unde per hoc quod Filius et Spiritus sanctus dicuntur a Patre missi, non ostenditur Trinitatis inaequalitas, sed ordo originis, quo una persona est ab alia. Unde Pater non mittitur, quia non est ab alio ut efficientiam ab alio habens respectu illius effectus secundum quem persona divina mittitur.

## QUAESTIO IV.

DE HIS QUAE AD CAUSAM PLURALITATIS PERTINENT.

Deinde quaeritur de his quae ad causam pluralitatis pertinent: et quaeruntur circa hoc quatuor.

Primo, utrum alteritas sit causa pluralitatis.

Secundo, utrum varietas accidentium faciat diversitatem secundum numerum.

Tertio, utrum duo corpora possint esse vel intelligi simul esse in eodem loco.

Quarto, utrum varietas loci aliquid operetur ad differentiam secundum numerum.

### ARTICULUS I.

*Utrum alteritas sit causa pluralitatis.*

Ad primum sic proceditur. 1. Videtur quod pluralitatis causa non sit alteritas. Ut enim dicitur in Arithmetica Boethii, omnia quaecumque a summa rerum natura constructa sunt, numerorum videntur esse ratione formata; hoc enim fuit principale in animo conditoris exemplar. Et hoc consonat ei quod dicitur Sapient. 11, 21: « Omnia in pondere, numero, et mensura disposuisti. » Ergo pluralitas sive numerus est primum inter res creatas, et non est ejus aliqua causa quaerenda.

2. Item, ut dicitur in lib. de Causis, prima rerum creatarum est esse. Sed ens primo dividitur per unum et multa. Ergo multitudine nihil potest esse prius nisi ens et unum. Ergo non videtur esse verum quod aliquid sit ejus causa.

3. Item. Pluralitas vel circuit omnia genera, secundum quod dividitur contra unum, quod est convertibile cum ente: vel est in genere quantitatis, secundum quod dividitur uni quod est principium numeri. Sed alteritas est in genere relationis: relationes autem non sunt causae quantitatum, sed potius e converso: multo etiam minus relatio est causa ejus quod est in omnibus generibus, quia sic esset causa substantiae. Ergo alteritas nullo modo est causa pluralitatis.

4. Item. Contrariorum contrariae sunt causae. Sed identitas et alteritas, sive diversitas, sunt oppositae. Ergo habent oppositas causas. Sed unitas est causa identitatis, ut patet in 5 Metaph. Ergo pluralitas vel multitudo est causa diversitatis: ergo alteritas non est causa pluralitatis.

5. Item. Alteritatis principium est accidentalis differentia. Hujusmodi enim differentiae, secundum Porphyrium, faciunt alterum. Sed non in omnibus in quibus est pluralitas, invenitur accidentalis differentia, nec etiam differentia qualisemque: quaedam enim sunt quae accidentibus subiecti non possunt, ut formae simplices: quaedam vero sunt quae

in nullo conveniunt, unde non possunt differentia dici, sed diversa, ut patet per Philosophum 10 Metaph. Ergo non omnis pluralitatis causa est alteritas.

Sed contra est quod Damascenus dicit, quod divisio est causa numeri. Sed divisio in diversitate vel alteritate consistit. Ergo diversitas vel alteritas principium pluralitatis est.

Item. Isidorus dicit, quod numerus dicitur quasi nutus nemeris, idest divisionis; et sic idem quod prius.

Item. Pluralitas non constituitur nisi per recessum ab unitate. Sed ab unitate non recedit aliquid nisi per divisionem; cum ex hoc aliquid dicatur unum, quod est indivisum, ut patet 10 Metaph. Ergo divisio pluralitatem constituit; et sic idem quod prius.

Respondeo dicendum, quod, sicut dicit Philosophus 10 Metaph., plura dicitur aliquid ex hoc quod est divisibile vel divisum. Unde omne illud quod est causa divisionis, oportet ponere causam pluralitatis. Causa autem divisionis aliter accipienda est in posterioribus et compositis, et in primis et simplicibus. In posterioribus namque et compositis causa divisionis quasi formalis, idest ratione ejus fit divisio, est diversitas simplicium et primorum; quod patet in divisione quantitatis: dividitur enim una pars lineae ab alia per hoc quod diversum habent situm, quod est quasi formalis differentia quantitatis continuac positionem habentis. Patet etiam in divisione substantiarum: dividitur enim homo ab asino per hoc quod habet diversas differentias constitutivas. Sed diversitas qua dividuntur posteriora composita secundum priora et simpliciora, praesupponit pluralitatem primorum et simplicium: ex hoc enim homo et asinus habent diversas differentias, quod rationale et irrationale non sunt una, sed plures differentiae. Nec potest semper dici quod illius pluralitatis sit alia diversitas aliqua prior et simplicior causa quia sic esset abire in infinitum. Et ideo pluralitatis et divisionis priorum et simplicium oportet alio modo causam assignare. Sunt enim hujusmodi secundum seipsa divisa. Non potest autem esse quod ens dividatur ab ente in quantum est ens. Nihil autem dividitur ab ente nisi non ens. Similiter etiam ab hoc ente non dividitur hoc ens, nisi per hoc quod in hoc ente includitur negatio illius entis. Unde in primis terminis propositiones negativae sunt immediatae, quasi negatio unius sit in intellectu alterius. Primum etiam causatum in hoc facit pluralitatem cum causa, quod non attingit ad eam. Et secundum hoc quidam posuerunt, quodam ordine pluralitatem ab ipso uno causari: ut ab uno procedat primo unum, quod cum causa pluralitatem constituat; et ex eo jam possunt duo procedere; unum secundum ipsum, aliud secundum conjunctionem ejus ad causam: quod dicere non cogimur, cum unum aliquid possit primum in aliquo imitari, in quo alterum deficit ab eo: et deficere in quo alterum imitatur: et sic possunt inveniri plures primi effectus in quorum quolibet est et negatio causae, et negatio effectus alterius secundum idem, vel secundum remotiorem distantiam in uno et eodem. Sic igitur patet quod pluralitatis vel divisionis ratio prima sive principium est ex affirmatione et negatione, ut talis ordo originis pluralitatis intelligatur quod primo sint intelligenda ens et non ens, ex quibus ipsa prima divisa constituuntur, ac per hoc



sunt plura. Unde sicut primum ens in quantum indivisum est, statim invenitur unum; ita post divisionem entis et non entis statim invenitur pluralitas primorum simplicium. Hanc autem pluralitatem sequitur ratio diversitatis, secundum quod manet in ea suae causae virtus, scilicet oppositionis entis et non entis. Ideo enim unum plurium diversum dicitur alteri comparatum, quia non est illud. Et quia causa secunda non producit effectum nisi per virtutem causae primae, ideo pluralitas principiorum non facit divisionem et pluralitatem in secundis compositis, nisi in quantum manet inter ea virtus oppositionis primae, quae est inter ens et non ens, ex qua habet rationem diversitatis: et sic diversitas primorum facit diversitatem secundorum: et secundum hoc verum est quod Boetius dicit, quod alteritas est principium pluralitatis. Ex hoc enim alteritas in aliquibus invenitur quod eis diversa insunt. Quamvis autem divisio praecedat pluralitatem primorum, non tamen diversitas: quia divisio non requirit utrumque conditorum esse, cum divisio sit per affirmationem et negationem; sed diversitas requirit utrumque esse ens, unde praesupponit pluralitatem. Unde nullo modo potest esse quod pluralitatis primorum causa sit diversitas, nisi diversitas pro divisione sumatur. Loquitur ergo Boetius de pluralitate compositorum; quod patet ex hoc quod inducit probationem de his quae sunt diversa vel genere, vel specie, vel numero; quod non est nisi compositorum. Omne enim quod est in genere, oportet esse compositum ex genere et differentia. Eos autem qui ponunt Patrem et Filium inaequales Deos, sequitur compositio saltem ratione, in quantum ponunt eos convenire in hoc quod sunt Deus, et differre in hoc quod sunt inaequales.

Ad primum igitur dicendum, quod numerus in verbis illis ostenditur esse prior rebus aliis creatis, ut elementis, et aliis huiusmodi; non autem aliis intentionibus, utpote affirmatione et negatione, aut divisione et huiusmodi. Nec tamen quilibet numerus est prior creatis omnibus, sed numerus qui est causa omnis rei, scilicet ipse Deus, qui secundum Augustinum est numerus omni rei speciem praebens.

Ad secundum dicendum, quod pluralitas, communiter loquendo, immediate sequitur ens: non tamen oportet quod omnis pluralitas: et ideo non est inconveniens, si pluralitas posteriorum causetur ex diversitate primorum.

Ad tertium dicendum, quod sicut unum et multa, ita idem et diversum non sunt propria unius generis, sed sunt passionis entis in quantum ens: et ideo non est inconveniens si aliquorum diversitas aliorum pluralitatem causet.

Ad quartum dicendum, quod omnem diversitatem praecedat aliqua pluralitas; sed non omnem pluralitatem praecedat diversitas, sed aliquam pluralitatem aliqua diversitas. Unde utrumque verum est: scilicet et quod multitudo diversitatem facit communiter loquendo, ut dicit Philosophus, et quod diversitas in compositis facit pluralitatem, ut dicit Boetius hic.

Ad quintum dicendum, quod Boetius accipit alteritatem pro diversitate quae constituitur ex aliquibus differentiis, sive sint accidentales, sive substantiales. Illa autem quae sunt diversa et non differentia, sunt prima, de quibus hic Boetius non loquitur.

## ARTICULUS II.

*Utrum varietas accidentium faciat diversitatem secundum numerum.*

Ad secundum sic proceditur. 1. Videtur quod varietas accidentium non possit esse causa pluralitatis secundum numerum. Philosophus enim dicit 3 Metaphys., quod numero sunt unum quorum est materia una. Ergo et numero plura quorum materiae plures; ergo diversitatem in numero non facit varietas accidentium, sed magis diversitas materiae.

2. Item. Dicit Philosophus 4 Metaphys., quod idem est rebus causa substantiae et unitatis. Sed accidentia non sunt individuo causa substantiae. Ergo nec unitatis: ergo per consequens nec pluralitatis secundum numerum.

3. Item. Omnia accidentia cum sint formae, ex seipsis sunt communicabilia vel communia et universalialia. Sed nihil huiusmodi potest alteri esse causa individuationis vel principium. Ergo accidentia non possunt esse individuationis principium. Sed aliqua sunt secundum numerum diversa, in quantum in sua individuatione dividuntur. Ergo accidentia non possunt esse causa diversitatis secundum numerum.

4. Item. Sicut ea quae in genere substantiae sunt genere vel specie, differunt secundum substantiam, et non solum secundum accidens; ita et ea quae differunt secundum numerum. Sed aliqua dicuntur diversa genere vel specie per id quod est in genere substantiae, non per accidentia. Ergo similiter dicuntur diversa numero secundum illud quod est in genere substantiae, et non secundum accidentia.

5. Item. Remota causa removetur effectus. Sed omne accidens contingit a subjecto removeri vel actu vel cogitatione. Si igitur accidens esset principium pluralitatis secundum numerum, et diversitatis, contingeret eadem esse quandoque unum secundum numerum, quandoque diversa actu vel cogitatione.

6. Item. Posterius nunquam est causa prioris. Sed inter omnia accidentia primum locum tenet quantitas, ut Boetius dicit in lib. Praedicam. Inter quantitates autem numerus prior est, cum sit simplicior et magis abstractus. Ergo impossibile est quod aliquid aliud accidens sit principium pluralitatis secundum numerum.

Sed contra est quod dicit Porphyrius, quod individuum facit collectio accidentium, quae in alio reperiri non possunt. Sed id quod est principium individuationis, est principium pluralitatis secundum numerum. Ergo accidentia sunt principium pluralitatis secundum numerum.

Item. In individuo non inveniuntur nisi materia, forma, et accidentia. Sed diversitas formae non facit diversitatem secundum numerum, sed secundum speciem, ut dicitur 10 Metaph. Diversitatem vero secundum genus facit diversitas materiae: dicit enim Philosophus 10 Metaph., quod in genere differunt quorum non est materia communis, nec generatio ad invicem. Ergo diversitatem secundum numerum non potest facere nisi diversitas secundum accidentia.

Item. Id quod invenitur commune in pluribus specie differentiibus, non est causa diversitatis secundum numerum, quia divisio generis in species praecedat divisionem speciei in individua. Sed ma-

teria invenitur communis in diversis secundum speciem, quia eadem materia contrariis formis subditur: alias habentia contrarias formas ad invicem non transmutarentur. Ergo materia non est principium diversitatis secundum numerum, nec forma, ut primo tactum est: ergo relinquitur quod accidentia sunt hujus diversitatis causa.

Item. In genere substantiae nihil invenitur nisi genus et differentia. Sed individua unius speciei non differunt genere, nec substantialibus differentiis. Ergo non differunt nisi accidentalibus differentiis.

Respondeo. Ad evidentiam hujus quaestionis, et eorum quae in littera dicuntur, oportet videre quae sit causa hujus triplicis diversitatis quae in littera assignatur. Cum enim in individuo composito in genere substantiae non sint nisi tria, scilicet materia, forma et compositum, oportet ex aliquo istorum cujuslibet harum diversitatum causas invenire. Sciendum igitur, quod diversitas secundum genus reducitur in diversitatem materiae: diversitas vero secundum speciem in diversitatem formae; sed diversitas secundum numerum partium in diversitatem materiae, et partium in diversitatem accidentis. Cum autem genus sit principium cognoscendi, utpote prima definitionis pars, materia autem secundum se sit ignota; non potest secundum se ex ea accipi diversitas generis, sed solum illo modo quo cognoscibilis est. Est autem cognoscibilis dupliciter. Uno modo per analogiam, sive per comparisonem, ut dicitur in 1 Phys.: hoc est, ut dicamus hic esse materiam, vel quod materia hoc modo se habet ad res naturales, sicut lignum ad lectum. Alio modo cognoscitur per formam per quam habet esse actu. Unumquodque enim cognoscitur secundum quod est actu, non secundum quod est in potentia, ut dicitur 10 Metaph. Et secundum hoc sumitur duplex diversitas generis ex materia. Uno modo ex diversa analogia ad formam; et sic penes materiam distinguuntur prima rerum genera. Id enim quod est in genere substantiae comparatur ad materiam sicut ad partem sui; quod vero est in genere quantitatis non habet materiam partem sui, sed comparatur ad ipsam sicut mensura; et qualitas, sicut dispositio. Et his duobus generibus mediantibus omnia alia genera consequuntur diversas comparationes ad materiam, quae est pars substantiae, ex qua substantia habet rationem subjecti, secundum quam ad accidentia comparatur. Alio modo penes materiam sumitur generis diversitas, secundum quod materia est perfecta per formam. Et cum materia sit potentia pura, et Deus sit actus purus, nihil aliud est materiam perfici in actu, qui est forma, nisi quatenus participat aliquam similitudinem actus primi, licet imperfecte; ut scilicet id quod est jam compositum ex materia et forma, sit medium inter potentiam puram, et actum purum. Non autem materia ex omni parte aequaliter recipit similitudinem actus primi; sed a quibusdam imperfecte, a quibusdam vero perfectius, utpote quaedam participant divinam similitudinem, secundum quod tantum subsistunt, quaedam vero secundum quod cognoscunt, quaedam vero secundum quod intelligunt. Ipsa igitur similitudo primi actus in quacumque materia existens, est forma ejus. Sed forma talis in quibusdam facit esse tantum, in quibusdam esse et vivere; et sic de aliis in uno et eodem: similitudo enim perfectior habet omne id quod habet similitudo minus perfecta, et adhuc amplius. Aliquid

igitur invenitur commune in utraque similitudine, quod in una substernitur imperfectioni, et in alia perfectioni; sicut materia substernitur (1) actui et privationi: et ideo materia simul accepta cum hoc communi, est adhuc materialis respectu perfectionis et imperfectionis praedictae: et ex hoc materiali sumitur genus; differentia vero ex perfectione et imperfectione praedicta. Sicut ex hoc communi materiali quod est habere vitam, sumitur hoc genus quod est animalium corpus; ex perfectione vero superaddita, haec differentia, sensibile; ex imperfectione vero haec differentia, insensibile: et sic diversitas talium materialium inducit diversitatem generis, sicut animalis a planta. Et propter hoc dicitur materia esse principium diversitatis secundum genus. Et eadem ratione forma est principium diversitatis secundum speciem: quia a praedictis formalibus quae habent addita materialia, unde genera sumuntur, per comparisonem formae ad materiam sumuntur differentiae quae constituunt species. Sciendum tamen, quod cum illud materiale unde sumitur genus, habeat in se formam et materiam, logicus considerat genus solum ex parte ejus quod formale est, unde ejus definitiones dicuntur formales; sed naturalis considerat genus ex parte utriusque. Et ideo contingit quandoque quod aliquid communicat in genere secundum logicum, quod non communicat secundum naturalem. Contingit enim quandoque quod illud de similitudine primi actus quod consequitur res aliqua in materia tali, aliud consequitur sine materia, aliud in alia materia omnino diversa. Sicut patet quod lapis in materia, quae est secundum potentiam ad esse, pertingit ad hoc quod subsistat; ad quod idem pertingit sol secundum materiam quae est in potentia ad ubi et non ad esse, et Angelus omni materia carens. Unde logicus inveniens in his omnibus illud ex quo genus sumebat, ponit omnia haec in uno genere substantiae; naturalis vero et metaphysicus qui considerant principia rerum, omnia non inventientes convenientia in materia: dicunt ea differre genere, secundum hoc quod dicitur 10 Metaph, quod corruptibile et incorruptibile differunt genere; et quod illa convenient genere quorum est materia una, et generatio ad invicem.

Sic igitur patet quomodo materia facit diversitatem in genere, forma diversitatem in specie. Inter individua vero ejusdem speciei hoc modo consideranda est diversitas secundum Philosophum 7 Metaph.: quia sicut partes generis et speciei sunt materia et forma; ita individui sunt haec materia et haec forma. Unde sicut diversitatem in genere vel specie facit diversitas materiae vel formae absolute; ita diversitatem in numero facit haec forma et haec materia. Nulla autem forma, in quantum hujusmodi, est haec ex seipsa. Dico autem in quantum hujusmodi, propter animam rationalem, quae quodammodo ex seipsa est hoc aliquid, sed non in quantum forma. Intellectus vero quamlibet formam quam possibile est recipi in aliquo sicut in materia vel sicut in subjecto, natus est attribuere pluribus: quod est contra rationem ejus quod est hoc aliquid. Unde forma fit hic per hoc quod recipitur in materia. Sed cum materia in se considerata sit indistincta, non potest esse quod formam in se receptam individuet, nisi secundum quod est distinguibilis. Non

(1) *Al.* substernebatur.

enim forma individuatur per hoc quod recipitur in materia, nisi quatenus recipitur in hac materia vel illa distincta, et determinata ad hic et nunc. Materia autem non est divisibilis nisi per quantitatem; unde Philosophus dicit 1 Physic., quod submotâ quantitate, remanet substantia indivisibilis. Et ideo materia efficitur haec et signata, secundum quod est sub dimensionibus. Dimensiones autem istae possunt dupliciter considerari. Uno modo secundum earum terminationem: et dico eas terminari secundum terminatam mensuram et figuram; et sic ut entia (1) perfecta collocantur in genere quantitatis, et sic non possunt esse principium individuationis: quia cum talis dimensionum terminatio varietur frequenter circa individuum, sequeretur quod individuum non remaneret idem numero semper. Alio modo possunt considerari sine ista determinatione in natura dimensionis tantum. quamvis nunquam sine aliqua determinatione esse possint: sicut nec natura coloris sine determinatione albi et nigri, et sic collocantur in genere quantitatis ut imperfectum. Et ex his dimensionibus interminatis efficitur haec materia signata; et sic individuatur formam, et sic ex materia causatur diversitas secundum numerum in eadem specie. Unde patet quod materia secundum se considerata non est principium diversitatis secundum speciem nec secundum numerum: sed sicut est principium diversitatis secundum genus, prout subest communi formae; ita est principium diversitatis secundum numerum, prout subest dimensionibus interminatis. Et ideo, cum haec dimensiones sint de genere accidentium, quandoque diversitas secundum numerum reducitur in diversitatem materiae, quandoque in diversitatem accidentium; et hoc ratione dimensionum praedictarum. Alia vero accidentia non sunt principium individuationis, sed sunt principium cognoscendi distinctionem individuorum: et per hunc modum etiam aliis accidentibus individuatio attribuitur.

Ad primum igitur dicendum, quod cum dicit Philosophus, quod numero sunt unum quorum est materia una, intelligendum est de materia signata, quae subest dimensionibus: alias oporteret dicere, quod omnia generabilia et corruptibilia sunt unum numero, cum eorum sit materia una.

Ad secundum dicendum, quod dimensiones, cum sint accidentia, per se non possunt esse principium unitatis individuae substantiae; sed materia, prout talibus dimensionibus subest, intelligitur esse principium talis unitatis et multitudinis.

Ad tertium dicendum, quod de ratione individi est quod sit in se indivisum, et ab aliis divisum ultima divisione. Nullum autem accidens habet in se propriam rationem divisionis, nisi quantitas. Unde dimensiones ex seipsis habent quandam rationem individuationis secundum determinatum situm, prout situs est differentia quantitatis: et sic habet duplicem rationem individuationis: unam ex subjecto, sicut et quodlibet aliud accidens; aliam ex seipsa, in quantum habet situm, ratione cuius in abstrahendo a materia sensibili imaginamur hanc lineam et hunc circulum. Et ideo recte materiae convenit individuare omnes alias formas ex hoc quod subditur illi formae, quae ex seipsa habet individuationis rationem; ita quod etiam ipsae dimensiones terminatae quae fundantur in subjecto

jam completo, individuantur quodammodo ex materia individuata per dimensiones interminatas praecognitas in materia.

Ad quartum dicendum, quod illa quae differunt numero in genere substantiae, non solum differunt accidentibus, sed etiam forma et materia. Sed si quaeratur quare haec forma differt ab illa, non erit alia ratio nisi quia est in alia materia signata. Nec invenitur alia ratio quare haec materia sit divisa ab illa, nisi propter quantitatem. Et ideo materia subjecta dimensionibus intelligitur esse principium hujus diversitatis.

Ad quintum dicendum, quod ratio illa procedit de accidentibus completis, quae sequuntur esse formae in materia: non autem de dimensionibus interminatis, quae praecognoscuntur ante ipsam formam in materia. Sine his enim non potest intelligi individuum, sicut nec sine forma.

Ad sextum dicendum, quod numerus, formaliter loquendo, est prius quam quantitas continua; sed materialiter quantitas continua est prior, cum numerus ex divisione continui relinquatur, ut dicitur 4 Physic.; et secundum hanc viam causatur diversitas secundum numerum divisio materiae secundum dimensiones.

Ad rationes in contrarium patet qualiter sunt concedendae, et qualiter falsum concludunt.

### ARTICULUS III.

*Utrum duo corpora possint esse, vel intelligi simul esse in eodem loco.*

Ad tertium sic proceditur. 1. Videtur quod duo corpora possint intelligi simul esse in eodem loco. Omnis enim propositio videtur esse intelligibilis, in cuius subjecto non includitur oppositum praedicati; quia talis propositio non habet repugnantiam intellectuum. Sed haec propositio, Duo corpora sunt in eodem loco, non est huiusmodi: alias nunquam posset fieri miraculose: quod patet esse falsum in corpore Dominico, quod exiit clauso Virginis utero, et intravit ad discipulos januis clausis. Non enim Deus potest facere quod affirmatio et negatio sint simul vera, ut dicit Augustinus contra Faustum. Ergo potest aliquis intelligere, vel saltem in intellectu fingere duo corpora simul esse in eodem loco.

2. Item. A corporibus glorificatis non removetur natura corporeitatis, sed solum corpulentiae. Sed removetur ab eis ista conditio, quod non possint esse cum aliis in eodem loco (1) per dotem subtilitatis, ut a multis dicitur. Ergo haec conditio non sequitur naturam corporeitatis, sed corpulentiae, sive grossitiei cuiusdam: ergo non est impossibile intelligi duo corpora simul esse in eodem loco.

3. Item. Augustinus dicit super Genes. ad litteram, quod lux in corporibus primum locum tenet. Sed lux est simul in eodem loco cum aere. Ergo duo corpora possunt esse simul in eodem loco.

4. Item, quaelibet species ignis: ut dicit Philosophus 5 Topic. Sed ignis est corpus. Ergo idem quod prius.

5. Item. In ferro ignito simul est ignis et ferum. Utrumque autem est corpus. Ergo possibile est simul esse duo corpora in eodem loco.

(1) *Al.* sed non removetur ab eis ista conditio quod possunt esse etc.

(1) *Al.* ut etiam.



6. Item. Elementa in mixto non sunt corrupta: alias mixtum non sequeretur dominantis motum. Sed omnia quatuor elementa sunt corpora, et simul sunt in qualibet parte mixti. Ergo possibile est duo corpora simul esse in eodem loco.

7. Item. Quod duo corpora non sint simul in uno loco, hoc non potest convenire corporibus ratione materiae, cum materiae secundum se non debeatur locus, nec ratione formae propter idem, nec ratione dimensionis, cum dimensiones non repleant locum: quod patet ex hoc quod quidam locum ubi non erant nisi solum dimensiones, dicebant vacuum esse. Ergo hoc non convenit corpori nisi ratione aliquorum accidentium posteriorum, quae non sunt omnibus communia, et quae possibile est a corporibus separari; et sic videtur quod duo corpora possint simul esse in eodem loco.

8. Item. Secundum astrologos qui sequuntur Ptolomaeum, sex planetarum corpora moventur in epicyclis, qui sunt circuli intersecantes sphaeras extrinsecas planetarum. Ergo oportet quod planetae corpus aliquando perveniat ad locum sectionis. Sed non potest dici quod ibi sit aliquid vacuum, cum vacuum natura non patitur; neque quod substantia sphaerarum sit divisibilis, ut intelligatur cedere corpori planetae quando pervenit illuc, sicut cedit aer lapidi; cum caeli sint solidissimi quasi ex aere fusi, ut dicitur Job 57. Ergo oportet quod corpus planetae sit simul cum corpore sphaerae in eodem loco; et sic falsum dicit Boetius, quod nunquam duo corpora obtinent locum unum.

Sed contra est quod si duo corpora sint in eodem loco, eadem ratione et quaelibet. Sed aliquod corpus quantumcumque magnum potest dividi in parva cujuslibet quantitatis secundum aliquem numerum. Ergo sequitur quod in parvissimo loco continebitur maximum corpus: quod videtur absurdum.

Item. Impossibile est inter duo puncta signata esse plures lineas rectas. Hoc autem sequetur, si duo corpora sint in eodem loco. Signatis enim duobus punctis ex duabus partibus loci oppositis, erunt inter ea due lineae rectae signatae in duobus corporibus locatis. Non enim potest dici quod inter illa duo puncta nulla sit linea, neque quod unius locati linea magis sit inter ea quam alia, neque quod sit ibi aliqua una linea praeter corpora locata quae sit inter duo puncta loci; quia sic illa linea esset non in subjecto. Ergo impossibile est duo corpora simul esse in eodem loco.

Item. Demonstratum est in geometria, quod duo circuli non se contingunt nisi in puncto. Sed si ponamus duo corpora simul esse in eodem loco, sequetur quod duo circuli contenti in eis se secundum totum contingant. Ergo impossibile est duo corpora simul esse in eodem loco.

Item. Quaecumque uni et eidem sunt eadem, ipsa sibi invicem sunt eadem. Sed cum oporteat unam esse dimensionem loci et locati, ex eo quod non est ponere dimensionem sine subjecto; si duo corpora sint simul in eodem loco, sequetur dimensiones utriusque corporis esse easdem cum dimensionibus loci: ergo sequetur eas esse easdem ad invicem: quod est impossibile.

Respondeo dicendum, quod in his quae apud nos sunt, quae omnes esse corpora conflentur, ad sensum videmus, quod adveniente uno corpore ad aliquem locum, aliud corpus ab illo expellitur. Unde

experimento patet talia corpora duo in eodem loco esse non posse. Quidam autem dicunt, quod non prohibentur duo horum corporum ab hoc quod sint simul propter corporeitatem, vel propter aliquid quod sit de ratione corporis in quantum corpus: sic enim omnino sequeretur duo corpora prohiberi ab hoc quod est esse simul: sed dicunt quod prohibentur ab hoc propter corpulentiam ipsorum. Sed quidquid sit hoc quod corpulentiam nominant, sive impuritas, sive corruptibilitas aliquorum corporum, vel etiam aliqua natura specialis naturae generali corporeitatis superaddita, non potest esse causa huiusmodi prohibitionis. Invenitur enim duplex comparatio corporis ad locum. Una secundum quam ponitur in hoc loco vel illo determinato; et haec comparatio sequitur naturam specialem huius vel illius corporis: sicut quod gravia ex natura gravitatis sint deorsum, levia autem sursum. Alia vero comparatio est secundum quam dicitur simpliciter in loco esse; et haec comparatio sequitur corpus ex ipsa natura corporeitatis, non propter aliquid additum. Secundum hoc enim corpus est in loco quod se loco committitur. Hoc autem est secundum quod est dimensionatum dimensionibus aequalibus et similibus dimensionibus loci. Dimensiones autem insunt cuilibet corpori ex ipsa corporeitate. Esse autem plura corpora in eodem loco vel non esse, non respicit locum determinate, sed absolute. Unde oportet quod causa huius impedimenti referatur ad naturam corporeitatis, ex qua corpori omni, in quantum est corpus, natum sit esse in loco. Et si ultima sphaera non sit in loco, hoc non est nisi quia nihil potest esse extra ipsam; non autem propter defectum praedictae aptitudinis. Et ideo alii concedunt simpliciter quod nulla duo corpora possint esse in eodem loco; et rationem ejus referunt ad principia mathematica, quae oportet salvari in omnibus naturalibus, ut videtur 5 de Caelo et Mundo. Sed hoc non videtur conveniens; quia mathematicis non competit esse in loco nisi improprie et similitudinarie, ut dicitur 2 de Generatione. Et ideo ratio praedicti impedimenti non est sumenda ex principiis mathematicis, sed ex principiis naturalibus, quibus proprie locus debetur. Praeterea rationes mathematicae non sufficienter concludunt in materia ista. Etsi enim mathematica salventur in naturalibus; tamen naturalia addunt aliquid super mathematica; scilicet materiam sensibilem: et ex hoc addito potest assignari ratio alicujus in naturalibus, cujus ratio in mathematicis non poterit assignari. In mathematicis enim non potest assignari ratio diversitatis harum duarum linearum, nisi propter situm: unde remota diversitate situs, non remanet pluralitas linearum mathematicarum, et similiter nec superficierum aut corporum. Et propter hoc non potest esse ut corpora mathematica sint plura, et sint simul; et similiter de lineis et superficiebus. Sed in corporibus naturalibus posset ab adversario assignari alia ratio diversitatis, scilicet ex materia sensibili, etiam remota diversitate situs. Et ideo ratio illa quae probat duo corpora mathematica non esse simul, non est sufficiens ad probandum duo corpora naturalia non esse simul. Et ideo accipienda est via Avicennae, qua utitur in sua Sufficientia in Tractatu de loco, per quam assignat causam prohibitionis praedictae ex ipsa natura corporeitatis per principia naturalia. Dicit enim, quod non potest esse causa



hujus prohibitionis, nisi illud cui primo et per se convenit esse in loco. Hoc autem est quod natum est replere locum. Formae autem non competit esse in loco, nisi per accidens; quamvis aliquae formae sint principium quo corpus inclinatur ad hunc vel illum locum: similiter nec materia per se considerata, quia sic intelligitur praeter omnia illa genera, ut dicitur 7 Metaph. Unde oportet quod materia, secundum quod subest ei per quod habet primam comparisonem ad locum, hoc prohibeat. Comparatur autem ad locum, prout subest dimensionibus; et ideo ex natura materiae subjectae dimensionibus prohibentur plura corpora esse in eodem loco. Oportet enim plura esse corpora, in quibus forma corporeitatis inveniatur divisa: quae quidem non dividitur nisi per divisionem materiae: ejus divisio cum sit solum per dimensiones, de ratione quarum est situs, impossibile est hanc materiam esse distinctam ab illa nisi quando est distincta secundum situm, quod non est quando duo corpora ponuntur esse in eodem loco; unde illa duo corpora essent unum corpus, quod est impossibile. Cum igitur materia dimensionibus subjecta inveniatur in quibuscumque corporibus; oportet quaelibet duo corpora prohiberi ex ipsa natura corporeitatis ne simul sint in eodem loco.

Ad primum igitur dicendum, quod dupliciter potest dici aliqua propositio non intelligibilis. Uno modo ex parte intelligentis, qui deficit intellectu; sicut haec propositio, In tribus personis divinis est una essentia; et hujusmodi propositio non oportet quod implicet contradictionem. Alio modo ex parte ipsius propositionis: et hoc dupliciter. Uno modo quia implicat contradictionem absolute, sicut, Rationale est irrationale; et hujusmodi, nullo miraculo verificari possunt. Alio modo quia implicant contradictionem aliquo modo, sicut ista, Mortuus redit ad vitam, virtute scilicet propria; cum ponatur per hoc quod dicitur mortuum, omni principio vitae destitutum: et talia possunt verificari miraculo superiori virtute operante: et similiter est in proposito. Sicut enim duobus corporibus non in eodem loco positus potest aliqua naturalis causa diversitatis inveniri; sic divina virtus potest ea, quamvis sint unita in situ, in sua distinctione conservare; et sic miraculose fieri potest duo corpora esse in eodem loco.

Ad secundum dicendum, quod quidquid sit illa corpulentia quae dicitur removeri a corporibus gloriosis, tamen planum est quod corporeitas ab eis nunquam removebitur; et ideo nec causa naturaliter prohibens aliquod eorum simul esse cum alio in eodem loco; sed solum miraculose hoc esse poterit quod sint simul cum aliis corporibus in eodem loco.

Ad tertium dicendum, quod lux non est corpus, sed qualitas quaedam, ut Damascenus dicit, et etiam Avicenna. Augustinus autem lucem nominat ignem ipsum: quod patet ex hoc, quod lucem dividit contra aerem, aquam et terram.

Ad quartum dicendum, quod tres species ignis a Philosopho assignatae sic sunt intelligendae, ut per lucem intelligatur ignis in propria materia existens, dato etiam, ut quidam dicunt, quod ignis in propria sphaera non luceat. Lucis enim non est lucere, sed quod ejus participatione alia luceant. Et similiter ignis etsi in propria sphaera non luceat, tamen ejus participatione alia fulgentia

S. Th. Opera omnia. V. 17.

fiunt. Per flammam autem intelligitur ignis in materia aërea, per carbonem in materia terrea. In materia autem aquea non potest ignis invalescere intantum quod ignis naturam habeat: quia aqua habet omnes qualitates oppositas igni.

Ad quintum dicendum, quod in ferro ignito non sunt duo corpora, sed unum corpus habens quidem speciem ferri, sed aliquas proprietates ignis.

Ad sextum dicendum, quod etsi ponantur elementa in corpore mixto remanere secundum suas formas substantiales, non tamen ponentur esse plura corpora in actu: alias nullum corpus mixtum esset vere unum; sed est plura potentia, et unum actu. Probabilior tamen videtur opinio Commentatoris, 5 de Caelo et Mundo, qui hanc opinionem Avicennae improbens, ait, elementorum formas in mixto non remanere, nec totaliter corrumpi, sed fieri ex eis unam mediam formam, in quantum suscipiunt magis et minus. Sed cum formae substantiali suscipere magis et minus sit absonum, videtur ejus dictum intelligendum hoc modo, quod formae elementorum suscipiunt magis et minus, non secundum se, sed secundum quod manent virtute in qualitatibus elementaribus quasi in propriis instrumentis; ut sic dicatur: Formae secundum se non remanent, sed solum prout sunt virtute in suis qualitatibus, ex quibus fit una media qualitas.

Ad septimum dicendum, quod quamvis dimensiones secundum se non possint replere locum, tamen corpus naturale ex hoc quod ejus materia intelligitur subjecta dimensionibus, habet quod repleat locum.

Ad octavum dicendum, quod opinio Ptolomaei de epicyclis et excentricis non videtur consonare principiis naturalibus, quae Aristoteles ponit; et ideo illa opinio sectatoribus Aristotelis non placet. Si tamen sustineatur, nulla necessitas fit quod duo corpora sint in eodem loco; quia secundum tenentes illam opinionem, triplex in corporibus caelestibus substantia distinguitur: scilicet substantia stellarum quae est luminosa, et substantia sphaerarum, quae est diaphana et solida non divisibilis, et substantia alia quae est inter sphaeras, divisibilis, et inspissabilis ad modum aeris, quamvis incorruptibilis. Et per hanc substantiam defenduntur, ne oporteat eos ponere substantiam sphaerarum dividi, aut duo corpora esse in eodem loco.

#### ARTICULUS IV.

*Utrum varietas loci aliquid operetur ad differentiam secundum numerum.*

Ad quartum sic proceditur. 1. Videtur quod loci varietas nihil faciat ad diversitatem secundum numerum. Causa enim diversitatis secundum numerum est in ipsis quae numero differunt. Sed locus est extra locata. Ergo ex diversitate locorum non potest esse causa diversitatis secundum numerum.

2. Item. Res non est completa in esse nisi per hoc quod est ab aliis distincta. Sed locus advenit post esse completum: unde et motus ad locum est motus perfecti secundum substantiam, ut dicitur 9 Phys. Ergo non potest ex loco sumi aliqua causa distinctionis in corporibus locatis.

3. Item. Distinctio secundum numerum est invariabilis circa ipsa distincta. Sed a causa variabili non procedit effectus invariabilis. Ergo cum locus

varietur circa locatum, non potest esse quod diversitas secundum locum sit causa diversitatis secundum numerum.

4. Item. Remota causa removetur effectus. Sed aliquando a duobus corporibus removetur per miraculum distinctio secundum locum, ut prius dictum est, et tamen non removetur distinctio secundum numerum. Ergo distinctio secundum locum non est causa diversitatis secundum numerum.

5. Item. Diversitas secundum numerum non solum invenitur in corporibus, sed etiam in substantiis incorporeis. Sed in eis diversitas secundum locum non potest esse causa diversitatis secundum numerum, cum ipsa incorporea in loco non sint, ut ipse Boetius dicit in lib. de Hebdomadibus. Ergo diversitas secundum locum non potest poni causa diversitatis secundum numerum naturaliter, ut ipse videtur dicere.

1. Sed contra est quod ea quae differunt secundum numerum, differunt accidentibus. Sed nullius accidentis diversitas ita inseparabiliter se habet ad diversitatem in numero, sicut diversitas locorum. Ergo diversitas in loco maxime videtur facere ad diversitatem in numero.

2. Item. Diversitas locorum secundum speciem concomitatur diversitatem corporum secundum speciem, sicut patet in gravibus et levibus. Ergo et diversitas locorum secundum numerum indivisibiliter comitatur diversitatem corporum secundum numerum; et sic idem quod prius.

3. Item. Sicut tempus est mensura motus, ita locus est mensura corporis. Sed motus dividitur numero secundum tempus, ut dicitur 5 Phys. Ergo et corpus dividitur numero secundum locum.

Respondeo dicendum, quod sicut ex supradictis patet, diversitas secundum numerum causatur ex divisione materiae sub dimensionibus existentis. Ipsa etiam materia secundum quod sub dimensionibus existit, prohibet duo corpora esse in eodem loco, in quantum oportet duorum corporum distinctas esse secundum situm materias. Et sic patet quod ex eodem causatur diversitas secundum numerum ex quo causatur necessitas diversitatis locorum in diversis corporibus. Et ideo ipsa diversi-

tas locorum in se considerata, est signum diversitatis secundum numerum, sicut et de aliis accidentibus, praeter dimensiones primas interminatas, supra dictum est. Sed si diversitas loci consideretur secundum suam causam, sic planum est quod diversitas loci est causa diversitatis secundum numerum: et ideo Boetius dicit, quod varietas accidentium facit diversitatem secundum numerum. Omnibus enim aliis remotis, in locorum diversitate hoc inevitabiliter verificari constituit: quia scilicet nullum aliud accidentium quae exterius apparent in re completa, est ita propinquum ad causam diversitatis secundum numerum, sicut diversitas locorum.

Ad primum igitur et secundum et tertium dicendum, quod rationes illae concludunt quod diversitas loci non est causa diversitatis individuum secundum se; sed per hoc non removetur quin causa diversitatis locorum sit causa diversitatis secundum numerum.

Ad quartum dicendum, quod omnes effectus causarum secundarum magis dependent a Deo, quam etiam ab ipsis causis secundis; et remotis ipsis causis secundis, ipse miraculose producere potest effectus quos vult.

Ad quintum dicendum, quod in substantiis incorporeis diversitatem secundum numerum sequitur diversitas secundum speciem, excepta anima rationali, quae sequitur divisionem materiae sibi dispositae. Illic autem loquitur de diversitate secundum numerum, ubi est eadem species.

Ad primum in contrarium dicendum, quod varietas accidentium propter dimensiones interminatas non facit diversitatem in numero sicut causa, sed dicitur facere sicut signum demonstrans; et sic maxime diversitas loci facit, in quantum est propinquius signum.

Ad secundum dicendum, quod diversitas locorum secundum speciem, est signum diversitatis corporum secundum speciem, sed non causa.

Ad tertium dicendum, quod cum divisio temporis causetur ex divisione motus, diversitas etiam temporis non est causa diversitatis motus, sed signum; et similiter est de loco in comparatione ad corpus.

## LECTIO II.

Age igitur, ingrediamur, et unumquodque, ut intelligi atque capi potest discutiamus. Nam, sicut optime dictum videtur, eruditi est hominis unumquodque, ut ipsum est, ita de eo fidem capere tentare (1). Nam cum tres sint (2) speculativae partes: Naturalis, in motu, in abstracta. Considerat enim corporum formas cum materia, quae a corporibus actu separari non possunt: quae corpora in motu sunt: ut cum terra deorsum, et ignis sursum fertur: habetque motum forma materiae conjuncta. Mathematica sine motu in abstracta. Haec enim formas corporum speculatur sine materia, ac per hoc sine motu: quae formae cum in materia sint, ab his separari non possunt. Theologia sine motu abstracta, atque inseparabilis: nam Dei substantia et materia et motu caret. In naturalibus igitur rationabiliter, in mathematicis disciplinabiliter, in divinis intellectualiter versari oportebit; neque deduci ad imaginationes, sed potius ipsam inspicere formam.

(1) *Al.* atque tentare.

(2) *Al.* Forte Nam tres sunt.

Proposuit supra Boetius sententiam catholicae fidei de unitate Trinitatis, et rationem sententiae prosecutus est: nunc intendit procedere ad inquisitionem praedictorum: et quia secundum sententiam Philosophi, 2 Metaph., ante scientiam oportet inquirere modum sciendi, ideo pars haec dividitur in duas. In prima ostendit Boetius modum proprium huiusmodi inquisitionis, quae est de rebus divinis; in secunda vero secundum modum praesignatum procedit ad propositum inquirendum, ibi, « Quae « vero forma vere forma, neque imago est, et quae « esse ipsum est. » Prima dividitur in duas. Primo ponit necessitatem ostendendi modum inquisitionis; secundo modum congruum inquisitioni praesenti ostendit, ibi, « Nam cum tres sint speculativae « partes. » Dicit igitur: Ex quo constat hanc esse sententiam catholicae fidei de unitate Trinitatis, et

indifferentiam esse rationem unitatis, age, adverbium exhortandi, « ingrediamur, » idest inquiramus interius, ipsa intima rerum principia considerantes, et veritatem quasi velatam et absconditam perscrutantes, et hoc modo convenienti: unde subdit: « Et unumquodque dicendorum discutiamus, ut possit intelligi atque capi, » idest per modum quo possit intelligi et capi. Et dicit haec duo, quia modus quo aliqua disentiuntur, debet congruere et rebus, et nobis. Nisi enim rebus congrueret, intelligi non posset; nisi congrueret nobis, nos capere non possemus, utpote quia res divinae ex natura sua habent quod non cognoscantur nisi intellectu. Unde si aliquis vellet alter sequi imaginationem in consideratione eorum, non posset intelligere, quia ipsae res non sunt sic intelligibiles. Si autem aliquis velit res divinas per seipsas videre, et ea certitudine comprehendere, sicut comprehenduntur sensibilia et demonstrationes mathematicae; non posset hoc modo capere propter defectum intellectus sui, quamvis ipsae res sint secundum se hoc modo intelligibiles. Et quod modus congruus est in inquisitione qualibet observandus, probat inducendo auctoritatem Philosophi in I Ethicor. cum dicit: « Nam, sicut optime dictum videtur, » ab Aristotele in principio Ethic. « eruditi hominis est unumquodque ut ipsum est, » idest per modum congruum ipsius rei, « ita de eo fidem capere tentare. » Non enim de omnibus potest aequalis certitudo et evidentia demonstrationis servari; et sunt haec verba Philosophi I Ethic.: « Disciplinati enim est intantum certitudinem inquirere circa unumquodque genus, in quantum natura rei recipit. »

Deinde cum dicit, « Nam cum tres sint speculativae partes, » inquit modum congruum suae inquisitioni per distinctionem a modis qui in aliis scientiis servantur: et quia modus debet esse congruus rei de qua est perscrutatio, ideo dividitur haec pars in duas. Primo enim distinguit scientias secundum res de quibus determinant; secundo ostendit modos singulis rebus congruos, ibi, « In naturalibus igitur rationabiliter, in mathematicis disciplinabiliter, in divinis intellectualiter versari oportebit. » Circa primum tria facit. Primo ostendit de quibus considerat naturalis Philosophia; secundo de quibus mathematica, ibi, « Mathematica sine motu inabstracta; » tertio de quibus considerat divina scientia, ibi, « Theologia autem sine motu abstracta atque inseparabilis. » Dicit ergo: Bene dictum est, quod unumquodque ut est, ita de eo debet fides capi: « nam cum tres sint partes speculativae, » scilicet philosophiae ( hoc dicit ad differentiam ethicae, quae est operativa, sive practica ) in omnibus requiritur modus competens materiae. Sunt autem tres partes praedictae, physica, sive naturalis, mathematica, et divina, sive theologia. Cum, inquam, sint tres partes, « naturalis, » quae est una de tribus, « est in motu inabstracta; » idest, versatur ejus consideratio circa res mobiles a materia non abstractas: quod probat per exempla, ut patet in littera. Quod autem dicit, « Ilabetque motum forma materiae conjuncta, » sic est intelligendum. Ipsum compositum ex materia et forma, in quantum hujusmodi, habet motum sibi debitum; vel ipsa forma in materia existens est principium motus: et ideo eadem est consideratio de rebus secundum quod sunt materiales, et secundum quod sunt mobiles.

Deinde exponit de quibus sit mathematica, dicens: « Mathematica est sine motu, » idest sine motus et mobiliu consideratione, in quo a naturali differt, « inabstracta; » idest, considerat formas quae secundum suum esse non sunt a materia abstractae, in quo convenit cum naturali: quod quomodo sit exponit. Haec, scilicet mathematica, speculatur formas sine materia, ac per hoc sine motu: quia ubicumque est motus, est materia, ut probatur 10 Metaph. Eo modo enim quo habent materiam, ibi est motus; et sic ipsa speculatio mathematici est sine materia et sine motu: « quae formae » scilicet de quibus mathematicus speculatur, « cum sint in materia, non possunt ab his separari » secundum esse, etsi secundum speculationem sint separabiles.

Deinde ostendit de quibus est divina, ibi, « Theologia, idest tertia pars speculativae, quae dicitur divina, vel metaphysica, vel prima philosophia, est sine motu, in quo convenit cum mathematica, » et differt a naturali, « abstracta, » scilicet a materia; « atque inseparabilis; » per quae duo differt a mathematica. Res enim divinae sunt secundum esse abstractae a materia et motu; sed mathematicae non abstractae, sunt autem consideratione separabiles; sed res divinae inseparabiles, quia nihil est separabile nisi quod est conjunctum. Unde res divinae non sunt consideratione separabiles a materia, sed secundum esse abstractae; res vero mathematicae e converso. Et hoc probat per Dei substantiam de qua divina scientia considerat principaliter, unde et nominatur inde.

Deinde cum dicit, « In naturalibus igitur rationabiliter, in mathematicis disciplinabiliter, in divinis intellectualiter versari oportebit, » ostendit quis modus sit congruus praedictis partibus: et circa hoc duo facit. Primo concludit modos congruos singulis partium praedictorum, et hujus partis dispositio relinquitur disputationi; secundo exponit ultimum modum, qui est proprius praesenti inquisitioni; et hoc dupliciter. Primo removendo id quod est impedimentum, ibi, « Neque oportet in divinis deduci ad imagines, » ut scilicet de eis judicandis sequamur iudicium imaginationis; secundo ostendendo id quod est proprium, ibi, « Sed potius ipsam inspicere formam » sine motu et materia: cujus conditionem consequenter exponit ingrediens ad propositam quaestionem.

## QUAESTIO V.

### DE DIVISIONE SPECULATIVAE SCIENTIAE.

Hic est duplex quaestio: prima de divisione speculativae, quae in littera ponitur; secunda de modis quos speculativae scientiae attribuit.

Circa primum quaeruntur quatuor.

Primo, utrum sit conveniens divisio, qua dividitur speculativa in has tres partes, naturalem, mathematicam et divinam.

Secundo, utrum naturalis philosophia sit de his quae sunt in motu et materia.

Tertio, utrum mathematica consideratio sit sine motu et materia.

Quarto, utrum divina scientia sit de his quae sunt sine materia et motu.



## ARTICULUS I.

*Utrum sit conveniens divisio, qua dividitur speculativa in has tres partes, naturalem scilicet, mathematicam et divinam.*

Ad primum sic proceditur. 1. Videtur quod speculativa inconvenienter in has tres dividatur. Partes enim speculativae sunt illi habitus qui partem animae contemplativam perficiunt. Sed Philosophus in 6 Ethic., ponit quod scientificum animae, quod est pars ejus contemplativa, perficitur habitibus tribus, scilicet sapientia, scientia et intellectu. Ergo ista tria sunt partes speculativae, et non illa quae in littera ponuntur.

2. Item. Augustinus dicit 8 de civ. Dei, quod rationalis philosophia, quae est logica, sub speculativa philosophia, vel contemplativa, continetur. Cum igitur mentionem de ea non faciat, videtur divisio insufficientis.

5. Item. Communiter dividitur philosophia in septem artes liberales, inter quas neque naturalis, neque divina continentur, sed sola rationalis et mathematica. Ergo naturalis et divina non debuerunt poni partes speculativae.

4. Item. Scientia medicinae maxime videtur esse operativa: et tamen in ea ponitur una pars speculativa et alia practica. Ergo eadem ratione in omnibus aliis scientiis operativis aliqua pars est speculativa; et ita debuit in hac divisione fieri mentio de Ethica, sive morali, quamvis sit activa propter partem ejus speculativam.

5. Item. Scientia medicinae quaedam pars philosophiae est; et sunt quaedam aliae artes quae dicuntur mechanicae, ut scientia de agricultura et alchimiae et hujusmodi. Cum igitur istae sint operativae, non videtur quod debuerit naturalis absolute sub speculativa poni.

6. Item. Totum non debet dividi contra partem. Sed divina scientia videtur esse ut totum respectu physicae et mathematicae, cum subiecta illarum sint partes illius scientiae, scilicet divinae, cujus subiectum est ens, cujus pars est substantia mobilis, quam considerat naturalis; et similiter quantitas, quam considerat mathematicus; ut patet 5 Metaph. Ergo scientia divina non debet dividi contra naturalem et mathematicam.

7. Item. Scientiae dividuntur sicut res, ut dicitur 3 de Anima. Sed philosophia est de ente: est enim cognitio entis, ut dicit Dionysius in epistola ad Polycarpum. Cum ergo ens primo dividatur in potentiam et actum, per unum et multa, per substantiam et accidens, videtur quod per hujusmodi deberent partes philosophiae distingui.

8. Item. Multae aliae divisiones sunt entium de quibus sunt scientiae magis essentielles quam illae per mobile et immobile, per abstractum et non abstractum; utpote per corporeum et incorporeum, animatum et inanimatum, et alia hujusmodi. Ergo divisio partium Philosophiae magis debet accipi per hujusmodi differentias quam per illas quae hic tanguntur.

9. Item. Illa scientia a qua aliae supponuntur, debet esse prior eis. Sed omnes aliae scientiae supponuntur a scientia divina, quia ejus est probare principia aliarum. Ergo debuit scientiam divinam aliis praeordinare.

10. Item. Mathematica prior occurrit addiscenda

quam naturalis, eo quod mathematicam facile possunt addiscere pueri, non autem naturalem, nisi proveci, ut dicitur 6 Ethic. Unde et apud antiquos hic ordo in adipiscendis scientiis fuisse dicitur observatus, ut primo logica, deinde mathematica, tertio naturalis, postea moralis addiceretur, et tandem divinae scientiae homines studerent. Ergo mathematicam naturali scientiae praeordinare debuit.

Sed contra. Quod haec divisio sufficiens sit, probatur per Philosophum 6 Metaph., ubi dicit, quod tres erunt philosophiae et theoriae, mathematica, physica et theologia.

Item. 2 Phys. et communiter secundum Philosophum ponuntur tres modi scientiarum, qui etiam ad has tres videntur pertinere.

Item. Etiam Ptolomaeus in principio Almagesti hae divisione utitur.

Respondeo dicendum, quod theoreticus sive speculativus intellectus, in hoc proprie ab operativo sive practico distinguitur, quod speculativus habet pro fine veritatem quam considerat, practicus autem veritatem consideratam ordinat in operationem tamquam in finem; et ideo dicit Philosophus 3 de Anima, quod differunt ad invicem fine; et in 2 Metaph., dicitur, quod finis speculativae est veritas, finis operativae sive practicae actio. Cum igitur oporteat materiam fini esse proportionatam, oportet practicarum scientiarum materiam esse res illas quae a nostro opere fieri possunt, ut earum cognitio in operationem quasi in finem ordinari possit. Speculativarum vero scientiarum materiam oportet esse res quae a nostro opere non fiunt; unde earum consideratio in operationem ordinari non potest sicut in finem: et secundum harum rerum distinctionem oportet scientias speculativas distingui.

Sciendum tamen, quod quando habitus vel potentiae penes objecta distinguuntur, non distinguuntur penes quaslibet differentias objectorum, sed penes illas quae sunt per se objectorum in quantum sunt objecta. Esse enim animal vel plantam, accidit sensibili in quantum est sensibile; et ideo penes hoc non sumitur differentia sensuum, sed magis secundum differentias coloris et soni. Et ideo oportet scientias speculativas dividi per differentias speculabilium in quantum sunt speculabilia. Speculabili autem, secundum quod est objectum speculativae potentiae, aliquid competit ex parte potentiae intellectivae, et aliquid ex parte habitus scientiae quo intellectus perficitur. Ex parte quippe intellectus competit ei quod sit immateriale, quia et ipse intellectus est immaterialis; ex parte vero scientiae competit ei quod sit necessarium, quia scientia de necessariis est, ut probatur 1 Posteriorum. Omne autem necessarium, in quantum hujusmodi, est immobile, quia omne quod movetur, in quantum hujusmodi, possibile est esse et non esse, vel simpliciter, vel secundum quid, ut videtur 10 Metaph. Sic igitur speculabili, quod est objectum speculativae scientiae, per se competit separatio et a materia et a motu, vel applicatio ad ea; et ideo secundum ordinem remotionis et a materia et a motu, scientiae speculativae distinguuntur. Quaedam igitur sunt speculabilium quae dependent a materia secundum esse, quia non nisi in materia esse possunt; et haec distinguuntur, quia dependent quaedam a materia secundum esse et intellectum, sicut illa in quorum definitione



ponitur materia sensibilis: unde sine materia sensibili intelligi non possunt: ut in definitione hominis oportet accipere carnem et ossa: et de his est physica, sive scientia naturalis. Quaedam vero sunt quae quamvis dependant a materia secundum esse, non tamen secundum intellectum, quia in eorum definitionibus non ponitur materia sensibilis, ut linea et numerus: et de his est mathematica. Quaedam vero sunt speculabilia quae non dependant a materia secundum esse, quia sine materia esse possunt: sive nunquam sint in materia, sicut Deus et Angelus, sive in quibusdam sint in materia, et in quibusdam non, ut substantia, qualitas, potentia et actus, unum et multa et huiusmodi: de quibus omnibus est theologia, idest divina scientia, quia praecipuum cognitorum in ea est Deus. Alio nomine dicitur metaphysica, idest transphysica, quia post physicam discenda occurrit nobis, quibus ex sensibilibus competit in insensibilia devenire. Dicitur etiam philosophia prima, in quantum scientiae aliae ab ea principia sua accipientes eam sequuntur. Non est autem possibile quod sint aliquae res quae secundum intellectum dependant a materia, et non secundum esse: quia intellectus, quantum est de se, immaterialis est: et ideo non est quartum genus philosophiae praeter praedieta.

Ad primum igitur dicendum, quod Philosophus 6 Ethic., determinat de habitibus intellectualibus in quantum sunt virtutes intellectuales. Dicuntur autem virtutes, in quantum perficiunt intellectum in sua operatione: virtus enim est quae bonum facit habentem, et opus ejus reddit bonum. Et ideo secundum quod diversimode perficitur per huiusmodi habitus speculativos, diversificat huiusmodi virtutes. Est autem alius modus quo pars animae speculativa perficitur per intellectum, qui est habitus principiorum, quo aliqua ex seipsis nota fiunt; et alius quo cognoscuntur conclusiones ex huiusmodi principiis demonstratae; sive demonstratio procedat ex causis inferioribus, sicut scientia; sive ex causis altissimis, sicut sapientia. Cum autem distinguuntur scientiae, ut sint habitus quidam, oportet quod penes objecta distinguantur, idest penes res, de quibus sunt scientiae: et sic distinguuntur hic et in metaphysica tres partes philosophiae speculativae.

Ad secundum dicendum, quod scientiae speculativae, ut patet in principio Metaphys., sunt de illis quorum cognitio quaeritur propter seipsas. Res autem de quibus est logica, non quaeruntur ad cognoscendum propter seipsas, sed ut adminiculum quoddam ad alias scientias. Et ideo logica non continetur sub philosophia speculativa quasi principalis pars, sed quasi quoddam reductum ad eam, prout ministrat speculationi sua instrumenta, scilicet syllogismos et definitiones et alia huiusmodi; quibus in speculativis scientiis indigemus. Unde et secundum Boetium in Comment. super Porphyrium, non tam est scientia quam scientiae instrumentum.

Ad tertium dicendum, quod septem liberales artes non sufficienter dividunt Philosophiam theoreticam: sed, ut dicit Hugo de Sancto Victore in 3 sui Didascalion, praetermissis quibusdam aliis connumerantur: quia his primum erudiebantur qui discere volebant philosophiam: et ideo in trivium et quadrivium distinguuntur, eo quod his quasi quibusdam viis vivax animus ad secreta philosophiae introeat. In hoc etiam consonat verbum Philosophi, qui dicit

in 2 Metaph., quod modus scientiae debet quaeri ante scientias: et Commentator ibidem dicit, quod logicam, quae docet modum omnium scientiarum, debet quis ante omnes aliarum scientias addiscere, ad quam pertinet trivium. Dicit etiam in 6 Ethic., quod mathematica potest sciri a pueris; non autem physica, quae experimentum requirit. Ex quo datur intelligi quod primo logica, deinde mathematica debet addisci, ad quam pertinet quadrivium; et ita his quasi quibusdam viis praeparatur animus ad alias physicas disciplinas. Vel ideo haec inter ceteras scientias artes dicuntur, quia non solum habent cognitionem, sed opus aliquod, quod est immediate ipsius rationis, ut constructionem, syllogismos et orationem formare, numerare, mensurare, melodias formare, cursus siderum computare. Aliae vero scientiae vel non habent opus, sed cognitionem tantum, sicut scientia divina et naturalis: unde nomen artis habere non possunt, cum ars dicatur ratio factiva, ut dicitur 6 Ethic.: vel habent opus corporale, sicut medicina, alchimia, et huiusmodi. Unde non possunt dici artes liberales, quia huiusmodi actus sunt hominis ex parte illa qua non est liber, scilicet ex parte corporis. Scientia vero moralis, quamvis sit propter operationem; tamen illa operatio non est actus scientiae, sed actus virtutis, ut patet 5 Ethic.; unde non potest dici ars, sed magis in illis operationibus se habet virtus loco artis: et ideo veteres definierunt virtutem esse artem bene recteque vivendi, ut dicit Augustinus 10 de civit. Dei.

Ad quartum dicendum, quod sicut dicit Avicenna in princ. suae Metaph., aliter distinguitur theoreticum et practicum cum philosophia dividitur in theoreticam et practicam; aliter cum artes dividuntur in theoreticas et practicas; aliter cum medicina. Cum enim philosophia vel artes per theoreticum et practicum distinguuntur, oportet accipere distinctionem eorum ex fine, ut practicum dicatur id quod ordinatur ad operationem, theoreticum vero quod ordinatur ad solam cognitionem veritatis. Hoc tamen interest, cum in hoc dividitur philosophia totalis, et artes, quia in divisione philosophiae habetur respectus ad finem beatitudinis, ad quam tota humana vita ordinatur. Ut enim dicit Augustinus 10 de civit. Dei, ex verbis Varronis, nulla est homini alia causa philosophandi nisi ut sit beatus. Unde duplex felicitas a philosophis ponitur: una contemplativa, et altera activa, ut patet 10 Ethic. Secundum hoc philosophiam in duas partes distinxerunt, moralem dicentes practicam; naturalem et rationalem dicentes theoreticam. Cum vero dicuntur artium quaedam speculativae, quaedam practicae, habetur respectus ad aliquos speciales fines illarum artium; sicut si dicamus agriculturam esse artem practicam, dialecticam vero theoreticam. Cum autem medicina dividitur in theoreticam et practicam, non attenditur divisio secundum finem: sic enim tota medicina sub practica continetur, utpote ad operationem ordinata: sed attenditur praedieta divisio secundum quod ea quae in medicina tractantur, sunt propinqua vel remota ab operatione. Illa enim pars medicinae dicitur practica quae docet modos operationis ad sanationes, sicut quod talibus apostematibus sunt talia remedia adhibenda; theoretica vero dicitur illa pars quae docet principia ex quibus homo dirigitur in operatione, sed non proxime; sicut quod virtutes sunt tres, et quod genera fe-

brium sunt tot. Unde non oportet ut si alicujus activae scientiae aliqua pars dicatur theoretica, quod propter hoc illa pars sub speculativa scientia ponatur.

Ad quintum dicendum, quod aliqua scientia continetur sub alia dupliciter. Uno modo ut pars ipsius, quia scilicet subjectum ejus est aliqua pars subjecti illius, sicut planta est quaedam pars corporis naturalis: unde et scientia de plantis continetur sub naturali scientia ut pars. Alio modo continetur una scientia sub alia ut ei subalternata, quando scilicet in superiori scientia assignatur propter quid eorum de quibus scitur in scientia inferiori solum quia: sic musica continetur sub arithmetica. Medicina igitur non ponitur sub physica ut pars. Subjectum enim medicinae non est pars subjecti scientiae naturalis secundum illam rationem qua est subjectum medicinae. Quamvis enim corpus sanabile sit corpus naturale, non tamen est subjectum medicinae prout est sanabile a natura, sed prout est sanabile per artem. Sed quia in sanatione quae fit per artem, ars est ministra naturae, quia ex aliqua naturali virtute sanitas perficitur auxilio artis; inde est quod propter quid de operatione artis oportet accipere ex proprietatibus rerum naturalium: et propter hoc medicina subalternatur physicae, et eadem ratione alchimia, et scientia de agricultura, et omnia hujusmodi. Et sic relinquitur quod physica secundum se et secundum omnes partes ejus est speculativa, quamvis aliquae operativae subalternentur ei.

Ad sextum dicendum, quod quamvis subjecta aliarum scientiarum sint partes entis, quod est subjectum metaphysicae, non tamen oportet quod aliae scientiae sint partes ejus. Accipit enim unaquaeque scientiarum unam partem entis secundum specialem modum considerandi, alium a modo quo consideratur ens in metaphysica: unde, proprie loquendo, subjectum illius non est pars subjecti metaphysicae; sed hac ratione considerata ipsa est specialis scientia aliis conditio. Sic autem posset dici pars ipsius scientiae, scientia quae est de potentia vel de actu, vel quae est de uno, aut aliquo hujusmodi: quia ista habent eundem modum considerandi cum ente, de quo tractatur in metaphysica.

Ad septimum dicendum, quod illae partes entis exigunt eundem modum tractandi cum ente communi, quia etiam ipsa non dependent a materia; et ideo scientia de ipsis non distinguitur a scientia quae est de ente communi.

Ad octavum dicendum, quod illae diversitates rerum quas objectio tangit, non sunt differentiae per se earum, in quantum sunt seibiles; et ideo penes eas scientiae non distinguuntur.

Ad nonum dicendum, quod quamvis scientia divina sit prima omnium scientiarum, naturaliter tamen quo ad nos aliae scientiae sunt priores: unde dicit Avicenna in princ. suae Metaph.: « Ordo illius scientiae est ut addiscatur post scientias naturales, in quibus sunt multa determinata, quibus ista scientia utitur, ut generatio et corruptio et motus et hujusmodi. » Similiter etiam post mathematicam. Indiget enim haec scientia ad cognitionem substantiarum separatarum cognoscere numerum et ordinem orbium caelestium: quod non est possibile sine astrologia, ad quam tota mathematica praeexigitur. Aliae vero scientiae sunt ad bene ipsius, ut musica et morales et hujusmodi.

Nec tamen oportet quod sit circulus, quia ipsa supponit ea quae in aliis probantur, cum ipsa aliarum principia probet: quia principia quae accipit alia scientia, scilicet naturalis, a prima philosophia, non probant ea quae idem primus philosophus accipit a naturali; sed probantur per aliqua principia per se nota; et sic philosophus primus non probat principia quae tradit naturali per principia quae ab eo accipit, sed per aliqua principia per se nota: et sic non est aliquis circulus in definitione. Praeterea, effectus sensibiles, ex quibus procedunt naturales demonstrationes, sunt notiores quo ad nos in principio; sed cum per eos pervenerimus ad cognitionem causarum primarum, ex illis apparebit nobis propter quid illorum effectuum, ex quibus probabantur (1) demonstratione quia: et sic scientia naturalis aliquid addit scientiae divinae; et tamen per eam sua principia notificantur. Et inde est quod Boetius ponit ultimo scientiam divinam, quia est ultima quo ad nos.

Ad decimum dicendum, quod quamvis naturalis philosophia post mathematicam discenda occurrat, eo quod universalis ipsius documenta indigent experimento et tempore; tamen res naturales, cum sint res sensibiles, sunt naturaliter magis notae quam res mathematicae a materia sensibili abstractae.

## ARTICULUS II.

*Utrum naturalis philosophia sit de his quae sunt in motu et materia.*

Ad secundum sic proceditur. 1. Videtur quod scientia naturalis non sit de his quae sunt in motu et materia. Materia enim est individuationis principium. Sed nulla scientia est de individuis, sed de solis universalibus, secundum sententiam Platonis, quae ponitur in Porphyrio. Ergo scientia naturalis non est de his quae sunt in materia.

2. Item. Scientia ad intellectum pertinet. Sed intellectus cognoscit abstrahendo a materia et conditionibus materiae. Ergo de his quae non sunt a materia abstracta, nulla scientia esse potest.

3. Item. In scientia naturali agitur de primo motore, ut patet 8 Physic. Sed ipse est immunis ab omni materia. Ergo scientia naturalis non est de his solum quae sunt in materia.

4. Item. Omnis scientia de necessariis est. Sed omne quod movetur, in quantum hujusmodi, est contingens, ut probatur 9 Metaph. Ergo nulla scientia potest esse de rebus mobilibus, et sic nec scientia naturalis.

5. Item. Nullum universale movetur: homo enim universalis non sanatur, sed hic homo, ut dicitur in principio Metaph. Sed omnis scientia de universalibus est. Ergo naturalis scientia non est de his quae sunt in motu.

6. Item. In scientia naturali determinatur de quibusdam quae non moventur, sicut est anima, ut probatur in principio de Anima; et terra, ut probatur in 2 Caeli et Mundi; et omnes formae naturales non fiunt nec corrumpuntur, et eadem ratione non moventur nisi per accidens, ut probatur in 7 Metaph. Ergo non omnia de quibus est philosophia, sunt in motu.

7. Item. Omnis creatura est mutabilis, cum natura immutabilis soli Deo conveniat, ut Augustinus dicit. Si igitur ad naturalem pertinet conside-

(1) *Al.* probabuntur.

ratio de his quae sunt in motu, ejus erit considerare de omnibus creaturis: quod expresse falsum esse apparet.

Sed contra. Ad philosophiam naturalem pertinet de rebus naturalibus determinare. Sed res naturales sunt in quibus est principium motus: ubicumque autem est motus, oportet esse materiam, ut dicitur in 10 Metaph. Ergo scientia naturalis est de his quae sunt in motu et materia.

Item. De his quae sunt in motu et materia oportet esse aliquam scientiam speculativam: alias non esset perfecta traditio Philosophiae, quae est cognitio entis. Sed nulla alia scientia speculativa est de his, quia nec mathematica, nec metaphysica. Ergo de his est scientia naturalis.

Item. Hoc apparet ex his quae dicit Philosophus 6 Metaph. et 2 Physic.

Respondeo dicendum, quod propter difficultatem hujus quaestionis coactus fuit Plato ponere ideas. Cum enim, ut dicit Philosophus 1 Metaph., crederet omnia sensibilia semper in fluxu esse, secundum opinionem Cratuli Eracliti, et ita aestimaverit scientiam de ipsis esse non posse, posuit quasdam substantias a sensibilibus separatas, de quibus essent scientiae, et darentur definitiones. Sed hic defectus accidit ex eo quod non distinxit quod est per se ab eo quod est secundum accidens; et ideo secundum accidens falluntur plerumque etiam sapientes, ut dicitur in Elenchis. Ut autem probatur in 8 Metaph., cum in natura sensibili inveniatur et ipsum integrum, id est compositum et ratio, id est forma ejus; per se quidem generatur et corrumpitur ipsum compositum, non autem ratio sive forma, sed per accidens. Non enim fit domum esse, sed hanc domum, ut ibi dicitur. Unumquodque autem potest considerari sine omnibus his quae ei non per se comparantur; et ideo formae et rationes rerum, quamvis in motu existentium, prout in se considerantur, sine motu sunt; et sic de eis sunt scientiae et definitiones, ut ibidem Philosophus dicit. Non autem scientiae sensibilibus substantiarum fundantur super cognitione aliquarum substantiarum separatarum a sensibilibus, ut ibidem probatur. Hujusmodi autem rationes quas considerant scientiae quae sunt de rebus, cum considerentur absque motu, oportet etiam quod considerentur absque illis secundum quae competit motus rebus mobilibus. Cum autem omnis motus tempore mensuretur, et primus motus sit motus localis, quo remoto nullus alius motus inest; oportet quod secundum hoc sit aliquod mobile quod est hic et nunc. Hoc autem sequitur rem ipsam mobilem, secundum quod est individuata per materiam existentem sub dimensionibus designatis. Unde oportet quod hujusmodi rationes, secundum quas de rebus mobilibus possunt esse scientiae, considerentur absque materia signata, et absque omnibus his quae consequuntur materiam signatam; non autem absque materia non signata, quia ex ejus notione dependet notio formae quae determinat sibi materiam: et ideo ratio hominis quam significat definitio, secundum quam procedit scientia, consideratur sine his carnibus et his ossibus, non autem sine carnibus et ossibus absolute. Et quia singularia includunt in sui ratione materiam signatam, universalia vero materiam communem, ut dicitur 7 Metaph.; ideo praedieta abstractio non dicitur formae a materia absolute, sed universalis a particulari. Possunt igitur hujusmodi rationes sic abstractae dupliciter conside-

rari. Uno modo secundum se, et sic considerantur sine motu et materia signata; et hoc non invenitur in eis nisi secundum esse quod habent in intellectu. Alio modo secundum quod comparantur ad res quarum sunt rationes, quae quidem res sunt in materia et motu; et sic sunt principia cognoscendi illa, quia omnis res cognoscitur per suam formam: et ita per hujusmodi rationes immobiles et sine materia particulari consideratas, habetur cognitio in scientia naturali de rebus mobilibus et materialibus extra animam existentibus.

Ad primum igitur dicendum, quod materia non est individuationis principium nisi secundum quod est sub dimensionibus signatis existens; et sic enim scientia naturalis a materia abstrahit.

Ad secundum dicendum, quod forma intelligibilis est quidditas rei; objectum autem intellectus est quid; ut dicitur 5 de Anima. Quidditas autem compositi universalis, ut hominis vel animalis, includit in se materiam universalem, non particularem, ut dicitur 7 Metaph. Unde intellectus communiter abstrahit a materia signata et conditionibus ejus, non autem a materia communi in scientia naturali; quamvis etiam in scientia naturali non consideretur materia nisi in ordine ad formam: unde etiam forma per prius est de consideratione naturalis quam materia.

Ad tertium dicendum, quod de primo motore non agitur in scientia naturali tamquam de subjecto vel parte subjecti, sed tamquam de termino ad quem naturalis scientia perducit. Terminus autem non est de natura rei cujus est terminus, sed habet aliquam habitudinem ad rem illam; sicut terminus lineae non est linea, sed habet aliquam habitudinem ad eam. Ita et motor primus habet aliquam habitudinem ad res naturales, est tamen alterius naturae ab eis. Habet enim habitudinem ad eas in quantum influit eis motum; et sic cadit in consideratione naturalis, non secundum ipsum, sed in quantum motor.

Ad quartum dicendum, quod scientia est de aliquo dupliciter. Uno modo primo et principaliter; et sic scientia est de universalibus rationibus, super quas fundatur. Alio modo est de aliquibus secundario, et quasi per reflexionem quamdam; et sic de rebus illis est quarum sunt illae rationes, in quantum rationes illas applicat ad res etiam particulares quarum sunt, adminiculo inferiorum virium. Ratione enim universali utitur sciens et ut re scita, et ut medio sciendi. Per universalem enim hominis rationem possum judicare de hoc vel de illo. Rationes autem universales rerum sunt omnes immobiles; et ideo quantum ad hoc omnis scientia de necessariis est: sed rerum quarum sunt illae rationes, quaedam sunt necessariae et immobiles, quaedam contingentes et mobiles; et quantum ad hoc de rebus contingentibus et mobilibus dicuntur esse scientiae.

Ad quintum dicendum, quod quamvis universale non moveatur, est tamen ratio rei mobilis.

Ad sextum dicendum, quod anima et aliae formae naturales, quamvis non moveantur per se, moventur tamen per accidens, et insuper sunt perfectiones rerum mobilium; et secundum hoc cadunt in consideratione naturalis. Terra autem quamvis secundum se totam non moveatur, quod accidit ei in quantum est in loco naturali, in quo quiescit per eandem naturam per quam movetur ad locum: tamen partes ejus moventur ad locum, quando sunt extra locum proprium: et sic terra ratione quietis



totius et motus partium, cadit in consideratione naturalis.

Ad septimum dicendum, quod mutabilitas illa quae competit omni creaturae, non est secundum aliquem motum naturalem, sed secundum dependentiam ad Deum, a quo si desererentur, deficerent ab eo quod sunt. Dependens autem ista pertinet ad considerationem metaphysicae potius quam naturalis. Creaturae autem spirituales non sunt mutabiles nisi secundum electionem. Talis vero mutatio non pertinet ad naturalem, sed magis ad divinum.

### ARTICULUS III.

*Utrum mathematica consideratio sit sine motu et materia.*

Ad tertium sic proceditur. 1 Videtur quod mathematica consideratio non sit sine materia de his quae habent esse in materia. Cum enim veritas consistat in adaequatione rei ad intellectum, oportet esse, quodcumque res aliter consideratur quam sit, falsam considerationem. Si ergo omnes res quae sunt in materia, considerantur sine materia in mathematica, ejus consideratio erit falsa; et sic non erit scientia, cum omnis scientia sit verorum.

2. Item. Secundum Philosophum 1 Poster., eujuslibet scientiae est considerare subjectum, et partes subjecti. Sed omnium materialium secundum esse materia pars est. Ergo non potest esse quod aliqua scientia consideret de his quae sunt in materia absque hoc quod materiam consideret.

3. Item. Omnes lineae rectae sunt ejusdem speciei. Sed mathematicus considerat lineas rectas numerando illas: alias non consideraret triangulum et quadrangulum. Ergo considerat lineas secundum quod differunt numero et conveniunt specie. Sed principium differendi his quae secundum speciem conveniunt, est materia, ut ex supradictis patet. Ergo materia consideratur a mathematico.

4. Item. Nulla scientia quae penitus abstrahit a materia, demonstrat per causam materialem. Sed in mathematica fiunt aliquae demonstrationes quae non possunt reduci nisi in causam materialem, sicut cum demonstratur aliquid de toto ex partibus. Partes enim sunt materia totius, ut dicitur 2 Physicor.: unde et in 2 Posterior. reducitur ad causam materialem demonstratio, qua demonstratur quod angulus qui est in semicirculo, est reectus, ex eo quod utraque pars ejus est semirecta. Ergo mathematica non omnino abstrahit a materia.

5. Item. Motus non potest esse sine materia. Sed mathematicus debet considerare motum; quia cum motus mensuretur secundum spatium, ejusdem rationis et scientiae videtur considerare quantitatem spatii, quod pertinet ad mathematicum, et quantitatem motus. Ergo mathematicus non omnino dimittit considerationem materiae.

6. Item. Astrologia quaedam pars mathematicae est; et similiter scientia de sphaera mota, et de ponderibus, et musica: in quibus omnibus fit consideratio de motu et rebus mobilibus. Ergo mathematica non abstrahit totaliter a materia et motu.

7. Item. Naturalis consideratio tota est circa materiam et motum. Sed quaedam conclusiones demonstrantur communiter a mathematico et naturali; puta. utrum terra sit rotunda, et utrum sit in medio caeli. Ergo non potest esse quod mathematica abstrahat omnino a materia.

Si dicatur quod abstrahit tantum a materia sensibili; contra. Materia sensibilis est materia particularis, quia sensus particularium est, a qua omnes scientiae abstrahunt. Ergo mathematica consideratio non debet dici magis abstracta quam aliqua aliarum scientiarum.

8. Item. Philosophus in 2 Physic. dicit, tria esse negotia. Primum est de mobili et corruptibili; secundum de mobili et incorruptibili; tertium de immobili et incorruptibili. Primum autem est naturale, secundum mathematicum, tertium divinum, ut Ptolomaeus exponit in principio Almagesti. Ergo mathematica est de mobilibus.

Sed contra est quod Philosophus dicit in 6 Metaph.

Item. Quaedam res sunt quae quamvis sint in materia, non tamen recipiunt in sui definitione materiam, et curvum in hoc differt a simo. Sed philosophiae est de omnibus entibus considerare. Ergo oportet de hoc ente esse partem aliquam; et haec est mathematica, cum ad nullam aliam pertineat.

Item. Ea quae sunt priora secundum intellectum, possunt sine posterioribus considerari. Sed mathematica sunt priora naturalibus, quae sunt in motu et materia: habent enim se ex additione ad mathematica, ut dicitur in 5 Caeli et Mundi. Ergo mathematica consideratio potest esse sine motu et materia.

Respondeo. Ad evidentiam hujus quaestionis oportet scire, quomodo intellectus per suam operationem abstrahere potest. Sciendum igitur, secundum Philosophum 5 de Anima, quod duplex est operatio intellectus. Una quae dicitur intelligentia indivisibilium, qua cognoscitur de unaquaque re quid est. Alia vero est qua componit et dividit, scilicet enuntiationem negativam vel affirmativam formando: et hae quidem duae operationes duobus quae sunt in rebus respondent. Prima quidem operatio respicit ipsam naturam rei, secundum quam aliqua res intellecta aliquem gradum in entibus obtinet; sive sit res completa ut totum aliquid, sive incompleta ut pars vel accidens. Secunda operatio respicit ipsum esse rei, quod quidem resultat ex aggregatione principiorum rei in compositis, vel ipsam simplicem naturam rei concomitatur, ut in substantiis simplicibus. Et quia veritas intellectus est ex hoc quod conformatur rei, patet quod secundum hanc secundam operationem intellectus abstrahere non potest vere quod secundum rem conjunctum est, quia in abstrahendo significatur esse separatio secundum ipsum esse rei; sicut si abstrahio hominem ab albedine, dicendo, Homo non est albus, significo separationem esse in re. Unde si secundum rem homo et albedo non sunt separata, erit intellectus falsus. Hac igitur operatione intellectus vere abstrahere non potest nisi ea quae sunt secundum rem separata; ut cum dicitur, Homo non est asinus. Sed secundum primam operationem potest separare ea quae secundum rem separata non sunt; nec tamen omnia, sed aliqua. Cum enim unaquaeque res sit intelligibilis secundum quod est actus, ut dicitur 10 Metaph., oportet quod ipsa natura sive quidditas rei, intelligatur vel secundum quod est actus quidam, sicut accidit de ipsis formis, et substantiis simplicibus; vel secundum id quod est actus ejus, sicut substantiae compositae per formas suas; vel secundum id quod est ei loco actus, sicut materia prima per habitudinem ad formam, et vacuum



per privationem locati: et hoc est illud ex quo unaquaeque natura suam rationem sortitur. Quando ergo hoc per quod constituitur ratio naturae, per quod ipsa natura intelligitur, habet ordinem et dependentiam ad aliquid aliud, tunc constat quod natura illa sine illo alio intelligi non potest; sive sit conjuncta conjunctione illa qua pars conjungitur toti: sicut pes non potest intelligi sine intellectu animalis, quia id a quo pes habet rationem pedis, dependet ab eo a quo animal est animal; sive etiam sit conjuncta per modum quo forma conjungitur materiae, sicut pars composito, vel accidens subjecto, sicut sinum non potest intelligi sine naso; sive etiam sint secundum rem separata, sicut pater non potest intelligi sine intellectu filii, quamvis illae relationes inveniantur in diversis rebus. Si vero unum ab altero non dependeat secundum id quod constituit rationem naturae, tunc unum non potest ab altero abstrahi per intellectum, ut sine eo intelligatur; non solum si sint separata secundum rem, ut homo et lapis, sed etiam si secundum rem conjuncta sint, sive ea conjunctione qua pars et totum conjungitur, sicut littera potest intelligi sine syllaba, et animal sine pede, sed non e converso; sive etiam sint conjuncta per modum quo forma conjungitur materiae, et accidens subjecto, sicut albedo potest intelligi sine homine, et e converso. Sic igitur intellectus distinguit unum ab altero aliter et aliter secundum operationes: quia secundum illam qua componit et dividit, distinguit unum ab alio per hoc quod intelligit unum alii non inesse; in operatione vero qua intelligit quid est unumquodque, distinguit unum ab alio, dum intelligit quid est hoc, nihil intelligendo de alio, neque quod sit cum eo, neque quod sit ab eo separatum. Unde ista distinctio non proprie habet nomen separationis, sed prima tantum. Haec autem distinctio recte dicitur abstractio; sed tunc tantum quando ea quorum unum sine alio intelligitur, sunt simul secundum rem. Non enim dicitur animal a lapide abstrahi, si animal absque intellectu lapidis intelligatur. Unde cum abstractio non possit esse, proprie loquendo, nisi conjunctorum secundum rem, secundum duos modos conjunctionis praedictos, scilicet qua pars et totum conjungitur, sive forma et materia; duplex est abstractio: una qua forma abstrahitur a materia, alia qua totum a partibus. Forma autem illa potest abstrahi a materia cujus essentiae ratio non dependet a tali materia. Ab illa autem materia non potest forma abstrahi per intellectum a qua suae essentiae ratio dependet. Unde, cum omnia accidentia comparentur ad substantiam sicut forma ad materiam, et cujuslibet accidentis ratio dependeat a substantia (1), impossibile est aliquam talem formam a substantia separari. Sed accidentia adveniunt substantiae quodam ordine. Nam primo advenit ei quantitas, deinde qualitas, deinde passiones et motus. Unde quantitas potest intelligi in substantia antequam intelligantur in ea qualitates sensibiles, a quibus dicitur materia sensibilis; et sic secundum rationem suae substantiae non dependet quantitas a materia sensibili, sed intelligibili tantum. Substantia enim remotis accidentibus non remanet nisi intellectu comprehensibilis, eo quod sensibiles potentiae non pertingunt usque ad substantiae comprehensionem. Et de his abstractis est mathematica,

quae considerat quantitates, et ea quae quantitates consequuntur, ut figuram et hujusmodi. Totum etiam non a quibusdam partibus abstrahi potest. Sunt enim quaedam partes a quibus totius ratio dependet; quando scilicet hoc est esse toti tali quod ex talibus partibus componit: sicut se habet syllaba ad litteram, et mixtum ad elementa: et tales partes dicuntur speciei, et formae, sine quibus totum intelligi non potest, cum ponantur in ejus definitione. Quaedam vero partes sunt quae accidunt toti in quantum hujusmodi, sicut semicirculus se habet ad circumulum. Accidit enim circulo quod sumantur per divisionem duae ejus partes aequales vel inaequales, vel etiam plures; non autem accidit triangulo quod in eo designentur tres lineae, quia ex hoc triangulus est triangulus. Similiter etiam per se competit homini quod invenitur in eo anima rationalis, et corpus compositum ex quatuor elementis: unde sine his partibus homo intelligi non potest: et sic oportet poni in definitione hominis, quae sunt (1) partes speciei et formae; sed digitus, pes, manus et hujusmodi sunt praeter intellectum hominis: unde ex illis ratio essentialis hominis non dependet, unde sine his intelligi potest: sive enim habeat pedes, sive non, dummodo ponatur conjunctus ex anima rationali et corpore composito ex quatuor elementis propria commixtione quam requirit talis forma, est homo. Et haec partes dicuntur partes materiae, quae non ponuntur in definitione totius, sed magis e converso; et ita se habent ad hominem omnes partes signatae, sicut haec anima, et hoc corpus, et hoc os, et hujusmodi. Haec enim partes sunt partes materiae: quae quidem sunt partes Socratis et Platonis, non tamen hominis in quantum est homo: et ideo potest homo abstrahi per intellectum ab illis partibus: et talis abstractio est universalis a particulari. Et ita sunt duae abstractiones intellectus. Una quae respondet unioni formae et materiae, vel accidentis et subjecti; et haec est abstractio formae a materia sensibili. Alia quae respondet unioni totius et partis; et huic respondet abstractio universalis a particulari, quae est abstractio totius, in qua consideratur absolute natura aliqua secundum suam rationem essentialem ab omnibus partibus, quae non sunt partes speciei, sed sunt partes accidentales. Non autem inveniantur abstractiones eis oppositae, quibus pars abstrahatur a toto, vel materia a forma: quia pars non potest abstrahi a toto per intellectum, si sit de partibus materiae, in quarum definitione ponitur totum: vel potest etiam sine toto esse, si sit de partibus speciei, sicut linea sine triangulo, vel littera sine syllaba, vel elementum sine mixto. In his autem quae secundum esse possunt esse divisa, magis habet locum separatio quam abstractio. Similiter autem cum dicimus formam abstrahi a materia, non intelligitur de forma substantiali, quia forma substantialis et materia sibi correspondens dependent adinvicem, ut unum sine alio non possit intelligi, eo quod proprius actus in propria materia fit: sed intelligitur de forma accidentali, quae est quantitas et figura. A qua quidem materia sensibilis per intellectum abstrahi non potest, cum qualitates sensibiles non possint intelligi non praecincta quantitate, sicut patet in superficie et colore: nec etiam potest intelligi esse

(1) *Al.* ad substantiam.*S. Th. Opera omnia. V. 17.*(1) *Al.* sed hic oportet poni in definitione hominis unde sunt etc.

subjectum motus, quod non intelligitur quantum. Substantia autem quae est materia, intelligibilis esse potest sine quantitate: unde considerare substantiam sine quantitate, magis pertinet ad genus separationis quam abstractionis. Sic igitur in operatione intellectus triplex distinctio invenitur. Una secundum operationem intellectus componentis et dividens, quae separatio dicitur proprie; et haec competit scientiae divinae, sive metaphysicae. Alia secundum operationem quae format quidditates rerum, quae est abstractio a materia sensibili; et haec competit metaphysicae. Tertia secundum compositionem universalis a particulari; et haec competit etiam physicae, et est communis omnibus scientiis: quia in omni scientia praetermittitur quod est per accidens, et accipitur quod est per se. Et quia quidam non intellexerunt differentiam duorum ultimorum a primo, inciderunt in errorem, ut ponerent mathematica et universalia a sensibilibus separata, ut Pythagorici et Platonici.

Ad primum igitur dicendum, quod mathematicus abstrahens non considerat aliter quam sit. Non enim intelligit lineam esse sine materia sensibili; sed considerat lineam et ejus passiones sine consideratione materiae sensibilis: et sic non est dissonantia inter intellectum et rem: quia etiam secundum rem id quod est de natura lineae, non dependet ab eo quod facit materiam esse sensibilem, sed magis e converso: et sic patet quod abstrahentium non est mendacium, ut dicitur 2 Physic.

Ad secundum dicendum, quod materiale non solum dicitur ejus pars est materia, sed etiam id quod in materia esse habet, secundum quem modum linea sensibilis materiale quoddam dici potest. Unde per hoc non prohibetur quin linea sine materia sensibili intelligi possit. Non enim materia sensibilis comparatur ad lineam sicut pars, sed sicut subjectum, in quo esse habet: et sic est de superficie et corpore. Non enim mathematicus considerat corpus quod est in genere substantiae, prout ejus pars est materia; sed secundum quod est in genere quantitatis tribus dimensionibus perfectum; et sic comparatur ad corpus quod est in genere substantiae, ejus pars est materia physica, sicut accidens ad subjectum.

Ad tertium dicendum, quod materia non est principium diversitatis secundum numerum, nisi secundum quod in multas partes divisa, in singulis partibus formam recipiens ejusdem rationis, plura individua ejusdem speciei constituit. Materia autem dividi non potest nisi ex praesupposita quantitate; qua remota, substantia omnis indivisibilis remanet; et sic prima ratio diversificandi ea quae sunt unius speciei, est penes quantitatem. Quod quidem quantitati competit inquantum in sua ratione situm quasi differentiam constitutivam habet, quod nihil est aliud quam ordo partium. Unde etiam abstracta quantitate a materia sensibili per intellectum, adhuc contingit imaginari diversa secundum numerum unius speciei, sicut plures triangulos aequilateros, et plures lineas rectas aequales.

Ad quartum dicendum, quod mathematica non abstrahit a qualibet materia, sed solum a materia sensibili. Partes autem quantitatis a quibus demonstratio sumpta quodammodo sicut a causa materiali sumi videtur, non sunt materia sensibilis, sed pertinent ad materiam intelligibilem, quae etiam in mathematicis invenitur, ut patet 7 Metaph.

Ad quintum dicendum, quod motus secundum naturam suam non pertinet ad genus quantitatis, sed participat aliquid de natura quantitatis aliunde, secundum quod divisio motus sumitur ex divisione spatii, vel ex divisione mobilis: et ideo considerare motum non pertinet ad mathematicum; sed tamen principia mathematica ad motum applicari possunt: et ideo secundum hoc quod principia quantitatis ad motum applicantur, naturalis considerare debet de divisione et continui et motus, ut patet in 6 Physic. Et in scientiis inter mathematicam et naturalem tractatur de mensuris motuum, sicut in scientiis de sphaera mota, et in astrologia.

Ad sextum dicendum, quod in compositis simplicia salvantur, et proprietates eorum; licet per alium modum: sicut propriae qualitates elementorum, et motus ipsorum proprii, inveniuntur in mixto; quod tamen est compositorum proprium, non invenitur in simplicibus. Et inde est quod quanto scientia aliqua abstractiora et simpliciora considerat, tanto ejus principia sunt magis applicabilia aliis scientiis. Unde principia mathematicae sunt applicabilia naturalibus, non autem e converso: propter quod Physica est ex suppositione mathematicae, sed non e converso, ut patet in 3 Caeli. Et inde est quod de rebus naturalibus et mathematicis ordines scientiarum tres inveniuntur. Quaedam enim sunt pure naturales, quae considerant proprietates rerum naturalium inquantum hujusmodi, sicut physica et agricultura et hujusmodi. Quaedam vero sunt pure mathematicae, quae determinant de quantitibus absolute, ut geometria de magnitudine, arithmetica de numero. Quaedam vero sunt mediae, quae principia mathematica ad res naturales applicant, ut musica et astrologia: quae tamen magis sunt affines mathematicis, quia in earum consideratione id quod est physici, est quasi naturale; quod autem mathematici, quasi formale: sicut musica considerat sonos non inquantum sunt soni, sed inquantum sunt secundum numeros proportionabiles; et sic est in aliis: et propter hoc demonstrant conclusiones suas circa res naturales, sed per media mathematica; et ideo nihil prohibet si inquantum cum naturali communicant, materiam sensibilem respiciunt. Inquantum enim cum mathematica communicant, abstractae sunt.

Ad septimum dicendum, quod scientiae mediae, de quibus dictum est, communicant cum naturali, secundum id quod est materiale in earum consideratione; differunt autem secundum id quod in earum consideratione est formale: et ideo nihil prohibet has scientias interdum cum naturali easdem habere conclusiones; non tamen per eadem demonstrant, nisi secundum quod scientiae sunt mixtae, et una interdum utitur eo quod est alterius; sicut rotunditatem terrae naturalis probat ex motu gravium, astrologus per considerationem lunarium eclipsium (1).

Ad octavum dicendum, quod sicut dicit Commentator ibidem, Philosophus non distinguere intendit ibi scientias speculativas quia de quolibet mobili, sive sit corruptibile, sive incorruptibile, determinat naturalis; mathematica autem, inquantum hujusmodi, non considerat aliquod mobile. Intendit autem distinguere res de quibus scientiae speculativae determinat, de quibus seorsum et secundum

(1) Deest responsio ad instantium.

ordinem agendum est; quamvis illa tria genera rerum tribus scientiis applicari possint. Entia enim incorruptibilia et immobilia praecise ad metaphysicum pertinent. Entia vero mobilia et incorruptibilia propter sui uniformitatem et regularitatem possunt determinari et quantum ad suos motus per principia mathematica, quod de immobilibus corruptibilibus dici non potest. Et ideo secundum genus entium attribuitur mathematicae ratione astrologiae; tertium vero remanet proprium soli naturali: et sic loquitur Ptolomaeus.

## ARTICULUS IV.

*Utrum divina scientia sit de his quae sunt sine materia et motu.*

Ad quartum sic proceditur. 1. Videtur quod scientia divina non sit de rebus a motu et materia separatis. Scientia enim divina maxime videtur esse de Deo. Sed ad Dei cognitionem perferre non possumus nisi per effectus visibiles qui sunt in materia et motu constituti. Rom. 1, 50: « Invisibilia Dei a creatura mundi per ea quae facta sunt, intellecta conspiciuntur. » Ergo scientia divina non abstrahit a motu et a materia.

2. Item. Illud cui motus aliquo modo convenit, non est omnino a motu et a materia separatum. Sed motus aliquo modo Deo convenit: unde dicitur de Sapientia divina, Sap. 7, quod est mobilis et mobilior omnibus mobilibus: et Augustinus dicit 8 super Genes., quod Deus movet se sine tempore et loco: et Plato posuit primum movens movere seipsum. Ergo scientia divina, quae de Deo determinat, non est omnino a motu separata.

3. Item. Scientia divina non solum habet considerare de Deo, sed etiam de Angelis. Sed Angeli moventur secundum electionem, quia de bonis facti sunt mali; et secundum locum, ut patet in illis qui mittuntur. Ergo illa de quibus scientia divina considerat, non sunt omnino separata a motu.

4. Item. Ut videtur Commentator dicere in principio Physic., omne quod est, aut est materia pura, vel forma pura, vel compositum ex materia et forma. Sed Angelus non est forma, quia sic esset actus purus, quod est solius Dei; nec est materia pura. Ergo compositum ex materia et forma: et sic scientia divina non abstrahit a materia.

5. Item. Scientia divina quae ponitur pars tertia speculativae philosophiae, est idem quod metaphysica, cujus subjectum est ens, et specialiter ens quod est substantia, ut patet in metaphysica. Sed ens et substantia non abstrahit a materia: alias nullum ens inveniretur quod haberet materiam. Ergo scientia divina non est a materia abstrahens.

6. Item. Secundum Philosophum 1 Poster., ad scientiam pertinet considerare non solum subjectum, sed etiam partes et passiones subjecti. Sed ens est subjectum scientiae divinae, ut dictum est. Ergo ad ipsam pertinet considerare de omnibus entibus. Sed materia et motus sunt quaedam entia. Ergo scientia divina ab eis non abstrahit.

7. Item. Sicut dicit Commentator 1 Physic., scientia divina demonstrat per tres causas, scilicet efficientem, formalem et finalem. Sed causa efficiens non potest considerari sine consideratione motus; similiter nec finis, ut dicitur in 5 Metaph.: unde in mathematicis, quia sunt immobilia, nulla

demonstratio per huiusmodi causas datur. Ergo scientia divina non abstrahit a motu.

8. Item. In theologia determinatur de creatione caeli et terrae, et actibus hominum, et multis huiusmodi, quae in se materiam et motum continent. Ergo non videtur theologia a materia et a motu abstrahere.

Sed contra est quod dicit Philosophus 6 Metaph., quod prima philosophia est circa separabilia, scilicet a materia, et immobilia. Prima autem philosophia est scientia divina, ut ibidem dicit. Ergo ipsa est abstracta a motu et a materia.

Item. Nobilissima scientia est de nobilissimis entibus. Sed scientia divina est nobilissima scientia. Cum igitur entia immaterialia et immobilia sint nobilissima, de eis erit scientia divina.

Item. Philosophus dicit in principio Metaph., quod scientia divina est de primis principiis et causis. Huiusmodi autem sunt immaterialia et immobilia. Ergo de talibus est scientia divina.

Respondeo. Ad evidentiam huius quaestionis scire oportet, quae scientia debeat dici scientia divina. Sciendum igitur, quod quaecumque scientia considerat aliquod genus subjectum, oportet quod consideret principia illius; cum scientia non perficiatur nisi per cognitionem principiorum primorum, ut patet per Philosophum in principio Physic. Sed principiorum sunt duo genera. Quaedam enim sunt quae sunt in seipsis quaedam naturae completae, et sunt nihilominus principia aliorum; sicut corpora caelestia sunt quaedam principia corporum aliorum inferiorum, et corpora simplicia corporum mixtorum: et ideo ista non solum considerantur in scientiis ut principia sunt, sed etiam ut sunt in seipsis res quaedam: et propter hoc de eis non solum tractatur in scientia quae considerat ipsa principiata, sed habent etiam scientiam per se separatam; sicut de corporibus caelestibus est quaedam pars scientiae naturalis praeter illam (1) in qua determinatur de corporibus inferioribus; et de elementis est quaedam scientia praeter illam in qua determinatur de corporibus mixtis. Quaedam autem sunt principia quae non sunt naturae completae in seipsis, sed solum sunt principia naturarum, sicut unitas numeri et punctus lineae, et forma et materia corporis physici. Unde huiusmodi principia non tractantur nisi in scientia quae agit de principiatis. Sicut autem uniuscuiusque generis determinati sunt quaedam communia principia quae se extendunt ad omnia principia illius generis; ita et omnia entia secundum quod in ente communicant, habent quaedam principia, quae sunt principia omnium entium: quae quidem principia possunt dici communia dupliciter secundum Avicennam in sua Sufficientia. Uno modo per praedicationem; sicut cum dico, quod forma est communis ad omnes formas, quia de qualibet praedicatur. Alio modo per causalitatem, sicut dicimus solum unum numero esse principium ad omnia generabilia. Omnium autem entium sunt communia principia non solum secundum primum modum, quod appellat Philosophus in 2 Metaph., omnia entia habere eadem principia secundum analogiam; sed etiam secundum (2) secundum modum, ut

(1) Al. in qua determinatur de corporibus mixtis, *alio omissis.*

(2) Al. tantum secundum modum.



sint quaedam res eadem numero existentes omnium rerum principia; prout scilicet principia accidentium reducuntur in substantias, et principia substantiarum corruptibilium in substantias incorruptibiles: et sic quodam gradu et ordine in quaedam principia omnia entia reducuntur. Et quia illud quod est principium essendi omnibus, oportet esse maxime ens, ut dicitur 2 Metaph.; ideo huiusmodi principia oportet esse completissima; et propter hoc oportet ea esse maxime actu, ut nihil vel minimum habeant de potentia, quia actus est prior et potentior potentia, ut dicitur 10 Metaph. Et propter hoc oportet esse ea sine materia, quae est potentia, et absque motu, qui est actus existentis in potentia: et huiusmodi sunt res divinae: quia si divinum alicubi existit, in tali natura immateriali et immobili maxime existit, ut dicitur 6 Metaph. Huiusmodi ergo res divinae, quia sunt principia omnium entium, et sunt nihilominus in se naturae completae, dupliciter tractari possunt. Uno modo prout sunt principia communia omnium entium; alio modo prout sunt in se res quaedam. Quia autem huiusmodi prima principia quamvis sint in se maxime nota, tamen intellectus se habet ad ea sicut oculus noctuae ad lumen solis, ut dicitur 2 Metaph.; per lumen naturalis rationis pervenire non possumus in ea nisi secundum quod in ea per effectus decimur: et hoc modo Philosophi in ea pervenerunt, sicut dicitur Roman. 1, 20: « Invisibilia Dei a creatura mundi per ea quae facta sunt, intellecta conspiciuntur. » Unde et huiusmodi res divinae non tractantur a philosophis nisi prout sunt rerum omnium principia; et ideo pertractantur in illa doctrina in qua ponuntur illa quae sunt communia omnibus entibus, quae habet subjectum ens in quantum est ens; et haec scientia divina dicitur. Est autem alius modus cognoscendi huiusmodi res non secundum quod per effectus manifestantur, sed secundum quod ipsae seipsas manifestant: et hunc modum ponit Apostolus 1 Coriuth. 2, 11: « Quae Dei sunt nemo novit nisi Spiritus Dei. Nos autem non spiritum huius mundi habemus, sed spiritum qui ex Deo est: » et ibid. 10: « Nobis autem revelavit Deus per Spiritum suum. » Et per hunc modum tractantur res divinae secundum quod in seipsis subsistunt, et non solum prout sunt rerum principia. Sic igitur theologia, sive scientia divina, est duplex. Una in qua considerantur res divinae, non tamquam subjectum scientiae, sed tamquam principium subjecti; et talis est theologia quam philosophi prosequuntur, quae alio nomine metaphysica dicitur. Alia vero quae ipsas res divinas considerat propter seipsas, ut subjectum scientiae; et haec est theologia quae sacra Scriptura dicitur. Utraque autem est de his quae sunt separata a materia et motu secundum esse; sed diversimode, secundum quod dupliciter potest aliquid a materia esse separatum et motu secundum esse. Uno modo sic quod de ratione rei quae separata dicitur, sit quod nullo modo in materia et motu esse possit: et hoc modo Deus et Angeli dicuntur esse a materia et motu separati. Alio modo sic quod non sit de ratione eius quod sit in materia et motu, sed possit esse sine materia et motu, quamvis quandoque inveniatur in materia: et sic ens et substantia et potentia et actus sunt separata a materia et motu: quia secundum esse a materia et motu non de-

pendent, sicut mathematica dependent, quae nunquam sine materia esse possunt, quamvis sine materia sensibili possint intelligi. Theologia ergo philosophica determinat de separatis secundo modo, sicut scilicet de principiis subjecti; theologia vero sacrae Scripturae tractat de separatis primo modo, sicut de subjectis; quamvis in ea tractentur aliqua quae sunt in materia et motu, secundum quod requirit rerum divinarum manifestatio.

Ad primum igitur dicendum, quod ea quae non assumuntur in scientia nisi ad manifestationem aliorum, non pertinent per se ad scientiam, sed quasi per accidens: sic enim in mathematica quaedam naturalia assumuntur: et per hunc modum nihil prohibet in scientia divina esse quaedam quae sunt in materia et motu.

Ad secundum dicendum, quod moveri Deo non attribuitur proprie, sed metaphorice: et hoc dupliciter. Uno modo secundum quod improprie operatio intellectus vel voluntatis motus dicitur; et secundum hoc dicitur aliquis movere seipsum, quando intelligit et diligit se. Et per hunc modum potest verificari dictum Platonis, qui dicit, quod primus motor movet seipsum, quia scilicet intelligit et diligit se, ut Commentator dicit in 8 Physic. Alio modo secundum quod ipse effluxus causatorum a primis causis potest nominari processio sive motus quidam causae in causatum, in quantum in ipso effectu relinquitur similitudo causae; et sic causa quae prius erat in seipsa, postmodum fit in effectu per similitudinem suam. Et hoc modo Deus, qui suam similitudinem omnibus creaturis impartitus est, quantum ad aliquid per omnia moveri, vel ad omnia procedere dicitur: quo modo loquendi utitur frequenter Dionysius: et secundum hunc modum videtur intelligi quod dicitur Sap. 7, quod omnibus mobilibus mobilior est sapientia, et quod attingit a fine usque ad finem. Hoc autem non est proprie moveri; et ideo ratio non sequitur.

Ad tertium dicendum, quod scientia divina quae est per inspirationem divinam accepta, non est de Angelis sicut de subjecto, sed solum sicut de his quae assumuntur ad manifestationem subjecti. Sic igitur in sacra Scriptura agitur de Angelis, sicut et de ceteris creaturis; sed in scientia divina quam Philosophi tradunt, consideratur de Angelis, quos intelligentias vocant, eadem ratione qua et de causa prima, quae est Deus; in quantum scilicet ipsi etiam sunt principia secunda saltem per motum orbium: quibus nullus quidem motus physicus accidere potest; motus autem qui est secundum electionem, inducitur ad illum modum quo operatio voluntatis vel intellectus motus dicitur: quod est improprie dictum, sumpto motu quasi metaphorice. Motus autem quo dicuntur secundum locum moveri, non est secundum circumscriptionem localem, sed secundum operationem quae exercetur in hoc vel in illo loco, aut secundum aliquam aliam habitudinem quam habent ad locum, omnino aequivocam ad illam habitudinem quam habet corpus locatum ad locum. Et ideo patet quod eis non convenit motus secundum quod naturalia in motu esse dicuntur.

Ad quartum dicendum, quod actus et potentia sunt communiora quam materia et forma: et ideo in Angelis etsi non inveniatur compositio materiae et formae, potest tamen in eis inveniri potentia et actus. Materia enim et forma sunt partes compo-



siti ex materia et forma: et ideo in illis invenitur tantum compositio materiae et formae, quarum una pars se habet ad aliam ut potentia ad actum. Quod autem potest esse, potest etiam non esse; et ideo possibile est unam partem inveniri cum alia et sine alia: et ideo compositio materiae et formae non invenitur, secundum Commentatorem 1 Cael. et Mundi, et 7 Metaph., nisi in his quae sunt per naturam corporalia. Nec obstat quod aliquod accidens in aliquo subjecto perpetuo conservetur, sicut figura in caelo, cum tamen corpus caeleste impossibile sit esse sine tali figura: quia figura et omnia alia accidentia consequuntur substantiam sicut causam; et ideo subjectum se habet ad accidentia non solum ut potentia passiva, sed etiam quodammodo ut potentia activa; et ideo aliqua accidentia naturaliter perpetuantur in subjectis suis. Materia autem non est hoc modo subjectum formae; et ideo omnis materia quae subsistat alicui formae, potest etiam non subesse, nisi fortassis a causa extrinseca contineatur; sicut virtute divina ponimus aliqua corpora quae ex contrariis composita sunt, esse incorruptibilia, ut corpora resurgentium. Essentia autem Angeli secundum suam naturam est incorruptibilis: et ideo non est in eo compositio formae et materiae. Sed quia Angelus non habet esse a seipso, ideo se habet in potentia ad esse, quod accipit a Deo; et sic esse a Deo acceptum comparatur ad essentiam ejus simplicem, ut actus ad potentiam. Et hoc est quod dicitur, quod sunt compositi ex quo est et quod est; ut ipsum esse intelligatur quo est, ipsa vero natura Angeli intelligatur quod est. Tamen si ex materia et forma essent Angeli compositi, non tamen ex materia sensibili, a qua oportet mathematica esse abstracta et metaphysica separata.

Ad quintum dicendum, quod ens et substantia dicuntur esse separata a materia et motu, non propter hoc quod de ratione eorum sit esse sine materia et motu, sicut de ratione asini est sine ratione esse; sed propter hoc quia de ratione eorum non est in materia et motu esse, quamvis quandoque sint in materia et motu; sicut animal abstrahit a rationali, quamvis aliquod animal sit rationale.

Ad sextum dicendum, quod metaphysicus considerat etiam de singulis entibus, non secundum proprias rationes per quas sunt tale vel tale ens, sed secundum quod participant communem entis rationem; et sic etiam pertinet ad ejus considerationem materia et motus.

Ad septimum dicendum, quod agere et pati non convenit entibus secundum quod sunt in consideratione, sed secundum quod sunt in esse. Mathematicus autem considerat res abstractas in consideratione tantum; et ideo illae res prout cadunt in consideratione mathematici, non possunt esse principium et finis motus; et ideo mathematicus non demonstrat per causam efficientem et finalem. Res autem quas considerat Divinus, sunt separatae, existentes in rerum natura. Tales autem possunt esse principium et finis motus: unde nihil prohibet quin per causam efficientem et finalem demonstret.

Ad octavum dicendum, quod sicut fides, quae est quasi habitus theologiae, habet pro objecto ipsam veritatem primam, et tamen quaedam alia ad creaturas pertinentia in articulis fidei continen-

tur, in quantum contingit aliquo modo veritatem primam; per eundem modum theologia est principaliter de Deo sicut de subjecto; de creaturis autem multa assumit ut effectus ejus, vel quomodo libet habentia habitudinem ad ipsum.

## QUAESTIO VI.

### DE MODIS QUOS SPECULATIVAE SCIENTIAE ATTRIBUIT.

Deinde quaeritur de modis quos speculativae scientiae attribuit; et circa hoc quaeruntur quatuor.

Primo, utrum oporteat versari in naturalibus rationabiliter, et in mathematicis disciplinabiliter, et in divinis intelligibiliter.

Secundo, utrum in divinis sit omnino imaginatio relinquenda.

Tertio, utrum intellectus noster possit ipsam divinam formam inspicere.

Quarto, utrum hoc possit fieri per viam alicujus scientiae speculativae.

### ARTICULUS I.

*Utrum oporteat versari in naturalibus rationabiliter, in mathematicis disciplinabiliter, et in divinis intelligibiliter.*

Ad primum sic proceditur. 1. Videtur quod non oporteat in naturalibus rationabiliter versari. Philosophia enim rationalis contra naturalem dividitur. Sed rationabiliter procedere videtur ad rationalem pertinere proprie. Ergo inconvenienter attribuitur naturali.

2. Item. Philosophus frequenter in libris Physic. distinguit processus ad aliquas conclusiones rationales et physicas. Ergo non est proprium naturalis scientiae rationabiliter procedere.

3. Item. Quod commune est omnibus scientiis, non debet uni appropriari. Sed quaelibet scientia procedit ratiocinando, discurrendo, vel ex effectibus in causas vel ex causis in effectus, vel ex aliquibus signis. Ergo non debet naturali appropriari.

4. Item. Ratiocinativum contra scientificum dividitur in 6 Ethic. Sed scientia naturalis ad scientificum pertinet. Ergo ei non convenienter attribuitur procedere rationabiliter.

Sed contra est quod dicit Boetius 5 de Consolatione: « Ratio cum quid universale respicit, nec « imaginativa nec sensu utens, imaginabilia et « sensibilia tamen apprehendit. » Sed imaginabilia et sensibilia comprehendere ad solum naturalem pertinet. Ergo rationalis processus convenienter naturali attribuitur.

Item. Dicitur in lib. de Spir. et Anima, quod ratio circa formas corporum versatur. Sed considerare corpora maxime pertinet ad naturalem. Ergo rationabiliter procedere convenienter naturali.

1. Uterius videtur quod inconvenienter dicatur, mathematicam disciplinabiliter procedere. Disciplina enim nihil aliud videtur quam acceptio scientiae. Sed in qualibet parte philosophiae accipitur scientia, quia omnes demonstrative procedunt. Ergo procedere disciplinabiliter est commune omnibus partibus philosophiae; et ita non debet appropriari mathematicae.

2. Item. Quanto aliquid est certius, tanto faci-

lius videtur ut de eo sit disciplina. Sed naturalia sunt certiora, ut videtur, quam mathematica; quia capiuntur sensu, a quo omnis nostra cognitio oritur. Ergo hic modus convenit magis naturali, quam mathematico.

5. Item. Ut videtur 3 Metaph., initium scientiae est a quo fit facilior disciplina. Sed initium addiscendi accipitur a logica, quam oportet praecaddiscere mathematicae et omnibus aliis. Ergo disciplinalis modus magis convenit logicae.

4. Item. Modus scientiae naturalis et divinae assumitur a potentiis animae, scilicet a ratione et intellectu. Ergo similiter et mathematicus modus ab aliqua potentia animae assumi debet; et sic non convenienter ponitur modus ejus disciplinabiliter procedere.

Sed contra. Disciplinabiliter procedere est demonstrative procedere et per certitudinem. Sed ut dicit Ptolomaeus in principio Almagesti, solum mathematicum genus, si quis hinc diligentiam adhibeat, inquisitionis firmam stabilemque fidem intendentibus necessariam dabit, velut demonstratione per indubitabiles vias facta. Ergo disciplinabiliter procedere, maxime proprium est mathematicae.

Item. Hoc patet per Philosophum in pluribus locis librorum suorum, in quibus mathematicas scientias disciplinas vocat.

1. Ulterius videtur quod non sit conveniens modus divinae scientiae intelligibiliter procedere. Intellectus enim, secundum Philosophum, est principiorum, scientia conclusionum. Sed non omnia quae traduntur in scientia divina, sunt principia, sed quaedam etiam conclusiones. Ergo intellectualiter procedere non est conveniens scientiae divinae.

2. Item. In illis quae omnem intellectum excedunt, intellectualiter versari non possumus. Sed divina excedunt omnem intellectum, ut Dionysius dicit 1 cap. de div. Nom., et Philosophus in lib. de Causis. Ergo intellectualiter tractari non possunt.

3. Item. Dionysius, 7 cap. de div. Nomin., dicit, quod Angeli habent intellectualem virtutem, in quantum divinam cognitionem non congregant ex sensibilibus, aut a rebus divisis. Sed hoc est supra potestatem animae, ut ibidem dicitur. Cum igitur divina scientia de qua hic agitur, sit scientia humanae animae, videtur quod non sit proprius modus ejus tractare intellectualiter.

4. Item. Theologia praecipue videtur esse de his quae sunt fidei. Sed de his quae fidei sunt, intelligere est finis: Isai. 7, 9, secundum aliam litteram: « Nisi credideritis, non intelligetis: » Ergo hic modus non debet poni sicut modus theologiae, sed sicut finis.

Sed contra est quod dicitur lib. de Spiritu et Anima, quod intellectus est spirituum creatorum, intelligentia vero ipsius Dei. De his autem est praecipue scientia divina. Ergo intellectualiter procedere videtur esse ipsius proprium.

Item. Modus scientiae debet respondere materiae. Sed res divinae sunt res intelligibiles per seipsas. Ergo modus conveniens divinae scientiae est intellectualiter procedere.

Respondeo dicendum ad primam quaestionem, quod processus aliquis quo proceditur in scientiis, dicitur tripliciter rationalis. Uno modo ex parte principiorum quibus proceditur, ut cum aliquis procedit ad aliquid probandum ex operibus rationis; cuiusmodi sunt genus et species et oppositum, et

hujusmodi intentiones, quas logici considerant: et sic dicitur aliquis processus rationalis, quando aliquis utitur in aliqua scientia propositionibus quae traduntur in logica, prout scilicet utimur in logica, prout est docens in aliis scientiis. Sed hic modus procedendi non potest competere proprie alicui particulari scientiae, in quibus peccatum accidit, nisi ex propriis procedatur. Convenit autem haec proprie fieri in metaphysica et logica, eo quod utraque scientia communis est, et idem subjectum quodammodo habent. Alio modo dicitur processus rationalis ex termino in quo sistitur procedendo. Ultimus enim terminus ad quem rationis inquisitio perducere debet est intellectus principiorum, in quae resolvendo judicamus: quod quidem quando fit, non dicitur processus vel probatio naturalis, sed demonstratio. Quando autem inquisitio rationis usque in ultimum terminum non perducit, sed sistitur in ipsa inquisitione, quando scilicet quaerenti adhuc manet via ad utrumlibet ( et hoc contingit quando per probabiles rationes proceditur, quae natae sunt facere opinionem et fidem, non autem scientiam ) sic rationalis processus distinguitur contra demonstrativum. Et hoc modo procedi potest rationabiliter in qualibet scientia, ut ex probabilibus paretur via ad necessarias conclusiones: et hic est alius modus logicae, quo logica utitur in scientiis demonstrativis, non quidem ut est docens, sed ut utens: et his duobus modis denominatur processus rationalis a scientia nostra: his enim duobus utitur logica, quae rationis dicitur scientia, in scientiis demonstrativis. ut dicit Commentator 1 Physic. Tertio modo dicitur aliquis modus rationalis a potentia rationali, in quantum scilicet procedendo sequitur proprium modum animae rationalis in cognoscendo; et sic rationalis processus est proprius scientiae naturalis. Scientia enim naturalis in suis processibus servat proprium modum rationalis animae quantum ad duo. Primo quantum ad hoc quod sicut anima rationalis a sensibilibus quae sunt magis nota quod ad nos, accipit cognitionem intelligibilem, quae sunt magis nota secundum naturam, ut patet 1 Physic.; ita scientia naturalis procedit ex his quae sunt nota magis quo ad nos, et minus nota secundum naturam: et demonstratio quae est per signum vel per effectum, magis usitatur in scientia naturali. Secundo, quia habet id quod est proprium rationis, sicut est de uno in aliud discurre: et hoc magis in scientia naturali servatur, ubi ex cognitione unius in cognitionem alterius devenitur, sicut ex cognitione effectus in cognitionem causae. Et non proceditur solum ab uno in aliud secundum rationem, quod non est aliud secundum rem, sicut si ab animali proceditur ad hominem. In scientiis enim mathematicis proceditur per ea tantum quae sunt de essentia rei, cum demonstrent solum per causam formalem: et ideo non demonstratur in eis aliquid de una re per aliam rem, sed per propriam definitionem illius rei. Etsi enim demonstrentur aliquae demonstrationes de circulo ex triangulo, vel e converso, hoc non est nisi in quantum in circulo est potentia triangulus, et e converso. Sed in scientia naturali, in qua fit demonstratio per causas extrinsecas, probatur aliquid de una re per aliam omnino extrinsecam: et ita modus rationalis in scientia naturali maxime observatur; et ideo scientia naturalis inter alias est intellectui hominis

magis conformis. Attribuitur igitur rationabiliter procedere scientiae naturali, non quia ei soli conveniat, sed quia ei praecipue competit.

Ad primum igitur dicendum, quod ratio illa procedit de processu qui dicitur rationalis secundum primum modum: sic enim rationalis modus proprius est rationali scientiae et divinae, non autem naturali.

Ad secundum dicendum, quod ratio illa procedit de processu illo qui dicitur rationalis secundo modo.

Ad tertium dicendum, quod in omnibus scientiis servatur quantum ad hoc modus rationis, quod procedatur de uno in aliud secundum rationem, non autem quod procedatur de una re in aliam; sed hoc est proprium naturalis scientiae, ut dictum est.

Ad quartum dicendum, quod Philosophus ibi pro eodem ponit ratioeicativum et opinativum: unde patet quod pertinet ad secundum modum assignatum. Ratioeicativo vero vel opinativo attribuit Philosophus ibidem agibilia humana, de quibus est scientia moralis ratione suae contingentiae. Unde potest ex dictis colligi, quod primus modus rationabilitatis est maxime proprius scientiae rationali, secundus morali, tertius naturali.

Ad secundam quaestionem dicendum, quod procedere disciplinabiliter attribuitur mathematicae, non quia ipsa sola disciplinabiliter procedat, sed quia ei praecipue competit. Cum igitur discere nihil aliud sit quam ab alio scientiam accipere, tunc dicimur procedere disciplinabiliter, quando processus noster ad certam cognitionem perducit, quae scientia dicitur: quod quidem contingit in mathematicis scientiis. Cum enim mathematica sit media inter naturalem et divinam, ipsa est utraque certior. Naturali quidem, quia ejus consideratio est a motu et a materia absoluta; cum naturalis consideratio in materia et motu versetur. Ex hoc autem quod consideratio naturalis est circa materiam, a pluribus dependet; scilicet a consideratione materiae et formae, et dispositionum materialium, et proprietatum quae consequuntur formam in materia. Ubicumque autem ad aliquid cognoscendum oportet considerare plura, est difficilior cognitio: unde in 1 Posteriorum dicitur, quod minus certa scientia est quae est ex additione, ut geometria ad arithmeticeam. Ex hoc vero quod ejus consideratio est circa res mobiles, et quae non uniformiter se habent; ejus cognitio est minus firma, quia ejus demonstrationes ut in majori parte sunt ex hoc quod contingit aliquando aliter se habere; et ideo quando aliqua scientia magis appropinquat ad singularia, sicut scientiae operativae, ut medicina, alchimia et moralis, minus possunt habere de certitudine propter multitudinem eorum quae consideranda sunt in talibus scientiis, quorum quodlibet si omittatur, frequenter erratur; et propter eorum variabilitatem. Est autem processus mathematicus certior quam processus divinae scientiae, quia ea de quibus est scientia divina, sunt magis a sensibus remota, a quibus nostra cognitio ortum sumit, et quantum ad substantias separatas, in quarum cognitionem insufficienter inducunt ea quae a sensibus accipiuntur, et quantum ad ea quae sunt communia omnibus entibus, quae sunt maxime universalis, et sic maxime remota a particularibus cadentibus sub sensu. Mathematica autem ipsa sub sensu cadunt, et imaginationi subjacent, ut linea, figura, numerus et hujusmodi; et ideo

intellectus humanus a phantasmatibus accipiens, facilius eorum cognitionem accipit et certius quam intelligentiae alicujus, vel etiam quidditatem substantiae, potentiam et actum et hujusmodi. Et sic patet quod mathematica consideratio est facilior et certior quam naturalis et theologica, et multo plus quam aliae scientiae operativae: et ideo ipsa maxime dicitur disciplinabiliter procedere; et hoc est quod dicit Ptolomaeus in principio Almagesti: « Alia duo genera theoriei potius quis opinionem quam conceptionem scientialem dicat: Theologum quidem propter inapparens ejus et incomprehensibile; physicum vero propter materiae instabile et immanifestum. Solus autem mathematicus inquisitionis firmam stabilemque fidem intendentibus dabit, velut utique demonstrationes per indubitabiles rationes manifestans. »

Ad primum ergo dicendum, quod quamvis in qualibet scientia disciplina accipiatur, tamen in mathematicis facilius et certius, ut dictum est.

Ad secundum dicendum, quod quamvis naturalia sensui subjacent, non tamen propter sui fluxibilitatem habent magnam certitudinem, cum extra sensum fiunt, sicut habent mathematica, quae sunt extra motum in materia secundum esse, et sic sub sensu et imaginatione cadere possunt.

Ad tertium dicendum, quod in addiscendo incipimus ab eo quod est magis facile, nisi necessitas aliud requirat: quandoque enim necesse est in addiscendo non incipere ab eo quod est facilius, sed ab eo a cujus cognitione cognitio sequentium dependet: et hae positione oportet in addiscendo a logica incipere: non quia ipsa sit facilior scientiis ceteris, habet enim maximam difficultatem, cum sit de secundo intellectis; sed quia aliae scientiae ab ipsa dependent, inquantum ipsa docet modum procedendi in omnibus scientiis. Oportet enim primo scire modum scientiae quam scientiam ipsam, ut dicitur 2 Metaph.

Ad quartum dicendum, quod a potentiis animae sumitur modus scientiarum propter modum quem habent potentiae animae in agendo. Unde modi scientiarum non respondent potentiis animae, sed modis quibus potentiae animae procedere possunt; qui non solum diversificantur penes potentias tantum, sed etiam penes objecta; et sic non oportet quod modus cujuslibet scientiae denominetur ab aliqua potentia animae. Potest tamen dici, quod sicut modus physicae denominatur a ratione, secundum quod a sensu accipit, modus autem scientiae divinae ab intellectu, secundum quod in Deo aliquid considerat; ita etiam modus mathematicae attenditur secundum quod accipit ab imaginatione.

Ad tertiam quaestionem dicendum, quod sicut rationabiliter procedere attribuitur naturali philosophiae, quia in ipsa observatur maxime modus rationis; ita intellectualiter procedere attribuitur divinae scientiae, eo quod in ipsa observatur maxime modus intellectus. Differt autem ratio ab intellectu, sicut multitudo ab unitate: unde dicit Boetius 6 de Consol., quod similiter se habet ratio ad intellectum, sicut tempus ad aeternitatem et circulus ad centrum. Est enim rationis proprium circa multa diffundi, et ex eis unam simplicem cognitionem colligere: unde dicit Dionysius 7 cap. de div. Nomin., quod animae secundum quod habent rationabilitatem, diffusive circumeunt veritatem, et in hoc deficiunt ab Angelis; sed inquantum convolvunt



multa ad unum, quodammodo Angelis aequantur. Intellectus autem e converso per prius unam et simplicem veritatem considerat, et in illa totius multitudinis cognitionem capit: sicut Deus intelligendo suam essentiam omnia cognoscit: unde Dionysius dicit ibidem, quod Angelorum mentes habent intellectualitatem, in quantum uniformiter intelligibilia divinorum intelligunt. Sic igitur patet quod rationalis consideratio ad intellectualem terminatur secundum viam resolutionis, in quantum ex multis ratio colligit unam et simplicem veritatem: et rursus intellectualis consideratio est principium rationalis secundum viam compositionis et inventionis, in quantum intellectus in uno multa comprehendit. Illa igitur consideratio, que est terminus totius humane ratiocinationis, maxime est intellectualis consideratio. Tota autem rationis consideratio resolventis in omnibus scientiis, ad cognitionem divinæ scientiæ terminatur. Quandoque enim (1) ratio, ut prius est dictum, procedit de uno in aliud secundum rem, ut quando est demonstratio per causas, vel per effectus extrinsecos; componendo quidem proceditur a causis ad effectum, quasi resolvendo, cum proceditur ab effectibus ad causas, eo quod causæ sunt effectibus simpliciores, et magis immobiliter et uniformiter permanentes, resolvendo autem quando e converso (2). Ultimus igitur terminus resolutionis in hac via est cum pervenitur ad causas supremas maxime simplices, quæ sunt substantiæ separatae. Quandoque vero proceditur de uno in aliud secundum rationem, ut quando est processus secundum causas intrinsecas: componendo quidem, quando a formis maxime universalibus in magis particularia proceditur; resolvendo autem, quando e converso, eo quod universalis est simplicius. Maxime autem universalis sunt quæ sunt communia omnibus entibus: et ideo terminus resolutionis in hac via ultimus est consideratio entis, et eorum quæ sunt entis in quantum huiusmodi. Hæc autem sunt de quibus divina scientia considerat, ut supra dictum est; substantiæ scilicet separatae, et communia omnibus entibus. Unde patet quod sua consideratio est maxime intellectualis. Et inde etiam est quod ipsa largitur principia omnibus aliis scientiis, in quantum intellectualis consideratio est principium rationalis, propter quod dicitur prima philosophia: et nihilominus ipsa addiscitur post physicam et ceteras scientias, in quantum intellectualis consideratio est terminus rationalis: propter quod dicitur metaphysica quasi transphysica, quia post physicam resolvendo occurrit.

Ad primum igitur dicendum, quod intellectualiter procedere non attribuitur scientiæ divinæ, quasi non ipsa ratiocinetur procedendo de principiis ad conclusiones; sed quia ejus ratiocinatio est intellectuali considerationi propinquissima, et conclusiones ejus principiis.

Ad secundum dicendum, quod Deus est supra intellectum omnem creatum quantum ad comprehensionem, non autem supra intellectum increatum, cum ipse seipsum intelligendo comprehendat. Est vero supra omnem intellectum viatoris quantum ad cognitionem qua cognoscitur quid est, non autem ad cognitionem qua cognoscitur an est. A beatis

autem cognoscitur etiam quid est, quia vident ejus essentiam. Et tamen scientia divina non est solum de Deo, sed etiam de aliis quæ intellectum humanum etiam secundum statum viæ non excedunt, quantum ad quid est cognoscendum de ipsis.

Ad tertium dicendum, quod, sicut supra dictum est, humana cognitio vel consideratio quantum ad sui terminum pertingit quodammodo ad angelicam cognitionem, non secundum aequalitatem, sed secundum quamdam assimilationem: unde dicit Dionysius, 7 cap. de divin. Nom., quod « animæ multorum ad unum convolutione ex intellectibus aequalibus Angelis, in quantum animabus est proprium et possibile, sunt dignæ habitæ. »

Ad quartum dicendum, quod cognitio etiam fidei maxime pertinet ad intellectum. Non enim eam rationis investigatione accipimus, sed simplici acceptione intellectus ei assentimur. Dicimur autem ea non intelligere, in quantum intellectus plenam eorum cognitionem non habet: quod quidem nobis in præmium repromittitur.

## ARTICULUS II.

*Utrum in divinis sit omnino imaginatio relinquenda.*

Ad secundum sic proceditur. 1. Videtur quod in divinis oporteat ad imagines deduci. Scientia enim divina nunquam competentius traditur quam in sacra Scriptura. Sed in sacra Scriptura in divinis deducimur ad imagines, dum divina nobis sub figuris sensibilibus describuntur. Ergo oportet in divinis ad imaginationes deduci.

2. Item. Divina non capiuntur nisi in intellectu; unde et in eis intellectualiter versari oportet, ut dictum est. Sed non est intelligere sine phantasmate, ut dicit Philosophus 1 et 3 de Anima. Ergo in divinis oportet ad imaginationes deduci.

3. Item. Divina nobis maxime innotescunt per illustrationem divini radii. Sed, sicut dicit Dionysius 1 cap. caelest. Hierarch., « impossibile est nobis aliter superlucere divinum radium, nisi varietate sacrorum velaminum circumvelatum; » et sacra velamina vocat sensibilibus imagines. Ergo in divinis oportet ad imaginationes deduci.

4. Item. Circa sensibilia oportet imaginabiliter versari. Sed divinorum cognitionem ex sensibilibus effectibus accipimus, secundum illud Rom. 1, 20: « Invisibilia Dei a creatura mundi per ea quæ facta sunt, intellecta conspiciuntur: sempiterna quoque ejus virtus et divinitas. » Ergo in divinis oportet ad imagines deduci.

5. Item. In cognoscitivis maxime regulamur per id quod est cognitionis principium, sicut in naturalibus per sensum, a quo nostra cognitio incipit. Sed principium intellectualis cognitionis in nobis est imaginatio, cum phantasmata hoc modo compareant ad intellectum nostrum sicut colores ad visum, ut dicitur 3 de Anima. Ergo in divinis oportet ad imagines deduci.

6. Item. Cum intellectus non utatur organo corporali ex læsione organi corporalis, non impeditur actio intellectus, nisi quatenus ad imaginationem convertitur. Sed per læsionem organi corporalis, scilicet cerebri, impeditur intellectus in consideratione divinorum. Ergo intellectus divina considerans, ad imagines deducitur.

Sed contra est quod dicit Dionysius 1 cap.

(1) *At.* quandoquidem.

(2) *Forte* resolvendo autem quando e converso proceditur ab effectibus ad causas . . . permanentes. Ultimus etc.



mysticae Theologiae ad Timotheum loquens: « Tu (inquit) o amice Timothee, circa mysticas visiones sensus derelinque. » Sed imaginatio non est nisi sensibilem, cum sit motus factus a sensu secundum actum, ut dicitur 2 de Anima. Ergo cum divinorum considerationes sint maxime mysticae, in eis non debemus ad imagines deduci.

Item. In cuiuslibet scientiae consideratione vitandum est id quod errorem facit in ea. Sed, sicut dicit Augustinus in lib. de Trinitate, primus error circa divina est eorum qui ea quae de corporibus noverunt, ad res divinas transferre conantur. Cum ergo imaginatio non sit nisi corporalium rerum, videtur quod non debeamus ad imagines deduci.

Item. Virtus inferior non se extendit ad id quod superioris est proprium, ut patet per Boetium 5 de Consolatione. Sed cognoscere divina et spiritualia ad intellectum pertinet, et ad intelligentiam, ut dicitur in lib. de Spiritu et Anima. Cum igitur, ut ibi dicitur, imaginatio sit infra intelligentiam et intellectum, videtur quod in divinis et spiritualibus non debeamus ad imaginationes deduci.

Respondeo dicendum, quod in qualibet cognitione duo est considerare: scilicet principium et finem, sive terminum. Principium quidem ad apprehensionem pertinet, terminus autem ad iudicium; ibi enim cognitio perficitur. Principium igitur cuiuslibet nostrae cognitionis est in sensu, quia ex apprehensione sensus oritur apprehensio phantasiae quae est motus a sensu factus, ut dicit Philosophus: a qua iterum oritur apprehensio intellectiva in nobis, cum phantasmata sint intellectivae animae ut objecta, ut dicitur 5 de Anima. Sed terminus cognitionis non semper est uniformiter: quandoque enim est in sensu, quandoque in imaginatione, quandoque in solo intellectu. Quandoque enim proprietates et accidentia rei quae sensu demonstrantur, sufficienter exprimunt naturam rei; et tunc oportet quod iudicium de re vera, quod facit intellectus, conformetur his quae sensus demonstrat de re: et huiusmodi sunt omnes res naturales, quae sunt determinatae ad materiam sensibilem; et ideo in scientia naturali terminari debet cognitio ad sensum, ut scilicet hoc modo iudicemus de rebus naturalibus secundum quod sensus ea demonstrat, ut patet 5 Caeli et Mundi; et qui sensum negligit in naturalibus, incidit in errorem. Et haec sunt naturalia quae sunt concreta cum materia sensibili et motu et secundum esse et secundum considerationem. Quaedam vero sunt quorum iudicium non dependet ex his quae sensu percipiuntur; quia quamvis secundum esse sint in materia sensibili, tamen secundum definitivam rationem sunt a materia sensibili abstracta. Iudicium autem potissimum de unaquaque re fit secundum eius definitivam rationem. Sed quia secundum definitivam rationem non abstrahunt a qualibet materia, sed solum a sensibili; et remotis conditionibus sensibilibus, adhuc remanet aliquid imaginabile; ideo in talibus oportet quod iudicium sumatur secundum id quod demonstrat imaginatio. Huiusmodi autem sunt mathematica. In mathematicis enim oportet cognitionem secundum iudicium terminari ad imaginationem, non ad sensum, quia iudicium mathematicum superat apprehensionem sensus: unde non est idem iudicium quandoque de linea mathematica quod est de sensibili; sicut in hoc quod linea recta tangit sphaeram solum secundum pun-

S. Th. Opera omnia. V. 17.

etum: quod convenit rectae (1) lineae separatae, non autem rectae lineae in materia, ut dicitur in 1 de Anima. Quaedam vero sunt quae excedunt et id quod cadit sub sensu, et id quod cadit sub imaginatione; sicut illa quae omnino a materia non dependent neque secundum esse neque secundum considerationem: et ideo talium cognitio secundum iudicium non debet terminari ad imaginationem neque ad sensum. Sed tamen ex his quae sensu vel imaginatione comprehenduntur, in horum cognitionem devenimus: vel per viam causalitatis; ut cum ex effectu causam cognoscimus, quae non est effectui commensurata, sed excellens: vel per excessum, vel per remotionem, quando omnia quae sensus vel imaginatio apprehendit, ab huiusmodi rebus separamus: quo modos cognoscendi divina ex sensibilibus ponit Dionysius lib. de divinis Nominibus. Uti ergo possumus in divinis sensu et imaginatione sicut principiis nostrae considerationis, sed non sicut terminis; ut scilicet talia iudicemus esse divina, qualia sunt quae sensus et imaginatio apprehendit. Deduci autem ad aliquid est ad illud terminari; et ideo in divinis neque ad sensum neque ad imaginationem debemus deduci: in mathematicis autem ad imaginationem, et non ad sensum; in naturalibus autem etiam ad sensum. Et propter hoc peccant qui uniformiter in tribus speculativae partibus procedere nituntur.

Ad primum igitur dicendum, quod sacra Scriptura non proponit nobis divina sub figuris sensibilibus ut intellectus noster ibi maneat, sed ut ab his ad invisibilia ascendat: unde etiam per vilium rerum figuras tradit, ut minor praebeatur in talibus occasio remanendi, ut Dionysius dicit 2 cap. caelest. Hierarch.

Ad secundum dicendum, quod intellectus nostri operatio non est in praesenti statu sine phantasmate quantum ad principium cognitionis; non tamen oportet ut semper nostra cognitio ad phantasmata terminetur; ut scilicet illud quod apprehendimus, iudicemus esse tale quale est phantasma per quod apprehendimus.

Ad tertium dicendum, quod auctoritas illa Dionysii loquitur quantum ad principium cognitionis, non quantum ad terminum ad quem ex effectibus sensibilibus venimus tribus modis praedictis, scilicet in cognitionem divinorum; non autem ita quod oporteat iudicium formari de divinis secundum modum quem habent ipsi sensibiles effectus.

Ad quartum dicendum, quod ratio procedit quando principium cognitionis est sufficienter ducens in id cuius cognitio quaeritur; et sic est principium sensus in naturalibus, non autem in divinis, ut dictum est.

Ad quintum dicendum, quod phantasma est principium nostrae cognitionis, ut ex quo incipit intellectus operatio, non sicut transiens, sed sicut permanens, ut quoddam fundamentum intellectualis operationis; sicut principia demonstrationis oportet manere in omni processu scientiae, cum phantasmata comparentur ad intellectum ut objecta, in quibus inspicit omne quod inspicit, vel secundum perfectam repraesentationem, vel secundum negationem. Et ideo quando phantasmatum cognitio impeditur, oportet totaliter impedi cogitationem intellectus in divinis. Patet enim quod non possu-

(1) *Al. omittitur rectae lineae.*

mus intelligere Deum causam corporum esse, sive supra omnia corpora, sive absque corporeitate, nisi imaginemur corpora; non tamen iudicium divinorum secundum imaginationem formatur. Et ideo quamvis imaginatio in qualibet divinorum cognitione sit necessaria secundum statum viae, nunquam tamen ad eam deduci oportet in divinis (1).

### ARTICULUS III.

*Utrum intellectus noster possit ipsam divinam formam inspicere.*

Ad tertium sic proceditur. 1. Videtur quod non possumus ipsam formam divinam, ad minus in statu viae, inspicere. Dicit enim Dionysius in prima epistola ad Cajum: « Si aliquis videns Deum intellexit quod vidit, non ipsum vidit, sed aliquid eorum quae sunt ejus, quae existunt et cognoscuntur. » Sed forma divina est ipse Deus. Ergo non possumus ipsius formam divinam inspicere.

2. Item. Forma divina est ipsa divina essentia. Sed Deum per essentiam nemo in statu viae videre potest. Ergo nec ejus formam inspicere.

3. Item. Quicumque inspicit formam alicujus rei, aliquid de ipsa re cognoscit. Sed secundum Dionysium, 1 cap. mysticae Theologiae, intellectus noster secundum quod melius potest Deo unitur, quando ejus nihil omnino cognoscit. Ergo non possumus divinam formam inspicere.

4. Item. Sicut dictum est, totius nostrae cognitionis principium est a sensu. Sed ea quae per sensum cognoscimus, non sunt sufficientia ad demonstrandum formam Dei, nec etiam aliquarum substantiarum separatarum. Ergo non possumus ipsam divinam formam inspicere.

5. Item. Secundum Philosophum 2 Metaph., intellectus noster se habet ad rerum manifestissima sicut oculus noctuae ad solem. Sed oculus noctuae nullo modo potest videre solem. Ergo intellectus noster nec formam divinam, nec alias formas separatas, quae sunt naturae manifestissimae.

Sed contra est quod dicitur Rom. 1, 20: « Invisibilia Dei a creatura mundi per ea quae facta sunt, intellecta conspiciuntur: sempiterna quoque ejus virtus et divinitas. » Nihil autem aliud est forma divina quam ipsa Deitas. Ergo ipsam formam divinam cognoscere intellectu aliquo modo possumus.

Item. Genes. 32, 30, super illud, « Vidi Dominum facie ad faciem, » dicit Glossa Gregorii: « Nisi homo illam (scilicet veritatem divinam) utrumque conspiceret, non eam conspicere se non posse sentire. » Sed nos sentimus divinam essentiam non posse perfecte cognoscere. Ergo aliquo modo ipsam conspiciamus.

Item. Dionysius 2 cap. caelest. Hierarch., dicit, quod humanus animus assuescit extendi per visibilia in supermundanas altitudines, quae nihil aliud sunt quam formae separatae. Ergo formas separatas possumus aliquo modo cognoscere.

Respondeo dicendum, quod dupliciter aliquid cognoscitur. Uno modo dum scitur de eo an est; alio modo, dum scitur de eo quid est. Ad hoc autem quod de re aliqua sciamus quid est, oportet quod intellectus noster feratur in ipsius rei quiddi-

tatem sive essentiam, vel immediate, vel median-  
tibus aliquibus quae sufficienter ejus quidditatem demonstrant. Immediate autem ferri non potest intellectus noster secundum statum viae in essentiam divinam et alias separatas essentias, quia immediate extenditur ad phantasmata, ad quae comparatur sicut visus ad colorem, ut dicitur 5 de Anima; et sic immediate potest concipere intellectus quidditatem rei sensibilis, non autem alicujus rei intellectualis; unde dicit Dionysius 2 caelest. Hierarch., quod nostra analogia non valet immediate extendi in invisibiles contemplationes. Sed quaedam invisibilia sunt, quorum quidditas et natura perfecte exprimitur ex quidditatibus rerum sensibilium notis; et de talibus intelligibilibus possumus scire quid est, sed mediate; sicut ex hoc quod scitur quid est homo et quid est animal, sufficienter innotescit habitudo unius ad alterum; et ex hoc scitur quid est genus et quid est species. Naturae autem sensibiles intellectae non sufficienter exprimunt divinam essentiam, neque etiam aliquas essentias separatas, cum non sint unius generis, naturaliter loquendo; et quidditas, et omnia hujusmodi nomina fere aequivoce dicuntur de sensibilibus, et de illis substantiis. Unde similitudines rerum sensibilium ad substantias immateriales translatae vocat Dionysius, 2 cap. cael. Hierar., dissimiles simulationes, alio modo intellectualibus habentibus quae aliquo modo sensibilibus distributa sunt; et sic per viam similitudinis non sufficienter illae substantiae ex his innotescunt. Neque etiam per viam causalitatis; quia illa quae ab illis substantiis inventantur effecta in his inferioribus, non sunt effectus adaequantes eorum virtutes, ut sic perveniri possit ad sciendum quod quid est de causa. Unde de substantiis illis immaterialibus secundum statum viae nullo modo possumus scire quid est, non solum per viam naturalis cognitionis, sed nec etiam per viam revelationis: quia divinae revelationis radius ad nos pervenit secundum modum nostrum, ut Dionysius dicit. Quamvis enim per revelationem elevemur ad aliquid cognoscendum, quod alias esset nobis ignotum; non tamen ad hoc quod alio modo cognoscemus nisi per sensibilia: unde Dionysius, 1 cap. cael. Hierarch., dicit, quod impossibile est nobis aliter superlucere divinum radium, nisi circumvelatum varietate sacerorum velaminum. Via autem quae est per sensibilia non sufficit ad ducendum in substantias supernaturales secundum cognitionem quid est. Et sic restat quod formae immateriales non sunt nobis notae cognitione quid est, sed solum cognitione an est, sive naturali ratione ex effectibus creaturarum, sive etiam ex revelatione quae est per similitudines a sensibilibus sumptas.

Est tamen sciendum, quod de nulla re potest sciri an est, nisi quoquo modo de ea sciatur quid est, vel cognitione perfecta, vel cognitione confusa. Unde dicit Philosophus, 1 Physic., quod definita sunt praecognita partibus definitionis. Oportet enim scientem hominem esse et quaerentem quid est homo, per definitionem, scire quid hoc nomen « homo » significat. Nec hoc esset aliquo modo nisi aliquam rem conciperet quam sciret esse, quamvis nesciat ejus definitionem. Concipit enim hominem secundum cognitionem alicujus generis proximi vel remoti, et aliquorum accidentium quae extra apparent de ipso. Oportet enim definitionum cognitio-

(1) Solutio ad sextum in priore ad quintum satis continetur.

nem, sicut et demonstrationum, ex aliqua praecexistenti cognitione initium sumere. Sic ergo de Deo et de aliis substantiis immaterialibus non possemus scire an est, nisi sciremus quodammodo de eis quid est sub quadam confusione. Hoc autem non potest esse per cognitionem alicujus generis proximi vel remoti, eo quod Deus in nullo genere est, cum non habeat quod quid est aliud a suo esse, quod requiritur in omnibus generibus, ut dicit Avicenna. Aliae autem substantiae immateriales creatae (1) sunt quidem in genere. Et quamvis logice considerando conveniant cum istis sensibilibus in genere remoto, quod est substantia; naturaliter tamen loquendo non conveniunt in eodem genere, sicut nec etiam corpora caelestia cum istis inferioribus. Corruptibile enim et incorruptibile non sunt ejusdem generis, ut dicitur 10 Metaph.: logice enim considerat absolute intentiones, secundum quas nihil prohibet convenire materialia immaterialibus et incorruptibilia corruptibilibus. Sed naturalis et philosophus primus considerant essentias secundum quod habent esse in rebus; et ideo ubi inveniunt diversum modum potentiae et actus, et per hoc diversum modum essendi, dicunt esse diversa genera. Similiter etiam Deus non habet aliquod accidens, ut infra probabitur. Aliae vero immateriales substantiae si habent aliqua accidentia, non sunt nobis nota; et ideo non possumus cognoscere, quod confusa cognitione cognoscantur a nobis substantiae immateriales per cognitionem generis et apparentium accidentium; sed loco cognitionis generis habemus in istis substantiis cognitionem per negationem, ut cum scimus quod hujusmodi substantiae sunt immateriales et incorporeae, non habentes figuras, et alia hujusmodi. Et quanto plures negationes de ipsis cognoscimus, tanto minus est confusa earum cognitio in nobis; eo quod per negationes sequentes prior negatio contrahitur et determinatur, sicut genus remotum per differentias. Unde etiam corpora caelestia, in quantum sunt alterius generis ab istis inferioribus, a nobis ut plurimum per negationes cognoscuntur, utpote quia neque sunt gravia neque sunt levia, neque calida neque frigida. Loco autem accidentium habemus in praedictis substantiis habitudines earum ad substantias sensibiles, vel secundum comparisonem causae ad effectum, vel secundum comparisonem excessus. Ita ergo de formis immaterialibus cognoscimus an est, et habemus de eis loco cognitionis quid est, cognitionem per negationem (2), per causalitatem et per excessum: quos etiam modos Dionysius ponit in lib. de divinis Nominibus. Et hoc modo Boetius intelligit inspiciendam divinam formam per remotionem omnium phantasmatum; non ut sciatur de ea quid est.

Et per haec patet solutio ad objecta: quia primae rationes procedunt de cognitione quid est perfecta; aliae vero de cognitione imperfecta, qualis dicta est.

(1) *Al. creaturae.*

(2) *Al. deest per negationem.*

## ARTICULUS IV.

*Utrum hoc possit per viam alicujus scientiae speculativae.*

Ad quartum sic proceditur. 1. Videtur quod ad formam Dei inspiciendam per scientias speculativas perveniri possit. Theologia enim pars est scientiae speculativae, ut hic Boetius dicit. Sed ad theologiam pertinet ipsam formam divinam inspicere, ut hic dicitur. Ergo ad cognoscendam divinam formam potest perveniri per scientias speculativas.

2. Item. De substantiis immaterialibus in aliqua scientia speculativa determinatur, quia in scientia divina. Sed quaecumque scientia determinat de aliqua substantia, inspicit formam; et omnis demonstrationis principium, secundum Philosophum, est quod quid est. Ergo inspicere formas separatas possumus per scientias speculativas.

3. Item. Ultima felicitas hominis secundum Philosophum consistit in intelligendo substantias separatas. Cum enim felicitas sit operatio perfectissima, oportet quod sit optimorum sub intellectu eadentium, ut potest accipi ex Philosopho in 10 Ethicor. Est enim felicitas illa de qua philosophi loquuntur, operatio a sapientia procedens, cum sapientia sit perfectissima virtus perfectissimae potentiae, scilicet intellectus; et haec operatio est felicitas, ut dicitur 10 Ethicor. Ergo per sapientiam intelliguntur substantiae separatae. Sed sapientia est scientia quaedam speculativa, ut patet in principio Metaphys. et in 6 Ethicor. Ergo per scientias speculativas possumus intelligere substantias separatas.

4. Item. Frustra est quod non potest pertinere ad finem propter quem est. Sed omnium scientiarum speculativarum consideratio ordinatur sicut ad finem in cognitionem substantiarum separatarum, quia perfectissimum in quolibet genere est finis. Ergo si per scientias speculativas hujusmodi substantiae intelligi non possent, omnes scientiae essent frustra; quod est inconveniens.

5. Item. Omne quod ordinatur naturaliter in finem aliquem, habet praeindita aliqua principia, quibus potest pervenire in illum finem: naturalium enim motionum principium est natura. Sed homo naturaliter est ordinatus ad cognitionem substantiarum immaterialium sicut ad finem, ut a sanctis Prophetis et philosophis traditur. Ergo habet in se aliqua principia illius cognitionis naturaliter indita. Sed omne illud in quod possumus devenire ex principiis naturaliter notis, pertinet ad considerationem alicujus scientiae speculativae. Ergo cognitio substantiarum immaterialium (1) ad aliquas scientias speculativas pertinet.

Sed contra est quod Commentator dicit 3 de Anima, quod ad hanc positionem sequitur vel quod scientiae speculativae nondum sint perfectae, cum illae scientiae nondum sint inventae quibus possumus substantias separatas intelligere: et hoc si contingat ex ignorantia aliquorum principiorum, quod nondum substantias praedictas intelligamus; vel si contingat ex defectu nostrae naturae, quod non possumus scientias illas invenire; sequitur quod si aliqui nati sunt hujusmodi scientias invenire, quod nos et ipsi aequivoce simus homines: quorum primum est improbabile, secundum impossibile.

(1) *Al. materialium.*



Ergo non potest hoc esse per aliquas scientias speculativas, quod hujusmodi substantias intelligamus.

Item. In scientiis speculativis investigantur definitiones, quibus rerum essentiae intelliguntur, per viam divisionis (1) generis in differentias, et per investigationem causarum rei et accidentium ipsius, quae magnam partem conferunt ad cognoscendum quod quid est. Sed sic (2) non possumus de substantiis immaterialibus cognoscere: quia, ut dictum est, naturaliter loquendo, non conveniunt in genere cum istis sensibilibus substantiis nobis notis: causam autem vel non habent, ut Deus, vel est nobis occultissima, sicut causa Angelorum: accidentia etiam ipsorum sunt nobis ignota. Ergo non potest aliqua scientia speculativa esse per quam veniamus ad intelligendum substantias immateriales.

Item. In scientiis speculativis rerum essentiae per definitionem cognoscuntur. Definitio autem est sermo quidam compositus ex genere et differentiis substantiarum. At (3) illarum essentiae sunt simplices, nec incidit in earum quidditatibus aliqua compositio, ut habetur per Philosophum et Commentatorem 9 Metaph. Ergo per scientias speculativas non possumus praedictas substantias intelligere.

Respondeo dicendum, quod in scientiis speculativis semper proceditur ex aliquo prius noto tam in demonstrationibus conclusionum, quam in inventionibus etiam definitionum. Sicut enim ex propositionibus praecognitis aliquis devenit in cognitionem conclusionis; ita ex conceptione generis et differentiae et causarum rei aliarum devenit in cognitionem speciei. Hoc autem non est possibile in infinitum procedere: quia sic omnis scientia periret et quantum ad demonstrationes et quantum ad definitiones, cum infinita non sit pertransire. Unde omnis consideratio scientiarum speculativarum reducitur in aliqua principia: quae quidem homo non habet necesse addiscere aut invenire, ne oporteat in infinitum procedere; sed eorum notitiam naturaliter habet: et hujusmodi sunt principia demonstrationum indemonstrabilia, ut est « Omne totum est majus sua parte », et hujusmodi, in quae omnes demonstrationes scientiarum reducuntur: et etiam primae conceptiones intellectus, ut entis, unius et hujusmodi, in quae oportet reducere omnes definitiones scientiarum praedictarum. Ex quo patet quod nihil potest sciri in scientiis speculativis neque per viam definitionis neque per viam demonstrationis, nisi ea tantum ad quae praedicta naturaliter cognita se extendunt. Hujusmodi autem naturaliter cognita homini manifestantur ex lumine intellectus agentis, quod est homini naturale: quo quidem lumine nihil manifestatur nobis nisi in quantum per ipsum phantasmata fiunt intelligibilia in actu. Hic est enim actus intellectus agentis, ut dicitur 5 de Anima. Phantasmata autem a sensu accipiuntur: unde principium cognitionis praedictorum principiorum est ex sensu et memoria, ut patet per Philosophum

(1) *Al.* definitionis.

(2) *Al.* hic.

(3) *Al.* aut.

in fine Poster.: et sic hujusmodi principia non ducunt nos ulterius, nisi ad ea quorum cognitionem acquirere possumus ex his quae a sensu comprehenduntur. Quidditas autem substantiarum separatarum non potest cognosci per ea quae sensu percipimus, ut ex praedictis patet; quamvis pervenire possimus per sensibilia ad cognoscendum hujusmodi substantias esse, et aliquas earum condiciones: et ideo per nullam scientiam speculativam potest sciri de aliqua substantia separata quid est, quamvis possimus scire ipsas esse, et aliquas earum condiciones, utpote quod sint intellectuales et incorporeales et hujusmodi. Et haec est sententia Commentatoris 5 de Anima, quamvis Avempace contrarium dixerit ex hoc quod aestimabat quidditates rerum sensibilium sufficienter exprimere quidditates immateriales: quod patet esse falsum, ut ibidem Commentator dicit, cum quidditas de utrisque dicatur quasi aequivoce.

Ad primum ergo dicendum, quod Boetius non intendit dicere quod per scientiam Theologiae possimus contemplari ipsam formam divinam quid est, sed solum ipsam esse ultra omnia phantasmata.

Ad secundum dicendum, quod quaedam res sunt a nobis per seipsas cognoscibiles; et in talibus manifestandis scientiae speculativae utuntur earum definitionibus ad demonstrandum earum proprietates, sicut accidit in scientiis quae demonstrant propter quid. Quaedam vero res sunt quae non sunt nobis cognoscibiles ex seipsis, sed per effectus suos. Et si quidem effectus sit adaequans causam, ipsa quidditas effectus accipitur ut principium ad demonstrandum causam esse, et ad investigandum quidditatem ejus, ex qua iterum proprietates ejus ostenduntur. Si autem sit effectus non adaequans causam, tunc effectus efficitur principium ad demonstrandum causam esse, et aliquas condiciones ejus; quamvis quidditas causae semper sit ignota: et ita accidit in substantiis separatis.

Ad tertium dicendum, quod duplex est felicitas hominis. Una imperfecta quae est in via, de qua dicit Philosophus; et haec consistit in cognitione substantiarum separatarum per habitum sapientiae: imperfecta tamen, et talis qualis est in via possibilis, non ut sciatur ipsa quidditas. Alia est perfecta in patria, qua ipse Deus per essentiam videbitur, et aliae substantiae separatae: et haec felicitas non erit per aliquam scientiam speculativam, sed per lumen gloriae.

Ad quartum dicendum, quod scientiae speculativae ordinantur in cognitionem substantiarum separatarum imperfectam, ut dictum est.

Ad quintum dicendum, quod nobis sunt indita principia, quibus possumus nos praeparare ad illam cognitionem perfectam substantiarum separatarum, non autem quibus ad eam possumus pertingere. Quamvis enim homo naturaliter inclinatur in finem ultimum, non tamen potest naturaliter illum consequi, sed solum per gratiam; et hoc est propter eminentiam illius finis.

# OPUSCULUM LXIV.

## DE VITIIS ET DE VIRTUTIBUS

deque aliis numero quaternario procedentibus.

(EDIT. ROM. LXXI.)

### CAPUT I.

#### *De speciebus virtutum.*

Quatuor sunt virtutum species: scilicet prudentia, ex hac memoria, intelligentia, providentia, dignitas: justitia, ex hac religio, pietas, gratia, veritas: fortitudo, ex hac magnificentia, confidentia, potentia, perseverantia: temperantia, ex hac continentia, obedientia, clementia et modestia. Prima praedictarum virtutum hominem ad agnitionem perducit: secunda dilectionem Dei et proximi servat: tertia vincit adversa, mortemque contemnit: quarta voluntatem reprimit et temperat omnia. Prima intelligit, secunda diligit, tertia victoriam praestat, quarta modum ponit in omnibus. Hae quatuor virtutes mores ornant, merita praebent, diabolum vincunt, caelum aperiunt. Quod agit prudentia in praecavendis insidiis, hoc temperantia in subveniendo miseriis. Quod agit fortitudo in tolerandis molestiis, hoc agit justitia in coereendis vitiis. Possumus autem et aliter dicere, quod quatuor sunt honestatum species: nam virtus et honestum, licet nomina sint diversa, res tamen et substantia prorsus est eadem: et est honestum, quod sua vi nos trahit et sua dignitate nos allicit: virtus vero, secundum Senecam, est habitus animi in modum naturae rationi consentaneus.

Quatuor sunt virtutes cardinales, scilicet prudentia, fortitudo, temperantia et justitia. Quatuor sunt quae prudentia nos edocet: scilicet praeterita recordari, disponere praesentia, futura praevidere, et dubia suspendere. In quatuor fortitudo nos instruit: scilicet prosperos in superbiam non erigi, adversos ad ima non detrudi, injuriae non sumere vindictam, et jucundam non deducere vitam. In quatuor temperantia nos admonet: scilicet circumcidere superflua, restringere desideria, ab illicitis abstinere, et blandimenta rejicere. In quatuor justitia nos edocet: scilicet honeste vivere, alterum non laedere, sobrie iudicium discernere, et unicuique jus suum tribuere.

#### *De his quae ex fide et spe et caritate proveniunt.*

Quatuor sunt quae ex fide proveniunt: scilicet vitae rectitudo, animae pabulum, Dei cultus et Paradisi praemium. Quatuor sunt quae ex spe procedunt: scilicet laetitia cordis, animae sobrietas, relevatio laboris et vitae longinquitas. Quatuor sunt quae ex caritate proveniunt: scilicet reverentia erga Deum, et proximum diligere, relevare oppressum, et errantem corrigere.

#### *De his quae proprie virtutes inducunt.*

Quatuor sunt quae prudentiam inducunt: scilicet in sententiis sive scientiis studium, in rebus experimentum, nocturna discussio et prudentium imitatio. Quatuor sunt quae temperantiam inducunt: scilicet aegritudinis formido, acquirendi cupido, Dei obsequium, et hypocrisis vitium. Quatuor sunt quae constantiam inducunt: scilicet timor pudicus, timor supplicii, spes laudis, ac spes compendii. Quatuor sunt quae prudentiam, justitiam et temperantiam gignunt: scilicet amor, odium, timor, compendium, scilicet brevis, utilis et levis sermo. Quatuor sunt quae perfectum hominem reddunt: scilicet Deum colere, proximum diligere, facere quod sibi vellet fieri, et alteri non inferre quod sibi nollet inferri.

#### *De his quae ex vitiis proveniunt.*

Quatuor sunt quae ex ira proveniunt: scilicet mentis turbatio, sui ignorantia, indecens factio, et iniqua sententia. Quatuor sunt quae ex superbia prodeunt: scilicet ingratitude servitii, oppressio proximi, linguae detractio et rixae promotio. Quatuor sunt quae ex invidia procedunt: scilicet dolor invidi, invidiosi exitium, dissensio populi, et eversio urbium. Quatuor sunt quae ex avaritia procedunt: scilicet rapina, perjuria, fraudes et homicidia. Quatuor sunt quae ex luxuria proveniunt: scilicet corporis et animae pollutio, sensuum debilitas, diminutio patri-monii et acceleratio senii. Quatuor sunt quae ex vitio gulae emergunt: scilicet corporis aegritudo vel virium, opum consumptio, delectatio nimia et mors

praematura. Quatuor sunt quae ex accidia prodeunt: scilicet vita tristis, calamitas, contemptus et egestas.

*De his quae vitia generant et minuant.*

Quatuor sunt quae hominem in superbiam provehunt: scilicet census, potentia, dignitas et parentela. Quatuor sunt quae superbiam minuunt: scilicet paupertas, oppressio, senium et aegritudo. Quatuor sunt quae iram pariunt: scilicet derisio, contumelia, ingratitude et injustitia. Quatuor sunt quae iram minuunt: scilicet dulce colloquium, vindicta, satisfactio et penuria. Quatuor sunt quae avaritiam inducunt: scilicet penuriae formido, senectutis oppressio, alieni invidia et filiorum copia. Quatuor sunt quae avaritiam minuunt: scilicet divitiarum copia, salubris juvenus, cum largis conversatio et prolis defectus. Quatuor sunt quae luxuriam alliciunt: scilicet vitia grandia, delicata cibaria, mulierum familiaritas et suavis otiositas. Quatuor sunt quae luxuriam minuunt: scilicet aquae usus et ciborum frigiditas, mulierum saevitia, sanguinis minutio et laboris assiduitas. Quatuor sunt quae vitium gulae inducunt: scilicet assuetudo tabernae, imitatio gulosorum, redituum copia et quies continua. Quatuor sunt quae gulae vitium minuunt: scilicet lueri anxietas, famis invasio, fatigatio corporis et penuriae afflictio. Quatuor sunt quae invidiam perimunt: scilicet honoris cupido, desiderium lueri, alterius felicitas et cum vitio odium. Quatuor sunt quae invidiam evellunt: scilicet ab homine potentiae privatio, penuriae eventus, sensuum elisio et virtutum defectus. Quatuor sunt quae accidiam producunt: scilicet loca obscura, quies solitaria, rumor displicibilis et cogitatio debilis. Quatuor sunt quae accidiam minuunt: scilicet conversari cum delitiis, assuescere cum gaudentibus, insistere conviviis et interesse dulcibus melodiis.

CAPUT II.

*De his quae rite diversis hominibus conveniunt: et primo de his quae conveniunt cuilibet praesidenti.*

Quatuor sunt quae rite cuique regnanti conveniunt: scilicet paterno regimine subditos regere, meritis amicos aquirere, placabilem vel affabilem se praebere quibuscumque orantibus, cum elementia justitiam ministrare delinquentibus. Quatuor sunt quae ab advocatis servari congruunt: scilicet adversarium patienter audire, audita pervigili mente discutere, discussis congruentem exhibere responsionem, objecta pro parte sua allegando concludere.

*De litigante.*

Quatuor sunt quae per litigantem servari congruunt: scilicet in proponendo humilitas, in respondendo suavitas, in litigando curialitas, in exponendo largitas. Quatuor sunt quae per tabellionem servari congruunt: scilicet in officio assiduitas, in scribendo velocitas, in mercede curialitas, in notando veracitas. Quatuor sunt quae per rectorem loci servari expediunt: scilicet pacis observatio, victualium procuratio, concedens prolatio et justitiae exhibitio. Quatuor sunt quae per rectorem familiae observari conveniunt: sub timore congruo familiam

retinere, alimenta juxta reditus exhibere, mores quoscumque justos docere, et in docendo hilarem se temporaliter exhibere. Quatuor sunt quae militi congruunt: scilicet sensus, probitas, census, et largitas. Quatuor sunt quae conveniunt praecipue domicello: scilicet in serviendo curiositas, in agendis velocitas, in dativis affabilitas, in gestis hilaritas. Quatuor sunt quae dominae praecipue congruunt: scilicet in facie memprisque formositas, in corpore castitas, in gestibus honestas et in domo curiositas. Quatuor sunt quae domicellae maxime congruunt, scilicet dominae suae curam habere, secreta non pandere, pudicitiam conservare, et domus negotia fideliter procurare. Quatuor sunt quae medico congruunt: scilicet morbi causam diligenter inquirere, saepius aegrotantem visitare, medicinas prout congruit exhibere, et aegrum instantius confortare. Quatuor sunt quae per aegrum praecipue servari expediunt: scilicet ut medico sive medenti obediat, in necessariis largiter expendat, ut fidem medico adhibeat, et ut se confortet non morando in otio, et quinto ipse aeger medicum sollicite exploret, et supplicando. Quatuor sunt quae potissime praelato conveniunt: scilicet in ministeriis assiduitas, in gestibus honestas, in regimine curiositas, in correctione benignitas. Quatuor sunt quae subjecto religioso conveniunt: scilicet ut monasterio sollicite immaneat et obedientiam praelato praestet, omnia devitet et orationibus vacet. Quatuor sunt quae scholari maxime congruunt: scilicet doctori reverentiam exhibere, attentionem sedulam in scholis habere, audita saepius repetere et retinere, et in dubiis attente prudentiores consulere. Quatuor sunt quae doctori congruunt: scilicet dicenda praevidere, cui dicat inspicere, quantum dicat animadvertere, et dicta ordinate proferre. Quatuor sunt quae praecipue conveniunt cuilibet auditori: scilicet dicentem audire patienter, audita discutere sapienter, et sapida aliis tradere, et insipida confestim oblivisci. Quatuor sunt quae maxime prudenti conveniunt: scilicet virtuosos colere, bonos attollere, oppressos relevare et errantes corrigere. Quatuor sunt quae maxime prudentis famam elidunt: scilicet enormia scienter fari et committere, justitiam negare merentibus, alios indecenter dispicere et passim referentibus credere.

*De consulentibus.*

Quatuor sunt quae cuilibet consulenti expediunt: scilicet dicta partium audire, actos sollemniter discutere, salarium a partibus aequaliter et congrue exigere, et consulari legaliter consilium impendere. Quatuor sunt quae concionatori praecipue congruunt: scilicet placita suaviter populo et dulciter pandere, dictis dicenda seriatim adnectere, idem non saepius dicendo repetere et uti brevitate. Quatuor sunt quae potissime mercatoribus conveniunt: scilicet ut in contrahendo sit discretus, in vendendo curiosus, in mercibus legalis et contrahentibus sit affabilis. Quatuor sunt quae adolescenti congruunt: scilicet audire patienter, respondere prudenter, neminem laedere et cuilibet servire libenter. Quatuor sunt quae ductori guerrae plurimum expediunt: scilicet census magnos ad expendendum, multitudo gentium, victualium armorumque copia et conditionum adversariorum notitia. Quatuor sunt quae gerentibus guerram maxime considerari congruunt: scilicet quis est qui guerram gerit, contra quem gerit, causam



propter quam gerit, et quis effectus guerrae quaeritur. Quatuor mala praecipua procedunt ex guerra: scilicet rerum et honorum consumptio, et destructio personarum, periclitatio prolis nacturae, impedimentum et error mulierum. Quatuor sunt quae maxime expediunt duci sive magistro militum: scilicet generis nobilitas, patriae dilectio, cordis securitas, et in bello discretio. Quatuor sunt quae praecipue conveniunt pacis cultori vel salvatori: scilicet non invadere, habere patientiam, foedera colere, de cunctis justis constantiam, injustis justitiam exhibere. Quatuor sunt quae subjectis potissime congruunt: scilicet in licitis rectori parere, civitati recte consulere, bonos niti attollere, et malos conari opprimere. Quatuor sunt quae tyranno subjectis omnino expediunt: scilicet proceres et milites honorare, neminem offendere, sobrie loqui et sollicite demorari. Quatuor sunt quae inter cetera a petitore sive petenti considerari expediunt: scilicet quis est, a quo petitur, causam quare petitur, quis effectus sequitur si fiat quod petatum est, vel negatur. Quatuor sunt quae petitus in petente maxime considerare habet: scilicet quis est qui petit, quid est quod petit, et quare petit, et effectum negatae vel concessae petitionis.

## CAPUT III.

*De diversitate hominum.*

Quatuor sunt hominum genera faciliter beneficia obliviscentia: scilicet puer cum adoleverit, humilis cum sublimatus fuerit, superbus superbia innodatus, incarcerationatus a carcere liberatus. Quatuor sunt genera hominum aliis rite ex merito praeeminentium: scilicet reges in subditos; parentes in liberos, mariti in uxoribus et magistri in scholaribus. Quatuor sunt genera hominum aliis injuste praesidentium: scilicet pecuniosi, fallaces, superbi et audaces. Quatuor sunt genera hominum plusquam lucrentur afferentium: scilicet rector ex regimine, cultor agrorum ex semine, mercator avarus ex mercimonia, sacerdos ex officio. Quatuor sunt genera hominum Deo et mundo displicentium: scilicet pauper elatus, dives serens mendacia, senex luxuriosus, et seminans inter fratres discordias. Quatuor sunt genera hominum summa egentium providentia: scilicet sacerdos in poenitentia, iudex in sententia, medicus in aegrotis, dives in thesauro. Quatuor sunt opera elemosynaria: scilicet erogare pauperibus, vindictam dimittere laedentibus, correctionem adhibere peccantibus, errantem revocare ab erroribus. Quatuor sunt genera hominum in penuriam delabentium: scilicet prodigus, gulosus, piger et rixosus. Quatuor sunt genera hominum divitias acquirentium: scilicet fallaces, avari, discreti et curiosi. Quatuor sunt genera hominum pertinaciter obstinatorum: scilicet tyrannus in retentione domini, haereticus in pravitate fidei, assuetus verbis improprietatis, et possessor alienae rei. Quatuor sunt genera amicorum praecipuorum vel principalium: scilicet amici fortunae, amici mensae, amici fidei et amici servitii. Primi fortuna recedente profugiunt, secundi mensa cessante evanescent, tertii perdurant perpetuo, ultimi perdurant servitio durante. Quatuor sunt genera hominum principatum acquirentium: scilicet pecuniosi, audaces, curiosi et sagaces. Quatuor sunt genera hominum faciliter amicitias acquirentium: scilicet largi, potentes, mites et affabiles. Quatuor sunt genera homi-

num quibus invitis confertur beneficium: scilicet debitor cum ultimo liberatur debito, puer cum verberatur delicto, letargus cum excitatur a somno; phreneticus cum paralicatur membro. Quatuor sunt genera hominum amicos immerito perdentium: scilicet dives oppressus penuria, potens privatus potentia, senex gravatus senio, et fortunatus pressus infortunio: hos etiam juvenes despiciunt. Quatuor sunt quae rite congrunt jejunanti: scilicet manducare cum modestia, devitare vitia, remiisci caelestium et erogare pauperibus. Quatuor sunt genera hominum diversimode felicium: felix quidem cum servitio (1) efficaciter incumbit, felix qui rerum causas patenter intelligit, felix qui mundi munera devitare potuit, felix quem alterius pericula cautum fecerunt. Quatuor sunt genera hominum quadrifarie infelcium: scilicet infelix qui in enormi peccato succumbit, infelix qui dum benefacere potuit desiit, infelix qui doceri potuit et doceri sprevit, infelix qui docere novit et facere neglexit.

## CAPUT VI.

*De his quae impellunt hominem ad regimen.*

Quatuor sunt quae ad regimen unumquemque impellunt: scilicet honor, compendium, vindicta et servitium; honor ut acquiratur, compendium ut extorqueatur, vindicta ut sumatur, servitium ut conferatur beneficium. Quatuor sunt quae homini dolorosissima existunt: scilicet filiorum interemptio, possessionum perditio, inimicorum exaltatio et amicorum oppressio. Quatuor sunt quae ad delictum hominem impellunt: scilicet lucrum, timor, spes et amor. Quatuor sunt homini omnino necessaria: scilicet ignis, ferrum, aqua et tabernaculum. Quatuor sunt quae ex singulis elementis vivunt: scilicet hallec ex aqua, salamandra ex igne, talpa ex terra, galmeon ex aere. Quatuor sunt quae plus aliis conferunt quam sibi: scilicet aves cum nidificant, apes cum mellificant, boves cum arant et oves producendo vellera. Quatuor sunt animalia plus homini conferentia: scilicet sues, boves, gallinae et anseres. Quatuor sunt quorum defectus plurimum obest: scilicet victualium inopia, census indigentia, sensus penuria et amicorum carentia. Quatuor sunt quorum copia frequenter affligit: scilicet mulierum abundantia, ciborum affluentia, verborum copia et malorum adhaerentia. Quatuor sunt quae homini gravia existunt: scilicet servire et non gratificari, rogare et non exaudiri, benefacere et non praemiari, expectare et non venire. Quatuor sunt quae homini durissima sunt, scilicet jacere in aegritudine, in summa paupertate degere, imprudenti subjacere domino et in carcere commorari.

## CAPUT V.

*De his quae homini grata existunt.*

Quatuor sunt quae homini gratiora persistunt: scilicet prudentibus lactari filiis, nitidis abundare divitiis, excelsam dignitatem assequi et inimicorum vindictam nancisci. Quatuor sunt quae ante rei factum expediunt: scilicet examinatio principii, discussio medii, praevio finis et consilium sapientis.

(1) Forte qui divino servitio.

Quatuor sunt quae post factum nihil prosunt: scilicet sensus, poenitentia, examinatio (1) et tristitia. Quatuor sunt quae homini levia sunt et digna laudibus: scilicet verbis quemcumque honorare, veritate frui, neminem offendere et cum bonis ambulare. Quatuor sunt quae infelicitatem saepe afferunt: scilicet filiorum multitudo, divitiarum affluentia, violentus dominatus, et laesa conscientia. Quatuor sunt quae laudabilem rei affectum ostendunt: scilicet consilii petitio, proprio sudore nutriri, tribulatis compati et elemosynas largiri. Quatuor sunt quae subito homini auferri et nunquam restitui possunt: scilicet cum fama alicujus falsa religione denigratur, virginitas cum assensu perditur, anima cum a corpore separatur per mortem, et membrum cum abscinditur. Quatuor sunt quae nunquam homini auferri possunt: scilicet scientiae thesaurus, animi voluntas, corporis contactus et gustus sapidus: vel sic et brevius, scientia, voluntas, tactus et sapiditas. Quatuor sunt quae conferri possunt et conferenti non desunt: scilicet scientia cum docetur, flamma cum impenditur, resurrectio corporalis et curialitas verbalis. Quatuor sunt quae in omni negatione discutiendo necessaria existunt: scilicet quid oporteat secundum necessitatem, quid liceat secundum aequitatem, quid deceat secundum honestatem et quid expediat secundum utilitatem. Quatuor sunt quae collegam respiciunt: scilicet dominatus in urbe, amplexus conjugis, quaestus acquisitio et in scutella sive in scissorio famelicus. Quatuor sunt quae socium cupiunt: scilicet in discrimine versans, in supplicio afflictus, in itinere means, in dignitate praeditus. Quatuor sunt quae conveniunt plurimum puerili aetati: nam irascuntur repente, reconciliantur sermonibus, obliviscuntur facile et celebrantur coaequalibus. Quatuor sunt quae adolescentes faciunt: scilicet abutuntur patrimonio, castigari spernunt, involvuntur vitiis et lucra negligunt. Quatuor sunt quae juvenes peragunt: scilicet quaerunt divitias, delectantur honoribus, quaerunt amicitias et abstinent se a turpibus. Quatuor sunt quae maxime senes peragunt: scilicet salubriter consulunt, petentibus gelide vel tepide tribuunt parentibus, praeterita referunt laudibus, et praesentia opprimunt affatibus. Quatuor incommoda senes principaliter assequuntur: scilicet sensuum elisio, saeva tenacitas, virium oppressio et vana timiditas. Quatuor sunt quae laedunt vel nil conferunt: scilicet luxuria sterilis, ridens tristitia, colligatus in vanis et mordens invidia. Quatuor sunt quae communiter insunt hominibus: scilicet displiciti afflictio, habendi cupiditas, sensus proprii credulitas et habitus parilitas in duello. Quatuor sunt quae senioribus proprie congruunt: scilicet verba promere fructifera, consilia praebere salubria, concordiam procurare discordibus, doctrinam largiri simplicibus. Quatuor sunt quae junioribus potissime congruunt: scilicet seniorum verba menti recondere, ipsis fideliter parere, sobrie dicenda pandere et obsequium praestare merentibus. Quatuor sunt quae ducibus belli expediunt: scilicet hostium acies discutere, praerogativa belli grandis praeligere, in bello suos alacriter exhortari et hostes expugnare viriliter. Quatuor sunt quae communiter hominibus insatiabilia existunt: scilicet acquirendi voluntas, oculi intuitus, scientiae cupiditas et aurium placidus auditus.

(1) Forte exanimatio.

Quatuor sunt mundi opera valde abusiva: scilicet christianus contentiosus, pauper superbus, senex sine religione et femina sine pudore. Quatuor sunt valde in saeculo abusiva: scilicet dominus sine veritate, plebs sine disciplina, populus sine lege et adolescens sine obedientia. Quatuor sunt quae terram concutiunt: scilicet servus cum regnaverit, stultus cum saturatus fuerit, mulier otiosa cum nupserit, et ancilla cum dominae haeres extiterit. Quatuor sunt quae hominibus summe gravia existunt: scilicet cum familia demente vivere, iniquis filiis abundare, solitum lucrum perdere et solitum dominari subsistere. Quatuor sunt quae forinseco principaliter expediunt: scilicet patientia in auditu indisciplinabilium, affabilitas in verborum relatu, honorem ut congruit deferre cuilibet, amicitiam cujuscumque nancisci.

## CAPUT VI.

### *De scientiis utilioribus.*

Quatuor sunt scientiae prae ceteris addiscendae; scilicet theologia, leges, philosophia et decreta: prima est animae pabulum et pontificatus viaticum: secunda defectus unius: tertia contra morbos subsidium, ingenii remedium et amicorum praesidium: quarta sublimatio humilium et dignitatis seu honoris initium. Quatuor sunt artes homines in assidua penuria et miseria nutriendas: scilicet grammatica, dialectica, arithmetica et geometria: prima artium est principium, sed sensus claudit ostium: secunda verum a falso instruit sive discernit, sed in persona est ridiculum: tertia docet numerum, sed nummorum nescit computum: quarta mensuram terrae variat, sed nummis privata exulat. Quatuor sunt quae inducunt hominem ad scientias: scilicet amor inanis gloriae, legendi delectatio, acquirendi cupiditas et divina inspiratio. Quatuor sunt praecipua dona fati sive fortunae: scilicet uxor prudens, linguae facundia, naturalis sensus et mundana gratia. Quatuor sunt quae doctorem ad bene legendum alliciunt: scilicet multitudo scholarium intelligentium, salarii stipendium, scientiae acquisitio et honoris consecutio. Quatuor sunt quae praecipue in ore sapientis disconveniunt: scilicet enormia sublinare laudibus, decentia supprimere affatibus, super ignotum scienter contradicere, et impertinens cum vitio delectare. Quatuor sunt quae hominis sensum perimunt: scilicet mulierum dilectio, crudelis et subita adversitas, timoris oppressio, et nimia prosperitas. Quatuor sunt materies hominum, quae in divitiis dominari nequeunt: scilicet rixosus, imprudens, tyrannus injuste obtinens, et effrene diffundens gratiam. Quatuor sunt quae sensum acunt: scilicet lucrandi desiderium, nocturna discussio, conferre cum prudentibus, muneris oblatio vel temperatus victus. Quatuor sunt quae nos in delictis nutriunt: scilicet delicti delectatio, coaversatio peccantium, reatus impunitas et gulae indulgentia vel commissi compendium. Quatuor sunt quae praecipue verecundiam inducunt: scilicet accessio penuriae, illatio injuriae, alium deprecari, et a turba depelli. Quatuor sunt quae verecundiam propellant: scilicet paucitas sensus, divitiarum cumulus, eminens scientia, expellens potentia, vel nitida conscientia. Quatuor sunt quae pater circa filium procurare debet: scilicet ipsum moribus instruere, artibus docere,

sub jugo retinere et competenter alere. Quatuor sunt quae filius tenetur facere suo patri: scilicet illum revereri, eidem totaliter obedire, illum in nullo contristari et senem optime procurare. Quatuor sunt quae hominis fortunae prosunt: scilicet in acquirendo curiositas, in conservando parcitas, justitia potiri et in offensis abstinencia. Quatuor sunt quae quilibet considerare debet in uxore accipienda: scilicet pulchritudo, nobilitas, pulchri mores et divitiae. Quatuor sunt in quibus homines potissime delectantur: scilicet in voce jucunda et suavi, venusta facie, cibis et potibus exquisitis et locis amoenis. Quatuor sunt quae nobis bona subito auferunt: scilicet incendium, tyrannus, diluvium et grando. Quatuor sunt praerogativae dotes hominis: scilicet corporis pulchritudo, animi scientia, fama laudabilis, et facundia. Quatuor sunt quae ante tempus hominem occidunt: scilicet uxor formosa, tristis famulus, immoderatus cibus et potus, et aer corruptus. Quatuor sunt quae vitam producant: scilicet sobrie vivere, cum dilectis habitare, motus corporis exercitio moderato, et locus amoenus et purus. Quatuor sunt quae abscondi nequeunt: scilicet tussis, amor, ignis, ira immoderata sive dolor. Quatuor sunt quae ex lingua discreta procedunt: scilicet amoris inductio, viri praeconium, vivendi instructio, et salutis praenium. Quatuor sunt quae ex lingua prava proveniunt: scilicet zizaniae semen, famae detractio, nequam interpretatio, et malorum instructio. Quatuor sunt quae visum delectant: scilicet venusta facies, colorum varietas, ornatus exterior, et aeris serenitas. Quatuor sunt quae auditum delectant: scilicet vox suavis, ornata locutio, rumor placidus, et honesta praedicatio. Quatuor sunt quae gustum delectant: scilicet sapor dulcis, aer bonus, coctio referta, et stomachus exoneratus. Quatuor sunt inter cetera reprobanda crimina: scilicet proximum sine causa odire, lingua aliis detrahere, aliena injuste tollere, et injuriam alteri irrogare. Quatuor sunt inter cetera enormia crimina: scilicet civitatis desolatio, maris et feminae foeda conjunctio, homicidii perpetratio, et socii detractio. Quatuor sunt quae periculosa persistunt: scilicet sub tyranno vivere, ventis se committere, in acie debellare, et cum furioso conversari. Quatuor sunt quae homini difficillima existunt: scilicet aliena possidere, et ea restituere; contumelias audire, et tacere; injustitiam irrogari, et hoc debere pati; et desiderabilia tractare, et non frui. Quatuor sunt in mundo praecipue mirabilia: scilicet solem diei spatio mundum gyrare, aquam terram (1) inundare, tot facies hominum dissimiles sub eadem effigie cernere, et tot vita dissidentes eundem finem petere. Quatuor sunt quae ad guerram hominem inducunt: scilicet thesauri abundantia, ambitio dominandi, vindictae desiderium, et rerum conjunctio. Quatuor sunt quae guerram avertunt: scilicet vindictae consumptio, defectus victualium, pecuniae penuria, et guerrandi taedium. Quatuor sunt quae homines plurimum cupiunt, nec habere queunt: scilicet sufficientia pecuniae, scientiae perfectio, quies continua, et perenne gaudium. Quatuor sunt excellentes et repentinae laetitiae: scilicet de carceribus egredi, sponsae copulari, miles fieri, et dignitatem ingredi. Quatuor sunt opera stupenda: scilicet quod tyrannus odiosus populum ingentem suspenderet,

quod in belli conflictu minimus numerus obtineat, quod pauperes auferant divitias divitibus, et quod multitudo gentium invigilet fraudibus. Quatuor sunt circa quae quasi omnes insistunt: scilicet in quaestu pecuniae, in potestatis ascensu, in familiae regimine, et in malorum accusatione. Quatuor sunt in quibus homines maxime in curam afflictionum detruduntur: scilicet ut diu vivant, ut penuriam evitent, ut fugiant dedecus, et ut prolem habeant. Quatuor sunt quae ut plurimum devitari expediunt: scilicet passim credere cuilibet, nec frustra fatigari quibuslibet, non dolere saepius praeteritis, nec optare quod nequit haberi. Quatuor sunt quae valde sanitati officiant: scilicet superflua mulierum commixtio, nimia cibi ac potus assumptio, nimium frigus, et nimietas laboris. Quatuor sunt difficilis cognitionis homini: scilicet avium volatus per aera, navium processus per aequora, via colubri per nemora, et via pueri in sua adolescentia. Quatuor sunt quae nullo modo ab homine devitari possunt: scilicet adventus senectutis, mortis accessus, familiaris elisio, et displicibilem invasio. Quatuor sunt quae suo cultori male retribuunt: scilicet ovum cum in pera recluditur, ignis cum in sinu reconditur (1) serpens cum in gremio gubernatur, et nequam cum beneficio elevatur. Quatuor sunt quae serviendo inimicitiam pariunt: scilicet amico pecuniam mutuare et eam repetere, pro eo fidejubere et solutum requirere, annuatim largiri et desistere, servire alicui, et ab eo similiter servitium non posse percipere. Quatuor sunt quae plura (2) reperiuntur quam opinentur: scilicet inimici, peccata animi, aetatis, et debita. Quatuor sunt quae minus reperiuntur quam opinentur: scilicet amicorum numerus, bonitas, potentia, et sensualitas. Quatuor sunt insatiabilia: scilicet ignis, terra, infernus et vulva. Quatuor sunt quae hominem de propria sede depellunt: scilicet fumus, stillicidium, foetor et feminae litigium. Quatuor sunt quae maxime hominem attrahunt ad civitatis habitaculum: scilicet justitiae conservatio, civium bonitas, quaestus adveniens, et victualium copia. Quatuor sunt quae hominem ad propriam reducunt patriam: scilicet uxoris dilectio, domus amoenitas, defectus sodalium, et temporis adversitas. Quatuor sunt quae hominis conditionem ostendunt: scilicet sermonis prolatio, corporis habitus, animi promotio, et gestorum exteriorum effectus. Quatuor sunt quae virum prudentem esse imminet: scilicet discretus sermo, honesta conversatio, consecutio scientiae, et moderatio sui ipsius. Quatuor sunt quae maxime hominis vitia tegunt: scilicet in expendendo largitas, in dietis affabilitas, in gestis honestas, et in actibus calliditas. Quatuor sunt quae veritatem aperiunt: scilicet rei aspectus, substantiae tactus, auditus veridici, et tentatio gustus. Quatuor sunt quae virum curialem efficiunt: scilicet divitiarum copia, honoris ambitio, sensus integritas, et servitii receptio vel amoris modus. Quatuor sunt quae maxime hominem incurialem reddunt: scilicet nimia paupertas, avaritia, pecunia, et invidia. Quatuor sunt vitia quae virtutes simulant: scilicet astutia simulat prudentiam, obstinatio simulat constantiam, avaritia simulat continentiam, et crudelitas simulat justitiam. Quatuor sunt quae praecipue conveniunt dominantibus: scilicet virtuo-

(1) *Deest for'asse non.**S. Th. Opera omnia. V. 17.*(1) *Al. recluditur.*(2) *Al. plurima.*



sos attollere, maleficos opprimere, virtutes colere, et relevare oppressos. Quatuor sunt bona quae maxime ex pace proveniunt: scilicet civitatis augmentum, ubertas victualium, divitiarum acquisitio, et laetitia civium: et his contraria quatuor ex guerra prodeunt. Quatuor sunt quae maxime divitiae peragunt: scilicet fidem acquirunt, gentes augmentant, infimum extollunt, et inimicum opprimunt. Quatuor sunt mala praecipua quae ex penuria prodeunt: scilicet sceleris imitatio, personae contemptus, corporis afflictio, et familiae interitus sive perditio. Quatuor sunt quae praecipue amicitiam generant: scilicet beneficium, familiaritas, similitudo, et facundia sive affabilitas. Quatuor sunt quae maxime odium pariunt: scilicet turpiloquium, offensio, avaritia et derisio. Quatuor sunt quae ad dignitatem quemquam provehunt: scilicet sensus, scientia, vis, astutia. Quatuor sunt quae caecant oculos iudicis: scilicet amor, odium, lucrum, et timor. Quatuor sunt quae subvertunt animi rationem: scilicet amor inordinatus, ebrietas vini, avaritia, et odium. Quatuor sunt quae divitias afferunt: scilicet fundus sive possessiones, scientia, negotiatio, et casus sive fortuna. Quatuor sunt quae divitias acquisitas destruunt: scilicet guerra, gulositas, ludus et luxuria. Quatuor sunt quae civitatem summe defendunt: scilicet pax, scientia, amor et justitia. Quatuor sunt quae urbem citissime destruunt: scilicet guerra, invidia, defectus victualium, et justitiae exilium. Quatuor sunt opera maxime laudanda. scilicet pacis inductio, justitiae observatio, relevare oppressum, et egenum sustentare. Quatuor sunt in quibus nobiles quondam praecipue delectabantur: scilicet ire venatum, delectari honoribus, servire quibuslibet, insudare laudibus. Quatuor sunt in quibus nobiles maxime nunc insistunt: scilicet invadere aliena, dominari affinibus, invigilare quaestibus, et largitatem spernere. Quatuor sunt quae scholarem potissime ad scientiae apicem perducunt: scilicet aure vigili audita percipere, solerti studio discutere, discussa memorative mente recondere, recondita cuilibet dicendo doctrinaliter diffundere. Quatuor sunt quae faciunt nobilem esse civitatem: scilicet antiqua constructio, civium nobilitas, eampestres victoriae, et conservatio foederum. Quatuor sunt quae rem rite perficiunt: scilicet artis doctrina, prudentium imitatio, usus observantia, et decora prolatio. Quatuor sunt liquores prae ceteris necessarii et utiliores: scilicet aqua, vinum, mel et oleum. Quatuor sunt quae absque assiduo usu ab aliquo sciri non possunt: scilicet fari grammaticae, ornate scribere, rite ratiocinari, et metricos versus componere. Quatuor sunt quae rite poenitentibus sunt summe necessaria: scilicet oris confessio, cordis contritio, operis satisfactio, et boni continuatio sive perseverantia in bono. Quatuor sunt quae mutationem saepe recipiunt: scilicet voluntas in muliere, ventus in vere, sors in prosperis, et turbatio in adversis. Quatuor sunt quae hujusmodi (1) praelato conveniunt sive expediunt: scilicet lapsorum statum conspiciere, in melius sperare dari, stipendia modica peragere, utiliter niti ad lucra. Quatuor sunt verba a quolibet praecipue notanda: quod scilicet largitas non durat, sensus non semper securat, curialitas nonnunquam fallit, et mensura nil omittit. Quatuor sunt quae in proditore semper reperies: scilicet

mel in ore dulcissimum, fel in opere mortiferum, subrisu blandissimus in vultu, et sagacissimus in actu. Quatuor sunt quae saepissime hominem decipiunt: scilicet verborum dulcedo, lucrandi cupiditas, receptio mulieris, et paucitas intellectus. Quatuor sunt quae morte pejora existunt: scilicet senem paupertate opprimi, hominem carere sensibus corporeis, peccatorem involutum peccatis, et aegrum in carceribus detentum. Quatuor sunt in quibus delectantur maxime populares: scilicet artium claritudo, victualium utilitas, nobilium oppressio, et variata novitas. Quatuor sunt loquelae prae aliis placabiles: scilicet Francigena in Gallia, in Lombardia Pedemontis prolatio metrica, et prosaica in Alemannia, compositio dictaminis in Apulia. Quatuor sunt urbes ceteris praecipue eminentes: scilicet Parisius in scientiis, Salernum in medicinis, Bononia in legibus, Aurelianis in actoribus. Quatuor sunt urbes prae aliis grandiores: scilicet Parisius in Francia, Mediolanum in Lombardia, Florentia in Tuscia, Roma in Italia. Quatuor sunt maximae civitates inter alias excellentes: scilicet Janua, Venetia, Constantinopolis et Pisa. Prima gaudet divitiis: secunda victualibus non ex se, sed aliunde: tertia in mereimoniis: quarta magnis civibus. Quatuor fuerunt homines ceteros alios excellentes: scilicet Salomon universali sapientia, Aristoteles in philosophia, Virgilius in poetis, et Hippocrates in physica vel Gratianus in decretis. Quatuor fuerunt strenuissimi milites prae aliis excellentes: scilicet temporibus Alexandri Magni, Popinus cursor: tempore quo Galli capta Roma Capitolium obsidebant, Furius Camillus; tempore belli punici Scipio, deinde Julius Caesar. Quatuor sunt quae tyranni praecipue peragunt: scilicet bonos destruunt, pauperes odiant, malos extollunt, virtutes enervant. Quatuor fuerunt olim crudelissimi tyranni: scilicet Herodes in Judaea, Nero in Roma, Attila in Gallia et Italia, et Aicelinus in Marchia et Lombardia. Primus proprio se occidit gladio. Secundus occisus fuit a populo. Tertius subito mortuus. Quartus in bracha nuda Mediolani laethifere sauciatus, et in Soncino castro Cremonae est sepultus. Quatuor sunt homines qui ut plurimum dominari satagunt: scilicet pauperes ut aliena rapiant, divites ut acquisita defendant, laesi ut se ulciscantur, boni ut urbem a malis tueantur. Primi cuilibet sunt laethiferi, secundi possunt tolerari, tertii saepe damna inferunt, ultimi utilitatem conferunt. Quatuor sunt quae praecipue tyrannos regnare impediunt; scilicet civium concordia, divitum copia, provisio prudentum, et audacia potentum. Quatuor sunt opera tyranni inter alia: scilicet inter cives schismata producere, prudentes opprimere, exinanire divites, et depellere potentes. Quatuor sunt mores qui praecipue tyrannis insunt: scilicet in crudelibus actionibus sunt praecipites, in decentium auditione in patientes; omnia progredi volunt ex se et a nemine volunt redargui. Quatuor sunt quae mulieres inter alia summe cupiunt: scilicet a formosis amari juvenibus, filiis pluribus pollere, pretiosis ornari vestibus, et domui prae ceteris dominari. Quatuor sunt quae mulieribus valde dura persistunt: scilicet maritum suum extraneis uti amplexibus, domui tumultum saepius promovere, filios egere victu et vestitu, et ipsorum mortem praevidere. Quatuor sunt quae optime iudici conveniunt: scilicet benigne audire, prudenter respondere, sobrie discutere, et solemniter judicare. Qua-

(1) Forte homini.

tuor sunt quae Deo et hominibus summe placida existunt: scilicet fratrum concordia, proximorum amor, conjugum consensus, et lapsorum reparatio. Quatuor sunt quae rei eventum pravum manifeste indicant: scilicet consilium deserere, male inchoare, ultra vires aggredi, et communia consequi. Quatuor sunt quae pretio comparari vel aestimari non

possunt: scilicet scientia, sanitas, libertas et virtuositas. Quatuor sunt quae absque gravi labore acquiri non possunt: scilicet grandis laus, excellens in moribus scientia, magnus census, et potentia. Quatuor sunt quae sine pretio et difficultate acquiri possunt: scilicet contemptus sui, fatuitas, vilis penuria et infirmitas.



# OPUSCULUM LXV.

## DE CONCORDANTIIS

in quo concordat seipsum in passibus apparenter contrariis.

(EDIT. ROM. LXXII.)

### *Prooemium.*

« Pertransibunt plurimi, et multiplex erit scientia: » Daniel. 13. In visione prophetica, quae usque ad tempus statutum signari et claudi praecipitur, docemur in Christo omnes thesauros sapientiae et scientiae esse absconditos, donec se manifestaverit electis: unde tunc non erit multiplex scientia, cum medium fuerit unum, et sufficiens ad alia cognoscenda. Secundum numerum enim mediorum invenitur numerus scientiarum. Medium enim erit essentia divina cui omnes beati sine medio creaturae conjungentur: unde uni non aderit alio mediante, quod unus alium doceat, unde Jeremi. scriptum est: « In illa die non docebit vir fratrem suum, et « proximum suum dicens: Cognosce Dominum: a « minore enim usque ad maximum omnes cognoscent me, dicit Dominus; » et hoc in plena luce perficietur, quae nihil tenebratum et erroneum patitur. Unde propter hujus luminis virtutem, nulla opinio locum habebit; sed erit una scientia omnium certissima, quae erit gloria beatorum: in hoc enim gloriabitur qui gloriatur, scire et nosse me. Praedictum igitur lumen dupliciter nobis in via communicatur. Uno modo modice, et quasi sub parvo radio; et hoc est lumen naturalis intellectus, quod est quaedam participatio illius lucis aeternae, multum tamen distans et ab illa deficiens. Unde propter nimiam distantiam est quasi umbra, cui modicum luminis est admixtum: et ideo in hominibus ratio invenitur quae est umbra intelligentiae: et inde est, quod sunt diversae opiniones apud homines propter defectum plenae lucis in cognoscendo: quae tamen penitus auferentur, cum illa lux radiare coeperit. Alio modo communicatur nobis in abundantia quadam, et quasi in quadam solis praesentia, et ibi acies mentis nostrae reverberatur, quia supra nos est et super sensum hominis quod nobis ostensum est; et hoc est lumen fidei quae nullam patitur opinionem infra suos terminos: totum enim certissimum est quod fides habet: ex quacumque enim parte ad fidem acceditur, omnis intellectus captivatur in obsequium Christi: nec mirum, cum etiam veritas creata cogat intellectum sibi assentire. Diversitas

igitur opinionis si qua fuerit, extra terminos fidei teneatur: infra terminos enim fidei unius et unius moris habitent fideles Christi. Duae namque offensae in Scripturis hominum inveniuntur. Error scilicet contra ipsam veritatem, sicut in doctrinis haereticorum contra fidem invenitur, de quibus est certum quod falluntur in ratione humana, quia argumenta contra fidem non sunt fundata super prima principia vel lumen naturale, quia Deus et fidem et naturalem scientiam homini tradidit. Est et alia offensa in Scripturis, et quidem satis frequens: difficultas scilicet deveniendi in mentem auctoris, quod dicitur esse intentum a quolibet studioso. Pauci enim vel nulli aliquid scripserunt qui ab hoc immunes sint; quia secundum Augustinum, 5 de Trinit., nunquam fuit aliquis qui in omnibus ab omnibus intelligeretur. Sperantes igitur cum Dei adiutorio in operibus nostris primam offensam evasisse, alteram quantum possibile est vitare desideremus. Unde quae in diversis locis posita sunt eadem dumtaxat quae occurrerunt nobis, debet hujusmodi cogitationibus quae inter se aliquibus videntur dissona, quibus mens nostra non satis est nota, sic concordare intendimus, ut quomodo unumquodque in suo loco accipi debeat, sine difficultate sciri possit. Supplices ut si quid aliquis invenerit a nobis non concordatum, si ei non sit magna causa discendi, ex qua secundum Hilarium accipienda est intelligentia dictorum, discretorum, et magis exercitatum consulat. Si vero non fuerit inventum quod simul utrumque stare possit, id illorum eligat quod magis veritati consonum judicaverit; alterum vero revocemus, si talis nobis discordia occurreret.

### *Utrum Deus sit subjectum theologiae.*

In primo igitur sententiarum diximus subjectum theologiae posse sic vel sic accipi, si quis hoc vellet: in prima vero parte Deum esse subjectum theologiae memoravimus: quod verum est, cum formalis ratio objecti in theologia sit a Deo, et tale verum est subjectum. Aliud vero de his quae materialia sunt intelligi potest, non id dicendum esse subjectum, vel nisi forte per accidens. Sed quia reve-



rentiae doctorum qui talia dixerunt, in aliquo derogare oderim.

*Utrum beatitudo consistat in actu voluntatis vel intellectus, et utrum frui sit actus voluntatis in ordine ad intellectum.*

Consequenter in eod. lib. diximus frui esse actum voluntatis in ordine ad intellectum: in 4 vero Sentent. et in 2 part. Sum. et in Sum. cont. Gent. et in aliis quasi frequenter posuimus beatitudinem consistere in actu intellectus essentialiter: quae sibi in nullo repugnant: sed addendum fuisset, quod frui non est ille actus absolute in quo consistit beatitudo, sed supra ipsum addit: frui enim complectitur actum intellectus in quo est essentia beatitudinis, et omnem actum qui sequitur, quasi perfectionem aliam addens super actum intellectus, ut puta delectationem, et hujusmodi quae perficit operationem intellectus beati, sicut pulehritudo juventutem: unde fruitio est de rebus cognitis, quibus voluntas delectata quiescit, secundum Augustinum.

*Utrum uti sit actus voluntatis.*

Rursum quaestione immediate sequente ubi de uti diximus, quod uti est actus voluntatis, cum tamen ejus essentia magis sit in executione quam in imperio, ut ibid. dictum est: sed hoc dictum est ideo, quia voluntas solum est imperans etiam exequens, ut patet in actionibus quas per seipsam facit, et sic uti est actus ejus. Vel hoc ideo dictum est, quia conjugitur cui libet viriorem inferiorum, quarum est exequi, sicut motor conjugitur mobili.

*Utrum actio reflexa differat ab actione secundum rectum: id est, an eadem actione intelligatur intelligibile et ipsum intelligere.*

Consequenter in solutione unius arg. 2 distinct. art. 3, dictum est, quod eadem actione intelligitur intelligibile, et ipsum intelligere. In prima vero parte Summae, et in 3 Sent., ostensum est actionem reflexam differre ab actione secundum rectum, et iterum in lib. de Anim. illud manifestum est: sed illius dicti ratio est, quia actio reflexa includit rectam; quia non potest ipsum intelligere intelligi, nisi intelligatur ipsum intelligibile; et ideo licet ipsum intelligere primum possit esse sine secundo, secundum tamen non erit sine primo.

*Utrum diversitas rationum quae est in attributis, sit tantum ex parte nostri, sive ex parte rei.*

Consequenter cum quaeritur, utrum in divina essentia possit esse pluralitas attributorum, dictum est quod diversitas rationis quae est in attributis, non tantum est a parte nostra, sed a proprietate rei ipsius, et hoc verum est: sed quomodo hoc debet intelligi, in prima parte Summae ostensum est, ubi quaesitum est utrum nomina dicta de Deo et de creaturis dicantur univoce; ibi enim invenitur quod unum quid simplex respondet omnibus conceptionibus quas de Deo habemus, et illud semper relinquitur post quamlibet conceptionem; unde non apprehensum bene nomen quod imponitur,

semper exceditur ab ipsa re. Et ideo cum dictum est quod diversitas rationum reperitur ex parte Dei, distinguendum est duobus modis posse aliquid correspondere rationibus diversis. Uno modo quando in re ipsa plures naturae reperiuntur, supra quas fundantur rationes diversae, sicut patet de homine albo et musico, in quo est diversitas rationum ex parte ipsius; et talis diversitas ponit compositionem in re ipsa, et determinate illud supra quod una conceptio fundatur, respondet illi conceptioni, et non alii; talis autem modus correspondentiae non est in Deo. Alio autem modo potest aliquid correspondere conceptionibus diversis; non quod in re sit diversitas aliqua naturarum, sed una natura simplex conceptioni nulli proportionata, sed excedens omnem conceptionem, et sic non derogat simplicitati: sicut enim in aliis diversitas naturae, ita in Deo summa perfectio respondet multis et diversis conceptionibus. Et isto modo ista diversitas non tantum est in ratiocinante, sed in ipsa re; quia semper accipitur eadem natura simplex in conceptione posteriori ut excedens priorem; unde pluralitas rationum ex parte Dei est ut quoddam excedens in perfectione, et non ut habent diversas naturas. In eadem vero quaestione dictum est, quod bonitas et sapientia et hujusmodi in Deo sunt secundum verissimam sui rationem; et ideo bonitas non est ratio sapientiae, secundum quod hujusmodi; unde concludebatur, quod absolute sunt in Deo secundum diversam rationem, quae diversitas non est tantum apud ratiocinantem, sed apud proprietatem rei. In prima autem parte Summae, ubi scilicet quaeritur an nomina dicta de Deo, et de creaturis dicantur univoce, illud satis declaratum est, quia non fuit intentum, ibid., ponere in Deo aliquam diversitatem rationum absolutarum, sed hoc invenitur in ipsa proprietate rerum etc.; et ideo positum est, secundum quod hujusmodi. Nihil autem est accipere a proprietate rerum quod non sit in Deo multo nobiliori modo. Et ideo connotatio in creaturis non est causa quod talia sint in Deo, sed e converso: non enim ideo Deus bonus est quia hoc reperitur in creatura; sed creatura bona est, quia Deus bonus est.

*Utrum Deus cognoscatur in patria per speciem suam.*

Dicitur autem, dictum est consequenter quod Deus et Angeli cognoscuntur a nobis per species impressas, et non abstractas, non ostendunt quod Deus videatur in patria per speciem suam: nam in prima parte Summae ostensum est hoc esse impossibile: sed in via cognoscitur quandoque Deus non per speciem a creaturis acceptam, sed interius a Deo formatam. Unde in responsione ad quaestionem dicebatur, quod non quaerebatur de visione Dei per essentiam.

*Utrum in una specie non possint multiplicari individua nisi ratione materiae aut potentiae.*

In quaest. de Trin. Dei, dist. 2, arg. 6, diximus in una specie non posse multiplicari individua, nisi ratione materiae, vel alicujus potentiae: ubi innuitur multiplicationem individuorum ejusdem speciei fieri posse per aliquam potentiam quae non sit materiae, quae quamvis possit reperiri sine ma-

teria ut in Angelis, tamen secundum eam non fit multiplicatio individuorum in eadem specie, cum tot sint species quot individua in eis, ut ostensum est frequenter. Hoc enim dictum est ideo, quia nondum inventum erat aliquid ad ostendendum potentiam non multiplicare individua in eadem specie, quod tamen multi tenebant.

*Utrum Deum esse unum possit demonstrari ratione et fide teneri.*

Quod autem in responsione ejusdem quaestionis dictum est, Deum esse unum demonstrari ratione, et fide teneri; non ostendunt aliquid ad fidem pertinere quasi articulus ejus, quod etiam posset demonstrari; cum fides sit de non apparentibus, secundum Apostolum. Sed hoc ideo dictum est, quia ratio naturalis subservit fidei: unde est dictum per fidem acceptum hoc, scilicet quod fides supponit Deum esse unum tamquam ratione ostensum, Deum scilicet esse unum: vel ideo dici potest ut fiat resolutio ad diversos, quia uni posset de hoc fieri demonstratio, alteri vero non, quem per fidem necesse est ad hoc accedere. In eadem iterum quaestione dicta sunt duo, quae sibi videntur repugnare.

*Utrum omnia nobiliori modo sint in causa quam in causato.*

Unum est, quod omnia nobiliori modo sunt in causa sua quam in suo causato.

*Utrum oporteat, quod illud, quod sit de nobilitate creaturae, sit de nobilitate creatoris.*

Aliud est, quod non oportet quod illud quod est de nobilitate creaturae sit de nobilitate creatoris: quae non sunt opposita, quia primum dictum est causaliter, aliud vero formaliter.

*Utrum materia multiplicetur per adventum formarum.*

Iterum ibid. in fine quaest., dictum est, quod materia multiplicatur per adventum formarum: quod verum est de multiplicatione specierum, quarum principia sunt formae: alias enim ostensum est frequenter formas multiplicari per materiam, quae est multiplicatio individuorum in eadem specie.

*Utrum Deum esse sit per se notum.*

Infra autem dictum est Deum esse non esse per se notum, et idem positum est in prima parte, et in libro contra Gentil., ubi actum est de ratione Anselmi, qui ex significatione ipsius termini processit, ut videtur: quam tamen significationem non ponit Dionysius, qui nominum divinarum significationes pertractavit, ut credimus, nec aliquis excepto Anselmo. Unde suffecisset ibi dicere quod dicit Augustinus in lib. de doctrina Christiana, quod licet omnes latini, cum audierint illud nomen, excitentur ad cogitandam quamdam naturam, quod potius factum videtur ex quodam usu quam ex ipsa vi vocabuli. Et ideo ibid. praemisit, quod non in strepitu istarum duarum similitudinum Deus cognoscitur ipse, quod tamen convenit in prolatione terminorum principii per se noti; nisi fuerit

tale per se notum, quod non nisi paucis et sapientibus est per se notum, ut incorporalia non esse in loco, ut dicit Boetius in lib. de Hebdom.; de quo tamen alii rudes, scilicet per rationem doceri possunt, quos tamen ipsa prolatio vocabuli non ducet haec, per quem modum posset dici sapientibus de Deo, Deum esse per se notum, non autem simpliciter ex ipsa prolatione nomen suum omnibus manifestavit, ut scriptum est.

*Utrum memoria sit praeteritorum.*

Quod autem postea scriptum est, memoriam quae est altera pars imaginis, non esse praeteritorum, abstrahit ab omni tempore, cum sit in intellectu, et ideo in parte sensitiva; dissentire videtur ei quod dictum est in quaestionibus disputatis, ubi dictum est, eandem memoriam respicere praeterita; sed hoc dictum est per similitudinem quamdam, quia respicere quod est talis memoriae, praesupponitur intuitioni intellectus ordine quodam, sicut inter praeteritum et futurum praesens ordo invenitur. Vel ideo dictum intelligi potest, quia intellectus possibilis species retinet per tempora, cum sit locus specierum, secundum Philosophum; sed ad eas non redit nisi per phantasmata, quae sunt in parte sensitiva, ubi etiam illa memoria ponitur.

*Utrum esse sit accidens.*

Consequenter dictum est, esse non esse accidens, in quaestione utrum essentia animae sint suae potentiae, in solutione secundi argumenti. Et ideo in mente sequitur essentia (1) animae, quia ostensum fuit effectum immediatum proportionatum esse suae causae. In quaestionibus vero Disputatis, dictum est esse Angeli esse accidens: et talia frequenterveniuntur esse dicta in diversis locis, quae sic intelligi habent: esse enim habet compositionem ad principium essendi et ad ipsum quod est, si scilicet sit suum esse, quod in Deo solum habet locum. Et hoc patet, quia esse album, album non est accidens habito respectu ad albedinem, sed est principium esse albi, in quo solum essentialiter est albedo. Ad ipsum vero subjectum comparatum, esse album est accidens; per quem modum esse rei animatae habito respectu ad principium ut est principium talis esse, esse non est accidens, quia natura ejus ut principium est, in homine salvatur, scilicet esse. Primum enim principium formale essendi est ipsum esse, per quod quaelibet forma dicitur causare esse. Unde forma non dat esse suae materiae, quae dicitur actus, nisi per ipsum esse, quod est etiam actus ipsius formae; quod tamen dicitur sequi ipsam formam, quia in ordine unionis ita se habet, quod esse absolutum nulli materiae unitur, cum in nullius compositione cadat. Et ideo per formam necesse est esse tribui materiae et non per se. Inde est quod respiciendo ad ordinem inhaerentiae, forma est principium ipsius esse; respiciendo vero ad ipsam actualitatem materiae sive compositi, esse est prius quam ipsa forma. Sic igitur si fiat respectus ad ipsum principium essendi in composito, esse non est accidens; si vero fiat respectus ad ipsum quod est, ut ad Angelum vel ad quodcumque aliud, illud esse est accidens; quia

(1) *Legendum, ut videtur, et ideo immediate sequitur essentiam animae.*

ipsum quod est intelligi potest et defini per propositionem indicantem quod quid est, etiam si non sit; nec per aliquam dici posset ipsum esse, cum suum esse non sit ipsum ens. Unde in Angelo licet idem sit id quod est, suppositum scilicet, et ipsum principium essendi; non tamen propter hoc quod accidentaliter se habet respectu unius, est accidens respectu alterius: differunt enim in Angelo esse et suppositum secundum rationem; et hoc sufficit ad propositum.

*Utrum potentia sit de genere actionis aut qualitatis.*

Quod autem dictum est ibid. ad idem genus pertinere potentiam et actum, et per hoc ostensum est potentiam animae esse accidens, quia operatio sua est accidens, plus concludere videtur: per hoc enim non solum potentia animae accidens esse ostenditur, sed ad praedicamentum actionis pertinere: quod verum est, sic enim principium actionis per reductionem ad idem genus cum actione pertinebit. Sed hoc non sufficit ad propositum ostendendum; quia nihil prohibet aliquid esse per se in genere aliquo, et per reductionem in alio: sicut albedo vel scientia est per se qualitas, sed per naturam alterius ad relationem pertinet seu spectat.

Ex quo ostendi videtur potentiam animae, ut operans est esse in genere actionis per se, tamen in genere qualitatis; sed ubi ponuntur duo principia secundum ordinem in agendo, et non secundum ordinem ad essendum, alterum necessario est accidens, ut patet de forma substantiali in igne, et de ejus calore. Cum ergo esse animae sit primum essendi principium et potentia proximum, ex quo esse animae est in genere substantiae, potentia erit in genere accidentis, scilicet qualitatis.

*Utrum unus articulus fidei possit probare alium articulum.*

Quod autem positum est pro exemplo quomodo ex articulis fidei potest argumentum sumi ad probandum ipsos articulos fidei, sic facit Apostolus I Corinth. 15, ubi ex resurrectione Christi probavit resurrectionem communem futuram, non ita intelligitur quin resurrectio communis sit articulus fidei, cum in Symbolo Apostolorum ponatur inter articulos fidei unde resurrectio probari non potest, licet per unum articulum alius defendi possit apud illum qui unum concedit alio negato: unde non placet nobis, quod dictum est in prima parte Summae, quod Apostolus arguit ex resurrectione Christi ad resurrectionem communem probandam, quia ejus oppositum expresse dictum est paulo ante, ubi dictum est, quod theologia non argumentatur ad principia sua probanda, quae sunt articuli fidei, et hoc verum est: ideo hic super primum librum melius dictum est.

*Utrum liber de Spiritu et Anima sit Augustini aut alicujus Cisterciensis.*

Ubi autem de frui dictum est, intitulatur liber de Spiritu et Anima Augustini: in quaest. vero de anima, dictum est, quod ille liber ejusdem Cisterciensis est; quae simul stare non possunt; ideo ultimum veracius dictum putamus.

*Utrum in Deo sint transcendentia.*

Postea dictum est, quod res est de transcendentibus, et ideo communiter se habet ad relativa et ad absoluta, unde possunt dici tres res in divinis propter diversitatem relationum quae ibi possunt inveniri, et non propter absoluta: quod non ideo dictum est, quod in Deo sint transcendentia in quantum transcendentia; sed ideo dictum est quod sicut alia nomina transumptive dicuntur de Deo, ita et illa; et tanto convenientius, quanto indeterminatius se habent ad res.

*Utrum materia individuetur per accidentia, aut per se sit principium individuationis.*

In prima parte dictum est materiam individuari per accidentia quaedam, cum tamen frequenter inveniatur dictum materiam esse principium individuationis: quae sic intelligi habent. Certum enim est ibi individuationem originari ubi terminatur actio ipsius intellectus abstrahentis; hoc autem est quidditas ipsa singularis ut singularis est, quae accipitur a ratione particulari quae est infima hominis, loco cujus in brutis est aestimativa; ipsa vero accidentia a sensu capiuntur. Unde apud nos duo participant ad individuum in genere substantiae: scilicet subsistere in primo gradu subsistendi, quod est fundamentum omnium aliorum proprium, unde et prima substantia a Philosopho vocatur, quia non est aliqua substantia prior de qua praedicetur, sed sola materia per quam individuetur: divisio enim formalis est per supposita ejusdem speciei: aliud est quod sensu demonstratur hic et nunc. Eadem vicinitas quae est inter rationem particularem nominis, et sensum suum, cujus solius est differentias loci et temporis percipere, necessario erit inter quidditatem particularis, ut particulare est, et sua accidentia per quae ad locum et tempus determinatur. Quantum igitur ad hic et nunc pertinet, quantitas individuationis est principium; quantum vero ad ipsam talem quidditatem spectat, materia est principium individuationis. Impossibile est tamen materiam uniri formae sine quantitate, quia primus gradus materiae per formam est corpus, licet ipsa quantitas non sit principium essendi sui subjecti.

*Utrum dimensiones interminatae sint in materia, aut materia nuda sine omni forma, possit diversitatem habere.*

Consequenter cum de simplicitate animae ageretur in primo Sententiarum, materiam nudam ab omni forma nullam diversitatem habere dictum est, quia esse substantiale praecedit omne esse accidentale. In 2 vero Senten. et 4, et in lib. cont. Gentil. dictum est dimensiones indeterminatas esse in materia: aliter enim non possunt diversae formae in materia recipi, si nulla penitus in ea diversitas esset; has autem dimensiones, 7 Metaph., removimus. Hic autem ita accipi debent. Cum enim de resurrectione ageretur in quarto, et quantitas dimensionis sit principium individuationis, ut dictum est, non resurgeret idem individuum numero, nisi, redirent eadem dimensiones numero; quod non posset contingere per agens naturale, sed per agens divinum. Unde, cum non sit in homine nisi una forma tantum, anima scilicet, quae quanta non est per se vel per



accidens, sicut aliae formae naturales sunt solum a parte materiae, ponendae sunt dimensiones hae non aliter constare quam in potentia. Et ideo non placet, quod usi sumus materia Commentatoris in 2 sent. cum de eis esset sermo, ne propter hoc videamur eas ponere modo Commentatoris. De hoc etiam in nostris quaestionibus agitur, ubi quaeritur de Veritate, utrum divina providentia disponantur corpora inferiora per corpora caelestia. Ibi enim arguitur super opinionem Commentatoris, et respondetur, quod dimensiones intelliguntur in materia ante formas naturales non actu completo, sed in actu incompleto; et ideo sunt prius in via generationis. Cujus ratio est, quia cum forma aliqua perficit materiam secundum diversos gradus, in gradu primo qui est imperfectior, sequuntur dimensiones. Et quia hic gradus incompletus actus est respectu gradus perfectioris, erit prior in via generationis; ideo praedictae dimensiones in via generationis praecedunt formas naturales secundum gradus perfectos: propter gradum enim naturae perfectum dicuntur formae naturales secundum quod in gradu naturae perfectioris est principium motus et actionis: nihil enim movet et agit aliquid nisi in gradu naturae perfecto existens, cum natura sit principium motus. Et licet dimensiones tales originentur in tali gradu tantum; tamen ut in subjecto sunt in ipsa re perfecta, et non tantum in ipso gradu imperfecto. Et isto modo posset opinio Commentatoris salvari, si tamen opinatus fuisset illas per generationem rei resultare, et non praecedere omnem formam substantialem. Et per hunc modum posset salvari quod dicit materiam non posse spoliari his dimensionibus; quia cum materia non sit sine forma, impossibile est eam esse sine primo gradu quem facit forma. Primus autem gradus est corporeitatis: unde non est materia nisi in corporibus. Sed ponere aliquam essentiam quantitatis sequi materiam, et ab ea non spoliari materiam, impossibile est, et opinio antiquorum negantium formas substantiales, ut dicitur in 7 Metaph. Isto igitur modo ubicumque aliquid de hoc invenitur, exponatur.

*Utrum in omni materia secundum capacitatem suam perfectio infundatur.*

Consequenter dictum est, quod in omni materia secundum capacitatem suam perfectio infunditur: in quo innui videtur formam ordinari ad materiam, et e converso, cum tamen forma sit finis propter quem materia sic vel sic disponitur: et hoc frequenter invenitur dictum: utrumque enim horum verum est: nam agens disponit materiam ut sit apta recipere formam, et illo modo forma finis est: et iterum receptum est in recipiente per modum recipientis: et sic limitatur forma secundum capacitatem materiae, et sic est ordo formae ad materiam.

*Utrum anima sit tota in toto, et in qualibet ejus parte.*

Consequenter, cum quaereretur utrum anima sit in qualibet corporis parte tota, in solutione secundi argumenti dictum est quod perfectibile debet esse proportionatum suae perfectioni. Et ideo sunt partes in animali perfecto distinctae propter distinctionem potentiarum animae perfectae, quasi potentiae illae essent perfectiones talium partium. Quod

verum est de perfectione accidentali, per quam partes immeritae se habent ad operandum; non autem de perfectione substantiali, quia illae potentiae non sunt formae substantiales, immo quaelibet pars habet esse ab ipsa essentia animae: unde licet unum sit esse ipsius totius et cujuslibet partis, quia una tantum est forma; diversae tamen sunt perfectiones in diversis partibus quae sunt principia immediata operationum determinatarum. Unde visiva potentia non est forma substantialis oculi dans ei esse substantiale, licet perficiat eum ad videndum; sed ipsa essentia animae propter sui perfectionem: unde una forma est constituens animal omnibus modis quibus constitui potest: unde nisi fuerint diversa organa, quot ipsa necessario requirit, non fieret animal per aliquid ejus: unde nulla pars animalis perfecti est animal nec actu nec potentia. Anima vero in animalibus imperfectis non requirit tantam diversitatem in partibus vel in organis, quia non est in eis multitudo operationum: et quia non requirit tantam diversitatem in partibus, ideo talium corpus non est omnino unius formae, ut ibid. dictum est, quia non constituit animal omnibus modis quibus constitui potest, quia animal potest fieri per aliquid ejus: si enim dividatur animal anulosum, ut ibi dicitur, forma quae prius erat in actu una, jam fit multae in actu: unde certum est quod partes in toto erant animalia in potentia, quod non contingit in animali perfecto: et ideo non est tanta unitas talis formae, quanta animae perfectae. Et propter hoc dictum est, quod corpus in talibus est quasi unius formae; non quod intellexerimus ibi esse plures formas nisi in potentia, quae ad actum per divisionem dueuntur. Quod ergo de unitate formae in diversis locis diximus, necessarium credimus, et ejus contrarium impossibile: sed de hoc qui in uno loco nos respexit, non statim sententiam ferat, cum multa in unum contulerit, inconveniens reperiet.

*Utrum anima uniatu corpori mediantibus dispositionibus.*

In prima parte dictum est, animam non uniri corpori mediantibus quibusdam dispositionibus; in 1 vero Sent. distinct. 2, solutionis generalis arg. ult. dictum est dispositiones manere cum forma substantiali. Et frequenter sermo de hac materia reperitur; et haec sibi repugnare videntur. Invenitur etiam quod dispositiones praecedentes in adventu formae substantialis corrumpantur. Primo ergo sciendum, quod prima duo sibi non repugnant: quia quando agens intendit suam similitudinem in materiam aliquam imprimere, virtus sua immediatior est ipsi materiae, quam accidens quod agit in virtute formae substantialis; quia virtus agentis conjungit secundum cum passo, forma autem substantialis sequitur suam virtutem, et non ipsum accidens. Et ideo si quando ex aëre generatur ignis, diceretur idem calor manere qui disponit aerem ad ignem, quod tamen impossibile est: nam propter hoc sequeretur formam ignis recipi in materiam mediante calore. De secundo, scilicet quomodo dispositio maneat, cum frequenter inveniatur dictum, dispositionem corrumpi in adventu formae substantialis, in solutione primi argumenti praedictae quaestionis sufficienter dictum est.

*Utrum philosophi divinam naturam cognoscentes, divinam generationem, qua Pater natura generat Filium, cognoverunt.*

Consequenter eum quaereretur utrum Pater genuit Filium natura, nam dist. 6, in sol. tert. arg. dictum est, quod philosophi ideo non cognoverunt divinam generationem, licet cognoscerent divinam naturam, quia non comprehenderunt eam. Si autem comprehendissent naturam Dei, et generationem novissent. Ex quo videtur quod nec beati in patria illam generationem sciunt, quia constat quod non comprehendunt naturam Dei; licet idem in prima parte Summae et in quaestionibus nostris docuimus. Quod posset concordari per hoc ut videtur, quia comprehendere dicitur, ut dicitur in 1 part. Sum., pro termino scilicet insecutionis, quando scilicet tenetur: et sic beati in patria habent meritum spei, et noscunt illam ineffabilem generationem: et sic philosophi non comprehenderunt divinam naturam, unde non attigerunt ad illam generationem. Alio modo dicitur comprehendere proprie, quod est concludere aliquid in terminis continentis. Et ideo illo modo nihil comprehendit Deum, quia ipse excedit omnem intellectum; et licet sic non comprehendatur, tamen generatio illa per primam comprehensionem satis manifestatur beatis; et sic in prima part. Sum. dictum est de comprehensione. Sed hoc non sufficit ad illa concordandum: quia in prima parte dictum est, quod qui ipsum comprehenderet, sciret rationes omnium rerum quae ab ipso productae sunt: quod necesse est intelligi de illa comprehensione qua nullus cum comprehendit sicut ipse seipsum: unde beati in patria omnes rationes quae in ipso sunt, non cognoscunt, etsi ipsum comprehendant primo modo; et idem dictum est in primo Sententiarum; per quod manifestum est comprehendere non posse accipi primo modo, sed secundo. De hoc enim dicitur ibid. quod tunc omnia opera divina cognoscent. Unde melius fuisset sic distinctum esse, quod cognoscere naturam divinam est duplex. Uno modo per revelationem; et sic non cognoverunt philosophi, quia tunc cognovissent ipsam generationem, quia fides dicit Deum esse aeternum, trinum et unum.

*Utrum una pars sit in potentia ad aliam, vel omnes partes sint in potentia respectu totius.*

Alio modo per effectus et cetera quae dicuntur ibidem, invenitur in prima parte Summae, ubi de divina simplicitate agitur quaestio. 5, sol. gen. 7 arg., quod quandoque una pars est in potentia ad aliam, sicut materia ad formam, vel omnes partes sunt in potentia respectu totius: alibi reperitur frequenter; ideo omnes partes dicit in potentia esse in toto, non respectu totius, sed ut per se sint actu: et utrumque verum est: omnis enim potentia ad actum ordinatur. Actus autem dupliciter: participative et simpliciter. Unde cum partes dicuntur esse in potentia respectu totius, non est intelligendum quod partes se habeant potentialiter ad actum participatum; nam in toto existentes habent illum actum; respectu enim ejusdem nihil est simul actu et potentia. Hoc igitur per similitudinem dictum est, quia imperfectum respectu perfecti se habet sicut potentia respectu actus; partes enim sunt deficientes a perfectione totius. Respectu

*S. Th. Opera omnia. V. 17.*

vero actus absoluti, proprie sunt in potentia, quia nulli nondum habent in toto existentes; et hoc modo in 1 Phys. expositum est a nobis quomodo partes sunt in potentia respectu totius.

*Utrum potentia generandi sit essentia vel proprietas.*

Consequenter, ubi de potentia generandi quaesitum est, dictum est quod essentia ut est paternitas, est principium quo Pater generat; et ideo potentia est quasi medium inter essentiale et respectivum. In prima vero parte Summae eodem argumento dictum est potentiam generandi esse essentiam principaliter, nec etiam essentiam inquantum est idem relationi, ut ex aequo utrumque significet; quia ut ibid. dicitur, paternitas non est quo Pater generat, cum sit quasi quaedam forma individualis, et ita illa valde sibi repugnare videntur: nec solum illa, immo etiam ea quae in eadem parte dicuntur, nisi intelligantur. Eadem namque quaestione arg. 4 dicitur, quod potentia nihil aliud est nisi principium actionum notionalium: et cum Pater sit principium generationis, et Pater et Filius principium spirationis; in Patre erit potentia generandi, in Patre et Filio potentia spirandi. In quaest. vero 56, arg. 4 dicitur, quod sicut Pater et Filius sunt unus Deus propter unitatem formae significatae per hoc nomen « Deus »; ita sunt unum principium propter unitatem proprietatis significatae per hoc nomen « principium »; ubi expresse dicitur principium significare proprietatem, non essentiam. Si igitur sic arguatur, principium significat proprietatem, non essentiam, cujus oppositum dicitur directe argumento ejusdem quaestiois, ut allegatum est prius. Ad horum igitur evidentiam considerandum est, quod proprietas personalis est semper constituens primo, et distinguens postea naturaliter: et prout est constituens, se habet per modum differentiae, sive formae particularis, cujus est esse incommunicabilis. Et isto modo idem est cum essentia, sed ratione differens; unde non potest esse principium quo aliquid producat, quia in ipso non fit assimilatio, cum sit incommunicabilis: et ideo dicitur in Summa, quod essentia non est principium quo Filius generatur secundum quod est cum paternitate: paternitas namque constituit et distinguit Patrem, ut dictum est. Inquantum autem constituit, ut proprietas particularis est, et sic nullo modo erit principium quo Pater generat, aliter generaret Patrem; inquantum vero distinguit, est relatio originis. Sed in relatione est duo considerare: id scilicet unde relatio est; et hoc sequitur actionem ipsam secundum modum intelligendi in divinis. Unde nec est sic paternitas principium quo Pater generat, quia sic paternitas sequitur ejus generare. Aliud autem est intelligere in relatione: scilicet quod est praeter quod in omni relatione reperitur. In divinis tamen idem est utrumque; in creatoris vero realiter differunt. Essentia igitur divina est id quod est in paternitate praeter id quod refertur; et eadem essentia est id quod est in filiatione praeter id quod refertur: et certum est, quod alia ratione est essentia in paternitate praeter id quod refertur, et alia in filiatione. Essentia igitur secundum quod est id quod est in paternitate praeter id quod refertur, est principium quo Pater generat: non autem omnino secundum quod est praeter id quod refertur, sed secundum quod est praeter id quod refertur in paternitate tantum.

Unde essentia est quasi principium primum, paternitas vero proximum, sicut humanitas: apud nos enim humanitas et potentia generativa semper communicatur, sed potentia generativa non est semper. Et ideo potentia ex aequo significat essentiam et relationem; immo principaliter essentiam, quia essentia communicatur, et hoc pertinet ad naturam principii generationis. Quod autem et Pater et Filius dicuntur unum principium, non est eo quod conveniant in aliquo quod personas eorum constituat; sed quia conveniunt in una relatione respectu Spiritus sancti. Ex quo manifestum est quod id in quo conveniunt, cum non sit particulare constituens, potest esse principium productionis personarum, licet forma particularis constituens non possit. Ista autem notio licet sequatur relationem in quantum est relatio fundata super actum, praecedit tamen in quantum est idem cum Patre et Filio: sed quia non particulariter se habet ad eos, quia non constituit eorum personas, potest esse principium quo spirant, sed non communicatur, quod est propter oppositionem ad spirationem passivam. Et ideo essentia non est id quod est praeter relationem in communi: tamen spiratione est principium, quo Pater et Filius spirant Spiritum sanctum. Ibidem ibi in scripto in fine ejusdem articuli dictum est eandem esse actionem essentiae et proprietatis Patris; ubi nomine proprietatis non est intelligenda forma particularis: sed magis hoc est dictum ad similitudinem proprietatis speciei; talis enim proprietas magis convenit cum essentialibus rei, quam proprietas individui: paternitas enim in Deo similitudinem habet cum forma particulari rei in quantum talis est, non est de intellectu essentiae rei, sicut haec anima non est de intellectu hominis. Haberet etiam convenientiam cum proprietate speciei quae concomitatur essentiam semper; et hoc modo ultimo potest esse eadem actio essentiae et proprietatis Patris: sed essentia communicatur, proprietas vero non; quod est propter oppositionem quam habet in se cum sit relatio. Diligenter igitur ubi talia inveniuntur, hoc modo distinguantur, et nihil dubietatis erit deinceps.

*Utrum per naturam immutabilitatis et temporis, aut naturam interminabilitatis et etymologiae ipsius nominis perveniatur ad naturam aeternitatis.*

Consequenter cum de aeternitate ageretur in primo Sententiarum per etymologiam nominis ipsius et per naturam interminabilitatis processum est. In prima vero parte Summae per naturam immutabilitatis et temporis perventum est ad naturam aeternitatis: et in 1 lib. contra Gentiles ex immutabilitate Dei ostensa in 14 art. et in 2<sup>o</sup>, statim enim aeternitatem intulimus, uterque enim modus satis conveniens est doctrinae.

*Utrum Spiritus sanctus per hoc differat a Filio, quia esse ab altero per generationem et esse ab eo per spirationem non possunt uni convenire.*

Consequenter, cum de Spiritu sancto ageretur, dictum est dist. 10, art. ult., quod esse ab altero per generationem, et esse ab eo per spirationem non possunt uni convenire, ut per hoc solum dif-

ferret Filius a Spiritu sancto, licet Spiritus sanctus non sit ab eo. Et statim post, distinct. 11, art. 1, ostensum est Filium et Spiritum sanctum non posse ab invicem distingui per diversum modum procedendi a Patre; sed requiritur ad eorum distinctionem quod alter eorum sit ab altero. Et iterum distinct. 15, art. 2, dictum et ostensum est, quod non esset differentia inter processiones ipsas, nisi alter eorum esset ab altero. De hoc etiam in lib. contra Gentiles, sufficienter disputatum est. In prima vero parte sum., qu. 56, art. 2, videtur recte contrarium dici ei quod dictum est distinct. 10, art. ult. idest Sent.: In summa autem dicitur, quod si in Filio et Spiritu sancto non esset invenire nisi duas relationes quibus uterque referretur ad Patrem, illae quidem invicem non essent oppositae, sicut nec duae quibus Pater refertur ad Filium et Spiritum sanctum: unde distinguerentur Filius et Spiritus sanctus praeter illas duas relationes oppositas: et hoc firmiter tenemus. Cum enim oppositae relationes quae tantum in una persona sunt, Patre scilicet, ad invicem non opponantur, non est sufficiens ratio quare aliae duae in alia persona esse non possint. Nunquam autem hoc melius ostendimus, quam distinct. 15, art. 2: ubi necessario ostensum est ipsas processiones non posse differre a se nisi per personas praecedentes. Ex quo manifestum est personas non differre per processiones ipsas; alias foret circulus in demonstratione ipsius. Quod ergo dictum est distinct. 10, art. ult. Anselmi concordat, et verum est secundum quod personae differunt penes attributa; ad quae etiam pervenerunt philosophi, licet attributa proprie sint naturae non personarum, vel penes appropriata etiam: dicere enim generationem differre a processione Spiritus sancti, quia generatio est actus naturae, processio vero voluntatis, cum natura et voluntas sint de absolutis, in quibus nulla est differentia realis, sed tantum rationis, nihil aliud est, quam Filium et Spiritum sanctum differre secundum attributa: ea enim quae naturae sunt, attribuuntur Filio, quia de ratione Filii est similitudo in natura: et ea quae amoris, Spiritui sancto. Unde secundum hoc non differt Filius a Spiritu sancto, nisi secundum rationem tantum: quae diversitas rationis non causabit majorem diversitatem quam ipsa sit. Si vero dicatur quod est differentia secundum appropriata, quia ea quae sunt intellectus vel naturae appropriantur Filio, et ea quae voluntatis sunt, Spiritui sancto; et sic differunt ab invicem secundum appropriata: adhuc sequitur quod aliunde differant realiter; quia differentia per appropriata supponit differentiam secundum propria. Verbum igitur Anselmi intelligi debet de differentia illa quae est penes attributa vel appropriata. Addendum est ergo in 1 Sent., dist. 10, articulo ult., ubi dicitur illa duo uni non posse convenire, uni videlicet secundum rationem: et non erit ad id quod dicitur in prima parte Summae aliqua oppositio. Unde exempla posita non sunt convenientia, quia natura et ars differunt realiter, similiter putrefactio et seminatio. In divinis autem non est aliqua realis differentia absolute.



*Utrum Pater et Filius sint spiratores Spiritus sancti, aut unus spirator.*

Consequenter dictum est Patrem et Filium esse spiratores Spiritus sancti, non spiratorem. In prima vero parte Summae concessum est eos esse unum spiratorem. Utrumque namque verum est: spirator enim nomen verbale est, et nomen substantivum: nomen autem substantivum sequitur formam a qua imponitur in unitate et pluralitate; in divinis autem una est forma; sive sit essentia, sive natura, sive notio illa communis Patri et Filio. Unde Pater et Filius debent dici unus spirator propter naturam nominis substantivi. Et quia idem nomen est verbale, trahitur magis ad significandum per modum actus. Actus autem distinguuntur penes supposita quorum sunt. In divinis autem duo supposita spirant: unde Pater et Filius sunt duo spiratores, non unus.

*Utrum caritas pertineat ad praemium essentiale: seu utrum beatitudo consistat in actu intellectus vel voluntatis.*

Consequenter distinct. 25, ubi quaeritur an divinae personae mittantur ad beatos in patria, dictum est in respons. ad quaest. quod caritas pertinet ad praemium essentiale; in 4 vero lib. Sentent., in 2-2, et in 3 contra Gentiles, quod essentia beatitudinis posita est in actu intellectus: frequenter etiam in aliis locis, ubi de hoc principaliter non intendebatur, idem dictum est. De hoc in nullo dubitamus, cum et veritas evangelica hoc doceat, Joan. 17: « Haec est vita aeterna etc. » Hoc etiam non solum ordo intellectus ad voluntatem, sed etiam ordo meriti ad praemium ostendit: meritum enim et praemium se habent per modum dati et accepti: in comparatione enim ad illum a quo est meritum, in ratione accepti, praemium vero in ratione dati: in comparatione ad ipsum qui meretur meritum est ut datum, et praemium ut acceptum: datum enim dicit diversitatem inter dantem et eum cui datur, sed non inter dantem et id quod datur, quia idem potest dare se: acceptum vero non dicit diversitatem inter accipientem et id quod accipitur, quia aliquid potest accipere se, sicut omnis creatura accipit se a Deo. Angelus autem non solum esse suum, sed etiam seipsum accipit a Deo, idest essentiam suam, cum tamen ipse sit essentia sua. Praemium igitur aeternum necessario erit ut acceptum ab eo qui meruit, meritum vero ut datum ab eodem. Unde cum actus intellectus sit ab intellectu, actus vero voluntatis sit a voluntate, ratio videtur docere meritum principaliter consistere in voluntate, praemium vero in intellectu. Quanto vero plus bonae voluntatis habuimus et amoris, tanto capacior erit intellectus, et plus praemii recipiet: amor enim dilatat intellectum et voluntatem. Cum autem aliquis amat intelligere aliquid, quanto plus amat, tanto plus et facilius intelligit. Et ideo Angeli superiores nomen acceperunt non ab eo per quod acceperunt quod habent, sed ab eo per quod id meruerunt: per hoc enim excitamur ad merendum gradum quem ipsi habent. Hoc tamen nomen specialiter impositum est propter accessum quemdam specialem illius ordinis ad divina: sic enim dicitur ult. cap. de divinis Nominibus: « Ordo divinae sapientiae est conjungere fines primorum

« principii secundorum: » et hoc patet discurrendo a summo rerum usque ad infinitum. In divinis autem personis non est ultimum, cum non sit ibi ordo prioris et posterioris; tamen Spiritus sanctus dicitur tertia persona, in quantum est a duobus. Ideo ordo supremus in creaturis per similitudinem quamdam ad Spiritum sanctum quasi vicinior ostenditur, unde a proprietate Spiritus sancti nominatur, ipse enim amor dicitur. Vel ideo sic nominatur, quia ignis divinas proprietates maxime significat, ut dicitur in fin. cael. Hier.: et ideo vocantur Seraphim, idest ardentes, propter accessum ad Deum. Unde ex nominibus Angelorum non potest sumi ratio cogens ad ostendendum in qua potentia beatitudo essentialiter consistat. Quod ergo dictum est 1 Sent., distinct. 13, non ostendit quod essentia beatitudinis sit in voluntate; sed quod caritas pertinet ad substantiam gaudii, quia inseparabiliter concomitatur illam visionem beatam: quod tamen non est verum de multis aliis gaudiis accidentalibus, sicut est de notitia illorum quae sciuntur per species creatas, et ideo sibi succedunt. Et ideo dilectio et amor non ita distant a gaudio essentiali, sicut notitia talium rerum; et pro tanto dictum est caritatem pertinere ad praemium essentiale et spirituale.

*Utrum mundum esse perpetuum sit problema neutrum.*

Consequenter, cum de Trinitate mundi ageretur, diximus in 2 Sent., neutram partem habere rationes necessarias: et idem in prima parte Sum. asseruimus, et in libro contra Gentiles: et de hoc etiam specialem tractatum fecimus, in quo ostendimus non sibi repugnare esse a Deo secundum totam substantiam, et non habere durationis principium: hoc enim maxime impediret processum Philosophi, qui dicit ad neutram partem rationes haberi. Ex repugnantia enim intellectum est potissima demonstratio ducens ad impossibile, sicut potissima demonstratio ostensiva est per intellectum fieri rationem indicantem quod quid est. Unde cum ventum fuisset ad solutionem rationum utriusque partis, illam de infinitate animarum aliis praetulimus in difficultate: non quod difficile sit ei respondere, sed quia tot in ejus solutione passi majus inconveniens, quam ipsa praetendat: magis enim fidei derogat unum esse intellectum, quod ponit Averrois, quia sic periret diversitas praemiorum (et in hunc defectum venerunt Averroistae Parisiis nostris temporibus, contra quos scripsimus de unitate intellectus), quam ponere infinitas animas actu, quod posuit Algazel in Metaphysica sua: quia licet essent infinitae, non propter hoc aequipararentur Deo in ordine rerum infinitarum in infinitum, foret ista infinitas subjecta infinitati divinae. Nihilominus et hoc contra fidem est, et contra Scripturam generalem (1) a qua fides in hoc exordium sumpsit. Unde opinio Philosophi erronea fuit, ponendo mundum aeternum; non tamen habuit eam tanquam conclusionem demonstrationis, sed erravit putans eam veram, non auferens titulum creationis a Deo. Praedictae igitur rationis responsionem aliorum in 2 Sent. et in 2 cont. Gentil. attulimus. In prima vero parte Sum. post alias respon-

(1) *Porte Genesis.*

siones, et in praedicto diximus eam esse particularem; et propter hoc non concludere intentum: quae quidem responsio non consentit dictis ibid.: quia haec responsio ad minus supponit posse demonstrari hominem non esse ab aeterno, et ejus oppositum esse impossibile: cum tamen in sol. dictae quaest. dictum sit, quod non potest demonstrari quod homo, aut caelum, aut lapis non fuerint. Quod quidem dictum de homine, non stat cum praedicta responsione. Unde scire debent adversarii, quod haec responsio non fuit intentionis nostrae: diversitas enim rationum ad hoc inductarum ostendit, quod nulla sufficiens est vel demonstrativa. Unde contingit, quod cum unus unam, alius aliam intulit rationem, quare huic dissentit iste, et ille alteri, ex fatuitate dicentiam irrisio oriatur apud infideles. Maneant igitur ipsi in rationibus quas putant sufficere, quod verum est si sint demonstrationes; mihi autem solummodo sufficit fides Christi: nec rationi humanae praesto aures, ubi Deus loquitur: antequam quicquam foret a principio, cum ipso eram cuncta componens.

*Utrum possint esse infinitae animae actu.*

De praedicta ratione in quaestionibus nostris Disputatis ubi quaeritur, An Deus possit infinita facere, et in alia quaestione ubi quaeritur, An possit infinita scire, diximus quod si esse actu repugnat ei quod est infinitum esse in actu, non potest Deus infinita actu facere. Si autem non repugnat, potest. Sed utrum possint esse actu, diximus differendum usque alias: et idem diximus in praedicto tractatu, quod nondum erat ostensum infinita actu esse non posse, nec adversarii nobis hoc ostenderunt, quod tamen nos postea in prima parte Summae ostendimus recitata opinione Algazelis, et certum habuimus quod infinita esse non possunt etiam per accidens, ut ibi ostensum est. Si igitur praedicta responsio non placet eis, quae nunc nobis sufficit, ut dictum est, quia Aristoteles ponit mundum omnes species rerum habuisse a principio, unde non mundus ab aeterno potuit poni perfectus, nisi homo esset qui est species perfectissima universi. Et iterum cum nesciam quid Aristoteles respondeat huic rationi, non enim habemus quicquid fecit de substantiis separatis, licet certum sit ipsum infinita nisi potentia tantum posuisse, ut patet in 1 et 2 Phys. Cogitent adversarii quid huic rationi objiciant: omnes enim fideles dicunt, quod in principio creavit Deus caelum et terram, quod beatus Gregorius prophetiam de praeterito esse dicit, et Apostolus 2 Petr.

dicit, « quod non voluntate humana aliquando allata est prophetia, sed Spiritu sancto inspirante, locuti sunt sancti Dei homines. » Unde constat fidelibus, quod non ratione humana, sed Spiritu sancto inspirante, locuti sunt sancti Dei. Unde constat fidelibus quod non ratione humana, sed inspiratione Spiritus sancti allatum sit: « In principio creavit Deus caelum et terram. » Quia ergo hoc ratione humana sciri non potuit, si videtur inconueniens mundum ab aeterno sine homine esse, qui postea factus est in tempore, dicatur, quod natura universalis non patitur aliquod inconueniens in universo, quaecumque sit illa virtus, ut Deus, sicut nos ponimus, sive anima mundi, ut alii posuerunt, sive quaevis alia talis, quam semper necesse est talem habere potestatem in universum, ut ipsum ab omni inconuenienti custodiat: quia defectus qui accidit in particulari, ut mors animalis vel hujusmodi, ad perfectionem universi pertinet; defectus autem qui redundat in universo ut est infinitas in actu, secundum eos non possibile est esse in universo. Posito ergo, quod ad perfectionem universi esset homo ab aeterno, sicut alia animalia, et quod non generaret nisi in tempore, ne accideret inconueniens de actu per virtutem universalis agentis, cujus est universum perficere, et omnia inconuenientia ab eo excludere, non remaneret quid objiceretur, nisi quod homo perfectus generare potest, sicut et alia animalia. Sed huic respondet Philosophus, quod generatio non est nisi ad salvandam speciem quae in uno salvari non potest. Natura igitur universali conservante hominem ne inconueniens accideret de infinitate propter bonum universi, differre potuit generationem ab eo: et tamen universum perfectum foret in omnibus speciebus, secundum Aristotelem: per Scripturam enim sacram docemur Adam immortalem factum per originalem justitiam. Unde licet eum Deus fecisset ab aeterno, quia non repugnat ab aeterno habere esse ab alio, ut frequenter ostendimus, potuisset Adam existere ad perfectionem universi, et non generare, nisi usque ad tempus a Deo sibi statutum, ne in universo inordinatio aliqua sequeretur. Cujus contrarium sola fides docet, et non aliqua humana ratio. Quod igitur in quaestione ubi quaeritur, an Deus posset infinita facere, dictum est post exemplum de circulo plumbeo, qui non movetur, non quia circulus, sed quia plumbeus. Si igitur infinitum actu esse posset secundum rei naturam et secundum meam opinionem non placet nobis: non enim opinamur hoc possibile esse, cum ejus oppositum docuerimus in prima parte Summae.



# OPUSCULUM LXVI.

## DE USURIS IN COMMUNI, ET DE USURARUM IN CONTRACTIBUS

(EDIT. ROM. LXXIII.)

### PROOEMIUM.

Omnis homo a natura non degenerans veritatem amat, et eam scire super omnia desiderat. Quam si quis concupiscit vero corde, et eam quaesierit in simplicitate cordis sui, ipsa seipsam manifestabit; et Deus qui hoc promittit, verax est, et eam praebet diligentibus se, sicut scriptum est Sap. 6: « Praeoccupat eos qui se concupiscunt, ut illis se prior ostendat: » Eccles. 1: « Fili, concupiscens sapientiam accede ad illam, et Dominus praebabit eam tibi. » Invoco ergo ipsam, ne me errare permittat in periculum animae meae, et in laqueum aliorum; sed illuminare dignetur oculos caliginosos ipso suo lumine, sine quo nemo valet ad lumen veritatis usquequaque pertingere. Amen.

Quoniam vero in dubiis quorum veritas agnita salutaris est, et incognita periculum ingerit humanae salutis, admodum utile est veritatem investigare, et temporibus nostris audivimus multas controversias inter Doctores, non solum in naturalibus quaestionibus, verum etiam in moralibus, in quibus periculum est diversa sentire et opinari, et praecipue in illa parte iustitiae quae commutativa dicitur a Philosophis, et in ista parte ejusdem, quae vitium usurae cohibet; ideo circa hanc materiam veritatem declarare et dubia elucidare, quantum Deus donaverit, et noster labor conamine pauperis investigationis nostrae attingere poterit, in hoc opere propositum nostrum est. In primis igitur inquirendum est, quid nomine usurae in communi significetur, et quot modis accipiatur apud Doctores. Secundo de materia ejus propria, et diversis modis et speciebus ipsius. Tertio de actibus humanis, circa quos et per quos incidit. Quarto an semper sit per se malum, et unde malum in ea. Quinto de translatione usurarum, scilicet utrum transferatur in eis dominium. Sexto utrum ratio dubii vel periculi valeat excusare vitium usurae in istis contractibus, in quibus secundum aliquos est usura. Septimo quando conditiones personales et reales habeant excusare usuram.

Deinde inquirendum est de vitio usurae. Et primo quomodo incidit et quando, non solum in mutuo, sed etiam in communi, in contractibus venditionis et emptionis. Secundo, utrum in emptione reddituum ad vitam incidat vitium usurae. Tertio, de divitibus qui sylvas vendunt ad terminum,

carius quam valeant in tempore venditionis. Quarto, de his qui committunt aliis mercatoribus suam pecuniam et alia bona, ut lucrentur ex eis pro tertia vel media portione lucri. Quinto, de bonis orphanorum quae committuntur tutoribus, vel parentibus, vel communitatibus villarum ad lucrum salva sorte. Sexto de campsoribus, et commutatione campsoria, utrum in ea sit vitium usurae. Septimo de mercatoribus, qui promittunt se soluturos in nundinis pro sociis remanentibus, quia paratam pecuniam acceperant ab eis alterius generis, quae in nundinis tantum valebat. Post haec quaeretur de restitutionibus usurarum. Et primo quare fieri debent. Secundo cui vel quibus. Tertio a quibus. Quarto qualiter, scilicet utrum publice vel private. Quinto utrum eadem res numero, aut tantum aequivalens. Sexto utrum fructus et proventus ipsarum sunt restituendi. Septimo utrum cogi debent, et quomodo.

### CAPUT I.

#### *Quid nomine usurae significetur.*

Quoniam autem scientia humana a signis ad res, et a sensibilibus ad intelligibilia procedit, sicut experientia docet, et auctoritas philosophica confirmat; et modicus error in principiis, seu ignorantia ipsorum maximum in prosecutione ad finem generat errorem; ideo de usura veritatem scire volentes, necesse habemus prius intelligere, quid nomine usurae significetur apud auctores. Cum enim nomina sint signa rerum, et ipsas res nobiscum ferre non possimus in disceptatione veritatis ipsarum; ideo ipsis nominibus pro rebus utentes, necesse habemus scire quid ipsa nomina significant. Usurae vero vero nomen secundum grammaticos ab usu dicitur: et significat primo suo intellectu rem quae per usum alicujus rei acquiritur, sicut rasura ab actu radendi, et tonsura ab actu tendendi est dicta. Sed quia grammaticus circa signa principaliter versatur, non propter res quae significantur, sed propter modum significandi quem ex se denotant, verbi gratia quod aliquando per modum substantiae, aliquando per modum accidentis substantiae, aliquando per modum actus, aliquando per modum accidentis, actui signum attribuitur; ideo ipsae voces a physicis auctoribus magis referuntur ad designan-



das res aliquas determinate has vel illas in aliquo genere rerum: propter quod cum frequenter a physico vel a logico non instituantur voces significantes secundum numerum rerum, quia ars non coaequat naturam, contingit quod physicus vel logicus una voce res plures designat; et sic fit aequivocatio vocum. Aliquando vero ipsam vocem quae ex vocis suae proprietate aliquid generaliter et universaliter significat, ad aliquam rem specialem ipse physicus designandam determinat: et hoc est aliquando per similitudinem aliquam, aliquando per contrarium: verbi gratia, Nomen Apostoli ab actu mittendi generaliter dicitur; et tamen theologus hoc nomen determinat ad missos speciales Christi, et adhuc singulariter ad personam Pauli, quando sine objectione dicitur. Physicum vero vel philosophum nominamus, qui de rebus philosophatur, sive naturaliter, sive mathematice, sive theologice. Et logicum nominamus, qui de sermonibus et signis qualitercumque considerat. Et per istum modum nomen usurae accipitur a naturalibus vel moralibus philosophis et ab auctoribus divinis ad designandum rem determinatam ex usu rerum provenientem, secundum quamdam singularem usus rei rationem. Cum autem jure naturali omnis res quae in usum hominis venit, ex natura usus minuatur magis quam incrementum pariat, et maxime in materia aeris hoc apparet: ideo et usura secundum rationem propriam dicta est res quae ex usu aeris acquiritur; propter quod dicunt philosophi usuram dictam, quasi usu aeris acquisitam: unde et illud Psalm. 14: « Pecuniam suam non dedit ad usuram. » Theologi vero considerantes justis et injustis rationes, subtilius exponentes nomina haec designantia, large extendunt hujus nominis significationem ad incrementa quae proveniunt ex usu omnium rerum per similem usum et rationem, et non tantum pecuniae. Et ideo vocant doctores usuram omnem superabundantiam cujuslibet rei quam parit usus, similis ei a quo primo dicitur usura: sicut habetur Ezech. 22: « Usuram et superabundantiam accepisti, et avare proximos tuos calumniaberis, meique oblita es, » dicit Dominus Deus. » Et sic accipit ibi usuram, et superabundantiam ejusdemque rei, quae usurae rationem habet. Significat ergo primo nomen usurae incrementum, quod parit pecunia ex usu suo. Secundario autem etiam significat superabundantiam quam parit quaelibet res ex usu suo simul cum usu pecuniae. Et ideo, quia talis superabundantia aliquando oritur ex usu contra legem, aliquando vero ex usu legaliter; ideo et nomen usurae in Scripturis sacris multipliciter accipitur. Aliquando enim accipitur in malo, sicut quando fit ex usu contra legem; aliquando vero in bono, sicut quando fit ex usu legaliter. In bono etiam invenitur acceptum tripliciter. Uno modo quando est secundum legem divinae caritatis, ut illud Matth. 23: « Oportuit te committere pecuniam meam numulariis, ut et veniens ego recepissem utique quod meum est cum usura. » Alio modo quando secundum legem est fraternae caritatis, ut illud Prov. 28: « Qui coacervat divitias usuris et foenera liberali, in pauperes congregat eos: » et illud Prov. 19: « Foeneratur Domino, qui miseretur pauperi. » Tertio modo quando secundum legem est justitiae et aequitatis, ut illud Psal. 71: « Ex usuris et iniquitate redimet animas eorum, et appropinquaverunt usque ad portas mortis. »

Primo modo usurae nomine designatur superabundantia praemiorum in futura vita, respectu meritorum vitae praesentis. Secundo modo designatur superabundantia meritorum in praesenti vita respectu gratiae datae. Tertio modo designatur superabundantia poenarum juste debitarum respectu culpa praesentis: et his tribus modis dicitur usura spiritualis magis quam corporalis. Alio vero modo dicitur usura superabundantia rerum corporalium et temporalium etc., secundum quam nomen usurae significat vitium quoddam de genere avaritiae, quod gignit cupiditas, quae radix est omnium malorum. Et secundum istum modum accipiendi nomen usurae, condemnatur usura communiter a doctoribus.

Ex his ergo patet quid significetur nomine usurae, et quot modis nomen usurae accipitur a sacris doctoribus.

## CAPUT II.

### *De materia propria usurae, de speciebus et modis ejus.*

Nunc autem ad eam significationem usurae, quae superabundantiam vel incrementum rerum corporalium vel temporalium significamus, investigationem convertentes, dicamus quae primo sit ejus materia propria, et quae species, et qui modi. Materiam vero ejus propriam secundum auctores invenimus determinatam tribus conditionibus: quia omne quod in usum hominis venit, determinabile numero, pondere et mensura, est proprie et per se materia usurae. Et hoc ita declaratur. Jam enim declaratum est, quod nomen usurae, secundum quod ipsa utuntur doctores sacrae doctrinae in condemnationem, significat superabundantiam sive incrementum ex usu alicujus rei proveniens. Quare cum superabundantia sit extremum respectu alicujus aequi et justis dictum in moribus, oportet quod aequum et justum in moribus sint determinata in rebus, ex quibus superabundantia innascitur, quae vocatur usura. Si enim ipsae res ex quarum usu dicitur innasci superabundantia damnabilis, determinatae non essent in ratione justis et aequi, nec ipsa superabundantia determinari posset in ratione injustis et inaequi. Res vero quae in usum hominis veniunt, determinari tantum possunt in ratione justis et aequi secundum tria praedicta: scilicet secundum numerum, per quem aequale et inaequale determinantur generaliter in omnibus rebus, quae discreto numero distinguuntur: et secundum mensuram per quam aequale et inaequale communiter determinantur in rebus continuis, secundum quod in usum hominis veniunt, ut triticum, vinum, oleum, et hujusmodi: tertio secundum pondus, per quod aequale et inaequale determinantur specialiter in aliis rebus, quae nec numero nec mensura ita prompte possunt aequari et dividi, sicut praecipue sunt metalla et aera. Nec aliis modis, nec pluribus nec paucioribus possunt res quae in usum hominum veniunt, ad aequitatem determinari: quia omnis res talis aut est distincta et discreta ad invicem, aut non. Si sit discreta, cum omnium discretorum prima ratio discretionis sit numerus, tunc necessario secundum aequitatem, quae per numeros demonstratur, oportet ipsas res in quantum sunt discretas, aequitate determinari. Verbi gratia, si volumus aequitatem determinare inter domum et

lectum, quae sunt res distinctae et discretae, oportet quod in aliquo numero ponamus aestimationem utriusque: et si sint domus quinque, et lectus unus, tunc aequitas erit, si quinque lecti addantur domibus quinque: quinque enim cum quinque aequalia sunt; et sic est in omnibus rebus a se invicem distinctis et divisis. Si autem res sint indistinctae, jam non possunt distingui et determinari ad aequalitatem, nisi duobus modis: scilicet aut per mensuram aliquam determinatam, sicut quando res habet quantitatem per se divisibilem et tractabilem, sicut agri, panni et fructus terrae: aut per pondus aequale, sicut quando res non est facile divisibilis et tota ejus bonitas consideratur in ratione sui ponderis, ut sunt aes, ferrum, stannum, aurum et argentum. Et ideo quia superabundantia, quam vocant auctores usuram, extremum dicit respectu aequitatis in rebus venientibus ad usum hominis, oportet quod materia usurae per haec tria praedicta cognoscatur et determinatur, quia extrema communicant in materia cum mediis. Et ex hoc apparet, quod non tantum pecuniae sive numismata dicuntur materia usurae, sed etiam omnes res quae numero, pondere et mensura determinari possunt, et in usu hominis veniunt: propter quod dicit Scriptura Deut. 23: « Non foenerabis fratri tuo ad usuram pecuniam, nec fruges, nec quamlibet aliam rem. »

Sunt autem species usurae corporalis secundum leges communiter duae: una quae dicitur communiter usura sortis, quae est quando aliquod incrementum ex sorte mutuata tantum quaeritur; alia quae dicitur usura usurarum, quae proprie dicitur improbum foenus, quae etiam hominem reddit infamem. De qua tertia quaest. 7: « Infames sine ponderis, » distinctione quaest. 7: « Tria. » Et haec dicitur usura usurarum, quia etiam ipsae usurae quae sorti accidunt, alias usuras pariunt secundum proportionem ad partem sortis. Sunt etiam duo modi usurarum, alii a praedictis, a jure condemnati, scilicet usura quae dicebatur centesima, quae per annum aequabatur sorti tantum. Alia vero dicebatur emiola, ab emi, quod est medium vel malum, et olon, quod est totum annum, quia per annum pariebat medietatem sortis tantum. De his habetur 47 dist. cap.: « Quoniam multa. » Ex his ergo liquet in qua materia usura contingat, et quae et quot sunt species sive modi ejus secundum auctores.

### CAPUT III.

*Quomodo in solo actu mutui primo per se accidit usura.*

Cum autem videamus superabundantias particulares ex multis rebus quae nec nomen nec vitium tenent usurae, ut ea quae multiplicentur ex seminibus, et etiam quae aliqui lucrantur humanis laboribus et justis contractibus, jam declarandi sunt actus, per quos et in quibus superabundantia rerum, nomen et vitium usurae sibi acquirat. Quod autem principaliter ex actu et per actum commutativae justitiae, qui dicitur mutuo rem dare vel accipere, superabundantia nomen habeat usurae, probatur primo per doctores sacrae Scripturae. Legitur enim in Exod. 22, sic: « Si pecuniam mutuo dederis populo meo pauperi qui habitat tecum,

« non urgebis eum quasi exactor: » et sequitur: « Nec usuris opprimes eum. » Item Deut. 23: « Fratri autem tuo absque usura id quo indiget commodabis. » Ratione vero sic declaratur. Quia cum de usura sit sermo, secundum quod dicit incrementum ex usu alienius rei elicatum; attendendum est, quod uniuscujusque rei possessae ab homine, duplex potest esse usus, ut dicitur 1 Polit. Unus et proprius est ipsius rei usus, quo ipsa res refertur ad necessitatem humanae vitae; verbi gratia, calciamenti calciatio. Alius est usus non proprius rei, licet per se insit; sed quo per ipsam rem commutative acquiritur alia. Verbi gratia, calciamenti commutatio per venditionem vel permutationem; ut cum pecunia vel alia res per ipsam acquiritur. Cum igitur usus primo modo dictus per finem fini convenientem determinetur, eo quod omnia quae possideri possunt, propter hominis utilitatem et vitam facta sunt et creata; consequitur, quod omnis exerescentia rerum, ex usu hujusmodi rerum genita, boni rationem habet et non mali de se: propter quod ex tali usu usura quae est exerescentia habens rationem mali, per se non innascitur. Est ergo consequens, quod ex usu rei secundo modo dictae est usus, qui est ex commutatione rei ad alterum. Hic autem modus adhuc dupliciter contingit: quia aut est ad finem convenientem, aut praeter finem convenientem. Si primo modo, tunc adhuc potest fieri commutatio per modum debitum et convenientem fini. Et hoc est dupliciter. Unus et primus modus est, per modum liberalitatis solum, ut in datione gratuita: et iste modus de se nullam parit exerescentiam, eo quod liberaliter transfertur ad alterum possessio rei et usus ejus. Alius modus et debitus est per modum aequitatis et justitiae; ut quando aliqua res et usus ejus commutatur et transfertur per adaequationem justam alterius rei vel usus, sive sit pro numismate, sive pro alia re, sive pro labore corporali. Et notandum, quod res quandoque simul cum usu ejus transfertur juste, ut in venditione et emptione et permutatione; aliquando vero solus rei usus, et non possessio rei, sicut et in accommodatis rebus et localis. In his ergo quae liberaliter transferuntur juste, si ad finem convenientem sibi transferantur, nihil reprehensibile naturaliter invenitur. Finem autem convenientem dicimus, utile et necessarium vitae humanae. Ex his concluditur, quod omnis superabundantia, ex usu rerum per modos praedictos innata, in relatione ad finem convenientem, caret ratione usurae. Si autem sit praeter finem convenientem vel debitum modum, sic est usura. Quare oportet, quod ratio usurae inveniatur primo et per se in actu aliquo praedictorum, in quantum caret modo debito, vel fine conveniente, vel utroque. Constat autem, quod proprius usus rei et per se est in relatione ad finem convenientem. Quare cum in relatione ad finem convenientem omnis usus sortiatur rationem boni simpliciter, consequens erit, quod in abstractione a fine convenienti sortiatur rationem mali communiter, non hujus vel illius vel illius specialiter. Specialis ergo ratio usurae secundum quod condemnatur ut vitium, non erit ex relatione usus rei ad finem: potest enim quis usuram quaerere, sicut et furari, ut habeat necessaria vitae humanae. Sed non propter hoc excusatur a vitio usurae vel furti. Quare ex modo indebito circa aliquem usum rerum, accidit ratio usurae.

Praeterea per superabundantiam quae ex mutuo ratione mutui accidit, usura utrumque modum debitum corrumpit simul; quia illa, scilicet superabundantia quae ex collatione gratuita accidit, non habet vitium, quia non corrumpit liberalitatem: si enim corrumpet liberalitatem, jam non fuisset collatio gratuita. Similiter illa superabundantia quae ex justa permutatione seu venditione accidit, non habet vitium inaequalitatis: alias enim non fuisset venditio justa vel permutatio; illa vero sola superabundantia quae ex mutuo ratione mutui procedit liberalitatem et justitiam corrumpit: liberalitatem quidem, quia mutuum gratuitum fieri debet de natura mutui: hoc enim significatur Lucae 6: « Moteum date, nihil inde sperantes. » Item hoc significatur ratione nominis, quia mutuum datur, quando meum vel tuum mihi vel tibi datur. Item justitiam corrumpit, quia in mutuo dati redditio designatur. Et idcirco ubi plus redditur, inaequalitas paritur. Ex his apparet, quod in solo actu mutui, circa commutationem rerum, primo et per se inest ratio usurae, secundum quod a doctoribus proprie accipitur, ut superabundantia ex usu rerum condemnabilis. Invenitur autem similitudo vitii hujus et in aliis contractibus, per quamdam assimilationem superabundantiarum ad hoc vitium, ut infra dicetur.

#### CAPUT IV.

##### *Quomodo usura est peccatum mortale secundum legem divinam.*

Jam ex dictis potest adverti, unde ratio vitii in usura hujusmodi sit. In omni enim actu hominis malum accidit, aut natura, aut lege. Natura, quando praeter naturam actus factus ad finem convenientem naturae non refertur: ratio enim boni a fine convenienti inest omnibus; lege vero malum incidit quando contrarium sit legi scriptae vel infusae. Et utroque praedictorum modorum invenitur malum in usura: nam si proprius usus rerum ad finem convenientem determinetur per naturam ipsarum, etiam commutatio ipsarum quae inventa est propter usum proprium ipsarum, ad eundem finem referri debet de natura ipsius. Quare si fiat praeter finem convenientem et non referatur ad finem propter quem est, erit de natura sua habens rationem mali. Ubiunque vero fit permutatio rerum propter augmentationem ipsarum et multiplicationem, jam fit praeter finem convenientem; quia ubi intenditur augmentatio et multiplicatio, ibi finis conveniens esse non potest. Quod facile videre possumus in homine avaro et usurario, qui semper aliquid desiderat ad divitiarum suarum cumulos magis ac magis semper augendos et multiplicandos, et tamen nunquam satiatur: quanto enim locupletior est, tanto pecuniarum sitibundior; et si scriptis Philosophi credimus, tam illi deest quod habet, quam quod non habet; et ideo in opibus cumulandis per usuram nullus finis reperiri potest conveniens. Et in usura in infinitum intenditur: quia quanto magis acquiritur, tanto magis intenditur, et magis infiniti rationem habet, sicut etiam determinat Philosophus in 1 Polit., cap. 5. Quaecumque enim sunt ad finem aliquem, finita sunt. Cum ergo usura dicat superabundantiam et incrementum ex usu rei productum, per intentionem et rationem ipsius

nominis, necessario dicet id quod est praeter finem commutativae naturalis, quae tantum est propter necessitatem vitae humanae, quae de se finita est in suis indigentis. Et hanc rationem ponit Philosophus non tantum in usura proprie dicta, quam vocant Thokon, idest partum numismatis; sed etiam in omni commutativa, in qua tantum lucrum et multiplicatio rerum intenditur propter necessitatem vitae. De qua dicit Philosophus in 1 Polit., cap. 5, in fin., ubi sic dicit: duplici quidem existente lucrative, quam vocat crismaticam, hac quidem Kalipica, idest augmentativa pecuniarum propter ipsam pecuniam; hac autem iconomica, idest quae servit ad regimen domus et civitatis, vel ad bonum commune; et hac quidem natiocica, idest quae acquirit ut iconomice servet laudata, quia finita, et ad debitum finem secundum naturam ordinatur; translativa autem vituperata juste. Translativam dicit alteram commutativam, per quam res transfertur de uno ad alium, non propter proprium usum rerum et necessarium vitae, sed solum gratia lucri, ut semper multiplicentur divitiae. Et quia translationis hujus gratia factum est numisma, sicut dicit ibid. Philosophus, ideo hujusmodi vitium magis apparet in translatione numismatum, pro multiplicatione ipsorum. Et ideo sequitur, quod non est secundum naturam translatio hujusmodi, quae est ad congregandum pecuniam, per translationem pecuniae: et hoc est quod sequitur: Sed ab invicem est: quia scilicet translatio fit pecuniae pro pecunia, et non pro alia re necessaria vitae humanae: et ideo rationabilissime odio habetur talis commutatio, quae dicitur oboletica, idest ubi datur obolus, idest parvum pondus et determinatum pro alio ejusdem generis ad augmentum. Et haec odio habetur, quia ab ipsa fit possessio numismatis et usus ejus ad aliud ad quod non est factum per naturam, quia factum est translationis gratia, idest ut per ipsum fieret translatio aliarum rerum secundum quod ad vitam necessariae sunt, et non secundum quod ad congregationem et ad affectum sunt avaritiae. Et statim Philosophus descendit ad hujusmodi lucra, secundum quod specialiter fiunt per usuram proprie dictam, quam vocant Thokon graece, idest partum latine, eo quod numisma seipsum parit in usura, idest quia propter translationem sui ipsius multiplicatur et augmentatur. In mutuo vero transfertur numisma propter se tantum, et non propter finem necessarium vitae, de ratione mutui. Unde Philosophus ibid. dicit: Thokos autem fit numisma etiam numismate. Itaque et maxime praeter naturam et rationem ista pecuniarum acquisitio est, scilicet quae est per Thokos, idest in mutuo pecuniae pro augmento pecuniae. Et ideo dicit maxime respectu illius acquisitionis quae fit in contractibus aliis, causa cupiditatis tantum, quae mala est et contra naturam, adhuc pejor est quae fit per exercitium turpitudinum corporalium; sed ista est maxime contra naturam, quia obligat reum ad restitutionem acceptorum, quod non faciunt primi duo modi. Sic ergo patet, quomodo natura inest malum in usura, et propter materiam secundum Philosophum. Alia ratione possumus ostendere in usura malum incidere specialiter propter naturam actus proprii ex quo incidit, qui est dare mutuo. Cum enim mutuo dare sit actus proprius, ex cujus corruptione generatur usurae vitium, ut in praecedenti capitulo



declaratum est, et hujusmodi actus sit actus liberalitatis et gratiae, ut ostendimus, necessario quicquid actui accidit quod liberalitatem tollit, ipsum actum a natura sua avertit, et per consequens virtutem justitiae universalis corrumpit. Quare rationem injuriae habet; et sic rationem culpae. Quod autem dare mutuo rem suam alteri sit liberalitatis et gratiae actus proprius, patet primo ex genere actus qui est ipsa datio, quia designat liberalitatem dantis. Quod autem liberalitatem tollit, aut violentiam exterioris agentis, aut necessitatem naturae interioris, aut debitum importat aequitatis: quicquid enim transfertur ab uno in alium per violentiam, non datur, sed auferitur. Quod autem similiter transfertur per necessitatem naturae, sicut in successio- nibus heredum, non datur, sed relinquitur. Item quod transfertur per debitum aequitatis, sicut in justis venditionibus et permutationibus rerum, et remuneratione laborum, magis redditur quam datur. Quare in illa translatione in qua actus dandi proprie debet attendi, nullo modo liberalitas debet corrumpi. Sed hujusmodi actus, scilicet dandi, vere attenditur in actu mutui, sicut probant auctoritates utriusque legis. Quare si aliqua circumstantia addatur hujusmodi actui, quae liberalitatem dandi corrumpat, erit hujusmodi actus malus et vitiosus et peccatum. Talis autem circumstantia additur, quandoenique datio mutui fit pro aliquo lucro, sive in spe, sive in re; eo quod illud quod pro lucro fit, non pro pura liberalitate fit. Ex quo sequitur, quod semper ibi malum et peccatum est, non solum ex natura finis et materiae suae, sed etiam ex natura actus proprii, circa quem fieri habet. Tertia ratio etiam non minor assignatur ab aliis, scilicet ex parte injustae possessionis usurarum: quicquid enim acquiritur ut possideatur, et juste possideri non valet, male acquiritur et male possidetur, et peccatum in acquirente et in possidente generat. Sed sic est in usura, ut declarabitur. Quare usura peccatum est: quicquid enim fit suum de non suo, sine justo titulo et per fraudem rei non suae, injuste acquiritur et injuste possidetur. Sed in usura est res facta sua de non sua, sine justo titulo et per fraudem rei non suae, ut patebit statim. Quare injuste acquiritur et injuste possidetur. Hujus autem ostensio est: quia translatio rei de domino in dominum non potest fieri justo titulo, nisi tribus viis: scilicet aut per jus naturae, quando scilicet res devolvitur a patribus vel parentibus in filios et heredes per mortem; qui modus non est in translatione usurae. Aut per jus gratiae et liberalitatis, quando scilicet dominus rei dat gratis alteri quod suum erat. In hac autem via videtur aliquantulum usura excusabilis eo quod voluntarie dicitur dare dominus incrementum usurae usurario. Sed hoc non valet excusare; eo quod usurarium vocamus eum qui non mutat gratis, sed pro spe alicujus incrementi, quod tunc accipit, vel sperat accipere. Et licet accipiens mutuo libenter det ei aliquod incrementum, vel dare velit; tamen ex parte accipientis vel sperantis hujusmodi incrementum, tollitur ratio gratiae et liberalitatis, quantum ad ipsum a quo est actus hujusmodi: et ideo non fit suum jure liberalitatis, quod accipit, quantum est ex parte ipsius accipientis: et ideo quantum ad ipsum non servatur jus gratiae. Aut potest fieri suum de non suo, jure aequitatis: quod est, quando secundum aequitatem juris fit recom-

pensatio alicujus rei, sicut in venditionibus et emptionibus rerum; vel laboris, sicut quando laborantibus redditur merces laboris. Constat autem, quod etiam in hac via non potest inveniri usura in ratione justae possessionis et acquisitionis. Primo, quia hujusmodi contractus non habet rationem venditionis et emptionis, nec permutationis, sicut apparet ex forma verborum, et ex translatione pecuniae, vel rei datae mutuo; quae de sui natura data est sive determinata numero, pondere et mensura. Et non pendet ex voluntate transferentis: propter quod si ultra exigitur quam datur, injusta est commensuratio: nihil enim in re data coaequatur ipsi incremento quod ultra accipitur, non gratis, nec jure naturae. Secundo etiam apparet iniquitas in acquisitione usurae, quia fraude fit de non suo suum. In usura ergo est vitium sive malum per viam licitae aequitatis. Quod sic patet. Foenerator enim rem vel pecuniam transferens, ut per translationem aliquid plus recipiat quam dederit, semper aliquam aequitatem in acceptione superabundantiae praetendit: quae non potest esse nisi tempus illud in quo hujusmodi gratiam facit, et expectat receptionem sortis. Et hoc patet; quia secundum prolongationem temporis vel abbreviationem augmentatur superabundantia usurae vel minuitur. Ergo foenerator de tempore recompensare intendit illud quod plus accipit quam dederat. Tempus autem commune est, nec est propria possessio alicujus, sed a Deo datur aequaliter. Quare hujusmodi foenerator de re non sua, et quae est aequaliter accipientis et dantis, et gratis a Deo omnibus datur, intendens aequare et recompensare rem acceptam, fraudem facit et proximo cujus est tempus, quod sibi vendit, et Deo cujus rem gratis datam sub pretio ponit. Constat autem, quod nec labore aliquo fit recompensatio in contractu vel acquisitione usurae; quia tantum lucratur foenerator dormiens sicut vigilans, et in diebus solemnibus sicut in feriis communibus. Quare ex his omnibus consequens est, quod superabundantia usurae nullo jure vel justo titulo acquiritur vel possidetur. Quare et malum est de sui natura et vituperabile, quia voluntate fit humana. Ex praedictis etiam liquet, quare quaedam usurae in sacra Scriptura et etiam in legibus humanis concessae sunt tamquam licitae; quia quandoenique usura potest accipi ut sua res aliquo justo titulo, erit sine scrupulo inculpabilis acceptio. Et hoc est, quando res violenter detinentur, et sunt aliorum secundum veritatem, et per usuram acquiruntur vel detinentur.

Quod autem malum vituperabile sit usura, et quare, jam dictum est. Sed quantum et quale sit, erit declarandum. Nam secundum Theologiam usura condemnatur tamquam peccatum mortale et grave. Unde Ezechiel. 18: « Qui universa haec detestanda fecerit, morte morietur: » et enumeratur in praedictis usura. Ergo usurae vitium est detestandum, et aeterna morte dignum. Praeterea. Ambrosius in lib. de bono Mortis, et habetur 17, quaest. 4: « Si quis usuras acceperit, et rapinam facit, vita non vivet. » Sed advertendum est, quod usura differt a furto et rapina: quia furtum et rapina nullam habent speciem aequitatis, eo quod per violentiam occultam et apertam committuntur: nec praetendunt in republica aliquam utilitatem, sed potius pacis reipublicae subversionem: usura vero aliquam speciem aequitatis praetendit: quia videtur

aequum et justum ut beneficio exhibito reddatur aliquod emolumentum, quamvis secundum rei veritatem non debeat talis beneficio aliquid ex justitia, nisi tantum ex gratia, quod est benevolentia et gratiarum actio. Similiter in usura aliqua utilitas videtur praetendi reipublicae, quia per ipsam retinentur multae hereditates, et vitantur damna quamplurima; propter quod etiam leges humanae eam permittunt et non puniunt, sicut puniunt et prohibent furta et rapinam. Ex his igitur patet, quod usura sit malum vituperabile secundum legem naturae, et peccatum mortale secundum legem divinam; et quod sit species quaedam sive modus de genere rapinae et furti.

### CAPUT V.

#### *Quomodo in usura non transfertur dominium secundum legem divinam.*

Cum autem dictum sit, quod usura in genere furti et rapinae contineatur ut specialis modus, et hujus non potest habere rationem nisi propter detentionem alicujus rei alienae invito domino; non immerito quaeritur a peritis, utrum usura sit vera res aliena, et non sit vera possessio accipientis. Et ex hoc communiter a doctoribus solet quaeri, utrum in usura transferatur dominium. Et quia hujus quaestionis duplex reperitur determinatio inter doctores: quia quidam eorum qui theologice magis procedunt, simpliciter affirmant in usura non transferri dominium; alii vero qui jura scripta et humanas leges attendunt, simpliciter transferri dominium dicunt. Ut autem veritas secundum nostram intentionem appareat, hoc capitulum subjungimus. Quae autem movere possunt theologos asserentes non transferri dominium, sunt quaedam auctoritates, et ex his rationes consequentes. Dicit enim beatus Augustinus ad Macedonium, et habetur 14 quaest. cap. 5: « Quid dicam de usuris, quas etiam ipsae leges et iudices reddi jubent? An crudelior est qui subtrahit vel eripit aliquid diviti, quam qui trucidat pauperem foenore? in haec itaque atque hujusmodi, male utique possidentur. » Ecce quomodo beatus Augustinus dicit, quod sicut furta et rapinae male possidentur, sic et usurae: et subdit ibid.: « Et vellem ut restituerentur. » Sed non est restituendum nisi quod est alienum et non suum; quare usurae non sunt in dominio possidentis: alienum enim et suum contraria sunt, et non incidunt in idem simul. Item Augustinus in lib. de verb. Dom., tract. 50: « Nolite velle elemosynas facere de foenore et usura. » Sed constat quod quilibet de suo potest elemosynas facere. Quare videtur quod usurae non sint in proprietate et potestate possidentis. Praeterea. Nulla res est restituenda alicui, nisi illi qui est verus dominus ejus. Quare cum una res simul habere duos dominos non valeat a se invicem diversos et aequales, et omnis usura restituenda sit secundum legem divinam ei a quo accepta est sicut vero domino, sequitur quod restituens non habeat verum ejus dominium; et sic non erat translatum in accipientem usuram.

E contrario vero movet quosdam legistas et jurisperitos, scilicet quod secundum omnem legem res aliena cujus dominium non transfertur, semper est restituenda vero domino eadem numero, a quocumque possideatur. Sed in usura etiam

secundum legem divinam hoc non judicatur. Si enim aliquis accepit equum vel pecuniam vel rem aliam quaecumque in usuram ab alio, non tenetur eandem rem numero restituere secundum leges, sed tantum sufficit si valorem rei restituat. Praeterea. Si foenerator equum acceptum in usuram vendiderit alteri, vel dederit, constat per leges quod transfertur dominium, et quod non competit repetitio ejusdem equi illi qui foeneratori equum dederat pro usura. Sed si non esset translatum dominium in foeneratorem, non posset foenerator alteri dare vel vendere transferendo dominium quod non habebat. Quare videtur in usura transferri dominium. Et alia ratione naturali videtur idem: quia accipiens mutuo una et eadem voluntate mutuum petit, et lucrum sive incrementum de suo promittit. Cum ergo penitus sit voluntas qua petit mutuum libera et non coacta, erit similiter et voluntas qua promittit incrementum libera. Sed reddi debet promissum aequa voluntate qua promittitur. Quare et libere incrementum hujusmodi reddetur ab eo qui est verus dominus rei. Sed si verus dominus rei transferat dominium in quemcumque possessorem, vere transfert dominium. Quare videtur in usura vere transferri dominium etiam jure naturali. Et sic lege divina, quae non compellit ad restitutionem ejusdem rei numero, et legibus humanis quae non compellunt ad restitutionem usurarum, et non puniunt accipientes usuras sicut accipientes res alienas, et lege naturae conantur ostendere, qui sunt hujus opinionis, quod in usura transfertur dominium. Quare ergo restitui debent, si non sunt res alienae? et si sunt res alienae, quo modo vendi vel dari possunt tamquam propriae? Ex his itaque surgit non immerito dubitatio

Ad quod ut declaretur, oportet praescire quod aliter judicat lex divina alienum, aliter lex humana. Lex enim divina alienum dicit quicquid possidetur contra legem Dei, qui solus est vere dominus. Et ideo omnia quaecumque possidentur ab alio, si praeter voluntatem Dei possidentur, injuste possidentur, et invito domino quasi res alienae possidentur: et hoc expresse dicit beatus Augustinus ad Macedonium: et habetur 14 quaest. cap. 5: « Quid dicam? Nonne omnes qui sibi gaudere videntur conquisitis, eis que uti nesciunt, alienum possidere convincimus? » Hoc enim certe alienum non est, quod jure possidetur. Hoc autem jure, quod juste; et hoc juste, quod bene. Omne igitur quod male possidetur, alienum est; male autem possidet, qui male utitur. Sic ergo patet, quod foenerator non est verus dominus usurarum, sicut nec raptor rapinarum, quia uterque male possidet: et ideo alienum possidet, et non suum: sed verus dominus id quod possidet ut dominus, possidet ut suum. Ex quo patet, quod secundum legem Dei, in usura non est translatum dominium: et ideo lex divina jubet restitutionem usurarum fieri sicut et rapinarum. Et voco legem divinam, quae in canone sacrae Scripturae et in decretis sanctorum Patrum et conciliis continetur. Lex autem humana alienum judicat id solum, quod praeter voluntatem hominis qui dominus rerum est, secundum leges humanas accipitur vel detinetur. Quare cum in furto vel rapina appareat rerum acceptio vel detentio contra illius hominis voluntatem qui putatur dominus ab omnibus hominibus, juste lex humana illa punit, et tamquam vere aliena restitui compellit. Sed id quod in usura ac-

cipitur vel detinetur, non videtur esse contra voluntatem dantis, eo quod nec per ignorantiam datur, nec per violentiam tollitur. Quare lex humana usuras non iudicat res alienas.

Sed dubitatur adhuc ex dictis. Si lex divina iudicat usuram vere rem alienam, quare non compellit ad restitutionem ejusdem rei numero? Ad quod respondemus, quod quantum est ex lege divina, debet compelli foenerator ad eandem in numero restitutionem, si manet ipsa res in potestate foeneratoris eadem, nisi per assensum repetentis liberetur; alias tenetur pro ipsa valorem restituere. Si autem res non manet in potestate foeneratoris, sed consumpta est, vel translata in alterius dominium, qui est verae fidei possessor; tunc compelli debet foenerator ad restitutionem aequivalentis.

Sed adhuc dubitatio oritur, quo modo foenerator rem alienam possit transferre in dominium alterius. Respondeo dicendum, quod secundum id quod aliena sibi iudicatur, non potest; sed secundum quod sua est. Verum quia lege divina iudicatur aliena, debet et eadem lege iudicari non posse juste transferri in alium sine consensu domini veri. Quomodo ergo quis potest retinere res datas vel emptas a foenatore, quas scit fuisse res usurarum? Vel quare non compelletur ad restitutionem, sicut qui retinet rapinas vel furta qualitercumque data vel emptas sine consensu veri domini? Ad quod dicendum, quod lex divina principaliter considerat justum ejusdemque personae, vel justum, in quantum per hoc ordinatur ad finem, qui est vita aeterna. Lex vero humana considerat hoc prout ordinantur homines inter se in bene esse civile, quod est vivere in honestate et pace communi. Lex autem divina iuritur lege humana sicut instrumento, ubicumque per opera civilia homo potest ordinari vel deordinari a fine vitae aeternae: sicut etiam tota natura instrumentum est divinae virtutis, et non propter indigentiam, sed propter divinae virtutis excellentiam, quae per se operatur aliqua, et quaedam per naturam. Quia ergo res per usuram acquisitae corrumpunt dominium justum in persona tantum acquirente et detinente, non autem proprie corrumpunt bonum civile humanum, id est pacem, quia non contra voluntatem dantis simpliciter sunt acceptae; ideo sufficit iudici qui secundum legem Dei iudicat, quod foenerator tantum satisfaciatur quantum ad Deum, scilicet ut tantum restituat, quantum accepit contra legem Dei. Sed quia res accepta non est faciens injustum ex parte dantis in lege humana, sed neque etiam in lege Dei, nisi propter rationem solam ex parte foeneratoris; ideo eandem rem non compellit iudex per legem aliquam restituere, nec est necesse propter causam dictam. Propter haec ergo quae dicta sunt, credimus in usura non transferri dominium secundum legem divinam, sed tantum lege humana translatum iudicamus.

#### CAPUT VI.

*Quomodo ratio dubii vel periculi valeat excusare vitium usurae in mutuo et aliis contractibus, et quando.*

Quia autem quaedam verba juris inveniuntur, quibus ratio dubii et pericula eventuum videntur omnino excusare usurae vitium in quibusdam permutationibus et contractibus; ideo considerandum

est, quando et in quibus contractibus et quomodo valeant excusare; et quando et in quibus non valeant. Sciendum igitur in primis, quod regula est generalis apud omnes doctores, et firma esse debet, quod nulla conditio sive circumstantia potest excusare aliquem actum vitiosum sive habitum, nisi secundum quod potest tollere rationem vitiositatis ab eo. Cum enim Hebraei excusantur a furto de spoliis Aegyptiorum, hoc non est nisi quia praecipio superioris domini res non suae factae sunt suae. Si igitur dubium vel periculum excusare valeant, hoc non erit nisi habeant virtutem tollendi rationem usurae vere dictae. Et quia in mutuis vitium usurae adnexum est ex eo quod fiant spe lucri, quod est contra naturam mutui; ideo quia dubium et periculum de sua natura non tollunt hanc vitiositatem a mutuo quando fit spe lucri, nec dubium nec periculum excusare possunt vitium usurae. Et hoc probatur per illam decretalem, « Naviganti. » Si enim quis pecuniam alicui naviganti commiserit mutuo propter spem alicujus lucri, licet periculum etiam sortis super se receperit, nihilominus iudicatur usurarius, etiam si totum amiserit. Et similiter si quis alicui aliquam pecuniam dederit mutuo, verbi gratia centum libras ad decem annos, ita quod si infra hoc tempus mortuus fuerit, alter ipsorum liberatus sit a debito, et a mutuo qui ipsum accepit; si vero supervixerint ambo, dabit post decem annos qui mutuum accepit ducentas quinquaginta libras ei qui mutuum dederat, non excusatur propter dubium et periculum ab usura. Sed ubicumque possunt tollere rationem vitii usurae, ibi possunt excusare: et hoc est in quibusdam contractibus. Et ad sciendum specialiter, quomodo et in quibus hoc contingere potest, considerandum est circa illos contractus vel permutationes rerum in quibus aliquid plus accipitur quam datur, quod si causa temporis permutatio haec fiat, jam speciem usurae vitiosae committit, eo quod huiusmodi superabundantia, nec ex labore licito, nec ex usu rei propriae, nec per recompensationem alterius substantiae valet reduci ad aequalitatem justitiae. Si vero non causa temporis haec superabundantia accipiatur vel intendatur, saltem ratio dubii sive periculi potest supplere aequitatem justitiae. Verbi gratia, si quis rem aliquam emit pro pretio minori quam valeat tempore emptionis, vel pro aequali, rem tamen percipiturus in tempore quo sperat eam plus valituram: vel etiam si quis vendat rem pro pretio majori quam valeat tempore venditionis, sperans tamen, quod tantum valitura erit tempore solutionis; si verisimiliter dubitatur utrum plus vel minus possit valere pro tempore illo pro quo venditur vel emitur res, in talibus ratio dubii excusare potest, et facere aequitatem justitiae, licet plus accipiatur quam detur; eo quod ratio huius dubii ponit aestimationem valoris in rebus ex ipsa natura rerum, quae in tali tempore plus vel minus possunt valere. Unde non causa temporis tantum ibidem plus expectatur, sed propter ipsam naturam rei, quae plus valet aliquando in uno tempore quam in alio, et aliquando minus. Et hoc modo ratio dubii et periculi etiam localis possunt excusare contractus aliquos, qui alias iudicarentur usurarii. Et hoc probatur per illud capitulum, « Naviganti. » Declaratio quoque praedictorum per exempla magis patebit. Ponamus igitur, quod aliquis post Augustum multa de blado vel de



vino habeat venalia, et pro illo tempore mensura bladi tres solidos tantum valeat, et modius vini decem, et vendet bladum pro quatuor solidis, et vinum pro duodecim, recepturus tamen pecuniam in festo S. Joannis, quia nec volebat dare pro minori pretio etiam si statim reciperet, eo quod rem suam aestimabat tantum valituram probabiliter in praedicto tempore solutionis; dico quod non committit usuram, licet plus accipiat in spe quam de tempore venditionis, quia illud non accipit causa temporis, sed pro natura rei, quam probabiliter et verisimiliter dubitari potest tantum valituram in tempore pro quo vendidit, etiam si non valuit tantum in tempore pro quo vendidit. Et haec ratio potest applicari ad aliquos alios contractus, etiam quando res minus emitur quam valeat tempore emptionis, recipienda tamen in alio tempore, in quo verisimiliter potest dubitari utrum plus vel minus sit valitura quam empti sit. Sicut autem dictum est de ratione dubii in mutuo et in contractibus aliis, ita dicendum est de ratione periculi: quia ratio periculi etiam circa sortem non tollit rationem usurae in mutuo, ut probatur in capitulo, « Naviganti. » Et hujus ratio patet per praedicta. In contractibus vero aliis in quibus videtur superabundare acceptum super datum; potest excusare scilicet quando ipsa ratio periculi potest recompensare hujusmodi superabundantiam. Res enim quae extra periculum possidentur ejusdem speciei, plus aestimantur, quam eadem existentes in periculo: et ideo ad naturam rei convertitur recompensatio, quae propter periculum aestimatur plus vel minus valere.

#### CAPUT VII.

*Quomodo ratio dubii vel periculi, valeat excusare hoc vitium, secundum conditiones personales vel reales.*

Quoniam autem videmus quasdam conditiones, quae secundum jura videntur excusare contractus simpliciter usurarios, sicut videtur primo per illud Deuter. 23: « Non foenerabis fratri tuo ad usuram; » et sequitur, « sed alieno. » Quare videtur usura quae accipitur ab alienigena, et maxime qui est disparis cultus, non habere rationem culpae: et sic videtur quod conditio personae, per quam est in dispari cultu, excuset usuram. Similiter secundum beatum Ambrosium 14, quaest. 4: « Ab illo exige « usuram, cui merito nocere desideras: cui jure « inferuntur arma, jure auferuntur usurae. » Ex quo patet, quod conditio quae facit hostem dignum morti, excusat vitium usurae. Tertia etiam conditio sumitur atque reperitur in jure ratione dotis, vel paternae promissionis: sicut cum aliquis accipit cum uxore in dotem aliquam hereditatem vel fundum vel redditus annuos, pro aliqua certa summa pecuniae in pignore, potest hujusmodi fructus percipere sine diminutione dotis, quamdiu ratio impignorationis manet. Et hoc habetur extra. de usuris, cap. « Salubriter. » Quarta conditio potest accipi ex natura rei: scilicet quando res quae accipitur in pignore, est illius qui accipit in pignore de jure, sed de facto detinetur violenter ab alio, tunc potest ille percipere fructus pignoris ultra sortem, eo quod ut suum recipit, et non ut alienum. Et hoc habetur in prima decr. de usuris, capit. « Pluris. » Quinta

conditio etiam potest excusare, quae dicitur interesse, sive damni recompensatio, et non spes lucri, ut si quis mutuo dederit gratis, usque ad terminum aliquem determinatum, in quo indiget sua pecunia pro aliqua necessitate, et mutuum non fuerit redditum ad praedictum terminum, potest mutuans repetere ultra sortem quicquid damni incurrit. propter defectum solutionis. Et hoc modo potest fidejussor repetere usuras a debitore, quas persolvit creditori, propter defectum debitoris. Et hoc confirmatur extra. de fidejuss. in duab. decretalibus. Excusatur etiam sexto usura, quando gratis aliquid offertur ultra sortem; quia secundum Gregorium in registro, et habetur in 1, quaest. 5: « Oblatio « nullam culpae maculam alicui ingerit, quae non « ex ambientis petitione procedit. » Causa vero propter quam hujusmodi conditiones excusant usuram et quando, satis liquet et patet, si advertatur quod in praecedenti capitulo dictum est, quia scilicet nulla potest circumstantia transmutare in moribus de bono in malum, vel e converso, nisi quae tollit de natura sui rationem bonitatis vel malitiae. Usura autem secundum quod vitiosa, contingere potest primo et per se in mutuis, et secundo in aliis contractibus. Usura autem in mutuis vitium est. Primo, quia corrumpit liberalitatem, cujus est mutuum dare gratis: et hanc rationem vitii tollit ultima conditio, scilicet quando gratis aliquid ultra sortem datur vel accipitur. Corrumpit etiam usura in mutuis debitum finem, quia accipitur spe lucri, et sine recompensatione justa; et etiam hanc malitiam tollit prima conditio, et secunda et quinta. Prima enim est, per quam ostenditur solus Deus esse Dominus omnium rerum, et omnia esse data ad cultum Dei promovendum: et ideo virtute fidei tollitur in illo casu malitia usurae: quia tunc non fit spe lucri. Similiter in secundo fit zelo justitiae et caritatis, quae quantum potest, inimicos fidei, scilicet tyrannos et haereticos conatur destruere, etiam eodem jure, quando non potest aliter res ipsorum quam per usuram requirere. In quinto vero patet ratio justitiae, quia non spe lucri accipitur, sed pro recompensatione damni: et ideo illa superabundantia juste acquiritur. Contingit etiam aliquando usuram accipere in aliis contractibus, in quibus aliquid petitur plus quam detur sine causa. Et hoc etiam excusari potest omnibus modis praedictis, et duobus etiam aliis. Et hoc potest contingere, quando illud quod ultra sortem recipitur, fit suum jure naturae; sicut fructus pignorum pro dote uxoris, vel pro provisione filiorum. Vel potest fieri suum jure aequitatis, sicut res ipsa quae impignoratur, quando secundum aequitatem erat illius qui fructus percipit. Haec dicta sufficiant de conditionibus excusantibus a vitio usurae: et quot sunt, et quando valeant excusare, et quando non.

#### CAPUT VIII.

*Quomodo vitium usurae incidit in contractibus venditionis et emptionis in communi.*

Quoniam autem antiqui hostis superseminata humanae naturae zizania cupiditatis et avaritiae, usurae vitium produxit, non tantum in mutuis, quae luce divinae veritatis in Scriptura sacra manifeste condemnata eradicatur: sed etiam in aliis contractibus diffudit, in quibus sub specie aequitatis

et justitiae humanae, quasi abscondita foeneratur, ideo in hac parte quaerentes detegere hanc malitiam, de his contractibus in quibus latet, dicemus. Primo autem dicimus, quod a principio dictum est, quod usura est quicquid praeter sortem accidit, sine justo titulo, sive sit in mutuis, sive in contractibus aliis. Quod autem tantum causa temporis accidit in contractibus, sicut in mutuis, sorti accidit sine justo titulo; quia ipse facit suum per fraudem, scilicet vendendo tempus, quod Dei est, et datum communiter omnibus. Et non potest habere titulum successionis naturalis, seu gratuita donationis, seu justii lucri per meritum liciti et proprii laboris, vel per recompensationem rei propriae. Et hinc est, quod omnis contractus in quo aliquid plus accipitur quam detur, sive in spe sive in re, et hoc tantum propter causam temporis, vocatur contractus usurarius: et hoc est quod dicitur in illis decretalibus extra. de usuris: « In civitate. Et consuluit. » Advertendum est autem, quid proprie dicatur hic sors, et quid sit accidens sorti: sors enim in Scriptura sacra duobus modis accipitur. Uno modo pro signo dato, per quod distinguantur res confusae ab invicem, secundum illud Proverb. 18. cap. « Contradictiones » comprimit sors: » et iterum Prov. 16: « Sortes » mittuntur in sinum, sed a Domino temperantur: » et illud Act. 1: « Cecidit sors super » Matthiam. » Alio modo accipitur sors pro officio, vel re propria juste possessa, vel debita in divisione aliquarum personarum vel possessionum: sicut vocantur sortes filiorum Israel, justae portiones distinctae cuilibet tribui vel personae assignatae. Et hoc modo accipitur etiam hic pro re juste possessa vel debita alicui personae. Hoc autem dicitur sorti accidere, quod non pertinet ad proprietatem sortis. Ex quo patet, quod usus proprius rei alicujus et fructus ejusdem non accidunt sorti: quia qui habet proprietatem in alia re sive possessione, habet et usum et fructum illius de jure: et ideo qui emit agrum vel equum ut plus percipiat in fructibus ratione fructuum, et ratione usus equi quem emit, nihil accipit plus quam accidat sorti, quia totum est de sorte, scilicet fructus et usus. Est etiam secundo advertendum, quod fructus et usus rerum possunt augeri et minui in pretio secundum diversitatem temporum. Et hoc potest accidere ipsis rebus tripliciter, sine eo quod tempus sit causa per se. Uno modo quando non fuerit ratio hujusmodi augmenti in usu rei. Alio modo propter ipsarum rerum paucitatem et abundantiam: res enim quae per usum suum minuuntur, secundum tempus naturaliter consumuntur, et sunt pauciores: quoniam magis elongantur a sua origine: sicut bladum naturaliter magis abundat in autumno quam in vere. Alio modo hoc accidit ex ipsarum rerum natura, quae secundum tempus recipiunt incrementum valoris, ut apparet in satis, sylvis et animalibus. Tertio modo ex natura rei relata ad loci conditionem. Est ergo generaliter tenendum, quod in omnibus contractibus in quibus accipitur plus a vendente vel emente quam dederit, et non fuerit ratio hujusmodi augmenti in usu rei sive in natura ipsius rei, nec producta fuerit ex temporis aliqua conditione existente in ipsis rebus, sicut apparet in tribus modis praedictis, sed accidit incrementum ex dilatione temporis concessa a vendente vel emente, ut per hoc plus accipiat; tunc talis superabundantia accepta super datum usura dicitur, et usurae tenet

vitium, quia sine justa ratione generatur in talibus contractibus et mutuis: et hoc vocatur apud jurisperitos, et etiam vulgariter, vendere vel emere ad credentiam. Si autem accipiatur plus quam detur simpliciter propter aestimationem vendentis vel ementis ampliolem in uno tempore quam in alio, propter aliquam trium causarum praedictarum, vel etiam propter dilationem rei in uno tempore quam in alio, tunc potest fieri sine vitio usurae, quia superabundantia hujusmodi recompensatur ex ampliori valore rei in se pro tempore pro quo accipitur hujusmodi superabundantia, et non accipitur pro temporis dilatione. Est tamen advertendum, quod in his contractibus, licet excusari possint a vitio usurae secundum rationem dictam, tamen non excusantur omnino a vitio cupiditatis: propter quod dicitur in canone turpe lucrum, ut habetur 14 quaest. cap. 4: « Si quis clericus, » et cap. « Quaecumque » temporum messis. » Et dicitur turpe lucrum, quia ratione temporis accidit sicut usura, licet differenter. Vel turpe lucrum dicitur ratione finis, quia tales contractus non fiunt ut in pluribus propter vitae humanae necessitatem seu utilitatem, sed magis propter divitiarum augmentationem, quam cupiditas facit, quae non habet finem, quia avarus non impletur pecunia: et ideo rationem vitii habent. Si tamen hujusmodi contractus ordinentur ad usum vitae humanae, excusantur ab omni turpitudine, sicut habetur in capitulis allegatis, 14, quaest. 4. Et per hoc etiam ostenditur, quod in hujusmodi non sit usura, quia usura non excusatur etiam quantumcumque ordinetur ad vitae necessitatem. Ex his etiam potest patere, quod non tantum ex dilatione temporis, sed ex natura rei relata ad temporis conditionem potest accidere usura. Et similiter ex natura rei relata ad loci conditionem: scilicet quando aliquae res dantur mutuo, sive pecunia, aequales reddendae in specie et numero, pondere et mensura. Et tamen quia mutuans sperat eandem rem numero plus valituram in tempore determinato quo debet reddi, vel in loco, et propter hoc ipse mutuavit reddendam ad tale tempus vel talem locum, ut in tempore determinato, vel in determinato loco sibi reddatur, dico quod ibi manifeste est vitium usurae: quia plus speratur ex mutuo, vel causa mutui, quam detur. Et eadem ratione potest incidere vitium usurae in aliis contractibus, in quibus plus accipitur quam detur simili ratione, ut verbi gratia, si quis bladum vel vinum vendiderit vel emerit in aliquo tempore ut plus accipiat in alio quam dederit tantum ratione temporis vel loci, licet etiam res pro tempore illo tantum valeant, jam propter intentionem usurariam fit vitium usurae. Quod tamen poterat fieri bene, si tantum rei natura attenderet, et non temporis vel loci causa, quae nullo modo sunt aliquid de re: et ideo nec vilitatem neque caritatem faciunt in rebus per se. Hinc liquet, quod in eodem contractu secundum speciem potest incidere vitium usurae ex intentione corrupta et vitium avaritiae sine vitio usurae ex turpitudine lucri. Et alias etiam potest fieri sine omni vitio, quando fit propter necessitatem vitae.

Ex dictis etiam dissolvitur dubitatio, quae a quibusdam movetur: utrum scilicet per anticipationem temporis generari possit vitium usurae, sicut per dilationem vel prolongationem: ut verbi gratia: aliquis debet alteri centum solidos persolvendos post annos, vel annuatim ad duos vel tres terminos,

et creditor vult remittere debitori tertiam vel quartam vel quintam partem, si solvat ei in principio anni, sive ante terminos positos, quando petierit. Constat autem quod in hoc casu plus accipitur quam datur ratione temporis. Verbi gratia, debitor juste debebat centum solidos, et propter anticipationem temporis tantum solvit octoginta. Accipit ergo ultra id quod dat, scilicet ultra octoginta, viginti: quia creditoris erant illi viginti, et sunt facti debitoris ratione temporis anticipati. Ratione ergo regulae datae de causa vitii in usura, quae est quando plus accipitur quam datur causa temporis, videtur quod hujusmodi casus sit usurarius. Sed hic potest cadere excusatio usurae dupliciter. Uno modo quando gratis et liberaliter creditor hujusmodi superabundantiam tribuit debitori, et debitor non causa temporis accipiat. Alio modo quando debitor per damnum propriae rei recompensat hujusmodi superabundantiam: ut quando non potest habere pecuniam sine alienius rei propriae alienatione et damno, ex qua solvat creditori quod petit ante terminum solutionis: alias est casus usurarius. Specialis autem difficultas videtur in contractibus illis, in quibus res emuntur vel venduntur, quae ex temporis processu recipiunt incrementum valoris vel vilitatis; sicut sunt sata, fructus animalium, fructus arborum, spolia sylvarum: quia enim hujusmodi res venduntur et emuntur ut frequenter ante tempus suae utilitatis vel usus, et minus emuntur quam sint valiturae in tempore suae receptionis et usus, quaestio est non immerito, utrum plus accipere pro eis vel sperare pro tempore suae receptionis faciat usurarium contractum. Quam quidem determinantes distinguunt: quia aut emens ex tempore emptionis jam habens dominium talis rei qualiscumque sit, recipit periculum supra se, aut periculum remanet in sorte vendentis. Si primo modo, volunt contractum esse licitum propter periculum: sicut locans rem suam et aliquid ultra recipiens excusatur propter hoc, quia periculum rei remanet in locante, ut habetur distinct. 88: « Emens. » Si vero secundo modo, tunc condemnant contractum. Sed si rei veritas attendatur, hujusmodi distinctio hic non habet locum: si enim locans accipit aliquid ultra rem locatam, hoc habet rationem aequitatis, quia illud recompensatur per usum rei locatae qui est proprietas locantis, et pertinet ad ejus sortem, idest ad rem locatam, cujus proprietas simpliciter manet apud locantem; et ideo periculum etiam ipsius remanet apud locantem. Sed quando quis vendit rem aliquam, non usum tantum ipsius, sed proprietatem ejus; constat quod transfertur de jure periculum rei in ementem. Quando ergo sic vendens res hujusmodi tenet periculum penes se, jam sic non transfertur dominium, et ideo non est permutatio venditionis justae. Sed constat quod emens jam transtulit dominium pecuniae quam dedit: quare magis habet rationem mutui: et si plus speratur propter tempus futurum determinatum quam sit datum, sequitur quod sit vitium usurae. Et ideo sine praesudicio aliter mihi videtur esse distinguendum in praedictis contractibus: et praecipue quia videmus non de facili imminere periculum rei in venditione spoliatorum, sive nemorum, sicut in aliis. Possunt enim hujusmodi res emi, vel tanquam necessariae ad usum vitae ementium, vel causa lucri tantum. Si primo modo, nullum est vitium, quamvis plus

valiturae sint probabiliter tempore suae receptionis: dum tamen aestimatio justa sit facta tempore contractus, quae est secundum legem naturae, et etiam consuetudinem humanam in hoc, quod tantum juste aestimari potest res vitae humanae, quantum necessarius est ejus usus: et hoc vel simpliciter, vel pro tempore aliquo determinato. Et quia simpliciter apud sapientes plus aestimatur res perfecta quam imperfecta, et pro tempore determinato aestimatur res quantum vendi potest inter homines; et ideo licet tales res minus vendantur imperfectae quam sint valiturae perfectae, non videtur mihi quod aliquis praeter sortem amplius accipiat, quia sors vendita est ipsius ementis, cum incremento suae valitudinis atque utilitatis. Si autem secundo modo, idest causa lucri fiant hujusmodi contractus, potest adhuc in eis tantum turpe lucrum judicari causa cupiditatis, quae oritur ex conditione temporis, sicut supra dictum est de aliis. Et potest iterum in eis incidere vitium: et hoc quando hujusmodi lucrum quaeritur tantum ex tempore, et periculum tollitur, vel verisimiliter dubitari non potest de periculo, utrum magis minusve ratione temporis res possint valere. Haec intantum dicta sint universaliter circa naturam contractuum, in quibus videtur posse aliquam usurae vitium incidere.

#### CAPUT IX.

##### *Quomodo in emptione reddituum ad vitam incidat vitium usurae.*

Quoniam autem in praecedenti capitulo de aequitate et justitia contractuum simpliciter secundum propositum nostrum discussum est, nunc post haec videtur justum de contractibus ad tempus factis et non simpliciter discutiendum. Et circa hoc investigatio duplex est perutilis. Primo, utrum emere aliqua bona, ut redditus vel possessiones ad vitam, quae est tempus indeterminatum, liceat. Secundo, utrum emere aliqua praedictorum ad tempus determinatum, verbi gratia, ad decem annos vel ad viginti, sit licitum: quae duo frequenter fiunt inter homines nostri temporis. Circa primum advertenda sunt dicta quorundam, et rationes ipsorum, qui hujusmodi contractum condemnant tanquam usurarium. In primis autem fatemur nos nusquam legisse auctoritatem nec audivisse seu in canone seu in epistolis extravagantibus, seu in corpore legis, pro hac opinione facientem aliquid. Sed in scriptis quorundam magistrorum vidimus quae subjungemus: et circa hoc ratione, quantum poterimus, dicta confirmare conabimur. Goffredus siquidem magnae auctoritatis in jure canonico summam faciens super titulos decretalium, ita dicit in titulo de usuris, cap. « Is qui naviganti: » ibi expresse dicit, quod dare certam pecuniam sive summam pecuniae alicui Ecclesiae pro aliquibus possessionibus tenendis ad vitam dantis pecuniam et post mortem tenentis reddituris ad ipsam Ecclesiam, est usurarius contractus. Et hujusmodi causam reddit dicens, quod dans habet spem vivendi ultra id tempus quo receperit de proventibus totam sortem quam dederat et ultra. Sola autem spes facit usurarium. Haec est ratio dicti magistri et sententia ejus. Hoc etiam quidam alius doctor theologus asserens pro sententia addit rationes: primo ostendens, quod hujusmodi contractus non potest



excusari per rationem dubii vel periculi, quia non est alterius rationis contractus in quo aliquis dat centum libras ut annuatim recipiat decem quamdiu vixerit, et sperat se victurum ad undecim annos et ultra: vel ut in undecimo anno recipiat simul centum et decem libras; addita etiam conditione, quod si ante moriatur, quod nihil accipiat de tota summa. Constat autem in hoc secundo contractu esse vitium usurae; nec tollitur propter rationem dubii vel periculi, sicut probatur per illud cap.

• Naviganti. • Quare similiter in primo contractu erit vitium usurae: nec tollitur ratione dubii, cum semper sit ibi spes accipiendi plus. Per hanc rationem vult idem doctor, quod tam vendens quam emens peccent vitio usurae; quia secundum hanc rationem, sicut emens accipit in spe plusquam dederat, sic et vendens, quia sperat, vel saltem optat cito finem ementis. Et si acciderit in primo anno enim mori, vel secundo, constat quod plus accepit quam dederit. Hoc autem vitium in vendente nullus quidem quem audierim verbo, vel scripta viderim, usque ad usuram extendit. Idem etiam doctor theologus opinionem hujusmodi quasi sententiam confirmare videtur ex Philosophi dictis, qui in duobus locis, videlicet 10 Ethic. et in 1 Polit., loquitur de ratione numismatis, ostendens quod inventio numismatis facta est translationis gratia, hoc est, ut per ipsum aliae res quae necessariae sunt ad vitam hominis transferantur: et ideo quando fit numismatis translatio ad alterum ut seipsum augeat et multiplicet, fit thecos, id est vitium usurae, ut apparet ex dictis Philosophi. Quare cum in emptione redditum ad vitam fiat translatio pecuniae ad hoc ut seipsam multiplicet, videtur semper et naturaliter esse vitium usurae. Praeterea ex lege divina videtur haec sententia data, Levit. 24, ubi dicitur: « Quando vendes quipiam civi tuo, vel emes ab eo, non contristes proximum tuum; sed juxta numerum annorum jubilai emes ab eo, quod juxta susceptionem fructuum vendet tibi. » Hoc autem exponens Glossa ibid. sic loquitur, « Quando vendes etc. »

• Hic secundum litteram moraliter informat, ut in contractibus proximis compatiamur, ne quis nimium molestus de pauperum necessitatibus negotietur, ne studeat possessiones aliorum acquirere, sed indigentibus commodare, et commodata paulatim ex fructibus agrorum recipere. » Ex hac auctoritate et Glossa videtur quod quando quis emit possessiones proximi sui percepta sorte ex proventibus fructuum, non liceat ementi aliquid ultra recipere. Sed omnis emens ad vitam possessiones vel redditus, sperat ultra sortem datam aliquid accipere, et recipit si vivat ultra secundum quod sperat. Ergo illicitus est contractus, etiam secundum legem divinam. Hoc idem videtur per ea quae dicta sunt de causa usurae: quia in talibus contractibus semper aliquid speratur vel accipitur ultra quam datur, causa solius temporis; sed haec causa facit contractum usurarium.

Horum autem et tantorum virorum sententiam non audentes falsam asserere, cum tantorum et multorum antiquorum et modernorum dissimulatione contraria sententia teneatur, videtur congruum etiam ratione circa hanc quaestionem discutere veritatem, quantum nostrae Deus dederit parvitati. Sciendum autem in primis, quod ejusdem famosi doctoris in jure vidimus sententiam, qui hujusmodi contractum condemnabat non tam-

quam usurarium, sed tamquam vitiosum propter circumstantiam peccati adnexam, scilicet in vendente; quia vendens optabat mortem emptoris. Sed etsi hoc malum sit, non tamen est ex natura contractus, sed accidit ab extra; et ideo propter hoc non debet condemnari contractus: unde secundum praedictum doctorem, si fierent hujusmodi contractus ad vitam vendentium, non essent mali. Investigando ergo quid injustitiae possit inesse in hujusmodi contractibus, et utrum licite fieri possint, et quomodo, contradicentium rationes solvantur. Dicimus primo, quod qui dominus est alicujus rei, dominus est et usus ejusdem rei. Dicimus etiam secundo, quod dominus verus alicujus rei potest eam transferre in alterum gratis, vel etiam pro pretio et pro commutatione alterius rei. Dicimus insuper tertio, quod dominus potest transferre usum et fructum propriae rei. Dicimus etiam quarto quod verus dominus rei, sicut potest dare vel vendere proprietatem rei, vel usum, seu fructus alicujus possessionis simpliciter quantum ad omne tempus, sic potest dare vel vendere quantum ad tempus determinatum vel particulare. Omnia ista probantur per veram rationem domini. Est etiam animadvertendum, quod in mutuo pensari debet tantum rei substantia et valor ejus secundum rationem substantiae, et non secundum rationem usus rei vel fructus; eo quod gratis fieri debet secundum rationem mutui; et ideo nihil ultra valorem rei sperare debet mutuans ex usu rei mutuatae, quia ratione substantiae transfertur mutuum, et non ratione usus. Alias est autem in accommodatis ad usum. Substantia enim rei in se non recipit magis et minus: sed in contractu venditionis et emptionis pensatur non tantum substantia rei, sed etiam ejus fructus et usus. Sed ex fructu rerum et usu ipsarum accidit quod valor ipsarum naturaliter inter homines augetur et minuitur: quare de natura hujusmodi contractus potest quis sperare ultra id quod datur, vel etiam timere ne minus accipiat quam dederit: et ideo mercatores sperare possunt luerum ex meratione, quod non possunt dantes mutuo. Advertendum est etiam, quod sicut Philosophus dicit, et pertractat in sua Polit. in 1, omnis rerum commutatio inter homines fit propter necessitatem vitae humanae: et ideo requiritur quod commensuratio ipsarum fieri debeat in magis et minus habere in valore, secundum quod magis et minus habent de utilitate et necessitate ad vitam humanam. Variatur autem hujusmodi utilitas multipliciter in magis et minus: uno modo ex tempore; alio modo ex loco; alio modo ex ipsarum conditione; alio modo ex ipsarum rerum natura. Quia ergo in venditione transfertur rei substantia cum usu ejus vel simpliciter, vel ad tempus. Et quando simpliciter constat quod plus recepturus sit emens sine culpa, propterea quia utilitas rei et fructus ejus translata sunt quantum ad omne tempus cum rei substantia. Quando autem in venditione transfertur tantum rei substantia cum utilitate ejus ad aliquod tempus, et non simpliciter, non est justum secundum rei naturam, quod tanti res aestimetur, cujus rei substantia ad tempus possidetur, sicut illa quae semper possidetur; quia non sequitur ex ea tanta utilitas humanae vitae possidenti: etiam si plus accipiat vel speretur accipi quam datum sit, non sequitur aliqua injustitia: et praecipue quando emens habet intentionem emendi pro necessitate et

utilitate vitae, et non ad lucrum vel augmentum pecuniae; quod etiam in emptionibus aliis facit peccatum, secundum Philosophum. Videntes autem ut in pluribus semper attendunt aliquam utilitatem, vel domus suae, vel Ecclesiae, vel civitatis; et non causa lucri hoc faciunt, quare magis excusantur. Dicimus etiam quinto, quod eo jure quo quis recipit aliquid plus ultra quam dederit in possessionibus emptis simpliciter, eo jure recipit aliqua plusquam dederit in possessionibus emptis, vel reditibus ad vitam: quia totum est de sorte, quicquid plus accipit; eo quod substantiam rei cum usu et fructu ejus emit, sicut et ille qui ad omne tempus emit. Sed dubium est adhuc secundum hanc sententiam, utrum vendens retinere possit substantiam quam accepit, quando nihil aut parum emens supervixit post emptionem. Cujus determinatio est, quare ratione dubii et periculi, quod erat de natura hujusmodi contractus, fit suum. Et haec ratio excusat in contractibus quandoque de natura ipsorum: quod non facit in mutuis, quia ibi accidit ex alio quam ex ratione mutui. Quando enim de natura contractus incidit periculum vel dubium aequaliter, tam ex parte vendentis quam ementis, tunc etiam juste fieret res quae emitur vel venditur minoris aestimationis in valore, quam si periculum vel dubium non incidere de natura contractus: et ideo de natura sui justus est contractus, cum ex utraque parte similiter dubium sit, utrum minus magisve recipiant vel recepturi sint. Si enim equum homo emit, et centum libras pro eo solvat; constat quod si eadem hora post solutionem equus moriatur, nihilominus vendentes centum libras juste detinent, quamvis nihil utilitatis emptor consecutus fuerit, eo quod rem suam juste transtulerit in ipsum ementem. Similiter ille qui possessiones vendit ad tempus indeterminatum, cujus determinatio pendet a natura, et non ab homine, et tempus determinatur praeter hominis intentionem, quantum est de jure rem suam transtulit, et translatio jam ad ipsum redit ex natura contractus. Praeterea considerandum est, quod in hujusmodi venditionibus et emptionibus ad vitam, aequae libera voluntas vendentis et ementis de natura contractus invenitur: et maxime quando divites vendunt, et pauperes emunt: quod est frequentius de natura contractus, quia uterque talia facit pro utilitate sua propria: neque enim dives cogitur vendere, neque pauper emere, neque etiam pauper tenetur gratis dare aliquid diviti vel mutuae, neque dives tali pauperi tenetur de suo aliquid dare. Quare et omnis translatio facta libera voluntate dominorum juste fit. Ex his sequitur, quod quicquid emens vel vendens amplius accipiant quam dederint, juste accipiunt, et ut suum factum, libera voluntate dominorum; sed in mutuis non potest ista justitia inveniri, quando amplius accipitur in lucro ex mutuo: nam accipiens mutuum libera voluntate accipit, sicut et is qui mutuum dat; sed accipiens mutuum non libera voluntate amplius promittit vel dat, sed quasi coactus ex perversitate mutuum dantis, qui quod gratis tenetur facere, non vult sine spe lucri facere: et ideo non potest fieri illud amplius ejus qui accipit eodem jure quo mutuum, quod sibi redditur, nec aliquo justo titulo. Ex praedictis infertur, quod tum propter justam aestimationem rerum in tempore contractus, quia tantum res aestimatur juste quantum ad utilitatem possidentis refertur, et tan-

tum juste valet quantum sine fraude vendi potest; tum etiam propter periculum aequaliter adnexum ipsi contractui per naturam ejus ex parte utriusque domini, tum etiam propter liberam voluntatem dominorum res transferentium cum suis proventibus, fit hujusmodi contractus de natura sui a vitio usurae liber. Diximus autem de natura sui; quia per accidens potest in ipso contractu vitium turpis lucri incidere, et etiam aliquando vitium usurae. Vitium autem turpis lucri sine ratione usurae tunc in ipso incidit, quando aliquis dives sibi sufficiens ad vitam, et secundum rei naturam et personae, et secundum statum personae, tales redditus emit ut divitior fiat, et ut plures divitias sine justa et pia necessitate acquirat: et ideo turpe lucrum tunc dicitur, quia non propter finem debitum humanae vitae, sed propter avaritiam, cujus non est finis, exercetur. Vitium vero usurae tunc ex hujusmodi contractu potest incidere, quando homo attenuatus paupertate tales redditus invitus vendit, vel possessiones suas pro necessitate cogente: et hoc propter defectum mutui, quod non invenit in divitibus. Et tunc etiam incidit usura, quando divites hanc proximorum necessitatem considerantes, minus justa aestimatione dant pro possessionibus pauperum sibi acquirendis, quorum necessitates si possunt sine damno, ex caritate fraterna tenentur relevare per mutuum: et in hoc casu loquitur lex Moysi Levit. 25, sicut apparet ex textu, et Glossa inducta, quae dicit: «Necessitati proximorum compatiendum, et ne quis de necessitatibus pauperum negotietur, sed indigentibus commo- dare, et commodata paulatim de fructibus agrorum recipere.» Ex his patet, quod in tali casu venditio propter defectum mutui, et emptio fit quasi loco mutationis; et etiam quod aestimatio ementis est minus justa propter necessitatem vendentis: et ideo id quod plus accipit emens quam dederit, non habet justum titulum possessionis. Unde in hac consideratione non tantum in emptionibus ad vitam incidere potest vitium usurae, sed etiam in emptionibus simpliciter, quantum ad omne tempus. Est ergo universaliter advertendum, quod quando-cumque aliquis emit aliquam possessionem sive ad tempus sive simpliciter causa lucri, quod tantum expectatur ex ipsa tantummodo ratione temporis, et non ex natura rei possessae; in tali contractu est vitium; et hujusmodi lucrum dicitur turpe in jure. Si vero ematur hujusmodi possessio causa lucri, et fuerit justum ex caritate fraterna dari mutuum proximo pauperi, ne ad summam paupertatem deveniat, sicut lex antiqua praecipiebat, tunc hujusmodi lucrum ex emptione vitium usurae habet per equipollentiam mutationis; quia ibi plus accipitur quam detur sine justo titulo possidendi rem. Si vero aliquis rem alterius emit non causa lucri, sed propter necessitatem seu utilitatem vitae suae, etiam si plus accipiat processu temporis quam dederit tempore contractus; cum hoc accipiat ex natura contractus per se, et per accidens ratione temporis, nullum credo fore vitium.

Quomodo autem satisfaciamus dictis et rationibus adversariorum, exponamus nunc, dicentes primo, quod dictum Goffredi nulla auctoritate canonis confirmatur: secundo quod exemplum ejus tunc veritatem habere dicitur, quando Ecclesia aliqua necessitate impulsam cogitur in pignora possessiones suas, quas non potest nec vult simpliciter alienare: tunc enim non

est venditio proprie, sed impignoratio; quia qui non potest rem vel possessionem aliquam vendere simpliciter, nec potest vendere eo jure ad tempus. Constat enim quod licet quaedam Ecclesiae multa possideant, tamen alienare jus possidendi non possunt sine auctoritate et consensu superioris praelati nec simpliciter nec ad tempus: et ideo hujusmodi venditiones Ecclesiarum sunt impignorationes, propter quod secundum hanc viam usurarius est hujusmodi contractus, quia fructus pignorum non licet recipere ultra sortem, eo quod non sunt de natura sortis. Ad rationem vero dicti Magistri de spe vendendi tantum quod amplius recipiat quam dederit, dicendum quod hujusmodi spes vel receptio amplioris non facit vitium usurae, nisi quando illud quod speratur vel recipitur, amplius sorti accidit, et non est natura sortis: aliter enim omnis emens agros vel animalia ut plus recipiat in proventibus processu temporis, vel in ipsis rebus venditis in alio tempore, esset usurarius. Sed in venditionibus justis, quando aliquis dominus transfert dominium suae rei cum usu ejus et fructu simpliciter sive ad tempus, constat quod omnis proventus rei venditae est de natura sortis, et non accidens sorti: quare talis spes vel amplior acceptio non facit contractum usurarium: et hoc dico salva reverentia tanti magistri. Ad id vero quod adducitur ab alio doctore theologo, videtur nobis respondendum, quod est dubium duplex: scilicet excusans, et dubium non excusans: dubium enim tunc excusat, quando tollit inaequalitatem, et justam aestimationem dati et accepti facit quantum ad rerum commutatarum naturam et usum; verbi gratia, quando aliquis emit decem annuatim pro centum, quos statim solvit, ad vitam suam vel alterius accipientes. Et considerata utilitate cujuslibet respectu possidentis, dubitatur verisimiliter quae sit major minorve propter indeterminationem temporis: et ideo fit aestimatio aequivalens propter dubium. Ex his jam patet, quod ratio dubii facit justitiam aestimationis: et ideo quidquid plus ultra datur vel accipitur sive ab emente sive a vendente, tamquam de propria sorte recipitur. Dubium vero quod tantum respectu lucri vel damni potest incidere ex determinato tempore, illud non potest aestimari, quia ex ejus dubio non innascitur aliqua justa aestimatio: quia speratur aliquid plus proventurum gratia temporis determinati tantum, quod non valet facere justam recompensationem: et ideo patet, quomodo extra posita, non sunt ejusdem rationis: nam in eo qui sperat centum et decem simul se accepturum in undecimo anno, jam gratia temporis determinati tantum, fit recompensatio inaequalitatis, et sic facit usurarium contractum; sed in alio qui non sperat se plus accepturum nisi in tempore indeterminatione, et ex re empti juste secundum naturam, tunc, ut ostensum est, nihil accipitur ultra sortem, sed totum speratur ut suum, et de sorte sua non factum suum propter rationem temporis, sed propter naturam contractus. Illud etiam quod secundo adducitur pro confirmatione hujus opinionis de dictis Philosophi, sic dissolvendum est. Primo quod intentio Philosophi, ut apparet ex dictis suis, est quod numisma inventum est causa translationis aliarum rerum, quarum usus vitae humanae est necessarius: et ideo quocumque aliquis utitur translatione numismatis ut per numismata alia ejusdem generis multiplicentur, fit abusus numisma-

tis, et inhonestus contractus, et vocatur thokos, idest parens rei. Hinc constat mihi, quod hujusmodi contractus, de quo est sermo, non est thokos. Primo, quia etsi redditus pecunia emanatur ad vitam, tamen ex natura contractus non habetur quod ad hoc emanatur ut pecunia pecuniae addatur, sed ut de ipsa pecunia empti res necessariae vitae humanae emanatur. Et hic finis contradicit fini propter quem fit thokos. Alia etiam ratione adhuc purgatur a vitio thokos, quia ut in pluribus in hoc contractu non pecunia numerata, sed ipsae res emuntur, quae vel per fructus suos referuntur ad hominis usum, ut ager et possessiones aliae, vel per seipsas, ut triticum, vinum, oleum et hujusmodi. Thokos autem est, ut dicit Philosophus, numisma numismatis. Tertia ratio etiam quod thokos non sit in hujusmodi contractu, ex hoc accipitur, quia tunc secundum Philosophum thokos est, quando acquiritur pecunia per pecuniam ad similitudinem generantium similia sibi. Constat autem quod quando similia ex similibus generantur ad multiplicationem, quod generantia salvantur, et non corrumpuntur in generationibus suis. Sed qui dat centum libras, ut habeat decem annuatim quoad vixerit, constat quod non est ibi ratio generationis, eo quod non manent centum librae, vel in potestate vel dominio dantis cum suagenitura, sed penitus sunt translatae ab ipso: nec manent etiam in jure repetendi sicut fit in thokos: quare magis debet vocari hujusmodi contractus transmutatio rei pro re, quam generatio alicujus rei ex re. Ex his apparet quod ratio de thokos nihil est ad propositum in hujusmodi contractibus. Ad id vero quod de lege divina contra hujusmodi contractum propositum fuit, dicendum est primo, quod lex illa secundum litteram intellecta dicitur divina, sed tamen est temporalis, sicut et aliae leges multae, quae tantum secundum litteralem sensum in figura datae sunt illi populo; et ideo sicut observantia jubilaei non manet in populo christiano, ita et leges quae propter jubilaeum datae erant, quarum una erat lex adducta, sicut apparet ex textu. Et iterum si consideretur id quod morale est in lege ista, quam exponit Glossa inducta, invenitur nihil facere contra naturam horum contractuum; sed tantummodo contra perversas intentiones divitum ementium, qui, secundum quod dicit Glossa Molesti, de pauperum necessitatibus negotiantur, et student possessiones aliorum acquirere, quando tenentur ex fraterna caritate eis indigentibus accommodare, et accommodata paulatim de fructibus agrorum recipere. Et sic evidenter apparet quod hoc accidit in hujusmodi contractibus, et non est de natura contractus, in quo frequenter sine indigentia non vendunt, sed emunt. Et nec lex nec Glossa de se inficit vitio usurae hujusmodi contractum per naturam, sed tantum per accidens. Ad istud autem quod dicitur de ratione temporis, patet veritas, si praedicta ad memoriam revocantur: quia tempus potest referri ad aliquas rerum permutationes, ut conferens aliquid justis valoris, vel auferens. Et hoc modo si causa temporis plus vendatur vel minus, non erit hujusmodi contractus usurarius: pluri enim aestimatur et juste mensura tritici in aestate quam in autumno ceteris paribus, hoc est quantum est de natura temporis: et ideo si quis accipiat plus de blado vendito pro tempore aestatis, quam dederit in autumno, quando bladum emit, non judicatur usurarius, dum tamen pro illo tem-



pore solo velit bladum vendere, et non pro alio. Hoc modo etiam patet, quod plus et juste appreciantur decem librae ad omne tempus annuatim, quam ad aliquod tempus particulare: vel plus et juste eadem ratione ad tempus equi juvenis, quam senis; et hoc ex natura temporis. Et tamen non judicatur usura, si quis emit decem libras ad omne tempus, id quod plus recipit vel speratur recipere quam dederit, licet ex tempore illud plus sibi accidat et certitudinaliter. Quare nec similiter is qui plus recipit de eo quod ad tempus aliquod particulare emit, debet judicari usurarius. Et haec est una causa, quia per naturam temporis facta est res sua eum suis proventibus: et ideo totum est de sorte propria. Potest etiam in contractibus tempus considerari ut nihil conferens vel auferens de valore rei ex natura temporis, sed tantum consideratur ut mensura durationis extrinseca. Quando ergo ratione temporis sic accepti aliquid plus accipitur vel speratur quam datur, jam patet vitium usurae vel injustitiae: quia illud plus quod ultra datum accipitur, nec ex natura rei recompensatur, nec gratis datur vel accipitur: et ideo nullo justo titulo potest fieri proprium, sed semper est alienum. Haec intantum de emptione et venditione reddituum et possessionum ad vitam dicta sunt a nobis. Rogantes universos quos contingeret hoc opus videre, quatenus parcant, si per ignorantiam male diximus, et corrigant, quia sine praesudicio et hic et alibi semper intendimus quae scribimus et dicimus affirmare.

## SECUNDA PARS

### HUJUS CAPITULI

*Quomodo liceat emere redditus ad certum tempus.*

Post haec autem investigandum est de secunda parte hujus capituli, scilicet de contractibus, in quibus certi redditus vel possessiones emuntur ad tempus determinatum. Verbi gratia, aliquis habet redditus certos, ut ex parochia vel praebenda, vel ex patrimonio, vel aliunde, et hujusmodi redditus vult vendere ad sex annos vel ad decem, vel ad aliquod tempus determinatum, ut simul habeat paratam pecuniam. Et quaeritur utrum haec licite possint emi pro minori pretio quam valeant in annis tot acceptis. Et videtur quod sic: quia secundum quod jam dictum est in praecedentibus, plurius valoris aestimatur res aliqua praesens et collecta, quam futura et divisa. Et iterum vendens hujusmodi redditus tantam utilitatem aut frequenter majorem ex tali venditione, quantam ex retentione rerum. Praeterea. Ecclesia indulget clericis cruce signatis, quod possint vendere fructus beneficiorum per triennium: hoc autem non esset, si in hujusmodi contractibus esset vitium. Sed contra hoc est aperte, quod de usura dictum est: quod in hujusmodi contractu plus accipitur, vel saltem certitudinaliter speratur ab emente quam datur: nec periculum nec dubium jam in hoc contractu ex natura sui accidit: quare simpliciter videtur usurarius ex parte ementis. Sentimus autem sine praesudicio, quod in hujusmodi contractibus ex parte vendentis non incidit vitium, quantum est de natura ipsius con-

tractus. Quantum autem ex natura temporis, potest videri quibusdam, quod ex parte ementis sit contractus usurarius, eo quod plus recepturus est, non tantum in spe, sed etiam in re, quam dederit, et hoc tantum ratione temporis. Quando autem minus quod est in dato respectu accepti, recompensatur illi respectu superabundantiae accepti ex solo tempore, tunc judicamus contractum usurarium, eo quod hujusmodi superabundantia transfertur sine justo titulo. Mihi autem videtur etiam ex parte ementis justum posse fieri contractum, et justum esse quantum est de natura contractus. Potest autem fieri injustus per accidens dupliciter. Uno modo, quando corrumpit caritatem debitam fratri: scilicet quando emens videt fratrem in necessitate pro salute corporis seu pro salute animae, propter quam necessitatem oportet eum vendere redditus seu possessiones suas, tunc emens si dives fuerit, potens sine damno proximo subvenire, dico sine praesudicio, quod tenetur ei mutuo dare, et loco pignorum praedictos redditus vel possessiones accipere, donec receperit quod accommodaverat. Et hoc probat per legem illam Levit. 24, et Glossam ejus. Alio modo potest fieri injustus contractus ex parte ementis propter corruptionem finis debiti, qui est ad utilitatem vitae humanae. Unde quando causa lucri tantum et augmentationis divitiarum fit, tunc est turpe lucrum: sed primo modo reducit ad usurae vitium. Sed de natura contractus habet in se tria, quae ipsum justum ostendunt. Unum est ipsa vendentis liberalitas, qua potest rem suam dare gratis, vel permutare pro re minoris pretii quam sit sua res: et secundum hoc nullum incidit vitium in emente, quia id quod accipitur, totum est de voluntate libera domini. Aliud est ipsa aequitas permutationis rerum: quia quando res venditur pro tanto quanto aestimatur juste: sive a venditore et emente, sive ab his qui sunt legis positivae, tunc est justitia in permutatione. Sed constat quod vendens non potest plus habere pro tempore pro quo vendit, et etiam res futurae per tempora non sunt tantae aestimationis, sicut eadem collectae in instanti, nec tantam utilitatem inferunt possidentibus: propter quod oportet quod sint minoris aestimationis secundum justitiam. Tertium est ipsa ratio sortis: quia quod plus accipitur quam datur, est de ratione sortis, eo quod emens totum emit quod eventurum erat tempore determinato, et ideo non ultra sortem propriam accipit, sicut nec ille qui emit redditus ad omne tempus. Hae sunt rationes hujusmodi contractus justitiam ostendentes: per quas etiam dissolvitur ratio contraria, quae videbatur ostendere usurarium contractum: quia etsi plus accipitur quam datur, hoc fit de natura rei permutatae, et illud plus non est accidens sorti, sed est de ipsa sorte ementis: sicut etiam plus accipitur quam datur in his possessionibus quae emuntur hereditarie quantum ad omne tempus: et haec in tantum sint dicta de his quae ad tempus venduntur et emuntur.

### CAPUT X.

*Quomodo est vitium usurae in vendentibus carius propter dilatam solutionem.*

Quia jam diximus quod in contractibus vitium usurae tunc incidit, quando res cariores venduntur propter temporis dilationem tantum, quam aesti-

mentur in tempore venditionis, et videmus hanc rationem fere in omnibus venditionibus fascellorum lignorum, qui per centenarios et millenarios generaliter venduntur; ideirco non immerito circa hujusmodi contractus investigandum est, utrum justitia possit inveniri in hujusmodi contractibus, an simpliciter sint usurarii. Et videtur quod simpliciter sint usurarii: quia propter tempus tantum carius venduntur, vel pro tempore in quo venduntur; verbi gratia, in aestate vel in vere minoris utilitatis sunt, et ideo minoris valoris: quare si tunc pars illorum pro parata pecunia detur pro minori pretio, quod videtur frequenter factum, quam si non esset pecunia parata, ergo tantum propter temporis dilationem reliqua pars carius venditur. Sed hoc facit usurarium contractum. Ergo etc. Item haec dubitatio duplicatur, quia invenitur in dominis principalibus, qui sylvas et nemora vendunt per mensuras terrae. Et invenitur etiam in mercatoribus, qui ab ipsis dominis emunt sylvas per mensuras, et ex ipsis fascellos faciunt, quos ulterius vendunt per numerum. Utrique ergo propter credentiam quam faciunt usque ad tempus, vendunt carius ligna, quam valeant tempore venditionis. Si ergo ea quae venduntur sive tunc sive ad messium tempus a mercatoribus, in tempore venditionis sint minoris aestimationis secundum justitiae aequitatem quam vendantur, et ultra justam aestimationem injuste aliquid accipiatur pro credentia ad tempus futurum, videtur sine omni excusatione esse contractus usurarius: quod potest probari extra. cod., cap. « Consulit: » ubi expresse dicitur contractus usurarius, quando aliquis merces suas longe majori pretio distrahit, si ad solutionem prolixo temporis dilatio prorogatur, quam si in continenti pretium persolvatur; et quod eorum quae taliter sunt accepta, compellendi sunt ad restitutionem. Sed contra hoc est consuetudo generalis, quae videtur et toleratur ab Ecclesia. Praeterea secundum justitiam unaquaeque res pluri debet esse pretii et aestimationis et in tempore et pro tempore usus ipsius quam in alio tempore in quo non est ita conveniens et necessarius usus ejus. Sed vendentes sylvas et fascellos et hujusmodi, vendunt persolvenda in tempore quo est ipsorum usus convenientior, quam sit in tempore venditionis ipsorum. Quare carius possunt aestimari et vendi, quam valeant pro tempore venditionis. Et per hanc rationem credo sine praesudicio, posse excusari hujusmodi contractus a vitio usurae: et quando verisimiliter est dubium, res hujusmodi plus minusve valituras tempore solutionis. Et hoc probatur extra. cod., cap. « In civitate. » Non ergo propter dilationem solutionis in prolixo tempore hujusmodi res carius venduntur, sed propter justam aestimationem rerum, quae in tempore futuro quo determinata est solutio, sunt plus valiturae probabiliter, quam in tempore venditionis carius venduntur; et sic non plus accipitur quam datur ratione temporis tantum, sicut praetendebant rationes in contrarium; sed servatur aequitas justitiae inter datum et acceptum pro tempore pro quo fit venditio. Unde advertendum est, quod credentia pretii persolvendi in tempore futuro post aliquem contractum, potest incidere in contractibus sine vitio, tribus de causis. Uno modo per gratiam et liberalitatem venditoris: scilicet quando res venditur secundum aestimationem justam pro tempore venditionis et commutationis ipsius rei, et ipse venditor expectat

solutionem in prolixo tempore liberaliter, propter gratiam quam habet ad emptorem. Et hoc modo caret credentia omni vitio, nec facit contractum vitiosum. Alio modo potest incidere credentia in aliquo contractu sine vitio secundum meritum et justitiam ipsius contractus, et non per gratiam venditoris; ut verbi gratia, si qua res vendatur in aliquo tempore in quo non habet tantam utilitatem et necessitatem humanae vitae, sicut in futuro aliquo tempore habitura est secundum naturam temporis, et venditor rem suam intendat vendere pro illo tempore in quo habet majorem necessitatem seu utilitatem, et in quo plus valitura sit quam valeat in tempore quo venditur, justum est ex natura contractus, quod venditor saltem expectet tempus illud pro quo facit majorem aestimationem pretii: et ideo talis credentia adhuc nullum vitium generat in contractu, nec in contractibus. Et hoc probatur extra cod., cap. « Naviganti. » Tertio modo potest incidere credentia per accidens, scilicet ex malitia vel paupertate seu impotentia emptoris. Et hoc modo vendere carius rem suam quam valeat tempore venditionis, vel etiam quam valitura sit probabiliter in futuro tempore, quo solummodo determinatur, potest excusari a vitio, per intentionem venditoris, licet ipse contractus de se sit vitiosus. Si enim venditor rem suam intendat vendere carius, non propter tempus tantum, sed tantum propter damnum quod sibi videt imminere ex dilatione persolutionis recuperandae, seu propter vexationem suam redimendam quam probabiliter timet futuram sibi in repetitione debiti sui, propter malitiam vel impotentiam debitoris, tunc excusatur a vitio, et fit aequitas aestimationis in hujusmodi contractibus, per recompensationem damni, vel quando probabiliter timentur haec in credentia accidere: et tunc rectitudo hujusmodi intentionis apparet, quando venditor optaret potius non vendere talibus, quam vendere ad credentiam; et quando libentius daret aliis pro minori pretio in continenti persolvendo, quam vendere ad credentiam talibus pro pretio majori. Uno autem modo credentia facit contractum usurarium: scilicet quando propter ipsam credentiam res venditur carius quam valeat simpliciter vel esset valitura probabiliter tempore solutionis; vel etiam si tantum sit valitura verisimiliter, tamen ipse venditor alias res suas non venderet, nisi plus acciperet propter ipsam credentiam. Et ex hoc liquet quando de sylvis praedicti contractus per mensuras, et de lignis per fascellos possunt licite fieri, et quando et quomodo sunt usurarii.

Sed de secunda parte hujus capituli videtur dubitatio: scilicet utrum liciti sunt contractus, quando pro minori pretio in continenti persolvendo, aliquae res emuntur; verbi gratia, bladum in terra in tempore hyemis et sylvae adhuc per tres annos vel amplius cresciturae, ante aptum tempus incisionis quam valiturae sint juste in tempore suae collectionis et receptionis; verbi gratia, bladum in terra tempore hyemis datur pro minori pretio, quam valiturum sit juste tempore Augusti quando colligitur: et sic de sylvis et de nemoribus. Et videtur contractus usurarius ex parte emptoris; quia pro dilatione temporis plus est recepturus quam dederit, ut patet ex propositis exemplis. Et haec ratio facit contractus usurarios, ut saepe praedictum est. Praeterea, hujusmodi contractus non possunt excusari propter rationem dubii

vel periculi, quia non dubitatur verisimiliter, quin valiturae sint hujusmodi res amplius in tempore suae receptionis, quam sit pretium quod datum est pro eis in tempore emptionis. Sed contra hoc est, quod uniuscujusque rei aestimatio justa dependet ab utilitate vel necessitate ipsius rei. Sed constat quod non est tanta utilitas vel necessitas alicujus rei imperfectae, sicut est ejusdem perfectae: quare nec recte tanti pretii aestimanda est, cum adhuc est imperfecta, et longe a perfectione sua, sicut cum jam est perfecta. Sed hujusmodi res ementur in tempore suae imperfectionis, quare debent aestimari minoris pretii quam sint valiturae in tempore suae perfectionis. Praeterea illud quod per naturam temporis accrescit rei alicui, juste est illius cujus est ipsa res: ut si quis emit terras fructiferas vel arbores, vel animalia fructifera, quicquid evenit per naturam temporis, et non tantum per exercitium laboris, juste fit illius cujus sunt hujusmodi terrae etc. Quare cum per naturam temporis segetes in terra satae, veniant ad majorem valorem, et similiter sylvae; sequitur quod quicquid provenit ultra pretium datum, juste fit illius qui emit ipsa, et cedit in propriam sortem: quare nihil accipit ultra sortem, licet plus accipiat emens quam dederit. Et haec credimus sine praejudicio melioris sententiae. Hoc autem dicimus quantum ad naturam contractus; licet tamen per accidens, per intentionem ementis posset esse turpe lucrum, quando scilicet tantum intenditur ab emente augmentatio lucri et divitiarum, proveniens ex natura temporis, sine exercitio laboris et sine dubio periculi probabiliter possibilis evenire. Et alio etiam modo potest esse contractus usurarius: quando scilicet aliquis cogitur talia vendere ante tempus congruum ex necessitate, propter quam emptor fraterna caritate tenetur venditori mutuum dare, si indiget et voluerit; sed si attendatur natura contractus secundum se, non pro dilatione temporis plus accipitur ab emente, sed pro natura et utilitate rei facta vel ducta ex natura temporis.

#### CAPUT XI.

*Quomodo in his qui committunt mercatoribus pecuniam vel aliam rem pro certa parte lucri, est vitium usurae.*

Nunc de his quae committuntur bonae fidei aliorum ad lucrum quaestio est. Et haec quaestio duplicatur: quia aut quaeritur de commissione numismatum, aut de commissione aliarum rerum quae per se veniunt in usum hominis, ut sunt agri, animalia et horti. Quantum ad primam quaestionem, videtur quibusdam usurae vitium incidere. Primo, quia nihil videtur differre secundum naturam rei committere pecuniam bonae fidei alterius, et mutuare eandem. Sed qui dat mutuo pecuniam propter lucrum aliquod, etiam si periculum propriae sortis super se accipiat, usurae vitium committit, ut habetur extra. eodem, capit. « Naviganti. » Quare similiter qui committit pecuniam suam bonae fidei alterius spe lucri, usuram committit. Hoc etiam secundo videtur; quia quod ex lucro sic speratur vel accipitur ultra sortem, accipit quod nullo justo titulo possidere potest; quia nec gratis datur, nec labore proprio redditur, nec per rem aliam recompensatur: quare simpliciter injuste possideri

vel sperari videtur. Praeterea, etsi in commissione aliarum rerum quae ex se fructum pariunt, potest excusatio valere; tamen quia pecunia de se nihil parit utilitatis ultra seipsam, videtur quod saltem in commissione pecuniae propter lucrum, semper sit thocos, quod est vitium usurae secundum Philosophum, hoc est partus sex numismatis ex numismate, quod est contra naturam ejus. Ad hoc mihi videtur dicendum, quod aut commissio fit pecuniae, ita quod transfertur dominium in toto vel parte rei commissae in potestatem ejus cui committitur; aut ita fit commissio, quod non transeat dominium, sed remanet tota res commissa in dominio committentis. Primo modo est vitium usurae, eo quod sperat lucrum jam de re non sua, quia jam erat translata per commissionem in dominium alterius; et in hoc assimilatur mutuo, ut ratio prima approbat. Sed secundo modo potest sperari lucrum sine vitio usurae, quia tunc commissa est pecunia vel res alia sicut servo et ministro, qui de re domini negotiantur ad utilitatem domini sui; et ideo committens potest sperare lucrum, sicut ex re sua et sic non accedit sorti, nec possidetur sine justo titulo; quia sicut rei propriae partem recipit, non tamen partem numismatis ex numismate immediate, sed partem ipsarum rerum, quae per numismata sua sunt acquisitae justa commutatione. Quia autem supra dictum est « in toto » vel in parte », ideo dictum est, quia si aliquis committit centum alicui, ita quod medietatem ei mutuet et aliam medietatem suo retineat dominio, ita tamen quod de illis centum debeat negotiari ad lucrum ille cui committitur; dico quod hoc lucrum jam habet vitium usurae, propter hoc quod non tantum ex re commissa speratur, sed etiam pariter ex re mutuata et commissa. Sicut enim in logica, locutio falsa judicatur propter falsi subjectionem, licet veritatem directe significet; sicut si dicatur, homo volans est animal; ita in moralibus actio vitiosa judicatur, quando vitio permiscetur, ut est in proposito casu. Ex dictis jam liquet veritas secundae quaestionis, scilicet quando res fructuosae ad lucrum committuntur. Notandum tamen, quod in his rebus commissis ad lucrum magis et minus liquet justitia permutativa: quia quando ager vel terrae committuntur excolendae ad lucrum, satis apparet justitia, eo quod ibi non transfertur dominium, et nihil ultra percipitur de fructu propriae rei. In animalibus vero, ut quando oves vel boves vel porci committuntur nutrienda propter lucrum, non ita liquet justitia: quia aliquando solet in hujusmodi commissionibus fraus usuraria permisceri, ut quando excluditur periculum principalis commissi a committente. Verbi gratia, aliquis dat centum oves ad nutriendum propter lucrum, ita tamen quod centum oves sibi semper salvae maneant quicquid contingat. In hoc casu potest incidere fraus usurae; et hoc quando ultra justam aestimationem taxat ipse committens sibi portionem lucri, propter quam non recompensatur labor et sollicitudo nutrientis secundum justam aestimationem. Solet etiam et alia fraus in talibus fieri, quando dives alicui pauperi mutuat centum libras, ut ex eis oves vel boves nutriendos emat ad lucrum illius qui mutuum dedit, et ad lucrum ipsius alumni: dico ibi fraudem usurae permixtam esse, eo quod jam radix hujusmodi lucri ex mutuo oritur: et ideo vitio usurae inculpatur hujusmodi commissio. Tunc



ergo hujusmodi commissiones licite fieri possunt, quando mutuum vel similitudo mutui non periscetur in talibus, sed dominium retinetur cum periculo quod communiter accidere potest: vel quando etiam dominium rei commissae communicatur ei qui eam suscipit ad lucrum nutriendam, et simile periculum communicatur utrique. Et quando secundum justam aestimationem taxatur lucrum, per quod juste recompensatur labor et sollicitudo alumni. Et haec de materia dicta ad praesens sufficient.

## CAPUT XII.

*Quomodo bona pupillorum licite committantur communitatibus ad lucrum.*

Quia vero quaedam in consuetudinem deducta habentur pro justis legibus, quae magis deberent dici corruptelae quam consuetudines adprobatae, et hoc videmus in hac materia usurarum secundum regiones et civitates diversas quantum ad pupillorum et orphanorum cautelam: et ideo non immerito investigandum censemus, utrum a vitio usurae excusari valeant pupilli, cum ad aetatem perfectam pervenerint, in qua sunt actu domini rerum suarum, et liberati secundum leges a tutoribus, et tunc proprias hereditates et bona in quibus successerant, aucta per usurarium actum, et exercitio tutorum recipiunt, vel saltem integra et non imminuta, per hujusmodi exercitium conservata. Solent etiam quandoque hujusmodi tutores ex bonis pupillorum lucrari, et hujusmodi etiam sub certa portione supra sortem aliquid tribuere pro parvulis nutriendis, vel etiam pro sorte augmentata: solent etiam aliquae villae sive civitates sive oppida pupillorum bona recipere, etiam exclusis propinquis pupillorum de tutela; et pro bonis pupillorum detentis solent certam superabundantiam tribuere tutoribus puerorum annuatim, salva semper sorte pupillorum. Videntur autem in talibus pupilli excusari a vitio usurae dupliciter. Primo, quoniam non est actio ipsorum, non enim dederunt res suas vel pecunias ad usuram: quare quicquid ultra sortem eis isto modo provenit, non ex mutuo, nec ex dato ab eis sub spe lucri, sed sicut gratis datum accipiunt, et sic justo titulo retinere possunt: unde Gregorius, et habetur 1, quaestione 2: « Sic • nulla oblatio suscipienti maculam culpae ingerit, • quae non ex ambientis petitione procedit etc. » Secundo quia cum sit parvulus, nihil differt a servo, secundum Apostolum Galat. 4; et ideo penes tutores residet usus justus vel abusus rerum parvuli, quare videtur parvulis non imputanda culpa usurae: sed ubi non est culpa in possidendo, non competit restitutio facienda ab illo. Contra hoc autem est, quia quod per servum acquiritur injuste, tamquam alienum, non potest fieri res domini sui juste propter ejus ignorantiam, quin semper teneatur ad restitutionem, quandocumque sciverit veritatem. Non possunt ergo pupilli, quando sciunt veritatem, retinere superabundantias suarum rerum sibi per usuras acquisitas. Ad haec determinanda distinguendum est. Primo de causa et origine hujusmodi superabundantiae: quia aut acquiritur per fructus ipsarum rerum quae sunt pupillorum, ut sunt agri, animalia et caetera; aut acquiritur per solam translationem rerum, et propter ipsam translationem: et

quia pecunia sola translationis causa instituta est, ut dicit Philosophus, ideo hujusmodi causa praecipue apparet in usu pecuniae, cujus usus est in translatione rerum fructuum. Et si primo modo aliquae superabundantiae acquirantur pupillis, nullum de se habent vitium usurae: tum quia in hoc non invenitur lucrum ex mutuo speratum vel acceptum: tum quia nihil accidit sorti, eo quod fructus ex talibus rebus partus naturaliter ipsas res comitatur, et est de natura sortis, et non accidens sorti. Secundo autem modo adhuc distinguendum est: quia superabundantia hujusmodi, quae ex translatione rerum vel pecuniae, aut datur vel oritur pupillis ut lucrum ex detentione rerum suarum ortum habens, et hoc modo non licet eis retinere, quia detentio rerum non parit rationem alicujus lucri in quantum detinentur, nisi secundum quod utilitatem habent et fructus afferunt. Si autem non datur hujusmodi superabundantia ut lucrum, sed ut gratia vel ut donum, tunc licet retinere eis: et hoc modo procedunt duae primae rationes. Et per illam rationem excusat consuetudo usurarium vitium in multis civitatibus: et hujus signum, quod gratis sit datum, accipitur ex eo quod praeter voluntatem pupillorum determinat sibi superabundantiam quam dant eis, et quod nunquam repetunt nec repeti faciunt a pupillis aliquid. Ex his liquet, quod si tutores pupillorum scienter pecuniam pupillorum dederint ad usuram per se vel per alios, quod hujusmodi superabundantia rei est aliena, et injuste possidetur etiam a pupillis, quandocumque sciverint: quod si pupilli nolunt restituere, tutores ad id faciendum compellendi sunt.

## CAPUT XIII.

*Quomodo in commutatione campsoria committatur usura.*

Est autem inter hominum commutationes quoddam genus commutationis in rebus, quod campsoria dicitur: quod nec mutui rationem habet, eo quod in tali commutatione lucrum non speratur ex temporis dilatione, nec iterum campsori redditur eadem sors in specie vel in numero vel in pondere. Dat enim Parisienses, et recipit sterlingos, vel monetam alterius generis. Similiter nec habet proprie rationem commutationis, quae dicitur venditio et emptio; quia hoc genus fit in rebus appretiabilibus, quarum pretia determinantur et mensurantur numismate: sed hoc genus est in sola commutatione numismatum diversorum generum: propter quod sequitur quod ars campsoria, quae est species commutationis, simpliciter permutatio dicatur. Sed permutatio dicitur generaliter quando aliquid accipitur loco alterius dati, et sic comprehendit omnem commutationem. Dicitur etiam permutatio, quando res determinata ad utilitatem hominum pro re altera similiter habente ex sua natura aliam utilitatem commutatur. Et sic agitur de permutationibus in jure civili et canonico: et sicut si quis velit permutare parochiam pro praebenda, vel praebendam pro praebenda, et similia. Tertio modo potest dici permutatio magis determinate ad materiam numismatis, ipsa numismatum commutatio. Et hoc modo dicimus campsoriam esse permutationem numismatum, quae causa lucri exercetur communiter. Sed de hoc lucro est quaestio in isto capitulo, utrum juste vel injuste acquiratur. Et

videtur tripliciter esse injustum secundum naturam. Primo, quia ex indebito usu rei procedit, eo quod numisma, secundum Philosophum, non parit numisma, sed campsor utitur numismate causa lucri. Secundo, quia actus campsorius videtur quod esse debeat ad utilitatem accipientis a campso, si est justus, vel quod debeat fieri gratis. Tertio, quia secundum Evangelium, Dominus ejecit tales de templo. Dicendum igitur quod ars campso de se est justa. Unde dicendum est ad primum, quod ars campso utitur de se numismate ad idoneum usum. Et est ratio, quia illud plus quod accipitur a campso in tali permutatione monetae, non accipitur ratione pecuniae quae de se est invendibilis, sed ratione periculi vel interesse, ut subveniatur salariis pensionum, donorum, ministrorumque, et laboribus et expensis in arte necessaria et licita, ne frustra ponant operam et sudorem suum in re licita ad utilitatem aliorum. Ad secundum dicendum, quod ars campso est justa ex duplici via. Primo, quia dicit actum justitiae et liberalitatis per ampliorem utilitatem dati apud accipientem a campso quam accepti ab ipso. Et iterum quia actus campso non debet fieri gratis ex natura sua, sicut actus mutui: ideo illud quod plus accipi videtur, transit in dominium accipientis per simplicem voluntatem dantis. Ad id quod tertio persuadetur per Evangelium, dicendum est, quod Dominus ejecit tales de templo ratione loci, qui tantum spiritualibus erat deputatus: et ideo contra reverentiam loco debitam faciebant suas merces, et apparebat in talibus turpitudine suae cupiditatis. Vel dicendum, quod de templo sunt tales ejiciendi, quia non licet ministris templi, id est viris ecclesiasticis, talia exercere mercimonia.

#### CAPUT XIV.

*Quomodo liceat committere pecuniam eunti ad nundinas, vel res alias ad lucrum.*

Est igitur quaestio rursus de mercatoribus. Primo, utrum liceat alicui committere pecuniam suam alteri eunti ad nundinas ad lucrum sine vitio usurae. Et distinguendum est circa hoc: quia aut est simpliciter commissio, quae fit propriae rei bonae fidei alterius, et sic non incidit usurae vitium, sicut ostendimus supra cap. 11: aut est commissio secundum quid, sed simpliciter translatio, sicut est in mutuo: commissionem vero secundum quid dico, in quantum committens non retinet periculum super se rei commissae. Et hoc modo propter rationem translationis, quae debuit fieri gratis sine spe lucri, incidit vitium usurae: et in hoc casu loquitur illa decretalis « Naviganti. » Propter hoc ulterius si quaeratur de his qui dant pecuniam aliquam determinatam mutuo aliis mercatoribus, tali pacto quod similem et aequalem in numero et pondere persolvent creditoribus illorum a quibus accipiunt in nundinis aliquibus determinatis secundum locum et tempus: verbi gratia, Balduinus a Gualtero accipit centum libras sterlingorum mutuo in Francia in mense Augusti, ita quod centum libras sterlingorum solvet Balduinus pro Gualtero in Januario sequenti, in quibus tenebatur Gualterus suis creditoribus: vel si non creditoribus, ipsi mutuanti in tali loco et tempore; circa hoc distinguendum est: quia aut mutuans tempore translationis aestimat dictam monetam plus valituram in loco aut in tempore quibus est per-

solvenda; verbi gratia, sterlingi plus valent in Anglia quam in Francia: et tunc nihil est ibi culpabile. Vel timet probabiliter minorationem pretii sterlingorum futuram ante tempus determinatum. Et tunc dicendum, quod mutuans committit usuram, quia lucrum sperat ex mutuo. Aut mutuans nihil lucri in mutuando intendit, sive ex tempore sive ex loco, sed tantum ob favorem et gratiam proximi hoc mutat, et tunc nihil culpabile ex hoc incurrit.

Est etiam aliud quod dubitari potest circa hujusmodi materiam. Dictum est enim quod spes lucri in mutuo facit usurae vitium. Quare videtur quod si aliquis habens pecuniam aliquam specialem, quam timet in tempore futuro minorandam in suo pretio secundum statuta legis positivae, et propter hoc hujusmodi pecuniam dat mutuo sibi reddendam in aequali pretio quod erat tempore mutui, respectu pecuniae terrae communis aestimationis; videtur quod cum hujusmodi mutuum videatur factum spe lucri, quod sit in eo vitium usurae. Verbi gratia, aliquis habens sterlingos valentes quatuor turonenses, timet ne in futuro tempore, per auctoritatem legis positivae, tantum sint valituri tertium turonem, propter quam causam dat mutuo sterlingos, et post diminutionem pretii ipsorum non tot penitus vult recipere sterlingos in numero et pondere quot dederat mutuo, sed secundum pretium in turonibus, cujus pretii erant tempore mutui. Ad hoc dicendum est, quod aliud est vitare damnum, et aliud sperare lucrum: quicumque enim ex mutuo speraret lucrum, peccat usurae vitio, secundum auctoritatem Evangelii Luc. 6: « Mutuum date nihil inde sperantes; » sed non sic qui ex mutuo vitat damnum. Primum enim non potest fieri sine injuria Dei, qui hoc prohibuit fieri; nec sine injuria proximi, cui gratis debuit fieri illud ex quo lucrum speratur, quod est contra gratiam; sed secundum potest juste fieri, eo quod per hoc non fit Deo injuria, eo quod non prohibetur aliqua lege: nec etiam proximo, quia nihil minus accipit pro tempore mutationis quam reddere teneatur, eo quod tempore quo mutuatur, tantum valebat quantum reddere tenetur. Neque etiam propter hoc vitaretur, si tempus a mutuante determinetur, in quo verisimile est pecuniam mutatam minus valituram, quam valeret tempore mutationis; quia ex sola dilatione temporis non accidit vilificatio, sed magis vel ex voluntate legis positivae, vel ex natura pecuniae. Nec in hoc damnificatur qui mutuum accipit: quia non ad hoc accipit, ut ipsum usque ad tempus illud conservet, in quo verisimiliter minus valitura esset; sed ut ipsa uteretur pro tempore illo pro quo valorem suum reservaret, quem habebat cum eum in mutuo acceperat.

Quaeritur etiam juxta hoc de eo qui dat mutuo bladum vel vinum vel oleum, ad certas mensuras, et hoc in tempore quo minus valent, ut sibi reddatur in aequalibus mensuris et ponderibus et speciebus in alio tempore, quo verisimile est res praedictas plus valituras. Et videtur ex eo quod jam diximus, quod licitum sit sic mutuum dare; quia ibi nihil plus accipitur quam datur, eo quod hujusmodi res numero, pondere et mensura realiter redduntur. Praeterea in hoc dans mutuo videtur tantum vitare damnum et non sperare lucrum: quia si res hujusmodi venderentur in tempore quo minus valent, ex hoc damnificaretur dominus ipsarum. Unde etiam et licite potest

eas vendere pro tempore illo in quo sunt valiturae verisimiliter, nec est usura, ut habetur extra. cap. « Naviganti. » Quare videtur similiter, quod licite possit eas res numero dare reddendas sibi in tempore quo verisimiliter plus sunt valiturae. Ad quod dicimus, quod in hoc casu conscientia aut excusat aut accusat, quia vero mutuum debet fieri gratis et sine spe lucri, quandoque in mutuo et ex mutuo intenditur spes lucri, tunc non caret vitio usurae; sed sic non est in emptione et venditione. Potest autem excludi spes lucri ab intentione dantis mutuo modo praedicto, dupliciter. Uno modo, quando dans mutuo paratus est omni tempore accipere rem mutuam, etiam ante illud tempus determinatum quo res verisimiliter deberent esse cariores: hoc modo spes lucri, et si per accidens intendatur, non tamen per se, quia non tollit rationem gratuiti a mutuo. Alio modo quando dans mutuo, etiam tempus illud determinavit in quo verisimiliter plus valiturae erant, propter solam damni vitiationem: tunc enim damnum vitat, quando necessitati propriae consulens intendit conservare res suas sibi magis necessarias ad usum vitae, quas si tunc non haberet, oporteret eas alibi emere, et sic reportaret damnum de gratia mutui facta proximo: et sic intendens in mutuando excusatur ab omni vitio usurae.

## PARS TERTIA.

### CAPUT XV.

*Quomodo et quare est restitutio usurarum facienda.*

Nunc autem ad id quod tertio in hoc opere declarandum proposuimus accedentes, de restitutionibus usurarum inquirendo prosequamur. Quod autem ad restitutionem usurarum iura obligent, satis liquet ex natura ipsarum. Quia enim superius in prima parte hujus operis, cap. 4, declaratum est quod superabundantia usurarum nullo justo titulo possideatur, ideo juste retineri non potest et injuste possidetur. Sed ut dicit beatus Augustinus, 74, quaest. 4, quod injuste possidetur et alienum est alicui, alteri proprium esse debet. Quare cum omnis superabundantia usurarum sit tanquam res aliena ipsi usurario injuste possidenti, sequitur quod sit propria alterius qui ipsa destitutus est. Sed hoc est justum secundum omnia iura, quod omnis res destituta contra justitiam restituatur: restitutio enim semper respicit destitutionem. Quare secundum omnem justitiam naturalem usurae restituendae sunt. Sed forte dicetur, quod hujusmodi res non sunt ab aliquo destitutae contra omnem justitiam: praecipue quia videtur destitutio facta voluntarie. Et etiam quia leges humanae non puniunt, quae tamen injurias punire debent: quare non videtur esse contra justitiam humanam. Ad quod advertendum est, quod voluntas hominis aliquando respicit volitum propter se, aliquando propter aliud. Quando autem propter se, tunc si illud volitum sit simpliciter justum et bonum, tunc voluntas bona est, et opus ex eis procedens bonum est et justum; si autem sit injustum et malum, tunc similiter voluntas est mala. Si vero respiciat volitum non propter se, sed propter aliud: verbi gratia, aliquis vult projicere

merces in mari, ut sic evadat periculum: illud iterum propter quod volitum dicitur aliquid, aut habet rationem justum, aut injustum, aut indifferenter. Et hoc modo primo judicatur adhuc voluntas justa et bona comparative, sed tamen potest esse injusta simpliciter, ut si aliquis vult forari ut pauperibus tribuat. Sed secundo modo potest judicari voluntas justa et libera absolute, quando illud volitum est ex natura sua justum et bonum; sed est comparative injusta et non libera, quando illud volitum habet malum finem. Unde quod aliquis vult dare superabundantiam de suo, de se non est malum nec injustum: et ideo quantum ad hoc voluntas est absoluta et libera; sed quando hoc vult dare propter rationem mutui, quod non aliter potest habere, jam hujusmodi voluntas comparata ad finem, qui de se est injustus, contrahit rationem injustitiae, et cadit a ratione libertatis. Et quia hujusmodi injustitia patiendo magis quam agendo incurritur, ideo in ipso dante est poena et non culpa. Leges vero hanc aliquando considerant justitiam, prout est conservativa pacis exterioris inter homines: et ideo leges tales non puniunt, nisi secundum quod hanc pacem destruunt. Aliquando etiam prout magis illustrantur lumine fidei et juris divini, considerant etiam justitiam veram et interioriorem: et sic leges etiam canonicae prohibent et puniunt usuras. Sic enim scriptum est Isa. 52: « Opus justitiae pax: » et ideo qualem pacem quaerunt qui leges condunt, talem sibi vindicant justitiam. Dicimus ergo, quod jure divino principaliter facienda est restitutio usurarum, quia in Scriptura sacra quantum ad legem veterem condemnantur dantes pecuniam ad usuram: et ideo contra legem divinam accipiuntur usurae. Lex autem nova prohibet sperare aliquid ex mutuo: quare magis accipere erit contra legem Evangelicam. Sed quod est contra legem divinam, secundum nullam aliam legem potest esse verum aut justum; eo quod lex divina sit prima et universalis origo omnium legum justarum, sicut Deus est origo omnium entium. Nihilominus tamen etiam contra legem naturae, quia in hoc finis conveniens secundum naturam actus humanae vitae corrumpitur. Huic enim actui qui est mutuum dare, conveniens finis ostenditur naturaliter, scilicet communis societas et fraterna caritas in subveniendo proximorum necessitatibus: et ideo gratis fieri debet naturaliter. Quare quandoque hujus actus fit propter spem alicujus commodi vel lucri, tunc ab eo tollitur finis qui naturaliter competit ei, et fit contra naturam, quare juri naturae repugnat: ideo non tantum fit injustum contra legem divinam, sed etiam contra jus naturale.

### CAPUT XVI.

*Quibus restitutiones sunt faciendae.*

Quoniam autem usurae sunt restituendae, jam oportet investigare, quibus sunt restitutiones faciendae. Et videtur quod soli Deo et ministris Dei facienda sit restitutio. Quia secundum ea quae dicta sunt prima parte capit. 5, in usura non transfertur dominium jure divino, sed tantum jure humano: sed secundum rationem in jure facienda est restitutio ejus quod detinetur injuste. Quare videtur quod soli Deo et Ecclesiae facienda sit restitutio. Sed contra hoc est, quod Domini est



terra et plenitudo ejus, a quocumque possidetur juste vel injuste: quare nulla re potest secundum veritatem destitui. Ex quo etiam colligitur regula generalis, quod illi soli aliqua res est restituenda, qui ipsa re vel aequivalenti destituitur injuste. Sicut enim restitutio facienda non est nisi ejus rei quae injuste possessa est sic nec alicui; vel aliquibus restituenda est nisi illi vel illis qui ea injuste destituti sunt. Et ex hoc concluditur primo, quod illis solis facienda est restitutio, qui juste illarum rerum domini erant, quae restituendae sunt, ante destitutionem injustam. Ex quo ulterius concluditur, quod defunctis illis qui expoliati fuerant, jam restitutio facienda est eorum filiis et successoribus, qui juste succedunt bonis defuncti expoliati. Si vero forte defunctus legavit omnia bona sua pauperibus vel Ecclesiis vel personis aliis, tunc sicut per virtutem testamenti acquiritur jus in bonis praesentibus et paratis ipsius defuncti, pauperibus, vel aliis quibus legata sunt, et sic eis est jus acquisitum in his quae jure debentur ei quocumque jure: et ideo in hoc casu ab executoribus praedicti defuncti, sive illis locis vel personis quibus omnia bona sua legavit, debet fieri restitutio quae sibi viventi facienda erat. Quod si forte ignorentur successores, et verisimiliter quibus facienda sit restitutio nescitur, vel forte noscuntur esse in locis et regionibus longinquis, et sine spe reversionis, et sine facultate mittendi vel accedendi ad eos, tunc in primo casu Ecclesiae consilium et auctoritas requiri debet: quia jam ratione juris divini pertinet restitutio quae debebatur homini qui erat membrum et filius Ecclesiae, ad ipsam Ecclesiam: unicuique vero sua Ecclesia dicitur suus Episcopus. In secundo etiam faciendum est de consilio Ecclesiae: hoc tamen superaddito, quod debet ei Ecclesia promittere restitutionem faciendam, si necesse fuerit aliquando in futuro tempore per inopinatam reversionem ipsorum quibus de jure erat facienda. Ex praedictis igitur concluditur, quod si a servo vel ancilla, vel a filio vel a filia, sive a raptore vel fure, sive ab alio usurario, sive Christiano sive Judaeo acceptae fuerint usurae talium bonorum, de quibus constat ei qui vult restituere quod non erant veri domini illarum rerum; quod restitutio talium non est facienda eis a quibus acceptae sunt, sed ipsis veris dominis et successoribus eorum, si haberi possunt. Debet tamen fieri hujusmodi restitutio caute, ne eum scandalo fiat personarum praedictarum. Si autem credatur probabiliter quod praedicti, scilicet filius de conscientia patris, et servus de voluntate domini sui, et monachus etiam Abbatibus sui, et raptor et usurarius de bonis juste possessis haec fecerunt, tunc etiam potest fieri restitutio ipsis personis injuriatis: et similiter dicendum est de uxore vivente marito.

## CAPUT XVII.

### *A quibus restitutio sit facienda.*

Nunc a quibus restitutiones usurarum fieri debeant, consideratio nostra necessaria est. Quod si quidem dominus omnis qui rem ab alio injuste destituitam detinet, juste vel injuste detinuit, aliquando ipsam rem vel aequivalentem restituere teneatur, manifestum ex utroque jure tam divino quam naturali. Primo, quia non dimittitur pecca-

tum jure divino, nisi restituatur ablatum, si restitui possit. Ergo ab eo cui peccatum hujusmodi imputatur, debet fieri ablati restitutio. Sed non imputatur peccatum nisi ei qui abstulit vel detinet rem alterius, quae non est sua aliquo justo titulo. Ergo ab illo facienda est restitutio. Item ex praecepto juris naturalis habemus quod Quaecumque vultis ut faciant vobis homines, et vos illis eadem faciatis. Sed justa voluntate vult spoliatus re propria ut spoliator ei restituat. Quare similiter spoliator debet juste restituere spoliato. Sed quis possit dici spoliator rei alienae, sive detentor in materia usurae, ita quod teneatur ad restitutionem, in quibusdam casibus non est ita clarum. Propter quod quaeritur primo de uxore usurarii, utrum teneatur ad restitutionem pro marito usurario defuncto. Secundo, utrum teneatur ad restitutionem eorum quae eedunt in usum vitae suae in domo mariti. Tertio, utrum hoc possit licite facere ignorante marito, et adhuc vivente. Et quarto de filiis et filiabus. Quaeritur similiter de servis et mercenariis usurariorum. Eodem modo quaeritur quinto de laborantibus et operariis et mercatoribus, qui labores et suas operas et suas res dant usurariis pro lucro, utrum teneantur ad restitutionem acceptorum ab eis. Sexto de accipientibus ab eis oblationes et eleemosynas vel munera, utrum teneantur ad restitutionem. Septimo etiam de fautoribus, qui fovent eos et defendunt in exercitio foenerandi, sicut aliquae civitates et aliqui principes fovent et defendunt hujusmodi qui dicuntur caursini, qui alias non auderent exercere hujusmodi actum foenerandi.

Ad hoc ultimum primo sciendum, quod sicut socii forum, et hi qui dicuntur currere cum fure, furi judicio condemnantur in sacra Scriptura; ita omnes praedicti in quantum agunt aliquid ad vitium usurae perpetranda, vel ut motores, vel ut auctores, vel ut participes lucri, vel ut factores et defensores talium, usurae vitio condemnandi sunt. Et sicut non satisfit Deo de injuria sibi illata, nisi per poenitentiam, ita nec proximo de re injuste spoliata nisi per justam restitutionem. Unicuique vero secundum gradum sui delicti competit restitutio ablati. Verbi gratia, alius peccat in hoc tantum ut motor, quare et ipse tenetur movere actorem ad faciendam restitutionem: quod si non sufficit ad hoc inducendum, debet invocare superioris auxilium: quod si non sufficit, vel forte negligit hoc facere, potest sine praejudicio, quod in hoc casu tenetur is qui promotor fuit, ad restitutionem ablatorum per ipsius motionem. Et si fuerit actor vel ut principalis, vel ut adjutor, uterque tenetur ad restitutionem ablatorum omnium in solidum: ita tamen quod altero restituente, alter absolutus est quantum ad injuriam proximi. Si vero ut particeps fuerit tantum lucri, aut scienter, aut ignoranter. Si scienter, tunc iterum potest fieri juste, aut pro necessitate corporali, quando alias commode non potest inveniri remedium, sicut accidit pauperibus mendicantibus. Et sic aliquando etiam per hoc possunt excusari filii et filiae in domo parentum usurariorum, qui alias nequeunt victum sibi necessarium invenire: et similiter uxor eadem necessitate potest excusari. Aut hoc fit pro utilitate spirituali, sicut et dominus cum publicanis manducabat pro conversione ipsorum. Et hoc fit iterum juste, aut propter recompensationem jam factam, vel saltem in spe faciendam: et primo modo artifices et laborantes et servien-

tes, possunt juste aliquando percipere de bonis usurariorum, quae acquirunt ab usurariis: quia quantum accipiunt ab usurariis, tantumdem reddunt ipsis per recompensationem operis vel laboris vel artificii, ita quod per hoc non sunt usurarii impotentes effecti ad restitutionem faciendam. Nihilominus tamen hujusmodi artifices, si credant usurarios nihil habere de bono, et eadem facilitate possunt ab aliis lucrari, peccant scienter usurariis communicando opera sua pro lucro quod sciunt esse rem alienam, et maxime propter scandalum. Sed modo secundo etiam possunt participare filii et filiae et uxor in spe recompensandi in aliquo futuro tempore, quando sperant se probabiliter facultatem habituros, quamquam tunc non habeant quando participant. Quicumque vero participes fuerint scienter extra aliquam trium causarum dictarum, sive etiam ignoranter, et aliquando hujusmodi notitiam habuerint, tales ad restitutionem tenentur pro parte illa in qua participes existunt rei alienae. Ita ergo per hoc generale documentum potest responderi ad quaesita. Ad primum et secundum de uxore, dicendum est quod uxor usurarii tenetur ad restitutionem pro marito defuncto, secundum quod ad eam bona male acquisita devoluta sunt, vel quantum ipsa, vivente marito, talibus bonis usa est. Quod si nihil de talibus bonis ad eam devolvitur, vel si forte de bonis quae in matrimonio attulerat, fructus erat sufficiens ipsius necessitatibus, et pro omnibus quae expendit in vita mariti; tunc non tenetur ad restitutionem aliquam faciendam, nisi fuerit usa rebus mariti in spe recompensandi, vel nisi aliquid alienum post mortem mariti sibi retinuit: nihil autem est restituendum nisi alienum. Ad tertiam quaestionem dicendum, quod cum uxor non sit domina rerum, sed tantum vir, est tamen conjuncta viro in adiutorium et in usum rerum: quare sicut nec potest alienare res viri ipso non volente, ita nec aliena viri potest restituere ipso nolente. Sed sicut in adiutorium est viro data ad generationem, ita ad rerum conservationem et multiplicationem honestam et utilem, et super hoc etiam ad salutis viri promotionem: unde Apostolus 1 Cor. 7: « Salvabitur « vir infidelis per mulierem fidelem. » Quare sicut de rebus propriis viri usurarii potest facere elemosynas moderatas, viro ignorante et non prohibente, quia sic agit causam viri, id ad quod tenetur ad salutem suam promovendam, et etiam ad bonorum suorum conservationem et multiplicationem: sic puto sine praedjudicio, quod possit facere restitutiones de rebus alienis, viro ignorante et non prohibente, quia sic agit causam viri. Quod si viro sciente sed dissimulante fecerit, tanto securius agere potest, quia jam est argumentum quod vir approbat, ex quo non reprobatur. Si vero viro prohibente, vel prius aut postmodum puniente, ita mulier fecerit, vel facere voluerit, jam non licet ei: quia sicut res sunt sub potestate viri, ita et uxor: quare oportet eam sic subditam viro obedire per omnia secundum Apostolum. Et si non in faciendo malum, tamen obedire debet in omittendo bonum, quia non est necessarium ad propriam salutem: unde si uxor non faciat quod sibi videtur bonum, non imputatur ei ad peccatum, sed ei qui hoc ei prohibet. Ad ea quae quarto et quinto adducta sunt patet responsio ex dictis prius de participantibus. Ad id autem quod sexto quaeritur de accipientibus elemosynas et

oblaciones et munera, dicendum quod tales qui ab eis recipiunt, aut sciunt eos usurarios, aut nesciunt nec tunc quando accipiunt, nec post: et si sic nesciunt, non peccant accipiendo, nec tenentur ad restitutionem. Si vero sciverint tunc vel post; vel necessitate compelluntur ad accipiendum, aut non: si necessitate, non peccant, nec tenentur ad restitutionem. Si vero necessitas non fuerit, adhuc aut sunt usurarii notorii, aut non notorii: si notorii, tunc omnis accipiens ab eis peccat propter scandalum, et quia ipso jure sunt excommunicati: et ideo semper restituendum est, sed non eis semper. Si vero non sunt notorii, aut aliquid creduntur habere de bono proprio praeter usuras, uat nihil: si nihil, tunc restitutio facienda est ab his qui aliquid acceperunt; si vero aliquid, tunc etiam accipi possunt sine peccato ab eis munera et hujusmodi, et ad restitutionem non obligantur. Ad ultimam quaestionem dicendum, quod ille solus tenetur ad restitutionem qui accipit vel detinet rem alienam injuste: unde et si usurarius qui sola spe lucri dat mutuum, nihil ultra acceperit, licet superaverit, etsi sit reus vitio usurae, tamen non tenetur ad aliquam restitutionem. Unde ille solus ad restitutionem tenetur, qui aliquid detinet vel accepit de alieno injuste. Unde fautores et defensores usurariorum, in quantum hujusmodi sunt tantum, non tenentur ad restitutionem alicujus, nisi in quantum sunt participes lucri; scilicet quia propter hoc sunt fautores, ut ab usurariis aliquam portionem recipiant: tamen in hoc peccant contra Deum, etiam quantumcumque utilitatem regionis vel civitatis intendunt, quia fovent peccatores in peccatis suis. Nec est simile de illis quorum auctoritate fit aliquid, et de his qui fovent, et defendunt, et recipiunt actores: quia illi sunt causa per se actus mali; isti vero non sunt causa ipsius actus, sed accidentium ipsi actui ad ejus conservationem et fructum ampliorem.

## CAPUT XVIII.

*Qualiter restitutiones fieri debent, et quo ordine.*

Quoniam autem in omni re modus habendus est, nunc de modo quo restitutio usurarum facienda est, restat inquirendum. Et primo, utrum publice, vel private. Deinde utrum prius vel posterius quam solutio debitorum, vel legatorum. Tertio, utrum prius facienda sit restitutio uni personae quam aliae. Et utrum aequaliter secundum proportionem ablatorum, vel inaequaliter possint fieri propter conditiones et necessitates personarum. Circa primum sciendum est, quod aliud necessarium est loquendo de necessitate satisfactionis, et aliud loquendo de perfectione ipsius. Ad necessitatem vero satisfactionis duo sufficiunt: unum quantum ad Deum, scilicet humilitas verae poenitentiae contra contemptum Dei; et aliud quoad proximum, scilicet restitutio plena ablati injuste contra injuriam proximi. Sed de perfectione satisfactionis ultima exiguntur signa: scilicet et testimonia praedictorum, in quibus est meritum perfectae humilitatis quantum ad Deum, et restitutio famae personalis contra scandalum ex peccato innatum quantum ad Ecclesiam. Et quantum ad hoc etiam usurario notorio non tantum est perfectionis, sed etiam necessitatis, saltem publice et in manu Ecclesiae restitutiones faciendas promittere et firmare; quia alias privaretur de jure Sa-

eramento salutis, et Christiana sepultura. Et propter hoc etiam dicit Apostolus, 1 ad Timoti. 5: « Pec-  
 cantem coram omnibus argue. » De secundo  
 vero quod propositum erat de ordine, sciendum  
 est quod consuetudo fere in omnibus apud nos  
 habet, quod prius persolvantur debita quae clara  
 sunt, et postea fiant restitutiones, et ultimo legata  
 solvantur. Et hujus consuetudinis potest esse ratio:  
 quoniam legata sunt secundum quid donata, et non  
 simpliciter donata. Ratio enim legati duo importat:  
 scilicet quod non est res data simpliciter, nisi per  
 mortem legatoris, unde semper vivente legatore  
 potest revocari: et quod sint legata propter utilitatem  
 aliquam legantis post mortem. Et ex his potest  
 patere, quod legata, in quantum hujusmodi sunt, non  
 obligant secundum necessitatem justitiae, sed secun-  
 dum devotionem et utilitatem legantis. Quare cum  
 necessaria ad salutem praecedant ea quae sunt de-  
 votionis et supererogationis, juste solvantur debita  
 ante legata. Sed majori justitia restituenda sunt  
 ablata quam debita sint solvenda, cum in hoc im-  
 pleatur justitia tollens injuriam factam Deo et pro-  
 ximo: sed in solutione debitorum nulla tollitur in-  
 juria, sed tantum solvitur justitia: quare secundum  
 hoc videntur prius restituenda ablata quam solvenda  
 debita. Sed contrarium fit ut in pluribus: quod tamen  
 habere potest rationem ex duobus. Uno modo scilicet,  
 quando debita sunt clara et manifesta, sed res-  
 titutiones non sic, sed inquirendae sunt; et clarum  
 semper praecedit obscurum in jure humano. Alio  
 modo quando res quae debetur, est determinata,  
 scilicet centum vel decem, sed restituenda non sic.  
 Sed determinatum jure praecedit indeterminatum,  
 in quantum hujusmodi. Et ex hoc concluditur quod  
 quando restituenda sunt clara et aperta et determi-  
 nata per apertam confessionem restituentis, debent  
 jure praecedere omnia debita: quod tamen raro  
 observatur, quia quod juris est, a paucis advertitur.  
 Et secundum dicta patet quando prius potest res-  
 titutio fieri uni personae quam alteri: scilicet quando  
 restitutio unius est clara et determinata, et alterius  
 non sic, ceteris paribus. Sed iterum si unus sit  
 dives, et alter pauper, et plus indigens his de  
 quibus restitutio facienda est, et aequaliter sit cla-  
 rum in utroque, adhuc prius pauperi potest res-  
 titutio juste fieri quam diviti, eo quod plus laesus  
 est in ablatione suorum, et quia plus indiget. Tamen  
 si uterque sit aequalis conditionis, scilicet in pau-  
 pertate vel divitiis, et aequaliter clarum sit de  
 utroque; si uni prius facta sit injuria quam alteri,  
 adhuc illi prius est restituendum ordine juris natu-  
 ralis, cui prius facta fuit injuria. Itemque, si per  
 partes facienda est restitutio, unicuique proportiona-  
 biliter restituendum est secundum quantitatem ablati:  
 ita quod si tantum est tertia pars ablatorum, vel  
 media, vel alia quaelibet pars, ceteris paribus fa-  
 cienda est omnibus restitutio tertiae partis omnium  
 restituendorum. Cujus ratio est ut omnibus osten-  
 datur bona voluntas restituendi omnia, si adesset  
 facultas: et sic fit praeior quilibet ad condonandum  
 injuriam sibi factam, quando videt voluntatem ad  
 emendandum paratam.

## CAPUT XIX.

*Quomodo res eadem vel aequivalens restitui debeat.*

Sed ex dictis quaestio oritur de materia et  
 quantitate restituendorum. An scilicet si quis ovem  
 vel bovem, vel aliam quamlibet rem acceperit ultra  
 sortem, teneatur eandem rem restituere, aut sufficiat  
 pretium rei acceptae restituere. Ex quibus potest  
 videri, quod ipsam rem eandem et non tantum  
 solam, sed duplicatam restituere teneatur, propter  
 illud praeceptum legis Moysi Exod. 22; ubi dicitur,  
 quod fur tenetur restituere eandem rem in duplo,  
 et ovem in quadruplo, bovem vero in quintuplo.  
 Quibus dicendum est, quod aliter judicandum est  
 de furto et rapina, et aliter de usura: quia in usura  
 aequaliter transfertur dominium jure fori, licet non  
 jure poli; sed nullo modo in aliis. Unde equus  
 furto ablati, in cujuscumque manum transierit,  
 semper est restituendus, etiam in jure fori. Secun-  
 dum vero non sic, si est equus per usuram acce-  
 ptus. Quare aliter judicandum est in usura: et di-  
 cendum quod sufficit si fiat restitutio pretii. Cujus  
 ratio est duplex. Una est jam dicta: quia quod  
 accipitur ultra sortem, non auferitur per violentiam  
 aliquam illatam domino, sicut est in furto et rapi-  
 na: et ideo proprie non dicitur ablatum, sed potius  
 acceptum contra justitiam naturalem et divinam de  
 voluntate dantis: sed quod ablatum est, idem numero  
 restituendum est, etiam si melioratur. Alia causa  
 etiam et ratio est ex natura permutationis, in qua  
 ultra sortem accipitur, quae est natura mutui. Sicut  
 enim in mutuis non est necesse quod idem numero  
 reddatur, sed tantum aequale in pretio; ita nec  
 superabundantia accepta ratione mutui est necesse  
 idem restituere, sed sufficit aequivalens in pretio.  
 Quod autem in lege scriptum est de duplo, quadru-  
 plo et quintuplo, non habet locum in usuris, sed  
 tantum in furtis vel rapinis, eo quod hujusmodi  
 usurae non destruunt bonum reipublicae de sua  
 ratione, sicut faciunt furta et rapinae; sed tantum  
 corrumpunt bonum personale, sive fraternum bo-  
 num; et hoc non inferendo malum, sed tantum in  
 non faciendo bene fieri debitum. Et de his alias  
 scripsimus in septimo praecepto decalogi diffusius:  
 et ideo haec ad praesens sufficiant.

## CAPUT XX.

*Quomodo usurae fructus et proventus sint restituendi.*

Quoniam autem, ut dicit Dominus, non potest  
 arbor mala fructus bonos facere: et quicquid ex  
 mala radice nascitur, radicis naturam trahere videtur;  
 visum est quam pluribus quod non tantum restituenda  
 sunt ablata vel injuste accepta, sed etiam quod omnis  
 proventus et omnia luera ex his provenientia sint  
 restituenda: quia quod ex alieno venit alicui, ratio-  
 nem de jure accipit alieni. Haec videntur expres-  
 sa extra. de rest. spol. cap. « Gravis: » ubi videtur  
 quod oportet reddi res cum fructibus perceptis, et  
 quae percepissent spoliati si ipsa possedissent: et  
 hoc etiam expresse habet lex extra. de rei vendi-  
 tione, cap. « Majus: » ubi dicitur quod talis tenetur  
 ad omnia luera percepta et percipienda. Sed contra  
 praedicta videtur esse ratio usurae. Primo, quia  
 simpliciter ibi non est ratio spoliationis violentae  
 vel furtivae, de qua loquuntur praedicta jura. Se-



eundo, quia in usuris ipsa superabundantia primo et per se est in pecunia, quae non habet fructum quantum est de natura sua, eo quod causa tantum translationis aliarum rerum facta est. Tertio etiam generaliter in ipsa restitutione facienda tantum restituendum est damnum quod illatum est: sed tantum non est illatum damnum, ut in pluribus, quantum provenit commodum furi de re furtiva et spoliata, eo quod fur labore proprio et solertia rem furtivam multiplicavit, quod non fecisset possessor verus. Quid autem videtur mihi super his dicendum. Dico sine praejudicio, quod aliter est judicandum est de restitutionibus usurarum, et aliter de restitutionibus furti et rapinae. Illud enim est restituendum, quod nullo jure sit suum, nec divino nec humano. Et ideo injuria fit non tantum apud Deum retinere res sic ablatas, et rerum fructus et usus; sed etiam apud hominem fit injustum tam jure fori communis, quam jure conscientiae personalis. Sed non sic est in usuris, quia licet sint contra jus divinum, et contra jus naturale naturae spiritualis, quod respicit solum debitum gratiae et caritatis; tamen non est directe contra jus humanum, quod respicit generaliter reipublicae utilitatem et justitiam; et ideo quoad hoc transfertur in eis dominium, nec habent rationem ablatorum. Constat autem quod jura allegata de rebus per violentiam ablati loquuntur, in quibus nulla radix justae possessionis invenitur. Hoc tamen generaliter advertendum est, quod in omni restitutione facienda omnis fructus et omnia luera, ex eo quod proveniunt ex re restituenda secundum quod injuste possidentur hujusmodi fructus et luera, et ex eo quod proveniunt ex re male detenta secundum justitiam divinam, habent rationem alieni, secundum rationem beati Augustini. Quare secundum Deum retineri non possunt, nisi auctoritate divina. Iterum secundo advertendum est, quod hoc solum restituendum est homini, in quo facta est ei injuria de re sua. Sunt autem quaedam res quae de natura sua habent in possidendo fructum et utilitatem; aut quia multiplicantur et augentur ex natura temporis, aut quia excoluntur solertia humani ingenii et laboris, ut terrae et agri: et hujusmodi res restituendae sunt homini cum suis proventibus: quia in hoc homo cui facta est injuria de re sua ablata damnificatur non solum quantum ad rei substantiam, sed etiam quantum ad rei usum et fructum ex usu proveniente: et sic possunt et debent intelligi jura allegata. Tertio etiam est advertendum, quod illi semper facienda est restitutio qui passus est injuriam et damnum. Si ergo aliquis passus sit injuriam et non damnum, illi non est facienda de jure restitutio realis, sed tantummodo secundum genus injuriae facienda est emendatio per similem satisfactionem. Unde qui proximum verberat in nullo eum damnificando, non tenetur ad aliquam restitutionem realem: quia omnis restitutio realis facienda alicui commensurari debet secundum quantitatem damni illati. Hinc est quod lex Moysis generaliter omnem furem ejusmodi rei, quae usum habet et utilitatem, condemnabat ad restitutionem dupli: unum scilicet propter rei substantiam, et aliud propter rei ablatam usum. Ex quo concluditur quod in omni restitutione facienda homini, debet considerari damnum tam rei, quam usus qui ex re provenit ex natura rei. Si ergo aliquod luera provenit usurario ultra rem et rei

usum naturalem ex propria operatione et solertia ejus, in quo non est alius damnificatus, dico sine praejudicio, quod non tenetur restituere homini hujusmodi luera. Verbi gratia, homo usurarius centum marchas argenti habuit ex usuris ex quibus formavit imaginem quam vendidit centum et decem marchis: credo sine praejudicio, quod illas decem marchas supererescentes non tenetur restituere ei a quo praedictas centum marchas habuit: tamen non potest eas retinere secundum Deum, quia contra Deum de re aliena sibi acquisivit. Et ideo sola auctoritas Ecclesiae ad restituendum vel distribuendum talia requirenda est. Ex his autem oritur quaestio. Si quis quaecumque rem furtivam statim vendat post furtum, aut convertat in usum proprium, ipsam totam consumendo, et non statim restituat, sed post tempus eam velit restituere, utrum teneatur ad omnes fructus usum quos percipisset verus dominus in tempore illius morae. Verbi gratia, aliquis furatus est pullum equinum, aut vitulum, quem verus dominus usque ad annos perfecti valoris custoditurus erat, sed fur statim vendidit, et liberavit se a futuro. Quaeritur utrum fur teneatur restituere pulli valorem tantum, vel etiam equi perfecti valorem. Quod videtur secundum jura allegata. Praeterea, tenetur restituere luera secundum legem, ergo multo magis damna illata. Juxta hoc etiam quaeritur de pecunia ablata, aut etiam injuste possessa: quare potest contingere, quod ille a quo est ablata sive injuste accepta, mercando ex ea auxisset eam, aut fortasse propter ejus defectum vendidit possessionem suam, et ex hoc damnum multum accepit. Utrum detinens et accipiens hujusmodi pecuniam sine justo titulo, teneatur ad omnia luera quae verus possessor ex ea fecisset, sive ad omnia damna quae exinde accidunt vero domino ad plenam restitutionem. Ad haec duo dicimus sine praejudicio, quod ad restitutionem alicujus rei faciendam, duo principaliter consideranda sunt: scilicet valor rei quae principaliter ablata est vel accepta injuste, et damnum quod illatum est injuriam passo. Propter primum dico quod eadem res quae ablata fuerat restituenda est, aut aequivalens et similis in specie et valore. Sed quantum ad secundum est notandum, quod aliquando dicitur damnum illatum proprie et per se, et aliquando per accidens tantum et non per se: et si primo modo, tunc tenetur reus ad restitutionem damni ejusmodi sit; secundo modo non tenetur ipsi passo damnum. Et ad intelligendum praedicta, ponamus exempli causa casus. Si quis damnum passus pro pecunia sibi ablata in hoc quod ex ea volebat emere necessaria sibi ad vitam, siveolvere emptam, sive debita, pro ejus spoliatione incurrit damnum, quia propter ejus defectum oportuit eum vendere possessiones suas sibi utiles, aut accipere pecuniam mutuo ad usuram, aut aliud incommodum incurrisset, dico quod hujusmodi damnum per se incidit ex furto vel rapina, et ideo restituendum est ipsi qui passus est. Praeter haec, potest incidere ibi damnum per accidens: quando scilicet ex pecunia ablata luera quod intendebat non acquisivit, et nihil aliud passus est damnum: dico sine praejudicio, quod luera tale non est restituendum ei qui passus esse dicitur hujusmodi damnum. Si vero sint res quae sunt ablatas, quae ex sui natura possunt secundum naturam temporis augeri et crescere in pretio, tunc

tenetur spoliator restituere pretium ipsarum rerum, quod valiturae erant secundum naturam et rei et temporis, in tempore quo vult restituere eos. Et per hoc patet responsio ad praedictas quaestiones. Et istud etiam in usuris est semper advertendum, quantum ad res quae accipiuntur pro usuris.

### CAPUT XXI.

#### *Quomodo et quis cogendus sit ad restitutionem usurarum.*

Quoniam autem restitutiones usurarum, et a quibus et quibus et ex quibus et quomodo faciendae sunt, superius diximus; in hoc ultimo capitulo quomodo cogendi sunt a legibus et a canone declarare volumus. Et primo supponendum est, quod culpa secundum quod est contra caritatem Dei, coactione non tollitur nec expiatur, sed solum poenitentia voluntaria, et valet emendari: sed culpa quae contra caritatem proximi directe committitur, etiam legibus tam divinis quam humanis coercenda est. Quia ergo vitium usurae directe est contra caritatem Dei, qui ipsam in lege sua prohibet et condemnat, et etiam contra caritatem proximi; quibus poenis sit coercendum, videamus. Ad quod intelligendum sciendum est, quod generaliter poenae publicae solum vitiis publicis sunt infligendae; et ideo usurarii publici poena juris coercendi sunt: et aliquando propter contumaciam comitantem, est etiam poena iudicis adjungenda. Poena vero juris triplici coercentur: scilicet quod prohibentur ad sanctam communionem recipi, et ne similiter recipiantur eorum oblationes in altari, et ne recipiantur in Christianorum sepultura; et haec tria habentur extra. cap.: « Quare in omnibus fere. » Et insuper additur poena his qui contra fecerunt, scilicet suspensionis, nisi per arbitrium Episcopi sui prius satisfecerunt, et insuper etiam per accidens consequitur tales nota infamiae. Unde et usurarii publici quando propter usuras pecunias ab alio, quas dederant, repetunt, repelli possunt per exceptionem, donec prius ipsi de usuris satisfecerint, extra. eodem cap.: « Quia frustra legis. » Specialiter autem super his poenis possunt clerici

jure ab officiis suspendi, si fuerint usurarii, extra. eodem cap. « Plerique clericos. » Contumaces vero qui nec propter poenas praedictas corriguntur, debet et potest iudex per suspensionis et depositionis sententiam coercere: laicos vero per excommunicationis sententiam cohibere, ut habetur extra. eodem cap. « Praedicta. » Item si non sufficit justitia Ecclesiastica, debet justitia laicalis in auxilium advocari: extra. « Deinde. » Cum vero ab homine, distinct. 17: « Nec licuit. » In foro autem poenitentiali, ubi de correctione peccati agitur, maxime in quantum est contra legem Dei, sic compellendi sunt usurarii ad restitutionem, ut beneficium absolutionis eis denegetur, nisi restitutionem faciant plenam quantum potuerint, aut dilationem petierint ab his quibus tenentur restituere. Aut si pauperes et impotentes sunt ad restitutionem faciendam, promittant Deo et confessori suo, quod si aliquando ad frugem prosperitatis venirent, se restituros pro sua facultate. Aut certe remissionem postulabunt ab his, quibus restituere tenentur: alias non debent absolvi in foro poenitentiae. Et haec omnia probantur beati Augustini auctoritate, qua dicitur quod non remittitur peccatum, nisi restituatur ablatum. Sicut ergo confessor ostendit absolutum a Deo quem absolvit verbo, ita non debet absolvere verbo nisi cum videt signa restitutionis fiendae in confitente: quae signa determinata sunt in his quae praediximus secundum diversos status restituentis. Haec sunt dicta circa usurarum vitium quantum ad ipsas usuras in communi, et usurarios contractus, et usurarum restitutiones, quantum Deus meae parvitati dignatus est donare. Quod si quid malee, vel minus bene dictum est, veniam peto, correctionem sustineo: scio enim quod homo sum infirmus, minor ad intellectum justiciarii, et legum et ignorantiae tenebris circumdatus et involutus. Quare ipsum lumen vitae, quod in tenebris lucet, semper imploro, ut illuminando cor meum, tenebras peccatorum et errorum in me purget, et ad perfectionem aeternae vitae perducere dignetur, Qui vivit et regnat cum Patre luminum, aeterno connexus et consubstantiali sancti Spiritus amore, Deus unus in saecula saeculorum. Amen.



# OPUSCULUM LXVII.


## DE QUO EST, ET QUOD EST

(EDIT. ROM. LIV.)

In omnibus in quibus est compositio ex materia et forma, est compositio ex quo, et quod est. Dicere autem quod, est in materia, quia quod, dicitur suppositum habens esse, materia autem non habet esse, sed compositum ex materia et forma in talibus compositis. Quo est, potest dici tripliciter: potest enim quo est, dici ipsa forma quae dat esse materiae: potest etiam dici ipse modus essendi quo est: ipsa natura quae relinquitur ex conjunctione formae cum materia, ut humanitas, praecipue secundum ponentes quod forma quae est totum, est quidditas, non autem forma partis, de quibus est Avicenna. Cum autem ratione quantitatis essentiae cum sit composita vel compositionem sequens, poterit inveniri et intelligi quidditas aliqua simplex non consequens compositionem formae et materiae. Si autem invenimus aliquam quidditatem quae non sit composita ex materia et forma, illa quidditas aut est esse, aut non esse. Si est esse, sic est essentia divina, quae est suum esse, est omnium simplex: si non est esse, oportet quod habeat suum esse acquisitum ab alio, et sic est omnis quidditas creata. Et quia quidditas posita est

non subsistere in materia, non acquiritur ei esse in altero, sicut quidditatibus compositis; inmo acquiritur ei esse in se, et ipsa quidditas erit hoc quod est suum esse, et quo est. Et quia omne quod habet aliquid non a se est possibile, respectu illius huiusmodi quidditatis, cum habeant esse ab alio, erunt possibles respectu illius esse, et respectu ejus a quo habent, in quo nulla eadem potentia, et ita in tali quidditate invenitur potentia et actus, secundum quod ipsa quidditas est possibilis, et est esse ejus compositio potentiae et actus, de quo est et quod est, unde Angelus vel anima potest dici quidditas vel natura vel forma simplex, in quantum eorum quidditas non componitur ex diversis, cum advenit ei compositio horum duorum, scilicet quidditas, et esse (1).

(1) *Hoc Opusculum est imperfectum et valde corruptum, ut puto vitio impressorum, qui illud in Alemania impresserunt: ne autem ordo totius libri destrueretur, ipsum etiam prout illud invenimus, reliquimus, quia nullibi inveniatur alia copia, qua melius emendari potuisset (Nota editionis Rom. 1570.)*





# OPUSCULUM LXVIII.

## DE ADVENTU ET STATU ET VITA ANTICHRISTI

( EDIT. ROM. 1810 A P. HYAC. DE-FERRARIS. )

« Tunc videbunt filium hominis venientem in « nube cum potestate magna et majestate; » Luc. 21, 27. In prima Dominica Adventus cantavit Ecclesia Domino misericordiam, et hoc propter hilarem et humilem adventum ejus. In ista Dominica propter adventum terribilem cantat Domino judicium. Unde dicitur in Psal. 100, 1: « Misericordiam « et judicium cantabo tibi Domine; » misericordiam quantum ad primum adventum, et judicium quantum ad secundum. Et hoc merito: quia secundum consilium Sapientis, Prov. 19, 12: « Sicut « frenitus leonis, ita et regis ira. » In quo tangitur adventus judicii. « Et sicut ros super herbam, « ita et hilaritas ejus: » in quo tangitur adventus misericordiae. Notantur ergo in praemissis verbis quatuor... ex quibus futurus ejus adventus terribilis et admirabilis redditur: primo tempus, secundo habitus, tertio locus, quarto ultio et comitatus. Tempus quidem describitur incertum ex eo, quod haec dictio « tunc » indeterminate relinquatur Matth. 24, 36: « De die autem illa ( et hora ) nemo scit. » Habitus describitur humilis, cum dicitur « filium hominis, » quia in eadem forma secundo, glorificata tamen, judicabit, in qua judicatus est. Job 56, 17: « Causa tua quasi impii judicata est: et « ideo judicium causamque recipies. » Et hoc indicatur ( ex illis verbis ) « in quem compunxerunt » Apoc. 17: « Videbit eum omnis oculus et qui eum « pupugerunt. » Joan. 5, 27: « Potestatem dedit « ei judicium facere, quia filius hominis est. » Idest in quantum homo. judicabit ministerio Trinitatis, non autem auctoritate. Locus subjungitur sublimis, cum subditur « venientem in nubibus. » Non enim in valle Josaphat descendet, ut dicit Glossa super illo verbo Joel. 3, 2: « Congregabo « omnes gentes etc. . . Hoc quidam pueriliter intelligunt, quod in valle quae est in latere montis Oliveti descendurus sit Dominus; quod frivolum est; quia non in terra, sed in spatio hujus « aeris sedebit contra locum montis Oliveti, unde « ipse ascendit, » ut impleatur quod dicitur Act. 1: « Sic veniet quemadmodum vidistis eum », « nobis « obviantibus ei in aere » sicut dicitur Thes. 4, 16, impiis autem remanentibus in terra quam dilexerunt: et dicetur eis tunc illud Matth. 23, 33: « Esurivi etc. » Comitatus subjungitur honorabilis cum dicitur « cum potestate magna et majestate. »

Prov. ultimo 5, 25: « Nobilis in portis vir ejus. » Et quia in primo adventu venit in signis amoris et mansuetudinis, secundum illud Luc. 2, 12: « Hoc « vobis signum: invenietis infantem etc., » et contemptus fuit: Isai. cap. 55, 2 et 5: « Consideravimus eum novissimum virorum. . . unde nec re- « putavimus eum: » ideo in secundo adventu veniet in signis furoris et potestatis, ut contemnes videant et confundantur. Eccles. 56, 6: « Innova « signa et immuta mirabilia: » et quomodo mutabis sequitur « excita furorem, » ibid. 8, scilicet in signis, « et effunde iram, » scilicet in sententiis. Ps. 64, 8: « Turbabitur gentes, et timebunt qui « habitant terminos, a signis tuis. » Ponuntur autem in evangelio signa potestatis, ut melius pateat potestas hujus judicii in omnibus creaturis. Primo in creatura superiori, et hoc dupliciter; scilicet quantum ad ornatum caeli empyrei; et hoc notatur cum dicitur: « Nam virtutes caelorum movebuntur » scilicet Angeli, qui sua virtute movent sphaeras secundum philosophos. De quorum commotione Job 26, 11: « Columnae caeli contremiscunt, et pavent « ad nutum ejus » Isa. 55, 7: « Angeli pacis amare « flebunt; » in quos licet non cadat passio, tamen signaurbationis et moeroris ostendent. Et quantum ad ornatum syderum, quod notatur cum dicitur Luc. 21, 25: « Erunt signa in sole et luna et « stellis ejus; » Ezech. 52, 7: « Operiam caelos et « nigrescere faciam stellas. ejus; » Psal. 18, 1: « Caeli enarrant gloriam Dei, » item ibid. Ezech. « Solem nube tegam, et luna non dabit lumen « suum. » Ezech. 52, 8: « Omnia luminaria caeli « moerere faciam super te, et dabo tenebras super « terram tuam. » Secundo in creatura inferiori; et hoc dupliciter: scilicet quantum ad elementum aquae, quod notatur cum dicitur « prae confusione sonitus « maris »; et quantum ad elementum terrae, quod notatur cum dicitur « in terris pressura gentium. » Ps. 56, 4: « Sonuerunt aquae et turbatae sunt « abyssi. » De secundo Isai. 24, 5, et 19 et 20, etc.: « Dissipatione dissipabitur terra, confractione con- « fringetur terra, contritione conteretur terra. . . « agitatione agitabitur terra sicut ebrius, et concu- « tientur fundamenta terrae. » Tertio in creatura media: et hoc dupliciter: scilicet quantum ad elementum ignis per ardorem undique inflammantis; Ps. 56, 5: « Ignis ante ipsum praecipit, » et quan-

tum ad elementum aeris undique luce carentis propter privationem solis, et apparitionem horridi iudicis, quae erit in nubibus aeris: quod notatur cum dicitur: « Venientem in nubibus cum potestate et majestate. » De his tribus Aggae: 2, 7: « Adhuc unum modicum est, et ego commovebo caelum, » quantum ad creaturam superiorem, « et terram » quantum ad inferiorem, « et mare » quantum ad mediam, et « commovebo omnes gentes » quantum ad omnia. Isai. 24, 6: « Maledictio vorabit terram. . . et insanient cultores ejus, et relinquentur homines pauci. . . clamor erit in plateis. » Is. 24, 17: « Formido » scilicet a superiori, et inde apparebit iudex iratus; « fovea » scilicet ab inferiori, ubi patebit profundum inferni; « laqueus » scilicet quia undique circumdabit ignis accensus. Job 2, 20: « Effugium peribit ab eis; » unde Ps. 158, 8: « Si ascendero in caelum etc. » Rogemus ergo etc.

Et quia materia se offert in praesenti evangelio, ut de adventu ad iudicium aliquam notitiam habeamus, secundum quod ex Scripturis colligi potest, distinguenda sunt nobis tria: scilicet praecedentia, concomitantia et subsequenda ad iudicium. Praecedentia autem sive praecambula ad iudicium distinguuntur secundum triplicem statum praedicationis, quae fiet per Enoch et per Eliam, Malach. ult. 5: « Ecce ego mittam vobis Eliam prophetam antequam veniat dies Domini magnus et horribilis. » Item secundum statum persecutionis quae fiet per Antichristum et pseudoprophetas et praedicatores, Apoc. 15, 15: « Et faciet, ut quicumque non adoraverit imaginem bestiae, occidatur. » Quod signatum fuit Dan. 5, ubi datum est edictum quod omnes interficerentur qui non adorarent statuam quam erexerat Nabuchodonosor. Item statum purgationis quae fiet per ignem. Psal.: « Ignis ante ipsum praecedet. » 2 Petri 5, 10: « Elementa vero calore solventur. » Et haec tria sumi possunt secundum illa tria quae ponuntur Dan. 12, 1 et 2, de statu iudicii: « In tempore autem illo consurget Michael princeps magnus, qui stat pro filiis populi tui, et veniet tempus quale non fuit ab eo ex quo gentes esse coeperunt usque ad tempus illud; et in tempore illo salvabitur populus tuus omnis qui inventus fuerit scriptus in libro ( vitae ), et multi de his qui dormierunt in terrae pulvere evigilabunt; alii vero in vitam, alii in opprobrium, intelligitur enim eligentur. » Joan. 15, 18: « Ego scio quos elegerim; » Matth. 20, 16: « Multi enim sunt vocati, pauci vero electi, » et hic propter praedicationem, scilicet Eliae et Enoch dealbabitur, scilicet propter persecutionem Antichristi. Ps. 50, 9: « Lavabis me et super nivem dealbabor. » Probabuntur scilicet per ignem, qui praecedet faciem iudicis; unde dicitur: « et quasi ignis probabuntur multi. » Job 25, 10: « Probavit me quasi aurum, quod per ignem transit. » Ps. 16, 5: « Igne me examinasti, et non est etc. » Quilibet autem istorum actuum vel statuum distinguitur multipliciter. Circa statum praedicationis notatur, quod ante praedicationem Eliae et Enoch praecedent quatuor. Primo, dissidium regnorum a Romano imperio. 2 Thess. 2, 5 et 7: « Nisi venerit discessio primum, et revelatus fuerit homo peccati, filius perditionis: » et ex Glossa Ambrosii « discessio » graece dicitur « apostasia; » nisi scilicet ab imperio romano primum gentes disces-

serunt. Et infra « qui tenet » nunc teneat, donec de medio fiat. Qui tenet, scilicet, romanum imperium « teneat illud donec ipsum fiat de medio. » Quia medium est dum universis circumquaque gentibus imperat; quibus ab ipso recedentibus, de medio auferetur, et tunc ille iniquus opportuno sibi tempore revelabitur. Dan. 7, 7: « Habebat cornua decem: » ubi dicit Glossa, quod imperium Romanum, appropinquante die iudicii scindetur in decem regna. Secundo, inobedientia ecclesiarum Romanae Ecclesiae, Dan. 12, 7: « Cum consummata fuerit dispersio populi sancti, complebuntur universa haec. »

Tertio, hypocrisis religiosorum et haeticorum 2 Tim. 4, 1 et 2: « In novissimis temporibus discedent quidam a fide attendentes spiritibus erroris et doctrinis daemoniorum in hypocrisi loquentium mendacium et cauteriatam habentium conscientiam etc. » Matth. 7, 15: « Attendite a falsis prophetis, qui veniunt ad vos in vestimentis ovium, intrinsecus autem sunt lupi rapaces: » et Matth. 24, 25: « Surgent ( pseudochristi ) et pseudoprophetae, et dabunt signa magna et prodigia, ita ut in errorem inducantur, si fieri possit, etiam electi. » Quarto, universalis concitatio populorum. Matth. 24, 7 et 8: « Consurget enim gens contra gentem, et regnum adversus regnum, et erunt pestilentiae et fames et terrae motus magni per loca: haec autem omnia initia sunt dolorum. » Post haec sequitur praedictio Eliae et Enoch, et persecutio Antichristi; et primo dicendum est de praedicatione Eliae et Enoch, qui commendabiles reddentur a multis in novissimo: primo ab eorum praedicationis diuturnitate, scilicet quantum praedicabunt, Apoc. 11, 5: « Dabo duobus testibus meis, et prophetabunt diebus mille ducentis sexaginta, amicti saccis. » Secundo habitu corporis eorum, « amicti saccis. » Tertio, habitu mentis, ibi, 4: « Hi sunt duae olivae. » Quarto, fiducia, et constantia eorum, ibi, 5: « Si quis voluerit etc. » Quinto, de potentia eorum, ibi, « Hi habeant potestatem » Sexto, de morte eorum, ibi, 7: « Cum finierint etc. » Septimo, de resurrectione eorum, ibi, 11: « Et post tres dies etc. » Octavo, de eorum assumptione in caelum, ibi, 12: « Et audierunt vocem magnam etc. » Nono, de plaga futura mundo in assumptione eorum, ibi, 15: « Et in illa hora factus est terrae motus etc.: » quae omnia continentur Apoc. 11. Dicitur ergo quantum ad primum « dabo; » numquid dicitur ad signandum quod inestimabile est quod dabit eis? Luc. 21, 15: « Ego dabo vobis os et sapientiam, cui non poterunt resistere et contradicere omnes adversarii vestri. » Unde dicitur Matth. 10, 20: « Non enim vos estis qui loquimini, sed spiritus patris vestri qui loquitur in vobis. » « Duobus » dicit propter sufficientiam testimonii, quia, ut dicitur Matth. 18, 16: « In ore duorum vel trium testium stat omne verbum. » Vel « duobus » dicit, quia de duobus praedicabunt, scilicet de divinitate Christi, et humanitate: vel de « duobus, » scilicet de Christo, ipsum commendando et magnificando, et de Antichristo, ipsum reprobando et damnabilem ostendendo. Vel « duobus », quia de utroque testamento accipient, quod ipsi praedicabunt. Vel « duobus », scilicet praemia bonorum, et poenas damnatorum.

« Testibus meis, » primo praedicando Act. 1, 8:

« Eritis mihi testes in Jerusalem et in omni Iudaea et Samaria, et usque ad ultimum terrae; » secundo moriendo Apoc. 2, 13: « In diebus illis Antipas testis meus fidelis qui occisus est apud vos: » quasi dicat: in hoc et propter hoc est testis meus, quia occisus pro me. Et in hoc quod dicit « dabo », notatur, quod magnam gratiam facit Deus cui dat ut pro eo sit martyr, sicut dicit Glossa interlinearis. Sequitur de tempore praedicationis eorum. Apoc. 11: « Et prophetabunt diebus 1260, idest tribus annis et dimidio, » ut dicit Glossa. Sed contrarium dicere videtur alia Glossa dicens: « Notat quod hi dies non perficient tres annos cum dimidio; » et hoc est verum, quia ad hoc quod tres annos cum dimidio perficerent, oporteret ut adhuc adderentur 19 dies. Sed non est contrarietas: quia praedicabunt solummodo tanto tempore, quanto Christus praedicavit. Christus enim postquam fuit baptizatus supervixit annis tribus et dimidio, non tamen integro; quia pro dimidio anno computatur tantum temporis quantum est ab Epiphania usque ad Pascha. Unde sicut Christus in praedicatione omnino et praecise non perfecit tres annos et dimidium, sic isti non perficient. Et hoc significatur per numerum dierum qui hic ponitur, qui non perficit praecise tres annos et dimidium, sicut dicit Glossa. Et hoc solummodo habetur de intellectu, qui dicit « sicut ipse Christus praedicavit » Hic etiam est notandum, quod de illis tribus annis et dimidio, idest, eo quod fuit ab Epiphania usque ad Pascha, Christus nec aperte praedicavit, nec aperte fecit miracula, sed tantum occulte deferens Joanni; quia adhuc Joannes Baptista non erat incarcerationatus, sed libere praedicabat; quia in Paschate quod fuit post annum et dimidium a baptismo Christi fuit incarcerationatus; et tunc Dominus publice coepit praedicare et docere, et in fine duorum annorum fuit crucifixus. Joannes vero Baptista uno anno ante Dominum fuit occisus; propter quod uno anno fuit in carcere detentus. Alia etiam solutio posset dari: scilicet quod Scriptura non facit vim in minutiis numerorum; et propter hoc per praedictum numerum intelliguntur tres anni et dimidium; etsi numerus ille non perficiat totum; quia posito majori numero, non fit vis in minori. Sed prima solutio verior est et melior. Sequitur de habitu corporis eorum; « auicti saccis; » ubi notatur, quod Ecclesia in sua senectute revertetur ad dies juventutis. Idem enim legis de praecone primi adventus; scilicet de Joanne Baptista, Matth. 3, 4: « Et erat Joannes vestitus de pilis camelorum et zona pellicea circa lumbos suos. » Hoc etiam de Isaia legitur, qui non propheta sed evangelicus praenunciator fuit dominicae passionis. Isai. 20, 2: « Solve saccum de lumbis tuis. » Unde Isai. 50, 5: « Induam caelos tenebris, et saccum ponam operimentum eorum: » quasi diceret: sancti praecones ultimi adventus lux sunt caeli splendentes virtutibus, tamen reputabuntur viles et miseri. Qui ergo pretiosis et mollibus induuntur non videntur esse nuntii vel praecones adventus Christi, sed magis recessus. Sequitur de habitu mentis eorum. Infra eod. ( Apoc. 11, 10 ): « Illi sunt duae olivae, et duo candelabra. » Olivae propter bona opera, quae in se habebunt. Eccles. 24, 19: « Quasi oliva speciosa in campis. » Vel propter opera misericordiae, quae exercebunt consolando desolatos, Zachar. 4, 14: « Isti sunt duo filii olei » idest splendoris,

« qui assistunt dominatori universae terrae. » Sed candelabra dicuntur propter lumen doctrinae quod exhibebunt aliis, exhortando bonos et confortando et arguendo malos, Matth. 5, 14: « Vos estis lux mundi; » et postea sequitur ibid. 16: « Sic luceat lux vestra coram hominibus. » Et in nullo inclinabunt se Antichristo. Unde sequitur Apoc. 11, 4: « In conspectu Domini terrae stantes, » idest Dei. Et si casuri sint, scilicet corporaliter in conspectu Antichristi, stantes dicit, quia in nullo obedient ei. Sequitur de fiducia et constantia eorum, infra ( Apoc. 2, 5 ): « Et si quis eos voluerit nocere, ignis exiet de ore illorum, et devorabit inimicos eorum. » Antichristus enim blandimentis et comminationibus conabitur eos attrahere, sed non praevaleret, ut a proposito praedicationis eos cohibeat. Quia ignis, idest scientia spiritualis, exibat de ore illorum, cui non poterunt resistere adversarii. Jerem. 23, 29: « Nonne verba mea quasi ignis » et sermo meus « quasi malleus conterens petras. » Eccles. 48, 1: « Et surrexit Elias quasi ignis, et verbum ipsius quasi facula ardebat; » Luc. 21, 13: « Dabo vobis os et sapientiam cui etc. Et devorabit inimicos eorum. » Idest devorandos eos ostendet, scilicet a daemonibus; Deuter. 32, 24: « Devorabunt eos aves » idest daemones « morsu amarissimo; » et damnandos in ignem aeternum, ubi in perpetuum cruciabuntur. Matth. 23, 41, ite « maledicti in ignem aeternum, qui paratus est diabolo, » idest Antichristo « et Angelis ejus, » idest ministris: quod quidem fuit signatum 4 Regum 1, in duobus quinquagenariis, qui consumpti sunt ab igne, qui ad preces Eliae descendit de caelo. Sic Antichristus quum videbit eos inflexibiles esse, tentabit eos occidere. Unde sequitur: si quis voluerit eos laedere, idest occidere morte corporali, idest Antichristus. Sic et si simili sententia sicut praemisi, oportet eos occidi, idest condemnari, qui Antichristum et suos praedicabunt et ostendent esse damnandos.

Sequitur de potestate eorum: infra eod. ( Apoc. 11, 56 ): « Illi habent potestatem claudendi caelum » ne pluat diebus prophetiae eorum, » quae durabit per tres annos et dimidium; et hoc fuit signatum 3 Reg. 17, ubi ad preces Eliae clausum fuit caelum, ne daret rorem nec pluviam annis tribus et mensibus sex. Vel caelum potest appellari sacra Scriptura, quae celat nobis arcana Dei, quam illi quum volent aperient. Non enim semper praedicabunt; sed tempore opportuno: quia, ut dicitur Ecclesias. 8, 6: « Omni negotio tempus est et opportunitas. » Habent etiam potestatem « super aquas convertendi eas in sanguinem; » ad litteram sicut factum est in Aegypto per manum Moysis, Exod. 8: « Et percutere terram omni plaga quotiescumque voluerint » sicut Aegyptus plagis percussa fuit; sed hac potestate non utentur ipsi, quia actus miraculi est ad utilitatem; tunc vero non erunt utilia propter hominum incredulitatem, et quia Antichristus etiam faciet multa miracula. Sequitur de morte illorum, et de illusionem, quam facient eis mali. Apoc. 11, 7: « Cum finierint testimonium suum, » idest praedicationem suam, scilicet post tres annos et dimidium; « bestia quae ascendit de abyso, » idest Antichristus « faciet adversus eos bellum et vincet illos et occidet eos » cum bello, scilicet multis diversisque disputationibus et miraculorum operationibus, et vincet et occidet eos, scilicet corporaliter, « et corpora eo-



« rum jacebunt in plateis diversis ( civitatis magna ). » Vel quia simul occisi de una platea portabantur in diversas plateas, ut videant eos homines et timeant imitari vel conformari eis. Vel forsitan in diversis locis occidentur. Secundo ponitur locus ubi sunt occidendi; quia in Jerusalem. Unde dicitur: « Civitatis magnae, » idest Jerusalem, quae dicitur magna propter duo. Primo, quia semper pro magna est habita; unde civitas regalis appellatur Isai. 52, 1: « Jerusalem civitas sancta. » In ea enim erant omnia sanctuaria; in ea enim celebratur Deus. Ps. 86, 2: « Gloriosa dicta sunt de te, civitas Dei. » Secundo dicitur magna propter multa vitia et peccata quae in ea facta sunt et fient, sicut quondam erat magna in virtutibus. Unde sequitur « quae vocatur spiritualiter Sodoma, » idest « muta » a laude Dei. Isai. 1, 10: « Audite verbum Domini principes Sodomorum, et percipite auribus legem Dei nostri populos Gomorrhae. » Hoc dicit Isaias pro tempore Antichristi; quia, cum tunc essent mali, non tamen tantum quantum erunt tempore Antichristi. Thren. 4, 6: « Major effecta est iniquitas filiae populi mei peccato Sodomorum, » et « Aegyptus, » idest tenebrosa et flebilis, quia ibit in tenebras exteriores « ubi erit fletus et stridor dentium, » Matth. 8, 12. « Ubi et Dominus illorum crucifixus est; cui ipsi servient » ad literam temporali passione; et spiritualiter crucifigetur in servis suis. Hebr. 6, 6: « Rursus crucifigentes sibi ipsos filium Dei. » Unde dictum est Petro: vado Romam iterum crucifigi: quia quod sit servis suis sibi reputat Christus fieri. Matth. 23, 40: « Quamdiu uni ex minimis meis fecistis, mihi fecistis: » et Act. 9, 4, Paulo dictum est: « Saule Saule quid me persequeris? etc. » Tertio ponitur crudelitas quam exercebunt in eos, et timor quem incurrunt multi propter hoc: « et videbunt multi de populis et tribus et linguis et gentibus: » quidam propriis oculis, quidam fama, « corpora eorum per tres dies et dimidium, » jacere super terram: et hoc fiet ut magis terreantur homines, ne eis acquiescant. Sed quare hoc permittet Dominus, ut scilicet tam crudeliter et sic inhumane tractentur? Respondeo, ut notetur mirabilis Dei dispensatio, quia per hoc erit magis evidens eorum resurrectio. Unde sequitur, « et corpora eorum non sument poni in monumentis. » Ecce magna illusio, ne scilicet eorum memoria habeatur. Sed cum terra illa sit calida, nunquam putrescent corpora illorum, eo quod per tantum temporis erunt in humanitate? et si foetebunt, quomodo poterunt sustineri? Respondeo: non putrescent, quia solidata erunt propter usum ligni vitae, quo ipsi modo vescuntur et vivunt in paradiso terrestri; tamen tandiu possent sic esse, quod putrescerent. Vel potest dici, quod eorum corpora conservabuntur solida virtute divina, ut eorum bonitas magis appareat, et melius cognoscantur cum resurrexerint. Quarto ponitur gaudium quod mali habebunt de morte istorum; idest « inhabitantes terram, » idest mali terrena amantes gaudebunt super illos, quia occisi sunt, et jucundabuntur, et munera mittent invicem prae gaudio, putantes se esse liberos et securos, illis occisis qui eorum vitae et malitiae contradicebant. Sap. 2, 1, et 6 et 8: « Dixerunt cogitantes apud se non recte: venite ergo, et fruamur bonis quae sunt; coronemus nos rosis antequam marcescant. » Et hoc facient gaudentes, ut dictum

*S. Th. Opera omnia. V. 17.*

est de morte eorum. Unde sequitur ( Apoc. 11, 10 ): « Quoniam hi duo prophetae » scilicet Enoch et Elias « cruciaverunt eos qui habitant super terram: » idest malos, quorum damnationes praedixerunt, et ita cruciandos annunciaverunt; vel « cruciaverunt eos » contradicendo iniquitati eorum. Sap. 2, 12 et 16: « Circumveniamus ergo justum, » quoniam inutilis est nobis, et contrarius est operibus nostris, et improperat nobis peccata legis, et diffamat in nos peccata disciplinae; » ibid. 16: « Tamquam nugaces aestimati sumus ab illo; » ibid. 19: « Contumelia et tormento interrogamus illum etc. » postea sequitur mors turpissima. Tunc enim mali cruciantur cum boni exaltantur. Vel cum eis sua praedicatione contradicunt. Sed cum deberet dicere « inhabitantes Jerusalem, » quare dicit « terra »? Respondeo; per hoc spiritualiter intelligitur, quod omnes sancti qui terram universam inhabitant, gaudebunt spiritu, et jucundabuntur corpore, et mittent invicem scilicet munera congratulationum quum « hi duo prophetae cruciaverunt » etc. idest audacter restiterunt malitiae eorum. Prov. 28, 1: justus quasi leo confidens absque terrore erit. Sequitur de eorum resurrectione, inf. cod. Ap. 11: « Et post tres dies et dimidium spiritus vitae, » idest anima, quae dat vitam « a Deo » scilicet missa, « intrabit in eos. » Ezech. 37, 6: « Ecce ego mitto tam in vos spiritum, et vivetis. » Cum dicitur « a Deo » notatur quod resurgent corpora, et quod non naturaliter, sed miraculose.

Sed quaeritur de istis quomodo resurgent? aut sicut Lazarus, aut sicut Christus? Si primo modo, idest sicut Lazarus, fiet eis quodammodo injuria, quia iterum morientur; si secundo modo, idest sicut Christus, igitur in corporibus glorificatis; et sic resurgent ante alios; quod est contra Apostolum Heb. 11, 40: « Deo nobis melius ( aliquid ) providente ut non sine nobis consumerentur. » Respondeo, non resurgent morituri iterum. Quod quaeritur: utrum in corporibus glorificatis? dici potest quod sic; sed hoc erit eis speciale privilegium specialiter datum propter speciale testimonium propter quod occiduntur. Sed si in corporibus glorificatis, quomodo ergo videbuntur ab hominibus? Respondeo, quod corpus glorificatum cum vult et cui vult offert se; et cum vult potest fieri palpabile, et sic etiam potest se visibile exhibere; et hoc habet corpus glorificatum a natura glorificationis. Dicunt tamen aliqui, quod cum se offert corpus glorificatum palpabile vel visibile, hoc est per miraculum. Vel potest dici, quod anima intrabit corpora eorum non ut organa, sed in materiam. Sed tamen magis videtur quod corporabitur, ut ad organa, per hoc quod dicitur, quod spiritus vitae intrabit in eos. Unde sequitur Apoc. 11, 11, « Et steterunt super pedes suos » vivi postquam surrexerunt. Sed quia superius dictum est quod corpora eorum non foetebunt, sed erunt multum solida propter usum ligni vitae, habetur ergo, quod difficilior morientur quam alii homines; et hoc est verum, quia gravissima erit eis mors, quia maxime vigebit in eis sensus, et sic maxime sentient. Quod etiam contingit in membris corporis humani, in quibus quanto magis viget sensus, tanto est major dolor si pereuntur vel vulnerentur. Timor magnus etiam erit ex hoc, ex tam sobita eorum resurrectione ( Apoc. 11, 11 ): « timor magnus cecidit, » sicut pondus opprimens, vel pro Dei reverentia,

vel pro inferni poena: « Super eos qui viderunt « eos, » scilicet jam gloriose resurrexisse. Job 31, 25, « Semper enim quasi tumentes fluctus super « me timui Deum, et pondus ejus ferre non potui. » Sequitur de mirabili assumptione eorum (Apoc. 11, 12): « et audierunt » Enoch et Elias « vo- « cem magnam » de caelo, idest magnae potestatis, « ascendite huc, » scilicet ad consortium justorum de medio hominum improborum: « ascendite, » qui prius descendistis humiliati et saccis amici. Luc. 4, 11: « Qui se exalat humiliabitur, et qui « se humiliat exaltabitur; » unde sequitur (Apoc. 11, 12): « Et ascenderunt in caelum in nube » sicut Christus, quia maxime ipsum imitati sunt in sustinenda pro eo tribulatione; sic et fient ei conformes in ascensione ejus; sed Christus propria virtute, illi vero in virtute Christi. Vel in nube, idest in corporibus subtiliatis et levibus super ventum factis. Vel in nube, idest Christo duce. Michae. 2, 15: « Ascendit pandens iter ante eos; » nec ascenderunt occulte sed publice: ideo sequitur « et viderunt illos inimici eorum, » scilicet eum gloria ascendentes, et cum honore deductos ante sedem Dei et Agni, idest Christi; unde poterunt dicere illud Sapien. 5, 4, « Nos insensati vitam « illorum aestimabamus insaniam et finem illorum « sine honore; ecce quomodo computati sunt inter « filios Dei, et inter sanctos sors illorum. » Sequitur de plaga futura mundo propter eorum ascensionem, ibidem 15: « et in illa hora » scilicet mortis, vel glorificationis eorum « factus est ter- « raemotus magnus » ad litteram. Vel terraemotus, idest magna commotio in hominibus terrena amantibus, qui in morte eorum audacius commovebuntur ad destructionem fidelium, ad suam majorem damnationem et punitionem in inferno. « Et decima « pars civitatis cecidit, » idest multi justi ad litteram ceciderunt gladio Antichristi. Unde sequitur « et « occisa sunt in terraemotu nomina hominum, » idest homines digni honore, usque ad « septem « millia » hominum, qui non curvaverunt genua sua ante Baal, idest Antichristum. Unde ad litteram occidentur ab Antichristo, qui eum nollent adorare: « Et reliqui in timorem sunt missi » hoc scilicet videntes. Psal. 47, 6: « Ipsi videntes sic admirati « sunt, conturbati sunt, commoti sunt, tremor ap- « prehendit eos. »

Circa statum Antichristi notanda sunt sex: primo de ortu ejus; secundo de progressu ejus; tertio de potestate ejus; quarto de cultu et simulatione ejus; quinto de conflictu et persecutione ejus; sexto de morte et poena ejus. Circa primum notantur quatuor: primo unde nascetur; secundo quomodo nascetur; tertio quomodo nutrietur in utero matris; quarto ubi nascetur. Circa primum sciendum est, quod nascetur de Judaeis de tribu Dan. Genes. ult. 17: « Fiat Dan coluber in « via, cerastes in semita, mordens ungulas equi, « ut cadat ascensor ejus retro. » Apoc. 13, 1: « Vidi de mari bestiam ascendentem etc. », idest Antichristum, nihil omnino secundum rationem gerentem, sed omnia per crudelitatem; et ideo vocatur bestia. Gen. 57, 53, « Fera pessima devoravit eum. » Ascendentem de mari, idest de Judaeis nascentem. Judaei autem dicuntur mare, quia etsi prius terra fuerunt culta, Jerem. 2, 21: « Vineam meam electam, « ego te plantavi, » et alibi « vinea de Sabaoth « domus Israel est culta » scilicet per legem et prophetas « et amoena »; tamen quia peccatum maximum

fecerunt Christum occidentes, propterea instabiles et vagi facti sunt super terram incurrentes illam maledictionem Cain, Gen. 4, 12, « Vagus et pro- « fugus eris super terram: » et sic sunt mare, quod fluidum est et amarum. Unde Thren. 1, 8, « Peccatum peccavit Jerusalem, » scilicet crucifigendo Christum; « propterea instabilis facta est. » De mari ergo ascendit, idest de Judaeis de tribu Dan, quae fuit in Israel vilissima tribus. Et propter hoc dicit « ascendentem, » quia de vili tribu veniet ad magnam potestatem « Dan coluber in via etc. » Et hoc dicitur de Antichristo, quia ipse insidiabitur et nocebit obviantibus per praecepta et consilia. Cum dicit « ascendentem » ostendit, quod multum tolletur in altum per superbiam et potentiam. Sed in fine dejicietur, ut lapsu graviori ruat. Prov. 29, 25: « Superbum » idest Antichristum « sequi- « tur humilitas » idest dejectio. In hoc, quod dicitur « ascendet de mari, » signatur quod cito erit casurus, quasi de instabili et fluxibili fundamento, super quod aedificium diu stare non potest; unde Apoc. 12, 18, dicitur: « Stetit super arenam « (maris); » Matth. 7, 26, 27, « Similis est viro « stulto qui aedificavit domum suam super arenam. « Et descendit pluvia, et venerunt flumina, et fla- « verunt venti, et irruerunt in domum illam, et « cecidit, et facta ruina illius magna. »

Sequitur secundum, scilicet quomodo nascetur. Nascetur enim de fornicatione, non de virgine, sicut quidam finxerunt. Apoc. 11, 7: « Bestia ascendit de abys- « so, » idest de fornicatione et peccato « faciet adversus « eos bellum. » Vel secundum aliam expositionem: « De abysso, » idest de profunda et obscura tenebrositate malitiae, qua erit plenus totus. Apoc. 17, 8: « Bestia quam vidisti, ascensura est de abysso « et in interitum ibit; » etsi in principio antequam sublimetur videatur bonus; et tyranni impii et hypocritae ponent eum in regno, quod signatum fuit Dan. 7, 7, ubi dicitur: « Ecce bestia quarta, » idest regnum Romanum, « terribilis » scilicet ante fidem, atque « mirabilis » post fidei susceptionem « dentes ferreos habebat magnos. » Hoc dicitur quia omnes domuit et sibi subjugavit. Et paulo post, « et ecce cornu aliud parvulum, » idest Antichristus « ortum est de medio eorum » qui tempore regni romani nascetur, et cum fiet discessio a romano imperio revelabitur. 2 Thess. 2, 2, « Nisi « venerit discessio primum, » idest a Romano imperio, et « revelatus fuerit homo peccati, » idest de peccato conceptus « filius perditionis, » idest Antichristus, qui de perditione, idest de fornicatione nascetur. Vel « filius perditionis » secundum Augustinum, quia ipse est fons peccati, et perditio omnium malorum et sui ipsius.

Sequitur tertium, quomodo nutrietur in utero matris, quia operatione diaboli. Nam, sicut dicit Augustinus, spiritus malignus descendet in uterum matris, et ex virtute diaboli confovebitur et implebitur Antichristus; non tamen erit in Antichristo diabolus, ut in daemoniacis; quia tunc non imputaretur ei peccatum, sed quia sic possidebit eum quod pro sua voluntate inclinabit eum cum consensu liberi arbitrii Antichristi; vel super illud 2 Thessal. 2, 9: « Cujus est adventus secundum ope- « rationem Satanae. » Glossa: non tamen sine consensu ut phreneticus, qui culpam non habuit: quia si sic vexaretur a diabolo, non imputaretur quodcumque ageret. Quod autem incipiat esse malus ex

utero matris, probatur per illud Is. 48, 8: « Trans-  
gressorem de ventre vocavi te: » sicut de Joanne dicitur Jer. 1, 5: « Priusquam te formarem in  
« utero novi te. » De matre Antichristi, dicitur  
Apoc. 17, 5: « Vidi mulierem sedentem super be-  
« stiam coccineam plenam nominibus blasphemiae. »

Sequitur quartum, de loco scilicet ubi nascetur, quia in Babylon magna mater fornicationum et abominationum terrae. Et statim sequitur de Antichristo Apoc. 17, 6: « Vidi mulierem ebriam de sanguine  
« sanctorum et martyrum Jesu. » Plenam, etsi non satiatam; velut enim ebria exultavit, cum sanctos occidendo se vicisse existimaverit. Per sanctos intelliguntur illi qui ante adventum Christi fuerunt occisi: 4 Reg. 21, 16: « Sanguinem innoxium fudit  
« Manasses multum nimis, donec impleret Jerusa-  
« lem usque ad os. » Idest martyres, qui in tempore testes intelliguntur, sancti, qui propter adventum Christi et propter ejus fidem, et testimonium fuerunt cisi. Ideo dicitur « martyrum Jesu ». Hebr. 2, 57: « Lapidati sunt, et occisi sunt in occisione  
« gladii etc. », de utrisque dicitur Matth. 23, 34: « Mitto ad vos prophetas et sapientes et scribas,  
« et ex illis occidetis et crucifigetis, et ex eis flagellabitis in synagogis vestris, ut veniat super  
« vos omnis sanguis justus, qui effusus est super  
« terram etc. » Unde bene dicitur ebria; sicut enim ebrius etsi non habeat necesse bibere, tamen appetitum non amittit; sic mali etsi multis bonis noceant, sitis tamen nocendi non extinguitur, sed crescit potius appetitus.

Sequitur de progressu Antichristi: Circa quod notatur primo, ubi nutrietur; secundo, a quibus; tertio, qui primi ei adhaerebunt; quarto, qua aetate incipient haec omnia.

1. Circa primum sciendum est, quod nutrietur in illis duabus civitatibus in « Chorozain et Betsaida; » unde super illo verbo: « Vae tibi Betsaida, » Matth. 11, 21, dicit Augustinus: ideo imprecatur et improbat Dominus istis civitatibus, quia in eis conversabitur filius perditionis, idest Antichristus.

2. A quibus nutrietur; quia a maleficis et magis Babylonis, qui docebunt eum omnem artem magicam; sicut enim dicit Augustinus, nutrietur enim a spibus malignis, qui propter incantationes suas continuo ei famulabuntur, et assistent ei.

3. Sciendum est, quod primo adhaerebunt ei judaei et populus judaeorum, Joan. 5, 45: « Si  
« alius veniet in nomine suo et illum accipietis. »

4. In qua aetate erit cum haec incipient, quia in adolescentia: Ecclesiastes 4, 13: « Vidi cunctos  
« viventes qui ambulant sub sole cum adolescente  
« secundo, » idest cum Antichristo. Nam prius adolescens fuit Christus, cui adhaerere debemus.

Sequitur de potestate Antichristi; circa quod notantur sex: primo, de potestate quam habebit, nequitia instigante; secundo, de potestate quam habebit a principibus; tertio, de potestate quam habebit ad omnes nationes; quarto, de potestate violenta quam exercebit per suos subjectos; quinto, de potestate quam habebit a diabolo; sexto, de usu dictae potestatis. Circa primum sciendum est, quod potentia Antichristi erit maxima, quam propria instigante malitia habebit: de qua dicitur Apoc. 13, 2: « Et bestia quam vidi similis  
« erat pardo, » propter varios modos decipiendi, quia valde erit perversus et plenus omni nequitia.

Jer. 13, 23: « Si mutare potest Aethiops pellem  
« suam, et pardus varietatem suam. » Assimilatur autem pardo propter varietatem fraudulentiarum suarum Fraudulentus valde erit. Eccles. 11, 31: « Multae insidiae sunt dolosi, » idest Antichristi. Notatur ergo in pardo ars decipiendi quam habebit; quia illos quos decipiet, tales faciet, ut sint digni igne gehennae. Vel comparatur pardo, propter variam philosophorum et magorum affectionem quam tenebit. Item erit potentia sua quantum ad carnis lasciviam. Job 40, 11: « Virtus ejus in lumbis ejus, et fortitudo ejus in umbilico etc. » Et ideo assimilatur urso. Apoc. 13, 2: « Et pedes  
« ejus sunt pedes ursi, » qui est luxuriosum et immundum animal. Unde Dan. 11, 57: « Et erit  
« in concupiscentia feminarum nec quemquam  
« deorum timebit. » Item erit superbissimus et crudelis ut leo. Apoc. 13, 2: « Et os ejus sicut os  
« leonis. » Jerem. 4, 7: « Ascendit leo, » idest Antichristus, « de cubili suo et praedo gentium se  
« levavit. Egressus est de loco suo, ut ponat terram tuam in solitudinem. »

Sequitur secundum, scilicet de potentia quam habebit a principibus, qui adhaerebunt ei, et erunt de familia Antichristi. Et non solum principes, sed optimates et capita populorum. Amos 6, 1: « Vae qui opulenti  
« estis in Sion, et confiditis in monte Samariae, » idest in vana spe et confidentia vestra: « optimates  
« capita populorum ingredienti pompae (domum  
« Israel ), » idest superbe contra Christum ad servitium Antichristi. Et « separati estis » scilicet ab electis et sanctis « in diem malum, » idest in diem tribulationis et afflictionis tempore Antichristi: et « appropinquatis solio iniquitatis, » idest obsequio et dominio Antichristi. Apoc. 13, 1: « Vidi  
« de mari bestiam habentem capita septem et cornua decem, » per quam intelliguntur universi principes mali qui adhaerebunt ei, et impugnabunt observantes decalogum, idest legem Dei, inter quos erunt multi apostatae christiani veritati resistentes, et prohibebunt fieri Baptismum. Apoc. 16, 12: « Et sextus Angelus effudit phialam suam in flumen ( illud ) magnum Euphratem, et siccavit  
« aquam ejus, » idest baptismum fieri impedit, « ut praepararetur via, » scilicet Antichristo et demonibus in « regibus » idest in falsis christianis, qui in baptismo fuerunt ut reges uncti; « ab ortu  
« solis » recedentibus scilicet a baptismo, in quo sol, idest illuminatio gratiae datur: et de multis habebunt victoriam, corporaliter tamen, quia eos occident et flagellabunt.

Sequitur tertium scilicet de potestate ejus quantum ad omnes nationes. Apoc. 13, 7 et 8: « Data  
« est ( illi ) potestas in omnem tribum » quoad judaeos majores, « et populum » quoad judaeos minores; « et linguam » quoad malos christianos, « et gentem » quoad paganos; « et adoraverunt  
« eum, » scilicet bestiam, idest Antichristum, se illi humiliando « omnes qui habitant in terram, » quorum, qui sunt reprobi, nomina non sunt scripta in libro vitae Agni, idest Christi. Hic liber est ipse Agnus, in quo erant ipsa nomina, antequam fierent. Joan. 1, 5 et 4: « Quod factum est, in ipso vita  
« erat, et vita erat lux hominum; » ipse enim est mens Dei et sapientia. Unde sicut domus est in mente artificis priusquam fiat actu, sic omnia fuerunt in Filio Dei, qui omnium erat exemplar et idea. Sic est ergo liber ( vitae ) in quantum Deus;



inquantum homo est etiam liber vitae, quia dedit nobis exemplum vivendi. Eecles. 24, 52: « Haec « omnia liber vitae et testamentum Altissimi, et « agnitio veritatis. » « Agni, » dico, qui occisus est in Abel, et in ceteris membris suis. Vel signatus occidi in morte Abel ab origine mundi, idest statim post originem. Vel occisus est et praevius et praedeterminatus occidi ab aeterno in tempore. Unde ab origine, idest ante originem mundi. Eec. 24, 14: « Ab initio et ante saecula creata sum, » idest praevius creari, quantum ad humanitatem, cujus pars fuit anima a Deo creata. Sic ergo potestatem habebit quantum ad omnes nationes, quia de omnibus nationibus mundi habebit multos.

Quarto sequitur de potentia violenta quam exercebit per suos, et potentia inducente. Potentia inducens erit operatio miraculorum. Apoc. 15, 15: « Et faciat signa magna ut etiam ignem faciat de « caelo descendere in terram » ad litteram, per daemonum operationem; nec est hoc incredibile, cum hoc alia vice fecerit Job 1, 16: « Ignis venit, « et cunctas oves puerosque consumpsit. » Et hujus ratio est, quia in iis quae sunt naturae habet diabolus potestatem, permissione Dei. Vel ignem faciet de caelo descendere, quia spiritus malignus descendet in falsos apostolos, et nuncios Antichristi; sicut Spiritus sanctus descendit in Christi Apostolos. Et hoc publice faciet: unde sequitur in praemissa auctoritate Apoc.: « In conspectu hominum, » Unde jaetabunt, se esse meliores quam Apostoli Christi fuerint, qui spiritum receperunt in conclavi (Act. 2, 2: « Factus est repente de caelo sonus etc. ), et per hoc multos ad se convertet. Unde dicitur Apoc. 15, 14: « Et per hoc seducet multos habitantes in « terra », idest finaliter amantes terrena et divina postponentes. 1 Mach. 1, 45 et 44: « Ut relinqueret « unusquisque legem suam; et consenserunt omnes « gentes secundum verbum regis Antiochi, » idest Antichristi. « Et faciet multa signa; » ideo sequitur Apoc. 15, 14: « Propter signa quae data sunt « eis, » scilicet permissione divina ipsis falsis apostolis. Quare in conspectu bestiae, idest Antichristi, ad ejus invocationem miracula facient ejus Apostoli. Et ideo faciet se idem Antichristus adorare ab hominibus. Unde dicitur Apoc. 15, 14: « Et « dicet, » idest praecipiet « habitantibus in terram, « ut faciant imaginem bestiae, » idest Antichristi, conformando se ipsius malitiae. Sed heu! quot sunt hodie, qui portant imaginem bestiae idest Antichristi, secum impressam in cordibus suis per prava opera! Quibus dicitur Matth. 12, 20: « Cujus est « imago haec et superscriptio? » Et propter hoc bonum est, quod faciamus consilium Apostoli, 1 Cor. 15, 49: « Sicut portavimus imaginem terreni, « portemus imaginem caelestis. » Ipse etiam Antichristus faciet fieri imaginem suam statuam, quae dabit responsa potestate daemonis. Apoc. 15, 15: « Et datum est illi » scilicet Antichristo ( data est ) potestas « ut daret spiritum imagini bestiae, et ut « loquatur » ipsa « imago bestiae. » Et in hoc apparebit magna ejus potestas, quia ipsam imaginem faciet loqui. Ergo videtur quod habebit spiritum? Respondeo. Verum est quod habebit spiritum inhabitantem vel residentem, non unitum, ut ipsa imago bestiae loquatur, sed ad litteram per spiritum praesidentem sicut antiquitus de idolis daemones dabant responsa. Vel spiritualiter exponendo « imagini bestiae, » idest illis, qui conformabuntur

bestiae idest Antichristo, per consensum invitando ipsum, dabit spiritum, idest ut variis linguis possint loqui. Sed quomodo hoc dabit diabolus qui etiam non potest dare scientiam? Respondeo, Diabolus autem faciet eos loqui secundum visionem hominum, vel quia ipse in eis loquetur.

Item sequitur de potestate violenta quam exercebit per suos apostolos. Apoc. 15, 11: « Vidi aliam « bestiam ascendentem de terra, » idest pseudo apostolos, ubi notatur eorum crudelitas in eo quod dicit « bestiam, » quia nihil facient aut intelligent secundum usum rationis; sed crudeliter saevient in sanctos. Deuter. 52, 24: « Dentes bestiarum im- « mittam in eos, » idest falsos apostolos Antichristi, qui eorum mala doctrina corrodent fideles. Qui ut serpentes furebunt in sanctos. Ps. 57, 5: « Furor « illis secundum similitudinem serpentis. » Vel « dentes bestiarum, » idest malos christianos et apostatas, qui deterius Ecclesiam persequuntur quam gentiles: de quibus in Ps. 56, 5: « Dentes eorum « arma, » scilicet ad defendendum suum principem, idest Antichristum et suum errorem; et « sagittae » ad fidelium percussorem, « et lingua eorum gla- « dius acutus; » corda siquidem seducentes per pravae et damnabilis doctrinae eruditionem. Falsi enim christiani et apostatae apostolos Antichristi falsos fovebunt, et nutriunt et defendunt. Et ideo signanter dicit « ascendentem de terra, » idest nutritam et defensam ab amatoribus terrenorum. Sed eorum finis descensus est, cum in principio per superbiam et operationem diaboli ascendunt. Ps. 72, 18: « Dejecisti eos dum allevarentur. »

Sequitur de potestate quam habebit Antichristus a diabolo, Deo permittente: et haec potestas erit quantum ad miracula facienda: Apoc. 15, 2: « Et dedit illi » scilicet Antichristo, « draco vir- « tutem ( suam ), » idest diabolus faciendi miracula secundum quod dicit Glossa. Sed miracula fiunt ad manifestationem Dei; sed Deus non manifestabitur per opera Antichristi; ergo non erunt miracula. Item diabolus non habet potestatem nisi in naturalibus, et non in libero arbitrio. Respondeo: verum est quod non erunt miracula, sed magis mirabilia; miraculum enim, ut dictum est, fit ad eognoscendam Dei virtutem. Habebit etiam posse ad seducendum multos. Unde sequitur: « Et dedit « illi draco virtutem et potestatem ( magnam ) » seducendi, scilicet multos: ita quod dum dicit « vir- « tutem » referatur ad potentiam miraculorum; cum autem dicit « potestatem », ad potestatem seductionis.

Sexto quaeritur de usu potestatis Antichristi, et de progressu, quantum ad duo: primo quantum ad se, secundo quantum ad suos. De primo dicitur Apoc. 15, 7: « Et datum est illi, » scilicet Antichristo, « bellum facere cum sanctis et vincere eos. » « Datum, » idest permissum a Deo, quia nihil habebit nisi quantum ei dabitur permissione divina. Et ex seipso nihil nisi propria malitia ( poterit ) facere bellum cum sanctis per blandimenta et promissiones, et commissiones, et exhortationes, et vincere eos, corporaliter tantum si sunt praedestinati; vel spiritualiter aliquos, qui non sunt praedestinati. Quos enim per fraudulentiam non poterit frangere, aperte debellabit per violentiam. Dan. 11, 40: « Ingre- « dietur terras et conteret et pertransiet, » quia scilicet non inveniet resistantiam: et ibidem dicitur 41: « Et introibit in terram gloriosam, et multi

« corruent; » quia ei resistere non poterunt propter ipsius potentiam. Dan. 11, 21 et 22: « Obtinebit regnum in fraudulentia et brachia pugnantis expugnabuntur a facie ejus et conterentur. » Secundo de usu potestatis ejus quantum ad suos. Apoc. 16, 13: vidi « De ore draconis, et de ore bestiae, » idest Antichristi « exire tres spiritus immundos » per quos intelliguntur pseudoprophetae et pseudoapostoli, qui ab Antichristo mittentur in orbem terrarum. Qui dicuntur spiritus propter subtilitatem et astutiam malitiae quam in decipiendo habebunt. Sed immundi dicuntur per sordida opera nequitiae et iniquitatis. Exire dicuntur non quocumque modo, sed in modum ranarum exeuntium scilicet de luto; sic et isti lutosi erunt per luxuriam et pravam operationem. Ps. 52, 1: « Corrupti sunt et abominabiles facti sunt in iniquitatibus. » Osee 1, 10: « Facti sunt abominabiles sicut ea quae dilexerunt ». Assimulantur etiam ranis propter eorum loquacitatem et verbositatem, et propter fidei quietem, quam auferent per foetentis doctrinae Antichristi disseminationem. Ili sunt inimicus homo, qui in agro domini superseminavit zizaniam, Matth. 13, 25. Job 16, 21: « Verbosi amici mei. » Et alibi (Job 11, 2): « Numquid vir verbosus justificabitur? » quod idem est ac, non, sed damnabitur. Et bene dicuntur « tres » propter infelices tres miseras mundi, quas sequentur: de quibus 1 Joan. 2, 16: « Omne quod est in mundo concupiscentia carnis est et concupiscentia oculorum et superbia vitae. » Vel tres dicuntur quia sacramentum Trinitatis impugnant, et spiritualiter et principaliter Baptismum fieri prohibebunt. Dan. 2, 27, 50 et 51: « Cor eorum erit ut malefaciant, et mendacium loquantur adversum testamentum sanctum, et polluent sanctuarium fortitudinis, et auferent iuge sacrificium, et dabunt, » idest praedicabunt « abominationem, in desolationem, » idest Antichristum.

Item potest exponi praedicta autoritas de malis advocatis. Dicit ergo « vidi de ore draconis et de ore bestiae, » idest diaboli « exire tres spiritus immundos in modum ranarum: » per quos spiritus possunt significari tria genera advocatorum, qui ut ranae pacem et quietem hominum perturbant; viventes in luto deliciarum, et falsas leges fingunt et allegant: contra quos dicitur Isa. 10, 1: Vae qui conditis leges iniquas. Alii veras male exponendo depravant, ut possint vincere quaestiones per falsam legum expositionem, ut postea melius ab eis remunerentur, et manus eorum muneribus impleantur. Contra quos Isai. 5, 20 et 25: « Vae qui dicitis bonum malum etc. vae qui justificatis impium pro muneribus et justitiam justii aufertis ab eo. » Tertii, qui per deceptiones frivolas et inutiles, causas ampliant et dilatant, et fovent causas injustas scienter. Sap. 1, 1: « Diligite justitiam qui judicatis terram. » Item de ore bestiae dicuntur exire, causa superbiae et vanitatis quam habent: superbiunt enim in suis advocacionibus, et clamant et inflantur ut ranae; scilicet ut videantur ab adversariis frangi. Item fovent causas et defendunt causa laudis, ut scilicet per hoc possint magni aestimari, et laudari ab hominibus, et honorari. Et omnium istorum efficacia a quo sit ostendit evangelista dicens Apoc. 16, 14: « Sunt enim spiritus daemoniorum, » idest a daemonibus ducti. Sed quid erit de istis prophetia dicit, Isa. 5, 24: « Sicut stipulam et ligna devorat flamma ignis, et calor

« flammae exurit; sic radix eorum quasi favilla erit, et germen eorum ut pulvis ascendit. » Et quare? « abjecerunt enim legem Domini exercituum et eloquium, » idest justitiam « sancti Israel blasphemaverunt. » Isa. cap. 5, 13: « Propterea captivus ductus est populus meus, quia non habuit scientiam; » idest habere noluit.

Viso de potestate Antichristi, sequitur videri de cultu et simulatione ejus. Circa quod videamus tria: primo quem cultum, et quam simulationem exercebit, ut trahat ad se judaeos; secundo quem cultum exercebit ut trahat ad se paganos; tertio quem cultum exercebit, et quam simulationem, sive fraudem, ut trahat ad se christianos. Et circa hoc quatuor videbimus: primo de simulatione quam per se exercebit; secundo quam exercebit per pseudoprophetas et apostolos; tertio de efficacia sive effectu simulationis quantum ad se; quarto quantum ad alios. Circa primum sciendum est quod ad hoc ut attrahat ad se judaeos, dicet et simulabit se esse Messiam promissum in lege, quem judaei adhuc expectant verum Deum et verum hominem. Et reaedificabit templum Salomonis, dicens, se velle ritum Moysis. 2 Thess. 2, 4: « Qui adversatur tollitur super omne quod dicitur Deus aut quod colitur, ita ut in templo Dei sedeat, ostendens se tanquam sit Deus, » gloriosus. Augustinus « quod dicitur » scilicet fidei ab idolatris « aut quod colitur in veritate a fidelibus: dicet in judaeis se velle destruere omnem idolatriam. Dan. 2, 56: « Elevabitur et magnificabitur adversus omnem Deum, et adversus Deum Deorum, et loquetur magnifica et dirigetur donec compleatur iracundia perpetrata. » Verumtamen secundum veritatem cor ejus erit ad destruendum cultum Dei. Dan. « Cor ejus » erit, intentio scilicet, adversus testamentum sanctum: usque ad principem fortitudinis magnificatus est, et ab eo tollet iuge sacrificium. » Secundo ut attrahat ad se gentiles et paganos et idolatras, faciet simulacrum et statuam, et per incantationem mittet in eam spiritum malignum ad dandum responsa. Et vocabis eam Deum Maozim (!): Apoc. (loc. cit.) « Et datum » est scilicet permissione divina « ut daret spiritum imagini bestiae. » Dan. 2, 57: « Deum patrum suorum non reputabunt. » 58: « Deus autem maozim in loco suo venerabitur, et Deum quem ignoraverunt patres sui colet. » « Maozim » autem in tempore praesidium; quia ponetur edictum et mandatum: quod quicumque fugerit ad statuam illam sit securus, et non occidatur ob reverentiam statucae. Hanc etiam statuam faciet ab hominibus adorari, Apoc. 2, 14: « Et faciet ut quicumque non adoraverit imaginem bestiae occidatur. » Tertio sequitur de cultu, simulatione et fraude quam exercebit per se ut trahat ad se et decipiat christianos. Nam ipse filius perditionis dicet et affirmabit se esse Christum, et venisse ad iudicium, sicut promisit in evangelio, et ostendet se mortuum et resurget. Apoc. 15, 5: « Vidi unum de capitibus suis, » idest diaboli, scilicet Antichristum « quasi occisum in mortem, et plaga mortis ejus curata est. » Bene igitur dicitur esse unum de suis capitibus, sive caput suum, quia dicet se esse principium sui ipsius, sicut dicebat Christus de se, Joan. 8, 23: « Principium qui et loquor vobis. » Isai. 47, 8: « Ego Dominus, et non est praeter me alter Deus. » Sic dicet Antichristus de se, 2 Thess. 2, 4: « Osten-

(1) In Hebr. מַּוִּזִּים, id. fortitudinem.

• dens se tamquam sit Deus, et extollitur super  
 « omne quod dicitur Deus. » Dan. 11: « Et ele-  
 vabitur, et magnificabitur adversus omnem  
 Deum. » Et simulabit se occisum, quia ad litte-  
 ram per artem magicam simulabit se esse mortuum,  
 et ideo « in mortem. » Hoc dicitur ne credatur  
 loqui secundum communem usum loquendi et  
 modum quo aliquis quasi occisus vel quasi mor-  
 tuus dicitur, quia proximus est morti. Post simu-  
 lationem mortis ejus sequitur simulatio resur-  
 rectionis. Unde dicitur, « et plaga mortis ejus curata  
 est » quia arte magica feretur a daemonibus in  
 aera quasi ascendat in caelum, et sic putabitur ab  
 omnibus resurrexisse qui prius mortuus putabatur,  
 ut conformet se fraudulentè resurrectioni Christi.  
 Tamen ipse non occidit mortem sicut Christus, sed  
 postea mors absorbet eum.

Sequitur de cultu et simulatione quam exerce-  
 bit per pseudo prophetas et apostolos; Apoc. 13, 11:  
 « Vidi aliam bestiam ascendentem de terra, et ha-  
 bebant cornua duo similia Agni; » per quam  
 intelliguntur nuntii Antichristi et falsi christiani,  
 qui simulabunt se habere duo testamenta per scien-  
 tia cognitionem, non per vitae sanctitatem; Et ideo  
 signanter dicit « similia Agni » scilicet cornibus,  
 idest Christum praedicantia. Sunt enim duo cornua  
 Christi vetus testamentum et novum. Ista simula-  
 bunt et affirmabunt se habere et servare falsi  
 apostoli Antichristi. Unum quidem per signationem,  
 aliud vero per exhibitionem. Vel duo cornua, sunt  
 simulata dilectio Dei et proximi. Vel secundum  
 Glossam duo cornua, scilicet doctrina et gratia fa-  
 ciendi miracula sicut habuit Christus, qui et vera  
 docuit: Joan. 18, 27: « (Ego) in hoc natus sum,  
 et ad hoc veni in mundum ut testimonium per-  
 hibeam veritati. » Et vera miracula fecit: et  
 propter hoc dicit « similia Agni; » et quod bene  
 dixerit « similia » et non vera « Agni », ostenditur  
 in eo quod sequitur in praemissa auctoritate.  
 « Et loquebatur sicut draco, » scilicet loentus erat  
 in Antichristo, idest per impiam suasionem concor-  
 dans draconi, hoc est diabolo: quasi diceret: doctri-  
 nam habebat similem doctrinae Agni, idest Christi,  
 et miraculorum Agni similitudinem; sed veritatem  
 cornuum diaboli, scilicet doctrinam foetentem, et  
 virtutem miraculorum phantasticam. Et inde aperit-  
 ur falsitas bestiae, idest Antichristi: quia apostoli  
 ejus simulabunt se bonos, et tamen mala suadebunt.  
 Unde sequitur, Apoc. 13, 12: « Et potestatem prioris  
 bestiae omnem faciebat: » idest omnibus modis  
 decipiendi utentur quibus utetur Antichristus: et  
 hoc « in conspectu ejus, » scilicet Antichristi, ut  
 ipse notabilis et magnus reddatur. Vel ut ipsi falsi  
 apostoli videantur et commendentur, quia illa erit  
 eorum intentio et finis malitiae ipsorum, scilicet  
 laus et commendatio Antichristi. Et ideo tamquam  
 suum caput in omnibus praeponent et extollent, si-  
 cut nos praeponimus et extollimus Christum. Unde  
 eorum simulatio et praedicationis malitia magnum  
 effectum habebit in hominibus. Apoc. 13, 12: « Fecit  
 terram et inhabitantes in ea adorare bestiam  
 (primam) cujus curata est plaga mortis. »  
 « Terram » idest terrenos in amore terrenorum  
 perseverantes; « adorare bestiam » scilicet « pri-  
 mam » et Antichristum, quem resurrexisse a  
 mortuis praedicabunt. Sicut enim superius dictum  
 est, simulabit se esse mortuum, et divina virtute  
 resuscitatum; et hoc praedicabunt sui Apostoli, quos

ipse mittet per mundum. Unde dicitur Apoc. 3, 3:  
 « De fumo putei », idest de malitia Antichristi  
 « exierunt locustae in terram, » idest praedicatores  
 mittentur ab eo in terram. Sequitur de efficacia  
 simulationis et fraudis ejus quantum ad se: quia  
 ex eo quod videbit quod homines credent eum  
 fuisse mortuum et resurrexisse, orietur in eo ma-  
 gna praesumptio, et ex praesumptione prorumpet  
 in apertas blasphemias. « Datum » scilicet permis-  
 sione divina, dicendo se esse Deum. Dan. loc. cit.:  
 « Adversus Deum Deorum loquetur magnifica. »  
 Psal. 11, 4: « Disperdat Dominus universa labia  
 dolosa et linguam magniloquam. » Et blasphemias,  
 negando Christum esse Deum. Ad hoc pertinent  
 omnes illi, de quibus dicitur in Psal. 72, 9: « Po-  
 suerunt in caelum os suum, et lingua eorum  
 transivit in terra. » Quia, sicut dicitur Dan. 11,  
 27, « erit in concupiscentia feminarum. » Et istas  
 blasphemias non dicet solum apud se in occulto,  
 sed in publico coram omnibus. Apoc. 13, 6: « Ape-  
 ruit os suum in blasphemias ad Deum, blasphe-  
 mare nomen ejus ( et tabernaculum ejus ), et  
 eos qui in caelo habitant. » In blasphemias ac-  
 tuales ad Deum, non tamen contra, sed usque ad  
 Deum procedens blasphemare nomen ejus, idest fi-  
 dem et doctrinam et miracula Christi, quibus  
 nobis redditur magnus et admirabilis Deus, et no-  
 minabilis, quia ipse Christus fecit nos venire per  
 suam sacram doctrinam in cognitionem Dei: Joan. 1,  
 18: « Unigenitus ( Filius ) qui est in sinu Patris,  
 ipse enarravit. » Et non solum Deum blasphe-  
 mavit, sed et « tabernaculum ejus, » idest huma-  
 nam naturam in Christo homine, quia divinitas in  
 Christo habitavit corporaliter secundum Apostolum.  
 Et non solum Christum, sed et Sanctos ejus bla-  
 sphemavit. Unde dicit « et eos qui in caelum ha-  
 bitant, » idest Sanctos, qui jam sunt in caelo  
 secundum animam uniti et conjuncti Deo per  
 gloriam, dicet esse damnatos in inferno. Quem  
 quidam haereticorum jam sequentes dicunt, beatum  
 Nicolaum et omnes Confessores qui fuerunt in Eccle-  
 sia a tempore Silvestri Papae, esse damnatos et in in-  
 ferno. De quibus dicitur in Ps. 16, 10: « Adipem suum  
 concluserunt, os eorum locutum est superbiam, »  
 dicendo injuriam sanctis, eos blasphemando.

Sequitur de efficacia simulationis quantum ad  
 alios; quae simulatio magnum effectum habebit in  
 hominibus per operationem diaboli: quod patet au-  
 ctoritate Apoc. 13, 3: « Et admirata est universa  
 terra ( post bestiam ), » et talis admiratio con-  
 surget in eis ex Antichristi phantastica, idest appa-  
 rente resurrectione. Quia credent eum resurrexisse,  
 et inde admirabuntur homines habitantes in terra,  
 permissione Dei, et peccatorum suorum meritis,  
 et per magicas artes illius decepti. Et ei confor-  
 mabuntur per operationem, serviendo illi, et ipsum  
 sequendo. Unde sequitur: et vadent scilicet « post  
 bestiam et ( ibid. 4 ) adoraverunt draconem, »  
 idest diabolum in Antichristo, quem putabunt resu-  
 scitatum, sicut illi qui videbant Christum facientem  
 miracula glorificabant Deum. Et adorabunt diabo-  
 lum, qui dedit ei potestatem resurgendi, scilicet  
 bestiae, idest Antichristo. « Et adoraverunt bestiam, »  
 idest Antichristum, se illi humiliando. Sicut disci-  
 puli adoraverunt Christum post resurrectionem Chri-  
 sti. Matth. ult. 16: « Undecim discipuli abierunt  
 in Galilaeam in montem ubi constituit illis Jesus,  
 et videntes eum adoraverunt. » Sic et illi facient



Antichristo, et admirabuntur de potentia ejus, ut sequitur in praedicta auctoritate: ubi notatur quod ex admiratione prorumpent in laudem, dicentes: « quis similis bestiae? » idest quis poterit tanta facere, et « quis poterit pugnare cum ea? » idest voluntati ejus resistere? Ecce laus quam ei exhibebunt. Unde quatuor notantur hic, quae isti facient circa hestiam, et efficaciam simulationis Antichristi: primo admirabuntur; secundo confirmabunt (1) se illi; tertio adorabunt eum; quarto laudabunt eum et vitam ejus.

Postquam dictum est de cultu et simulatione Antichristi, et de efficacia simulationis ejus quantum ad se et quantum ad alios, dicendum est de conflictu et persecutione ejusdem Antichristi. Circa quod videbimus tria: primo duritiam et crudelitatem persecutionis ejus; secundo modum quem in persecutione tenebit; tertio tempus ipsius persecutionis, idest quanto tempore durabit. Circa primum duo videbimus: primo de persecutione quam per se faciet; secundo de persecutione quam faciet per alios, idest suos principes et pseudo apostolos et prophetas.

Affliget enim homines per multas tribulationes et tormenta, et tandem persequetur usque ad mortem. Apoc. 16, 8: « Quartus Angelus effudit phialam suam in solem, et datum est illi aestu affligere homines et igne. Et aestuaverunt homines aestu magno, et blasphemaverunt nomen Dei habentis potestatem super has plagas. » Dicitur ergo « effudit phialam suam in solem, » idest Antichristum, qui se solem existimabit: et dicit mundum illuminatum per eum esse. Ipse enim sibi usurpabit nomen veri solis et veri hominis, idest Christi: de quo dicitur Joan. 8, 12: « Erat lux vera etc. » et infra 8, 12: « Ego sum lux mundi. Et datum est illi, » idest permissione Dei concessum est Antichristo affligere homines aestu et igne, idest minori et majori tribulatione. Isa. 14, 16: « ( Numquid ) iste est vir qui conturbavit terram, qui concussit regna, qui posuit orbem desertum et urbes ejus destruxit, vinetis non aperuit carcerem? » ad litteram. Multos incarcerationabit, et interficiet: infra 20: « Tu ( enim ) terram tuam disperdisti, tu populum ( tuum ) occidisti. Unde dicitur « et aestuaverunt homines scilicet fideles « aestu magno, » scilicet laborantes et afflicti graviter in tribulationis ardore. Psal. 45, 22: « Propter te mortificamur tota die, aestimati sumus sicut oves occisionis; » propter quod in impatientiam multi vertentur et deficient in tribulationibus. Jonae 4, 8: « Percussit sol supra caput Jonae, et aestuabat, et petiit animae suae ut moreretur. » Et ideo in impatientia blasphemabunt nomen Dei. Et hoc est quod dicitur: « Et blasphemaverunt nomen Dei habentis potestatem super has plagas, » ut a quo vult amoveat, et cui velit tribuat. Apoc. 1, 18. « Ipse qui habet claves mortis et inferni. » Rom. 18, « ergo cui vult miseretur et quem vult indurat. » Unde dicitur Apoc. 16, 11: « Neque egerunt poenitentiam » ut darent gloriam Deo, qui scilicet damnandi erant per prava opera perpetua poena, nec permittebantur poenitere; quia etsi aliqui iterum dolebunt, tamen exterius confiteri non audebunt. Unde talis contritio et dolor eis non sufficiet ad salutem. Rom. 10, 9: « Si confitearis in ore tuo

(1) Forte conformabunt.

« Dominum Jesum (Christum) et corde tuo credideris quod Deus illum suscitavit a mortuis, salvus eris. » Unde non sufficit homini credere solum corde, sed oportet ad hoc ut salvus fiat, quod fidem et Christum ore confiteatur; infra 10: « Corde (enim) creditur ad justitiam, ore autem confessio fit ad salutem. » Sed quia non erunt in fide firmi et stabiles, cadent. Nahum 3, 17: « Pavuli tui » ( o Ecclesia ), idest infirmi qui cadent in illa persecutione, « sicut locustae locustarum, quae confidunt in sepibus in die frigoris. » Idest tenent fidem tempore pacis et prosperitatis. Luc. 8, 13: « Ad tempus credunt et in tempore tentationis recedunt. » Unde sequitur in praedicta auctoritate Nahum: « Ortus est sol, et avolaverunt, » et non est cognitus locus earum ubi fuerunt. « Ortus est sol, » scilicet in Antichristo a quo tribulatio excitata est, « et avolaverunt a fide, » scilicet recedentes, quam tenuerant. Sap. 4, 4: « Etsi in ramis in tempore pacis scilicet germinaverint, » idest fidem tenuerunt, infirmitate posita a vento commovebuntur, et a nimietate ventorum, idest persecutionum Antichristi « eradicabuntur » a Christo, a fide scilicet et cultu Dei. Sed e contrario boni et electi et aestum sustinebunt et ignem. Gen. 31, 40, « die noctuque aestu urebar et gelu. » Secundum Glossam aliam ad litteram habetur: « Et datum est illi aestu affligere homines, » exponit sic; quod afflicti fideles suos tortores aestu iracundiae afficient, quia erunt insuperabiles, et propter hoc ipsi tortores blasphemabunt et impenitentes morientur.

Sequitur de persecutione quam Antichristus faciet per suos principes et pseudo prophetas et apostolos. Quia igitur non poterit per propriam malitiam omnes sibi subjugare, mittet satellites per mundum, et persequentur fideles per suos principes. Apoc. 15, 16: « Et faciet » scilicet per principes saeculi, qui homines cogent ut bestiam adorent, idest Antichristum, « et quicumque non adoraverit imaginem bestiae occidatur: » hoc faciet praconizari et ordinari per firmum statutum quod facient sui principes, quod fuit signatum Dan. 5, ubi datum est edictum ut omnes interficerentur qui non adorarent statuam auream quam fecerat Nabuchodonosor rex: unde multi timore ducti obedient coram mandatis et adjungent se eis, inter quos erunt multi magni et parvi, pauperes et divites. Apoc. 15, 16: « Et faciet omnes pusillos et magnos et divites et pauperes et ( liberos et servos ) habere characterem in dextra manu sua aut in frontibus suis. » Quod autem dicit « omnes » non est intelligendum, quod singuli et de quolibet hominum genere convertantur; sed quia de quolibet genere hominum habebit aliquos et divites et pauperes et liberos et servos: quasi diceret, communiter recipiet omnes. Unde dicent meliorem esse doctrinam suam quam doctrinam Christi, qui solum venit ad pauperes et ipse pauper fuit. Hos igitur qui ad Antichristum convertuntur faciet « habere characterem, » scilicet signum aliquod apertum et patens, et imitationem bestiae « in dextera manu, » idest in potioribus operationibus. Sicut est in latria, quae est cultus qui soli Deo debetur, et in sacrificiis: et hoc, ut non videantur manifeste ministri Antichristi. Aut in frontibus, ubi maxime est locus apparentiae, ut sic et verbo et opere confiteantur Antichristum. Sed quia per ista non poterunt omnes ad se tra-

here, alium modum persecutionis et crudelitatis invenient, scilicet quod nullus sit ausus vendere alicui fidelium aliquod, aut emere ab eisdem, nisi obedient Antichristo. Apoc. 13, 17: faciet scilicet Antichristus per principes suos hoc servari « ne quis possit emere (aut vendere), nisi qui habent characterem bestiae. » Aliter exponitur sic: Et faciet ne quis possit emere veritatem spiritualis scientiae per meditationem et studium. Prov. 23, 25, « Veritatem emere aut vendere, » idest distribuere temporalia in eleemosynas et pios usus pro spiritualibus thesauris. Matth. 19, 21: « Vende quae habes (et da pauperibus), et habebis thesaurum in caelo. » Vel vendere aut emere non poterunt sancti viri, idest servos Dei acquirere, ut dicit Glossa. Vel sic « ne quis possit emere » gladium, scilicet praedicationis divinae, quia emitur studendo et audiendo a sanctis doctoribus et praedicatoribus, quia apostoli Antichristi hoc multum impedient, ne scilicet Scriptura secundum veritatem exponatur a catholicis doctoribus et praedicatoribus, et a fidelibus audiatur. Et tunc verificabitur verbum Apostoli, 2 Timoth. 4, 5: « Erit enim tempus cum sanam doctrinam non sustinebunt, sed ad sua desideria coacervabunt sibi magistros. » « Aut vendere » idest deponere tunicam mundanae conversationis per castigationem carnis in operibus poenitentiae. Ipsi enim falsi apostoli dicent, non esse poenitendum, sed vacandam deliciis et divitiis, juxta illud Isai. 22, 13, « Comedamus et bibamus, eras enim moriemur. » Vel ad litteram: boni et electi habebuntur quasi excommunicati, ut nec eis vendatur aliquid, nec ematur ab eis. Et ex hoc erit magna anxietas et dolor bonorum, nisi habeant characterem in fide cordis; aut nomen bestiae idest Antichristi in confessione oris. Vel characterem, idest signum aliquod ad litteram, ut sui cognoscantur, et alii interficiantur. Et affirmabunt se ex hoc adimplere Scripturam, Exod. 12, et 9, 4, ubi dicitur: « Signa tua super frontes virorum gementium et dolentium super cunctis abominacionibus, quae fiunt in medio ejus. » Et postea sequitur, 5, « non pareat oculus vester neque misereamini; » (ibid. 6), « senem et adolescentulum et virginem et parvulum et mulieres interficite; omnem autem super quem videritis tau ne occidatis. » Hanc ergo Scripturam dicent se illi complere eum persequentur omnes illos qui non habent signum bestiae, idest Antichristi. Unde illi qui signati erunt signo bestiae, idest filii perditionis, non interficientur.

Sequitur de modo quem in persecutione tenebit. Ubi notandum est, quod pugnabit contra duplicem populum: scilicet contra potentem populum, nobilem et divitem; secundo contra populum ignobilium et simplicium. Populus autem major sive fortior distinguitur in tria genera hominum: scilicet in clericos et litteratos, in principes et milites, in mercatores et burgenses. Clericos autem et litteratos expugnabit et ad se trahet per rationes naturales et per auctoritates Scripturae, quas fraudulenter exponet et depravabit. Erit enim Antichristus valde instructus in scripturis philosophorum, et antiquorum paganorum. Dan. 8, 25: « Cum creverint iniquitates, consurget rex impudens facie, » idest Antichristus, « et intelligens propositiones, » ibid. 24, « et roborabitur fortitudo ejus. » Job 4, 10: « De ore ejus lampades procedunt, » idest

rationes philosophorum. Principes autem et milites et alios nobiles expugnabit, et ad se trahet per distributionem terrarum et dignitatum. Dan. 11, 39, « Multiplicabit gloriam, et dabit eis potestatem in multis, et terram dividet gratuito. » Ezech. 27, 35: « In multitudine divitiarum tuarum et populorum (tuorum) ditasti reges terrae, » idest principes et alios nobiles, et ex hoc laudabunt dicentes illud Zach. 11, 5: « Benedictus Dominus, divites facti sumus. » Sed revera pauperes erunt et miseri, quia istae divitiae cito deficient, et peribunt in afflictione maxima. Job 20, 4: « Hoc scio a principio, ex quo positus est homo super terram, quod laus impiorum brevis sit, et gaudium hypocritae ad instar puncti. » Ibid. 21, 10: « Ducunt in bonis dies suos, et in puncto ad inferna descendunt. »

Mercatores autem, et alios burgenses et alios divites, qui multum pecuniam diligunt, expugnabit et attrahet ad se per aurum et argentum et pecuniam. Dan. 11, 45: « Dominabitur thesaurorum auri et argenti, et in omnibus pretiosis Aegypti; » et Dan. 11, 25: « In copia rerum omnium occidet plurimus. » Daemones enim revelabunt ei omnes thesauros occultos. Nam antiquitus cum moriebatur homo abscondebat thesaurum suum, sperans se redire post longum tempus, secundum quod aliqui philosophi posuerunt ad eundem locum, et vivere carnaliter sicut prius. Et ideo in sepulcris antiquorum paganorum frequenter invenitur thesaurus. Haec sepulera aperiet et manifestabit diabolus Antichristo. Job 21, 32: « (Ipse) ad sepulchra ducetur et in congerie mortuorum vigilabit. » Job 41, 21: « Sternet sibi aurum quasi lutum. »

Populus autem minor distinguitur similiter in tria genera hominum: scilicet primo in simplices, secundo in fortes et firmos, tertio in perfectos et poenitentes. Simplicies trahet ad se, et expugnabit eos per falsos prophetas et apostolos, qui decipient et seducent eos suis blandis praedicationibus. De quibus dicitur Matth. 7, 15: « Attendite a falsis prophetis qui veniant ad vos in vestimentis ovium, intrinsecus autem sunt lupi rapaces. » Fortes autem et firmos coget per tyrannos, et tribulationes multas, et metum mortis. Dan. 8, 24: « Supra quam credi potest universa vastabit et prosperabitur et faciet et interficiet robustos et populum sanctorum secundum voluntatem suam, et dirigetur dolus in manu ejus, et cor suum magnificabit. » Apoc. 17, 6: « Vidi mulierem, » idest Antichristum, qui mulier dicitur propter malitiam et promptitudinem quam habebit ad exercendum omne malum contra homines sanctos: « ebriam de sanguine sanctorum, et de sanguine martyrum Jesu. » Perfectos vero et poenitentes expugnabit et ad se trahet per falsa miracula et similitudinem signorum Christi; faciet enim ut videatur ignis descendere de caelo: sicut factum fuit super apostolos Christi in die Pentecostes. Apoc. 15, 15: « Fecit signa (magna), ut etiam ignis faceret de caelo descendere. » Simulabit se jam resurrexisse et fuisse mortuum, ut superius dictum est. De istis tribus dicit Dominus Matth. 24, 24: « Surgent enim pseudo Christi et pseudo prophetae » quantum ad simplices inducendos, et decipiendos per falsam doctrinam, ibid. 9, et « tradent vos in tribulationem, et occident vos » quantum ad firmos et fortes, contra quos pugnabit

per tormenta multa, *ibid.* 24, « et dabunt signa magna et prodigia, ita ut in tentationem inducantur ( si fieri potest ) etiam electi; » quantum ad perfectos et poenitentes commovendos. Et ideo propter has tribulationes et persecutiones Satanas praedicatur solvendus circa diem iudicii; quia dabitur ei libera potestas nocendi et tentandi. *Apoc.* 20, 7: « Et cum consummati fuerint mille anni, solvetur Satanas de carcere suo, et exibit et seducet gentes, quae sunt per quatuor angulos terrae: et congregabit eos in praelium, quorum numerus est sicut arena maris. » Dicit Glossa, cum consummati fuerint mille anni, idest tempus praesentis saeculi, solvetur Satanas de carcere suo, idest relaxabitur ejus potestas, quae modo ligata est, ne tantum noceat quantum vellet. Sed quid est quod dictum est, non solvetur nisi tempore Antichristi? Constat quod sic saltem tribus annis cum dimidio ante finem. Quomodo ergo expositum est quod mille annos, idest post finem saeculi? Respondeo. Verum est quod solvetur tempore Antichristi saltem, tribus annis et dimidio ante mundi finem. Sed quia illud est parva positio (1) temporis totius saeculi, propter hoc non excipit illud beatus Evangelista Joannes, secundum morem Scripturae, quae sic consuevit facere; scilicet non excipitur, ubi est parvus numerus respectu majoris. Ita videtur Augustinus dicere, 20 libro de civitate Dei, cap. 15. Sed postea Satanas religabitur, et iterum cruciabitur ipse cum sociis: de ejus poena dicitur infra.

Dicto de persecutione Antichristi per se et per suos, et de modo persecutionis, dicendum est de duratione persecutionum, scilicet quanto tempore durabit ejus persecutio. Ubi sciendum est, quod Antichristi persecutio durabit parum, secundum quod habetur *Apoc.* 15, et *Dan.* 12. Dicitur autem in *Apocalypsi* 15, 5: « Data est ei potestas » scilicet Antichristo « facere » scilicet mala praedicta « menses » 42, qui sunt tres anni cum dimidio: et licet futura sit maxima tribulatio et persecutio, tamen propter brevitatem temporis minus timebitur. Idem quasi habetur *Apoc.* 2, 2, ubi dicitur: « Atrium autem, quod est foris templum, eijce foras » ( et ne metiaris illud ) quoniam datum est gentibus, et civitatem sanctam, idest Ecclesiam « conculcabunt » Antichristus scilicet et principes sui, et omnes de parte sua. « mensibus quadraginta duobus, » idest tribus annis cum dimidio. Quod etiam facient falsi christiani similes gentilibus in conversatione, conculcabunt Ecclesiam tempore Antichristi; et plus satis nocent, quam gentes: quod fuit signatum 1 *Machab.* 7, 25, ubi dicitur, quod Alcimus, qui erat de judaeis, plus nocuit judaeis quam gentes. De duratione autem persecutionis dicitur in *Dan.* 12, 6 et 7: « Et dixi viro qui indutus erat lineis: usquequo finis horum mirabilium? » idest quanto tempore durabit persecutio Antichristi? « Et audivi eum levasset dexteram et sinistram suam in caelum, juravit per viventem in aeternum, quia in tempus et tempora, et dimidium temporis, » idest usque ad tres annos et dimidium. Hebraeus enim nomine temporis accipit unum annum, per tempora duos annos, et per dimidium temporis medium annum, sicut dicit Magister.

Viso de persecutione Antichristi per se et per suos, de modo persecutionis, et persecutionis duratione, videndum est de ipsius Antichristi morte.

(1) Fortasse portio.

Ubi quinque videbimus. Primo de tempore mortis ejus. Secundo de persona quae eum interficiet. Tertio de loco ubi interficietur. Quarto de modo mortis ejus. Quinto de poena ejus et suorum sequacium post mortem.

Circa primum sciendum est, quod Antichristus interficietur postquam praedicaverint Enoch et Elias tribus annis cum dimidio, ut dictum est superius. Quod colligitur ex verbis *Dan.* 7, 25, ubi dicitur quod « (Sermones) contra Excelsum loquetur, et sanetos Altissimi conteret; et putabit quod possit mutare tempora et leges. Et tradentur in manu ejus usque ad tempus et tempora, et dimidium temporis, » sicut expositum est superius. Et postea sequitur *ibid.* 26: « Ut auferatur potentia, et conteratur et dispereat usque in finem. »

Secundo sequitur de persona quae Antichristum interficiet; quia Christus Filius Dei, vel ministerio (alienus), Christus vero auctoritate. 2 *Thess.* 2, 8: « Tunc revelabitur ille iniquus, quem Dominus Jesus interficiet spiritu oris sui, et destruet illustratione adventus sui eum. » *Isai.* 11, 4: « Spiritu labiorum suorum interficiet impium, » idest Antichristum. Magister tamen dicit in historicis, quod audietur vox in aere dicens « morieris, » et statim fulminabitur Antichristus.

Tertio sequitur de illo loco ubi interficietur; quia in monte Oliveti. Congregabit enim multitudinem exercitus sui; et cum fuerit jam in supremo gloriae suae prae multitudinem exercitus sui, interficietur ibidem in papilione. *Danielis* 2, 44: « Veniet in multitudine magna, ut conterat et mortificet plurimos, et figet tabernaculum suum inter maria super montem inelytum et sanctum. » « Maria » appellat mare mortuum et circumadjacentia maria, secundum consuetudinem judaeorum; quoniam congregationes aquarum appellant maria. « Montem inelytum et sanctum » appellant montem Oliveti propter dignitatem passionis et mortis Domini. Sequitur « et veniet, » scilicet Antichristus « usque ad summitatem ejus. » Hoc est montis Oliveti, « et nemo auxiliabitur ei: » quum scilicet interficietur a Christo.

Quarto sequitur de modo mortis Antichristi, qui erit triplex: primo interficietur subito. *Job* 54, 20: « Subito morietur, et in media nocte turbabuntur populi; » secundo interficietur absque manu hominis. *Dan.* 8, 25: « Contra principem principum consurget, » scilicet Antichristus contra Christum, « et sine manu conteretur. » *Job* 54, 20: « Auferent violentum, » idest Antichristum « absque manu; » tertio interficietur cunctis videntibus. *Job* 40, 28: « Videntibus cunctis praecipitabitur. » Et sic morietur et deficiet ille iniquus spiritu Dei percussus et vulneratus, a quo vulnere nunquam sanabitur. *Jer.* 50, 12: « Insanabilis fractura tua, pessima plaga tua. » *Ibid.* 14: « Omnes amatores tui obliti sunt tui, teque non quaerent; plaga enim inimici percussi te castigatione crudeli propter multitudinem iniquitatis tuae; dura facta sunt peccata tua; feci haec tibi etc. » *Infra*, 15: « Insanabilis est dolor tuus propter multitudinem iniquitatis tuae, et propter dura peccata tua feci haec tibi etc. » Item notatur quod ex dolore mortis Antichristi principes et sequaces ejus erunt obstinati in malo, et multi ex eis habebunt exaeatum intellectum, et ex nimio dolore blasphema-



hunc Deum, et cum videbunt quod non poterunt tenere homines in servitio Antichristi et eos ad eum trahere, erit eis magna poena, et ex nimia invidia ascendent in furias, ut quasi videantur comedere carnes proprias. Apoc. 16, 10: (Quintus) « Angelus effudit phialam super sedem bestiae, et factum est regnum ejus tenebrosum, et manducaverunt linguas suas prae dolore, et blasphemaverunt Deum caeli prae doloribus suis et vulneribus. » Sedes bestiae sunt gentes et falsi christiani consentientes Antichristo, in quibus sicut in sede conquiescet. Unde dicitur, « quod factum est regnum ejus tenebrosum, » idest cor eorum excaecatum est et obscuratum amplius quam prius fuerat. Isai. 6, 10: « Excaeca cor populi hujus, et aures ejus aggravata, » quia tunc fidei veritatem audire non poterunt, immo detrahent veritati. Unde dicitur, quod manducaverunt linguas suas, scilicet detrahendo Christo, qui est summa veritas, et mutuis sermonibus malis se invicem reficiendo. Unde consumuntur prae dolore, et invidia quam erga sanctos habebunt pro eorum constantia, dolentes ex invidia et dolore blasphemabunt Deum caeli, quia dicent Christum fuisse magnum, quia ipse est Filius Dei verus et naturalis; unius potentiae unius majestatis cum Patre. Et hoc facient quia prae doloribus et vulneribus erunt excaecati, et vertentur in furias, ut videantur quasi comedere linguas suas: et potissime ex hoc dolebunt, quia non poterunt omnes copulare Antichristo; sicut et justis faciunt et sancti viri, cum vident aliquos a Christo recedere, donec eos Christo reconcilient. Galat. 4, 19: « Filioli mei, quos iterum parturio donec formetur Christus in vobis. »

Viso de morte Antichristi, dicendum est de poena ejus, et suorum omnium, quae erit magna post mortem. Ubi notandum est quod poena ejus et suorum omnium erit magna post mortem, et crudelis, propter quatuor. Primo, propter poenarum diversitatem. Secundo, propter poenarum acerbitatem. Tertio, propter poenarum continuationem. Quarto, propter omnium consolationum privationem. Nam dignum et justum est, quod qui multos occidit et captivos duxit, scilicet sanctos corporaliter, et alios multos corporaliter et spiritualiter, et ipse captivus ducatur et affligatur. Apoc. 15, 10: « Qui in captivitatem duxerit, in captivitatem vadat. » Antichristus scilicet et sui, qui in captivitatem ducunt alios « flagellando sanctos, vel spiritualiter » ad peccatum trahendo multos, in captivitatem vadent, idest in poenas inferni, contra quos jam data est sententia. Joan. 16, 10 « Princeps hujus mundi » pro suo corpore « jam judicatus est. » Ezech. 12, 11: « In transmirationem et captivitatem ibunt. » Scilicet omnes increduli et famuli Antichristi. Et dux, scilicet Antichristus, portabitur in humeris daemoniorum in infernum, in caligine egredietur, idest in obscuritate rapietur Isa. 55, 1: « Vae qui praedaris, nam et ipse praedaberis; » et oportet eos, scilicet Antichristum et suos, gladio sententiae Dei occidi, quia et ipsi multos occiderunt. Apoc. 15, 10: « Qui in gladio occiderit, oportet eum gladio occidi. » Gladio enim aeterni iudicii occidentur Antichristus et sui. Job 19, 29: « Fugite si potestis, a facie gladii, quia ultor iniquitatis gladius est. » Idest sententia Dei. Ezech. 2, 28: « Muero, muero, evagina te ad occidendum, lima te, ut interficias et fulgeas. » « Evagina » dici-

tur, quia tempore Antichristi latebit sententia Christi, sed postea apparebit.

Sequitur de poenarum acerbitate de qua dicitur Apoc. 20: « Descendet ignis a Deo de caelo » et devorabit eos, » idest gravis poena, quae signatur per ignem; quia sicut igni nihil resistit, ita illi poenae. Ps. 96, 5: « Ignis ante ipsum praecedet, et inflammabit in circuitu inimicos ejus. » Unde dicitur « devorabit eos » idest totos undique occupabit, scilicet Antichristum et suos. Matth. 25, 41: « Ite maledicti in ignem aeternum, » adhuc erit acerbior poena. Apoc. 20, 9: « Et diabolus qui seducebat eos, » idest Antichristus « missus est in stagnum ignis et sulphuris. » Fraus enim sua et dolus non patrocinantur sibi, cum et gravius punientur quam alii. Ezech. 58, 22: « Ignem et sulphur pluam super eum, et super exercitum ejus, et super populos multos qui sunt cum eo, » ubi et bestia, idest Antichristus et pseudoprophetae, idest complices ejus, et apostoli tormentabuntur, inferius enim, idest omnes impii, qui fecerunt de cordibus suis loca tenebrarum, in quibus diabolus damnatus est, et mors, idest diabolus eorum caput, missi sunt in stagnum simul utrumque, scilicet membra et caput. Hic ponitur poenarum Antichristi continuatio et aeternitas. Apoc. 20, 9 et 10, et diabolus missus « in stagnum ignis, ubi et bestia et pseudoprophetae, » idest Antichristus et omnes sequaces ejus « cruciantur die ac nocte, » idest continuo et sine interpolatione. Et hoc « in saecula saeculorum. » Ubi notatur poenarum aeternitas. Unde « in saecula saeculorum, » idest in perpetuum et sine fine. Apoc. 14, 11: « Fumus tormentorum eorum ascendet in saecula saeculorum. » Ps. 10, 7: « Ignis et sulphur et spiritus procellarum pars calicis eorum, » et hoc in aeternum. Isa. ult. 24: « Ignis eorum non extinguetur. »

Sequitur quinto de omnium consolationum privatione Antichristi et suorum, et quantum ad animam, et quantum ad corpus, et quantum ad omnes corporis sensus. Auferetur enim ab eis quantum ad animam omne delectabile, quod est duplex: scilicet virtus, quae perficit practicum intellectum, et scientia, quae perficit speculativum. Apoc. 18, 22: « Et omnis artifex, » idest virtus quantum ad primum, et « omnis artis, » idest scientia quantum ad secundum « non inveniatur in ea, » idest in illa poena « amplius. » Et hoc est argumentum satis probabile, quod philosophi et omnes damnati non habent scientiam in inferno; quia, si adhuc vivente homine aliqua infirmitas facit eum amittere scientiam, multo ergo fortius poena inferni, quae omnem temporalem infirmitatem et poenam excedit. Eccl. 9, 10: « Nec sapientia nec scientia erit apud inferos, quo tu properas. » Tamen hoc non asserimus. Unde ponatur quod scientiam habeant, tunc exponitur sic. Omnis ars, idest scientia inveniatur in ea, verum est non ad consolationem, sed potius ad dolorem. Eccl. 1, 18: « Qui addit scientiam, addit dolorem. » Sed quia possunt aliqui dicere: habebunt aliquam consolationem vel solatium quantum ad corpus; et ideo excluditur, quod nullam habebunt. Apoc. 18, 21: « Et unus Angelus, » idest Christus qui est magni consilii Angelus. Isa. 9 « fortis, » Job 9, 19: « Si fortitudo quaeritur, » « robustissimus est, » « sustulit lapidem quasi molam reo magnum, » idest Antichristum, et omnes

malos, qui dicuntur lapides propter duritiam obstinationis molaris; quia mala voluntas est circa temporalia et malas operationes. Ps. 11, 9: « In circuitu impii ambulant ». « Et misit in mare, » idest in amaritudinem inferni; « et ultra jam non invenietur, » scilicet postquam ceciderint in infernum, de omnibus intellectus nullus invenietur, qui ad poenitentiam redeat. Quod est contra quosdam haereticos qui sic exponunt istud verbum « et ultra » idest, intra mille annos « non invenietur, » scilicet in inferno, quia poenitent tunc, et liberabuntur, sicut ipsi dicunt. Sed mentionitur. Et hoc est, quod dicitur intellectus; sicut quidam haeretici putant, quod debeant scilicet poenitere et liberare, sed decipiunt: quia Job 4, 20, dicitur: « De mane usque ad vesperam succendentur ». « Et quia nullus intelligit, in aeternum peribunt. » Matth. 25, 41: « Discedite a me maledicti in ignem aeternum. » Apoc. 20, 1, 2 et 5: « Vidi Angelum, » idest Christum, « descendentem de caelo, habentem clavem abyssi, et catenam magnam in manu sua, et apprehendit draconem, serpentem antiquum, qui est diabolus

« et satanas, et ligavit eum ( per annos mille ), « et misit eum in abyssum, et clausit, et signavit super illum, ut non seducat amplius gentes. » Sed quia consolatio quaedam est in particularibus sensibus, a proportionatis sensibilibus, sicut est in auditu et in ceteris; ideo ad excludendum omne delectabile ab eis, incoepit a sensu auditus. Apoc. 18, 22: « Et vox citharaedorum et musicorum et tibia canentium et tuba non audientur in te amplius. » Item removebitur ab eis delectabile quantum ad gustum: unde Apoc., ibidem: « Vox molae, » quae scilicet est ad victualia praeparanda « non audietur in te amplius. » Isa. 65, 13: « Ecce servi mei comedent, et vos esurietis. » Item auferetur ab eis delectabile quantum ad sensum visus. Apoc. 18, 23: « Lux lucernae non lucebit in te amplius, » ne scilicet oculi tui in aliquo delectentur. Ps. 81, 5: « Nescierunt neque intellexerunt, in tenebris ambulant. » Job 10, 21: « Terram tenebrosam et opertam mortis caligine, » ibid. 22: « Ubi umbra mortis et nullus ordo, sed sempiternus horror inhabitat. » Amen.



# OPUSCULUM LXIX.

## DE PRAEAMBULIS AD JUDICIUM, ET DE IPSO JUDICIO et ipsum concomitantibus.

( EDIT. ROM. 1810 A P. HYAC. DE-FERRARIS. )

Circa statum purgationis, quae fiet per ignem, ( consideranda sunt ea ) (1) quae sequentur statum Antichristi, et praecedent ignem purgationis mundi, quae sunt quatuor praeambula. Primo enim praecedet praedicatio Evangelii; secundo, spatium poenitendi; tertio, status securitatis; quarto, status quindecim signorum, quae dicit Hieronymus se invenisse in animalibus hebraeorum. Circa primum notandum est, quod post mortem Antichristi, quum jam persecutio et tribulatio cessabit, quibus affligentur, praedicabitur evangelium per sanctos praedicatores publice. Apoc. 11, 15: « Et Angelus septimus cecinit « tuba, » idest ordo praedicatorum praedicavit, idest praedicabit: quia per praeteritum prophetali certitudine intelligitur de futuro. « Et factae sunt voces « magnae in caelo, » idest in sancta Ecclesia caelesti conversatione sublimata; « voces, » idest exultationes honorum laudantium Deum de vita et pace collata eis, et de damnatione Antichristi et suorum. Isa. 51, 3: « Consolabitur Dominus Sion, » idest Ecclesiam fidelium post mortem Antichristi, « et « consolabitur omnes ruinas ejus, » idest tribulationes, quas perpassi sunt ab Antichristo. Et consolabitur eos de privatione honorum spiritualium, quibus privati fuerunt tempore persecutionis. Unde « consolabitur, » quia Ecclesia tempore Antichristi duplicem desolationem habebit et sustinebit: unam quidem, quia erit multis daemonibus vexata; aliam, quia non faciet tunc miracula. Et propter hoc post mortem Antichristi duplex erit consolatio; scilicet pax, et multiplicatio fidei; tunc enim omnes judaei convertentur ad fidem Christi, videntes se fuisse deceptos, Jerem. 25, 6: « In diebus illis salvabitur Juda, et « Israel habitabit confidenter: et hoc est nomen « quod vocabunt eum, Dominus justus noster. » Vere enim tunc constabuntur Christum, quem patres eorum crucifixerunt, verum Deum esse, et verum hominem, unius potentiae et majestatis cum Patre secundum divinitatem. Unde et in laudem prorumpent et magno gaudio ipsi judaei, cum aliis fidelibus, cum in Christi cognitionem devenient. Psal.

9, 7: « Cognoscetur Dominus judicia faciens. » Ideo dicent illud Apoc. 11, 15: « Factum est regnum « hujus mundi, » idest universitas fidelium, « Do- « mini nostri » scilicet Dei Patris, « et Christi « ejus, » idest Filii: ut dicit intellectus hujus regni. Tranquillitas etiam tunc in mundo incipiet, cum Christus Filius Dei spiritu oris sui Antichristum interficiet. Et statim Ecclesia quasi dimidiae horae silentio, scilicet tempore quod sequitur usque ad finem mundi, pacificata conquiescet. Et hoc est quod dicitur Apoc. 8, 1: « Factum est silentium in « caelo, » idest in Ecclesia, « quasi media hora. » Et propter hoc etiam dixit: « factum est regnum, » et diu fiet, quia ex tunc fraudulentia et saevitia diaboli penitus deficiet, et Deus in suis fidelibus universis perpetua pace et tranquillitate regnabit. Unde sequitur in praedicta auctoritate Apoc. 11: « Et regnabunt, » scilicet ipsi fideles in Deo, et Deus in eis « in saecula saeculorum. » Et in eodem capitulo paulo ante de Christo dicitur: « potestas « ejus potestas aeterna quae non auferetur, et re- « gnum ejus quod non corrumpetur, » et de hoc Joannes jurat, ideo dicit « amen, » idest verum fiet quod dictum est.

Sequitur status, in quo dabitur hominibus spatium poenitendi. Nam post mortem Antichristi dabitur spatium quadragintaquinque dierum ad poenitendum illis qui in persecutione Antichristi negaverunt Deum. Dan. 12, 11: « In tempore autem « cum posita fuerit abominatio desolationis, » idest Antichristi, qui abominabiliter exhibebit se adorandum, idest faciet se adorari « dies mille ducenti « et nonaginta, » qui sunt tres anni et dimidium, quia tanto tempore durabit persecutio Antichristi. Et postea sequitur: ibid. 12: « Beatus qui expectat « et pervenit ad dies mille trecentos triginta « quinque: » in hoc numero invenitur spatium quadraginta quinque dierum datum ad poenitendum. Nam si diebus mille ducentis nonaginta addantur dies quadraginta quinque, fient dies mille trecentos tricinta quinque. Est ergo sensus; beatus, qui post hos dies persecutionis Antichristi, qui sunt mille ducenti nonaginta, perveniet ad dies quadraginta quinque superadditos, et datos ad poenitendum! qui simul

(1) Haec verba desunt in codice amanuensis vitio, sed omnino erant addenda, ut sensus periodi haberetur.



collecti faciunt dies mille trecentos triginta quinque, sicut dicit Magister in historiis in ultima visione Danielis.

Post hunc statum sequitur tertius, scilicet status securitatis. Dicent enim tunc ministri Antichristi: licet princeps noster mortuus sit, tamen pacem et securitatem habemus; et ducent uxores et convivia celebrabunt. Sed subito superveniet eis angustia et tribulatio, a qua liberari non poterunt: 1 Thess. ult. 5: « Cum dixerint pax et securitas, tunc repentinus eis superveniet interitus sicut dolor parturientis, et non effugient. » Matth. 24, 58: « sicut erant in diebus Noe ante diluvium comedentes et bibentes, nubentes et nupti tradentes usque ad eum diem quo introivit Noe in arcam, et non cognoverunt donec venit diluvium, et tulit (omnes). » Ita erit adventus filii hominis. Unde sequitur: « Vigilate quia nescitis diem neque horam, qua Dominus vester venturus sit. » Unde « sicut fur in nocte, ita veniet, » secundum quod dicitur 1 Thess. ult. 2.

Sequitur de statu XV. signorum quae dicit Hieronymus se invenisse in annalibus hebraeorum; quae signa XV. diebus fient; sed utrum continuo vel interpolate non determinat. Prima die eriget se mare XV. cubitis super altitudinem montium, et erit quasi murus, et omnes aquae simul. Isai. 51, 14: « Ego Dominus qui conturbo mare, et intumescunt fluctus ejus. » Exod. 15, 22: « Erat autem aqua quasi murus ad dexteram eorum et laevam. » Secunda die descendet ad ima in tempore quo vix conspici possit. Psal. 76, 17: « Sonuerunt et turbatae sunt abyssi. » Unde dicitur Exod. 15, quod Moyses extendit virgam super mare, et Dominus vertit illud in siccum. Isa. 49, 5: « Arescet aqua de mari et fluvius siccabitur. » Isai. 51, 10: « Quis siccavit aquam abyssi vehementis? » Hoc admirando dicit propheta, videns in spiritu mare quasi siccum. Tertio die erit in aequalitate sicut a principio. Eccli. 45, 25: « Cogitatione sua placavit abyssum. » Quarto die omnes pisces et belluae marinae super aquas congregabuntur et dabunt voces et rugitus usque ad caelum. Sap. 17, 18: « Mugientium valida bestiarum vox . . . deficientes faciebat illos prae timore. » Ezech. 58, in illa die erit commotio magna, « Et commovebuntur a facie mea pisces maris et volucres caeli, et bestiae agri, et omne reptile quod movetur super humum eumque homines, qui sunt super faciem terrae. » Quinto die ardebit mare, et omnes aquae: Sap. 16, 17: « Quod enim mirabile erat, in aquis, quae omnia extinguunt, plus ignis valebat. » Sexto herbae et arbores sanguineum rorem dabunt. Isai. 26, 21: « Revelabit terra sanguinem suum. » Isai. 54, 7: « Inebriabitur terra (eorum) sanguine. » Septimo omnia aedificia ruent. Matth. 14, 2: « Videtis haec omnia? Amen dico vobis, non relinquetur lapis super lapidem, qui non destruat. » Ezech. 58, 20: « Subvertentur montes, et cadent sepes et omnis murus in terram corruet. » Octavo die bellabunt petrae ad invicem et collidentur. Isai. 50, 50: « Allidet in turbine et in lapide grandinis. » Sap. 17, 18: « Sonus validus praecipitarum petrarum . . . deficientes faciebat illos prae timore. » Habac. 2, 11: « Lapis de pariete clamabit. » Nono die fiet generalis terraemotus. Isai. 29, 6: « Visitabitur in tonitruo a Domino et in commotione terrae. »

Isai. 24, 18: « Concutientur fundamenta terrae. » Eccli. 45, 18: « Vox tonitruum ejus verberavit terram. » Matth. 24, 7: « Erunt terraemotus magni per loca. » Decimo die acquabitur terra, et omnes montes et colles in planitiem convertentur. Isai. 40, 4: « Omnis mons et collis humiliabitur, et erunt prava in directa et aspera in vias planas. » Psal. 96, 5: « Montes sicut cera fluxerunt a facie Domini. » Undecimo exhibunt homines de cavernis, et ibunt velut amentes, et non poterit alter alteri respondere prae timore. Isai. 24, 20: « Agitatione agitabitur terra sicut ebrius, » id est homines habitantes in terra. Isai. 59, 10: « Vix palpavimus quasi caeli parietem . . . Impegimus in meridie quasi in tenebris. » Psalm. 106, 17: « Turbati sunt et commoti sunt sicut ebrius. » Duodecimo cadent omnes stellae de caelo. Dicuntur autem cadere, eo quod obscurabuntur. Matth. 24: « Stellae cadent de caelo; sol convertetur in tenebras et luna in sanguinem, antequam veniat dies Domini magnus et terribilis. » Amos 8, 9: « In die illa, dicit Dominus (Deus), occidet sol in meridie, et tenebrescere faciam terram in die luminis. » Ezech. 52, 8: « Omnia luminaria caeli moerere faciam, et dabo tenebras super terram. » Decimotertio die exurgent omnia ossa mortuorum, et congregabuntur ad ora sepulchrorum. Ezech. 57, 8: « Ecce ego aperiam tumulos vestros, et educam vos de sepulchris vestris; » ibidem parum superius: « haec dicit Dominus (Deus) ossibus his: Ecce ego intromittam in vos spiritum et vivetis, et dabo super vos nervos, et succrescere faciam super vos carnes et superextendam in vobis cutem. » Et postea sequitur: « Et vidi et ecce commotio, et accesserunt ossa ad ossa unumquodque ad juncturam suam: et ecce super ea nervi et carnes ascenderunt, et extenta est in eis cutis desuper. » Illi etiam qui mortui sunt in mari, educentur. Unde Apoc. 20, 15: « Mare dedit mortuos, » id est corpora mortuorum. Decimoquarto die morientur omnes vivi, ut simul cum mortuis resurgant. 1 Thess. 4, 14: « Non praevenerunt eos qui dormierunt. » Sed propter hoc verbum non aperte habetur quod omnes debent mori, sed magis in immortalitatem mutandi, ut dicit Glossa Augustini. Sed amplius alibi dicit 1 Cor. 15, 15: « Omnes quidem resurgemus. » Et secundum quod dicit Augustinus super illud 1 Thess. 4: « Nos qui vivimus, qui residui sumus etc. » Si nulli codices habent « omnes dormiemus »; et idem dicit ibidem: resurrectio autem ubi mors non praecessit nulla est. Quintodecimo die ardebit terra usque ad inferni novissima, devorabitque terram cum germine suo, et montium fundamenta comburet. Psalm. 96, 5: « Ignis ante ipsum praecedet. » Isai. ult. 15: « Dominus in igne veniet. » Haec autem signa quae sunt XV. utrum fiant per ordinem sicut posui, an quod omnino non fiant, non assero; sed sicut inveni, ita recito.

Circa statum ergo purgationis quae fiet per ignem, quod est quintum decimum signum, (dicendum est) primo quis erit ille ignis qui purgabit mundum; secundo quam virtutem habebit; tertio quantum ascendet; quarto quid fiet de eo: ut sic cognoscamus quae sit ejus essentia, quae virtus, quis ascensus, et quis finis. Circa istius ignis essentiam sunt quatuor opiniones. Nam quidam dixerunt, quod erit ignis elementaris; quod videtur; quia sicut prima purgatio facta est per aquam.

seu elementum aquae, sic et secunda purgatio fiet per elementum ignis. Glossa super illo verbo Psal. 17, 9, « Ignis in conspectu ejus exardescet », « iste ignis materialis erit, quo facies hujus mundi comburetur. » Alii dicunt, quod sit ignis spiritualis a Deo ad hoc spiritualiter reservatus, et nescitur ubi sit. Unde Augustinus: « Quis sit iste ignis, aut in qua parte mundi sit, neminem scire arbitror, nisi cui Deus revelaverit. » Hoc etiam videtur ex Beda, qui dicit: « Elementa quatuor, quibus hic mundus constat, ignis maximus ille ardebit. » Ergo est aliud corpus ab elementis. Alii dicunt quod sit ignis purgationis, quia habebit vim purgativam ad venialia et mortalia facta purganda per contritionem. Glossa super illud verbum, « Ignis ante ipsum praecedet »: « ignis in quem mittendi sunt mali non ante eum, sed post eum erit; iste non praecedit, qui est poena malorum et salus bonorum. » Quarti dicunt quod sit congregatio omnium ignium mundanorum, sicut prima purgatio facta est per inundationem omnium aquarum. Augustinus de civit. Dei: « Tunc figura hujus mundi mundanorum ignium conflagratione praeteribit, sicut factum est mundanarum aquarum inundatione dituviam. » Circa virtutem istius ignis nota similiter quatuor: nam quaedam purgabit, quaedam comburet, quaedam innovabit, quaedam non laedet. Prima tria sumuntur secundum tria quae sunt in igne: scilicet lux, flamma et carbo. Igneum luminosum pertinet quantum ad bonos purificandos; igneum terrestre, quod est in carbone, pertinet ad malos comburendos; igneum flammeum pertinet ad elementa innovanda. Vel aliter: lux ignis erit ad illuminandos bonos et perfectos, qui tunc erunt; flamma ad purgandum peccata infirmorum, qui secum habebunt eremabilia. Carbo erit ad innovandum elementa, et fumus ad torquendum reprobos. Sic ergo primo purgabit bonos, qui tunc vivi inventientur. Augustinus: « Cum futura erit resurrectio mortuorum, quosdam vivos repertos invenio quoties de verbis Apostoli volui cogitare: similiter rapiemur cum illis in nubibus obviam Christo in aera. » Hoc etiam dicitur in Glossa super illo verbo 1 Cor. 3, 13, « Dies Domini declarabit: » ignis qui in judicio praecedet purgabit quosdam salvandos. Item secundo comburet malos, sive damnandos. Glossa super illo verbo Isa. ult. 13: « Dominus in igne veniet, » « in igne, qui aeternus erit malis, quos involvet, et quod purgabitur quidquid in bonis est purgandum. » Gregorius: « Sub uno eodemque igne aurum rutilat, et palea fumat. » Tertio innovabit elementa: 2 Petr. ult., 12: « Caeli calore solventur. » Glossa: « Qui consumpti per ignem meliorem, et pulchriorem speciem reassument. » Augustinus: « Conflagratione mundana elementorum corporalium qualitates quae in nostris corporibus corruptibilibus congregabantur, ardendo penitus interibunt. » Sybilla: « Exuret terras ignis pontumque polumque. » Quarto perfectos non laedet. Prov. 6, 28: « Quis ambulabit super ignem, et non comburentur plantae ejus? » « Ceteri sancti et viri perfecti. » Isa. 43, 2: « Cum ambulaveris super aquas, tecum ero. » Augustinus: « Neque ignem illum pertimeseant immortales: quia sicut virorum tria corpora corruptibilia in camino ardenti illaesa permanserunt, sic et ipsi illaesi permanebunt. » De quibus dicitur Dan. 3, quod ambulabant in medio flammae, laudantes Deum; sed Angelus Domini descendit, et fecit me-

diurni fornacis quasi ventum roris flantem, et non tetigit eos ignis omnino, neque contristavit, neque quidquam molestiae intulit. Hic nota triplicem purgationem mundi: prima fuit corporalis, quae facta est per aquam in diluvio: et haec potest dici lavatio. Eccl. 40, 10: « Propter impios factus est cataractae clysmus: » secunda fuit spiritualis quae facta est per sanguinem in Passione. Hebr. 1, 3: « Purgationem peccatorum faciens: » tertia erit corporalis et spiritualis, quae fiet per ignem in judicio. Item in prima aqua a terra ascendit ad aerem contra naturam aquae; in secunda corpus Christi crucifixum est in aere, et sanguis defluxit in terram. Item in tertia ignis contra naturam descendet ad terram, et ardebit usque ad inferni novissima.

Circa ascensum istius ignis notantur similiter quatuor: primo quomodo ascendet; nam potius deberet dici descendere quam ascendere, cum ignis sit super omnia elementa. Respondeo dicendum est quod non descendet motu naturali, sed jussu Dei, sicut aqua diluvii ascendit super altitudines montium non quidem natura sua, sed jussu Dei. Job 37 « in maribus. » Secundo quantum ascendet determinat Beda dicens, quod aqua quodammodo diluvii de locis terrestribus transcendendo perdidit: hic ignis extremi judicii ejusdem mensurae spatio pererescens occupando disperdet. Item super illo verbo 2 Petr. 3, « elementa calore solventur, » dicit Glossa: « Tantum ascendet ignis illius incendii, quantum ascendit aqua diluvii. » Tertio utrum ascendet ad caelum empyreum et paradysum terrestrem: quod videtur, quia in empyreo commissum est peccatum primi Angeli, et in paradiso terrestri primi hominis. Respondeo: dicendum est, quod infectio elementorum nihil aliud est quam poenalitas quam Deus indidit elementis propter peccata nostra, ut possit nos punire in loco poenitentiae hic. Nam paradysus terrestris et caelum empyreum non erant loca poenitentiae, ideo non indidit Deus ejus qualitates nocivas. Et ideo purgatio quae fiet per ignem illum non ascendet ad ipsum. Per peccatum enim in paradiso factum infecta sunt elementa inferiora, non ipsum paradysum infecit. Quarto utrum ascendet usque ad caelum sydereum: quod videtur per illud Isai. 51, 6: « Caeli sicut fumus liquecent, » et terra sicut vestimentum atteretur. » Ex quo videtur, quod ille ignis ascendet usque ad caelum ipsum sydereum. Hoc autem solvitur ex verbis Bedae, qui ait: « Caelum in quantum sydereum illo igne quamvis maximo non est tangendum; sed caelum aereum igne marcescet; sydereum autem manebit illaesum. » Circa finem istius ignis, quidnam scilicet fiet de eo, notandum est quod ponit Basiliius super illo verbo Psalm. 28, 7: « Vox Domini intereidentis flammam ignis, » ut electis luceat, et reprobos urat. Quod quadrupliciter potest; primo sic quod dividatur ignis secundum usum, non secundum substantiam; ut usus lucis sit in regione bonorum, usus caloris sit in regione damnatorum. Secundo potest dici, quod duplex est caliditas vel luciditas, scilicet potentialis et accidentalis. Ergo dividetur sive purgabitur, sed potentialis remanebit, quia potentialiter est lux in igne, qui est in regione malorum; et potentialis est calor in luce, quae est in regione vivorum et bonorum. Tertio potest dici quod in virtute Dei suspendentur actus istarum qualitatum, ut in caelo suspendatur caliditas ab igne, sicut factum est in camino ignis

trium puerorum. Dan. 5: « In inferno suspendatur, « luciditas », « ab igne. » Quarto potest dici, quod ignis carebit non solum suis qualitatibus, sed etiam radicibus qualitatum suarum, secundum illud quod dicitur super illo verbo 2 Petr. 5: « Elementa « calore solventur: » ubi dicit Glossa Bedae, quod ignis ille maximus duo elementa ex toto absumet, scilicet aquam ( et terram vel aerem ) secundum illud Apoc. ultimo, « Et mare jam non est. »

Positis superius praeambolis ad iudicium, sequitur de concomitantibus iudicium; propter quod notatur, quod concomitantia iudicium sive statum iudicii, sic ordinantur. Primo enim praecedet citatio; secundo post citationem citatorum resurrectio; tertio post resurrectionem sequitur resuscitatorum congregatio; quarto post congregationem sequitur iudicis congregantis disceptatio. Circa primum ergo, scilicet citationem quam Dominus faciet in die iudicii, notantur tria: primo numerus citationis, secundo tempus citationis, tertio modus. Circa primum notandum est, quod citatio erit trina: prima per Eliam et Enoch, qui erunt praecedentes proximi iudicii: de quibus Apoc. 11: « Dabo duobus testibus meis etc. », quod erit ante mortem Antichristi, de quo satis dictum est supra; secunda citatio fiet per praedicatores qui praedicabunt evangelium post mortem Antichristi; et isti erunt magis propinqui ad iudicium Mare. 13, 10: « Oportet « primum praedicari evangelium; » tertia citatio fiet per Angelos. Matth. 24, 31: « Mittet Angelos « suos cum tuba et voce magna, et congregabunt « omnes electos eius a quatuor ventis caeli, a summis caelorum usque ad terminos eorum. » Circa tempus citationis nota tres differentias. Nam Augustinus dicit super illo verbo, « media nocte clamor factus est, » quod non pro hora temporis accipiendum est, sed quia tunc veniet cum non speratur. Cassiodorus autem dicit quod potest non incongrue intelligi mediae noctis tempore venturus Dominus, quia hoc tempore primogenita Aegypti percussa sunt, cum sponsus venturus speratur. Apostolus autem, et aliae plures Scripturae ponunt eum venturum in die. 1 Cor. 5, 13: « Dies enim « Domini declarabit; » quod non pro qualitate temporis, sed quia cogitationes et consilia singulorum patebunt, sicut ait Augustinus. Tertio notandum est de modo citationis; circa quod nota differentias; plures enim ponuntur formae citationis. Apostolus enim 1 Thess. 4, 13, ponit, quod citatio erit per vocem Archangeli: unde dicit: « Ipse Dominus in jussu et in voce Archangeli, et in tuba « Dei descendet de caelo; et mortui qui in Christo « sunt, resurgent primi. » Hieronymus ponit, quod erit per illa verba, « surgite mortui, et venite ad « iudicium. » In Matth. 23, 6, ponit Dominus hanc formam: « Ecce sponsus venit, exite obviam « ei. » Videtur enim quod haec erit vox Angelorum ad homines congregandos. Augustinus autem dicit, quod tubae nomine aliquod evidens et praeclarum signum intelligitur, quod vox Archangeli et tuba Dei ab Apostolo nominatur, et in Evangelio vox filii Dei, et clamor appellatur. Post citationem sequitur resurrectio. Circa quam notanda sunt quatuor: primo causa resurrectionis mortuorum; secundo errores qui sunt circa resurrectionem; tertio probatio resurrectionis per rationes et auctoritates Scripturarum; quarto miraculum resurrectionis. Circa causam resurrectionis nota tria verba Apostoli: sei-

licet « in jussu et voce Archangeli, et in tuba Dei »: tria namque erunt in resurrectione: scilicet collectio pulverum, reformatio membrorum, et unio, sive unio animae ad corpus. Causa primi notatur per hoc quod dicitur « tuba: » causa secundi ( per hoc ) quod dicitur « voce: » causa tertii per hoc quod dicitur « jussu. » Et bene competit: quia per turbam designatur commotio rei inanimatae a re animata procedens, quod pertinet ad congregationem pulverum insensibilium et inanimatorum. Vox autem est sonus sensibilis animati. In quo notatur recte calamitas respectu corporis sensibilis reformandi. Jussus autem est sonus rationabilis, in quo notatur potestas rationabilis super partem rationabilem super corpora uniendam. In collectione ergo pulverum jam dispersorum ostenditur potentia Patris, in reformatione membrorum ostenditur sapientia filii, in unione animae ad corpus notatur bonitas Spiritus sancti, qui est nexus utriusque: propter hoc dicit Psalm. 67, 14: « Dabit vocem « suam vocem virtutis. » Ubi notatur quod ipse filius, sive Christus, erit causa efficiens resurrectionis corporum mortuorum.

Circa errorem resurrectionis nota decem opiniones falsas, et errores quorundam philosophorum, et aliorum plurium haereticorum. Primus error est Aristotelis et suorum sequacium, qui proponendo et sophisticè probando aeternitatem mundi, et per consequens ( dicunt ) generationem et successionem esse aeternam, quia antecessit in infinitum, et non habebit finem generatio hominis: quod est contra Scripturam. Gen. 1: « In principio creavit Deus « caelum et terram; » Luc. 21: « Caelum et terra « transibunt. » Quod si hoc esset, scilicet quod generatio esset aeterna, essent infiniti homines; et si essent infiniti homines, infiniti resurgerent; et si infinita corpora replerent, essent infinita loca, et ita locatum esset et cresceret in infinitum, et locus similiter: et ita essent aliqua infinita simul actu, quod repugnat veritati. Secundus error est quorundam aliorum philosophorum, et eorum sequacium, qui ponunt animas multum fuisse ante creatas, quam essent infusae corporibus; et dixerunt quod peccaverunt ante infusionem, et propter hoc detrasae sunt in corporibus tamquam in carcere: quae opinio impugnat resurrectionem; quia si hoc esset, anima non appeteret naturaliter et secundum sui naturam iterum uniri corpori, et ideo non jungeretur corpori ad gloriam, sed magis ad poenam, si corpus esset carcer animae; et ita vacuaretur ratio unionis animae ad corpus, quae unitur ei ut forma et perfectio ejus; contra quod est, quia si anima esset in corpore tamquam in carcere, non esset anima perfectio corporis, quia incarcerationis non est perfectio carceris: propterea non inesset animae naturalis appetitus perpetuae ligationis cum corpore. 2 Cor. 3, 4: « Nolumus expoliari sed su- « pervestiri. » Tertius error Pythagorae est et suorum sequacium, qui dicunt animas devolvi de corpore in corpus: quam opinionem habuit, quia habuit morbum memoriae, putans vera esse quae accepit in somnis. Somnians enim de bello, putavit, animam suam vidisse factum illius belli in alio corpore. Quae opinio destruit resurrectionem corporum: quia si resurgeret anima, nesciretur in quo corpore resurgeret, an in uno, an omnibus; quia si in uno, non esset generalis resurrectio; si in omnibus, oporteret quod divideret se, alioquin non



posset implere plura corpora. Quartus error est Epicureorum, qui dixerunt animam interire cum corpore. Unde dicunt impii, Sap. 2, 1, apud se non recte cogitantes; non est refrigerium in fine hominis, et non est qui agutus sit reversus ab inferis, quia ex nihilo nati sumus, et post hoc erimus tamquam non fuerimus; quia extinctus cinis erit cor nostrum, et spiritus diffundetur tamquam mollis aer. Sed quod anima non pereat cum corpore, probatur sic: substantia, cujus esse dependet a corpore, et virtus ejus et operatio ejus dependet a corpore; unde e contrario si virtus vel operatio non dependet a corpore, nec substantia dependet a corpore. Sed constat quod operatio virtutis intellectivae non dependet a corpore: quod patet, quia non habet instinctum corporeum; intelligit enim quaedam non per abstractionem a phantasmatis, sed per se ipsam intelligit, ut sunt prudentia et justitia; ergo nec ejus esse dependet a corpore. Hoc etiam patet in raptu et in prophetia. Praeterea omne mortale sua duratione paulatim debilitatur et deficit donec deveniat ad ultimum defectum, qui est mors. Sed virtus intellectiva sua duratione invalescit et proficit; quanto enim diuturnior et antiquior, tanto est validior ad intelligendum; quia sicut dicitur, in antiquis est sapientia, et in multo tempore prudentia; ergo est incorruptibilis. Quintus error est Valentini qui simpliciter carnis resurrectionem negavit; contra quod dicitur 1 Cor. 15, 12: « Si Christus praedicatur quod resurrexit a mortuis, quomodo dicunt in vobis quidam, quod resurrectio mortuorum non est? » Sextus est error Hymenei et Phyleti, contra quos Apostolus dicit 2 Timoth. 2, 18, quod « a veritate ceciderunt dicentes resurrectionem (esse) jam factam. » Vel quia non credebant resurrectionem esse nisi spiritualem, vel quia non dicebant alios resurrecturos nisi illos qui cum Christo resurrexerunt. Septimus est quorundam haereticorum modernorum qui dicunt resurrectionem futuram, non tamen eorundem corporum, sed animae resument quaedam corpora caelestia. Contra quos Apostolus dicit 1 Cor. 15, 55: « Oportet corruptibile hoc induere incorruptionem, et mortale hoc induere immortalitatem. » Octavus error est Eutychi Patriarchae Constantinopolitani, qui posuit, quod corpora nostra in resurrectione erunt aerea, vel vento similia, sicut narrat Origenes 14 lib. Moralium: contra quod est quod Dominus post resurrectionem suam corpus suum discipulis palpandum praebuit, dicens Luc. ultimo, 59: « Palpate et videte, quia spiritus carnem et ossa non habet, sicut me videtis habere; » et Apostolus Philip. 5, 21: « Reformabit corpus humilitatis nostrae configuratum corpori claritatis suae. » Nonus error est quorundam dicentium, quod corpora humana in resurrectione vertentur in spiritum. Contra quos dicitur Luc. ultimo, 59: « Spiritus carnem et ossa non habet, sicut me videtis habere. » Decimus est error Cerinthi, qui mille annos post resurrectionem in terreno regno Christi fabulabatur futuros, in quibus homines carnales ventris ac libidinis voluptates habebunt; contra quod dicitur Math. 22, 50. « In resurrectione neque nubent neque nubentur. » Quidam etiam dixerunt quod post resurrectionem mortuorum in eodem statu in quo nunc est, mundus manebit; contra quod dicitur Apoc. 21, 1: « Vidi caelum

« novum et terram novam; » et Apostolus dicit Roman. 8, 21, quod « ipsa creatura liberabitur a servitute corruptionis in libertatem gloriae filiorum Dei. » Et contra omnes istos errores dicitur 1 Cor. 15, 51: « Omnes quidem resurgemus. » Et in symbolo Apostolorum dicitur: « Carnis resurrectionem; » et in alio symbolo patrum dicitur: « Expecto resurrectionem mortuorum. »

Circa assertionem et resurrectionis probationem, notatur quod resurrectio potest probari quadrupliciter: primo per rationes, secundo per similitudines rerum naturalium, tertio per auctoritates sacrae Scripturae, quarto per inconvenientia quae sequerentur si non esset resurrectio. Rationes autem ad probandam resurrectionem corporum aliae sumuntur de ordine Creatoris, a quo est resurrectio; aliae ex ordine creaturarum, cum quibus est resurrectio, ( idest ) animae ad corpus, ad cujus perfectionem est resurrectio.

Ex ordine vero Creatoris tripliciter: aliae sumuntur ab ejus justitia, aliae ab ejus sapientia, aliae ab ejus bonitate. Ab ejus justitia sic. Certum est, quod divina justitia tribuit unicuique juxta opera sua. Sed hoc non fit in hac vita; ergo in alia; unde restat, quod post hanc vitam retribuetur corpori et animae bonum vel malum, quia anima non peccavit sine corpore, nec corpus sine anima. Psal. 95, 15: « Quoadusque justitia convertatur in judicium. » Ab ejus sapientia sumitur sic. Quia summi artificis sapientiae est disponere omnia ordinatissime. Sed omnis natura habet nobilissimum esse in homine; habet enim esse cum lapidibus, vivere cum plantis, sentire cum animalibus, intelligere cum Angelis etc., sicut dicit Gregorius; ergo vel resurget homo in quo est status universitatis ordinatissimus et pulcherrimus, vel artifex erit insipiens, qui est Deus; quod est falsum, quia sapientissimus est. Psal. 146, 5: « Sapientiae ejus non est numerus. » Propter quod vocatur homo omnis creatura; Marci ult. 15: « Praedicate evangelium omni creaturae. » Ab ejus bonitate sumitur sic. Si corpus non resurget, non est perfecta bonitas apud ipsum; quia illi, qui duce sapientia reguntur in bono, invenirent se deceptos; illi vero qui male vivunt, sapienter agerent 1 Cor. 15, 19: « Si in hac vita sperantes sumus tantum in Christo, miserabiles sumus omnibus hominibus. » Malach. 5, 14: « Vanus est qui servit Deo: et quod emolumentum quia custodivimus praecepta ejus? » Et postea sequitur 15: « Ergo nunc beatos dicimus arrogantes. »

Ex ordine creaturarum sumitur ratio resurrectionis tripliciter: primo ab earum esse; quia est substantia omnino corporalis, ut ista corporalia; quaedam omnino incorporalis, ut Angelus; rectum ergo erit, ut quaedam sit partim corporalis et partim incorporalis, ut homo; corporalis ex parte corporis, spiritualis ex parte animae. Secundo ex earum compositione; quia secundum auream catenam Pythagorae, quae est connexio et ordo rerum, est quaedam creatura composita corporalis non cognitiva, ut corporalis; quaedam simplex et incorporalis cognitiva ut intelligentia; sic congruum erit, ut sit quaedam media partim simplex et partim composita; partim cognitiva, et partim non cognitiva, ut homo partim sic, et partim sic. Tertio ex comparatione ejus ad universitatem: quia omnis natura habet nobilissimum esse in homine; habet enim

esse cum lapidibus, vivere cum arboribus et plantis, sentire cum animalibus, intelligere cum Angelis. Sed si homo non resurgeret, non participaret omnis creatura divinam bonitatem, nec frueretur ea, sed homo resuscitatus et glorificatus frueretur Deo, et in eo, scilicet in homine, frueretur Deo omnis creatura, cum omnis creaturae nomine designetur homo secundum Gregorium, ut dictum est supra.

Ex ordine animae ad corpus probatio sumitur sic. Habet enim anima quaedam potentias et dependentias in comparatione ad corpus quae non possunt perfici nisi in corpore: beatitudo autem est perfectio plena; ergo aut nunquam erit beata, aut oportet eam incorporari. Secunda sumitur sic: quia animae inest naturalis appetitus perpetuae ligationis cum corpore; sed si naturaliter inest ei, non privabitur suo desiderio naturali, quia natura nihil facit frustra, et nullus appetitus cassus a Deo creatus est; ergo pervenire potest ad perpetuam ligationem cum corpore; sed non in hac vita, ergo in alia. Tertia sumitur sic: anima est perfectio corporis, sed perfectio ordinatur ad perfectibile, et perfectibile dependet a perfectione; ergo non potest esse perfecta beatitudo sine altero. Apoc. 6, 11: « Datae sunt illis singulae stolae, scilicet beatitudo animae: « Et dictum est illis » idest a Deo inspiratum, « ut requiescerent tempus adhuc modicum » patienter expectando; » et dicitur « modicum, » quia brevis est cursus hujus temporis respectu aeternitatis, « donec impleatur numerus etc., » quia anima naturaliter appetit suum corpus vivificare, et hujusmodi appetitus affligeret eam, nisi speraret aliquando se hoc consecuturam, scilicet suum corpus vivificare. Quarto probatur resurrectio per similitudines rerum naturalium quadrupliciter. Prima similitudo sumitur a re inanimata, quia de pulvere fit vitrum lucidissimum per artem et ministerium hominis; sed si hoc potest artifex homo, qui est creatura, multo fortius et nobiliter et pulchriori modo Creator artificis de pulveribus nostris reformabit corpora lucidissima et gloriosa. Matth. 13, 43: « Fulgebunt justi sicut sol in regno Patris » eorum. » Et ideo Apostolus admirans incredulitatem talium ait Rom. 9, 21: « An non habet potentiam figulus luti ex eadem massa facere aliud » quidem vas in honorem, aliud quidem in contumeliam? » Secunda similitudo sumitur a re animata vegetabili, quae mortua in grano resurgit in herbam vel spicam. 1 Cor. 15, 36: « Inspiciens » tu quod seminas, non vivificatur nisi prius moriatur. » Tertia sumitur per similitudinem rei animatae sensibilis, quae redacta in cineres ex eisdem cineribus resurgit in phoenicem; sed si hoc potest natura, multo fortius et nobiliter in corpore nostro Dominus naturae. Quarta sumitur per similitudinem rei caelestis, quae oritur et occidit, et ad locum suum revertitur, ibique renascens gyrat per meridiem, et flectitur ad aquilonem. Augustinus: « Si cursum rerum naturalium inspicemus, certius est nobis resurrectionem futuram, quam cras » oriri solem. »

Tertio probatur et ostenditur resurrectio mortuorum per inconvenientiam quae sequuntur si resurrectio non esset. Primum inconveniens surgit ex comparatione corporum nostrorum ad corpus Christi; quia si corpus Christi, quod est caput, resurrexit, inconveniens esset quod nos, qui sumus membra, non resurgeremus. 1 Cor. 12, 26: « Sive gloriatur

*S. Th. Opera omnia. V. 17.*

« unum membrum, congaudent omnia membra; » 1 Cor. 13, 16: « Nam si mortui non resurgunt, » Christus non resurrexit. » Secundum inconveniens sumitur ex comparatione corporis nostri ad animam; quia cum corpus fuit socius in passione, inconveniens esset si non esset socius in consolatione. . . . quoniam existentiam, neque quoad virtutem neque quoad malitiam separatim anima pertransivit sine corpore. Ideo ambo simul retributionibus fruuntur. 2 Cor. 5, 10: « Omnes stabimus ante tribunal Christi » recepturi prout in corpore gessimus etc. » Tertium inconveniens sumitur ex comparatione corporis nostri ad alia corpora; quia alia corpora innovabuntur in melius. Inconveniens esset si corpora nostra non reciperent meliorem statum quam nunc habeant. Quod autem alia corpora innoventur, patet Apoc. 21, 1: « Vidi caelum novum et terram novam. » Quartum inconveniens sumitur ex comparatione musicae, quae est in numeris sensibilibus ad musicam quae est in numeris exemplaribus. Quia dicit Augustinus: Omnis musica quae est hic in numeris sensibilibus erit delectabilior in numeris exemplaribus. Sed anima erit conformis Deo; ergo in anima erit musica jucundissima. Sed diffusius est gaudium interius quam progreditur exterius, quam cum gaudium intus retinetur. Ergo musica quae erit in mente, erit etiam in corpore; alioquin esset inconveniens. Apoc. 5, 9: « Cantabant sancti » canticum novum ante sedem Dei et Agni, et resonabat terra in voces eorum. » Augustinus: « Vocabimur, amabimus, laudabimus. »

Quarto probatur et ostenditur resurrectio per auctoritates sacrae Scripturae novi et veteris testamenti. Dicitur autem Isai. 26, 19: « Vivent mortui » tui; interfecti mei resurgent. » Job 19, 25: « Scio » quod Redemptor meus vivit, et in novissimo die » de terra surrecturus sum, et in carne mea videbo » Deum, et rursum circumdabor pelle mea, et » videbo salvatorem meum, quem visurus sum ego » ipse, et non alius. » Ezech. 37, 5: « Haec dicit » Dominus ossibus his: Ecce ego imittam in vos » spiritum et viveris, et infra aperiam tumulos vestros, et educam vos de sepulchris vestris, et » scietis quia ego Dominus. Cum aperiero sepulchra vestra, et eduxero vos de tumulis vestris, » et dederero spiritum in vobis, et vixeritis, et requiescere vos faciam super humum vestram, » idest super corpus vestrum. Dan. 12, 2: « Et multi » de iis qui dormiunt in terrae pulvere evigilabunt. » Haec autem omnino intelliguntur de resurrectione secundum carnem. Matth. 10, 28: « Eum time » qui potest animam et corpus perdere in gehennam. » Matth. 12, 42: « Regina austri resurget » in iudicio cum generatione ista etc. » Sed constat, quod regina austri non resurget a peccato ulterius, ergo resurget in carne. Matth. 24, 31: « Ibi erit fletus et stridor dentium. » Sed hos actus non potest exercere nisi corpus: Matth. 22, ita ut Sadducaeii qui negant resurrectionem carnis quaerunt a Christo de muliere quae habuit septem viros, et omnes isti septem fuerunt mortui, cuius istorum in resurrectione esset uxor? Et Christus respondit de resurrectione mortuorum: ibid 31: « Non legitis quia dictum est » a Domino dicente vobis, » « Ego sum Deus Abraham, Deus Isaac, et Deus » Jacob? non est Deus mortuorum sed vivorum. » Et non erat hic quaestio de animabus, sed de corporibus. Joan. 5, 28: « Venit hora, in qua omnes

« qui in monumentis sunt audient vocem filii Dei  
 « et qui audierint vivent, » et infra: « et procedent  
 « qui bona fecerunt in resurrectionem vitae, qui  
 « vero mala in resurrectionem iudicii. » Joan. 6,  
 55: « Ego resuscitabo eum in novissimo die; »  
 Joan. 11, 24: « Scio quia resurget in resurrectione  
 « in novissimo die. » Hoc non potest intelligi de  
 resurrectione a peccato, quia hoc non potest fieri  
 in novissimo die. Non enim erit tunc tempus poenitentiae,  
 sed justitiae. Psalm. 74, 3: « Cum accesserit  
 « pero tempus etc. » Rom. 8, 25: « Nos ipsi intra nos  
 gemimus adoptionem filiorum Dei expectantes  
 redemptionem corporis nostri. » 1 Cor. 15, 51:  
 « Omnes quidem resurgemus, sed non omnes immutabimur. »  
 Haec auctoritas nullomodo potest exponi de resurrectione  
 spirituali a peccato, scilicet, quia non omnes resurgunt  
 a peccato; ergo intelligitur omnino de resurrectione  
 carnis. Infra cod. 55: « Oportet corruptibile hoc induere  
 « corruptionem, et mortale hoc induere immortalitatem. »  
 2 Cor. 4, 14: « Qui suscitavit Jesum a mortuis,  
 et nos cum Jesu suscitabit. » Eph. 4, 15: « Donec  
 occurramus omnes in unitatem fidei, et agnitionis  
 filii Dei, in virum perfectum, in mensuram aetatis  
 plenitudinis Christi. » Phil. 3, 8: « Omnia detrimentum  
 feci (et arbitror) ut stercora ut Christum lucrifaciam. »  
 Et postea sequitur ibid. 10: « Ad cognoscendum illum; »  
 ibid. 11, « si quomodo occurram ad resurrectionem quae  
 est ex mortuis; » hoc enim non potest intelligi de  
 resurrectione a peccato, quia ipse sanctus erat et jam  
 resurrexerat a peccato; ideo non expectabat a peccato  
 resurgere, sed expectabat resurrectionem carnis. Phil. 3,  
 20 et 21: « Salvatorem expectamus Dominum Jesum  
 Christum qui reformabit corpus humilitatis nostrae  
 configuratum corpori claritatis suae. » Jacob. 5, 5:  
 « Aurum et argentum vestrum aeruginavit, et aerugo  
 eorum erit vobis in testimonium, et manducabit carnes  
 vestras sicut ignis. » Haec auctoritas non potest  
 exponi in praesenti vita, quia aerugo aurum non comedit  
 divitum; ergo erit in alia vita. Apoc. 11, 11: « Spiritus  
 vitae intrabit in eos. » Apoc. 17, 16: « Carnes ejus  
 manducabunt et ipsam igni comburent. » Apoc. 20,  
 12: « Vidi mortuos magnos et pusillos stantes in  
 conspectu throni, et libri aperti sunt. »

Circa miraculum resurrectionis notantur quatuor, quae faciunt ipsam resurrectionem miraculosam. Primo mortis definitio; quia mors est privatio vitae; sed de privatione ad habitum non est regressus nisi miraculose. Secundo naturae definitio, quia natura est vis insita rebus ex similibus similia procreans, ut ex homine homo, et ex asino asinus; sed postquam insonuerit tuba nullus erit homo qui possit hominem generare: ergo quod homines erunt non erit a natura. Tertio per operationem naturae, quia natura operatur successive; sed resurrectio erit subita, quia in momento et in ictu oculi, sicut dicit Apostolus; hoc autem fieri non posset nisi per miraculum. Quarto per impossibile naturae. Nam idem corpus numero resurget. Natura vero non idem numero facit, nec idem in individuo; nec potest supra se, ut faciat corpora immortalia et splendidiora quam fuerint. Potest autem dici, quod quoad quaedam resurrectio erit naturalis; nam in tantum resurgent corpora ex eisdem pulveribus in quos resoluta sunt, in quantum anima natura-

liter appetit conjungi corpori suo, et in quantum erit naturalis obedientia in istis pulveribus ut de eis fiant corpora, sicut in costa Adae fuit potentia ex qua posset fieri Eva; sed non ex qua fieret, quia in ea non erat actus vel potentia activa, sed potentia susceptiva.

Post resurrectionem sequitur suscitatorum congregatio, quae fiet ministerio Angelorum; circa quam notantur tria. Nam quidam congregabuntur in terra in valle Josaphat, ut omnes mali, sicut dicit Magister sententiarum 4 distinct. 46. Joel. 3, 13: « Congregabo omnes gentes (et deducam) in valle Josaphat. » Matth. 5, 41: « Mittet filius hominis Angelos suos, et colligent de regno ejus omnia scandala et eos qui faciunt iniquitatem » et mittet eos in caminum ignis, ibi erit fletus et stridentium. De manu omnium bestiarum exquiram sanguinem animarum vestrarum, quia etiam comesti a bestiis omnes resuscitabuntur, et submersi etiam in mari. Apoc. 20, 15: « Et mare reddidit mortuos suos, » idest corpora mortuorum; quia illi qui in mari mortui sunt resurgent, de quibus tamen minus videtur; et sic per locum a minori probat quod omnes resurgent. Notandum est etiam, quod animae quae sunt in inferno, ad corpora sua redibunt. Apoc. 20, 15: « Mors, » idest diabolus et infernus, scilicet locus tenebrarum dederunt mortuos suos, idest animas mortuorum, quae in ipsis erant, et quas tenebant. Dederunt, dieo, ut ad sua corpora redirent, et judicarentur in ipsis. Et ideo simul congregabuntur, ut postea simul factis de eis fasciculis in ignem mittantur. Isai, 24, 22: « Congregabuntur in congregatione unius fascis in lacum; » Jerem. 12, 13, « congrega eos sicut gregem ad victimam. » Quidam autem rapiuntur in aera jam resuscitati, ut omnes boni, qui tunc inveniuntur mortui, qui resuscitabuntur, et postea rapiuntur. Matth. 24, 31: « Mittet Angelos suos cum tuba (et voce magna) et congregabunt omnes electos. » Quidam vero rapiuntur antequam moriantur, ut illi qui tunc inveniuntur vivi, qui rapiuntur vivi, et in ipso raptu moriuntur et resurgent. Mira enim celeritate legimus eos passuros mortem et recepturos immortalitatem. Ambrosius: « In ipso raptu eorum qui vivi rapiuntur mors erit et resuscitatio, ut anima, quasi per soporem egressa de corpore eidem in momento reddatur. » Sed contra dicit Hieronymus, quosdam in fine saeculi non esse mortuos, sed vivos repertos in immortalitate mutandos. Contra ejus opinionem est illud Apostoli 1 Cor. 15, 22: « In Christo omnes vivificabuntur » quod esse non posset nisi prius morerentur. 1 Thess. 4, 16: « Simul rapiuntur cum illis in nubibus obviam Christo in aera. »

Post congregationem sequitur congregantis disceptatio; circa quam notatur quod Dominus disceptabit cum reprobis: primo de magnitudine Passionis suae, unde ostendet omnia instrumenta mortis suae, scilicet Crucem, clavos et lanceam, sicut dicit Magister in historiis. Item ostendet cicatrices. Apoc. 1, 7: « Videbit eum omnis populus et qui eum pupugerunt. » Item Apoc. 19, 13: « Indutus erat veste aspersa sanguine. » Vexillum autem Crucis apparebit ante illum. Matth. 24, 30: « Tunc apparebit signum filii hominis in caelo. » De quibus etiam dicit (1): « Quid dices,

(1) *Hic in Codice, adnotante Cl. Editore, indicatur nomen Auctores sub sigla dubiae interpretationis, cum ad B vel R accedere videatur.*



• quid facies o peccator? contra te loquetur conscientia, te accusabunt omnia elementa. Crux Christi plorabit, Christus per vulnera allegabit. Cicatrices loquentur, et clavi conquerentur. • Secundo de omissionibus. Matth. 23, 42: • Esurivi et non dedistis mihi manducare; sitiivi et non dedistis mihi bibere. Hospes fui, et non collegistis me; nudus et non cooperuistis me, infirmus et in carcere, et non visitastis me. • Tertio de cogitationibus impiis interrogatio erit. Quarto de intentionibus. Hebr. 4, 12: • Discretor cogitationum et intentionem cordis. • Quinto de verbis otiosis. Matth. 12, 36: • De omni verbo otioso quod locuti fuerint homines reddent rationem in die iudicii. • Sexto de malis operibus. Sap. 6, 4: • Interrogabit opera vestra, et cogitationes scrutabitur. • Septimo de rebus temporalibus. Lue. 16, 2: • Redde rationem villicationis tuae. • Octavo de custodia familiae tuae . . . ubi est grex qui datus est tibi? Nono de annis et de tempore quod otiose pertransivit tecum, idest vocavit adversus me tempus. Job 44, 25: • Dedit ei Dominus poenitentiae tempus, et ipse abutitur eo in superbia. •

Post disceptationem sequitur causae discussio: circa quam nota quatuor: scilicet qui erunt accusatores, qui testes, qui assessores, et qui executores. Accusatores erunt tres: primo accusabit hominem conscientia. Rom. 2, 15: • Testimonium reddente illis conscientia ipsorum; et inter se invicem cogitationibus accusantibus . . . in die, qua iudicabit Deus occulta hominum secundum evangelium meum per Jesum Christum. • Item daemones qui datus est ei ad exercitium, qui continue observavit eum et opera ejus ut accusaret. Apocal. 12, 10: • Projectus est accusator fratrum nostrorum qui accusabat illos die ac nocte. • Psal. 57, 15: • Viam faciebant qui quaerebant animam meam. • Item locus et creatura ubi peccavit. Job 20, 27: • Revelabunt caeli iniquitatem ejus, et terra surget adversus eum. • Habac. 2, 11: • Lapis de pariete clamabit; et quod etiam pater accusabit filium, et filius patrem. Conqueretur filius de malo patre, quoniam propter ipsum est in opprobrium. Sap. 4, 6: • Ex iniquis omnes qui nascuntur filii testes sunt nequitiae adversus patrem. • Testes similiter erunt tres. Primus erit Creator, quem offendimus. Job 16, 20: • Eccc in caelo testis meus (et conscius) meus in excelsis. • Jerem. 29, 25: • Ego sum iudex et testis. • Secundus erit bonus angelus, qui datus est homini ad custodiam, qui accusabit eum de multa ingratitude servitii sui. Unde dicit in iudicio illud Jerem. 51, 9: • Curavius Babylonem et non est curata vel sanata. • Tertius erit macula peccati, quae relucebit in facie. Jerem. 2, 19: • Arguet te malitia tua. • Job 16, 9: • Rugae meae dicunt testimonium contra me. • Et sic erunt tres testes contra hominem, juxta illud: • In ore duorum vel trium testium stat omne verbum. • Assessores erunt quatuor. Et primi erunt chorus Apostolorum. Ipsi enim aderunt in iudicio quasi senatores. Prov. ult. 25: • Nobilis in portis vir ejus cum sederit cum senatoribus terrae. • Secundi assessores erunt chorus martyrum, ipsi enim aderunt in iudicio quasi principes victoriosi, et quasi milites invicti. Apoc. 5, 21: • Qui vicerit dabo ei sedere mecum in throno meo. • Sap. 3, 8: • Iudicabunt sancti nationes. • Tertii

assessores quodammodo erunt chorus Patriarcharum et Prophetarum, de quibus dicitur Isa. 3, 14: Dominus ad iudicium suum ad iudicandum veniet cum senioribus populi sui. Quarti assessores erunt chorus pauperum, qui omnia dimiserunt propter Christum, et secuti sunt eum; sicut sunt praedicatorum evangelii, et defensores fidei et eorum similes qui sunt pauperes spiritu, idest voluntate: de quibus dicit Dominus Matth. 5, 5: • Beati pauperes spiritu. • Istis ergo dabitur potestas iudicandi. Job 36, 6: • Iudicium pauperibus tribuit. • Matth. 19, 28: • Vos qui reliquistis omnia et secuti estis me, sedebitis super sedes, iudicantes duodecim tribus Israel. • Sic ergo iudicanti Christo aderunt Apostoli ut senatores, martyres quasi milites, Patriarchae, et prophetae ut seniores, et pauperes quasi iudices.

Executores illius terribilis iudicii et sententiae erunt quatuor, secundum quatuor quae sunt in executione sententiae in foro saeculari. Sunt enim primo ibi aliqui qui praecipiant; secundo tortores et carnifices qui torquent, quibus praecipiant; tertio sunt ibi acclamatores, qui laudant et confirmant sententiam et dicunt, fiat fiat; quarto sunt ibi instrumenta, quibus torquentur, et exerceant vindictas. Sic in illa sententia ultimi iudicii praecerunt executioni, scilicet Michael et omnes Angeli, qui praecerunt malis Angelis ad torquendum. Qui et religabit Satanam et omnem virtutem ejus. Apoc. 20, 1: • Vidi Angelum descendentem de caelo habentem clavem abyssi, idest potestatem super abyssum; et catenam magnam, idest invincibilem potentiam qua constringit omnia. Sicut dicit Glossa, • In manu sua, idest in operatione passionis, et propter meritum passionis ubi abscondebatur fortitudo sua, et potentia, qua diabolus ligari debeat, sicut dicitur Habac. 3. Apoc. 20, 2: • Et apprehendit draconem serpentem antiquum, ( qui a principio nocere incepit. Joan. 8 88: • Ille homicida erat ab initio. • Qui est diabolus, et Satanus): et ligavit eum (per annos mille) in abyssum, et clausit et signavit, scilicet signo crucis, • ut non seducat amplius gentes. • Item Apoc. 14, 15 et 18, de executione honorum Angelorum divinae sententiae. • Et alius Angelus exivit de templo, quod est de caelo, habens falcem acutam; et infra dicit ei Christus: • Mitte falcem tuam acutam, et vindemia botros vineae terrae, quoniam matura sunt uvae ejus, idest eorum malitia completa est. Et postea sequitur: • Et misit Angelus falcem suam ( acutam ) in terram et vindemiavit vineam terrae, ( idest omnes qui delectationes suas finaliter posuerunt in bonis terrenis. Lue. 6, 24: • Vae vobis divitibus, qui habetis hic consolationem vestram), et misit in lacu irae Dei: • secundum torcular magnum, idest in infernum, in lacum scilicet miseriae, et in lutum faecis. Sicut materialiter in adventu alienius magni regis plateae civitatis mundantur, sic in adventu Domini ad iudicium mundus purgabitur de malis, et ipsi in lacu inferni projicientur. Psal. 17, 45, • Ut lutum platearum delebo eos. • (Apoc. 14, 20:) • Et calcatus est lacus extra civitatem, idest mali puniti sunt extra Ecclesiam et consortium justorum. Nota quod Dominus habet duplex torcular; scilicet purgatorii et inferni. De illo, scilicet purgatorio, emittitur purum vinum, et homo non est extra civitatem, quia meritis et suffragiis Ecclesiae vinum

istud citius depuratur. Sed aliud est extra civitatem, quia nunquam mali inde exibunt, sed in pressura perpetua remanebunt. Matth. 25, 46: « Ibunt hi in supplicium aeternum. » Isa. ultimo 24, « Ignis eorum non morietur. » Et (Apoc. 14, 20), pro vino exivit sanguis, « De lacu usque ad frenos equorum per stadia mille sexcenta. » Pro vino ergo exivit sanguis, idest crudelitas poenae infernalis exuberabit de lacu, idest a minoribus, « Usque ad frenos equorum, » idest usque ad majores, scilicet praelatos et reges et alios. Omnes enim ibi crudeliter cruciabantur secundum merita culparum. Sed majores amplius et acrius tormentabantur. Sap. 6, 6: « Judicium durissimum in his qui praesunt fiet. Et hoc per stadia mille sexcenta, » idest per diversas poenas angustiari secundum quod fecerunt diversa peccata. Matth. 13, 49: « Exibunt Angeli, et separabunt malos de medio justorum, et mittent eos in caminum ignis; ibi erit fletus et stridor dentium. »

Secundo tortores et carnifices: et hi erunt omnes Angeli mali, qui torquebunt malos in inferno. Apoc. 9, 5: « Et datum est illis, » idest mandatum a Deo, « ne occiderent eos, » sed ut cruciarentur, quia mali et damnati mori non poterunt, sed deducuntur per poenarum diversitatem et acerbiter usque ad mortem. Psal. 48, 15: « Mors depascet eos. » Unde sicut herba quae a bestiis pascitur iterum pullulat ut pascatur, sic damnati nunquam totaliter deficient, nec radicitus destruentur, ut in aeternum et continue torqueantur. ( Apoc. 9, 5 ): « Et cruciatus eorum ut cruciatus scorpionis eum percutit hominem. » Et quilibet carnifex habet super se alium tortorem, qui torquet eum et tormentat, ut sicut ipse tormentatur, ita torqueat et tormentet, et torqueat animas damnatorum et corpora. Et propter hoc sequitur, ibi, 11: « Habebant semper super se regem Angelum abyssi. » Nec tamen, ut dictum est, mori poterunt. Apoc. 9, 6: « Quaerent homines mortem, et non invenient (eam) et desiderabunt mori, et fugiet mors ab eis. »

Tertio erunt ibi acclamantia, et laudatores divinae sententiae, qui congaudebunt divinae justitiae. Apoc. 18, 20, « Exultate super eam caeli; » idest caelestes spiritus secretorum Dei conscii concordantes divino judicio; « et sancti Apostoli et prophetae, » idest majores sancti et minores. Omnes enim illi prophetae possunt dici, quia mala praevident per circumspersionem et cantelam, et praevisa cavent: « Quoniam judicavit Deus judicium vestrum de illa, » scilicet societate malorum. Item de ista acclamatione. Apoc. 19, 1: « Laus et gloria et virtus Deo nostro, qui judicavit de meretrice magna, » idest de societate peccatorum, « quae corripit terram, » scilicet malo exemplo, « in prostitutione sua, » quia ipsa in se vilis fuit. « Et iterum dixerunt alleluja, » qui est cantus laetitiae. Per hanc iterationem debemus intelligere laudem esse aeternam. Primo dictum est pro vindicta peccatorum quae fecerunt, alios corrumpendo malo exemplo: nunc iterum dicitur pro vindicta peccatorum quae fecerunt male operando. Unde Eccles. 12, 7, « In impiis » et peccatoribus, « reddet vindictam, » custodiens eos in die judicii; unde in praedicta auctoritate, Apoc. 19, 5, « Et fumus ejus, » idest poena, « ascendit, » idest nunquam remittetur saltem post diem judicii, « in saecula saeculorum, » idest in aeternum. Unde

intelliguntur aeternaliter puniri isti. Per « fumum » autem designatur poena; quia fumus relinquitur ex applicatione ignis inferni ad peccata. Per hoc igitur, quod fumus semper est continuus, igni applicato ad ligna, designatur, quod poena malorum est aeterna. Apoc. 9, 2: « Ascendit putei fumus, » sicut fumus fornacis magnae. » Et Apoc. 14, 11: « Fumus tormentorum suorum in saecula saeculorum ascendet. » Sic igitur sancti gaudebunt de justo Dei judicio. Psal. 57, 11: « Laetabitur justus cum viderit vindictam. » Psal. 149, 6: « Exaltationes Dei in gutture eorum, ad faciendam vindictam in nationibus et increpationes in populis, ut faciant in eis judicium conscriptum: gloria haec est omnibus sanctis ejus. »

Quarto erunt ibi instrumenta multiplicia ad torquendum, scilicet ignis et sulphur et fumus. Psalm. 10, 7, « Ignis, sulphur et spiritus procellarum etc. », item vermis et tinea. Isa. 14, 11: « Subter te sternetur tinea, et operimentum tuum erunt vermes. » Et omnia alia genera poenarum: et maxima poenarum erit perpetua privatio visionis divinae. Isa.: « Tollatur impius ne videat gloriam Dei. »

Post causae discussionem sequitur sententia justa quoad bonos et quoad malos. Matth. 25, 34: « Venite, benedicti Patris mei percipite regnum etc. » et hoc quantum ad bonos. « Et ite maledicti in ignem aeternum, » quantum ad malos. Utrum autem voce sensibili haec verba proferantur, an virtute judicis ita fiat, singulorum conscientis attestantibus, dubium relinquit Magister in sententiis. Erit autem justa haec quadrupliciter; idest ex causa, ex ordine, ex animo, ex aequitate; his enim quatuor modis in foro saeculari potest esse justa sententia. Ex causa (est injusta) quum judex condemnaret innocentem. Prov. 17, 15: « Qui justificat impium, et qui condemnat justum (abominabilis est uterque apud Deum). » Isai. 5, 23, « Vae qui justificatis impium pro muneribus. » Ex animo, cum condemnat aliquem ex irato animo vel ex odio. Jac. 1, 20: « Ira enim viri justitiam Dei non operatur. » Ex ordine, quum scilicet condemnat aliquem juris ordine praetermisso, dimittendo scilicet litis contestationem vel receptionem testium et hujusmodi: tunc enim injusta esset sententia, etiam si ille qui condemnatus est malus sit, et dignus tali sententia. Deuter. 16, 20: « Juste quod justum est exquires. » Isai. 59, 14: « Conversum est judicium retrorsum. » Ex aequitate, quum scilicet judicat sine misericordia; quia in justitia debet esse comes misericordia; alioquin erit crudelitas. Jac. 2, 15: « Judicium sine misericordia fiet illi qui non fecit misericordiam. » Ibid.: « Superexaltat misericordia judicium. » Sententia ergo Christi erit justa primo ex causa: quia sicut dicitur Psalm. 61, 15, « Reddet unicuique juxta opera sua. » Job 33, 15: « Non enim frustra audiet Deus, et Omnipotens singulorum causas intuebitur. » Job 54, 11, « Opus hominis reddet ei et juxta vias singulorum restituet. » Rom. 2, 5, « Secundum duritiam autem tuam . . . thesaurizas tibi iram in die irae, et revelationis justi judicii Dei. » Item erit justa ex animo, quia in ipsum non cadit ira vel odium. Unde non judicabit animo irato vel odioso. Jac. 1, 17: « Apud quem non est transmutatio vicissitudinis. » Sap. 11, 25: « Nihil odisti eorum quae fecisti. » Item

erit justa ex ordine juris, secundum Job 34, 12: « Vere Deus non condemnet frustra, nec Omnipotens subvertet iudicium. » Item erit justa ex aequitate quia proveniet citra condignum. Psalm. 76, 10: « Non continebit in ira misericordias suas. » Psalm. 52, 5: « Diligit misericordiam et iudicium. » Erit autem sententia ejus damnatis intolerabilis propter quatuor, quae erunt in ea: primo erit ibi poenarum acerbitas. Psalm. 46, 7: « Ibi dolores ut parturientis. » Isai. 13, 8: « Torsiones et dolores tenebunt. » Job 24, 19: « Transibunt de aquis nivium ad calorem nivium. » Secundo erit ibi poenarum diversitas, quia erit ibi omnis timor, Isai. 13, 8: « Unusquisque ad proximum suum stopebit, facies combustae vultus eorum. » Item erit ibi pessima societas. Isai. 13, 21: « Requiescent ibi bestiae, idest daemones, et replebuntur domus eorum draconibus, et habitabunt ibi struthiones, et pilosi saltabunt ibi. » Job 24. Transibunt de aquis nivium etc. Tertio erit ibi poenarum durabilitas, sive aeternitas. Isai. ultimo ibid. 24: « Vermis eorum non morietur, et ignis eorum non extinguetur etc. » Matth. 23, 46: « Ibunt hi in supplicium aeternum etc. » Quarto erit ibi continuitas. Apoc. 20, 15: « Omnis qui non est inventus in loco vitae, missus est in stagnum ignis; » ibid. 10: « Et cruciabitur die ac nocte in saecula saeculorum. » Job 50, 17: « Qui me comedunt non dormiunt. » Ab ista ergo sententia tam crudeli quo fugiet miser peccator? in caelo non. Isai. 54, 50: « Inebriatus est in caelo gladius meus. » Deut. 52, 42: « Inebriabo sagittas meas sanguine etc. » In terra non. Deut. 52: « Ignis accensus est in furore meo et ardebit etc. devorabitque terram cum germine suo, et montium fundamenta comburet. » Item ad austrum non. Habac. 3, 2: « Deus ab austro veniet et sanctus etc. » Item ad aquilonem non. Jerem. 1, 14: « Ab aquilone pandetur omne malum. » Item ad orientem non, ad occidentem non, ad sylvas non, ad deserta non. Psalm. 74, 5, 7: « Dixi iniquis, nolite inique agere; quia neque ab oriente neque ab occidente neque a desertis montibus etc. » Item in aëre non. Abdias 1, 4: « Si exaltatus fueris ut aquila, et inter sidera ponas nidum tuum, inde extraham te. » In mari non, neque eum aliqua creatura securi erunt. Sap. 5, 18: « Armabit creaturam ad ultionem inimicorum, contra insensatos. » Psalm. 138, 7: « Quo ibo a spiritu tuo, et quo a facie tua fugiam? si ascendero in caelum etc. », usque ibi, et tenebit me dextera tua, idest potentia tua Job 11, 20, « Peribit effugium ab eis. »

Expeditis praecambulis ad iudicium, expeditis etiam concomitantibus in iudicio; sequitur tertium, scilicet de subsequentibus post iudicium. Circa quod sciendum est, quod innovabitur microcosmus et macrocosmus, idest major et minor mundus, secundum illud Apoc. 21, 5: « Ecce nova facio omnia. » Minor ergo mundus, idest homo, innovabitur dupliciter: primo quantum ad animam, secundo quantum ad corpus. Quantum ad animam tripliciter: scilicet quantum ad potentiam vegetabilem, sensibilem et rationabilem. Quantum ad vegetabilem tripliciter secundum tres vires ejus quae sunt, scilicet nutritiva quae conservat, augmentativa quae augmentat, generativa quae multiplicat. Hae tres innovabuntur in generatione; quia

ibi erit nutritiva sine actu et necessitate, alimento et digestionem non indigens, et satietate non fastidians. Tob. 12, 19, « ego cibo utrorque invisibili »: Isa. 49, 10: « Non esurient neque sitient amplius. » Gregorius: « Longe erit a satietate fastidium quia sicientes saturabuntur, et satiati sitiemus. » Ibi erit augmentativa sine necessitate et actu suo, superfluitate incremens, diminutione non retrahens. Non enim erit necessarium augmentari vel diminui corpus, quoniam habebit juxta illud Luc. 6, 58, « Mensuram bonam, et confertam, et coagitatam, et supereffluentem. » Ezech.: « Mensura hominis quae est Angeli. » Ibi erit generativa sine necessitate et actu suo, fecunditate non foedans, sterilitate non vituperans; sed erit ad decus; quoniam neque nubent neque nubentur, sed erunt sicut Angeli Dei etc. Actus ergo istarum potentiarum et corruptiones cessabunt, sed non veritas naturae, quae in ipsis est. De primis duabus potentiis dicit Augustinus, quod non potestas, sed egestas comedendi et bibendi detrahetur corporibus glorificatis; quoniam servata partium congruentia, integritas substantiae in nostris corporibus remanebit. Quantum ad potentiam sensibilem fiet innovatio secundum quinque vires interiores quas habet, quae sunt: sensus communis, imaginatio, vis imaginativa seu informativa, quae in homine dicitur cogitativa, aestimatio et memoria. Sensus communis vertit se super actum sensus exterioris aliquantum, prout dicimus: video me videre. Haec etiam vis discernit inter sensibilia diversorum sensuum, ut inter album et dulce, eo quod apprehendit omnia sensibilia quinque sensuum, quod non potest facere aliquis sensus particularis: unde visus non potest discernere inter album et dulce. Imaginatio convertit se supra similitudinem rei, quae similitudo dicitur esse « idolum » vel phantasma; et recipit hanc similitudinem a sensu communi, et servat in absentia rei. Unde imaginatio dicitur area formarum. Post hanc sequitur vis imaginativa, cujus actus est moveri ab una forma posita in imaginatione in aliam, et componere eas et dividere in chimacras et (ideas veras). Haec autem dicitur informativa quantum ad formationes quae fiunt in somniis. Haec etiam dicitur cogitativa in homine; per hanc enim et disponitur in posterum ex consideratione praesentium et praeteritorum. Post hanc sequitur aestimatio: hujus est apprehendere intentiones; et differt forma et intentio: quia forma cadit sub forma exteriori, qualia (sunt) sensibilia. Intentio dicitur res quae non cadit sub aliquo sensu, tamen innititur rebus sensibilibus, ut bonitas, malitia, amicitia, nocentia, honor, dedecus et similia. Per hanc iudicat ovis sibi lupum esse inimicum, et asinus leonem amicum, et aquam inimicam, quia reputant horridam imaginem suam. Cum tamen a leone occidatur, et per aquam salvetur. Post hanc sequitur memoria, quae habet se ad aestimationes sicut imaginatio ad sensum communem. Recipit enim intentionem ab aestimatione, et conservat eas. Unde dicitur thesaurus intentionum. Et sic secundum ista quinque sunt vires potentiae sensibilis: scilicet sensitiva, imaginativa, informativa, aestimativa et memorativa. Ut ergo congrua fiat innovatio in regeneratione, ibi erit sensitiva in brutali dispositione nihil communicans, spirituali in incorruptibilitate subsistens. 1 Cor. 15, 45: « Seminatur corpus animale, resur-



• get spirituale. • E contra vis ista modo communis est nobis et brutis. Eccle. 5, 19: « Nihil • habet homo jumento amplius. » Sap. 9, 15: « Corpus quod corrumpitur aggravat animam. » Gen. 8, 21: « Sensus et cogitatio humani cordis • in malum prona sunt ab adolescentia sua. » Ibi imaginativa rerum ad sensum molestia carens, euneta sibi praesentia cernens. Gregorius: quid est quod non judicant, qui videntem omnia vident? Unde dicit: Deum nunc nisi in creatura intelligimus. Ita et tunc creaturam non nisi in Creatore cognoscemus. Rom. 11, 56: « Ex ipso, per ipsum • et in ipso sunt omnia. » E contra vis imaginativa modo multas phantasias patitur Eccl. 54, 6: « Sicut parturientis cor tuum phantasias patitur, • nisi ab Altissimo missa fuerit visitatio. » Ibi informativa rerum fictione non errans, felici revelatione et somno quiescens. Prov. 5, 24: « Quiesces, • et suavis erit somnus tuus. » Psal. 4, 9: « In • pace, in idipsum dormiam et requiescam. » E contra modo informativa fictiones patitur, et maxime in somnis. Isa. 29, 8: « Sicut somniat esuriens • et comedit, cum autem fuerit expergefactus va- • eua erit anima ejus. » Job 4, 15: « In horrore • visionis nocturnae, cum sopor solet occupare • homines, pavor tenuit me ac tremor. » Ibi ejus aestimativa malorum opinione non terrens, felici jucunditate consistens. Nahum 1, 15: « Celebra • Juda festivitates tuas. » E contra modo patitur multos timores. Sap. 17, 10: « Semper praesumit • saeva perturbata conscientia. » Prov. 28, 1: « Fugit impius nemine consequente. » Ibi memorativa rerum praeteritarum oblivione non subsistens, quia nihil erit ibi praeteritum vel futurum, sed omnia praesentia erunt. Unde Angelus in Apoc. 9, juravit, quod tempus amplius non erit; omnia enim beneficia memoriter tenebit. Psal. 111, 7: « In memoria aeterna erit justus. » E contra modo est ad beneficia labilis. Thren. 77, 5 et 17, oblitus sum bonorum. Psalm. 11: « Oblitus sum • benefactorum ejus; » et ad injurias tenax. Quantum ad potentiam rationalem fiet innovatio quoad intellectum. Intellectus autem distinguitur triplex: intellectus agens, intellectus possibilis, et intellectus materialis, haec autem distinctio fit secundum agere, non secundum esse. Intellectus materialis considerat species in phantasmatis; itaque apprehendit species, et praeparat intellectui separabili. Intellectus agens est potentia, cujus actus est abstrahere species a phantasmatis, quas praeparavit ei intellectus materialis, et facere eas quodammodo resultare in intellectu possibili. Est autem comparatio intellectus agentis ad possibile, qualis est comparatio lucis ad visum. Lux enim facit resultare species coloris de ipso colorato in oculum. Intellectus possibilis est potentia habens aptitudinem, sicut tabula rasa nullam habens picturam, nec etiam magis aptitudinem ad unam quam ad aliam; quia quantum ad scientiam acquisitam ex principiis disserit. Intellectus adeptus habet etiam aliquas formas, quas non praeparat ei intellectus agens, sed anima acquirit eas per rectam operationem, ut sunt prophetiae. In regeneratione ergo innovabitur potentia rationalis, quia ibi erit intellectus materialis, virtute animi deiformis secundum receptionem imaginum sensibilium res cognoscens. Cant. 46, 6: « Donec aspiret dies, » scilicet aeternitatis, « et • inclinatur umbrae, » scilicet imaginabilis mor-

talitatis. Sicut enim Angelus non cognoscit sensibilia per receptionem imaginum, sic et homo glorificatus. Joan. 4, 42: « Jam non propter tuam loque- • lam credimus, sed quia ipsi vidimus. » Verbum est intellectum ad sensum. Ibi erit intellectus agens quietus, et sine collatione et deliberatione dijudicans, sicut et intellectus Angelicus. E contra modo confert utramque partem, ut eligat quod verius et melius sit. Gen. 25, 22: « Collidebantur in utero • ejus parvuli; » idest motus ad utramque partem. Job 20, 2: « Idecirco cogitationes meae variae suc- • cedunt sibi. » Ibi erit intellectus possibilis aptitudinem habens ad omnia sicut tabula rasa, qui etiam propter omnium scientiam acquisitam et infusam dicitur intellectus adeptus et illuminatus. Isa. 58, 11: « Implebit splendoribus animam tuam. » Psal. 55, 10: « In lumine tuo videbitus lumen. » Quantum ad alias potentias erit ibi liberum arbitrium sine coactione. Job 17, 5: « Pone me Do- • mine, juxta te, et cujusvis manus etc. » Erit ibi voluntas sine contrarietate. Psal. 126, 5: « Beatus • vir qui implevit desiderium suum ex ipsis. » Erit ibi synderesis sine murmuratione. Job 8, 6: « Pacatum reddet habitaculum tuum. » E contra in damnatis murmurabit et reclamabit. Isa. ult., 24: « Vermis eorum non morietur, » idest remorsus conscientiae. Sap. 5, 5: « Dicentes intra se, • poenitentiam agentes. . . » ibid. 8, « quid profuit • nobis superbia, aut quid divitiarum jactantia • contulit nobis? » Hoc etiam patet in divite qui erat in inferno, cui remurmurabat synderesis de culpa. Gregorius: « Servatur diviti ad poenam cogni- • tio pauperis, quem despexit, et memoria fratrum, • quos reliquit, ut de visa gloria desperet, et de poena • inutiliter amatorum amplius torqueatur. » Habent ergo displicentiam mali in collatione ad poenam. Erit etiam ibi concupiscibilis sine fomitis molestia. Job 5, 18: « Vocem exactoris non audivit, » idest fomitis. Isa. 62, 5: « Habitat juvenis cum virgine. » Ad litteram enim non sentient motus concupiscentiae. Erit etiam ibi irascibilis sine turbatione, sicut et de Deo dicitur, « irascaris et tranquillus es; » sicut ait Augustinus in libro Confessionum. Psal. 4, 5: « Irascimini et nolite peccare. » Ibi erit rationalis sine errore. Isa. 55, 8: « Haec erit vobis directa • via, ita ut stulti non errent per eam; » quia ille Deus concupiscibili fruitio bonitatis, rationali aspectus veritatis, irascibili protectio potestatis. Haec tria notantur Isa. 52, 18: « Sedebit populus meus • in pulchritudine pacis, » quantum ad aspectum veritatis, « in requie opulenta » quantum ad fruitionem bonitatis, « in tabernaculis fiduciae, » quantum ad protectionem potestatis.

Post innovationem animae et potentiarum ejus, sequitur de innovatione corporum, et partium eorum. Ubi notatur, quod fiet innovatio corporum tripliciter: scilicet in his quae sunt ad ejus esse, in his quae sunt ad bene esse, et in his quae sunt ad ejus decorem. Quantum ad ejus esse fiet innovatio ejus in principiis ex quibus constat: videlicet elementis, humoribus, membris, ossibus et hujusmodi. Quantum ad bene esse fiet innovatio in quinque sensibus, qui ipsum informant; videlicet in auditu, visu, gustu, odoratu et tactu. Quantum ad decorem fiet innovatio in extremitatibus et accidentibus ex quibus ornatur, scilicet capillis, ungulis, cicatricibus et hujusmodi. Fiet ergo innovatio quantum ad esse; primo quia resurget corpus

ex iisdem elementis quantum ad substantiam et harmoniam, et radicem elementorum, elementari qualitate, contrarietate et corruptibilitate exclusis. Augustinus loquens de elementis, « omnia, inquit, sic  
 • redibunt, ut servata integritate substantiae, defor-  
 • mitas pereat. » Actus tamen, vel proprietates elemen-  
 • torum quae nostris corporibus corruptibilibus con-  
 • gruebant, omnino cessabunt: et B. (1) dicit, quod  
 quatuor dotes erunt in quatuor elementis. Secundo  
 resurget ex eisdem humoribus in quantum pertinet  
 humor ad integritatem et stabilimentum et vitam  
 corporis, digestionem tamen et corruptibilitatem et  
 multiplicationem spiritus vitalis ad fomentum vitae,  
 exclusis; quod patet per hoc quod simpliciter dici-  
 tur, Ezech. 37, 5: « Immittam in vos spiritum et  
 • vivetis, » supple sine actibus et fomite et hu-  
 • jusmodi. Augustinus: « Puto facile intelligi in corpo-  
 • ris cognitione dignitatem necessitati fuisse copula-  
 • tam: transitura quippe est necessitas, tempusque ven-  
 • turum, cum invicem sola pulchritudine sine ulla li-  
 • • bidine perfruemur. » Et infra, loquens de humoribus  
 et huiusmodi « permanebunt haec, inquit, ad actum  
 • decoris et dignitatis, non ad actum necessitatis. » Ter-  
 tio resurget in eisdem membris quantum ad organationem,  
 harmoniam et congruentiam, deformitatem tamen  
 et diminutionem et superfluitatem exclusis. Augu-  
 stinus: « Si quid minus est quam deest Creatorem,  
 • novit: unde supplebit, et si quid plus est quam  
 • decet manere, servata integritate, subtrahetur. » Item  
 Augustinus: « Omnes harmoniae corporis per cuncta  
 • dispositi interius exteriusque patebunt, ut subjecta  
 • sint nobilia membra nobilioribus. » Item Augusti-  
 nus: « Quidquid fuit vel futurum fuerat secundum  
 • conditionem naturae bene institutae de integritate  
 • substantiae, servata membrorum congruentia, redi-  
 • bit: vitia quippe detrahentur, et servabitur natura. »  
 Ezech. 37, 4: « Ossa arida, audite verbum Domini:  
 • ecce ego immittam in vos spiritum et vivetis,  
 • et dabo super vos nervos, et succrescere faciam  
 • super vos carnes, et superextendam in vobis  
 • cutem, et dabo vobis spiritum et vivetis. »

Quantum ad bene esse corporis fiet innovatio  
 in quinque sensibus. Et primo in visu, qui revera  
 innovabitur, quia videbimus sine obstaculo. Vide-  
 bimus enim mentes et corda aliorum, et harmo-  
 niam corporis, et dispositionem membrorum inter-  
 iorem. Commentatio super Hierarchiam: « postquam  
 • Jesus reformaverit corpus humilitatis nostrae con-  
 • figuratum corpori claritatis suae in illa beata im-  
 • mortalitate justorum corda sibi invicem erunt ful-  
 • gentia, et puritate translucuntia; ibi uniuscujusque  
 • mentem ab alterius oculis membrorum corpulentia  
 • non abscondet, sed patebit animus corporalibus o-  
 • culis. Ipsa etiam corporalis harmonia uniuscujusque  
 • erit conspicibilis alteri, sicut nunc non potest esse  
 • conspicibilis sibi. » Item quia videbimus si volue-  
 rimus etiam oculis clausis; videbimus enim Anto-  
 nium si esset oriente, et nos in occidente; quia  
 videbimus rem de longe, sicut de prope. Isa. 60,  
 5: « Videbis et affluēs; et mirabitur et dilatabitur  
 • cor tuum. » Isa. 64, 4: « Oculus non vidit,  
 • Deus, absque te quae praeparasti diligentibus te. »  
 Delectabitur autem visus in tribus. Primo et prin-  
 cipaliter in splendore corporis Christi. Apoc. 21,  
 25: « Civitas illa non eget sole neque luna ut lu-  
 • ceant in ea: namque claritas Dei illuminabit eam. »

(1) Forte Beda.

Ad litteram: non egebunt ibi sancti nec sole nec  
 luna, sicut faciunt in praesenti vita; quia Deus eos  
 plenissime illuminabit, non solum in mente, sed  
 quoad corpora. Unde Apoc. 21, 25: « Lucerna ejus  
 • erit agnus, » id est Christi humanitas continens  
 divinitatem. Erit lumen omnium etiam quoad cor-  
 porum illuminationem. Psal. 88, 16: « Domine, in  
 • lumine vultus tui ambulabunt. » Et alibi, Psal.  
 35, 10, « in lumine tuo videbimus lumen. » Isa.  
 55, 17: « Regem in decore suo videbunt; » et  
 infra Apoc. 22, 5, « et nox non erit amplius illuc. »  
 Secundo in fulgore corporum glorificatorum. Matth.  
 13, 43: « Fulgebunt justi sicut sol. » Tertio in  
 pulchritudine et varietate et irradiatione caelestis  
 Jerusalem, et omnium creaturarum. Apoc. 21, 18:  
 « Ipsa vero civitas similis auro mundo, » quod est  
 transparentis.

Secundo fiet innovatio in auditu, qui revera  
 innovabitur, quia audiet sine reverberatione aëris,  
 sine turbatione tympanorum, qui sunt in auribus,  
 et sine obturatione, et sine obstaculo, quae omnia  
 in auribus concurrunt. Delectabitur autem auditus  
 in triplici melodia. Primo in laudibus sanctorum.  
 Apoc. 19, 1: « Post haec audivi vocem dicentium  
 • alleluja, laus et gloria et virtus Deo nostro. »  
 Alleluja est quaedam laus, quae humanis verbis  
 explicari non potest, ut dicit Glossa, « et est ver-  
 • bum graecum, ut dicit Beda (1), quod idem est quod  
 • laus; interpretatur enim laudate, Dominum. » Sed  
 quare ponitur ibi laus, cum idem sit alleluja quod  
 laus? Solutio: ad significandum quod duplex lin-  
 gua, graeca videlicet et latina, Dominum laudare  
 debet, tacente tertia, scilicet hebraea. Dicitur  
 autem laus pro operibus Creatoris, et gloria, pro  
 operibus Redemptoris. Luc. 2, 14: « Gloria in al-  
 • tissimis Deo. » Et virtus in iudicio: quia tunc  
 videbunt filium hominis in maiestate sua etc. Isa.  
 51, 5: « Gaudium et laetitia invenientur in ea,  
 • gratiarum actio et vox laudis. » Secundo in con-  
 sonantiis firmamenti et orbium, id est septem pla-  
 netarum. Est namque in planetis dulcis harmonia,  
 cuius sonus ad nostras aures ideo non pervenit,  
 quia super aërem fit; et ejus magnitudo nostrum  
 augustum auditum excedit. Nullus enim sonus a  
 nobis percipitur nisi qui in hoc aëre fit. Unde no-  
 tatur quod a terra usque ad firmamentum caelestis  
 musica mensuratur, et septem toni reperiuntur se-  
 cundum philosophos. A Terra enim usque ad Lunam  
 est tonus; a Luna usque ad Mercurium semitonus;  
 a Mercurio usque ad Venerem semitonus: inde tunc  
 usque ad Solem tres semitoni. A Sole usque ad  
 Martem tonus, a Marte usque ad Jovem semitonus;  
 a Jove usque ad Saturnum semitonus; inde usque ad  
 Signiferum tres semitoni: quae simul juncta, septem  
 tonos efficiunt. Philosophi enim novem musas fin-  
 xerunt, quae a terra usque ad caelum novem con-  
 sonantias deprehenderunt, quas homini naturaliter  
 inditas invenerunt. Has autem consonantias distin-  
 xerunt secundum quantitatem distantiae. A Terra  
 enim usque ad Lunam sunt XV. millia CLXXXV.  
 milliarum; a Luna usque ad Mercurium VII. millia  
 CCCXII. milliarum et semisse; a Mercurio usque ad  
 Venerem VII. millia CCCXII. milliarum et semisse.  
 A Venere usque ad Solem XXIII. millia CCCXXXVI.  
 milliarum; a Sole usque ad Martem XV. millia DCCCX.

(1) Neque alleluja vox Graeca est, neque id unquam a Beda assertum est. Vide Admonitionem huic volumini prae-  
 fixam.

milliaria; a Marte usque ad Saturnum XV. millia DCCCX. milliaria; a Saturno usque ad firmamentum XXII. millia CCCCXXXVI. milliaria. Sunt itaque a terra usque ad caelum milliaria centum millia, et novem millia et CCCLXXV. milliaria, secundum quod habetur in mappa mundi. Haec autem non sunt praedicanda sed scienda. De hac melodia loquitur Job 38, 57: « Concentum caeli quis dormire faciet? » Psalm. 148, 4: « Laudate Dominum caeli caelorum. » Secundo delectabitur in concordantia et harmonia quatuor elementorum. Sap. ult. 17: « In se enim elementa dum convertuntur, sicut in organo aequalitatis sonus immutatur, et omnia suum sonum custodiunt. »

Tertio fiet innovatio in odoratu, qui revera immutabitur et innovabitur quia delectabitur in omnibus odoriferis; et hoc tripliciter. Primo sine cerebri resolutione. E contra modo non potest sentiri odoratus, nisi fiat aliqua resolutio in cerebro. Secundo sine terrestri fumositatem. Odor enim rei est quidam vapor terrestris ab ea progrediens: unde nisi teneatur clausa evaporat, et perdit odorem. Tertio sine putrefactione rei odoratae. E contra modo per multam odorationem et applicationem putrescit pomum, quia fit attractio odoris. Delectabitur autem odoratus primo et principaliter in odore corporis Christi Cant. 1, 5: « Curremus in odorem unguentorum tuorum. » Secundo in odore Virginis Matris eius, Eccl. 24, 20: « Quasi myrrha electa dedi suavitatem odoris. » Cant. 5, 6: « Quae est ista quae ascendit (per desertum) sicut virgula fumi ex aromatibus (mirrhae) etc. » Tertio in omnium sanctorum et odorum et rerum fragrantia, quibus disponetur curia caelestis sponsi. Apoc. 8, 4: « data sunt ei incensa multa; » et Apoc. 5, 8, « habentes singuli cytharas et phialas aureas plenas odoramentorum etc. »

Quarto fiet innovatio in gustu, qui revera innovabitur, quia fiet sine esurie et fastidio, sine digestionem et amaritudine. Delectabitur autem gustus si voluerit, quia cibus erit invisibilis et incorruptibilis. Tob. 12, 19, dicit Angelus: « Ego cibo et potu invisibili utor, qui ab hominibus, » supple mortalibus, « videri non potest. » Erit enim cibus multiplicabilis, quia sapientia in ore eujuscumque sicut appetitus. Sap. 16, 20: « Paratum panem de caelo praestitisti illis omne delectamentum in se habentem, et omnis saporis suavitatem. » Erit enim animabus infastidibilis. Eccl. 24, 29: « Qui edunt me adhuc esurient. » Isai. 65, 15: « Servi mei comedent et vos esurietis. » Haec non sunt referenda ad cibum carnalem, sed ad cibum qui decens erit corpori glorificato in vita aeterna. Non enim detrahetur corpori potestas comedendi, sed necessitas, sicut dicit Augustinus: nam et Angelus comedit missus ad Tobiam; et Christus post resurrectionem; unde ponit ipse exemplum, dicens, quod aliter absorbet aquam radius solis, et aliter terra sitiens.

Quinto fiet innovatio in tactu, qui revera innovabitur. Fiet enim absque asperitate et difficultate et obstaculo. Poterit enim homo si voluerit manu penetrare murum, sicut penetrat aerem solis radius, sicut patet in corpore Christi glorificato, qui resurrexit clauso sepulchro, et intravit ad discipulos januis clausis, ut habetur Joan. 20. Delectabitur autem ipse tactus primo quia (poterimus) tangere ipsum Christum, si voluerimus. Et si magnum fuit tangere hic fimbriam, majus erit tangere ipsum

regnantem. De hoc tactu loquitur beata Agnes dicens: quem cum tetigero munda sum. Poterimus etiam, si voluerimus, osculari ei manus et pedes. Cant. 8, 1: « Quis det te fratrem meum, ut deosculer te, et jam me nemo despiciat? » Notatur autem quod omnes hi quinque sensus manebunt in patria secundum actus qui congrui erunt et decentes vitae beatae. Erunt etiam ibi quinque sensus interiores et spirituales, de quibus Augustinus: cum amo Deum meum, amo lucem, vocem, odorem, cibum et amplexum interioris hominis. Ibi fulget quod non capit locus; ibi sonat quod non potest corpus; ibi redolet quod non spargit flatus; ibi satiat quod non diminuit edacitas; ibi haeret quod non divellit satietas.

Quantum ad ea quae sunt ad decorem corporis, fiet innovatio in tribus; scilicet in coloribus, et in cicatricibus, et in extremitatibus, ut sunt capilli et ungues: in coloribus, quia corpus non habebit aliquem turpem colorem quem modo habet, sed totum clarum et lucidum erit. Et volunt quidam dicere, quod omnia corpora erunt ejusdem coloris secundum majus et minus. (Sed hoc videtur falsum, quia dicitur) 1 Cor. 15, 41: « Alia claritas solis, et alia claritas lunae; sic et resurrectio mortuorum. » In cicatricibus, quae modo videntur esse ad indecentiam, tunc erunt ad decorum in martyribus. Unde Augustinus: decebit in illo novo saeculo ut indicia gloriosorum vulnerum in illa immortali carne cernantur, quamvis omnia quae tunc apparebunt vitia non erunt reputanda, sed virtutis insignia, sicut dicit Apostolus, quod resurget in virtute. Ipse etiam Dominus retinuit cicatrices quas ostendet in iudicio. Zach. 13, 6: « Quid sunt plagae istae in medio manuum tuarum? et dicit: « his plagatus sum in domo eorum, qui diligebant me, » id est, qui videbantur, vel qui debebant me diligere. In extremitatibus, quia de capillis remanebit numerus, non longitudo; similiter de unguibus. Matth. 10, 50: « Capilli capitis vestri omnes numerati sunt. » Augustinus: « Quod dictum est, capillus de capite vestro non peribit, » multo aptius de numero quam de longitudine dictum intelligitur. Utrum autem capilli ad capillos, ungues ad ungues redeant, an quicumque eorum qui prius erat in carne, et inter alias partes corporis, revocentur, curabit artificis providentia. ne quid fiat indecens vel inveniatur in illa beata gloria. Isai. 49, 18: « Vivo ego, dicit Dominus, quia omnibus his velut ornamento vestieris, et circumdabis tibi eos quasi sponsam. » Notatur autem, quod corpora resurgent in tali statura et magnitudine, qualem habuerunt vel habitura erant secundum naturam bene institutam. Augustinus: « In resurrectione carnis easdem habebit mensuras corporum magnitudo, quas habebit perfectae vel perficiendae ejusquam indita corpori ratio juventutis. » Unde puer qui statim post ortum moritur, in illa statura resurget quam habiturus esset si viveret usque ad aetatem triginta annorum, nullo naturae vitio impeditus. Huic concordat istud verbum Job 5, 19: « Parvus et magnus ibi sunt. » De aetate autem notatur, quod omnes resurgemus in aetatem triginta annorum. Ephes. 4, 13: « Donec occurramus omnes in unitatem fidei... in virum perfectum, in mensuram aetatis plenitudinis Christi. » Ubi dicit Glossa: « Illis verbis non eadem resurgentibus assignatur statura, sed aetas. » Non autem fas est dicere, quod in



resurrectione accedat corpori magnitudo quam nec habuit nec unquam fuerat habiturum: cum nec majora corpora redigenda sint ad modum dominici corporis. Item Glossa Augustini: « in mensuram aetatis et plenitudinis Christi, » idest ad quam usque pervenit Christus, hoc est circa annos triginta. Non enim fas est dicere quod in communi resurrectione vel corpori Christi sit accessura magnitudo quam non habuit, quum et ante passionem discipulis notus erat, et suscitatus apparuerit, qua scilicet tunc longissimis hominibus fiat aequalis, vel ad modum dominici corporis majora ceterorum corpora detractone aliquarum partium redigenda, qualiter deperiret de corporibus plurimum; cum ipse Christus nec capillum periturum esse promisit. Restat ergo ut quisque suam recipiat mensuram, quam vel habuit in juventute, etsi senex mortuus est, vel fuerat habiturus si est ante defunctus. Nihil enim quolibet modo detractum de humano corpore periturum est; et si quid in praesenti aliqua enormitate abundavit, per totum spargetur. Similiter si quid minus fuit, addetur. Si quis contendat in ea quemquam statura corporis resurrecturum esse in qua defunctus est, non procaciter seu pugnanter resistendum est; tamen absit omnis deformitas.

Circa innovationem mundi exterioris nota duo: scilicet innovationem supernorum et infernorum. In superioribus innovabitur primo firmamentum Et hoc tripliciter. Primo, quia quadam resurrectionis virtute clarebit. Isai. 51, 6: « Caeli sicut fumus liquecent; » Glossa: « caeli novi et terra nova quasi quadam resurrectionis virtute glorificata clarebunt. » Secundo quia non movebitur ulterius, sed consistet invertibile et immobile. Isai. ultimo 22: « Sicut caeli novi et terra quae ego stare facio coram me; » Glossa: « stare immobilia. » Tertio quia erit lucidum et perspicuum et transparens, Dan. 12, 2: « Sicut splendor firmamenti. » Secundo innovabitur sol, et hoc tripliciter: primo quia lucebit septemplex sicut lux septem dierum, idest sicut lux ante peccatum; quia per peccatum deteriorata sunt omnia. Isai. 50, 26: « Lux solis erit septemplex sicut sol septem dierum, » quia septuplum lucebit plusquam splenduerit ante peccatum, sicut dicit Glossa. Secundo quia stabit immobilis in ordine in quo creatus est. Habac. 3, 17: « Sol et luna steterunt in habitaculo suo. » Ponit autem praeteritum certitudine prophetali, quasi diceret: ita certi sitis quod erit, quasi jam fuisset. Tertio quia non veniet ad occasum, nec unquam patietur eclypsim: propter hoc dicitur totum tempus futurum una dies, Zach. ultim. 7: « Erit dies una, quae nota est Domino; non dies neque nox: » una, idest uniformis, quasi tanta erit, ut solus Deus eam comprehendere possit. Et de ista die potest intelligi, quod dicitur Matth. 24, 36: « de die illa nemo scit, neque Angeli caelorum, nisi Pater solus. » Quia non erit dies neque nox, quia non erit necessitudo a die in noctem, neque e converso. Illuminatur etiam luce mirabili. Isai. 60, 19: « Non erit tibi amplius sol ad lucendum per diem, neque splendor lunae illuminabit te, sed erit (tibi) Dominus in lucem sempiternam. »

Tertio innovabitur luna, et hoc tripliciter. Primo quia habebit lumen a se, non a sole ut nunc. Psalm. 88, 58: « Et luna perfecta in aeternum. » Secundo quia habebit tantam lucem quantam habuit sol ante peccatum. Isai. 50, 26: « Erit lux

« lunae sicut lux solis. » Tertio quia non minuetur, nec decrescet, nec patietur eclypsim. Isai. 60, 20: « Non occidet ultra sol tuus, et luna tua non minuetur. » Sed contra istud est illud Isai. 60, 19: « Non erit tibi amplius sol ad lucendum. » Sed Glossa solvit, quia his verbis non negat solem lucere, sed iis qui in aeterna beatitudine sunt, lucem non praebere, significat. Ex his, quae diximus patet quod post iudicium non erit tempus, quia firmamentum non movebitur, cujus motus est causa temporis; et tempus est mensura motus. Unde Apoc. 10, 5: « Angelus levavit manum suam ad caelum, et iuravit per viventem in saecula saeculorum, qui creavit caelum et terram; quia amplius non erit tempus, » idest mutabilitas vitae. Sed contra ponitur: « et erit tempus eorum in saecula. » Solutio: tempus prout mensura motus primi mobilis non erit, quia sol et luna stabunt, sicut dicit Habacuc 3, 17: « In habitaculo suo, » idest in loco in quo creata fuerunt in principio. Sed notatur quod tempus est mensura motus rerum mutabilium; sic erit tempus, et hoc solum quantum ad malos; unde verbum praemissum proprie intelligitur de malis. Item non erit generatio et corruptio quarum causa est motus caeli; quia cessante causa, cessabit effectus: et ideo cessante motu, cessabit generatio et corruptio. Item non erit necessitudo temporis, ut dies et nox, hyems et aestas. Basilius: in inferioribus innovabuntur quatuor elementa. Et primo ignis, qui, sicut dicit Basilius, interciderit ut alius, luceat, et alios urat. Quod est intelligendum quantum ad usum ignis, non quantum ad substantiam. Voluerunt etiam quidam dicere quod luciditas et caliditas non sunt substantialia ignis. Potest etiam dici, quod caliditas accidentaliter destruetur, sed potentialiter remanebit. Sed per quid innovabitur ignis, cum plus non ascendat ille maximus ignis quam ascenderit aqua diluvii, et illa non ascenderit usque ad ignem qui est elementum, quia usque ad illum non ascenderunt opera hominum? Potest dici quod forte ille ignis qui est elementum, se ipsum purgabit et innovabit. Ignis enim virtutem habet purgativam. Secundo innovabitur aer. Et hoc tripliciter. Primo quia erit sine turbine, tonitruis, et pluviis. (Isai. 5: ) « Mandabo caelis ut non pluant imbrem super terram. » Secundo quia in illa alteratione quae fiet per ignem non communicabit aer et ignis et caelum et aqua, ut omnia ista dicantur caelum. Unde Apoc. 21, 1, sumitur caelum pro tribus elementis, cum dicitur: « Vidi caelum novum et terram novam », idest innovatam. Haec autem innovatio fiet per illum maximum ignem qui praecedet faciem iudicis, secundum quod dicit Glossa super 2 Petr. 3, 10: « Elementa quatuor quibus mundus consistit magno calore solventur, » et ille maximus ignis exuret. Quis sit autem ille maximus ignis dicit Augustinus 20 de civ. Dei, c. 16. quod ille ignis conflagratio mundanorum ignium, idest mundani ignes conflagrati, idest simul ardentis; sicut diluvium fuit inundatio mundanarum aquarum. Omnes enim materiae ignibiles tunc incenduntur et comburentur. Ex hoc videtur quod aqua omnino peribit: quia cum aqua non sit combustibilis, sed potius per ignem evaporabilis, videtur quod tum non erit. Praeterea Augustinus, 20 de civ. Dei, cap. 16: « Caelum quippe novum et terram novam futuram legimus 2 Petr. 3, 13: « Caelos novos et terram novam secundum pro-

« missa expectamus in quibus justitia habitat. De  
 « mari autem novi aliquid me unquam legisse non  
 « recolo ». Item hoc idem videtur de igne, quia  
 subtractis et consumptis membris ignibilibus defi-  
 ciet ignis, secundum illud, « subtraha ligna foco  
 « protinus ignis abest. » Sed hoc fiet in illa con-  
 flagratione ignium, quia aliter semper duraret ille  
 ignis, nisi consumeretur materia ignibilis. Sic ergo  
 videtur, quod duo elementa, scilicet ignis et aqua,  
 omnino consumerentur. Et hoc videtur expresse di-  
 cere Glossa super illud 2 Petr. 3, quae talis est:  
 « Nec cuncta intantum consumet ille maximus ignis,  
 « ut non sint; sed duo in totum consumet, duo vero  
 « in meliorem restituet faciem. » Solutio: Omnia ele-  
 menta innovabuntur, et manebunt innovata in sub-  
 stantia sua, et praeteribit et deficiet eorum figura;  
 qualitates etiam eorum manebunt in quantum sunt,  
 et non in quantum sunt agentes vel patientes. Hoc  
 enim, scilicet agere eorum et pati, competit homi-  
 nibus existentibus in statu vitae hujus mortalis,  
 quamdiu indigent elementis et qualitatibus suis.  
 Sed tunc non indigebunt eis. Et hoc est quod di-  
 cit Augustinus, 20 de civ. Dei, cap. 16 « elemen-  
 « torum corruptibilium qualitates, quae corporibus  
 « nostris corruptibilibus congruebant, ardendo peni-  
 « tus interibunt. » Atque illa substantia eas qualitates  
 habeat, quae corporibus immortalibus mirabili mu-  
 tatione conveniant, ut mundus in melius innovatus  
 apte accommodetur hominibus in carne in melius  
 innovatis. Apoc. 21, 1: « Primum caelum et pri-  
 « ma terra abiit, » scilicet a priori statu, quia jam  
 ille necessarius non erit. Sed quia nihil dicit de  
 igne, potest dici quod ignis minus habet corruptio-  
 nis quam cetera elementa. Tertio innovabitur, quia  
 carebit qualitatibus corruptibilibus, scilicet calidita-  
 te et humiditate, ut dictum est: remanebunt tamen  
 radices qualitatum, scilicet calidi et frigidi.

Tertio innovabitur aqua, et hoc tripliciter. Pri-  
 mo quia aqua non erit fluxibilis; et quia ista est  
 principalis proprietates aquae, propterea dicitur Apoc.  
 21, 1: « Et mare jam non est. » Quod verum est  
 secundum priorem statum, quia amaritudo aquae  
 et grossitudo auferetur, et remanebit in primo statu  
 suo, meliorato tamen et innovato. Sed per quid  
 purgabitur aqua, cum ipsa non sit ignibilis, sed potius  
 evaporabilis per ignem? dicit Glossa hoc « et ma-  
 « re etc. » quod est dubium, dicens: « immutatio aeris  
 « et terrae dubitabilis non est quin per ignem fiat.  
 « Sed de aqua dubitatur. Nam purgationem in seipsa  
 « habere creditur. » De hac innovatione loquens 2  
 Petr. c. 5, dicit « elementa calores solventur: » per quod  
 videtur, quod omnia per ignem debeant innovari,  
 et aqua et alia. Voluerunt autem quidam dicere,  
 quod non solum carebit qualitatibus, sed etiam  
 radicibus qualitatum suarum, quae nobis frequen-  
 tius servantur. Et ignis similiter; unde nobilius re-  
 numerabuntur. Secundo quia carebit potestate ex-  
 tinguentis. Sap. ult. 19: « Aqua extinguentis naturae  
 « obliviscetur. » Tertio quia carebit corruptione  
 et potentia corrumpendi, quia corruptio est ab hu-  
 miditate. Unde Augustinus tripliciter exponit illud  
 Apoc. 21, 1: « Et mare jam non est. » Primo, ut  
 per mare intelligatur corruptio elementorum. Se-  
 cundo, ut per mare intelligatur cor impii, juxta illud  
 Isaiae « cor impii quasi mare fervens, quod quie-  
 « scere non potest. » Tertio potest exponi secundum  
 illam Glossam superius alligatam super illud 2  
 Petr. 3 « elementa quibus mundus hic constat etc. »

quod quidam exponunt de aere et aqua, quae ex  
 toto dicuntur consumi, quoad usum illarum quali-  
 tatum; scilicet caliditatis et humiditatis: aqua enim  
 non habebit potestatem extinguendi vel fluendi  
 quoad bonos, neque ignis comburendi.

Quarto innovabitur terra, et hoc tripliciter: pri-  
 mo quia non erit obscura sed lucida; secundo quia  
 usum germinandi ( amittet ) nec erunt in ea vege-  
 tabilia. Eccles. 1, 4: « Generatio praeterit, terra  
 « autem in aeternum stat; » tertio, quia erit tota  
 plana et apta ad habitandum. Isai. 40, 4: « Omnis  
 « mons et collis humiliabitur, et erunt prava in  
 « directa, et aspera etc. »

Hanc innovationem expectant naturaliter omnes  
 creaturae. Rom. 8, 19: « Expectatio creaturae re-  
 « velationem filiorum Dei expectat; » quia sicut  
 ibidem subditur: « ipsa creatura liberabitur a ser-  
 « vitute corruptionis. » Et subdit idem Apostolus:  
 « Omnis creatura ingemiscit et parturit usque ad-  
 « huc. » Omnis creatura vocatur ab Apostolo rerum  
 visibilium et materialium collectio, quae libe-  
 ratur a mutabilitate, cum filii Dei glorificabuntur.  
 Qui autem calor in tantum possit intendi, ut fa-  
 ciat istam rarefactionem et innovationem in ele-  
 mentis usque ad summum, potest patere per triplex  
 experimentum, licet dicatur, quod ignis sit calidus  
 in termino. Primo per experimentum speculi, quia  
 lux cadens in speculum concavum quemvis panem  
 et lignum comburet per congregationem radiorum,  
 quia lux multiplicata facit ardorem, et sic aug-  
 mentando lucem per speculi qualitatem augmen-  
 tatum, potest fieri disgregatio usque ad summum.  
 Potest enim lux sic semper augmentari; et sic  
 rarefactio fiet per ignem verum, cum sit a luce,  
 quae nobilior est igne elemento. Secundum expe-  
 rimentum est per corpus sphaericum vitreum ple-  
 num aqua clara. Si quis ponat ampullam vitream  
 plenam aqua ad solem, congregantur radii, et in-  
 cendant, in tantum quod fit rei appositae combu-  
 stio, si debito modo apponatur. Tertium experi-  
 mentum est per opus artificis; quia si artifex ap-  
 poneret corpus subtilizandum in vase solido et  
 forti, quod esset undique bene obturatum et com-  
 pactum; et tunc poneretur vas tale cum contento  
 in igne forti, subtilizatur corpus illud multum. Et  
 dicitur quod intantum posset comburi, quod fieret  
 quinta essentia; non tamen majorem locum occu-  
 paret; et tunc in illa rarefactione esset itaque il-  
 lud quod grossius est in fundo vasis; quod autem  
 erit subtilius erit superius. Et talis erit rarefactio  
 elementorum. Grossum enim separabitur a subtili,  
 et descendet ad imum vasis, id est ad imum infer-  
 ni. Talis autem depuratio non potest esse in cor-  
 poribus damnatorum, quia in eis nihil est de puro;  
 et ideo non poterit separari purum ab impuro, licet  
 ignis ille sit fortissimus. Potest etiam esse experi-  
 mentum de hoc quod lux possit augeri et ignis,  
 quia per conjunctionem unius stellae cum alia ut  
 Martis cum Sole fit combustio. Et si hoc possunt  
 duae stellae, quid si omnes conjungerentur? Item  
 posset esse experimentum per magnam nubem  
 sphaericam et concavam, in qua fit reflexio radio-  
 rum et magna combustio.

Purgatis ergo et renovatis omnibus elementis,  
 et purgatis et renovatis omnibus, Apoc. 14, 19:  
 « Misit Angelus falcem suam in terram, et vinde-  
 « miavit vineam terrae; » id est omnes qui finaliter  
 posuerunt delectationes suas in bonis terrenis. Luc.

6, 24: « Vae vobis divitibus qui habetis hic consolationem vestram. » Apoc. 14, 19 et 20: « Et misit in lacum irae Dei, et calcatus est lacus extra civitatem. » Et pro vino « exivit sanguis. » « In lacum irae Dei, » idest in infernum, in lacum miseriae, et in lutum faecis. Sicut enim materialiter in adventu alicujus magni regis plateae civitatis mundantur, et faeces et immunditiae in lacum vel in aquam mittuntur; sic in adventu Domini mundus purgabitur de malis, et ipsi in lacum inferni projicientur. Psal. 17, 45: « Ut lutum platearum delebo eos. Et calcatus est lacus extra civitatem, » idest puniti sunt damnati extra consortium beatorum. Et notatur quod habet Dominus nunc duplex torcular; purgatorii scilicet, et inferni. De primo emittitur purum vinum, et hoc non est extra civitatem, idest extra consortium honorum, quia meritis et suffragiis Ecclesiae vinum istud citius depuratur. Psal. 118, 63: « Particeps ego sum omnium timentium te. » Sed aliud est infernus, et est extra civitatem, quia nunquam inde exhibent, sed in pressura et tristitia perpetua remanebunt, et ibidem calcabuntur; et pro vino « exivit sanguis, » idest crudelitas poenae infernalis exuberavit « de lacu, » idest de inferno, a minoribus scilicet « usque ad frenos, » idest usque ad majores praelatos, scilicet reges et episcopos. Omnes enim sine misericordia ibi punientur secundum merita culparum. Sed majores amplius et vilius conculcabuntur quam minores. Sap. 6, 6: « Judicium durissimum in his qui praesunt fiet. » Durum fiet minoribus, qui non praesunt; durius illis qui praesunt et infraenant homines, quia cum ipsis hominibus cruciabuntur. Matth. 23, 41: « Ite maledicti in ignem aeternum, qui paratus est diabolo et angelis ejus. » Sic erunt in moerore et luctu et tristitia in aeternum, sine spe alicujus consolationis seu solatii. Isa. 24, 7 et 8: « Ingemuerunt omnes qui laetabantur corde; cessavit gaudium tympanorum, quievit sonitus lactantium, conticuit dulcedo cytharae. Cum gaudio non bibent vinum. Amara erit potio bibentibus illam. » Dabitur justa tribulatio illis quibus peccatum est dulce, et illud abscondunt et celant; qui in fine amaritudine et dolore implebuntur. Job 20, 12: « Cum dulce fuerit in ore ejus malum, abscondet illud sub lingua sua: » et postea sequitur: « panis ejus, » idest dulcedo peccati « in utero illius vertetur in fel aspidum. Divitias quas devoravit, evomet, et de ventre ejus extrahet eas Deus. Vadent et venient super eum horribiles, omnes tenebrae in occultis ejus; devorabit eum ignis. Luct quae fecit omnia, nec tamen consumetur. » Psal. 48, 15: « Mors depascet eos. » Quibus autem generibus hominum poena perpetua debeatur, expresse dicitur Apoc. 21, 8: « Timidis autem et incredulis et execratis et homicidis et fornicatoribus et veneficis et idolatris et omnibus mendacibus; pars eorum erit in stagno ardenti, igne et sulphure, quod est mors secunda. » Ubi notandum est quod evangelista ponit octo genera hominum non desiderantium nec laborantium venire ad istam innovationem superius positam, et ad gloriam beatorum, sed magis peccantium contra octo beatitudines quae ponuntur a Domino Matth. 5: « Beati pauperes spiritu etc. » Et consequenter eorum poenam subjungit. Dicit ergo timidus, idest his qui propter malum vel humanum, seu munda-

num fidem non recipiunt, quod est contra illud, « Beati pauperes etc. » Contra quos dicitur 1 Joan. 4, 18: « Perfecta charitas foras emittit timorem. » Matth. 10, 28: « Eum timete, qui potest animam et corpus mittere in gehennam. » « Incredulis, » idest desperatis de hac innovatione, qui scilicet fidem non recipiunt superbi et elati; quod est contra illud, « Beati mites, » mites enim humiliant intellectum in obsequium fidei, secundum consilium Apostoli 2 Cor. 10, 5: « In captivitatem redigentes omnem intellectum in obsequium Christi. » Luc. 18, 14: « Qui se humiliat exaltabitur. » Joan. 3, 18: « Qui non credit jam judicatus est, » quia ut dicit Apostolus (Hebr. 11, 6): « Sine fide impossibile est placere Deo. » « Excaecatis, » idest excommunicatis et derisoribus peccantibus contra illud, « Beati qui lugent etc., » illi enim lugere contemnunt, Eccles. 1, 26: « Exceratio peccantibus sapientia; » et ideo dicebat Psal. 6, 7: « Lavabo per singulas noctes lectum meum, lacrymis meis etc. » « Ego ideireo, » Thren. 1, 16, « plorans et oculus meus deducens aquam. » Luc. 6, 21: « Beati qui nunc fletis. » « Homicidis, » qui scilicet peccant contra jus naturale, et etiam contra justitiam positivam, quia justitiam non diligunt, quod est contra illud, « Beati qui esuriunt et sitiunt justitiam. » Contra quos dicitur Exod. 21, 12: « Qui percussit hominem volens eum occidere, morte moriatur. » 1 Joan. 5, 15, omnis homicida non habet partem in regno Christi et Dei. « Fornicatoribus, » qui scilicet propter amorem carnalium delectationum, seu quarumcumque rerum temporalium, Deum relinquunt. Et hi sunt immisericordes sibi, contra illud « paree animae tuae beneplacens Deo. » Vel etiam quia male acquirunt, vel male expendunt, vel utrumque. Et secundum hoc accipietur hic fornicatio large pro quocumque peccato, per quod homo separatur a Deo. Job 20: « Divitias quas devoravit evomet, et de ventre ejus extrahet eas Deus; » et hoc est contra illud, « Beati misericordes etc. » « Veneficis, » qui verbo et exemplo venenum corruptionis immittunt. Psal. 159, 4: « Acuerunt linguas suas sicut serpentis, venenum aspidum sub labiis eorum. » Psal. 11, 5: « Vana locuti sunt unusquisque ad proximum suum, labia dolosa in corde et corde locuti sunt. » Psal. 61, 5: « Ore suo benedicebant, et corde suo maledicebant. » Matth. 15, 8: « Populus hic labiis me honorat, cor autem eorum longe est a me: » quod est contra istud, « Beati mundo corde. » « Idololatri, » hi sunt qui pacem unitatis Ecclesiae turbant per alienum cultum; contra quos dicitur Exod. 20, 5: « Non habebis Deos alienos coram me. » Et hi etiam qui movent dissensiones et discordias ponunt inter homines. Prov. 6, 16: « Sex sunt quae odit Dominus, et septimum detestatur anima ejus: oculos sublimes, » et postea subdit, « et eum qui seminat inter fratres discordias. » Et talis maledictionem Dei incurrit. Eccl. 28, 5: « Susurro et bilinguis maledicetur. » Et hoc est contra illud, « Beati pacifici etc. Et mendacibus. » Hi sunt qui ne aliquid patiantur mali, parati sunt affirmare et negare, et frequenter cum juramento: contra quos dicitur Sap. 1, 11: « Os quod mentitur occidit animam. » Psal. 5, 7: « Perdes omnes qui loquuntur mendacium: » quod est contra illud, « Beati qui persecutionem patiuntur propter justitiam »



« tiam. » 1 Petr. 5, 14: « Si quid patiemini propter justitiam. » Bene his omnibus sic fiet quod pars illorum erit, sicut supra dictum est, in stagno ardenti igne et sulphure, quod est mors secunda. Et dicitur « pars, » quia unusquisque participabit ibi de poena secundum qualitatem culpae plus vel minus recipiens, quod innuit Psal. 10, 7, dicens: « Ignis, sulphur et spiritus procellarum pars calicis eorum. » Sic ergo Antichristus et homines omnes damnati et daemones cum eorum capite, scilicet diabolo, quem pro capite habuerunt, poenis et cruciatibus deputabuntur aeternis. Et hoc est quod dicitur Apoc. 20, 9: « Et diabolus, qui seducebat eos, missus est in stagnum ignis et sulphuris, ubi et bestia et pseudoprophetae, » id est complices ejus, « et cruciabuntur die ac nocte, » hoc est continue sine interpolatione « in saecula saeculorum, » id est in perpetuum sine fine. Et hoc etiam dicitur Apoc. 14, 11: « Fumus tormentorum eorum ascendet in saecula saeculorum. » Amen. »

Deputato Satana cum omnibus membris suis, scilicet daemonibus et hominibus damnatis, poenis aeternis, et missis in lacum ignis et sulphuris aeternaliter cruciandis, homines glorificati in anima et corpore, et induti nova glorificationis veste, destructo penitus mortalitatis sacco, introducentur in gloriam. Non enim decebat veste mortalitatis indutum in regis gloriae palatium introire. Et ideo homo pulcherrimis vestibus indutus, et totaliter renovatus quantum ad animam et quantum ad corpus, ut dictum est, intrabit beatitudinem indutus etiam nova glorificationis veste. Zach. 5, 3: « Induite mutatoris. » Matth. 21, 25: « Intra in gaudium Domini tui. » Ubi videbunt Sancti Dominum Deum aperte et per essentiam. 1 Cor. 13, 11: « Videmus nunc per speculum etc., tunc autem facie ad faciem. » 1 Joan. 5, 2: « Videbimus enim sicut est. » Joan. 14, 21: « Manifestabo ei meipsum. » Ex cujus visione sancti beatificentur.

Consistit autem beatitudo sanctorum in duobus: scilicet in affluentia omnis boni, et in remotione omnis mali. Affluentia autem omnis boni consistit in quatuor; primo quia sancti habebunt ibi jucundam Christi hominis societatem. Quanta autem erit gloria videre hominis hominem conditorem! ut dicit B. quasi videns Evangelista Joan. Apoc. 21, 3, ait: « Ecce tabernaculum Dei cum hominibus. » Christus enim eadem gloria quam ipse habet, ditabit homines qui eum fuerint imitati. Et notatur quod dicit « tabernaculum: » non quod ibi sit tempus militandi, sed ad significandum familiaritatem quae erit inter homines et Deum; sicut solet esse in hominibus quamdiu simul in tabernaculis et expeditionibus inveniuntur. Isa. 55, 20: « Oculi tui videbunt Jerusalem civitatem opulentam, tabernaculum quod transferri nequaquam potest, nec auferentur clari ejus in sempiternum; quia solummodo ibi magnificus est Deus noster. » Secundo quia habebunt ejusdem gloriae quam ipse habet communitatem firmam et stabilem. Unde subjungit Evangelista ibidem ( Apoc. 21, 3 ): « Et habitabit cum eis. » Immobiliter enim gloriam possidebunt justi. Sicut enim Christus secundum humanam naturam militavit in mundo, et jam est in gloria; ita et justi qui eum imitati sunt, in eadem gloria cum ipso erunt. Joan. 17, 24: « Volo, Pater, ut ubi sum ego, ibi sit et minister meus. »

Luc. 17, 37: « Ubi fuerit corpus, ibi congregabuntur et aquilae. » Tertio, quia non habebunt peccandi potestatem, quod notatur ibi: « et ipsi populus ejus erunt, » in nullo scilicet eum offendentes, quod hic omnino esse non potest. Psal. 94, 5: « Ipse est Dominus Deus noster; nos autem populus ejus etc. » Quarto, quia facie revelata intuebuntur divinitatem, hoc est « quod ibidem subditur: » et ipse Deus cum eis erit eorum Deus. » Etiam et secundum divinitatem existens cum eis principaliter et maxime tunc apparebit quod eorum erit Deus, quia nunquam ab eis de cetero repellatur; nec ipsi peccabunt amplius, propter quod Deus ab eis debebat elongari. Levit. 26, 11: « Propter quod nam tabernaculum meum in medio vestri, et non abjiciet vos anima mea; ambulabo inter vos, et ero Deus vester, vosque eritis mihi populus. » Luc. 12, 57: « Praecinget se et faciet illos discumbere, et transiens ministrabit illis. » Istam gloriam desiderabat Psalmista, cum dicebat: « Sitivit anima mea ad Deum vivum; quando veniam, et apparebo ante faciem Dei? » Et Augustinus 1 lib. Confessionum: fecisti nos, Domine, ad te, et inquietum est cor nostrum donec requiescat in te.

Consistit etiam beatitudo sanctorum in remotione omnis mali. Erit enim ibi affluentia omnis boni sine aliqua miseria, secundum quod dicitur Prov. 1, 53: « Abundantia perfruetur, omnium malorum timore sublato; » quod apertius dicitur Apoc. 21, 4: « Absterget Deus omnem lacrymam ab oculis sanctorum. » Quae scilicet possunt esse quaecumque causa. B. « felices lacrymae, quas manus Conditoris absterget! » Et quia dixit « omnem » subdividit, ostendens, quod solum quatuor modis possunt esse lacrymae, quas omnes absterget. Primo pro necessitate moriendi: quod removet cum dicit « et mors, » id est dissolutio animae et corporis, ultra « non erit. » 1 Cor. 16, 54: « Absorpta est, mors, victoria tua, » quam scilicet habebis in sanctis, qui recepti in aula regia omnes incursus peccatorum et daemonum vicerunt. Isa. 25, 8: « Praecipitabit mortem in sempiternum, et auferet omnem lacrymam Dominus Deus ab omni facie, et opprobrium populi sui auferetur de universa terra. » Secundo pro peccatis propriis vel alienis: quod removet cum dicit, « neque luctu etc. » Isa. 61, 19: « Non audietur ultra in ea vox fletus et vox clamoris. » Tertio pro incolatu ejus: quod removet cum dicit « neque clamor; » aliqua scilicet inquietatio. Isa. 54, 4: « Noli timere, quia non confunderis, neque erubesces; fundabo te sapphyris et ponam jaspidem propugnacula tua. » Isa. 58, 14: « Sustollam te super altitudines terrae, et cibabo te hereditate Jacob patris tui. » Quarto pro desiderio caelestis patriae: quod removet dicens, « neque dolor: » quia sancti ipsam patriam perpetuo possidebunt, nec unquam amittent: Isa. 60, 18: « Non audietur ultra iniquitas in terra tua, vastitas et contritio in terminis tuis; et occupabit salus muros tuos, et portas tuas laudatio. » Et postea sequitur: « Populus tuus omnes justi in perpetuum hereditabunt terram. » De ista terra, scilicet vita aeterna, dicitur in Psal. 26, 15: « Credo videre bona Domini in terra viventium. » De istis quatuor dicitur Isa. 52, 18: « Sedebit populus meus, scilicet semper vivens, quod est contra mortem; in pulchritudine pacis » contra clamorem: Isa. 9,

7: « Et pacis non erit finis »: « in tabernaculis fiducia, » contra luctum: « in requie opulenta, » contra dolorem; « quia prima » scilicet quatuor praedicta, « abierunt » recedentes ab aula regia. Isa. 32, 17: « Et erit pax et cultus justitiae et securitas usque in sempiternum. » Et hoc est argumentum quod non pervenitur ad gloriam nisi per ista, Act. 14, 21: « Per multas tribulationes oportet nos intrare in regnum Dei. » Et ideo pervenientibus ad gloriam illa sunt prima. Eccl. 5, 4: « Tempus flendi » prius in hac vita, « et tempus ridendi » post fletum, scilicet in futura gloria. Vel exponendo secundum Glossam « quia prima abierunt, » quia causa horum, scilicet peccatum, non erit ibi, unde nec ista erunt ibi. Et tunc sic construitur et exponitur ista littera; quia illa recesserunt, quia prima, idest illa quae ad haec sunt priora et antecedentia et causa, abierunt, scilicet peccata. Ibi enim jam homines peccare non poterunt, et ita nec mori nec clamare nec lugere nec dolere: quia tanta erit bonorum affluentia, quod miseriae praesentis saeculi, et molestiae quas sustinuerunt sancti, oblivioni tradentur. Isa. 65, 17: « Non erunt in memoria priora, et non ascendent super cor; sed gaudebitis et exultabitis in sempiternum. » Et ibidem « traditae sunt oblivioni angustiae priores, et absconditae sunt ab oculis nostris. » Et ideo dicitur Psal. 16, 15: « Satiabor cum apparuerit gloria tua. » Dicit autem Augustinus, 20 de civit. Dei, cap. 17: « hoc, scilicet, absterget Deus etc. et post « neque luctus etc. » Nullo modo potest intelligi

de ecclesia militanti, sic inquit: « Quis enim tam « vesanus est, quod audeat affirmare in huiusmodi « mortalitatis aerumnis, non dico populum sanctum, « sed unum aliquem sanctorum, quod hanc vel ducat vel ducturus sit vel duxerit vitam nullas habentem lacrymas vel dolores? Cum potius quanto « est quisque sanctorum, et desiderii justorum plenior, tanto sit ejus morando fletus uberior. » Vel possunt distingui quatuor in praedicta auctoritate. « Absterget Deus etc., » ut supponatur omnis laboris amotio. Apoc. 14, 13: « Amodo jam dicit spiritus « ut requiescant a laboribus suis »: « et mors ultra « non erit, » idest particularis vitae dissolutio, quae fit per quotidianam et continuam perditionem, et fluxum naturae. Sed erit vita indeficiens, permanens et aeterna. Sap. 5, 16: « Justi in perpetuum « vivent ». « Neque luctus » pro conscientia peccati; « neque dolor » pro poena. Isa. 14, 5: « In die « illa cum requiem dederit tibi Dominus a labore « tuo et a concussione tua, et a servitute dura « qua antea servisti; assumes parabolam istam dicens: quomodo cessavit tributum, quievit exactor. » Sic ergo renovati omnes sancti et beatificati coronam regni caelestis accipient cum Christo Filio Dei in perpetuum regnaturi, secundum quod dicitur Dan. 7, 18: « Suscipient regnum sancti Dei altissimi, et obtinebunt regnum usque in saeculum, « et in saecula saeculorum. » Ad quod regnum perducatur nos ipse Filius Dei qui cum Patre et Spiritu sancto vivit et regnat Deus in saecula saeculorum. Amen.





# INDEX

## EORUM QUAE IN HOC VOLUMINE CONTENTA SUNT



### OPUSCULUM XXXVIII. De natura accidentis.

CAP. I. De accidente logico . . . . . pag. 6

### OPUSCULUM XXXIX. De natura generis.

CAP. I.	De ente . . . . .	8
II.	De transcendentibus. . . . .	ib.
III.	De quadruplici divisione entis. . . . .	9
IV.	Quod logicus et metaphysicus circa omnia operantur differenter . . . . .	10
V.	. . . . .	11
VI.	Quod substantiae separatae et materiales non conveniunt nisi in genere logico . . . . .	12
VII.	. . . . .	ib.
VIII.	. . . . .	13
IX.	. . . . .	14
X.	. . . . .	15
XI.	. . . . .	16
XII.	. . . . .	17
XIII.	. . . . .	18
XIV.	. . . . .	ib.
XV.	. . . . .	20
XVI.	. . . . .	21
XVII.	. . . . .	22
XVIII.	. . . . .	23
XIX.	. . . . .	24
XX.	. . . . .	ib.
XXI.	. . . . .	25
XXII.	. . . . .	ib.

### OPUSCULUM XL. De potentiis animae.

CAP. I.	Quot sunt animae, quod gradus viventium, quod genera potentiarum animae. Et primo determinat de vegetativa. . . . .	27
II.	De anima vegetativa, et ejus potentiis . . . . .	28
III.	De potentia sensitiva, et quinque sensibus exterioribus . . . . .	ib.
IV.	De quatuor potentiis sensitivis interioribus secundum eorum naturas . . . . .	29

CAPUT	V. De virtute animalis motiva sensitiva. . . . .	pag. 31
	VI. De potentia intellectiva . . . . .	ib.
	VII. De voluntate et libero arbitrio, quod sunt idem . . . . .	55
	VIII. In quibus potentiis animae est peccatum, et in quibus non . . . . .	ib.

### OPUSCULUM XLI. De tempore.

CAP. I.	Quod tempus habet esse extra materiam. . . . .	55
II.	Quod tempus non est motus, sed aliquid ejus . . . . .	57
III.	Quae sunt illa quae mensurantur tempore, quae non . . . . .	58
IV.	De differentia aeternitatis, aevi et temporis et quid sit unumquodque eorum. . . . .	59

### OPUSCULUM XLII.

De pluralitate formarum . . . . .	41
-----------------------------------	----

### OPUSCULUM XLIII.

De natura syllogismorum . . . . .	50
-----------------------------------	----

### OPUSCULUM XLIV. De totius logicae Aristotelis summa, seu de praedicabilibus, de praedicamentis, de enuntiatione, de syllogismis et de demonstratione.

Prooemium . . . . .	54	
<b>TRACTATUS PRIMUS. De quinque universalibus secundum rem et secundum intentionem logicam, seu de praedicabilibus.</b>		
CAP. I.	Quid sit universale, et quomodo originetur. . . . .	ib.
II.	Quid sit genus, et unde originem habeat. . . . .	55
III.	Quid sit species, et unde sumat originem. . . . .	56
IV.	De origine differentiae; et quid ipsa sit secundum rem et intentionem . . . . .	ib.
V.	De genere generalissimo et subalterno, et quod ens non potest esse genus. . . . .	57

- CAPUT VI. De origine proprii; et quomodo inest omni individuo speciei et semper. pag. 58
- VII. Quod proprium inest soli speciei, et conversim de ipsa praedicatur . . . " 59
- VIII. De origine accidentis, et descriptione ipsius . . . . . " 60
- TRACTATUS SECUNDUS. *De praedicamentis quae genera rerum dicuntur: et primo de praedicamento substantiae.*
- CAP. I. De diversis modis praedicandi. . . . . " 61
- II. Quid sit substantia secundum intentionem logicam . . . . . " 62
- III. De prima et secunda substantia quid sint; et de ordine substantiae . . . . . " 63
- IV. Quod substantia non suscipit contrarietatem, nec magis et minus: licet sit subjectum utriusque per sui mutationem . . . . . " 64
- TRACTATUS TERTIUS. *De praedicamento quantitatis.*
- CAP. I. De numero qui est quantitas discreta . . . . . " 66
- II. De secunda specie quantitatis discretae, scilicet de oratione . . . . . " 67
- III. De quantitate continua in communi secundum logicam intentionem . . . . . " *ib.*
- IV. De quantitate habente positionem, et de requisitis ad ipsam . . . . . " 68
- V. De speciebus quantitatis continuac; et primo de linea . . . . . " *ib.*
- VI. De loco, qui est species quantitatis continuac . . . . . " 69
- VII. De tempore, quomodo est quantitas successiva . . . . . " *ib.*
- VIII. Quod quantitas non suscipit magis nec minus, nec habet contrarietatem; sed secundum eam aliquid dicitur aequale vel inaequale alteri . . . . . " *ib.*
- TRACTATUS QUARTUS. *De praedicamento qualitatis.*
- CAP. I. Quid sit qualitas in genere. . . . . " 70
- II. De prima specie qualitatis, quae est habitus et dispositio . . . . . " *ib.*
- III. De secunda specie qualitatis, quae est naturalis potentia vel impotentia. " 71
- IV. De tertia specie qualitatis, quae est passio vel passibilis qualitas . . . . . " *ib.*
- V. De quarta specie qualitatis, quae est forma, vel circa aliquid constans figura. " 72
- VI. De qualitate et conditionibus ejusdem ex tribus modis ejus . . . . . " *ib.*
- VII. De communitatibus et proprietatibus qualitatis. . . . . " 73
- TRACTATUS QUINTUS. *De praedicamento ad aliquid.*
- CAP. I. Quid sit ad aliquid secundum intentionem logicam . . . . . " *ib.*
- II. De secunda definitione relativorum, quae convenit relativis secundum esse et realibus . . . . . " *ib.*
- III. Quod relatio differt a suo fundamento realitate extrinseca solum . . . . . " 74
- IV. Quod entitas relativorum sumitur a fundamentis. . . . . " *ib.*
- V. De communitatibus et proprietatibus relativorum . . . . . " *ib.*
- CAP. UN. De sex praedicamentis et eorum praedicatione in communi . . . . . " *ib.*
- CAP. I. Quid sit actio secundum rationem praedicamentalem, juxta utramque opinionem. . . . . " 75
- II. Quae actio suscipit magis et minus et contrarietatem, et quae non . . . . . " 76
- III. Quod proprium actionis est ex se inferre passionem . . . . . " *ib.*
- CAP. I. Quid sit passio formaliter, ut est praedicamentum. . . . . " *ib.*
- II. Quod denominatio passionis est formaliter ab intrinseco . . . . . " 77
- CAP. I. De praedicamento Quando, quid sit, quia est tempus ut denominat temporale, seu respectus temporis ad temporalia quae mensurat. . . . . " *ib.*
- II. Quod Quando non est respectus rei mensuratae ad tempus, sed e converso. " 78
- III. Quod Quando non suscipit magis nec minus, nec habet contrarium; et quod Quando est in omni eo quod incipit esse . . . . . " *ib.*
- CAP. I. De praedicamento Ubi, quid sit formaliter, et in quo sit subjective . pag. 79
- II. Quod Ubi non suscipit magis nec minus, nec habet contrarietatem; et quod est in omni corpore terminato superficie . . . . . " *ib.*
- CAP. I. De praedicamento situs, an aliquid sit secundum rationem formalem. . . . . " 80
- II. Quod positio est denominatio seu respectus sumptus a partibus loci ratione partium locati . . . . . " *ib.*
- III. Quod situs non suscipit magis nec minus nec habet contrarietatem: et quod proprium ejus est proxime assistere substantiae . . . . . " 81
- CAP. I. De habitu secundum quod est praedicamentum, quid sit formaliter . . . . . " *ib.*
- II. Quod habitus potest immediate fundari in substantia . . . . . " 82
- III. Quod habitus suscipit magis et minus, licet non omnis; et quod habitus non habet contrarietatem . . . . . " *ib.*
- IV. Quod proprium habitus est existere tam in corpore quam in his quae circa corpus sunt, secundum divisionem partium . . . . . " 85
- TRACTATUS SEXTUS. *De interpretatione, seu enunciatione.*
- CAP. I. De nomine, quid sit secundum intentionem logicam . . . . . " *ib.*
- II. De verbo, quid sit formaliter secundum descriptionem logicam . . . . . " 84
- III. De oratione quid sit, et de speciebus ejus. " 85
- IV. De enunciatione, quid sit; et quid est verum et falsum. . . . . " *ib.*
- V. Quod veritas et falsitas sunt tantum in enunciatione, et quare . . . . . " 86
- VI. De enunciatione categorica et hypothetica, affirmativa et negativa . . . . . " *ib.*
- VII. De quantitate propositionum categoricarum de inesse: scilicet de universalis, particulari, indefinita et singulari. . . . . " 87
- VIII. De oppositione propositionum categoricarum existentium in figura quantum ad enunciationes de inesse . . . . . " 88
- IX. De aequipollentis enunciationum categoricarum de inesse . . . . . " 89
- X. Quomodo enunciationes categoricae de inesse sitae in figura se habent ad veritatem et falsitatem . . . . . " *ib.*
- XI. Quid sit propositio modalis, et de ejus quantitate . . . . . " 90
- XII. De qualitate propositionum modalium quoad affirmationem et negationem . . . . . " 91
- XIII. De oppositione et aequipollentia enunciationum modalium. . . . . " *ib.*
- XIV. De enunciatione hypothetica, et de tribus speciebus ejus . . . . . " 92
- TRACTATUS SEPTIMUS. *De syllogismo simpliciter.*
- CAP. I. Quid sit syllogismus, et quae ad ipsum requiruntur constituendum . . . . . " 93
- II. De conversione propositionum de inesse, et de speciebus ejus. . . . . " 94
- III. De conversionibus propositionum modalium, et differenti modo earum . . . . . " 95
- IV. De syllogismis ostensivis de inesse quoad modum et signum . . . . . " 96
- V. De syllogismis inutilibus in omni figura. " 97
- VI. De syllogismis primae figurae directe concludentibus, et de syllogismis secundae figurae . . . . . " 98
- VII. De syllogismis tertiae figurae, et de reductione omnium syllogismorum ad duos primos modos primae figurae. " 99
- VIII. De syllogismis indirecte concludentibus, et de reductione ipsorum . . . . . " 100
- IX. De inventione medii termini in syllogismis omnium figurarum tam affirmativis quam negativis. . . . . " *ib.*
- X. De differentia syllogismi ad impossibile ab ostensivo . . . . . " 101
- XI. De syllogismis ad impossibile, in quibus modis et in quibus figuris fiant . . . . . " 102

**CAPUT XII.** De syllogismis ad impossibile, qualiter reducuntur ad syllogismos ostensivos. pag. 103

XIII. De syllogismis modalibus, quantum ad propositiones de necessario . . . " *ib.*

XIV. De syllogismis contingentibus . . . " 104

XV. De mixtione contingentis et necessarii in tribus figuris syllogismorum . . . " 106

XVI. De syllogismis conditionalibus ex propositionibus simplicibus . . . " *ib.*

XVII. De syllogismis conditionalibus ex propositionibus hypotheticis compositis. " 107

XVIII. De syllogismis disjunctivis, et de propositionibus reduplicativis, et de conversione per comparationem . . . " 108

**TRACTATUS OCTAVUS. De syllogismo demonstrativo.**

**CAP. I.** De syllogismo demonstrativo quid sit . . . " 109

II. Quid sit dici de omni per se primo, seu universaliter . . . " *ib.*

III. Quod demonstratio procedit ex veris et necessariis . . . " 110

IV. Quod demonstratio procedit ex praemissis in quibus est, per se, et non per accidens . . . " *ib.*

V. Quod demonstratio procedit ex primis et immediatis . . . " *ib.*

VI. Quod demonstratio procedit ex propriis, et non ex extraneis, nec communibus . . . " 111

VII. Quod demonstratio procedit ex per se notis . . . " 112

VIII. Quod demonstratio procedit ex causis conclusionis. . . . . " 113

IX. Quod demonstratio potissima affirmativa fit solum in prima figura, et in primo modo ejus . . . " *ib.*

X. Quod demonstratio potissima negativa debet fieri in secundo modo secundae figurae. . . . . " *ib.*

XI. Quod demonstratio Quia procedit ab effectu ad causam, vel a causis remotis ad effectum. . . . . " 114

XII. Quod in demonstratione aliqua sunt praecognita ante conclusionem, et aliqua sunt cognita postquam demonstrata est. . . . . " 115

XIII. Quod scientia quae est per causam, et quae dicit formam, est certior quam illa quae dicit effectum, et quae dicit materiam. . . . . " 116

XIV. Quod unitas formalis scientiae sumitur ab unitate formali subjecti secundum rationem scibilis . . . . . " *ib.*

**OPUSCULUM XLV.**

De sensu respectu singularium, et intellectu respectu universalium . . . . . " 118

**OPUSCULUM XLVI.**

De inventione medii . . . . . " 119

**OPUSCULUM XLVII.**

De natura luminis . . . . . " 120

**OPUSCULUM XLVIII.**

De natura loci . . . . . " 122

Quomodo ultima sphaera sit in loco. . . . . " 124

**OPUSCULUM XLIX.**

De intellectu et intelligibili . . . . . " 126

**OPUSCULUM L. De universalibus.**

**TRACTATUS PRIMUS.** . . . . . " 128

**TRACTATUS SECUNDUS.** . . . . . " 131

**OPUSCULUM LI. De Venerabili Sacramento Altaris.**

**CAP. I.** De tribus causis institutionis Sacramenti Corporis Christi . . . . . " 135

*S. Th. Opera omnia. V. 17.*

**CAPUT II.** De prima causa institutionis per se, scilicet memoria Salvatoris, et de praeparatione ejus ad iudicium. pag. 136

III. De secunda causa institutionis Sacramenti Eucharistiae. scilicet sacrificio Altaris. . . . . " 138

IV. De tertio circa sacrificium notando, scilicet sacrificii nostri excellentia. . . . . " 139

V. De tertia causa institutionis, qui est cibus hominis . . . . . " 140

VI. De duabus aliis rationibus quibus datur Corpus Christi in cibum . . . . . " 141

VII. De forma donationis, videlicet qua ex causa detur veratum hoc Sacramentum. " 143

VIII. De duabus aliis rationibus, quibus datur corpus veratum . . . . . " 144

IX. De forma donationis, qua datur sub specie panis. . . . . " 145

X. De forma donationis, qua datur sub specie panis triticeo . . . . . " 146

XI. De tribus mirabilibus quae sunt in consecratione . . . . . " 147

XII. De tertio mirabili quod fit in consecratione. " 149

XIII. De tribus mirabilibus quae considerantur in corporis possessione . . . . . " 150

XIV. De tribus mirabilibus in Corporis Christi perceptione. . . . . " 151

XV. De qualitate nostrae praeparationis ad Sacramentum . . . . . " 152

XVI. De praeparatione nostra in tertio, scilicet Agno Paschali . . . . . " 154

XVII. De triplici modo manducandi; et primo de Sacramentali tantum . . . . . " 155

XVIII. De tertio genere indigne manducantium, scilicet de praesumptuosis. . . . . " 156

XIX. De secundo modo manducandi spirituali tantum . . . . . " 158

XX. De tertio modo manducandi, scilicet de Sacramentali et spirituali simul. . . . . " 160

XXI. De duodecim effectibus sive fructibus Corporis Christi contra nostros duodecim languores; et primo de quatuor primis. . . . . " 161

XXII. De quatuor fructibus secundis. . . . . " 162

XXIII. De quatuor fructibus tertiis . . . . . " 165

XXIV. De tribus effectibus principalibus . . . . . " 165

XXV. De effectibus Corporis Christi sumptis ex tribus ejus vocabulis. . . . . " 166

XXVI. De effectibus sumptis ex tribus aliis Corporis Christi vocabulis . . . . . " 167

XXVII. De consideratione Sanguinis Christi tribus modis; et primo de primo ut in cruce funditur. . . . . " 168

XXVIII. De duobus aliis circa pretiositatem Sanguinis Christi notanda . . . . . " 170

XXIX. De consecratione Sanguinis Christi, secundo modo, scilicet ut in Sacramento sumitur. . . . . " 171

XXX. De tertio quod circa Sanguinem Christi quaeritur; et de utilitate Sanguinis digne sumpti . . . . . " 172

XXXI. De consideratione Sanguinis Christi tertio modo, ut a fidelibus spiritualiter sumitur . . . . . " 175

XXXII. De triplici potu Sanguinis Christi . . . . . " 175

**OPUSCULUM LII. De Sacramento Eucharistiae ad modum praedicamentorum.**

**CAP. I.** . . . . . " 177

II. . . . . " 178

III. . . . . " *ib.*

IV. . . . . " 179

V. . . . . " 180

VI. . . . . " *ib.*

VII. . . . . " 181

VIII. . . . . " 182

IX. . . . . " 185

X. . . . . " 184

XI. . . . . " *ib.*



OPUSCULUM LIII. De humanitate Jesu Christi Domini nostri.

ART. I. Prooemium . . . . .	pag. 185
II. De quatuor utilitatibus divinae incarnationis . . . . .	" 190
III. De Sacramento humanae redemptionis . . . . .	" 191
IV. De nativitate Christi . . . . .	" 196
V. De Christi circumcisione . . . . .	" 198
VI. De impositione nominis Christi . . . . .	" 199
VII. De apparitione Christi . . . . .	" <i>ib.</i>
VIII. De oblatione Christi . . . . .	" 200
IX. De baptismo Christi . . . . .	" 201
X. De jejunio Christi . . . . .	" 202
XI. De Christi tentatione . . . . .	" 205
XII. De triplici tentatione: scilicet Dei, hominis, et diaboli . . . . .	" 204
XIII. De Christi conversatione . . . . .	" <i>ib.</i>
XIV. De doctrina Christi . . . . .	" 205
XV. De Christi miraculis . . . . .	" <i>ib.</i>
XVI. De Christi transfiguratione . . . . .	" 206
XVII. De coena Christi . . . . .	" 207
XVIII. De Christi passione . . . . .	" 208
XIX. De morte Christi . . . . .	" 215
XX. De sepultura Christi . . . . .	" 216
XXI. De descensu Christi ad inferos . . . . .	" 218
XXII. De Christi resurrectione . . . . .	" <i>ib.</i>
XXIII. De ascensione Christi . . . . .	" 225
XXIV. Sequitur de secundo adventu . . . . .	" 225
XXV. De ultimo adventu Christi . . . . .	" 228

OPUSCULUM LIV. De dilectione Dei et proximi.

DE DILECTIONE DEI.

CAP. I. Prooemium . . . . .	" 255
II. De duplici dilectione . . . . .	" <i>ib.</i>
III. De tribus concomitantibus dilectionem . . . . .	" 257
IV. De quinque consequentibus dilectionem concupiscentiae . . . . .	" 259
V. De dilectione amicitiae . . . . .	" 240
VI. De triplici exitu scientiae . . . . .	" <i>ib.</i>
VII. De primo exitu . . . . .	" 241
VIII. De secundo exitu . . . . .	" <i>ib.</i>
IX. De naturae conformitate . . . . .	" <i>ib.</i>
X. De praesentialitate . . . . .	" 242
XI. De utilitate . . . . .	" <i>ib.</i>
XII. De amicitate . . . . .	" 245
XIII. De consanguinitate . . . . .	" <i>ib.</i>
XIV. Amandus est Deus propter fidelitatem . . . . .	" 245
XV. De tertio exitu . . . . .	" 246
XVI. De exitu caritatis . . . . .	" <i>ib.</i>
XVII. De augmento caritatis . . . . .	" 247
XVIII. Quomodo diligendus sit Deus . . . . .	" 248
XIX. Quid sit ex toto corde Deum diligere . . . . .	" <i>ib.</i>
XX. Quid sit ex tota anima diligere Deum . . . . .	" 249
XXI. Quid sit diligere ex tota mente . . . . .	" 250
XXII. Quid sit diligere ex totis viribus . . . . .	" <i>ib.</i>
XXIII. Diligendus est Deus ex tota virtute . . . . .	" 251
XXIV. Diligere ex tota fortitudine quid sit . . . . .	" 252
XXV. Quare in via nec Deum videre, nec plane in ipso possumus delectari . . . . .	" <i>ib.</i>
XXVI. De dilectione affectus circa Deum . . . . .	" <i>ib.</i>
XXVII. De diversitate videntium Deum . . . . .	" 255

DE X. GRADIBUS AMORIS SECUNDUM BERNARDUM.

Primus gradus . . . . .	" 254
Secundus gradus . . . . .	" <i>ib.</i>
Tertius gradus . . . . .	" <i>ib.</i>
Quartus gradus . . . . .	" 255
Quintus gradus . . . . .	" <i>ib.</i>
Sextus gradus . . . . .	" <i>ib.</i>
Primus fons . . . . .	" 256
Fons secundus . . . . .	" 258
Fons tertius . . . . .	" <i>ib.</i>
Fons quartus . . . . .	" 259
Fons quintus . . . . .	" <i>ib.</i>
Septimus gradus . . . . .	" 260
Octavus gradus . . . . .	" 261
Nonus gradus . . . . .	" 262
Decimus gradus . . . . .	" 265

DE DILECTIONE PROXIMI.

CAP. I. Prooemium . . . . .	" 265
II. De convenientia duorum mandatorum . . . . .	" 267
III. Quomodo debeat homo seipsum diligere . . . . .	" 268
IV. De multiplici proximitate . . . . .	" 271

CAPUT V. Quomodo diligendus proximus dilectione amicitiae . . . . .	pag. 272
VI. Diligendus est proximus dilectione concupiscentiae . . . . .	" 275
VII. De causis et effectibus dilectionis . . . . .	" 276
VIII. De duplici praecepto affirmativo et negativo . . . . .	" 279
IX. De impedimento caritatis . . . . .	" 280
X. De remediis contra impedientia caritatem . . . . .	" 285
XI. Conclusio . . . . .	" <i>ib.</i>

OPUSCULUM LV. De divinis moribus.

Prologus . . . . .	" 285
Deus immutabilis est . . . . .	" <i>ib.</i>
Bonum Deo placet . . . . .	" <i>ib.</i>
Deus praevidet omnia . . . . .	" 286
Deus patiens est . . . . .	" <i>ib.</i>
Justitia Dei . . . . .	" <i>ib.</i>
Rectitudo Dei . . . . .	" <i>ib.</i>
Patientia Dei . . . . .	" <i>ib.</i>
Liberalitas Dei . . . . .	" <i>ib.</i>
Placabilitas Dei . . . . .	" 287
Misericordia vel sufficientia Dei . . . . .	" <i>ib.</i>
Compassio Dei . . . . .	" <i>ib.</i>
Largitas Dei . . . . .	" <i>ib.</i>
Discretio Dei . . . . .	" 288
Justum iudicium Dei . . . . .	" <i>ib.</i>
Veritas Dei . . . . .	" <i>ib.</i>
Deus non est personarum acceptor . . . . .	" <i>ib.</i>
Cura Dei de creaturis . . . . .	" 289
Aequanimitas Dei . . . . .	" <i>ib.</i>
Deus non quaerit commodum suum . . . . .	" 290
Deus omnia bene fecit . . . . .	" <i>ib.</i>
Benignitas Dei . . . . .	" <i>ib.</i>
Misericordia Dei . . . . .	" <i>ib.</i>
De conformatione animae ad Deum . . . . .	" <i>ib.</i>
Oratio . . . . .	" 291
In omnibus non possumus Deum imitari . . . . .	" <i>ib.</i>

OPUSCULUM LVI. De beatitudine.

Prologus . . . . .	" 292
CAP. I. Primum principale cognitionis per Deum . . . . .	" <i>ib.</i>
Secundum principale cognitionis ad Deum . . . . .	" <i>ib.</i>
Tertium principale cognitionis propter Deum . . . . .	" <i>ib.</i>
II. Primum principale dilectionis per Deum . . . . .	" 295
Secundum principale dilectionis ad Deum . . . . .	" <i>ib.</i>
Tertium principale dilectionis propter Deum . . . . .	" 296
III. Primum principale fruitionis per Deum . . . . .	" 500
Secundum principale fruitionis ad Deum . . . . .	" <i>ib.</i>
Tertium principale fruitionis propter Deum . . . . .	" <i>ib.</i>
IV. Primum principale unionis per Deum . . . . .	" 502
Secundum principale unionis ad Deum . . . . .	" <i>ib.</i>
Tertium principale unionis propter Deum . . . . .	" <i>ib.</i>
V. Primum principale laudis per Deum . . . . .	" 504
Secundum principale laudis ad Deum . . . . .	" <i>ib.</i>
Tertium principale laudis propter Deum . . . . .	" <i>ib.</i>
VI. Primum principale gratiarum actionis per Deum . . . . .	" 505
Secundum principale gratiarum actionis ad Deum . . . . .	" <i>ib.</i>
Tertium principale gratiarum actionis propter Deum . . . . .	" 506
VII. Primum principale congratulationis per Deum . . . . .	" <i>ib.</i>
Secundum principale gratulationis ad Deum . . . . .	" <i>ib.</i>
Tertium principale gratulationis propter Deum . . . . .	" <i>ib.</i>

OPUSCULUM LVII. De modo confitendi et puritate conscientiae.

Prologus . . . . .	" 508
Confessio debet esse pura . . . . .	" <i>ib.</i>
Vera . . . . .	" <i>ib.</i>
Integra . . . . .	" <i>ib.</i>
Locus . . . . .	" 509
Tempus . . . . .	" <i>ib.</i>
Coram quo . . . . .	" <i>ib.</i>
Mora quae contrahitur . . . . .	" <i>ib.</i>

Quoties. . . . .	pag. 509
De motibus vanae gloriae . . . . .	" 510
De inobedientia . . . . .	" 514
De intentione habita in peccatis . . . . .	" <i>ib.</i>
De occasione et causa peccatorum . . . . .	" <i>ib.</i>
Occasionibus quae dantur aliis in peccando . . . . .	" 512
De pollutione . . . . .	" <i>ib.</i>
De causa pollutionis . . . . .	" 515
Utrum propter pollutionem nocturnam sit vitanda sacri altaris perceptio . . . . .	" <i>ib.</i>
De fluxu libidinis . . . . .	" 514
De complacentia habita in memoria peccati . . . . .	" <i>ib.</i>
De tempore mortis . . . . .	" 515
De cogitationibus inhonestis . . . . .	" <i>ib.</i>
De motibus carnis . . . . .	" <i>ib.</i>
De periculo familiaritatis dominarum, vel mulie- rum . . . . .	" 516
De verbis otiosis . . . . .	" 517
De mendacio . . . . .	" 518
De simulatione . . . . .	" <i>ib.</i>
Eruditio utilis ad omnia ista supradicta . . . . .	" <i>ib.</i>
Modus cognoscendi seipsum . . . . .	" 519
Peccatorum origo . . . . .	" <i>ib.</i>
Peccata in Spiritum sanctum . . . . .	" 520
Peccati descriptio . . . . .	" <i>ib.</i>
Confessio, seu humiliatio snipsius . . . . .	" 521

### OPUSCULUM LVIII. De officio sacerdotis.

Prologus . . . . .	" 522
De horis canonicis . . . . .	" <i>ib.</i>
De Sacramentis Ecclesiasticis . . . . .	" 524
De Sacramento Confirmationis . . . . .	" 525
De cautela in confessione habenda . . . . .	" <i>ib.</i>
De Sacramento Eucharistiae . . . . .	" 527
De Sacramento Unctionis . . . . .	" 529
De Sacramento Ordinis . . . . .	" <i>ib.</i>
De Sacramento Matrimonii . . . . .	" 550

### OPUSCULUM LIX. Expositio Missae, quid significant illa quae fiunt ibi.

Prologus . . . . .	" 552
De causa Missae . . . . .	" <i>ib.</i>
De differentia Missae . . . . .	" <i>ib.</i>
De fine Missae . . . . .	" <i>ib.</i>
De virtute Missae . . . . .	" <i>ib.</i>
De ordine crucis in serie canonicis . . . . .	" <i>ib.</i>
Quare ibi ponimus panem, vinum et aquam . . . . .	" <i>ib.</i>
Quare primo tres cruces facimus . . . . .	" 555
Causa quare hoc sacramentum iteretur . . . . .	" <i>ib.</i>
Quomodo bene sumatur . . . . .	" <i>ib.</i>
Quid bene sumptum operetur . . . . .	" <i>ib.</i>
Quare hoc Sacramentum speciebus sit velatum . . . . .	" <i>ib.</i>
Quare secundo facimus quinque cruces . . . . .	" <i>ib.</i>
Quare tertio duas cruces facimus . . . . .	" <i>ib.</i>
Quare quarto fiunt quinque cruces . . . . .	" 554
Quare sacerdos extendit brachia per modum cru- cis . . . . .	" <i>ib.</i>
Alia ratio quare quinque fiant cruces in hoc quar- to ordine . . . . .	" <i>ib.</i>
Quare ponuntur duo ordines Sanctorum novi te- stamenti, primo et quarto ordine, et majores in primo, et plures . . . . .	" <i>ib.</i>
Quare quinto fiunt tres cruces . . . . .	" <i>ib.</i>
Quare est ibi tanta diversitas in crucibus . . . . .	" 555
Quare corpus Christi integrum tunc manu tenea- tur . . . . .	" <i>ib.</i>
Quare oratio dominica dicatur hic . . . . .	" <i>ib.</i>

### OPUSCULUM LX.

De emptione et venditione ad tempus . . . . .	" 556
-----------------------------------------------	-------

### OPUSCULUM LXI.

Epistola exhortatoria ad quemdam, in qua propo- nit idoneum modum salubriter acquirendi scien- tiam sive humanam sive divinam . . . . .	" 558
-----------------------------------------------------------------------------------------------------------------------------------------------	-------

### OPUSCULUM LXII.

In librum Boetii de hebdomadibus, expositio . . . . .	" 559
-------------------------------------------------------	-------

### OPUSCULUM LXIII.

In librum Boetii de Trinitate, expositio . . . . .	pag. 549
----------------------------------------------------	----------

#### QUAESTIO I. De divinarum cognitione.

ART. I. Utrum mens humana ad cognitionem ve- ritati indigeat nova illustratione divinae Incis . . . . .	" 552
II. Utrum mens humana possit ad Dei noti- tiam pervenire . . . . .	" 554
III. Utrum Deus sit primum quod a mente cognoscitur . . . . .	" 555
IV. Utrum ad divinae Trinitatis cognitionem mens humana per naturalem ratio- nem pervenire sufficiat . . . . .	" 557

#### QUAESTIO II. De manifestatione divinae cognitionis.

ART. I. Utrum divina liceat investigando tractare . . . . .	" <i>ib.</i>
II. Utrum de divinis quae fidei subsunt, possit esse scientia . . . . .	" 559
III. Utrum in scientia fidei, quae est de Deo, liceat rationibus physicis uti . . . . .	" 561
IV. Utrum divina sint velanda novis et obscu- ris verbis . . . . .	" 565

#### QUAESTIO III. De his quae pertinent ad cognitio- nem fidei.

ART. I. Utrum humano generi fides sit necessaria . . . . .	" 565
II. Utrum fides sit distinguenda a religione . . . . .	" 567
III. Utrum fides christiana convenienter nomi- netur catholica vel universalis . . . . .	" 569
IV. Utrum haec sit vera confessio, quod Pa- ter et Filius et Spiritus sanctus sunt unus Deus . . . . .	" <i>ib.</i>

#### QUAESTIO IV. De his quae ad causam pluralitatis pertinent.

ART. I. Utrum alteritas sit causa pluralitatis . . . . .	" 572
II. Utrum varietas accidentium faciat diver- sitate secundum numerum . . . . .	" 575
III. Utrum duo corpora possint esse vel in- telligi simul esse in eodem loco . . . . .	" 575
IV. Utrum varietas loci aliquid operetur ad differentiam secundum numerum . . . . .	" 577

#### QUAESTIO V. De divisione speculativae scientiae.

ART. I. Utrum sit conveniens divisio, qua dividi- tur speculativa in has tres partes, naturalem scilicet, mathematicam et divinam . . . . .	" 580
II. Utrum naturalis philosophia sit de his quae sunt in motu et materia . . . . .	" 582
III. Utrum mathematica consideratio sit sine motu et materia . . . . .	" 584
IV. Utrum divina scientia sit de his quae sunt sine materia et motu . . . . .	" 587

#### QUAESTIO VI. De modis quos speculativae scientiae attribuit.

ART. I. Utrum oporteat versari in naturalibus rationabiliter, in mathematicis di- sciplinabiliter, et in divinis intelli- gibiliter . . . . .	" 589
II. Utrum in divinis sit omnino imaginatio relinquenda . . . . .	" 592
III. Utrum intellectus noster possit ipsam di- vinam formam inspicere . . . . .	" 594
IV. Utrum hoc possit per viam alicujus scien- tiae speculativae . . . . .	" 595

### OPUSCULUM LXIV. De vitiis et de virtuti- bus, deque aliis numero quaternario procedentibus.

CAP. I. De speciebus virtutum . . . . .	" 597
II. De his quae rite diversis hominibus con- veniunt: et primo de his quae con- veniunt cuilibet praesidenti . . . . .	" 598
III. De diversitate hominum . . . . .	" 599
IV. De his quae impellunt hominem ad regi- men . . . . .	" <i>ib.</i>
V. De his quae homini grata existunt . . . . .	" <i>ib.</i>
VI. De scientiis utilioribus . . . . .	" 400

OPUSCULUM LXV. De concordantiis, in quo concordat seipsum in passibus apparenter contrariis.

Prooemium . . . . .	pag. 404
Utrum Deus sit subjectum theologiae . . . . .	" <i>ib.</i>
Utrum beatitudo consistat in actu voluntatis vel intellectu, et utrum frui sit actus voluntatis in ordine ad intellectum. . . . .	" 405
Utrum uti sit actus voluntatis . . . . .	" <i>ib.</i>
Utrum actio reflexa differat ab actione secundum rectum: idest, an eadem actione intelligatur intelligibile et ipsum intelligere . . . . .	" <i>ib.</i>
Utrum diversitas rationum quae est in attributis, sit tantum ex parte nostri, sive ex parte rei . . . . .	" <i>ib.</i>
Utrum Deus cognoscatur in patria per speciem suam . . . . .	" <i>ib.</i>
Utrum in una specie non possint multiplicari individua nisi ratione materiae aut potentiae. . . . .	" <i>ib.</i>
Utrum Deum esse unum possit demonstrari ratione et fide teneri . . . . .	" 406
Utrum omnia nobiliori modo sint in causa quam in causato . . . . .	" <i>ib.</i>
Utrum oporteat, quod illud quod sit de nobilitate creaturae, sit de nobilitate creatoris. . . . .	" <i>ib.</i>
Utrum materia multiplicetur per adventum formarum. . . . .	" <i>ib.</i>
Utrum Deum esse sit per se notum . . . . .	" <i>ib.</i>
Utrum memoria sit praeteritorum . . . . .	" <i>ib.</i>
Utrum esse sit accidens. . . . .	" <i>ib.</i>
Utrum potentia sit de genere actionis aut qualitatis . . . . .	" 407
Utrum unus articulus fidei possit probare alium articulum. . . . .	" <i>ib.</i>
Utrum liber de Spiritu et Anima sit Augustini aut alicujus Cisterciensis. . . . .	" <i>ib.</i>
Utrum in Deo sint transcendentia . . . . .	" <i>ib.</i>
Utrum materia individuetur per accidentia, aut per se sit principium individuationis . . . . .	" <i>ib.</i>
Utrum dimensiones interminatae sint in materia, aut materia nuda sine omni forma, possit diversitatem habere . . . . .	" <i>ib.</i>
Utrum in omni materia secundum capacitatem suam perfectio infundatur. . . . .	" 408
Utrum anima sit tota in toto, et in qualibet ejus parte . . . . .	" <i>ib.</i>
Utrum anima uniat corpori mediantibus dispositionibus . . . . .	" <i>ib.</i>
Utrum philosophi divinam naturam cognoscentes, divinam generationem, qua Pater natura generat Filium, cognoverunt. . . . .	" 409
Utrum una pars sit in potentia ad aliam, vel omnes partes sint in potentia respectu totius. . . . .	" <i>ib.</i>
Utrum potentia generandi sit essentia vel proprietas . . . . .	" <i>ib.</i>
Utrum per naturam immutabilitatis et temporis, aut naturam interminabilitatis et etymologiae ipsius nominis perveniatur ad naturam aeternitatis. . . . .	" 410
Utrum Spiritus sanctus per hoc differat a Filio, quia esse ab altero per generationem et esse ab eo per spirationem non possunt uni convenire. . . . .	" <i>ib.</i>
Utrum Pater et Filius sint spiratores Spiritus sancti, aut unus spirator . . . . .	" 411
Utrum caritas pertineat ad praemium essentiale:	

seu utrum beatitudo consistat in actu intellectus vel voluntatis. pag. 411	
Utrum mundum esse perpetuum sit problema neutrum . . . . .	" <i>ib.</i>
Utrum possint esse infinitae animae actu . . . . .	" 412

OPUSCULUM LXVI. De usuris in communi et de usurarum contractibus.

Prooemium . . . . .	" 415
CAP. I. Quid nomine usurae significetur. . . . .	" <i>ib.</i>
II. De materia propria usurae, de speciebus et modis ejus. . . . .	" 414
III. Quomodo in solo actu mutui primo per se accidit usura . . . . .	" 415
IV. Quomodo usura est peccatum mortale secundum legem divinam . . . . .	" 416
V. Quomodo in usura non transfertur dominium secundum legem divinam . . . . .	" 418
VI. Quomodo ratio dubii vel periculi valeat excusare vitium usurae in mutuo et aliis contractibus, et quando . . . . .	" 419
VII. Quomodo ratio dubii vel periculi, valeat excusare hoc vitium, secundum conditiones personales vel reales . . . . .	" 420
VIII. Quomodo vitium usurae incidit in contractibus venditionis et emptionis in communi . . . . .	" <i>ib.</i>
IX. Quomodo in emptione reddituum ad vitam incidat vitium usurae . . . . .	" 422
Quomodo liceat emere redditus ad certum tempus . . . . .	" 426
X. Quomodo est vitium usurae in vendentibus carius propter dilatam solutionem. . . . .	" <i>ib.</i>
XI. Quomodo in his qui committunt mercatoribus pecuniam vel aliam rem pro certa parte lucri, est vitium usurae. . . . .	" 428
XII. Quomodo bona pupillorum licite committantur communitatibus ad lucrum. . . . .	" 429
XIII. Quomodo in commutatione camporia committatur usura . . . . .	" <i>ib.</i>
XIV. Quomodo liceat committere pecuniam eunti ad mundinas, vel res alias ad lucrum . . . . .	" 450
XV. Quomodo et quare est restitutio usurarum facienda . . . . .	" 451
XVI. Quibus restitutiones sunt faciendae . . . . .	" <i>ib.</i>
XVII. A quibus restitutio sit facienda . . . . .	" 452
XVIII. Qualiter restitutiones fieri debent, et quo ordine. . . . .	" <i>ib.</i>
XIX. Quomodo res eadem vel aequivalens restitui debeat . . . . .	" 454
XX. Quomodo usurae fructus et proventus sint restituendi . . . . .	" <i>ib.</i>
XXI. Quomodo et quis cogendus sit ad restitutionem usurarum . . . . .	" 456

OPUSCULUM LXVII.

De quo est, et quod est . . . . .	" 457
-----------------------------------	-------


OPUSCULUM LXVIII.


De adventu et statu et vita Antichristi . . . . .	" 458
---------------------------------------------------	-------

OPUSCULUM LXIX.

De praecambulis ad iudicium et de ipso iudicio et ipsum concomitantibus. . . . .	" 452
----------------------------------------------------------------------------------	-------







BQ  
6822  
1852  
v.17

Thomas,  
... O

Thomas, A.

... Opera omnia.

BQ  
6822•  
1852  
v.17

PONTIFICAL INSTITUTE  
OF MEDIEVAL STUDIES  
59 QUEEN'S PARK  
TORONTO 5, CANADA



